

Anumzamofu Ruotage Avontafere

**The Scriptures in the
Kamano-Kafe language
of Papua New Guinea**

**Sampela hap Buk Baibel
long tokples Kamano-
Kafe long Niugini**



Anumzamofu Ruotage Avontafere

The New Testament with Old Testament portions in the Kamano-Kafe
language of Papua New Guinea
[kbq]

Translation by Wycliffe Bible Translators

New Testament, © 1978, Wycliffe Bible Translators, Inc.

New Testament and Proverbs, © 2014, Wycliffe Bible Translators, Inc.

Web version

© 2014, Wycliffe Bible Translators, Inc.

www.Wycliffe.org

<http://pngscriptures.org>

www.ScriptureEarth.org



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok kliia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>

Sapos yu gat askim long dispela, **plis askim mipela.**

Anumzamofu Ruotage Avontafere

Anumzamofu Monane, Mopane, Mikaza Tro Hu'nea Avontafere.	
Jenesis-Agafa	Jen-Agf 5
Ruti	
Ruti	Rut 90
Proveps-Knare Nomaniza	
Proveps-Knare Nomaniza	Pro 97
Jona	
Jona	Jona. 143
Knare Musenke Matiu kre'nea naneke	
Matiu	Mat 147
Knare Musenke Maki Kre'nea Naneke	
Maki	Mak 214
Knare Musenke Luku Kre'nea Naneke	
Luku	Luk 256
Knare Musenke Joni Kre'nea Naneke	
Joni	Jon 328
Aposol Vahe'mo'kizmi Erizamofu Naneke	
Aposol	Apo 379
Poli'a Romu Vahe Avonkre Zami'nea Naneke	
Romu	Rom. 443
Poli'a Korinti Vahe'mokizmi Ese Avonkrezami'nea Naneke	
1 Korinti	1 Kor 473
Poli'a Korinti Vahe'mokizmi Anante (2) Avonkrezami'nea Naneke	
2 Korinti	2 Kor 501
Poli'a Galesia Vahe'mokizmi Avonkrezami'nea Naneke	
Galesia	Gal 519
Poli'a Efesasi Vahe'mokizmi Avonkrezami'nea Naneke	
Efesasi	Efe 530
Poli'a Filipai Vahe'mokizmi Avonkrezami'nea Naneke	
Filipai	Filp 539
Poli'a Kolosi Vahe'mokizmi Avonkrezami'nea Naneke	
Kolosi	Kol 546
Poli'a Tesalonaika Vahe'mokizmi Ese Avonkrezami'nea Naneke	
1 Tesalonaika	1 Tes 553
Poli'a Tesalonaika Vahe'mokizmi Anante (2) Avonkrezami'nea Naneke	
2 Tesalonaika	2 Tes 559
Poli'a Timoti Ese Avonkre'nea Naneke	
1 Timoti	1 Tim 563
Poli'a Timoti Anante (2) Avonkre'nea Naneke	
2 Timoti	2 Tim 571
Poli'a Taitusi Avonkre'nea Naneke	
Taitusi	Tait 577

Poli'a Filimon Avonkre'mi'nea Naneke		
Falimoni	Fal581
Hibru Vahe Avonkre'zmi'nea Naneke		
Hibru	Hib583
Jemisi Krenea Avontafemofo Naneke		
Jemisi	Jem604
Pita'ma Ese Avonkre'nea Naneke		
1 Pita	1 Pit.612
Pita'ma Anante (2) Avonkre'nea Naneke		
2 Pita	2 Pit.621
Joni'a Ese Avonkre'nea Naneke		
1 Joni	1 Jon626
Joni'a Anante (2) Avonkre'nea Naneke		
2 Joni	2 Jon634
Joni'a Nampa 3 Avonkre'nea Naneke		
3 Joni	3 Jon636
Juti Kre'nea Avontafemofo Naneke		
Juti	Jut638
Revalesen-Hufo Hu'ne		
Revalesen-Hufo Hu'ne	Rev-Huf641

Anumzamo Monane, Mopane, Mikaza Tro Hu'nea Avontafere.

Anumzamo maka'za eri fore hu'nea naneke

1 ¹Ese agafare Anumzamo monane mopane trohu'ne. ²Ama mopama fore osu'nerera, mago zana omnetfa hu'neane. Hankino tusi'a hanimo tina refite'negeno ana timofo agofetura Anumzamomofo Avamumo vono nehiane. ³Anante Anumzamo msa fore hino higeno, msa fore hu'ne!
⁴Anumzamo knare higeno keteno, msane hanine refko hu'ne. ⁵Anumzamo msagura zgegane huno agi'a nemino, kumzukura hanine huno agi'a ami'ne. Hanki hani huno ko'matigeno'a pusa kna (fes de) emente'ne.
⁶Tinke me'negeno Anumzamo huno mago kankamu amu'nompi me'nenno tina refko hanie hu'ne. ⁷Anumzamo tina refkohu fenka netreno hunagamu netreno higeno, kankamu efore hu'ne. ⁸Anumzamo ana kankmumofona agi'a mone huno ante'ne. Hanki, haninkino msa higeno, tare kna (dei tu) emente'ne.
⁹Anante Anumzamo huno, timo'a monamomofo hinkanaga mago kaziga erizogino evnigeno, ho'mu mopa fore hnie huno higeno, anaza efore hu'ne. ¹⁰Anumzamo hagagema hiankazigagura mopa nehuno, tima evazu huno omeri atruma hia tinkura, hagerine huno hu'ne. Anumzamo'ma anazama kegeno'a e'i knare hu'ne.
¹¹Anumzamo amanage huno hu'ne, mopafinti maka'za hagesie. Za'ara zane zafane rumofo rumofo rga'a revava hania zamo hagesie, rga'afina avima'a efore hanie! Hanigeno zafa rgama rente haniana e'i agu'afinka avima'amo'a agri'agna rga rentesie higeno, mopafina ana zantamimo'a efore hu'ne. ¹²Hanki mopamo'a ruzahu ruzahu trazana erifore hanigeno, ruzahu ruzahu ne'zampina avima'a mesie, avima'amo'a agragna rga fore hu'ne. Zafa rgama rentesiana e'i agu'afinka avima'amo'a agri'agna huno me'nenno avima'a rentere hugahie. Hanki Anumzamo'ma kegeno'a knare hu'ne. ¹³Haninkino msa higeno tagufa kna (dei tri) emente'ne.

¹⁴Anumzamo huno tavitamimo'a mona kankamumpi me'nenno, msane haninema refko'ma nehuno, kfugi zgegi ko knagi hanigu mesie. ¹⁵Tavitamimo'a mona kankamumpi fore huno mopamofa remsa hanie higeno fore hu'ne. ¹⁶Anumzamo tusi'a tavi tre tro hu'ne. Rantvi feru kegva hanigu zge trohuno, rankna tavi hanimpi remsa huno kegva hanigu ika tro nehuno, ofunena tro hu'ne. ¹⁷Anumzamo'a ana mona kankamumpi tavitmima ante'neana, e'i mopamofoma msama amisnigure. ¹⁸E'i ana tavi'moza hanine msanema kva hu'ne'za, hanimpintira msa refko hnagure. Anumzamo'ma anazama kegeno'a knare hu'ne. ¹⁹Hagi haninkino msa higeno, taregi taregi (dei 4) kna emente'ne.

²⁰Anante Anumzamo amanage hu'ne, timpina noza zgane, zamasimu nentesnaza zgagfamo'za avite'gahaze. Hanki nmazgamo'za mona kankamumpi hare'za vono hugahaze. ²¹Hanki Anumzamo'a tusinasi zgagfa trohuno hagerimpina zamagri kna zmante'ne. Ana timpina avite'ne'za kaza kaza hu'za vono nehaze. Hanki nmazga zamagri kna huno tro huzmante'ne. Anumzamo anazama keana knare hu'ne. ²²Anumzamo'a asomu ke hunezmanteno amanage hu'ne, kse hakare huta hagerimpi mni titipa hu'za nemnisage'za, nmamo'zanena mopafina kse hakare hu'za mni titipa hiho. ²³Hagi haninkino msa higeno, 5fugna emente'ne.

²⁴Anumzamo amanage huno hu'ne, mopafi zga rumofo rumofo fore hnaze. Kumate zgagfagi mopafi ne'onse zgarmino, trampi afi' zgane rumofo rumofo fore hiho. Anage higeno ana maka fore hu'naze. Ana miko zgagfamo'za zmagragna forehu anante anante hu'naze. ²⁵Hanki Anumzamo'a zgagfa tro hu'neana trampi mani zgagfa zamagri kna tro nehu'no nontegama mani zgagfa zamagri kna tro nehuno mopafi ne'onse zgarmina zamagri kna tro hu'ne. Anazama Anumzamo kegeno'a knare hu'ne. ²⁶Hagi Anumzamo amanage huno hu'ne, vahe tro hamnena tagrikna hu'za manine'za, maka'za kva nehu'za nozamene, nmamo'za hare'za vano nehazane, kumate zgagfane, mopafi kaza nehza zgarami kegva hugahaze.

²⁷Anumzamo vahe'ma tro hu'neana, Agra'agna tro hu'ne. Vene a'ene tro huznante'ne.

²⁸Anumzamo asomu ke huneznanteno amanage huno znasmi'ne, mofavre kse hakare hnankeno, mopa mani vitesaze. Ana nehuta makaza kva hi'o. Timpi nozame zgane, hareno vano nehia nma zgane hakare'a mopafi kaza huno vano nehia zgane ana makaza kva hi'o.

²⁹Anumzamo amanage hu'ne, kma antahi'o! Mopafima nehagea zamofona avima'ane zafa rga'ane nesa'egu tanami'noe. ³⁰Hanki mika ama mopamofa agofetu vonoma nehia zgagfagi, monafima hareno vonoma nehia nma'zgagi, mika zgagfa asimu'ma me'negeno vonoma nehia zgarmina, ruzahu ruzahu traza ne'zama nesazaza Nagra zami'noe

huno higeno fore hu'ne. ³¹Anumzamo mika'za trohuteno keana knare huno hentofa zanke fore higeno keteno, muse hu'ne! Hagi haninkino msa higeno, 6signa emente'ne.

7ni knazupa fore hu'nea zamofa naneke

2 ¹E'inahu huno monane mopane, anampima me'neaza maka trohu vgare'ne. ²Eri'za eri vgareteno, 7ni knarera Anumzamo manigsa hu'ne. ³Anumzamo 7ni knarera manigsa nehuno, ana kna eri ruotge huno asomu hunte'ne. Na'ankure miko'a eri'za eriva reteno manigsa hu'ne.

Anumzamo Vene A'ene Ideni hozafi trohu znante'nea naneke

⁴Ra Anumzamo monane mopane erifore hunte'nea nanekea, amanahu me'ne. ⁵E'i ana knafi za'ara zana fore osu'ne, na'ankure Ra Anumzamo ana knafina kora huntengeno oru'ne. Eri'za eri vahera fore huno omni'negeno, ⁶kampui timo mopafinti hanatino mika mopamofona tina ami'ne. ⁷Ra Anumzamo kugusopa erino regripeno vahe tro huno agonagampi Agra'a asimu'a huhu huvazigeno, vahe fore hu'ne. ⁸Hanki Ra Anumzamo mago hoza zge hanatitega ante'ne. Ideni hoza agu'afina, ana ne'ma trohu'nea nera ana hozafi avreno ome ante'ne. ⁹Ra Anumzamo rumofo rumofo zafa higeno, mopafinti hage'ne. Hakare zafamo'a zamuma kete'ene ne'zanena knare hu'ne. Hagi ana hoza amu'nompi tare zafa me'ne. Mago zafa ofri manivava hu zafe. Hagi magora tamazane havizane antahi zafe. ¹⁰Ideni hozafinti tina enevuno hozafina tina nemino refko huno taregi taregi (4) a ranti enevie. ¹¹Ese'ma evu'nea tinkura, Pison tine huno agi'a ante'ne. Knare koli me'nea mopa Havira rugagino evu'ne. ¹²Ana mopafina knare koline, mna nentake'zane konaririane mizama'amo mreri'nea oniksie nehaza have me'ne. ¹³Anante timofo agi'a Gihon tine. Kusi^a mopafi rugagino evu'nea tine. ¹⁴Anantema taregi magoki (3) timofo agi'a Taigrisie Asiria mopa agentega zge mreneria kaziga evu'ne. Taregi taregi (4) tina Yufretis tine.

¹⁵Hanki Ra Anumzamo ana nera avreno Ideni hozafima ante'neana, hoza eri'zama enerino kvama hanigure huno avrente'ne. ¹⁶Ra Anumzamo kasege hunteno, kagra mika hozafima me'nea zafa rga amne negahananagi, ¹⁷knare'zanki havi'zanki huno antahi zafa rga ono. Hanki kagrama nesnanana tmage hunka frigahane.

Anumzamo A' trohu'nea naneke

¹⁸Ra Anumzamo anage hu'ne, vemo agrake maniazamo'a knare osianki'na, azahu vahera tro hanugeno knare hu'ne tragotene manigaha'e. ¹⁹Mopa kateno mika zgagfane, nmane ne'one zgagfazga tro huzmanteno

^a 2:13 Itopia (Ethiopia) kzigagu hu'ne.

zmareno zamagi antezmisie huno ana nete zamareno vigeno, zamagi'a ante'zmigeno ana zamagima ante'nere me'ne. ²⁰Higeno ana ne'mo mika'ma nontega mni zgagfagi, monafima hareno vonoma nehia nma'zgagi, mopafima maka afi zgagfagi huno zamagi zmi'neanagi, mago agri azahu knampa'a omni'ne. ²¹Ana higeno Ra Anumzamo ve mofona azeri avukoko higeno mse himre'negeno, magoke omete asoza'a avazu huteno, avufanu renknirente'ne. ²²Ra Anumzamo ana ne'mofo asozareti a' trohuno avreno egeno,

²³ ana ne'mo huno, ha e'ine! Nagri zferinane navufareti tro hu'ne, hanki'na are hu'na agi antemue, na'ankure e'i ve'mofo avufafinti erino trohu'ne.

²⁴E'i ana agafare vemo'a nererane nefane atreno, a'ane hagerafino eri mago huke nemni'e. ²⁵Znagra arave huke kena omsi znavufga znavapa manina'anagi, znagazea osu'ne.

Ana vene a'mo'ene Anumzamofa ke rutagrena'a naneke

3 ¹Ra Anumzamo tmage huno maka zgagfa mopafi trohu zamante'nefintira, osifave'mofo antahi'zamo zamagatere'ne, hozafima me'nea zafa rgagura, Anumzamo tmagerfa huno mika one'o huranante'nefi? ²A'mo osifavemofo kenona hu'ne, hozafinti mika zafa rga knare ne'o huno hurante'ne. ³Hu'neanagi mago zafa hoza amunompi me'nea zafa rgagura avako osuta one'o, nesnuta'a frigaha'e huno Anumzamo tasmi'ne. ⁴Osifavemo'a a'mofonkura amanage hu'ne, tanagra ofrigaha'e. ⁵Na'ankure Anumzamo'a keno antahino hu'neankino nesna'ana tanavumo'a hari hina Agri kna hutna antahi antahi tani'amofona eriana hanigetna, knare zanki havi zanki hutna kegaha'e. ⁶Hanki a'mo ana zafa rgama keana nezama ne'amo'a knare higeno, avuma keazamo enena knare hu'neankino, avesizamo'a ana zafa rga'ama mago'mo'ma nesniana knare antahi antahiza erigahie. Hanki ana zafa rga tagino neneno, neve ene mani'negukino amigeno ne'ne. ⁷Netake'no znavumo'a hari hige'ne znavufga znavapa mani'nene, znagazegu nehune zafa (fik) anina anakike kena masina'e.

Anumzamo Adane, Ivikizni hanavege huznante'nea naneke

⁸Kinaga zasi antegeni Anumzamo hozafi ne'egeni agasasanke nentahi'ne hozafi zafa asoka fraki'ne mni'na'e. ⁹Anumzamo'a kezatino vemofonku, iga mni'nane? huno higeno, ¹⁰Hozafi neanke'na kagasasanke nentahi'ne, na'ankure navufga navapa mani'nena koro hu'na fraki'noe. ¹¹Ra Anumzamo huno, iza hugantegenka kavufga kvapara mani'nane? Nagrama ono hu'noa zafa rga'a taginka ne'nampi? ¹²Higeno vemo'a huno Kagrama nami'nana a'mo ana zafa rga tagino neneno namige'na ne'noe. ¹³Anante Ra Anumzamo ana a'ku huno, kagra e'izana naza hu'nane?

Huno antahigegenoa a'mo kenona hu'no, osifavemo renavatga hige'na tagi'na ne'noe. ¹⁴Anumzamo amanage huno osifavemofa asmi'ne,

Osifavemoka e'inama hana nona'a kumate afu'ene, trampia zgagfane mani'nafinti tusi (kes) hugantoe. Kagra zamageterenka rankna erinka kasguregati vano nehunka, kugusopa nenenka mika zupa manigahane.

¹⁵Nagra kagrira kazeri'na a'mofa ha' vahe'a antesugeno, a'mo kagri ha' vahe manigahie. Hanigena Nagra tanagigomokizmi amunopina ha'za antesugeno a'mo ksentesia mofavremo kaseni reprofro vazina, kagra agamerumpafi amprigahane.

¹⁶A'mofonkura amanage hu'ne, Nagra kagrira rama'a kata kamisugenka, ana katafi maninenka mofavrea ksentegahane. Ana nehunka negave avesintenka kva huntegahue hunka hnananagi, agra kagri kegva krigantegahie.

¹⁷Hianagi Adamuna amanage huno asmi'ne, a'kamofa ke antahinka Nagrama kase huganteno'a zafa rga ne'nanku mopamofa tusi huntoe, kata negrinkenka maka zupa hozaka'a enerisankeno nezanka'a fore hinkenka negahane.

¹⁸Hozafina ne'zana ave'ave zane agaso tra'zamo mopafi fore huno refinetena nezana anampinti erinka negahane.

¹⁹Kavugosafinti kamunasisi hute'sigenka nezanka'a erinka negahane. Ana hume vunka kugusopare tro hugante'nogu ete mopafi ufregahane.

²⁰Ana nemo'a nenaro agi'a Ivi'e^b huno ante'ne. Na'ankure mika vahe'mokizmi zamarera'zama hanigure huno antemi'ne. ²¹Hanki Ra Anumzamo'a zgagfa akru'a tavrofeno Adane, Ivigizni kukena masizante'ne. ²²Ra Anumzamo amanage hu'ne, ama ne'mo'a tagi'na huno knare zane havi zanena hago antahi'ne. E'igu manivava hu'mofa zafa rga'a mago'ene tagino nesnuno'a manivava hu'zanku, ²³Ra Anumzamo'a Ideni hozafintira huntengono fegi'a agri'ma tro hu'nea mopare, hoza erizama erisnigu huntengono vu'ne. ²⁴Anumzamo ana ne'ma Ideni hozafinti ahenatigeno vigeno'a, zge hnatitega hanvenentike ankeri zgame tevenefa tagivazu nehia bainati kazimo kagigagi nehuno ana manivava zafa mofona kegva hu'naze.

Kenine Abelikizni naneke

4 ¹Adamu'a Ivi ene mse'geno amu'ene huno ne'mofavre Keni ksenteno, Anumzamo naza hige'na ne'mofavre erifore hue, hu'ne. ²Anante Ivi'a negna Abel ksentene, ana nemo'a ra huno sipisipi afute kva higeno,

^b Ivi'e huno Hibru kefi hu'nea agafa'a hakare zamasi'mu nentaza zgamokizmi nezmarera kua hu'ne

Keni'a mopafi eri'za erino hoza anteno kva hu'ne. ³Mago'agna hunte'nere egeno Keni'a, Ra Anumzamofa ofa hunteku hoza'afinti ne'za erino e'ne. ⁴Ana higeno Abel sipisipi'afinti agusa hunte'nea afutamimpinti mago'a agonesa afu aheni eme kre sramna vuntegeno, Ra Anumzamo negeno Abel antahi so'e hunte'ne. ⁵Hianagi Keni'ma ofa hunte'neaza keteno Ra Anumzamo'a antahi haviza higeno Kenina asi vazigeno avugosa rugririne. ⁶Ana higeno Ra Anumzamo negeno Keninku amanage hu'ne, nahigenka krimpagna nehunka kavugosareti arune giririne? ⁷Hianagi kagra'ma knare'za hnanke'na, Nagra muse hugantegahue. Hanki kagrama havizama hnankeno'a, kumimo'a kazeri kagaterega hianagi kagra hankavetinka mani'nenka kumira azeri agatero.

⁸Keni'a nagana'amofa Abelinku hofa trampu vanu'e huno agi higene vuna'e, ana hofa trampu umanineke Keni'a nagna'amofa Abelina ahe fri'ne. ⁹Henka'a Anumzamo Keni antahigene, negagna Abeli'a inantega manine? Nagra onke'noe, nagra nagnanimofa kva hunte ne' maninofi? ¹⁰Hianagi Ra Anumzamo amanage hu'ne, kagra na'a hu'nane? Nagnakamofa koramo'a mopafi tagi ramineno nagritega krafa hunenamie. ¹¹Ana hanku Nagra ama mopane kagri'enena sifna nehoe. Nagna kamofoma kzampinti ahe'nana koramo'a mopafi tagiramigeno mopamo ne'ne. ¹²Hagi mopafima hozama ante'snana hozamo'a hikzake hugahie. Ana nehina nonka'a omnena mopafi kanke kanke hugahane. ¹³Keni'a amanage huno Ra Anumza'mofonku kenona hu'ne, nagri'ma hunantana kemo'a tusi'a kna navesie! ¹⁴Kma antahio! Kagra ama mopafinti nagrira meni nazeri natranankina, kagri kavurera ohanitigahue. Nagrira noni'a omne'neankina ama mopafi kanke kanke neha'nana aza'o nagesuno'a nahe frigahie. ¹⁵Higeno Ra Anumzamo'a kenona'a asmi'ne, kagri'ma kahesimo'a ana nona'a 7ni'a (7) zupa kna'zana agetereno erigahie. Vahe'mo'ma ohesnigu Kenina mago avame'za agofetu antente'ne. ¹⁶Ana higeno Ra Anumzamofa avatetira Keni'a atreno Ideni hozamofa zge hanati kaziga vuno, Nodi mopare umani'ne.^c

Kenimpinti vahe fore hu'naza naneke

¹⁷Keni'a nenaro'ene masegeno amu'ene huno ne'mofavre ksenteno, agi'a Enoku'e huno ante'ne. Anteteno rankuma erifore huno kiteno ana kumamofa agi'a Enoku'e huno mofavre'a agire asamre'ne. ¹⁸Enoku mofavre agi'a Iradi'e, Iradi'a Mehuzaeli nafa'aza hu'ne. Hagi Mehuzaeli'a Metusael nafa'aza higeno, Metusaeli'a Lemeki nafa'aza hu'ne. ¹⁹Lemeki'a a' tare hu'ne, Pusa a'mofa agi'a Ada'e, mago a'mofa agi'a Zila'e. ²⁰Ada'a ne'mofavre ksenteno agi'a Jabali'e huno ante'ne, fugagi no ki'za nemse'za afu kva nehaza vahe'mokizmi zamageho'e. ²¹Hagi ngana'amofa agi'a Jubali'e. Jubali'a ese agafa huno

^c Nodi ke agafa'a, Hibru kefina kanke kankere hu'ne

nofite zvena (harp) nehaza naga'mokizmi nezmageho'e. ²²Hanki Zila'a Tubalkein ksentene, agra aenima, kopama tevefi krezafino amasagino eri'za tunkno tro nehia nere. Tubalkeini nesaro agi'a Nama'e.

²³Mago zupa Lemeki'a nenaro kiznigura amange huno znasmi'ne, Adagane Zilagta'a kma antahi'o, mago nehza ne'mo kuzafa nahege'na, agrira ete ahe fri'noe.

²⁴Mago ne'mo'ma, Kenima eme ahesuno'a, 7ni'a knazana eri agofetu huno erigahie. Hianagi tmage nagri'ma Lemeki'nama eme nahesnuno'a, 77ni'a knazana agofetu huno nona'a erigahie.

Abel frigeno nona'a mago mofavre Seti ksentene naneke

²⁵Adamu'a nenaro'ene msegeno ne' mofavre ksenteno amange hu'ne, Keni'ma, Abelima ahe'a nona'a Anumzamo'a namie, huno nehuno ana agafare agi'a Seti'e huno antemi'ne. ²⁶Henka'a Setina ne'mofavre fore humigeno agi'a Enosi'e huno antemi'ne. Ana knafi vahemo'za erigafa hu'za Ra Anumzamofa agihanta nevaziza, Agrite mono hunte'naze.

Adamu nagapinti vahe'ma fore hu'naza naneke

5 ¹Adamu naga nofipinti fore hu'naza naneke amanahu hu'ne. Anumzamo'ma vahe'ma trohu'neana, Agra'agna huno trohu'ne.

²Agra vene, a'ene tro huznante'ne. Ana nehuno asomu huzmanteno, vahere huno hu'ne. ³Adamu'a 130ti'a zgegfu manino agra avugosagna ne'mofavre ksenteno, agi'a Seti'e hu'ne. ⁴Ananteti ne' mofara hakare'a kse zamanteteno 800ti'a zgegfu agatereno mani'ne. ⁵Ana maka zgegfu Adamu mani'neana 930ti'a zgegfu maniteno fri'ne.

⁶Hagi Setima 105fu'a zgegfu maniteno ne' mofavre anteno agi'a Enosi'e huno antemi'ne. ⁷Seti'a Enosi ksenteteno ananteti ne'mofa hakare kse zamanteno 807ni'a zgegfu mani'ne. ⁸Ana maka zgegfu'a 912fu'a zgegfu maniteno Seti'a fri'ne.

⁹Enosi 90ti'a zgegfu maniteno ne' mofavre ksenteno agi'a Kenani'e huno antemi'ne. ¹⁰Kenanima ksenteteno'a Enosi'a 815ni'a zgegfu manineno hakare ne'mofa kse zamante'ne. ¹¹Enosi'a 905fu'a zgegfu maniteno fri'ne.

¹²Kenani'a 70ti'a zgegfu maniteno ne' mofavre ksenteno Mahalari'e huno agi'a antemi'ne. ¹³Mahalari ksenteteno Kenani'a 840ti'a zgegfu manino, ne'mofa hakare'a kse zamante'ne. ¹⁴Kenani'a 910ni'a zgegfu maniteno fri'ne.

¹⁵Mahalari'a 65fu'a zgegfu maniteno ne' mofavre anteno agi'a Jareti'e huno antemi'ne. ¹⁶Jaretima ksenteteno, Mahalari'a 830ti'a zgegfu manino mago'a ne'mofara ksezmante'ne. ¹⁷Hanki Mahalari'a 895fu'a zgegfu maniteno fri'ne.

¹⁸Jareti'a 162tu'a zgegfu maniteno ne' anteno agi'a Enoku'e huno antemi'ne. ¹⁹Enoku'ma ksenteteno Jareti'a 800ti'a zgegfu mani'ne ne' mofara ksezmante'ne. ²⁰Jareti'a' 962tu'a zgegfu maniteno fri'ne.

²¹Enoku'a 65fu'a zgegfu maniteno ne' mofavre Metusera ksentene.
²²Ananteti Metuserama ksenteteno'a Enoku'a 300ti'a zgegfufina knare huno Anumzane tragoteno mani'nenone' mofara kse zamante'ne. ²³Hagi ana maka 365fu'a zgegfu Enoku'a mani'ne. ²⁴Enoku Anumzane tragoteno mani'negu, Anumzamo avre'ne. ²⁵Metusera'a 187ni'a zgegfu maniteno ne'mofavre Lemeki ksentene. ²⁶Lemekima ksenteteno'a, Metusera'a mago'ane 782tu'a zgegfu nemnino ne'mofara hakare kse zamante'ne. ²⁷Hagi Metuserama manino'ma e'nea kna'a, 969ni'a zgegfu huteno fri'ne. ²⁸Lemeki'a 182tu'a zgegfu nehuno ne' mofavre ksentene. ²⁹Lemeki'a agi'a Noa'e huno antemi'ne. Ra Anumzamo mopamofu tusi hunte'negeta tusi'a eri'za erita nevunkeno tagri taza hanigu ana mofavre agi'a mani fruhu nere nehuno, zamagra kefina Noa'e huno antemi'ne. ³⁰Hanki Noama ksenteteno'a Lemeki'a 595fu'a zgegfu maniteno mago'ane ne' mofara ksezmente'ne. ³¹Lemeki'a ana maka kna'a, 777ni'a zgegfu maniteno fri'ne. ³²Noa'a 500ti'a zgegfu maniteno ne'mofavre tagufa zamanteno zamagi'a Semi'e, Hamu'e, Jafeti'e huno zamante'ne.

Kefozamo avite'nea naneke

6 ¹Veamo'za ama mopafi vahe kse hakare nehzageno, knare'nare mofa'ne fore huzmi'ne. ²Hanki vahe'mo'ma mofa'ne ksentea mofanezga, Anumzamofu mofavre naga'mo'za ke zamasane hu'za zamesia a'ne eri'naze. ³Ana hianagi Ra Anumzamo amanage hu'ne, vahe'mofompina Avamunimo'a zamagra'neana manivava osugahie. Na'ankure vahera fri'zga mani'naze. Hanki zgegfuma mani'zama vgamarezana, 120ti'a zgegfu manigahaze. ⁴Ana knafine henka'anena tusinasi vahe'mo'za ama mopafina mani'nazankino, Anumzamofu mofavremo'za e'za vahe'mokizmi mofane zgame emsageno mofavre ksezmente'naze. Hankiza fore'ma hzana korapa knafina hankavenentake hihamu'ane vahe fore hu'naze.

⁵Hianagi Ra Anumzamo vahe'mokizmima zamage'neana, mika kna havi avu'avazamo ama mopafina ra huno vahe'mofu antahi antahifina, havi avu ava'zamo aviteno meno vu'ne. ⁶E'ina nehzageno Anumzamo nezmageno rimpa haviza higeno, muse osu'ne. Nahige'na vahera trohu'noe huno asunke nehuno, ⁷hagi Ra Anumzamo'a amanage hu'ne, vahe'ene, zgagfane, nmane, mopafi ne'onse zgarmi'ne zamahe fanane

^d Anumzamofu ne'mofavre ramine huno hu'nea kemofu agafa'a ama' osu'ne. Tgufa antahizana amanahure: 1. Zamagine vahemo'za a' tare tgufa hu'naze. 2. Anumzamo monafinti zamahe nati'nea ankeromo'za mopafi a'ne eri'naze; 3. Seti naga Anumzamofu nevririza nagamo'za, negna ahe fri'nea ne' Keni naga havi avu'ava nehaza nagapinti a'nea eri'naze

hugahue. Nagra tro'ma huzmante'noa zankura nasunku hue. ⁸Ana hu'neanagi Noa'a agrake Ra Anumzamofa avurera fatgo nera mani'negeno muse hunte'ne.

Noa nagamofa naneke

⁹Noa nagamofa naneke amanahu me'ne. Ana knafi mani'naza vahepina Noa'a fatgo huno hazenke'zama'a omne'ne Anumzane tragoteno mani'neni amage anteno vu'ne. ¹⁰Noa'a ne' mofavre tagufa zamanteno zamagi'a Semi'e, Hamu'e, Jafeti'e huno antezmi'ne.

¹¹Ama mopamo'a Anumzamofa avurera haviza hu'ne, ha' zamo'ene, kefo avu'avazamo enena avite'ne. ¹²Anumzamo'ma ama mopafima ke'neana, tmage huno makazamo'a haviza hu'ne, ama mopafi me'neazama keana kumike'za huvare'naze. ¹³Hagi Anumzamo, Noana asmi'ne, ke ontahizageno kefo zamo'a aviteankina zamagri'ene mopazimine zamahe fanane huku Nagra nagesa nentahue. ¹⁴Hagi kagra hhave zafareti vente'a^e trohuo. Asa hutnenka hunaraginto. Timo ufre'zanku agu'ane megianena fukinu renkaniro. ¹⁵Ana ventema kisanana, zanra'a 130 mitagi, kahesa'a 22 mitagi, atrure'a 13 mitagi hunka neginka, ¹⁶anagamu no amumpa tvaonte mago mitamofona agema'a (1/2) mita zasika hageno. Magokaziga kaha hagentenka, ana ventemofa agu'afina ese nonki, anante nonki, agofetu nonki hunka kio.

¹⁷Hagi Nagra ke ha'nenkeno tusi'a ti hageno mopa refitena mani'ne'za zamasimu nentaza zane, mafka'zanena zamahe fanane hugahue. ¹⁸Hu'neanagi kagrane hagerfinogu huvempa hu'na negasmue. Kagrane a'mofavre ka'ane knoferah'e'zane tamagra maka ventefi mrrerigahaze. ¹⁹Hagi rumofa rumofa zgagfama mani'nafintira vene, a'ene zamaretere huge'za kahefa hu'za mani'sagu ventefi mrreriho. ²⁰Zgagfama nma, rumofa rumofa kumate zgane, mopafi ne'onse zgarmine, vene a'ene ksefa hu'za manisnagu kagrite egahaze. ²¹Ana nehunka aru ne'za aru ne'zana, tamagrane zgagfanema nesazazana erinka eme eritru huo. ²²Higeno Anumzamo asmi'neaza huno Noa'a maka'zana tro hu'ne.

Tusi'a ti hage'nea naneke

7 ¹Ra Anumzamo Noanku anage huno asmine, mopafi menima mani'nafintira kagrake fatgo nera mani'nanke'na negagoe. E'igu kagrane nagaka'anena ventefi mrreriho. ²Avima hanagu avusese zgafintira 7ni'a arvere arvere avrentetere huo. Ana nehunka avusese osu zgagfaintira magoke arve avrentetere huo. ³Ana nehunka avima hanagu nma 7ni'a arvere arvere avrentetere huo. ⁴Na'ankure 7ni'a zge manite'na Nagra ke ha'nenkeno ko' rugahie. 40ti'a zgene hanine ko' nerinke'na

^e ark

Nagrama mopafima trohu zamante'noazana maka zamahe fnane hugahue. ⁵Higeno Anumzamo asmi'neaza huno Noa'a mika'zana hu'ne.

⁶Ana knafi Noa'a 600ti'a zgegfu mani'tegenog mopaфина timo'a ahe refitene. ⁷Ko' runaku nehige'za Noa'ene nenaro'ene mofavre zga'ane anoferhe'zane ventefi mreri'naze. ⁸⁻⁹Hagi ne'zga, one'zga, nmane, vene a'ene Anumzamo ke hu'neaza hu'za Noa ventefi ufre'naze. ¹⁰Ana hu'za ufre'za 7ni'a zge mani'tageno ko' erigafa huno ti hageno refite'ne.

¹¹Noa'a 600ti'a zgegfu mani'genog 2 ikana 17tini zupa ana gnare, mopa agusafinti tusi'a ti hage'ne.

Tusi'a ko' ruvava huno

havi avufgafinti hatihati huno

tusi'a ti hage'ne.

¹²Ana nehuno zgene, hanine 40ti'a knafi ruose ko' ruvava huno vu'ne.

¹³Noa'ma ventefi mreria zupa, mofavre naga'a Semiki, Hamuki, Jafeti'ma a'ne zamima nezmarerama hu'za mreri'naze. ¹⁴Trampi zgagfane, kumate zgagfane, nmane, rumofo rumofo mopafi ne'onse zgarminena, vene a'ene tragote'za Noante etere hu'za ventefi ufre'naze. ¹⁵Arvere arvere zamasimu nentaza zgagfamo'za ana maka Noante e'za ventefi ufre'naze. ¹⁶Anante Anumzamo ke hu'neaza huno arvere arvere mika ufre varetageno Ra Anumzamo kafana erigi zamante'ne.

¹⁷Ra ko'ma ru'neana zgene hanine 40ti'a knafi kora ruvava huno tusi'a ti hageno ana ventea mopafinti erisga huno mreri'ne. ¹⁸Ana nehuno timo reviteno mrenerino mopa refitegenog ventemo timofo agofetu vano hu'ne.

¹⁹Hagi timo mago'ene hageno mrerino osi agonane, zaza agonanena mika erinakri vare'ne. ²⁰Hagi timo'a mago'ene mreri aviteno mika mopane mreri agtere'nea agonane 7ni'a mita aru agtereno refite'ne. ²¹Mopafi mani'nea zgarmine, nontega zgagfane, trampi zgagfane, nmane, ne'onse zgarmine, vahe'ene, vanoma nehia zgarminena zamahe fri vare'ne.

²²Hgage mopafi zamasimu eri'za mani'naza zgagfa, maka fri hana hu'naze.

²³Ra Anumzamo vahe'ene, ne'onse zgarmine, nmane, zgagfanena zamahe fanane hige'za omnitfa hu'naze. Higeno Noa'ene ventefi mani'namo'za zamagrake ksefa hu'za mani'naze. ²⁴150ti'a zgegnafi timo'a mopa refite'ne.

Timo taneno urami'nea ke

8 ¹Timo mopa refite'negeno Anumzamo, Noanku'ene mika zgagfanenku ventefi mani'nagenog agha nentahino, zaho atufegenog timo'a taneno urami'ne. ²Anumzamo mopa agusafinti hanati'nea tina renkani nereno, monafinti ko'ma e'nea kora azerigenog ruse'ne. ³150ti'a knamofo agu'afi timo'a akoheno taneno urami'ne. ⁴7ni ikamofona, 17 zupa ana ventemo'a eramino mago Ararati agonarega eme runtrako hu'ne. ⁵Runtrako huno me'negeno timo akoheno nermigenog 10ni ikamofog ese zupa mago agonamo osi'a hanaku hige'za ke'naze.

⁶40ti'a zge manino Noa'a zahoka anagino, mago osa rumpa hunteteno vu'ne. ⁷Hareno vano huno hunoteteno timo'ma uramigeno mopamo ho'mu huteteno umani'ne. ⁸Omegeno Noa'a mago nma maho hunteteno mopamo ho'mu hu'nesigu, ⁹hareno vano hiana manisniazana omneno tinke me'negeno ete e'ne. Egeno Noa'a aza antegame teno ventefi avre vazine. ¹⁰⁻¹¹Avrenteteno 7ni'agna manite'no Noa'a ete hunteteno hareno vu'ne. Olivi zafa asina atasino agipi haninkofino ana kinagage ehanati'ne. Ehanatigeno Noa keteno hago timo'a taneno uramie huno agesa antahi'ne. ¹²Mago'ene 7ni'agna maniteno mago'ene ana maho hunteteno hareno vuteno ete ome'ne. ¹³Noa'ma 601ni'a kfuma nehigeno'a, 1ni ikamofona ese knarera, mika ama mopafina timo'a ho'mu higeno, Noa'a ana ventemofona amumpafinti anasgeno keana, mopamo'a ho'mu huvgare'negeno ke'ne. ¹⁴Anante 2ikamofona 27ni zupa mopamo'a ho'mu huvaregeno Noa ke'ne.

Noa naga ventefinti atirami'naza naneke

¹⁵Anumzamo'a Noana amanage huno asmi'ne, ¹⁶⁻¹⁷kagrane nagaka'anena ventefintira atreta fegi'a atirmiho. Ventefima mani'naza zgagfane, nmane, mika mopafi vano nehaza zgarmine, zamare atrege'za mopafi vu'za eza nehu'za kse hakare hu'za maniho. ¹⁸Anage hige'za Noaki, nenaroki, mofavre naga'ane, anoferhe'zane atiraminaze. ¹⁹Hagi ana zgagfane, ne'onse zgarmine, nma zgane mika vono nehaza zgarmina, zamagrare zamagrare erizogi'za ventefinti atirmi'naze.

²⁰Anantera, Noa'a Ra Anumzamofonte kre sramna vu ita trohuteno, mago'a avusese zgagfafinti ene avusese nmafinti enena aheno mika kre sramna vu'ne. ²¹Kre sramna vu'nea mna'agu Ra Anumzamo muse nehuno amanage Agra hu'ne, vahemo'za kumi hanaza zankura mago'anena ama mopa eri haviza osugahue. Hakare'mo'za nehzanteti mani'za menima e'naza knarera havi antahi'zampi mani'naze. Hakare zgarmima zamasimu nentaza zgarmina menima huaza hu'na zamahe refi oteghue.

²²Ama ana mopa me'nenkeno maka'za me'nena
hoza negri'za, kafigahaze.
Zasi ko netinkeno amuhua hugahie.
Ko' aru knane zgere knane,
zgene hanine,
hanigeno maka'zana vga oregahie.

Anumzamo Noa naga asomu huzmante'nea naneke

9 ¹Anumzamo Noane mofavre naga'ane asomu huzmanteno amanage huno zamasmie'ne, Mofavre kse zamantenke'za ama mopa ruviteho. ²Zafafi zga, timpi zga, nma, kazakaza nehu'za vano nehza zga mika kva hihogu tmi'noankiza tamagoro nehnageta kva hugahaze. ³Ana

zgagfa nesnagu meni neramue. Kotera hagu' kamosa tmi'noana menina maka'zana nesnagu neramue. ⁴Hianagi korama me'nea ame'a onegahaze na'ankure, korampina e'i asimu'a me'ne. ⁵Tmage hu'noe mago ne'mo o, mago'a zgagfamoma tamagri korama eri fegima tesigena, Nagranena agri korana eri fegi atregahue. Mago'mo nefu ahe frisnigena, Ngaranena, agrira ahe frigahue.

⁶Aza'o mago ne'ma ahe frisianana, ana nera ahe frigahaze. Na'ankure Anumzamo'a vahera Agra gna trohu zamante'ne.

⁷Kagrane, kagehe'zane, vahe kse hakare huta miko'a mopafina mani viteho.

Anumzamo Noa'ene hagerfi'nea naneke

⁸Rune Anumzamo Noanku'ene, mofavre naga'aguene amanage huno zamasmine, ⁹Menina antahio, kagrane, nagaka'ane kagehe'zane hagerfita mani'sunegu huvempage nehue. ¹⁰Ana nehu'na zgagfa ventefinti atiramiza mani'naza nmafi, kumate zgafi, trampi zgafi, mika hagerfita manigahune. ¹¹Nagra huvempa ke'ni'a huama nehue, arunena ko' tina atresugeno zamasimu ante'za mani'naza zgarmine, mopane, tina hageno zamahe fanane osugahie. ¹²Anumzamo hu'ne, Nagra amama nehuana huvempa ke nehue, Nagrane, tamagra ene hakare zamasimu eneriza zgarmima tamagrane mani'nazane, henkama fore'ma hnaza vahe'ene amu'nontifi huvempa ke nehuankina, ¹³avame'za monare furagena ante'nanena negeta antahi vava hugahaze. ¹⁴Hampona huntisugeno mopa reganegineno, hagi furagenamo monare fore hugahie. ¹⁵Nagra huvempa ke'niagu ngesa nentahina kagri'ene mopafi hakare zgagfa'nenana mago'enenana tinura tmahe fnane osugahue. ¹⁶Nagra monare'ma furage'na kesu'na huvempa kema zgagfagu'ma hunteno'a kegu nagesa antahigahue. ¹⁷Mopafi vea'ene zgagfane hagerfinogu avame'a e'inahuza fore hugahie, huno furagenaku Anumzamo Noana asmi'ne.

¹⁸Noa mofavre nagama ventefinti atirminazamokizmi zamagi'a Semi'e, Hamu'e Jafeti'e. Hagi Hamu'a Kenani, nefa'e. ¹⁹Noana tagufa mofavre nagapinti mopafima mani'nona vahera, forehu hakare hu'none.

Noa negi ti ne'nea naneke

²⁰Noa'a hoza ne manineno krepini hoza ante'ne. ²¹Mago'zupa waeni tima'a neteno negi neno kena omsi avufga avapa seli noma'afi mse'ne. ²²Kenani nefa Hamu'a ome keana Noa'a avufa avapa mse'negeneno keteno atiramino nempu'amokizni ome znasmine. ²³Ome znasmigene, Semike, Jafetikea tavrave eri'ne znafunte antetene znamigati ana seli nompini vu'ne, neznafa'na ome rufitentena'e. Znavigosa arugziga huntene neznafa avufga onkena'e.

²⁴Hagi Noa'ma negineno mse'nefinti henka ruhri huno negeno Hamu'ma hunte'neazana keno antahino huteno, ²⁵Noa'a amanage hu'ne,

Kenia sifnafi nemanino, afuhemokizmi zamagafinka evu ramino amane eri'za vahe'zmi mani'gahie. ²⁶Hanki Noa'a hu'ne, Semi Anumzamfo ra agi nemita agi'a eri'sga hanune. Kenaniga, Semi kato vahe mani'gahane. ²⁷Anumzamfo, Jafetina, mopa'a erira huntkeno Semi'ene tragotene mani'ne snakeno Kenani'a, Jafeti eri'za vahe manigahie.

²⁸Timo tanetegeneno Noa'a mago'ane 350ti'a zgegfu mani'ne. ²⁹Hagi ana mika zgegfu'a 950ti'a zgegfu Noa'a maniteno fri'ne.

Noa Mofavre naga'mokizmi zamagimfofo naneke

10 ¹Rantima hageno mika'za ahe refitetegeneno'a, Noana tgufa mofavre nagapinti maka'a vahera fore hu'naze. Ana kogna naga zamagi'a Semi'ma, Hamu'ma, Jafeti'e.

Jafeti mofavre naga zamagi'amfofo naneke

²Hanki Jafeti mofavre naga zamagi'a ama'ne, Goma'e, Magogi'e, Madai'e, Javani'e, Tubali'e, Meseki'e, Tirasie'e. ³Hanki, Goma, amohe'i zamagi'a Asikenazi'e, Rifati'e, Togama'e. ⁴Hanki, Javani mofavre naga zamagi'a Elisa'e, Tarsisi'e, Kitimi'e, Dodanimi'e. ⁵Ana nagapintira refko hu'za hagerinkena mopa agerute agerute kognare famote ranra kuma erifore hu'za kva hutere hu'za mani'naze.

Hamu mofavre naga'mokizmi zamagimfofo naneke

⁶Hanki Hamu naga mani'naza mopa agi'a Kusi'e (Etopia), Mizrami (Isipi), Puti'e (Libya), Kenani (Palestine). ⁷Hanki Kusi mofavre naga zamagi'a, Seba'e, Havila'e, Sabta'e, Rama'e, Sabiteka'e. Hanki Rama'a tare ne'mofavre znante'ne, znagi'a Sebake Dedanike. ⁸Kusi'a, Nimiroti nefa'e. Nimiroti'a agra harfa nere. ⁹Anumza'mofo avurera knare harfa vahe fore huno mani'nea nere. E'ina'ma hu'negu menina vahe'mo'za rumofo husga huntkenakura, Nimroti kna vahe mani'ne nehaze. ¹⁰Nimroti kva hu'nea moparera tgufa ra kumara me'ne, zamagi'a, Babelie, Erekie, Akatie, Kalne, e'i ana kumatmina Sainar (Babiloni) mopafi me'ne. ¹¹Nimroti'a Babiloni rankumara atreno, Asiria kaziga vuno rankumazga ome azeri otino ki'ne. Ana kuma zamagi'a Ninive, Rehobotir, Kala, Resenie. ¹²Hanki Reseni rankumara Ninive'ne, Kala kumamofo amu'nompi me'ne. ¹³⁻¹⁴Mizrami'e (Isipi), Ludim (zge hanati kaziga Afrika me'ne), Anamaitis (Afrika magokziga) vahe'mokizmine, Lehabimi'e (Lybians) vahe'ma, Naftuhim (Nile Delta, tihane agupofine) vahe'ma, Patrusim (Isipi) vahe'ma, Kaslu (Isipine Keneni amunompi mani'naze), Kefraits (Kriti ti amunompi nemnize). ¹⁵Kenanina agoneso mofavrea Saidoni'e, hanki Heti'a Kenani negeho'e. ¹⁶Jebusi (Jerusalem), Amorie, Girgase, ¹⁷Hiva, Arkise, Sinie, ¹⁸Arvada, Zemara, ne Hamat, vahe'mokizmi nezmageho'e. Hanki henka'a Kenani, agehe'za mago mago hu'za ru mopare ru mopare

mani'naze. ¹⁹Hanki, Kenani vahe mopamo'a, Saidoni kumateti eri agafa huno Gerari vuno Gaza uhanatiteno, ananteti vuno Sodom Gomora kaziga uhnatino Admati, Zeboim kaziga vuno Lasa uhnati'ne. ²⁰Hamu agehe'za nagate nofite hu'za mani'neza ruzmegeru ruzmegeru neruza rankuma trohu'za kva hutere hu'za mani'naze.

Semi mofavre naga zamagimofa naneke

²¹Semina mago'a ne'mofavre'a fore humi'ne. Jafetina nempu amo'e. Semi'a, Eberi naga zamageho mani'ne. ²²Semi mofavre naga zamagi'a, Elamu'e, Asari'e, Arpaksadi'e Ludiki Aramu'e. ²³Aramu mofavre naga zamagi'a Uzi'e, Huli'e, Getari'e, Masi'e. ²⁴Arpaksadi agra Sela nefa'e, Sela'a Eberi nefa'e. ²⁵Eberi'a tare ne' mofavre znante'ne. Mago'mofa agi'a Peleki'e, Peleki'e, hu'nea kemofo agafa'a amanahure, mopa refko hu'za nagate nofite hu'ne. Hanki nefu agi'a Joktani'e. ²⁶Joktani'ma zamante'nea naga zamagi'a, Almodati'e, Selepi'e, Hazarmaveti'e, Jera'e, ²⁷Hadoramuki, Uzaliki, Dikla'e, ²⁸Obali'e, Abimeleki, Seba'e, ²⁹Ofiriki, Havilaki, Jobabi'e zamagra Joktani mofavre nagare. ³⁰E'i ana naga'ma kuma trohuza mani'naza mopamo'a Mesati agafa huno Sefari zge hnatitega agonare uhanatine.

³¹Amana vahera Semipinti fore hu'naza vahere. Semi agehe'za nagate nofite mago mago hu'za manitere hu'neza zamagerute zamagerute hu'za mopa zamire mani'neza, rankuma trohu'za kva hu'za manitere hu'naze. ³²Tima hagetegeno ana amefi'a Noa ahi'moza mofavre naga'afinti forehu anante anante nehu'za ranra kuma anteza mopafi hakare kaziga manime vu'naze.

Ruzahu ruzahu zamageru ru'naza naneke

11 ¹Ana knafi mopafi mani'naza vahe'mo'za magoke zamageru ru'za magoke kege hu'naze. ²Vahe'mo'za hage'za zge hanatitega nevu'za mago agupo mopa Sainar (Babiloni) ome kete'za, anante kuma ome ante'za mani'naze. ³Mani'ne'za ke hugantugma hute'za enketa havemofa nona'a mopa kateta briki tro huta tevefi kre hanveneti'za, simenimofa nona'a fuki (kolta) eri'naze. ⁴Anante amanage hu'naze, enketa tagrati rankuma trohuta zaza no kita monafi mrisnunkeno, ana nomo'a ra tagi neramino arurega vuta eta hu'zanku tazeri atru hino. ⁵Ra Anumzamo rankuma ene, zaza none, vahe'mo'za ki'naza nonku'ma kenaku erami'ne. ⁶Ra Anumzamo eramino amanage hu'ne, zamagra magoke naga mani'ne'za magoke zamageru neraze. Amazana eri agafa hazankiza, mago'zama hunakuma hnazazana, amne tro hugahaze. ⁷E'i zanku tagra uramita ke'zmi eri svari hamnenke'za, zamagra zamageru ruzanku havia hanaze. ⁸Anage nehuno Ra Anumzamo zamazeri fragu vazige'za kumazimi tro huvga ore'za atre'za hakare'a mopare vu'za e'za hu'za umani'naze. ⁹Ana hu'nea agafare Babelie hu'za hu'naze. Na'ankure Ra

Anumzamo ama mopafi zamageru zamazeri havia huteno, hakare moparega Ra Anumzamo zamazeri atrege'za vu'za e'za hu'naze.

Semi agehe'mokizmi zamagimofa neneke

¹⁰Semi mofavre naga zamagi'a, tima hageteno tare kfu agteregeneno Semi 100ti'a zgegfu huteno Arpaksadi na nefa'za hu'ne. ¹¹Arpaksadi nfa'aza huteno Semi'a 500ti'a zgegfu nehuno ne'mofara mago'ane zamante'ne. (Semi'a 600ti'a zgegfu maniteno fri'ne). ¹²Arpaksadi'a 35fu'a zgegfu huteno Selana nefa'za hu'ne. ¹³Arpaksadi'a Sela nefa'zama huteno'a 403'a zgegfu manineno mago'ane ne'mofara zamante'ne. (Arpaksadi'a 438ti'a zgegfu maniteno fri'ne). ¹⁴Sela'a 30ti'a zgegfu maniteno Eberina nefa'za hu'ne. ¹⁵Sela'a Eberi nefa'za huteno 403'a zgegfu maniteno mago'ane ne'mofara zamante'ne, (Sela'a 433'a zgegfu maniteno fri'ne). ¹⁶Eberi'a 34'a zgegfu maniteno, Pelekina nefa'za hu'ne. ¹⁷Eberi'a Peleki nefaza huteno, 430'a zgegfu maniteno mago'ane ne'mofara zamante'ne, (Eberi'a 464'a zgegfu maniteno fri'ne). ¹⁸Peleki'a 30'a zgegfu maniteno Reuna nefa'za hu'ne. ¹⁹Peleki'ma Reu nefa'za huteno 209ni'a zgegfu manino mago'ane ne'mofara zamante'ne. (Peleki'a 239ni'a zgegfu maniteno fri'ne). ²⁰Reu'a 32'a zgegfu maniteno Seragina nefa'za hu'ne. ²¹Seragima, Reu'a nefa'za huteno 207ni'a zgegfu manineno mago'ane ne'mofara zamante'ne. (Reu'a 239ni'a zgegfu maniteno fri'ne). ²²Seragi'a 30'a zgegfu maniteno Nahona nefa'za hu'ne. ²³Seragi'a Naho nefa'za huteno 200ti'a zgegfu manineno mago'ane ne'mofara zamante'ne. Seragi'a 230'a zgegfu maniteno fri'ne. ²⁴Naho'a 29ni'a zgegfu maniteno Terana nefa'za hu'ne. ²⁵Naho'a, Terana nefa'za huteno 119ni'a zgegfu maniteno mago'ane ne'mofara zamante'ne, (Naho'a 148ti'a zgegfu maniteno fri'ne). ²⁶Tera'ma 70ti'a zgegfu nehuno'a Abrama, Nahone, Harani kizmi nezmafa'za hu'ne.

Tera naga'mofa naneke

²⁷Tera nagara amana hu'ne. Tera'a Abrama, Nahoma, Harani kizmi nezmafa'e. Hagi Harani'a Loti nefa'e. ²⁸Tera'a ofri mani'negeno, Harani'a ksente'naza kumate Ur kaziga Kaldi'a mopare frine. ²⁹Abramu ene Nahokea a' eri'na'e. Hagi Abramam a'mofa agi'a Sarai'e. Naho a'mofa agi'a Milka'e, agra Harani mofare. Milkane Iska kizni neznafa'e. ³⁰Hianagi Sarai'a mofavre onte narvo a' mani'ne.

³¹Tera'a mofavre naga'a Abramum'a, Harani mofavre Loti negehonki, nenofero Sarai Abramum'a nenaronki huno nezmareno Kaldi'a kazigati Ur kumara atre'za Kenani vu'naze. Haran kumate'ma unehnatiza anante umani'naze. ³²Tera'a 205fu'a zgegfu huteno Harani mopare fri'ne.

Anumzamo Abramum'a asmigeno ru kaziga vu'nea naneke

12 ¹Ra Anumzamo Abramum'a asmi'ne, Mopakane, vaheka'ane negfa vahe'enena atrenka Nagra kaveri hanua mopare umanio.

² Nagra kagripinti vahera kazeri ra hanugenka ra kuma tro hugahane. Nagra asomu hunegantena, kagi'a eri ra neha'nena, kagriteti hakare vahe'mo'za asomu erigahaze.

³ Kagri'ma asomu hugantesimofona Nagra asomu hunteguhue. Hianagi aza'o kagrima kazeri haviza hnimofona, Nagra azeri haviza hugahue. Maka mopafi naga'mo'za kagriteti asomu erigahaze.

⁴ Anumzamo ke asmiaza huno Abramua Harani kuma atreno nevigeno Loti'a agrane vu'ne. Abramua 75fu'a zgefufu nehuno Haranitira otino vu'ne. ⁵ Abramua nenaro Saraima, ngana'amofu mofavre agi'a Loti'ma, eri'za vahe'ane, nezmavreno mafka afufenoma'ane enerino Harani atre'za Kenani mopare vu'za, Kenani uhanati'naze. ⁶ Hanki Abramua Kenani mopa amu'nompi rugitgino eva eva huno Sekemu ra oak zafa me'nere More kumate ehnati'ne. Hanki ana knafina Kenani vahe'mo'za anampina mani'nageno, ehanati'ne.

⁷ Ra Anumzamo Abramunte eno amanage huno asmi'ne, ama maka mopa nagaka'a zamigahue, higeno Abramua Ra Anumzante kre sramna vunaku ita tro hu'ne. ⁸ Ananteti atreno agonarega vuno Betel kumara agtereno, Ai zge hanati kaziga megeno Betel kuma zge fre kaziga menegeni amu'nompi seri no ome gi'ne. Hanko no kiteno Ra Anumzanku nentahino have ita tro huno Ra Anumzante agihanta vzino mono hunte'ne. ⁹ Hagi Abramua mago'ene manitere hume vuno vuno Negevi uhanati'ne.

¹⁰ Ana knafina kave omnegeni agate'za fore higeno Abramua Isipi moparega vu'ne, na'ankure tusi'a agate kna fore higeno'e. ¹¹ Isipima vu kofta nehuno nenaro Sarainku amanage huno asmi'ne. Kagema antoana kagra knare soe a' mani'nanankiza, ¹² Isipi vahe'mo'za kagesu'za Agri nenaro'e hu'za nahe fri'za kagrira a' kavre antegahaze. ¹³ E'ina hu'negu, nensaro mani'ne hunka huge'za onahe'za natre'sage'na mani'neni.

¹⁴ Abramua anage huno nehuno Isipi uhanatige'za, Isipi vahe'mo'za Saraina knare a' ke'naze. ¹⁵ Fero eri'za vahe'mo'za Saraina kete'za husga hunte'za Fero asmi'naze, nehu'za ana ara avre'za Fero nompi ome ante'naze. ¹⁶ Fero'a knare huno Abramua kegva hunte'ne, Saraima muse huntea kazigati, nehuno Abramua sipisipima, bulimakaoma, donkima, eri'za vahera vene a'ene, a' donkine kemorine huno ami'ne.

¹⁷ Ana hianagi Ra Anumzamo tusi'a krizga atregeni Feronte ene, noma'afima nemniza vahete'ene e'ne, na'ankure Abramua nenaro Sarainteku e'inhura huzmante'ne. ¹⁸ Fero'a ke higeno Abramua egeni asmi'ne, na'a ama 'zana hunante'nane? Nahigenka Sarai a'ni'a mani'ne hunka onasmi'nane? ¹⁹ Nahigenka nensaro'e hankena ara avre'noe? Ama'ne negnaro'a! Ko avrenka vuo. ²⁰ Fero'a hanve'ane ke vahe'a huzmanteno, Abramua kegva hu'nenkeno nenaro'ene mika afu fenoznia enerine ama mopa atrene vi'o.

13 ¹Isipi mopareti Abramua hakare afufenoma'a enerino nenarone, Lotine neznareno Negev zge hnati kaziga mago asoparega noti kaziga vu'ne. ²Menina Abramua afuzgama, kolima, silvama huno tusi'a feno ne' hampre'ne. ³Hagi msetere hume nevuno, Negev mopare vuno ko'ma mani'nenon hu'nere uhnati'ne. Mago kaziga Beteli kuma me'negeno, mago kaziga Ai kuma amu'nompi uhnati'ne. ⁴Abramua ko'ma have itama tro hunte'nere anante uhnatino, Ra Anumzamofomo mono hunte'ne.

Loti'a Abramua atreno Sodomu vu'nea naneke

⁵Abramue'ne vu'nea nera, Lotina afuzga'ane, noma'ane me'nea nere. ⁶Hianagi ana mopamo'a knarera huoznantene magopima maniana, maka afuzga zniamo'a titipa huno kave nezamo'a upa higeno magote manigara osu'na'e. ⁷Ana nehigeno Abramune, Loti'gizni afu kva vahe'mo'za fravzi'naze. Ana knafina Kenani vahe'ene, Perisi vahe'mo'za ana moparera mani titipa hu'naze. ⁸Abramua, amanage huno Lotina asmi'ne, tagra mago kora mani'noku fra ovazisnue, burimaka afuti'are kva nehza vahe'mo'zanena fra ovazi hnazanki, ⁹rama'a mopa me'neanki kagra kavesite vanuema hnana kaziga vuo, kagrama hoga kaziga vugahue hnanke'na, nagra tamaga kaziga vugahue. Hanki kagrama tamaga kaziga vugahue hnankena, nagra hoga kaziga vugahue. ¹⁰Loti'ma kesga huno kegantugma huno keana, Jordani kokamo'a hakare kaziga masvenke huno Ra Anumzamofomo hoza (Edeni) gna nehuno Isipi mopagna hu'negeno ke'ne, ananteti vuno Zoarima uhnati'neane Sodomu'ne, Gomorane'ma Ra Anumzamomo ahe fnanema osu'nea knafine. ¹¹Anante Loti'a mika Jordani agupoma hunehamprino'a zge hnatitega vu'ne, ananteti naga'ane otre atre hu'na'e. ¹²Abramua Kenani mopare manigeno, Loti'a ranku'ma zga me'nefi Jodani agupofi Sodomu tva'onte seri noma'a omegino mani'ne. ¹³Sodomu vahe'mo'za havi avu'ava ene kumi huhakare nehu'za, Ra Anumzamofomo ha' rente'naze.

Abramua Hebroni kumate vu'nea naneke

¹⁴Loti'ma, Abramua atreno vutegeno, Ra Anumzamomo Abramunku amanage huno asmi'ne, Kesga hunka zge hnatitegane, zge fretegane keganti kegma hunka ko, ¹⁵mika kagri'ene, kagehe'ine tmi vaneroe. ¹⁶Nagra kagehe'ina zamazeri hakare ha'nena ama mopafi ksepankna kugusopa hanige'za, hamprisnimo'a, kagehe'ina ana zanke huno hamprigahie. ¹⁷Hagi otinka vunka enka hunka kamisua mopa agema'a go. ¹⁸Higeno, Abramua otino seri noma'a tagna vzino erino vuno Mamre'a oak'zafa tvaonte Hebroni kumate, Ra Anumzante ita tro hu'ne.

Kini vahe'mokizmi amunompi ra ha' fore hu'nea naneke

14 ¹Mago kaziga mani'naza kva vahe'mokizmi zamagi'a, Amrafeli'a Babiloni kumateti nere. Arioki'a Elasa kumateti nere. Kedolaoma'a

Elami kumateti nere. Tidali'a Goimi kumateti' nere. ²Hagi vu'za ha' ome huzmante'nazana Bera'a Sodomu kumate kini nere. Birs'a'a Gomora kumate kini nere. Sinabu'a Adma kumate kini nere. Semeba'a Zeboimi kumate kini nere. Hagi Bela, kumakura Zoarie nehza kumateti kinie. ³Ana knafi e'i ana kumatera kini vahe'mo'za magopi hagerfi'za Sidimi krahopi mani'naze. Ana kazigagura menia Kragefe Hgerine (Dead Sea), hu'za nehaze. ⁴E'i ana veamo'za 12fu'a zgegufufina Kedolaoma kvafi mani'naze. Hagi 13tinima hiankfufina zamasi vazige'za ke'a antahi omi'naze. ⁵14tinima hiankfufina Kedolaoma ene hagerfiza mani'naza kini vahe'mo'za e'za zamahe anati'naze. Refaim e'i Astero-karnaimi kumate vahe'ene, Zuzim e'i Hami kumate vahe'ene, Emim e'i Save-Kiriataim kumate vahe'ene, ⁶Horaeti vahera zamaririge'za Idomu (Seir agona) mopa zamirega vu'za El-parani zamarotgo hu'za hgage hu'nea kama mopa me'nea tvaonte vu'naze. ⁷Ete rukrahe hu'za ne-e'za, En-mispat (menina Kadesi'e nehune) Amalekaet vahe mopa zamahe'za nehnare'za, Hazazon-tamari nemniza, Amori vahe'ene zamahe. ⁸Anantera Sodomu kinigi, Gomora kinigi, Adma kinigi, anati'naze. Zeboim kinigi, Bela kinine, Belagura menina Zoari huza nehzankino, ana fu'a 5fu'a kini vahe'mo'za eri mago hute'za Sidim agupofi hara hunaku tro hu'naze (Dead Sea). ⁹Sidim agupofima ha'ma hzana, Kedolaoma'a Elami kini neki, Tidali'a Goimi kini neki, Amrafeli'a Sainari kinigi, Arioku'a Elasari kinigi, huza ana 4'a kini vahe'mo'za 5fu'a kini vahe'ene kragefe hagerimofu agupofina hara hu'naze. (Ded Si).

¹⁰Ana agupofi hakare'a keru me'neveno Sodomu kini ne-ene Gomora kini ne'ene ha' vahe'znine koro fre'ne ne'ene kolta kerirami me'nefi tmizageno, mago'a amne mani'nazamo'za fre'za agonarega vu'naze. ¹¹Ha'ma agaterea 4'a kinine ha' vahe'zmimo'za Sodomu kumateti'ene Gomora kumateti'ene mafka'za zimine hozafinti mika ne'za zimine eri'za vu'naze. ¹²Eri'za nevu'za Abram u negna mofavre Lotina Sodomu kumate mani'nege'za nege'za azeri'za afufenoma'ane vu'naze. ¹³Mago ne'mo zamatreno koro freno nevuno, Abram u Hibru ne' ome asmi'ne. Abram u'a Mamre Amorari ne'mofo oak i zafa agafare umani'ne. Mamre'a Eskoline, Anel kizni'a nezna fu kino Abram u ene tragote'naze. ¹⁴Lotima ha' vahe'mo'za avre'za vu'naza naneke Abram u'a nentahino, noma'afima kse zamantege'zama ha'zama rempi huzamige'za antahi'naza vahetmina 318ni'a nezmavreno zamarotgo hu'za vuva vuva hu'za Dani uhanati'naze. ¹⁵Abram u'a eri'za vahe'a kenage zamazeri atru huno refko huzmantege'za nevu'za, ha' vahera zamagatere'za zamarotgo hzage'za Hoba e'i Damaskas kumamofu noti kaziga uhnati'naze. ¹⁶Abram u'a maka fenone, negna mofavre Lotine, maka'zama ane, a'ene vahe ene ha'pinti eri'za vu'naza zana mika eri'za ete e'naze.

Melkizedeki Abramuna asomu hunte'nea naneke (Hivru 7:1-10)

¹⁷Anantera Abram u'a Kedolaoma ene mani'naza kini vahe ha' huzmagatere'ne ete e'ne. Hanki Sodomu kini ne'mo'a Save agupofi

eme agenaku ene, ana agupogura kini vahe'mokizmi agupoe nehaze. ¹⁸Melkizedeki'a Salemi kinigino, bretine, wainine erino eme ami'ne, agra Mrerisa Anumzamofu pris nere. ¹⁹Abramuna amanage huno asomu ke hunte'ne, monane mopane eri fore hu'nea Mrerisa Anumzamo kagrira asomu hugantegahie. ²⁰Mrerisa Anumzamofu ra agi amisune, ha' vahe ka'a kagri kzampima ante'nere. Abramua'na mika zama eri'nefintira refko huno 10ni'a kevu antete'no anampintira mago kevu Melkizedekina ami'ne.

²¹Sodomu kini ne'mo'a Abramunkura amanage hu'ne, mika vahe'zga nenaminka, mika fenona kagraka'a erio. ²²Hianagi Abramua'na Sodomu kini netega amanage hu'ne, monane mopane tro'ma hu'nea Mrerisa Anumzantega nagra huvempage hunte'noankina, ²³nagra kukena hati nofiro, agia anomofu nofira, e'oritfa hugahue. Ru kagra nehunka, Abramuna nagra hugeno feno nera mani'ne hugahane. ²⁴Nagrani'a mago'zana e'orisoanagi, vaheni'amo'zama ko'ma ne'naza ma'age'za erisnue. Hanki nagra nema vu'nazamokizmi atrege'za Aneriki, Eskoliki, Mamreki hu'za mago'a zana zamagra'a erio.

Anumzamo Abramua'na hagerfi'nea naneke

15 ¹Henka'a Ra Anumzamo avanafi amanage huno Abramuna asmi'ne,

Abramua'na koro osunka manio.

Nagra hankoka'agna hu'na mani'noe.

Ana nona'a tusi'a musezampi manigahane.

²Hianagi Abramua'na anage hu'ne, Ra Anumzanimoka hakare'za nenaminankena, mofavre onte'noanki iza anazana erigahie? Frisugeno'a eri'za ne'nimo Eliesa Damaskas kumateti ne'mo erigahie. ³Hagi mofavre onaminankino, noni'afima ksente'nea eri'za vahe'nimo ana afufenoni'a erigahie. ⁴Hu'neanagi Ra Anumzamo huno, a'o! Rumo'a afufenonka'a e'origosie. Kagrifinti'ma fore hanimo afufenonka'a erigahie. ⁵Kesga hunka hanafira ko. Knare hunka hamprigahampi? Ana avamente kagehe'za fore huhakare hu'za manigahaze. ⁶Ra Anumzamo anage huno asmigeno, Abramua'na ana kea nentahino amentinti nehigeno, Anumzamo'a fatgo nere huno Abramunkura hu'ne.

⁷Ra Anumzamo amanage huno Abramuna asmi'ne, Ur kumateti, Karatia vahepinti Nagra Ra Anumzamo'na kavre'na e'onomo'na, ama mopa negamue, ⁸higeno, Abramua'na Tusi'a Mrerisa Anumzamoka, ama mopa kamigahue nehanana, inankna hu'na ke'na antahi'na hugahue? ⁹higeno, Ra Anumzamo amanage huno asmi'ne, Tagufa kafu hu'nesia bulimaka a' anenta afu'ene, tagufa kafu hu'nesia a' anenta meme'ne, tagufa kafu hu'nesia ve lama afu'ene, tare maho nmane, avrenka Nagrite eno. ¹⁰Abramua'na ke hiamana'na aheno egeno rutne tare hugagufeno kanti

kma nenteno nma tga osu aga ante'ne. ¹¹Tumpa nmamo'za kete'za nenaku neage'no Abramua keteno harige'za vu'naze. ¹²Zge ufregeno avukoko higeno Abramua mse himreneno, avanama keana tusi'a hanimo refitente'negeno negeno koro hu'ne. ¹³Ra Anumzamo amanage huno Abramua asmi'ne, Nagra negasmue antahise huo. Kagehe'za ru vahe mopafi umani'nesage'za knara nezmante'za, zgo e'ori kazokzo eri'za 400ti'a zgegufufina erigahaze. ¹⁴Hianagi Nagra ana eri'za eri'zmantesaza kumate vahera keaga huzamante'gahue. Ana amefiga'a zamagrama atiramiza esu'za, rama'a feno eri'za egahaze. ¹⁵Hanki kagra Abramuga so'e zampi mani'nenka ozafa resanke'za asegantésagenka negfa'zane umanigahane. ¹⁶Hanki kagehe'za 4'a zupa vahera forehu anante anante hute'za, ete ama mopa emerigahaze. Amori vahe kumi zamimo zamagri avamentera aviote'ne.

¹⁷Zge fregeno kumzu hani higeno kuma'ane, kavone, anefa tvi'ene fore huno afu rutnenteno refko hunte'nea amunompi nevigeno, Abramua ke'ne. ¹⁸Ana zupage'za Ra Anumzamo Abramua'ene hagerfine manisa'a kea huvempa huno asmi'ne, Ama mopa kagehe'i zamigahue. Isipi tima menereti vuno, Jufretisi rantima me'nea mopa zamigahue. ¹⁹Ana mopare mani'naza vahe'mokizmi zamagi'a, Kenas vahe'ene, Kin vahe'ene, Kadmo vahe'ene, ²⁰Hiti vahe'ene, Peres vahe'ene, Refaemi vahe'ene, ²¹Amori vahe'ene, Keneni vahe'ene, Gilgasa vahe'ene, Jebusi vahe'mokizmi mopa erisanti haregahaze.

Haga Ismael ksente'nea naneke

16 ¹Abramu nenaro agi'a Sarai mofavre onte narvo a' mani'ne. Hagi Izipi mopareti Sarai'a eri'za mofa Haga avrentegeno eri'zama'a enerino mani'ne. ²Sarai'a amanage huno Abramuna asmi'ne, kma antahio. Ra Anumzamo mofavre kuni'a erigige'na mofavre kseontoanki, vunka eri'za a' ni'ane umsegena agripinti mago'a mofavrezga eri fore hunmino huno higeno, Abramua a'amofa kea antahino ana hu'ne. ³Ama anazana Abramua Kenani mopare 10ni'a zgegfu manitegeno, Sarai'a Isipi eri'za mofa'a Hagana neve Abramua nenaroza hanie huno avre ami'ne. ⁴Higeno Abramua Hagana anteno msegeno Haga'ma keno antahino'ma hiana amu'enema nehuno'a, kva'a Saraina ke azanava hu'ne.

⁵Sarai'a amanage huno Abramua kesu'ne, Kagra haviza hu'nankeno eri'za a' mo'a anthi haviza nehuno avesinonante. E'i ana knazamo nagritetira kagrite vugahie. Nagra eri'za a'nia avre kamugenka antenka mse'nankeno amu'ene hu'nenano antahi haviza hunenante. Kagra haviza hu'nampi, Nagra haviza hu'nofi, Ra Anumzamo nerageno refko hurantegahie huno asmi'ne. ⁶Abramu'a, amanage huno Saraina asmi'ne, antahio, knareki miza e'ori kazokzo eri'za a' mani'neanki kagri kvesisiaza hundo huno higeno, Sarai Hagana tusiza huno azanva higeno koro

freno vu'ne. ⁷Freno Suri kumatega nevía kamofo kampui ti me'nere ka'ma mopafi umani'ne. Anante Ra Anumza'mofo ankeromo emegenó amanage huno antahige'ne. ⁸Hagaga Sarai eri'za a'moka igati ne-enka iga nevane? huno higeno, Saraima eri'zama'a enerua a'mofo kvafinti fre'na e'noe huno asmi'ne, ⁹Ra Anumzamófo ankeromo asmi'ne, Rukrahe hunka vunka, umaninénka ke'amófo amage anténka eri'zama'a omerinto, ¹⁰huno nehuno, Nagra kazeri ra ha'nena kagehe'za ohampriga vahe fore hugahaze hu'ne.

¹¹ Ra Anumzamófo ankeromo mago'ene huno ne' mofavre ksénténka ana mofavre agi'a Ismaeli'e hunka antegahane.^f
Kna kve nesigenka ke hánkeno
Anumzamo antahi'negu

¹² Hagi mofavre ka'amo ra hunteno
afi' donki afu kna huno manigahie.
Mika vahe nezmahénke'za agrira ahégahaze.
Afu agna'zanena omnigosie huno asami'ne.

¹³ Hanki Haga'a ke humia Ra Anumzamófo agi neheno amanage hu'ne, Kagra nenagana Anumzane, na'ankure nagra kagoanagi ofri mani'noe.

¹⁴ Ana hunegu ana tinkérimofo agi'a Bir Lahai Roi'e (ksefa huno nemnino nenagea Anumzamófo tine) Beretine, Kadesine amunoznifi me'nea tinkeri'e.

¹⁵ Hanki Haga'a ne' kséntégeno, Abramú ana mofavre agi'a Ismaeli'e, huno ante'ne. ¹⁶ Abramú'a 86'a zgefú manitégeno Ismaelina, Haga'a ksente'ne.

Abramu'a ksefa agi eri'nea naneke

17 ¹ Abramú'a 99ni'a zgefú higeno, Ra Anumzamo agrite efore huno amanage huno asmi'ne, Nagra Hihamu'ane Anumzamó'na negasmue. Nagri namagenéntanku fatgo avu'ava hunka manio. ² Hanki Nagri huvempa keni'amo'a amu'nonti'afi me'nena, Nagra kagripinti vahera zamazeri hakare hugahue.

³ Abramú arena areno avugosaregati msenégeno, Anumzamo mago'ene amanage huno asmi'ne, ⁴ Nagra kagrane hagerfine'na amanahu hugahue, Nagra hanénke'za kagripinti hakare kokantega kuma ante'za mani avitesnagenka nfazmi'za hugahane. ⁵ Abramuge huza mago'ene kagia ohégahaze. Menina Abrahamuge hu'za hugahaze. Na'ankure kagra hakare'a veamokizmi nfazamiza hugahane. ⁶ Nagra hanúgeno, kagripinti hakare'a vahe fore nehanágeno, kini vahera fore hugahaze. ⁷ Hankina Nagra amunonti'afi huvempage hu'na, kagehe'mokizmine, kagigomo kizmine, kamefiga fore hania vahe'enena ama ana mevava huvempa

^f Ana agimofo agafa'a Anumzamo keti'a nentahie, huno agi ante'ne.

kemo'a, kagri'ene henka'a fore hnaza vahe'enena, Nagra Anumzantami manigahue. ⁸Kagri ene, kagehe'ine, henka fore hanamokizmine hageta emani'naza mopa, Kenani mopa tmivaneroe, ana mopamo tamagriza seno mevava nehina, Nagra Anumzantami manigahue.

Venenemofa agoza anoma'a tga hnia naneke

⁹Anumzamo'a mago ene amanage huno Abrahamunku asmine, kagrane mofavrezga ka'ane kse anante anante hnamozanena huvempa ke'ni'a amage anteho. ¹⁰Hagerfi'nonku amanahu hugahaze, Ne' mofavretmia mika zamagozamofa amega anoma'a tga hutregahaze. Henka'ane fore hu' anante anante huza ehanatinamo'zane ana zanke hugahaze. ¹¹Abrahamuga, Negrane hagerfi'namofa avame'a, kagozamofa amega noma'a tga hutro. ¹²Ne' mofavre'ma ksentesamokizmia 8ti'a zge gnare, knane knane henka fore hnaza mofavre zamufga tga hugahaze. Nonka'afima eri'za vahe'mo'ma ksentesia vahe'pinti ene zgoreti'ma miza sesana vahe aruregati e'nesia vahe'ene, zamufa tga huzmantegahaze. ¹³Kato vahe'mo'za kagri nompki ksente'nesazampi, miza hu'nana vahe'mo'zafi, zamagozamofa amega anoma'a tga hugahaze. E'ina nehu'za Negrane hagerfi'nagu zamufgare avame'za mevava hugahie. ¹⁴Hagi avufga tga osnimo'a, Negrane hagerfinoa ke ruhantingegu Nagri nagapintira afu'agna atreno agra ru vahe manigahie.

Anumzamo Saranku mofavre antegahane huno asmi'nea naneke

¹⁵Hanki Anumzamo Abrahamu asmi'ne, kotera negnarona Sarai'e hu'nane hagi menina ksefa agi'a Sera'e hugahane. ¹⁶Nagra Serana asomu huntisugeno, agra mofavre eri fore hunegamina, asomu huntanena hakare'mokizmi antazmiza nehnigeno, agripinti kini vahera fore hugahaze. ¹⁷Anumzamo anage huno nesmigeno, Abrahamu rena reno kepri huno agu'afi kiza rene, Nagra 100ti'a zgegfu hugeno Sera'a 90ti'a zgegfu higeta, ko' ozafa tvava re'noanki, inankna huta mofavre ksente'nenaku nehukeno nehie? ¹⁸Abrahamu'a, Anumzamofonku amanage hu'ne, knare Ismaeli'a kavure mani'neni asomura erigahie! ¹⁹Hianagi Anumzamo'a amanage hu'ne, a'o tamage huno negnaro Sera'a mofavre kasentesigenka, agi'a Aisaki'e hunka antegahane. Nagra huvempa ke'ni'a agrite ene, agripinti henka'a fore hanaza vahepine mevava hugahie. ²⁰Ismaeli kaziga antahigamuanki antahio! Nagra asomu huntisugeno fore huhakare nehuno rama'a vahe fore hu'za manigahaze. ¹²fu'a kva vahe'mokizmi nezmafaza hugahie. Nagra agehemokizmine zamazeri hanvetisuge'za hanvenentake vahe manigahaze. ²¹Hianagi Nagra huvempa ke'ni'a Serama ksentesia mofavre Aisaki ene huama hugahue. Ama ana knare anaga'a kafufi ksente'gahie. ²²Anumzamo anage huno Abrahamu asmiteno atreno vu'ne.

²³Abrahamu'a Ismaeline, kato vahe'a mokizmine zamazerino zamagoza noma'a tga huvigare zamante'ne. Agri nompî ksentene'ne kato vahe'ane, ru mopareti miza se'nea kato vahe'ane mafka'a tga hu'ne. Anumzamo asmiaza huno ana zupage'za tga hu'ne. ²⁴Abrahamu'a 99ni'a zgegfu manino ozafa reteno avufga tga hu'ne. ²⁵Hanki Ismaeli 13ni'a zgegfu nehazave seno manigeno avufga tga hu'ne. ²⁶E'i ana zupage Abrahamune, Ismaelikizni znavufga tga huznante'ne. ²⁷Miko eri'za vahe'ane, mofavrezimi agrane nemniza ksentene'ne, arurega vahe zgoreti miza sezmantene'a vahe'ene ana mika zamufa ano tga hu'naze.

Anumzamo Seranku ne'mofavre ksentegahie hu'nea nanke

18 ¹Abrahamu'a zgemo tusi amuho higeno Mamrea oak zafa agafare seri noma'a kasante mani'negeno, Ra Anumzamo anante ehnati'ne. ²Seri noma'a kasante mani'nereti kesga huno keana, taregi magoki vahe oti'nageno keteno, aga reno viazamo zamagafi'ome arena arena kepri huno, ³anage hu'ne, Ranimoka nagrama knare nehanugenka musema nehusunka, eri'za vaheka'a maninogu muse (plis) hugantoanki nagaterenka e'ovuo! ⁴Muse (plis) hurmantoanki mani'nenkena osia tina afi'za eme tamina tamaga sese hugahazanki ama zafa agafare manigsa hiho. ⁵Ana nehanage'na osi'a ne'za uri'na eme taminena neneta manifru huteta kama vnarega vugahaze. Eri'za vahekamona noni'a kasante nantu ante nante'nagu ne'zana neteta vugahaze higeno, knareki kema hanaza huo hu'za hu'naze.

⁶Anage hzageno Abrahamu'a noma'afi mrrerino nenaro Sera asmi'no knare hu'nesnia flaua tgufa kevu urinka brete eme tro hunka kro, ⁷nehuno Abrahamu'a agareno vuno bulimaka'afinti anenta afu ome aheni eri'za vahe'a eme amigeno, hantka huno erino ome kre'ne. ⁸Abrahamu'a meme'mofo ami rima'a tagino eme ante nezmanteno, hagi ko'ma kragefe'neama'a erino, kaone eme ante zamanteno tva'onte zafa agafare otino mani'nege'za ne'naze.

⁹Nene'za mani'ne'za Abrahamuna amanage hu'za antahige'naze, Negnaro Sera iga mani'ne? Hazageno ami seri nompî mani'ne huno hu'ne. ¹⁰Mago'mo amanage huno hu'ne, henka'a ama ana knare'ma esnuana negnaro Sera'a ne' mofavre kasentegahie. Huno nehigeno agu'afi Sera'a seri no kasama'are mani'neni ana ke antahi'ne. ¹¹Abrahamuke ozafa tvava rakeno, kafu zaimo agaterege'ne, Sera'a mofavre antega osu'negeno avufgamo ampasgigeno mani'ne. ¹²Sera ana ke nentahino agu'afi kiza nereno amanage huno agesa antahi'ne, nagrane ranimo enena ozafa tvava renoanki, inankna huno mofavre fore hunaminogu nehie? ¹³Ra Anumzamo Abrahamuna antahige'ne, Nahigeno Sera'a kiza nereno, tvavamo'na mofavre ksenteku hugeno nehie? ¹⁴Nazamo Ra Anumzamofona amuho huntegahie? Ete esanua knarera, ama ana knare

anaga'a kfufina Sera'a ne' mofavre ksentegahie. ¹⁵Sera'a amano vazigeno havige huno, a'o kiza ore nogenka nehane huno higeno, Anumzamo huno a'o kagra kiza re'nane huno hu'ne.

**Abrahamu Sodom Gomora kumate vaheku
Anumzamofu antahige'nea naneke**

¹⁶Ana tagufa vahe'mo'za oti'za vunaku nehu'za Sodomu kuma me'nea kaziga zamurga negageno (Abrahamu kantega ome zamatreteno enaku nevigeno), ¹⁷Ra Anumzamo amanage hu'ne, menima hunaku'ma nehuazana Abrahamu avurera fraki snufi? ¹⁸Tamage huno Abrahamumpinti tusi'a hanvenentake vahe fore hu'za kuma ante'za manigahaze, ama mopafina mika kumate vahe'mo'za agripinti asomura erigahazanki, ¹⁹Nagra maka vahepinti Abrahamuna agi hu'na Mofavre'ane, agehe'ine, avempage huzmasamina fatgo hu'za nemniza knare'zanke nehu'za Ra Anumzamofu kante vnazegu huhampri'noe. Hagi Ra Anumzamo'na huvempa hu'noa ke'mofu avufga'a fore hanigu Abrahamuna huhampri'noe. ²⁰Anantera Ra Anumzamo amanage hu'ne, Sodom Gomora vahe'mokizmi tusi'a kumizmimofu kezanke antahue, hankino kumi'zmimo'a tusi'a zampi mreri'ne. ²¹E'ina hu'nagu Nagra menina urami'na ome kena antahina hanue. Zamagenke'a antahi'nomofu vu'na ome zamage'na antahi'nue, huno hu'ne.

²²Anage nehige'ne tare netre moke rukrahe hu'ne Sodomu kaziga vu'na'e. Nevakeno Abrahamu'a anante Ra Anumzane oti'ne. ²³Abrahamu'a egofta huno Ra Anumzamofu antahige'ne, Ana kumapina fatgo vahe'ene, hazenke vahe'ene mani'nazana ana maka zamahe fanane hugahano? ²⁴50ti'a ana kumate fatgo vahe mani'nesazana, ana 50ti'a fatgo vaheku zamahoke henka ana kumara zamahe fnane osugahano? ²⁵E'i kagri kavu kvara omne'ne, havi vahe'ene, ftago vahe'enema ahe fnane hankeno, havi vahe'ene, fatgo vahe'ene mago'zahu knazana e'origahaze. Mika mopafi vahe'mota refko nehana nemoka mago'zanke hunka refko nehane. ²⁶Hankino, Anumzamo amanage hu'ne, Nagra'ma kesugenoma 50ti'a fatgo vahe'ma Sodomu ran kumapima mani'nesazana ana mika rankumara zamagriku hu'na zamahe fanane osugahue. ²⁷Anante Abrahamu antahige'ne, Nagra kugupage hu'na tanefake vahe'mo'na Ra Anumzamokane naneke nehue. ²⁸Hanki 50ti'a fatgo vahe mani'nesafinti 5fu'a omnisagenka knare ama ana mika rankumara zmazeri havizana hugahampi? Higeno ete ke nona'a huno amanage hu'ne, kesugenoma 45fu'a fatgo vahe'ma mani'nesage'na Nagra zmazeri haviza osugahue. ²⁹Abrahamu mago'ene antahige'no, 40ti'a fatgo vahe maninesagenka knare zamahe fanane hugahano? Higeno ete ke nona'a huno amanage hu'ne, kesugenoma 40ti'a fatgo vahe'ma mani'nesage'na Nagra zmazeri haviza osugahue. ³⁰Abrahamu mago'ene amanage hu'ne, Ra Anumzamoka krimpa aheonanto arune, ke hugahuanki 30ti'a fatgo vahe

mani'nesagenka knare zamazeri havizana hugahano? Higeno ete ke nona'a huno amanage hu'ne, Kesugenoma 30ti'a fatgo vahe'ma mani'nesage'na Nagra zamazeri haviza osugahue. ³¹Abrahamu mago'ene hanve e'nerino Ra Anumzamofa antahige'ne, 20ti'a vahe mani'nesagenka knare zamahe fanane hugahano? Higeno ke nona'a huno amanage hu'ne, kesugenoma 20ti'a vahe'ma mani'nesage'na Nagra zamazeri haviza osugahue.

³²Abrahamu anage hu'ne, Ra Anumzamoka krimpa aheonanto, magoke zupa kantahigegahue, 10ni'a vahe mani'nesagenka knare zamahe fanane hugahano? Higeno ete ke nona'a huno amanage hu'ne, kesugenoma 10ni'a fatgo vahe'ma mani'nesage'na Nagra zamazeri haviza osugahue.

³³Anumzamo Abrahamu'ene keaga huvgama nereno'a atreno vigeno, Abrahamu'a kuma'arega ete vu'ne.

Sodom Gomora kumate vahe'mo'za kefoza hu'naza naneke

19 ¹Tare ankeri netremoke kinagafi Sodomu kumate uhnatina'e. Loti ana ra kumamofa kasante mani'nege'ne ome ke'na'e. Hanki Loti'a neznageno otino vuno znagafi upri huno, arena areno amanage hu'ne, ²Muse (plis) hurnantoanki ranimota'a eri'za vahetni'amo'na nompri mrrerita tnaga sese huteta nagrane maseta oki vugaha'e huno hige'ne, A'o, megia kumapi masegahu'e hu'na'e. ³Hianagi Loti'a hankvetigene agrane vu'na'e. Vakeno noma'afi ra ne'za kre znanteno zo'ore bretri mago'a kre znantegene ne'na'e.

⁴Ne'za nete'za omase mani'nageno Sodomu kumate nehzavene ranra vahe'zgane mika Loti nona regagi'naze, ⁵Loti ke'za atimi'za, iga nantu vahe'ma znavrenkama nonka'afima ante'nana vahera mani'na'e? Znavre kmategeta znanteta msamneno. ⁶Loti'a atirmino nevuno amefiti kafana eri negino, ⁷Muse (plis) hurmantoanki nafuheta kefo avu'avazana huoznantegahaze. ⁸Kma antahiho, ofani'amoke vene omase mofatre manina'anki, zanagri znavre'na eme tmi'nena tamavesi hniaza huku'ma hanuta ana hugahaze. Hagi muse (plis) hurmantoanki nantu vahe'ma noni'afima ena'ana, nonia'mofa amumpamo refiteznante'negu znagria mago'zana huoznantegahaze. ⁹Huno nehige'za, kagra manigano! Ru kazigati vahe'moka tagrikura nehananki, hago kagra refko hurante'za nehampi, kagrira razampi kazeri haviza hugahune. Lotina atufe'za kafama'are eme reutrako hu'za kafana anafe hu'za hu'naze. ¹⁰Ana netremoke Lotina avazuhu nompinka nente'ne, kafa erigi'na'e. ¹¹Maka vene'ne no kasante oti'naza vahe'mokizmia znagra ositeti vuno rante vu'nea nagara zamurga erisu higeza impa'ne eneriza, kafanku hakre'za vu'za e'za hu'naze.

Loti'a Sodom Kuma atreno hageno ru kaziga vu'nea naneke

¹²Anama nehzage'ne ana netremoke Loti antahige'na'e, ama kumapina vaheka'a mago'a mani'nazo? Ne'mofaka'ane, negnemone, ruga'a

vaheka'ane zamavrenka amafintira ko viho. ¹³Ama kumara ahe fanane hugahune. Zamagenkemo Ra Anumzamofonte mrrerigeno Ra Anumzamo ahe fanane huku hurantegeta e'noe. ¹⁴Loti'a mofa'amokizni arave hugaha'e huno huhampri znante'nea ne'tre amanage huno huznante'ne, Anumzamo ama kumara ahe fanane huku nehianki otita vinkero, huno hige'ne, Reravatga nehunka taginke nehane nehu'ne kiza re'na'e.

¹⁵Kotu afu'za rugeka nehigeno ankerono netremoke amanage hu'ne asmi'na'e, Lotiga ame' hunka mofaka'a rarene, negnarone zamavrenka vuo. Amafi vahe knaza mani'neta erizanku freta viho. ¹⁶Loti'a tare agesa nentahige'ne, ana netremoke Lotine, nenarone, mofa'ararene zamazante zamazu hu'ke, ana kumapinti vu'ne fegi'a ome zamatre'na'e. Anumzamo asuntginte'negu Lotina ana hunte'ne. ¹⁷Fegiamata atirmitageno'a, mago ankeromo huno, tmufagu ko' freho! Magore huta rukrahera huta onkeho, ama agupomofa tvaontera omniho, agonarega mrrerita omesi hiho, anama osnuta tamagrane fanane hugahaze. ¹⁸Hianagi Loti amanage hu'ne, a'o! Ranimota'a muse hurnantoe! ¹⁹Menia antahio, eri'za vahekamo'na nagu'vazinka, nahoke nehenka navrenka eme natrane. Hananagi agonarega vuga vahera omni'noe, nevanenkeno ana knazamo nagtereno nahe frigahie. ²⁰Ko, ama onensa kumara tva'onte me'neaki anampinka tragina ufresue. Onensa kuma me'neanki natrege'na ana osi kumapi fre'na umani'nenana ana knazana agatera'nenano. ²¹Ankeromo, knareki mago'ene nantahiganke'na keka'a antahigmuanki traginka ufro, kema hana kumara zamahe fanane osugahue. ²²Ame hunka, mago'zama osunesure kagiarenka ana kumate vuo. Ana hu'negu ana osi kuma'mofa agi'a Zoari hu'naze.

Ra Anumzamo Sodom Gomora kumate vahe zamahe fanane hu'nea naneke

²³Zge hnatigeno Loti'a Zoari kumate uhnati'ne. ²⁴Unehnatigeno Ra Anumzamo tevenerea salfa havenu monafinti ko'ma rianza huno reherafirmino Sodomu kumate'ene Gomora kumate vahe'ene, ²⁵ana maka ranra kuma'ene, ranra kuma agu'afi mani'naza vahe'ene, hozane, trazane, mopafi nehagea maka'zana ahe fanane huvgare'ne. ²⁶Hianagi Loti nenaro henka ne'eno rukrahe huno negegeno, ana zamo avufgare rukamregeno hagemo'ma hianza huno krage feno anante oti'ne.

²⁷Abrahamu'a msereti ame nantera otino Ra Anumzane otineno keaga hu'nere vu'ne. ²⁸Vuno unemnino ke fenkamu teno Sodomu kuma'ene, Gomora kuma'enema me'nea agupofina mago'zana onke'ne. Teve kunte ke'ne. Kumo tusiza huno mrenerino vemgu vemgu nehuno refite vgare'ne. ²⁹Ana nehuno Anumzamo ana agupofi me'nea kumara kre nerageno Loti mani'nea kumara refinete'no Abrahamunku agesa antahi'negu Lotina avreno rurega ante'ne.

Moab vahe'ene Amori vahe'mokizmi naneke

³⁰Zoari kumapi mani'zanku Loti koro nehuno tare mofa'arere'ne hage'za agonarega havegampi umani'naze. ³¹Umani'ne'za nuna'amo ngana'amofa amanage huno asmi'ne, nfati'amo'a ozafa re'ne. Amafi ve erita mofavre ksentesnu'a vahe omnitfa hu'ne. ³²Antahio, tafati'amofona negi ti ami mnenkeno neteno negi nenena nagatimofa zamagi fanane hu'zankura anukita mse'neta, tfati'amofo mofavre ksentesanu'e. ³³Huno hige'ne ana kenage nfaznimofa hanve ti amikeno neteno, agesa ontahi negi neno msenegene, nuna'amo neznafa anukino mase'ne. Anazama ha'ana neznafa'a antahino keno osu'ne.

³⁴Nuna'amo nefa anteno msegeno ko'atia kinaga ngana'amofa amanage huno asmi'ne, hago nagra kenage nerfa'ene mse'noanki meni kenage anahu kna huta hanve ti ami'mnekeno nete'no ete negi nena anukinka mse'tegeta, nfati'a mofa mofavre tmu'ene huta ksenta'mneno, nagati'amofo zamagi fanane huzankura huno hige'ne, ³⁵ana hu'ne, nfa'zanimofona ti amikeno neteno agesa ontahi negi neno msenegeno ngana'amo anukino mse'ne. Anazama hiana neznafa'a antahino keno osu'ne.

³⁶E'ina nehune Loti mofa tremoke nfa'zani mofonteti mofavre znamu'ene hu'na'e. ³⁷Kota mofa'mo ne'mofavre ksenteseno, agi'a Moabu'e huno ante'ne, agra Moab vahe'mokizmi nezmageho'e. ³⁸Hagi ngana'amo enena anazanke huno ne' mofavre ksenteseno, agi'a Ben-Ammi'e huno ante'ne. Ana mofavrefinti fore hu'nea vahe'kura Amoni vahere hu'za nehaze.

Abrahamune Abimelekigizni naneke

20 ¹Abrahamu'a maka feno ma'ane kumara atreno, Negev kaziga Gerar umani'ne. Ana kumara Kadesine, Surine amunompi me'ne. ²Abrahamu'a nenaro Seranku amanage huno zamasm'i'ne, ama nensaro mani'ne. Abimeleki Gerari kumate kini ne'mo ana naneke nentahino, eri'za vahe'a huzmantege'za Serana ome avre'za Abimeleki eme ami'naze. ³Hianagi kenage Anumzamo'a ava'nafi Abimeleki amanage huno asmi'ne, Kva huo! Ara vereti a' avre'za eme kami'naze. Hankinka frigahane huno asmi'ne. ⁴Abimeleki'a Sera'enema ovase'negu huno amanage hu'ne. Ramoka mago ke'a omne'nesia vahera knare amne kuma'ane naga'anena zamahe fanane hugahano? ⁵Abrahamu agra'a nasmi'ne, ama ara nensaro'e nehigeno, Sera'a Abrahamunkura nenfu'e hu'ne, tarega'moke hu'na'e. E'igu Serama avre'za eme nenamige'na nagra nagu'areti ene antahi antahini'areti ene hu'na knare fatgo avu'ava hu'noe hu'na nagra nagesa antahi'noe. ⁶Anumzamo ava'nafi amanage huno asmi'ne, tamage, Nagra antahi'noe, kagra fatgo antahintahi antahinenka, anazana hu'nane. E'ina hu'nanke'na Nagra kase hugantogenka Serana avako osu'nane. E'igu

kefozana osu'nane. ⁷Hianagi ama a'mofo neve'a kasnampa (profet) ne' mani'neanki, hunteteno neve hirega vino. Nevnigeno negeno, kagrama fri'zankura nunamu huno kza hino. Hanki hunte'nankeno ovniana, kagrane maka'a naga kanena frigahaze. ⁸Nanterame Abimeleki'a maka'a kva vahera ke hige'za eme atru hzageno, Anumzamo'ma ava'nafi asmi'nea nanekea huama huno zamasmine. Nezmasmige'za nentahi'za, tusi'za hu'za zamagogogu hu'naze. ⁹Abimeleki'a Abrahamu ke higeno egeno amanage huno antahige'ne. Kagra naza hurantenane? Nagra kagrira mago'a kumi hugante'nogenka amanahu havizana kumaniane vahe nianena hurantane? Ama zana ra kumi eri fore hane. ¹⁰Abimeleki'a amanage huno Abrahamu asmi'ne. Kagra na agafare amanahu'zana hane? ¹¹Abrahamu amanage hu'ne, Na'ankure nagra amanage huna nagesa antahi'noe, ama kumapina Anumzamofonku koro nosazankiza, zamagra a'niareku hu'za nahegahaze. ¹²Hanki ami ara nensaro mani'ne, nenfa mofa, ana hu'neanagi nenrera mofa omninegu huno a'ni'a mani'ne. ¹³Hanki Anumzamo'ma hunatege'na nenfa noma netre'na amanage hu'na Seranku asmi'noe, amai soe kvukva hunantegahane, hakare'a kaziga vanuana, nagriku'ma hanunka nenfu'e hunka huo. ¹⁴Abimeleki'a sipisipine, eri'za eri kaone (oksen), vene a'ene miza e'ori eri'za vahe'ene, avreno Abrahamu nemino, nenaro Sera avreno eme ami'ne. ¹⁵Abimeleki'a amanage hu'ne, ko, ama nagri mopa me'ne, kvesinirera amne umanio. ¹⁶Serana amanage huno agra asmi'ne. Negfuna, Abrahamuna menina wan tauseni'a silva zgoa nemue, kagri kagazema eri kami'nogu ama miza amue. E'ina nehnuge'za mika vahe'mo'za negeza, nagrikura havi zana osu'ne hu'za hugahaze. ¹⁷Anumzamofonte nunmu higeno Anumzamo Abimelekine, nenarone, kazokzo eri'za mofane ane zamazeri soe higeza mofavre ksente'naze. ¹⁸Na'ankure Abrahamu nenaro Seranteku Ra Anumzamo Abimeleki naga'mofo a'ne zamarimpa erigine.

Aisaki ksente'nea naneke

21 ¹Ra Anumzamo Serana, kema huntenero eri knare huntenteno ko'ma huvempa hu'nea kere, Agra Serana eri knare hunte'ne. ²Sera'a amu'ene huno ne' mofavre ksente'ne, Abrahamu ozafa retegeno ksente'ne. ³Abrahamu ne'mofavre, Sera'ma ksentea mofavre'a Aisaki'e huno agi'a ante'ne. ⁴Hanki Abrahamu'a nemofo Aisakina 8ti'a zgegnare, Anumzamo'ma asmi'nere agoza avufga anoma'a tga hunte'ne. ⁵Abrahamu'a 100ti'a zgegfu mani'teteno mofavre Aisakina Sera kasentene. ⁶Sera'a amanage hu'ne, Anumzamo naza hige'na kizaneroe. Vahe'mo'za antahisuza nagrane kiza regahaze. ⁷Anage huteno Sera'a amanage huno hu'ne, Iza Abrahamuna, Sera'a mofavre'a ante omigahie huno hugahie? Ana hu'neanagi menina agra ozafarefinka mofavre kse

amue. ⁸Ana Mofavremo nena huno ami a'o nehigeno Abrahamu'a ra ne'za kre'ne.

Hegane, Ismaeligizni tramema huznantege'ne vu'na'a naneke

⁹Mago zupa Sera'a keana Hega, Isipi a'mofo mofavre, Abrahamunteti ante'nea nemo avaharo nehigeno ke'ne. ¹⁰Sera'a amanage huno Abrahamu asmi'ne, Erizanti'a e'neria a'ene mofavre'anena zanahenatige'ne vio, eri'za a'mofo mofavremo'a fenonka'a e'origahie, mofavre'nimo Aisaki erigahie. ¹¹Anage nehigeno nentahino, Abrahamu'a mofavre'agu tusi rimpagna hu'ne. ¹²Hianagi Anumzamo asami'ne, Abrahamuga krimpa haviza osuo, na'ankure mofavrene eri'za a' kagura kagesa ontahio, Sera'ma naneke kasmiaza huo, Aisaki'pinti kagehe'za fore hugahaze. ¹³Eriza a'mofo mofavrefintira Nagra zamazeri hakare ha'nena rankuma ante'za manigahaze. Na'ankure zamagra kagri kageheze.

¹⁴Hanki Abrahamu nanterame otino bretine, zgakfa avufgare tafempi tifino Hega afunte nenteno mofavre'a amino hunte'ne. Hanki Hega atreno Birseba ka'ma kopi vu'no umani'ne. ¹⁵Anampi zgagfa avufgare tafempi ti afine vuna'a timo vgaregeno, mofavre'a osi zafa agafare ome ante'ne. ¹⁶Hega vuno mago kaziga tvaonte keve ahetregeno vuno umania kna zaza'a umanineno amanage hu'ne, Negesugeno mofavre'nia fri zankura navresra hie nehuno, krafa huno zavi ate'ne.

¹⁷Hianagi Anumzamo antahi'ne, ne' mofavremofu zavike'a, Anumzamofu ankeromo monafinti amanage hu'ne, Hegaga kagripina na'a hu'ne? Koro osuo, antufi mani'neni ne'mofavremo zavima neteana Anumzamo antahi'ne. ¹⁸Otinenka ne'mofavre azante azeri otinka avro, Nagra azeri ra hanugeno tusi'a vahe fore huno rankuma antegahie. ¹⁹Anumzamo ana a'mofo avurga azeri hari higeno keana mago tinkeri me'negeno ke'ne. Keteno vuno zgagfa avufgare tafempi ti afino ana mofavre ome amigeno ne'ne.

²⁰Anumzamo ana ne'mofavrene mani'negeno nena huno, ka'ma mopafi ati ahe'zante harfa ne mani'ne. ²¹Agra ka'ma mopafi Parani mani'negeno, nerera'a Isipi mopareti a' ome avreno eme ami'ne.

Abrahamu'a Abimeleki'ene huvempage hu'na'a naneke

²²Ana zupage Abimeleki'ene vugota ha' kva ne'a Fikoli'ene amanage hu'ne Abrahamuna asmina'e, Anumzamo kagrane mani'neni maka'za hanazampina kzeri knare nehie. ²³Hanki kagra amafina tmage hunka Anumzamofu avufi huvempa hunka nasmio. Nagri ene, mofavreniane, nagehe'inena reravatga hunka haviza huoranto, knare navunva hugante'noaza hunka nagrira knare kvukva hunanto, amama emani'nana mopafina. ²⁴Abrahamu huno, Nagra huvempa huankina kema hanaza hugantegahue hu'ne. ²⁵Ana hianagi Abrahamu'a tinkeriagu Abimelekina

keaga hunte'ne, na'ankure Abimeleki eri'za vahe'mo'za tinkeria hanare'nazagu hu'ne. ²⁶Abimeleki amange hu'ne, nagra ontahi'noe, iza e'inahu'zana hu'nefi, kagra onasminkena ontahi'noe, hanki meni nentahue. ²⁷Abrahamu'a mago'a eri'za eri kaoma (oksen), sipisipima refko huno Abimelekina eme nemino, anante raru hu'ne tragote'ne manisa'a naneke huvempa (covenant) hu'na'e. ²⁸Abrahamu 7ni'a sipisipi a' anenta avreno arure ante'ne. ²⁹Abimeleki amange huno Abrahamu antahige'ne, ami 7ni'a a' sipisipi anentara nankna kagukagesare avre ruotge hu'nane? ³⁰Abrahamu amange hu'ne, kagra ama 7ni'a a' sipisipi anentara nazapinti kamuana erigeno, anazamo hu'ama huranteno ama tinkeri nagra kafinoe hino. ³¹E'i kumara Bersibe huno agi'a ante'ne, na'ankure anante tarega'moke huvempa ke hu'na'e. ³²Hanki zamagra huvempa Bersiba hute'za, Abimeleki ene Fikoli ha' kva ne'ane otine mopa zniarega Filistia vu'na'e. ³³Abrahamu tamarisk zafa Bersiba negrino, anante manivava Anumzante Ra Anumzamofa agi hanta vazine. ³⁴Abrahamu'a zaza kna Filistia vahe mopare mani'ne.

Aisakina ahenka ofa hunanto hu'nea naneke!

22 ¹Mago'a kafua agateretegeni Anumzamo Abrahamu areheno ke'ne. Anumzamo'a amange hu'ne, Abrahamu'o higeno ama mani'noe huno Abrahamu hu'ne. ²Anumzamo asmi'ne, magoke mofavre, kvesi kvesi huntana mofavrea Aisakina avrenka Moraia vuo. Anantega Nagrama kverisua agonare agrira ahenka tevefi kre sramna vuo. ³Ame' nantera kerage Abrahamu otino donki afura azeri retro hu'ne. Kre sramna vu tevea ape huno krevare'are enerino, tare eri'za vahe'ane mofavre'a Aisakine zamareno, Anumzamo asmi'nea kotega vu'naze. ⁴Tare zgegna agteregeni, anante knarera Abrahamu'a nevuno kesga huno ana asmi'nea koka ke'ne. ⁵Eri'za vahetrenku amange hu'ne, amare donki afura anteta maninekena nigrane, ne'niane vuta mono ome hunteteta ete maninesate egahu'e.

⁶Abrahamu kre sramna vu teve erino Aisaki kofinenteno, agra'a hugre tevene, kazine erige'ne vu'na'e. Znagra kantega nevu'ne, ⁷Aisaki'a, Abrahamunku, Nfa o higeno, voe nenmofa huno Abrahamu'a hu'ne, Hugre tevene, kre tevene eri'noe, hagi inantegati kre sramna vu lama afura erigahu'e? Huno Aisaki antahige'ne. ⁸Abrahamu kenona huno asmi'ne, Anumzamo kre sramnavu lama afura tamigahie huno higeno vu'na'e.

⁹Anumzamo asmi'nea kaziga unehnati'ne, Abrahamu have erino ita huno teve hnavazine, Nemofa, Aisaki agare azante nofi anakiteno, ana ita agofetu azeri sga humsente'ne. ¹⁰Abrahamu kzima'a erino Aisaki kazi refriza nehigeno, ¹¹monafinti Ra Anumzamofa ankeromo kezatino, Abraham! Abraham! Higeno ama mani'noe hu'ne. ¹²Mofavremofa

avufgarera kzana onto, mago'zana huonto huno asmi'ne. Menima kagrima kagentoana Nagrite kamentiti nehunka, Anumzanku kore nehane na'ankure, Nagri'ma nami'zantera mofavreka'a magoke mofavrea azeri usasi oki'nane. ¹³Abrahamu kesga huno osi zafa titipafi ve rama afumo pazive'afi rusi hu'negeno ke'ne. Ana ve rama afu ome azerino mofavre'amofa nona'a aheno tevefi kre fnane hu'ne. ¹⁴Abrahamu ana agonagura Ra Anumzamo tamigahie huno agi'a ante'ne. Eno menima mani'nona knafinena, Ra Anumzamofa agonare tamigahie nehaze. ¹⁵Ra Anumzamofa ankeromo Monafinkati Abrahamunku mago ene kezati'ne. ¹⁶Anage hu'ne, Nagrani'a Ra Anumzamo'na avempage nehue, na'ankure ke'nia zafa nehunka ne'mofavreka'a, magoke ne'mofavrea azeri usasi oki'nane. ¹⁷Nagra asomu huneganta'nena kagri kagehe'impintira fore huhakare hu'za monafinka hanafi ene hgerinkena ksepa kna hugahaze, kagehe'moza ha' vahe'zmi mokizmi ranra kumara eri nfa'a hugahaze. ¹⁸Na'ankure kagri kagehe'impinti ama mopafina mika zamageru'ene vahemo'za asomu erigahaze na'ankure, nagri ke'mofa avriri nankure. ¹⁹Abrahamu ene Aisakikea eri'za netrentega ake'za, maka'mo'za kuma zamirega Bersiba vu'naze. Abrahamu anante Bersiba mani'ne.

Nahori agehe'mokizmi zamagi'amofa naneke

²⁰Henka'a mago'a gna anama hu'nea zana evutege'no, Abrahamu nesamiza Milka enena mago'a mofavre'zga ksente'ne. Hankino Milkana neve'a Nahori'e hanki Nahori'a Abrahamuna nefu'e. ²¹Ana mofavremokizmi zamagi'a, Uzi'a pusa nere, Buzi'a agri negna'e, Kemueli'a Aramu nefa'e. ²²Keseti'e, Hazori'e Pildasi'e, Judlaf Betueli'e, ²³Betueli'a Rebeka nefa'e. Milka'a, Nahorintetira 8ti'a ne'mofavre zga zamante'ne. Nahori'a Abrahamuna nefu'e. ²⁴Hanki henka a'mofa agi'a Reuma'e. eri'za a'a Reuma Nahorin'tetira Teba anteno, Gahamu anteno, Tahasi anteno, Makagizmi zamante'ne.

Sera'ma frigeno'a Abrahamu mago mopa ome miza huno, ana mopafi Serana asente'ne naneke

23 ¹Sera'a 127ni'a zgegfu mani'ne. ²Sera'a Kiriati-arba fri'ne. Menina ana kumara Hebronie hu'za nehaze, Kenani mopafine. Hankino Abrahamu'a tusi'za huno Seranku asunku nehuno zvi ate'ne. ³Sera fri kerfare Abrahamu mani'nereti otino Hiti mofavre'zga amanage huno ome zamantahige'ne, ⁴Tamagra antahi'naze, nagra mopa agafa nera omni'noe, amne tmagri mopafi emani'noe. A'nimo fri'nege'na tmantahi'negoe, mopa miza hu'na anampi ome asenteku nehue. ⁵Hiti mofavre'mo'za amanage hu'za Abrahamu asmi'naze. ⁶Kma antahio ra ne'moka, kagra ra kvane tagrane mani'nane. Knare'ma huno kvesinia matipi asenteku'ma hananketa, amne kamigahune, aza'o nafa'a

mani'nenimo'a i'o osugahie. Amne kamina ana matimatipina ome asentegahane. ⁷Abrahamu ana mopafi vahera, Hiti mofavre'mokizmi zamufi otino mopafi kepri huno muse hu'ne. ⁸Hanki antahiho! A' ka'ama asentesane hanuta, nagri nagi erita vuta Zohari nemofo, Efroni'ene ome kegaga hiho. ⁹Ome antahigenkeno Makapela mopa nminke'na, Ana mopa agentega havegampi Serana ome asentaneno. Ana mopamo'a nagri'za segahie. Hanki knarere hinkena'a hakare'amota tamufi knare hu'na miza hugahue. ¹⁰Hankino, Efroni'a ana Hiti mofavre'mokizmi amunompi mani'ne. Efroni'a Hiti ne'kino Hiti naga rankuma'mofo kafante emani'naza vahe'mokizmi zamagesafi, ke nona'a huno Abrahamu asmi'ne, ¹¹Efroni'a amanage hu'ne. Kma antahio ra ne'moka, havegana miza osegahane, e'i ana mopane amne kmigahue, maka'a naganimokizmi zamufi huvempa hu'na meni ana mopa kmigahue. Kamisnugenka anampi fri kerfa ome asente'gahane. ¹²Anage higeno Abrahamu'a maka vahe zamufi kepri hu'ne. ¹³Abrahamu ana vahe zamufi amanage huno Efronina asmi'ne. Efroniga muse (plis) hugantoanki kma antahio, nagra menina ana mopa miza hugahue. Hanki zgoma Kamisnuana, erige'na ana mopafi fri kerfa ome asenta'neneno. ¹⁴Efroni'a ana naneke nentahino amanage huno Abrahamuna nona'a asmi'ne. ¹⁵Kma antahio, ra vahe'moka, ama mopamofo mizama'a 400ti'a silva me'neanagi amu'nonti'afina osi'zane. Amne fri kerfa ome asentegahane. ¹⁶E'inage nehigeno Abrahamu'a nentahino, mago'a zgo'a refko huno Efroni eme ami'ne. Efroni'a agra'a kehia avamente fo hantreti'a (400) silva zgo anama'a hakare vahe zamufi eme ami'ne. ¹⁷Efroni mopa Makapela, Mamre kaziga avugosa hunte'ne. E'i ana mopafi me'nea havegane, zafane, mopane, hakarezana ami vgare'naze. ¹⁸Hanki hakare'zana Abrahamu nfa'a hinogu Hiti ne'mofavre nagama ran kuma'mofo kahante ke refko nehza vahe'zmufi ami vgare'naze. ¹⁹E'ina huteno Abrahamu'a Serana Makpela havegampi, Mamre kaziga avugosa hunte'nea have'gampi ome asente'ne, ana kuma agi'a Hebron hu'za nehaza kumare, Kenani mopafi me'ne. ²⁰Mopane havegane anampi me'neana, Abrahamu naga asezmante mope hu'za Hiti mofavre naga'mo'za ami vgare'naze.

Aisaki a' eri'nea naneke

24 ¹Abrahamuna tusiza huno hakare'a zama'afi Ra Anumzamo asomu hunentegeni mani'neni ozafare'ne. ²Korapa eri'za ne'a, maka'a fenonte ene nonte kegva gri'nea ne'ku, Abrahamu amanage huno asmi'ne, Muse (plis) hugantoanki kzana namo'mofo fenka anto. ³Kagra huvempa hunka Ra Anumzana, monama troma hu'nea Anumzane ama mopama troma hu'nea Anumzante, tamage hunka Kenani mopafinti ara ne'nimofona eri omigahane. ⁴Hagi vunka mopa agafa'niare vahe'niafinti a' uvrenka Aisakina eme amio. ⁵Eri'za ne'amo Abrahamu asmi'ne, Hanki

ana a'mo navririno'ma ama mopare omena, ete negamofona avre'na mopakare ome atregahufi? ⁶Anante Abrahamu'a eri'za ne'a asmi'ne, I'o hue! ne'nimofona avrenka ovutfu hugahane. ⁷Monafinka Ra Anumzamo nemni'a Anumzamo nenfa vahe'pinti ene fore hu'noa mopareti, navreno emenanteno amanage huno huvempa huno nasmi'ne, ama mopa nagakamofo zamigahue, huno hu'neankino Anumzamo mago ankeru vahera huntkeno kagota hugantenkenka, Aisaki nenaro anantegati uvrenka egahane. ⁸Hagi ana a'mo, ovugahuema hinkenka huvempama hu'nana kegu koro osunka atrenka eno. Hagi ne'nimofona ana mopare avrenka ovugahane. ⁹Anage higeno, eri'za ne'amo azana Abrahamu amo'mofo fenka anteno, anankere huvempa hu'ne.

¹⁰Eri'za ne'amo kemori afura ¹⁰ni'a ozafa'amofo kemorifinti nezmareno, mago'a knare nare'zana azampi ozafa'areti enerino, otino Mesopotamia, Nahori rankumate vu'ne. ¹¹Kemori afu'tmina zamazeri rena rezmantege'za, tinkerire a'nemo'za ti nefiza knare kinaga rankuma'mofo fegi'a mani'naze. ¹²Eri'za ne'mo amanage huno nunamu hu'ne, Ra Anumzane, ozafani'amofo Abrahamu Anumza'moka muse (plis) hugantoanki, menina antahi nminka, ozafani'a Abrahamuna avesintenka azeri so'e hnane. ¹³Keho, ti hnatite nagra otina mani'nanena, rankumate vahe'mokizmi mofanemo'za ti afinakura egahaze. ¹⁴Mago mofaku'ma hu'na, Muse (plis) hugantoanki, ti afi kavo ante mopafitege'na afi'na na'neni nehnugeno, tina nenege'na kemorika'a afi zami'neni, huno hanimo eri'za neka'a Aisaki nenaroza hugahie. Anama hinke'na, Abrahamu ozafani'a avesintenka azeri so'e hane hugahue.

¹⁵Nunmuna huvga ore'neni, keana mago mofara Rebeka agra ti afi kvo afunte kofino atirmino e'ne. Milka nemofo Betuel ksente'nea mofa, (Milka'a, Abrahamu negna Nahori nenaro'e), ¹⁶Ana mofara vemo ke asane hu'are, vene'nene omse'nea mofamo, tintega uramino kvo'afi ti omefirino mrerino e'ne. ¹⁷Abrahamu eri'za ne'mo, ana mofa'mo ti afirino mrerige'no agia reno ome antahige'ne ana mofara, Muse hugantoanki kvoka'afinti osi'a tina nmisanke'na nesue. ¹⁸Ana mofa'mo hu'ne, ranimoka amne negahane nehuno ana kvo'a anteme ramino azeri sga huntogeno ne'ne. ¹⁹Amigeno netegeni, ana mofa'mo asmi'ne, Kemorika'a ana zanke hu'na tina afi zami'neni nezmu hugahaze, ²⁰Huteno ame huno tina kvo'finti afu'moza ti nenaza zompafi taginte zamantege'za nenageni, ufino ete ete ete huno neragige'za ana maka kemorimo'za nevgare'naze.

²¹Ana nehigeni ke osu'no ana mofa'mofo avufi negeni mani'ne, Kama ante'na e'nomofona, Anumzamo'a naza nehifi nosie huno eri'za ne'mo agesi antahi'ne. ²²Kemorimo'za ti nehana hutageni, ana eri'za ne'mo golire tro hu'naza rini kna'amo 5fu'a gremi hu'neane manogosane, golire tro hu'nea asana tarega azampi antaninte'ne, korimofo kna'amo 100ti'a grem hu'ne, ²³nehuno ana mofaku hu'ne, Iza mofa kagra mani'nane?

Muse (plis) hugantoanki nasmio, knare negfa nompina kankmuna me'nesigu umasegahuno? ²⁴Ana mofa'mo asmi'ne, Nagra Betuel mofa mani'noe Milkane, Nahorigizni mofavremo ksenante'ne. ²⁵Ana mofa'mo mago'ene eri'za ne' asmi'ne, Kemorimo nesia ne'zana hakare'a me'ne, hanki mse kankmunena me'ne. ²⁶Anante ana ne'mo kepri huno, Ra Anumza'mofo mono hunte'ne. ²⁷Eri'za ne'mo hu'ne, Rankagi kamue, ozafani'a Abrahamu Ra Anumzamoka, agekani ontenu soe'za hunentenu aza nehie ozafa'nimofona, hanki nagrira Ra Anumzamo nza nehuno kana nverige'na ozafa'nimofo afu'agna nompifefatgo hue. ²⁸Ana mofa'mo agia reno nerera nompifemani'namokizmi ana naneke ome zamasmine. ²⁹Hagi Rebeka nempu'amofogia' Labani'e, Labani agia reno fegia'vuno ti fi kerire mani'nea nete vu'ne. ³⁰Agonafi manogosa renentenu, asama azampi nesaro antani'nea negenu, nesaro Rebeka ana eri'za ne'mo asmia ke nentahino, ana netega vuno, ome keana tinkerire kemori afu'zgane otinegeno ke'ne. ³¹Labani ana ne' asmi'ne, Ra Anumzamo asomu hugantene'moka no agu'afi emrerio. Nahigenka fegira mani'nane, no msesanazane kamorimokizmi kuma'enena nagra ko erise hunte'noe. ³²Ana ne'mo nompimreri'ge'no, anante Labani'a kemori agumpinti fenoma'a erinentenu, Kemori mofo osapa trazane, ne'zane nezmino, agia sesehu ti tagi zamige'za agrane e'naza vahe'ene zamaga sese hu'naze. ³³Ne'za nenogu kreno avuga eme antenentege'no amanage hu'ne, Kavera onenena mago'a naneke tasmite'na negahue higeno, Knareki tasmisanketa antahisanune huno Labani'a hu'ne.

³⁴Agra anage hu'ne, nagra Abrahamu eri'za ne'a e'noe. ³⁵Ra Anumzamo tusiza huno ozafa'nimofona asomu hunentege'no afufeno ne' mani'ne, Ramo sipisipima, bulimaka'ma, silvafi, korifi, eri'za vahe'ma, a'nema, kemorima, donkima huno ami'ne. ³⁶Hanki ozafanimofonenaro Sera'a tavavatetenu ne'mofavre kase amigeno, ana mofavremofomika zama'a ami vgabe'ne. ³⁷Ozafanimohuvempa huno hunantenu, Kagra zamagri mopafi emani'noa vahepintira ne'mofavreni'a rera Kenani vahe'mokizmi mofa'nea avre omigahane. ³⁸Hianagi vunka nenfa mopa agafareti, vahe'niafinti ara ome avrenka ne' mofavreni'a eme amio. ³⁹Nagra ozafanimofonku anage hu'noe, Ana a'moma navaririno omenke'na na'a hugahu'e? ⁴⁰Nagrama amage' nentoa Ra Anumzamo, Agra ankerovahe'a huntkeno kagrane nevina kama vnana kamo'a knare hanigenka, vahe'niafinti nenfa nompinti ne'nimofo a'ra uvregahane. ⁴¹Nagrama huvempa hu'noa kemo'a kaze'origahie, kagrama nagri vahepima vnanke'za, ana a'ma onkamisageno'a, nagrama huvempa hu'noa kemo'a kaze'origahie.

⁴²Hige'na nagra meni ti afite enehnati'na amanage hu'na hu'noe, Ra Anumzamoka ozafa'nimofo Abrahamu Anumzana, nza nehnankeno kama eno'a kamo'a knare hnie, ⁴³amare nagra otina tinte mani'nesugeno,

ina mofamo'o ti afiku'ma esanige'na ana mofaku hu'na, Muse (plis) hugantoanki tina kavoka'afintira osi'a namige'na na'nenno hanugeno, ⁴⁴ana mofamo nasmino, Tina nenege'na kemorikamokizmi tina afi'na eme zami'nenno huno hanimo, ozafa'nimofa ne'amofa ara Ra Anumzamo hampri nente hu'na antahigahue. ⁴⁵Anage hu'na nagu'afinka nunamuna nehugeno, Rebeka kvo afunte kofino tinkirireti ti afinaku uramigena kete'na, Muse (plis) hugantoanki ti afi namige'na na'nenno hu'noe. ⁴⁶Kavo'a afunteti ame huno anteme neramino amanage hu'ne, Tina erinka nenege'na, Kemorika'a tina afi zamineno huno hige'na, nenogeno kemori naga ti afino zamige'za ne'naze. ⁴⁷Hanki nagra antahige'noe, Iza mofa mani'nane? hu'na nehugeno, Betuel mofa Nahori nemofa'e Milka ksente'neane huno hige'na, manogosa agonafi renente'na, asana azantrempi antaninte'noe. ⁴⁸Ana hute'na kepri hu'na Ra Anumzamofa mono hunte'noe, Ra Anumzamofa agi ahesga hu'na, ozafanimofa Abrahamu Anumzamo'ma kva hunantege'na ozafani'mofa afu'agnapinti ne'amofa a'ra erifore hu'noe.

Kagota hunantege'na ngana'amofa mofavrere' Aisaki a' eriku neoe. ⁴⁹Hagi menina muse kazigati husoe huta ozafa'nimofonkura nasmiho, tmage tmarimpamo so'e osnigeta nsaminke'na, hagi nagra nentahi'na, nza tmaga'o hoga'o rukrahe ha'nenno.

⁵⁰Anage hige'ne Labanike, Betuelike ana kemofa nona'a asminal'e, Ra Anumzamo amanahu'zana higu, tagra mago'a havigeo tamageo osugahu'e hu'na'e. ⁵¹Rebeka ama kavuga mani'neanki, Ra Anumzamo ke hiaza hunka avrenka vugeno, ozafa kamofa ne'mofa nenaro'za hino. ⁵²Abrahamu eri'za ne'mo nentahino, kepri huno mopafi rena reno Ra Anumzamofa muse hunte'ne. ⁵³Abrahamu eri'za ne'mo avasese hu'zana silvare'ene, golire tro hu'naza zane, kukenane Rebeka nemino, anazanke huno mago'a knare'nare zantmina zgo'amo mreri'nea zana nesarone, nererane znami'ne. ⁵⁴Zamiteno ana eri'za ne'ene agrane e'naza naga ene kave'ene tineneta nete'za mase'naze. Ko'atige'za o'neti'za nanterampi amanage huno zamasmine, Hunantenke'na ozafa'nimo nehirega va'nenno hu'ne. ⁵⁵Hianagi, nempu'amo'ene nerera'kea anage hu'na'e, A'o atrenkeno mago'agna maniteno, 10ni'agna azana agaterete'na, avre tma vugahaze. ⁵⁶Anage nehakeno, a'o nazeri rentrako osi'o. Ra Anumzamo naza nehigeno eri'za nami'nemo knare hu'negu, hunantenke'na ete ozafanimo nehirega va'nenno hige'ne, ⁵⁷ana mofa'mofa avesi antahigeta kesu'e nehu'ne, ⁵⁸Anante Rebeka ke hakeno ege'ne antahige'na'e, Kagra ama ne'enena vugahano? Ana mofa'mo huno, ozo vugahu'e hu'ne. ⁵⁹Anantera zamagra nezmasaro Rebekana huntageno vu'ne, kegvama hunentea a'ene, Abrahamu eri'za ne'ene, agrane e'naza naga'ene ana maka vu'naze. ⁶⁰Rebekana asomu ke hunente'za amanage hu'naze, Kagra, tagri nersaroga, Kagripinti tusi'a vahe krerfa fore hugahaze. Hagi kagri kagehe'za zamesi ozmantesaza

vahe'mokizmi rankumazmi zamahe'za hanregahaze. ⁶¹Rebeka'ene, mago'a agri eri'za a'nene oti'za kemori agumpi mreri'za, ana ne'mofo amage vu'naze. Higeno Abrahamu eri'za ne'mo Rebekana avreno vu'ne.

Aisaki'a Rebeka a' eri'nea naneke

⁶²Aisaki'a Ber-lahai-roiti eno, Negev agra emani'ne. ⁶³Aisaki'a mago kinaga vuno hofage kopi umani'nenno agha antahi antahi nehuno kesga huno keana, kemori'zga neageno ke'ne. ⁶⁴Rebeka'a kesga huno Aisakina negeno kemori agumpinti erami'ne. ⁶⁵Eri'za ne'ku amanage hu'ne, aza amanu nera tavrenakura ne-e? Higeno eri'za ne'mo huno e'i nagri ozafe higeno. Anante Rebeka tavrave erino avugosa refite'ne.

⁶⁶Eri'za nemo Aisakina hakare zama hu'nea zana asmi vare'ne. ⁶⁷Ana hutegeno Aisaki'a Rebekana avreno nerera Sera seri nomp ome antegeno nenarozha higeno, avesintene. Aisakina nerera'a fri'nere amena eme arentinti hu'ne.

Abrahamu'a ru a' eri'nenno ksezmente'nea mofavre'mokizmi zamagi'amofa naneke

25 ¹Menina Abrahamu aru a' erine, agi'a Katura'e. ²Ana a'mo kse zamante'nea naga'mokizmi zamagi'a Zimran, Joksan, Medan, Midian, Ispak, Suaki'e, huno zamante'ne. ³Joksani'a, Seba'ne, Dedani kizni neznafaza hu'ne. Hanki, Dedani mofavre nagara Asurimi'e, Letusimi'e, Leumimi'e. ⁴Hanki, Midiani mofavre zamagi'a Efa'ma, Eferi'ma, Hanoki'ma, Abita'ma, Elda'ma, Ana maka'mo'za Katura agehe'za mani'naze. ⁵Menina, Abrahamu'a maka zama'a Aisaki ami'ne, ⁶ana hu'neanagi henka eri'nea a'nemokizmi mofavre nagara, Abrahamu ksefa mani'nenno muse'za nezmino huzmantege'za, Aisaki atre'za afete'are zge hanati kaziga umani'naze.

Abrahamu fri'nea naneke

⁷Ami Abrahamu mika zgegfu hu'neana 175fu'a zgegfu hu'ne. ⁸Abrahamu ozafa'rfa reteno hakare'a zgegfu hu'neazanku muse nehuno, vgare asimu anteteno frino naga'ane umani'ne. ⁹Hanki agri mofavre Aisakike, Ismaelikea Abrahamu kerfa eri'nea Makapela havegampi ome asente'na'e. Hiti mopa Zohari nemofo Efroni ami'nefi Mamre kaziga avugosa huntene. ¹⁰Abrahamu, Hiti mofavremofa mopa miza hu'nea mopafi, nenaro Sera asente'nefi Abrahamuna ome asente'na'e. ¹¹Hanki, Abrahamu fritegenoa Anumzamo agri ne'mofavre'a Aisakina asomu huntengeno, Aisaki'a Ber-hai-roi mani'ne.

Ismaeli agehemofa naneke

¹²Hega Isipi a'mo Sera eri'za enerino Abrahamunteti, Ismaelina ksente'nea mofavremofa naga'mokizmi naneke. ¹³Ismaeli mofavre

nagamofu zamagi'a ama'ne, Ismaeli mofavre fore'ma hu'nazare zamagi'a ante'ne, Ismaeli agonesa mofavre Nebaioti'e, Kedari'ki, Adbiliki, Mibsami'e. ¹⁴Misma'ma, Duma'ma, Masa'e, ¹⁵Hadadi'ki, Tema'ki, Jetuki, Nafisi'ma, Kedema'e. ¹⁶Amai Ismaeli ne'mofavre nagamofu zamagine, kuma'zmine, 12fu'a kva zamine, nofite nagate hu'za mani'naze. ¹⁷Ama maka Ismaeli mani'nea zgegfu'a 137ni'a zgegfu huteno, vgare asimu anteno frino, fri'naza naga'ane umani'ne. ¹⁸Hanki, Ismaeli agehe'za Havilati mani'za Suri uhanati'naze, zge hanati'tega Isipi tvaonte, Asiri'a kaziga vu kamofu, zamagonaru'za zamagraku arure umani'naze.

Aisaki mofavre'mokizmi naneke

¹⁹Abrahamu'a Aisaki nefa'e. Aisaki'pinti fore hu'naza naga'mokizmi naneke. ²⁰Aisaki 40ti'a zgegfu huteno Rebekana Betueli mofa erine, Lebani'a Aramea nera, Mesopotamia mopareti ne'mofu nesaro erigeno, nenaro'za hu'ne. ²¹Aisaki'a Ra Anumzantega nenaro agi' erino nunmu hu'ne. Na'ankure Rebeka mofavre ontogeno, ana higeno Ra Anumzamo nunmuma'a antahi'migeno Rebeka amu'ene hu'ne. ²²Hianagi tare mofavremo arimpafinti knime nerakeno, amazana na'a nehie nehuno Anumzamofu antahige'ne. ²³Ra Anumzamo amanage huno asmi'ne, tare kumamoke krimpafi mani'na'e, hankino tare'mokea arure arure kvufga'finti vune ene hugaha'e, mago'mo'a hanvetina, mago'mo'a hanve otigahie, hanigeno ramo'a, osimofu katoza hugahie.

²⁴Mofavre ksente kna'ma egeno'a, tare kugaveza mofavre arimpafi mani'na'e. ²⁵Kota mofavrema ksenteana koranke avufgane ante'ne, hakare avufgamo'a azokake hu'nege'za agi'a Isoe hu'za ante'naze. ²⁶Hanki amefiga'a negna ksente'ne, Iso agiare azerino atiramigeno, agi'a Jekopu'e hu'za antemi'naze. Ana knarera Aisaki'a 60ti'a zgegfu hutegenonaro mofavre kse znante'ne.

Iso nfa'amo manu rentesnia antahi amne hu'nea naneke (Hivru 12:16, 17)

²⁷Ana mofavre'moke nena hute'ne, Iso'a zzagfa hofa trampinti ahe ne' mani'negeno, Jekopu'a rimpa frune, kzone ne' seli nompini'ne.

²⁸Aisaki'a Isona avesinte'ne, na'ankure agrama zzagfa aheno eme amigeno nenea zankure, hagi Rebeka'a Jekopu avesinte'ne.

²⁹Jekopu'a ne'za negregeno Iso'a trampinti agaku nehuno e'ne, ³⁰Iso'a, Jekopu amanage huno asmi'ne, ame'ama hunka antu koranke migri (sup) ne'zana eri namige'na na'neno, na'ankure naganetege'na nehue, ana hu'negu agi'a Idomu'e. ³¹Higeno Jekopu amanage hu'ne, zge mofavremo eri asomura kota'zana nagri nmitegeno. ³²Iso amanage hu'ne, Negano nagra friza nehue, zge mofavremofu asomumo'a na'a hunantegahie?

³³ Jekopu amange huno asmine, kotazana huvempa hutegeno higeno, agra huvempa huntenu zge mofavremo eriga asomura Jekopu ami'ne.

³⁴ Jekopu'a bretine, lentol koheki huno amigeno neteno atreno vu'ne. Iso'a, agra'a asomukura antahi amneza se'ne.

Aisaki Gerari mopare mani'nea naneke

26 ¹Agatekna ko'ma Abrahamu knafi fore hu'neankna huno ana mopafina fore higeno, Aisaki'a Gerari kumate, Abimeleki, Filistia kini ne'tega vu'ne. ²Ra Anumzamo agrite fore humino amange huno asmi'ne. Isipia ovuo, Nagrama kasmisua mopare manigahane. ³Ama mopafi mani'nege'na, Nagra, kagrane mani'ne'na asomu hunegantane'na, kagri ene kagehe'ine ama mopa mika neramina, Nagrama huvempa negfa Abrahamunku hunte'noa ke eri knare ha'nenno. ⁴Nagra kagehe'ina zamazeri ra ha'nenke'za monafi hanafi kna hanage'na, Nagra ama mopa kagehei zamisugeno kagehe'impinti, miko mopafi vahe'mo'za asomu erigahaze. ⁵Na'ankure Abrahamu namage Nagri anteno, kema huankea amage huno, Nagri kasege amage anteno, ruga'a nanekea amage anteno, tra ke'nia avariri'ne. ⁶Ana higeno Aisaki'a Gerari mani'ne. ⁷Ana kumate vahe'mo'za nenaronku antahi kageno, agra amange hu'ne, A' nimo'e huno huzankura koro huno agra nensaroe hu'ne. Agesama antahiana Rebeka'a vahe'mofo anunu hu'are manigeno, ana kumate vahe'mo'za ahezanku anage hu'ne. ⁸Zaza kna anampi umniteno, Aisaki'a nenaro Rebeka agzafene'geno, Abimeleki Filistia kinimo nomofo avo kampinti ke'ne. ⁹Anante Abimeleki'a, Aisaki kehuno amange hu'ne, Antahio, tamage huno ami kagri a' mani'ne! Nahigenka kagra nensaroe hunka hu'nane? Aisaki amange huno asmi'ne, Na'ankure nagra agriteku hu'na fri'zanku anage hu'noe. ¹⁰Abimeleki'a amange hu'ne, Amazana naza hunerantane? Mago vahe'mo negnaro ene msere'sina, kagra mago knaza eri tamisine. ¹¹Ana huteno Abimeleki'a hakare vahe mago kasege antezmanteno, aza'o ama nero, nenarono avako'ma hanimo'a frigahie hu'ne. ¹²Menina Aisaki ana mopafi avimza hozafima hankre'neana ana kfufina 100ti'a agatereno hamre'ne. Ana higeno Ra Anumzamo asomu hunte'ne, ¹³ana ne'mo feno ne' fore nehuno, mago'ene ra huno tusi'a feno anteno, mika fenona ante agatere'nea ne' mani'ne. ¹⁴Aisaki'a sipisipi zgane, memeki zgane, Bulimakane, eri'za vahe'ene, rama'a ante'negeza, Filistia vahemo'za zamasigu hunte'naze. ¹⁵Menina mika tinkeri agri nefa eri'za vahe'mo'za Abrahamu knafi kafinte'naza, Filisti'a vahe'mo'za mopa kate'za refite'naze. ¹⁶Abimeleki amange huno Aisakina asmi'ne, Kagra tagri'pintira atrenka vuo, kagra tagrira tgaterenka hanve'nentake hane. ¹⁷Ananteti Aisaki'a atreno Gerari agupofi seri no anantega omegino mani'ne.

Tinkerigu hafra hu'naza naneke

¹⁸ Aisaki eteno korapa Abrahamu kafinte'nea tinkeri kafi'ne. Nefa fritege'za Filistia vahe'mo'za refite'naza tinkeri tmina kafiteno, nefa

ami'nea agi'a eriksefa huno antetere hu'ne. ¹⁹ Aisaki eri'za vahemo'za ana agupofi tinkeri nesageno, anampinti ti fore huno mreri'ne, ²⁰ Gerari afu kva vahe'mo'za, Aisaki afu kva vahera frage huzmante'za amanage hu'naze. Ama tagri tine! E'inage hzageno agi'a Eseki'e^s na'ankure zamagra frage hunante'naze. ²¹ Aisaki eri'za vahe'mo'za mago'ane ru tinkeri nesageno, esaza hu'za Gerari vahe'mo'za fra vazizmente'naze. Fra vazizageno negeno, Aisaki'a ana tinkerimofona Sitne huno agia ante'ne.^h ²² Aisaki'a ana tinkeria atreno ru' tinkeri ome kafige'za, hafra huontageno ana tinkerimofa agi'a Rehoboti'e huno ante'ne,ⁱ na'ankure Ra Anumzamo'a tzahunu kankmuna tro hurante'neankita ama ana mopare eri hakare hurantesigeta manigahune. ²³ Aisaki'a ana kumara atreno mrerino Bersiba kumate uhaniti'ne. ²⁴ Ana'ma uhanitia kenegera Ra Anumzamo'a efore humino amanage huno asmi'ne, Nagra Abrahamu nafaka'amofa Anumzane, e'igu korora osuo. Nagra kagrane mani'nena asomura hugante'na henka'a kagripinti kegehe'za fore hnamoki'zminena zamazeri hakare hugahue. Na'ankure Abrahamu'a Nagri eri'za vahe mani'negu ana hugahue. ²⁵ Aisaki'a ana kumatera kre sramna vu ita trohuno, Ra Anumzamofa agi hanta vzino ana kumateke seri no azeri onetige'za, Aisaki eri'za vahemo'za mago tinkeri kafi'naze.

Aisakike Abimelekike huvempa ke huke hagerafina'a naneke

²⁶ Abimeleki'a Aisaki ome kenaku Gerari nevuno, magora knare antahintahi nemia ne' agi'a Ahusati'e, hanki magora ha' vahe'amofa kva ne' Fikoligizni neznareno vu'ne. ²⁷ Aisaki'a zmantahigeno, Tamagra na'anuku nagritega neaze, ko'ma mopa tmifintira tamesra hunanteta nahe nati'nazanki? ²⁸ Ana kemofo nona'a anage hu'naze, Ra Anumzamo'a kagrane mani'neno kaza nehigeta negeta, tagra anage nehune, Kagri ene tagri ene amu'notifina tamage hunka huvempa naneke hugeta kagrane, tagra hagerfi mneno. ²⁹ Kagra, tagrira tazeri havizana osugahane, tagra, kagrira kazeri haviza osuta, trimpa frune hugantonkenka e'nane. Menina Ra Anumzamo knare huneganteno asomura hunegante. ³⁰ Ana kezmi nentahino Aisaki'a ra kave kre zamentege'za tine ana ne'zana ne'naze. ³¹ Nantera'me oti'za huvempage hugantugma hute'za, anante Aisaki'a huzmantege'za zamarimpa frune vu'naze. ³² Ana'ma huzamtege'za vaza zupa Aisaki eri'za vahe'mo'za amanage hu'za eme asmi'naze. Hago mago tinkeri kafinompinti tina fore hie. ³³ Ana tinkerimofa agi'a Siba huno ante'ne.^j Meninena ana kumamo'a rahige'za Bersiba kumare hu'za nehaze. ³⁴ Iso'a 40ti'a zgegfu maniteno Hiti ne'mofo mofa' eri'ne, agi'a Judi'e, nefa'a

^s (agafa'a anahure; frage hu'naze) ^h (agafa'a anahure; hafra hu'naza tinkerie) ⁱ (knare huno manisoe hu kumare) ^j (agafa'a anahure, hnavege huvempa huza hgerfi'naza tinkerie)

Beri'e. Hanki mago a'a mofo agi'a Basemati'e, Eloni mofare, agra enena Hiti ne'mofo mofare. ³⁵Ana atremokizni mani'zamo Aisakine Rebeka gizni znarimpa znata znami'ne.

Jekopu'a revtaga higeno, Aisaki'a asomu hunte'nea naneke

27 ¹Aisaki ozafarfa regeno avumo'a osi'a asu higeno, zge mofavre'a Isonku amanagero huno asmi'ne, mofavrenige higeno, Ama mani'noanki nahie huno higeno, ²Aisaki agra anage hu'ne, antahio menina nagra ozafarena fri knania ontahinoe. ³Menina vunka ati keveka'a erinka hofa trampinti zga ahenka eme namio. ⁴Nagri'ma navesesia ne'za kre haga hunka eme namige'na nene'na, nagu'areti manu regantete'na, mani'ne'na henka'a frineno.

⁵Rebeka'a aghesa anteno antahi'ne Aisaki'a nemofo Isoma asmia kea, higeno Isoma trampinka zga aheno eme krenteku nefreana, ⁶Rebeka Jekopuna mofavre'a asmi'ne, Antahio, negfa'a negfu Isonkura nentahugeno amanagero huno asmi'ne, ⁷zga ome ahenka kre haga hunka eme namige'na nene'na Anumzamofa avure manu regantete'na fri'nenno, nehigena antahi'noe. ⁸Hanki mofavre'niga kasmisua kea antahio. ⁹Menina vunka afu kevufinti tare onensa meme avrenka eme namigena negfama avenesia ne'za kre haga hugami'nenana, ¹⁰negfa'na erinka ome amisanakeno neteno, manu aregenteteno mani'nenno frino. ¹¹Hianagi Jekopu'a kenona'a Rebekana hunte'ne, Ke'nano, nempunimo'a avufga azokake ne' mani'ne, nagrira navufga nazokara ore'ne. ¹²Hu'neanagi nafanimo navakoma hunoma kesige'na agri avufina, nagra havige revatga nehuna, nagra nvufare manuna e'origahuanki, kna eri kofigahue. ¹³Anage higeno nerera'a amanagero huno asmi'ne, Kagri knazamo'a nagrite egahie. Mofavre'nimoka, ke'nia erizafa hunka, vunka ome erinka eme namio.

¹⁴Anante ke hianza huno tare mementre ome avreno nererante egeno nefama avenesia kavera kre haga huteno, ¹⁵Rebeka'a Iso zge mofavre'amofa knare kukena, nompima me'neama'a erino Jekopu hankrente'ne. ¹⁶Rebeka'a meme akru'a tga huno, tarega azantrempi antenenteno, azoka onte avufgare anankempi antente'ne. ¹⁷Kave'ma kre haga huntea ne'zane, bretima troma hunteana nemofo Jekopu ami'ne.

¹⁸Nfa'amofonte Jekopu uhanitino amanagero huno hu'ne, Nfa'o, higeno, nfa'amo amanagero hu'ne, kma ama mani'noanki, Kagra izaga, ina mofavrenimoka nehane? ¹⁹Jekopu nafa'amofa asmi'ne, zge mofavre kamona Nagra Isone, ke hunantanaza hu'na neza kreri'na neoe. Muse (plis) hugantoanki otinka maninenka erinka nezanka'a nenenka manurenanto. ²⁰Hianagi Aisaki'a nemofonku amanagero huno asmi'ne, mensi hugantogenka vu'nananki, inankna hunka ame' hunka neane, mofavre nimoka? Na'ankure Ra Anumza, kagri Anumzamo naza huno eri fore hunamige'ne.

²¹ Aisaki'a asmi'ne, muse (plis) hugantoanki tvaonte e'nege'na kavufga kvako hu'na ka'nenno. Tmage Isoga mani'nampi? ²² Higeno Jekopu'a nefa tva'onte egeno avufgare azerino ke'ne. Kagerumo'a Jekopu ageru kna nehie. Hanki kazamo'a Iso azankna nehie. ²³ Aisaki'a ke so'e osune, na'ankure azamo'a azokake huno nefu Iso azankna hu'negeno, Aisaki'a Jekopu manu rentene. ²⁴ Aisaki amanage hu'ne, Tmage hunka kagra mofavre ni'a Isoga mani'nano? higeno, Jekopu revatga huno, Izo nagra anane. ²⁵ Hanki ana ne'za erinka eme nmige'na nene'na manu reganta'nenno higeno, Ana ne'zane, waeni tine erino eme amigeno ne'ne. ²⁶ Anante nefa Aisaki'a nemofonku anage hu'ne, Muse (plis) hugantoanki mofavre' nimoka nagrite enka eme nantako huo. ²⁷ Eazamo eme antako nehigeno, kena'aretima mna nevigeno nentahino'a, anante manu renenteno amanage hu'ne,

Ko, mofavreni'amofo mna.

E'i ana mnamo'a hozamofo Ra Anumzamo asomu huntogeno, nevia kna mna nevie.

²⁸ Nagri'ma navesiana, menina Anumzamo'a monafinkati ata' kora kamisigeno,

mopa aru fru hanigeno,

nezamo'a hakare nehuno, rga nerenkeno ksefa wainimo enena hakare hugahie.

²⁹ Veamo'za kagri eri'za enerisageno,

maka moparegati vahe'mo'za zamarena reza kagrite zamagena hantgigahaze.

Kagra kafuhe'ina razimi manigahane,

negrera mofavre zgamoza zamarena re'za kepri hugante'saze.

Kagrira sifna hugantesamo'za zamagranena sifna erigahaze, asomu hugante'samo'za, asomu erigahaze.

³⁰ Aisaki'a Jekopuna manu rente vgaregeno, hagi Jekopu'a Aisakina anama atreno atirmino arugagino nevigeno, Iso'a zga zantetira e'ne.

³¹ Agranena haga'ane ne'za tro huno nefante erino e'ne. Iso'a anage huno asmi'ne, Nfa'nimoka otinka negamofo zgagfa netenka, henka manurenanto. ³² Nefa Aisaki amanage huno kenona hu'ne, Kagra azage? Nagra Iso'ne, zge mofavre kamo'ne higeno, ³³ Aisakina tusi'a ahirahi neregeno amanage hu'ne, Aza' zga aheno kreno eme nmige'na nete'na,

asomura huntogeno vigenka kagra henka neane? Ne'zama'a eri'na nete'na koma manu rente'noa manuna anante megahie. ³⁴ Iso'a nafa'amo hianke nentahino tusiza huno rimpamo haviza nehigeno, tusiza huno zavira neteno nfa'amofona asmi'ne, Nfa'nimoka! Nagri'enena ana zanke hunka manurenanto!

³⁵ Hianagi naganakamo havige eme renavatga huno kagrira kamiku'ma hu'noa manuna ko emerino vu'ne. ³⁶ Iso amanage hu'ne, Jekopu'e hunka agima ante'minanana tamage, tare zupa nagri

ku'ma eri'ne? Kota mofavre'mona asomura agra eri'ne, menina ko, nagri asomura agrake e'nerie. Nehuno amanage hu'ne, Menina mago'a manuni'a eri nante'nano? ³⁷Higeno, Aisaki'a Iso ke'are nona hu'ne, Antahio hago kva vaheka'a azeri oti'noe, hakare naga'a eri'za vahere hu'na huzmante'noe, ana nehu'na hoza kave ene ksefa wainimo agri azeri sga hugahie. Hanki mofavre'niga, nagra na'a hugantegahue? ³⁸Iso'a nefa asmi'ne, Nafanimoke, kagra magoke manutfana erinano? Nagri'ene manurentogtu nehue, nenfao huno nehuno Iso'a krafa huno tusi zvi ate'ne.

³⁹ Anante nefa Aisaki kenona huno asmi'ne,
Antahio, kagra msavema'a omnesia mopafi manigahane.
Anagamu monafinkatira, ata'mo mopakafina oramigahie.

⁴⁰ Ama mopare manisnanana ha' nehunka manigahane,
ana nehunka nganakamofo katoza humigahane.
Hinkenka mani rva osunka, agra kaomofo anankempi agare namare
zafa anteno azeri kante nehiankna zafa knankempima ante'neana,
kagra eri hantagi atregahane.

⁴¹ Aisaki Jekopuma manu rente'nea zanku, Iso'a nagna'a mofa antahi haviza hunteno asi vazinte'no, amanage huno hu'ne, Nafa'nimofonku'ma nasunku husua kna egofta hie, hankina henka'a nagra naganani'a Jekopuna kegahue. ⁴² Zge mofavre'amo Iso'ma hianke Rebekana eme asmi'zageno, anante mofavre'a Jekopu agi higeno egeno anage huno asmi'ne, Kma antahio, negafu Iso'a rimpa antefru huteno, kagrira kahe frinaku ke retro hie. ⁴³ E'igu menina mofavre'nimoka keni'a erizafa hunka, otinka frenka Harani nensaro Labani nehirega vuo! ⁴⁴ Mago'a gna agrane umani'negeno, negfunu rimpa ahezamo'a ravaheno, ⁴⁵ Kagrira rimpa ahegante'neama fru huno ageknina, anante ke ha'nenkenka egahane, nankna huna tarega'motna magoke'zupa frisnake'na nasunkura hugahue?

Aisaki Jekopu huntengeno Labani kumate vu'nea naneke

⁴⁶ Rebeka'a Aisakinku hu'ne, Nagra navesra hie manizankura, na'ankure Hiti vahe'mokizmi mofa'negura, agra Jekopu Hiti vahe'mokizmi mofanefinti a' erizankura, nankna huno knarera mani'zanimo'a hugahie?

28 ¹ Hanki Aisaki'a ke higeno Jekopu egeno asomu hunenteno, hanventake ke asmino, kagra mago Kenani vahe'mokizmi mofara e'origahane. ² Otinka Padan-aram (Mesopotemia), Betuel nontega vuo, e'i negrerana nefa'e, anantegati a' ka'a erisanana Labani negrera nesaro mofanefinti mago mofa a'ra erio! ³ Ana'ma hanankeno Hanventake Anumzamo asomu huganteno, kazeri hakare nehuno, kazeri hakare hugante'na tusi'a vahe fore hunka manigahane. ⁴ Nagri'ma navesiana Anumzamo Abrahamu hunte'neaza huno kagri'ene,

mofavreka'ane asomu hugantesnie, ama vanoma nehana mopa, Anumzamo Abrahamu ami'nea mopa eri nafa'a hugahane. ⁵Aisaki'a Jekopuna huntengeno Padan-aram (Mesopotemia) Labanintega vu'ne. Betueli Aramia nemofo mofavre, Rebeka nesaro, Jekopune Iso gizni neznarera'e.

⁶Iso'ma antahigeno, Aisaki'ma Jekopu asomu huntenteno Padan-aramuti a' erinogu huntengeno nevigeno, hanventake ke asmimo amanage hu'ne, kagra Kenani vahe'mokizmi mofa'nefintira ara e'oriogahane. ⁷Higeno Jekopu'a nefane nerera ke erizafa huno Padan-aram vu'ne. ⁸Isoma keana nefa Aisaki'a Kenani mofanegura musena osu'ne. ⁹Ana higeno Iso'a Ismaelintega vu'no a'nema zamante'nefi aru mago'ene a' omeri'ne, Ismaeli mofa agi'a Mahalati'e, Ismaeli'a Abrahamu nemofo'e. Mahalati'a Nebaioti nenunkna'e.

Jekopu ava'na ke'nea naneke

¹⁰Jekopu'a Bersiba atreno Harani kaziga vu'ne. ¹¹Nevigeno kantega zge ufreno hani ome higeno, have fita erinteno mse'ne. ¹²Anante mseneno ava'na ke'ne, ana avanafima keana mago ratamo'a eramino, agafamo'a mopare regrigeno, amuzamo'a anagamu monafinka mreri'negeno ke'ne. Anantema keana Anumzamofa ankeromo'za mareri'za tamiza anante nehzageno ke'ne. ¹³Ana huno nezmagegeno Ra Anumzamo anante ontino mani'nenno asmi'ne, Nagra Ra Anumzane, negageho Abrahamune, negfa Aisakigizni Anumzane, Menima mase'nana mopa kagri'ene, kagehe'ine tamigahue. ¹⁴Kagripinti'ma fore hnaza vahe'mo'za kasepakna hu'za fore huhakare hu'za manigahaze. Zge fre kazigane, zge hanati kazigane, ruga raga agentega vu'za e'za hu'za mani titipa hu'za manigahaze. Kagri ene kagehe'impinti ama mopafi vahe'mo'za asomura erigahaze. ¹⁵Hanki antahio Nagra, kagrane mani'nena, inantega vanoma hananana, kva hunegante'na, ete kavre'na ama ana mopare egahue. Hanige'na Nagra onkatre'na, kema huvempa hugante'noa kea eri knare huvgaregahue.

¹⁶Jekopu'a avu msenereti otino anage hu'ne, Tmage huno Ra Anumzana amafi mani'negena nagra ontahi'noane. ¹⁷Agra amnogu nehuno amanage hu'ne. Ama mopa ruotge huno me'ne! Ra Anumzamo mani'nea nomp'i e'noe. Hankino ama mona kafa me'ne. ¹⁸Jekopu'a nanterame otino, fitaruno mse'nea havea erisga huno retru renteteno, masve tagino agofetu frente'ne. ¹⁹Agra ana nonkura Beteli'e huno agia antemi'ne.^k Korapa ana kumamofa agi'a Lusi'e huno me'neane.

²⁰Jekopu'a amanage huno huvempa hu'ne, Afete kama nevugeno Anumzamo nagrane nevuno nagu'vazino ne'za ni'ane kukena'ni'ane naza nehanigena, ²¹mago knazamo navate osanige'nama nafa'nimofa

^k Anumzamofa none, huno agra kefi Betel huno ante'ne.

kumate ete rukrahe hu'na uhanati su'na, Ra Anumzana, nagri Anumzane hugahue. ²²Ama have eri retruroana, Anumzamofa no mesie. Mika'zama nami'sankeno'ma 10ni'ama fore'ma hanige'na, anampintira refko huna magoke kevua kamitere hugahue.

Jekopu Labani kumate uhnati'nea naneke

29 ¹Jekopu'a anage nehuno masetere hume vuno, zge hanati kaziga vahe'mofa mopafi uhnati'ne. ²Agra kesga huno trazampi keana tinkerire tagufa afu kevu masenageno ke'ne, ana tikerireti sipisipi ramina tina afi nezmize. Hanki ana kerimofa agitera ra have runkni rente'naze. ³Anante mika sipisipi kva vahe'mo'za utru hute'za, kerimofa agiteti havea atufe ante'ne'za, tina afi'za sipisipi zamia amite'za, ete ana havea atufe'za ana kerimofa avazare runkani rentetere nehane.

⁴Jekopu'a zamagrikura amanage hu'ne, Nafuheta tamagra igatire hige'za? Kenona hu'za tagra Haranitire hu'naze. ⁵Agra amanage huno zamasmine, Nahori negehona Labanina ke'nazo? hige'za, zamagra amanage hu'naze. Tagra agrira ke'none hu'naze. ⁶Jekopu zamagri zamasmino, Labani knare huno mani'nefi? hige'za, zamagra huza agra knare huno mani'ne, antu ko, agri'mofa Resoli sipisipi zga'ane ne-e. ⁷Jekopu'a zamasmino keho, zgea anamifi me'ne, hagi afu'zgarmina eritru hukna omne'ne, ti sipisipi nezmita zamavreta vinkeno traza neho huno nehige'za, ⁸zamagra amanage hu'naze, E'inahura osu'nenunkeno mika'a emetru hutena, tinkeri havea avaza'a eritreta tina afi zamisunke'za negahaze.

⁹Jekopuma naneke zamagrane nehigeno, Resoli'a nefa sipisipi zamareno ene, agra sipisipi kva a're. ¹⁰Jekopu'a nenogo Labani mofa Resoli sipisipi'ane ne-egeno, negeno Jekopu'a vuno tin kerireti havea rekrehe huno, agri nerera nesaro Labani sipisipia ti afizmi'ne. ¹¹Anante Jekopu'a Resolina antako hunenteno ranke huno zvi ate'ne. ¹²Jekopu'a Resoli asmino, Nfaka'mofa nesaro Rebeka mofavre mani'noe higeno, Resoli agareno vuno nefa ome asmi'ne. ¹³Hanki Labani agri nenogo ne' mofavremofa ke nentahino, agareno ome ke'naku vuno, ome anukino antako hunenteno avreno noma'afi ene. Hanki Jekopu'a hakare kea asmi vga'rene. ¹⁴Lebani amanage huno asmi'ne, kagra nagri kora maninane. Jekopu anante mago ika agrane mani'ne.

Jekopu Labani eri'za enerino Resoligizni Lea gizni a' eri'nea naneke

¹⁵Labani amanage huno Jekopuna asmi'ne, Kagra nagri kora mani'nane, hagi amne eri'za e'origahane? Nasmio, nama'a kagrira miza hugantegahue? ¹⁶Labani'a tare mofatre znante'ne, kotamofa agi'a Lea'e, osi'mofa agi'a Resoli'e. ¹⁷Lea avurgamo'a kzagiri'ne, hagi Resoli avurgamo ene, avurgamo enena knarezantfa hu'ne. ¹⁸Jekopu'a Resoli

avesinteno, amanager hu'ne, nagra 7ni'a kafufi osi mofaka'a Resoli erikura erizanka'a erigantegahue. ¹⁹Labani amanager hu'ne, Ru vahe ami'zankura kagrira kamisua knare hu'neanki nigrane manio. ²⁰Resolima a' erikura Jekopu'a 7ni'a zgegfu eri'zana eri'ne, ana kna'mo'a agritera osi knasentene, na'ankure agrama Resolima avesinte'negu ana hu'ne.

²¹Jekopu amanager Labaniku hu'ne, Knama nmi'nana kna vga'reanki a'nia nmige'na agrane msa'nenno. ²²Labani ana kumate miko vahe zamare tru huno, ra ne'za kre'ne. ²³Ana kenegera nefa'a Lea avreno Jekopu ome amigeno anteno mse'ne. ²⁴Labani'a eri'za erinentea a' Zilpa avreno mofa'a Lea katoza huminogu eme ami'ne. ²⁵Hanki mseno kotigeno nanterana keana Lea mani'negeno! Agra Labaniku amanager hu'ne, Na'a amazana hunantane? Resolinte erizana eri kantenofi? Nahigenka renavatga hane? ²⁶Ana hianagi Labani amanager hu'ne, tagri kumapina nagna'amo nuna'amofa agtereno ve' eri'zana omne'ne. ²⁷Mago sonta manitegeta, tagra mago'mofona kamisnunkenka ete mago'ene 7ni'a zgegfu erizana eri nantegahane. ²⁸Jekopu'a mago sonta Lea ene mani vga'retegeno, Lebani mofa'a Resolina avre amigeno nenaro'za hu'ne. ²⁹Labani'a, Bilha katozama'a e'neri a' avreno Resoli katoza eri aminogu ami'ne. ³⁰Hanki Jekopu'a Resolina anteno mase'ne, agra Leama avesi nenteama'a agatereno Resolina rama'a avesintene, agra ana nehuno Labanina erizana 7ni'a zgegfu erinte'ne.

Jekopu mofavremokizmi naneke

³¹Hanki Ra Anumzamo keana Jekopu'a Leana avesi ontegeno, Anumzamo rimpa eri vasne'ne, ana hianagi Resoli'a narvo mani'ne. ³²Lea amu'ene huno ne' ksenteno agi'a Rubeni'e hu'ne, agra amanager hu'ne, Na'ankure Ra Anumzamo natazani'a nazeri knare hiankino, nenave'a avesi nantegahie. ³³Anante mago'ene amu'ene huno ne' ksenteno amanager hu'ne, Na'ankure Ra Anumzamo antahi namie, nenve avesi onantegenno. Agra mago'ene ama mofavrea nenamie nehuno, Simioni'e huno agia antemi'ne. ³⁴Anante amu'ene huno ne' kasenteno amanager hu'ne, Menina ama knarera nenave'a tvaonire manigahie. Na'ankure nagra tagufa ne'mofavre kse amue. Ana hu'negu agi'a Levi'e huno antemi'ne. ³⁵Anante mago'ene amu'ene huno, ne'mofavre ksenteno amanager hu'ne, Menina nagra Ra Anumzamofa agi'a erisga hue. Ana hu'negu agi'a Juda'e hu'ne. Ana huteno ana a'mo mago'ene mofavrea onte'ne.

¹ Jekopu a'nemo'za kse zamante'naza mofavre'mokizmi zamagimofa agafa'a ana vesifi metere hu'neanki fgago huta keho. Hanki mago'a agimo'a, zamagi ante'naza kante tvaio hukna hu'ne. Zge mofavre'amofa agima Rubeni'e huno ante'neana, Anumzamo knazani'a negeno ne'mofavre nmi'ne, hu'ne.

30 ¹Resoli'a mofavre Jekopuna kase omino nuna'amofu kahiru henenteno, Jekopuna amanage huno asmi'ne, mofavre onte manine'na frisugi, Mofavre eri fore hunamio. ²Higeno Jekopuna asi vazigeno Resolina rinkfa henenteno, amanage hu'ne, Nagra Anumzana omni'noanki, aza karimpa hagerfigenka mofavre kamu'ene nosane. ³Resoli amanage hu'ne, Kato mofani'a Bilha ama mani'neanki, antenka msegenon mofavre kse naminkeno, agripinti naganena anazanke hu'na mofavre antaneno. ⁴Ana huno kato mofa'a Bilhana amigeno anaroza higeno, Jekopu'a anteno mse'ne, ⁵ana higeno Bilha'a Jekopunteti amu'ene huno ne'mofavre ksente'ne. ⁶Resoli'a amanage hu'ne, Anumzamo fatgoza hu'nane nehuno, nunamuni'a antahino ne'mofavre namie. Ananku huno agi'a Dani'e huno ante'ne. ⁷Resoli kato mofa Bilha ete mago'ene amu'ene huno Jekopuna ne'mofavre kse amigeno tare se'ne. ⁸Resoli'a nevreno anage hu'ne, Nuna nimofona tusiza hu'na krano renente'na agateroe. Anage nehuno ana mofavremofu agi'a Naftali'e, huno ante'ne.

⁹Hanki Lea'a mago'ene mofavre onte mani'nenon keana higeno, kato mofa'a Zilpana avreno Jekopu nenaroza hinogu eme ami'ne. ¹⁰Lea kato mofa Zilpa'a Jekopuna ne'mofavre kse ami'ne. ¹¹Anante Lea'a amanage hu'ne, Na knare'za hue, nehuno agi'a Gati'e huno antemi'ne. ¹²Lea kato a'mo Zilpa ne'mofavre Jekopuna kse amigeno tare se'ne. ¹³Ana higeno Lea'a anage hu'ne, Nagra muse nehue, a'nemo'za muse hu'moe hugahaze. Nehuno Asa'e huno agi'a antemi'ne.

¹⁴Witi taga hu'za eme vatu nehaza gnare, Rubeni'a vano hiregati mago'a rone hunte flaua rga'a (Mandrake) erino nerera Lea hirega e'ne. Higeno Resoli'a amanage huno Leana antahige'ne, Muse (plis) hugantoanki Rubeni'ma rone hunte flaua'mofu rga'a eme kamifintira mago'a namio. ¹⁵Hianagi Lea'a amanage hu'ne, Kagra nenavema hanrena'nana osi zampi? Hutenska meni ne' mofavre'nimofu rone hu flaua erisue nehano? Higeno Resoli anage hu'ne, Ha knarere, ana ronehu flauama namisanana nona'a Jekopu'a meni kenage kagrane emasegahie. ¹⁶Ana zupa kinaga Jekopu'a hozaregati ne-egeno, Lea'a kantegati ome nevreno asmi'ne, Kagra nagritega eno, mofavre'nimo nami'nea rone hu flauateti miza se'na Resoli ami'noanki, ana nona'a nagrane msegahane. Higeno ana kenege Jekopu'a Lea'ene mase'ne. ¹⁷Anumzamo Leana antahi amigeno, amu'ene huno 5fu'mofona ne'mofavre Jekopu'na kse ami'ne. ¹⁸Lea ksenenteno anage hu'ne, Anumzamo mizani'a namie, na'ankure eri'za mofani'a nenge avre ami'nogu huno nami'ne. Huteno agi'a Isaka'e huno antemi'ne. ¹⁹Lea'a Isaka amageteti amu'ene huno 6simofona ne'mofavre Jekopuna antemi'ne. ²⁰Lea'a anage hu'ne, Anumzamo mreri'nea miza muse hunanteno nami'ne. Menia nenave'a nagrane manigahie. Na'ankure 6si'a ne'mofavre kse amue. Nehuno agi'a Zebuluni'e huno ante'ne. ²¹Henka'a Zebulun amagetetira mofara mago anteno agi'a

Daina'e hu'ne. ²²Anantera Anumzamo Resolina, antahi'nemino mofavre ante ku'a vasnente'ne. ²³Ana higeno amu'ene huno ne'mofavre ksenenteno anage hu'ne: Nagazeza Anumzamo eri amne hunante. ²⁴Anumzamo ne'mofavre mago'ene namisie, huno nehuno agi'a Josefe'e huno antemi'ne.

Jekopu'a Labani'ene keaga hu'na'a naneke

²⁵Resoli'a Josefena kasentetegeni Jekopu'a Labani amanage huno asmi'ne, ha kuma'nirega mopa ni'are vanuanki hunantega'na va'neni. ²⁶Namio, a'ne ni'ane mofavre naga'enena zamagriku hu'na eri'zanka'a eri'na e'noe, katre'na sa vu'za hue, kagrake'za eri'za erigante'noa zana antahi'nane. ²⁷Hianagi Labani'a amanage huno Jekopuna asmi'ne, Menima kagrama kvesi nante'sunka nagrane manio, nagrama kagrama kasnampa huno kagoana nagrane mani'nankeno, Ra Anumzamo'a kagriku huno asomu hunenante. ²⁸Labani'a ru'ene ke avazu huno hu'ne, Mizanka'a agi ahe nasamio, ke hnanama'a ana avamente kamigahue. ²⁹Jekopu'a amanage huno asmi'ne, Nagrama eri'zanka'a eri'na neogeno maka afukamo knareke huno e'neana, kagra kenka antahinka hu'nane, ³⁰Nagrama ome'nogenka, kagra osi'a ante'nampinti rukazi hu'ne, nagrama inankna zama hugeno'a Ra Anumzamo kza hu'ne. Hianagi menia, ina zupa nagra ana zanke hu'na a' mofavreni'a zamaza hugahue? ³¹Labani'a amanage huno Jekopuna asmi'ne, Na'a nagra kamigahue? Nehigeno Jekopu'a anage hu'ne, Kagra mago zane hunka onamigahane. Kagra magoke zantfa nagrira hunantegahane, nagra mago'ene hu'na afuka'a zga traza me'nesirega kegva hugantegahue, ³²menina natrege'na maka afu zgaka'a mani'nafi vano nehu'na, tupri tapri sipisipine, aganumpa lama anentamo tegre ramine'niane, tupri tapri hu'nenia memene avre rure ha'nenkeno, e'i ana afu'zgamo nagri miza megahie. ³³Henka mizama naminaku hnana zupa, havigema hu'zankura e'i anamo eriana hunantegahie. Hakare'a agrono kre ramineni'ane, tupri tapri osu'nenia memempi, aganumpa osu'nenia lama anenta'enema, nagri afupima kenunka kumzafa se'nane huo. ³⁴Labani'a amanage hu'ne, Ha knareki kema hanaza huo. ³⁵Higeno ana zge zupage, agra'a Labani'a vuno maka'a agrono krerami'neane, tupri tapri hune'a ve memene tupri tapri hu'nea a' memene, efeke hu'neane, agnumpa sipisipi afura afete'are amohe'za ome anteza kegva hu'naze. ³⁶Labani'a taregi magoki zgegna vu'are agri ene Jekopu amu'noznifina me'ne, higeno Jekopu'a ruga'a afu'zgare kva krino mani'ne. ³⁷Hianagi kva huno mani'neni tgufa ruzahu ruzahu zafamofa azankunatmi akafrino, ukari'za mago'a nehareno nohreno higeno efeke nehuno tupri tapri hu'ne. Ana zafa ukari'ma haregeno'a efeke hu'ne. ³⁸E'i ana zafa azankunara erino vuno sipisipine mememo'za ti netere nehaza zamure tinkampi, ana zota mopafi ome rentere hu'ne. Tima nenaku esanu'za eme kehogu arentetere hu'ne. Tima

nenaku esnu'za ve afu'mo a' afu'mofu agumpi mrrerigahie. ³⁹Hanki e'i ana zafa azanku'na tmi rente'nea tva'onte ve afu'mo a' afu agumpi mrrerinkeno ana afu'mo tupri tapri azoka'ene anenta antegahie. ⁴⁰Hanki Jekopu'a Labani ve anenta lama azeri anteganti neteno, sipisipia atregeno tupri tapri' azoka'ene agnumpa afu'zga Labani afupi nezmanteno, agra'a afu'zga eri zogino rure ante'ne, Labani afu'pina aru havia osu'ne. ⁴¹Hanki hanve afu'zgamu agumpi marreriza nehazageno'a, Jekopu'a ana zafa azankuna zamuga tinkampi arentetere hu'ne, ana hige'za zafa azankuna arentenea tva'onte agumpina mrreritere hu'naze, ⁴²Hianagi hankve'a omne'nea afu'zgamu, vea'za huku nehigeno'a ana zafa azankunara ome reonte'ne, hankve'a omne'nea afu'zga e'i Labani afu'zge hanve afu'zga Jekopu suzane. ⁴³Ana nehuno Jekopu'a mrrerino feno ne' mani'ne, afu'amo hakare higeno, eri'za vene a'ene, kemorine, donkine, hakare'aza ante'ne.

Jekopu'a Labani atreno fre'nea naneke

31 ¹Labani mofavre naga'mo'za nehza kea Jekopu agesamo antahi'ne, Jekopu'a nerfa zana maka eri vgare, nerfa zanteti agra feno vahe fore huno manie. ²Hanki Jekopu'a Labani avu'avama keana ko'ma nehiaza osu'ne, avugosa hunenanteno ha' vahe'mo hiaza hu'ne. ³Ana nehigeno Ra Anumzamo Jekopu asmi'ne, Nagra kagrane manigahuanki negafagizmi moparega vaheka'afi vuo. ⁴Jekopu ana ke nentahino afu'zgane mani'nerega e'ogu, Resoline, Leagiznirega ke atreznanteno, ⁵anage hige'ne anante akeno amanage huno znasmi'ne, Nernafa'a ko'ma nehiaza huno nagra nena kiza zokago huno menina nomni'e, avugosamo'a ruzahu nehige'na negoe, hianagi nenfa Anumzamo nagra mani'ne. ⁶Nagrama nernafa eri'zama tusi namu'na sisi nehigena hanveni'a atre'nama eri'noana, tanagra nageta antahita hu'na'e. ⁷Anama hu'nogura agha ontahino, renavatga huno mizani'a 10ni'a zupa eri antenaga henkma hu'ne, ana hianagi Anumzamo'a atregeno navufgarera mago'zana osu'ne. ⁸Kora Labani'a amanage huno nasmi'neane, maka'a tupri tapri azoka ene afu'zga eri'za enerina mizanka'e, higeno tupri tapri ke'za fore hu'ne, agrono tegre ramira mizanka'e hiana anazanke hu'ne. ⁹E'ina higeno Anumzamo nernafa azampintira memene, sipisipine, rama'a nagri avre nmi vare'ne. ¹⁰Hanki afu'zgamu agafihea knafi navu kesga hu'na ava'na amanahu ke'noe. Maka'a ve mememofu avufgarera tupri tapri ene agrono krerami krerami azoka me'negenana negogeno a' mememofu agumpina mrreri'ne. ¹¹Anumzamofu ankeromo ava'nare amanage huno nagia he'ne. Jekopu! Hige'na, voe ama mani'noe hu'na asmi'noe. ¹²Anumzamofu ankeromo amanage hu'ne. tupri tapri'ene avon krerami'nea ve meme zgamo a' meme agumpima mrrerime neviana, kesga hunka ko, Labani maka'a avu'ava hunegante'mofona Nagra ko ke'noe. ¹³Nagra Betelima eforema hugenka have eri atru hunka masve

taginka frentenana Anumzamona, navufi huvempa hu'namone, meni otio, ama kumara atrenka, fore'ma hu'nana kumatega vuo. ¹⁴Resolike, Leake ana naneke nentahi'ne, amanage hu'na'e. Tagra nerfa afu fenompintira mago'zama erisu'a zana huhampri oranteneanki na'a hugahu'e? ¹⁵Hagi nerfa'a ko hurantegeta ruregati emani vahe kna hu'noe. Tagrira ko mizante tatre'ne, Tagriteti afufeno eriana ko ana afu fenona atre hana hu'ne. ¹⁶Tmage nerfa azampinti Anumzamo maka zama kagri hanre kamiana, e'i ana maka zana tagri ene mofavre'tine suzane. E'igu Anumzamo'ma kasmi'niaza huo. ¹⁷Jekopu'a otino maka a' mofavre'a, kemori afu'mofo agumpi zamarentere hu'ne. ¹⁸Maka'a afu'ane, fenoma'ane emani'nenno eritru hu'nea zana zogi hana huno Padan-aram atre'no, Kenani moparega Aisaki'a nefa hirega vu'ne. ¹⁹Labania, sipisipi azoka nehreno afete mani'negeno. Kenani vunaku tro nehzageno Labani'a havi anumzante mono hunentea'za, Resoli'a nOMPI mrrerino musufa seno erino vu'ne. ²⁰Jekopu'a Arameani nera Labanina osmi revatga nehuno freno vu'ne. ²¹Jekopu'a maka zama'ane erino otino fre'no vu'no, Yufretis tina tka heno Gileati agonarega avugosa huntenu vu'ne.

Labani'a Jekopu arotgo huno vu'nea naneke

²²Tare gna manitege'za, anante zupa, Labanina mago'a vahe'mo'za asamiza, Jekopu'a hago katreno fre'ne hu'za asmi'naze. ²³Labani ananke nentahino naga'a nezmareno Jekopuna arotgo hu'za vu'naze. Agene re'nazana 7ni'a hanine, zgene karanka mse'naze. Jekopuna Gileati agonafi mani'nege'za ome azeri'naze. ²⁴Hianagi Anumzamo Labani Arameani ne' kenage ava'nafi eno asmi'ne, Kva huo, Jekopuna magore hunka so'e kefi havigea huonto huno avanafina asamine. ²⁵Labani'a Jekopu'na ana agonafi ome azeri'ne. Jekopu'a seli no omegino mase'ne, hagi Labani'a mago kaziga vahe'ane seli no omegino, Gileati agonafi mase'naze. ²⁶Labani'a Jekopuna anage huno asmi'ne, Kagra nahigenka renavatga hutenska mofani'a trena hapinti kina zamare'za frazaza hunka znavrenka e'nane? ²⁷Nahigenka okura frenka renavatga hu'nane, nasminkena sinia muse nehu'za tambori'nine, zvena nehe'za hugantagenka tatrenka asine, ²⁸nahigenka nasminkena mofavre naga'niane, mofani'a trena zamantako nehu'na huso'e huzmantogenka zamavrenka ome'nane? Kagra mago kefo avu'avaza hu'nane. ²⁹Nagra kagrira ha' kahenaku e'noanagi, meni kenagera masenogeno negfa Anumzamo amanage huno nasmi'ne, Jekopuna azeri koro osuo, magore hunka havi keo, so'e keo huonto huno nasmi'ne. ³⁰Nagra antahi'noe natrenka'ma anana, na'ankure negfa nonku tusiza huno kvenesigenke, hianagi nahigenka anumzani'a noni'afintira kumzafa senka e'nane? ³¹Jekopu'a ana kemofa nona'a amanage huno Labani asmi'ne, na'ankure koro hu'noe, antahuana nagripintira hanve tinka mofa trenka'a hanregahane hu'na oku'a e'noe. ³²Aza'o mago'mo

ana anumzanka'a erino e'nesnimofona hakrenka erifore hnankeno'a, agra anamo'a frigahie. Nagatiamofa zamufi nege'nagenka mago'a zama nagri fenompima me'neniana erigahane, Jekopu'a Resoli'ma mustufa seno e'negura ontahineno, e'inage hu'ne. ³³Labani'a, Jekopu seli nompime agafa huno hakrete'no, Lea seli nompime keteno, tare eri'za a' tremokizni seli nompime keme viana onke'ne. Anantera Lea seli nona atreno Resoli seli nompime umreri'ne. ³⁴Resoli'a ana havi anumzana erino vuno kemorimofa agofetu ante'za nemniza tra'mofa agu'afinka ome antete'no agofetu manino rentrako hu'ne. Labani'a hakreno vano hiana keno eri fore osu'ne. ³⁵Resoli'a amanage huno nefana asmi'ne, O'maotisnua zankura ranimoka ke onasuo, ika kna'ni ege'na mani'noe. Labani'a maka zampina hakre'no keno eviana ana havi anumzama'a kefore osu'ne. ³⁶Jekopuna asi vazigeno ke ha' Labanina renteno, Jekopu'a Labaninku amanage hu'ne, Nagra mago zanka'a eri haviza hu'nogenka amanahura nehano? Naza magora hugante'nogenka navaririnka ne-enka haha'ene kea hunenantane? ³⁷Nagri feno zama renanana naza magora kagri fenona nonka'afintira erina e'nogenka hakrenka erifore hu'nano? Hakrenkama erifore hu'nenunka, tavufi eri atru hugeta, nagri vahe'ene, kagri vahe enena negeta eri fatgo ha'mneno. ³⁸20ti'a kafumofa agu'afima eri'za erigante'noana a' sipisipimo'o, a' mememo'o magore huno anentara kse haviza osu'neane, ve sipisipi afu zgaka'afintira magore hu'na one'noe. ³⁹Hanki afi zgamo'ma afu'zgama aheno negena kagrira eme noksamuane, afu'zgafinti ferupi kenagepi kumazfa sage'na, nona'a nagra'a suampinti avre'na kegina ka'afi eme nentoane. ⁴⁰Anahu knazampi nemnina, Zgefina zge hara tusiza huno navanesino, hagi kenagera tusiza huno zasimo'a nazeri kragenefege'na, magore hu'na navura mse so'e nosuane. ⁴¹Nagra kagri nompime 20ti'a zgegfu hu'noe, Nagra 14ni'a zgegfu taregamofa kamofa eri'za eri'noe, 6si'a kafufina afu'zgakamofa eri'za eri'noe, ana nehugenka mizani'a afu nmi'nampinti 10 ni'a zupa eri fenka anaga hu'nane. ⁴²Hianagi nfa'niamofa Abrahamu Anumzamo, e'i ana Anumzante Aisaki koro hunentea Anumzamo nigrane omni'nesina, antahuana kagra menina nza navapa hunantanke'na osine. Hianagi narimpa knazampi mani'nomofona Anumzamo nenageno, nazampinti hanve eri'za eri'nomofona negeno, kengera hanavege kasmi'ne.

Jekopuke Labanike ke hagerfi'na'a naneke

⁴³Labani'a ke nona'a amanage huno Jekopuna asmi'ne, Tare mofatrena nagri mofatre mani'na'e, hanki mofavre zga nagri mofavre zge, afu'zga nagri afu'zge, maka zama neganana nagrike zane. Hianagi menia nagra inankna hugahue, mofatreni'ane mofavrema kse zamantena'a nena? ⁴⁴E'igu menia egeta, naneke huvempa huteta, have zogita emeri atru hundesnukeno amu'nontiafi me'nena, henka ama anante vano nehuta

negeta tagesa antahitere ha'mneno. ⁴⁵Jekopu'a za'za have ome erino anante eme asente'ne. ⁴⁶Jekopu naga'a ke hige'za mago'ene havea eri'za anante kevu vazinte'naze, ana hute'za ana have kevu'umofo tvaonte kave ne'naze. ⁴⁷Labani'a ana havemofo agi'a Jegar-sahaduta'e (ana have atrumo hutagesa hugahie huno, Aramea kefi) ante'ne. Hanki Jekopu'a Galitie (ana have atrumo hu tgesa hugahie huno, Hibru kefi) ante'ne. ⁴⁸Labani'a amanage hu'ne, Amama eritru hu'a havemo meni avame'za amu'nonti'afi megahie. Hu'ne nehu'ne ana havemofo agi'a Galitie hu'ne ante'na'e. ⁴⁹Ete mago agi'a Mizpa hu'ne ante'na'e. Labani'a amanage hu'ne. Tagra afete mani'neta oge age osuta maka avu'ava hanu'ana, Ra Anumzamo agrake tagegahie. ⁵⁰Jekopuna amanage huno mago'ene asmi'ne. Kagrama mofa'nimokini hazenke ati zanamige, mago ru a'ne erige hananana, amunonti'afina magora vahera omni'naze, ko Anumzamo agrake tagegahie. ⁵¹Labani'a mago'ene Jekopuna asmi'ne: Antahio, za'za have asento'a negenka, amama oti'noa amu'nontiafi eri atru hu'a havea ko. ⁵²Amama mani'neta huvempa huta asento'a havemo amu'nontiafi me'nena, nagra ama ana havea agatere'na krimpa eri haviza hu'zana osugahue, hanki kagra eri atru hunto'a havene, asento'a havene agaterenka narimpa eri haviza hu'zana osuo. ⁵³Abrahamu Anumzane, Nahori Anumzane, neznafo Anumzamo amu'nontiafi refko hurantegahie. Higeno Jekopu'a nefa Aisaki koro huno huvempa hu'ne. ⁵⁴E'i ana agonafi kre sramna vu ne'za kreno naga'a zamagihu tru hige'za nete'za ana agonafi mse'naze. ⁵⁵Labani'a nanterame otino mofatre ma'ane, agehe'ine nezmatgino zamantako nehuno, asomu huzmante'ne. Ana huteno, Labani'a kuma'arega ete vu'ne.

Jekopu'a Isonku koro' hu'nea naneke

32 ¹Jekopu'a kantega nevigeno, Anumzamofu ankeromo'za fore humi'naze. ²Nezmageno Jekopu amanage hu'ne, ama Anumzamofu nonkumare. Nehuno anantekura agi'a Mahanaimie huno ante'ne. ³Jekopu'a ke erino vu vahe huzmantege'za vugote'za nefu Iso mani'nere Idom moparega Seir vu'naze.

⁴Mago'ene huzmanteno, Amanage huta ranimofo Isona asmiho, eri'za ne' ka'amo Jekopu anage hie, nagra Labani mopafi mani'noreti menina neoe. ⁵Nagra Bulimaka afuki, donkigi, memene, sipisipi kevu'uzgane, eri'za veanine zamare'na ne-ena negasmue. Negasmi sugenka kasunku'ma hunante sunka, ranimoka kagra antahi nmisanku hunezmantoe. ⁶Ke eri'za vu'naza vahe'mo'za ete e'za Jekopuna eme asmi'naze, Negfu Isona ome asamunanagi kantega tutagiha hugantenaku ne-ege'za, 400ti'a vahe'mo'za avega hu'za neaze. ⁷Jekopu'na tusi amano vazigeno agu'amo tare hu'ne, miko'a zama'a vahe'ane, Bulimaka kevu'fi, memene, sipisipi kevu'fi, kemorifi, tarefi refko huno kevu hu'ne, ⁸anahu agesa agra

antahi'ne, Iso'ma mago kevu zamahe'naku esnigeno'a, mago kevu'amo fresnaze, huno tare kevu ante'ne.

⁹E'ina nehuno amanage huno Anumzamofa agihanta vazine, o nenageho Abrahamu Anumzana, nfanimofo Aisaki Anumzane, Ra Anumzamoka, Kagra nasmi'nane, etenka kagra mopakarega nagaka'arega vugena, kazeri ra hugantaneno hunane. ¹⁰Nagra knare osu vahe mani'nogenka ksuntaginantenka, kavesi nenantenka, antahinaminka Kagra eri'za vahekamo'na naveri'nane, nagra magoke azompa eri'nena Jordani tina tkahena vu'noe. Hanki menia nagra tare kevu eri hu'na neoe. ¹¹Nagu vazinka nza huo, nagra nunamu nehue, nenfu Iso azampinti, koro nagesa nehie, na'ankure eme nenaheno mofavre ni'ane, zamarerane zamahe'zankure. ¹²Hianagi Kagra ko hunante'nane, Nagra kazeri ra neha'nena kagehe'za hage rinkena ksepankna hnage'za hampri hana huga osugahaze hunka hunante'nane.

¹³Higeno ana kerage anante maseteno, kotigeno otino mika'za erino e'nefinti ase'ma hu'neama'a refko huno muse'za nefu Iso ami'za eri atru hu'ne. ¹⁴200ti'a memenki, 20ti'a ve memenki, 200ti'a sipisipigi, 20ti'a ve sipisipi zamarenteno, ¹⁵30ti'a ami ri rati kemori afu'ene ksefa ve anenta'zmine, 40ti'a bulimaka'one 10ni'a buli afuki, 20ti'a a' donkigi, 10ni'a ve donki afuki huno zamarente'ne. ¹⁶Eri'za vahe'amokizmi huzmantege'za afu'zga refko hute'za zamente zamente erizogiza zamagri'aku zamagri'aku zmavre'za nevzageno amanage huno zamasmine, Vugoteta nevuta rure rure huta zamareta viho, ¹⁷huno nezmasmino, kota vu'nemofonku amanage huno hanave ke asmi'ne, Nenfu Isoma eno emenegageno, Igati vahe'moka, iga nevane, aza afu'zga zamaregotenka neane? huno kantahigesigenka, ¹⁸amanage hunka asmio, Eri'za vahekamofa Jekopu afutmine. Muse'za ramofo nefu Iso ami'zane, hagi agra henka timage'a ne-e. ¹⁹Hanave kefintike amefi'a vnamokizmine afu kevu zamariri'za vanazane, anankege huta kantegama Isona kesuta asmiho, ²⁰tamagra anage hiho, antahio, eri'za vaheka'a Jekopu'a agra tamefiga'a ne-e. Anage huno agra antahi'ne, kote'na museza ami'nenkeno so'e hunantesie. Henka avufi negesugeno, nenageno huso'e hunantegahie. ²¹Anage huno agesa nentahino huzmantege'za ana afu zamaregot'eza vzageno, ana kenagera nonkiza msenare (kemifi), anante agra mse'ne.

Jekopu Anumzane oretufe aretufe hu'nea naneke

²²Ana kenage amu'nOMPI Jekopu otino a' trema'ane, eri'za mofatrene, 11ni'a mofavre'ane zamareno Jabok osi tina kagata hu'nere ome zamatrege'za takahe'za vu'naze. ²³Zamareno ome zamatrege'za maka afu fenoma'ane eri'za vu'naze. ²⁴Anante Jekopuna agrike atre'naze, mago ne' anante ege'ne oretufe aretufe nehakeno ko' atu'ne. ²⁵Ana ne'mo keama Jekopuma agate'ma oreno'a, oretufe aretufe hapi amumzinare arigeno

amumazinamo avazu hurami'ne. ²⁶Kotu'za hianki natregena va'neni huno ana ne'mo hu'ne, Jekopu'a ana neku hu'ne, A'o, nagra katranena ame hunka ovugahananki, asomu hunantetenkage vugahane huno higeno, ²⁷ana ne'mo kagi'a azage huno antahigegeno, nagra Jekopu'ne huno asmi'ne. ²⁸Mago'ene kagrikura Jekopu'e hu'za osugahaze, huno ana ne'mo asmi'ne, hagi menina Israelige, na'ankure Anumzane, mopafi vahe'ene mraguza netinka hanavetinka nagatere'nane. ²⁹Anante Jekopu antahige'ne, Muse (plis) hugantoanki kagi ka'a nasmio, huno antahigegeno, Na'anku Nagri nagigura nantahi negane? Nehuno anante asomu hunte'ne. ³⁰Na'ankure Jekopu'a ana kumakura Penieli'e hu'ne. Huama huno nagra Anumzamofu avufi amate nege'na mani'noe. ³¹Penieli kumara agteretegeni, zgemo'a hnati anamifi tegeni, revazmu revazmu huno vu'ne. Na'ankure amumzinamo ampu henegeni'e. ³²Ana hu'negu menina Israeli mofavre'moza amumzinamofu aregri zferinafi eme hampri'nea agnuna ageza'fintira nonaze, na'ankure agra, Jekopu amomofu amumzina avakoma hu'nea zanku hu'za nonaze.

Jekopu'a Iso ome kefore hu'nea naneke

33 ¹Iso'a 400ti'a vahe'ane ne-egeni, Jekopu'a kesga huno negeni mofavre naga'a refko huzmantege'za, nezmarrera Leaki, Resoliki, tare eri'za a'tre zamuga otitere hu'naze. ²Ana huteno eri'za a' trema'ane mofavre zinine huzmantege'za vugota hu'za vu'naze. Anantera Lea ene mofavre naga'ane vzageni, hanki Resoli ene Josefekea henka vu'na'e. ³Hianagi Jekopu'a agra vugoteni vugofa nehuno 7ni'a zupa rena ome reno mopafi kepri huteno, vuno nefu tva'onte uhnati'ne. ⁴E'ina higeni Iso'a negeni agareni eni Jekopuna azante eme azerini agazafeni, azana anankempi rugagini agazafeni antako hunentege'ne, zavi otente atente hu'na'e. ⁵Kesga huni ana a'nene mofavre ramine nezmageni, Zamagra iza'za kagranena neaze? Huni antahigegeni, Jekopu amanage hu'ne, Anumzamofu agampu hunanteni eri'za vahekamona nami'nea mofavre ramine, huni asmi'ne. ⁶Jekopu eri'za a' trene, mofavre zinine vu'za Iso agiafi ome zamareni re'za mopafi kepri hu'naze. ⁷Anante Lea'ene mofavre naga'ane ne-eza anazanke hu'za Iso agiafi zamareni eme re'za mopafi kepri hzageni, Josefe ene Resolike henka'a, anazanke hu'ne mopafi eme kepri hu'na'e. ⁸Ana hutageni Iso'a amanage hu'ne. Esera afu'zga avre'za e'naza vahe zamage'noana, nahigenka huzmantanke'za e'naze? Higeni Jekopu'a amanage hu'ne, Kagri ranimoka, kazeri muse hunaku e'inara hu'noe. ⁹Hianagi Iso'a nentahini amanage hu'ne. Nagna nimoka, nagra hagi rama'a feni ante'noanki, kagrama erinka e'nana zanka'a kagragu erio. ¹⁰Jekopu'a amanage hu'ne. A'o, muse (plis) hugantoanki nagri'ma kagu'afinti antahi nenamisunka amama negamua musezana (gift) nazampintira erio, kvugosama koana, Anumzamofu avugosa

keankna nehugenka nagrira krimpa naminka nenavrane. ¹¹ Muse (plis) hugantoanki nagrama muse'zama (gift) negamuana eri'nanegu navenesie. Na'ankure Anumzamo avesi nenanteno nza huno hakare'aza nmi'negen, knare hu'nena eme negamue. E'inage huno Jekopu'a hankvetino kehigeno Iso'a eri'ne. ¹² Iso'a ana museza (gift) enerino, otinketa vamneno huno Jekopuna asmi'ne. Nagra vugotanena magoka vugahune huno zamasmine. ¹³ Hianagi Jekopu'a amange huno Isona asmi'ne, ranimoka kma antahio, mofavrenimo'za hanve otinaze, afu zgamo'za anuntage nehzagu zamega hugahue. Magoke zgefinke'ma afu kevuma harita zaza kama vanunke'za, ufrigahaze. ¹⁴ E'igu muse (plis) hugantoanki kagra ranimoka eri'za nekamona natrenka vugota huo, nagra navesite akohena vugahue, afu kevu zgane, a' mofavre ni'ane kama vnaza avamente nevuta, Seiri (Idom) ranimokare uhnatigahue. ¹⁵ Iso'a amange hu'ne. Muse (plis) hugantoanki mago'a eri'za vaheni'a zamatra'nena kvega hu'za vugahaze nehigeno, Jekopu'a amange hu'ne. Na'ante anara hugahane? Ko' ranimo'a nazeri so'e hu'ne. ¹⁶ Anage higeno Iso'a netreno, ana zupage Seir (Idom) moparega ete vu'ne. ¹⁷ Jekopu'a Sukoti kumatega vuno, e'i ana mopare noma'a negino, afu kevu'mokizmi none kine. E'ina hu'negu menina ana kumamofo agi'a Sukotie hu'za nehaze. ¹⁸ Jekopu Padan-aramu mopa atreno ne-eno rankuma Sekemu enehnatino, Kenani mopare ra kuma'mofo fegi'a nonkuma (kemi) eme anteno mani'ne. ¹⁹ E'i ana mopa miza huno seli noma ki'nea mopa Hamori amohe'impinti, Sekemu nefa mopa, anama'a 100ti'a silva zgoreti miza huno eri'ne. ²⁰ Anante havere ita tro hunteteno agi'a El-Elohe-Israeli'e (Israeli Anumzane) huno antemi'ne.

Sekemu'a Daina havi avu'avaza hunte'nea naneke

34 ¹ Daina'a Jekopune, Leagini mofakino mago kna a'ne zamagenaku vu'ne. ² Sekemu'a Hamori nemofo'e, Hivai vahe'mokizmi kva (prins) nekino negeno kefoza huntenaku, hankvetino avazu huno kefoza hunte'ne. ³ Sekemu'a, Jekopu mofa Daina avesinenteno, akoheno masve kefinti ke humi'ne. ⁴ Sekemu'a nefa Hamori asmi'ne, Ama mofara a' erinaku nehuanki avre namio. ⁵ Jekopu'a mofa'amofa Daina kefo avu'avazama hunte'nea ke nentahino, akoheno ke osu mani'nege'za, mofavre'amo'za lama afu kva nehzaregati e'naze. ⁶ Hamori'a Sekemu nefa Jekopuntega ana hazenke'mofo keaga hunaku vu'ne. ⁷ Jekopu amohe'za sipisipi afu kva hunareti, ana hazenke zamofa ke nentahiza, kumate ene hnatiza, zamagua kna nehzageno tusi zamasi vazi'ne. Na'ankure, e'inahu kefo avu'avazana Israeli vahepina osugaza, Jekopu mofara hunte'naze. E'inahu avu'avazana osugaza hu'ne. ⁸ Hianagi Hamori'a zamasmine. Sekemu'a agu'areti avesinenteno e'i ana avu'avazana hu'negu, muse hurmantoanki aminkeno a' erinteno. ⁹ Mofa omiami hugahune, namohe'za mofaneka'a, a' erisageno, kamohe'za, mofa'nenia a' erigahaze. ¹⁰ Tamagra,

tagrane manineta, mopatifina tamevesite vano nehutma, nazanoma troma hunaku'ma hanutma amne tro hugahaze. ¹¹ Sekemu'a Jekopune amohe'igizmia amanage huno zamasm'i'ne. Tamagrama knarere hnage'na, inankna zanku tamavesisia zana nagra tamigahue. ¹² Mofa tamimofonte zgo fenonku'ma agima ahenantesazana, kema hnazagante tamigahue, hagi mofa tamia naminke'na a' eri'nenno. ¹³ Jekopu amohe'za Sekemune nefa Hamorigizni reznvatga hu'naze, na'ankure nezmasaro Daina azeri haviza hu'negu zamagesa nentahiza, kea hufatgo osu'za havige hu'naze. ¹⁴ Zamagra znasmi'naze, tagra e'inahuzana osugahune. Oku avufga tga osu vahe'mo'ma nerasaro a' erisigeno'a, tagaze hugahie. ¹⁵ Mago'zana oku kvufama tga osu'nana kazigati nehune, tagra hu'nonakna huza, kagri nagamo'za oku zamufga mika'moza tga hiho. ¹⁶ Tamagra tagri mofane ara erisageta, tagra tamagri mofane enerita magoke vahe trohuta manigahune. ¹⁷ Hanki tamagrama ketima antahita oku tamufga taga osnageta, nersarona avreta ama kumara atreta vugahune. ¹⁸ Hamori ene nemofo Sekemuke anankema nentahike hugnarere hu'na'e. ¹⁹ Ana nehaza ne' Sekemu'a anagama hza nentahino, hantka huno ana kemofo amage' ante'ne, na'ankure Jekopu mofate agu'a me'negeno'e. Sekemuna nefa nagamo'za antahi nemiza nere. ²⁰ Hamorike nemofo Sekemu ene ran kumamofo kahante eke atru huza kenaneke fatgo nehaza kumate vahe ananke eme zamasm'ina'e. ²¹ Ana vahemo'za knare knampa hurantaze, zamatre sunke'za mopatimo'a ra hu'neakiza mani'neza, inankna'zana mizante tro nehuta, mofanetia omeri emeri hugahune. ²² Oku tavufga tga hutesunke'za, anamo'za mago zamarimpa hu'za tagrane, mago vahere hu'za mani'gahaze, e'igu zamagra hzankna huta maka'a vene'nemota oku tvufga tga hugahune. ²³ Afu kevuzimine, feno zamimo'a tagriza segahie. Hanki tagrama zamagri kemofo avaririta oku tavufga tga hanunke'za tagra'ene knare hu'za manigahaze. ²⁴ Hakare'a vahe'mo'za rankumamofo kahante atiramiza, Hamori ene, nemofo Sekemugini ke nentahiza, mika venenemo'za oku zamufga anoma'a tga hu'naze.

Dainana asarahe'za ha' ome hu'naza naneke

²⁵ Tagufa zge agteregenno anama oku zamufga tga hunaza vahemo'za tusi zamatazmampi mse'nageno, Daina nesaroke Simioni ene, Livaiké zaza kazi (bainat) eri'ne, ana kumapi vu'ne maka'a vahera antri hzaza hu'ne zamahe hana hu'na'e. ²⁶ Hamorine nemofo Sekemu'giznia kazinknonu (bainat) znahe nefri'ne, Sekemu nompinti neznasaro, Daina nevrene vu'naze. ²⁷ Dainama kefo avu'avama hunte'naza zanku, Jekopu mofavre nagamo'za ana kumapi mreri'za, maka'a knare'zana eri vgare'naze. ²⁸ Afu kevuma, donkima, kuma agu'afi me'neaza eri hana nehu'za, fegi'a me'nea zane eri'naze. ²⁹ Hakare'a razama, onensa zama, a' mofavrene nompinti zane erihna huza vu'naze. ³⁰ Jekopu'a amanage

huno Simionine, Livaigiznia znasmi'ne, Kenani vahe ene, Perizi vahe amu'nompina knaza erita nagrira nazeri hi'mna va'e. Tagra onensa'a vahe mani'nonankiza, atru huza ha'ma eme hurantesuza, nagri ene maka zaniane nazeri haviza hugahaze. ³¹Hianagi kenona'a anage hu'na'e, hanki nahigeno nersarona, monko a'nemofa hianknara hunte'ne?

Jekopu'a ete Beteli kumate vu'nea naneke

35 ¹Anumzamo amanage huno Jekopuna asmi'ne, Otinka, anagamu Beteli vunka anante umanio, anante Anumzamofa ita tro hunto, ko'ma negfu Iso koro frenka nevankena kagrite fore hugaminoa kumate vuo. ²Jekopu'a amanage huno naga'ane, agrane nemnizamokizmi zamasmi'ne. Maka'a havi anumzana netreta, tamagu'a retro nehuta, kukena timia antaniho. ³E'ina hutenketa otita ete anagamu Beteli vamneno. E'i anante Anumzamofa have ita tro hugahue, antahima nenamino kna'zampinti nza nehuno hakare kaziga nevugeno nigrane nemanie. ⁴E'inage hige'za maka'a vahe'mo'za havi anumza zimine, zamegesafi renentaza rinine eri'za Jekopu eme amizageno erino Sekemu kuma tva'onte oak zafa agafafi keru kafino asente'ne. ⁵Jekopu'a amohe'zane kama nevzageno'a, Anumzamo Kenani vahera zamazeri koro hige'za zamariri'za mago'zana huozamte'naze. ⁶Jekopu'ene vahe'ane ana maka vu'naze. Nevu'za Lusi uhnati'naze, mago agi'a Beteli'e, ana mopa Kenani me'ne, ⁷Jekopu'a havere ita tro hunteno agi'a El Beteli hu'ne, na'ankure nefu Isonku koro'ma freno nevigeno Anumzamo korapara anante fore humi'neane, ⁸anante mani'nageno Rebeka avate eri'za ara Debora'a frige'za oak zafa agafafi Betelia ohenkamu'a asente'naze. Nehu'za agi'a Alon Bakut hu'za ante'naze. Zamagra kefina, zavi zafe hu'naze.

Anumzamo Jekopuna Israeli'e huno agi'a antemi'nea naneke

⁹Padan-aramuti ete ne-egeno Anumzamo Jekopuna mago'ene fore humino, asomu hunte'ne. ¹⁰Anumzamo amanage huno asmi'ne, Kagi'a Jekopu'e, mago'ene Jekopu'e osugahaze, hagi menia kagi'a Israeli'e huno megahie. Israeli'e huno Agra ante'ne. ¹¹Anumzamo mago'ene asmi'ne, Nagra hihamu'ane Anumzane, fore huhakare hunka rukzi hunka, rankuma (nation) nente'za aru moparegane umani emani nehu'za atru huza rankuma (nations) antesageno, kagehe'impinti hakare kini vahera fore hugahaze. ¹²Mopa Abrahamune, Aisaki'gizni Nagra znami'noe, Nagra kagri kmigahue, Nagra henka ama mopa kagehe'i zamigahue. ¹³Huteno Anumzamo Jekopu ene keaga hu'nea kumateti atreno ete Agra mreri'ne. ¹⁴Jekopu'a ra have erino eme retru rente'ne, ana haverera waini ti tagino ofa nehuno, oliv masve erino eme neragino, Anumzane naneke hu kumare huno hu'ne. ¹⁵Jekopu'a Anumzane keaga hu'nea kuma'mofa agi'a Beteli'e huno ante'ne.

Benjameni ksente'nea naneke

¹⁶ Jekopu'a naga'ane Betel atre'za, Efrata kumate vuku nevzageno kantega Resolina mofavre ante kna'amo egofta higeno tusi atagu hu'ne. ¹⁷ Mofavre'za negegeno tusi atagu nehigeno anante aza huno kse aminaku avega huno mani'nea a'mo amanage huno asmi'ne, ne'mofavre ksentananki kagogogu osuo. ¹⁸ Resoli'a ksentedeno fri'za nehuno ana mofavre agi'a Ben-oni'e (nansunku mofavre) huno ante'ne, nehigeno Jekopu'a Benjameni'e (nza tamaga mofavre) huno ante'ne. ¹⁹ Resoli'a frige'za Efrata vu kamofa ankenare asente'naze, (mago agi'a Betrehem.) ²⁰ Jekopu'a ra have erino vuno Resolima asente'nea kerimofa agofetu ome retru re'ne, menina Resoli kerire retru re'nea havea amne me'ne. ²¹ Israeli'a (Jekopu'a) viazamo mani'ne'za afu kva nehza no (tawa) Ederi agatereteno seli nonku'ma omegino mani'ne. ²² Anampi umani'nageno Israelina (Jekopu'na) agonesa ne'amo Rubeni'a, nefana mago a'a, nenaro eri'za erinente'a a' Bilha anteno mse'nea, ke Israeli'a antahi'ne.

Israeli (Jekopu) ne'mofavre zamagi'amofa naneke

²³ Ama Jekopuna 12fu'a ne' mofavre zamagi'e. Lea ne'mofavre Rubeni'a Jekopuna zge'e, anante Simioni'e, Levi'e, Juda'e, Isaka'e, Zebulun'i'e. ²⁴ Resoli ne'mofavre, Josefe ene Benjamenike. ²⁵ Resoli eri'za a'mo Bilha znante'nea ne'mofavre Dani'e magora Naftali'e. ²⁶ Lea eri'za a'mo Zilpa znante'neana Gati'e, Aseri'e Jekopu Padan-aram mani'neni zamante'ne.

Aisaki fri'neazamofa naneke

²⁷ Jekopu'a nefa hirega Mamre Kiri-at-bera e'ne, e'i Hebron mago agi'e, ana kumara nefa Abrahamu ene Aisakike zoka umnina'a kumare. ²⁸ Aisaki'a wan hantret eiti'a (180) zgegfu mani'ne. ²⁹ Aisaki'a zaza kna maniteno ozafa reteno rentermino, vgare asimuna antete'no frino agehe'zane agigo mo'zane umani'nazarega vu'ne. Jekopuke, Isoke eri'ne ome asente'na'e.

Iso ne' mofavre naga zamagi'amofa naneke

36 ¹ Ama'i Isompinti fore hu'za vu'naza naga'mokizmi zamagi'e, Isona mago agi'a Idomu'e, ² Iso'a Kenani vahe'mokizmi mofane eri'ne, Ada'a Eloni mofare, Hiti nere. Oholibama agra ana mofare Zibeon ageho'e Hivi nere'. ³ Hanki mago a'mofa agi'a Basemati'e, Ismaeli mofa, Nebaioti nesaro'e. ⁴ Ada'a Elifazi Isona kse amigeno, Basemati'a Reueli kse ante'ne, ⁵ Oholibama'a Jeusima, Jalamuma, Korama huno kse zamante'ne. Iso'ma ne'mofavre Kenani mopare mani'negeni fore humi'nea zamagi'e. ⁶ Iso a'neane, ne'mofavre ane, mofa'neane, maka noma'afi nemniza naga'ane, memene, sipisipi kevune, Bulimaka kevune,

mika feno Kenani mani'nenno erifore hu'nea fenoma'ane enerino, negna Jekopu atreno afete moparega vu'ne. ⁷Maka'za zinimo'a rukzi hige'ne noma emanina'a mopamo'a avitegeno, afu kevu zinimo'a hakare higeno Iso'a atreno vu'ne. ⁸Higeno Iso'a Seiri agona moparega umani'ne, Isona mago agi'a Idomu'e. ⁹Isopinti fore hu'naza vahe zamagi'a, Iso'a Idomu vahe nezmageho'e Seir agona kokampi nemniza vahere. ¹⁰Iso ne'mofavre mokizmi zamagi'a, Elifazi'a Iso nenaro Ada ne'mofavre, Reueli'a Iso nenaro Basemati ne'mofavre. ¹¹Hanki Elifazi ne'mofavre zamagi'a Teman, Omar, Zefo, Gatam, Kenasi'za mani'naze. ¹²Iso nemofo Elifazi, mago miza e'ori kazokzo a'amofa agi'a Timna'e. Timna'a mago ne'mofavre Elifazi kse ami'ne, agi'a Amaleki'e. Iso nenaro Ada ne'mofavre kse zamante'ne. ¹³Hanki Reueli ne'mofavre zamagi'a, Nahati'e, Zera'e, Sama'e, Miza'e. E'i ne'mofavre nagara, Iso nenaro Basemati kse zamante'ne. ¹⁴Isona mago a'amofa agi'a Oholibama'e, Ana mofare, Zibeon negeho'e. Ama Iso nenaro Basemati kse zamante'nea ne'mofavre zamagi'a Jeusi'e, Jalamu'e, Kora'e huno Isona kse ami'ne.

¹⁵Iso nagapinti kva eri'za eri'naza vahe zamagie. Isona agonesa ne'mofavre Elifasi ne' mofavre nagamo'za kva eri'za eri'naza vahe zamagi'a Temani'e, Omari'e, Zefo'e, Kenazi'e, ¹⁶Kora'e, Gatami'e, Amaleki'e. E'i'a kva vahe'tmina Idomu mopafi kva hu'naze, Elifasi nagapinti, Isona nenaro Adakizni znagehoze. ¹⁷Hanki Isona mago a'amofa agi'a Basemati'e, nemofo agi'a Reuel, Reueli ne' mofavre naga kva eri'za eri'naza naga'mokizmi zamagi'a, Nahati'e, Zera'e, Sama'e, Miza'e. Reueli naga Idomu mopafi kva eri'naza mokizmi zamagi'e. ¹⁸Iso nenaro Oholibama ne' mofavre nagapinti kva eri'namokizmi zamagi'e, Jeus'e, Jalami'e, Kora'e. E'i tagufamo'za kva eri'naze, Oholibama Isonteti kse zamante'ne, Oholibama'a Ana mofare. ¹⁹E'ina vahera Iso ne'mofavre fore huno mani'nea vahere, Idomu'e nehaza ne'mofonpinti kvaza eri'naza vahe'mokizmi zamagi'e. ²⁰Ama Seir ne'mofavre Horati ne' ko'ma ana mopa nfa'a hu'zama mani'naza vahepinti fore hu'za kvaza eri'za mani'naza vahe zamagi'a, Lotani'ma, Sobali'ma, Zibeonize, Ana'ma, ²¹Disoni'e, Eseri'e, Disani'e zamagra kva eri'za eri'naza Horaet vahe, Seir ne' mofavre Idomu mopafi mani'naza kva vahe zamagi'e. ²²Lotani ne'mofavre agi'a Hori ene, Hemani enene. Hanki Lotani nesaro'a Timna'e. ²³Sobali ne'mofavre naga zamagi'a Alvani'e, Manahati'e, Ebali'e, Sefo'e, Onami. ²⁴Zibeoni ne'mofavre nagara, Aia ene, Ana enene. Ana'a agra amuhu tinkeri ka'ma mopafi keno eri fore hu'ne. Nefa Zibeoni donki kva huno vano nehuno ana tinkeria ke fore hu'neane. ²⁵Ana mofavre zamagi'a Disoni'e, Oholibama'e. Oholibama'a, Ana mofare. ²⁶Disoni ne'mofavre zamagi'a Hemdani'e, Esbani'e, Itrani'e, Kerani'e. ²⁷Eseri ne'mofavre zamagi'a Bilhani'e, Zavani'e, Akani'e. ²⁸Disani ne'mofavre zamagi'a Usike, Aranike. ²⁹Horaeti vahepi kva eri'za eri'naza naga zamagi'a, Lotani'e, Sobalima, Zibeonima, Anama, ³⁰Disoni'ma, Ezeri'ma,

Disani'e. Amai Horati vahepi fore hu'naza kva vahere. Seir mopare nagate nagate mani'neza kva eri'za eri'naza vahe zamagi'e. ³¹Hanki ama'i Idomu mopafi kini vahe zamagi'e, Israeli ne' mofavre'mo'za kini vahe fore osu'naza knafi, Idomu mopare kini vahe fore hu'za mani'nazane. ³²Bela agra Beori nemofo kini kvaza erino Idomu kegva kri'ne, rankuma'amofogagi'a Dinhaba. ³³Bela'ma nefrigeno'a, Zera nemofo Jobab, Bozra kumate ne'mo kini kva erino Bela nona eri'ne. ³⁴Jobabu'ma nefrigeno'a Husamu kini erino kva mani'neane, agra Temanaeti mopareti nere. ³⁵Husamu nefrigeno Bedati nemofo Hadadi kini huno kva hu'neane, agra Midian vahe ha' huzmanteno Moab zamagtere'nea nere, rankuma'amofogagi'a Avit. ³⁶Hadadi'ma nefrigeno'a Samla, Masreka kumateti ne'mo kini kva erino kegva hu'ne. ³⁷Samlama nefrigeno Sauli, Rehobot kumate Yufretis timofo tva'onte ne'mo agri nona eri'ne. ³⁸Sauli nefrigeno'a Bal-hanan agra, Akbor nemofo kinimofo nona erino kegva hu'ne. ³⁹Bal-hanan agra, Akbor nemofo nefrigeno'a, Hadari kuma'a erino kini mani'neane, Pao rankumateti ne'mo, Nenaro agi'a Mehetabeli'e, Matreti mofare, Mezahab negeho'e. ⁴⁰Isompinti fore hu'za kvaza eri'naza vahe zamagi'a, fore hu'za nagate nofite kuma anteza mani'ne'za kva eritere hu'naze. Timnama, Alvanima, Jetetima, ⁴¹Oholiba'ma, Ela'ma, Pino'ma, ⁴²Kenazi'ma, Temani'ma, Mibzari'ma, ⁴³Megdili'ma, ima'Irami'e. E'i zamagra Idomu kva nagare, Iso'a Idomu vahe nezmafa'e, nonkuma ante'za nemni'za mopa eri'za mani'nazare, kva hutere hu'za mani'naze.

Josefe ava'na ke'nea naneke

37 ¹Menina Jekopu'a agri nefa, mani'nenon hu'nea mopare Kenani mopare mani'ne. ²Amai Jekopu naga nofimofo naneke. Josefe, 17tini'a zgegfu nehuno, nehaza ne' mani'nenon nefu'zane afutmi kegvagrine, Bilhane, Zilpagizni nefa a'tremokizini mofavre'mozane kegva hu'naze. Josefe nefu'za haviza hza kea erino nezmafa ome asmi'ne. ³Menina Israeli'a (Jekopu'a) mika ne'mofavre afintira, Josefenku avesintene, na'ankure agra ravusefinka ante'ne, agra avasese'ane kena tro huno antanite'ne. ⁴Josefe nefu'za, kazana nezmafa rama'a agri avesinentege'za, zamagra avesi onte'za knare fru keaga huomi'naze. ⁵Anante Josefe'a avana keteno, afuhe'mokizmi ana avana ke nezmasmige'za, zamagra mago'ene tusiza huza zamarimpa hente'na'ze. ⁶Josefe amanage huno zamasmine, Muse (plis) hurmantoanki ava'nama ke'noa kea antahiho, ⁷avanama ke'noana hozafi witi ananekunkeno nagri witimo'a oti fatgo higeno, tamagri witimo'za regagiza, nagri witire zamarena reza kepri hu'naze. ⁸Anante nefu'za amanage hu'za antahige'naze, Kagra, tagri tgaterenka rankva (kini) mani'za nehano. Tamage hunka kegva hurante'za nehano. Anage nehu'za mago'ene zamasigu hunente'za, agri avana gene, ke'anena ontahi'naze.

⁹Anante mago'ene ava'na keteno afuhe'i zamasmino amanage hu'ne, Antahiho, mago'ene ava'nagoana, zgene, ikane, 11ni'a ofumo'za nagrite kepri hunante'naze. ¹⁰Josefe anage huno nefane, afuhe'i nezmasmigeno, nfa'amo kesuno amanage hu'ne, Kagra nankna avana negane? Negrane, negrera'ene negfu'zanena tmage huta mopafi trena kagrite regahunu? ¹¹Agri afuhe'za amefia ke hunte'nazanagi, nefa'a hakare'a nanekea antahi antahifi atre'ne.

Josefena miza se'za avre'za ru vahepi vu'naza naneke

¹²Mago'zupa agri nefu'za, nezmafa afutmi avre'za traza nehogu Sekemu vu'naze. ¹³Israeli'a, amanage huno Josefena asmi'ne, Negafu'za afuzga zamavre'za Sekemu traza me'nerega ome zamantenarega ege'na, huganta nenkenka zamagritega vuo. Josefe amanage huno kenona hu'ne, Nagra vugahue. ¹⁴Nefa amanage huno Josefe asmi'ne, Menina vunka negfuzane, afuzganena knare hu'za mani'nafi ome ketenka, ete enka kea eme nasmio. Anage nehuno huntogeno Hibroni agupofinti vuno Sekemu uhnatine. ¹⁵Hakeno vano nehigeno, mago ne'mo keteno azerino antahige'ne, Na'anku kagra nehakrane? ¹⁶Josefe anage hu'ne, Nagra nafuhemokizmigu nehakroe, muse (plis) hugantoanki inantega afu'zmi kegva huza mani'nafi nasmio. ¹⁷Anante ana ne'mo asmi'ne, Amafinti atre'za vunaku nehu'za, Dotani vanune nehzagena antahinoe, higeno Josefe'a zamage zamavririno vuno afuhe'ina Dontani ome zamage fore hu'ne.

Josefe azeri havizahu ke retro hu'naze naneke

¹⁸Josefe afete ne-eno eravao osunege'za nege'za, ahe frigahune hu'za ke retro hu'naze. ¹⁹Zamagra osmi asmi huza, Ava'na kege nera antu e! ²⁰Hanki menina, enketa aheta keru kampi mate'vuta nevezita, amanage hugahune. Afi zgamo aheno ne'ne, nehuta avana ke'amo nankna hugahifi kesune. ²¹Ana hianagi Rubeni'a ana naneke nentahino, zamazampinti aza hunaku anage hu'ne, atrenketa asimu'a e'orisune. ²²Rubeni'a mago'ene amanage huno zamagri zamasmine, Korana eri oragi'sune. Hanki amima ka'ma kopi me'nea kerifi oheta atre'sune, ana hnage'no agra aza huno avreno nefa ome amisigu hu'ne. ²³Hanki Josefe'ma eno afuhe'inte'ma ehnatige'za, zamagra azeriza, knare avasese ane zaza kena nefama antaninte'nea zafi netre'za, ²⁴zamagra azeriza ti keru kampi matevu atre'naze. Ana kerifina tina omnene.

²⁵Ana hute'za, zamagra mani'neza ne'za nenaku nehu'za, kesga huza zamu kazana, avazu hunteza Ismaeli vahe'mo'za Giliatiti ne-eza, kemori'zmifi gamune, (fukinkna masve), tusa masve kregefe'neane (bam) mna'nentakeza mere'ne eri'za Isipi vunaku e'naze. ²⁶Juda'a amanage huno nezmafunku hu'ne, Nankna miza erigahune nergnama aheta korama'a refitesuta? ²⁷Enketa tagra mizante Ismaeli vahete Josefena atrammeno,

tagra agrira ohesune, agra tagri kora manine. Nefu'za ana naneke antahi'naze.

²⁸Anante mago'a Midiani vahe'mo'za, feno omi ami nehu'za miza nesaza vahe'mo'za anante neazageno, zamagra Josefena kerifinti avazuhu naga'atre'za Ismaeli vahete 20 sekel silva zgore atre'naze. Ana hazage'za Josefena avre'za Isipi vu'naze.

²⁹Rubeni'a keru avazare eno keana Josefe kerifi omni'negeni! kukena'a sgane sagnu hu'ne. ³⁰Aganaheinte agra uhnatino amanage hu'ne, Ana mofavre'a omni'ne, hanki nagra inantega vugahue? ³¹Hige'za zamagra Josefe avasese kena eri'za, ve meme ahe'za ana zaza kena'a korama'afi re'za tiza hute'za, ³²anante ana avasese ma'ane zaza kena, mago'amo'za eri'za nezmafante uhnatiza anage hu'naze. Amama kefore'ma huna kena, muse (plis) hugantonanki kagri negamofo zaza kenafi ko. ³³Anante keteno amanage hu'ne, amai nagri ne'mofavremofa zaza kene. Afi zgagfamo aheno ne'ne, tmage huno Josefena amprino anitrage trogo hutre'negahie! ³⁴Anage nehuno Jekopu'a kukena'a braro bruru huno tanefa kateno kukena'are^m nefreno zaza kna ne'mofonkura zavira ate'ne. ³⁵Ana hige'za mika ne'mofa amo'za, otiza azeri avavasenaku hu'nazanagi, azeri vava sezankura ave osine. Nehuno agra amanage hu'ne, Nenamofonku zvi netena frina fri vahe kumapi umanigahue. Nehuno nefa'a zvi ate'ne.

³⁶Ana hige'za Midiani vahe'mo'za Josefena, mizante atrazageno, Isipi ne' Fero avate kva nemo Potifa miza se'ne.

Judane Temagizni Naneke

38 ¹Mago kna egeno ana knazupa Juda'a afuhe'i zamatreno Adulami kumate Hira ome keku vu'ne. ²Juda anantega Kenani ne' Sua'e nehza ne'mofa mofa keteno, a' erino anteno mse'ne. ³Ana higeno amu ene huno ne' ksentegeni, agra agi'a Eri'e huno ante'ne. ⁴Anante mago ene amu ene huno ne' ksenteno, Onani'e huno agi'a ante'ne. ⁵Ana a'mo mago'ene ne' ksenteno Sela'e huno agi'a ante'ne, Juda'a, Kezipi mani'negeni nenaro'a ne'mofavre kse ante'ne. ⁶Hanki Juda'a agonesa ne'mofavre Erina a' avre ami'ne, agi'a Tema'e. ⁷Ana hianagi Judana, agonesa ne'mo Eri'a Anumza'mofo avufi haviza higeno, Ra Anumzamo ahe fri'ne. ⁸Juda'a amanage huno Onani asmi'ne, Nempuka'mofo ate vunka, nefu a' eneria kna avu'ava hugeno, negfu mofavre ksenteno. ⁹Hianagi Onani'a antahi'ne, kento a'mo, ksentesia mofavre'a agri mofavre omnigahiankino, nempua'mofo a' ene nemseno avufga rina, nefu mofavre antemi'zanku mopafi atre'ne. ¹⁰E'inama agra hiazankura Ra Anumzamo musena osuno, ahe fri'ne. ¹¹Anante Juda'a nenofero Tema

^m toza kukena huno mani'ne.

asmi'ne, Negfa nompi kento umani'negeno, ne' niamo Sela nena huteno, nehuno aghesa antahi'ne, aru agranena nefu'za fri'nazaza hanigi nagra koro hue hu'ne. Higeno Tema'a vuno nefa nompi umani'ne. ¹²Mago'a zgegfu evigeno Sua mofa, Juda nenaro frigeno, zamasunku huza zvi atazageno ana kna vga'retegeno, Juda'a sipisipi azoka neharerega Timna kumate mrerino vu'ne, agrane, Hira agri arone'a Adulam ne'ene vu'na'e. ¹³Mago'a vahemo'za Temana ome asmi'za, konkeno negnofero'a sipisipi'a azoka hareku Timna kumate evu'ne. ¹⁴Hanki ana a'mo kento kukena hate netreno amne kukena huno, avugosa refiteno, Enaim kuma'mofo kasante Timna vu kante emani'nenno, aghesa antahino keana, Sela hago ra hu'neanagi, a' ka'e huno navreno omi'ne. ¹⁵Juda'ma ana a'ma eme negeno, monko a' mani'ne huno aghesa antahi'ne, ana a'mo avugosama refiteno mani'negeno keso'e osuno'e. ¹⁶Agra kana atreno ana a'mofonte vugantuteno amanage hu'ne, menina natresankena kagranena umasegahuo? Agra nemofo are huno ontahi'ne, Tema'a amanage huno antahige'ne. Na'a namitenka nagra'nena umasegahane? ¹⁷Mago ve meme afuzga ni'afinti avre'na antegantegahue huno asmi'ne. Ana a'mo amanage huno asmi'ne. Knare mago avameza kmentezana naminenka, henka'a avrente nantegahampi? ¹⁸Ana ne'mo amanage hu'ne. Avame'zana nagra na'a kmigahue? Ana a'mo anage hu'ne, rinine, knankempi kvasese nofi ene, kazampi erinana azompa ka'ane namigahane. Ana miko'za nemino ome anteno msegeno agri'teti amu ene hu'ne. ¹⁹Anante otino vuno avugosafi refite'neaza eri netreno, kento kukena omeri hankre'ne. ²⁰Juda'a rone'a Adulami ne'te, ve meme avre amigeno ana a'ma ami'neaza azampinti erinogu ome hakeana ana ara onke'ne. ²¹Agra ana a'mofo kumate vahe zamantahi'geno, ina'ne Enaim vu kantega havi anumzante mono hunentazafi nemnia monko ara? Zamagra amanage hu'naze, amafina havi anumzante mono hunentazafina monko ara omni'ne. ²²Ana ne'mo ete Judante vuno, amanage hu'ne, Ana ara hakena erifore osuge'za, ana kumapi vahe'mo'za amafina monko ara omni'ne hu'naze. ²³Anante Juda'a amanage hu'ne, Aru vahe'mo'za tagiza resagi atregeno ana a'mo erino. Hago amai ve meme avre kamugenka, ana a'ra ome hakenka eri fore osane. ²⁴Henka 3'a ikana evutegenno, Judana asmi'za negnofero Tema'a savri nehuno, savri mofavre eririne. Juda anage hu'ne, Avre fegi atreta ana ara tevefi kre kasegeho! ²⁵Ana ara avazu huza fegi'a atirmizageno, nagrama namu'ene hunoana ama zamofa nefanteti mofavrea eririnoe, nehuno ana zana zamige'za eri'za nenofronte vazageno mago'ene anage hu'ne. Muse (plis) hugantoanki ko, ama rinine, anankempi avasese'zane, azompa aza suzane? ²⁶Juda anazantmi keno antahino nehuno, amanage hu'ne, Tema'a nagrira nagtereno knare'za hu'ne. Haviza huna nagra nenmofo Silana avre omugenno anteno omse'ne. Juda'a ete mago'ene ana a'ene omse'ne. ²⁷Ana a'mo mofavre anteku

nehigeno, keana kugaveza rimpafina mani'na'e. ²⁸ Anante mofavre kasenentegenogemo mago'mo azana ante gamategeno, aza huno mofavre kasemi a'mo koranke osi nofi azante kinenteno, amanage hu'ne, ama mofavremo koteno e'ne. ²⁹ Hianagi eteno azana anmagi agu'ategeno, ete mago'mo atirmine. Ana a'mo amanage hu'ne, inankna hunka kagra anafe hunka agterenka ane! Ana hunegu agi'a Peresi'e (Peresi anafe huno e'ne) huno antemi'ne. ³⁰ Hanki amefiga'a nefu osi koranke nofima azante kintenemo atiramigeno, agi'a Zela'e huno antemi'ne.

Josefe Potifa nOMPI eri'za eri'nea naneke

39 ¹ Josefena avre'za Isipi mopare vzageno, Potifa Isipi ra eri'za ne' Fero avate vugota hu'nea kva (kepten) ne'mo, Ismael vahe'mo'za avre'za vu'naza vahepinti miza huno avrente'ne. ² Ra Anumzamo Josefe ene mani'negeno, maka erizama'amo knare'zanke hu'ne. Josefe ozafa'amofogemo nOMPI Isipi mani'ne. ³ Ozafa'amogema keana Ra Anumzamo Josefe ene mani'negeno, eri'za kama'amo'a agri azantera knare zanke hu'ne. ⁴ Ana higeno, ozafa'amogemo Josefena antahimino, avate eri'za ne' azeri oti'ne, Josefena makazama'a azampi antegenogemo kegva krinte'ne. ⁵ Isipi ne'mogema ana'ma higeno'a, Ra Anumzamo'a Josefe agra noma'afi mani'negu huno asomu hunte'ne, Ra Anumzamo nOMPI zane, fegi'a hozafi zanena maka asomu hunte'ne. ⁶ Maka'zana Josefe azampi Potifa'a antegenogemo kegva kri'genogemo, maka zankura agesa ontahino kave'ma nesia zankuke hu'ne.

Josefe agi'avugosane, agia azane, avufganena knare huno soe zanke hu'ne. ⁷ Anazama nehifina ozafa'amogemo nenarogema Josefe kesane nehuno anage hu'ne, enka nagrane emso. ⁸ Hianagi agra ana keggu i'ogemo huno ozafa'amogemo nenarogemo asmi'ne, Antahio, nagrama ama nompima mani'nogengema ozafanimogema maka'zankura nontahie, maka'zana ante'nea zana nagri nzampi kegva kri'nenogemo hunantene'ne. ⁹ Mago agtere'sa nera ama nompina omni'ne, nagrakere, mago'zane huno refite onante'ne kagra'akere na'ankure kagra nenarogema mani'nane. Inankna huna nagra tusi'a kefo'zana erifore hu'na kumira Anumzamogemo avufina hugahue? ¹⁰ Ana a'mo kinagane, nanteranema Josefengemo msesu'e huge erava'ogemo huoma nehigenogema, ke'a antahi omi'ne.

¹¹ Mago'zupa ana hu'ne, Josefe'a eri'za erinaku nOMPI mrrerigeno, ruga'a eri'za vahera ana nompina omni'nagenogemo keteno, ¹² ozafa'amogemo nenarogemo nakre ku'are avazu huno, nagrane emaso higeno, ana nakre ku'a azampi zafi netreno, freno megia atirmino vu'ne. ¹³ Ozafa'amogemo nenarogema keama Josefe'ma nakreku'ama azampi atreno freno fegi'a atirmigenogema, ¹⁴ ana a'mo noma'afi eri'za eneriza vahe ke hige'za eme atru hzageno, Keho, Hibru ne'ma avrenoma eme ante'nea ne'mo nagri zokago renantenaku ege'na krafagemo hu'noe. ¹⁵ Antahigema'na ranke hu'na krafagema

nehuana, nakre ku'a avateti zafitreno freno fegi'a vu'ne. ¹⁶Higeno ana nakre ku'a avate ante'negeno, ozafa'amo nonte e'ne. ¹⁷Anante Potifa egeno, nenaro amanage huno asmi'ne, miza e'ori kazo kazo Hibru eri'za ne' avrenka eme tmi'nana ne'mo, nagrite eno zokago renantenaku nehige'na, ¹⁸ranke'ma hu'na krafa hugeno'a, nakre ku'a anante atreno atirmino fegi'a freno vu'ne.

Josefe kina hunte'naza naneke

¹⁹Josefe ozafamo, nenaro asmia ke nentahino. Miza e'ori kazokzo eri'za ne'kamo anahura nagrira hu'ne, hiankemo rimpamo teve re'ne. ²⁰Ana higeno Josefe ozafa'amo avreno kina ome tafi'ne, kinimofu (Fero) eri'za vahe zamare'za ome nerafi'za kumate anampi kina hunte'naze, kina huntageno anampinka mani'ne. ²¹Ana hianagi, Ra Anumzamo Josefe ene mani'nenno agampu hunentegen, kina kumate vugota hu'nea ne'mofu avumo keana knare'za hu'ne. ²²Kina kumate vugote'nea ne'mo Josefena maka'a kina vahe'mokiz mire kegva krinogu azeri oti'ne, inankna zama anampima hniazana agri azampi ante'ne. ²³Kina kumate vugote'nea ne'mo Josefe azampima ante'nea zankura agesa ontahine, na'ankure, Ra Anumzamo agri'ene mani'negu huno, maka'zama Josefe'ma hiazana, Ra Anumzamo aza nehigeno knare'zanke hu'ne.

Josefe ava'na ke eri ama hu'nea naneke

40 ¹Ana maka'zama fore hutegen, anante Isipi kinimofu tintfente ene nezama'are kegva hu'nea ne' ene, breti kre'zante vugota hun'a ne'tremoke, ra zani Isipi kinimofona rimpa eri haviza hu'na'e. ²Fero'a tare vugotena'a eri'za netrena, kinimofu tintfente ene nezama'are kegva hu'nea ne' ene, breti kre'zante vugota hu'na'a ne'tremokiznia tusi'a rimpa heznante'ne. ³Ana netrena kinimofu avate kva hunentea (kepten) ne, nompI Josefe mani'nefi magopi kina ome huznantene. ⁴Ra kva ne'mo, Josefe kegva huznante'nogu ome znante'ne, agra kegva kriznantegeke mago'a zaza kna mani'na'e.

⁵Isipi kinimofu tinkapure azeri nentea ne'ene breti negrea ne'enena kinafi manineke, tarega'moke ava'na magoke kenege ru ava'na ketere hu'na'e, mago'mofu ava'na gemo rugante rugante hu'ne. ⁶Nanterampi Josefe eno eme znageana, znagra zanasu zampi mani'nankeno znage'ne. ⁷Fero eri'za netre'moke kva'amofu (masta) kina nompI mani'nakeno znantahige'no, Na'a higetna menina tanasu'zampina mani'na'e? ⁸Znagra kenona hu'ne asmina'e. Tagra ava'na ke'noa ava'na magore huno huama hurami vahera omni'ne. Josefe znasmi'ne, huama'ma hu'zana Anumzamofompi me'neanki, Muse (plis) hurnantoanki, nasmi'o.

⁹Kinimofu tinkapure vugote'nea ne'mo agra avana ke'a Josefe asmino anage hu'ne, Nagri ava'nafina koana, navuga mago nofi (vain) me'ne,

¹⁰ ana vain nofitera taregi magoki azankuna'a me'ne, nehagefintira, rga rehenerfino, atruma hu'nefintira, rgamo'a knare afure'ne. ¹¹ Fero kapumo'a nzampi me'nege'na, vain rga tagi'na eri rati'na Fero kapufi nente'na, ana kapua Fero azampi ome ante'noe. ¹² Higeno Josefe anage huno asmi'ne, Ava'nama kana agafa'a anahure, taregi magoki azankuna amo'a taregi magoki zgegne, ¹³ taregi magoki zgegna varesigeno Fero'a kagaze'za eri amne huganteno ko erizankare kavrentegahie, hanigenka kote'ma nehanaza hunka Fero azampi kapu'a antegahane, agri tinkapure azeri nentanaza ome hugahane. ¹⁴ Hianagi knare'ma hunka umanisunka nagriku antahi namio, muse (plis) hugantoanki antahi naminka nagri nagenkea Fero asmigeno ama'i kina kumapintira navre fegi'a natreno. ¹⁵ Na'ankure nagrira tamage huza musufa ase'za, Hibru vahe mopafinti navre'za eme nantenage'na, amafima ema mani'nofina magore huna antahi'na kena osu'noa zante navre'za mopa agu'afina hanimoke hu'nefina eme kina hunante'naze.

¹⁶ Ana zanke huno kinimofu breti vugoteno negrea ne'mo, Josefe'ma ava'nage knare huno rukrehe humigeno nentahino, anage huno Josefena asmi'ne, Nagranena anazanke hu'na ava'na ke'noe, koana, taregi magoki eka'ekapi (basket) efe breti zogirinte nanunte me'ne, ¹⁷ agofetu me'nea eka ekapi ruga'a ruzahu ruzahu breti kave Fero suza me'ne, nmamo'za ana eka'ekamo nanunte me'nege'za agu'afinti ne'naze. ¹⁸ Josefe kenona huno asmi'ne, avana kamofu agafamo'a amanahure, taregi magoki eka ekamo'a taregi magoki zgegne, ¹⁹ taregi magoki zgegna agteresigeno'a, Fero'a kazeri sga huno kagena akafriteno, zafare hantigantesige'za, nmamo'za kavufga negahaze.

²⁰ Huznasm'i'nea kante taregi magoki kna egeno, Fero ksente'nea knare maka eri'za vahe'amokizmi ra ne'za kre zamante'ne, kre nezmanteno vugoteno ti kapu'a erisga hunentea ne'ene, breti'a kre nentea ne'tremokiznia, ranra eri'za vahe'amofu zamure, znavre ama hu'ne. ²¹ Fero tinkapu'a vugoteno azerisga hunentea nera, erizama'afi avrentegeno agra Feron kapu'a azampi antente'ne. ²² Hianagi breti kre'zante vugota hu'nea nera, Josefe ava'na keznia zamasm'i'nea gante zafare hanti'naze.

²³ Hianagi kinimofu kapu'are vugota hu'nea ne'moa Josefena antahi omino, agekni ante'ne.

Fero avana ke'nea naneke

41 ¹ Tare zgegfu agteretegeni Fero'a ava'na keana, Nael timofu ankenare oti'neni ke'ne. ² Ke'neana, Nael timpintira 7ni'a masvenke huno avufga krerfane Bulimaka afu'tamimo hanatino, timpinti traza tragahu'za nenazageno ke'ne. ³ Anante'ma keana, ete 7ni'a zferinage huno, vahe'mo kesane huga osu'nea Bulimaka afuzga Nael timpinti ehni'za, tinkenafi ko'ma emani'naza bulimakane magopi otiza

mani'naze. ⁴Haviza hu'za zferinage hu'naza Bulimaka afumo'za 7ni'a knare hu'za zore'naza Bulimaka afutmina zamahe'za nehna hu'naze. Hzageno Fero'a avupintira otine.

⁵Avukoko higeno nemseno mago'ene ava'na keana, magoke witi ramparera ome ahente eme ahente huno 7ni'a ranra nenage hu'nea me'negeno ke'ne. ⁶Hanki ete henkama hnatia 7ni'a witi rampamo'a osi higeno, zge hanatitegati ea zaho'mo azeri amuho higeno nena'amo hgage huno fore hu soe osu'ne.

⁷Osi nena'ane witi rampamo 7ni'a magoke rampamo ranra witi rga rentenea asgahu nevazigeno ke'ne. Fero otino keana higeno ava'na koe nehuno mse'ne. ⁸Nantera otino antahitahi hakare nehuno vahe huzmantege'no ome zamasmige'za, kasnampa vahe'ene antahizane vahe Isipi nemniza, eme atru hu'naze. Fero'a ava'na ge'ama zamasmiana mago'mo eriamu huno Feronu asamiga osu'ne.

⁹Vugota huno Fero kapure kva hunentea ne'mo amanage huno Fero asmi'ne, Ko'ma nagrama ufre'noa knazamofu nanekea meni huama hu'na kasmigahue. ¹⁰Feroga eri'za vahe ka'a karimpa aherantenka, kavufgare kva (kepten) nemofu nompiku kina hurante'ne, nagri'ene vugota huno breti negrea ne' ene hurante'ne. ¹¹Tarega'mota magoke kerageke ava'na ke'noe, agrane nagra'ene, ava'na ti'afina taregamota afante afante avanu ketokeno eriamu hu'ne. ¹²Hibru nehzana, magora anampina tagra'enenu mani'ne, kinimofu avufgare kva (kepten) ne'mofu eri'za ne'mo kina hu'nenu, ava'na keti'a agri asamukenu huama hunu ana avanu ketiare tsami'ne. ¹³Huama hunu tasminere, efore hurami'ne, nagrira ete eri'zaniafi navrentenu, hanki agrira zafare hanti'ne.

Josefe avanu kea eriamu hu'nea naneke

¹⁴Fero ke huzmantege'za Josefenu kina nompiku mopa agu'a, mani'nege'za ame hu'za ome avre'za agenu, agi azoka harenu kena'a eriku vasitenu'a, Fero avuga uhnati'ne. ¹⁵Fero'a amanage hunu Josefenu asmi'ne, Nagra avanu ke'nomofonu, magore hunu hunasmiga vahera omnitfa hu'ne, kagri kagenke nasmiza avanu kea eriamu nehenu hu'za nasm'i'naze. ¹⁶Josefe kenonu hunu Feronu asmi'ne, Nagripinu anahu zanu omne'ne, Anumzamo agrake Feroga ana avanu ke'a kasamigahie.

¹⁷Nehigeno Fero anage hunu Josefe asmi'ne, Avanu ke'nofinu, Naeli timofu ankenare otinoe. ¹⁸Oti'nenu negogenu masvenke hunu ra avufgane bulimakana 7ni'a Naeli timpintiku hnatiku'za trazu nenage'na ke'noe. ¹⁹Negogenu ana timpintiku mago'ene 7ni'a zferinage hunu kesane osuga hu'nea Bulimaka afutaminu hnatiku'ne, e'iku anahu afutminu magore hu'na Isipiku mopafinu kora onke'noane, ²⁰anu zferinage hunu asane huga osu'nea Bulimaka afu'zgamo'a kotenu'ma 7ni'a masvenke avufgane Bulimaka afu'tminu ahenu ne'ne. ²¹Nehnu hu'nazanagiku zamufa e'ori'naze, ana

zamufare mani'naze, kote'za mani'naza kanteke vahe'mofo asane osu'are mani'nagena nege'na, navu mse'nofintira oti'noe. ²²Ete mse'nena mago ava'na ete'na ke'noe, koana mago witimofo zafa'arera 7ni'a nena'a ranra rga'a ome ahente eme ahente hu'ne, ²³negogeno henka'a ete 7ni'a osasi rampa'ane witi avimza hnatiana hagege hugege higeno, zge hanatitegati ea amuho'ane zaho'mo temagigeno hanati haviza hu'ne. ²⁴Ana osi rampane witimo 7ni'a ranra rampamo nenage huno ahente'nea witi rampa aga asgahu nakri'ne. Negenka kasnampa vahe'zga zamasmuge'za, mago'mo huama huno onasmi'ne. ²⁵Josefe amanage huno Fero asmi'ne, Feroga tare ava'na kamo'a magoke kampi vu'ne, Anumzamo hniazamofu eri ama huno Agra'a Feroni averi huno husmi'ne. ²⁶7ni'a knare avufgane bulimakamo'a 7ni'a zgegfue, hanki 7 ni'a nena'ane witi rampamo'a 7ni'a zgegfue, ana tarega avana kemo'a magoke kante vu'ne. ²⁷7ni'a knare osu zaferinage Bulimaka mrenerigenka kanana 7ni'a zgegfue, hanki 7ni'a osasi huno hagege hu'nea witi rampa zge hanatitegati amuho zaho'mo temagiana 7ni'a zgegfufina tusi'a agate'za fore hugahie. ²⁸Maka'za meni fore hnia zamofonku Fero nesmue, inankna'za fore hniana Anumzamo, Agra'a eri ama huno Feroni ave'nerie. ²⁹Keho, 7ni'a zgegfumofu agu'afina maka Isipi mopafina ne'zamo fore huhakare hukna ne-e. ³⁰Hianagi 7ni'a zgegfumofu agu'afina esniana tusi'a agatonto kna egahie, ana aga'zamo'a Isipi mopafi kave fore'ma hu'nea kna osnige'za zamage kanigahaze, miko'zana ahe fnane hanigeno mopamo'a haviza hugahie. ³¹Ana mopafi kave fore nehiaza osuno, agtereno tusi'a agate'za fore huhanige'za, koma knare kfuma maninaza zankura zamagesa ontahigahaze. ³²Ete mago'ene Anumzamo ana avanage Feroma tare zupa asmi'neana anahure, Anumzamo hanigeno ame huno anazana fore hugahie.

³³Hanki Feroga mago knare antahi'zane agu'agesane ne' azeri otinkeno Isipi mopare kva hino. ³⁴Feroga huge'za ame huza mopa zamire kva hnaza vahe zamazeri otigeza 7ni'a zgegfufina kegva hu'ne'za, ne'zamo hakare hania knafina 5 kevufinti refko hu'za mago kevua Isipi mopafi nezana mago'zanke hu'za eritru hiho. ³⁵Kave'mo hakare hnia kafu'afina huge'za maka'a ne'zana nompri eri tru hiho, Fero kegva hu'nea ranra kumate witi rgane kave nezana eritru hute'za, vahe'mo'za kegva hiho. ³⁶Isipi mopafi 7ni'a zgegfufina agatontoza fore'ma hanigeno'a, e'i anama eritru hania nezamo zamaza hanige'za, zamagakura ama ana mopafina ofrigahaze.

Josefena Isipi mopare kva azeri oti'nea naneki

³⁷Hanki Fero ene eri'za vahe'ane ana nanekema antahi'zana knare hu'ne. ³⁸Fero'a eri'za naga'a zamasmi'no, Magora amanahu nera hakreta kegahuno, anumza avamu'ene nera? ³⁹Fero anage huno Josefena asmi'ne, Anumzamo ana maka'za kagri kasmi'negu, knare antahi'ene agu'agesane

vahera omni'naze. ⁴⁰Kagra nagri nona kegva krigahane, ke hnana kante vahenimo'za antahi kami'za kesga hugantegahaze, ran tratera nagrake'za manisga hugantegahue. ⁴¹Fero anage huno Josefe asmi'ne, Negano, nagrama kagri Isipi mopare kva kzeri oti negantoana. ⁴²Fero'a azampinti agri'a rini zafino Josefe azampi vzinenteno, knare ksefa kena eri vasinrenteno, anankempi golire ananke nofi hunte'ne. ⁴³Feron amiga'a kva ne'mofo karisifi avrentegeno vano nehige'za, agri avufi kezati'za husga hunente'za, agrite zamarena re'naze! Nehuno maka Isipi mopa agri kvafi ante'ne.

⁴⁴Mago'ene, Ferro'a Josefe asmi'ne, nagra Ferro'na mani'noanagi kagripinti kema e'orinesuno'a, mago'mo'e huno azana erisga huge aga rentege maka Isipi mopafina osugahie. ⁴⁵Nehuno Ferro'a agi'a Josefenkura Zafenat-panea'e huno antenemino, Oni (mago agi'a Heliopolis) havi mono kva ne' Potifera mofa Asenati amigeno nenaroza hu'ne. Higeno Josefe agra Isipi mopa agu'afi vano hu'ne. ⁴⁶Josefe'a 30ti'a zgegfu huteno Ferro avuga Isipi kini nete uhnati'ne. Josefe'a Ferro avure mani'nenono kana anteno Isipi mopafi vano hu'ne.

⁴⁷Ana 7ni'a zgegfumofa agu'afina ne'zamo'a ana mopafina ampore'ne. ⁴⁸Hutegeno maka ne'zama 7ni'a kafufi Isipi mopafi fore'ma hiana eritru huno ranra kumamofa no agu'afi ante'ne, maka'a ranra kumateti eri'za e'nazana ana kumate nompri eritru hutere hu'naze. ⁴⁹Josefe'a ana nehuno witi rgama (grain) eritru hu'neana hagerinkenafi ksepankna huno zogi atru hu'ne, huganteno mago'ene sigerire hantiga osu'ne. Nankure nompina aviteno herfi ramigenoe.

Josefe ne'mofavremofa naneke

⁵⁰Agate kna fore osu'negeno, tare ne'mofavre Josefena fore humi'ne, Oni havi mono kva ne' Potifera mofa'mo Asenati kse ami'ne. ⁵¹Zge ne'mofavre agi'a Josefe'a Manase'e huno antemi'ne, nankure knazama eri'noane, nenfa nonku'enena Anumzamo eri nagekni nante'ne. ⁵²Anante ne'mofavre nenteno agi'a Efremi'e huno antenemino anage hu'ne, natazampi mani'noa mopafi Anumzamo nazeri rga renante'ne.

⁵³7ni'a kafumofa agu'afi Isipi mopafima ne'zamo ampoma'renereti vgaregeno, ⁵⁴Josefe'ma ke hu'nere, 7ni'a kafumofa agate kna egeno miko'a mopa kaziga aga'zanku huva re'neanagi, Isipi mopamofa agu'afina bretia me'ne. ⁵⁵Tusi zamagazanku maka Isipi mopafi nehu'za, Ferontega bretigu zvike hzageno, Ferro maka Isipi vahera zamasmino, Josefente vinkeno'ma, na'ane naneke ma tmasmisiana ke hniaza hiho. ⁵⁶Maka kaziga mopa kagi'afi zamaga'zanku hzageno'a, Josefe mika feno nona anagige'za Isipi vahe'mo'za anampinti miza se'naze, ana nehigeno tusi'a agate'zamo Isipi mopafina fore hu'ne. ⁵⁷Zamagazamo maka kaziga mopafina hige'ze maka kaziga mopareti vahe'mo'za, Isipiti witi ne'za zimia Josefenteti eme miza hu'naze.

Josefe afuhemokizmi Isipi huzmantage'za vu'naza naneke

42 ¹Jekopu'ma Isipi moparega witi me'ne kema nentahino'a, ne'mofavre naga'a zamasmi'ne, Na'a higeta ovufi avufi nehaze? ²Jekopu anage hu'ne, keho, antahuana Isipi mopafina witi ne'zana me'ne, vuta ana moparegati ome mizaseta eho, ofrita manisunema hanuta. ³Hige'za Josefena 10ni'a afuhe'za Isipiti witi miza senaku urami'naze. ⁴Hianagi Jekopu'a Josefe negna Benjaminina atregeno afuhe'zanana ovu'ne, agra anage hu'ne, hazenke erizanku koro hue. ⁵Hige'za zamaga'zamo' a anazanke Kenani mopafinena hige'za Israeli amohe'za ke hiaza hu'za witi ne'za miza senaku ruga'a vahe'ene e'naze.

⁶Josefe'a ana knafina ana mopafina kegva kri'ne, agritetike maka ana mopafi vahe'mo'za eme ne'zana miza se'naze. Josefe afuhe'za agrite e'za zamarena reza kepri mopafi hu'naze. ⁷Josefe'a afuhe'i zamugosafi nezmageno, onke vahekna nehuno hanve'ane ke huzmanteno, anage hu'ne, Igati e'naze? Zamagra anage hu'naze, Kenani moparegati ne'za miza senaku e'none. ⁸Josefe'a afuhe'ina zamageni hianagi, zamagra agrira keni' osu'naze. ⁹Josefe'a ko'ma afuhe'inte ava'na kezamte'nea aghesa nentahino, anage huno zamasmi'ne, Vahe'mo'za kva osu mopati kenaku tamagra afure vahe e'naze. ¹⁰Hianagi Zamagra anage hu'naze. A'o, rantimoka kagri eri'za vahe'mota ne'za miza senaku e'none. ¹¹Tagra magoke ne'mofo mofavre nagare, tamage vahe mani'none, eri'za nagaka'mota, tagra mopa afure' vahera ome'none. ¹²Anage hzanagi ke'zmi rezmanteno agra anage hu'ne, A'o, kegva osunona mopati kenaku tmagra e'naze! ¹³Zamagra asmi'naze, eri'za vahe'kamota mafka 12fu'a mani'none, magoke ne'mofo ne'mofavre naga'a Kenani moparetire, amitenamo'a nerfa'ene mani'ne, hanki magotimo'a hago fri'ne. ¹⁴Hianagi Josefe'a amanage huno rentase hu'ne, Ko'ma neramasmuane, tamagra mopati afure vahere. ¹⁵Ananku hu'na tamagenoka nehue, Fero avufi hanve'ane ke nehue, ama kumara atreta ovu'nesageno neramagna are' etene! ¹⁶Mago'mofo huntkeno nermagna ome avreno eno, ruga'amota kinafi mani'nesageno, ke timimofo tamagenoka hugeta hzana, tamagra tmagu'areti tamage hu'nafi. Hanki havigema hanuta Fero avufina, tamagra tamage huta mopati afure vahere. ¹⁷Ana mafka mago kepi, taregi magoki zge kinafi zamante'ne.

¹⁸Taregi magoki zge (3) knarera Josefe amanage huno zamasmi'ne, Nagra Anumzamofonku koro nehugu amana'ma hnazana manigahaze, ¹⁹Hagi tamage vahe'ma mani'nesuta, atrenkeno mago nermafu kina huno mani'nena, ruga'amotma witi ne'zantmia erita zamaga zankuma nehaza naga tamirega viho. ²⁰Hianagi nermagna avreta nagrite ehanatiho, anama nehnageno ketamimo'a tamagesesigeta ofri'gahaze. Hige'za kema zamasmiaza hu'naze. ²¹Zamagra zamagra nehu'za, tamage nergnana

haviza hunte'none, na'ankure negonkeno agra o'e nehigeta, antahiomuna nona'a ana knazamo'a tagritega ne-e. ²²Rubeni ke nona'a amanage huno zamasmine, Nagra ontmasminofi, Kumira mofavre'mofona huonteho, nehugeta ke'nia antahi onami'nazane. Meni agri koramo nona'a tesiramie. ²³Josefe kezmia nentahino ontahi vahekna hu'ne, na'ankure ke akrehu vahemo amu'nozamifi mani'nenonaneke akrehe huzmasmine. ²⁴Zamatreno vuno zavi ome ate'ne. Huteno eno eme kema hunezmino'a, eri'za vahe'a zamasmige'za Simeon azeri'za zamufi azante nofi anakinte'naze.

Simeon nezmagnanteku hu'za azeri Isipi ante'naza naneke

²⁵Huteno Josefe higeza witi ne'za beki ku'zmifi eriri nezmante'za, zgo zimia ana zanke hu'za beki kuzmifi eriri zamante'za, kantega nevu'za nemema vnaza kave'ene eriri zamante'naze. ²⁶Hige'za donki afu'zmimifo agumpi witi ne'za eri'nazana ante'za anantetira atre'za vu'naze. ²⁷Kantega umsenaku harega mago'mo donki afu'amofa ne'zama aminaku beki ku'a eriheta huno, keana, beki ku'amofa avazare zgoa me'negenonaneke. ²⁸Afuhe'igizmi anage huno zamasmine, keho, zgonia ete'za nami'naze, beki ku'niafi eriri nante'naze. Zamasumnamo uramigeza, zamahirahi nerege'za rukre hu'za ovufi avufi nehu'za, anage hu'naze, naza ama zana Anumzamo'a hunerante?

²⁹Kenani mopare Jekopu nezmafante unehnati'za, maka inankna zama fore huzmi'nea zankura asminaze. ³⁰Ana nera, mopare kegva kri'nea ra ne'mo'a hanve kefintike kea hurmine, tamagra mopati afure vahe e'naze huno hu'ne. ³¹Hianagi tagra anage huta asminone, Tagra tamage vahe mani'none, tagra afure vahera omninone. ³²Tagra 12fu'a kogna nagare, magoke ne'mofo mofavre nagare, magotimo'a omnine, hanki nergana'a nerfa'ene menina Kenani moparega mani'ne. ³³Ana nera, ana mopafi kegva kri'nea ra ne'mo amanage huno tasmine, mago nermafuna nagrite netreta, witi ne'za enerita nontamirega viho. E'inama hanagena, tamage vahe mani'naze huna nagra antahigahue, ³⁴Hianagi nermagnana avreta enkena negena, tamagra tamage huta mopa afure vahera omninaze hu'na antahi rami'nenonaneke. Nermafuna atranena ama mopafina ketami omnena vute'ete huta ne'zana miza segahaze. ³⁵Beki ku'zmifinti ne'zama eri'za e'naza herfinaku, nehu'za kazana ana kognamokimi zgo'zmia kona anakinare beki ku'zmifi metere hu'ne, ana zgo nezmafa'enema nege'za tusi koro hu'naze. ³⁶Nezmafa Jekopu amanage huno zamasmine, Tamagra mofavre onte ne' kna hunenantaze, Josefe fanane higeno, Simeon fanane higeno, Benjaminina ana zanke huta avregahaze, ana maka zamo'a ha' renante. ³⁷Rubeni nefana asmino, Benjamin avre'na omesnugenka tare ne'mofavrenia znahe frio, nagri kvafi antege'na ete'na avre'na eme kamineno. ³⁸Nehigeno Jekopu'a anage hu'ne, Nagri

nenmofo'a kagranena uoramigahie. Nankure nefu'a fri'geno, agrake mani'ne. Kama nevnageno ha'zamo kantega tutagihama hanigeno'a, efe nazokara nazeri ante henkmatesankeno nasuzamo nahe frina (Seol) fri vahe kumapi umanigahue.

Ete Isipi vu'naza naneke

43 ¹Ana knafi Kenani mopare tusi'a zamagate'za fore hu'ne. ²Isipi mopareti mizase'za eri'za e'naza ne'za nehna hzageno, nezmafa amanage huno zamasmine, Ete mago'ene vuta ne'zana osia ome miza seho. ³Hianagi Juda'a amanage huno nfa'amofona asmine, Ana kva ne'mo hanvenentake ke huranteno amanage hu'ne. Tamagra nagna tmimofoma avreta ome snageno tamufina ontamagesosue huno higeta e'none. ⁴Kagrama naganatima atresankeno'ma tagra'nama e'sniana, tagra uramita nezanka'a ome miza huta egahune. ⁵Hianagi kagra'ma atresankeno'ma tagra'nema omesniana tagra ovugahune. Na'ankure, ana Isipi kva nemo'a amanage huno tasamine, tamagna timimofoma avretama ome snazana nagri navumo'a ontmagegahie. ⁶Anage nehazageno Jekopu'a (Israeli) amanage hu'ne, Tmagra nahigeta ana kva nera magora nagna'tia mani'ne huta asminageno ananke hu'ne? Ana nehuta nagrira tusi'a zampi nazeri haviza haze. ⁷Hianagi zamagra asmi'za, ana kva ne'mo'a hakaremota tantahige tantahage huno tagriku'ene, vahetigu'ene, tantahigeno amanage hu'ne, Nermafa'a ofri amne mani'nefi? Hagi magora nermagna'a mani'neo? Huno higeta tagra ke nona'a asminone, tamagra nermagnana avreta eho hani'a naneke ontahineta hu'none.

⁸Anage hu'za asmitageno Juda'a nfa'amofa Israeli (Jekopuna) asmine, Ana ne'mofavre, Benjaminina huntogeno nigrane esnigeta otita va'mneno, hanigeta tagrane kigrane mofavre'zgatine tagakura ofrita mani'mneno. ⁹Nagrani'a huvempa huankina kegva krintegahue, hanki kvama hu'soe osnugenoma kna'ma eri'na ana knazana nagra erigahue. Hagi kagri kavure'ma avre'na omesuna nagra ana knazana eri kofigahue. Nehanugenno ana knazamo nigrane mevava hugahie. ¹⁰Hianagi tagrama avega ontetasina, tagra menina tare zupa vute ete huta nezana eruntetine.

¹¹Nezmafa Israeli'a amanage huno zamasmine, Ana'ma hu'nesniana amanahu hiho, mago'a knare'zama mopatifi me'nesiata kutamifi eririta osi'a tusa masevene (bam), tumemofo rima'ane, (honey) mananentake fukine, mananentake zafa rine, pistasios zafa rgane, almon zafa rgane eri'neta vuta ana kva nera museza ome amiho. ¹²Ana nehuta mago'a zgone eri aguheta (dabol) tamazampina erineta viho, erita e'naza zgone erita viho, zamage kaniza eririnegahaze. Erineta omehefi amiho. ¹³Ana nehutma ngana tmi'mofona otita ame huta avretma ete ana kva nete

vinkeno, ¹⁴hugahananagi hihamu'ane Anumzamo ana ne'mofu avure asunku hurmantesuno'a, mago nermafune, Benjamenigizni znatre sanigeke tamagrite egaha'e. Hagi nagrama mofavre ni'amokizmiguma nasunku'ma hanuna, nagra nasunku nehuna manigahue. ¹⁵Jekopu'a anage hige'za mofavre naga'amo'za ana muse'zana (gift) eneriza, mago'ane zgoa eriguhe'za zamazampi eneriza hagi, Benjameni nevre'za oti'za Isipi moparega vu'za ana kva ne' Josefe avure u'oti'naze.

Josefe'a Benjameni age'nea naneke

¹⁶Josefe'a ngana'amofu Benjameni negeno noma'afi eri'za ne'a amanage huno hunte'ne, ama vahera zamavrenka nomp ome nezmantenka mago afura ome ahenka, krenka retro huo, na'ankure zamagra, nigrane ferura ne'za negahune. ¹⁷Eri'za ne'amo Josefe ke hiaza huno zamareno Josefe nomp ome zamante'ne. ¹⁸Hianagi Josefe eri'za ne'mo, nomp zamareno vige'za kore nehu'za amanage hu'za hu'naze. Ko'ma kutifima eriri rantene'nea zgoreku huno tavre noma'afi tanteankino tantahinegeno tazerino kazokzo eri'za vahe'a trohu ranteno mika donki tine avre vgaregahie. ¹⁹Anage nehu'za Josefe nomp eri'za ne'te vu tva'o huza no kasante ome asmi'za, ²⁰amanage hu'naze, ra netimoke, tagra amare e'tama nezama eme miza senona naga e'none. ²¹Hianagi ne'zama miza huteta, kantega umsenaku hunte kutima, eriheta huta konana, magoke magokemota zgotima atre'nona kante kutimofu avazare me'negeta keteta ama erita e'none. ²²Aza ana zgo'a eririranteneo e'i ana vahera onke'none. Antahita keta osu'neta ana zgo'ne ete mago'ane ne'za miza hanune huta eritru huna zgonena erineta e'none. ²³Josefe eri'za ne'mo amanage huno zamasmine, knare huta mani'gahazanki koro osuta maniho. Kagri Anumzane, nermafa Anumza nemo kutmifina zgoa eririrmantene. Nagra zgo tmia ko nmizage'na eri'noe. Nehuno Simeoni ome avreno eme zami'ne. ²⁴Ana huteno Josefe eri'za ne'mo nomp zamareno eno, tina tagi zamige'za zamaga sese nehazeno, donki zamimofona nezana zami'ne. ²⁵Ana nehu'za, Josefe agra noma'afi feru ne'za negahune hige'za antahinagu avega anteza mani'neza musezana (gift) eri antente'naze.

²⁶Nontega Josefe ne'ege'za nege'za, musezama (gift) eri'za e'naza eme nemi'za mopafi zamarena reza avuga kepri hunte'naze. ²⁷Anante Josefe'a mani'za zamigu zamantahige'ne, Ko'ma nermafanku'ma ozafa reno mani'ne hutama nasmi'nazana, agra menina knare huno mani'nefi? Ofri mani'neo? ²⁸Zamagra anage hu'za asmi'naze, Nerfa'a eri'za nekamo'a knare huno ofri mani'ne. Anage hu'za nesmi'za agafi kepri hu'za razampi antahimi'naze. ²⁹Ana hunentageno kesga huno negna Benjameni, nerera mofavre negeno amanage huno hu'ne, ama mofavrea, henka mofavre hutama nasmi'naza mofavrefi? Josefe anage nehuno, Anumzamo knare huno mofavrenimoka kza huno agampu hugantegahie. ³⁰Josefe'a

negna negeno zvi atentesia agesa higeno hantka huno zamatreno zvi ate'sia kumaku hakreno nemsefinka asafi (rum) ufreno zavi ome ate'ne. ³¹Zaviteteno avugosa sese huteno asu'zana eri rentrako nehuno megia' atiramino, amanage huno zamasmine, Ne'za atinketa namneno. ³²Josefe ne'zana arure atimi'za, zamagrira arure atinte zamante'za, Isipi nagamo'za zamagragu nenaze, na'ankure, Isipi vahe'mo'za Hibru vahe enena magopina Bretia onegahaze. Isipi vahe'mo'za Hibru vahe enema magopi kave nezankura zamesra huno zamagote'ne. ³³Hagi pusa mofavrereti agafa huno fore hunare, ranteti vunoosite zamazeri rempi huzmantage'za mani'ne'za tusi'a zampi zamano nevazige'za zamagogogu nehu'za ovufi avufi hu'naze. ³⁴Josefe itareti eri'za vahemo'za nezana refko huza afuhe'i ome ante nezmante'za, Benjameni tafepina 5fu'a vahe'mo'za nega neza antente'naze. E'ina hige'za magopi mani'ne'za knare hu'za ne'zane, tine nene'za muse hu'naze.

Josefe'a negna kupi, kapu eririnte'nea naneke

44 ¹Anante Josefe eri'za ne' asmimo, beki ku'zmifina eri'zama vnaza avamente ne'zana eri vite nezmantenka, zgo'zmia zamente zamente ku avazare eriri' zamantetere huo. ²Nagri kapua, Silvare kapua nagna zami'mofo ku avazare eriri nentenka, witi'are zgone eririnto, higeno, eri'za ne'mo Josefe asmiaza hu'ne. ³Msa hu'za nehigeno, ana vahetmina huzmantege'za donki zamine vu'naze. ⁴Zamagra rankumara atre'za afete ovu'nageno, Josefe eri'za ne'a asmimo, otinka ana vahera zamaririnka ome zamazeri sunka, anage hunka zamasmio. Na'a higeta knare'zama huma nermanteana havizana hunte'naze? ⁵E'i ana kapufintira ranimo tinkera none, hagi henkama fore'ma hania zana ana kapufintike nege. Tamagra havi avu'ava huta ranimofo kapu'a erita e'naze. ⁶Agra zamaririno ome zamazerino, anage huno zamasmine. ⁷Zamagra anage huza asmi'naze, na'a higeno ranimo'a amanahu kea hie? Eriza vahe kamota amanahu'zana huga osu'none! ⁸Keho, beki ku avazaretima zgoma haketa Kenani mopareti eritama kagrite e'nonana. Inakna huta tagra kagri ramofu nompintira silvane, golinena musufa segahu'ne? ⁹Ina eri'za vahe kamofu beki kupintima hakenka eri fore hnunka, ana mofona ahe frigeta, tagra rantimofo kazokzo eri'za vahe'a mani'mneno. ¹⁰Agra anage hu'ne, menina kema hzaza hugahue, iza'o eri nenige'na hakena eri fore hanumo'a, nagri kazo kzo eri'za ne' manigahie. Hanki mago'amota anazama osanamota knare hu'nazankita amne vugahaze. ¹¹Anage hige'za magoke magoke vahe'mo'za ame hu'za ku'zmi hanti mopafi ante'za, eri heta hzageno ana kapugu hakre'ne. ¹²Agra agafa huno nempuzmireti hakeno vuno nagna zamire uhnatino, ana kapua Benjameni beki kupinti eri fore hu'ne. ¹³Anante zamagra kukena zami sagne nehu'za, hakareza donki agumpi erinte'za ete rankumatega vu'naze. ¹⁴Anante Juda'a afuhe'zane

Josefe nonte ehanatizana, Josefe nompinka mani'negeza avuga mopafi ruzaganiza mse'naze. ¹⁵Josefe afuheigizmi zamasmine, na'a higeta havizana hu'naze? Tmagra ontahinazo, nagra kasnampa (divinesen) tro huna oku menenia'zana kena eri fore osugahuo? ¹⁶Juda anage hu'ne, na'ane huta ranimoka hugahune? Nanke hugahune? Inankna huta fatgo hu'none hugahune? Anumzamo kagri eri'za vahe'mofo kumira keno eri fore hu'ne, Antahio, tagrane kapu eri'negenka kenka eri fore hu'namo enena, ranimofo kazokzo eri'za vahere. ¹⁷Hianagi Josefe zamasmino, nagra einahu'zana osugahue. Ina nemofo beki kupinti kapu niama eri fore'ma hunemo kazo kzo eri'za eri nantegahie. Hagi ruga'amota nermafa hirega tamarimpa frune vugahaze. ¹⁸Juda'a Josefente erava'o nehuno, anage hu'ne, ranimoke, muse (plis) hue, knare kagri eri'za vahe'mona ranimoka kagesafina kea hugahuo, krimpa kna eri'za vahe kamofona huonto, kagrane Fero enena mago'zahu hu'na'e. ¹⁹Rantimoka eri'za vaheka'a tantahigenka, anage hu'nane, tamagrira nermafa ene nermagna enena manineo? ²⁰Tagra ranimofo asminone, nerfa'a ranafa re'ne, ranafa refinka osi mofavre ante'ne. Menina osi ne'mofo nempu'amo frigeno agrake nerera enena mani'negeno, nefa'a avesinente. ²¹Hagi kagra eri'za vaheka'agu anage hu'nane, ana mofavre'a avreta nagrite enkena ka'nenno hu'nane. ²²Hianagi tagra ranimokagura anage hu'none, osi ne'moa nefana otregahie, hanki nefama atrenoma esigeno'a nefa'a frigahie. ²³Hianagi kagra eri'za vaheka'agura anage hu'nane, nermagnama avreta omesuta, nagri navufina onke'gosaze. ²⁴Anankema hutanketa tagra nerfa hirega kagri eri'za vahete uhnatita, tagra rantimo hia kea asminone. ²⁵Henka nerfa'a anage hu'ne, ete vuta osia ne'za ome miza seho. ²⁶Hianagi anage hu'none, tagranema nergana'ma ovanigeta tagra uoramigahune. Ana ne'mofo avugosa nerganama tagrane ovanigeta onkegahune. ²⁷Kagri eri'za vahe nenfa tagriku anage hu'ne, tamagra antahi'naze a'nimo tare ne'mofavre kse nmi'ne. ²⁸Mago'mo'a fanane hige'na nagra anage hu'noe, mago'a zgamo aheno tgana vazinegahie nehu'na, nagra mago'enena onke'noe. ²⁹Mago'ene ama negnama avreta vnagenoma, anahu hazenke erisigeta, nagrira efe nazokara nazeri ante henkma tesankeno nasuzamo nahe frina, fri vahe kumapi (Seol) umanigahue. ³⁰E'ina hu'negu kagri eri'za vahe nerfante nagra vanugeno, ana mofavrema tagrane omesiana, nerfa'a agu amena ana mofavrefi ante'ne. ³¹Nerfama kesigeno ana mofavremo tagrane ovanigeno'a, agra frigahie. E'inama eri'za vahe ka'mota hanuta, nerfana eri'za ne' ka'a efe azoka'ra azeri ante henkma antesunkeno asuzampi mani'nenno, fri vahe kumapi (Seol) umanigahie. ³²Eriza vahe'kamona ana neku huvempa huna asmino'e, nenfaga nagrama avre'na omesugenno'a ana knazana nagrite mevava hugahie. ³³E'ina hu'negu muse (plis) hugantoanki natrege'na nagra eri'za vahe kamona nergna nona hu'na kazo kzo eri'za ranimofonte eri'nena, nergnana atregeno nefuzane

vino. ³⁴Na'ankure Asuzamo nenfana azeri haviza huzanku nentahuanagi, inankna hu'na nenfantera vugahue nenagnama ovanige'na?

Josefe'ne huno afuhe'inte huama hu'nea naneke

45 ¹Josefena, asuzamo avitegeno, anante oti'naza vahe ranke huno hakare amota amafintira meg'i'a atiramihio, higeza atiramizageno, Josefe'a nefuzane mani'nenno huama huno, nagra Josefene huno zamasi'ne. ²Ranke huno zavi netege'za Isipi vahe'mo'za nentahizageno, Fero nompni nemniza vahe'mo'zane antahi'naze. ³Anante Josefe afuhe'i'gizmi anage huno zamasm'i'ne, nagra Josefe'ne! Nenfa'a knare huno maninefi? Higeno, afuhe'mokizmia, tusi'a zamagogo fege'za magore hu'za kea osu'za mani'naze.

⁴Anante Josefe afuhe'i'gizmigu anage hu'ne, Muse (plis) hurmantoanki nagrite erava'o hiho. Zamagra anante erava'o hzageno. Agra anage hu'ne. Nagra, tamagri nermafune Josefena, tamagrama zgorema natrage'za mizase'za Isipima e'nazane. ⁵Menina tamagra tamagazegura osutma tamagra ramagra tamarimpa oheho, na'ankure tamagra mizante natrage'na amafina eomani'noe, na'ankure Anumzamo hunantegenaga egota hu'na ofrita manisagu emani'noe. ⁶Na'ankure agate'zamo tare (2) kafu evigeno, 5fu'a zgegfu amne me'neankiza hoza eri'za kriza onkafigahaze. ⁷Anumzamo hunantegenaga ofrita manisagu egotena e'noe, ama mopare tmazeri'se nehu'na, agate kna'afina tmagri'ra tmazama hanuana tusi'a knare kankamupinti tmaza hugahue. ⁸E'ina hunegu, tmagra'tmi hunantegenaga ome'noe, Anumzamo, Agra'a hunantegenaga Fero antahintahi ami'ne (edvaesa) noma'afina ra vahe tro hunantegenaga mika Isipi mopare kegvagri noe. ⁹Ame huta nenfa hirega vuta, anage huta ome asmiho, negamofu Josefena, Anumzamo ra vahe Isipi nazeri oti'neanki, avega ontenka ko hantka hunka eno, huta ome asmiho. ¹⁰Kagra Goseni mopare, nagri tvaonte emanigahane, kagrane, mofavre naga ka'ane, kagehe'zane, sipisipine, meme kevune, bulimakao kevune, mika zanka'ane emanigahane. ¹¹Anantega mani'nenagenaga nagra ne'zana tamigahue, 5fu'a agate kafumofu agu'afina, kagrane, mika nonka'afima maninaza vahe'tminema omesutma tamunte omnena frigahaze. ¹²Keho, tamagra negageno, nagna'nimo Benjameni enena nege, nagra nagipinti ama kea tamagrira nermasmue. ¹³Vuta nenfana mika knare soe zani'a, Isipima me'negeta tamagra kazana ome nesmita, ko ame' hutma avreta kma eramihio. ¹⁴Anante negna Benjameni anankempi ome azeri anukino zvi atente'geno, Benjameni'a ana zanke huno zavi ate'ne. ¹⁵Josefe'a mika'nefugizmi zamantako nehuno zavi atezamantetege'za, henka nefu'zane keaga hu'naze.

¹⁶Josefe nefu'za e'naze ke nentahino, Fero ene eri'za vahe anena muse hu'naze. ¹⁷Anante Fero'a Josefenkura anage hunka negfu'gizmia zamasmio hu'ne, amana

hiho, kutuntamia donki afu agumpi erintetma avreta Kenani moparega viho, ¹⁸vutma nermafane maka nontmifi nemniza vahe ene zamareta nagrite enke'na, soe mopa Isipi nagra taminena anampi maniho. ¹⁹Menina nagra hurmantoe, hosi afumo avazu huno vano nehia ita (karis), Isipiti erita vuta osi mofavre tamine, a'ne tamine, nermafana avreta eho. ²⁰Tmagra miko zantamigura tamagesa ontahiho, Isipi mopareti knare'za erigahaze.

²¹Anante Israeli amohe'za ke zamasmiaza hzageno, Josefe hosimo arenteno avazu nehiaza (karis) Fero asmiaza huno nezmimo, kantega neme vnaza ne'zane zami'ne. ²²Mago mago'mofona Josefe'a magoke kukena zamitere nehuno, Benjaminina 5fu'a kukenagi, 300ti'a silva zgone ami'ne. ²³Nefana ama zama'a antente'ne, 10ni'a donkimifo agumpi knareza Isipi me'neaza eri nenteno, 10ni'a donkimifo agumpi witi rgane, raisi rgane (grain) nezmino, nezmafa kantega ne-eno neme esia kave antege'za eri'za vu'naze. ²⁴Anante Josefe huzmantege'za atre'za vuza nehzageno, anage huno zamsmi'ne, kantega nevuta ha' fra osiho. ²⁵Anante zamagra Isipitira eza Kenani mopare nezmafa Jekopunte e'naze. ²⁶Zamagra anage hu'za nezmafa asmi'naze, Josefe'a ofri amne mani'ne, tmage agra Isipi mopa miko kegva kri'ne, nehzageno ana kegura agesa tra'nereno antahi ozami'ne. ²⁷Hianagi zamagra mika ke Josefe huzmantenea ke, nezmafa eme nesmizageno nentahino, arenteno avazu huno vu'za negeno, nezmafa Jekopu agu'amo ksefa higeno muse hu'ne. ²⁸Anante Israeli anage hu'ne, ha knarere, mofavrenimo'a ofri amne mani'ne. Nagra vu'na ome kete'na henka frigahue.

Jekopu'a Isipi vu'nea naneke

46 ¹Huteno Israeli'a afufenoma'a miko enerino Isipi vu'ne. Bersibama unehnatino'a, afu aheno nefa Aisaki Anumzantega kre sramna vunte'ne. ²Kerage agu'afi, Anumzamo Israelina avanafi humino Jekopu, Jekopu higeno, Ama mani'noe. ³Agra anage hu'ne, Nagra Anumzamone, Nafakamofa Anumzane, Isipi vuzankura korera osuo na'ankure, nagaka'a Nagra zamazeri hakare hugahue. ⁴Kagrane magoka Isipia uramigahue, hagi Nagra tmage kvare'na ete mrerisugeno, Josefe kavurga erisu huno eri asegantegahie.

⁵Anage higeno, Jekopu Bersibati otino nevig'e'za amohe'za Fero'ma ome avreho huno zami'nea hosimo avazu hu'zampi (karis) nezmafa Jekopunki, ne'onse ne' mofa ene, a'ne zamigi huza anampi zamare'za vu'naze. ⁶Hakare afu zgagi, fenozmima Kenani mopareti eritru hu'nazane eri'za Isipi e'naze, Jekopu ene agehe'zane magoka maka erami'naze. ⁷Agri'a mofavre zgane, agehe'zane, maka mofa'ne zga'ane, agehemofone naga'ane, hagi agripinti fore hunaza naga'ane zamareno Isipi vu'ne.

Isipima Enaza Nagamofa naneke

⁸Ama'ne Israeli mofavre naga'mokizmi zamagia, Jekopu mofavre naga'ma Isipima vu'nazana. Rubeni'a Jekopuna agonesa mofavre. ⁹Rubeni

ne'mofavre naga mokizmi zamagi'a, Hanoki'e, Palu'e, Hezroniki anante Karmi'e. ¹⁰Simioni ne'mofavre naga zamagi'a Jemueli'e, Jamini'e, Ohati'e, Jakini'e, Zohari'e, anante Sauri'e Kenani kumate a'mofo mofavre. ¹¹Livai ne'mofavremo kizmi zamagi'a Gersoni'e, Kohati'e, Merari'e. ¹²Juda ne'mofavre naga'mokizmi zamagi'a Eri'e, Onani'e, Sela'e, Perezi'e, Zera'e. (Hianagi Erike, Onanikea Kenani mopare fri'na'e.) Hagi, Perezi mofavre treña Hezroni ene Hamulike. ¹³Isaka ne'mofavre naga'a mokizmi zamagi'a Tola'e, Puva'e, Iobu'e, Simroni'e. ¹⁴Zebulun ne'mofavre naga'a mokizmi zamagi'a, Seredi'e, Eloni'e, Jalili'e. ¹⁵E'i Leama, Padan-aram mani'nenō Jekopu kse ami'neana magoke mofara Diana'e. Ana miko ne'mofavrene, mofa'ne naga anena 33'a vahe forehu anante anante hu'naze.

¹⁶Gadi mofavre nagara, Zifioni'e, Hagi'e, Suni'e, Ezboni'e, Eri'e, Arodi'e, Areli'e. ¹⁷Asa ne'mofavre nagara, Imna'e, Isva'e, Isvi'e, Beria'e. Hanki, nezmasaro agi'a Sera'e. Beria ne'mofavre znagi'a, Heberiki, Malkieli'e. ¹⁸E'i, Zilpa ne'mofavre nagare, Labani mofa'amōfo Lea kato mofa ami'nea mofa'mo, Jekopunteti 16ti'a vahe forehu anante anante hu'naze. ¹⁹Jekopu nenaro Resoli ne'mofavre treña, Josefe ene, Benjameni'ke. ²⁰Josefe Isipi mopare umaninegeno Manaseke, Efraimike, fore hu'na'e. Asenati'a, Potifera Oni kumate (mago agi'a Heliopolis) mono kva ne'mofo mofamo, kse ami'ne. ²¹Benjameni ne'mofavre nagara, Bela'e, Besa'e, Asbeli'e, Gera'e, Neimeni'e, Ehi'e, Rosi'e, Mapimi'e, Hapimi'e, Ard'i'e. ²²E'i, Resol mofavre naga Jekopunteti kse zamante'ne. Ana miko'a 14ni'a vahe forehu anante anante hu'naze. ²³Dani ne'mofavre'a Husimi'e. ²⁴Naftalae ne'mofavre nagara, Jazili'e, Guni'e, Jezeri'e, Silemi'e. ²⁵E'i Bilha ne'mofavre naga'ma, Labani mofa'amōfo Resol kato mofa ami'nea mofamo, Jekopunteti kse zamante'ne. Ana maka'a 7ni'a vahere. ²⁶Hakare Jekopu naga'ma Isipima e'nazana, agri'pintima fore'ma hunante anante hu'naza nagare, hagi Jekopu ne'mofavremokizmi a'ne nagara anampinka ohampri'naze, ana miko'a 66si'a vahere. ²⁷Hagi Josefe Isipi umani'nenō mofavre erifore hu'neana, tare ne'mofavre kse znante'ne, ana higeno hakare Jekopu ene naga anema Isipi e'nazana ana maka'a 70ti'a vahere.

Jekopu'a naga'ane Isipi uhnati'nea naneke

²⁸Jekopu'a vunaku nehuno Juda huntengeno Josefentega vu'ne, Goseni kama eri anima hanigeno agrama vanigu hige'za, zamagra Goseni mopare e'naze. ²⁹Josefe hosi afu'a retro huno karisifi Goseni mrrerino nefa Israeli kenaku vu'ne. Anama avure e'hnatigeno'a, anankempi azeri anukino zvira zanra kna atente'ne. ³⁰Anante, Israeli'a amanage huno Josefena asmi'ne, Menina natrege'na mani'nenā fri'nenō, ofrinka knare hunka mani'nankena kvugosafina eme kagoe.

³¹Higeno Josefe afuhe'inku ene nefa nagaku enena amanage hu'ne, Nagra mrrerina Feronte vu'na, amanage hugahue, Nafuhe'zane,

nafanimofu naga enena, Kenani mopareti nagritega e'naze hu'na asmigahue. ³²Hagi zamagra sipisipi kva nehza vahere, traza nenaza afu korapa kva nehane, hagi zamagra sipisipi kevu zamine, afu kevu zamine, makaza zamine eri'za e'naze. ³³Fero'ma ke huno eri'za tamigu tamantahigenketa, ³⁴anage hugahaze, Tagrane nerfa zanena eri'za vahe kamota afu' kva huta korapa nehaze maninonte eta menima e'none huta, tamagrama hanageno'a, tamagrira tamatresigetma Goseni mopare umanigahaze. Isipi vahe'mo'za hakare afu kva vahekura, zamesra huzmante'za zamagonetaze.

Jekopu naga kevumo'za Goseni umani'naza naneke

47 ¹Anante Josefe vuno amanage huno Feronu asmi'ne, Nfa'ni'ane, nafuhe'zane maka sipisipi zamine, Bulimaka zamine, maka zamine Kenani mopa atre'za Goseni mopare emani'naze. ²Afuhe'impinti 5fu'a vahe zamareno Fero avure vu'ne. ³Fero ana afuhe'mokizmi zamantahigene, Nankna eri'za eneriza nagare? Hige'za Feronku asamiza, tagrane nerfa zane, tagehe'zanena eri'za naga kamota afu kva nagare hu'naze. ⁴Feronku anage hu'naze, Osi'a gna ama mopare maninaku tagra e'none. Eri'za vahekamokizmi afumofu ne'zana, trazana omnegeno aga'zamo Kenani mopare forehigu, menina muse (plis) hugantonanki eri'za vahe ka'a tatregeta Goseni mopare mani mneno hu'naze. ⁵Anante Fero'a Josefe asmine, Negfa ene, kafuhe'zanena kagritega e'naze. ⁶Isipi mopamo'a, kagri kvafi mane'ne, negfane, kafuhe'inena knare huno tre tre hu'nenia mopa zamige'za Goseni maniho, kegeno anampima knare vahema mani'nesiana huge'za nagri bulimaka kva hiho. ⁷Anage higeno Josefe'a nfa'a mofo avreno Feronte egeno, Jekopu Feronu asomu hunte'ne. ⁸Fero'a nama'a zgekfu hu'nane huno Jekopuna antahigene? ⁹Higeno Jekopu'a Feronku anage hu'ne, Ama menima upsa knama mani'noana, 130'a zgekfu hu'noe, kna navenesige'na osi'a kna mani'noe. Hagi nafahe'za maniza e'naza knafina, nagtere'za zaza kna mani'naze. ¹⁰Jekopu'a, Fero asomu hunenteno atreno vu'ne. ¹¹Higeno, Josefe nfa'a mofone, afuhe'ine zamavreno Isipi mopama knare huno tre tre hu'nerega, Rameses kaziga Fero'ma hu'nere, regori zamige'za mani'naze. ¹²Josefe'a nefane, afuhe'ine, nefa nompima nemniza vahe'ene, osi mofavre naga'enena, nezana mani'naza avamente zamine. ¹³Hianagi mika mopafina nezana omnetfa hu'ne, aga'zamo'a tusiza higeno Isipi mopafine, Kenani mopare'enena himamu hankavea omne'ne na'ankure, tusi'a zgereno mikaza tefnane hu'ne. ¹⁴Josefe hakare zgoma Isipi mopareti'ene Kenani mopareti'ma nezama eme miza'saza zgoa eritru huteno, Josefe'a erino Fero nompia ana mika zgoa ome ante'ne. ¹⁵Zgo zamima mika atre'za eri hnama Isipi mopare'ene Kenani moparema nehu'za, hakare'a Isipi vahe'mo'za Josefente e'za, Nezana tamio, nahnigeta kagri kavurera frigahune? Zgotia

hago atreta erihna hu'none huza hu'naze. ¹⁶Anante Josefe anage hu'ne, zgo tamima omnea nona'a, afu'zgatmi eme naminkena afu tamimofono nona huna nezana refko hurami'nenno. ¹⁷Hige'za afu zgazmia avre'za Josefente ageno, hosima, Sipisipima, memeki'ma bulimakaoma, donki afu'zgare nona huno Josefe'a nezana nezmino, nezanteti kegva ana zge kfufina huzmante'ne.

¹⁸Ana kafu vgarage'za mago zgegfure Josefente ete e'za, anage hu'naze, rantimoka kavurera fra okigahune zgotia mika hago atreta rantimoka eri'hnahune, hagi mika afurmina rantimofono suzane. Mago'zana omne'tfahie, hanki rantimoka tavufane, mopatine asi'zanke me'ne.

¹⁹Nahanigeta kagri kavufina tagrane mopati'nena frigahune? Tagri'ene mopatinena nezante miza hugeta, hagi tagrane mopatinena Feronte kazo kzo eri'za erinta mneno. Nehunka avimza tamigeta tagra ofrita mani'nesunkeno ama mopamo'a, trankino megusa avu'avara osino.

²⁰Higeno Josefe mika Isipi mopa nezanteti mizaseno Fero ami'ne, mika Isipi vahe'mo'za mopa zamia ne'zante atretere hu'naze, e'i zamagazamo'a zamazeri havizantfa hige'za atrageno, ana mika mopamo'a Fero mopa sevale'ne. ²¹Hagi Josefe'a, ana mika vahe tmina kazokzo vahere huno, Isipi mopamofono ruga raga atupa'regati zamareno, ranra kumatmimpi ome zamante'ne. ²²Hianagi mono kva vahe'mokizmi mopa miza ose'ne, Fero'a havi mono kva vahera ne'zana zamige'za nene'za mopa'zmia zgorera otre'naze.

²³Josefe amanage huno maka vea zamasmine, Keho, hago menina tmagri'ene mopatmi'nena Fero mizasemi'noe. Menina, avimza timia ama'ne, hagi tamagra hoza eritma hankregahaze. ²⁴Hagi ne'za hanti knarera 5fu'a ko'nama anaki'nutma mago ko'na Fero amigahaze. 4'a ko'na, hozafi avi krisaza zane, ne'zama nontamifi naga'ene ne'onse mofavremokizmi ne'za tamagra erigahaze. ²⁵Hige'za anage hu'naze, Kagra knare hurantanketa ofrita mani'none! Knare agampu ra'nimofono avurera hiankita, Fero kazo kzo eri'za vahe manigahune. ²⁶Anage hzageno, Josefe Isipi mopamofono tra kea ante'ne, ana knareti eno menima e'neana ananke avaririsageno Fero mago kona erigahie. Havi mono kvamokizmi mopamo Fero zana omne'ne.

²⁷Menina, Israeli vahe'mo'za Isipi mopare, Goseni agu'afi mani'ne'za, mika zana erisanti nehare'za, rama'a vahe fore hu'naze. ²⁸Jekopu Isipi moparera 17ni'a zgegfuo mani'ne. Jekopuma mani'noma e'nea zgegfua ana maka'a 147ni'a zgegfuo hu'ne.

²⁹Israeli (Jekopu) frisia knamo atupa nehigeno, mofavre'a Josefe ke huno asmi'ne, Muse (plis) hugantoanki kagrama nagrikuma kave'ma sinante'nunka, menina kzana fenka namopi antenka musezana hunaverinka tmage hunka huo, muse (plis) hugantoanki Isipia ase onantegahane. ³⁰Hianagi nagrama frisenuganka, kagra Isipitira erinka

vunka, vahe'niama asema nezmantafi ome asenanto, higeno, kema hanaza hugahue huno Josefe hu'ne. ³¹Agra anage hu'ne, tamage hu'na hugahue hanunka, huvempa huo higeno, tamage hu'na ana hugahue huno Josefe'a asmi'ne. Anante Israeli'a (Jekopu) kepri huno sipare mani'nenono hu'ne.

Jekopu'a tare Josefe mofavre asomu ke huznante'nea naneke

48 ¹Anama hutegeno, henka'a Josefena asmi'naze, antahinano, negfa'ma kri eri'nea nanekea hu'za Josefe asmi'zageno, Josefe tare ne'mofavre'a Manasene, Efraimi gizni neznavreno vu'ne. ²Vahe'mo'za Jekopuna ome asmi'za, konkono negamofu Josefe kagenaku ne-e hu'za hazageno, Israeli'a mraguzatino otino sipa'are mani'ne. ³Anante Jekopu'a Josefe asmi'ne, tusi'a Hanve'ane Anumzamo Lusi mopare Kenani fore hunamino asomu hunenanteno, ⁴amanage huno Agra nasmi'ne, Antahio, Nagra ha'nena fore huhakare hnageno hampriga osugahaze. Nagra kagrira rama'a vahe kami'nena, henka'a ama mopa kagehemofu zamisugeno zamagri mopa mevava hugahie. ⁵Menina kagra tare mofavre znante'nane, Kenani mopare mani'nogenka, kmama Isipi mopare mani'nenka, kse znante'nana mofavrea nagrire, Efremike Manasekea nagri mofavre manigaha'e. Rubeni ene Simioni enema manina'ankna hugaha'e. ⁶Hanki henkama ksentesana mofavre kagri mofavre manigahie, zamagra nezmafu zanagire makazana refko hu'za erigahaze. ⁷Hagi korapara nagra Padaniti neogeno, Resel frige'na nasunku hu'na kantega Kenani mopafi zavi eme ate'noe, afete Efrata me'nege'na, nagra Efrata vu kantega eme asente'noe, (e'i Betrehemie).

⁸Anante Israeli'a Josefe ne'mofavre neznageno, ama aza mofavre trene? hu'ne. ⁹Josefe nefanku anage huno asmi'ne, zanagra, nagri mofavre'rerene, Anumzamo amafi mani'nogeno nami'ne, Jekopu anage hu'ne, muse huanki znavrenka nagrite egena asomu huznantaneno. ¹⁰Menina Israeli'a ozafareno avurga ke'so'e osu'ne. Josefe'a znavreno urvao higeno, znanukino antako hu'znantene. ¹¹Israeli'a anage huno Josefena asmi'ne, nagra kagrira kvugosafina onkagegahue hu'na nagesa antahi'noanagi, menina Anumzamo natrege'na kagri ene, mofavre trenka'ane tamagoe.

¹²Anante Josefe'a nefa amoteti mofavre'a rarena neznavreno, avugati mopafi kepri hu'ne. ¹³Josefe tarega znavreno tmaga azanu Efraimina avreno Israeli aza hoga'a nemino, Manasena aza hoga'anu avreno Israeli aza tmaga'a amigene tvaonte mani'na'e. ¹⁴Manase'a nempu'amo mani'neanagi, Israeli'a tamaga azana, henka ne'mofu Efraimi asenire nenteno hoga azana, nempuamofu asenire anteno, azana anteganti antegma huno znanunte ante'ne. ¹⁵Asomu ke Josefe hunenteno amanage hu'ne,

korapama nenfa Abrahamu ene Aisakike Anumzamofu avure vano
 hun'a kna huno,
 nagrira Anumzamo mani'zaniafi sipisipi kva nehia kna huno kva
 hunanteno menina amagnare ehanatie.

16 Havi zampinti nza hu'nea ankeromo
 asomura hurnantegahie.

Nagri nagimo zanagripi me'nigeno,
 nenfa Abrahamukizni Aisakine zanagimo ana zanke hugahie.
 Hanki zamagra tusi'a vahetmi erifore hu'za miko mopafi
 manigahaze.

17 Josefe kegeno nefa aza tamaga Efremi asenire nentegeni muse
 nosuno, nefa azana Efremi aseniretira erino Manase asenire ante'ne.

18 Josefe'a nefana anage huno asmi'ne, nenfaga e'inahura osuo, amamo
 kota fore hu'ne. Tamaga kazana asenire anto. 19 Ana hianagi nefa'a i'o
 nehuno anage hu'ne, ne'nimoka nagra antahinoe, agripintira vahe fore
 nehinkeno rukazi huno tusi'a vahetami manigahie. Ana hianagi, agri
 negnapintira nefuna agtereno tusi'a vahetmi fore huno, miko mopafi
 rukazi huza ra kuma ante'za mani'gahaze. 20 Agra ana kna zupa asomu
 huneznanteno anage hu'ne,

kagrikura Israeli vahe'mo'za asomu kea anage huza hugahaze, e'ima
 Anumzamo Efremine, Manase gizni asomu huznanteneaza hugahie!
 Nehuno agra Efremina, Manase avuga avrente'ne! 21 Ana huteno Israeli'a,
 Josefena anage huno asmi'ne, kma nago, nagra hago friza hue, ana
 huanagi Anumzamo tmagrane mani'neni tmareno ete tmafahe'i mopare
 vugahie. 22 Sekemu mopa, kzinknonteti (bainat) ene atireti ene nagra
 Amori vahe zamahe'na hnare'noa agona mope, negfu'gizmi amu'nompina
 manisga hunanku, nezmisufintira ante tarese'na kagrira kamigahue.

Jekopu'a mofavre naga'a asomu ke huzmante'nea naneke

- 49** 1 Jekopu'a amanage huno ne'mofavre amokizmi zamasmine,
 Eme atru hinke'na henkama tamagrite fore haniazamofu naneke
 tamasmine'neni hige'za ageno, amanage huno zamasmine,
 2 Eme atru huta Jekopuna mofavre nagara tamagesa antahiho.
 Israeli'na nfatimi'mo'na hanua nanekeni'a antahiho.
 3 Rubeniga nagonesa mofavre moka,
 ese hihamu ni'afinti ksegante'nogenka
 zamagterenka mreri vahe mani'nanku, hanve kamo asga hu'ne.
 4 Hianagi ti hageno evia kna hunka, nagakafina ran kagia omnegahie.
 Na'ankure, negfa sipare mrerinka
 haviza hunka mago a'ni'a avazu nehunka sipani'a eri hi'mna vu'nane,
 mase sipa ni'are mreri'ne.
 5 Simioni ene Livaikea kogna mani'na'e.

- Ha' kazikno zaimo'a, mago'a vahe zamazeri haviza hugahie.
- 6 Nagri knare antahi antahimo'a, tanagri antahi antahifina omnegahie.
Nagra kema anakisapina omanigahue.
Na'ankure znarimpa ahenke'ne vahera akafrigaha'e,
Znagra musezampi vu'ne, buli Bulimaka agia agruna nofi akafrina'e.
- 7 Tanarimpa he'zantera tusi huneranantoe, na'ankure tnarimpa
hezamo'a arava ohegahie.
Tanarimpa nehena, hazenke vahe manigaha'e.
Jekopu'na nagri'pintira znatufe atra'nena, Israeli mopafi arure arure
hu'za manigahaze.
- 8 Judaga kafu kagnaza kagi erisga hugahaze,
Kagri kzamo ha' vahe ka'amokizmi zamanankempi megahie.
Kagri negfa ne'mofavremo'za kepri hu'za zamarena regahaze.
- 9 Judaga laioni anenta kna hu'nane.
Kagra nenamofoga ne'zga laionimo aheno nenaku kva hiankna hu'nane.
Kagrikura vahe'mo'za kagoro hugahaze. Mago vahe'mo'a kvako
osugahie.
- 10 Judaga kva vahe'mokizmi azompa kagripi mevava hugahie.
Kva vahe azompamo agiarere amunompi me'nesigeno,
Nafa'amo henka Sailo ehnatigahie,
Hanige'za hakare ranra kumate veamo'za agri ke erizafa hugahaze.
- 11 Donki anentara krepire nofi rentesnankeno manigahie.
Agaho donkima avesi'nesia krepri nofitema arentesigura antahi
muhara osugahie.
Kukena'a waini timpi sese hu'ne, na'ankure, ne'zamo'a amporegeno
nehna huga osu'ne.
- 12 Agra rama'a waini tina nenegu huno tare avurgamo'a koranke hu'ne,
agra rama'a afumofu amirina nenegu huno ave'mo efetfa hu'ne.
- 13 Zebuluniga hageri ankenare umanigahane.
Umani'nesanke'za vente'mo'za efre'za vu'za hugahaze.
Mopa kamofu agemo'a Saidon kuma atupare uhanatigahie.
- 14 Isakaga hanve donkie,
Tare fenonku'mofu amunompi manigsa hugahane.
- 15 Agrama kegeno knare manigsa kuma me'negeno,
ana kumamo knare zantfa hu'negeno,
hanave'a erigoteno eri'za eri'ne,
ana hu'neanagi henka'a kna'ane kazo kzo eri'za erigahie.
- 16 Daniga kva (jas) vahe tro hunka vaheka'a kva hugahane. Mago naga
Israeli kevufi mani'gahaze.
- 17 Ha' osifavemo kamofu ankenare mani'neno, hosimofu aga'me
rumpafi amprigeno, agumpi vu'nea ne'mo amefigati asga
hurami'ne.

- 18 Ra Anumzamoka nahoke ahesnanegu, kvega mani'noe.
 19 Gatiga kumza vahe'mo'za kahegahaze.
 Hianagi rukrahe hunka, zamagumpi zamarotgo hugahane.
 20 Asaga, hentofa neza eri fore hugahane,
 Rankva vahe zamenesia neza, hankre'gahane.
 21 Naftaliga, afi a' afu dia atregeno agareno viankna nehunka,
 knare so'e naneke'age hugahane.
 22 Josefega zafa azankunamo rga rente'nea kna hugahane,
 azankunamo ti ankenare me'nenno rga reno,
 pagagi huno kegina refitean kna hugahane.
 23 Ha' vahekamo'za atireti hanveti'za hara hunegante'za,
 kevea negahe'za, kazeri haviza hugahaze.
 24 Hianagi Josefena azamo'a oragesigeno,
 ati amo'a hanve tinkeno, keve ahesiana hantaga osugahie.
 Hanve nentake Jekopu Anumza'mofo azampintira evu oramigahie,
 ana Anumzamo Israeli vahe afu kva hiankna nehuno, zamagu'vazi
 havegna hu'ne.
 25 Na'ankure Jekopu'na, negfana Anumzamo kza nehuno,
 hihamu'ane Anumzamo asomu huneganteno,
 anagamu monafinkati asomu huneganteno,
 mopa agu'afinti tina hnatinigenka asomura enerinka,
 aminte karimpafinti fore hnaza mofavre'mo'zane asomura erigahaze.
 26 Kagri negfa'na asomumo'a, nagri nagehe'i asomura agatereno
 mevava agonagna huno mreri'ne,
 ana asomumo'a, Josefega kokovite me'nenige'za, kafuhe'za kage
 anagamute'za kagegahaze.
 27 Benjaminiga tusi'a ha' kragna (wolf) hugahane.
 Nanterampi freno zga ahenno traga hiankna nehunka,
 kinga'afina refko huno erino ome'mi eme'mi hiankna hugahane.
 28 Ama ana maka 12fu'a Israeli nagare, nezmafa asomu hunezmanteno
 zamasmine naneke. Asomu huzmanteno, mago'mago mofona
 agri'a avamente asomu huzmantetere hu'ne.

Jekopu fri'nea naneke

29 Jekopu amanage huno mofavre naga'amokizmi zamasmine, Nagra fri'na vahe'ni'ane umani knanimo'a kofta nehie. Hagi nafahe'ima ase zamante'naza mopare, havegampi ome asenanteho. Hiti ne' Efroni mopama mizama se'nefi ome asenanteho. ³⁰Makapela mopamofo havegampi Mamre kuma tvaonte Kenani mopa agu'afi, Abrahamu ana mopane havegane vahe asente'zane huno, Efroni'pinti mizama se'nea mopafi ome asenanteho. ³¹E'i anampina Abrahamune nenaro Serane ase'znante'naze, Aisakine nenaro Rebeka giznia anampi ase znantenafi, anampinke a'nia Liana asente'noe.

³²Ana mopane havegane Hiti ne' mofavre'finti miza se'neane. ³³Mofavre naga'amokizmi zamasmu vga reteno, agiarere sipare asuteno vgare asimu atrete'no (frino) naga'ane umani'ne.

Israeli fri'nea naneke

50 ¹Anante Josefe'a nefa avugosafi umseno, zvi atenenteno antako hunte'ne. ²Henka Josefe fri kerfare kva nehia eri'za vahe'a huzmantege'za, kehiaza hu'za avufga kasri'zanku agu'afina mago'a marasini nente'za eri soe hute'za Israelina (Jekopu) masve fre'za ante'naze. ³40ti'a zge gnafina e'i anazana huga hazankino, ana foti'a zge gnafina avufga eri soe hu'naze. Ana hzageno Isipi vahe'mo'za 70ti'a zgegnafi zamassuku hu'za zavira ate'naze.

⁴Anante zavi'ma atekna agatereno, Josefe'a anage huno Fero nompri eri'za vahera zamasmu'ne, tamagra menima nagri antahi namisuta, muse huramantoanki, Feron aamanage huta ome asmihio, ⁵nenfa'a huvempa ke hunante'ne, kma nago, nagra ha fri'za hue, nagrama kerigama Kenani mopafi kafintenofi anantega ome asenantegahane. Anage hu'negu, natrege'na eri'na mrerina nenfana ome asentete'na, etena egahue. ⁶Fero'a amanage hu'ne, anagamu vunka negfama huvempa huno kasmu'neaza hunka ome asento.

⁷Josefe'a nefa asenteku anagamu mrerigeno, Fero eri'za vahe'mo'zane, noma'afi (elda) kva vahe ene, mika Isipi mopafi (elda) kva vahe ene, ⁸mika Josefe naga ene, nefu'zane, nefa naga vu'naze. Hianagi osi mofavre naga'zmine afu kevu zaminena Goseni mopafi zamatre'za vu'naze. ⁹Anantega arenteno avazu nehia zahe'zane (karis), hosi agumpi ha' vahe ene rama'a vahe vu'naze.

¹⁰Ana vahe'mo'za vu'za Atad witi akru'a neharea kumate uhnati'naze, Jordani timofo kantu ankena, anante umani'ne'za tusi'a zavi netageno, Josefe ene avega hu'za vu'naza vahe'mo'zanena, ⁷nia zge gna nefantekura zavira ate'naze. ¹¹Ana mopafi nemniza Kenani vahe'mo'za kazana Atad witi akru neharazare zavi nete'za maninage'za, anage hu'naze, Ama'i Isipi vahe'mo'za tusi'a zavi atetere, nehu'za agi'a Abel-mizraim hu'naze, Jodani me'ne.

¹²Ana nehu'za Jekopu mofavre nagamo'za ke zamasmu'neaza hu'naze. ¹³Agri mofavre'mo'za kerfa'a eri'za Kenani mopafi vu'za, Makapela havegampi Mamre kuma tvaonte ome asente'naze, ko'ma Abrahamu, vahe asente mopa Hiti ne' Efroninteti, miza hu'nea mopafi asente'naze. ¹⁴Nefama agra asenteteno, afuhe'zane Josefe'a nefama asenteku mreri'naza vahe'ene maka ete Isipi e'naze.

Josefe'a afuhe'i kumi'zmi atre zamante'nea naneke

¹⁵Anante nezmafa frite'ge'za, Josefe nefu'za anage hu'naze, havizama tagrama huntenona nona'a, tagrira na'a hurantegahie? ¹⁶Zamagra

Josefena ke atrente'za, Nagafa'a frinaku nehuno, ¹⁷anage huta Josefena asmiho, narena rena muse (plis) hugantoanki, kase hagutere'za haviza hugante'nazana kumi zamia atrezmanto. Menina muse (plis) hugantoanki, negfa Anumzamofu eri'za vahe'mota kase hagutenone. Ana kema nentahino'a Josefe zvi ate'ne.

¹⁸Anante afuhe'za e'za Josefe avuga zamugosaregati umse'za anage hu'naze, antahio, tagra kagri kazo kzo eri'za vahere. ¹⁹Hianagi Josefe'a anage huno zamasmine, korora osiho, nagra Anumzana omni'nogu, keaga huormante'gahue. ²⁰Tmagra nagrira nazeri haviza hu'nazanagi, Anumzamo'a henkama knare'za fore hanigu huno, anazana hu'ne, zamasimu otresazegu ana hu'ne. ²¹E'ina hu'negu tamagra korora osiho, Nagra tamagri ene, neone mofavre naga enena tamazeri knare hugahue. Zamanukige antege nehuno, knare kegaga huzmi'ne.

Josefe fri'nea naneke

²²Josefe'a Isipi mopare nefa naga'enena mani'ne, Josefe'a 110'a zgegfu hu'ne. ²³Efremi mofavremo mofavre ante'geno, tata'a mofona ete ksente'negeno, hanki Manase ne'mofavre Makiri mofavre tata'amofu Josefe'a amote avrenteno keteno fri'ne.

²⁴Josefe'a amanage huno afuhe'ina zamasmine, Nagra friza hue, Anumzamo tmagrira ke kvagri rmanteneno, tmavreno ama mopafintira mrerino Abrahamuma, Aisakima, Jekopuma huvempa huzmante'nea mopare vu'gahaze ²⁵Anante Josefe'a Israeli ne'mofavre naga huvempa huno zamasmine, Anumzamo tmagrira kegva kri ramante'nea, zaferinani'a erita mreriho. ²⁶Ana huteno Josefe'a 110ni'a zgegfu mani'teno frige'za, avufga kasrizanku agu'afina mago'a marasini nenteza eri soe hute'za masve freza, zavoafi antageno Isipi mopafi mane'ne.

Ruti

Mago nagapi zamaga'zane, fri'zane fore hu'nea naneke

1 ¹Korapa'ma ke fagagohu vahemo'za (jasi) mopa kva hu'naza knafi, tusi'a zamagate'za Juda mopare fore higeno, mago nera Betrehem, Juda mopareti ne'mo, osi'agna Moapu umaniku nenarone, tare ne'ane zamareno vu'ne. ²Ana ne'mofo agi'a, Elimeleki'e, nenaro agi'a Naomi'e, hagi tare ne'amokizni znagi'a, Maloni'ene, Kilionike. Efrati naga nofipinti Betrehem, Juda mopafinti Moab mopare e'za emani'naze. ³Ana mopare mani'nageno, Naomi neve, Elimeleki'a frigeno, Naomi'a tare ne'mofavre'ane zamagraku mani'naze. ⁴Higeno tare ne'amoke Moapu mopareti mofatre ara erina'e. Magomomo agi'a, Opa'e, hanki magomomo agi'a Ruti'e. Ana nehu'za teni'a zgefpu naza anantega mani'naze. ⁵Anante mani'nageno Naomina, tare mofavre'a Maloni'ene, Kilionikea anazanke hu'ne fri'na'e. Ana hzageno, Naomina, tare mofavre'ane, neve'ene, fri'zageno, zavi neteno agraku mani'ne!

⁶Moapuma mani'nenno antahiana Ramo'a asomu huntogeno, agri'a vahepina nezamo'a avite'ma higeno'a, Naomi'a mopa'are vunaku retro nehigeno, nenoferokea, agrane vunaku tro hu'na'e.

Naomi'ene, Rutike Betrehem vu'na'a naneke

⁷Nenofero a'trene, agrane (Naomi) ne'maniza mopa atre'za vu'za Judama nevza kante uhnati'naze. ⁸Anante Naomi'a tarega nenofergiznigu anage hu'ne, tarega motna'a kma antahi'o, antatani'amomo nontega vi'o. Fri'naza nagate'ene, nagrite'enema tanagrama ha'a avu'ava zantera, Anumzamo'a tnagrira ana huno knare avu'ava huranantesie. ⁹Kasefa ve eritna nonku'ma hnapi'na Anumzamo'a knare'za huno kegva huranantegahie huno neznasmino, znagi antako nehige'za krafa hu'za zvi ate'naze. ¹⁰Hianagi znagra anage hunae, O'e, tagra kagri vahetega kagrane vugahu'e, huke asmi'na'e. ¹¹Hu'neanagi, Naomi nona'a anage hu'ne, Kuma tni'arega etetna vi'o, mofanimotna'a, Judama nagranema vna'a zamofona knare kegafa omne'ne. Nagra knare osu'noanki'na, mofavrea ksente'snugeno, anamo'a nernave zana

osugahie. ¹²Ku'ma taniarega etetna vi'o, mofa nimotna'a! Nagra ko tvava te'noanki'na ete'na arvea osugahue, nagrama antahi'na knare kna me'neanki'na meni kerge ve erina mofavre zga kse zamantegahue husine. ¹³Tanagra knare znavega ante'nesanke'ne, arave huga kantera ra hate'sino? Tanagra knare vea e'oritna ana kna'afina amnea mani'tesino? O'e, mofa trenimotna'e, naganena ovu tfaza hugaha'e. Na'ankure tanagrama eri'a knazana agtere'na nagra eri'noe, Ramo'a nagrira nazeri haviza hu'ne. ¹⁴Tusi krafa hu'za mago'ene zvira ate'naze. Anante Opa'a nenofera azerino antako nehuno, ana huo huno huma nenteana, Ruti'a tusi'za huno Naomina agzafeno anuki hampo'na hu'ne. ¹⁵Naomi'a anage hu'ne, Ko, neganunkna'a, vahe'ane, anumzama'a nehirega eteno nevie. Neganunkna amage antenka kumaka'arega vuo, huno asmi'ne.

¹⁶Hianagi Ruti'a ke'arera amange hu'ne, natrenka vuo hunka kagra tutura huonanto. Na'ankure, kagrama inantega vusanana, anantega nagra vugahu'e. Inante manisana, nagra anante umnigahu'e. Kagri vahe'mo'za, nagri vahe manigahaze. Kagri Anumzamo'a, nagri Anumza segahie. ¹⁷Inante'ma kagrama fri snantera, anante nagra frisnuge'za ase nantegahaze. Anumzamo'a nagrira tusi'a kna namigahie, nagrama nehua kema amage'ma osnugeno'a. Magoke'zana fri'zamoke tazeri pasegahie.

¹⁸Naomi'ma kegeno hampo'na tino agrane vugahu'e'ma higeno'a, tutu'ma huma nenteretira anante atre'ne. ¹⁹Higeke ana tarega'moke vuvava hu'ne Betrethem uhanatina'e. Betrethem ufrake'za, ana miko kumamo'za uma hnatina'a zankura tusi muse hu'naze. Ana kumate a'ne zgamo'za anage hu'naze, Ama ara Naomi'o?

²⁰Hianagi, Naomi'a ke nonazmi huno, Naomi'e (knaremo'e) hutma nagia ohetma, Mara'e (aka he'ne) huta nagia aheho, na'ankure Miko'zante Kva Hu'nea Hanave Anumzamo (Sovren) knare'zana huonante'ne.

²¹Amareti'ma atre'na vu'noana avitena vu'noe, hianagi Ramo'a nzampi omne kno eteno nvareno e'ne. Na'a higetma Naomi'e huta nagia nehaze, negazo Ramo'ma nagrima ha'ma renenante'no, Miko'zante Kva Hu'nea Hnave Anumzamo (Sovren) nagri'ma nasuzane, nata'zama nenamiana?

²²E'ina higeno, Naomi'ene tragote'noma e'nea ara, Moabuti a' Ruti'e, nenofero. Moabuti'ma e'ne Betrethem'i'ma ehanati na'ana, bali hoza agafa hu'za traga nehza knafi ena'e.

Boasi hozafi Ruti'a, eri'za eri'nea naneke

2 ¹Ana zupa Naomina neve kazigati vahe'a mani'ne, agi'a Boasi'e. Agra Elimeleki naga nofipinti afufeno ne' mani'nege'za, rama'a vahe'mo'za ke'za antahi'za hu'naze.

²Mago zupa Ruti'a Moaputi a'mo, Naomi asmino, natrege'na hozafi vu'na atresaza bali rga knarerema hunantesage'na tragama hanaza

naga zamage nevu'na zogi'nenno. Higeno Naomi'a mofa'nimoka, tagri tavutva'kinka amne vugahane huno hunte'ne. (Diut 24: 19) ³Higeno Ruti'a vuno bali rga traga nehaza vahe zamage nevuno evuramiama'a zogi atru huno vu'ne. Menima agra Boasi hozafi eri'zama omo eri'neana, agra Elimeleki naga nofipinti nere huno ontahi'ne.

⁴Anama nehia knafi Boasi'a Betrehem kumateti eno, hoza traga nehaza vahe'agu kezatino Ra Anumzamo'a tmagrane manigahie, hige'za zamagra nona'a, Ra Anumzamo'a asomu hugantesie, hu'za hu'naze. ⁵Boasi'a, hoza traga nehaza vahe'mokizmi kva ne' antahigeno, Amu zahufa ara aza naga nofipinti a' emani'ne? ⁶Bali traga nehaza vahe'te kva ne'mo anage hu'ne, Agra Moabuti zahufa are, Moabu kumateti Naomi'ene magoka ena'e. ⁷Ruti'a eme nantahigeno, Knare bali tragahu vahe'mokizmi zamage nevu'na, bali rga manute ananekisafinti evu ramisiamaa'a zogi atru hutere hugaho? Huno hige'na, knarere hunte'noe. E'neregati nantera agafa huno hampona atino tusi eri'za manigsa osu enerino, tona nompina osi'a kna manigsa nehie.

⁸Higeno Boasi'a anage Rutinku hu'ne, Mofanimoka antahi ankeru, mago hozafina atrenka vunka bali rga ome zogi atru osutfu huo. Kagra ama'na hozafinti'ra, atrenka ru hozafina ovugahane. Eri'za a'ne nagani'ane tragotenka eri'zana erigahane. ⁹Ke ankerenka vene'ne mo'za e'i'na hozafi eri'zana eri'zanki nehunka, eri'za a'ne naga zamage huo. Vene'nemo'za kvako osiho hu'na nagra zamasmig'ahue. Kagri'ma tinku kvesi snigenka, vunka vene'nemo'za ome afi'za eme ante'naza kvofinti afinka no. ¹⁰Ruti'a agiafi rena reno anuna mopafi avugosagati hunteno, agriku anage hu'ne, Nahigenka nagrira knare'zana hunantenka, nagrikura kagesa antahi nenamine, nagrama ru mopareti a'ma mani'noana?

¹¹Higeno, Boasi'a nona'a Rutinku anage hu'ne, Maka'zama negave'ma fri'nereti'ma negnoferoma huntanka e'nana'zane, negfane, anta'kane, mopaka'anema atretenka kora antahinka, kenka osu'nana vahe'enena emani'nana kagenke ka'a ko nagrira nasmige'na antahi'noe. ¹²Anama hu'nana nona'a, Ramo mizana kamisie. Knare kvukva zantera Israeli Ra Anumzamo nona huno ante avitegantesie, kagrama kva hunante'snie, hunkama hu'nana Anumzamo. ¹³Anante Ruti'a anage hu'ne, Kagra knare'za nagrira hunenantane ramoka, na'ankure nagra mago kagri eri'za ara omni'noanagi, kagra nazeri so'e nehunka, knare keaga hunami'nane.

¹⁴Henka ne'za nenaza knare, Boasi'a Rutinku anage hu'ne, Amare enka breti eme nenenka, hagi breti ka'a vinega timpi refru hunka no! Higeno bali tragahu vahe'mokizmi zamasoparega umani'negeno tevefi kre hagege hu'naza bali rga fko humigeno Ruti'a nenegeno amu higeno mago'a eriri'ne.

¹⁵Anante Ruti'a otino bali rga eri atru hunaku nehigeno, Boasi'a eri'za vahe'a zamasmino, Atrenkeno ama a'mo'a bali rga ko'nama anakinte'naza

amu'nompi vano nehuno zogino. Ahe onatiho. ¹⁶Anahu kna hutma agri tfana, ko'na anakinte'pintira rga'a rmina avazuhu atre'nenkeno agra zogirino, hagi i'o hutma huonteho.

¹⁷Ana higeno Ruti'a hozafinti bali rga zogi atru nehigeno kinaga se'ne. Anante agrama zogi atru huno hareno eriri'nea bali rgamofa kna'amo'a 10ni'o, 13ni'a kilo naza fore hu'ne.

Ruti'a, Naomi hirega vu'nea naneke

¹⁸Ruti'a zogirino, erino rankumate vigeno, nenofero'a nama'a zogirino e'neo ke'ne. Agra mago'a kre hagegehu balima feru nenegeni amu'ma higeno eriri'nea ne'zana Naomina hefimi'ne. ¹⁹Naomi'a, nenoferoni amanage huno antahige'ne, Inante menina bali rga eritru hu'nane? Inante erizana eri'nane? Aza'o kagriku'ma agesa antahino kza hu'nesimofona asomu huntegahie. Higeno Ruti'a nenoferoni aza'ene erizana eri'neo, nesmino anage hu'ne, Nagrama menima erizama eri'noa ne'mofa agi'a, Boasi'e huno asmi'ne. ²⁰Naomi'a nenoferonku anage hu'ne, Ra Anumzamo agrira asomu huntegahie, na'ankure Ramo fri'naza nagakura age oknino, mani'nona nagara so'e hunerante. Anante Naomi'a, Rutina asmi'ne, Ama'na nera tagri tvate kora mani'ne, agra tagri kegva hurantegahie. ²¹Ruti, Moapu a'mo ke nona'a anage hu'ne, mago'ane nagriku anage hu'ne, Kagra eri'za vaheni'a mokizmi zamate manitere nehnanke'za nagri hozafinti ne'zana tragahu vgaregahaze huno nasmi'ne. ²²Naomi'a, anante nenofero Rutina anage huno asmi'ne, Mofa'nimoka agri eri'za mofa'nene tragotenka eri'zante vnanana knare hugantegahie. Na'ankure ru vahe hozafi'ma eri'za omerisanana, hazenke'zamo kvufare egahie.

²³Ana higeno Ruti'a, Boasi eri'za mofane zgane tragoteno bali rga zogino eritru nehigeno, bali hozama tragahu eri'zamo'a vgaregeno, witi hozama tragahu eri'zamo'a anante vgare'ne. Ana eri'zama vgaregeno'a Ruti'a nenofero'ene mani'ne.

Naomi'a Ruti avumro ante'nea naneke

3 ¹Ana zupage Naomi'a nenofero Rutinku amanage huno asmi'ne, Mofa'nimoke, vahe'ma tragotenka noma mani'sana zankura nagra hakre'na kegantesugenka kagrira kagu vazisigenka knare hunka manigahane. ²Menina Boasi eri'za mofane zgane tragotenka eri'za eri'nana nera, tagri tvate knampatie. Ko! meni keragera, bali rga hare kuma tro huntenera bali rga akru haregahie. ³Hagi kagra ti fretenka, mna nevia msave kvufarera nefrenka, knare kukenaka'a kvate eri hutenka, bali rgama hare kumate uraminka vuo. Hianagi, ana ne'mofa avurega osunka ufraki'negeno ne'zane, tinena nevga reno. ⁴Agra retro huno vseku'ma hanigenka, vsesia kumara ke ankerenka, inante vsesifi kvua ketenka, agiarega omeri vkarenka umse'negeno, mago'azama

husana zana ksami'gahie. ⁵Ruti'a, ke nona huno Naomina asmi'ne, Hakare kema nasmina zana, nagra amne hugahue.

⁶Higeno Ruti'a, bali rga hre kumate vuno nenofero'ma maka asmi'no, e'inahuo huno asmi'nea kante ana hu'ne. ⁷Boasi'a ne'zama'a nehna huteno muse nehuno, bali rgama eri kevu vzinte'pinka mago asoparega umse'ne. Anante Ruti'a tkaureno ako heno, Boasi agarega frankera omeri zakeno umase'ne. ⁸Mase'nereti kerage amu'nomp mse rukrahe huku nehuno, anante keana mago a'mo agri agiarega mase'negeno keteno antri hu'ne. ⁹Boasi'a anage hu'ne, kagra azage? Huno antahi'gegeno, ke nona'a anage hu'ne, Nagra Ruti'ne, kagri eri'za mofare, hagi kagri eri'za are, a' navrento, na'ankure tagri naga nofi'mokizmi zamesi'zana, kagra Elimelekina mago korankinka, kagrake taza hugahane. ¹⁰Boasi'a anage hu'ne, mofa'nimoka Anumzamo'a asomu hugantegahie. Kagra vgare muse'za hu'naverina zamo'a, pusante asu'zana agatere, ksefa verero, fenoma'a me'nea netero, fenoma'a omne netera, a' erigante'nogura zamaririnka vono osu'nane. (Diut 25:5-10) ¹¹Menina mofa'nimoka korera osuo, maka zanku'ma nantahigesanke'na, nagra amne hugantegahue. Na'ankure hakare ra kumapi vahe'nimo'za hago knare kavukva ene a' mani'nane hu'za antahi'za kage'naze. ¹²Menina tmage, nagra kvate vaheka'a mani'noe. Hianagi, nagrira nagatereno magora tmazahu nera mani'ne. ¹³Meni kergera ama anante mase'negeno, hagi nanterampi a' erigantegahue hniana, knare hugahie, atregeno agra ana hino. Hianagi anama osugahue'ma hniana, nagra tmage hu'na huvempa nehue, Ra Anumzama mani'negu nagra ara erigantegahue. Amare mse'negeno ko atino.

¹⁴Higeno Ruti'a agafi mase'nereti, msa osu'negeno ko'atu hanimpi vahe'mo onke'are vu'ne. Boasi otino amanahu agha antahi'ne, Mago a'mo bali rga hare kumapi eno emase'nereti vie, kea ontahi tfa hiho. ¹⁵Ngo'ane agra anage hu'ne, amega kvufare'ma ruvnare'nana kena eritarenka azeri hampona huo, higeno azerigeno, 6si'a zupa balia herfi anteno anakino afunte kofi ante'ne. Ana huteno Boasi'a ra kumapi ufre'ne. ¹⁶Ruti'a nenofrontega vu'ne.

Ruti'ma nenofronte uhnatigeno, Naomi'a antahige'ne, Mikazamo'a inankna hugante'ne, mofa'nimoka? Higeno Ruti'a, maka'zama Boasi hunte'nea zana asmi'ne. ¹⁷Ruti'a anage hu'ne, Ana bali rgamofona, 27ni'a kilo naza kna'amo'a hu'nea, herfinteno nenamino anage hu'ne, Neganofrontega vusunka, kza avapara ovugahane hu'ne. ¹⁸Anante Naomi'a anage hu'ne, ako'henka mofa'nimoka avega ante'nenka ko, naza fore hugahifi. Na'ankure, ana nemo'a mani fru osu'nenno ana kna'zana mensi eri ante fru hugahie.

Boasi'a ana knaza eri fru hu'nea naneke

4 ¹Boasi'a ana kumate mrerino kasante umani'ne. Anante Boasi'a keana, Rutima asmino kva huntegahie hu'nea ne' egeno, anage hu'ne,

Nenfuga amare enka emnio, higeno anante emani'ne. ²Boasi'a 10ni'a ranra kuma kva vahe, zamare atru huno anage hu'ne, Amare emniho, hige'za zamagra emani'naze. ³Anante Boasi amanage huno ana nera asmi'ne, Naomi Moabu mopareti e'nenno, tagri vahe'mofo Elimeleki mopa mizante atrenaku nehige'na negasmue. ⁴Hige'na nagra tmage kazigati kasami fatgo hunaku nagesa nentahue. Amama mani'naza vahe'ene, ranra kva vahenimokizmi zamufi, kagrama miza sena aza hugahue hanunka, amne ana huo, hagi ana osugahue hanunka, nasmige'na antahi'nenno. Na'ankure kagra kagota hanke'na, nagra kagri kamage hu'noe. Ana ne'mo kenona huno, nagra mizase'na aza hugahue huno hu'ne. ⁵Boasi'a anage hu'ne, Ana mopa Naomi azampinti miza sesana zupa, Moabu fri'nemofu kento, Rutina nfa'aza hugahane, fri'nea ne'mofo naga zamagima erifore hnanke'za, ana naga'mo'za ana mopa erigahaze. ⁶Kvama hunttega ne'mo'a anage hu'ne, Nagra mizase'na azahuga osu'noe, na'ankure e'ina hanu'na nenfama namige'na erisanti hare'noa zana eri haviza hugahue. E'ina hu'negu nagrama huga'zana kagra huo. Na'ankure nagra mizase'na azahuga osu'noe.

⁷Amanahu avu'avara, korapa knafi'na Israeli vahepi me'neane. Mago'zama mizasekuro, azahu'kura, mago ne'mo agia ano zafino mago'mofo nemia zane. Higeno amanahu antahi'zamo'a mani'zamofu kankamu erifore huno Israelia vahera aza nehia zane.

⁸Ana higeno, Naomima kegva hunttega ne'mo'a, Boasinku anage hu'ne, Kagraka'a suza miza'so, nehuno aga nona zafi'ne. ⁹Anante Boasi'a ranra vaheku'ene, mika vaheku anage hu'ne, tamagra negesage'na tamagri tamufi menina Naomi azampintira, Elimelekima, Kilioni'ma, Maloni zantami'ma me'neana, nagra miza segahue. ¹⁰Nagra ana zanke hu'na, Moaputi a' Rutina azeri nfa'a nehue, Maloni kento a'mo nagri a' mani'nenno, fri'nea ne'mofo agi fnane hu'zanku zamagia erifore hanige'za ana mopare ene, vahe'afine, kuma'afinena fanane osugahie. Mika vahe'mota menina amazana tamufinti negaze,

¹¹huno higeno ana kumamofu kasante mani'naza vahe'ene, kumate ranra vahe'ene mika'moza hu'za, Tagra negone, Ra Anumzamo azeri so'e hanigeno nonka'afima esnia a'mo'a, Resoli'ene, Liakema, Israeli vahe kse hakare huna'a kna hugahie. Hanigenka kagra Efrati naga nofipi ra kagi erinka Betrehemia feno ne' manigahane. ¹²Mago'ene nagakamo'a, Peresi naga kna huno, Judanteti Tamari'ma ksente'nea ne'mofo nagapinti, Ra Anumzamo ama a'pinti mofavre zga kmigahie.

Naomi negeho fore hu'nea naneke

¹³Higeno Boasi'a, Ruti a' avregeno nenaro'za higeno, anteno mse'ne. Ramo azeri knare hunttegeno agra amu'ene huno ne'mofavre ksente'ne. ¹⁴Anante a'nemo'za Naominku anage hu'naze, Ra Anumzamofu agi'a

erisga hanune, na'ankure meni ama knafina kzahu vahera omni'ne huno onkatre'ne. Ama mofavremo Israeli vahe motafina ragi erigahie. ¹⁵Agra nomni zanka'a kzeri muse nehuno tvava'ma resankeno'a knare huno kegva hugantegahie, na'ankure neganofero'a, seveni'a ne'mofavre zga zamagatere'no, agra avesi kantega'hie! ¹⁶Anante Naomi'a ana mofavre avreno, agra'a asumpi anu'kino kegva hu'ne.

¹⁷Magopi nemniza a'nemo'za, anage hu'naze, Mago ne'mofavre Naomi'na fore humie! Obeti'e hu'za agi'a antemi'naze. Obeti'a raseno Jesi ksentegeno, Jesi'a, Deviti nefaza hu'ne!

Deviti'a, Obeti naga'nofipinti fore hu'nea naneke

¹⁸Ama'ne e'i Peresi naga'nofimokizmi zamagi'e, Peresi'a, Hesroni ksentene, ¹⁹Hesroni'a, Rami ksentegeno, Rami'a, Aminadabu ksentene. ²⁰Aminadabu'a, Nasoni ksentegeno, Nasoni'a, Salmoni ksentene. ²¹Salmoni'a, Boasi ksentegeno Boasi'a, Obeti ksentene. ²²Obeti'a, Jesi ksentegeno, Jesi'a, Deviti ksentene.

Proveps-Knare Nomaniza

Knare Nomanizamofu Naneke

1 ¹ Ama avontafera knare nomanizamofu ke Israeli vahe'mokizmi kini ne' Solomoni, Deviti nemofo krente'ne. ² Ama knare nomanizamofu ke'mo'a, knare antahi'za neramino, tavumro ante ke nerasmino, taza hinketa oku'ama me'nea kea keta antahita hugahune. ³ Knare antahintahi neramino, tazeri fatgo nehanigeta, fatgo avu'ava nehuta, fatgo huta refko nehuta, maka vahe'mofona mago avamente knare avu'avara huzmantegahune. ⁴ Hagi ama ana nanekemo'a, antahi'zama'a omane'nesia vahera knare antahintahi nezaminkeno, ne'mofara antahiza nezaminke'za knare hu'za maka zana refko hugahaze. ⁵ Knare antahintahima eri'nesimo'a, ama nanekea nentahinkeno rempi hunemina, mago'ane ama' antahizana e'nerinkeno, antahi amama hania ne'mo'a, avumro kea erigahie. ⁶ Ama nanekemo'a zamaza hina, knare antahintahi eri kene, avame kea antahi ama nehuta, antahi'zane vahe'mo'zama hu'naza kene, ruzahu ruzahu fraki kea erigahaze. ⁷ Anumzamofonku kore hunteno agorga'a manizana, antahizama erizamofu agafa'a me'ne. Hu'neanagi neginagi vahe'mo'za knare antahi'zane avumro kegura amagena humigahie. ⁸ Mofavre'nimoke, negfama kavumro kema hania kea amage nentenka, negrerama repima hugamisia kea ha'ontagio. ⁹ Ana kavumro kemo'a, avasase zanu anunte fetori anteanzna nehuno, anankempi pasesu nofi anteanzna hugantegahie. ¹⁰ Mofavre'nimoke, kumi vahe'mo'za kefoza huogu kavazuma hanazana, ana kefozana osutfu huo. ¹¹ Tagrane egeta frakineta hazenkezmi omne vaheku ome zmahamneno hnagenka, ovutfu huo. ¹² Fri vahe kumamo'ma vahe'ma zamagahu nevazianzna huta, zamasmuma eri'za mani'naza vahera zmahe frisune. ¹³ Mika zgo'amo mareri zantamima zmaheta hnaresuna zantamina refko huta nontifi eri antevi'neteta, ¹⁴ musufama erisuna zgoa refko hugamigahunanki, tagrane enoma hanagenka, ¹⁵ mofavre'nimoke, zamagranena ovutfu huo, zamagrama vanarega ovuo. ¹⁶ Na'ankure ame hu'za kumira nehu'za, vahera zmahe'za korana eri neragize. ¹⁷ Nmamo negesigenka

krifu anaginte'sanana, ana namamo'a krifufina ohenigeno, krifumo'a amnezankna hugahie. ¹⁸Anahu kna hu'za, vahe'mo'za ruvahe zmahe'naku hazanagi, zamagra'a zamahe nefrize. ¹⁹E'inahu kanteti'ma mustufama fenoma erizamo'a, kahe frigahie.

Knare antahizamo'a, mago a' kna huno keza netie

²⁰Knare antahintahizamo'a mago a'kna hu'neakino, kama vu'za e'za nehazafi oti'nenno kezanetino, vahe atru hu'za nemanizafi ranke huno kezatino ke nehie. ²¹Ana a'mo'a tusi kereso nehaza kamofa atuparegati kezatino, rankumapi ufre kafante mni'nenno kea nehie. ²²Antahiza omane vahe'motma nama'a zupa musena hutma antahizantmi omane vahera manigahaze? Kiza zokago kema knare antahizanku'ma nehazana, taganetma omanigahafi? ²³Nagrama i'oma hugantoa kema amage'ma antesanke'na, nagu'a neramina, knare antahi'zani'a rempi huramigahue. ²⁴Hianagi kema nehugenka antahi nonaminka, kagrite etragote'za nehugenka antahi nonamine. ²⁵Kavumro'ma negantogenka, keni'a nontahinka, osuo huazama nehanku, ²⁶ana nona'a kagrite'ma esia hazenkegura, kagiza regahue. Tusi'a hazenke zamo kazeri kagateresige'na, Nagra kagiza regahue. ²⁷Zahoko'mo hiaza huno hazenke zamo'ma tmazeri agaterenkeno, hankro zaho'mo hiaza huno tinko'mo refitege, hazenke'zamo ene kore'zamo tmagritera egahie. ²⁸Ana hanige'za zamagra zmazama hanugura kezatigahazanagi, nagra kenona huozamigahue. Zamagra nagrikura hakre snazanagi, onagegahaze. ²⁹Na'ankure zamagra, antahi'zama erizankura zamesra hunente'za, Ra Anumzamofona kore hunte zamagesa ontahi'naze. ³⁰Nagrama zamavumro antoanke erinetre'za, zmazeri fatgo huankea amage onte'naze. ³¹E'ina hu'negu zamagrama hu'nesaza zamuzmamofona rga'a nesageno, oku'ma hu'naku retroma hu'nesaza zamavu'zmavamofona nona'a havi miza erigahaze. ³²Antahintahizmi omane vahe'mokizmia, neginagi zmavu'zmavamo zamahe nefrinkeno, knare hu'none hu'zama hanaza zamo, zamahe frigahie. ³³Hianagi aza'o nagri kema antahisimo'a, hazenke e'ori knare huno nemnino, havizankura korora osu mani fru huno manigahie.

Knare antahizamo'ma kaminia zamofo naneke

2 ¹Mofavre'nimoke, nagri kema antahinka kasege'nima eri kagu'afi nentenka, ²knare antahintahire kagesa neminka, kagu tumokareti hunka ama' antahizana e'nerinka, ³kagrama knare'zane havizanema refko hu antahintahigu'ene, ama' antahizanku'ma kezama netinka, ⁴silvagu'ma hiankna hunka knare antahizankura nehakrenka, marerisa zantami frakinte'nea zanku hakreankna hunka hakresunka, ⁵Ra Anumzamofoma kore huntenu agorgama manizana keama nehunka,

Anumzamofa antahi'zana hakrenka erifore hugahane. ⁶Na'ankure Ra Anumzamofa knare antahiza neramigeno, Agri agipinti antahi'zane, antahi amama huzamofa kea ne-e. ⁷Fatgo vahe'mofona knare antahiza ante avitenenteno, makazampima mani fatgoma huno mania vahe'mofona, Agra hanko zamigna nehie. ⁸Na'ankure Agrake fatgo vahe'mokizmia kama vano hu'zazmifina kegva nehuno, zamagu tumoteti hu'za amage'ma antaza nagara kavu'za zamifina zamagu nevazie. ⁹Ana nehunka fatgo avu'avazane, fatgo huno ke refkohu avu'ava ene, maka vahe'ma mago avamente avu'avama hunte'zana antahi ankeregahane. ¹⁰Na'ankure knare antahintahimo kagu'afi unefrenigeno, antahi'zamo'a, kazeri muse hugahie. ¹¹Knare antahizamo'a kva hugante'nenigeno, ama' antahintahimo'a kaguvazigahie. ¹²Knare antahizamo'a kefo avu'avazama nehu'za, akrehe krehe zmageruma neraza vahepintira, kaza huno kagu vazigahie. ¹³Iza'o fatgo avu'avamofa kama atremo'a, hani avu'avamofa kampi nevie. ¹⁴Iza'o knare osu avu'avama musema huno nehuno, akrehe krehe kefo avu'avazankuma muse nehimo'a, ¹⁵kama vu'zama'amo fatgo osu'neankino, havige vahe manine. ¹⁶Arumofa a'mo monko'za huno vano nehania a'mo, nagrane eno huno kazeri savri hu'naku hanianagi, ana knare antahintahi'zamo'a kahokeno kaguvazigahie. ¹⁷Ana a'mo nevena netreno, kahefazniare Anumzamofa avure'ma huhagerafina'a huvempa kea amefi hunemie. ¹⁸Na'ankure ana a'mofa nompima ufre'sanana, fri vahe'mokizmi kumate vu'nea kampi vugahane. ¹⁹Agrite'ma vimo'a eteno omeno, knare asimu eri kana onkegahie. ²⁰E'ina hu'negu knare vahe'mo'ma nevia kante nevunka, fatgo avu'avama nehia vahe'mofa kante vugahane. ²¹Na'ankure hazenkezmi omane vahe'mo'za ana moparera mni'nesage'za, makazampima mani fatgoma nehaza vahe'mo'za ana mopare manigahaze. ²²Hianagi kefo avu'avama nehaza vahe'mokizmia ana mopafintira zamazu hunetreno, fatgoma hu'za omanisaza vahera zamahe fanane hugahie.

Kasefa vahe'mokizmi naneke

3 ¹Mofavrenimoke, nagrama rempima hugamua kea kage'okanio. Hianagi kasegeni'a kagu'tumote erintegenomeno. ²Na'ankure kaza nehanigenka, karimpa frune zaza kafuzge knare hunka maninka vugahane. ³Atregeno vahe'ma knare kavukvama huntezamo ene, tamage avu'avamofa katreno ovino. Hagi knankempi nofi kintegenomeno'ne'na kagu tumote avo krentegenomeno. ⁴E'inama hanankeno'a, Anumzamofene vahe'mozanena kavesineganteza, husga hugantegahaze. ⁵Anumzamofona mika kagu'areti hunka antahi'neminka, nagrani'a antahintahiretira makazana hugahue hunka osuo. ⁶Hanki mikazama hanampina antahiminka agihanta nevazigeno, vanana kana azeri ante fatgo hugantegahie. ⁷Kagraka'a antahizankura knare hu'ne hunka eri

antesga osunka, Anumzamofonku koro huntenka agorga'a nemaninka, havi avu'avazana kamefi humio. ⁸E'i ana'ma hanankeno'a, kavufa kazeri neganamreno, zaferina ka'a kazeri hanavetigahie. ⁹Feno zanka'anu'ene hozakafima pusama nenama hania nezanteti'ene Ra Anumzamofona aminka, agia eriantesga huo. ¹⁰Ana hanankeno Anumzamo'a kaza nehina nezama ante nonka'amo'a aviteno herafi neramina, waini tintafemofona kasefa waini timo aviteno tagiramigahie. ¹¹Mofavre'nimoka Ra Anumzamoma, kazeri fatgo hania kegura, kamefira huomige, kazeri fatgoma hunaku kazeri akorisiana karimpagna osuo. ¹²Na'ankure mago ne'mo'ma mofavre'ama avesima nenteno azeri fatgo nehiankna huno, Ra Anumzamo'a avesimantea vahera azeri fatgo nehie. ¹³Iza'o knare antahintahigu hakreno e'nerino, antahi ama'huzama erisimo'a, muse hugahie. ¹⁴Na'ankure ana knare antahintahimofona mizama'amo'a, silvaretima e'neriza zgoa agateneregeno, koliretima e'neriza zgoa, mago'ane agatere'ne. ¹⁵Knare antahintahimo'a mizama'amo mreri'nea havea agatere'ne, mago'a zankuma nentahinka kavesi kavesima nehana zantamina ageterene. ¹⁶Zaza knama maninka vuzamo'a, knare antahintahimofona tmaga azampi megeno, hoga kaziga azampina fenone, agi husaga hu'za me'ne. ¹⁷Knare antahintahimofo avu'avama huzamo'a, krimpafru nehunka muse hugahane. ¹⁸Iza'o ana knare antahintahima azerimo'a, asimu eri zafagna hu'neankino, agri avesizama azeri hampo'na hanimo'a muse hugahie. ¹⁹Ra Anumzamo'a knare antahi'zama'areti, ama mopamofa agafa'a erifore nehuno, antahi ama' hu antahizama'areti mona eri fore hu'ne. ²⁰Agra'a antahizanteti higeno timo'a mopa agu'afintira katati huno marerigeno, hampomo'a atakora nerie. ²¹Mofavre'nimoke atregeno knare antahintahizane, havizane knare zanema antahinka refkohu kavukvazana kagripintira fanane osina, kegva huo. ²²Hagi ana antahizamo'a kasimu kaminigenka zaza kna nemaninankeno, asunku'zamo'a knankempi kavasese huganteaza hugahie. ²³Ana nehunka kama vananana, kva hugantenkenka traka osunka, knare hunka vugahane. ²⁴Kavu'ma mase'sanana kore osunka, haga'nentake kavu masegahane. ²⁵Ame huno hazenkema esigenka kagra korera nosunka, kefo vahe'ma knazamo'ma azeri haviza hanigenka, korera osuo. ²⁶Na'ankure Ra Anumzamo kagrira kegva hugante'nesigeno, kagafina krifumo'a aze'origahie. ²⁷Kagrama azama huga kankamunte'ma mni'nesunka, atupama hu'nenaza vahera amane aza huo. ²⁸Tva'onkare nemni'simofona amigama hu'nesunka, oki ege'na kami'nenno hunka osuo. ²⁹Tva'onkare nemnisaza vahera hazenke zamikea retro osuo. Na'ankure kagrikura taza hugahie hu'za antahinegamize. ³⁰Kegafa'a omaneno, mago kefozama huogante'nesnigenka, mago nera azerinka keaga huonto. ³¹Hazenkema hanaza vahe'mokizmi zamavu'zmavakura kegasane nosunka, zamagrama hanaza zamavu'zmavara osuo. ³²Na'ankure Ra

Anumzamo'a akrehe krehe znavu'zmava'ene vahekura avesra huno agote'nezmanteno, fatgo znavu'zmavama nehaza vaheku avesi'nezmante. ³³Kefo zamavu'zmavama nehaza vahe'mokizmi naga'zmimofona, Ra Anumzamo'a kazusi hunezmante. Hianagi fatgo ne'mofo nagapina asomu hunezmante. ³⁴Vahe'mokizmima azanava kema huzmante vahe'mofona, Ra Anumzamo'a agri'enena azanava ke huntegahie. Hianagi anteramino manimofona, asunku hunente. ³⁵Knare antahizane vahe'mo'a, ra agi erigahianagi, neginagi antahizane vahe'mo'za, zamagazegu hugahaze.

Kasefa ne'mofa'mofo zamavumro naneke

4 ¹Mofavre naganimote, negafanama rempi hugamisua kavumro kema kagesa antahi ankere'sunka, antahi ama' hu antahintahia erigahane. ²Nagra knare antahiza negamuanki, rempi hugamisua kea kamefi huonto. ³Nagrama nenfa nompima onensa mofavre mni'norera antanimofa magoke mofavre'a mani'nogeno kegva hunante'negeno, ⁴amanage huno nenfa'a rempi hunamine, mika kema kasamisua kea kagu tumote erintenka azeri hampo'na nehunka, kasegeni'a amagama antesunka, knare hunka manigahane. ⁵Knare antahintahia erio, antahi amahu antahi'zana erio, kasamisua nanekea kagera okaninka, kamagena huontetfa'za huo. ⁶Knare antahintahimofoma kamage'nama huonte'sankeno'a, kagu nevazina avesima ante'sankeno'a, kegva hugantegahie. ⁷Knare antahintahi'zana raza me'neanki erio. Hagi makazana erigahananagi agatere'neazana knare antahiza erio. ⁸Knare antahintahi zana azerisga nehugeno, kagrira kazeri sga hino, agri'ma azeri akonama hanankeno'a, kagrira kazeri sga hugahie.

⁹Ana antahizamo'a, rimpa fru'zanu konariri kasenire huneganteno, kinimofa asinentike fetori kasenire resi hugantegahie. ¹⁰Mofavre nimoke, nagrama huankema antahitenka, ana kema avaririnka amage'ma antesunka, rama'a kafuzge maninka vugahane. ¹¹Knare antahi zampi vuogu nagra kazeri fatgo nehuna, knare fatgo kante kavare'na nevue. ¹²Ana kantema kagama renake'renka vnanana mago zamo'a asevazi ogante'na, traginaku'ma hananana tanafara osugahane. ¹³Kagrama hananegu'ma amama kasamua kea otrenka azeri hanavenetinka atregeno ovino. Na'ankure e'i ana kema huoguma rempima hunegamua kemo'a mani'zanka'agna hugahie. ¹⁴Havi kefo avu'ava hania vahe'mofo kantera ovunka, haviza huno kefoza hu'nenia vahe'mo hania zana ovaririo. ¹⁵Ana kantera ovunka, atrenka rukagesenka vugahuema hantega vuo. ¹⁶Na'ankure zamagra kefo avu'ava zama osu'nesu'za zamavura ovase'za manine'za kefozana hute'za zamavura masegahaze. Vahera zamazeri haviza hutesuzage, zamavura vasegahaze. ¹⁷Kefo avu'avama hu'zana, breti neankna nehu'za, hazenkema huzana waini ti neza negi neankna nehaze. ¹⁸Hianagi fatgo vahe'mofo manizamo'a, zgemo zahufa nehnatino

remsa hume ne-eno, eme remsa huno feru aseankna nehie. ¹⁹Hianagi havi avu'ava ene vahe'mofo mani'zamo'a, hani hiankna hu'neankiza, ana vahe'mo'za na'amo zamazeri tanafa nehie nonkaze. ²⁰Nagrama huankere mofavrenimoka kagesa antenenka, mika keni'a antahi ankeru. ²¹Hagi ana nanekea kavure antenenka negenka, ana mika kea kagu'afi erintenka kegva huo. ²²Na'ankure iza'o ana kema erino agu'afima antemofona, manizama'amo'a knare hanigeno, mika avufgamo'a knare hugahie. ²³Ana mikazana hugahananagi agatereneazama hananana, antahi zanka'a kvahu so'e huo. Na'ankure e'i tamage asimu eri tinkampui me'ne. ²⁴Havigema huzana netrenka, krunagama kagipintima atirami'zankura atregeno afete meno. ²⁵Kavua kegantigama osunka, ke fatgo hunka kavugage kavua kenka vuo. ²⁶Kagama rentenkama vanana kana kva hu'nenka, kavua kenka nevugeno, mika zamo'a kagriteru agafa huno eme hanavetigahie. ²⁷Kagia antifi omerege amafi emerege osunka, kagamoma kefo avu'avapima kavareno vuzankura kva huo.

Savari a'ene monko avu'avaza hu'zanku kva hanuna tavumro naneke

5 ¹Mofavrenimoke, knare antahi'zane ama' antahizamofu kema kasamisua kagesa antenka antahi so'e huo. ²Anama hanunka ama' antahintahire nemaninka, keagama hananana antahintahine vahe'mo'za nehazankna hunka kea hugahane. ³Na'ankure savri a'mofo agipinti kemo'a, tume rima'amo haga hiankna nehinkeno, agipintima atiramisia nanekemo'a, olivi masavemo fru huno karoro hiankna hugahie. ⁴Hianagi refaregama kesana, ana amo'a akahe trazankna nehuno, tare kaziga asane'nea kazinkna hu'ne. ⁵E'i ana a'mofo agamo'a fri'zampi uneramino, agama renakereno viazamo'a, fri vahe kerifi nevie. ⁶Ana savari a'mo'a, asimuma erino mani kankura nontahino, kama via kamo'a fatgoa nosianagi antahino keno nosie. ⁷E'ina hu'negu mofavre nimota kenia antahitma, amama tamasamisua kemofona tamagena huomiho. ⁸Ana savari a'mofona atrenka ogantu'a nemaninka, nomofo kasama'arera uravao osuo. ⁹Anama hananana havi kagi e'nerinka, zahufafi kasefa vahe mani'nesanke'za, havi vahe'mo'za kazeri haviza hugahaze. ¹⁰Onke'nesana vahe'mo'za hanaveka'a atrenka eri'nanazana, e'nerisageno, knare zantamima amuhu hunka eritru hunte'sana zantamina ru vahe'mo'za erigahaze. ¹¹Henkama frinaku'ma hanana knama esigeno'a, krimo'a kavufafina ra nehuno, kazeri zaferinage hinkenka karagi nerunka, ¹²anage hugahane, na'a higena navumaro kema nenasimige'na, nagokura hu'na navesra hunentena, nazeri fatgo nehigena, ana kea ontahi'noane hugahane. ¹³Nahige'na rempi hunami vahe'mo'zane, nazeri kante ante kema nasami'za vahe'mokizmi kea ontahi'noane hunka hugahane! ¹⁴Nagra mika vahe zmurera haviza hu'na keforoe hugahane. ¹⁵Ru vahe'mofo tintetira tina ono, kagra'a tintetike tina no, e'i a'ka'ane

mani fatgo huzanku hu'ne. ¹⁶Amanefina tinka'a ome tagi atre, eme tagitre osuo. Kagra a'enenke'za maso. ¹⁷Atregeno kagri a'mofo suzanke meno, aru a'nenena monkozana osuo. ¹⁸Kasefama maninenka e'rinana a'ka'ane muse hunka mani'negeno, Anumzamo'a asomu hugantegahie. ¹⁹A'ka'amo'a dia a' afu'moma hiankna huno avesi avesi huno knare zantfa huneganteanki, amima'amo'a maka kna kavesizana kazeri knare nehina, kagrma kavesi kantenia zamo'a kazeri agrarega atrena agri avesizampi manigahane. ²⁰Neve enema mani fatgo hunoma omanisia a'nea mofavre'nimoka ke'negeno kavufgamo'a oraotino. Atregeno amima'arera kavrenteno kanura okino. ²¹Na'ankure Ra Anumzamo'a miko kama vano hunana, ke'anckereno refako huno tage'negeta vano nehune. ²²Kefozama nehia ne'mofona kefo avu'avazama'amo'a kukomo azeriankna nehigeno, kumi'amo kina rentegeno nemani'ne. ²³Agra'a avesizama kegvama osaniazamo hanigeno frigahie. Rama'a havizama haniazamo hanigeno, fanane hugahie.

Mago'a kavukavama osnana zamofa nanenke

6 ¹Mofavrenimoke, tva'onkarema nemanisimo'ma nofi hugahue hanigenka aza hugahue hananano, rumofonku'ma huvempa hunka kaza hugahuema hananana, ²kagraka'a huvempama hu'nenana kemo kinama regatenigenka, ³mofavre'nimoka amana huo, hago agri azampi mani'nananki kagra'a kavufa anteraminka ana nete vunka, kasunku naneke ome hugeno kina reogantena amne manigahane. ⁴Kavu tokora osunka, kavura omasenenka, ame hunka vuo. ⁵Kagra dia afumo'ene namamo enema zgagfama ahe vahe'mofo azampinti ame huno freankna hunka, kagra'a kavufga kaguvazio.

⁶Eri'zama e'ori feru vahe'motma kipazuvemoza nehaza zante ome negeta, rempi huta nentahita, knare antahizana eriho. ⁷Kipazuvemofona kva vahe'zmia omanigeno, zamazeri ante fatgohu kva vahe zamia omanigeno, kvama krizamante kva vahe zamia omani'neanagi, ⁸ne'zamo'ma rama'ama fore hianknafina nezama omane knafima nesagura, nezana eri atru nehaze. ⁹Eri'zama e'ori feru vahe'motma, nama'a zupa tamavura masegahaze? Nazupa masetamavuna segahaze? ¹⁰Osiagna ko kavura masenka hinkrafora antegenko, osiagna ko mago'ane manifru nehunka, osiagna ko mago'ane kagemazampare kazana antenka manifru hananana, ¹¹mago zanka'a omanetfa hanigenka, kumazafa vahemo atireti kazerino fenozanka'a erivgareankna hugahane. ¹²Mago zazmi omane kefozama nehaza vahe'mo'za akrehe krehe zmageru aruza vano nehaze. ¹³Ana vahe'mo'za havigema nehanuza zamavu resukinegamiza, zmagiareti rekapasga nehu'za, zmazanteti ene erigu'a hu'za avame'namera hugahaze. ¹⁴Havi avu'avazama erifore'ma hu'zamo zamagu'afina avitenege'za, kefo avu'avazana hakare zupa nehu'za,

hazenkea eri hakare hu'za nevaze. ¹⁵E'ina hu'negu e'inahu vahetera hantka huno havizamo'a agritera eno, ame huno azeri haviza hanigeno, anama azeri havizama hania knazama eritre kana omanetfa hugahie.

Seveni'a avu'avazama Anumzamofoma ago'ma netea zamofa naneke

¹⁶Sigisi'a zama Ra Anumzamo ago'matenentea zantami me'neanagi, seveni'a zamo'a Ra Anumzamofa avurera kasrino haviza me'ne.

¹⁷Agra avufga erisga nehuno, ru vahe kafenkami atre'zane, havigema hu'zane, hazenke'a omane vahe'ma aheno korama'a eri fegi atre'zane, ¹⁸havi antahintahizamo antahintahifima mevite'zane, havi zante'ma ame huno avreno neviazane ave'nosie. ¹⁹Keagama refkohu trate osu'nea zanku tamage nehie huno havige hu vahe'ma, zamagipintima krunagama hu'zama atineramia zane, naga'afima hazenke zama eri hakare nehiazana Anumzamo'a agonete. ²⁰Mofavrenimoke, negfa'ma kasamisia kasegea otretfa nehunka, negrera'ma rempi hugamisia kea amge'anto. ²¹Kagu'afi erintenka azeri antakro maka zupa nehunka, avaseseza hiankna hunka rugaginka knankempi anakio. ²²Kama vanoma hananana ana kemo kazeri fatgo nehuno, kavu'ma masesanana kegva huneganteno, masenesampintima oti'sanana nanekea kasamigahie. ²³Na'ankure ama ana kasegemo'a rampe tavikna higeno, amama rempima huneramia kemo'a msa megeno, kazeri fatgohu kavumroma antea kemo'a, manizamofa ka me'ne. ²⁴Savri a'nemo'za kazeri hava huzankura ana kemo kza nehina, neve'enema mni fatgo osu savari avu'avazante vanoma nehania a'mofa haganentake ageru'mo'a kazeri havizana osugahie. ²⁵Ana a'mofa agi agonagura kegasanea osuge, atregeno kavazu hunaku'ma avuretima revumima hugamisia zamo'a kavazua osino. ²⁶Na'ankure savri a'enema mase zamo'a kazeri kefo regahianagi, vereti a'mo'ma kavazu haniana kasimu ka'a erigahie. ²⁷Akru huno neresia tevema hankeri kasumpima antesanana kukenaka'a azerino onteghahifi? ²⁸Teve zugu'ma neresifima kaga vapama vananana, kagagusa teonkasagegosifi? ²⁹E'ina hukna hugahane, tava'onka'arema nemanisia ne'mofa a'enema masege, monkozama hananana hazenke erigahane. ³⁰Aga'ma netenigeno nezama nesia zankuma kumzafama erisia vahera, rama'a tamarimpa kna hunontaze. ³¹Hu'neanagi ana ne'ma azerisageno'a, seveni'a zupa nama'aza eri'neo seveni'a zupa antegofetu huno miza segahie. Hagi upama hanuno'a, no'ma'afima ante'nesia fenoma'areti ene mizasegahie. ³²Hianagi ru ne'mofa a'enema maseno monkozama huntesia ne'mo'a, ana negi' avu'ava zama'areti agra'a azeri haviza nehie. ³³Ahe'zama azeri agazema huntesa zamo'a, agrite me'nesigeno agaze zamo'a vgaore agrite mevava hugahie. ³⁴Na'ankure ana a'mofa neve'ma rimpama ahesia zamo marerisigeno nona huno kahenaku esiana asuntagizana agripina omanegosie. ³⁵Ana hazenkere miza antege, rimpa azeri fru hu'naku rama'a zantami eme amisia zamo'a, azeri fru osugahie.

Savri a'mofonku'ma mani korema hu'zamofu naneke

7 ¹Mofavre'nimoke, keni'a nentahinka, kasegeni'a eri kagu'afi antegeni raza segantena kva huo. ²Kasegeni'ama amage antesanana kagra kasefa hunka nemaninka, rempima hugamisua zana kavurgama kegva nehanankna hunka kegva huo. ³Kazeri kagesa hanigu rini kazampi antaniankna hunka kantu kagu'afi tumoka'are krento. ⁴Knare antahintahigura nensaro'e nehunka, antahi amahu antahintahigura nenafu'e hunka huo. ⁵Ve'ama maninesia a'mo'ma kazeri savrima hu'zama nehinkeno'a, ana kemo'a kaza nehina ru kazigati a'mo'ma kazeri savri hunaku'ma masavenke'ma nehanigeno'a, ana kemo'a kaguvazigahie.

⁶Mago zupa mani'ne'na noniamofona zaho eri kampinti negogeno, ⁷mago'a nehazave enevazafina kogeno amuno zamifina, mago nehaza ne'kanora, knare antahizama'a omanenea ne' ke'noe. ⁸Agra monko'amofu nontava'onte vu'nea nonkaranka nevuno, ana a'mofu nonte vu'nea kampi ufreno vu'ne. ⁹Hanima hukuma nehigeno, hanimo'ma rentrako huzahifi ana hu'ne. ¹⁰Ana a'mo'ma kukenama hu'neana monko a'nemo'za nehazankna kukena hu'neni, ana ne'ma masavenkema asamino azeri savrima hanigura e'ne. ¹¹Ana a'mo'a kehagra hagra nehuno, nontera manirava oheno kankekanke nehigeza, rama vahe'mo'za ke'za antahiza hu'naza are. ¹²Ana a'ra hakarea zupa kampine, maketi kumapine, maka kaziga manineno venenema evazageno rezamaheno zamavazuma hanigu negea akino, ¹³ana nehaza nera azeri anukiazamo antako hunteno, avufga azeri otiare avunutira negeno anage hu'ne, ¹⁴nagra menina narimpa fruma eri kresramana vugeno, huvempama huntenoa kemo'a raga re'ne. ¹⁵Hu'negu kagriku hakarena kagenaku oregati hago eme kagena eri forehue. ¹⁶Isipi vahe'mokizmi pse'ane tavravereti mase tafera hunte'noe. ¹⁷Hago knare manama vuzantami miama, aloima, sinamoninu mase tafepina rutri huna ahemna vunte'noe. ¹⁸Hagi egeta umaseneta, zokagora nereta musena nehanukeno ko'aturanteno. ¹⁹Nenave'a nontera omani'neanki, hago afete ka vu'ne. ²⁰Zgomo'a ku'afina avitenegeno vu'neankino kora omegosianki ama ikamofona amunontega esia kante vu'ne. ²¹Ana a'mo'a masave kema asamino avresia nanekea, rama'a naneke asamine. ²²Ana ne'mo'a ame huno ve bulimakao afu aheku avazu hu'za nevazankna huno ana a'mofona avaririno vu'ne. ²³Kevemo'ma tumo'ruragino ahesnia zankura agesa ana ne'mo'a nontahino, agra namamo hareno krifu anagintepi ufreankna nehuno, ahe frisia zankura nontahie.

²⁴Hanki mofavre'nimote, tamagesa anteso'e hutma nanekeni'a antahiho, ²⁵Atrenkeno tamagu'amo'a ana a'mofu kerera amagera ontege, kavareno agri kantera ovino. ²⁶Na'ankure ana a'mo'a rama'a venene zmazeri haviza nehuno, zamahe fri'ne. ²⁷Hagi ana a'mofu nona fri vahe kerimofu ranka me'neankino, ana kamo'a fri vahe kumapi uramine.

Knare antahintahimo kezanetia naneke

8 ¹Knare antahintahizamo ene antahi ama'hu antahizamo'a mago a'kna hu'neankino agerura eri antesga huno kezana netie. ²Agra kamofa tavaonte me'nea agonare, ka hatana hu'nefi otine'no, ³rankumapi ufre'nea kante ene kampi otineno ranke huno kezana netie. ⁴Ana miko vahe'motmagu kezankea nehue. Vahe'motagu kezankea nehue. ⁵Antahizantmi omane vahe'motma eta refakomahu antahizana emerihio, neginagi antahi'zane vahe'motma, eta antahi amahu antahi'zana emerihio. ⁶Kma antahiho kema nehuana, na'ankure mareri agatere'nea zanku nehue, maka nanekema hanua kemo'a, fatgo huno tamage ke tamamigahue. ⁷Nagra tamage kege nehu'na, havi kegagama nagi'pintima huzankura nagonete. ⁸Maka nanekenimo'a tamage huno fatgo higeno, krunagene kazaki kema huzana omane'neanki, ⁹ana maka kemo'a antahizane vahetera fatgo hu'ne. Ana antahizama erinaku'ma hakaza vahetera, fatgo hu'ne. ¹⁰Nagrama hiho hu'nama rempima huneramua kemo'a, silva agateregeno, antahizama erizamo'a, koli'a agatereneanki erio. ¹¹Na'ankure knare antahi'zamo'a mareri agaterenea havea agatereno, kavesi kavesima nehunka razane hunka nehanazana agatere'ne. ¹²Nagra, knare antahi'zamona knare huno refakohu'zane nemanue, Nagripi antahizana me'neankina miko zana nagrake refko hu'na negoe. ¹³Ra Anumzamofonku koroma huntezana kefo avu'avama huzankura kagotegahie. Agra'a agima erisga nehuno, avufga ra nehuno, havi avu'ava nehuno, akrahe akrehe ageru'ma aru'zana navesra hunentoe. ¹⁴Knare antahizama ami'zane, refakoma huzana nagripi me'ne. Nagra antahi ama'ma huzane hanavenena nagri zane. ¹⁵Nagra maninoge'za kini vahe'moza kegva nehazageno, ugota kva vahemoza fatgo hu'nea kasegea retro nehaze. ¹⁶Kva vahe'mo'za nagra zamaza nehuge'za vahera zamavre fatgo huza ne'vzageno, trakere kva vahe'moza fatgo huza refkoa nehaze. ¹⁷Iza'o nagrima avesi nentemofona, nagra avesi nentoe. Hagi nagri'kuma hakre'nimo'a, nagrira nagefore hugahie. ¹⁸Nagripi fenozane, ra agima erizana me'ne. Hanavetino zazatema meno vu fenozane, fatgo avu'avazana nagripi me'ne. ¹⁹Nagrama nezamua zamo'a, golia agatenereno knare silvama mizama nesazazana agaterene. ²⁰Nagra fatgo avu'avazamofo kante nevuna, fatgo huno refakoma huzamofo kantamimpi nevue. ²¹Iza'zo nagrima zmavesi nantesaza nagamo'za, fenona erisanti neharesagena, nagra feno nozamifina zago'amo mareri zantamina antevi tezamantegahue. ²²Ra Anumzamomo'a pusazana nagri nazeri fore huteno, mika'zana henka tro hu'ne. ²³Korapara ama mopama tro osuneno ese zana nagri huhamprinantene. ²⁴Nagra fore hutogeno henka hagerina tro higeno, kampui tintamimo'a hanatino vu'ne. ²⁵Ranra agonane, onensa agona forera huno menima antenerera omanenegena,

nagra pusante fore hu'noe. ²⁶Miko mopane, hofa kokama ama mopafi kugusopa nazana henka tro hu'ne. ²⁷Nagra korapa maninogeno monarera mikazana tro hunenteno, hagerina tro huntegeno tavumoma ometre emetretera evune. ²⁸Nagra ko maninogeno anagamua hampona tro hunenteno, tinkampuima hanatino tiruma umarenia keria tro hune. ²⁹Nagra korapa maninogeno hagerinkura, e'i avamente tirura marenka emetro huno kase hunenteno, tiruma maresia mopa trohune. ³⁰Nagra makazama tro'ma hu'noa Ne'mofo tavaonte mani'nena, aza nehugeno muse nehigena maka kna nagra nena rama'a muse nehue. ³¹Maka kokama troma hu'nea zanku'ene vahe'ma anampima mani'nea zankura, nagra tusi'a muse nehue. ³²E'ina hu'negu mofavre'nimoka ke'ni'a antahinamio, na'ankure nagri navu'nava zama avaririsaza vahe'mo'za muse hugahaze. ³³Kavumroma antesua kea nentahinka, ama antahizana e'nerinka kavesra huontenka amage anto. ³⁴Ke'ni'ama nentahiza, kumanimofo kama atiramitema knane knanema naveganenteza, kahani'arema navegama nentaza vahe'mo'za, tusi muse hugahaze. ³⁵Na'ankure nagriku'ma hakremo'a, nomaniza hakeno erifore nehigeno, Ra Anumzamo'a avesinente. ³⁶Hianagi ha'marenanteno kumi'ma nehimo'a, agra'a hazenke enerie. Iza'o avesrama hunantemo'a, frizamomofo avesinente.

Knare antahizamo'a vaheku kezati'nea naneke

9 ¹Knare antahizamo'a mago a'kna hu'neankino noma'a negino, 7ni'a noma azeri oti zafa antreno erisoe nehie. ²Hagi ana a'mo'a ra neza retro nehuno, waini tina tro huno nenteno, nezama ante trara retro huntene. ³Ana huteno eriza a'ne'a, vahe ome kehihogu hunezamanteno, agra rankumapina marerisga hunereti kezana atino, ⁴tamagi omane vahe'motane refakoma hutama kezampima atupama hu'nesamota, ⁵rukrehe huta nagrite etma ne'zana eme neneta, waini tima tro'ma huntenoana eme neho. ⁶Hagi neginagi kavukavama nehanazana netrenka nomanizanka'a agafa hunka erintese nehunka knare antahintahizana rempi hunka nentahinka anazana hunka vuo. ⁷Azanava kema hu vahe'mofoma azeri fatgoma hananana, kema asamisana kegura huhaviza hugantegahie. Kefo avu'avama nehanimofo azeri fatgo hu kema hananana, ana kegura kiza zokago ke hugantegahie. ⁸Ana hu'negu azanava ke'ma nehia vahera azeri fatgo osuo, avesra hugantegahie. Ama' antahizane vahe'ma azeri fatgoma hanankeno'a, avesigantegahie. ⁹Ama' antahintahine vahe avumrora nentegenomago'ane antahintahifina, ama huno manino. Fatgo avu'ava zane ne' rempi hunemigeno antahintahi'afina mago'ane antahizana erino. ¹⁰Ramofoma koroma hunteno agorga'ama manizamo'a, knare antahizamomofo agafa me'ne. Ruotage'ma Hu'nemomofo kagra antahi ama'ma hananana, ama' antahiza erigahane. ¹¹Na'ankure knare antahizamo'a huno, nagriteti zazakna nemaninka mago'ane

rama'a kafu manigahane hune. ¹²Kagrama ama' antahizama erisanana, knare antahizamo'a, mizama'a kamigahie. Kagrama kiza zokagoma huntesanana kagra'a haviza hugahane. ¹³Neginagi avu'avama hu'zamo'a mago a'mo rankege nehiankna hu'neankino, ke antahizama'a omanegeno, antahintahizana agripina omanene. ¹⁴Agrira noma'amo'a rankumamofona mesga huno me'negeno kahama'are manineno, ¹⁵zamagra'a erizante'ma vu fatgo huza kantema agatere'za vu'za e'zama haza vahekura, kezatino kea huno, ¹⁶atrenke'za zamagi omne vahe'mo'za rukrahe hu'za eho, nehuno refko hu'zama ke ama' osu'naza vahe'mokizmigura kea nehie. ¹⁷Kumzafama asenana timo'a knare haga hugahie. Hagi ne'zama kragagu oku'ama ne'nana ne'zamo'a haga hugahie. ¹⁸Hianagi fri'za me'ne hu'za nontahiza, ko'ma ana a'mofonontegama vu'naza vahe'mo'zama fri'naza zankura nontahize.

Solomoni knare antahizamofonaneke

10 ¹Solomoni knare antahintahi zamofonaneke, erikofa huno krente'nea naneke. Ama' antahintahine mofavremo'a, nefana azeri muse nehie. Hianagi neginagi antahintahine mofavremo'a, nererana rimpa erihaviza higeno, asuzampi nemanie. ²Havi kazigatima erisana feno zamo'a kaza osugahianagi, mani fatgoma hunka manizamo'a, fri zampintira kagu vazigahie. ³Fatgoma hunoma nemanie vahera, Ra Anumzamo'a atregeno agazankura nosie. Hianagi fatgo osu'zama haza vahera, zamatrenige'za erinaku'ma maragu'zama netizazana e'origahaze. ⁴Feru'ma maniza vahe'mokizmia zamuntera nomane. Hianagi amuhoma hu'za erizama erizamo'za, rama'a fenoza nentaze. ⁵Ama' antahizama eri'nea vahe'mo'a, nezamo'ma nenama hianknafina, ne'zana eritru nehie. Hianagi ne'zama hamareno eri atruhu knafima, avu'ma masea vahe'mo'a agazegu hugahie. ⁶Fatgo vahe'mokizmia zamasenirera asomu'mo'a, kini fetori antani zamante'ankna nehie. Hianagi kefozama nehaza vahe'mokizmi kemo'a, hazenkezana refinete. ⁷Fatgo vahe'mo'zama ko'ma knare zama hu'naza zankura, vahe'mo'za antahinezmiza muse nehaze. Hianagi kefo zama nehia vahe'mofona, agi agenke'a omanegahie. ⁸Ama' antahintahine vahe'mo'za, eri'za kea nevaririze. Hianagi tavare vahe'mo'za, haviza nehaze. ⁹Iza'zo mika zampima mani fatgoma haza vahe'mo'za, knare hu'za nemanize. Hianagi fatgo zama osnimo'a, fra'okigahie. ¹⁰Regavumi kavami huzamo'a, hazenke eri kamigahie. Hagi tavre vahe'mo'za zmagra'a haviza hugahaze. ¹¹Fatgo vahe'mofo zamagipintima atiramia kemo'a, asimu ami tinkapui'mo atiramino eankna nehie. Hianagi kefozama nehaza vahe'mokizmi zamagipintima atiramia kemo'a, hazenke zana refinete. ¹²Vahe'ma antahi havizama huzamo'a, ha' fra hu'za eri fore nehie. Hianagi vahe'ma avesima ante'zamo'a, miko kefozana refinete. ¹³Knare antahizamo'a knare'ma huno refkomahu vahe'mofo zamagi'pinti

atineramie. Hianagi knare antahintahi omane vahe'mofona zmgumpi sefu amigahaze. ¹⁴Ama' antahizane vahe'mo'a, antahi'zana erite erite huno, rama'a enerie. Hianagi neginagi kema haza vahe'mo'za, mika zankura upa nehu'za, ame hu'za haviza hugahaze. ¹⁵Feno vahe'mokizmi feno zmimo'a, vihu huzmanteankna hugahie. Hianagi zamunte'ma omaneazamo zamunte omane vahera zmazeri haviza nehie. ¹⁶Fatgo zamavu'zamavama nehaza vahe'mokizmia mizazmia, knare nomaniza erigahaze. Hianagi kefozama nehaza vahe'mo'za, havi miza erigahaze. ¹⁷Avumro'ma anteankema antahimia vahe'mo'a, knare nomaniza eri kante nevie. Hianagi zamazeri fatgoma hazanke'ma zamavesrama huntaza vahe'mo'za, havifi nevaze. ¹⁸Rimpa knama hu'nea vahe'mo'ma ana rimpa knama refitenakura, rama'a havige nehie. Hagi vahe'mokizmi zamagenkema hu vahera, neginagi vahere. ¹⁹Rama'a kegagama huzamo'a, kumipi kavareno nevie. Hianagi iza'o agefu'nama kegavama himo'a, ama' antahizane vahe manine. ²⁰Fatgo vahe'mofo kemo'a, knare silvagna hu'ne. Hianagi havi vahe'mokizmi antahintahimo'a, haviza huno mago kna'a omanene. ²¹Fatgo vahe'mofo kemo'a, rama'a vahe zamazeri hanavenetie. Hianagi neginagi vahe'mo'za antahi ama'hu antahintahigura upa hu'za nefrize. ²²Ra Anumzamo zamazeri feno vahe nesea asomumo'a, asunkuzana eri ozamigosie. ²³Neginagi vahe'mo'za, kefo avu'avazana kiza zokago hazankna hu'za nehaze. Hianagi ama' antahintahine vahe'mo'za, knare antahintahifi muse hu'za makaza nehaze. ²⁴Kefo vahe'mo'zama koroma nehazazamo'a, zamagrite egahie. Hianagi fatgo vahe'mo'za zmave'ma nesiazana erigahaze. ²⁵Kefo avu'avazama nehaza vahe'mokizmia unu ko'ma atuno esuno'a, zamavreno fregahie. Hianagi fatgo vahe'mo'za oti hanavetiza, manivava hugahaze. ²⁶Feru vahe'ma eri'za erinogu'ma huntesanana, ana vahe'mo'za aka'zamo vahe'mokizmi zamagipi ufreno akahiankna nehu'za, tokimo vahe'mokizmi zamavurgafi ufareno aka heankna kagriteri hugahaze. ²⁷Ra Anumzamofoma koroma hunteno agorga'ama manizamo'a, zaza kafuzge manigahane. Hianagi kefozama hu vahe'mokizmia knazamia erikofa hinke'za, zazatera omanigahaze. ²⁸Fatgo vahe'mo'zama amuhama nehaza zamofona nena'a musezane. Hianagi havizama nehaza vahe'mozama amuhama nehazazamo'a amene zankna hugahie. ²⁹Ra Anumzamofoma avu'avazamo'a fatgo vahe'mokizmi, vihu huzmanteankna hu'ne. Hianagi havi avu'avazama nehaza vahe'mokizmia, zamazeri haviza hugahie. ³⁰Fatgo vahe'mokizmia zamazeri torera osugahie. Hianagi havi zmavu'zmavama nehaza vahe'mo'za, ama'na mopafina omanigahaze. ³¹Fatgo vahe'mofo agipintima atiramia kemo'a, knare antahiza atiramino nevie. Hianagi akrehe krehe ageru'ene vahe'mofona azeri taganegahie. ³²Fatgo vahe'mofo zamagi'pintira vahe'mokizmi zamazahu naneke atineramie. Hianagi kefo vahe'mokizmi zamagi'pintira, akrehe krehe kemo atineramie.

Fatgo zane havi zanemofo naneke

11 ¹Havizama huno avamente'ma refkohu so'ema nosia vahera, Ra Anumzamo'a agoteno avesra hunente. Hianagi avamente'ma fatgo huno mizama asea vaheku avesinente. ²Kavufga atarezamo'a, kagaze'za erigamigahie. Hianagi kavufga anteramizamo'a, knare antahintahiza erino egahie. ³Maka zampima tamage huno fatgo avu'avama hanimofona, ana avu'avazamo kegva huntegeahie. Hianagi hazenke vahe'mofo akrehe akrehe'zamo'a, zamagrira zamahe fanane hugahie. ⁴Refkoma hugantesia knarera, feno zankamo'a kaza osugosie. Hianagi fatgoma huno manizamo'a frizampintira kagu'vazigahie. ⁵Fatgo vahe'mokizmia tamagehu zamavu zamavamo hanige'za, kama nevaza kamo'a, knare hu'nesige'za vugahaze. Hianagi havi vahe'mokizmia zamagra nehanaza kumimofo kna'amo, zamazeri traka hugahie. ⁶Fatgo znavu' znavama nehaza vahe'mokizmia, fatgo znavu' znavava zmimo'a zamagu nevazie. Hianagi fatgo osu vahe'mokizmia fatgo osu znavu' znavava zamo zmazerigahie. ⁷Kefozama nehia vahe' moma erinaku'ma amuhama nehia zamo'a frisigeno'a anama erinakuma amuhama nehiazamo'a, amane zankna hugahie. ⁸Hazenke zamo'ma fatgo vahete'ma esniana, Ra Anumzamo'a aza huno avare atrenigeno, ana hazenke zamo'a kefozama nehanaza vahete egahie. ⁹Anumzamofonku'ma korema hunte'za agorgama omaniza vahe'mo'za, kezmireti tava'ozmirema mani'namokizmia zamazeri haviza nehaze. Hianagi fatgo vahe'mo'za ama' antahiza zamimo zamagu nevazie. ¹⁰Fatgo vahe'mo'zama nomaniza zmifima knare hazageno'a, rankumapi vahe'mo'za musenkase nehaze. Hagi kefo zamavu zamavama nehaza vahe'ma fri'zage'za, havizama nehiazana vgaregahie hu'za tusi muse nehaze. ¹¹Anumzamoma fatgo vahe'mofo nomanizama asomuma huntegeno'a, rankumamofo agimo'a marenerie. Hianagi kefo avu'avama nehia vahe'mofo agipintima esia kemo'a, rankumara eri haviza hutregahie. ¹²Tava'ozmirema nemaniza vahe'ma zamage henkaminetaza vahe'mo'za, neginagi vahe mani'naze. Hianagi fatgo antahizane vahe'mo'za, kea osu akohe'za nemanize. ¹³Iza'o vahe amefi kema huno vanoma hanimo'a, oku'a fraki'nesia zana hu'ama hugahie. Hianagi tamage kema hu vahe'mo'a, nefuma hu'nenia zana huama huontegosie. ¹⁴Ama' antahizane kva vahe'ma omanisigeno'a, kumamo'a haviza hugahie. Hianagi knare antahizama ami vahe'ma rama'ama mani'nenageno'a, kumamo'a hankvetino knare hugahie. ¹⁵Mago'mo'ma vahepintima nofima hu'nesigenka, anazamofo nona huna miza kamigahue hunka hanunka, knaza erifore hugahane. Hianagi ana'ma hu'zankuma avesrama hanimo'a, agra'a aguvazigahie. ¹⁶Rimpa fru avu'ava ene a'mofona, agesga hunentaze. Hianagi vahekuma asuragionte ne'mo'a, feno zanke e'nerie. ¹⁷Vahe'mofo asuraginteno so'e avu'avama

hunte ne'mo'a, agra'a azeri so'e nehie. Hianagi vahe'mokizmi havizama huzmantea ne'mo'a, agra'a azeri haviza nehie. ¹⁸Kefo avu'avama nehaza vahe'mo'za, antesaza feno zmimo'a atupa knafi megahie. Hianagi fatgo vahe'mokizmi mizamo'a, zaza kna megahie.

¹⁹Fatgo vahe'mo'za knare manizanku nehakaze. Hianagi havi avu'avazama nevaririza vahe'mo'za, frizanku nehakaze. ²⁰Hagi akrehe akrehe avu'avazama agu'afima me'nea vahe'mofona, Ra Anumzamo'a agotenezmante. Hianagi fatgoma hu'za nemaniza vaheku, Ra Anumzamo'a muse hunezmante ²¹Tamage, havi avu'avama nehaza vahe'mo'za hazenkea agateore'za, ana hazenkea erigahaze. Hianagi fatgo vahe'mokizmi mofavreramina, Ra Anumzamo'a keagaga huozmanteno zmagu'vazigahie. ²²Hentofa agi agonane a'mo'ma fatgo osu avu'avama nehia a'mo'a, agra afu'mofokolire tro hunte rinima agonafi antanintaza kna hu'ne. ²³Fatgo avu'avama nehaza vahe'mo'za, knare'zama erifore'ma hanaza zanku zmave'nesie. Hianagi havi zamavu'zamavama nehaza vahe'mo'za hazenkefi manigahune hu'za antahigahaze. ²⁴Zamagragu'ma ontahiza vahe'ma zamaza nehaza vahe'mo'za, zamagra mago'ane eri avitegahaze. Hianagi rumofo amiga zama omisnazana, maka zankura eme atupa hugahaze. ²⁵Muse hu'za vahe'ma vevama nehaza vahe'mo'za, zmagra'a rama'aza erigahaze. Vahe'ma zmazahu vahe'mo'za, ana nona'a erigahaze. ²⁶Iza'o nezama'ama zgore'ma otreno, azeri akonama hania vahe'mofona, vahe'mo'za huhaviza huntegahaze. Hianagi iza'o nezama'ama zgore'ma atresimofona, asomu'mo agritera megahie. ²⁷Iza'o knare avu'ava zankuma kazigazi huno hakesimo'a, knare'za erinkeno, kefo zanku'ma hake'simo'a, kefoza erigahie. ²⁸Iza'o rama'a fenoma ante'nesia zanku'ma antahintahima hanimo'a, evuramigahie. Hianagi fatgo vahe'mo'za zafamo amu eri mareankna hu'za, tre tre hugahaze. ²⁹Naga'amofoma hazanke'ma erimisimo'a, mago'zana erisinti oharegosie. Neginagima hanaza vahe'mo'za ama' antahi'zane vahe'mokizmi eri'za vahe manigahaze. ³⁰Fatgo vahe'mofo avu'avamo'a, asimuni eri zafagna hu'ne. Hagi iza'o vahe'ma agu'mavazimo'a ama' antahi'zane vahe mani'ne. ³¹Ama mopafima fatgo vahe'mo'za miza zamia e'nerisage'za, kefo zamavu'zamavama nehanaza vahe'mo'zane, kumi vahe'mo'za knazana erigahaze.

Fatgo vahe'ene kefo avu'ava nehaza vahe'mofo naneke

12 ¹Azerinte fatgohu kegu'ma avesintemo'a, ama' antahizamofonku avesinente. Hianagi azeri ante fatgohu kegu'ma avesrama hunte'mo'a, neginagi vahe mani'ne. ²Knare zamavu'zamavama nehaza vahera, Ra Anumzamo'a avesi nezamanteanagi, havi zamavu'zamavama hunaku'ma retroma nehaza vahera, Ra Anumzamo'a haviza hu'naze huno ke huzmantegahie. ³Kefozama hanaza zantetira mani'zamia retrora

osugahaze. Hianagi fatgo znavu'znavazama hanazana, arafunare'za mani'nageno, vahe'mo'za eri tasagira osugahaze. ⁴Hentofa avu'ava'ene a'mo'a, nevena knare agi nemie. Hianagi knare avu'ava osania a'mo'a, neve zaferinafi namu reno kasriankna hugahie. ⁵Fatgo vahe'mo'ma antahizama retroma hania antahizamo'a, knare huno fatgo hu'ne. Hianagi havi zamavu'zamava nehanaza vahe'mo'zama, tami'naza antahi'zana, regavatga hugahaze. ⁶Kefo zamavu zamavama nehaza vahe'mokizmi ke'mo'a, vahe zamahe nefria vahe'mokizmi zamazankna hu'ne. Hianagi fatgo vahe'mofo kemo'a, vahe'mokizmia zamagu'nevazie. ⁷Kefo zamavu zamavama nehaza vahe'mo'za, haviza hu'za fanane nehaze. Hianagi fatgo vahe'mokizmi nagamo'za, oti hanavenetize. ⁸Antahizama'amo knare'ma hu'nesia nera, vahe'mo'za husga huntegahaze. Hianagi antahiza zmimo'ma fatgoma osu vahera, vahe'mo'za zamavesra huntegahaze. ⁹Eri'za vahe'ama mani'nenia vahe'mo'ma, anteramino amane vahe maniazama hanimo'a, zamunte omane vahe'mo'za zamagra'a zamavufga erisga nehazageno ne'zazmia omane vahera zmagatere'naze. ¹⁰Fatgo vahe'mo'a zgakafa'amofona kegvagriso'e hunezamante. Hianagi kefo zamavu'zamavama nehaza vahe'mo'za, zgakfa zamia kevg hugahazanagi, kanonkeve zamigahaze. ¹¹Amuho hu'za hozama antaza vahe'mo'za, rama'a neza me'nenige'za negahaze. Hianagi neginagi vahe'mo'za, nena rga'a omne'zante knazmia ahe friza erizana e'nerize. ¹²Kefo zamavu'zamavama nehaza vahe'mo'za, kefo zamavu'zamava hu'za eriza vahe'mokizmi zante ke zmanunu nehaze. Hianagi fatgo vahe'mo'za, arafuna rene'za raga rentegahaze. ¹³Kefo zamavu'zamavama nehaza vahe'mo'za, havigema nehaza kezamifinti, krifu ahazankna nehaze. Hianagi fatgo vahe'mo'za, ana krifufina ohe'za agate'neraze. ¹⁴Knare zmageru'ene vahe'mo'za, kezmireti knare'zana e'nerize. Hagi eri'za vahe'mo'za, anahu kna hu'za erizazmireti mizazmia e'nerize. ¹⁵Neginagi vahe'mo'zama zamagesama antahizana, zamagrama nehazazamo'a fatgo hu'ne hugahazanagi, ama antahizane vahe'mo'za rumo'zama antahintahima zamiza kea nentahize. ¹⁶Neginagi vahe'mokizmia zmarimpa he'zamo'a ame huno amate eama hanigenka kegahananagi, ama' antahizane vahe'mo'a, azeri havizama nehinke'no'a, rimpa he'zamo'a eama hanigenka onkegahane. ¹⁷Tamage'ma hu vahe'mo'a, keagare'ma otisimofona tamage huno hufore huntegahie. Hianagi havigema hu vahe'mo'a, keagare'ma otisimofona havige huno hu frakintegahie. ¹⁸Antahintahima osuno ame'ama huno hu ke'mo'a, kazimo vahe avufafi reankna nehie. Hianagi, antahintahima huteno keagagama hu vahe'mofo kemo'a, zamaza huno zamazeri neganamare. ¹⁹Tamage ke'mo'a mevava hugahie. Hianagi havigema hu kemo'a, zazatera omanegahie. ²⁰Kefo antahintahine vahe'mokizmi zamagu'afina vahe'ma rezmavataga hu antahizamo avitene. Hianagi rimpa fru zanku'ma nehaza vahe'mo'za,

muse hugahaze. ²¹Fatgo vahe'mokizmirera hazenke zana omegahie. Hianagi havi zamavu zamava ene vahe'mokizmirera, hazenke zamo'a avitegahie. ²²Ra Anumzamo'a havigema haza vahekura, tusiza huno agotezmanteno avesra hunezamante. Hianagi, tamage'ma nehaza vahekura, tusi muse nehie. ²³Ama' antahizane vahe'mo'za ame hu'za antahintahi zazmia eri ante ama nosaze. Hianagi neginagi vahe'mo'za, neginagi antahintahizamia ame huza hu ama nehaze. ²⁴Hanavetinka eri'zama erisanana, kva vahe fore hugahane. Hianagi feru vahe'ma manisanana, kazokzo eri'za vahe manigahane. ²⁵Antahintahi hakarema hu'zamo'a, vahe'mofona azeri antepri nehie. Hianagi zmazeri hanaveti ke'ma vahe'ma huzami zamo'a, zamazeri antesga nehige'za muse nehaze. ²⁶Fatgo vahe'mo'za tava'ozamire'ma nemaniza vahe'mokizmia, knare antahiza zamiza knare kante zmavare'za nevaze. Hianagi kefo zamavu zamavama nehaza vahe'mo'za, zamavre'za havifi nevaze. ²⁷Feru vahe'mo'zama zgagfa ahe'sazana onkregahaze. Hianagi kazigazi huno eri'zama eri'zamo'a, vahe'mofona mrrerisa feno zama'e. ²⁸Fatgo avu'avama huno manizamo'a, knare nomanizamofo ka me'ne. Hagi ana fatgo avu'avama avaririzamo'a, frizana omanene.

13 ¹Ama' antahizane mofavremo'a nefa'ma avumroma antesiankea antahigahianagi, veganokano kema hu mofavremo'a, vahe'mo'ma avumroma antesiankea ontahigahie. ²Knare kema vahe'mokizmima huzmi vahe'mo'za, knare zana e'neriza muse hugahaze. Hianagi hazenke vahe'mo'za, vahe'ma zmazeri haviza nehu'za zmatama zamizanku zmave'nesie. ³Iza'o agi'ma kegavama huno kema himo'a, agra'a maniza kegva nehie. Hianagi rama'a keagama hania vahe'mo'a, agra'a azeri haviza hugahie. ⁴Feru vahe'mokizmi zmagu'amo'a, rama'a zama erizanku zmave'nesianagi, anazana e'norize. Hianagi amuhu hu'za eri'zama erisaza vahe'mo'za, zmavesizana eri knare hugahaze. ⁵Fatgo vahe'mo'za havigema huzankura zamavesra nehaze. Hianagi kefo zamavu'zamava nehaza vahe'mo'za, rumokizmirera zmagaze huno zamagote zmavu'zmava nehaze. ⁶Fatgoma huno manizamo'a kva hugantena, knare hunka hazenkea omanesigenka manigahane. Hianagi kefo avu'avamo'a, kumi vahera azeri haviza hugahie. ⁷Mago'a zmunte omane vahe'mo'za, feno vahe kna nehaze. Hagi mago'a feno vahe'mo'za, zamunte omane vahe kna nehazanagi, feno vahe mani'naze. ⁸Feno vahe'mo'za nomaniza'zmima eri havizama huzankura, miza hu'za manigahaze. Hianagi zamunte'ma omane vahe'mofona, mago vahe'mo'a azeri korera osugahie. ⁹Fatgo vahe'mokizmi lamu tavimo'a, ru masa nehige'za, muse nehaze. Hianagi kefo zamavu'zamavama nehaza vahe'mokizmi lamu tavimo'a, asu nehie. ¹⁰Avufga ra huno vahe'mofo agorga omani avu'avazamo'a, ha' fra hu'za avreno ne-e. Hianagi avumro kema antahino amagama ante vahe'pina, knare antahizamo'a megahie. ¹¹Revatga

hunka havige kantetima eri'sana zgom'o'a, ame huno fanane hugahie. Hianagi eri'zama erino, osia eri atruma hute hutema himo'a, rama'a eri atru hugahie. ¹²Vahe'mo'za fore hugahie huza amuha nehaza zamo'ma fore'ma osanige'za, zmagu'amo'a haviza hugahie. Hianagi ana zamo'ma e'ama'ma hania zamo'a, asimu ami zafagna hugahie. ¹³Avumroma antesia kemofoma zokagoma antesimo'a, agra'a hazenkefi mani'noe huno hugahie. Hianagi kasegema asaminia kemofa agorga'ama maninimo'a, nomanizama'afina knare hugahie. ¹⁴Ama' antahizane vahe'mo rempima hugamisia zamo'a, asimu ami ti kapui hanatiankna hu'neankino, iza'o ana kema antahimofona, frizamofa krifufintira agatenere. ¹⁵Knare hu'za antahi amama haza vahe'mokizmia, vahe'mo'za zamavesi nezamantaze. Hianagi hazenke vahe'mokizmi zmvu'zmvamo'a, hanavetino haviza hu'ne. ¹⁶Maka zamofa ankereno hu vahe'mo'a agha antahiteno, maka zana nehie. Hianagi neginagi antahintahine vahe'mo'za, zamagesa ontahi neginagi zmvu'zmvava eri ama nehaze. ¹⁷Kefa vahe'mofoma katogema huntisigeno vaniana, hazenkefi ufregahie. Hianagi iza'o tamagama huno kema hu vahe'ma, ke erino vanigu'ma katogema huntisigeno erino vaniana, vahe'mokizmia zmazeri knare hugahie. ¹⁸Iza'o avumaroma antesaza kema ontahisimofona amunte omnesigeno, agazegu hugahie. Hianagi izano azeri fatgohu kema asamisigeno antahino amage antesimofona, agrira husaga huntegahaze. ¹⁹Avenesinia zama e'nerisigeno'a, agu'amo'a muse hugahie. Hianagi neginagi vahe'mo'za havi zmvu'zmvava nehaza zampintima atreno atiramizankura zmvavesra nehie. ²⁰Iza'o knare antahizane vahe enema vanoma nehia vahe'mo'a, knare antahiza erigahie. Hianagi neginagi vahe enema tagrote'za vanoma nehaza vahe'mo'za, hazenke erigahaze. ²¹Hazenke zamo'a kumi vahe'mokizmi nezmavaririe. Hianagi fatgo vahe'mokizmia, fenozmimo'a rama'a hugahie. ²²Knare vahe'mo'a mofavre'amo'ene henka negehoma eri sintima haresia zana, ko retro huzmanteteno nefrie. Hianagi kumi vahe'mo'zama fenoma eri atruma haza fenona, fatgo vahe'mo'za erigahaze. ²³Zamunte omane vahe'mokizmi hozafina, rama'a neza fore hugahianagi hazenke nomanizamo'a timo'ma hiaza huno harafi huno vugahie. ²⁴Iza'o mofavre'amo hazenke nehanigeno knoma amino azeri fatgoma osanuno'a, mofavre'a avesinonte. Hianagi iza'o mofavre'ama avesima nentemo'a, hanavetino azeri fatgo hugahie. ²⁵Fatgo vahe'mo'za rama'a ne'za me'nege'za nezamu nehaze. Hianagi kefo vahe'mofoza, zamaga tevava nehaze.

14 ¹Knare antahizane a'mo'a noma'a erise higeno, naga'amo'a so'e nehie. Hianagi neginagi a'mo'a, noma'ane naga'anena eri haviza nehie. ²Fatgo avu'avazama nevaririmofona, Ra Anumzamofa kore'zamo agu'afina me'ne. Hianagi iza'o kefo avu'avama nehimo'a Ra Anumzamofona korera hunonte. ³Neginagi vahe'moma kema hiankemo'a,

agrazante kano eri agumpi nente. Hianagi fatgo vahe'mofo kemo'a, agu'vazigeno knare huno nemanie. ⁴Bulimakao omani'nea afu nompina avusese nehie. Hianagi hanave bulimakamo'a rama'a ne'za erifore nehie. ⁵Tamage huno kema hu ne'mo'ma, keagarema otinea ne'ma, aza huno huama haniana, tamage hugahie. Hianagi havige'ma hu ne'mo'a keagarema otinea nema kema aza hunoma haniana havige hugahie. ⁶Hagi kiza zokago kehu vahe'mo'ma, knare antahizanku'ma hake'suno'a, keno eri fore osugahie. Hianagi ama' antahizane vahe'mo'a, fru huno antahizana erigahie. ⁷Knare antahizama omane vahepintira, mani agetaginka manio, na'ankure knare antahizana e'origahane. ⁸Knare antahizane vahe'mo'a kama vania kana antahi ani' hu'nenno vugahie. Hianagi neginagi vahe'mo'za, zamagrazmi rezmatga nehaze. ⁹Neginagi vahe'mo'za kumimofo nona'ama erizankura, hu kiza zokago nehaze. Hianagi fatgo avu'ava'ene vahepina, antahiami' avu'avazana me'ne. ¹⁰Mago'mago vahe'mo, agria'a rimpa aka'zana antahino keno nehie. Hagi mago'mo'e huno rumofo musezana mika'a erinte amara osugahie. ¹¹Kefo vahemofo nomo'a, haviza hugahie. Hianagi fatgo vahemofo seli nomo'a, hanavetino megahie. ¹²Mago kamo'a vahe avurera knare hugahianagi, avaririno atuparega vaniana fri'za me'ne. ¹³Musema huzampinena rimpa akazana me'ne. Hagi musema hu'zamo'a vgamaresigeno'a, asuragiza egahie. ¹⁴Zmentinti osu vahe'mo'za zamagrama hu'nesaza z mavu'zmava zante, mizana erigahaze. Hagi knare vahe'mo'a agra'a, hu'nesia avu'ava zante, mizana erigahie. ¹⁵Osi antahintahima erinaza vahe'mo'za, maka zankura zamentinti nehaze. Hianagi knare antahizane vahe'mo'a, kama vu zama'afina kva nehie. ¹⁶Knare antahizane vahe'mo'a kva huso'e hu'nenno, kefozana agatenere. Hianagi neginagi vahe'mo'a kva huso'e osuno, makazana amane hugahue huno nehie. ¹⁷Ame huno rimpama ahe vahe'mo'a, neginagi avu'ava nehie. Hagi kefozama hu antahintahima eri fore'ma nehia vahera, avesra hunentaze. ¹⁸Osi'a antahintahine vahe'mo'za, neginagi avu'avaza erisantiharegahaze. Hianagi makazama ankere'za hu vahe'mo'za, kini fetori anteanakna huno antahizana erigahaze. ¹⁹Iza'zo kefo zamavu'zmava nehanamo'za knare'zama nehanaza vahe zamavuga zamarena regahaze. Havi zama nehamo'za fatgo vahe'mokizmi kegina kafante zamarena ome reza husga huzmantegahaze. ²⁰Amunte'ma omne'simofona, knampa'amo enena avesionteguhie. Hianagi feno vahe'ma manisimofona, rama'a vahe'mo'za knampa'a manigahaze.

²¹Inamo'o tava'oma'arema maninesimofoma kefenkami netreno knarema huontesimo'a, kumi hugahie. Hianagi iza'o amunte omane vahe'ma knarema huntesimo'fona, Anumzamo'a asomu huntetegahie.

²²Havi avu'avama huzamofo kema retroma hanaza vahe'mo'za, havi kantera novazafi? Hianagi iza'zo knare avu'avama huzamofo kema

retroma hazamo'za, mani fatgoma huno manizane vga'ore avesizana ke'za erigahaze.

²³Hanavetiza mika erizama eriza vahe'mo'za, rama'a eriguhe'za erigahaze. Hagi mani'neza ke'agemu hu vahe'mo'za, zamunte omane vahe manigahaze.

²⁴Ama' antahizane vahemofu fenomo'a, anunte fetori meankna huno me'ne. Hianagi neginagi z mavu'zmavama nehaza vahe'mokizmi neginagi z mavu'zmavamo'a, zmazeri neginagi nehie.

²⁵Keagama humanezmantesafima, tamage hunka kema huamama hanamoka, rama'a vahe zmagu'vazigahane. Hianagi keagafima havigema hunka huamama hanamoka, havige vahe manigahane.

²⁶Ra Anumzamofoma korema huntessimofona, Agra hanave vihu huntkeno mani'neza, mofavre'amo'za hanave vihufi manigahaze.

²⁷Ra Anumzamofoma kore'ma huntenu Agri agorga manizamo'a asimu ami' kapu'i ti me'neankino, vahe'ma ahefri krifu'fintira azeri atregahie.

²⁸Kinimo'ma rama'a vahe'ma kegvama hanige'za, agrira rahi amigahaze. Hianagi kinimo'ma osia vahe'ma kegvama hanuno'a, agra haviza hugahie. ²⁹Ame' huno zmarimpa ohe vahe'mo'za, ama' antahiza e'nerize. Hianagi hatuma huza zamarimpahe vahe'mo'za, neginagi z mavu'zmava eri ama nehaze. (Jem 1:19-20)

³⁰Vahe'mo'ma rimpama ante fru hunoma mani'zamo'a, avufgamofona asimu amigahie. Hianagi rumofu zante'ma kesanema nehanimofona, ana avu'avamo'a zaferinafi namureno kasriankna hugahie. ³¹Kagrama amunte omane vahe'ma zmazeri havizama hanunka, troma huzmantenea Anumzamofu huhaviza nehane. Hianagi kagrama zmazeri so'e hanunka, Anumzamofona ra ahi amigahane. ³²Kefu avu'avama nehia vahe'mofona, ana kumi avu'avazamo azeri haviza hugahie. Hianagi fatgo vahe'mo'ma, frisigeno'a, agu'vazigahie. ³³Knare antahi'zamo'a, ama' antahizane vahe'mofu agu'afi akoheni meso'e huno megahie. Neginagi vahemofu agu'afina ana knare antahizamo'a, agra'a azeri ante'ama' nehie. ³⁴Fatgo avu'ava hu'zamo'a ana mopafi me'nea kumara azeri antesga nehie. Hianagi kumi'ma nehaza avu'avazamo'a mika ana mopafi vahe'mofona, azeri agaze nehie. ³⁵Knare avu'avamahia eriza ne'mofona, kinimo'a muse hunente. Hianagi agazema hu avu'avama nehia eri'za vahera, kinimo'a rimpama hentegahie.

15 ¹Akohenka antefru hunka ke'nona hanana zamo, rimpama akahe'zana eri'ame'ne hugahie. Hianagi hakrugema hanana zamo'a, rimpahazana azeri otigahie. ²Knare antahizane vahe'mofu agipintira, knare antahiza e'nige'za vahe'mo'za antahi muse hugahaze. Hianagi neginagi vahe'mofu agipintira, neginagi kemo akaha hunerame. ³Ra Anumzamofoma mika kaziga kefu vahete' ene, knare vahetera avua keteno nemanie. ⁴Fru kema hu'zamo'a vahe'mofu asimu ami zafagna

hu'ne. Hianagi akrehe akrehe kema hu'zamo'a, vahe'mofo agu'a ahenefri. ⁵Neginagi antahizane vahe'mo'a nefa'ma azeri fatgo hiankea nontahie. Hianagi iza'o azeri fatgoma hiankema antahimo'a, knare antahiza e'nerie. ⁶Fatgo vahe'mokizmia nozamifina, fenozamo avinete. Hianagi kefo vahe'mo'za erisaza mizana, hazenke'za erigahaze. ⁷Knare antahi'zane vahe'mo'za, antahizana vahera nezamize. Hianagi neginagi antahizane vahe'mo'za, anahura osugahaze. ⁸Kefo avu'avama nehaza vahe'mo'zama, Ra Anumzamofonte'ma kre sramnama vunentaza zankura, agonete. Hianagi fatgo vahe'mo'zama haza nunamunku, Agra muse nehie. ⁹Kefo vahe'mo'ma hia avu'ava zankura, Ra Anumzamo'a agotenente. Hianagi fatgo avu'avama huzanku'ma kazigazima hia vahe'mofona, Ra Anumzamo'a avesinente. ¹⁰Fatgo kamofoma amefi humisimo'a, tusi'a hazenke erigahie. Iza'o azeri fatgohu kemofoma avesrama huntesimo'a, frigahie. ¹¹Fri' vahe'mofo kuma'mo'ene frizamo'a, Ra Anumzamofu avurera amate me'neankino, tagutumotia keno antahino hu'ne! ¹²Veganokno kema hu vahe'mo'za, azeri fatgoma hanimofona avesra hunenteno, ama' antahizane vahe'mofontera aza hinogura urava'o osugahie. ¹³Krimpamo'ma musema hu'nesigeno'a, kavu'gosafintira knare huno kizankiza hugahie. Hianagi karimpamo'ma musema osu'nesigeno'a, kavugosamo'a rugaririgahie. ¹⁴Ama' antahizane vahe'mo'za antahizama erizankura zamaganete. Hianagi neginagi antahizane vahe'mofona havi kemo'a, ne'zama'agna hugahie. ¹⁵Zamunte omane vahe'mo'za mika zupa maniza zmifina tusi'a amuhu nehu'za maragu'zantetize. Hianagi muse arimpame manisimo'a, nezane tine neneno muse huvava hugahie. ¹⁶Osi'a fenoma anteneta Ra Anumzamofonkuma kore'ma huntenuzamo'a, rama'a fenoza ante'neta hazenkema erizana agaterene. ¹⁷Vahe'ma avesinentenka hozafi kamo'ma osia refko hunka ne'zamo'a, ra bulimakao afu'ma ahegino rimpagnanema refkoma huno nezana, agaterene. ¹⁸Ame' hunoma rimpama ahe vahe'mo, ha'frama hu'zana eri fore nehie. Hianagi akohenoma rimpa fru huno mani vahe'mo, ha'frama huzana erifru nehie. ¹⁹Eri'za e'ori feru'ma mani vahemofu kamo'a, ave'ave trazampima neviankna hu'ne. Hianagi mani fatgo hu'za mani vahe'mokizmi kamo'a ranka me'nege'za nevaze. ²⁰Ama' antahi'zama me'nea mofavremofu nefa'a, muse nehie. Hianagi neginagi ne'mo'a, nererana kefenkaminetre. ²¹Antahizama'a omane vahe'mo'a, neginagi avu'avazankura muse hugahie. Hianagi ama' antahizane vahe'mo'a, knare zanke nehuno, fatgo kante nevie. ²²Knare antahizama vahepinti e'orinenka mago'a zama retroma hunaku'ma hananana, ana zamo'a forera osugahie. Hianagi rama'a knare antahintahima eritenka, retroma hanana zamo'a, efore hugahie. ²³Fatgo hunoma kenonama hanimo'a, muse hugahie. Hagi kna fatgore'ma huga kema hania kemo'a, knare'zantfa hugahie. ²⁴Knare antahi'zane vahe'moma asimu erisia kamo'a anagamu marenerino,

fri vahe kumapima uramizankura kegva hunente. ²⁵Ra Anumzamo'a avufama eri antesgama hanimofona nomanizama'a, eri haviza hugahie. Hianagi kento a'mofo fenoma'ane nonkuma'a, kegva huntegahie. ²⁶Kefo avu'avazama hu antahizama retroma huzankura, Ra Anumzamo'a avesra huno agonete. Hianagi avusese hu'nea kema huzankura, Agra muse nehie. ²⁷Iza'o mika'za rehatri huno nagrike zanema hu' vahe'mo'a, hazenke erino naga'afi efregahie. Hianagi havi kazigatima masavema huno mizama sezankuma avesrama huntesimo'a, knare huno manigahie. ²⁸Fatgo agu'ane vahe'mo'a aghesa antahiteno, kenona nehie. Hanki kefo vahe'mofo agipintera, kefoge atineramie. ²⁹Ra Anumzamo'a kefo zamavu'zmavama nehaza vahe'mokizmirera, afete nemanie. Hianagi fatgo vahe'mokizmi nunamunte, aghesa anteno antahinezamie. ³⁰Musema nehia vahe'mofo avufima kesanana, muse hugahane. Knarezama hu'nesia zamoho agenkema hu ke'mo'a, vahe'mofona zaferina kampina azeri fru hugahie. ³¹Iza'o so'e nomanizama manisieguma, azeri fatgoma hu kema nehinkeno antahisimo'a, knare antahizane vahe'mozama manisaza amunompi manigahie. ³²Iza'o azeri fatgo hu kema nehanigeno antahisimo'a, agra'a azeri haviza nehie. Hianagi iza'o azeri fatgo hu kema nehinkeno, antahisimo'a, ama' antahintahi erigahie. ³³Ra Anumzamofonku korema hunteno agorgama mani avu'avazamo, vahe'mofona knare antahintahia rempi hunemie. Hagi kagrama anteraminka manisunka, rankagia erigahane.

16 ¹Vahe'mota e'ina hu'za hugahune huta antahintahia retro hugahunanagi, Ra Anumzamoke ana antahintahima retroma hanuntera, huvigare kea huntegahie. ²Tagrama mika zama hunazamo'a knare hune huta tagesa antahigahunanagi, nanknahu tagu'tagesareti ana mika'zana nehune Ra Anumzamoke refako hugahie. ³Mika'zama huku'ma hanana zana Ra Anumzamoho azampi antegeni, ana mika zama huku'ma antahintahima retro'ma hanana zamo'a, nena'a fore hugahie. ⁴Ra Anumzamo'a agafa'a me'negeni makazana trohune. Hagi zmahe fananema hania kefo znavu'zmavama nehaza vahe'enena, tro huzmantene. ⁵Ra Anumzamo'a znavufga ra nehaza vahekura, avesra huzmanteno agotenezmante. Hagi zamavufara hanaza vahe'mo'za, knazampi manigahaze. ⁶Tamage huta Ra Anumzamoho avesinteta mani fatgo huta manisunkeno'a, Ra Anumzamo'a kumitia eritregahie. Ra Anumzamofonku'ma kore hunteta Agri agorga manisunazamo, kefo zampintira tazeri amane hugahie. ⁷Ra Anumzamo'ma musema nehia kantema tavutva'ma hanunkeno'a, ha' vahetimo'zanena zamarimpa fru hurantegahaze. ⁸Fatgo manizane maninenka osi'a fenoma ante'snamo'a, havi kampinti rama'a fenoma ante'sana zana agaterene. ⁹Ana hugahune huta antahintahia retro hugahunanagi, Ra Anumzamo Agrake makazama hanuna kana erinte fatgo hugahie. ¹⁰Kini vahe'mo'za Anumzamo'ma e'ina

hihoma huno zamia antahizanteti kea nehaze. Hagi vahe'ma refakoma hanu'za, fatgo hu'za vahera refako hiho. ¹¹Fatgoma huno makazama refko hu'zana, Ra Anumzamofontegati ne-e. Hagi fatgoma huno makazama kna'amoma hu'nea avamente'ma refkoma huzanku avenesie. ¹²Kini vahe'mofona kefo avu'avazankura agoteno, avesra nehie. Na'ankure kini trama me'neana, fatgo avu'avamofo agofetu me'ne. ¹³Kini vahe'mo'za fatgo vahemofo kegu musena nehu'za, tamage keagama nehia vaheku zamavesinezamantaze. ¹⁴Kini ne'mofo rimpa aka'zamo'a frigahane naneke me'ne. Hianagi knare antahi'zane ne'mo'a, kini ne'mofona rimpa azeri fru hugahie. ¹⁵Kini ne'mofo avugosamo'ma kiza avu'avama haniana, kasimu erinka manigahane huno nehie. Ana avu'avamo'a, mona hampomo ko erino eramigeno, ne'zamo afureankna nehie. ¹⁶Knare antahi'zama eri'zamo'a golia agateregeno, ama' antahizama avesinteno erizamo'a, silva agatere'neankino hentofaza hu'ne. ¹⁷Fatgo vahe'mofo kamo'a, ranka me'nege'za, kefo avu'avazamofona azeri agateregahaze. Iza'o kva hu'nenno ana kama avaririmo'a, agra'a agu'nevazie. ¹⁸Kavufga rahu zamo'a, kazeri haviza hugahie. Kagra kavufga husgama hu'zamo'a, kazeri tna fakofa hugahie. ¹⁹Akoheno anteramino amunte omane vahe enema manizamo'a, avufga rahu vahemo ha'pinti feno eri'neaza refko hu'zana agatere'ne. ²⁰Iza'o avumro antesaza kema avaririsimo'a, hakare'zama hanifina knare hugahie. Ra Anumzamofontema amentinti'ma hanimofona, asomu huntegahie. ²¹Antahi amama haza vaheku, ama' antahizane vahere huza hugahaze. Knare kema hania nanekemo, vahe'mofona avare agrarega atregahie. ²²Ama' antahintahima eri'naza vahe'mofontera ana ama' antahizamo'a asimu ami kampu'i tinkna hu'ne. Hianagi neginagi avu'avazamo'a, neginagi avu'avama haza vahetera, nona'a knaza nezamie. ²³Ama' antahizane ne'mofo agu'amo azeriante fatgo higeno, mago'ane vahe'ma agu'ama azeri rukrahe hu kea agipintira atineramie. ²⁴So'e kema hu'zamo'a tumemofo rima'agna hu'neankino, vahe'mofo agu'amemofontera haga higeno, zaferinamofona azeri so'e nehie. ²⁵Mago'a vahe'mo'za knare kante nevune nahazanagi, anama nevaza kamofa atuparega friza me'ne. ²⁶Eri'zama e'neriza vahe'mo'za antahi'naze, eri'zama zamunasisi hu'za e'orisanu'za ne'zana onegahazankiza, zmagamatezamo hige'za, eri'zana e'nerize. ²⁷Kefo vahe'mo'za, kefozama eri fore huzanku nehakraze. Ke'zmimo'a afe tevemo te'osa hiankna huno, vahe'mokizmia zamazeri haviza nehie. ²⁸Akrehe akrehe zmageru'ene vahe'mo'za, vahe'mokizmi amunompina kea erintage'za ha' fra nehaze. Vahe'mofo amefi agenke'ma huzamo knare arone'a, azeri netane. ²⁹Ha'framahu ne'mo'a, tava'oma'arema nemanimofona revatga huno avreno havi kante nevie. ³⁰Iza'o avuma mago ne' resukima nemimo'a, akrehe akrehe avu'avaza nehie. Hagi iza'o agi'ma haninkofisigenka, hazenke avu'ava nehie hunka antahigahane.

³¹Fatgo avu'avazama hu'zama nevaza vahe'mokizmia tu zmazokamo'a, kini fetori anunte antanintea kna nehige'za, ra agi nemize. ³²Ame huno arimpa'gnama osu vahe'mo'a, himamu vahera agateregeno, iza'o rimpa he'zama azerirava nehimo'a, tusia kuma'ma ha'ma huno eri'nemofona agatenere. ³³Mago'azama hunakura satu zokago renka antahياما hugahue hnananagi Ra Anumzamoke hu izora hutenkeno, anazamo'a eforera hugahie.

17 ¹Vahe'mo'ma rimpa frune akoheno manineno naga'anema osia kav'e'ma ne'zamo'a, tusi'a ne'zama hafra nehuno kreno ne'zana agatere'ne. ²Knare antahizane eriza ne'mo'a, kva'amofu mofavre'mo'ma agaze hu avu'avama hania mofavremofona ugota huno kegva hunte'neni, mofavre'amo'za erisanti haregahaze huzmante'nesafintira erigahie. ³Koline silvanena tevefi kre'za eri agru nehaze. Hianagi Ra Anumzamoke tagu'amofona reheni nege. ⁴Kefo avu'ava'ene vahe'mo'a, havigema nehazankea nentahie. Hagi tavre vahe'mo'a, vahe'ma azeri haviza hukema hazanke nentahie. ⁵Amunte omame vahe'ma huhaviza huntesia vahe'mo'a, tro'ma huzmante'nea Ra Anumzamofu huhaviza hunente. Hagi hazenkema erisaza zanku'ma muse hanimo'a, agra'a havi mizana erigahie. ⁶Nenama huza ra avuma omesaza vahe'mokizmia, zamagehe'mo'za, kini fetorikna zamanuntera hu'nage'za, ra zamagi vahe'mo'za nezamize. Hagi mofavre'mo'za nezmarrera zmafana muse huzmantegahaze. ⁷Neginagi vahe'mofontera knare ke'ma hu'zamo'a, haviza hu'neanagi, kva ne'mo'ma havigema hu'zamo'a, havizantfa hu'ne. ⁸Mago'mo'ma mago zama erinaku zgoreti'ma maseve'ma amino erisiazamo'a, agraragisa kaguvaza huno efore hiankna nehie. Iza'o anazama himo'a maka zampina knare nehie. ⁹Iza'o havizama huntessimofoma kefo zama'a atrentesimo'a, amu'nozanimina avesinte avu'avazamo'a, meno vugahie. Hianagi arone'amofu havi avu'avazama'agu hugantigama hanimo'a, knare knampa'a azeri atanegahie. ¹⁰Kemofoma refko huno antahi ankemare vahe'mofona, magoke zupama azeri fatgo hu kema asamisankeno'a antahigahianagi, neginagi vahe'mofoma azeri fatgo hunaku'ma 100ti'a zupa knona ami'sanana, avu'avara ruzahera osugahie. ¹¹Kefo avu'avazane vahe'mo'za, ha'ma erifore hu zankuke zamave'nesiankino, hazenke'zami vahera huntunkeno zmavaririgahie. ¹²Anenta'ama kumzafama ase'nesaza beama, mago ne'mo'ma kantegama tutagihama huntEZamo'a knare hu'neanagi, neginagi vahe'mo'za neginagi zamavu'zamavama nehaza vahe'enema tragoteno manizana agatere'ne. ¹³Hagi mago vahe'mo'a knare'zama magamofoma huntesia zanku'ma, nona huno kefozama huntesia vahe'mofona, kefo zamo'a naga'afintira atreno ovutfu hugahie. ¹⁴Ha' frama hu'zamo'ma agafama nehanigeta, koma eri amne osanunkeno'a, ti anagi atregeno ti hageno eankna huno rama'aza eri haviza hugahie. ¹⁵Kefo avu'avama nehia vaheku'ma fatgo

vahere nehu'za, fatgo zmavu'avazama nehaza vaheku'ma, kefo vahere hu'zama nehaza tare zmavu'zmavakura, Ra Anumzamo'a agoteno avesra hunezmante. ¹⁶Neginagi vahe'mo'za knare antahi'zama rempima hu'za eri zmave'sizama omane'nege'za, na'a higeza avono hu zgoa zamazampina eri'naze? ¹⁷Mika zupa knampatimo'za zmavesirantegahaze. Hagi knazampima tza hanagu tafuhe'mokizmia kasezmante'naze. ¹⁸Knare antahi'zazmima omane vahe'mo'za zamagrazmi huvempa hu'za, tava'ozmire nemaniza vahe'mo'za nofima hu'naza zama ovakanesageta, tagrati vakanezmantegahune hu'za nehaze. ¹⁹Iza'o ha'frama hu'zankuma avesintemo'a, kumiku avenesie. Iza'o agra'a agima erintesgama nehimo'a, hazenke erigahie. ²⁰Akrehe akrehe agu'ane ne'mo'a, knare zana hakeno erifore osugahie. Hagi iza'o tavre kema nehanimo'a, hazenkefi ufregahie. ²¹Neginagi vahe'mofo nerera nefa'a, tusi'a ataza e'nerie. Higeno nefa rimpamo'a, ana neginagi ne'mofonkura musena osugahie. ²²Musema huno mani'zamo'a, tusazamo vahera azeri so'e higeno maniankna nehie. Hianagi vahe'mofo antahizamo'ma havizama haniana, havi krimo zaferinafi me'nenno azeri haviza hiankna hu'ne. ²³Kema refkohu tratema kefo ne'moma maninesuno'a, keagama eri haviza hinogu oku'a masevema huno amisia zgoa e'nerino, keaga eri rukrahe huno fatgo kantera ontahigosie. ²⁴Antahi'zane vahe'mo'a knare antahizante avua anteno nevie. Hianagi havi vahe'mofo avumo'a, mopa ataginare ame huno omegege, emegege huno nevie ²⁵Neginagi mofavremo'za nezmafana zamasuzana eri nezamie. Hagi kasema ante'nea zamarerahe'ina, zmarimpa zamata eri'nezamize. ²⁶Fatgo hu'nesia vahe'ma knazama zamige, knare huno hazenke'a omane kva vahe'ma knoma ami'zamo'a, haviza hu'ne. ²⁷Knare antahintahima me'nea vahe'mo'a, rama'a keaga osugahie. Hagi ama' antahizama me'nenia ne'mo'a, ame huno rimpagna osugahie. ²⁸E'ina hu'negu neginagi vahe'mo'ma kema osuno manisia zankura, vahe'mo'za knare antahiza eri'ne hugahaze.

18 ¹Agra'aku'ma nemanisia vahe'mo'a, agraguke agesa nentahie. Knare antahizama eri'nea vaheku'enena ana ne'mo'a avesiozmantegahie. ²Neginagi vahe'mo'a ama' antahintahima erizankura, musena osugosie. Hianagi agra'a antahi'zanke hu'netreno manigahie. ³Kefo avu'ava'ene vahe'mo'a, mago'a vahekura antahi amane'za neseno, zmagi'a eri haviza nehuno, zmagaze eri'nezamie. ⁴Knare antahizane vahe'mofo agipinti kemo'a, tiru kna hu'ne. Hianagi mika knare antahizamo, timo kerifinti aviteno herafiramino neviankna nehie. ⁵Hazenkema huteno trate'ma otisigenka, hazenkema hu'nesia vahera aza osutfu huo. Hagi fatgo vahe'ma keagafima oti'nenigenka havigema huntanka azeri atre'zankura kva huo. ⁶Neginagi vahe'mofo kemo'a, hafra hu'za eri fore nehigeno, ana ke'zmimo'a kanonkevegu meme nehie. ⁷Neginagi vahe'mofo agi'mo'a, havi ke'agage nehanigeno, krifu

agra'a avufare anaginente'ankna nehiakino, agrira azeri haviza hugahie. ⁸Vahe agenkema hu'zamo'a, haga ne'zankna hu'neankino, ame huno vahe agu'afina ufregahie. ⁹Zaferina omane feru vahe'mo'a, makazama eri havizama nehia vahe'mofo nefu manine. ¹⁰Ra Anumzamofa agimo'a hanavenentake vihugna hu'neankino, fatgo vahe'mo'za agritega zamagare'za nevazageno, zamagu nevazie. ¹¹Feno vahe'mofo fenomo'a ra kuma zmimofa vihugna hu'neankino, kegva hurantenkenta knare huta manigahune hu'za nentahize. ¹²Avufga ra hu'zamo'a, henka hazenkefi kavrentena manigahane. Hianagi knare hunka anteraminka mani'zamo'a, kazerisga huno knare kagi kamigahie. ¹³Iza'o kema antahi anke ore'neni ke'nonama hanimo'a, agra neginagi avu'ava nehuno agaze zana agra'a erigahie. ¹⁴Krima eri'nesimo'ma ana zankuma antahintahi hakarema osaniana, ana krifina amane manino vugahie. Hianagi vahe'mofo antahintahimoma havizama haniana, iza knarera huno manigahie? ¹⁵Maka'zama antahi ankere vahe'mo'a, knare antahintahima erinakura muse nehie. Knare vahe'mo'a agesazofa huteno nemanie. ¹⁶Musezama eri'neni esimofona, kafana anagisigeno keagama hukuma hania rankva nera negesigeno, keaga humigahie. ¹⁷Keagafima otinesia ne'ma ese'ma keagama refkoma huno kesiana tamage hugahazanagi, anantema antahigesia ne'mo, hazenke'a keno erifore hugahie. ¹⁸Taisi zokagoma re'zamo ha frama hu'zana eri fru nehuno, hanave netremoke'ma ha'ma hu'zana zanazeri netane. ¹⁹Kagrama negafu'ma arimpama azeri havizama hu'nenana ne'ma avare'zamo'a, rankumamofa hanavenentake vihu hunteankna huno negafu'ma avare'zamo'a amuhu hu'ne. Ha' frama hu'zamo'a, rone ka'a hanavenentake kafa erigino rentroko huno, refko hiankna hugahie. ²⁰Knare kema kagipintima atiramisuno'a, knare ne'zama nankeno kamuma hiankna huno kaza hugahie. Fatgo kema hanana kemo'a, kazeri knare hugahie. ²¹Kekamo'a vahera zmazeri so'e nehuno, zmazeri havizana hugahie. Hagi kema huzantema avesima nentesimo'a, ana ke'amoma rentesia rga'a agra'a erigahie. ²²Iza'o a'ma hakreno erinesimo'a, knare'za hakreno eri'neankino, Ra Anumzamofa avesinente. ²³Amunte omane vahe'mo'a, asumaraginteno azama hanigu meme nehianagi, feno vahe'mo'a, hanave kefinti kenona nehie. ²⁴Rama'a ronekamo'a kazeri haviza hugahianagi, tamage ronekamo'a negafuma nehiaza huno tava'onkare manigahie.

19 ¹Amunte omane vahe'ma manineno, maka zampima mani fatgoma hu'zamo'a, neginagi vahe'moma akrehe krehe ageru'ma aruzana agaterene. ²Mago vahe'mo'ma keno antahinoma osu'nesia zama hunaku'ma haniana, knarera osugahie. Iza'o ame'ama huno mago zama hunakuma hanimo'a, ana zana eri haviza hugahie. ³Mago'a vahe'mokizmi zamagri'a neginagi z mavu'zmava zamo zamazeri haviza nehige'za, Ra Anumzamofona zamarimpa ahenentaze. ⁴Amunte'ma me'nea ne'mofona,

rama'a knampa'a manigahaze. Hagi fenoma'a omane ne'mofona knampa'amo'za netraze. ⁵Keagare'ma omatinesia vahe'ma havigema huno huamama hunteno azama hanimo'a, knazana erigahie. Hagi havi kema hanimo'a, mizama'a erigahie. ⁶Rama'a vahe'mo'za zamazama hania vahe arone manizanku zamave'nesie. Hagi maka vahe'mo'za muse zama zamiza vahe'mofo rone nemanize. ⁷Kagrima kamunte'ma omanesige'za, kafuhe'za kavesi ogantegahaze. Hagi knampa ka'amo'za mago'ane agatere'za zamavesra hugantegahaze. Kazama hanazegu'ma hake'sanana, zamagra omanigahaze. ⁸Kagrama knare antahi'zama erisunka, kagraka'agu avesinentane. Kagrama ama' antahi'zama azeri hampo'nama hanunka, knare hunka manigahane. ⁹Keagafima otisia vahe'ma havigema huno huama huntesia vahe'mo'a knaza erigahie. Hagi havigema hanaza vahe'mo'za, frigahaze. ¹⁰Neginagi vahe'mo'za marerisa zampina manigara osu'naze. Kazokzo eri'za vahe'mo'ma kva vahe manino, kva (princes) vahe'ma kegva huntezamo'a, knarera osu'tfaza hu'ne. ¹¹Knare antahi'zama eri'nesia ne'mo'a, ame huno arimpa ohegosie. Hagi havizama huntesia zanku'ma agesama ontahisiana, husga huntegahaze. ¹²Kini vahe'mofo rimpa he'zamo'a, laionimo rankrafa hiankna nehie. Hianagi vahe'ma zamavesinteno zamazama hu avu'avazamo'a, trazante ata ko arunteankna nehie. ¹³Mago ne'mofavremo'ma neginagi avu'avazama hiana, nefana tusi'a hazenke eri'nemie. Hagi mago ne'mofo a'mo'ma kefra nehuno, ke huvava hania a'mo'a, nomofo anuntupinti ko'arigeno varivri hiankna hugahie. ¹⁴Negrera negafampinti none fenozanena erisanti haregahane. Hianagi Ra Anumzamoke, ama' antahizane a'ra kamigahie. ¹⁵Feru vahe'moka kavu mase vava hugahane. Hagi eriza e'ori vahe'moka nezanku frigahane. ¹⁶Iza'o kasegema amage'antesimo'a knare huno manigahie. Hagi iza'o Ra Anumzamofu avu'avama amefi'ma humisimo'a, frigahie. ¹⁷Iza'o amunte omane vahe'ma knare avu'avama hunentemo'a, Ra Anumzamofu anara hunente. Hagi agrama hania avu'avamofu avamente, mizana amigahie. ¹⁸Mofavre kamofona azeri fatgoma hugama hu'nesire, avumaroma antenka azeri fatgo huo. Hagi azeri fatgoma osnanana, frinogu kave'nesie. ¹⁹Hantaka hunoma arimpa ahe vahe'mo'a, hazenke'a erigahie. Na'ankure kagrama aza hunka eri'amane hanankeno'a, henka ana ne'mo'a anazana nehinkenka aza huvava hugahane. ²⁰Kavumro antesia kema nentahinka, kazeri fatgoma hania kema avaririsunka, mani so'e hunka vugahane. ²¹Vahe'mo'a rama'a zanku antahi'zana eri retro huno hugahue hugahianagi, Ra Anumzamoma antahino fore hugahie hu'nesia zamoke fore hugahie. ²²Ra zama me'neana huvempama huntonesia kere, amagama anteno mani'zane. Hagi amunte omane vahe'ma manizamo'a, havige vahera agaterene. ²³Ra Anumzamofonkuma koro'ma hunteno agorga'ama manizamo'a, kavreno knare mni'zante vugahie. Hagi iza'o e'inahu'ma hanimo'a,

mago'zankura korera osuno knare huno manigahie. ²⁴Eri'za e'ori feru vahe'mo'a, ne'za nenaku tafepi azana antesigeno vugahianagi, ana ne'zana agipina erinteno onegahie. ²⁵Vahe'ma huhaviza nehania vahe'ma azerinka sefu'ma amisankeno'a, knare antahi'zama omane vahe'mo'za nege'za, knare avu'avara amage antegahaze. Hianagi knare antahizama me'nea vahe'ma azeri fatgo hanankeno'a, mago'ane antahizana erigahie. ²⁶Mago mofavremo'ma nefama neheno, nererama nompinti'ma ahenati atresia mofavremo'a, tusi'a agazeza erino naga'afina eme antegahie. ²⁷Kavumroma antesianke'ma ontahi'sanana, e'i knare antahizamofu kana atrenka havifi vugahane. ²⁸Havige hu vahe'moma havigema huno keagafima omati'nea vahe'ma huamama hunte'zamo'a, keagama antahi trara kiza zokago zankna nehuno, havi avu'avazana ne'za nazankna nehaze. ²⁹Vahe'ma huhavizama hunezmantaza vahe'mokizmi'a, mizazmia ko tro huzmantegenome'neankiza erigahaze. Nehanage'za neginagi hanaza vahera, knonkeve zamigahaze.

20 ¹Waini tima nenea vahe'mofona azeri neginagi higeno, vahe'ma huhaviza hu kea nehigeno, aka timo'a vahe'mofona azeri negi nenkeno ke huhaviza nehuno hara hugahie. Waini ti neno neginagi hu vahe'mofona, agripina ama' antahizana omanegahie. ²Kinimofu arimpa akahe zamo'a, laionimo rankrafa hiankna hu'ne. Kini vahe'mofu azeri arimpa ahe'simofona, ahe frigahie. ³Ha' frama hu'zanku'ma mani kore huno agatere'zamo'a, ra agi erigahie. Hianagi neginagi vahe'mo'za ame hu'za hafra nehaze. ⁴Feru vahe'mo'ma hozama ante knare'ma mopama rekorino hozama ontosuno'a, hozama hamare knarera ne'zana ohamaregahie. ⁵Vahe'mofu antahi'zamo'a tirukna huno me'neanagi, ama' antahizane vahe'mo'a ana tirupintira ana antahizana afi anaga netre. ⁶Rama'a vahe'mo'za, tavesi negantone hugahazanagi, mago mago vahe'mo'za tamage hu'za kavesigante'gahaze. ⁷Fatgo avu'ava'ene ne'mo'a, mani fatgo huno nemanie. Agri mofavre zgamo'za, asomu erigahaze. ⁸Kini vahe'mo'ma keagama refako hunaku'ma trate'ma mani'nenno, keaga refko huno havi avu'avazana ke fore nehie. ⁹Nagu'amo'a fatgo higena, nagra agru hu'noankino nagripina kumira omane'ne huno iza hugahie? ¹⁰Havige hu'za makazama refko huza kna'ama ke'zane, havige hu'za avamente refkoma osu'zanena Ra Anumzamo'a avesra huno agotenezmante. ¹¹Mofavremofona avu'avate negenka, agri avu'avamo'a agru hu'neanki, fatgo mofavre mani'neanki hugahane. ¹²Tagesama me'neana keaga antahizane, tavuragama me'neana tavuma ke'za me'neankino tarega'zana Ra Anumzamo museza tami'ne. ¹³Kagrama kavu'ma masetenka manizankuma kavesi kavesima haniana, kamuntera omanegosie. Kavuma omasesanana ne'zama nesana zamo'a rama'a megahie. ¹⁴Knare osu'ne! Knare osune! Huno mago'a zama mizama seku'ma himo'a nehie. Hianagi mizaseno

kantegama nevuno'a, ana zankura knare'za erue huno rama'a muse ke hume nevie. ¹⁵Antahizama ami kemo'a, koline zago'amo'ma marerisa havea ageterene. ¹⁶Onke'nenana vahe'mo'ma nofima nehinkeno magomo apasegahue hanigenka, anamofu anakreku'a huvame hunka eri'negeno, ana nofima hu'neazana eme apaseno. Savri a'mo'ma nofima hanigenoma mago'mo apasegahue'ma hanigenka, aza hu'na apasentegahue huno kamunia zana erio. ¹⁷Kumzafa kave'mo'a haganentake hugahianagi, refuzufupe havemo kagipi aviteno kagi traga hiankna henka'a hugahie. ¹⁸Antahi'zana vahepinti erintenka erizama eri antahizana retro huo. Hagi knare antahi'zama mago'mofompinti'ma e'orinesunka hatera ovuo. ¹⁹Vahe zamagenkema hu vahe'moza vahe'mokizmi oku'zana hu ama nehaze. E'ina hunegu vahe zamagenkema hu vahe enena tragotenka omanio. ²⁰Nerera nefama huhaviza huntesia vahe'mofona tvi'amo asu hanigeno kumazu hanimpi maniankna huno frigahie. ²¹Arera a'fama ofri maninesigeno'ma erisinti haregahanema hu'nesia zama ame'ama huno erisia mofavremo'a, atuparega asimu'a omanegosie. ²²Kefo avu'avama hugante'sagenka anahukna huna nona huzamantegahue osuo. Hagi avega antenegeno Ra Anumzamo kaza huno ana knazana erino. ²³Mago'azama mizaseku'ma hanigeno kna'ama refako huno kezama (skel) erinteno refako hu so'e osu avu'avazana, Ra Anumzamo'a avesra huno agonete. ²⁴Vahe'mo'ma mika zama hiazana, Ra Anumzamoke azeri ante fatgo nehie. Inankna huno mago'a vahemo'a agra'ma nehia zana keno antahino hugahie? ²⁵Kagesa antahi ankeretenka Anumzamofontera huvempa huo. Ame'ama hunka huvempama hutesunka henka'a anama hu'nesana kegu kagesa antahintahi nehunka kagraka'a kazeri haviza hugahane. ²⁶Ama' antahizane kini ne'mo'a kefo zamavu'zamava nehza vahera witi hona'a hareno eriherahe hianka huno rezaganeno ke ama huteno, henka knanentake havenu witi'a refuzafupeankna huno knazana zamigahie. ²⁷Ra Anumzamofu lampe tvi'mo'a, vahe'mofu kantu agu'afi ufreno mika kefo agu'agesama me'neana hakeno eri ama nehie. ²⁸Kini ne'mo'ma vahe'mokizmima avesi nezamanteno knare avu'ava huzamantesiana, agra knare huno mani'nenno, zaza kna kva eri'zantera manino vugahie. ²⁹Nehazave ramimofona hanave zamimo ra zamagia nezamie. Hianagi ranra vahera efe'zmazoka nege'za vahe'mo'za husga hunezmantaze. ³⁰Hazenkema hania vahe'ma knokeve'ma ami'zamo, kefo avu'avazana ahenati netreno, agu'a azeri agru hugahie.

21 ¹Tima eriante fatgo'ma higeno kama'are vu fatgo hiankna huno, Ra Anumzamo'a kini vahe'mofu agu'agesa azeri antefatgo nehigeno, Agri avesite nevie. ²Vahe'mo'za maka zamavu'zamavama nehaza zankura, fatgo avu'avaza nehune hu'za hugahazanagi, Ra Anumzamoke zamagu'a refako huno nezamage. ³Ra Anumzamofu avurera fatgo avu'ava zane, fatgo huno refako hu'zamo'a, kre sramnama

vu zana agatere'ne. ⁴Vahe'ma ke fenkamite zane, avufga ra hu'zamo'a, nena raga'a rentesiana kumire. ⁵Knare huno antahintahima retro huteno, hanavetino erizama erizamo'a, rama'aza erifore hugahie. Hianagi ame'ama huzamo'a, amunte omane vahe manigahie. ⁶Havigereti eri fenomo'a, hampogino kirga hiankna huno fanane nehuno, frikante kavreno vugahie. ⁷Kefo avu'avama nehaza vahe'mokizmi hazenke'zamo'a, zamavazu huno zamazeri haviza hugahie. Na'ankure zamagra fatgo zamavu'zamava huzankura, zamavesra hunentaze. ⁸Hazenke zamima me'nea vahe'mo'za mani fatgo hu'za nomanize. Hianagi hazenke zamima omane vahe'moza fatgo avu'avate nemanize. ⁹Fra vazivava a'ene mago nOMPI omanino, agraku'ma nomofu fegu'a mani'zamo'a, knare hu'ne. ¹⁰Kefo avu'avama nehaza vahe'moza, kefo zama huzankuke zamavenesie. Hagi tava'ozmirema nemaniza vahe'ra zamazeri haviza nehaze. ¹¹Vahe'ma huhaviza'ma hu vahe'ma knoma amiza azeri fatgoma hazageno'a, antahi ama osu vahe'moza negeza ama' antahi'zana erigahaze. Hianagi knare antahizama eri'nesaza vahe'mo'za zamazeri fatgohu kema zamasamisage'za mago'ene antahi'za erigahaze. ¹²Ra Anumzamo'a fatgo hu'neankino, kefo vahe'mo'ma noma'afima hia avu'ava'zana keno antahino nehiankino, ana vahera zamazeri haviza hugahie. ¹³Mago vahe'mo'ma amunte omane vahe'mofo kezanke'ma antahi omisimofona, agrama mago zanku'ma upama hu'nenno kezatisige'za antahi omigahaze. ¹⁴Rimpama hegante'nesia vahe'ma oku'ama musezama amizamo'a arimpa ahagante'nesia zana eri fru hugahane. ¹⁵Vahe'mo'ma fatgo huno refako hu avu'avama hanigeno'a, fatgo vahe'mo'za muse hugahaze. Hianagi kefo avu'avama nehaza vahe'mo'za, tusi koro hugahaze. ¹⁶Mago'mo'ma antahi ama'ma hu antahizamofu kama atreno havifima vanimo'a, frino ko'ma fri'naza vahe'ene umanigahie. ¹⁷Knare kave neneno, tima neno muse zanku'ma mika zupama avesivava hanimo'a, zgo'amo'a vgaresigeno amunte omane vahe manigahie. ¹⁸Fatgo avu'avama nehaza vahetema hazenkema esiana, kefo avu'avama nehaza vahe'mo'za zamagri nona eri'za ana hazenkea erigahaze. Hagi hazenke vahe'mo'za fatgo vahe'mofo nona eriza knazana erigahaze. ¹⁹Mago ne'moma kehakare nehuno, rimpa hevava nehania a'amofoma atreno ka'ma kopima umanisiana knare hugahie. ²⁰Ama' antahi'zama eri'nesia ne'mo'a, knare feno zantamine olivi masavena noma'afina erivitegahie. Hianagi neginagi antahizane vahe'mo'za, mika fenozazmia atre vganeraze. ²¹Mago vahe'mo'ma fatgo avu'ava ene avesima ante avu'ava'ma hankavetino avaririsimo'a, knare nomani'zanki, fatgo avu'ava'ene ra agine erigahie. ²²Ama' antahi'zane ne'mo'a, hanave vahe'mokizmi rankumara ha' huzamanteno e'nerino, hanave vihugu'ma amuha'ma hunemiza vihua tapage hutregahie. ²³Iza'o kema hu'zampima agi'ene agnefu'nanema kvama hanimo'a, hazenkea e'origahie. ²⁴Vahe'ma

huhavizama huzamante vahe'mo'a, avufga ra nehuno, vahera zamage fenkami netreno, agra'a avufga erisga hu'zanke nehie. ²⁵Eri'za e'ori feru vahe'mo'a mika zama eri'zankura avesi'avesi nehuno, frigahie. Na'ankure agra azana eri avako huno, erizana e'orine. ²⁶Feru ne'mo'a mika'zama eri'zankura antahi'vava nehie. Hianagi fatgo ne'mo'a agra'agura ontahino, mika feno'zana vahera nezamie. ²⁷Kefo avu'ava ene vahe'mo'ma kresramnama nevia zankura, Ra Anumzamo'a agoteno avesra hunenteankino, kefo zamagu'zamage'saretima eri'za aza vahera mago'ane agatereno avesra hunezamante. ²⁸Keagama refako hu tratema havigema huno hu ama'ma huntesimo'a, frigahie. Hianagi tamage kema hanimofona, ana agenke'amo'a mevava huno vugahie. ²⁹Kefo avu'avama hu vahe'mo'a, havige huno nagra knare vahe mani'noe nehie. Hianagi fatgo vahe'mo'za zamagesa antahi so'e hute'za kana nevaze. ³⁰Ama' antahizana eri'nenka, antahi ama'ma hu antahizana erigahananagi, Ra Anumzamofoma ha'ma rente'sanana ana antahi zankamo'a amne zankna hugahie. ³¹Ha'ma huzana hosi afura azeri retro hugahazanagi, ha'ma azeri'agatere zana, Ra Anumzamofontegati egahie.

22 ¹Vahe'mo'ma knare kagi'ma kami'zamo'a, rama'a fenoma ante'zana agatere'ne. Hagi vahe'mo'ma kagrima kavesigante zamo'a, koline silvanena agatere'ne. ²Feno vahe'ene amunte omene vahe'ene, Ra Anumzamo ana tarega vahera tro huzanantege'ne mani'na'e. ³Ankere antahizane vahe'mo'a, hazenke zama ne'esigeno negeno maniganesigeno agateregahianagi, knare antahizama omene vahe'mo'a, hazenkema fore'ma nehanigeno'a, negeno nevuno ana hazenkezana erigahie. ⁴Agra'a avufga anteramino nemanino, Ra Anumzamofonku'ma koro hunteno, agorga'ama mani'zamo'a, rama'a fenoza nentesankeno kagi'a husga nehanagenka, zaza kna manigahane. ⁵Akrahe krahe avu'ava ene vahe'ma nevaza kampina, ave'ave zane vahe'ma azeri kukone me'ne. Hianagi iza'o agra'ama kegvama himo'a afete nemanie. ⁶Mofavreka'a knare kantema vuza rempi humigeno knare kante nevuno, rama hanuno'a, ana avu'avara atreno rukrehe osino. ⁷Feno vahe'mo'za zmunte omne vahera, kegva hunezamantaze. Hagi zgoma nofi'ma nehaza vahe'moza, zago'ama nofima haza ne'mofo kazokazo eri'za vahe nemanize. ⁸Kefozama krinenimo'a, henka nezama'a hazenke'za kafigahie. Hagi vahe'ma zamazeri havizama nehia himamu'amo'a, vgaregahie. ⁹Iza'o zamunte'ma omene nagama muse zampintima ne'zama amisia vahera, Ra Anumzamo'a asomu huzamantegahie. ¹⁰Kehu haviza hu vahera zamahe anati atrenkeno, vahe'ma huhavizama hu'zane, ha'ma hu'zane, fragema hu'zana vgareno. ¹¹Agu'amo'ma agru nehanigeno, fru kema huzanku avenesisimo'a, kini ne'mofo rone'a manigahie. ¹²Ra Anumzamo'a antahizama erizante avu'a anteno kegva nehianagi, hazenke vahe'mofo kea erinetre. ¹³Feru vahe'mo'a amanage nehie, megia laioni

mani'neankino, vanuana nahe frigahie huno nehie. ¹⁴Savri a'mofo agipintima nea kemo'a, muri kankna hu'ne, izano Ra Anumzamo'ma arimpa hentesimo'a, ana muri kampi tamigahie. ¹⁵Mofavremofu agu'afina negi'nagi avu'avazamo avitegahianagi, kanoma amino azeri fatgoma hu'zamo ana avu'ava zampintira azeri arukrahe hugahie. ¹⁶Fenzami mago'ane eri rama'a hunaku'ma zamunte omane vahe kna zamiza zamazeri haviza nehaza vahe'ene, feno vahe'ma musezama nezamiza vahe'mokizmia, zamuntera omanegahie. ¹⁷Knare antahizane vahe'mofo kere kagesa antenka antahise nehunka, nagrama rempima hugamisuzaa huo. ¹⁸Na'ankure ana kemo'a knare hu'neankinka kagu'afi erintenankeno ana kemo'a, kagitera me'nena kea hutere hugahane. ¹⁹Nagra menina rempi hunegamugu, nentahinka Ra Anumzamofonte kagranena kamentinti huo. ²⁰Nagra 30ti'a knare kegaga krentegantenofina, kavumro kene, antahiza eri zamofu naneke kregaminoankinka, ²¹ama ana kereti tamage kea rempi hunka antahinenka, iza'o hugantenigenka e'nesamofona fatgo'are kenona ome asamigahane. ²²Zamunte omane vahe'mokizmi zana ohanareho, na'ankure zamagra zamunte omane vahe mani'naze. Hagi zamunte omanesige'zama upama hu'nesaza vahera, keagarera zamavrenteta zamazeri havizana osiho. ²³Na'ankure Ra Anumzamo'a, zamunte omane vahera zamahokeno zamazeri havizama hanaza vahe'mokizmia, zamazeri haviza hugahie. ²⁴Arimpa hevava vahera rone huonto, ame huno rimpape vahe enena tagro oto, ²⁵ru ana vahe zamavuzmava enerisankeno, kukomo kazeriankna huno kagu'a azeri haviza hugahane. ²⁶Mago vahera huvempa hunka mago'za hugantegahue osuo. Hagi ru vahe'mo'ma nofima hu'nesigenka, ana nofima hu'nea zana nagra vakanentegahue hunka osuo. ²⁷Anama nofima hu'nesaza zama apa osesanke'za miko zanka'ane, tafe'ma masinkama nemasesana zanena eri vgaregahaze. ²⁸Tamagehe'mo'za ko'ma re'nenaza kanagi kana, akasi kantutretma rumofu mopa eri havia osiho. ²⁹Eri'zama eri antahizama eri'nea ne'mofo erizana negano? Agra kini vahe'mokizmi eri'za vahe nemanino, agi omane vahe'mofo eri'za vahera omanigahie.

23 ¹Rankva ne'ene kave negahane hu'za kagima hanagenka umani'nenka nezama nekura, antahi so'e hutenka kva hunka ne'zana no. ²Rama'a ne'zama ne' vahe'moka, kagraka'a knankenofi kazinuti taga hiankna nehane. ³Rankva ne'mofo ne'zamo'a, ksanea osino. Na'ankure ana kaveteti, regavatga hugahie. ⁴Feno vahe'ma mni'zankura maragu'zatinka kazeri havizana osunka, ama' antahiza e'nerigeno feno vahe'ma mani antahizamo'a kazeri havizana osino. ⁵Kavuma keramage'ma hanankna huno, feno zankamo'a fanane hugahie. Na'ankure agekona eri atareno tumpa namamo hareno hampompi mareriankna huno, afe hugahie. ⁶Veva osu ne'mo'ma ne'za emeno huno kagi hania nezantera ovuo. Knare ne'za krentesia nezantera, ksanegura osuo.

7Na'ankure agra e'inahukna ne'kino, nama'a mizana hugahie antahintahi hakare nehuno, ne'zana nenenka tina no hugahianagi, agri agu'amo'a, kagri'enena omane'ne. 8Anama ne'nana nezana amu'atinetrenka, nanekema hu so'e huntenana zamo'a, amanezankna hugahie. 9Neginagi vahe'ma mani'nenafina keaga osuo, na'ankure ama' antahizanteti hanana kea, huhaviza hugahaze. 10Tamagehe'mo'za koma re'ne'naza kanagi kana akasi kantugma osuge, megusa mofavre'mofo mopa kavunofi ahenka e'orio. 11Na'ankure zamahoma ke'nia Nera hankave Ne' mani'neankino, tamagrira keaga Agra'a hurmantegahie. 12Kagu'areti kavumro kea nentahinka, antahizama kami kere kagesa antenka antahio. 13Mofavrema azeri fatgoma huzankura, korera osuo. Kagrama knoma amisanana ofrigahie. 14Azeri fatgo hu knoma amizamo'a, fri vahe kumapima vuzankura agu amena agu'vazigahane. 15Mofavre'nimoke, ama' antahizama erisiana, Nagri nagu'amo'a muse nehuno, 16kagipinti'ma fatgo ke'ma antahi'sugeno'a, mika nagu'amo'a muse hugahie. 17Kumi vahe'mokizmi zamavu'zmavakura kegasanea osuo. Hianagi Ra Anumzamofonku kore'ma hunteno agorga'ama manizanku maka kna, kagesa antahio. 18Henkama fore hania zankuma tamage hunka kagesa nentahinka, amuhama nehana zamo'a amnezanknara osugahie. 19Mofavre'nimoka, ke'ni'a antahinka knare antahi'zana erinka, fatgo kante kagu'a antenka vuo. 20Rama'a aka'tima nene'za neginagi nehaza vahe'ene, rama'a zgagfamofa ame'are'ma nehaza vahe'enena, trago oteho. 21Aka tinte vahe'ene ra'ma'a nezama ne' vahe'mo'za, zmunte omne vahe manigahaze. Hagi avu'ma mase vava vahe'mo'a, kukena zamimo'a tagato tagatu hugahie.

Savri monko avu'ava'ene a'mofonku kva hu naneke

22Kasema kante'nea negafa ke'a nentahinka, negrerama tvavaresigenka kafenkamia otro. 23Tamage ke'ma mizase'nenunuka zgorera otro, ama' antahizanki, huoguma rempima hugamisiazanki, antahi'ama huno refkoma hu'zana erio. 24Fatgo avu'avama nehia mofavremofa nefa'a, tusi'a muse hugahie. Hagi ama' antahiza eri'nea mofavre'agura, nefa'a muse huntegahie. 25E'inahu kavukva hunka negrera kfama azeri muse nehunka, ksegante'nea negrerana azeri muse huo.

26Mofavre'nimoke, kagu'tumoka'a Nagri nenaminka, kvuma ke'sanana, Nagri navu'navate kento. 27Monko avu'avama huno Savrima huno vanoma nehia a'mo'a, murigankna higeno, vema ante'nea a'mo'ma savrima huno vanoma nehia a'mo'a, osi tinkerigna huno urami'neankino, ana tinkerifima uramisaza vahe'mo'za haviza hugahaze. 28Ana a'mo'a kumza vahe'kna huno kazeri savri hunaku kaveganteno mni'neankino, venenea azeri savri hanigeno, mani fatgo huno a'are'ma omani'zamo'a ra hugahie.

Rama'a negi ti nenaza vahe'mokizmi naneke

²⁹Iza hazenkefina mni'vava higeno, iza asu zampina nemanie? Iza ke hakarea nehigeno, iza hara azeri o'netie? Iza avufamo hazenkea erigeno namuna nere? Iza avumo korankera nehie? ³⁰E'i anazama fore'ma nehiana zazate'ma aka tima nenaza vahe'ene, hanave waini tima tagi havia hu'za ne'naza vahe'tmimofonte fore nehie. ³¹Atregeno wainimo'ma korankrema nehuno, agrema'amo taferopinti krakra huno mrenerino, knankente'ma fruma huno urami'nia zamo'a, kazeri kasanea osino. ³²Hianagi henka'a hamu osifavemo kreankna nehuno, ha' osifavemo kamprino avuatgazama'a regatati huganteankna hugahie. ³³Kavumo'a ruzahu ruzahu'za negenkeno, antahintahi kamo'a savri nehina, kema hanana kemo'a savri hugahie. ³⁴Hagi e'inama nehanana, hageri amunompi me'nea ventefi masenankeno kranto kranto huno kazeri tore tore hiankna nehuno, ventemofu seri rente zafare mani'nankeno, zahomo kavregantugama hiankna hugahane. ³⁵Anage hugahane, nahazanagi nata onkrine hunka nehunka, kanona namizanagi antahina kena osu'no'e hugahane. Hanki nagrama ete otisuna, mago'ane ana tina negahue nehane.

24 ¹Havi vahe'mo'ma hania avu'ava zankura kegasane huge, ana vahe'enema tragotenka mani'zankura, kagesa ontahitfa huo. ²Na'ankure antahiza zamifina vahe'ma hazenke'zami antahizamo avitegeno, zamagipintima atineramia ke'mo'a, hazenke erinte kege nehaze. ³Knare antahizanteti nona neginka, ama' antahizanteti eri hanavetigahane. ⁴Antahi'zama erinenanteti, knare fenozane zgo'amoma mreri zantamina nonka'afina erinte avitegahane. ⁵Ama' antahizane vahe'mo'za rama'a hanave erizageno, antahizama eri vahe'mo'za mago'ane hanave e'nerize. ⁶Ha'ma hu'zante'ma ama' antahizama hunka e'orinesunka, hatera ovuo. Na'ankure rama'a vahe'mo'zama ha'tema vanana kavumroma kantensagenka, hara azeri agateregahane. ⁷Knare antahizamo'a mesga hu'neanki'za, neginagi vahe'mo'za erigara osu'nazankiza, rankumamofu kafante'ma kva vahe'mo'zama atruma hu'zama kema hanafina, mago kea osugahie. ⁸Kefo avu'avazama hu antahizama retro'ma nehaza vahe'mokizmigura, hazenke vahere hu'za nehaze. ⁹Neginagi avu'avama hu'zama retro'ma hanazana, kumi nehaze. Vahe'ma huhavizama hunezmantea vahe'mofona, vahe'mo'za zamavesra hu'za zamagote'nentaze. ¹⁰Knazampima unefrenka hanavema otisankeno'a, hanaveka'a omanegosie. ¹¹Havigema hu'za zmahe frinaku'ma hanaza vahera, zamaza huta zamavreho. Hagi zamahe frinaku hanaza vahera, zamaza huta zamavreho. ¹²Antahi'nesunka ontahi'noe hunka havigea osuo. Na'ankure Anumzamo'a kagu'a kageno antahino nehuno, kagu'a kegva hunegantea ne'mo'a, kagu'a

kageno antahino osugahie hunka osuo. Miko vahe'mokizmia zamagrama hu'nesaza znavu'zmavate anteno mizana zamamigahie. 13 Mofavre'nimoka tume rima'a no, na'ankure knare hu'neankino, kagitera haga hugahie. 14 E'i anahukna huno, ama' antahizamo'a kagu'afina haga hugahie. Hagi hakenkama erifore'ma hanankeno'a, henkama erigahue hunka amuhama nehana zamo'a, amnezanknara osugahie. 15 Kefo vahe'moka fatgo vahe'mozama nemaniza nontera, zmazeri haviza hunakura kva hunka omanio. Hagi fatgo vahe'mo'za nemaniza kumara eri havizana osuo. 16 Na'ankure fatgo vahe'mo'za, 7ni'a zupa evuramiga hazanagi, ete otigahaze. Hianagi kefo avu'avama nehaza vahetera, mago hazenkema esuno'a, eme zamazeri haviza hugahie. 17 Ha'ma renegantesaza vahe'ma evuramisagenka, musena osuo. Hagi tanafama hanaza zankura, musena osuo. 18 Na'ankure Ra Anumzamo'a ana'ma hanankeno'a, negageno musena hunoganteno arimpahe zama'a anamofontetira eritregahie. 19 Kefo vahe'mofo avu'avakura korera hunka antahintahi hakare nosunka, ana havi zamavu zamavakura kegasanea osuo. 20 Na'ankure kefo zamavu'zama'ene vahe'mokizmia, henkama knare huzama mani' mani'zana omnesige'za, lamu tavi'mo asu hiankna hugahaze. 21 Mofavre'nimoke, Ra Anumzamofone kinimofonena koro huneznantenka zmagorga nemaninka, ha'ma reznantesaza vahe'enenamagopina tragoteta omaniho. 22 Na'ankure e'inahu vahetera, tusi'a hazenke zamo ame huno egahie. Ra Anumzamo'ene Kini ne'mo enema zamisaza knazana, mago'mo'e huno ontahitfa hugahie. 23 Ama' antahizama eri'naza vahe'mo'za amanahu ke hugahaze. Nanekema trate refkoma hanuza magomofonkukera osugahaze. 24 Iza'o kefozama hu'nesia neku'ma, kefozana osune hunoma hanige'za, rama'a vahe'mo'za anagama hania ne'kura, huhaviza hunentesageno, kokankoka vahe'mo'za antahi haviza huntegahaze. 25 Hu'neanagi iza'zo kefoza hu'nesia neku'ma, kefoza hu'ne huzama huamama hanimo'a, rama'a asomu erino rama'aza antegahie. 26 Tamagama huno ke nonama hu'zamo'a, e'i knare kvate knampaka'amo kanukino kantako huganteankna hugahie. 27 Kotazana hozama antesanaza retro hunka hoza antetenka, henka nonka'a kigahane. 28 Tava'onka'arema nemanisimofoma trate'ma kegagama hunentezama, kenana zanku nehazafi huama huo hanagenka, havigea hunka hazenkema osu'nesia zankura, hazenke hu'ne huonto. 29 Hagi zmagrama hunantesaza zana nona huna huzamantegahue hunka osuge, mago'mo'ma havizama hugantesiana, nona hu'na havizana huntegahue hunka osuo.

Feru vahe'mofo naneke

30 Nagra feru ne'mofo hozafine antahintahi'a omane ne'mofo waini hozafi agaterena nevu'na koana, 31 ave've trazamo'ene hozafi inozamo hageno ana hoza refitegeno, have keginama hugagi'nea zamo'a

fraguvaziramine. ³²Ana zama nege'na nagesama nentahugeno'a, mago'aza rempi hunamine. ³³Osi'agna nagra navura masehimarege, osi'agna masege, osi'a nazana anamagina manisga huge'ma hanugeno'a, ³⁴musufa vahe'mo'za mika fenozmi kumzafa sage'za, mika zazmimo'a ame huno vgaresige'za, zamunte omane vahe maniankna hugahaze.

Mago'ane Solomoni knare antahintahi'amofa naneke

25 ¹Ama'i Solomoni knare antahizamofa naneke, Juda vahe kini ne' Hezekia eri'za vahe'mo'za eriza krente'naza naneke. ²Ra Anumzamo'a rama'a zama antahizama'afi erifrakinegu, ra agi nemune. Hagi kinimo'a anama frakinea zama hakeno erifore nehigeta, agrira ra agi'a amita husga nehune. ³Monamo onagamu me'geno, mopamo'a ufenkamu megeta antahita keta nosunankino, e'inahukna kante kini vahe'mokizmi antahintahizmia tagra antahita keta osugahune. ⁴Silvama kre'za eri avusese hazageno, knare'ma hige'za anantetira zgo'amo mareri zantamina tro nehaze. ⁵Kefo avu'avama hanaza vahe'ma kini ne'mofa kumapintima zamahenati atresazana, agrama kegvama hu'nea kumamo'a, hanavetino fatgo huno megahie. ⁶Kini ne' avurema emanisunka, nagra ra vahe'mani'noe hunka kavufga ra nosunka, zmagine vahe'mokizmi tratera eomanio. ⁷Akoheno mani'nenkeno kema huno avrenagamute zamo knarera hu'neanki, agine vahe'mofa avufima hugantesigenka anama mani'nenana tra'ma atrenka urami zamo'a kagaze hugahianki, antahinka kenka huntanka fatgoza huo. ⁸Ame hunka naneke hu tratera magomofona avrentenka kehara huonto. Na'ankure tava'onkarema maninaza vahe'mo'za, ana nanekeka'ama eriyama huno kazeri kagazema haniana, atuparega na'a kagra hugahane? ⁹Kagrama tava'onkarema nemanisimo'enema ke ha'ma nehanunka, magomofa oku'a avu'ava'amofa naneke hu amara osuo. ¹⁰Henka'ama vahe'mo'za antahisuzza, frakiza hazankeka kagra franokine huge, kazeri kagaze nehu'za mika zupa antahi haviza hugante vava hugahaze. ¹¹Hagi vahe'mo'ma knare antahi'zama kna fatgo'arema hu'ama'ma hanigeno'a, ana ke'mo'a kolire tro hunte'naza epoli zafa rgamo silva zuompafi meankna hu'ne. ¹²Knare antahizantetima azeri fatgoma nehanigeno agesa anteno antahisimo'a, kolire tro hunte'naza avasaseza agesafi anteankna hu'ne. ¹³Kema erino esia ne'mo'ma, ome huo huno huntisigeno esia kema eme fatgohuno anankema hu ne'mo'a, hozafinti neza hamare knare ata ko'mo rufu hiankna nehigeno, kva'amofa agu'amo'a fru nehie. ¹⁴Mago vahekuma museza kamigahue hunoma avufga ra hu kazigati huvempa hunteteno, anazama omisia vahe'mo'a, ko aruku zaho e'nerino hampo ko atuno hanintiri huteno, kora oriankna nehie. ¹⁵Hagi ame hunka krimpama ohe'zamo'a, kva vahera rimpa azerifru hunka, kagrarega avrentegahane. Antefru hunka huke'mo'a, ha' frama hu'zana mika azeri agateregahane.

16 Tume'mofo tima'amo'a haga hu'neanki, nenunuka avamente no, rama'a nesanana amu'atigahane. 17 Tva'onkarema nemanisimofo nontera hakare zupa vuvava osuo, anama hanankeno'a musema hunoma negavreanknara osugosianki, avesra hugantegahie. 18 Tava'onkarema nemanisimofoma havigema huntanka, agenkema hanana zamo'a, kumpa knonu aheankna nehunka, kazinteti avufgama akafriankna nehunka, keve aheankna hugahane. 19 Kagrama kaza osuga vahe'ma antahinemisankeno havi knama esigeno'a, naza hugahiema hananana, ave'neneno ata negrifi ne'zama neankna nehunka, agamo haviza hu'nea ne'mo revazamu revazamu huno veankna hugahane. 20 Vahe'mo'ma asunku zampima mani'nenigenka muse zgamema hananana, ana asunku zampi mani'nea vahe'mofona, zasi knafi nakreku'a zafi atreankna nehunka, aka tinu avufga taga hu'nefi tagi atreankna hugahane. 21 Ha' vahekamofoma aga'zanku nehanigenka ne'zama nesia zana neminka, tinku'ma avenesinigenka tina amigeno neno. 22 E'inhuma hanankeno'a, teve tankanuzza asenifi hampagenteankna hanankeno, agra'a havi avu'ava zama'agura agaze nehanigeno, Ra Anumzamo'a mizana kamigahie. 23 Vahe'ma amefiga ke'ma hu kemo'a, noti (north) kazigati zaho'mo ko atufeno eankna huno, ana vahe'mofontera arimpa ahe'za erino esigeno, avugosamo'a zahe hugahie. 24 Fegi'a anaga nomote kagraku manizamo'a, nogu'afima kehakarema nehia a'enema manizana agaterene. 25 Afete kumateti knare'zamofa agenkema egeno antahizamo'a, tinku avesinere zasi ti amigeno neankna nehie. 26 Fatgo ne'mo'ma kefo avu'ava ene ne'ma, avaririno kefo avu'avama ome haniana, knare tinkerifi agamunke timo ufreno eri haviza hiankna hugahie. 27 Vahe'mo'ma ra'ma'a tumerima ne'zamo'a, knarera osu'ne. Vahe'mo'ma agra'a ra agima erizanku'ma mraguzamati'zamo'a, knarera osu'ne. 28 Iza'o, rimpa aka he'zama azeri aravama ohesiana, mago ra kuma'mofo have keginamo fragu vaziramiankna hugahie.

26 1 Neginagi vahe'ma ragima amizamo'a, zage knafi ko' ariankna nehigeno, ne'zamo afure knafi ko' ariankna huno knarera nosie. 2 Magomo'ma hazenkema osu'nenigeno kazusi hunte kema hanigeno'a, ana kazusi kemo'a kisave namamo mika zupa mnigsa osuno hareno vano vano nehiankna huno, vahetera forera osugahie. 3 Hosi afura sefu knonu ahe'za azeri antefatgo nehazageno, donki afumofona aeni zamagipina rentenaza zante zamavazu huza zmazeri fatgo nehaze. Hagi neginagi vahera knonteti zamagumpi zamahe'za zmazeri fatgo hugahaze. 4 Neginagi vahe'mofona neginagi naneke zamirera kenona huozamanto, anama hananana zamagri kna hunka neginagi vahe manigahane. 5 Antahiso'e hutanka neginagi vahe'mo'za, neginagi nanekema hanaza nanekerera, kenona zmia huzamanto, ru zamagra antahisazana knare antahiza eri'none hugahaze. 6 Neginagi

vahe'mofoma katogema huntensakeno kema erino vaniazamo'a, mago kaga akafri atreankna nehuno, avuatga ti neankna hugahane. ⁷Neginagi vahe'mo'ma knare nomanizamofu nanekema hu'zamo'a, vahe'mofoma frino sti'nea agamo eri'za e'oriankna huno, ana nanek'e'amo'a erizana e'origahie. ⁸Neginagi antahizane vahe'ma ra zamagima zmizamo'a, kumi'atifima have erinteno ahe atrenaku anteankna nehie. ⁹Neginagi antahizane vahe'mozama knare nomanizamofu nanek'e hanazana, negi ti neno neginagi hu'nea vahe'mo, ave ave nofi azampi azerineno traka truku huno vano hiankna nehie. ¹⁰Neginagi antahizane vahe'ene karankama enevanaza vahe'ma zgorema eri'za erisazegu'ma zamavresia zamo'a, keve ome ahetre emehetre huno rama'a vahe zamaheankna hugahie. ¹¹Kramo'ma amu'ma atitrenere'ma eteno viaza hu'za neginagi vahe'mo'za koma nehaza neginagi zamavu'zmavara hutere nehaze. ¹²Neginagi vahe'mo'za amuhama hazazamo'a, ama' antahizane vahe'ma mani'none hu'za antahiza vahera zamagateneraze. ¹³Kampine ra kumamofu kantamimpina ha' zga laioni manine hu'za feru vahe'mo'za nehaze! ¹⁴Kafamo'ma hantintinare'ma me'nenno anagino erigino hiankna hu'za, feru vahe'mo'za nemasaza tafe zamire, rukrahe rukrahe nehaze. ¹⁵Feru vahe'mo'a ne'zama ante tafepintira ne'zana erigahianagi, agipina erinteno nezankura avesra hugahie. ¹⁶Feru vahe'mo'a agraguma antahiana, 7nia knare antahizane vahera, nagra zamageterenoe huno nentahie. ¹⁷Rumozama ha' frama nehazafima, anintka huno kema hu'zamo'a, kramofu agesare avazu huno viankna nehie. ¹⁸⁻¹⁹Tava'oma'are nemanimofoma revatga nehuno, kiza zokago ke hugantoe hunoma nehimo'a, negi ne'mo teve nerea keve ome ahetre eme ahetre hiankna nehie. ²⁰Hagege teve rampama omanesigeno'a, tevea rukru huno ontegahie. Hagi vahe zamefi kema hu'zama omanesigeno'a, ha' frama hu'zana omanegosie. ²¹Tevemo'a tanknuzare tevea nereno hagage teve rampare rukru huno tevea nereankna hu'za keframa vazi vahe'mo'za, ha'ma hu'zana eri agafa nehaze. ²²Vahe'ma amefi agenke hu kemo'a, haganentake ne'zankna hu'neankino, vahe'mofu agu'afinka unefre. ²³Vahe'ma azeri havizahu antahizama kagu'afima me'negenka, amne kagitetima fru kema humisanana, mopa kavomofu amega'a silva masave frenteno eri knare hiankna hugahane. ²⁴Magomo'ma avesra hunentesia vahe'mofoma amega agiteti avurera so'e ke humigahianagi, agu'afina antahi muginente. ²⁵Knare kema hanigenka ana kegura tamage hunka antahiomio, na'ankure agu'afina 7ni'a kasrino agote'zamo avitene. ²⁶E'i ana kefo antahizana frakigahianagi, mika veamo'za, kefo avu'ava'afi eama hanige'za kegahaze. ²⁷Iza'o kerima asentesimo'a, anama asentesia kerifi agra'a tamisigeno, iza'o havema rezahe huno mrenerinimofona, ana havemo'a ete eramino havema retufeno mrerino nevanimofona eme rehapatigahie. ²⁸Havi kema hu vahe'mo'a, avesrama hunentea vahera,

havige huno azeri havizahu ke hunente. Rumofu zante ke'neni masave kema hu'zamo'a, ruga'a vahera azeri haviza nehie.

27 ¹Okina e'inahu'za hugahue hunka kavufga rana osuo, na'ankure mago mago knamo'ma erinoma e'nia zana ontahinane.

(Jem 4:13-16)

²Atregeno ru vahe'mo'za husga hunegantena, kagra'agura husga osuo. Rurega vahe'mo'za husga huganteho, kagra'a kavufga husga osuo. ³Havemo'a kna higeno, kasepamo'a tusi'a knanentake hu'neanagi, neginagi vahe'mo'zama nehaza zamavuzmavamo'a, ana tarega zana agatereno tusi'a knanentake hu'ne. ⁴Rimpama ahe'zamo'a havizantfa higeno, asivazi zamo'a ti hageno eankna hugahianagi vahe'mofu zantema negeno arimpa haviza hu'zamo'a, tusia havizantfa hu'ne. ⁵Havi avu'avama hanigenkama amate huama huntanka azeri fatgo'ma hu'zamo'a, frakinkama avesima nentenka azeri fatgoma osanana zana agaterene. ⁶Knampa kamoma kazeri fatgo hukuma katama kami'zamo'a, ha' vahekamo regavatga huno kagi'ma antakoma hania avu'avara agaterene. ⁷Amu'ma hu'nesimo'a, tumemofu rima'a one atregahie. Hianagi agazanku'ma nehania vahe'mofona aka hu'nesia nezamo'agi, agitera haga hugahie. ⁸Nonkuma zamire'ma manisoe osu vahe'mo'za, nmamo'zama nozamire manirava osu kanke kankema hazankna nehaze. ⁹Kavesima kanten kavumroma ante'zamo'a, mnanentake masavemo'ene knare mnavovo zamo mnaviankna huno rone'amofu agu'a azeri muse hugahie. ¹⁰Roneka'ane negafa rone'amofona kamefira huozamio. Hazenkema e'nerisunka kazama hinogura negafu nontega ovuo. Tava'onkarema nemanisimofu nontega vu'zamo'a, afete'ma mani'nesia nagafu nontegama vu'zana ageterene. ¹¹Mofavre'nimoke, ama' antahiza e'nerigeno nagu'amo'a muse nehina, ana zamo'a knama namiza huhaviza hunenantaza vahera kenona zamia huzamantegahie. ¹²Knare antahi'zama me'nesia vahe'mo'a hazenkema agrite'ma eku'ma haniazana ko negeno, mani'ganenigeno agateregahie. Hianagi knare antahi'zama omane vahe'mo'a, avua onkeno ana hazenkefina vuno ufregahie. ¹³Zamagenka antahinkama osu'nesana vahe'mo'za nofi'ma kagripinti hugahue hanagenka, amanea ozaminka nakre kuzmia avame zama'a erinege'za, ana nofima hu'nesaza zana eme vakanegahie. ¹⁴Mago ne'mo'ma nanterama'afima kezatino, knare kne hunoma haniana, vahe'ma sifna aheankna hugahie. ¹⁵Ke fra nehuno kema huvavama nehia a'mo'a, nomo trovavi huvava hiankna nehie. ¹⁶E'ina hu kna a'nema zamazeri ante fatgohu kema zamasamia zamo'a, zahoma azeriankna nehuno, masave fre'nea azanteti azerigeno arugraru vaziankna hugahie. ¹⁷Aeniretima, aenima kne'agonama nehiankna huno, vahe'mo'a, vahe'mofu antahintahia azeri fatgo hugahie. ¹⁸Fiki zafama

kegva hanimo'a, raga'a tagino negahie. Hagi iza'o kva'amofoma kegva hundesimo'a, ra agi agra erigahie. ¹⁹Timpima kvugosama kanankna huno, kavukavama hanazamo'a kagu'afima me'neaza eri ama nehie. ²⁰Fri vahe kumamo'ene, fri vahe'mo'za avima notazankna huno, vahe'mofo zmavenesia zamo'a zamura nosie. ²¹Koline, silvama azeri agruma hunakura, tusi'a tevefi kre'za negazanagi, vahe'mofoma rehenonegeana ragima amizanteti rehenonege. ²²Neginagi vahe'mofona neginagi avu'ava atresiegura, havereti witima refuzafupeno hona'a hareankna hunka zmahegahananagi, ana neginagi zamavu'zamavama nehaza zampintira, zamazeri otregahane. ²³Memene, sipisipi afukamozama nemaniza nomniza zamia rezagenka ke so'e hunka negenka, kagu'areti hunka kegva huzamanto. ²⁴Na'ankure, fenozamo'a mevava osanigeno, ragima erizamo'a mago naga nofitera meno ovugahie. ²⁵Trazama akafri atresigenoma kasefa hagesigeno agonaregati trazana erinoma ufresigeno'a, ²⁶sipisipi afu'mo'zane meme afumo'za nenesageno, sipisipi afumofona azoka'aretira kukena hatino nentanino, meme afura mopama mizasega'are zgorera atreno zagoa erigahie. ²⁷Hagi meme afumofa ami rima'a, rama'a me'nenkeno agrane noma'afima nemaniza naga'amo'zane nenesageno, kazokzo eri'za mofane'amo'za nesazama'anena megahie.

Kegva huno manizamofa naneke

28 ¹Kefo zamavu zamava'ma nehazamokizmia, vahe'mo'za zamarotgo nosazanagi, kore nefraze. Hianagi fatgo zamavu'zamava'ma nehaza vahe'mo'za, laionimo nehiankna hu'za hanavetiza nemanize. ²Mago kumapima vahe'mo'ma mago rimpama hu'zama omanesigeno'a, rama'a kva vahe fore hugahie. Hianagi antahizane vahe'ene antahi ama hu antahizane vahe'ma maninesigeno'a, maka zamo'a knare huno vugahie. ³Amunte omane vahe'mo'ma, amunte'ma omane vahe'ma azeri havizama nehiazamo'a, e'i ranko aruno hozamofa eri haviza hiankna nehie. ⁴Kasegema ruhantagi vahe'mo'za, kefo avu'avazama nehaza vahekura husga hunezmantaze. Hianagi kasegema nevaririza vahe'mo'za, kefo vahe'mokizmia ha' renezmantaze. ⁵Kefo zamavu' zamavama nehaza vahe'mo'za, fatgo huno refkohu avu'avazana antahi amara nosazanagi, Ra Anumzamofonkuma nehakamo'za makazana antahi amara nehaze. ⁶Amunte omane vahe'ma manineno fatgoma huno manizamofa, havi avu'avatetima feno vahe'ma manizana agatere'ne. ⁷Kasegema amage'ma ante mofavre'mofona, ama' antahiza agripina me'ne. Hianagi nezama nehana hu vahe'enema tragoteno manisia ne'mo'a, nefana ra agaze erimigahie. ⁸Zagoma agrama trohu kazigatima ra zgo agima ahentesia vahe'mofona, ana zagomo'a agri kupina omanegosianki, zamunte omane vahe'ma zmavesinte'za kegvama huzmantesaza vahe'mo'za erigahaze. ⁹Kasegema

antahizankuma amagena hunemia vahe'mofonena, Ra Anumzamo'a agri nunamuma antahizankura agotenente. ¹⁰Iza'o fatgo vahe'ma avreno kefo avu'avama hu kante'ma vanimo'a, agra'a asentenesia keri ramigahie. Hianagi tamagemama huno manisimo'a, knare'za erisanti haregahie. ¹¹Feno vahe'mo'a agra'aguma antahiana ama' antahizane vahe mani'noe huno hugahianagi, zamunte omane ama' antahizane vahe'mo'za, amane agrira age'za antahiza hugahaze. ¹²Fatgo vahe'mo'ma rankuma'mofoma kegvama higeno'a, mika ve'amo'a rimpa fru higeno, tusi muse nehaze. Hianagi kefo vahe'mo'ma kegvama higeno'a, mika vahe'mo'a franekie. ¹³Iza'o kumi'ama framakinimo'a, nomanizama'afina knarera osugahie. Hianagi kumi'ama hu ama nehuno, atreno arukrahe huno esimofona, Anumzamo'a asunku hunteno azeri so'e huntegahie. ¹⁴Maka knama Ra Anumzamofonku'ma koro hunteno agorgama mani vahe'mo'a, muse hugahie. Hianagi izano agu'amo'ma hanavema atisimo'a, hazenke erigahie. ¹⁵Kefo avu'avama nehia kva vahe'mo'a, zamunte'ma omane vahe'mokizmia, laionimo vahe ahenonaku krafa hiankna nehigeno, beamo'ma vahe'ma ahenonaku arotago nehianka nehie. ¹⁶Vahe'amofoma knama zami kva ne'mofona, ama' antahizana agripina omanene. Hianagi havigemama huno fatgo osu kantetima fenoma erizanku'ma avesrama huntesia kva ne'mo'a, zazate manino vugahie. ¹⁷Mago vahe'ma ahefri'nesia ne'moma, vahe'ma ahe fri'nesia antahintahimo'ma knama neminkeno, nontema mani so'e osu vanoma nehina, aza osu atrenkeno frino. ¹⁸Tamage avu'ava huno manizamo'a, hazenkefintira kagu vazigahie. Hianagi iza'o mani fatgoma hunoma omanisimo'a, ame huno traka hugahie. ¹⁹Hanavema atino erizama mopafima erisimofona, ne'zama'amo'a avitegahie. Hianagi iza'o agafa'ama omanezante'ma avaririsimo'a, amunte omane vahe manigahie. ²⁰Tamagemama huno hugahue nehiazama fatgo hunoma nehia vahe'mo'a, rama'a asomu erigahie. Hianagi iza'o ame'ama huno feno vahe'ma maninaku'ma hanimo'a, hazenkefi ufregahie. ²¹Magomofokazigama nemanino magomofoma atrezamo'a, knarera osu'ne. Hianagi mago'a vahe'mo'za breti ankra'are, kumi avu'avaza eri fore hugahaze. ²²Araguke'ma antahi' vahe'mo'a, ame' huno feno vahe'ma manizanku agu'agesa nentahie. Hianagi henkama amunte omnesia zankura, keno antahino nosie. ²³Vahe'ma azeri fatgo hunaku azeri koneria ne'mo'a, vahe'mofoma masavenkema huzamante nera agatereneankino, henka rama'a vahe'mo'za agrikuke hugahaze. ²⁴Iza'o nerera nefa zama kumzafama neseno kumira nosue nehimo'a, agra mikazama eri havizama nehia vahe'ene tragonete. ²⁵Araguke'ma antahi vahe'mo'a, ha' azeri onetie. Hianagi Ra Anumzamofonte'ma amentinti nehanimo'a, nomanizama'afina mani knare hugahie. ²⁶Iza'o agra'a antahizanku'ma knare hu'neankina amne hugahuema hanimo'a, neginagi vahe kna nehie.

Hianagi iza'o ama' antahizampima vanimo'a, knazana agateregahie. ²⁷Iza'o amunte omane vahe'ma amisimo'a, mago zankura upara osugahie. Hianagi iza'o ozamage vahe kna nehuno zamaza osanimo'a, rama'a kazusifi manigahie. ²⁸Kefo vahe'mozama kvama maniza kegvama hzageno'a, mika vahe'mo'za fra'nekize. Hianagi ana kefo kva vahe'zgama frizage'za, fatgo vahe'mo'za ome rama'a nehaze.

29 ¹Iza'o rama'a zupama azeri fatgoma hanaza kema ontahino eritrenimo'a, ame huno havizantafa hanige'za, azeri fatgo hugara osugahaze. ²Fatgo vahe'mo'zama kvama manizage'za, mika vahe'mo'za muse nehaze. Hianagi kefo vahe'mo'zama kegvama hazage'za, zamarimpa kna nehu'za, kragi neraze. ³Ama' antahizama avesintea ne'mofo nefa'a muse nehie. Hianagi savri a'enema tagroteno nemanimo'a, fenoma'a atre vganere. ⁴Fatgo avu'ava ene kini ne'mofo kumamo'a, oti hanavetigahie. Hianagi masavema ami kazigatima ami'naza zagoma eri nemo'a, kuma'amofona eri haviza hugahie. ⁵Tava'o zamirema maniesia vahe'ma rezmatga hu'za masave kema huzmantaza zamo'a, zamagra'a kama nevazafi kuko anteankna nehaze. ⁶Kefo vahe'mofona krifumo azeri ankna huno kumimo'a azenerianagi, fatgo vahe'mo'za zgame hu'za muse nehaze. ⁷Fatgo vahe'mo'za zamunte omne vahe'mofo nomni'zankura antahi nezamiza kegva hunezmantaze. Hianagi kefo vahe'mo'za, anara nosaze. ⁸Vahe'ma huhavizama huzamante vahe'mo'za ra kumapi tevea taginteankna nehaze. Hianagi ama' antahizane vahe'mo'za, haframa hu'zana eri amane nehaze. ⁹Ama' antahizane vahe'mo'ma neginagi vahe'ma keagarema avrentesiana, ana neginagi ne'mo'a, arimpa ahentege ana ke'arera kiza zokago ke nehanigeno znarimpa fruzana omanegosie. ¹⁰Vahe'ma zamahe fri vahe'mo'za, hazenkezmi omane vahekura zamavesra hunezmantaze. Hianagi fatgo vahe'mo'za, hazenkezmi omane vahe'ma zamazeri so'ema hanaza zanku nentahize. ¹¹Neginagi vahe'mo'za zamarimpa he'zana azerirava nosazanagi, ama' antahizane vahe'mo'za, zamarimpa ahe'zana azerirava nehaze. ¹²Kva ne'mo'ma havigemofoma amagama antesiana, mika eri'za vahe'mo'za haviza hugahaze. ¹³Amunte omane vahe'ene, knama nezamiza vahe'enena, Ra Anumzamo'a ana taregamokiznima magozahu'zama, zanami'neana zanavuma ke'za zanamine. ¹⁴Zmunte omne vahe'ma fatgo huno refakoma huzmantesia kini ne'mo'a, zaza kna kinia manino vugahie. ¹⁵Mofavrema kanoma amino azeri fatgoma huzamo'a, ana mofavrea ama' antahiza amigahie. Hianagi kanoma amino azeri fatgo osu mofavremo'a, nererana agaze eri nemie. ¹⁶Kefo zamavu'zmava'ene vahe'mo'za kvama manizageno'a, kefo avu'ava zamo'a ra huno marenerie. Hianagi fatgo vahe'mo'za manine'za nezamagesage'za evuramiza haviza hugahaze. ¹⁷Mofavreka'a avumro antenka, azeri fatgoma hanankeno knare avu'avama hanigenka, karimpa fru nehina

muse hugahane. ¹⁸Ra Anumzamo'ma henkama fore'ma haniazanku'ma, eri ama huno kasnampa kema ozamasmisige'za, vahe'mo'za savri hu'za magoke kantera omanigosaze. Hianagi iza'o kasegema amage'ma antesimo'a, muse hugahie. ¹⁹Kazokzo eri'za vahe'mofona kegera hunka azeri antefatgo osugahane. Na'ankure ana kea antahi ama hugahianagi, ana kemofona amagera anteno anazana osugahie. ²⁰Zamagesa ontahi ame'ama kema nehaza vahera nezamagano? E'i ana vahera neginagi zamavu'zamava'ma nehaza vahe'mo'za zmaza huzama erisaza kamo'a zmagetere'ne. ²¹Osi'ma maninesigenka makazama hugnareke'ma hunte'nesana eriza ne'mo'a, henka'a kazeri haviza hugahie. ²²Arimpama ahe vahemo ha'ma hu'zana eri agafa nehie. Hagi ame huno rimpa ahe vahe'mo'a, rama'a kumi nehie. ²³Zamavufga eri antesga hu vahe'mo'za evuramigahaze. Hianagi zamavufgama anteramiza mani vahe'mo'za, ra zamagi erigahaze. ²⁴Kumzafa vahe'enema tragoteno manisimo'a, agra'a azeri haviza nehie. Keaga refakohu tratetima antahige'sankeno huamama hanige'za kana amigahaze. Hagi huamama osniana, Anumzamo'a azeri haviza hugahie. ²⁵Vahe'mofoma koroma huntesanana, kagra'a krifu anaginentane. Hianagi iza'o Ra Anumzamofonte'ma amentintima hanimofona, agu'vazinkeno knare huno manigahie. ²⁶Rama'a vahe'mo'za kva vahe zamimozama zamavesima zamantesaza zanku zmavu'zmavara nehazanagi, Ra Anumzamo refako huno nege. ²⁷Fatgo vahe'mo'za kefo vahekura zmavesra huza zmago atenezmantaze. Hianagi kefo vahe'mo'za, fatgo zmavuzmava'ene vahekura, zmavesra huza zamago'atenezmantaze.

Aguri hu'nea naneke

30 ¹Ama'na nanekea, Jake nemofo, Aguri Itielintegane Ukalintega huama huno kre zanami'nea naneke. ²Tamaga nagra mago'a vahe'mo'zama nehaza havizana agaterena havizantfa nehu'na, vahe'mozama antahi ama'ma nehazaza hu'na antahiamara nosue. ³Nagra knare antahizana rempi hu'na e'orina, Anumzamoma Ruotage hu'nemofoma keno antahinoma hu antahizana e'ori'noe. ⁴Iza monafinka mareriteno ete erami'ne? Iza zahora aza agu'safina azeri'ne? Iza tvarave'afina tina anakino ante'ne? Iza mopa ometre emetretera mikazana antegenore fore huno me'ne? Agri agi'a iza'e, nemofo agi'a iza'e? Antahinesunka nasamio! ⁵Anumzamofoma kema maka ke'za antahizama hu'nazana tamage ke me'ne. Agra mika zamagu vazinoguma Agritema neaza vahe'mokizmia hankogna hu'nenozamagu nevazie. ⁶Anumzamofoma nanekerera kagra'a kagesafintira amerasenska ruokamaro, ru kazeri korino havige vahe maninane huno kazeri ama hugahie. ⁷Anumzamoka tare zantfanku kantahige'za huanki kavresra huonanto, ama mopafi ofrina kasefa hu'na maninesurera, ⁸ese' zanku'ma kantahigesuana, nazahuge'na vahe'ma revatgahu avu'avazane havigea

osaneno. Anante'zana natrege'na rama'a feno vahera omanige, namunte omane vahera omanisuanki magoke magoke knama nesugeno namuma hania avamente namio. ⁹Na'ankure nagrama rama'azama antesuna, namefi hunegamina ru Ra Anumzamoka kagena antahina osu'noe huge, ru namunte omanena musufa nesena, kagi eri haviza huzankura, avamente namio. ¹⁰Mago kazokzo eriza nemofona kva'amofontera vunka ome azeri haviza hu kea osuo. Kagrama anama hnankeno'a, ana kazokzo eriza ne'mo'a antahi haviza hugantena, hazenkefi manigahane. ¹¹Mago'a vahe'mo'za nezmafana hu haviza hunezamante'za, nezamrerana musenkea hunozmantaze. ¹²Mago'a vahe'mo'zama antahi'zana kumitia omne'ne nehazanagi, Anumzamofa avurera agrua osu'naze. ¹³Mago'a vahe'mo'za knare hu'none huza zamavufga ra nehu'za, mago'a vahe'mokizmia zmage fenkami netraze. ¹⁴Mago'a vahe'mokizmi zamavemo'a, vahe'ma zamahe bainati kazinkna higeno, tuke zmavemo'a kazinkna huno asaneneankino zamunte omane vahe ene, mago'a zanku'ma upama hu'nesnaza vahera, ama mopafintira zamasga huvazigahaze. ¹⁵Kukufamo'a taremotatre znante'ne. Zanagi'a, Namio, Namiok! Zmavesizama eriknarema nosia zana 3'a za me'ne. Zmamuma nosia zana 4'a za me'neankino, ¹⁶e'i anazantamina, fri vahe kumaki, venema mase a'mo'ma mofavrema nontea naravo aki, tima anihuma nehia hagege mopagi, ke'onke zama tefananema nehia tevemofonena zamura nosie. ¹⁷Nefama negeno azanava kema hunenteno, nererama kefenkami atresnia vahe'mofo avurga, kotkoti nama zgamo'za ana avurga ani kasonepesageno, tumpa namamo'za avufga nevgaregahaze. ¹⁸Nagriter a 3'a zamo ruzahukna zana megeno, antahi ama'ma nosua zana 4'a zana me'ne. ¹⁹E'i anazana ina kante tumpamo'a monafina hareno nevie, ina kante osifavemo'a have agofetura regraroheno vanoa nehie. Ina kante ventemo'a, tusi'a hagerimpina vano nehie. Hagi na'a hu'nea zanku venenemo'za, vene omase akura zamavenesie.

²⁰Savri a'mofo avu'avamo'a amanahu hu'ne, venema maseteno'a, ne'za neteno agiteti eri ho'mu hiankna nehuno, kefo zana osu'noe nehie. ²¹3'a zamo ama mopamofona azeri tore nehanigeno, 4'a zamo rga oregosie. ²²E'i kazokzo eri'za ne'mo'ma kini mani'zane, neginagi antahizane vahe'mo'za nezama nezamuma hu'zane, ²³ave'sinontaza a'mo'ma ve'ma eri'zane, kazokzo eri'za a'mo'ma kva'ama maninesia a'mofo ve'ama rehanareno manizamo'a, ama mopa azeri tore nehie.

²⁴Ama'na mopafina 4'a onensa zgaramina mani'nazanagi, knare antintahimo'a, zamagripina avitene. ²⁵Kipzuvemofona hanave zmimo'a osi hu'neanagi, ko knafima nesagura ne'zana zgegnafi eritru nehaze. ²⁶Krofamofona hanavezmia omne'neanagi, havefi nozmia negize. ²⁷Kenumofona kini vahe'zamia omni'neanagi, sondia vahe'mo'zama hazaza hu'za, vugota huza nevazageno, ana amage amage hu'za

nevaze. ²⁸Tagovira kazanteti amne fru hunka azeriga zgamo'agi, kini vahe'mokizmi marerisa nompina ufregahaze.

²⁹3'a zgamo'za knare huza kana nevazagena kenasane nehuanagi, 4'a zgamoza fatgo hu'za nevazagena negoe. ³⁰E'i ana zga laionigino mika zgamofona hanave'amo'a zmagatere'neankino, mago zgagura korora huno manigane ozamantegahie. ³¹Ve kokoremoza zmahihiza eri antesga hu'za vazageno, ve memeki afumo'za zmasenia eri antesga hu'za vazankna huno, kini ne'mo'ma sondia vahe'anema nevuno'a, ana nehie. ³²Kagrama neginagi kavukavama hunka kavufa ra nehunka, kefo avu'avama hu antahizama retro'ma nehanunka, kanzu kagite refintanka kea osuo. ³³Mememfo amirima tatizana bata tronehaze. Hagi kagona ru hapati'sazana, kora hugahie. E'ina hu'negu arimpama ahezamo'a, ha' eri fore nehie.

Kini ne' Lemuel hu'nea naneke

31 ¹Ama'na nanekea, kini ne' Lemuelina nerera knare antahintahi ami ke rempi humi'ne. ²Nagrani'a narimpafinti'ma kasegante'noa mofavre'nimoke, Ra Anumzamofonte huvempa hugeno nami'nea mofavre mani'nane. ³Hanave ka'a a'nerera hunka otro. E'inahu a'nemo'za kini vahe'ma zamazeri havizama nehaza a'nerera osuo. ⁴Lemueliga kini vahe'mo'za aka tina onesageno, kva vahe'mo'za hanave tima nezankura zamavesi zamavesi osugahaze. ⁵Na'ankure aka tima nesuza kasegemofona zamage'nekaniza zamunte omane vahera zamazeri so'e osugahaze. ⁶Aka tina fri'zama nehanaza vahe nezamita, waini tina ra hazenkefima mani'naza vahe zaminke'za neho. ⁷Zmatrenke'za aka tina nene'za, zamunte omnea zanku'ene, ra knazama eri'naza zankura zmagekaniho. ⁸Kema hugama osu'nesia vahe'mokizmima, trate'ma zamavrente'za zmazeri havizama nehanageta, kea hutma zamaza hiho. ⁹Zamunte'ma omane vahe'ene, zamagra'ama zamaza hugama osanaza vahe'mokizmi knarezankura, fatgo huza refkoma huzmantesaza zankura keaga hunka zamaza hugahane.

Knare antahizane anemofu naneke

¹⁰Izaga knare avu'ava ene ara erigahane? Na'ankure e'inahukna a'mo'a, zago'amo marerisa havea agaterene. ¹¹Neve'a ana a'mofonkura makazana hugahie huno antahinemi'ankino, mago zankura upara osugahie. ¹²Mika zupa nomni'zama'afina, ana a'mo'a, knare zanke'za nevena hunenteno, azeri havizana osugahie. ¹³Ana a'mo'a muse nehuno sipisipi azoka ene nofi'ene hakeno erino nofi zagiteno, agra'a azanu kukena hatino tro nehie. ¹⁴Ana a'mo'a ventemo'za zagore atre feno eri avitete'za neazankna huno, afetetira nezana erino noma'afina egahie. ¹⁵Agra masa osu'nesigeno nanterampi otino nevene, noma'afi naga'amofu nezana retro

nehuno, eri'za mofamo'ma erizama emerisia zana retro huntegahie. ¹⁶Ana a'mo'a hozama ante mopa rezagneno keteno, agra'a eri'nesia zagoreti mizaseno waini hoza antegahie. ¹⁷Ana a'mo'a hanavetino eri'zana eri a'kino, hanavetino erizana erigahie. ¹⁸Ana a'mo'a zgoma erifore'ma hu eri'za eri kaziga knare hu'neanakino, tavira rekru hunteno erizana e'nerinkeno kenage segahie. ¹⁹Ana a'mo'a agra'a, azanuti nofira zagino kukena hatino tro nehie.

²⁰Agra zamunte omane vahera zamaza nehuno, mago'a zanku'ma upama haza vahera zamaza nehie.

²¹Ana a'mo'a zasi koma atanigeno'a, noma'afima nemaniza naga'amo'zama zasiku'ma fri'zankura, korora osugahie. Na'ankure amuhoma hu tavravereti hatino kukena huzamantene. ²²Agra tafe'ma masi tafera hatino tafera nehuno, zgo'amo mareri efeke ene fitunke tavravereti kukena hugahie.

²³Rankumamofa kafantema ranra vahe'mo'zama atru huza kegagama nehazafina, ana a'mofa nevena antahimiza ke'za antahiza hu'naza nere. ²⁴Mika zupa ana a'mo'a knare kukena nehatino, zamu'nofira tro nehige'za feno vahe'mo'za eme mizase'naze. ²⁵Agra hanave'areti'ene ra agima amizanteti kukena hiankna nehuno, henkama esia zankura kiza regahie.

²⁶Ana a'mo'a ama' antahizanteti kea nehigeno, agipina vahe'mofoma knare kema hunte kemo avite'ne.

²⁷Arga mika'zama noma'afima me'nea zantamina kegva hu so'e nehuno, ferura nomanie.

²⁸Mofavre zga'amo'za hu muse hunentesageno, neve'a husga huntegahie. ²⁹Rama'a a'nemo'za knare avu'avara nehazanagi, kagra zmagaterenka hiranto a'tfa mani'nane.

³⁰Mago a'mo'ma fru huno knare avu'avama haniazamo'a krevatga hanigeno, agi agonama keganunuma hananazamo'a, fanane hugahie. Hianagi Ra Anumzamofoma koro hunteno agorgama nemanisia a'mofona, husga huntegahaze. ³¹Agrama eri'zama eri'nesia avamente mizana neminkeno, knare avu'avama nehuno, knare eri'zama eri'nesia zankura, vahe'mo'za ra kumamofa kafante husga huntegahaze.

Jona

Anumzamofu ke Jona rutagre'nea naneke

1 ¹Ramo'a Amitai nemofo Jonana, amanage huno asamine, ²hantaka'a otinka, tusi'a ra kumate Ninive vunka, kefo avu'ava nehaza zankura kezatinka Anumzamo, Anumzamo'a keaga hunermante hunka zamasmio, na'ankure kefoza zamimo'a Nagri navure eama nehige'na negoe. ³Ramo, Jonama ke huntenu, vuoma hirega atreno freno Tasisi atreno vunaku agesa antahi'ne, Jopa uramino Tasisi vuku nehia vente kefore hutenu, vania zana mizasenu ventefi mrrerino, Ramofu avatetira freno, afete Tasisi vu'ne.

⁴Ana higeno Ramo'a tusi'a zaho ko huntegeni hagerimo kranto kranto nehigeno ana ventemo tgana vaziza hu'ne. ⁵Anampima eri'za e'neriza vahe'mo'za (sailors) tusi koro nehu'za zamagra anumaza zamire agihanta vazitere nehu'za fenoma ventefima me'neana o'za hurantesie hu'za asgahu'za hage rimpu atre'naze. Ana hazanagi, Jona'a ana ventemofu agu'afi fenka uramino avu uvasenu, hinkrafo ante'ne. ⁶Vase'negenu ana ventema azeneria ne'mo'a agrite eazamo, Nahigenka kagra kavura mase'nane? Otinka anumzankamofu agihanta vazio, kagri anumzamo'a tagrikura antahiramino tza hugahio, taza osugahio, tagra ofrisune! ⁷Ana ventefi eri'za vahe'mo'za ke hugantu kma hu'za, E'nenketa zgoa reta, ama'na hazenke'mofona aza ugagota hu'nefi kamnenu, nehu'za zgoma razana Jona remi'naze. ⁸Ana hute'za Jonana antahige'naze, aza hzenkere hagerimo'a tagrira refite'zana nehie? Kagra nankna eri'za e'nerine? Kagra igati e'nane? Ra nonkuma ka'a igatire? Kagra ina vahe'pinti e'nane? Hu'za antahige'naze. ⁹Jona'a ke nona huzmantenu anage hu'ne, Nagra Hibru nere, monafinka Anumzama hagerine, hagage mopanema tro hu'nea nete, Ramofonte nagra monora hunentoe. ¹⁰Ana ke nentahi'za, tusi zamanogu nehu'za, anage hu'za antahige'naze, Kagra inankna hazenke hu'nane? Na'ankure Jona'ma Anumzamofu ke rutagrenu fre'nea kea, ana nagara zamasmige'za antahi'nareti hu'naze. ¹¹Hagerimo'a mago'ene tusiza huno kranto kranto huno regzarino avune ante'no e'ne. Hige'za antahige'naze, Inankna kagrira hugante sunkenu hage rimo'a tagrira rurva herante'gahie? ¹²Nagrira

nasgahutma hage rimpí matevu natrenkeno, timo'a rurava hino. Nagra hago ke'na antahi'na nehue, na'ankure nagri hzenke zamofó agofetu hage rimó'a tamagriterá avunea nente, huno zamasmí'ne. ¹³Nehiana netre'za ana vahe'mo'za tusiza hu'za avame ante'za tin ankenare vu'zante mraguzatí'naze. Ana hu'nazanagi, amuhara osu'naze, na'ankure hagerimo'a mago'ane erirankasege'za ankenarega vugara osu'naze. ¹⁴Anante Anumzamofó kezatimí'za, Ramoka muse (plis) hugantonanki ama ne'ma hae frisuna zankure hunka tagrira tahe fanane osuo. Ama, ke'a omne ne'ma hae frisuna zankura, tagrira tazerinka kegaga huoranto, Kagriku huta amanahura huntegahune, Ramoka kavesiniáza Kagra huo. ¹⁵Anante Jonana asgahu'za hage rimpí matevu'za atrageno, avunema nentea hagerimo'a aru rva he'ne. ¹⁶Anama hiazanku ana vahemo'za, Ramofona tusi'a koro hunte'za, kre sramna Ramofona hunente'za, mago'a huvempa ke Agrite hu'naze.

¹⁷Ana hzageno Ramo'a tusi'a nozame huntegenó Jonana asga huvzigeno, Jona'a nozamemofó rimpafina tagufa zgegi, tagufa kergeki huno mani'ne. (Mat 12:39-41)

Jona nunamumofó naneke

2 ¹Jona'a nozamemofó arimpafinti, Ramofontega agri'a Anumzante nunamu hu'ne.
²Agra anage hu'ne,
 Nagra tusi'a hazenkefi mani'ne'na Ramofó agi hanta vazugenó, Agra kenona hunami'ne.
 Fri vahe'mofó kumapi mani'nena fri'za nehuna naza huogu kezatugenka, kagra zavi ke'ni'a antahi'nane. ³Kagra nasga hunka ame fenkame hage rimofó agu'afinka nagrira natre'nane.
 Anampi timofó hnavimo nazeri kagigagi hu'ne.
 Kagrama hanave'ane zaho hunatankeno kranto kranto huno e'nea timo, nagrira nazeri nakrino refite'ne. ⁴Ana hige'na, Kagripintira ko nagrira nahe anatitrenane hu'na nagra antahi'noe.
 Kagri ruotge ra mono nonka'a (tempol) mago'ene onkegahue, hu'na ngesa antahi'noe. ⁵Kagigagi huno avune ante'nea timo, nanankempi mrrerige'na ti nakrika ate'noe,
 Ame fenkame tami'nea timo nazeri kagigeno,
 Hgerimpi inozamo nanuna eri anovazi'ne. ⁶Agonamofó agafafi nagra urami'noe,
 Ana mopamofó agu'afinka rentrako hunantesige'na kina hu'na manivava hugahue hu'na ngesa antahi'noe.
 Hu'neanagi, Kagra Ra Anumzamoka, ana kerifintira tumoni'a naza hunka navare atre'nane. ⁷Navu evuevu hige'na frinaku nehu'na, nagra Ramoka nagesa antahi kmugenó, nunamuni'amo ruotge ra mono nonka'afine, Kagrite'ene e'ne.

- ⁸ Knare osuno havi anumzante mono hunentaza vahe'mo'za, Anumzamofu asunku'zana zamagra erigaragi, zamagena hunemize.
- ⁹ Hianagi, Ranimoka kezati'na kagia erisga nehu'na, nagra zgamepinti Kagritega ofa hugantegahue Ranimoka. Nagrama huvempama Ranimokane hua kea, amage hugahue, na'ankure nazahu hanavea Ramoka Kagrakere.
- ¹⁰ Anante Ramo'a ana nozame huntegeno ke zafa huno, Jonana hageri ankenare hagage ksepante amu ome atitre'ne.

Ninive vahe'mo'za zamagu'a rukrahe hu'naza naneke

- 3** ¹ Anante Ramofo kemo mago'ene Jonante eno anage hu'ne, ² Mensitfa otinka, tusi'a kumate Ninive vunka, Nagrama kasmisua nanekea vahera ome zamasamio. ³ Anage higeno, Jona'a otino Ramo asmia kante anteno Ninive vu'ne. Ninive kumara tusi'a ranku'ma me'negeno ana kumapina tagufa zgegna rukitagi'za mago atuparega kana nevaze. ⁴ Jona'a ana kumapi agafa huno, magoke zgegnafi vuno, agra kezatino anage hu'ne, foti'a zgegna evanigeno Ninive kumamo'a haviza hugahie. ⁵ Anante Ninive vahe'mo'za Anumzamofu kere zamentinti nehu'za, zamagra ne'zana a'o nehu'za, ranteti vunoosite'ma vu'neana, zamasunku hu kukena (sek klos) eri hankre'naze. (Mat 12:41, Luk 11:31-32)
- ⁶ Ana nanekemo'ma Ninive kini nete'ma uhnatigeno'a, kini tratetira otiazamo, kini kukena'a atova hutreno, asunku hu kukena erino vziteno, ta'nefapi mani'ne. ⁷ Anante kinine, kagota eri'za naga'ane amage'ma hanaza naneke atrageno ran kumapi vahe'zgare vuno eno higeno, kinimo'a magore hunka kagro, zgagfaka'a, atrogeno ne'zane, tinena one'tfa hino, huno hu'ne. ⁸ Mago mago'moka kasunku hu kenage eri nehunka, hagi anazanke hunka zgagfaka'a asu kukena eri hunto. Kagra nena Anumzantega kagu'areti nunmuna nehunka, kumi hu'zane, ha' fra huno vahe azeri haviza hu'zana atreho. ⁹ Ontahi'none, Anumzamofu nentahino asurgi ranteno Agra'a rimpa he'zana atresigeta ofri mani'gahune. ¹⁰ Kefo avu'ava zama nehaza zama atre'za zamagu'a rukrahe hzageno, Anumzamofu negeno, Agra asurgi zamanteno zamahe frighuema hia agu'agesa atre'ne.

Anumzamofu asurgi zamantegenofu, Jonana asi vazine naneke

- 4** ¹ Jona'a tusiza huno musena osuno tusi'a asi vazigeno, ² Ramofontega nunamu huno asmi'ne. Ramoka muse (plis) hugantoe. Ese agafareti nagra ko antahi'noe, Ninivea eri haviza osugahane hu'na kumani'are mani'nena antahi'noe. Antahite'na mopani'a atre'na, Tasisia nagra fre'na vu'noe! Na'ankure, Kagra kasunku nehunka knare huzmante Anumzane, agzone huzmantenka kasunku'zamo avite Anumzane, zamazeri haviza

hugahue hana vahera ana nosane. ³E'izanku nona'a, Ramoka nagri menina nahege'na fri'нено. Nagrama omni'na, frisugeno'a knare hugahie. ⁴Ramo anage hu'ne, knare kegafa me'negenka krimpa nehano?

⁵Anage higeno, Jona'a zge hanati kaziga ra kumara atreno via'zamo, zge tonare huno osi no ome kino anampinka mani'нено, inankna'za Ninivea fore hugahie nehuno avu anteno mani'ne.

⁶Ra Anumzamo, zgefinti aza huno Jonana anumofu tona huntenu, nofi huntenu hgeno mreri'ne, ana nofi'ma hage'nea zankura Jona'a, tusi'za huno musena hu'ne. ⁷Hianagi mseno ko'atigeno nanterampi, Anumzamo'a havigfa huntenu ana nofira eme ani traga hutenu, ana nofi'mo hagege hu'ne. ⁸Zgema hanatigeno'a, Anumzamo amuhu nentake zaho, zge hanati kazigati huntenu, zgemo'a Jona anunte tentenu, avu evu evu higeno Jona'a fri'za nehuno, kezati'ne, nagrama ngesa antahuana frisugeno'a knare hugahie, ksefa hu'na mani'zankura nave'osie. ⁹Anante Anumzamo Jonana asmi'ne, knare ke agafare nofikura kasia nevzio? Huno antahigeno Jona'a, knare ke agafare nagria nasivazige'na friku nehue.

¹⁰Higeno Ramo amanage hu'ne, eri'za erinka, krinka kegva hu'nana nofiku kagra krimpagna nehano, nofimo'a mago kergepi hageteno mago zgefina frigahie. ¹¹Ninive ra kumapi wan 120 tauseni'a agtere'nea vahe'mo huno, e'izana tamazanki, havi'zanki huno osugahie, afu' kevuzga rama'a mani'ne. Hianagi, kagrama antahi'nana, Nagra e'i ana ra kumakura nagesa nontahuo? Huno asmi'ne.

Knare Musenke Matiu kre'nea naneke

Jisas Kraisina, agigo azankomo'za fore hu'nante anante
hu'za e'naza naneke
(Luk 3:23-38)

1 ¹ Ama'na avona Jisas Kraisi agigo azankomofu naneke, Agra Deviti nemofo'e, Deviti'a Abrahamu nemofo'e. ² Abrahamu'a, Aisaki nefa'e, Aisaki'a Jekopu nefa'e, Jekopu'a, Judane afu'agnahe'ina ksezmente'ne. ³ Juda'a, Perezine, Zerakizni neznafa'e, neznarera'a Tamari kse znante'ne, Perezia'a, Hezroni nefa'e, higeno Hezroni'a, Rami nefa'e. ⁴ Rami'a, Aminadabu nefa'e, Aminadabu'a, Nasoni nefa'e, higeno Nasoni'a, Salmoni nefa'e. ⁵ Salmoni'a Boazi ksente'ne. Hagi Boazi nerera agi'a Rehapu'e. Boazi'a Oveti ksente'ne. Hagi Oveti nerera agi'a Ruti'e. Oveti'a Jesi ksente'ne, ⁶ Jesi'a, kini ne'mofu Deviti nefa'e.

Deviti'a Solomon nefa'e, Betsiba, Uria a'ma eri'nemo ksente'ne. ⁷ Solomoni'a Rehoboam nefa'e, Rehoboamu'a Abaija nefa'e, hagi Abaija'a Asa nefa'e. ⁸ Asa'a Jehosafati nefa'e, Jehosafati'a Joram nefa'e, hagi Joram'u, Uzia nefa'e. ⁹ Uzia'a Jotamu nefa'e, Jotamu'a Ahazi nefa'e, Ahazi'a Hezekaia nefa'e. ¹⁰ Hezekaia'a Manase nefa'e, Manase'a Amoni nefa'e, hagi Amoni'a Josai nefa'e. ¹¹ Josai'a Jekonaia nefakino, afu'agnahe'ine kse zamante'ne. Anama hu'neana kinafima zamavre'za Babiloni vuku haza knafine.

¹² Babilon kumate kina ome hutageno Jekonaia'a, Seatiel nefa'za hu'ne, Seatieli'a, Zerubabel nefa'e. ¹³ Zerubabeli'a, Abihut nefa'e, Abihuti'a, Eliakim nefa'e, hagi Eliakimi'a, Azori nefa'e. ¹⁴ Azori'a, Zedok nefa'e, Zedoku'a, Akimi nefa'e, hagi Akimi'a, Eliuti nefa'e. ¹⁵ Eliuti'a, Eliaza nefa'e, Eliaza'a, Meteni nefa'e, hagi Meteni'a, Jekopu nefa'e. ¹⁶ Jekopu'a, Josefe nefa'za higeno, Josefe'a Mariana neve'e. Hagino Jisasima ksentege'za, agi'a Kraisi'e hu'za antemi'naze.

¹⁷ Abrahamunteti vuno Devitinte'ma vahe'ma forehu anante anante hu'nazana 14tini'a naga nofi fore hu'naze. Hagi Devitinteti'ma eno

Babiloni kina huzmante'nare'ma e'neana 14tini'a naga nofi fore hunante anante hu'naze. Hagi kinama huzmante'nareti vuno Kraisi knare'ma e'neana 14ni'a naga nofi forehu'nante anante hu'naze.

Jisasima ksente'nea naneke

(Luk 2:1-7)

¹⁸Jisasi Kraisi'ma fore hu'neana amanahu hu'ne, Agri nerera Mariama, Josefente huhampri ante'nageno, nomago hu'ne omni'nakeno, Ruotge Avamu'mo rimpafi emanigeno, amu'ene hu'nege'za kefore hu'naze.

¹⁹Ana hazageno, agri neve Josefe'a fatgo ne' mani'negu, Mariana azeri agaze hu'zanku, oku'a a' atrenaku agu'agesa antahi'ne. ²⁰Hianagi ana antahintahima retro nehigeno'a, mago Ramofo ankeromo ava'nafi eno anage huno asmi'ne, Josefe, Devit nemofoge, korera osunka Mariana aka'agi avro, na'ankure agri rimpafima mani'neana, Ruotge Avamu'mofo mofavre mani'ne. ²¹Ne'mofavre ksentegahianki, ana mofavremofogagi'a, Jisasi'e hunka agi'a antemio, na'ankure Agra vahe 'amokizmi kumi'zmifinti zamaza hugahie. ²²Ama ana maka'zama efore hu'neana, korapa Ra Anumzamo kasnampa ne'te ke hunte'nea zamo nena'a efore hu'ne.

²³***Keho vene omni'nea a'mo mofavre amu'ene huno, Ne'mofavre ksentegahie, ana hanige'za zamagra Agri Agi'a Imanueli'e hugahaze,*** ana agima eri rukrahe haniana, Anumzamo tagrane mani'ne hu'ne. (Aisa 7:14) ²⁴Mse'nefinti Josefe otino Ramofo ankeromo asmimo hunte'nea kante anteno, Mariana a' avare'ne. ²⁵Hianagi anteno omseno amne kegva hu'negeno, Ne'mofavre ksentegeno, Josefe'a, Jisasi'e huno agi'a ante'ne.

Antahi'zazimi'ne vahe'mo'za Jisasi eme ke'naza naneke

2 ¹Jisasi'ma Betrethem Judia kaziga mopare, Heroti'ma kini hu'nea knafi fore'ma hige'za, zge hanatitegati antahi'zane vahe'mo'za Jerusalem ehanati'za, anage hu'naze, ²Jiu vahe'motma Kinima manisia nera inantega ksente'ne? Na'ankure tagra Agri ofuna zge hanati kazigati keteta, mono huntoku e'none. ³Ama ana nanekema Heroti kini ne'mo nentahino'a, agu'agesamo kore'nehuno tarerare nehigeno, Jerusale kumate vahe'mo'zanena agrama hiaza hu'naze. ⁴Heroti'ma pris vahe'zgane, kasegere'ma ugagota hu'naza vahe'ma magopi zamazeri atru huteno'a, inantega Mesaia'a fore hugahie? huno zamantahige'ne. ⁵Zamagra, agri husmi'za, Judia kaziga Betrehe kumate ksentegahie, na'ankure korapa Anumzamofogokasnampa (profet) ke huama hu'nea ne'mo avon tafepi amanage huno krente'ne, ⁶***hagi kagra, Betrehemia, Juda vahe mopafina, kagra Juda vahe'mokizmi ranra kumapintira osasi kumatfana omni'nane, na'ankure kagripinti magora ra nera Israeli vahe ni'ama kegvama hania nera fore hugahie.*** (Mai 5:2)

⁷Heroti'a frakino oku'a antahi'zane vahera zamagenoka huno nankna ana ofumo'a fore hu'ne huno zamantahige'ne. ⁸Heroti'a Betrehem viho huno hunezmanteno, anage huno zamasmine, Vutma ana Mofavrea ome haketa ketetma, Agri'ma kefore'ma hanutma eme nasminke'na, nagranena anazanke hu'na monora ome hunta'nenno. ⁹Ana nanekema kini ne'mo hige'za antahite'za, nevu'za ko'ma zge hanati kaziga mani'neza ke'naza ofumo kagota huzmanteno nevice'za keme nevzageno ana Mofavre mani'nea nomofo agofetu eme otige'za ke'naze. ¹⁰Ana ofuma negageno'a tusi'a muse zamo zamagu'afina avite'ne. ¹¹Ana nomp emareri'za ana Mofavre'mo, nerera Maria'ene mani'nege'za nege'za, zamugosa regati kepri hu'za mono hunte'naze. Eri'zama vu'naza feno'zana anagi'za, musezama ami'nazana, golima, mananentake paurane (frankincense), mere'ne (myrrh) ami'naze. ¹²Anumzamo'ma avanafi zamasmino Herotintera oviho hunoma hu'nea kea nentahiza, antahi'zane vahe'mo'za oti'za rugantegati mopa zamirega vu'naze.

Josefe ana tramentre znavreno Isipi freno vu'nea naneke

¹³Antahi'zane vahe'ma vzageno, Ra Anumzamofa ankeromo Josefena avanafi efore huno asmi'ne, Otiot! Mofavrene, nererana znavrenka Isipi frenka vuo, anantega umani'nege'na Nagrama kasmisugenka eno, na'ankure Heroti'a ana Mofavre hakreno azeri haviza hugahie huno asmi'ne. ¹⁴Anage higeno Josefe'a otino ana Mofavrene, nererane ana kenage agu'afi znavreno Isipi vu'ne. ¹⁵Anantega Isip vuno umani'negeno Heroti'a fri'ne. Ana'ma hu'neana Anumzamo kasnampa ne'mofo asmigeno korapa kre'nea kemofo nena'a efore hu'ne, ***Isipitira Nagra Ne'mofavre'ni'a agi hugeno e'ne.*** (Hos 11:1)

Heroti onse'anse mofavre zga zamahe fri'nea naneke

¹⁶Anante Heroti'ma keama, antahi'zane vahe'mo'za revatga hzageno'a, agra tusi'a rimpa he'ne. Agra vahe huzmanteno, Betrehemi kumapinti ene, ana tva'onte me'nea kumapinti, zgegfu'zmimo tare zgekafureti urami'nea mofavre'zga ome zamahe friho huno antahi'zane vahe'mo'za ofugu'ma asmi'za, e'inhuzana fore hugahie hazageno antahi'nea knagu anage huno zamasmine. ¹⁷Anante korapa mago kasnampa ne' Jeremaia Anumzamo asmigeno kre'nea kemofo nena'a fore hu'ne, ¹⁸***mago ageru Rama kumateti antahi'naze, zavi neteno tusi'a asuza eri'ne, Reseli'a mofavre rmima'agu zavi ate'ne, higeno agri'ma azeri tagane'zankura ave'osi'ne, na'ankure magore huno omni tfa higeno'e.*** (Jere 31:15)

Ete'za Nazareti vu'naza naneke

¹⁹Heroti'ma fritegeno, mago Ra Anumzamofa ankeromo Josefena avanafi e'no Isipi eme asmi'ne, ²⁰otinka, Mofavrene nererane znavrenka

Israeli mopare vuo, na'ankure ahe'naku hakre'naza vahera hago fri'naze. ²¹Anage higeno Josefe'a otino ana Mofavrene, nererane zanavreno eteno Israeli mopare e'ne. ²²Hianagi, Heroti nemofo Akelasi, nefa no erino Judia kaziga kegva hie kema nentahino'a, ana kaziga vuzanku koro hu'ne. Anumzamo ava'nafima asmi'nea kante anteno, agra (Josefe) atreno Galili kaziga vu'ne. ²³Agra zanavreno viazamo, Nasareti kumate umani'naze. Anama hu'neana korapa kasnampa vahe'mo'za hunte'naza kemo nena'a efore hiankino Jisasinkura **Nazareti Nere hu'za agia hegahaze.**

Mono ti frezmante Joni mono eri'za eri'nea naneke

3 ¹Ana knafina mono ti frezmante Joni'a, Judia kaziga ka'ma mopafi ne-eno Anumzamofu ke huama huno zamasmine. ²Kefozantamigu tmasunke huta tamagu'a rukrehe hiho, na'ankure mona kumamo'a hago tva'o nehie. ³Na'ankure korapa ama'na kegu kasnampa ne' Aisai Joninku anagea hu'ne, **mago ageru'mo ka'ma mopafinti kezatino, Ramofo kana vri'nenteta, agri kana eri ante fatgo hiho hu'ne!** (Aisa 40:3) ⁴Joni'a kemori azokateti trohunte kena masineno, trazama nenaza afu'mofo akruteti amunofira nehuno, kentu'ene, afi' tumemofu rima'ane ne'ne. ⁵Anante Jerusale kumate vahemo'zane, Judia kazigati ene, ana mika Jodani kzigati vahe'mo'zane mika eri hantage'za Joninte etere hazageno, ⁶Joni'a Jodani timpi huama kumi'zmi hutere nehazageno, mono ti fre zamante'ne. ⁷Hianagi agrama kege'za hakare'a Farisi vahe'ene, Sadusi vahe'ma mono ti frekure hu'za ageno, Joni'a anage huno zamasmine, tamagra ha' osifavemofu mofavre nagare, aza tmasmino amuma ne-ea Anumzamofu rimpafe zampintira fregahaze. ⁸Ana hu'nagu rga rentenkeno, tamagu'a rukrehe hunaze huno tamage'za sena, ⁹hagi Abrahamu'a nerfakita, tagra knare hunone hutma osiho. Na'ankure nagrama tmagri'ma tmasmina, Anumzamo'a amne hanigeno ami havemo'a, Abrahamuna mofavre fore humigahie. ¹⁰Meninena hago sasumemo'a mika zafa agafare kriri'neankino, hakare zafamo knare rgama reontesia zafa'rmina, antagino tevefi mate'vuno atregahie.

¹¹Nagra amne tinteti mono tina fre nermantoe, tmagu'a rukrahe hnazegu, hianagi Agra henkama ne-emo'a nagrira nagtereno hiamu'ane ne' egahie, higena nagra Agri aganona (sendol) erizafiga osu'noe. Ruotge Avamupine, tevenu'ene Agra mono tina fre tmante'gahie. ¹²Witi ne'za eri atru hania kna hago atupa nehigeno, Agra vazihhehu azota azampi erino mani'ne. Hanki akru hre kuma eri hagro nehuno, anampinti nena'a zogirino erino nompri Agra ome nenteno, hona'a tevava tevefi krenkeno tegahie.

Joni'a, Jisasi mono ti frente'nea naneke

(Mak 1:9-11, Luk 3:21-22)

¹³Anante Jisasi'a Galiliti atreno Joni mono ti frente'snie huno Jodani tinte e'ne. ¹⁴Hianagi Joni'a tima Agri'ma frente'zankura i'o nehuno,

Kagra, nagrira tina fre nantesankeno knarera hugahie, hianagi Kagra nagritega neano? ¹⁵Hianagi Jisasi ke nona'a Jonina asmi'no, Menina amne fre nantegahane, na'ankure tagrati'a e'inama hanu'ana fatgo avu'avaza hugahue, higeno Joni'a Agri ke antahino, ¹⁶mono tima frentegeno, Jisasi'a ana timpinti ame huno otino ankenarega mrerino ne-egeno, monamo hagro nehigeno, keana Anumzamofu Avamu'mo maho nma'gna huno akoheno eramino Jisasinte emani'ne. ¹⁷Higeno, monafinkati mago ageru'mo huno, Ama'i Nagrama avesinento'a magoke Mofavre, hige'na Nagra tusi'a muse Agrira hunentoe.

Sata'a, Jisasi revatga hu'nea naneke

(Mak 1:12-13, Luk 4:1-13)

4 ¹Anante Jisasina Avamu'mo avreno vahe omni ka'ma mopafi Sata revatga hinogu vu'ne. ²Ka'ma mopafina 40ti'a hanine zgene ne'zana oneno a'o huno mani'ne. Ana huteno Agra tusi'a aga'zanku hu'ne. ³Revatga hu ne'mo anante ehanatino Jisasinku anage hu'ne, Kagrama Anumzamofu mofavre mani'nesunka, ke nehugeno ama have'zgamoa'a breti fore hino. ⁴Hianagi Jisasi ana ke nona'a huno, Anumzamofu avontafepi anage huno krente'ne, *Vahe'mo'a bretige neneno kasefara huno omanigahie. Hianagi maka kema Anumzamofu agipinti atirami'nea nanekema amage antesu'za manigahaze.* (Diu-Kas 8:3) ⁵Anantetira Sata'a, Jisasina avreno Jerusale ruotge ra kumate vuno, ra mono nomofu amumpare ome antege'no oti'negeno, ⁶anage huno Jisasina asmi'ne, Kagrama Anumzamofu Mofavrema mani'nesunka, Kagra amareti takauro, na'ankure Anumzamofu avontafepina anage hu'za krente'naze, **Anumzamoa ankeru naga'a kagriku huno huzmantesige'za, zmagra zmazanteti kazeri sga hanagenka kagra haverera kagia kavavera onkahegosie.** (Sam-Zga 91:11-12) ⁷Jisasi'a agriku hu'ne, *Mago ene anage hu'za Anumzamofu avon tafepina kre'naze, Kagra Ra Anumzanka'a revatga hunka onkegahane hu'ne.* (Diu-Kas 6:16) ⁸Ete ru'ene Sata'a avreno Jisasina mago za'za agonarega mrerino, maka mopa kagi'afina avenerino, konariri zama'a averi hu'ne. ⁹Hagi Sata'a anage huno Jisasina asmi'ne, Kagrama krenarenka nagiafi mono hunantesnanana ama zantamina maka Kagri kamigahue. ¹⁰Anante Jisasi'a agriku huno, *Sataga manigno! Na'ankure Anumzamofu avontafepina anage hu'za krente'naze, Kagra Ra, Anumzanka'a Agrike krena renka monora hunteguhane, nehunka Agri eri'za erintegahane hu'ne.* (Diu-Kas 6:13) ¹¹Anante Sata'a, Agrira atreno vige'za, ankeru vahe'mo'za e'za Jisasina eme aza hu'naze.

Jisasi mono ke Galili erigafa hu'nea naneke

(Mak 1:14-15, Luk 4:14-15)

¹²Ana huteno Jisasi antahiana Jonima azeri'za kina nompia ante'naze kema nentahino'a, Agra atreno Galili kaziga vu'ne. ¹³Galilima mani'nereti

Nazareti'a atreno Kapaneum nonkumate umani'naku ran tiru ankenare, Zebulunine, Nafatalikizni mopa kaziga vu'ne. ¹⁴ Ama'i korapa kasnampa ne' Aisaiana Anumzamo asamigeno huama huno kre'nea kemofa nena'a efore hu'ne. ¹⁵ *Zebuluni mopane Nafatali mopane, hageri anke'narega, Jodani kantu kaziga, Galili meg'i'a vahe'ma,* ¹⁶ *hanizampi nemniza vahe'mo'za tusi'a msaza ke'naze. Hagi ana mopafi nemni'za fri'zamofa tonapi mni'naza vahera, zamagri zmagofetura msazamo remsa hu'ne.* (Aisa 9:1-2) ¹⁷ Ana knareti agafa hu'neana, Jisasi mono ke huzmasmino anage hu'ne, tamagu'a rukrahe hiho, na'ankure Anumzamofa mona kumamo'a, hago tva'o nehie.

Jisasi'a amagama ante'saza disaipol naga zamagi hu'nea naneke
(Mak 1:16-20, Luk 5:1-11)

¹⁸ Galili tiru ankenarega nevuno, Agra tare kogna ome znage'ne, Saimoni'e, mago agi'a Pita'e, hagi negna'a Endru'e. Znagra nozame kuko tirupi atre'na'e, na'ankure znagra nozame zante netrenki'ne ana hu'na'e. ¹⁹ Agra anage huno znasmi'ne, Eta eme namage anteke'na, vahe'ma zamavazu hana'azana huranaveri ha'neni. ²⁰ Hantaka hu'ne kuko zani'a netre'ne, amage'antene vu'na'e. ²¹ Jisasi'a ananteti'ma viana, tare kogna ome znage'ne, Jemsi, Zebeti nemofoki, negna Jonine, osi ventefi neznafa, Zebeti ene kukozmi nehati'za mani'nageno anante ome znagi hu'ne. ²² Hantaka huke osi ventene nezna'fana atre'ne, Agri amge vu'na'e.

Jisasi kri eri amne hu'nea erizamofa naneke
(Luk 6:17-19)

²³ Jisasi'a, maka Galili kaziga vono nehuno, osi mono nozmifi (sinagog) mrerino knare musenke (gospol) mona kuma'mofa naneke rempi hunezmino, maka zamufa haviza hu'nea kri vahe ene krimo amu'nozomifi me'nea vahera zamazeri so'e huzmante'ne. ²⁴ Ana nehigeno Jisasi agenkemo Siriane maka kaziga vuno eno hige'za, nentahi'za zamagra maka kri vahera zamavre'za Agrite e'naze, ruzahu ruzahu krima eri'naza vahe'ene, zamufa zamatazane, kefo avamu'mo zamagu'afi mani'neane, manani kri'ne, zamufa fri'nea vahe'ene (paralais) zamare'za Agrite ageno zamazeri so'e hu'ne. ²⁵ Ana higeno rama'a vahe krerafamo Jisasima amage ante'nazana, Galiliti'ma, Dekapolis kazigati'ma, Jerusaleti'ma, Judia kazigatiki, Joda timofa asoparegati etere huza amage ante'naze.

Jisasi agonare mrerino mani'neni hu'nea mono naneke
(Luk 6:20-23)

5 ¹ Jisasi'ma hakare vea kevuma nezmageno'a, mago agonare mrerine. Anante'ma umanige'za, amage'ma nentaza disaipol nagamo'za Agrite e'naze. ² Anante Agra agafa huno rempi hunezmino, amanahu ke hu'ne,

³Zamufama anterami'za avamupima manisaza vahe'mo'za, Anumzamofu asomura erigahaze. Na'ankure mona kumara zamagri kumare.

⁴Zamasu'zampi mani'ne'samokizmia, Anumzamofu asomu huzmantegahie. Na'ankure Agra zamazeri fru hugahie.

⁵Akohe'za nemanimokizmia Anumzamofu asomu huzmantegahie. Na'ankure maka mopa zamisige'za erigahaze.

⁶Fatgo avu'avaku zamaganeteno, tinku zamesiaza nehazamokizmia asomu huzmantegahie. Na'ankure Agra zamagrira knare huzmantegahie.

⁷Vaheku'ma zamasunku hunezmantamo'za, asomu erigahaze. Na'ankure Anumzamofu asuntgi zamantegahie.

⁸Zamagu'amoma agru hu'nesamoza, Asomu erigahaze. Na'ankure zamagra Anumzana kegahaze.

⁹Ha'ma erifru nehazamo'za, asomu erigahaze. Na'ankure zamagrifura Anumzamofu mofavre hugahaze.

¹⁰Knare zamavuzmama nehnage'za hafra huzmantesamo'za, asomura erigahaze. Na'ankure mona kumamo'a zamagri'za segahie.

¹¹Vahe'mo'ma huhaviza huneganteno, knonkeve negamino, maka hankromofu nanekea havige huno hugofi neganteno, Nagriteku huno hugantesimoka, Asomu erigahane. ¹²Kaninkaha hutma muse hiho, na'ankure avamutami'amofu fenozana rama'a monafinka me'ne. Na'ankure korapara kasnampa vahera anahukna hu'za zamahe'naze.

Hagene tvi'kna hu'za mani'saza naneke

(Mak 9:50, Luk 14:34-35)

¹³Tamagra ama'na mopare hage mani'naze. Hianagi ana hagemo'ma haga'ama omnesigeno'a, inanknahu huno hage'a ete erigahie? E'i mago knare'za hugara osiankino, atresnage'za vahe'mo'za zamagareti rehaviza hutregahaze.

¹⁴Tamagra ama mopamofu tvi mani'naze. Mago rankumamo agonare me'nesia rankumamo'a fra okigahie. ¹⁵Vahe'mo'za ramu tavi rekru hu'za baketifina nontaze. Tavi ante azotare hantintenageno remasa nompina nehie. ¹⁶Anahu kante tavika'a atregeno, vahe'mokizmirera remsa hanige'za, knare kavu kvara nege'za, monafi mani'nea Negfana ra agi amigahaze.

Anumzamofu kasegegu Jisasi hu'nea naneke

¹⁷Tamagra kasegene, kasnampa vahe ke eri atreku e'ne hutma Nagrikura osiho, Nagra kasege eri atrenaku ome'noanki, eri knare hunaku e'noe. ¹⁸Nagra tamagerafa hu'na neramasmue, monane mopane vga'oreno me'nena, mago onensa avoma kasegefi me'nea zamo'a vgaore me'nenkeno, hakare zamo'a efore hugahie. ¹⁹Hagi iza'o ana kasegefinti

mago rufutagino, rumofo rempi humino, ana hiho hanuno'a, agra ositfa mona kumapina manigahie. Hianagi mago vahe'mo'ma Anumzamofa kasegema amage nenteno, rempi vahe huzmisuno'a, mona kumapina henka ra manigahie. ²⁰Na'ankure Nagra neramasmue, tamagri tamavutamavamo'ma fatgo huno kasegere ugagota hu'naza vahe'mofone, Farisi vahe'mokizmima, zamagatemareshiana, tamagra mona kumapina ovugahaze.

Rimpa he'zane vahe ahe fri'zamofa naneke

²¹Tamagra ko antahi'naze, tamagehe'ima zamasm'i'naza kea, *Kagra mago nera ahe ofrio, hagi iza'o vahe'ma ahe frisimo'a, keagare otigahie* hu'ne. ²²Hianagi Nagra anage nehue, iza'o nefuma rimpa kna huntesimo'a, agra keagare otigahie. Aza'o mago nefuma huhaviza hunte'simofona, avare'za kansol kva vahete (Sanhedrin) vugahaze. Hagi iza'o neginagi ke nehie huno hanimofona, tusi'a tevefi avare tregahaze. ²³E'ina hu'negu, kagrama ofa ka'a erinka kre sramanavu itare'ma esunka, negafu'ma rimpa hegante neniazanku antahisunka, ²⁴ana kre sramnavu itare ofa ka'a atrenka ete vunka, kotazana ana negafu'ene ome kasunke hutenka, henka ofaka'a eme amio.

²⁵Hagi mago'mo naneke hugantenaku hanimofona karanka nevutna ame'ama hunka rimpa eri fru huo, aru kagrira kavreno ke refakohu vahete vanigeno, anante ke refakohu ne'mo'a kavreno kina kva ne'te vnigeno, hagi kagrira ksaga huno kina nOMPI katre'zanku, ana huo. ²⁶Tamage hu'na kagrira negasmue, kagra anampintira atioramitfa hugahane, hagi agima ahegantesiama'a mizase varesunka henka kina nompintira atiramigahane.

Ru vene, a'ene monkoza huzamofa naneke

²⁷Tamagra antahi'naze amanagema hu'nea kea, *tamagra ru vene, a' ene monko'zana osugahaze* hu'ne. ²⁸Hianagi Nagra neramasmue, aza'o mago a' negeno kesane hanimo'a, hago ana a'ene monko'za agu'afina hu'ne. ²⁹Tamaga kavurgamo kazeri kumipi katre'na, eri tagitinka mate vuo, na'ankure ru maka kavufa tevefi (hell) vu'zankura, mago kvufamo fnane hani'ana, knare hugahie. ³⁰Kzantmaga'amo kumipi kavrentena, taga hunka matevu atro. Ru mika kavufamo tevefi vu'zankura, mago kavufa atresanana, e'i knare'za hugahie.

A'ne zmatrezamofa naneke

(Mat 19:9, Mak 10:11-12, Luk 16:18)

³¹Korapara anage huno avona krente'ne, *iza'o a' ama huntenuku hanuno'a, a' atre avo kre amino* hu'ne, ³²Ana hanigeno Nagra anage tmagrikura nehue, mago vahe'mo a' a'mo monko'za osu'nenigeno

atre'siana, ana ne'mo'a ana ara huntessigeno monko'zana hugahie. Hanigeno iza'o, vemo'ma atre'esia a'ma erisia ne'mo, monko'za hugahie.

Huvempa naneke

³³ Mago'ene tamagra korapama, tamagehe'ima zamasmine'a kea antahi'naze, *huvempa kea ha'ontagigahane. Hianagi Ra Anumzantera huvempa hu'nana kea eri knare huo hu'ne.* ³⁴ Hianagi Nagra anage hu'na neramasmue, mona kumaku hunteta huvempa osiho, na'ankure Anumzamo nemnia tra'e, ³⁵ mopa'mofonku hunteta huvempa osiho, na'ankure Agra agia nentea mope, hifi Jerusalegura osiho, na'ankure *tusi'a kinimofo rankumare* hu'ne. (Aisa 6:1-2) ³⁶ Kagra kasenire huntanka huvempa osuo, na'ankure kagra mago kazokara eri efeke osuge, hanikera osugahane. ³⁷ Hianagi kema hananana, izo hanunka, izo huo, i'oma hnunka i'o huo, mago'a amana kema agtereno hanuno'a, hankro'mofontegati eanke hugahie.

Nona huno ozmahenia, naneke

(Luk 6:29-39)

³⁸ Tamagra anagama hu'nea kea antahi'naze, *avu rupro hanimofona, agri enena avu rupro huo, ave rutafri simofona, agri enena ave rutafrio* hu'ne. ³⁹ Hianagi mago'ene anage hu'na neramasmue, haviza huramante simofona, azeri arava hiho, hianagi iza'o tmaga kaziga kameragente'ma kahena, rukrehe hugeno, mago kaziga kameragente kaheno. ⁴⁰ Mago'mo sioti ka'agu namio hanigenka, anakre kuka'ane amio. ⁴¹ Iza'o kagri'ma tutu huno fenoni'a erinka, mago kilo mita vuo hanigenka, eriagaterenka tare kilo mita vuo. ⁴² Mago zanku kantahige simofona amne amio, erite'na kamisue huno kantahigena i'o osuo.

Ha' vaheti avesi antesuna naneke

(Luk 6:27-28,32-36)

⁴³ Tamagra antahi'nageno korapa anage hu'naze, *kagri tva'onte mni'nemofona kavesintetfa nehunka, ha' vahe ka'a hinko hunto* hu'ne. ⁴⁴ Hianagi Nagra anage hu'na neramasmue, ha' vahetmia zamesizmantetfa nehuta, tamahesia vahera nunamu huzmanteho. ⁴⁵ E'inama hanuta monafi nemnia Nfatimofo mofavre manigahaze. Agra zgegu higeno, zgea knare vahete ene, havi vahetera neregeno, fatgo vahete'ene, fatgo osu vahete enena kora atregeno nerie. ⁴⁶ Na'ankure kavesima antenia vahe'ma, kavesi zamantenunka na'a mizama'a erigahane? Tagra antahi'none, takesi zgoma eri vahe'mo'za anahu knara nehaze. ⁴⁷ Tamagrama nermafunkte'za zamazeri so'e hanazana, na'a mago'a zana hugahaze? Megi'a vahe'mo'za zamaganena anahu kna nehaze. ⁴⁸ E'ina hu'negu tamagra monafi neramafama fatgo huno agru hu'nea kna hutma fatgo hutma agru hiho huno zamasmine'a.

Vahe zamaza hu'zamofu naneke

6 ¹Vahe'mofu avure fatgo avu'ava nehnanke'za kagezankura kva huo, monafi mani'nea Negfa'a mizana onkamigahie.

²Hanki kagrama zamunte omne vahe'ma zamaza hunka zamisunka, ufenkrafahu vahera huzmantege'za ufre'za ugota osiho, havige vahe'mo'za mono nompine (sinagog) kantegane nehaza knara osiho, e'ina hanankeno'a vahe'mo'za kagi erisaga hugahaze. Nagra tamage hu'na nermasmue, hago zamagra mizazmi'a eri'naze. ³Hianagi zamunte omne vahe zamaza hanunka, atregeno hoga kzamo'a, tmaga kzamoma hania zana onkeno, ⁴e'ina hunka oku'a amigeno, oku'a nehiaza me'negeno negea Negafa, Anumzamo'a mi'zana kamigahie.

Nunamu huzamofu naneke

(Luk 11:2-4)

⁵Nunamu hunaku hanunka, havige vahe'mo'za nehazankna osuo. Na'ankure zamagra mono nomp i'oti'za mani'ne'za, megi'a kampire oti'ne'za nunamu nehazage'za, vahe'mo'za negazazana osiho. Tamage hu'na Nagra nerasmue, zamagra ko miza zimia eri'naze. ⁶Hianagi kagrama nunamu hunaku hanunka, nomofu agu'afi ufrenka, kafa erikitenka Negafantega oku'a nunamu huo. Hugeno oku'aza negea Negfa'a mizana kamigahie.

⁷Nunamuma hanunka, agu'agesa omne vahe'mo'za revahe revahe hu'za, megi'a vahe'mo'za (gentiles) hantgazankna kea osuo, na'ankure zamagrama antahizana, rama'a naneke nehusunkeno Anumzamo antahisie hu'za nehaze. ⁸E'i ana hu'negu zamagri knara osiho, na'ankure antahi onkenageno upa'ma hu'naza zana ko tamagri Neramafa antahi'ne. ⁹Amanahu kna hutma nunamuna hiho. Tagri Nfatimoka monafi mani'nane, Kagri Kagimo ruotage huno mesie. ¹⁰Kagri mona kumara esie, Kagri kavesi'zana monafinka nehazankna huno, ama mopafi efore hanie. ¹¹Mago mago knare'ma nesuna ne'zana meni tmio. ¹²Kumitia atre'rantegeta, anahu kna huta kumi hurante'namokizmi'a atre'zmanta maneno. ¹³Nehunka tatregeta rerahe'zampina uoframaneno, hianagi hankromofu azampintira tza hunka tavro. [Na'ankure Kagri mona kumamo mevava hugahie. Tamage.]^a ¹⁴Hianagi tamagrama kefo'za hurmantesamokizmi kumi'zami atrezmante sageno'a, monare nemnia Nfatimo'a, kumi'tamia eri atre ramantegahie. ¹⁵Hagi vahe'mokizmi kefoza zimi atre ozmante snageno'a, monare nafatmimo'a, kefozantimia atre oramantegahie.

^a 6:13Mago'a antahi'zane vahemo'za, vgare naneke'mo'a ese'ma kre'nafina kre onte'naze, hu'za hu'naze.

Neza atreno nunamu huzamofo naneke

¹⁶Ne'zama a'o hanuta (fast) tavre vahe'mo'za nehaza knara hutma havi tamugosa osiho. Na'ankure e'inahu tamugosa nehnage'za, vahe'mo'za nege'za, neza a'o hu'ne hu'za hugahaze. Nagra tamage hu'na neramasmue, ko zamagra mizama'a eri'naze. ¹⁷Hianagi ne'zama a'o hanutma, tmasenire msavena nefretma, tamugosa sese hiho. ¹⁸E'ina hanageno nezama a'oma hanaza zana vahe'mo'za onkeho. Hianagi tamagri Neramafa oku'a nemnimo kagegahie. Nehuno oku'a me'negeni negea Neramafa'a mizana tamagrira tamigahie.

Mevava fenoza eritru hanaza naneke

(Luk 12:33-34)

¹⁹Ama mopafina fenona eritru osiho, havi kfamo'ene, krogroheni erihaviza nehnigeno, kumza vahe'mo'za, nona anafe hu'za kumza segahaze. ²⁰Hianagi monafinka fenona havi kfamo'ene, krogro ohegeno, kumza vahe'mo'za nona tgana vaziza kumza ose fenotmina, tamagra eritru hiho. ²¹Na'ankure fenonka'a me'nenirega, e'i anantega kagu'amo'a megahie.

(Luk 11:34-36)

²²Kavurgamo'a kavufa'mofo rampe tvi me'ne, ana hu'neankino kavurgamo knare huno me'nenigeno'a, mika kvufamofona remsa hugantegahie. ²³Hianagi kavurgamo haviza hanigeno'a, mika kavufa hanizamo refitegahie. Hianagi kagu'afi me'nea tvimo asu'ma hanigeno'a, tusi'a hani hugahie.

Tare kva vahe'mofonte eri'za e'orisnaza naneke

(Luk 16:13, 12:22-31)

²⁴Mago'mo'a tare kva netera eri'zana e'origahie. Na'ankure anamo'a mago'mofona avesra hunenteno, mago'mofona avesi nenteno, mago'mofonte amage nenteno, mago'mofona kefenkami atregahie. Kagra Anumzante'ene zgore enena monora huontegahane.

Mago zankura hakare kagesa ontahisana naneke

²⁵E'ina hu'negu, Nagra neramasmue, tamagra manisnaza zankura tamagesa ontahiho, naza kavera negahune, igati tina negahune, kukena tavufarera na'a hugahune huta ontahiho. Anampina kavemo'a mani'zana agterenefi, hipi kukenamo'a tavufa agtere'neo? ²⁶Nmamo'ma hareno vano nehiana keho, zamagra hoza ante'za, kafiza, eri atru hu'za, kave ante'nompina nontazanagi, monare nemnia Neramafa ne'zana nezmie. Nmamo'za kagrira kagaterenafi? A'o. ²⁷Hagi mago timimo'ma knare'zama

huno mani'zanku'ma antahintahi hakarema hania zamo'a, asimu'a erizazara hugahio? A'o.

²⁸Nahigetma kukena huzankura hakare antahintahia nehaze? Flauamo'a nankna huno nehagefi keho, zamagra eri'za e'oriza kukena trora nosaze. ²⁹Ana hianagi Solomoni'a avasese'amo hu'nea knare nare kukena hu'neanagi, ami flauamofo avasese'amo'a agatere'ne. ³⁰Hianagi Anumzamo'ma, amuma me'nea trazama kukenama huma ante'neana, menina me'neanagi vahe'mo'za okina tevefi eri kregahaze. Ana hu'negu tamagrira Anumzamo'a agatereno kukena hurmantegahie. Tamagra osi'a tamentinti'ne naga mani'naze. ³¹Tamagra nanezane tine neneta nakukena hugahune hutma hakare antahintahi osiho. ³²Na'ankure mono ontahi vahe'mo'za, miko zankura nehakaze. Na'ankure monafi nemnia Neramafa'a miko zankuma upama hu'nazana ko antahine. ³³Hianagi kota zana, Anumzamofo kumaku'ene, fatgo avu'avazanku haketenkeno, ana maka'zana anazanke huno tamamigahie. ³⁴E'i zanku oki fore hania zankura tamagesa hakare osiho. Na'ankure okizana atrenkeno, agra'a kva krino, mago knare'ma esia hazenkea, ana knazupage knaza megahie.

Vahe refako huzamofo naneke

(Luk 6:37-38,41,42)

7 ¹Jisasi'a anage huno mago'ane zamasmine, rumofona refako huo zamantenkeno, anahu kna huno tmagri e'nena refako huormanteno. ²Na'ankure rumofoma refako huntessante, ana avamente Anumzamo'a kagrira refako hugantegahie. Kagrama rumofoma refakoma hanana avamente, anazanke huno kagrira refako hugantegahie. ³Nahigenka osi zama negafu avufima me'neazana negenka, kagri kavufima ra zafa rampama me'neana nonkane? ⁴Na'ane hunka negafunkura, natregena osi'zama kavufi me'neana eri traneno nehane, kagri kavufi'ma ra zafa rampama me'neana? ⁵Kagra tavre vahere, esera ra zafa ranpama kavufi me'neazana eriatrenka kavua keama hutenka, ete negafu avufi me'nea osi'zana eri atregahane.

⁶Tamagra ruotage hu'neniazana kramofona omiho, hiro zantmi'a afumofona omiho, zamagra eri'za zamagianu rehapa atiza eri haviza hugahaze. Arukrehema hanuno'a kaheno traga trogo hugahie.

Kazigazi huno Antahinegeno, nehakeno, kafante vagre

vagre hnimofo naneke

(Luk 11:9-13)

⁷Antahigesankeno anazana kamigahie, hakesunka kefore hugahane, kafante vagre vagre hanankeno, anagi kantegahie. ⁸Na'ankure maka vahe'mo'za antahima nege'za e'nerize. Iza'o, hake'noma vanimo'a, keno eri fore hugahie. Kafante vagre vagre nehnimofona, anagi antegahie.

⁹Tamagri amu nompinti magomofone ne' mofavremo, breti eri namio hanigetma, havea knare eri amigahzafi? ¹⁰Hifi noza eri namio hanigeno'a, agra knare osifavea eri amigahio? ¹¹Hianagi tamagra havizama nehaze vahe'mota antahi'naze, mofavre'tmima knare muse'zama ami'zana, monafima nemnia Neramafa'a, knare muse'za, iza'o Agri'ma antahigemofona rama'a zantmi nemie! ¹²vahe'mo'zama maka zampima kagrira, hugantesaze hunka nehana avu'avara, kagra ana avu'ava zamagrira huzmanto. Na'ankure e'i kasegene kasnampa vahe'mokizmi kenena eri knare hugahaze.

Osi kafa'mofo naneke

(Luk 13:24)

¹³Tamagra osi kafampinti ufrehu, na'ankure fananehu kantema vu'nea kamo'a, ra huno fru hu'ne. Ana kantera rama'a vahe'mo'za amage ante'za nevaze. ¹⁴Ana hianagi asimu eri kumate vu'nea kafamo'a osi higeno, ana kamo'a kakanino amuhu hu'nege'no, osi'amoza ana kana nege'za nevaririze.

Zafane rga'amofone naneke

(Luk 6:43-44)

¹⁵Kva hiho havige kasnampa vahekura, sipisipimofu avufa erihankre'za egahzanagi, zamagu'afinka afi kra egahaze. ¹⁶Kagrama zamagenka, antahinka zamagrira hananana, rgama rentesare kegahane, krepia ave'ave zafafinti noragize, hifi ave'ave trazampinti fikia tagigahazo? A'o, anara osugahaze. ¹⁷Anahu kante hakare Knare zafamo'za, knare rga renetageno, havi zafamo'za havi rga renentaze. ¹⁸Knare zafamo'za havi rga oregahaze, ete havi zafamo'a knare zafa rga oregahie. ¹⁹Miko zafamo'za, knare rga reontesiana, antagiza matevu'za tevefi atregahaze. ²⁰E'ina hu'nege'no ana kante, zamavu'zmavama hanare zmageta antahita hugahaze.

Anumzamo havige vahe refako hania naneke

(Luk 13:25-27)

²¹Mago'a vahe'mo'za Nagriku, Ra Anumzanti, Ra Anumzantie nahaza vahe'mo'za, mona kumapina ovugahaze. Hianagi iza'o monafi nemnia Nfanimofi avesima nevariri'samo'za ufregahaze. ²²Ana knazupa rama'amo'za anage hu'za Nagrikura hugahaze. Ra Anumzane, Ra Anumzane, Kagri kagifina mono nanekea hu'none, Kagri kagifina havi hankrora hunenteta, kaguvaza (mirakol) hu'nonane hanagena, ²³ana knazupa Nagra anage hu'na zamasmigahue, tamagra kasegeni'a amage'onte vahe mani'nazagena tmatahina kena osunoanki, maniganeho hu'na zamasmigahue.

Tare vahe'moke no ki'na'a naneke

(Luk 6:47-49)

²⁴E'ina hu'negu, iza'zmo ama keni'a nentahi'za amage nentamo'za, knare antahizane ne'mo hanave nentake havemofu, agofetu nona kiankna nehie. ²⁵Kora nerigeno, tina hageno ne-egeno, zaho kora atuno ana nona eri tagna vazinaku ana'ana hianagi, ana nona eri tagna ovazi'ne, Na'ankure keru kafino tamino havemofu agofetu nona ome ki'ne. ²⁶Hagi iza'zmo, ama Nagri naneke nentahiza amage onte'samo'za, negi vahe'mo noma'a ksepampi kia kna hugahie. ²⁷Kora arigeno, tina hageno egeno, zahomo'ene huno ana nona eri traka hutregeno asaga huramigeno, razampi tagana taganu vazi'atre'ne.

²⁸⁻²⁹Jisasi'a ana naneke zamasmu vgarage'za mika vahe anante atru hu'namo'za antahi'nazana, kasegere ugagota hu'naza vahe'mokizmi avamente ozmasmi'ne. Rankva vahe'mo rempi hunezamia kante, hihamu'ane naneke nehige'za nentahi'za muse hunente'za, hakare zamagesa antahi'naze.

Jisasi'a fugo namu ne' azeri avusese hunte'nea naneke

(Mak 1:40-45, Luk 5:12-16)

8 ¹Jisasi'ma agonaregati'ma eramige'za, tusi'a vea krerfamo'za amage vu'naze. ²Mago fugo namure'nea ne'mo, avuga rena emereno amanage hu'ne, Ramoke, Kagrama naza huku'ma nehanunka, Kagra amane nazeri avusese hugahane. ³Jisasi'a azana antegantuteno ana ne'mofu avufare avako nehuno, anage hu'ne, Nagrima navesiana, fugo namunka'amo'a amane hugahie. Higeno ame huno ana fugo namumo'a afe higeno, avusese hu'ne. ⁴Jisasi'a ana nera asami'ne, Kagra kva hunka, ama zankura mago'mofona osamitfa huo. Hagi prisi nete vunka, kvufa ome averinka ofa erinka vunka, Mosesima hu'nea kante antenka zamagrite eri ama huo.

Jisasi 100ti'a sondia vahete kva ne'mofu

eri'za ne'a azeri so'e hu'nea naneke

⁵Jisasi'ma Kapenium kumate uhanatigeno'a, 100ti'a sondia vahe'mokizmi kva ne'mo (sensurien), Agrite eno aza hinogu antahige'ne. ⁶Agra anage hu'ne, Ranimoke, eri'za ne'ni'a, avufamo'a frigeno, tusi'a atazampi nonte maseno mani'ne. ⁷Knareki'na vu'na ome eri so'e huntegahue. ⁸Hianagi ana sondia kva nemo'a kenona'a anage hu'ne, Ramoka, nagra knarera osu'noankinka, eno hanugenka nagri nompina omegahane, hanki amane ke'age nehugeno, eri'za ne'nia knare hunteno. ⁹Na'ankure nagra'nena mago kva vahe'mofu hinkanaga mani'nogeno, sondia vahe'mo'zanena nagri hinkanaga mani'nazage'na, mago'mofonku

hu'na vuo hugeno, agra nevie. Mago'mofonku eno hugeno agra ne-e. Hagi nagrani'a kazokzo eri'za neku, amana huo hugeno, agra anazana nehie. ¹⁰Jisasi ana ke nentahino'a, tusi antri nehuno, amage'ma vu'naza nagara anage huno zamasmine, Nagra tamage huna nerasmue, mago nera Israeli vahepina amanahu hanave amentintine nera, Nagra onketfa hu'noe. ¹¹Amanage hu'na nerasmue, hakare'a vea'mo'za zge nehntia kazigati'ene zge fre kazigati'ene eri hantge'za Abraha'ene Aisaki'ene Jekopu'ene monafina muse nehu'za, ne'za nene'za manigahze. ¹²Hu'neanagi rama'a zamagri kumarema hunoma huzmantenea Israeli vahe'mo'za, tusi'a kumazu hanimpi megia zamatresage'za, anantega manine'za zavira nete'za, zamavera ani kreki hugahaze. ¹³Anante Jisasi'a 100ti'a sondia vahete kva nera anage huno asami'ne, Kagrama kamentinti hanku kagrira kaza hugahianki amne vuo huno humanentegenoa, ana kna fatgore eri'za ne'amofona kri'amo'a atrente'ne.

Pita nonte kri vahe zamazeri so'e huzmante'nea naneke
(Mak 1:29-34, Luk 4:38-41)

¹⁴Pita nOMPI Jisasi'ma umrerino omekeana, nenemo ara avufa amuhu amaho kri erino mase'negeno omege'ne. ¹⁵Ana a'mofo azante ome avako higeno, avufa amuhu zamo'a atrentegenoa, otino neza tro huno zami'ne.

Jisasi'a hakare kri vea zamazeri so'e hu'nea naneke

¹⁶Kinagama segeno'a, hakare havi avamutami zamagu'a fre'nea vahe zga zamare'za Agrite e'naze. Agra ana havi avamura kereti ahenati netreno, maka krime erinaza vahera zamazeri knamare'ne. ¹⁷Amana zana kasnampa ne'mo, Aisaia korapa hunte'nea kemofa avufa'a efore hu'ne. ***Agra kumitia e'nerino kritia eri atrerantene*** hu'ne. (Aisa 53:4)

Jisasi amage'ma vu'zamofa naneke
(Luk 9:57-62)

¹⁸Anante Jisasi'ma kegeno tusi'a vahe'mo'za Agrira azeri kagigeno'a, Agra zamasmimo timofo kantu kaziga viho huno amagama nentaza disaipol nagara huzmantene. ¹⁹Anante magora kasegere ugagota hu'nea ne'mo Agrite eno, Rempi hurami nere, inantego vnanana, nagra kamage ante'na vugahue. ²⁰Jisasi'a amanage huno agrira asami'ne, afi kramofona mopafina kerigama'a me'ne, hare'za vanoma nehaza namamofona noma'a me'ne. Hagi Vahe'mofo Mofavre'mofona asenima anteharege huno masesia zana omane'ne. ²¹Jisasi amagama nentaza disaipol nagapinti mago zamimo anage hu'ne, Ramoka natrege'na pusazana nenfana ome asenteteno huno hu'ne. ²²Hianagi Jisasi'a anage

huno asami'ne, Nagri namage eme nentenka, atrege'za fri kerfamo'za, zamagri'a fri kerfa asenteho.^b

Jisasi tusi'a zahoko azeri fru hu'nea naneke

(Mak 4:35-41, Luk 8:22-25)

²³ Jisasi'ma votifima mrenerige'za, Agri amagama nentaza disaipol nagamo'za avaririza vu'naze. ²⁴ Nevzageno tusi'a zaho komo ana tirupinti erira huteno, ana timo'a eri kranto kranto huno votia refite'za hu'ne. Anama nehiana Jisasi'a mase'ne. ²⁵ Hige'za amagama nentaza disaipol nagamo'za, Agrite eza eme azeri oneti'za anage hu'naze, Taza huo Ramoka, Hago tagra friza nehune. ²⁶ Hianagi zamagriku anage hu'ne, Nahigetma korera nehaze, onensa tamentintine nagara? Nehuno Agra anante otino hanave ke huno ana zaho ene, tinena rurava huo higeno, kranto krantoma nehiretira, arane'ne. ²⁷ Hige'za ana disaipol nagamo'za tusi zamagogogu nehu'za, zahomo'ene, timo'ene ke'a erizafa nehianki, ama inankna vahere? hu'naze.

Hankromo znagu'a fre'nea netre Jisasi zanazeri so'e hu'nea naneke

(Mak 5:1-20, Luk 8:26-39)

²⁸ Jisasi'ma timofo kantu kaziga Gadara uhanatigeno'a, hankaro'mo znagu'a fre'negeke matipi nemani'a netremoke, Jisasi'ene tutagiha hu'na'e. Zanagera tusi hamponatikeno vahe'mo'za koro hu'za ana kantera novazane. ²⁹ Zanagera tusi kezatike, Anumzamofu Mofavre'moka, nago'azana huorantenka tataro. Kagrama amafima e'nanana tagri tazeri haviza hunaku e'nano, knama osu'nefina? ³⁰ Mago'a ogantu'agna rama'a afu zgamo'za ne'za nene'za mani'naze. ³¹ Anante ana hankaromo'za anage hu'za antahige'naze, Tagri'ma tahe natitresunka, hurantegeta antu afu'zgafi uframneno. ³² Hazageno Jisasi'a anage hu'ne, Viho! Hige'za atiramiza afu'zgafi ufrageno, ana afu'zgamo'za zamagage zamagage hu'za zaveniteti tirupi tkaure'za ti nakri'naze. ³³ Unefrige'za afu' kva vahe'mo'za zamaga re'za vu'za kumate uhnati'za, anama hu'naza zamofu naneke vea' ome nezmasmi'za ana netremokizni znagu'afinti'ma hankro'mo'za atiramizama afu'mofo agu'afi ufre'zama fri'naza naneke zamasm'i'naze. ³⁴ Anante ana kumapinti vahe krerfamo'za eri hantge'za Jisasinte e'za, eme'ma nege'za, ama kzigatira ko atrenka vuo, hu'za hunte'naze.

Jisasi'a agia fri'nea ne' azeri so'e hu'nea naneke

(Mak 2:1-12, Luk 5:17-26)

9 ¹ Votifima mareriteno ti taka heno kantu kaziga Agra'a ran kumate vu'ne. ² Anama hutege'za vahe zgamo'za agamo fri'nea nera sesenku

^b 8:22 avamupima frinaza vahemoza, ama avufarema fri'nea vahera asentehogu hu'ne.

hu'za erizafa hu'za Agrite e'naze. Jisasi'ma zamagri zamentintima negeno'a, korera osuo mofavre'nimoka, kagri kumira hago eri atroe. ³Mago'a kasegere ugagota hu'naza vahe'mo'za, zamagra zamagra anage hu'naze, Amana ne'mo'a Anumza'mofo huhaviza hunente. ⁴Jisasi'a zamagrama haza zamuzma negeno, anage hu'ne, Nahigetma kefo antahintahia tamagu'afina nentahize? ⁵Inanke'mo oza hugahie, Kefo zanka'a eri ataroe hanua kemopi, otinka vuo hanua kemo'e? ⁶Vahe tmamo'na mopafi mani'nena nagra hihamure vahe'mokizmi kefoza eri fanane huga vahe mani'noanki'na, tameri ha'nena kegahaze, huno nehuno rukrahe huno, ana agaza sti'nea ne'mofonku, Otinka sesenkuka'a erinka nonka'arega vuo huno higeno, ⁷anante otino noma'arega vu'ne. ⁸Ana'ma hiaza vahe'mo'za nege'za, zamagra tusi kore nehu'za, Anumzamoma e'inahu hanave'ma Jisasima ami'neazankura, Anumzamomo agi'a ahesga hu'naze.

Jisasi'a Matiu agi hu'nea naneke

(Mak 2:13-17, Luk 5:27-32)

⁹Ananteti Jisasi'a nevuno, mago nera agi'a Matiu'e nehaza ne' takisi zago zonegi'za onensa nOMPI mani'negeno omegeno, Nagri namage eme anto, higeno agra otino amage vu'ne. ¹⁰Jisasi'ma vuno Matiu nOMPI neza ome nenege'za, rama'a takisi zagoma zonegiza vahe'ene, kumi vahe'mo'zanena e'za Jisasi ene amage'ma nentaza disaipol naga'ane kave eme ne'naze. ¹¹Ana'zama farisi vahe'mo'za nege'za, amage'ma nentaza disaipol nagara anage hu'za zamantahige'naze, nahigeno tamagri rempi hurami ne'mo'a, takisi zago zogi naga'ene, kumi naga'enena ne'zana nene huza zamantahige'ne? ¹²Jisasi'ma nentahino'a amanage hu'ne, Kri'zamima omane'nesia vahe'mo'za tusa netera ovugahaze, hagi krime eri nesaza vahe'mo'zage tusa netera vugahaze. ¹³Jisasi'a zmasamino, vutma ome zaganeta antahiho ama kemo'a na'ane hu'nefi, *Nagrira rumofo asuragintezanku navenesie, hagi (ofagura) kresramangura nave'nosie*. a'ankure Nagrama e'noana, fatgo vahe zamagi huku ome'noe, hagi kumi vahe zamagi hanuge'za, zamagu'a rukrahe hihogu e'noe. (Hos 6:6)

Korapa avu'ava'zane ksefa avu'ava'zane raru osana'a naneke

(Mak 2:18-22, Luk 5:33-39)

¹⁴Hianagi Jonima amage nentaza disaipol naga'mo'za Jisasinte e'za, nahigeta tagrane, Farisi vahe enena ne'za a'o nehunke'za, Kagri kamage'ma nentaza disaipol nagamo'za, ne'zana a'o osu'a nenaze? hu'za antahige'naze. ¹⁵Jisasi'a zamagriku anage hu'ne, Aravema hute'ma kenaku eme atruma hu'naza vahe'mo'za, aravema husia ne'ma zamaganema maninesige'za zamasunkura osugahaze, tamagefi? Hu'neanagi mago kna ne'eankiza aravema hunaku'ma hania nera, zamagri pintira avaretrete'za, anante zamagra nezana a'o hugahaze.

¹⁶ Mago'mo'a kahefa tvarave korapa kenarera erinteno ohatigahie. Anama antenoma hatisia kenamo'a ampimpi huno eri tagato hura hugahie. ¹⁷ Ana nehuno vahe'mo'a kahefa wainia, meme akuruteti tro hu'nea atafa waini tafempina tagi ovazigahie. Na'ankure meme akaruteti trohunea atafa tafemo'a, pro huno wainimo tagisigeno, ana tintafemo'a haviza huzanku, kahefa wainia kahefa meme akuruteti tro hunte tafempi tagi vazisigeno, taregamoke knare hugah'e.

Fri'nea mofa azeri o'netino korankri eri amane hu'nea naneke
(*Mak 5:21-43, Luk 8:40-56*)

¹⁸ Ana kema nehigeno, mago ugoteno keaga nehia ne'mo eno, Agrite eme kepri nehuno, anage hu'ne, Mofanimo'a mensi fri'neanki, enka kza agrite eme antegenno, agra otino asimu erino manino. ¹⁹ Higeno Jisasi'ene Agri amage nentaza disaipol naga'mo'za otiza ana ne' avariri'za amage vu'naze. ²⁰ Higeno mago ara korankri erino 12fu'a zgegfu maninea a'mo, Jisasi amefi eno zaza kena'amofa atupa'are eme avako hu'ne. ²¹ Na'ankure agrama agesama antahiana, nagra magoke'zana Agri zaza kenarafante azeri sugeno'a, kri'nimo'a atrenantegahie huno agu'afina antahi'ne. ²² Hianagi, Jisasi rukrahe huno negeno amanage hu'ne, Mofani'moka korera osuo, kagrika'a kamentintimo kazeri knare hie, nehigeno ana kna fatgo'are ame'ama huno ana ara kri'amo'a, so'e hunte'ne.

²³ Jisasi'ma vuno ana ugoteno keaga nehia kva ne'mofo nompima ufreno, uvire tafema neraza vahe'ene, zavisu krasu nehu'za zamazuzampi mani'naza vahe krerfa ome nezmageno, ²⁴ amanage huno zamasmine, Atretma eviho, na'ankure ama mofara ofri'neanki, amane avu mase'ne. Anagema hiazanku Agrira tusiza hu'za kiza zokago ke hunte'naze. ²⁵ Hianagi, ana vahe krerfa'ma huzmantege'za megia' vzageno'a, ana nomofo agu'afi ufrea zamo akoheno ana mofa'mofo azante azerigeno oti'ne. ²⁶ Higeno anama hiazamofa agenke'mo'a, ana kaziga vuno eno huno hezgani'ne.

Jisasi znavu asu hu'nea ne'trene, agefuna atupa
hu'nea ne' zamazeri so'e hu'nea naneke

²⁷ Ananteti Jisasi'ma nevigeno'a, znavu asu hu'nea netremoke avariri'ne nevuke kezatine, Deviti mofavre'moka kasuragiranto huke hu'na'e. ²⁸ Ana nompima Jisasi ufregeke, ana zanavu asuhu ne'tremokea Agrite e'na'e. Jisasi'a amanage huno zanagriku hu'ne, Amana zana Nagrikura eriamane hugahie hutna, tanamentintia neha'o? Higeno zanagra Agriku anage hu'na'e, Ozo Ramoka, ²⁹ anante Jisasi'a zanavuragare avako nehuno, anage hu'ne, tanamentinti'ma haku anazamo'a tanavufare fore hugahie. ³⁰ Higeno zanavurgamo'a hari hu'ne. Jisasi'a hanave zanavumro znanteno, mago vahe'mo'a atrekeno amana nanekea ontahitfa hino. ³¹ Hianagi zanagra atreke nevuke, ana nanekea ome hugantugma ana kaziga hu'na'e.

³²Hagi vu'za e'zama nehazana, mago nera havi hankaro'mo ke'a eritaganegeneno kea nosia ne' avare'za Jisasinte e'naze. ³³Ana kefo hankro'ma ahenatitregeno'a, kema nosia ne'mo'a keaga hu'ne. Mika vea krerfamo'za zamagogogu nehu'za amanage hu'naze, amanahu'zana Israeli vahe'motafina korapara fore higeta onke'nonazane, hu'za hu'naze. ³⁴Hianagi Farisi vahe'mo'za amanage hu'naze, Jisasi'ma hankaroma ahenenatiana, hankromokizmi ugagota hankromofu (Satan) hankave'afi ana nehie hu'za hu'naze.

Ne'zama eri atruhu vahe'mofu naneke

³⁵Ananteti Jisasi'a osi kumate'ene ra kumatera vano nehuno osi mono nomp'i rempi hunezmino, Anumzamofu mona kumakura mono naneke nezamasmino, mika kri eri amane hu'ne. ³⁶Ana vahe krerfama nezmageno, Jisasi'a tusiza huno asunkura huzmante'ne. Na'ankure zamagra tusi negine'za zamaza osu'are, nefa omani sipisipimo hia kna hu'naze. ³⁷Ananteti Jisasi'a amage nentaza disaipol nagaku amanage hu'ne, Ne'zamo'a hozafina anareneanagi, eri'za vahera osi'a mani'naze. ³⁸Ana hu'negu anare'nea hozamofu nefa, Ramofu nunamu hutma antahigenkeno, mago'a eri'za vahera huzmantesige'za ome hamareho.

12fu'a Aposol naga huzmantege'za vu'za e'za hu'naza naneke (Mak 3:13-19, Luk 6:12-16)

10 ¹Jisasi'a amage'ma nentaza disaipol nagara zamagi hige'za ageno, zamagrama hankro'ma ahe natinetre'za, ruzahu ruzahu krime zamagu'afi me'nea vahe'ene, krime erinesaza vahe'ma zamazeri so'e hanaza hanavea zami'ne. ²Ana 12fu'a aposol naga'mokizmi zamagi'a ama'ne, Pusana, Saimoni'e (Pita'e huza nehaze) Andru'e agri negna'e, Jemisi'e Zebeti nemofo Joni nefu'e. ³Filipiki Batolomiuki Tomasiki Matiu zamagire takesi zgo eneria nere, Jemisi Alfias ne'mofu ene, magora Tadiasi'e. ⁴Romu vahe ha' renezmantaza zaretie nehaza nagapinte nera Saimoni'e, hagi magora Judas Iskalioti Jisasima avrezmi'nea Aposolo nere.

Jisasi'a eri'za zami'nea naneke (Mak 6:7-13, Luk 9:1-6)

⁵Jisasi'a ana 12fu'a aposol nagara hunezmanteno, amanahu ke huno zamavumro ante'ne, megia vahe'mokizmi kaziga oviho, ana nehutma mago Samaria vahe kumapina u'ofreho. ⁶Hianagi vnazana, Israeli vahe'ma fnane hu'nesaza vaheteke viho. ⁷12fu'a aposol nagamota nevusutma, amana naneke hiho, Anumzamofu kumamo'a hago erava'o nehie, nehutma, ⁸kria eri amane nehutma, fri vahera zamazeri o'neti'tma, fugo namure'nea vahera zamazeri so'e nehutma, hankrora ahenatitreho.

Hankavea amane tamuanki, amane zamiho. ⁹Magore hutma kolio, silvo, kopa tmasopare kupina eri'oritfa hiho. ¹⁰Nantuma vukura tmavate kutamia e'oriho, mago'a anakrekuro, tmaga none, azompanena e'oritfa hiho. Na'ankure eriza vahe'mo'ma upama haniazana amigahie. ¹¹Osi taonifi vnazano, kumatema vnazana, haketma erifore hutma aza anampina knarera hu'neo, zamagrane maninetma, vukuma hanaza kna vugahaze. ¹²Hagi ana nompima unefresutma, tamagra musenkea huzmanteho. ¹³Kegenoa ana nOMPI vahe'mo'ma knare'ma hanagenka, karimpa fru nanekea atregeno ana nonte meno. Hianagi knarema osnagenka, karimpa fru naneke ka'a atregeno kagripi meno. ¹⁴Hanki mago'a vahe'mo'zama muse hu'za tmareontege, nanekema hanazama ontahisagetma, anankumama netresutma tmagareti kugusopa arupopo hunetretma, ana kumara atretma viho. ¹⁵Tamage hu'na neramasmue, Anumzamo'ma keagama refako huzupa, Sodomune, Gomora kumate korapa hu'neazana, agatereno ranknaza erigahie.

Hakare knaza fore hania naneke

(Mak 13:9-13, Luk 12:12-17)

¹⁶Antahiho, Nagrama humanermantoana afi kramo'za avite'za maninafi sipisipi afumo ufrea kna hu'na huneramantoe, hagi osifavemoma nehia kna hutma kva hunetma, knare antahintahi eneritma, maho namamo nehia avu'ava hutma mago havizana osiho. ¹⁷Hu'neanagi vahekura kvahiho, na'ankure kanisol vahete zamagra tamavre'za vuza keaga hunermante'za, osi mono nOMPI omermante'za sefukno tamigahaze. ¹⁸Ana nehu'za mago'ene tamavre'za Gavanane, kini vahetaminte vugahaze. Na'ankure tamagra Nagri namage'nentaza nagare. Hagi Nagri nanekea Jiu vahera nezmasamita, megi'a vahera anahu hutma zamasmio. ¹⁹Hianagi tamagrma tamavre'za vnagetma, inankna keaga hugahune hutma tamagesa ontahiho. Na'ankure nankna kema hanaza kea, anakna fatgore Anumzamo'a tmasamisnigeta hugahaze. ²⁰Na'ankure tamagra'a ana keaga osugahaze. Hagi tamagri neramafa Avamumo tamagripi efreno hugahie. ²¹Nefu'a ami'mi huno nefuna azeri frigahie, nefa'a mofavre'a anazanke hugahie, hanigeno mofavre zgamo'a, arera afana ha'rezmanteno zmahe frigahie. ²²Hakare vahe'moza Nagri nagima hesaza'zanku ha'reramantegahaze. Hianagi aza'o oti hanavetino refare'ma vanimofona agu'vazigahie. ²³Hianagi mago kumate'ma vnageno tmazanva hanagetma atretma ru kumate viho. Tamage hu'na neramasmue, Israeli kumapina vuvga ore'nesageno, Vahe'mofo Mofavrea egahie.

²⁴Amage'ma nentea disaipol nemo'a rempi huzami nera agatereno mani anagamu otreghahie. Kazokzo eriza nemo'a, kva ne'amofona agate'oreghahie. ²⁵Amne amage'a nentea ne'mo'a rempima humi ne'a knara

hugahie, hanigeno kazokzo eri'za vahe'mo'a kva ne'agna hugahie. Hagi mago nagamofu ugotama huzmante'neasia ne'kuma ugagota hankrore (Belzabul) haniana, naga'amofonena mago'ane havi zamagi zamigahie!

Vahekura kore osunka, Anumzanku kore hunto.

(Luk 12:2-7)

²⁶Zamagrikura korera osiho, hakare fraki'neazana efore hugahie, hakare'zama oku'a me'neazamo'a efore hugahie. ²⁷Nagrama hanimpima tmasamisua kea, msare zamasamiho. Hagi sumi kema tamagesafima antahisaza kea, nomoteti kezatitma hugahaze. ²⁸Tamufama tamahe fri vahekura korera osiho. Hianagi tamagu'a ahe ofrigahie. Anazanku kore'ma huntasanana, kagu'ane kavufane teve tirupima kre fanane hanimofo Anumzamofonku korera hunteho. ²⁹Tare kisave nama azeriza osi zagorera netrafi? Ana hu'neanagi, mago zanimu'a mopafina negafa avesi zampintira asgahu orami'ne. ³⁰Kanunte'ma me'nea kazokara ko miko hampri'ne. ³¹Ana hu'negu korera osuo, kagra miko kisave nama'zga zamagaterenka raza mani'nane.

Jisasi agenke huama hanuna naneke

(Luk 12:8-9)

³²Aza'o vahepi huama huno, Jisasi vahe mani'noe hanimofona, Nagra monafinka Nenfante agrira huama huna nagri vahe manine huntegahue. ³³Hianagi aza'o, Nagrama vahepi hufra kisimofona, Nagra monafinka Nenfa avurera agrira hufra kintegahue.

³⁴Nagrama e'noa zankura rimpa fruza erino ama mopafi e'ne hunka kagesa ontahio. Nagrama e'noana rimpa fruza erina ome'noe, hagi ha' kazi bainati eri'na e'noe. ³⁵Na'ankure Nagrama e'noana vahe kankamu retro hanenkeno nefana ha' rentesigeno, mofa'amo nerera ha' rentesigeno, Nenofero'a a' nenofero ha' rentesigeno, ³⁶hagi ana ne'ma ha'ma rentesazana agri'a naga'amoza otiza hara rentegahaze. ³⁷Aza'o nefano, nererama avesinte zamo'ma ra hanigeno, Nagrama avesinante zamo osima hanimo'a, Nagrama namage'ma antezantera knarera osugahie. Hanigeno aza'o ne'aguro mofa'aguma avesinte zamo'ma ra hanigeno, Nagrama avesinante zamo osima hanimo'a, Nagrama namage'ma antezantera knarera osugahie. ³⁸Hanigeno iza'o keka zafa'a erisaga huno namage ontesimo'a, Nagrama namage antezantera knare osu'ne. ³⁹Iza'o agra'a nomanizama'are asimu'a atesimo'a, asimura e'origahie. Hagi iza'o Nagrama huno nomanizama'a atesimo'a henka'a asimura erigahie.

Museza erisanaza naneke

(Mak 9:41)

⁴⁰Iza'o kagrama kavaresiana, Nagri navaregahie. Hagi aza'o Nagrama navaresimo'a, hunantegenana e'nomofu avaregahie. ⁴¹Aza'o ksanampa

ne'mofo agifi kasnampa ne' avaresimo'a, kasnampa ne'mo erisa avamente mizana erigahie. Aza'o fatgo ne'mofo agifi fatgo ne' avaresimo'a, fatgo ne'mo erisia avament mizana erigahie. ⁴²Hagi azago zasi tintafama taginka namage'ma nentaza nagapinti mago agima omane'nesi mofoma amisamoka tamagerafa hunka mizanka'a erigahane.

Joni amage nentaza naga'mo'za Jisasinte vu'naza naneke

(Luk 7:18-35)

11 ¹Jisasi'a 12fu'a amagemata nentea disaipol nagamokizmi naneke zamasma vagareteno, anantetira rankumate'ene ne'onse kumate ene mono ke nehuno, rempi huzamiku vu'ne.

²Hagi Joni'a kina nompini mani'neni, Kraisi'ma eria erizamofu ke nentahino, Joni'a agri'a amagemata nentea disaipol naga agenoka ome hutma keho huno huzamantege'za, ³vu'za Kagra avegama ante'nomokafi ru nere, hifi tagra mago'a vaheku kegahune? ⁴Ana ke nona'a Jisasi anage huno zamasma'ne. Tamagra vutma, nentahita, kaza zana Jonina ome asamiho, ⁵avu suhu vahe'mo'za kazageno, zmaga havizahu vahe'mo'za kana vazageno, fugo namuzmare'nea vahe'mo'za knare hazageno, zamagesa ankanire vahe'mo'za antahi'zageno, fri vahe'mo'za otizageno, zamunte omane vahe'mo'za knare muse ke antahi'naze. ⁶Hanki iza'o Nagrama huazankuma amentintima ataresigeno uoramisimofona, Anumzamomo asomu huzamantegahie hutma ome asamiho.

⁷Joni amagemata nentaza disaipol naga nevazageno, Jisasi'a agafa huno anampi mani'naza kevua Joninku zamasma'ne, ka'ma kopima vu'nazana na'a ome ke'naku vu'naze? Zahomo traza eri tagosi hiaza ke'naku vunazafi? ⁸Hagi na'a ome kenaku vu'naze? Mago vahe'mo marerisa kukena hu'nea kenafi? Kinimofu kumapi nemani'a vahe'mo'zage marerisa kukena eri nehankraze. ⁹Hu'neanagi na'a ome kenaku vu'naze? Mago kasnampa nepi? Tamage hu'na Nagra neramasamue, hakare kasnampa vahera zamagatereno mani'nea ne' ome ke'naze. ¹⁰Ama ana neku avontafepina amanage huno krentene, *Antahio, kema erino vu vahe'ni'a nagra huntogeno ugagota huganteno kama vanana kana varino vugahie* hu'ne. (Mal 3:1) ¹¹Tamage hu'na Nagra neramasamue, a'nemo'za kasema zamante'nafintira, mago'mo'e huno mono tima frezamante Joni knara osu'ne! Ana hianagi Anumzamomofu kumapima osi hu'nemo, anamo agrira agatere'ne. ¹²Mono ti frezamante Joni knareti eno menima eana, Anumzamomofu kumama erikura hanavetiza kazigazi hu'za ha' nehaze. ¹³Hagi miko kasnampa kene, kasegea nehazageno eno Joni knare eme atrene. ¹⁴Hagi Nagrama nehua kema antahinakuma hanutma, antahiho, Ilaija'e egahie hu'nea nera agra'a Joni'e. ¹⁵Iza'o agesama me'nenimo'a, ama nanekea antahi ankereno.

¹⁶Hianagi amagnafi mani'naza vahe kura inankna ke zamagrikura hunte'na hugahue? Amanahu kna hu'ne, maketi kumapi mofavre'zgamozza kanuzage hu'za mani'ne'za, mago'amokizmigu ke'za atigantu zami'za,

¹⁷tagra konke tafe reneramantonketa, tamagra avoa nohagaze, zavi zagame nehunketa, tamagra zavira notaze hu'za hu'naze. ¹⁸Hagi Joni'ma manino e'nea knafina, ne'zana rama'a oneno, waini tina onege'za, zamagra havi avamu agripina mani'ne hu'naze! ¹⁹Vahe'mofo mofavremo eno ne'zane tine nenege'za, zamagra anage hu'naze, keho ne'za nevganereno, aka tinte nehuno, takesi eri vahe'ene kumi vahe'mokizmi ronezame hu'naze! Ana hu'neanagi anama hu'nefina knare antahi'za, eriamu hu'ne.

Zamagu'a rukarahe osu'naza kumamoza knaza erisaza naneke
(Luk 10:13-15)

²⁰Anante Jisasi erigafa huno mago'a kaguvaza higeza ke'naza ranra kumateti vahe'mo'za zamagu'a rukarehe osaza zanku, ke ontahi vahere huno huhaviza huzamantene. ²¹Kva hiho Korasini vahe'mota! Kva hiho Bedsaita vahemota tusi nasunku huramantoe! Na'ankure kaguvazama huazama Taiane, Saidoni kumatema huasina, zamagra zamasunku kukena nehu'za, tanefa fare'za zamagu'a rukarehe ko hazasine. ²²Tamage hu'na neramasamue, Taia vahe'mo'zane, Saidon vahe'mo'za Anumzamoma vahema refakoma huknare osi'a knaza erigahazanki, tamagra rama'a knaza zamagareta erigahaze. ²³Hagi tamagra Kapanium vahe'mota monarera marerigahafi? Anara osugahaze. Tamagra fri vahe'mofo kumapi Hedes uramigahaze, Nagrama tamagripima hua kaguvaza Sodomu huasina, meninena amane mesine. ²⁴Tamage hu'na nerasmue, vahema refakohu knarera, Sodomu mopafi vahe'mo'za erisaza knazana, agateretma ra knaza erigahaze.

Jisasinte ne-enunkeno tagu'amo fru hania naneke
(Luk 10:21-22)

²⁵Ana knazupa Jisasi anage huno nunamuna hu'ne, Nenfaga monane, mopamofo Ra mni'nane, susu huna musenke hugantoe antahi'zane vahe manita, antahi ankerenone nehaza vahetera, eri frakinenka, osi mofavre'gna hu'naza vahete eri ama hu'nane. ²⁶Hagi Nafa'nimoka amanahu'zama hua zamo'a, Kagri kazeri muse nehie.

²⁷Miko'azana Nenfa nami'ne, magomo'a Nemofona antahino keno osu'neanagi, Nefake antahi'ne. Mago'mo'e huno Nefana antahino keno osu'neanagi, Nemofoke antahino keno hu'ne. Hagi Nemofoma eri averi hugahue himofo, eri averi hugahie.

²⁸Ana'ana nehuta mragu'za netinkeno, knama tamavenesinimota nagrite enkena tamazeri fru haneno. ²⁹Nagri agarenmare zafa eri kofinetma, Nagriteti rempi hiho. Na'ankure Nagra akohena nagu'a antefru hu'na nemanue. Hanigeno tamagu'amo'a fru hugahie. ³⁰Nagri agarenmare zafama eri'amo'a oza higeno, knazanima erisaga hu'amo'a, amuhu osu'ne.

Jisasi'a mni fruhu knamofu (Sabat) Rane

(Mak 2:23-28, Luk 6:1-5)

12 ¹Ana kna mni fruhu knazupagino (sabat), Jisasi'a witi hozafi nevig'e'za, Agri amage nentaza disaipol nagamo'za zmaga'atege'za witimofu rga'a taniza ne'naze. ²Hianagi Farisi vahe'mo'za, anama hazaza nezmage'za, anage hu'za asmi'naze, ko! Kagri kamage nentaza disaipol nagamo'za, kasegemo osuo hu'neaza mni fruhu knarera nehaze. ³Hianagi Jisasi'a anage huno zamasm'i'ne. Deviti ene magokama vu'naza nagamo'za zmagamatege'za hu'naza zana hampritma ontahinazo? ⁴Zamagrama Anumzamofu nompri mareriza ruotge hu'nea bretima omeri'za ne'nazana, kasegemo huno prisi vahe'moke negahie hu'nea bretia? (1 Sam-Zga 21:1-6) ⁵Hifi kagra kasegefina hamprinka onke'nano, prisi vahemo'za mni fruhu kna rufutagiza havizana nosaze? ⁶Hianagi Nagrama neramasmuana, mono noma agtere'neazana ama me'ne. ⁷Tamagrama amana kemofu agafa'ama antahiana hanutma, *Nagrma navesiana vaheku'ma asuraginte zanku navesianki, kresramna vuzankura nave'osie* hu'ne. (Hos 6:6) *Ke'a omne vahera tamagra huhaviza huozmantegahaze.* ⁸Na'ankure Vahe'mofu Mofavremo mni fruhu knamofu Rana mani'ne.

Mni fruhu knazupa aza sti'nea vahe eri so'e hu'nea naneke

(Mak 3:1-6, Luk 6:6-11)

⁹Ananteti Jisasi'a atreno osi mono nozimifi (Sinagok) vu'ne. ¹⁰Mago aza sti'nea ne' mni'negeno, zamagra Jisasi keaga hunte kanku nehake'za, Jisasina antahige'za, kasegemo'a vahera mni fruhu knazupa azeri knare huo hunefi? hazageno, ¹¹Jisasi'a zamagriku huno, amu'no tamifintira ina ne'moka sipisipi afukamo mni fruhu knarera kerifi uramisigenka avazuhu anaga otregahano? ¹²Vahe'mofu kna'amo'a inankna higeno, sipisipimofu kna'amo'a inankna hu'ne, e'ina hu'negu manifruhu (sabat) knarera vahera amne aza hugahane. ¹³Anante aza sti'nea nera anage huno asmi'ne, Kzana ru fatgo huo! Higeno azana ru fatgo higeno, mago kaziga azamo hu'neaza huno fatgo hu'ne. ¹⁴Hianagi Farisi vahe'mo'za atre'za atinerami'za, ahesaza kanku hakeza keaga huge antahige hu'naze.

Jisasi'a Anumzamofu eri'za vahe mni'nea naneke

¹⁵Jisasina ahenaku nehzageno nentahino, anampinti atreno nevig'e'za, rama'a vahe'mo'za amage avaririza nevzageno, Agra mika kri'zmia zmazeri knare hunezmanteno, ¹⁶anage huno zmasmi'ne, Agra inanka ne' mni'nefi vahera ozmasmiho huno hanavetino zmasmi'ne. ¹⁷Ama'i Aisaia kasnampa ne'mo hu'nea kemofu nena'a fore hu'ne. ¹⁸***Keho Nagri eri'za vaheni'a huhamapri ante'noana, Nagra navesi nentogeno nagu'amo muse agrikura nehie. Nagra avamu ni'a agripi ante'sugeno, agra fatgo***

zamofona huama megi'a vahete hugahie. ¹⁹*Agra fra ovazino, ranke osuno, ranke huno kampina vano osugahie.* ²⁰*Hakea erifu ottagigahie, tevemo'a tegege vazigahianagi tesura osanigeno, agra fatgo'zamo agateregahie.* ²¹*Agri agifi megi'a vahe'mo'za zmentinti'a hugahaze.* (Aisa 42:1-4)

Jisasine, havi avamu kva ne' Belsebul naneke
(Mak 3:20-30, Luk 11:14-23)

²²Anante hankro'mo agu'afi fre'nea ne'mofona avurga asu higeno kea nosia ne' avre'za Jisasinte vzageno, Agra eriknare huntogeno kea nehuno avua ke'ne. ²³Miko vahe kevumo'za antri nehu'za anage hu'naze, Agra ama Nera David nemofofi? ²⁴Hianagi Farisi vahe'mo'za ana ke nentahi'za anage hu'naze, ama ne'mo hankro'ma hunte'neana, hankro'mofo kagota kva Belsebul hanavefi hunte'ne hu'naze. ²⁵Jisasi'a antahintahizmi refako huno nezmageno anage huno zmasmi'ne, mago mago rankumapi vahe'mo'za amu'nompinti refakoma hanuza, zamagrazmi zmazeri haviza hugahaze. Hagi mago rankumamo'o, nomo o refako osnu'za hanavetigahaze. ²⁶Ana hu'neanagi Satama, Satanima humegi atesiana, agra'a ha' arentegahie. Inankna huno agri rankumamo'a megahie. ²⁷Nagrama hankromofa kva Belsebul hihamure, hankroma hunentanena, iza hihamure tmagri mofavremo'za hunentaze? E'ina agafare tmagrira refako hurmantegahie. ²⁸Hianagi Nagrama Anumzamofa hanavefi hankro'ma hunentanena, Anumzamofa kumamo'a tmagrite ko e'ne. ²⁹Inankna huno mago ne'mo'a hanave vahemofa nompina vuno miko'zama'a erigahie. Anara osuneno kota'zana ana nera azerino kina renteteno, anante noma'afi mrrerino kumzafa nese. ³⁰Nagranema omni'nenamo'za ha' Nagrira renenantaze. Hagi iza'zo Nagrane atru huza omni'namoza, fragu vaziza vuza e'za hugahaze. ³¹E'ina hu'negu Nagra amanage hu'na neramasmue. Mika azanavankene kumi'ma vahe'mozama hanazana, Anumzamofa atre zmantegahie. Hianagi Ruotge Avamumofa azanava ke huntetasana, Anumzamofa kumi zmia atre ozmantegahie. ³²Iza'o Vahe'mofo Mofavregu mago kema huhaviza hunte'sazana, Agra kumizmi'a atre zmantegahie. Hianagi iza'o Ruotge Avamumofonku huhaviza huntetasana vahera menine, henka'anena kumi zmi'a atre ozmantegahie.

Zafane rga'amofa naneke
(Luk 6:43-45)

³³Zafa azeri knare hanankeno, knare rga'a regahie. Hagi havi zafama azeri haviza hanankeno'a, rgamo'enena haviza hugahie. Na'ankure rgare negenka zafamofona ke'ankeregahane. ³⁴Tamagra ha' osifave'mofo mofavre kevu mni'naze, havizama nehana vahe'moka,

inankna hunka knare'zana hugahano? Na'ankure krimpafi me'nea kea kagi'mo nehie. ³⁵Knare vahe'mo'a knare'zama rimpafi erinte'neaza, agimo'a eriamana nehie. Havi vahemo'a havizama rimpafi erinte'nea agi'mo'a eriamana nehie. ³⁶Hianagi Nagra amanage hu'na nermasmue, Anumzamo'ma vahe'ma refakoma huknarera, miko'a havigema nehaza kere, tamagenoka huzmante'gahie. ³⁷Naneke hunante fatgo hu'nane huno refako hugantegahie. Naneke hunenante haviza hu'nane huno refako hugantegahie.

Avame'za Jonante fore hu'nea naneke

³⁸Anante mago'a kasegere ugagota hu'naza vahe ene Farisi vahe'mo'za anage hu'za asmi'naze, Rempi Hurami ne'moka, mago avame'za Kagra hananketa kesunegu nehune. ³⁹Hianagi Jisasi'a kenona anage huno zmasmi'ne, ama knafi vahe'mo'za kefoza nehu'za zmentinti nosaza vahe'mo'za avame'za kenaku nehazanagi, mago avame'zana onkegahaze, kasnampa ne' Jona avame'zanke kegahaze. (Jona 1:17) ⁴⁰Anahu kna huno, *Jona tagufa zgegi tagufa haninki huno nozamemofo rimpafi mase'neankna huno* Vahe'mofo Mofavremo tagufa zgegi, tagufa haninki huno mopa agu'afi masegahie. ⁴¹Ninive vahe'mo'za Anumzamoma refakoma hania knarera, ama knafi vahe ene magoka oti'za, keaga hurmantegahaze. Na'ankure Jona'ma huama hia kere zmagu'a rukrahe hu'naze. Hagi keho Jonama agatere'neana ama'ne. ⁴²Hanki Seva'a sauti kazigati kuini a'mo Anumzamo'ma refakoma hania knarera otino, ama knafi vahe'motma keaga hurmantegahie. Na'ankure afete moparegati eno Solomoni knare antahintahi antahinaku e'ne. Sagi ko, Solomonima agtere'neazana ama me'ne.

Havi avamu'mo ete rukrahe huno nea naneke

(Luk 11:24-26)

⁴³Hagi havi avamu'mo, vahema atreno vuno, noma manisia kumaku hagege kokampi ome hakeana kefore osu'ne. ⁴⁴Ana huteno anage hu'ne, ko'ma mni'nena atre'na e'nofi umanisue nehuno, eno eme keana hrafi huno eri antefatgo hu'negeneno ke'ne. ⁴⁵Eteno vuno 7ni'a havi avamu tmimo'ma agri'ma agtere'nea ome zmavreno ege'za ufre'za mni'naze. Henkama mni'nea mni'zamo'a, pusama mni'nea mni'zana agtereno havi zantfa hu'ne. E'inahu avu'avaza ama knafi havi zmavu'zmava nehaza vahetera fore hugahie.

Jisasi nererane agnahe'i naneke

⁴⁶Jisasi'a ana naneke atru hu'naza vahe kevumokizmi nezmasmige'za, Nerera ene agnahe'za Agri'ene keaga hunaku megia emani'naze. ⁴⁷Mago'a vahe'mo Agrira asmino, negrera'ene kagnahe'za Kagrane keaga hunaku

megi'a emani'naze higeno, ⁴⁸ anama asmi'mofonku anage huno asmi'ne, Nagri nenrera ene nagnahe'za izaza mni'naze? ⁴⁹ Ana nehuno amage nentaza disaipol naga'a mni'narega azanu zmerino anage hu'ne. Ko, nenrera ene naganaha'za ama mni'naze. ⁵⁰ Iza'o monafi mni'nea Nenfa avesizama amage'ma antesimo'a, agra nenagna'ene nensarozane, nenreraza mni'naze.

Hozafi avimza atre'nea fronka naneke

(Mak 4:1-9, Luk 8:4-8)

13 ¹ Ana knareke Jisasi'a nompinti atreno vuno, tiru ankenare umani'ne. ² Rama'a vahe'mo'za mni'nere umani korve hzageno, osi botifi mrerino umanige'za, rama'a vahe'mo'za tiru ankenare otinaze. ³ Rama'a fronka kea anage huno zmasmi'ne. Antahiho hoza kri ne'mo'a avimza krinaku vu'ne. ⁴ Ana'ma huno avimzama negrigeno'a, mago'a avimzamo'a ka ankinafi evuramigeno, nma zgamo eno eme ne'ne. ⁵ Mago'a avimzamo'a havege huno osi'a mopa me'nefi evurami'ne. Na'ankure osi'a mopa me'negeno, ame huno hageno mrerine. ⁶ Hianagi zgemo hanatino mrerino temagi atre'ne, na'ankure rafu'namo krakaka kigeno, zgemo te osapare'ne. ⁷ Hagi mago'amo ave'ave trazampi evurmigeno, ana ave'ave trazamo hageno rentrako higeno haviza hu'ne. ⁸ Hu'neanagi mago'amo'a knare mopafi evurmino ne'za rente'ne. Mago'amo'a 100ti'a rentegenog, mago'amo'a 60ti'a rentegenog, mago'amo'a 30ti'a rente'ne. ⁹ Iza'o agesama me'neniana, ama kea antahise hino.

Fronka kema zmasmi'nea kemofog agafa naneke

(Mak 4:10-12, Luk 8:9-10)

¹⁰ Agri'ma amage'ma nentaza disaipol nagamo'za Jisasinte e'za anage hu'za antahige'naze, nahigenka fronka kefintikera nezmami'ne? ¹¹ Jisasi'a ke nona huno, Anumzamofog kumapi oku'a me'nea zantmina kehogut tamaveri nehie. Hianagi zamagrira zmeri nosie. ¹² Iza'o mago'azama eri nenimofona, mago'ene ami'nigeno, agra eri avitegahie. Iza'o e'ori nenimofona, mago'a zama eri'neniana hanregahie. ¹³ Ama'na agafare, Nagra fronka kefintira nezmasmue. *Na'ankure zamagra negazanagi keso'e osugahaze, antahigahazanagi antahi so'e hu'za amara osugahaze.* ¹⁴ E'inama hu'naza'zamo'a kasnampa ne' Aisaia hu'nea nanekemo'a avufa'a fore nehuno anage hu'ne, *Tamagra antahigahazanagi, amara osugahaze. Tamagra kegahazanagi, keanke oregahaze.* ¹⁵ *Na'ankure vahe'mokizmi zmarimpamo hanavetino anaki'ne. Higeno zmagesareti'ma kema antahizamo'a amuhog hunezmantege'za zmua asu'nekiza, zmurgaretira zamua onke'za, zmagesa nontahiza, zamagu'aretira amara nosazankiza, zmagu'a rukrehera osnagena, Nagra zmaza osugahue.* (Aisa 6:9-10)

¹⁶ Hianagi tamagra ketama antahitma hazazante Anumzamog asomug hunermante. Na'ankure tamavua negeta tamagesamo'a nentahie.

17 Tamage hu'na neramasmue, korapa rama'a kasnampa vahe'mo'zane, fatgo vahe'mo'za amama negaza'za kenaku hu'nazanagi onke'za, nentahizankea, antahinaku hu'nazagi ontahi'naze.

Avimzama ase'nea fronka kemofo agafa'e

(Mak 4:13-20, Luk 8:11-15)

18 Antahiho, Avimza ase'nea fronka kemofo agu'agesa'a, ama'ne, 19 Mago'a vahe'mo'za Anumzamofu kumamofu knare naneke nentahi'za, antahi ama osaza nagamofona, Sata eno rimpafi me'nea ke emeri atre'ne. Amana hu'ne, kamofu ankinafi avimza kri'nea kna hu'ne. 20 Mago avimzamofu have mopafi evurami'neana, amanahu kna vaheku hu'noe. Anumzamofu naneke nentahino, ame'ama huno muse hu'ne. 21 Ana hianagi rafu'na uorminegeno, osi'a knafi mni'negeno ana nanekemofonte rehe'za egeno'a, ana nanekea ame huno atreno traka nehie. 22 Hagi ave'ave trazampi evu rmi'nea avimazana anahu kna hu'ne, Anumzamofu kea antahiteno, ama mopafi afufenoku agesa nentahigeno, ana zamo avazu higeno Anumzamofu kemo'a nena rga'a reonte'ne. 23 Hianagi so'e mopafi kri'nea avimza avimo'a, amanahu vaheku hu'noe, naneke nentahino ana nanenkemofu agu'agesa'a ama nehuno, nena rga'a renteno mago'amo'a 100ti'a rentegenofu, mago'amo 60ti'a rentegenofu, mago'amo 30ti'a rente'ne.

Hozafi za'araza tgi'nea fronka naneke

24 Jisasi'a anage huno mago'ene fronka ke zmasmi'ne, Anumzamofu kumamo'a mago ne'mo hoza'afi knare avimza aseankna hu'ne. 25 Hianagi avimaza aseteno umasenegeno, ha' vahe'amo havi traza'mofu avi ana witi hozafi eme neseno vu'ne. 26 Hianagi witimo hageno rga ome renentegenofu, havi trazamo enena hage ama hu'ne. 27 Nena nehigeno kazokzo eri'za vahe'amo'za e'za, hoza nefana antahige'za, ramoka kagra knare avimzanke hoza ka'afina kri'nampi? Inankna huno havi trazana hage'ne? hu'za antahige'naze. 28 Hoza nefa'a anage huno zmasmi'ne, Ha' vahetimo anara hu'ne! huno hige'za, kazokzo eri'za vahe'mo'za anage hu'za asmi'naze, knare tatresanketa ome zanegi atregahumpi? hu'za antahige'naze. 29 Hianagi hoza nefa'a anage huno zmasmi'ne, A'o tra'za zanafisafina witine zanefigahazanki atrenkeno me'nenofu. 30 Atrenkeno magoka tarega moke hage'ne hoza hamare knare uhnati'o, hozama hamareknare, hoza hamaresaza vahera nagra zamasmigahue. Kotazana havi traza zanegita nofi anakita tevefi kresigu eri atru hiho. Hianagi witi eri atru hutma nezama ante noni'afi eri antegahaze huno zmasami'ne.

Masteti zafamofu fronka naneke

(Mak 4:30-32, Luk 13:18-19)

31 Jisasi'a anage huno mago'ene fronka ke zmasmi'ne, Anumzamofu kumamo'a masteti zafa rgamofu avima'agna hu'neankino, vahe'mo erino

hoza'afi negrie. ³²Mago'a zafa avigna osu'neanki onensa avima'a me'ne. Hianagi ana osi zafamo'a ra huno mago'a hozafima me'nea zantamina agteregeni zafa segeno, *Nma'zgamu eno azankunate no emegino amu ante'ne.* (Ezi 31:3-14)

Zistimofu fronka naneke

(Luk 13:20-21)

³³Jisasi'a anage huno mago'ene fronka ke zmasmi'ne, mona kumamo'a amanahu hu'ne, mago'mo yisti erino wifiti herafiteno kregeno ra hiankna hu'ne.

Fronka kemofo agafa'a eriamu hu'nea naneke

(Mak 4:33-34)

³⁴Jisasi'ma maka kema vea kevufi hu'neana fronka kege zamasmu'ne. Hagi Agra amate kea ozmasmi'ne. ³⁵Amanage huno kasnampa ke hu'nea kemofo avufa'a fore hu'ne, *Nagra fronka kefintike kea hugahue. Nagra monane mopa fore osu'nereti'ma eno menima ama knare'ma e'neana, oku'a me'nea kea eri ama hugahue.* (Sam-Zga 78:2)

Za'arazama hozafima hage'nea fronka kemofo agafa'e

³⁶Ana huteno ana vahe kevua, zmatreno nompri ufure'ne. Agri'ma amage'ma nentaza disaipol nagamo'za Agrite e'za, anage hu'za asmi'naze, hozafi hage'nea havi trazamofu agu'agesa'a tasmio. ³⁷Jisasi'a anage huno zmasmi'ne, knare avimza ase'nea nera, Vahe'mofu Mofavre. ³⁸Hagi hoza, ama mope, knare avimzana, Anumzamofu mofavrerimine, havi trazana, Sata mofavreramine. ³⁹Hagi ha' vahe'mo havi traza kri'neana Sata'e. Hozama hamre kna, mopa vgare kne, hoza hamare vahera, ankeru vahezge. ⁴⁰Havi traza eri tru hu'za tevereti kre'nazana anahu hu'ne, vgaresia knarera tevefi kregahie. ⁴¹Ana knarera Vahe'mofu mofavremo'a ankeru vahe'a huzmantesigenu, kumi'ma nehu'za vahe'mokizmia zmazeri kumipima nentaza vahera, Agra'a kumapintira zmazeri megri atregahie. ⁴²Zmazeri mate vnige'za amuhu tevefi mni'ne'za zavira nete'za, zmavera ani kreki hugahaze. ⁴³Anamu hanige'za fatgo vahe'mo'za nezmafumu kumapina zgemo remsa hiankna hu'za manigahaze. Iza'o agesamu me'nenigenu'a, amu naneke antahise hino. (Dan 12:3)

Anumzamofu Kumamofu fronka naneke

⁴⁴Mona kumamo'a, zgo'amo mreri'neaza hozafi frakiankna hu'negenu, mago'mo ome kenu eri fore hutenu, ete eri franekino, musezamu higeno viazamu miko zama'a zgore ome atre vgareteno, amu mopa ome mi'za hu'ne.

Mizamamo mreri'nea zamofu fronka naneke

⁴⁵Mago'ene mona kumamo'a, fenu ne'mo knare kintna me'negenu hakrea kna nehie. ⁴⁶Zgo'amo mreri'nea kintna mago hakenu eri fore'ma

huteno'a, ete vuno miko zama'a mizante ome atreno zgo erino, ana kintna ome mizase'ne.

Noza kukomofu fronka naneke

⁴⁷Mago'ene mona kumamo'a, noza kuko timpi atreno rama'a ruzahu ruzahu nozame azeriankna hu'ne. ⁴⁸Hagi avi'matetegenoa avazu hu'za ksepampi atre'za, knare nozame eri'za zompafi ante'naze. Hianagi havi'za hu'nea nozame'a matevu atre'naze. ⁴⁹Anahu kna huno mona mopa vgare knarera ankeromo'za e'za fatgo vahe amu'nompinti ke ontahi vahera eme zmare'za, ⁵⁰tevefi matevu'za zmatresigeno ana kumapina zavi nete'za, zmavera ani kreki hugahaze.

⁵¹Tamagra maka kema huana antahi ama nehazafi? Kenona'a anage hu'za Jisasina asmi'naze, izo. ⁵²Jisasi'a anage huno zmasmi'ne, e'ina hu'negu miko kasegere ugagota hu'naza vahe'mo'za mona kumamofonku e'ina hugahaze hu'za hunezmasamiza vahe'mo'za, nomofu nafa'amo noma'afi ufreno korapa fenozane, ksefa fenozama'a erino atineramia kna nehie.

Jisasina kuma'are vahe'mo'za zmagena humi'naza naneke

⁵³Ana fronka kea Jisasi'a zamasmigareteno, ana kuma atreno, ⁵⁴Agra kuma agafa'are Nazareti eno osi mono nompinti eme rempi hunezmagi'za, antri hu'za anage hu'naze, ama ne'mo'a knare antahi'zane, kaguvaza eriforehu hankavea igati erine? ⁵⁵Ama kapenta ne'mofo mofavrefi? Nererankura Maria'e nehazafi? Agnahe'za Jemsi ene Josefe ene Simioni ene Judasizafi? ⁵⁶Hagi asarahe'za tagrane omni'nazafi? Inaregati ama ne'mo'a maka'zana eri'ne. ⁵⁷Nehu'za antahi haviza hunentageno, Jisasi anage huno zmasmi'ne, kasnampa vahe'mofona Agri kumate vahe'mo'zane, maka naga amo'za ra agi nomize. ⁵⁸Ana hu'neankino rama'a kaguvazana amafina osugahie. Na'ankure zmagra zamentintia nosaze.

Joni ananke akafrigeno fri'nea naneke

(Mak 6:14-29, Luk 9:7-9)

14 ¹Ana knafina Heroti'a Galili kumate kota kva ne'mo, Jisasi agenke antahiteno, ²eri'za vahe'a zmasmi'no, e'i mono ti frente Joni frinefinti otine, e'ina hu'negu kaguvaza hu hanavea agripina me'ne. ³Hagi Heroti'a, Jonina azerino kina nompinti ki rente'ne. Na'ankure nefu Filipi a' Herotias eri'neazanktekure. ⁴Na'ankure Joni'a anage huno asmi'ne, negafu a'ma rehanre'nanana tra kea hantaginane. ⁵Ana higeno Heroti'a ahe frinaku hianagi, rama'a vahe kevu mni'nageno kore hu'ne. Na'ankure Jonina mago kasnampa ne' mni'ne hu'za kente'naze. ⁶Hianagi Herotima ksente kna egeno, Herodias mofa'mo zmuga avo eme reazamo,

Herotina tusiza huno azeri muse higeno, ⁷tusi'za huno avesinteno, agra hanave ke huno huvempa huno, na'anku'ma nantahigenanke'na amne kamigahue huno asmi'ne. ⁸Nerera'ma amia antahizante ana mofa'mo huno, mono ti frente Joni agenopa kitaginka zompafi eme namio. ⁹Kini ne'mo'a kamigahue hu'nea kegura keke hianagi, nezama nenaza vahe'mokizmi zmufi huvempa hu'negu, amigahaze huno huzmantene. ¹⁰Agra mago'mofo huntegeno kina nompfi vigeno, sondia vahe'mo'za Joni agenopa akafri amizageno, ¹¹aseni'a tafepi erinteno, ana mofa'mofo eme amigeno, erino vuno nerera ome ami'ne. ¹²Anante Joni amage nentaza disaipol vahe'amo'za e'za avufa'a emeriza, ome asentete'za vu'za Jisasina ana kea ome asmi'naze.

Jisasi 5 tauseni'a vahe ne'za zami'nea naneke

(Mak 6:30-44, Luk 9:10-17, Jon 6:1-14)

¹³Heroti'ma Joni ahe'nea naneke Jisasi'a nentahino ana kuma atreno vahe omni'nea ka'ma mopare agrake votifi mrrerino vu'ne. Vige'za hakare vea'mo'za nentahi'za maka kumateti eri hantge'za avariri'za mopafi vu'naze. ¹⁴Vu'za uhnatizageno, Jisasi'a botifinti takaunereno keana hakare vea nezmageno tusi'za huno asunku hunezmanteno kri eri'namokizmi zmazeri so'e hu'ne. ¹⁵Kinaga sege'za, amage nentaza disaipol nagamo'za Jisasinte e'za anage hu'naze, ama vahe omni ka'ma kopi mni'nonkeno, hago hani hu'za nehianki, ama vahe'zga huzmantege'za kumatega vu'za, zmagra'a nesaza ne'zana ome miza seho. ¹⁶Hianagi Jisasi'a anage huno zmasmi'ne, Zamagra ovugahazanki nezanku keta zminke'za neho! ¹⁷Hige'za, zamagra anage hu'za Jisasina asmi'naze, 5fu'a Bretigi, tare nozaki huta ama eri'none hazageno, ¹⁸erita eme namiho, huno hige'za eri'za eme ami'naze. ¹⁹Ana vahetmina apenate maniho huno nezmasmino, ana 5fu'a Bretine, tare nozara erino, monafi ke'nagamuteno negeno, asomu ke huno susu huteno, breti'a korino amage'ma nentaza disaipol naga zamige'za, ana vahetmina zami'ne. ²⁰Makamo'za ana neza nageno zamu hu'ne. Nege'za atrazama'a zogiza 12fu'a ekaeka kupi zogiri avitente'naze. ²¹5 tauseni'a vahe nazamo'za ne'naze, hagi a'nene mofavre'zga ohampri'naze.

Jisasi ti avozare vu'nea naneke

(Mak 6:45-52, Jon 6:15-21)

²²Amage'ma nentaza disaipol naga ame huno huzmanteno, ko botifi mrreritma kantu kaziga viho nehuno, anampima mani'naza vahekrerfa huzmantege'za vu'za e'za hu'naze. ²³Ana veara huzmantege'za vutageno, Agra agonarega nunamu hunaku mrrerino umani'negeno, kinagasegeno Agra'ake anante mni'ne. ²⁴Anama nehigeno, amage'ma nentaza disaipol nagamo'za ti amu'nompfi nevzageno, hanave zahoko atigeno timo'a kranto kranto huno boti'a erirukrahe

hu'za hu'ne. ²⁵Ana nehigeno kotu afa'za nentegeno, Jisasi'a ana ti avozare ne-egeno, ²⁶amage'ma nentaza disaipol nagamo'za negageno ti avozare ne-ege'za tusi koro nehu'za, amanu hankrore nehu'za koro hu'za krafa hu'naze. ²⁷Hianagi ame huno Jisasi'a anage huno zmasmi'ne, akoheta manihō, ama Nagre, huno higeno, ²⁸Pita'a anage huno asmi'ne, Ramoka Kagrama mni'nenunka, eno hunka huge'na kagritega va'nenō. ²⁹Higeno Knareki eno! higeno Pita'a botifinti uramino ti avozare Jisasintega vu'ne. ³⁰Hianagi tusi'a zaho enerigeno nevfinti koro huno, ana timpi uneramino kezatino, Ramoka nazahuo! ³¹Higeno Jisasi'a ame huno azana ante'gantu ateno avazu nehuno, anage huno asmi'ne, kagra osi kamentinti hane, Na'a higenka tare kagu kagesa nentahi'ne? huteno, ³²Ana botifi marerigeno, zaho'mo amane hu'ne. ³³Ana botifi mni'namo'za mono hunente'za, tamage Kagra Anumzamofō mofavre mni'nane hu'za hu'naze.

(Mak 6:53-56)

³⁴Ana timofō kantu kaziga ankenare, Kenesareti mopare vu'naze. ³⁵Ana kumate vahe'mo'za Jisasi e'ne kema nentahiza, kea huzmantageno ana kumamofō tva'onte me'nea kumapi vahe'mo'za kri eri'naza vahera zmavare'za Jisasinte e'naze. ³⁶Kri vahe'mo'za Jisasinku muse hugantonanki tatregeta kena atupaka'are avako hamneno, nehu'za avako hzamokizmi krizamimo'a vgre'ne.

Vahe'mofō kasege ruhantagi'nea naneke

(Mak 7:1-13)

15 ¹Anante mago'a Farisi vahe'ene kasegere ugagota hu'naza vahe'mo'za Jerusaleti, Jisasinte e'za anage hu'za asmi'naze. ²Na'a hige'za kamage nentaza disaipol nagamo'za tagehe'i avu'ava zana ruhanentagize? Na'ankure zmazana sese osu ne'zana ne'naze. ³Jisasi'a ana ke nona'a, amanage huno zmasmi'ne, nahigeta tamagra tamagehe'i avu'ava avriri zankuke nehutma, Anumzamofō kasegea rufunetage? ⁴Na'ankure, Anumzamō'a anage hu'ne, *Negfane, negrera ke amage antenka agi erisaga huo, iza'o nererane, nefane huhaviza huntessimofona ahe friho* hu'ne. ⁵Hianagi tamagra anage nehaze, iza'o nererano nefanku huno, kzahu'za ante'noa zana Anumzamofō ami'none haniana, ⁶agra nererano nefana antahi ominō amagera nonte. Hagi anama nehutma Anumzamofō kea, nermageho avu'avakuke nehutma retufe netraze. ⁷Tamagra tavre vahere, Aisaia'ma kasnampa kema hunte'neana tmagriku tamage hu'ne, ⁸*Ama vahe'mo'za amega zmagiteti Nagia erisaga nehaze. Hianagi nagritetira zamagu'amo'a afete'are me'ne* ⁹Hianagi nena' omne mono hunenante'za, *rempima hazana vahe'mofō keage nehaze.* (Aisa 29:13)

Vahe'mokizmi zmazeri haviza nehia zamofō naneke

(Mak 7:14-23)

¹⁰Jisasi'a vahe kevu kehutru huteno anage hu'ne, Antahi ankeretma antahi ama hiho. ¹¹Vahe'mo'za zmagipima nazazamo'a zmazeri haviza

nosie. Hianagi agipinti' ma atiramia zamo zmagu'a zmazeri haviza nehie. ¹²Anante amage nentaza disaipol nagamo'za e'za, anage hu'za asmi'naze, Farisi vahe'mo'za kema hana antahite'za zmarimpama ahegade'nazana Kagra antahi'nano? ¹³Hianagi Jisasi'a ke nona'a amanage huno zmasmi'ne, maka'zama Nagri Nenfama onkri'neana, mika zanefti tregahie. ¹⁴Zmatrenke'za, zamu suhu kva vahe'mo'za, zamusuhu vahera kana zameri'za viho. Na'ankure zamavu suhu vahe'mo'za, zamavu suhu vahera kana zmeri'za vnazana, taregamoke kerifi uramigaha'e. ¹⁵Pita'a amanage huno hu'ne, ana fronka kemofa agafa'a eriamu hugeta antahi maneno higeno, ¹⁶Jisasi'a amanage huno hu'ne, tamaganena antahi so'e osu'neta nehazafi? ¹⁷Tamagipima nageno tamarimpafi uneramigeta arifama neraza'zana ontahi'nazo? ¹⁸Hianagi agipinti atiramia zamo'a agu'afinti neankino azeri haviza nehie. ¹⁹Na'ankure agu'afinti havi antahintahizane, vahe ahe fri'zane, monko'zane, arave osu'nenono monko'za hu'zane, kumzafa sezane, havigegu eri tamage hu'zama, knare vahe'mofa huhaviza hunte'zana ne-e. ²⁰Ama'na zantamimo vahera zmazeri haviza nehie. Hianagi azama sese osu'nenono ne'za nezamo'a, vahera azeri havizana nosie.

Megi'a a'mo Jisasinte amentinti hu'nea naneke

(Mak 7:24-30)

²¹Jisasi ana kumara atreno, Taiane Saito kaziga kumate vigeno, ²²mago Kenaniti a'mo eno ranke huno kezatino, kasunku hunanto Ramoka, Deviti nemofoga, mofanimofona havi hankro'mo agu'afi fre'negenono tusi haviza hu'ne. ²³Hianagi Jisasi ana a'mofa kenona osu'ne. Agri amage nentaza disaipol nagamo'za e'za anage hu'za asmi'naze. Muse hugantonanki huntengeno vino, na'ankure agra tusi kereso nehianki huntengeno vino. ²⁴Hianagi Agra amanage huno kea hu'ne, Nagri'ma hunante'neana Israel vahe'ma fnane hu'naza sipisipiguke huno hunante'ne. ²⁵Hianagi ana a'mo eno avuga kepri huno amanage hu'ne, Ramoka Kagra naza huo! ²⁶Higeno Agra ana ke nona anage hu'ne, Mofavre bretima eri'na matevu'na kra ramimofa ami'zamo'a knarera osu'ne. ²⁷Hu'neanagi ana a'mo anage hu'ne, ize Ramoka, hianagi ana kramoza rama'amofa itareti ankra heramiamu'a nenaze. ²⁸Anante Jisasi ana a'ku anage huno asmi'ne, A'moka, Kagri kmentintimo'a ra krefahie, kagrima kavesinia kante anazana fore hugahie. Higeno, ame huno ana mofa'amofa krimo'a atrente'ne.

Jisasi hakare kri vahe zmazeri so'e hu'nea naneke

²⁹Ana kuma atreno Jisasi'a Galili tinkenarega vuno, agonarega umrerino anantega umani'ne. ³⁰Rama'a vahe'mo'za anantega Agrite ne'eza, zmagia zmaza sti'nea vahe'ene, zmagia haviza hu'nea vahe'ene, zmu suhu'nea vahe'ene,

zmaza haviza hu'nea vahe'ene, zmagefuna atupa hu'nea vahe'ene, mago'a ruga'a vahe'ene zmare'za Jisasi agafi eme zmantageno zmazeri so'e hu'ne. ³¹ Tusi'a zmanogu nehu'za antri hu'naze. Kageno agefuna atupahu vahe'mo ke nehigeno zmaza haviza hu'nea vahe'mo'za knare nehzageno agia havizahu vahe'mo otino nevigeno, zamavu asuhu vahe'mo'za zmvua negage'za, Israeli vahe'mokizmi Anumzamofu agi zmagra hesga hu'naze.

Jisasi'a 4 tauseni'a vahe ne'za zmi'nea naneke

(Mak 8:1-10)

³² Jisasi'a amage nentaza disaipol naga'a ke huno anage huno zmasmi'ne, Nagra ama vahe taminkura nasunku huzmantoe, na'ankure zmagra tgufa kna Nagranena mni'nageno nezama nesazazana omne'ne. Nagra huzmantesugeno zmaga ene vuzankura navenosie. Na'ankure kantega nevu'za zamavu evu evu hanige'za traka ome hugahaze. ³³ Amage'ma nentaza disaipol nagamo'za anage hu'za Agriku hu'naze, inantegati rama'a Bretia erita ama tusi vahe krerfa zmisunke'za, ama vahe omni kokampina erignare hugahaze? ³⁴ Jisasi'a anage huno zmasmi'ne, nama'a breti tamagra eri'naze? Hige'za zmagra anage hu'naze, 7ni'a Bretigi, mago'a osi nozame. ³⁵ Vea kevu huzmantege'za mopafi mni'naze. ³⁶ Manitageno ana 7ni'a Bretine noza'ene erino Anumzamofu susu hunteteno, tmanasino amage nentaza disaipol naga'a zmige'za eri'za ana vea kevu zmi'naze. ³⁷ Ana hige'za maka vahe'mo'za ana neza nazageno zmu hutege'za, atrazama'a eri atru hu'za 7ni'a ekaeka ku eri avite'naze. ³⁸ Hagi ana nezama ne'nazana 4tauseni'a vene'nenazamo'za ne'naze, anampina a'ene, mofavre'ramina ohampri'naze. ³⁹ Hagi ananteti Jisasi'a, ana tusi'a vea kevu huzmantege'za nozimirega vu'za e'za nehzageno, botifi mrrerino Magatania kaziga vu'ne.

Farisi vahe'mo'za Jisasi reheza ke'naza naneke

(Mak 8:11-13, Luk 12:54-56)

16 ¹ Anante Farisi vahe'ene Satusi vahe'mo'za Jisasinte e'za, monafinti avame'za huraveri huo hu'za rehe'za ke'naze. ² Hianagi Agra anage huno zamasami'ne, kinagamasegeno korimpe'nare kamupseko atigeta, okina zo'ego tugahie nehaze. ³ Hagi nanterama monare kamupse ko netigeta negetma, zaho ko atugahie nehazageno, zaho kora netie. Menina monare fore'ma hiazana refako hutma negazanagi, ama knafima fore'ma hiazana refako hutma nonkazo? ⁴ Ama knafi havi tamutma ene tamentinti netraza veamotma avame'zanku nantahi negazanagi, mago avame'za eri fore ha'nena onkegahzanki, kasnampa ne Jonama hu'nea avame'zanke kegahaze. (Jona 1:17-2:10)

Farisine Satusi vahe'mokizmine zamuzma'zamofu fronka naneke

(Mak 8:14-21)

⁵ Hianagi amage nentaza disaipol naga'amo'za tirumofu kantu kaziga ankenare unehanati'za, zmage'akani'za breti e'ori' e'naze. ⁶ Kvahiho Farisi

vahe'ene Sadusi vahe'mokizmi yistigura huno Jisasi'a zmasmi'ne. ⁷Anage hige'za, zamagra'zmi hugantu kma huza bretima e'orima onazanteku nehie hu'naze. ⁸Jisasi antahino keno nehuno, Agra anage hu'ne, Kagra izago osi'a kamentinti nehnamoka! Amu'no tamifi bretima e'ori'naza zankura nahigeta ke hakare nehaze? ⁹Tamagrira tamage'akninefi? 5efu'a bretima, 5 tauseni'a vahe'mo'za ne'nazageno, nama'a nege'atrege hu'nazama'a eka eka kupina erivite'naze? ¹⁰Hifi 7ni'a bretiretima 4 tauseni'a veamo'za nene'za zamu'ma hiama'a, eka eka kutamimpima eriri avite'nazana tamagra antahi'nazo? ¹¹Inankna huta keta antahita nosaze, Nagra bretigura nosue? Hianagi Farisi vahe'ene Sadusi vahe'mokizmi zistigura kva hiho. ¹²Anante zmagesa antahi ama nehu'za, bretifi nentageno zonerea zistigu kva hiho nosie. Hianagi Farisine Sadusi vahe'mo'za rempima hunemiza zanku kva hiho nehie.

Pita'a Jisasinku huama hu'nea naneke

(Mak 8:27-30, Luk 9:18-21)

¹³Ananteti Jisasi'ma eno Sisaria Filipai kumate enehnatinno, anage huno amage'ma nentaza disaipol naga zmasmi'ne, iza'e hu'za Vahe'mofo mofavregura nehaze? ¹⁴Zamagra ana kenona anage hu'za asmi'naze, mago'amo'za mono ti frezmante Joni'e nehaze, ruga'amo'za Ilaija'e nehaze, mago'amoza Jeremaiapi nehazageno, mago'amo'za kasnampa nere hu'za nehaze. ¹⁵Jisasi'a amanage huno zmantahige'ne, hu'neanagi tamagra iza'e, huta Nagrikura nehaze? ¹⁶Saimoni Pita'a kenona'a anage hu'ne, kagra Kraisige, ksefa huno mni'nea Anumzamofu mofavre mni'nane. ¹⁷Jisasi'a anage huno asmi'ne, Saimoniga, Jona nemofoga, asomu hugantesie. Na'ankure vahe'mo amazana erigaveri nosie. Hu'neanagi Nenfa monafi mni'nemo erigaveri nehie. ¹⁸Nagra anage hu'na negasmue, kagra Pitage, hanki'na ama ana havere, mono noni'a ki'nugeno, fri'zamofu hanavemo'a azeri agete'oregahie. ¹⁹Nagra mona kumapi kinofitmina kamigahue. Kagrama ama mopafi na'ano anakisanana, monafina anakigahie. Na'ano mopafi'ma atresana zana, monafina atregahie. ²⁰Anante amage nentaza disaipol naga'agu, Kraisi'e hutma vahera ozmasmiho huno zmasmi'ne.

Friteno otisiazamonku Jisasi'a pusante hu'nea naneke

(Mak 8:31-9:1, Luk 9:22-27)

²¹Ana knareti'ma e'neana, Jisasi'a amage nentaza disaipol naga'a agafa huno zmasamino, Agrama Jerusale vanige'za, mono kva (elda) vahe'mo'zane, ugapota prisi vahe'mo'zane, kasegere ugota hu'naza vahe'mo'za, rama'a zampi azeri haviza nehu'za ahe frisageno tagufa knarera otigahie, huno zmasami'ne. ²²Pita'a, Jisasi avare rure anteno, agafa huno anage huno kesu'ne, O'e Ranimoke! E'ina hu'zana

Anumzamo'a atresigeno, Kagritera forera osugahie! ²³Hianagi Jisasi'a rukrahe huno Pitankura anage hu'ne, maniganenka namefi evuo Sataga! Nagri kana rehiza nehane, na'ankure kagra Anumzamofa antahintahi e'norine, vahe'mofa antahi'za e'nerine.

²⁴Anante Jisasi'a amage nentaza disaipol naga'agu zmasamino, mago vahemo Nagri namage antenaku hanuno'a, agra'a avesizana, atreteno rugeka zafa'a erino namage eno. ²⁵Na'ankure asimu'a eriso'e hunakure hanimoa'a, asimu'a atregahie. Hianagi iza'o Nagriku huno asimu'a atresimo'a asimu'a erigahie. ²⁶Mago'mo mika mopafiza eri tru nehuno, agra'a agu amema atre'siana, na'a azahu'za erigahie? Hifi agu amemofa nona huno na'a amigahie? ²⁷Vahe'mofa mofavremo ankeri tmima'ane, Nfa'amofa hanavefi esuno'a, Agra magoke magoke'moma hu'nenia avu'avate anteno mizana amigahie. ²⁸Nagra tamage hu'na neramasmue, meni ama otitma mni'nafintira mago'amota ofri'mni'netma negesageno Vahe'mofa mofavremo'a kini manino egahie.

Jisasi avufgamo zahe huno ruzahu hu'neazamofa naneke

(Mak 9:2-13, Luk 9:28-36)

17 ¹6gisi knamofa amefi zupa, Pitama, Jemisima, Jonima Jemisi nefu'ma huno Jisasi'a zamagri'ake zmareno zaza agonarega mreri'ne. ²Zmuga umninege'za negageno, avugosafintira zge avunasisimo hiaza nehigeno, kukenamo efeke huno remsa hu'ne. ³Anante Mosesi ene Ilaijake zamuga efore hu'ne naneke Jisasi' ene hu'naze. ⁴Hagi Pita'a amanage huno Jisasi asmi'ne, Ramoke, amafima mni'nonana knare hu'ne, Kagrama knarere hananana, nagra tagufa tona nona kigahue. Magora Kagriki, magora Mosesinki, magora Ilaijanki hu'na kigahue, ⁵huno kema nehigeno, msa'ane hampomo tmino refite nezmantegeni, mago ageru'mo hampopinti anage hu'ne, Ama'i Nagri Ne'mofavre, Agriku navesi nentena, tusiza hu'na musena hunentoe, ke'a antahi amiho! ⁶Amage' nentaza disaipol nagamo'za nentahi'za tusi zmagogo fege'za mopafi ruhapati'za zmugosaregati mse'naze. ⁷Hianagi Jisasi eno zmako nehuno, koro osuta otiho, huno zmasmi'ne. ⁸Kesga hu'za kazana mago'a vahera onke'nazanki, Jisasi'a Agrake mni'nege'za ke'naze.

⁹Ana hute'za agona atre'za eneramizageno, Jisasi'a kase huzmanteno, Amama avana'gnazama kazazana mago vahera osmi'nenkeno, Vahe'mofa mofavremo fripintira otino. ¹⁰Amage nentaza disaipol nagamo'za anage hu'za antahige'naze. Nahige'za kasegere ugagota hu'naza vahe'mo'za, koteno Ilaija'a ete'ne hu'za nehaze? ¹¹Jisasi'a kenona huno, Ilaija'ma esuno'a maka'zana emeri zo'e hugahie. ¹²Hu'nazanagi Nagra neramasmue, Ilaija'a ko e'ne. Ana hu'neanagi agrira ke'za antahi'za osu'naze. Hianagi Agri'ma hunte'nazana, zamagri'ma zmesi'za hu'naze. Anahukna hu'za, Vahe'mofa mofavre'mofona azeri haviza hugahaze.

¹³ Anante amage nentaza disaipol nagamo'za antahini nehu'za, mono ti frezmante Joninku Agra nehie hu'naze.

Havi avamumo agu'a fre'nea mofavre Jisasi'a azeri so'e hu'nea naneke
(Mak 9:14-29, Luk 9:37-43)

¹⁴ Hakare vea kevufi enehnatigeno, mago ne'mo eno, Jisasi agafi rena reno, ¹⁵ anage hu'ne, Ramoke, kasunku mofavre nimofona hunto, na'ankure mananiza negegeno ran kna enerino, mago'a kna traka huno teve tanenkino, timpi traka huno masetere nehie. ¹⁶ Nagra avare'na kamage'ma nentaza disaipol nagate oanagi, zamagra azeri onkanamre'naze. ¹⁷ Jisasi'a kenona huno, tamagra tamentinti nosuta fatgo tamagutmagesa ontahi vahe mni'naze! Nama'a kna Nagra tamagra nena manigahue? Nama'a zupa knaza tmia erigahue? Nagrite avretma amare eho. ¹⁸ Anante Jisasi'a havi avamu kesigeno atiramino vigeno, ana knazupage mofavremofu krimo'a so'e hu'ne. ¹⁹ Anante amage' nentaza disaipol nagamo'za zamagraku Jisasinte e'za anage hu'naze. Na'a higeta havi avamura huntonkeno atinoramie. ²⁰ Jisasi'a anage huno zmasmi'ne, na'ankure tamagra osi'a tamentinti hu'naze. Nagra tamage hu'na neramasmue, masteti zafamofo osi avima'agna tamentintimo hu'nenana, anage hutma ama agonagura hugahaze. Amarera atrenka anture vuo hanageno'a, amne vugahie. Mago'zamo'a amuho huormantegahie. ²¹ [Hagi amanahukna havi avamumo'a, vahe agu'afinti atioramigahie. Hagi kave atretma nunamuma hanutma amne huntegahaze.]^c

Mago'ene Jisasi friteno otisia ke hu'nea naneke
(Mak 9:30-32, Luk 9:43-45)

²² Galili utruma hutazageno, Jisasi'a anage huno zmasmi'ne, Vahe'mofu Mofavre komoru hu'za avare'za vahe zmazampi antegahaze. ²³ Zmagra ahe frisageno friteno tagufa knazupa Agra otigahie, huno hige'za amagemana nentaza disaipol nagamo'za nentahi'za zmarimpa kna hu'naze.

Mono no takesi zgogu hu'nea naneke

²⁴ Kapenium etageno ra mono nOMPI zgo e'neriza vahe'mo'za, Pitante e'za anage hu'naze, tamagri'ma rempi huneramia ne'mo'a, ra mono nOMPI tare takesi zgoa nentefi nonte? ²⁵ Pita'a izo nehuno nOMPI umrerigeno, Jisasi'a e'se antahigeno, Saimoniga na'ane kagesa nentahine? Ama mopafi kini vahe'mo'za izampinti takesi zgoa e'nerize? Zamagra vahepintipi ru vahepintire? ²⁶ Higeno Pita'a ru vahepinti e'nerize hutegeni, Jisasi'a anage hu'ne, hagino naga'amo'za miza osegahaze. ²⁷ Hianagi ana hu'negu tagra zmarimpa kna eri ozmisunanki, tirute vunka huku nofi

^c 17:20-21 Korapama krenaza avontafepina 21 omnene.

ome atrenka ese'ma avazu hanana nozara agi eri aka hunka mago zgo me'nena kegahane. Ana zgo erinka Nagrite'ene kagra re'enena ome miza hugahane.

Mona kumapina iza ra vahera manigahie hu'nea naneke

(Mak 9:33-37, Luk 9:46-48)

18 ¹Ana knafi amage nentaza disaipol nagamo'za Jisasinte e'za amanage hu'naze. Aza mona kumapina ugagota vahera manigahie? ²Hzageno Jisasi'a mago osi mofavre kehigeno egeno, amu'no zmifi azeri'otiteno, ³amanage hu'ne. Nagra tamage hu'na neramasmue, Kagra ruzahе hunka osi mofavre'gna osnunka, mona kumapina ovufta hugahane. ⁴Aza'o agra avufa antermino ama osi mofavre'gna hanimo, mona kumapi rana manigahie. ⁵Hagi aza'o ama anahukna huno osi mofavre Nagri nagifi avresimo'a, Nagri navregahie.

Zmentinti eri haviza nehiazamofo naneke

(Mak 9:42-48, Luk 17:1-2)

⁶Hu'neanagi iza'o ama neone mofavre nagapinti Nagrite amentinti nehimofoma kumipi avarente'simofona, ne'zama refuzafuma nepaza ranhave eritma anankempi tafiteta, asgahutma hageri amu'nompi atresageno tima nakriniana knare hugahie. ⁷Iza'o rumofoma kumipima avrenentea vahekura Nasuragie, na'ankure hakare zupa vahe'ma zmazeri kumipi netreazana me'ne. Hianangi iza'o rumofoma kumipi avrentesimo'a tusi'a hzankefi manigahie.

⁸Kzamo'o, kagiamo'ma kavareno kumi kante'ma vanigenka, akafrinka matevu atro. Kagra'ma magoke kzane kaganema me'nesigenka manivava kasimuma erisanana knare hugahie. Hagi tare kzane kagane me'nenige'za tevava tevefi mate'vu katregahie. ⁹Kavurgamo'ma kumipi kavrentesigenka, tagatinka matevu netrenka, manivava kasimuma magoke kavurgane erisanana knare hugantegahie. Hagi tarega kvurgama menesigeno'a, tevava tevefi matevugatregahie.

Fanane hu'nea Sipsipi'mofo fronka naneke

¹⁰Tamagra kva hiho, amana ne'onse mofavre nagara zmage fenka otreho. Na'ankure nagrama nermasmuana monafina zamagri ankeromo'za, mika zupa monafinka mni'nea Nenfa avugosa negaze. ¹¹[Vahe'mofo mofavre'ma e'neana fanane hu'naza vahe hakreno zmarenaku e'ne.]^d

¹²Na'ane kagesa nentahine? Magomo'ma 100ti'a sipsipi ante'nesnifinti, mago'ma fanane hanigeno'a, 99'a agonarega zmatreneno mago'ma

^d 18:11 Ama'i isa (11) korapa avontafepina omnene hagi ruga'a tafepi me'ne.

fananema hu'nemofonkura ome hakreno ovregahio? A'o. ¹³Agra hakreno erifore hanuno'a, tamage nerasmue, 99ni'a fananema osu'naza sipisipi afuzga agtereno mago'ma fananema hu'nemofona tusi'a muse huntegahie. ¹⁴Anahu kna huno, monafinka Negafa avesizamo'a, ama ne'onse nagapintira magore huno frino fnane osnie nehie.

Kumi'ma nehnigenka aza hanana naneke

¹⁵Mono negafu'ma kumi'ma hugantesigenka, vutna tanagragu umani'neta ana havizama hu'nesia zana ome azeri fatgo hunto. Agrama keka'ama antahisiana, negfuna avare kamatane. ¹⁶Hagi keka'ama antahisnigenka, magoro tareo znavrenka vunetma, nentahisageno mika hazenkea erifatgo huno eriyama hugahie. ¹⁷Hanigeno agrama antahi oramisiana, mono kevumofa asami'o. Hanankeno mono kevumofa ke antahisiana, atregeno agra mono ontahi vahero, havige huno takesi zgo eri vahekna vahe manino.

¹⁸Nagra tamage hu'na nerasmue, inankna zama mopare'ma anakisnaza zana, anazanke huno monarera anakigahie. Hagi inankna zama mopare'ma vakane atresnaza zana, anahu'kna huno monarera vakane atregahie.

¹⁹Ete mago'ene Nagra tamage hu'na nerasmue, taremotna ama moparera mni'netna, mago tnarimpa hutetna, mago'a zanku antahigesna'ana, monafinka mni'nea Nenfa'a amne hugahie. ²⁰Na'ankure ama mopare'ma taremo'o tagufamo'za, Nagri nagire emeritru hanafina, Nagra zamagri amu'nozmifi manigahue.

Kazokzo ne'mo nofi hu'nea fronka naneke

²¹Anante Pita'a, Jisasinte eno anage hu'ne, Ramoke, kumi hunantesia nenafuna, nama'a zupa kumi'a atrentegahue, 7ni'a zupa atrentegahufi? ²²Jisasi'a Pitankura anage hu'ne, 7ni'a zupo'ompge, Nagra tamage negsamue, 490'a zupa atrentegahane. ²³Ama ana agafare mona kumamo'a amanahu hu'ne, mago kinimo'ma kazokzo eri'za vahe'a eri'za refako huno zmia kna hu'ne. ²⁴Anama huno zganeno hakeno negege'za, 10 tauseni zgo'a nofi hu'nea ne' agrite avare'za e'naze. ²⁵Na'ankure ana ne'mo'a nofima hu'neana ovaknegeno, ramo hamponage ana ne'ku huno, a'mofavre'ane mika tuzampaza ante'neazana zgore ome atrenka, nofima hu'neama'a etenka vaknento higeno, ²⁶anante kazokzo eriza ne'mo'a mopafi agri avuga mseno keke hunteno, kagra agazone hunaminege'na, mika nofi'ma hunoana ete'na nagra vaknaneno hu'ne. ²⁷Ramo'a ana kazokzo eri'za nera asuragianteno avrenetreno nofima hu'nea zana atrentene.

²⁸Atreno atiramino fegi vuteno'a, kazokzo eri'za ne'mo, magoka kazokzo eriza eneri'a ne'mo agripinti 100ti'a silva zgo nofi hu'nea ne'

omege'ne. Anante ananke nofite avazu nehuno anage hu'ne, Nagripinti nofima hu'nana zana etenka vakano hu'ne. ²⁹Anante ana kazokzo eri'za ne'mo mopafi unemaseno keke hunteno, agazone hu'nantenege'na nagra eme vaknaneno. ³⁰Hianagi, ana kea ontahino ruvahe hiazamo kina nOMPI avreno ome retufe vazigeno mni'nenno, nofi'ma hu'nea zana vaknegahie. ³¹Magoka kazokzo eri'zama eneriza nagamo'za fore'ma hiazana kete'za, tusiza hu'za zmasunku hute'za vazazamo'za mika zama fore hiazana ra zmimofu ome asmi'naze. ³²Anante rankva ne'amo ugota kazokzo eri'za ne' kehuno, Kagra havi kavukva'ene kazokzo eriza nere! Na'ankure kagrama keke hunantakena maka nofima hu'nana zana atregante'noe. ³³Nagrama hugante'noaza hunka kazokzo eri'za negfuna kasunkura huontegahampi? ³⁴Nehuno tusi asi vazigeno, agri rankva'amo kina nonte kva nehaza vahete, azeri haviza nehnageno mni'nenno nofi'ma hu'neaza vaknenogu avreno ome zmi'ne. ³⁵Ana hu'negu, mago mago'mokama negfuma kagu'areti kumi'ama apase ontesanana, monare Nenfa'a tmagrira anazanke hurmantegahie.

Arave atane'zamofu naneke

(Mak 10:1-12)

19 ¹Jisasi ana naneke zmasmi vgareteno, Galili kumara atreno, Judia kaziga, Joda tina agatereno vu'ne. ²Tusi'a vahe krerfamo avaririza nevazageno, anantega zmazeri so'e huzmante'ne.

³Anante mago'a Farisi vahe'mo'za rehe'za kenaku Agrite e'za, mago'azama hanigeno'a amne nenarona ahenatigahie huno kasegemo'a hu'nefi? hu'za antahige'naze. ⁴Jisasi'a ke nona huno, tamagra hampritma onke'nazo, ese agafare'ma Anumzamo'ma vene, a'enema tro huneznanteno, ⁵amanage hu'ne, *ama kegafare vemo'a nerera afana atreno, nenaro'ene hagerfino, ana tarega'moke eri mago hune, magoke znavufa manigaha'e.* (Jen-Agf 2:24) ⁶Hanige'ne, mago'ane tare vahe omnigaha'e. Hagi magoke znavufa manigaha'e. E'ina hu'negu na'ano Anumzamo'ma eri hagerfima ante'nesia zana, mago ne'mo'a ovakanegahie. ⁷Hige'za Farisi vahe'mo'za Agriku anage hu'naze. Na'a higeno Mosesa tagrikura huno, a'ma hunte avona kretma nemita huntaho hu'ne? ⁸Jisasi anage zamagriku hu'ne, Mose'a tmasmino a'netmia atregahaze hu'neana, na'ankure tmagri'ma tamarimpamo usasi ki'negu hu'ne. Hianagi Anumzamo pusanteti'ma agafa hu'neana amanahu kana omne'ne. ⁹Hagi menina tmagrikura amanage nehue, Aza'o nenaro'ma savri monko avu'ava^e osu'nesigeno netreno ru a' erisimo'a, monko avu'ava hugahie. ¹⁰Agri amage nentaza disaipol nagamo'za anage hu'naze, amana ke'mo'ma arave hu'nea vene a'enenku'ma hu'nesiana, arave osuta amane

^e 19:9 Adultry

manisnunkeno'a knare hugahie. ¹¹ Jisasi'a anage zamagriku hu'ne. Amama huntoa kea, hakaremo'a e'origahie. Hagi azano Anumzamo'ma ami'nenimo anara hugahie. ¹² Na'ankure kse zmantetegati zmufamo knare huozmante'nesamo'za arave osugahaze. Hagi mago'amo'za zmagonkna'za hari'naza vahe'mo'za arave avu'ava zana osugahaze, mago'amo'za arave osu'za mona kumaku nentahize. Inamo'ma ama rempima humiazama erisimofona atregeno erino.

Jisasi'a mofavre'zga asomu huzmante'nea naneke
(*Mak 10:13-16, Luk 18:15-17*)

¹³ Anante neonse mofavre zimi zmavare'za aza anteno nunamu huzmantehogu Jisasinte e'naze. Hianagi Jisasi amage nentaza disaipol nagamo'za ke zmasu'za i'o huzmante'naze. ¹⁴ Hianagi Jisasi'a huno, zmahe onatita zmatrenke'za ne'onse mofavre zga Nagrite eho, mona kumara e'ina hu vahe'mokizmi kumare, ¹⁵ nehuno azana zmanunte anteteno zmatreno vu'ne.

Afufenone nehazave ne'mofo naneke

¹⁶ Anante mago ne'mo Agrite eno amange hu'ne, Rempi hurami ne'moka, inaknahu knare navunava hutena mani'vava nasimura erigahue? ¹⁷ Jisasi anage huno ana ne'ku hu'ne, Na higenka na'amo knare hune hunka Nagrira eme nantahinegane? Agra magoketfamo knarera hu'ne. Hianagi kasimu erinaku'ma hanunka, tra ke amage'anto, ¹⁸ higeno ina su'ane? Huno antahi'gegeno, Jisasi ke'nona huno, vahera ahe ofrio, monko zana osuo, kumzafa oso, havi nanekea osuo, ¹⁹ antaka nfaka'mofo ra agi amio. Hagi kagra kvufa avesi antana'kna hunka tava'onkare nemanisimofona avesinto. ²⁰ Ana nehazave ne'mo, anage hu'ne, nagra nagu'areti ana miko tra kea amage'nentoe, hagi inaza nagra nosue? ²¹ Jisasi agriku anage hu'ne, Kagrama fatgo hugahuema hanunka, vunka zgore afufenonka'a ome atrenka, ana zgoa erinka zmunte omne vahe ome nezminka, hagi kagra monafinka feno eri santi haregahane. Hutenska Nagrira eme namage anto. ²² Hianagi ana nehza'moma ananke nentahino'a, tusi'a asuzampi vu'ne. Na'ankure agra tusi'a afufeno ante'negu anara hu'ne.

²³ Jisasi'a amage'ma nentea disaipol nagara anage huno zmasamine, Tamage hu'na neramasmue, afufeno ne'mo mona kumate vunaku haniana, tusi amuhu huntegahie. ²⁴ Mago'ene Nagra nehue, kemolimofona amuhu huontenkeno nekzamofu kampintira frenkro huramigahie. Hagi feno ne'mo'ma Anumzamofu kumapi vuku'ma haniana, tusi'a amuhu huntegahie. ²⁵ Amage nentaza disaipol nagamo'za, ana kema nentahiza, tusi antri hu'za zmagogogu nehu'za anage hu'naze. Hagi aza knare huno agura vazisigeno manigahie hu'naze. ²⁶ Hzagenu Jisasi'a ana mokizmi

nezmageno amange hu'ne, Vahe'mo'a osugahie, hagi Anumzamo'a mika'zana amne hugahie.

²⁷Pita'a amange agriku hu'ne, hagi kmago. Hakare zanti atreta Kagri kamage nentone! Tagra naza erigahune? Higeno, ²⁸Jisasi amange huno zmasmi'ne, Tamage hu'na nerasmue. Miko zama azeri ksefa'ma hania knarera, Vahe'mofo mofavremo'ma, Agri'a msanentake tra'are umnisigenka, tamagra ma namage'ma nentamotma tamagra nena 12fu'a kini trate umani'neta, 12fu'a Israeli naga nofira refako huzmantegahaze. ²⁹Hagi azago, nonka'o, kafuhe'mofono, ksarahehe mofono, negafano, negrerano, mofavre'kao, hoza'ka'ama Nagri'kuma hunka atresamoka, 100ti'a rugaterenka ama knafina enerinka, henka esia knafina manivava kasimu erigahane. ³⁰Hu'neanagi hakare ugagota huna'mo'za ehenka hanageno, ehenka hu'namo'za vugagota hugahaze.

Krepi tagi'naza eriza vahe'mokizmi fronka naneke

20 ¹Anumzamofu kumamo'a, mopamofu nefa'ma nante'rampi viazamo zgore'ma omezmareno ege'za agri waini hozafi eri'za emeri'za kna hu'ne. ²Hige'za eri'za vahe'ene mizama mago zgefima erisaza zante, mago zmarimpa hutageno, huzmantege'za waini hoza'afi vu'naze. ³Nanterana 9 kilokinaza nehigeno, mago'ene vuno omegeana ruga'a nagamo'za eriza e'ori maketi kumapi oti'za mni'nageno omezmage'ne. ⁴Zamagriku Agra anage hu'ne, tamagrane waini hozani'afi eri'za omenerinkena, mizana fatgo hu'na tamigahue. ⁵Hige'za vu'naze. Eteno ana kinaga zgemo rukrahe higeno (3 kiloki) vuno magokna ke ome hu'ne. ⁶Ana kinaga 5 kiloki naza higeno, viazamo mago'amo'za eri'za e'ori amne oti'za mni'nageno ome zmagefore nehuno, Nahigetma ama zgeferura eri'zana e'oritma otita amnea mni'naze? Huno zmantahige'ne. ⁷Zamagra anage Agriku hu'naze, mago'mo'e huno zgo erizantera oravregeta anahu huta mni'none. Hzageno, vutma waini hozani'afi tamagra 'nena eri'za ome eriho hu'ne. ⁸Kinagasegeno hozamofu nfa'amo eri'za kva ne' asamino, eri'za vahe ome ke hunka zgozimi zmio, henkama e'namokizmireti agafa hunka kotama e'namokizmire vuo. ⁹5 kiloki kinaga eri'za eme eri'naza vahe'mo'za, mago kante e'za nanterama emeri'naza vahe kna hu'za mago zgemofo agu'afi miza eri'naze. ¹⁰Pusantema eri'zampima zmarege'za eri'namo'za e'za, rugatereta rama'a erigahune hu'za zmagesa antahinazanagi, mago avamente miza zmia eri'naze. ¹¹Ana miza eneriza, agafahu'za ana hozamofu nefa kehakare hunte'za, ¹²anage hu'naze, henkama e'naza nagamo'za, osia knafi (1 aua) eri'zana emeri'nagenka, tusi'a knanentake eri'za zge tasageta eri'nokenka, mago avamente mizana neramine. ¹³Hianagi hoza nfa'amo ke nona huno mago'mofo asmi'ne, knampa nimoke, havizana hunogantoe. Mago zge'mofo agu'afi mizankura mago trimpa hunopi osu'no'e? ¹⁴Mizanka'a

e'nerinka vuo. Nagra henkama eri'za emeri'naza vahera, magozahu avamente tamagrima tamua kante zaminaku nehue. ¹⁵Nagra zantema nazano hugahue hanuazamo'a knarera osu'nefi? Hipi havi antahintahima e'nerinana nagrama knare'zama huazankupi? ¹⁶Hu'negu, henkama hunenimo'a ugagota hanigeno, ugagota hunenimo'a uhenkategahie.

Jisasi'a friteno oti sniazanku hu'nea naneke

¹⁷Jisasi'ma Jerusale mrerino nevuno'a amage nentaza disaipol nagara, z mavare otage atreno anage huno kantega zamagri'ake zamasamime vu'ne, ¹⁸Kehe, Jerusale nevunankiza, Vahe'mofo Mofavrea avare'za ra mono kva vahete ene, kasegere ugagota hu'naza vahe zmisige'za, frigahie hu'za keaga huntegahaze. ¹⁹Ana nehu'za avare'za mono ontahi megia' vahete vnage'za, kiza zokago ke hunente'za sefu knonteti knonkeve nemiza ahe'za hantigahaze. Hanageno tagufa knarera agra otigahie.

**Jemisi'ene Jonike Jisasi'ene manisa'egu neznarera'a
antahige'nea naneke
(Mak 10:35-45)**

²⁰Anante Zebeti ne' mofavre zgane nezmarera ene Jisasinte e'za, mopafi neznerera'a renareno mago zanku antahige'ne. ²¹Jisasi'a anage huno ana aku asami'ne. Na'anku kavenesie? Higeno ana a'mo Jisasi'ne anage huno asami'ne, hugnare hugeke tare mofavre treniafinti mago'mo'a tamaga kaziga manisigeno, magomo'a hoga kaziga mani'nogu Kagri kumapina nehue. ²²Higeno Jisasi kenona'arera anage hu'ne, Kagra nantahima neganazana ontahinenka nehane! Knare Nagrama nenaku'ma nehua tafempintira amne negahampi? huno zmantahigege'za, zamagra anage hu'naze, Tagra amne negahune, hu'naze. ²³Agra zanagri znasmi'ne, Nagri taferopintira amne negaha'anagi tamagani'ane, hoga kaziga mni'zana, Nagrizana omne'neakina ontanasamigosue. Hagi zamagri'ma Nenfama erigahaze hunoma huhampri zmanteno retroma huzmante'nemo'za erigahaze.

²⁴Anante 10ni'a amagama nentaza disaipol nagamo'za nentahiza, tusiza hu'za tare kognagura zmarimpa hezmante'naze. ²⁵Hianagi Jisasi zmagi hutru huno zmasmi'ne, koma antahinazane, megia mono ontahi vahete kvamo'za, kva huzmante'naze. Higeno iza'o agatereno eri'za kantema mni'nemo'a hankave'a zmagrite nenteno kva kri'nezmante. ²⁶Tamagripina amanahu'zana omneno. Hagi iza'o tamagripinti ugagota hugahue hanimo'a, atregeno eriza vahe manino. ²⁷Hagi iza'o kagota hugahue hanimofona, atregeno kazokzo eriza ne'ka'a manino. ²⁸Anahu kna huno Vahe'mofo Mofavre'ma e'neana, Agri eriza erintehogura ome'ne, Agra'a erizana enerino, asuragino rama'a vahe zmaza huno misa senaku asimu'a atregahie.

Jisasi zanavurga asu hu'nea netre znazeri hari hu'nea naneke

²⁹Zamagrama atre'za Jerikoma nevzage'za, tusi vahe kevu krerfamo'za avariri'za vu'naze. ³⁰Tare znavu asuhu netre'moke kamofu ankenare mopafi mni'neke, Jisasi evie kema nentahikea, znagra kezatike, Ramoke, Deviti nemofoga kasunku huranto. ³¹Hakeno vahe kevumo'za kne hu'za taganetna mni'o hu'nazanagi, tusi kezatike mago'ane vivi huke, Ramoke, Deviti nemofoga kasunku huranto huke hu'na'e. ³²Jisasi'a anante eme otino, znagi hiazamo anage hu'ne, Na'a Nagra hurnantenuegu neha'e? hige'ne, ³³anage znagra hu'na'e, Ramoka tavurga eri hari huranto hakeno, ³⁴Jisasi'a asuntgi znanteno zanavurgare znavako higeno, ame huno zanavurga ruhari higeke nege'ne Jisasi avaririke vu'na'e.

Jisasi'a donki afu'mofo agumpi Jerusale ra kumate vu'nea naneke

21 ¹Jerusale kuma emeri tupa hute'za Betfage kumate ehni'za, Olivi agonare emanine'za, Jisasi'a amage nentaza disaipol nagapinti tare'mokizni huznanteno, ²anage huno znasmi'ne, hantka'a vutna antu kumate ome kesakeno, a' donki afura, anenta'ane kina rentenenigeno mni'neakitna ome kegaha'e. Kina katufetna znavreta Nagrite e'o. ³Avreta ne-esnakeno mago'moma kema hina, eri'za me'negeni Ramo hurantegeta enevro'e hutna hi'o. Anagemu hanankeno'a, ko avretna vi'o hugahie. ⁴Amazama fore hu'neana korapa avontafepi kasnampa vahe'mo hunte'nea, kemo eama hu'ne. ⁵**Saioni mofara anage hunka asmio, ko, kagri kinimo'ma kagritega ne-eanki, avufa anteramino, donki agumpi manino, ve agaho donkifi, ne-e.** (Zek 9:9)

⁶Amage nenta'za disaipol nagapinti vu'namoke Jisasi kema huznante'neaza hu'na'e. ⁷Ana a' donkine, anenta'ane znavre'ne eke anakre kuzni'a zafike ana donki agumpi vasi'nakeno, Jisasi'a ana agofetu mrerino mani'ne.

⁸Manino nevig'e'za rama'a veamo'za anakre ku'zmi zafiza kante vasi'za nevzage'za, mago'amo'za zafa azankuna akafri'za kampi vasinageno anante vu'ne. ⁹Rama'a vahe kote'za Agri avuga vu'naza vahe'zgane, henkama aza vahe'mo'za tusi muse nehu'za kezati'za, **muse huntunesune Deviti ne'mofavrea, agrira asomu huntoto ramofu agifi ne-emofona, muse huta agi'a erintesga hunagamu atresune.**

¹⁰Ana nehzageno Jisasi'ma, Jerusale kuma agu'afi uhnatige'za mika veamo'za antri nehu'za muse hu'za, Ama nera iza'e? ¹¹Ana vahe kevumo'za hu'za, Ama'i kasnampa ne' Jisasi'e, Nasareti kumateti, Galili kazigati e'nea nere.

Ra mono nompinti zmahenanti atrenea naneke

(Mak 11:15-19, Luk 19:45-48, Jon 2:13-22)

¹²Jisasi'a mono nomofu agu'afi ufreno maka zgore netre'za miza neseza nehza vahe'zga zmahe anatige'za fegi'a atirami'naze. Hagi zgo rezahe

nehza vahe sipa eri herafi netreno, mizante maho nma zga ante'naza vahe tra'zmi eri rukrahe hutre'ne. ¹³Jisasi'a anage huno zmasmi'ne, Anumzamofa avontafepima kre'nazana, *nagri nona Anumzamofonte nunamu hunte no megahie* hu'ne. Hianagi tamagra kumzafa vahe frakiza mnisnaza kuma retro nehaze. (Aisa 56:7)

¹⁴Ana hige'za zmuraga asu hu'nea vahe'ene, zmaga haviza hu'nea vahe'mo'za Agrite ra mono nOMPI ageno zmazeri so'e huzmante'ne. ¹⁵Hianagi pris vahe'ene kasegere ugagota hu'naza vahe'mo'za Jisasi'ma kaguvaza hiaza negazageno, mofavre ramimo'za ranke hu'za, Deviti Nemofo muse huntone hazazamo zamarimpa hege'za, Jisasinku anage hu'naze, ¹⁶Amama mofavre ramimo'zama nehza kea nentahino? Jisasi anage hu'ne, Ozo, tamagra mono avontafera hampritma onke'nazo, *osi mofavrene, aminte mofavre mokizmi zmagipi, kagri rankagi kami'zana retro hunte'nane*. (Sam-Zga 8:2)

¹⁷Jisasi anage huteno Jerusale rankumara atreno Betani kumate vuno, anante umse'ne.

Jisasi fik zafa kesigeno osapate'nea naneke
(Mak 11:12-14,20-24)

¹⁸Jisasi'a nanterana otino ete Jerusale rankumatega vunaku nevuno aga'zanku hu'ne. ¹⁹Keana ka vutega magoke fiki zafa oti'negeno, Agra ana zafa tava'onte eno eme keana magore huno nena'a omneno ani'namoke hu'negeno, Agra ana zafagu huno, ²⁰Mago enena kagripina rga fore osugahie. Ana zafamo osapategeno amage nentaza disaipol nagamo'za nege'za zmanogu nehu'za antahige'naze. Nankna huno ama fiki zafamo'a ame huno osaparare? ²¹Hu'za hzageno, Jisasi'a anage huno kenona zmirera hu'ne, Tamage hu'na neramasmue, tamentinti nehutma tare tagufa tamagesa ontahisnutma, tamagra fiki zafa huntoa kna'zana ageteretma amne hzasine. Hianagi ama'na agonagu hutma, otinka hage rimpi tka'uro hanageno'a amne ana hugahie. ²²Hanki nazankuro kamentinti hunka, nunamu hunka antahigesanana, amne erigahane.

Na hihamu eri'nane? hu'za Jisasi antahige'naza naneke
(Mak 11:27-33, Luk 20:1-8)

²³Jisasi'a ra mono nomofo kumate mrerino rempi hu'nezmige'za, pris vahemo'zane, Jiu kva vahe'mo'za Jisasinte e'za amanage hu'za antahige'naze, Ina hihamure ama eri'zana Kagra e'nerine, Aza ana hihamua Kagrira kami'ne? ²⁴Jisasi zamagri kenona huno, Nagra anazanke hu'na mago zanku tmantahigegahue, anazama Nagri'ma nasmisage'na, Nagra ina hihamufi ana eri'zana e'nerufi anazanke hu'na tmasmigahue. ²⁵Joni'ma mono ti frezmante'neana, iza'e agafa'a, monafintipi vahe'mo'za huntageno eri'ne? Hige'za ana vahe'mo'za

nanekea nentahi'za agafa'agu naneke ohumi ahumi hu'za, tagrama huta, monafintire hanunkeno'a, Agra tagriku anage hugahie, hanki nahigetma agritera tamentintina nosaze? Huno hugahie. ²⁶Hianagi tagrama hutma, vahe'mo'za huntageno eri'ne hanunke'za, vahe'mo'za tahegahaze hu'za koro hu'naze. Na'ankure maka vahe'mo'za Joninkura kasnampa nere nehaze. ²⁷Nehu'za Jisasina ke nona'a hunte'za, Tagra ontahi'none hzageno, Agra anazanke huno zmasmi'ne, Nagranena igati eri'noa hihamufi eri'zana eneruo ontamasmigahue.

Tare ne'mofavremokizni fronka naneke

²⁸Hianagi tamagra na'ane tamagesa antahigahaze? Mago ne'mo'a tare ne'mofavre znante'ne. Pusa ne'te viazamo anage hu'ne, mofavre'nimoka menina vunka waini hozafi eri'za omerio hu'ne. ²⁹Ana mofavremo'a ke nona hunteno, Nagra ovugahue hutenoagi, henka agu'a zahe huno vu'ne. ³⁰Neznafa'a henka'mofonte viazamo anahu ke huno ome antahige'ne. Ana mofavremo ke nona huno, nagra ana hugahue hutenoagi, ovu'ne. ³¹Taremokiznifintira inamo nefa avesizana avaririne? Zamagra hu'za Pusante'mo'e, hzageno Jisasi anage huno, Nagra tamage neramasmue, zgoma vahepinti zonegiza vahe'ene, monkote'ma nehaza vahe'mo'za tmagrira tmagatere'za Anumzamofu kumapina vugahaze. ³²Na'ankure Jonima tmagritega e'neana fatgo avu'ava huramerinaku e'negetma, tamagra agritera tamentinti osu'naze. Hianagi, vahepinti zgo zogi vahe'mo'zane, monko vahe'mo'za agritera zmentinti hu'naze. Hagi tamagra ma ana zana negetmagi, tamagu'a rukrahe hutma tamentinti huonte'naze.

Havi hoza kva vahe'mofo fronka naneke *(Mak 12:1-12, Luk 20:9-19)*

³³Mago fronka kea antahiho. Mago mopa agafa ne'mo'a waini hoza kri'ne. Ana hoza kegina huno wainima tatisia keria asenteteno, hagi mni'neni kvahu nona kintene. Zoka mni'neni ikante zgo mizaseterehu (rent) vahete hoza'a netreno afete ka vu'ne. ³⁴Hozama anarere knama egoftama higeno'a, kazokzo eri'za vahe'a huzmantege'za, agri'ma refako hu'za amisnazama'a erisnagu kegva hu'ne'za ikante mizama (rent) nezamiza nagate e'naze. ³⁵Ana hianagi, anama kegvama hu'naza nagamo'za zmarotago hu'za, magora knonkeve nemi'za, magora ahe nefri'za, magora have kanonu ahe'naze. ³⁶Mago'ane kazokzo eri'za vahera pusante'ma huzmante'neama'a agatereno hakare huzmantege'za vazage'za, anazanke huzmante'naze. ³⁷Henkarfana, ne' mofavreni'a agazone humigahaze nehuno mofavre'a huntageno vu'ne. ³⁸Hagi ana hoza ikante kva hu'ne'za miza nesaza vahe'mo'za, kageno nemofoma ege'za, ama fenoma erisia mofavre ama eanki erinketa ahenefrita ana

fenona erigahune. ³⁹Anage hute'za, ana waini hozafinti avazuhu fegu atre'za ahe fri'naze. ⁴⁰Hagi anantema waini hozamofo nfa'amo'ma esuno'a, hozama kegvama hu'naza vahera, na'a huzmantegahie? ⁴¹Agrira anage hu'za asmi'naze, Agra havi avu'ava hanaza vahera zmazeri havizahutfa hugahie. Huteno ana waeni hoza zmazampinti hanare'mreno, hoza kegva hu'ne'za hoza anerere knare, agrama erigahue hu'nesiama'ama amisaza vahe zamigahie hu'naze. ⁴²Jisasi'a anage huno zmasmi'ne, Anumzamomo avontafepina tamagra hampritma nonkazo? *Nogi vahe'mo'za knare osu'ne hu'za eritre'naza havemo'a, nomofo renagentete asente'nageno azeri hanaveti have menina fore nehie. Ama'i Anumzamomo tro hu'neankino, tvurera so'e zantfa fore nehie.*

(Sam-Zga 118:22-23) ⁴³Ama ana agafare, Nagra kea tmagrira tamasmia, Anumzamomo kumara tmagripintira hanareno, iza'zo Anumzamomo kuma'mofo nena rgama renentesnamokizmi zamigahie. ⁴⁴Hagi mago'mo'ma amana havere'ma asaga hurmisimo'a, korino rupanini hugahie. Hianagi ana havemo'ma inamofo agofeturo asagahu ramisimo'a fuzafupeno kugupa segahie. ⁴⁵Hige'za ugagota prisi vahe'mo'zane, Farisi vahe'mo'za ana fronka kema hia nentahiza, zamagra antahi'za zmifina, tagriku nehie hu'za hu'naze. ⁴⁶Jisasina azerisaza kanku hakre'nazanagi, zamagra tusi'a vahe kevugu kore hu'naze. Na'ankure ana vahe kevumo'za, Agrikura kasnampa nere hu'za nehza'zankure.

Arave hute ne'za retro hu'neazamomo fronka naneke

(Luk 14:15-24)

22 ¹Jisasi'a fronka kea mago'ene zamagrikura anage huno zmasamine. ²Mona kumamo'a mago kini ne'mo mofavre'amo arave huku higeno kave retro hu'neankna hu'ne. ³Huteno Agra kazokzo eri'za vahe'a, zmagima hu'noa vahe'zga ome kehinke'za, aravemahu nezantero eho huno huzmantege'za vzanagi, zamagra omegahune hu'naze. ⁴Mago'ene ruga'a kazokzo eri'za vahera hunezmanteno, anage hu'ne, zmagima hu'noa nagara zmasamiho, Nagra aravehu nezana hago retro huntogeno me'ne. Agusage bulimakao afu'zganai'a, ko ahe'za traga huvazi antazageno, mika'zana retro hunte'ne. Ana hu'negu aravemahu nezante eho. ⁵Hianagi anankeo ontahiza atre'za vu'za e'za hu'naze. Mago'mo'a hoza arega vigeno, mago'mo'a zgo eri'za ma'are vu'ne. ⁶Ruga'amo'za eri'za vahe'a zmazeri haviza nehu'za, zmahe fri'naze. ⁷E'ina hazazamo, Kini ne'mofona tusiza huno rimpa haviza higeno, sondia vahe'a huzmantege'za vu'za ana vahe'ma zmahe'fri'naza vahera ome zmahe nefri'za, rankuma zmia teve taginte'naze. ⁸Anante Agra kazokzo eri'za vahe'agura anage huno zmasmi'ne, aravema hu nezana hago trotra hunte'ne. Hu'neanagi zmagima hu'nona vahe'mo'za efegara osu'naze. ⁹E'ina hazagu, ranra kampi vutma inakna vahema zmagesuta,

zmagi hinke'za aravema hu nezantera eho. ¹⁰Hige'za ana kazokzo eri'za vahe'amo'za rankuma kampi vu'za e'za hu'za zmagaza vahe'a, havi avu'ava nehaza vahero, knare vahero kehutru hazage'za, ana aravehu nompina, zamagi hu'naza vahe'krerfamo'za avite'naze.

¹¹Hu'neanagi, Kini ne'mo'ma efreno arave hutema zmagi hu'nea vahepima eme keana, anampina mago nera aravehu kukena osu'nea ne' emani'negeno ke'ne. ¹²Hianagi Agra ana neku anage hu'ne, nenfuga aravemahu kukenama osu'nenka kagra inankna hunka amafina efre'nane? Hianagi agrama hukeaga omne'geno mago keaga osu'ne. ¹³Anante Kini ne'mo eri'za vahe'a zmasamino, azeritma nofi agare azante anakitetma, asgahutma tusi'a hanizampi matevutrenkeno, anampinka zvira neteno, ave aninkreki hino hugahie. ¹⁴Na'ankure ra'ma'amokizmi ke hu'neanagi, osi'a naga huhampri nezmante.

Sisa amisaza takesi zgogu Jisasi antahige'naza naneke

(Mak 12:13-17, Luk 20:20-26)

¹⁵Anante Farisi vahe'mo'za magopi omeri truhu'za, rehesageno, Agra'a hania kefinti azerisune hu'za ke retro hu'naze. ¹⁶Hute'za zamagri zmage nentaza naga'ene, Herodima amage nentaza disaipol naga'ane, magoka huzmantage'za Jisasinte vu'za anage hu'naze. Rempi huzami nere, tagra antahi'none, Kagra tamage ne'tfa mni'nenka, tamage ke'moma hu'nea kante antenka Anumzamofu kankura rempi hunezmine. Mago'mofonkukera nosane, na'ankure mago'mofontega nontane. ¹⁷Hagi tagrira tasmio. Kagra nankagesa nentahi'ne? Knare hu'negu, Sisama ami takisi zgoa amigahumpi omigahune? ¹⁸Hianagi, Jisasi'a havi antahi'zama eri'zana nezmageno anage hu'ne, tamagra tavre vahere! Na'a higetma renvatga huta negaze? ¹⁹Mago'ma takisima nehaza zgofinti eri naveriho, hige'za mago zgo eri'za Agrite e'naze. ²⁰Jisasi'a zamagriku anage hu'ne, ama aza amema'ane aza naneke krente'naze? ²¹Zamagra ke nona'a hu'naze, Sisa su'ane hazageno, Agra zamagriku anage hu'ne, anama huno, Sisa'zama me'nesiana, Sisa amiho. Hagi Anumzamofu zama me'nesiana, Anumzamofu amiho. ²²Anankema nentahi'za antri nehu'za, Agrira atre'za vu'naze.

Fripinti oti snaza kegu Jisasi antahige'naza naneke

(Mak 12:18-27, Luk 20:27-40)

²³Ana zupage Satusi mono vahe'mo'za (vahe'mo'za fripintira o'tigahaze nehaza vahe'mo'za) Jisasinte e'za eme antahige'naze, ²⁴Rempi huzami ne'moka, Mosesi'a huno, ***mago'ne'moma mofavre kse onte'nenoma frisigeno'a, nefu'a ana kentora d'erineno nefu fri'nea ne'mofo mofavre ksente'gahie.*** ²⁵Tagripina 7ni'a kogna mni'nafinti, agonesa mofavremo a' eriteno, mofavre onteno fri'geno, ana ara negna erinte'ne. ²⁶Anantemo'a

anazanke hu'ne, hagi 3mo'a anazanke huno tamino 7nimofonte vu'ne. ²⁷Ana ara henka fri'ne. ²⁸Ana hu'negu Fripinti otisaza kna'zupa, ana kognafintira iza a' manigahie? Na'ankure ana miko'mo'za ana ara erinte'naze. ²⁹Jisasi'a ke nona'a anage huno zmasmi'ne, Tamagratmi tmazeri havia nehaze, na'ankure avontafero, Anumzamofu hanavea antahi'amara nosaze. ³⁰Na'ankure fri'nehnafinti'ma oti snazana, arave hu'zana omnesigeno, ara vasi omiami hu'zana omnesigeno, monafinka ankeru vahe'kna hu'za manigahaze. ³¹Hianagi fri'naza vahe'ma otisaza zanku'ma Ra Anumzamo'ma tamagriku'ma hu'nea kea hamprita ontahinazo. ³²*Nagra Abrahamuma Aisaki'ma Jekopu Anumza mni'noe hu'neana? Agra fri vahe'mofo Anumzana omni'ne, hagi kasefa hu'za mni'naza vahe'mofo Anumzane.* (Ekso-Uti 3:6) ³³Tusi'a vea kevumo'za ana nanekema nentahi'za, rempima huzmia kegura tusi zmagogogu nehu'za antri hu'naze.

Vugutama hu'nea kasegemofu naneke

³⁴Hianagi Farisi vahe'mo'zama antahi'zama, Satusi vahera ke'osza kema Jisasi huzmantege'za, Farisi vahe'mo'za magopi eritru hu'naze. ³⁵Zamagripinti mago'zmimo'a, kasegere ugagota hu'nemo, reheni kenaku agenoka hu'ne. ³⁶Rempi huramine'moka, inana tra kemo mareri'agetereno vugagota hu'ne? ³⁷Jisasi'a kenona'a asmimo, Rana, kagrika'a Anumzana, mika tumokareti ene, mika kagu kamenteti ene, mika antahintahi ka'areti avesinto. (Diu-Kas 6:5) ³⁸Ama e'i pusama huno, vugagote'nea kasege. ³⁹Anante'ma hu'neana, kagragu'ma kavesi'nentanaza hunka, tva'onkarema nemnisimofona avesinto hu'ne. (Lev-Pris 19:18) ⁴⁰Mika kase'gemofu'ene, kasnampa vahe'mofo kemo'a, asma tare tra kemofonte aniri'ne.

Jisasi'a Farisi vahe'mokizmi Kraisinku zmantahige'nea naneke (Mak 12:35-37, Luk 20:41-44)

⁴¹Farisi vahe'ma eri'tru'ma nehazageno'a Jisasi'a mago zmagenoka ke zmantahige'ne, ⁴²Tamagra Kraisinkura nankna tamagesa nentahi'ze? Agra iza ne' mofavre? Huno zmantahigege'za, Deviti mofavre hu'naze. ⁴³Agra zamagrira anage huno zmasmi'ne, nahigeno Avamumo Devitina asmigeno Ranimoke hu'ne? ⁴⁴*Ramo'a nagri Rantega anage hu'ne, tmaga kzigani'a mni'negena, ha' vaheka'a zmare kagri kagafi ataneno* hu'ne. (Sam-Zga 110:1) ⁴⁵Deviti'ma, Ra'ne huno'ma hu'neana, inankna huno agri mofavre manigahie? ⁴⁶Ana kemofu nona'a, mika'amo'za mago'a kea huntega osu'za, ana knareti'ma vu'neana koro kazigati mago'anena, Agrira agenoka osu'naze.

Kasegere ugota hu'naza vaheku'ene Farisi vaheku hu'nea naneke (Mak 12:38-39, Luk 11:43,46, 20:45-46)

23 ¹Jisasi'a anante ana vea kevugu'ene, amage nentaza disaipol nagaku anage hu'ne. ²Kasegere ugagota hu'naza vahe'ene, Farisi

vahe'mo'za, Mosesi kasege kemofonte nemnize. ³Ana hu'negu nankna ke'ma tmasmi'sazana, tamagesa antahi ankeretma, tmasmisazaza hiho. Hianagi zamagrama hanaza'zana osiho, na'ankure zamagrama rempima huzami'za zana amage' ante'za nosaze. ⁴Zamagra kna'nentake huno erisaga huama'a amuho hu'nea zantmi anakiza vahe zmafunte nentaze. Hu'neanagi zmagra zmazana ante'za zmazankontutira retufe zmage'sa nontahize. ⁵Ana mikazama nehzana vahe'mo'za zmagehogu zmagra ana nehaze. Na'ankure zamagra osi nunamu vogisifina mago'a mono kea kre vazite'za, zmazante'ene kokovite'ene anaki'za nofi arente arente zaza kukenare nehaze. ⁶Hakare vahe atru hu'za ne'za nenafi kva vahe trate mni'zanku zamavenesi'za, osi mono nompri kva vahe trate mnisnaza zanku zme nesie. ⁷Hagi vahe'mo'za maketi kumapima humusema hunezmante'za, rempi huzami vahere'ma hu'za hanaza'zanku zmenesie. ⁸Hu'neanagi tamagrikura rempi huzami vahere hu'za osiho. Na'ankure Rempri hurami'nera Magoke mni'negetma, tamagra ana miko'a kogna mni'naze. ⁹Hagi ama mopafina nenfa'e hunka mago'mofonkura osuo, na'ankure tamagrira Magoke Nfa'tmimo monafinka mani'ne. ¹⁰Anazanke hutma kvatie hutma mago nekura osiho. Na'ankure magoke Kva tmia Kraisi mni'ne. ¹¹Ugagotama tmagri'pima hu'nesnimo'a, tmagri eri'za ne' manino. ¹²Iza'o agra'ama ante marerisimofona, azeri anteramigahie, iza'o agra'ama anterami'simofona, azeri antesga hugahie.

Jisasi'a huzmasmi vahemo'za haviza hu'naza zanku zmasmi'nea naneke
(*Mak 12:40, Luk 11:39-42,44,52, 20:47*)

¹³Hu'neanagi kva hiho, kasegere ugagota hu'naza vahe'ene, Farisi vahe'mota, tamagi'ari hutma tavre vahe mni'naze. Mona kumapima vunaku haza vahera, tamagra kafa erigita ahenkani renezmantaze. Na'ankure tamagra tmia unofretma zmatrage'za ufrenaku'ma haza vahera unofraze. ¹⁴[Kva hiho, kasegere ugagota hu'naza vahe'ene, Farisi vahera tamagi'ari hutma tavre vahe mni'naze. Na'ankure tamarga kento a'nemokizmi havige hunezmanteta nozimine, mafka zazimine rezmatga hutma kumzafa erivganereta, kefo zama nehaza zantami refitenaku za'za nunamu nehaze. E'i ana'ma nehzagu tusi'a kna erigahaze.ʃ]

¹⁵Kva hiho, kasere ugagota hu'naza vahe'ene, Farisi vahera, tamagiri hutma tavre vahe mni'naze. Mago'mo agu'a akarahe hinogura, tamagra mopafina vanohutma, hagerina taka nehaze. Anama hutma mago'ma nevretma, anamofona tamagra mni'naza avamena ageteretma tarezupa tevemofu mofavre azerinesaze. ¹⁶Kva hiho, tamavu'suhu kva vahera, tamagra anage nehaze, iza'o ra mono nonte huntenu huvempa haniana,

^f 23:14 Amana isa'a [vs 14] koma krenaza avontafepina mago'a agaterenazageta krentenone.

amne zane! Hianagi inamo'o ra mono nompima me'nea kolimofu agire'ma huvempa hanimo'a, agrama huvempama hunte'nea kere amage anteno. ¹⁷Tamavu suhuno neginagi vahe mni'naze! Ina'nazamo tusi'a razana me'ne, koli mopi, hipi ra mono nomo'ma koliretima azeri ruotge hu'nea zamo'e? ¹⁸Hianagi iza'o, kre sramnavu itamofonte hunteno, huvempa haniana amne'zane. Hianagi iza'o kre sramnavu itamofu agofetu me'nea ofare hunteno huvempama hanimo'a, huvempama hunte'nea ke'are amage anteno. ¹⁹Tamusuhu vahe mni'naze! Ina'nazamo razana me'ne, ofamopi, kre sramnavu itamo ofa azeri ruotgera nehio? ²⁰E'ina hu'negu, iza'o kre sramnavu itamofonte huvempa hanimo'a, kre sramnavu itare me'neazanku'ene huvempa nehie. ²¹Hagi iza'o ra mono nonte'ma huvempama himo'a, anampinkama nemnia Anumzante ene huvempa nehie. ²²Iza'o monamofonte huvempa hanimo'a Anumzamofu traku'ene, anantema nemnia Anumzanku huvempa nehie. ²³Kva hiho, kasegere ugagota hu'naza vahe'ene Farisi vahera, tamagi'ari hutma tavre vahe mni'naze. Na'ankure tamagra migufa'ene, nasene, zonkofea ofa nentaze. Hianagi kasegefima ugagota hu'neazana, fatgo avu'ava huzanki, asunkuzane, ke amage ante'zana tamagena hu'nemize. Hianagi ama zantmine, mago'azama nehazane tamagena huomitma amne hugahaze. ²⁴Tamagra tamuvusuhu kva nagare, havigfa kuko antetma azeri netraze, hianagi kemoli afura asagahu nevazize.

²⁵Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mni'naze. Na'ankure amega kapumofone, zompamofona tamagra azeri avusese nehaze. Hianagi zmagu'afina kumzafa'sezane zamagraguke huzamo avitene. ²⁶Tamavu asuhu Farisi vahekure, pusantera zompane kapumofona agu'afi sesehugeno, amega avufamo'a anahu kna huno avusese hino.

²⁷Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mni'naze. Na'ankure tamagra efeke paseteti vahe kerire frentageno amega kerimo'a avusese huno knare'za hiakna nehaze, hianagi agu'afinka fri vahe'mokizmi zferinamo ene avusese osu'nea zantamimo avite'ne. ²⁸E'inahu kante amega'a vahe zamurera tamagra fatgo huta mni'none nehaze. Hianagi tmagu'afinka tavrema huzamo'ene tra ke amage osu'zamo avite'ne.

²⁹Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mni'naze, na'ankure tamagra kasnampa vahe'mokizimi keru tro nehutma, fatgo vahe'mokizimi keru konariru hunentaze. ³⁰Ana nehutma amanage huta nehaze, Korapa tagehezane mni'nona sinifa, tagra anampina ufreta, zmagra'nena kasnampa vahe korana eru megira otro'sine nehaze. ³¹Amanahu kema nehazana agafatmi hufore hutma, tagra kasnampa vahema zmahe fri'naza vahe'mokizimi zmagehete hutma nehaze. ³²Tamagra nermageho'zama hunaza'zana

huvhareho. ³³Tamagra osifave, tamagra ha' osifavemofo mofavre zge. Inankna hutma tevefima vugahaze huno huramante'neana maniho hugahaze? ³⁴E'ina hu'negu keho, Nagra kasnampa vahe'ene, antahi'zane vahe'ma, kasegere ugagota hu'naza vahezga, huzmantoge'za neaze, mago'amokizimia, zmahetma hantigahaze, mago'amokizimia osi mono'nontamifi zmazeritma nofi knonu sefu nezamitma, ra kumate kumate zmazeri haviza hutma vano hugahaze. ³⁵Ana'ma hanageno'a mika fatgo vahe ama mopafi zmahageno tagirami'nea koramo'a, tmagrite egahie. Fatgo ne' Eboli koranteti agafa huno Berekaia nemofo Zekaraiama, tamagra ma ra mono none, kre sramanavu itamofo amu'nompima ahe fri'naza ne'mofo korante vugahie. ³⁶Nagra tamage hu'na neramasmue. Amana knafi vahe'motmage', ama ana knazana erigahaze.

Jisasi Jerusale rankumate vaheku asuntgi'nea naneke
(Luk 13:34-35)

³⁷Jerusale vahere, Jerusale vahere. Kasnampa vahe zamahenefritma, huzmantege'za tmagritega aza vahera have knonu zmahe'naze. Nama'a kna mofavre'zgatmia kokoremo anenta'a zga agekonanu zmazeri atru huno refite zmanteankna hunaku nehuanagi tamagra tamavenosie. ³⁸Keho, tamagri ra mono nomo'a, vahera omnigeno megusa avu'ava hie. ³⁹Na'ankure Nagra neramasmue, meninteti agafa hutma tamagra Nagrira onagetma maninetma anage hugahaze. *Anumzamofa agifima e'nemofona asomu huntenu huta hugahaze.*

Jisasi'ma enaku hanianknare fore hanizanku antahige'naza naneke
(Mak 13:1-2, Luk 21:5-6)

24 ¹Jisasi'ma mono kuma'ma atreno nevice'za, amage'ma nentaza disaipol nagamo'za ra mono nontami eme averisagu e'naze. ²Hianagi zamagriku anage Jisasi'a hu'ne, amama me'nea nontamina negazafi? Nagra tamage hu'na neramasmue, mago havemo'e huno mago havemofo agofetura omanetfa hugahie. Ana miko'mo'a tagnavazi ramigahie.

Jisasi'a tusi'a knaza fore hugahie hu'nea naneke
(Mak 13:3-13, Luk 21:7-19)

³Olivi agonarema vuno unemnige'za amage'ma nentaza disaipol nagamo'za, zmagra'agu e'za Jisasina eme antahige'za, nazupa kema hanazana fore hugahifi tasamio. Kagrama eku'ma nehnankeno'ene, ama mopama vgareku'ma hanigeno'a, nankna avame'za fore hugahie? Hu'za hu'naze. ⁴Jisasi'a ke'nona zamirera anage hu'ne, mago'a vahe'mo'za havi kante tmavare'za vuzankura kva hiho. ⁵Na'ankure rama'a vahe'mo'za,

Nagri nagihe'za, tagra kraisigate nehu'za rama'a vahe'zga zmazeri savri hugahaze. ⁶Ha'mofo nanekea nentahitma, ha'mofo agigenkea antahigahazanagi tamagra korera osiho. Na'ankure amanahu'zana amne fore hugahie. Hianagi mopa vgarekna zahufa ne-e. ⁷Na'ankure mago rankuma nagamo'za, oti'za mago rankuma nagara ha' huzmantenkeno, mago kini ne'mofo nagamo'za otino mago kini nemofo nagara hara huzmantenkeno, agate'zamo ene iminkomo hakare kaziga tusi'za hugahie. ⁸Hianagi ana maka zama fore haniana, mofavre ksenteku'ma eneria kna ataza ama erigafa nehie.

⁹Henka'a, ha' vahete tmagrira tamavare'za vnage'za tamata neramiza tamahe frigahaze. Hakare kuma'mo'za tusi'za hu'za zmavesra huramantegahaze. Na'ankure Nagri nagireku hu'za ana huramantegahaze. ¹⁰Ana knafina hakare'mo'za zmentintia atre'za vu'za, komoru ohunte ahunte nehu'za, zamavesra ohunte ahunte nehu'za, ¹¹hakare havi kasnampa vahetami fore hu'za mika vahera havigante zparentegahaze. ¹²Hagi na'ankure ke ontahi'zamo'a ame'namepi agatereno marenerinkeno, hakare vahe'mofo avesinte avu'avazamo zasi hugahie. ¹³Hu'neanagi aza'o amentintifima oti hampo'nama huno atupare'ma vanimofona aguvazigahie. ¹⁴Anumzamomofo kuma'mofo knare musenkea mopane mopane huama hutesageno, hagi vgarekna egahie.

Maka'za agatereno haviza hania naneke

(Mak 13:14-23, Luk 21:20-24)

¹⁵Hianagi tusi'a haviza'mo'ma ruotge hu'nesia kumapima efreno knare'zama ahe fnane nehnigetma negesutma ksanampa ne' Danieli hunte'neazamo'e nehuta, atrenke'za hamprisamo'za antahi ama hiho. (Dan 9:27, 11:31, 12:11) ¹⁶Hagi Judiama mni'namo'za fre'za agonarega viho. ¹⁷Aza'o nomote mni'nesimo'a, uramino noma'afintira mago'zana e'orino. ¹⁸Hagi hozafima mni'nesimo'a ruvahe huno nakre ku'a ome e'orino. ¹⁹Zamu'ene hu'naza a'nene, mofavre aminuntage ana knafi hanaza a'nemo'za, tusi'a knaza fore hugahianki kva hiho. ²⁰Nunamu nehinkeno fretma vuzamo'a, zasi knarero manifruhu knazupa (sabat) fore osino. ²¹Na'ankure ana knafima fore'ma hania knazamo'a, ese'ma mopa fore'ma huneregati fore osu'nea knaknaza tusi'a knaza fore hanigeno, henka'a anahu knazana fore osugahie. ²²Hanki ana knamo atupama osanigeno'a, magomo'e huno omanigahie. Hu'neanagi huhampri zmante'nea vaheku huno knamofona eritupa hugahie. ²³Mago'mo'ma tamagriku huno, keho, Kraisi'a amananki huge, Agra antune hania kerera tamentinti osiho. ²⁴Na'ankure havige kraisi'a ene, havige kasnampa vahemo'za efore hu'za, tusi'a avame'zane kaguva'za hu'za zmazeri savari nehu'za, hampo'nama atisu'za, Anumzamomo'ma huhampri'zmante namokizmia zmazeri savari hugahie. ²⁵Hagi antahi ankereho, korapa

Nagra fore hugahie hu'na tmasmi'noane. ²⁶Hagi henka'ma mago'mo kagriku hunoma, Agra ka'ma kopi eanki ko hanigenka ovutfu huge, ko, antu hunaraginte nompni mni'ne huno hanigeta, tamentinti osiho. ²⁷Na'ankure kopsi'namo zge hanatitegati zge fretega tevenefa tagivazu huno viankna nehanigeno, Vahe'mofo mofavrea egahie. ²⁸Na'ankure frino kasrine'niazama me'nesirega, anantega tumpa nmamo'za utru hugahaze.

(Mak 13:24-27, Luk 21:25-28)

²⁹Tusi'a knazama evutesigeno'a, ana knafina ame huno zagemo'a tusi'a haninkisigeno, ikamo'a tavira ontesigeno, ofuzgamo'a monafintira atafiramisigeno, hagi monamofo hankavemo'a kogekoge hugahie. (Joel 2:31, Rev-Huf 6:12, 13) ³⁰Ana hanigeno Vahe'mofo Mofavremofo avame'zana monare fore hanige'za, mika kazigati nagate nofite vahe'mo'za zmasunku nehu'za negesageno, Vahe'mofo Mofavre'a tusi'a hanave' ane masazama'afi mona hamponte eramigahie. ³¹Hagi ankerovahe'zga'a huntelige'za ufena nere'za, mopa omete emete huneregati'ma Agrama huhampri'ma zmante'nemokizmi, monamofo mago agentega vuno mago agentegatira zmavare atru hugahaze.

Fiki zafare hunte'nea fronka naneke

(Mak 13:28-31, Luk 21:29-33)

³²Fiki zafareti fronka kea rempi hunka antahio, knare huno amena'mo vuno eno huno ani'nama erimarena, zgegna egofta nehie hutma hiho. ³³Anahu kna kante, tamagra ma ama ana zantmima negesutma, Agrama esia knamo'a kofta huno kafantfante me'ne hutma tamagesa antahiho. ³⁴Tamagerafa hu'na Nagra neramasmue. Ama knafima mni'naza vahera ofrita mni'nesageno, ana mika'zana fore hugahie. ³⁵Monane mopanena fanane hugahie. Hianagi Nagri nanekemo'a fanane osu mevava hugahie.

Tro hutma maniho huno Jisasi hu'nea naneke

(Mak 13:32-37, Luk 17:26-30,34-36)

³⁶Hu'neanagi anama esia knane zgenena, mago nemo'a ontahi'tfaza hu'ne. Monafinka ankeromo'zane Nemomo'enenena ontahine. Hagi Nenfaka'za antahi'ne. ³⁷Na'ankure Noa knafi hu'nazankna avu'ava'za nehnageno Vahe'mofo Mofavrea egahie. (Jen-Agf 6:5-8) ³⁸Na'ankure tina ohage'nege'za, ana knafina, vahe'mo'za nezana nene'za, aka tina nene'za, a'nea e'neriza, ara masi omiami nehazage'no, Noa'a ventefina umreri'ne. ³⁹Zamagra mago zankura ontahi'za mni'nageno tinko'mo hageno eme zmaheno refite vgare'ne. Vahe'mofo mofavrema enaku'ma hanigeno'a, e'inahu'za fore hugahie. (Jen-Agf 7:6-24) ⁴⁰Hagi tare ne'trena hozafi tragote'ne mni'nesnakeno mago'mofo netreno, mago'mofona avregahie. ⁴¹Tare a'tremoke'a witi rga neganesakeno, mago'mofona netreno

mago'mofo avregahie. ⁴²E'ina hu'negu kavua ketenka manio, na'ankure kagri Ramo'a nanknare egahio, kagra ontahi'nane. ⁴³Hianagi ama'na kea antahi ankerenka antahio, nomofo nefa'ma musufa ne'mo kenagepima ne-esia knama antahi ankere'nesuno'a, agra kvahu ankere'ne'no atresigeno noma'a tapagana vazino uofregahie. ⁴⁴E'ina hu'negu tamagra nena trotra hiho, na'ankure Vahe'mofo mofavremo'a tamagra egahie hutma antahi omisaza knazupa egahie.

Havi eri'za vahe'ene tamage eri'za vahe'mokizmi naneke
(Luk 12:41-48)

⁴⁵Aza'o ke amage'anteno knare antahintahine kazokzo eriza ne'ma mni'nesiana, kva'amo noma'afi vahete kva hunte'nesigeno, ruga'a kazokzo eriza vahera knafatgorera ne'zana zamigahie. ⁴⁶Kazokzo eriza ne'mo kegva huno mni'nesigeno, kva'amo eno emegesimo'a muse hino. ⁴⁷Tamage hu'na Nagra neramasmue, kva'amo eri'za nera huntensigeno, miko zama'arera kegva hugahie. ⁴⁸Hu'neanagi ana havi kazokzo eriza nemo'ma agragu'ma huno, Nagri kva ne'mo'a hago zaza kna umanie nehuno, ⁴⁹agra agafa huno, magoka eri'za e'neriza kazokzo eri'za vahe nezmaheno, aka ti ne'za neginagi nehaza vahe'ene ne'zane, tinena ne'ne. ⁵⁰Anante ana kazokzo eri'za ne'mo kva'agu omegahie huno, keno antahino osnia knare'ma esuno'a, ⁵¹aheno rutnerare huteno, huntkeno tavre vahe'mofo kumapi umanigahie. Ana kumate zavike nehuno, ave' aninkreki hugahie.

10ni'a vene omase mofa'nemokizmi fronka naneke

25 ¹E'i ana knafina mona kumamo'a 10ni'a venenene omase mofanemo'za lampe tavizami'a eriri eriri huza, a' erinaku hia ne' ome tutagiha hunaku vu'naza kna hu'ne. ²Mago 5fu'a vene omase mofane'mokizmia knare antahintahia omanene. Hagi mago 5fu'a vene omase mofane'mokizmia knare antahintahi me'ne. ³Hu'neanagi knare antahintahima omanenea mofane'mo'za rampe tvi zamia eri'nazanagi, mago'a masevena e'orinaze. ⁴Hu'neanagi knare antahintahima me'nea mofane'mo'za tafero zamifina mago'a masevena eririza rampe tvi zaminena vu'naze. ⁵A'ma erinaku'ma hu'nea nera kora omegeno zamu toko hige'za mse'naze. ⁶Hianagi kenage amu'nompi mago ne'mo kezatino, A'ma eri nera hago e'ne! Atiramita eme keho! Hige'za, ⁷anante ana maka mofanemo'za oti'za tvi' zimi erira hu'naze. ⁸Anante knare antahintahima omane'nemo'za, knare antahintahima me'nemokizmia zmantahige'za, mago'a masavena tamiho, na'ankure tvi timo'a asu nehie huza hazegeno, ⁹knare antahintahima eri'namo'za kenona huzamante'za, i'o masave timo'a tmagri'ene tagrienena knarera huorantegosianki, feno nontega vuta, tamagra su'zana ome miza seho hu'naze. ¹⁰Ana masave mizasenaku nevgazeno, a'ma eriku'ma hu'nea nera ege'za, tro'ma hu'za

mani'naza mofa'nemo'za, aravehu ne'zama retro hunte'nea nomp agrane marerizageno kahana erigi'ne. ¹¹Henka ana knare antahizazmi omane 5fu'a mofa'nemo'za e'za Ramoke, Ramoke kahana anagiranto hu'naze. ¹²Hianagi ke nona huzamanteno, tamage hu'na nerasmue, nagra ontamage'noe huno hu'ne. ¹³E'ina hu'negu kva huta maniho, na'ankure Vahe'mofa Mofavrema ete esiankna ontahi'naze.

Kazokzo eri'za vahe'mokizmi zgo refako huzami'nea fronka naneke
(Luk 19:11-27)

¹⁴Mago'ane Mona kuma'mo'a amanahukna hu'ne, Mago ne'mo' ru kaziga umanigeno enaku nehuno, eri'za vahe'a kehutru huno, zamagri'zmi avamente zago'a refako huzami'ne. ¹⁵Mago'mofona 5tauseni'a zago amino, mago'mofona 2 tauseni'a zgo amino, magomofona 1tauseni zgo ami'ne. Hanave zamimofa avamente refako huzamiteno, atreno afete kana vu'ne. ¹⁶Anama kva amo'ma nevigeno, ame huno 5 tauseni'a zgoma eri'nea ne'mo'a, ana zgonuti eri'za erino mago'ane 5 tauseni'a zgo eri fore hu'ne. ¹⁷Anahu kna huno 2 tauseni'a zgo eri'nea ne'mo'a, mago'ane 2 tauseni'a zgo erifore hu'ne. ¹⁸Hu'neanagi 1 tauseni'a zgoma eri'nea eri'za ne'mo, mopafi keru ome kafino kva'amofa zgo asente'ne. ¹⁹Hagi zazakna kva zimimo'a umaniteno, eno kazokzo eri'za naga'a ke hutru huno, zgoma zami'nea zgo eri fatgo huno kenaku zmantahige'ne. ²⁰5 tauseni'a zgoma eri'nea eri'za ne'mo, mago'ene 5 tauseni'a zgo eri agofetu huno eno amanage hu'ne. Ramoke kagra antahi naminkama 5 tauseni'a zgoma nami'nana zgoreti, mago'ane 5tauseni'a zgo eri agofetu hu'na zgo erifore hu'noe higeno, ²¹kva'amo'a kenona hunteno, knare'zantfa hane, kagra knare hunka fatgo eri'za nere. Osi'a zantera knare hunka kegva hanku, nagra kavare antesnugenka rama'a zante kegva krigahane. Hagi enka NAGRANE muse eme huo hu'ne. ²²Anante 2 tauseni'a zgoma eri'nea ne'mo eno amanage hu'ne, ramoka, antahi naminkama 2 tauseni'a zgo nami'nantetira ko, ete 2 tauseni'a zgo eriagofetu hu'noe higeno, ²³kva'amo ke nona huno, knare'zantfa hane, kagra knare hunka fatgo eriza nere, osi'a zantera knare hunka kegva hanku, nagra kavare antesnugenka rama'a zante ke kva krigahane. Hagi enka NAGRANENA musena eme huo hu'ne. ²⁴Anante 1tauseni'a zgoma eri'nea eri'za ne'mo eno amanage hu'ne, Ramoka kagra himamu ne' mani'nankena kage'na antahi'na hu'noe, kagra ohankre'nana hoza nevsagenka, avimza orani'nana ne'za nevasganku, ²⁵kagoro hugante'na zgoka'a keru ome kafina mopafi asente'noreti, ama ana maka zago ka'a vati'na eri'na oanki ko higeno, ²⁶kva'amo ke nona hunteno, kagra haviza hunka, eriza e'ori ne' mani'nane. Kagra ko nagenka nantahinka hu'nane, ohankre'noa hoza nevasage'na, avimza orani'noa ne'za enerugu, ²⁷kagra zgoni'a zgo nomp ome ante'nankeno, mago'ane zgoa erifore nehige'na,

ete eme eruresine. ²⁸E'ina hu'negu zgoa agripintira eritma, 5 tauseni'a zgoma eri'nemofo amiho hu'ne. ²⁹Na'ankure, mago'azama ante'nesamo'za mago'ane eneri'za, zmesi' nesiazana rama'a erigahaze. Hu'neanagi mago'azama onte'nesimofompintira eri'nesnia zana eritregahie. ³⁰Hagi ama kefo eri'za nera avreta fegi'a kumzu hanimpi ome matevuta atreho, e'i anampina vahe'mo'za zavi krafa nehu'za, zmave anikreki hugahaze.

Mika vahe refako hania naneke

³¹Vahe'mofo Mofavremo ete hanave'afine msa zama'afima mika ankeru zga'anema esuno'a, Agra masa nentake tra'are emanigahie. ³²Mika kokankokati vea'mo'za Agri avure emeritru hanageno afu kva nemo, afu kevufinti memene sipisipi afutmi refako hugantugma hiankna huno, zamazeri kantugma hugahie. ³³Sipisipi afu'tmina, Agra aza tamaga kaziga zmvrenenteno, meme afutmina aza hoga kaziga zamavrentegahie. ³⁴Anante kinimo'a azantmaga kazigama mani'namokizimigura amanage huno hugahie. Nafa'nimo'a asomu huramante'neanki, etma mona mopa tro osu'nenoma retro huramante'nea kuma emeritru hugahie. ³⁵Na'ankure nga'ma'netegeta Nagrira ne'za namizage'na ne'noe. Tinku nave'nesigeta Nagrira tina namizage'na ne'noe. Nantu vahe Nagra neogetma nontamifi navrente'naze. ³⁶Navufa navapa mani'nogetma Nagrira kukena hunante'naze. Kri eri'nogeta Nagrira kegva hunante'naze, Kina nompini mani'nogeta, Nagrira eme nage'naze hanige'za, ³⁷anante fatgo vahe'moza ke nona hunte'za, Ramoke, nazumepaga kagakura nehanketa ne'zana kami'none? Inazupa tinkura kave'nesigeta, kamunkenka ne'nane? ³⁸Nazumepaga kagonkenka Kagra nantu vahera neanketa kavare nontifina kante'none? Nazupa Kagra kavufa kavapara mani'nanketa, kukena hugante'none? ³⁹Nazumepaga kagonkenka, Kagra kria eri'nane, nazupa Kagra kina nompina mani'nanketa, ome kagenone? ⁴⁰Kini ne'mo kenona huzmanteno amanage hugahie, tamage hu'na neramasamue, amama zmagima omane nafuhe'impinti mago zmimofoma nankna avu'ava huzmante'nazana, Nagri hunante'naze.

⁴¹Nehuno anante aza hoga kazigama mani'namokizimia amanage huzmantegahie, tamagra kausifi mani'naze, maniganeta kefo nemofone, ankeru naga'amofoma retro'ma huzmante'nea tevava tevefi ufrehu. ⁴²Na'ankure nga'ma'netegeta magore hutma ne'zana namizage'na one'noe, tinku nave'nesigeta magore hutma tina afi onami'naze. ⁴³Nantu vahe neogeta nontimifina navre onte'naze. Navufa navapa mani'nogetma kukena huonante'naze. Krima eri'noane, kina nompina maninogeta eme onage'naze. ⁴⁴Ana vahe'mo'za ke nona huntegahaze, Ramoka, nazu'mepa kagonkenka kagakura hu'nane, hifi tinkura kavesi'ne, hifi nantu vahe e'nane, hifi kavufa kavapa mani'nanketa, kukena huogante'none, hifi kria eri'nane, hifi kina nompina mani'nanketa kza osu'none? ⁴⁵Hanageno Agra

ke nona huzmantegahie. Tamage hu'na neramasmue, amama zamagi omne'nea vahe'pinti, mago zmimofoma mago'zama huonte'nazana, Nagri huonte'naze. ⁴⁶Hanige'za ana vahe'mo'za manigane'za mani'vava zamatazampi vugahaze. Hianagi fatgo vahe'mo'za mani'vava mani'zampi vugahaze.

Jisasi ahefriku ke retro hu'naza naneke

(Mak 14:1-2, Luk 22:1-2, Jon 11:45-53)

26 ¹Jisasi'ma ana maka naneke huvgareteno, amantage huno amage'ma nentaza disaipol nagara zmasmi'ne. ²Antahi'naze Anumzamo Israeli vea kinafinti zmare'nea kna, tare knama agteresigeno egahie. Hagi Vahe'mofo Mofavre avare zamisage'za, ahe'za keka zafare hantigahaze.

³Hanki ugagota pris vahe'mo'zane, Israeli vahe'mokizmi ranra kva vahe'mo'zane, ugagota mono kva ne' Kaiafasi kumapi atru nehu'za, ⁴Jisasima havige hunte'za, azeri'za ahefrisaza naneke, oku'a huge antahige hu'naze. ⁵Hu'neanagi anage hu'za aru amu'nozmifinti ke hakare hu'za ha' eri fore hu'zanku kinafinti zmare'nea knagu antahimi'za ne'zane knarera anara osugahune hu'naze.

Masave Jisasi frente'nea naneke

(Mak 14:3-9, Jon 12:1-8)

⁶Jisasi'a Betani kumate Saimoninku fugo ne're nehaza nemofo nomp marerino mani'negeno, ⁷mago a'mo hentofa have tafempi mananentake huno mizama'amo mareri'nea masave erineno, Jisasi'a aza tununte itare mase'negeno, asenire tagino frente'ne. ⁸Hianagi amage'ma nentaza disaipol naga'mo'za, anama hiaza nege'za zmarimpa haviza nehige'za, ama masavena na'a higeno amne zanknara nehie hu'naze? ⁹Ra mizante atreno, zago erino amunte omne vahe zamigare nehazageno, ¹⁰Jisasi keno antahino nehuno'a anage hu'ne, nahigetma ama ara antahi haviza hunentaze? Na'ankure agra knare avu'avaza hunenante. ¹¹Zamunte omne vahera zamagra mika zupa tamagra ne manigahaze. Hagi Nagra mika zupa tamagra nena omanigahue. ¹²Ama a'mo'ma navufare masavema frenenanteana, asemanante'zamofa nazeri retro nehie. ¹³Tamage hu'na neramasmue, mopane mopane vu'za e'za nehu'za, knare muse keni'a huama hanarega, ama a'mo hia avu'avazankura huama hu'za vahera nezmasmisage'za, zamagesa antahimigahaze.

Judasi'a komoru hanige'za Jisasi azerisnaza naneke

(Mak 14:10-11, Luk 22:3-6)

¹⁴Anante 12fu'a amage nentaza disaipol naga'afinti Judas Isakarioti'e nehza ne'mo, ugagota prisi vahete vuno, ¹⁵amantage huno zmantahige'ne.

Na'a namisagu nagra Jisasina avreramigahue? Hige'za tagufa zota zgoa hampriza ami'naze. (Zek 11:12-13) ¹⁶Ana knaretima vu'neana Jisasima avare zamisia kankamu fore hanigu Judasi'a hakrene.

Jisasi'a amage nentaza disaipol naga'ane vgare ne'za ne'nea naneke
(Mak 14:12-21, Luk 22:7-14,21-23, Jon 13:21-30)

¹⁷Zo'ore Breti nenaza hompa knamofona ese zupa, amage nentaza disaipol nagamo'za Jisasinte e'za eme antahige'za, inantega kinafinti zmare'nea knagu antahimi ne'zana retro hugante'sunkenka negahane? ¹⁸Jisasi ke nona'a huno, Rankumate ufresuta'a mago ne' ome kegaha'anki amanage huta ome asami'o, rempi hurami' ne'mo'a amanage huno hu'ne. Knani'a atupa nehigu nonka'afi namage'ma nentaza disaipol nagani'ane kinafinti zmare'nea knagu antahimi ne'zana negahune hune hutna hi'o. ¹⁹Higene Jisasi'ma huznantea kante anteke, amage'ma nenta'a disaipol netremokea ne'zana ome retro hu'na'e.

²⁰Anama higeno Jisasi'a 12fu'a amage' nentaza disaipol naga'ane neza nenaza trate zmaza tununte mni'naze. ²¹Ne'za nenageno Jisasi'a zmasamino, tamage hu'na neramasmue, mago'moka ha'ma renenantaza vahe'mokizmi zmazampi komoru hunka nevrentegahane. ²²Amage'nentaza disaipol naga'mo'za zmusunku nehu'za magoke magokemo'za Jisasinku anage hu'naze, Ramoka tamage nagriku nehampi? ²³Jisasi' kenona'a huno, ama tafepinti'ma ne'zama magoka Nagrane nenompinti, mago'moka nagrira ha' vahe zmazampi navarentegahane. ²⁴Agriku'ma hu'za krente'naza kante, Vahe'mofo mofavremo frigahie. Hianagi kva hino, komoru huno ha' vahete navre zamisnia ne'mo'a, nerera'ma kse ontene'sinia knare hisine. ²⁵Komoru huno ha' vahe avare zmisia ne' Judasi'a amanage hu'ne, Hurami' ne'moka tamage nagriku nehampi? huno higeno, Izo kagra ha e'i nehane, huno Jisasi'a asmi'ne.

Jisasi'a hame ne'za zamige'za ne'naza naneke
(Mak 14:22-26, Luk 22:15-20, 1 Kor 11:23-25)

²⁶Anama nenageno, Jisasi'a breti erino Ramofonte sus huno nunamu huteno, erigorino amage'ma nentaza disaipol naga'a nezmino amanage hu'ne, Ama'i nagri navufgagi erita neho. ²⁷Anante Jisasi'a mago waini tafero erino Anumzantega susu huno nunamu huteno nezamino, mika'mota ama anampinti neho hu'ne. ²⁸Na'ankure Anumzane huhagerafita manisnaza'zamo avempa huno mesnigu ama'i korani'e. Mika vahe'mofo kefo zazmi eri apase zmantenigu korani'a tgi neramue. ²⁹Amanage hu'na neramasmue, Meninteti'ma vniana wainia mago'ene one'na henka'a, Nfa'nimofo kumapi tamagra ne ksefa waini negahune. ³⁰Mago zgame hute'za, atirami'za Olivi agonare vu'naze.

Jisasi'a vahane hugahane huno Pitanku hu'nea naneke

³¹Jisasi'a amanage huno zmasmi'ne, meni kenegetfa Nagrite'ma fore'ma hania zanku natretma fregahaze. Na'ankure ko avontafepina krente'no, *Nagra sipsipi kva ne' ahesuge'za sipisipi kevumo'za panini hu'za ufre efre hugahaze* hu'ne. (Zek 13:7) ³²Hianagi fripinti oti'na Galili ugote'na vugahue. ³³Pita'a kenona huno, mikamo'za kagrite'ma fore'ma hania zankura katre'za fre vgaregahaze. Hianagi nagra onkatretfa hugahue. ³⁴Jisasi'a huno, tamage hu'na negasmue, meni kenegetfa kokorege osu'nenkenka, tagufa zupa Nagrikura onke'noe hunka vahane hugahane. ³⁵Pita'a amanage huno asmine. Ha nagra Kagrane fritfa hugahue, hanki'na Kagrira okage'noe hu'na vahane huogantegahue. Hige'za ana miko amage'ma nentaza disaipol nagamo'za ana kege hu'naze.

Jisasi'a Anumzane naneke hu'nea naneke

(Mak 14:32-42, Luk 22:39-46)

³⁶Jisasi'a amage nentaza disaipol naga'ene Getsamenie nehzarega vuteno, anage huno zmasami'ne, amare mni'nenkena Nagra amnure nunmu ome huteno nehuno, ³⁷Pita nevreno Zeveti ne'mofavrea zanagri kogna Jemisine Jonine znavreno nevigeno agafa huno rimpamo tusi kna avenesigeno agu'amo haviza nehigeno, ³⁸amange huno zamasmie'ne, nagu namemo'a tusiza huno kna nehuno, nazeri fri kante nevie. Amare mni'neta Nagrane kvahuta manihio. ³⁹Osi'a vu ogamnu'a atreno avugosaregati mopafi unemaseno, Anumzamofontega nunamu huno, Nfa'nimoka knare'ma hu'nesiana, ama'i knazana eri atrenanto. Hu'neanagi Nagri navesira ovaririo. Kagri kavesizamo forehino. ⁴⁰Ananteti amage'ma nentaza disaipol nagate eno, zamageana, zamu mse'nageno, Pitanku amanage hu'ne. Tamagra mago auafina naganena kva osugahazo? ⁴¹Reramatagafi ufreta traka hanagi, kva huneta nunamu hiho. Avamu timimo'a ave'nesianagi, amega tamavufgamo'a avenosie. ⁴²Ete mago'ene vuno nunamu ome huno, Nfa'ni moka ama'i knazamofa taferora eri atre onante'nanke'na nesuana, Kagri kvesimo forehugahie. ⁴³Ete eno eme zamageana zamu toko hige'za zamu mase'nageno, ⁴⁴ete zmatreno vuno tagufa zupa ko'ma hu'neankna ke huno Anumzantega nunamu ome hu'ne. ⁴⁵Ananteti eno amage'ma nentaza disaipol naga'a zmasmi'ne, tamagra manigsa nehutma tamu masenazo? Keho, Vahe'mofa mofavrema komoru hu'za kumi vahe'mokizmi zamazampi avremisaza knahie. ⁴⁶Otinke' vamneno, komoru huno Navre zamisinie nera ama ne-e.

Jisasina komoru hu'za azerinaza naneke

(Mak 14:43-50, Luk 22:47-53, Jon 18:3-12)

⁴⁷Jisasi'a ke huvga ore'negeni 12fu'a amage'ma nentaza disaipol naga'afinti mago'mo Judasi ehanitino tusi'a vahe kevune e'ne. Ugagota

pris kva vahe'mo'zane, Jiu kva vahe'mo'za huzmantage'za kazinknone kumpa knone eri'za e'naze. ⁴⁸Jutasi'a komoru hu'nemo zamasmino, agi'ma antako hanuana, e'i ana neki azeriho. ⁴⁹Judasi'a ame huno Jisasinte vuno knare kenegere hurami Ne'moke nehuno, agi antako hu'ne. ⁵⁰Jisasi'a ke nona'a huno, Rone'nimoka hunakurema hunka anazana huo. Anante ruga'amo'za e'za Jisasina eme azeri'naze. ⁵¹Hianagi mago Jisasi'ene mani'nea ne'mo, kazinknoma'a erino ugagota pris ne'mofo kazokzo eri'za ne' agha rukafri atre'ne. ⁵²Ana higeno Jisasi'a amanage huno asmi'ne, kazi knonka'a anoma'afi vazinto. Kazi knonu ha' nehaza vahe'mokizmi'a kazi knonu zamahe frigahaze. ⁵³Kagra ontahinampi, Nagrama Nenfanku antahigesugeno'a, mago'ane 12 tauseni'a sondia ankeru kevu vahe menitfa erami'za naza hanazana? ⁵⁴Hianagi amanahu kante fore'ma hino huno Anumzamofu avontafepima kre'nea kemo'a, inankna huno efore hugahie?

⁵⁵Ana knafi Jisasi'a ana vahe kevu amanage huno zamasmine, Nagri nazerikura nahigeta kazinknone kumpa kno erita kumzafa vahe zamazeriku nehazankna hutma neaze? Knaneknane ra mono nompini mani'ne'na naneke huneramasmugeta naze'ori'naze. ⁵⁶Hagi ana maka zama fore hu'neana korapa kasnampa vahe'mo'za, fore hugahie hu'za kre'naza'zamo avufga'a fore hu'ne. Ananknafi amage nentaza disaipol nagamo'za atre'za fre'naze.

Jisasina kanisol vahete avare'za vu'naza naneke

⁵⁷Jisasima azeri'za vu'naza vahe'mo'za, Kaiafasi ugagota pris nemofo nompini avare'za vu'naze, ana nompina kasegere ugagota hu'naza vahe'ene Jiu ranra kva vahe'mo' za atru hu'za mani'nazafi avare'za vu'naze.

⁵⁸Hu'neanagi Pita'a ogama'a zmavaririno nevuno, ana mono ne'mofo no kumapi ufreno, Jisasinte'ma fore haniaza kenaku eri'za vahe'ene umani'ne.

⁵⁹Ugagota prisi vahe' mo'zane ana miko kanisol (Senhitren) vahe'mo'za, Jisasi havige huntage'za ahefrisaza vaheku hakare'naze. ⁶⁰Hianagi miko vahe'mo'za eama hu'za havige huntazanagi, mago havizama'a hake'za eri fore osu'naze. Hianagi henka'a taremoke eama huke,

⁶¹Jisasinku anage hu'na'e, Ama ne'mo Anumzamofu ra mono nona tapage hu'na tagufa knafi ki vgaregahue, huno hu'nea nere. ⁶²Anante ugagota prisi nemo otino amanage huno, Ama nanekema hunegantarera kenona osugahampi? Na'a hu'nanke'za ama vahe'mo'za kea hunegantaze?

⁶³Jisasi'a ke osu' mani'negeno ana ugagota prisi ne'mo amanage hu'ne, kasefa huno mani'nea Anumzamofu agire nehuanki tasamio. Kagra, Kraisiga Anumzamofu Nemofogafi? higeno, ⁶⁴izo Kagraka'a hago nehane. Hianagi amanage hu'na mika motmagura nehue, henka'a Vahe'mofo mofavremo'a, negesnageno Anumzamofu azantmaga kaziga manino hihamu'ane mona hampompi ne-enketa kegahaze.

⁶⁵Higeno ugagota mono kva ne'mo kukena'a eritagato hunetreno amanage hu'ne, keho Anumzamofonku azanava ke nehie! Mago'ene naneke huontegosune, tamagra tami azanava kema huntea kea nentahize.

⁶⁶Hagi na'ane tamagesa nentahize? Hige'za kenona hu'za, hazenke hu'neankino frisie.

⁶⁷Nehu'za Jisasina avufi zmetu henente'za zamaza kano ahe'naze. Mago'amo'za zamaza rutarete'za nehe'za, ⁶⁸amanage hu'za antahige'naze, kagra Kraisiqe, aza negahefi kasnampa ke hu'ama hunka tasimio?

Pita'a Jisasinku onke'noe, hu'nea naneke

(Mak 14:66-72, Luk 22:56-62, Jon 18:15-18:25-27)

⁶⁹Ana kumapi fegi'a Pita'a umani'negeno mago eri'za mofa'mo eno, kagranena Galili ne' Jisasi ene vano nehazafinti mago zamimoke, hu'ne. ⁷⁰Pita'a maka vea zamufi vahane huno, nagra ontahi'noa zanku nehane. ⁷¹Ananteti atiramino ana kumamofu kafante vigeno, mago ru eriza mofa'mo negeno, anante'ma mani'naza vahera zamasmino, ama nera Jisasi Nazareti ne'ene nemnia nere. ⁷²Pita'a mago'ene vahane huhampo'na huno, nagra onke'noa neku nehane hu'ne. ⁷³Anante osi'a kna evige'za, oti'za mani'naza vahe'mo'za Pitante eza, anage hu'naze, tamage kagra mago zamimoke, na'ankure kageru'mo hufore nehie. ⁷⁴Pita'a hanave kefinti agra'agu huhaviza nehuno, monamo'a antahine, tamage nagra onke'noa neku nehaze, higeno kokoremo'a ana agi'ene krafa hu'ne. ⁷⁵Anante Jisasi'ma hu'nea kere Pita'a agha antahigeno vu'ne, kokoremo krafa osu'nenkenka onkenoa nere hunka tagufa zupa vahane hugahane hu'nea kegu nentahino, Pita'a fegi atiramino tusi asunku huno zavi ate'ne.

Judasi fri'nea naneke

(Apo 1:18-19)

27 ¹Ko'matigeno nanterama'a maka ugagota mono kva vahe'ene, ranra kva vahe'mo'za atru huza Jisasi ahefrisanaza naneke hunaki'naze. ²Ana hute'za Jisasina azeri'za nofi kite'za, rankumamofu kagota kva ne' (Gavana) Paeroti avare'za omemi'naze.

³Komoru huno avare zami'nea ne' Judasi'a antahiana Jisasi frigahie kema nentahino'a, rama'a asuza e'nerino, tagufa azotama ami'naza zgo'a erino ugagota mono kava vahete'ene ranra vahete vuno, ⁴amanage hu'ne, hazenke'a omane ne'ma komoru hu'na avare tamuana, nagra kumi hue huno hige'za zamagra anage hu'naze, tagri zana omane'neanki kagri'zane hu'naze. ⁵Judasi ana zgo'a mate'vuno ra mono nomofu agu'afi netreno, vuno kana ome he'ne. ⁶Ugagota mono kva vahe'mo'za ana zgo eneriza anage hu'naze, trakemo'a i'o hu'negu vahe'ma zamahe frikuma mizama ase'naza zgo'a mono nomofu zgo tafempina ontegahu'ne. ⁷Anante kehuge antahige hute'za, ana zgonuti mopa kvo tro nehia ne'mofu

mopa, ru kazigati emani vahe fri hanageta asezamantesuna mope hu'za mizase'naze. ⁸ Amana kegafare, ana mopagura kora mope hu'za meninena nehaze. ⁹ Anante kasnampa ke Jeremaia hunte'nea kemo avufga'a fore hu'ne. *Israeli vahe'mo'za agri avufgare huhamprinte'naza 30ti'a silva zgoa zmagra eri'naze,* ¹⁰ *nehu'za ana zgoa eri'za, Ramo nasmi'nea kante mopa kvo tro' nehia ne'mofo mopa miza segahaze.*

Jisasi Paeroti avuga keagare otinea naneke
(Mak 15:1-5, Luk 23:1-5, Jon 18:28-38)

¹¹ Jisasi'a anante ra kumamofu kva (Gavana) ne' avuga uotigeno agenoka huno, Kagra Jiu vahemokizmi Kini mani'nano? Izo e'ima kagra nehanane, huno Jisasi ke'nona hu'ne. ¹² Hagi ra mono kva vahe'mo'zane, ranra kva vahe'mo'za naneke humanentageno'a Jisasi'a kenona huozmante'ne. ¹³ Anante Paeroti'a amanage hu'ne, hakare hazenkema hu'nana zanku'ma naneke'ma huma negantazana nentahimpi? ¹⁴ Jisasi'a magore huno keagama huntea kerera, ke nona'a osutfu higeno, Paeroti'a tusi'a antari hu'ne.

Jisasi frisnia naneke
(Mak 15:6-15, Luk 23:13-25, Jon 18:39-19:16)

¹⁵ Ra kumate kva ne'mo'a agri'a avu'avakino mika kafurera kinafinti zamavre'nea knare muse hu'za kave ne zupa (pasova) kinafinti zamesimofonku hazageno avare fegu'a netreane. ¹⁶ Hagi ana knafina mago nera agi'a Barabasi'e tusi hazenketi'nea ne' kina nomp mani'ne. ¹⁷ Maka veama atru hutageno'a, Paeroti'a zamantahigeno, azanku tamenesi'a katufe tamisue? Barabasipi, Jisasinku Kraisi'ema nehaza nere? ¹⁸ Krunonkema Jisasi hunte'za avare'za eme ami'nazana agra antahinokeno hu'ne. ¹⁹ Paeroti'a ke refakohu tra'are'ma mani'negeno'a, nenaro'a ke atregeno vu'ne. Meni kenagera mse'ne'na Agrite'ma ke'noa avanamo'a tusi ngogofe'ne. E'i Nera fatgo ne' mani'neanki, mago zana huonto.

²⁰ Hianagi ra mono kva vahe'mo'zane, ranra kva vahe'mo'za, Barabasi tamiho nehutma Jisasina ahefrio hutma hiho, hu'za mika atru hunaza veara masave ke zmasami'naze. ²¹ Hianagi rankuma kva ne'mo'a, ama tare netrempitira inamofonku tamenesigu nagra katufe tamisue? Higeza zamagra Barabasi'e hu'naze. ²² Paeroti'a zmasamino, Jisasinku tazahu ne' Kraisi'ema nehaza nera na'a huntuesegu tamenesi'e? Hige'za ana mika veamo'za, Rugeka zafare aho, hu'za kezatiza hzageno, ²³ Paeroti'a kenona huzmanteno, Naza havizana hu'negeta neheze? huno hige'za, mago'ene kezati'za, Rugeka'zafare ahegeno frino. ²⁴ Paeroti'a keana maka vea'moza ra kege hazageno, mago'za huga nosuno tifino hakare vea zamufi aza sese nehuno, ama ne'mofo kora kumira nagripina omanegahianki, tmagri zane

hu'ne. ²⁵Hakare veamo'za ke nona'a hu'za, atregeno agri kora kumimo'a, tagripine mofavreti'fine meno, hu'naze. ²⁶Anante Paeroti'a Barabasina atregeno vigeno, Jisasina sefu amite'za rugeka zafare hesnazegu avare'zmine.

Sondia vahe'mo'za Jisasi huhaviza hunte'naza naneke

²⁷Rankumate kva ne'mofo sondia vahe'mo'za Jisasi avare'za ana nemofo kumapi mika sondia vahe nemniza kumate ufrageno regaginte'naze. ²⁸Anante Jisasina kukena'a eri'hate netre'za koranke kukena hunente'za, ²⁹ave'ave nofite kini vahe'mokizmi fetorikna huza tro hu'za asenire antaninte'za, azota tmaga azampi erinte'naze. Hagi avuga kaziga zamarena renamagi'za revatga nehu'za, Jiu vahe'mokizmi kini nera ama'ne! hu'za hu'naze. ³⁰Zametu ahenente'za azampinti azota hanare'za anumpi amasgi'naze. ³¹Ana hu'za huhaviza huntete'za, ana koranke kukena hatenetre'za, agri kukena ete erihuntete'za, rugeka zafare aheza hantinaku avare'za vu'naze.

Jisasina rugeka zafare ahe'naza naneke (Mak 15:21-32, Luk 23:26-43, Jon 19:17-27)

³²Anama atinerami'zageno mago nera Sairini kazigati Saimoni'e hu'za nehaza ne' eme nege'za, Jisasi rugeka zafa eri kofino vinogu tutu hunte'naze. ³³Mago kumara aseni zaferine nehazare (Golgota) uhanatinaze. ³⁴Anante waini timpi akaza erihava hute'za, Jisasi amizageno neno keana higeno, one'ne.

³⁵Rugeka zafare azerinte'za hanto'ma ahete'za kukena refako huku kasi zokago (tais) re'naze.^s ³⁶Anante Jisasinte kvagri'za mani'naze. ³⁷Hagi anuntega avoma kre'za ahentenazana, **ama nera Jisasi'e. Jiu vahe'mokizmi kini nere** hu'naze.

³⁸Anante ruga raga asopare kumzafa netrena rugeka zafare znahe'za magoka hanti'naze. ³⁹Hagi ana kante agatere'za vu'za e'za haza vahe'mo'za, azanva ke nehu'za zmageno ru'za, ⁴⁰amanage hu'naze, Kagra ra mono nona tapage hunka tagufa knafina ete kivga'regahue hu'nane, hagi Anumzamofu Mofavre mani'nesnunka kagraka'a kza hunka rugeka zafaretira eramio. ⁴¹Anahu kante anteza ugagota prisi vahe'mozane, kasegere ugagota hunaza vahe'mozane, ranra vahe'moza azanva ke nehu'za amanage hu'naze. ⁴²Ru vahe'mokizmi zamagu vazineanagi Agra'a agura novazie. Israeli vahe'mokizmi Kinima maninesuno'a! Atregeno rugeka zafaretira menina eraminketa, tagra Agrite tamentinti hamaneno. ⁴³Anumzanku amentinti nehie. Atregeno Anumzamo avesima antesuno'a menina aguvazino, na'ankure Anumzamofu

^s 27:35 Kasi zokagorema hu'neana, havere avo kreteneza atrazageno mareri nambama erimo eneria zokagore.

Mofavre mani'noe huno hu'ne. ⁴⁴Hagi tare kumzafa netre Agri'ene znahe'za hantinaza netremoeka, ana zanke huke huhaviza hunte'na'e. (Sam-Zga 22:7-8)

Jisasi fri'nea naneke

(Mak 15:33-41, Luk 23:44-49, Jon 19:28-30)

⁴⁵Zgemo anuntupi me'negeno mika mopane haninkino kinaga 3 kiloki uhanitine. ⁴⁶Jisasi'a ranke huno, Eloi eloi lema sabaktani, Hibru kefina Anumzanimoke, Anumzanimoke, nahigenka kamagena hune'namine huno hu'ne. (Sam-Zga 22:1) ⁴⁷Anage hige'za anante mago'a oti'za mani'namo'za nentahiza, Ilaijanku ke nehie hu'naze. ⁴⁸Ame huno mago'zimimo agareno kapuku (Spans) urino aka waini timpia areteno zotare antenagamu teno Jisasi nesiegu ami'ne. ⁴⁹Ruga'amo'za anage hu'naze. Ilaija eme agu vazigahifi atre'nenketa kamaneno, hu'za hu'naze. ⁵⁰Jisasi mago'ene kezatino ra krafa nehuno, asimu'a atreno fri'ne.

⁵¹Anama nehigeno'a, ra mono nomofo kasante tifi'nea tavravemo amunompinti sgane huno nagamuti tami'ne. Ana nehigeno imi enerigeno, ranra haveramimo rutane herafine. ⁵²Ana nehigeno fri vahe'mofo keriramimo, hagro nehige'za korapa'ma rama'a fatgo veama fri'namo'za oti'naze. ⁵³Jisasima otitege'za, matipinti otite'za Jerusale ruotage hu'nea rankumapi ufre'za hakare vahete eama hu'naze. ⁵⁴Anante 100ti'a sondia vahe'mokizmi kva ne'ene, mago'ama Jisasinte kvagri'naza sondia vahe'moza imima enerigeno fore hiaza nege'za tusi kore nehu'za, Tamage ama Nera Anumzamofa Mofavre! hu'naze. ⁵⁵Galili kazigati hakare a'nenemo'za, aza nehu'za magoka vano nehazamo'za anampi ogamu'a mani'ne'za ke'naze. ⁵⁶Ana a'nefina, mago a'ra Maria'e Makdala kazigati. Hagi mago a'ra Jemisine Josefegizni neznerera Maria'e. Hagi mago a'ra Zeveti mofavre'mokizini neznera'e.

Jisasi asente'nea naneke

(Mak 15:42-47, Luk 23:50-56, Jon 19:38-42)

⁵⁷Kinaga segeno mago afufenone nera agi'a Josefe, Jisasi amage nentea ne' Arimatia kazigati e'ne. ⁵⁸Paerotinte vuno Jisasi avufga amisiegu ome antahige'ne. Paerati'a Jisasi avufga eriamiho higeno, sondia vahe'mo'za eri ami'naze. ⁵⁹Josefe kahefa tavaravefi erinteno ano vazino, ⁶⁰agri'a keria havefi kasefa asente'nazafi ome asenteno, ra have retufeno ana have kana runkni reteno vu'ne. ⁶¹Hagi ana kerimofa tva'onte kanti kaziga, mago ara Maria Makdala kazigati a'ene, Mariake anantera mani'nene ke'na'e.

Sondi vahemo'za Jisasi mati kva hu'naza naneke

⁶²Trotra huknamo^h vagaregeno mni fruhu knamofa amefi zupa ra mono kva vahe'mozane, Farisi mono vahe mo'zane Paerotinte vu'za, ⁶³amanage

^h 27:62 Trotrahu kna Frante zupagu hu'ne.

hu'naze. Ra nemoke ana havige ne'mo ofri mani'nenno amanage hu'ne. Frite'na tagufa kna mnitena, ete otigahue hu'nea kegu nentahune. ⁶⁴Ana hu'negu huzmantege'za, vu'za ana kerire tagufa knafina ome kva hiho. Ru agri'ma amage'ma nentaza disaipol vahe'moza e'za avufga'a musufa emeneriza, vahe'mokzimi zmasamiza Jisasi'a frinefinti otine hanaza kemo'a, kote krunage zmia agatereno, rankrunage fore hugahie. ⁶⁵Paeroti amanage huno zamasm'i'ne, sondia vahe ome zmvavreta tamagra ma antahizaza huta ome kva hiho. ⁶⁶Hagi zmagra sondia vahe'ene vu'za, ana have rezahe hutre'zanku kase ome hunente'za sondia vahe'moza kegva hu'naze.

Jisasi fri'pinti oti'nea naneke

(Mak 16:1-10, Luk 24:1-12, Jon 20:1-10)

28 ¹Mni fruhu kna vgaregeno ese knazupa ame nanterampi, Makdala kumateti Maria ene Mariake matimati havega kenaku e'na'e. ²Ame huno tusi'a imikrefa erine, na'ankure Ramofo ankeromo monafinti eramino matite runkani re'naza have eme revahe hugantu atreno ana agofetu manine. ³Ana ankeromofa masa'amo'a kopsinamoma hiaza nehiegeno, kukena'amo'a efeke hampomo'ma hiaza hu'ne. ⁴Matite kva hu'naza vahe'mo'za ana ne'ku tusi agoro hunente'za zmahiritege'za fri vahe kna hu'naze. ⁵Hianagi ankeromo'a ana a'trena zanismo korora osi'o, na'ankure nagra antahinue, Jisasima rugeka zafare ahe'zama hantinaza neku eme nehaka'e. ⁶Agra amafina omanine, na'ankure koma hu'nea kante oti'ne. Amare eta ante'nazafina eme ke'o. ⁷Ame' hutna amage nentaza disaipol nagara, Agra ko fripintira otine huta ome smasami'o, Galili vugotegahianki Agrira anantega ome kegahaze. Nagrama tanasamua nanekea antahi ankere'o. ⁸Higeke ana keria atreke kore nehune tusi musezampi zanagareke amage nentaza nagatega ananke zamasminaku vu'na'e. ⁹Antari ha'aza huno Jisasi'a tutagiha huznenteno, nanterane huznategeke, znagra Agrite eke agiare azeri hanavetineke mono huntena'e. ¹⁰Anante Jisasi zanasmino korora osio, vutna nafuheina Galili viho hutna ome zamismi'o. Anantega Nagrira nagegahaze.

Matite kva hu'naza sondia vahe'mokizmi naneke

¹¹Ana a'trema nevake'za matitema kva hunaza sondia vahepinti, mago'amo'za rankuma agu'a ufre'za, fore'ma hu'nea zama'a maka ugagota prisi vahetaminte huama hu'naze. ¹²Hagi vugota prisi vahe'mo'za mono kva vahe enema atru hu'za kema retro hute'za, ana sondia vahe'mokizamia rama'a zago nezamiza, ¹³anage hu'za zmasmi'naze, amanahu ke tamagra hugahaze. Amage'ma nentaza disaipol nagamo'za ana nera kenage'afi tavu mase'nonke'za kerfa'a musufa emeriza fre'naze, hutma hiho. ¹⁴Ama kemo'ma rankuma kva (Gavana) ne'mofo agesare hanigeta, tagra kaziga avrenenteta, hazenkefima ufreku hanazana tmaza

hugahune. ¹⁵Hige'za sondia vahe'moza ana zago eneri'za, zamisminaza kante kea Jiu vahepina huganti kma hazage'za ana kemo'a meninena meno ne-e.

Jisasi'a ra erizanke hantagi zmi'nea naneke

(Mak 16:14-18, Luk 24:36-49, Jon 20:19-23, Apo 1:6-8)

¹⁶Ananteti 11ni'a Jisasi amage nentaza disaipol naga'moza Galili vu'za, Jisasi'ma zmasamino vihoma hu'nea agonare uhanati'naze. ¹⁷Agri'ma ome nege'za, mono hunte'naze. Hianagi mago'amo'za tare antahintahi hu'naze. ¹⁸Anante Jisasi zmagrite eno amanage hu'ne, maka monafine mopafinema kegvahu hihamu'a, Anumzamo'a ko Nagri namine. ¹⁹E'ina hunegu kokankoka vutma, namage ante disaipol naga zmazeri retro hunezmanteta, Nefa agifine, Mofavre'amofa agifine, Ruotge Avamumofa agifi mono tina frenezamanteta, ²⁰Nagrama huramantoa kasege rempi huzaminke'za ana miko vahe'mo'za avaririho. Hagi kma antahiho, Hakare zupa tamagra ne manina nevanenkeno mafkaza vgaregahie.

Knare Musenke Maki Kre'nea Naneke

Ti frezmante Joni erizamofu naneke
(*Mat 3:1-12, Luk 3:1-18, Jon 1:19-28*)

1 ¹Anumzamofu Mofavre Jisas Kraisi knare musenkea ama agafa hu'ne.

²Kasnampa ne' Aisaia amanage huno avona krentene, *Antahiho, nagra huntanenkeno nagri naneke erino ome huamahu ne'mo'a ugagota kagrira huganteno, kana retro hugahie.* ³*Ka'ma kopinti mago'mofu agerumo amanage huno kezanetie, ramofo kana retro nehutma, kama vania kana erinte fatgo hiho.* (Aisa 40:3, Mal 3:1)

⁴Ka'ma mopafinti mono ti frezmante Joni'a eama nehuno, agafa huno kumi'zmigu zmagu'ama rukrahe hanegeno apasezmante mono tima fresaza'zanku huama huno zamasmine. ⁵Maka Judia kazigati vahemo'zane Jerusaleti'ene, agrite maka'mo'za vu'za huama kumizmia ome hazageno, Jodani timpina mono tina frezmante'ne. ⁶Hagi Joni'a kemori azokate tro hu'nea anakre ku'a hu'nenno, zgagfa akuruteti tro hu'nea amu nofi afafafi rugagino hu'nenno, kenu ene afi' tumemofu tima'ane nenea nere. ⁷Hanki mago'ma henkama ne-emo'a nagrira nagetereno hanave'ane ne' neankina, prihu'na aga anomofonte anakinea nofira kazufega osu'noe. ⁸Nagra tintfanu mono tina freneramantoe. Hianagi Agra Ruotge Avamunu, mono tina freramantegahie, huno huama huno zmasamine.

Joni'a mono ti Jisasina frentene naneke
(*Mat 3:13-4:11, Luk 3:21-22, 4:1-13*)

⁹Ana knafi Galili kaziga Nazareti kumateti Jisasi'a egeno, Joni'a Joda timpini mono ti frentene. ¹⁰Timpinti anama Jisasi'a marerino ne-egenno, mona kamo hagro nehigeno Ruotge Avamumo maho namagna huno hareno Agrite emanine. ¹¹Monafinti mago agerumo amanage hu'ne, Kagra navesimanegantoe mofavre'nimokagina muse hugantoe.

¹²Avamumo'a ame huno ka'ma kopi atufegeno vu'ne. ¹³Ka'ma kopi 40ti'a kna umani'negeno, Sata'a revatga hu'ne. Agra afizga kfone maninegeno, ankeri vahe'mo'za aza hu'naze.

**Jisasi'a Galili kaziga mono eri'za erigafa nehuno, amage'ma antesaza
vahezga avare'nea naneke**

(Mat 4:12-22, Luk 4:14-15, 5:1-11)

¹⁴Jonima kina huntageno, Jisasi'a ana knafi Galili vuno Anumzamofoknare so'e naneke huama huno, ¹⁵Anumzamo'ma huhampri'nea kna hago eforehie. Anumzamofokumamo'a hago eravao hie. Tamagu'a rukrahe huta knare musenkere tamentinti hiho.

¹⁶Galili timofo ankenare Jisasi'a nevuno Saimoni'ene Endrukea, kogonararemoke, kuko timpi netrakeno ome znagene. Na'ankure znagra nozame ahe ne'trene. ¹⁷Jisasi'a anage huno znasami'ne, enamage antenkena, Nagra vahe'ma avazu hu'zana huranami'neni. ¹⁸Higeke ame huke kuko zani'a netre'ne amage anteke vu'na'e. ¹⁹Ananteti Jisasi'a mago'ene osi'a nevuno, Jemisi Zebeti nemofokino nefu'ene ventefi mani'ne'za kukozamia nehatazageno ome zamage'ne. ²⁰Neznageno zanagi higeke, neznafe Zebetini eriza vahe'a nezmatreke ame huke amage eme ante'ne vu'na'e.

Jisasi'a havi avamu hu megi atrenea naneke

(Luk 4:31-37)

²¹Zamagrama Kapanea kumate'ma umahanatite'za, mni fruhu knama egeno'a ame huno Jisasi'a osi mono nompivi vuno rempi ome huzami'ne. ²²Vahe zagamo'za tusiza hu'za rempima huzamia zankura antri hu'naze. Na'ankure kasegere ugagota hu'naza vahe'moza nehazaza osu'neanki, hanave'ane agi me'nea vahe'mo rempi hu'nezamiakna hu'ne. ²³Anama nehigeno'a mago'mofona agu'afi havi avamu fre'nea ne'mo osi mono nompinti kezatino, ²⁴Nazareti Jisasi'a na'a hurantenaku nehane? Tagri tazeri haviza hunaku neampi? Nagra antahi'noe, Kagra Anumzamofona Ruotge hunamoke. ²⁵Hianagi Jisasi'a kesuno, taganenka atrenka atiramio! ²⁶Ana havi avamumo azeri hirahi hirahi nehuno, tusiza huno krafage nehuno ana ne' agu'afinti atiramino evu'ne. ²⁷Ana'ma higeza vahe'mo'za tusiza hu'za zmagogogu nehu'za, ontahige antahige hu'za, amazana na'a fore nehie, kahefaza hanave'ane rempi nehuno, havi avamumofona kea higeno ke'a amage nente. ²⁸Anama hiazamofokanemo'a maka Galili kaziga ame huno vuno eno hu'ne.

Pita nenemo Jisasi'a azeri knamre'nea naneke

(Mat 8:14-17, Luk 4:38-41)

²⁹Hanki osi mono nompinti' atirami'za Saimonine Endru kizini nonte Jemisi'ene Joniza vu'za umarerinaze. ³⁰Hagi Saimoni nenaro nerera'a

avufa amuhohu kri erino maseno maninegeno, Jisasina krimea eri'nea kea ame hu'za ome asami'naze. ³¹Ana a'te vuno azante ome azerioti'geno, avufga teveha nehiazamo atrentegeno, otino ne'za krezamante'ne.

Jisasi'a hakare kri vahe' zmazeri knamarenea naneke

(Mat 8:16-17, Luk 4:40-41)

³²Zage uramino kinagasegeno, vahe'zgam'o'za krimea eri'naza vahe'ene, havi avamu zamagu'afi mani'nea vahera zamavre'za Jisasinte e'naze.

³³Ana rankumate vahe'mo'za ana kasante eme eritru huvhare'naze. ³⁴Ana nehazageno rama'a ruzahu ruzahu krimea eri'naza vahera zmazeri so'e nehuno, havi avamu rama'a zmagu'afi mani'neana hufegi netreno, ama anazankura kea osiho huno i'o huzmantene. Na'ankure havi avamumo'za Agrira keza antahiza hu'naze.

Jisasi'a nunamu nehuno rempi huzami'nea naneke

(Luk 4:42-44)

³⁵Kotu hanimpi Jisasi ana nompinti atiramino vuno vahe omani'afi umani'nenono, anantega nunamu hu'ne. ³⁶Hagi Saimoni ene mago'amo'za oti'za hake'naze. ³⁷Ome age'za erifore nehu'za, mika vahe'mo'za kagriku nehakraze hu'za asami'naze. ³⁸Anage huno Agra kenona zmirera zamasmine, erinketa tava'ontema me'nea kumatamimpi vuta, anantega mono kea huama haneno. Na'ankure nagra e'ina agafare e'noe. ³⁹Anage nehuno maka Galili kaziga vano nehuno, osi mono nontamimpi mono naneke huama nehuno, havi avamutmi zamagu'afi freneana hufegi atrezmante'ne.

Jisasi'a fugo namune ne' azeri so'e hu'nea naneke

(Mat 8:1-4, Luk 5:12-16)

⁴⁰Hagi mago fugo namurenea ne'mo Jisasinte eno kepri huno agiafi traka humaseno, muse hugantoanki Kagrama nazeri knamrenaku hanunka, amne nazeri agru huo, huno antahigene. ⁴¹Jisasi'a asunku hunenteno, azana asuteno avako nehuno anage hu'ne, Nagri'ma navesiana knare huo! Higeno, ⁴²ana fugo namumo'a ame huno vgarentegeno agru hu'ne. ⁴³Hanki Jisasi'a amazama hugantoazankura vahera ozamasamio huno hanave avumro nenteno, ame huno hunteno, ⁴⁴Kma antahio, ama'nazama hugantoa zankura mago'mofona osamitfa huo. Hianagi prisi nete vunka kavufga ome averi hugeno keno. Anante Mosese'ma ko'ma huno kazeri agrumahu ofa ome hugahane hu'nea kante ome hugeno, veamo'za nege'za hago agru hu'ne hu'za hiho. ⁴⁵Hianagi ana ne'mo nevuno, kri'ama azeri knamare neazankura vahepi huama nehige'za, rama'a vahe'mo'za nentahizageno, ana kemo'a ra hiazanku, rankumapina Jisasi'a eamara huno omeno, megia rama'a vahera omani'naza kumapi umaninege'za rama'a vahe'mo'za anantega eme ke'naze.

Jisasi'a aga stinea nera azeri so'e hu'nea naneke

(Mat 9:1-8, Luk 5:17-26)

2 ¹Mago'a kna evutegeni Jisasi'a rukrahe huno Kapanea nemania kumate emani'nege'za, Jisasi'ma e'ne kea vea'mo'za antahi'naze. ²Rama'a vahe krerfamo'za atru hu'za nompine kasante'ene mani titipa nehzageno, mono kea zamasmine. ³Mago'a vahe'mo'za aga sti'nea ne' avare'za e'naze. ⁴a vahe'mo'za sesenku hu'za erizafa hu'za e'naze. ⁴Zamagra zafahu'za ufrega osu'naze, na'ankure rama'a vahe krefamo'za manihiza hazageno, Jisasi'ma mani'nea avamenteti nomuza eri anasege'za, ana nera sesenkufi mase'nege'za nofite azerineza atrageno akoheno urami'ne. ⁵Avare'za e'namokizmi zamentinti Jisasi'a negeno, aga sti'nea nera amanage huno asami'ne, Ne'nimoka kumika'a apasegantoe. ⁶Hianagi anampina mago'a kasere ugagota hu'naza vahe'mo'za mopafi mani'ne'za, anage hu'za zmagu'afina antahi'naze. ⁷Na'a higeno ama ne'mo'a kumira atregantoe nehie? Anumzamofu huhaviza hunente! Iza Agra kumira atregantoe nehie, Anumzamo ke kumira atregantoe hu'za antahinaze? ⁸E'i anage hu'za zamagesa nentahizageno, Jisasi'a zmagu'afi negeno, ame huno zmasami'ne, Na'a higetma tamagu'afina e'inahu antahintahia nehaze? ⁹Agama sti'nea nera ina'i kema hanua kemo fru huntengahie. Kumi ka'a atregantoe hanua kemopi, ontinka sesenku ka'a erinka vuo hanua kemo fru huntengahio? ¹⁰Hianagi tamagra antahitma ketma hugahaze. Vahe'mofo Mofavremo'a, ama mopafi vahe'ma kumi'ma atrente hihamua erineankino, kumira atregantoe. ¹¹Nagra hugantoanki otinka sesenkuka'a erinka nonka'arega vuo. ¹²Higeno ame huno otino sesenku'a eri kofino mika vahe zamure atiramino vu'ne. Nevege'za mika vahe'mo'za zamagogo fege'za, Anumzamofu agi erisaga nehu'za, e'inahu ruzahu ruzahu avu'avazana nonkonaza erifore nehie, hu'naze.

Livai agi hu'nea naneke

(Mat 9:9-13, Luk 5:27-32)

¹³Henka ete Jisasi'a Galili tiru ankenarega nevege'za, veamo'za eri hantage'za mani'nerega azageno rempi huzami'ne. ¹⁴Agra nevuno Alfiasi nemofu agi'a Livai takisi e'neriza osi nompini mani'negeno ome keno, eme namage anto higeno otino amage vu'ne.

¹⁵Hagi Jisasi'ma Livai nompini ne'za ome ne'negeno'a, rama'a takesi zagoma eneriza vahe'mo'zane, kumi vahe'mo'za Jisasi'ene amage'ma nentea disaipol naga'ane magopi ne'za ne'naze. Na'ankure rama'a vahe'mo'za Jisasi'ne amagera ante'naze. ¹⁶Kasere ugagota hu'naza vahe'ene, Farisi vahe'mo'zama, kazageno kumi vahe'ene takisi zgo e'neriza vahe'ene, magopi tine nezama nenazageno, na'a higeno takesi e'neriza vahe'ene kumi vahe'ene magopina ne'zana nene? Hu'za

amage'ma nentaza disaipol nagara zmantahige'naze. ¹⁷Jisasi'a ana naneke nentahino amange huno zamasmine, krime e'orinaza vahe'mo'za tusa vahetera novaze. Hanki krime eri'naza vahe'mo'za tusa vahetera nevaze. Nagra fatgo vahe kehunakura omenoanki, kumi vahe kehuku e'noe.

Ne'zama a'o huzamofa naneke

(Mat 9:14-17, Luk 5:33-39)

¹⁸Hagi Joni amage'ma nentaza disaipol nagamo'zane, Farisi mono vahe'mo'za, ne'zana a'o nehu'za Jisasinte e'za anage hu'naze. Na'a higeno Joni amage'ma nentaza disaipol vahe'ene Farisi vahe'mo'za ne'za a'o nehazageno, Kagri kamagema nentaza disaipol vahe'mo'za ne'zana a'o nosaze? ¹⁹Jisasi'a anage huno zmasamine, aravema hunakuma hirema etruma hu'naza nagamo'za aravema hunaku hu'nesia ne'ma zamagri enema mani'nenige'za ne'zana a'o hugahazafi? Aravema hu'naku hu'nesia ne'ma mani'nenigeno'a, ne'zana a'o osugahaze. ²⁰Hianagi mago'a kna ne-eankino, aravema hunaku hania ne'ma avare'za vutesageno, ana knafi ne'zana a'o hugahaze. ²¹Hagi mago vahe'mo'e huno korapa kenama tagato hu'nerera kasefa tavravea erinteno ohatigahie. Sese nehanigeno ampimpi nehuno mago'ene ruragato hura hu'zanku anaranosie. ²²Magore huno vahe'mo'a kahefa wainia, atafa tintafema zgakfa akrote tro huntepina taginonte. Na'ankure wainimo'a ana tafena rutagato hanigeno, wainimo'ene ana tintafemo'enenena haviza hugaha'e. Hagino kahefa waini'a kahefa tintafempi tagintegahie.

Mni fruhu knazupa (Sabati) kasege ruhantagi'naza naneke

(Mat 12:1-8, Luk 6:1-5)

²³Mago mni fruhu knazupa Jisasi'a witi hozafi rukitagino nevigeno, Agri amage'ma nentaza disaipol naga'mo'za mago'a witi eritaniza nene'za vu'naze. ²⁴Ana hazageno Farisi vahe'mo'za anage Jisasinkura hu'naze. Ko, na'a hige'za kasegemo mni fruhu knazupa osiho hu'neazana nehaze? ²⁵Agra anage huno zmasamine, Deviti ene magoka vu'naza vahe'mo'za, zmagama atege'za hu'naza zana tamagra hampritma ontahinazo? ²⁶Abiatama, uagota Prisima maninerera, Deviti'ma Anumzamofa nOMPI ufreno, prisi vahe'moke nenea Bretia erino neneno zamineana, kasegemo'a prisi vahe'mo'zage negahaze hu'nea Bretia ne'neazamofa kea ontahineta nehazo? ²⁷Huteno Jisasi'a anage huno zmasamine, Anumza'mo'ma mni fruhu knama anteneana, vahe'mofa aza hinogu antene. Hagi vahe'mo'za mni fruhu kna aza hanazagura ontene. ²⁸Hagi Vahe'mofa Mofavremo enena mni fruhu knamofona ra mani'ne.

Jisasi'a aza sti'nea ne' mni fruhu knazupa eri so'e hunte'nea naneke

(Mat 12:9-14, Luk 6:6-11)

3 ¹Mago'ane Jisasi'a osi mono nOMPI ufregeno, aza stinea nera anampinka mani'ne. ²Hagi vahe'mo'za Jisasi'ma aza stinea ne'ma azeri so'e mni fruhu

knazupa hanige'za, keaga Agrira huntesagu zamua antete'za mani'naze. ³Hagi Jisasi'a azama sti'nea ne'mofonku anage hu'ne, ama vahe'zgamofu zmvuga eme otio! ⁴Anante Jisasi'a anage huno zmasami'ne, mni fruhu knazupa vahe aza hanuna zamo'a kasegefina knare tavutava hugahumpi, havi tavutva hugahune, hifi vahe aza hugahumpi, vahe ahe frigahune? Higeno ke'zamia omanene. ⁵Zmarimpamo hanavetia zanku, arimpa henezmanteno keganti kegama huno nezmageno, asunku huno aza sti'nea nera kzana rusuto higeno azana rusutegeni, azamo'a so'e hunte'ne. ⁶Farisi vahe'mo'za ame hu'za atirami'za Heroti naga'ene Jisasina ahe frisanza naneke ome huge antahige hu'naze.

Tusi'a vea tinkenarega mani'naza naneke

⁷Anampinti Jisasi'ene amage'ma nentaza disaipol nagamo'za atre'za tinkenarega nevazageno, Galiliti'ene Judiati'enena tusi'a vahe krefamo'za avaririza vu'naze. ⁸Jerusale kumateti'ene, Itumia kuma Joda timofu kantu kazigati'ene Taia kumapinti ene Saido kuma agu'afinti'ene tusi'a veamo'za Jisasi'ma hiizamofu kema nentahiza, erihantge'za Agrite omeri atru hu'naze. ⁹Tusi'a vahe'ma emetruma hazazanku, amage'ma nentaza disaipol naga'agu mago vente retro hunantenkeno veamo'za naretufe'za omeho huno zmasamine. ¹⁰Na'ankure rama'a vahezga zmazeri so'e hu'negu, krima eri'naza vahe'mo'za Jisasima avako hanageno kri zmimo'ma atre zmantesiegu oretufe aretufe hu'naze. ¹¹Hagi agru osu havi avamu'mo'za, Jisasi'ma nege'za upri hu'za ranke hu'za, Anumzamofu nemofoge hu'naze. ¹²Hianagi ana havi avamukura Jisasi'a huhankavetino, Nagra iza'na manino'e, vahera ozmasamiho huno huzmante'ne.

12fu'a Aposol naga'a huhampri'nea naneke

(Mat 10:1-4, Luk 6:12-16)

¹³Hagi Jisasi'a agonarega marerino umniteni, avesi'nea vahe zamagi hige'za agra maninerega e'naze. ¹⁴Azageno 12fu'a aposol namage'ante nagare huno huhampri zmantene. Agrane mani'ne'nageno huzmantesige'za mono kea huama hanagu huhampri nezmanteno, ¹⁵havi avamu'ma huzmante hihamu zmene. ¹⁶12fu'a huhamprizmanteno, Saimoninkura Pita'e huno agi'a antemi'ne, ¹⁷Zebeti mofavre'rarena, Jemisine Joni kizanigura Bonzis hu'ne, ana agimofona agafa'amo'a mona krafagemofu Mofavre huno znagia ante'ne. ¹⁸Endruki, Filipiki, Vatoromuki, Matiuki Tomasi'e, hanki Arafiasi nemofo agi'a Jemisi'e. Hagi Tatiasiki, mago ne' agi'a Saimoni Zaleti nagapinti nere. ¹⁹Hanki Judasi Isakarioti, henka'a Jisasima ha' vahe'amokizmi zmazampi komoru huno avrentesige'za ahesaza nere.

Jisasinku Belsebul hanavefi eri'za enerie hu'za hu'naza naneke

(Mat 12:22-33, Luk 11:14-23, Luk 12:10)

²⁰Jisasi'a kumatega ete vige'za, hakare veamo'za eri hantage'za ome atru hazage'za, Jisasi'ene amage'ma nentaza disaipol nagamo'za ne'zana

neknazmia omanene. ²¹Ana kema naga'amo'za nentahiza avrenaku vu'naze. Na'ankure zamagra'ma zimagesama antahi'zana hago negi nenegahie hu'za hu'naze. ²²Hagi Jerusaleti erami'naza kasegere ugagota hu'naza vahe'mo'za anage hu'naze. Belsebul agu'afi fre'negeno, ugagota havi Avamumofu hanavefi, havi avamura hunente hu'naze. ²³Anage nehzageno Jisasi'a nentahino, kehige'za azageno fronka kea anage huno zmasmi'ne, inankna huno Sata'a, Satana ahenanti tregahie? ²⁴Hagi mago rankumapi vahe'mo'za refko hu'za ha' oriente arente hanu'za oti hanave otigahaze. ²⁵Hagi mago nompinti vahe'mo'za refko'ma hu'za ha' oriente arente hanu'za, oti hanave otigahaze. ²⁶Hagi Sata'ma otinoma agra'ama ha'ma renenteno, amu'nompinti refko'ma haniana, oti hanave otino vgaregahie. ²⁷Hianagi mago'mo'e huno hanave ne'mofo nompinti kumzafama asenakura, amane vuno musufa ose'nenno, ana nera azerino anaki atreteno, anante noma'afinti'zana enerie.

²⁸Tmage hu'na neramasmue, Anumzamo'a vahe'mo'za ana miko kumi'ma hanazane huhavizama huntésaza kumira apase zmantegahie. ²⁹Hianagi Ruotge Avamumofu huhaviza huntésimofona, kumi'a eri atre ontesigeno, kumi'amo'a mevava hugahie. ³⁰Na'ankure zmagra hu'za, Jisasina agru osuno havi avamu ene mani'ne hu'za hu'naza kegu hu'ne.

Tamage naga'agu Jisasi'a hu'nea naneke
(*Mat 12:46-50, Luk 8:19-21*)

³¹Anante Jisasi nerera'ene agnahe'zane e'za fegi'a eme oti'neza, ome asaminkeno eno hu'za ke huzmante'naze. ³²Tusi'a vahe'mo'za mani kaginte'nazafi anage hu'za ome asami'naze, antahio, negarera'ene kaganahe'zane kasarahaheza megia mani'ne'za kagriku ke nehaze. ³³Ana kenona'a amanage huno zmasami'ne, iza'za nagri nenrera'ene naganaha'za mani'naze? ³⁴Keganti kegma huno manigagi'naza vea nezmageno anage hu'ne, keho, nenrera ene naganaha'za ama mani'naze. ³⁵Iza'zo Anumzamofu avesizama amage'ma nentamo'za, nenaganaki nensaroki nenreraki hu'za mani'naze.

Avimaza avi rurani'nea fronka naneke
(*Mat 13:1-9, Luk 8:4-8*)

4 ¹Mago'ene Jisasi'a ra tiru'mofo ankenare mani'nenno naneke erigafa huno rempi huzami'ne. Tusi'a vahe krerfamo'za regorave hazageno, Jisasi'a votifi marerino maninege'za, tusi'a vahe krerfamo'za tiru ankenarega mani'naze. ²Agra rama'a fronka ke zmasami'ne. Rempima huzamifina, anage hu'ne, ³kma antahiho! Hoza ne'mo avimaza rurani'ne hozarega vu'ne. ⁴Ana'ma huno ome runernigeno, mago'a avimzamo'a kamofu ankinafi evuramigeno, namamo'za eme ne'naze. ⁵Mago'a avimaza avimo'a havege huno rama'a mopa omanenefi evuramino ame

huno hagene. Na'ankure havege huno osia mopa me'negeno'e. ⁶Zagema hanatino'a teosaparene, na'ankure rafunamo'a fempina uoraminegeno osapare'ne. ⁷Mago'a avimaza avimo'a ave'ave trazampi evuramigeno, aveave trazamo'a hagene, reutrako higeno raga'a reonte'ne. ⁸Hu'neanagi mago'a avimzamo'a tima'ane mopafi evuramiteno hagene raga'a rente'ne. Mago'amo'a 30ti'a rentegeno, mago'a 60ti'a rentegeno, mago'a wan 100 ti'a rente'ne. ⁹Ana nehuno anage hu'ne, izano agesa me'nenigeno nentahisimofona, atregeho ama kea antahise hino.

Fronka kema zamasmine'a kemofa agafa'e
(*Mat 13:10-17, Luk 8:9-10*)

¹⁰Anama huteno Jisasi'ma Agrakema umani'negeno, mago'a manigagi'naza vahe'mo'zane, ¹²fu'a amage'ma nentaza disaipol nagamo'za, ana fronka keramimofa agafa'a antahise hunaku antahige'naze. ¹¹Jisasi'a anage huno zmasami'ne, Anumzamofa kumamofa oku'a antahintahia tmagrira ko tamine. Hianagi meg'i'ama mani'naza vahe'mo'za fronka kege nentahize. ¹²Ana higu Avontafepina anage hu'ne, *kegahazanagi keama osugahaze. Antahigahazanagi antahi amara osugahaze. Zamagra aru zmagu'a rukrahe hanageno Anumzamofa kumizimi eri atrezankure.* (Aisa 6:9-10) ¹³Jisasi'a anage huno zmasami'ne, ama fronka kemofa agafa'a antahi ama'ma osanutma, inankna hutma mika fronka kemofa agafa'a antahi amara hugahaze? ¹⁴Avimaza rurani'nea ne'mo'a, Anumzamofa ke ome krine. ¹⁵Mago'a avimaza kamofa ankinarega evurami'neana, mago'a vahe'mo'za Anumzamofa kea nentahizageno, Sata'a ame huno zamagu'afima krinea kea eritrene. ¹⁶Havege mopafima rurani'neana, Anumzamofa kema nentahi'za, muse hu'za ame hu'za eneri'ze. ¹⁷Hianagi zmagu'afina rafuna ore'nazanki'za oti hanave otinazankiza, anante'ma Anumzamofa kegu hu'za hazenke zano, zmazeri haviza huzama fore hige'za, ame hu'za atre'za nevaze. ¹⁸Mago'amo'za ave'ave trazampi avimaza ruranineankna hu'naze. Anamo'za Anumzamofa kea antahinazanagi, ¹⁹mopafi zankuke zmagesa nentahi'za, zago afu fenoma eri atruma huzamo rezmatga nehuno, mago'azama zamesinte'zamo zmagu'afina efreno Anumzamofa nanekea reutrako higeno ne'za raga'a renonte. ²⁰Hianagi tima'ane mopafi rurani'nea avimazana, zamagra Anumzamofa kea antahi ankere'za, ana kea e'neri'za nena raga'a rementaze. Mago'mo'a 30'a rentegeno, mago'mo'a 60'a rentegeno, mago'mo'a 100ti'a renente.

Tavi'mofa fronka naneke
(*Luk 8:16-18*)

²¹Jisasi'a amanage huno mago'ane zamasmine, rampe tavi'ma rekruma hazana, sipa gampi ome nentafi, kavo agu'afinka ome nentazo? A'o

anara nosaze. Rekrū hutma tavima rekrū hunte azotare ome nentaze. ²²Na'ankure miko'zama fra'ma ki'nesiazamo'a, eama nehanigeno, oku'a me'nesiazamo'a, msare eama hugahie. ²³Izano agesa me'nenigeno nentahisimofona, atregeno ama kea antahise hino. ²⁴Mago'ane anage huno zamasmī'ne, kema nentahizana antahi so'e hiho. Tamagrama amisaza avamente, ana avamente tamagrira neramamino, mago'ane agofetu huno tamamigahie. ²⁵Na'ankure iza'o eri'nenimofona mago'ene agofetu huno amigahie. Hagi iza'o e'orinesimofona, osiama eri'neniazana eritre vgaregahie.

Avimza hage'zamofō frōnka naneke

²⁶Jisasi'a mago'ane anage hu'ne, Anumzamofō kumamo'a, mago vahe'mo avimza avi mopafi rurano kriankna hu'ne. ²⁷Kriteno umasenegenō feru ene kenage'enena hageno, ana avimza avimo'a ru hanana huno hagegenō, anama hageana nankna huno hage'neo agra ontahine. ²⁸Mopamo'a agra'a azerinena higeno ne'zama'a rente'ne, esera asina reno rampa'a fore huteno, anante amosare aheno, rampareara nezana rente avinete. ²⁹Anantera raga'a renteno nena hutegenō, agra kazaki kazinteti eme taga hu'ne, na'ankure hozama hamarekna egeno'e.

Masteti ragamofō frōnka naneke (*Mat 13:31-32,34, Luk 13:18-19*)

³⁰Jisasi'a mago'ane anage huno zmantahige'ne, inankna ke hunteta Anumzamofō kumakura hugahune. Inankna frōnka ke hunteta eriamā hugahune? ³¹Masteti raga'agna hunege'za mopafi negrize, ama mopafima me'nea avimzana agatereno onensatfa hu'ne. ³²Karitageno'a hageno nena huno, maka hozafima me'nea ne'zana ra huno agetenereno, rama'a azankuna'a hageno vuno eno higeno, maka afi' namamo'za ana zafamofō tonapi nona eme kigahaze.

Jisasi'a frōnka kefinti ke zmasami'nea naneke

³³Ana nehuno rama'a frōnka kefinti zamagrama antahi ama hanaza avamente zmasami'ne. ³⁴Agra mago'a kema hunakura frōnka kefintike zamasmī'ne. Ana hu'neanagi amage'ma nentaza disaipol naga'ma zamagrake mani'nageno, eriamā huno maka'zana zmasami'ne.

Jisasi'a ke higeno timo rurava he'nea naneke (*Mat 8:23-27, Luk 8:22-25*)

³⁵Ana zupa kinaga segeno Jisasi'a amage nentaza disaipol naga'agura hu'ne, erinketa kantu kaziga tinkenare vamneno huno hige'za, ³⁶vahe krerfama zmatrete'za Jisasi'ma mani'nea ventefi mareri'za vazageno, mago'a ventea zamagrane vu'naze. ³⁷Nevzageno tusi'a ununko atuno,

tina erikranto kranto nehuno, ana ventefi timo'a marevite'za higeno, timpí tami'za hu'ne. ³⁸Hagi Jisasi'a ventemofona arigarega fita runo mase'negeno, azeri oti'za anage Agrikura hu'naze. Rempí hurami ne'moka, timo'ma tazeri nakri'za nehiana nonkano? ³⁹Anante otino zahomofona kenesuno, tami avazago huno timofona ke higeno, ako heno urami avazagene. ⁴⁰Ana higeno Jisasi'a anage huno zmantahige'ne, Nahigetma amanahu huta koro nehaze? Tamentintia nosazo? ⁴¹Ana nehige'za tusi'a zamagogo fege'za, Inankna ne'mo kea nehigeno zahomo'ene timo'ene ke'a antahine hu'za hu'naze.

Jisasi'a negi ne'mofu agu'afinti havi avamu hunte'nea naneke
(*Mat 8:28-34, Luk 8:26-39*)

5 ¹Ventefi vu'za Galili timofo kantu kaziga'a Gerasin uhnati'naze. ²Anama Jisasi'a ventifinti eneramigeno, agru osu havi avamumo agu'afi fre'nea ne'mo, ame huno hezamopinti (matipinti) tutagiha huntene. ³Ana ne'mo vahe asenentea kumapi mani'nege'za, mago vahemo'e huno azerino anaki ontege, seni nofinu anaki onte'ne. ⁴Na'ankure ana ne'mofona azeriza seni nofi'nu azampi kina renentaza aeni agare azantera kina rente'naze. Hianagi ana ne'mo'a azampine agafinema rente'nea nofira rukampruhu osi osi hu'ne. Ana higeno mago vahe'mo'a hanaveti'za azeriarava hugara osu'naze. ⁵Mika zupa hanine, zagene vahe asenentaza kumapine agonaregane vano nehuno, rankege huno, have erino avufa tagarago hu'ne. ⁶Jisasi'a afete mani'negeno ana ne'mo negeno, agareno agafi ome renareno, ⁷anante ranke huno kezatino, Jisasiga marerisa Anumzamofu Mofavremoka, na'a hurante'za nehane! Nagra Anumzamofu agifi huhanavetina negasamue, tazeri havizana osuo! ⁸Na'ankure Jisasi'a havi avamumofonku atiraminka evuo huno hu'negeno'e! ⁹Jisasi'a kagi'a iza'e huno antahigegeno? Nagini'a hakarena mani'noe, na'ankure tagra rama'a sondia vahe mani'none. ¹⁰Jisasiga amafintira hurantegeta atreta ovamneno huno kazikazi huno asami'ne. ¹¹Agonamofu asoparega rama'a afu'mo'za ne'za nene'za mani'naze. ¹²Ana havi avamumo'za kazigazi hu'za antahige'za, tataregeta antu afutamimofu zmagu'afi uframaneno hu'za hu'naze. ¹³Jisasi'a knareki viho huno ana havi avamutamina huzmantege'za, ana ne'mofu agu'afinti atirami'za, afu'mokizmi zamagu'afi ufre'naze. Ana maka afu'tamina 2 tausen'i'a afu'mo'za agonaregati tragi'za uramiza timpí takaure'za ti nakri'za fri'naze.

¹⁴Afu kva vahe'mo'za anazanku koro nehu'za, fre'za vu'za rankumate'ene osi kumate'ene ke huganti hugma hu'za vahe zamasm'i'naze. Nezmasmige'za ana veamo'za nentahi'za ana'ma hu'neaza kenaku eri hantage'za e'naze. ¹⁵Jisasintega e'za eme kageno havi avamu'mo'ma agu'afi fre'nea ne'mo'a anante mani'negeno ke'naze. Kukena

nehuno fatgo antahintahi erino mani'nege'za, rama'a havi avamumo agu'afi fre'nea nere nehu'za koro hu'naze. ¹⁶Hagi ana nete fore nehuno afute fore hu'neaza ke'naza vahe'mo'za, onke'naza vahe'mokizmi zmasmi vgarage'za antahi'naze. ¹⁷Ana vahe'mo'za Jisasinku hankavetiza, ama mopa atrenka vuo hu'za hunte'naze. ¹⁸Hagi Jisasi'a ventefi marenerigeno havi avamumo agu'afi fre'nea ne'mo'a, natregena kagrane va'neni huno antahige'ne. ¹⁹Hianagi Jisasi'a nagranena ovugahane nehuno, anage huno asami'ne, kumakarega vunka, vahe ka'afi Ramo'ma asunku'ma huganteno, razama so'eza hugante'nea zankura ome zmasamio. ²⁰Anage huno asamigeno atreno Dekapolisi 10ni'e nehaza kumate vuno Jisasi'ma knare huno aza hu'nea nanekea zamasmige'za, maka vahe'mo'za nentahi'za antarintru hu'naze.

Kva ne'mofo mofa'ene korankri eri'nea a'mofo naneke
(*Mat 9:18-26, Luk 8:40-56*)

²¹Hagi Jisasi'a ete ventefima vuno kantu kaziga Galili tiru ankenare umahnatige'za, hakare veamo'za agrite e'za eme regagi ante'naze. Anama hazazanku Jisasi'a anante mani'ne. ²²Anante osi mono nonte kva vahe zgafinti mago nemofo agi'a Jairasi'e nehaza ne'mo, eno Jisasima eme negeno, agafi emaseno, ²³muse hugantoanki, osi mofa'nimo'a fri'za higena neonki, enka kzana eme antegeni ofrino manino huno antahige'ne. ²⁴Jisasi'a agrane nevigeno tusi'a vahe krerfamo'za otufe atufe hu'za vu'naze.

²⁵Mago ara korankri 12fu'a zage kafufi eri'nea a'mo anampi mani'ne. ²⁶Zgo afufenoma'a ana krimoma vagarentesigu atrevgareno rama'a tusa vahe'mofo ome miza hu'neanagi, atage'za amizageno ana kri'amo'a vgaore erirahu'ne. ²⁷Hagi ana a'mo Jisasi agenke antahiteno tusi vea kevufinti, Jisasina amefiti zaza kena'are eme avako hu'ne. ²⁸Na'ankure antahintahi afina kukena'are ome avako hanugenoke kri'nimo'a atrenantegahie huno nentahino, ²⁹ome avako higeno ame huno korankrima eri'neazamo'a atrente'ne. ³⁰Hagi Jisasina mago'a hanave'amo nevigeno nentahino, ame huno ana vahe kevufi rukrahe huno anage hu'ne, kena ni'arera iza avako hu'ne? ³¹Agri amage'ma nentaza disaipol naga'mo'za anage hu'za, mika vahe'mo'za oretufe aretufe hu'nazanki nahigenka, aza navako hu'ne nehane? ³²Hianagi Jisasi'a rukrehe huno keganti kegma huno avako hu'nemofonku hakare'ne. ³³Nehakregeno ana a'mo koro nehuno agu'amo'a fakifaki nehigeno kri'ama amane hu'neazanku nentahino, vea amu'nozimifi kepri huno maka kri'amo vgaranteazana huama huno asami'ne. ³⁴Jisasi'a anage huno ana aku hu'ne, Mofa, kagri ka'a kamentintimo kazeri knare hianki, karimpa frune vuo.

³⁵Anage huno nehigeno'a, osi mono nomofo kva ne' nompinti e'naza vahe'mo'za, Jirusinku huza mofa kamo'a hago fri'neanki rempi hurami

ne'mofona kna omio. ³⁶Hianagi anama hazenkea Jisasi'a antahi amane nehuno, ana kva nera anage huno asami'ne, korora osunka kamentinti huo. ³⁷Maka vahera maniho hunezmanteno, Pitama Jemisi nefu Jonima huno z mavrege'za amage anteza vu'naze. ³⁸Ranke hu'za tusi zavi krafa hu'za zavira netageno, ana kva ne' nonte uhaniti'za ome zmage'naze. ³⁹Ana nompima unefreno'a, na'a higetma ranke hutma zavira netaze, mofavremo'a ofrineanki amane mase'ne. ⁴⁰Anage hiankegura zmagra kiza re'naze. Hianagi miko megia huzmantege'za mani'zageno, ana mofa'mofo nerarane, nefane nezanevareno amage'ma nentea disaipol naga'a nezamavreno ana mofa hunaragi antepinka ante'nazafinka ufre'naze. ⁴¹Anante ana mofamofa azante akoheno aze'nerino Talita kum! Zamagri'a kefina osi mofa'moka Nagra kagriku huanki otio hu'ne. ⁴²Ana mofamo'a 12fu'a zgegafu hu'neakino ame huno otino kana vano hige'za tusi antri hu'naze. ⁴³Jisasi'a hanavetino ama zankura mago vahere hutma ozmasamiho nehuno, ne'za aminkeno neno huno zmasami'ne.

Jisasina Nazareti kuma'are veamo'za zamefi humi'naza naneke
(*Mat 13:53-58, Luk 4:16-30*)

6 ¹Jisasi'a ana kumara netreno kuma'arega ege'za, amage'ma nentaza disaipol naga'mo'za avariri'za e'naze. ²Mni fruhu knama (Sabat) egeno'a agafa huno osi mono nOMPI rempi huzamigeno, rama'a vahe'mo'za antahizamo'za, antri hu'za zmagogogu nehu'za anage hu'naze, igati amanahu antahintahia erine? Iza amanahu knare antahintahizana ami'ne, nankna huno kagu'vazana eri fore nehie? ³Ama kapenta ne' Maria mofavrefi? Jemisi'ma Josefi'ma Judasima Saimonikizmi nempu'zimi mani'ne. Hanki asarahe'za tagrane mani'nazafi? Anage nehu'za ha' arente'naze. ⁴Anante Jisasi'a anage huno zmasami'ne, kasnampa ne'mofona mika vahe'mo'za antahi amiza, ra agi'a amigahazanagi, kuma'are vahe'mo'za antahi nomizageno, naga'amo'zane, noma'afi vahe'mozanena antahi omi'naze. ⁵Anampina mago'a kaguvazana Agra eri fore osu'neanagi, mago mago kri vahete azanteno zmazeri so'e huzmantetere hu'ne. ⁶Hanki zamentintima osaza'zankura Jisasi'a antahintahi hakare nehuno, mago'a kuma tamimpi vano huno, Agra rempi huzami'ne.

12fu'a Aposol vahe'mofo mono erizante huzmante'nea naneke
(*Mat 10:5-15, Luk 9:1-6*)

⁷Jisasi'a 12fu'a amage nentaza disaipol naga zamagi hige'za ageno, tare tare huno hunezmanteno, agru osu havi avamu humazmante hihamu zami'ne. ⁸Agra amana hugahaze huno zmasamine, nevanutma bretine kutmine, zagonena erinetma oviho, azompage eritma viho. ⁹Tamaga ano vazigahazanagi, tare kukena hutma oviho. ¹⁰Ina nonte'ma vanutma,

ana nompinke maninetma ana kumara atretma viho. ¹¹Mago kumate nevanage'za oramavrege, naneketimi ontahisagetma zamatreta nevuta, tmagareti kugusopa ru popo hunetretma vinke'za, anazama hanaza zamo'a hazenkefi mani'naze huno zmaveri hino. ¹²Ana hige'za amage'ma nentaza disaipol naga'mo'za vu'za, zmagu'a rukrehe hanazegu, mono kea ome huama hu'za mika vahe zmasami'naze. ¹³Zamagra rama'a havi avamura hunezmante'za, krimea eri'naza vahe'mokizimi, masave tagi'za frenezmente'za, zmazeri kanamre'naze.

Mono ti frezmante Joni fri'nea naneke

(Mat 14:1-12, Luk 9:7-9)

¹⁴Hagi kini Heroti'a, Jisasi agi agenkemo'a ra higeno nentahigeno, mago'amo'za mono ti frezmante Joni frinefinti oti'negu kagu'vazana nehie hu'naze. ¹⁵Hianagi mago'amo'za Ilaiaj'e hu'za nehazageno, mago'amo'za hu'za, agra korapa mani'naza kasnampa vahekna nere hu'naze. ¹⁶Hagi mago'ane Heroti'ma nentahino'a anage hu'ne, Joni agenama akafrinoa ne'mo otino e'negahie! Hu'ne. ¹⁷Na'ankure nefu, Filipi nenaro Herotiasi, Herotima rehanare'nea agenke Jonima huama hu'neazanku, Heroti'a huzmantege'za Jonina ome azeri'za kina nomp ome ante'naze.

¹⁸Na'ankure Joni'a hanavetino ke huvava huno Herotina asamino, negafu a'ma rehanarenka a'ma erinanana kasege rufutaginka knare avu'avara osu'nane. ¹⁹Ana higeno Herodiasi'a Jonina rimpa ahenteno ahe frinaku hu'ne. Hianagi ahe ofri'ne. ²⁰Na'ankure Heroti'a Joninku koro nehuno, kegva krintene. Na'ankure agra antahino keno hu'ne. Joni'a fatgo huno ruotage hu'nea nere. Joni agenke nentahino agogogu hu'neanagi, Jonima hania kema antahinakura muse hu'ne.

²¹Mago kankamu eforema hu'neana, Herotima kasente'nea kna fore higeno, muse huno kasente'nea ne'za nenaku atru nehazageno, agri nompima eri'zama e'neriza vahe'ene sondia vahe'mokizimi ugagota kva vahe'ene, Heroti'a ne'zana ne'ne. ²²Herodiasi mofamo efreno avoma eme hageazamo Heroti'ne ne'za neku zmagima hu'nea vahera zmazeri muse higeno, Heroti'a ana mofa asmimo, na'ankuro kve'ma siniazankuma nantahi kesnankena, amane kamigahue hu'ne. ²³Heroti'a huvempa huno ana mofara asamino, na'ankuro kavesinesia zanku'ma nantahi kesnankena, amane kegva kri'noa kumara amu'nompintira refko hu'na kamigahue. ²⁴Anage higeno ana mofa'mo atiramino vuno, nererankura na'ane hu'na ome antahigegahue? Higeno nerera'a anage hu'ne, mono ti frezmante Joni agenope hunka ome huo huno asamigeno, ²⁵ana mofa'mo ame huno Herotinte vuno, menitfa mono ti frezmante Joni agenopa rukafrinka zompafi antenka erinka eme namisane huno higeno, ²⁶Kini ne'mo nentahino Joninku tusiza huno asuragi ante'neanagi, hanave huvempa kema mofa'ama agrane mani'naza vahe zamufi hunte'nea kegu

nentahino, i'ora osu'ne. ²⁷Hagi kini ne'mo'a ame huno agenama ome akafri vahe huntengeno kina nOMPI vuno, Joni agena ome akafrine. ²⁸Ana ne'mo agenopa'a zompafi erino vuno, ana mofa ome ami'geno, ana mofamo erino vuno nererana ome ami'ne. ²⁹Hagi Joni amage'ma nentaza disaipol nagamo'za ana kema nentahi'za, avufa'a eri'za havegampi ome asente'naze.

Jisasi'a 5 tauseni'a vahe ne'za zami'nea naneke

(Mat 14:13-21, Luk 9:10-17, Jon 6:1-13)

³⁰Anante Jisasi aposol nagamo'za, ehanatiza miko'zama nehu'za, rempima hu'zaminaza nanekea eme asami'naze. ³¹Jisasi'a anage huno zmasamine, Nagrane enketa vahe omanitega onsia umanikasa hamneno, (na'ankure vahe'mo'za vute'ete hazageno, ne'za nesaza knazimi omanenegure.) ³²Zamagraku vahe omani kaziga vunaku ventefi mareri'za vu'naze. ³³Hianagi zahufama nevazageno, hakare veamo'za e'irega vazanki hu'za nentahi'za, mopafi rugagi'za miko kumapinti veamo'za kote'za anama umanisare, ko umani'naze. ³⁴Jisasi'ma anante uhanitino ventefinti takaureno, tusi'a vea kevu nezmageno asunku huzmante'ne. Na'ankure zmagra kvazimi omani sipisipigna hu'nazageno agafa huno hakare kea rempi huzami'ne.

³⁵Kinaga nesegeno, amage'ma nentaza disaipol naga'mo'za Jisasinte e'za anage hu'naze, vahe omani ka'ma kopi mani'nonkeno hago kinaga nesegu, ³⁶huzmantege'za hozafi kiza mani'naza kumapine, kuma tamimpi vu'za ne'zama nesazazana ome miza seho hu'naze. ³⁷Hianagi Jisasi'a anage huno zmasami'ne, Tamagratmi ne'zana zaminke'za neho, hige'za zamagra anage hu'naze, mago kafufi eriza erina miza eriga mizanteti nezana mizaseta zamigara hu'ne hu'za asami'naze? ³⁸Agra anage huno zmasami'ne, nama'a breti eri'nazafi ome keho? Huno hige'za ome kete'za e'za 5fu'a bretigi, tare nozame me'ne hu'za hu'naze. ³⁹Anante Jisasi'a amage'ma nentaza disaipol naga'a huzmanteno, zafa asinage hu'nea apepate huzmantege'za omeri atru, eme eritru hu'za maniho huno huzmante'ne. ⁴⁰Maka vahe'mo'za fko hu'za mago'a kevufina 100ti'a vahe nemanizageno, mago'a kevufina 50ti'a nemanizageno hutere hu'naze. ⁴¹Mani'nageno 5fu'a bretine, tare noza'ene erino kesga huno monafi negeno, Anumzamofontega susu huteno, eri korino amage'ma nentaza disaipol naga'a veva hnazegu nezamino, nozamea anazanke huno refko huno zami'ne. ⁴²Ana maka'mo'za nazageno zamu hu'ne. ⁴³Nene'zama atraza bretine, noza enena zogi'za, 12fu'a eka eka kupi erivite'naze. ⁴⁴Bretima ne'nazana 5tauseni'a venenemo'za ne'naze.

Jisasi'a timofo agofetu vu'nea naneke

(Mat 14:22-33, Jon 6:15-21)

⁴⁵Jisasi'a ame huno amage nentaza disaipol naga'a ventifi vugote'za kantu Betsaida kaziga vihogu hunezmantage'za nevageno, vahetaminkura

viho huno huzmante'ne. ⁴⁶Viho huno huso'e huzmanteteno, agonarega nunamu hunaku vu'ne. ⁴⁷Kinagama segeno'a ventemo'a timofo amunompi nevigeno, Agrake moparera manine. ⁴⁸Jisasi'a nezmagegeno, tusi maraguzatiza azotanu tina vakakiza vu'naze, na'ankure zahomo tusiza huno eme zmareturefege'za, mraguzatiza nevazageno ko'ma atu masa hu'za nehigeno, Jisasi'a timofo avozare eno zmagatere'za nehige'za, ⁴⁹zamagrama timofo agofetu nevigeza nege'za, zimagesama antahizana hankrore nehu'za zamagogo hu'za krafa hu'naze. ⁵⁰Na'ankure makamo'za nege'za zmagogogu hu'naze. Hianagi hantaka huno anage huno zmasami'ne, Nagragi oti hanavenetita, korora osiho. ⁵¹Anage huteno mani'naza ventifi marerigeno, zaho'mo amane nehigeno tusiza hu'za antri hu'naze. ⁵²Na'ankure bretima tamanasino zami'nea zamoyo agafa'a, ke so'e osazageno zmaguamo hanavetine.

Jisasi'a Genesareti kaziga kri veamokizmi zamazeri so'e hu'nea naneke
(*Mat 14:34-36*)

⁵³Hanki kantu kaziga takahe'za Genesareti mopare uhanati'za, ventea kina rentete'za, ⁵⁴ventifinti atineramizageno'a, vahe'mo'za ame hu'za Jisasi'e hu'za ke'ama nehu'za, ⁵⁵zamaga re'za vu'za e'za hu'za, ana kazigama me'nea kuma tamimpinti kri vahetamina sesenku hu'za zmarente'za, Jisasi'a mani'ne haza kumate vu'naze. ⁵⁶Hagi ina osi kumatero rankumatero, hozafi kiza maninaza kumapino, Jisasima virega kri vahera zamavre'za maketi kumapi ome zmantene'za, knare tataresanketa zaza kena kamoyo atupare azerigahunu huza antahinege'za, kukena'arema avakoma hazamo'za, kri zmimo'a vgarene.

Anumzamoyo kemo vahe'moyo kea agaterenea naneke
(*Mat 15:1-9*)

7 ¹Hagi Farisi mono vahe'mo'zane kasere ugagota hu'naza vahe'mo'za Jerusale kumateti' e'za, Jisasinte emeri atru nehu'za, ²Jisasi amage'ma nentaza Disaipol naga'mo'za zmazana sese osu'za bretia nenage'za ke'naze. ³Na'ankure Farisi vahe'ene, mika Jiu vahe'mo'za, zmagehe'moyo zamavu zmavama avaririza, zamazana sese huso'e osune'za ne'zana nonaze. ⁴Maketi kumapinti ne-e'za, zamagra ne'zana onene'za zmazana sese hute'zage ne'zana nenaze. Hagi zamagra rama'a zmagehemoyo kasegea eri'naze, kapuma kavoma tinkavoma nezama anteno ne' zamtamima sesehu agruma hute'za, ne'zama ne'zana azenerize. ⁵Hagi Farisi vahe'mo'zane, kasere ugagota hu'naza vahe'mo'za Jisasi antahige'za, nahige'za kamagama nentaza disaipol vahekamo'za tagehe'i avu'avamoyo kea amage onte'za, ne'zama nenakura zmazana sese nosaze? ⁶Jisasi'a anage huno zamasmine, Aisaia'a fatgo huno krunage vahere huno krenteneana, tmagriku hu'ne, *Ama vahe' mo'za zamagititi nagi hentesga nehaze, hianagi zmaguamo'a*

nagriter a omaneno, afete'are me'ne. ⁷*Amegati nezama'a omane mono hunenante'za, vahe'mofo kasege rempi nehaze.* (Aisa 29:13)

⁸Anumzamoma'hiho hu'nea kasegea netretma, vahe'mofo zmuzma'mofo ke azeri hanavetita amage nentaze. ⁹Anage huno mago'ane zmasami'ne, Anumzamomofo kasegema eritre kaziga knare hu'naze. Hanki tamagehe'i avu'ava'mofo amagera nentaze. ¹⁰Na'ankure Mosesi'a anage hu'ne, Negafane negreranena antahiminka agoraga'a manio, hagi iza'o nefama nererama agoraga'a omanino, huhaviza huntessimofona, ahe friho hu'ne hutma nehaze. ¹¹Hianagi tamagra anage nehaze, aza'o nefama nerera asamino, nagrama tanaza hu'zama ante'noana, Anumzamomofo ami'naku ante'noe huta nehaze. ¹²Ana nehutma, ana ne'mofona atrageno nefane nereranena mago'zana aza nosie. ¹³Tamagri tami tmavu tmava'za rempima huzamiza'zamo Anumzamomofo ke'mofo hanavea eri netreta, rama'a ama anahu'zana nehaze.

Vahe'mokizimi zmazeri pehena nehia zamomofo naneke
(*Mat 15:10-20*)

¹⁴Maka veaku Jisasi'a ke hige'za ageno anage huno zamasmi'ne, tamagra nanekeni'a nentahita antahi ama hiho. ¹⁵Magore huno fegiatima vahemomofo agu'afima ufresiazamo'a, azeri pehena osugahie. Hianagi vahe'mofo agu'afinti atiramino esiazamo, azeri pehena hugahie. ¹⁶[Kagesa antahinamoka antahio.] ¹⁷Anage huteno, ana vahe zamatreho Jisasi'a nompimrenerige'za, amage'ma nentaza disaipol naga'mo'za, ana fronka ke'mofo agafa'agu antahige'naze. ¹⁸Jisasi'a anage huno zmasami'ne, tamagrira knare antahizana omane'nefi? Tamagra antahi amara nosazo, nankanzamo'ma fegiatima vahe'mofo agu'afinka ufrezamo'a, vahe'mofona zmazeri pehena nosie. ¹⁹Na'ankure anazamo'a tumopina novie. Hanki rimpafi uramiteno, anantetira rifa kerifi nevie. (Jisasima anagema hu'nea kemo'a, mafka ne'zamo'a agru hu'ne.) ²⁰Jisasi'a anage huno zmasamine, vahe'mofo zmaguafinti atiramiazamo, zmazeri pehena nehie. ²¹Vahe'mofo agu'afintima efore'ma nehiana, havi agu'agesa antahizane, monko avu'ava'zane, kumzafa se'zane, vahe ahe frizana ne-e, ²²arave hu'nea a'ene vene monko avu'ava hu'zane, agraguke antahizane, havi avu'ava'ene, vahe'mofo krunage hunte'zane, vahe'mofo kumipi avrente avu'avazane, vahe'mofo zanku kenunu hu'zama, knare vahe'mofo havige hunte'zane, neginagi avu'ava hu'zane, avufga eriantesga hu'zane, ²³ana mafkazana vahe'mofo agu'afinti atiramiazamo vahera azeri pehena nehie.

Mago a'mo Jisasinte amentinti hu'nea naneke
(*Mat 15:21-28*)

²⁴Jisasi'a otino ana mopa atreno Taia kuma kaziga vu'ne. Vuno mago nompimufreno, vahe'mo'za emenine huza ontahisaze nehuno umanine,

hianagi frakigara osu'ne. ²⁵Ana hianagi mago mofara havi avamumo agu'afi fre'nea mofa'mofo nerera'a Jisasi'ma emani'nea ke nentahino, ame huno eno agafi eme prihuno, ²⁶ana ara Sairofonesia kuma Griki meg'i'a vahepinti a'kino, Jisasinku muse hugantoanki havi avamura ome hunto huno asami'ne. ²⁷Jisasi'a anage huno ana aku hu'ne, mofavremomo Bretima erita kramofo amizamo'a knarera osu'neanki, atregeno mofavremo kotazana nemu huteno. ²⁸Ana a'mo'a anage hu'ne, Ramoka tamage hananagi, itaretima mofavre'mo'za nenazageno, ankrama hermiam'a kramo'za zogi'za ne'naze. ²⁹Anante Jisasi'a anage hu'ne, e'inhau kenona hanku vuo, havi avamumo'a mofaka'amofa agu'afinti hago atiramino vu'ne. ³⁰Higeno noma'arega vuno ome keana, mofa'amofona havi avamumo ko atreno vigeno, sipare mase'negeno ome ke'ne.

Agesa anari neregeno ageru noria ne' Jisasi'a azeri knamare'nea naneke

³¹Anante Jisasi'a Taia kumara atreno, Saido kumapinti rugitagino Dekapolisi kaziga, Galili tirutega uhanatige'za, ³²mago agesa ankani neregeno kea nosia ne' avare'za e'za, Jisasinku muse hugantonanki kazana agofetu anto hu'naze. ³³Jisasi'a veara nezmatreno ana ne' avareno znagrake umanine'ne, agesa gampi azana nevazino, avetu aheno azankonu aganefunare avako nehuno, ³⁴kesga huno monafi negeno ra asimu nenteno, Efata huno hu'ne, (ana kemofa agafa'a ruhagro huo hu'ne.) ³⁵Ame huno ana ne'mofo agesamo'a ru hagro higeno, agefunamo'a oza higeno, knare huno kea hu'ne. ³⁶Jisasi'a amazama huazana vahera ozmasmiho huno nezmasamiana netre'za, ete mago'ane vahera huama hu'za zmasaminaze. ³⁷Hagi tusi zamagogo fege'za, Agra mika' zana knare'za nehie hu'za nehu'za, zamagesa anknire'naza vahe erinkro huzmantege'za, knare hu'za kea nentahize. Hagi zamagnefu'na kna hu'nea vahe zamazeri so'e hige'za knare hu'za kea nehze hu'za hu'naze.

Jisasi'a 4tauseni'a vahetami ne'za zami'nea naneke

(Mat 15:32-39)

8 ¹Ana knafi mafka vea mago'ene eritru hzageno, ne'zana omanegeni, Jisasi'a amage'ma nentaza disaipol naga ke hige'za ageno anage huno zamasm'i'ne. ²Nagra ama vea krerfagura nasunku huzmantoe. Na'ankure zamagra tagufa kna nagri'enena mani'zageno, ne'zana omane'ne. ³Nagrama huzmantesuge'za kuma zimirega zmaga'ma netesige'za vanu'za, mago'amo'za afeteti e'nazankiza kantega utraka hugahaze. ⁴Agri amage'ma nentza disaipol naga'mo'za anankemofa nona'a anage hu'za asami'naze, vahe omani mopafi mani'nonanki inantegati' ne'zana erizamisunke'za neganare hugahaze? ⁵Hzageno Jisasi'a huno nama'a breti eri'naze? huno zmantahigege'za, 7ni'a breti eri'none, ⁶hzageno, Jisasi'a ana maka veara mopafi maniho huno

zmasamige'za manizageno, 7ni'a breti erino Anumzamofu susu hunteteno, tamanasino amage'ma nentaza disaipol nagara zmige'za ana veara refko hu'za zami'naze. ⁷Ana nehzageno onensa nozamene mago'a me'negeno erino Anumzamofu susu hunteteno, amagemata nentazana disaipol nagakura eritma zamiho huno zamasmine. ⁸Maka vahe'mo'za ana ne'za nenageno zamu hige'za ankra'ama atrazama'a, amagemata nentaza disaipol nagamo'za 7ni'a ra eka eka kupi zogiri avite'naze. ⁹Ana vahera 4tauseni'a vahe nazamo'za netageno, huzmantege'za vu'za e'za hu'naze. ¹⁰Jisasi'a anama huteno, ame huno amage'ma nentaza disaipol naga'ane ventefi mareri'za Talmanuta kaziga vu'naze.

Farisi vahe'mo'za Jisasinku avame'za huraverio hu'za hu'naza naneke
(*Mat 16:1-4*)

¹¹Anante Farisi vahemo'za e'za Jisasinku ke hakare hu'za, monafinti ruzahu hankave'za erifore hugeta kamneno huza rehe'za ke'naze. ¹²Jisasi'a rimpamo kna nehigeno anage hu'ne, Na'a hige'za meni knafi vahe'mo'za avame'za kenakura nahaze? Nagra tamage hu'na neramasamue, mago avame'zana ama knafi vahe'mo'za onkegahaze. ¹³Ana huteno zamatreno ete ventefi marerino kantu kaziga vu'ne.

Herotina Farisi vahe'mokizmine havige kemofonku, zistire hunteno zmasami'nea fronka naneke
(*Mat 16:5-12*)

¹⁴Hagi amage'ma nentaza disaipol naga'mo'za zmagekani'za bretia eri'za omazanagi, magoke bretige ventefina me'nege'za vu'naze. ¹⁵Nevzageno Jisasi'a huno, Farisi vahe'mokizmi zistigu'ene kini Heroti zistigura kva hiho. ¹⁶Hige'za zmagra zmagra ke huge antahige hu'za bretima erita ome'nonazanku nehugahie hu'naze. ¹⁷Nehazageno Jisasi'a antahino keno nehuno, nahigeta breti omane'nea zankura huge antahige nehaze? Tamagra ketma antahi amara osu'nazafi? Tamagri tmagu'amo'a eriginefi? ¹⁸Tamavurga me'neana ke so'e nosazafi? Tamagesama me'neana antahi so'e nosazo? Tmagrira tamage'kaninegahie. ¹⁹Ko'ma 5fu'a breti tamanasina, 5 tauseni'a vahe zami'noge'za nene'za atrazama'a, nama'a eka eka kupi erivite'naze? 12fu'a eka eka kupi zogiri'none hu'naze. ²⁰Hagi 7ni'a bretireti tamnasi'na 4tauseni'a vahe zami'noge'za nene'za atrazama'a, nama'a eka eka kupi zogiri avite'naze? Hige'za 7ni'a kupi zogiri'none hu'za hu'naze. ²¹Anante Jisasi'a anage huno zmasami'ne, e'ina'ma hu'nozankura menina tamagra tamagesa antahi'ama nosazafi?

Jisasi'a avusu hu'nea ne' azeri hari hunte'nea naneke

²²Zamagra Bedsaita kumate azageno, mago'a vahe'mo'za avusu hu'nea ne' avare'za Jisasinte e'naze. Avurgare avako hinkeno so'e huntenu

hanaveti'za Jisasi antahigene'naze. ²³Ana nehzageno, Jisasi'a avusu hu'nea ne'mofo azante avazu huno kumara atreno megi'a vuteno, Jisasi'a avufi avetu ahenenteno, azanu avako nehuno, mago'azana negano? Huno antahigene. ²⁴Kesga huno avua negeno, vahera vano nehazagena zmagoanagi, zafamo vano nehiaza nehigene'na nezmago'e huno hu'ne. ²⁵Anante Jisasi'a mago'ene azanu avurgare avako higeno, ana ne'mofo avurgamo'a hari higeno, ke ankereno negeno maka'zana keama huno ke'ne. ²⁶Anante Jisasi'a hunenteno, kumapina ufrege efrege osunka, fatgo hunka nonkarega vuo huno asami'ne.

Pita'a huama Jisasinku hu'nea naneke

(Mat 16:13-20, Luk 9:18-21)

²⁷Jisasi'a amage nentaza disaipol naga'ane Sisaria Filipai kumatamimpi vu'naze. Kantegama nevu'za Jisasi'a anage huno zmantahigene, Nagrikura vahe'mo'za iza'e hu'za neheze? ²⁸Mago'amo'za, hu'za mono ti frezamante'nea Joni'e hu'za nehze. Hagi mago'a mo'za, kasnampa ne' Ilaija'e hu'za nehze. Hagi mago'amo'za korapa kasnampa vahepinti mago'zmimo'e hu'za neheze. ²⁹Anage hzageno Jisasi'a zamagri zmantahigeno, hagi tamagra iza'e hutma Nagrikura neheze? Higeno Pita'a kenona huno, kagra Kraisige, Anumzamo'ma huhamprino vahe'ama z mavregahanema hu'nea nere hu'ne. ³⁰Agra hu hankavetino mago vahera ana naneke huama hutma ozmasmiho huno zamasmine.

Jisasi'a knafima ufreno frisia ke zamasmine naneke

(Mat 16:21-28, Luk 9:22-27)

³¹Anante Jisasi'a erigafa huno amage'ma nentaza disaipol naga'a rempi huzamino, Vahe'mofo Mofavremo'a rama'a ata e'nerisigeno, mono kva vahe'mo'zane, ugagota kva vahe'mo'zane, kasegere ugagota hu'naza vahe'mo'za zmefi humiza ahefrisageno, tagufagna maseteno otigahie huno zmasami'ne. ³²Huama huno amate zmasamigeno, Pita'a nentahino Jisasi'a avaregantiteno, agafa huno e'inahu kea osuo huno kesu'ne. ³³Hianagi Jisasi'a rukrahe huno, amage nentaza disaipol nagatega nezmageno Pitana kesuno, Sataga manigenka namefiga'a evuo, Anumzamofa antahintahi novaririnanki, vahe'mofo antahintahi nevaririne.

Jisasi amage'antezamofa naneke

³⁴Anante Jisasi'a maka veamokizmi ke hige'za, amage'ma nentaza disaipol naga ene emetru hazageno, anage huno zmasami'ne, mago vahe'mo nagri namage'ma antenaku'ma hanuno'a, agra'a avesizana netreno, keka zafa'a erigofino namage egahie. ³⁵Na'ankure iza'o, agra'a manizama'a eri so'e huku hanimo'a, asimu'a atregahie. Iza'o nagriteku'ene knare musenkere'ma asimu'a atresimo'a,

manizama'a erigahie. ³⁶Mago vahe'mo'ma ama mopafi fenoza eri atruma nehanigeno, agu amema'a fnanema haniana, nankna aza hu'za erigahie? ³⁷Na'a vahe'mo'a asimuma erisigura nona'a huno Anumzamofona amigahie? ³⁸Iza'o ama knafi keontahi kumike vahepi, Nagriku'ene Nanekenimofa agaze huntessimofona, henka Vahe'mofo Mofavremo Nfa'amofa hanavefima routge ankeri vahe'ane esuno'a, Agranena zamagaze hunte'nesamokizmia, eme agaze huzmantegahie.

9 ¹Jisasi'a mago'ane zmasamino, tamage hu'na neramasmue, amafi otiza mni'naza vahepintira, ofri mani'ne'za Anumzamofa kumamo'a hanave'ane esige'za kegahaze.

Jisasi avufgamo masantake nehige'za kenaza naneke
(*Mat 17:1-13, Luk 9:28-36*)

²Gsi'a zagegna evutegeni, Jisasi'a, Pitama, Jemisima, Jonikizmia zmvreno za'za agonafi mareriza zamagrake umani'ne'za, negageno avufagamo'a rukrehe huno ruzahie nehigeno, ³kukena'amo efe anentake huno tampre tampre hu'ne. Mopafina kukena sese nehigeno e'inahukna efenentake nosiaza huno efenentake hu'ne. ⁴Hagi Ilaija'a Mosesi'ene zmvuga efore huke Jisasi'ene naneke hu'naze. ⁵Ana higeno Pita'a anage huno Jisasi'ne asami'ne, Hurami' nemoke, knare amafina mani'none. Hagi tagufa tona nona kigahune, mago nona Kagriki, mago nona Mosesinki, mago nona Ilaijanki huta kigahune. ⁶Na'ankure zmagra tusi koro nehazageno, na'ane naneke hugahie, Pita'a ontahineno ana kea hu'ne. ⁷Anante hampomo refitenezmantegeni, mago agerumo amanage ana hampopinti hu'ne, ama'i tusiza hu'na navesima nentoa Mofavreni'e. Agrama hania kea antahi amiho! ⁸Keganti kegma hu'za kazana, ame huke Moseke Ilaijake omninakeno, Jisasi Agrake mani'nege'za ke'naze.

⁹Zamagrama agonaregati magoka eneramizageno hanave ke zmasamino, ke'naza zana vahera ozmasamitfa hu'nenkeno, Vahe'mofo Mofavremo'a, fripinti otiteno hu'ne. ¹⁰Zamagra'a fritena otitanenoma hia naneke nentahiza, na agu'agesare nehie hu'za hu'naze. ¹¹Anante zmagra Jisasi'ne anage hu'za antahige'naze, na'a hige'za kasegere ugagota hu'naza vahe'mo'za, hu'za Ilaija'a etenkeno'e hu'za nehaze? ¹²Jisasi'a anage huno zmasami'ne, Tamage Ilaija ko eno maka'zama haviza hu'neazana eriso'e hu'ne. Hagi na'a higeno avontafepina krenteno, Vahe'mofo Mofavremo'a rama'a ataza erina, vahe'mo'za zamefi humigahaze hu'ne?

¹³Hianagi anage hu'na neramasamue, Ilaija'a ko' ehanatige'za nanknazama hunte'nakuma haza'zana avon tafepima kre'nea kante ante'za maka'zana hunte'naze.

Jisasi'a mago mofavre azeri knamre'nea naneke
(*Mat 17:14-21, Luk 9:37-43*)

¹⁴Jisasi'ene tagufa amage'ma nentaza disaipol nagamo'zama, ete ruga'a amage'ma nentaza disaipol nagatema, e'za eme zmagazana kasegere

ugagota hu'naza vahe'mo'za keha renezmantazageno eme zmage'naze. ¹⁵Ana maka vahe'mo'za Jisasina nege'za antri nehu'za, ame hu'za zmagare'za vu'za muse ome hunte'naze. ¹⁶Jisasi'a huno na'anuku huge antahige zamagranena nehaze huno zmantahige'ne? ¹⁷Tusi'a vahepinti mago'mo ana kemofono nona'a anage hu'ne, Rempi hurami ne'moke, havi avamumo agu'afi mani'nenono agira eri antrako higeno, ke nosia mofavreni'a avarena Kagrite neoe. ¹⁸Anama havi avamumo agu'afi nefreno'a azeri traka hutregeno mopafi masenegeno, ahirahi neregenono agipinti agremono zuzu nehigeno, avera anikreki nehuno mase havavu nehie. Ana nehigena avre'na Kagri kamage'ma nentaza disaipol nagate havi avamu humegi atresazegu zmantahigo'anagi, azeri so'e huonte'naze. ¹⁹Ana kemofono nona'a Jisasi'a anage huno zmasami'ne, tamagra tamentinti osu vahere! Nama'agna tamagra nena manigahue? Nama'agna tmagri kna erina vugahue? Ana mofavre avaretma Nagrite eho. ²⁰Hagi ana mofavre avare'za azageno, havi avamumo Jisasima anama negeno'a, ana mofavre azeri traka hutregeno mopafi traka huno maseno rukre rukre nehigeno, agipinti agremono zuzu huramine. ²¹Ana nehigeno Jisasi'a ana mofavremofono nefana antahigeno, Nanknafi ana zana agafa hu'ne? Higeno, mofavre maninegenono anazana fore humine huno hu'ne. ²²Rama'a zupa tevefine tirupine ahefri'naku azeri traka hunetre. Hagi Kagrama azahuga hunesunka, kasunku hurantenka taza huo huno hu'ne. ²³Jisasi'a anage huno ana mofavremofono nefana asami'ne, na'a higenka kagrama azahuga hunesunka azeri otio hunka nehane? Hagi mago'moma amentinti huno, maka'zana fore hugahie hanimofontera, amane maka'zana fore hugahie. ²⁴Ana mofavremofono nefa'a ranke hantka huno anage hu'ne, namentinti huanki namentintima osu'zana naza huo! ²⁵Jisasima keama rama'a vahe'mo'za ame hu'za eritru nehazageno, havi avamura hanavetino hunteno, kagra vahe'mokizmi zmazeri negi nenenka zamagi zamazeri antrako nehana havi avamumoka, hugantoanki agu'afintira atiraminka nevunka, mago'anena eofro.

²⁶Higeno ranke huno azeri tagosi tagosi nehuno atiramino enevigeno, ana mofavremo fri vahekna huno mase'nege'za, hago frine hu'za hakare vahe'mo'za sumi sumi ke hugantigama hu'naze! ²⁷Hianagi Jisasi'a azante akoheno azeri otigeno oti'ne. ²⁸Ana huteno Jisasi'a nompni umarerige'za, amage'ma nentaza disaipol naga'mo'za, Agrane zamagraku umani'ne'za, na'a higeta havi avamura ahenati notrone hu'za antahige'naze? ²⁹Jisasi'a anage huno zmasami'ne, amana huknazana, nunamuhu kantetike huntisageno atiramigahie.

Jisasi'a friteno otisia zamofonku hu'nea naneke

(Mat 17:22-23, Luk 9:43-45)

³⁰Jisasi ene amage'ma nentea disaipol naga'mo'za ana kumara atre'za, atiramiza Galili kaziga rukitagiza vu'naze. Hianagi Jisasi'a kama

vazama'a mago vahemo antahi zankura ave'osine. ³¹Na'ankure amage'ma nentea disaipol nagara rempi hunezamino, anage huno zmasami'ne, Vahe'mofo Mofavre avare'za ha' vahe zmazampi antesageno ahe frina, tagufa kna maniteno kerifintira otigahie. ³²Hianagi ana naneke antahi ama nosu'za, antahige'zankura koro hu'naze.

Amu'nontifina i'za rana mani'ne hu'naza naneke

(Mat 18:1-5, Luk 9:46-48)

³³Ananteti Kapanea kumatega ete'za, Jisasima nompinka enemanino'a anage huno zmantahige'ne, Kantegama ne-eta na'anku keaga huta e'naze? ³⁴Hianagi kantegama ne-eza i'za amu'nontifintira ugagota hu'ne hu'za hugantugama hu'nazagu, zamagra kea osutfu hu'naze. ³⁵Anante'ma Jisasi'ma mopafima nemanino 12fu'a amage'ma nentaza disaipol naga'a, kehuno anage huno zmasamine, iza'o ugagota hunaku'ma hanimo'a, henkarfa nemanino, maka vahe'mofo eriza vahe manigahie. ³⁶Agra osi mofavre amunozmifi azante azerino azeri onetino, anage huno zmasami'ne. ³⁷Iza'o amanahu'kna osi mofavre, Nagri nagifi avreno azeri so'e huntesimo'a, Nagri navareno nazeri so'e hunantegahie. Iza'o Nagri'ma nevareno nazeri so'e hunante'nimo'a, Nagrike navreno nazeri so'e osugahianki, Nenfa hunantege'na e'nomofo avreno azeri so'e huntegahie.

Erizanti eri haviza nosimo'a tagri kaziga mani'ne hu'nea naneke

(Luk 9:49-50)

³⁸Joni'a Jisasi asamino, Hurami ne'moka mago ne'mo kagri kagifi havi avamutamina humegi netregeta negeta, ana osuo huta hunte'none. Na'ankure ana ne'mo'a tagranena vano osu'negu ana osuo huta asevazinte'none. ³⁹Hianagi Jisasi'a anage hu'ne, i'o huonte'ho, na'ankure mago vahe'mo'e huno Nagri nagifima kaguvazama nehanimo'a, hantga huno hu haviza hu onantegahie. ⁴⁰E'ina hu'negu iza'o tagri'ma ha'marema norante'nimo'a, tagri kaziga mani'ne. ⁴¹Na'ankure tamage hu'na neramasamue, iza'o, Kraisi amage'ma nentaza disaipol naga zmaza hanue huno nehuno, tima afi tamisimofona, mizama'amo'a fanane osugahie.

Havi avu'avazamo zmentinti zmazeri haviza nehia naneke

(Mat 18:6-9, Luk 17:1-2)

⁴²Jisasi'a anage huno zmasamine, iza'o ama osi mofavremo'za, Nagrite zmentinti nehaza mofavre naga kumipi zmarentesamokizmia, tusi'a monu havereti anankempi rentete'za, hagerimpi matevu'za atresageno uramisiana knare'zantfa hugahie. ⁴³Hagi kzamo'ma kumipi kavare nentesigenka akafritro, na'ankure ru tare kaza me'neni asu osu tevava tevefi kavarente zanku, magoke kaza me'nena manivava asimu erizampi ufresanana knare hugahie. ⁴⁴[Anampina knimo'a zamufgafi manivava

hugahie. Hanki tevemo asu osu tevava hugahie.] ⁴⁵Hagi kagamo'ma kumipi kavare nentesigenka akafri tro, na'ankure ru tare kaga me'nenos asu osu tevava tevefi kavarente'zanku, magoke kaga me'nenos, manivava asimu erizampi ufresanana knare hugahie. ⁴⁶[Anampina knimo'a zamufgafi manivava hugahie. Hanki tevemo asu osu tevava hugahie.] ⁴⁷Hagi kavurgamo'ma kumipi kavare nentesigenka, tagati atro, na'ankure ru tare kavurga me'nenos, asu osu tevava tevefi kavretre'zanku, magoke kavurgama me'nenos, Anumzamofos kumapima ufresanana knare hugahie. ⁴⁸*Anampina knimo'a zamufgafi manivava hugahie. Hanki tevemo asu osu tevava hugahie.* (Ais 66:24) ⁴⁹Na'ankure ana mikomofona tevenu kre fatgos hugahie. ⁵⁰Hagemo'a knare hu'neanagi, haga'ama atresigenka, inankna hunka ete kagra eri haga hugahane? Tamagra hagegna huta amunos tamifina ovesinte avesinte hutma maniho.

Jisasi'a arave atane zanku zmasami'nea naneke

(Mat 19:1-12, Luk 16:18)

10 ¹Jisasi'a anankuma atreno Judia kaziga vunos Joda ti takahenos kantu kaziga vu'ne. Nevige'za tusi'a veamo'za mago'ene Agrite emeris atru hzagenos anante umani'nenos, ko'ma nehiazas hunos naneke mago'ene agafas hunos rempi huzami'ne. ²Farisi vahe'mo'zas e'zas Jisasinas rehe'zas anage hu'zas antahige'nazes, vemomas nenaros atrezamo'a kasege amage antegahifi? ³Ana kenonas'a anage hunos zmasami'ne, na'a hiho hunos Mosesi'a kasegea krerami'ne? ⁴Zamagra anage hu'nazes, Mosesi'a avompinas, vemo'a nenaros atrenakuras amane katros hunos eriamahu avonas kre neminos, huntekenos vugahie. ⁵Hianagi Jisasi'a amanage hunos zamasmis'ne, na'ankure tmarimpamo'a hankavetinos erigi'neazanku hunos Mosesi'a ana kasegea krenos tamamis'ne. ⁶Hianagi Anumzamos ese agafare *vene a'ene trohu znante'ne*. ⁷E'i ana agafare vemo'a nefane nererananos netrenos, nenaros'ene hagerfinos, (Diu-Kas 24:1, Jen-Agf 1:27, 5:2) ⁸erimagos znavufas neseke, mago'anes tare vaheras omnina'anakis, magoke manis'ne. ⁹E'inas hu'negus nazanos Anumzamos eris hagerafis neniazanas, atregegos magos vahe'mo'as eris ovasanenos. ¹⁰Ete mago'enes nompis umareris'zas amage'ma nentazas disaipol naga'mo'zas aravemas refutagizankuras antahige'nazes. ¹¹Jisasi'a ke'nonas zamiris anage hunos zmasamis'ne, iza'os ese a'ma netrenos aru a'ma erisas ne'mo'as, ese a'mofonas kumis huntenos monkos avu'avazas hugahie. ¹²Hagi magos a'momas neves netrenos, aru ves eris snimos'a, monkos avu'avas hugahie.

Jisasine ne'one mofavre naga'mofos naneke

(Mat 19:13-15, Luk 18:15-17)

¹³Anante vahe'zgamo'zas ne'one mofavres raminas Jisasi azantenos asomus huzmantenogus zmvare'zas neage'zas, amage'ma nentazas disaipol

nagamo'za ke zmasu'za azeri amuho osiho hu'naze. ¹⁴Hianagi Jisasima nezmageno asi vazigeno, anage huno zmasami'ne, zamazeorita zmatrenke'za osi mofavre'mo'za Nagrite eho, na'ankure Anumzamofokumara e'inahu vahe'mofo kuma me'ne. ¹⁵Tamage hu'na neramasamue, iza'o Anumzamofokumama mofavre'moma eneriaza huno e'orisimo'a, uofretfa hugahie. ¹⁶Jisasi'a anage huteno, ana mofavre'rami zamavreno, azana zmagofetu anteno agafa huno asomu ke huzmante'ne.

Afufeno ne'mo Jisasi antahige'nea naneke
(*Mat 19:16-30, Luk 18:18-30*)

¹⁷Jisasi'a otino kantega nevigeno mago ne'mo negeno, agareno agafi rena omenereno anage huno hu'ne, knare rempi hurami ne'moka, nankna hanuna manivava asimura erigahue? ¹⁸Higeno Jisasi'a anage huno ana nera asami'ne, na'a higenka kagra knare hu'nane hunka nehane? Mago vahe'mo'e huno knare osu'neanki, Anumzamofokumama Agrake knarera hu'ne. ¹⁹Hagi kasegefina ko amanage hu'negenka antahinane, vahe ahe ofrio, rumofo a'enena monko'zana osuo, kumzafa oso, vahera havige huozmanteho, vahezana eri savarira osiho, negrerane negafane kea antahi znaminka zmage antegahane hu'negenka antahinane. ²⁰Anante ana ne'mo Jisasina anage huno asami'ne, Hurami ne'moka, osi'ma maninoreti, nagu'areti hu'na maka ana kasegea amage ante'noe. ²¹Jisasi'a ana nera negeno avesinteno anage hu'ne, mago'zanku upa hu'nane, vunka inanknazama ante'nesnana zana, maka zagore ome atrenka eritenka, ana zago erinka zamunte omene vahe nezamigeno, monafi fenonka'a meno. Ana nehunka kagra, Nagri eme namage'anto. ²²Ana naneke nentahigeno, avugosamo ruzahe higeno, rama'a afufeno ante'negu rimpagna nehuno atreno oti'no vu'ne.

²³Vigeno Jisasi'a ome zmage eme zmage nehuno, amanage huno amage'ma nentaza disaipol naga'a zmasmi'ne, Afufeno zmine vahe'mo'za Anumzamofokumapi ufrenaku'ma hanazana, tusi'a amuho hugahaze! ²⁴Amagemanentaza disaipol nagamo'za antri ana kegura hu'naze. Hianagi mago'ene Jisasi'a anage huno zmasami'ne, mofavre naga'mote, Anumzamofokumapima ufrezamo'a tusi'a amuho hu'ne! ²⁵Kemoli afumo'za nekazamofokampima ufrenakuma nehazana amuhoa hunozmante, hianagi afufenone vahe'moza Anumzamofokumapi ufre'naku hanazana, tusi amuho huzmantegahie. ²⁶Mago'ene antri hu'za tusi zmagogogu nehu'za, zamagra zmagra anage hu'naze, hagi iza manivava manizana erigahie? ²⁷Jisasi'a nezmageno ana kenona amanage huno hu'ne, Vahe tfamota amanahu'zana hugara osu'nazanki, Anumzamofokumama amane maka'zana hugara hu'ne.

²⁸Pita'a anage huno Jisasina asmi'ne ko, tagra mafka'zana atreta kagri kamage'entone. ²⁹Jisasi'a anage hu'ne, tamage hu'na neramasamue,

iza'o Nagriku ene knare muse kereku'ma huno nozmifi, afuhe'impfi, asarhehe'impfi, nererampfi, nefampfi, mofavre'zga'afi hoza ramima'ama atresimo'a, ³⁰ana nona'a maka'zana 100ti'a agatere'za menina ama knafina rama'a e'neriza, rama'a kuma'ene, nefu'zane nesaro'zane nererane mofavre' naga'ane, hoza zmine e'nerisage'za, vahe'mo'za zmazeri haviza nehanige'za, henkama esia knarera manivava zmasimu erigahaze. ³¹Hianagi rama'amo'za ugagota hu'nenamo'za, henka esnage'za, rama'a henka e'nenamo'za, ugagota hu'za vugahaze.

Ete tagufa zupa Jisasi'a friteno otisia zanku hu'nea naneke
(*Mat 20:17-19, Luk 18:31-34*)

³²Jerusale vu kantega mareri'za nevazageno, Jisasi'a ugota huno vu'ne. Hianagi amagama nentaza naga'mo'za antri nehzageno, zmavaririza vu'naza vahe'mo'za koro hu'naze. Hianagi Jisasi'a 12fu'a amage'ma nentaza disaipol nagara zmare kanti mago'ene zmanteno, agafa huno agritema fore haniazamofu naneke zmasami'ne. ³³Keho, Jerusale kumate marerita meni nevunankino, Vahe'mofo Mofavrea azeriza ugagota mono kva vahete'ene kasegere ugota hu'naza vahe zmazampfi avrentegahaze. Zamagra ahe friho nehu'za, fegi'a vahe zmazampfi avrentegahaze. ³⁴Ana vahe'mo'za huhaviza hunente'za, zmavetu ahenente'za sefunemiza, ahe frigahaze. Hianagi tagufa kna agetere'sigeno frinefintira otigahie.

Jemisike Jonike kota vahe maninaku Jisasina antahige' na'a naneke
(*Mat 20:20-28*)

³⁵Anante tare Zebeti nemofoke Joni'ene Jemisike Jisasinte e'ne anage hu'na'e, Hurami ne'moka, menima tagrima tave'manesiza hurantogu kantahinego'e? ³⁶Jisasi'a anage hu'ne, na'a huranantesuegu neha'e? ³⁷Anage huke asami'na'e, monafima hihamu hanaveka'afima kinima umaninunka tatregeno, mago'mo'a kazantmaga manina, mago'mo'a kaza hoga'a maninogu nehue. ³⁸Hianagi Jisasi'a anage huno znasami'ne, tanagra antahitna ketna osu na'azanku nantahinega'e! Tanagra nesua kapufintira negaha'o, hifi tima fresuaza hutna, tina fregaha'o? ³⁹Ana netremoke anage huke Jisasina asami'na'e, tagra amane negahu'e huke hakeno, anante Jisasi'a anage huno znasami'ne, Nagrama nesua kapufintira amane neta, tima frezama nehua tina fregaha'e. ⁴⁰Hu'neanagi nazantmaga mani'zane, naza hogama manizana Nagri'zana omane'ne, Anumzamo'ma huhampri zamanteno, retroma huzmanteno erigahazema hu'nea vahe'mo'za erigahaze.

⁴¹Anage nehige'za 10'a amage'ma nentaza disaipol naga'mo'za ana naneke nentahi'za, Jemisine Jonigizni agafa hu'za zmarimpa aheznante'naze. ⁴²Jisasi'a mika'amokizmi ke higeza ageno anage huno zamasmine, megi'a vahepinti kva vahere hu'za antahizamiza vahe'mo'za

ra vahe'zimi nemanizageno, iza'zo ra zmagima eri'za vahe'mo'za hanave zmireti zmagatere'za kegva hunezmantaze. ⁴³Hu'neanagi tamagra anahukna osugahaze. Hianagi iza'o ra vahe maninaku hanimo'a, tmagri amu'nompina eriza vahe manino. ⁴⁴Iza'o amuno tamifintima ugagota hurmante'nakuma hanimo'a, mika'motma kazo kazo eriza vahe manigahie. ⁴⁵Ana hu'negu Vahe'mofo Mofavre'mo enena, eri'za erintehogura ome'ne. Hianagi tamagri tmaza nehuno, Agra'a asimura atreno rama'mokizmi miza sezmantenaku e'ne.

Avusu hu'nea ne' Batamias naneke

(Mat 20:29-34, Luk 18:35-43)

⁴⁶Zamagrama Jeriko kumate ehnatite'za, Jisasi'ene amage'ma nentaza disaipol naga'ene tusi'a veamo'za ana kuma atre'za nevazageno, Timeasi nemofo Batamiasi avusuhu ne'mo, kamofa ankenarega mani'nenno, azama hanagu meme hu'ne. ⁴⁷Ana ne'mo antahiana Nazareti Jisasi ne-e hia ke nentahino'a, agafa huno kezatino, Jisasiga Deviti nemofofa nagrira kasunku hunantenka nazahuo! ⁴⁸Rama'a vahe'mo'za kesu'za, kagra tagano hu'naze. Hianagi mago'ene kezatino, Jisasiga Deviti nemofofa nagrira kasunku hunanteka nazahuo! ⁴⁹Higeno Jisasi'a nevfintino utino, Ke hinkeno eno hige'za, zamagra ana avusuhu neku, kagriku ke nehianki krimpamo'a so'e nehinkenka otinka eno hu'za hu'naze. ⁵⁰Ana ne'mo zanra anakreku'a netreno ame huno otino Jisasinte e'ne. ⁵¹Anante Jisasi'a anage hu'ne, na'a hugante'nuegu kavenesie? Hurami ne'moka, ete navu kenaku nehue. ⁵²Higeno, Jisasi'a anage huno asami'ne, kamentintimo kazeri so'e hianki vuo higeno, ame huno avurgamo'a ete hari higeno amage'avaririno kantega vu'ne.

Jerusale kumapi Jisasi'a donki afumofa agumpi kini vahekna huno ufre'nea naneke

(Mat 21:1-11, Luk 19:28-40, Jon 12:12-19)

11 ¹Hagi Jerusale kuma tva'onte e'naze. Betfakene Betani Olive agonare me'nea kumate ne-eza, Jisasi'a tare amage'ma nenta'a disaipol netrena huznanteno, ²anage huno znasami'ne, tanagra ugoteta antu kumapi vi'o. Kasefa donki vahe'mo'a agumpi omninenia kina arente nenigeta ome kenutna, nofira eri katufetna avazu huta e'o. ³Hanki ana nehnakeno mago'a vahe'mo, na'a hu'naku nevra'e huno hinketna'a? anage hi'o, Ramofona eriza me'ne hutna hikeno, ame huno atrenketna avretna egah'e. ⁴Huno huznantegeke karanka nevu'ne ome ka'ana, fegia nomofa kafante rente'nagene ome negene katufe'na'e. ⁵Anante otinaza vahe'mo'za, na'a hunaku donkina katunefa'e hu'za znantahige'naze? ⁶Jisasi'ma hu'nea kea nezmasmige'za, anante'ma otinaza vahe'mo'za knarere hu'za huznante'naze. ⁷Anante ana kasefa donkina avre'ne Jisasinte ne-ene anakreku'zani zafi'ne ana donkimofa agumpi

tafevasi nentakeno, Jisasi'a ana agofetu manino vu'ne. ⁸Mika veamo'za zaza anakre ku'zimi zafiza kampi vasiza nevu'za, mago'amoza zafa asina hozafinti akafri'za kampi tafe vasiza nevzageno, Jisasi'a ana tafete vu'ne. ⁹Kote'za vaza vahe'mo'zane henkama aza vahemo'zanena amrara hu'za ranke hu'za muse hunente'za, *tazahu nera, (hosanna) ramofo agifi ne-emofona asomu hutesnie!* (Sam-Zga 118:25-26) ¹⁰Nerafa Deviti nagapintima ne-emofonkura mrrerisa Anumzamofona muse hunenteta, Tazahu ne'mofona agi'a hentesga hanune. ¹¹Anante Jisasi'a Jerusale kumapi vuno, ra mono nOMPI ufreno maka'za ome kagino ke vgareteno, atiramino 12fu'a amage'ma nentaza disaipol naga'a zgemo kinaga segeno nezamavreno atreno Betani kumate vu'ne.

Fiki zafamo raga'a oreno huno sifna hente'nea naneke
(*Mat 21:18-19*)

¹²Masete'za nanterana Betani kumara atre'za neageno, Jisasina aga ate'ne. ¹³Fiki zafa'mofo asina ogamanu me'negeno negeno, nezama rente'nenigu kenaku eme ke'ne. Hianagi eme keana asinage me'negeno ke'ne. Na'ankure fiki zafa raga rentekna omane'ne. ¹⁴Ana zafa mofonku anage huno hu'ne, mago'ene rga oresnanke'za veamo'za tagi'za onegahaze. Anage hige'za amage'ma nentaza disaipol nagamo'za ana naneke antahi'naze.

Ra mono nOMPI maketi nehaza vahe Jisasi'a zamahe fegi zmatre'nea naneke
(*Mat 21:12-17, Luk 19:45-48, Jon 2:13-22*)

¹⁵Jisasi'ene amagemma nentaza disaipol naga'ane Jerusale kumate uhnti'za, ra mono nOMPI marerino, agafa huno maketima nehaza vahera zmahenati netreno, zagore netre'za miza nesaza vahe'mokizmi trara erikaha hunetreno, mani'ne'za maho nma zgore netraza tra enena erikaha hutrene. ¹⁶Ana huteno feno zantamia mago vahe'mote hutma eritma ra mono nOMPINA aru kitagita vuta eta osutfa hiho huno hu'ne. ¹⁷Ana huteno agafa huno rempi hunezamino anage huno zamasmine, amanage huno Anumzamomo avontafepina krente'ne, *Nagri nona mika kaziga vea'moza nunamu hanaza no me'ne*, hianagi tamagra kumzafa vahe'moza fraki nonkuma eri tro nehaze. (Aisa 56:7, Jer 7:11) ¹⁸Ra mono kva vahe'mozane, kasegerema ugagota hu'naza vahe'mo'za nentahiza, inankna huta ahegahune hu'za ahesaza kankamunku hakrenaze. Na'ankure zmagra koro Agrikura hu'naze. Hagi maka vahe'mo'za rempima huzamia zankura antri hu'naze. ¹⁹Ana kinaga Jisasi'ene amage'ma nentaza disaipol nagamo'za, rankuma atre'za fegi'a vu'naze.

Sifnama hente'nea fiki zafamo hagege hu'nea naneke
(*Mat 21:20-22*)

²⁰Nanterana enevu'za kazana, sifnama Jisasi'ma ahente'nea fiki zafamo'ene arfu'na'amo'a, osapa re'nege'za ke'naze. ²¹Pita'a Jisasi'ma

hu'nea kegu age'sa nentahino anage hu'ne, Hurami ne'moka ko! Okima sifna kema hunka raga renontenka osaparo hu'nana Fiki zafamo'a osapa re'ne. ²²Jisasi'a kenona anage huno zamagrira zmasami'ne, Anumzamofonte tamentinti hiho. ²³Tmage hu'na neramasamue, mago vahe'mo'ma ami agonagu'ma huno, otinka hagerimpi takauro huno tare aghesa ontahi amentinti nehuno hanigeno'a, amane ke haniaza huno fore hugahie. ²⁴E'ina hu'negu anage hu'na neramasamue. Nazankuma nunamu hunka Anumzamofa antahima kesunka, hago eri'noe hunka kamentinti hanunka erigahne. ²⁵Hagi otinka nunamu hunakuma hanunka, mago'mo haviza hugante'nesnia zana atrento, anama hanunkeno'a, monafi nemanina Nafakamo'a kagri'enena kumika'a atregantegahie. ²⁶[Hu'neanagi kagra vahe'mofo kefoza atre ozmantesanana, monare mani'nea Nfakamo kagri kefozana anazanke huno atre ogantegahie.]

Jisasi hanavegu agenoka hu'naza naneke

(Mat 21:23-27, Luk 20:1-8)

²⁷Jerusale kumate ete uhnatizageno, Jisasi'a ra mono no kumapi nevice'za, ra mono kva vahe'mo'zane, kasegere ugagota hu'naza vahe'mo'zane, mago'a ugagota kva vahe'mo'zane, nege'za Jisasinte e'za, ²⁸anage hu'za antahige'naze, Kagra ina hihamure hakare zana eri fore nehane? Iza hihamua kamigenka hakare zana nehane? ²⁹Jisasi'a zamagri kura anage huno hu'ne, Nagra ete tamagrira mago'zanku tmantahigegahue, ana kenona'a hutenkena, aza hihamu namigena erizana e'nerufi tmasmigahue. ³⁰Nasamiho, Joni mono ti frezmante'nea, zana monafinti e'nefi, vahe'mo erifore hu'ne? ³¹Jisasi nehige'za zamagra ohumi ahumi nehu'za anage hu'naze. Tagrama monafintire huta hanunkeno'a, Agra anage hugahie. Hagi nahigetma tamentinti ana zankura nosaze huno hugahie? ³²Hianagi vahe'mo eri fore hu'ne, huta osugosune, nehu'za maka veaku koro hu'za atre'naze. Na'ankure maka veamo'za Joninkura, tamage kasnampa nere hu'za antahinaze. ³³Anage nehu'za Jisasina kenona hunte'ze, ontahinone hazageno Jisasi'a anage huno zmasami'ne, Nagra nena iza hihamufi eri'zana enerue ontasmigahue huno hu'ne.

Hoza nafa'amofa mofavrene eri'za vahe'a zmazeri haviza hu'nea fronka naneke

(Mat 21:33-46, Luk 20:9-19)

12 ¹Jisasi'a erigafa huno fronka ke zmasami'ne, mago mopa agafa ne'mo'a waini hoza kri'ne. Ana hoza kegina huno, waini'ma tatisia keria asenteteno, mni'nenon kvahu nona kinte'ne. Zoka mni'nenon ikante zgo miza seterehu (rent) vahete, hoza'a netreno afete ka vu'ne. ²Hozama vasage knama egeno'a, kazokzo eri'za ne'a huntengeno, agri'ma refko hu'za amisnazama'a

erisnigu, kegva hune'za ikantema mizama (rent) nezamiza naga'mokizmire e'ne. ³Ana hianagi, anama kegva hu'naza nagamo'za, azeri'za knonkeve nemi'za, atrageno mago'zana e'ori amane vu'ne. ⁴Ete mago'ane ru kazo kazo eri'za ne'a huntegeno vige'za, anu rutane'za ahete'za, ke huhaviza hazageno atreno e'ne. ⁵Ana hazageno ete mago'ene ru huntegeno vimofona, ahe frigeno hakare huzmantege'za nevzageno, mago'a knonkeve nezami'za, mago'a zmahe fri'naze. ⁶Ana hazageno, magoke avesi avesi hunentea mofavrege mani'ne. Ana huzmante vgareteno, henkarfana magoke mani'nea mofavre'a hunenteno, zamagra magoke mofavre ni'agi'za antahimigahaze hu'ne. ⁷Hianagi ana hoza kva hu'naza vahe'mo'za, zamagra zmagra anage hu'naze, nafa'amofa zama erisanti haresia nera ama eanki, enketa ahe frisunkeno nefa feno zamo'a, tagriza se'nie! Hu'za hu'naze. ⁸Ana nehu'za azeri'za ana mofavrea ahe frite'za, avufa'a waini hozafinti megi'a mate vu'naze.

⁹Waini hozamofo nefa'a nankna eme hugahie? Agra eno waini hoza kegva krinaza vahera eme zmaheno, waini hoza ru vahe'mokizmi eri zaminke'za, kegva hugahaze. ¹⁰Hanki ama naneke Anumzamofa avontafepi krente'nazana hampritma ontahinazo? *Nogi vahe'mo'za haviza hie huza atre'naza havemo'a, no renage antepinka no azeri hanaveti have fore hu'ne.* ¹¹Anumzamo ama anazana hu'neanki, tavuma konana knare zantfa hu'ne. (Sam-Zga 118:22-23)

¹²Hagi ana vahe'mo'za azeri'saza kanku hakre'naze. Na'ankure fronka kema hu'neana zamagriku hu'ne. Hianagi zmagra tusi'a vahe kevugu koro nehu'za atre'za vu'naze.

Takisi zgo Sisama amizanku Jisasina antahige'naza naneke
(*Mat 22:15-22, Luk 20:20-26*)

¹³Hagi Juda kva vahe'mo'za Jisasina rehe'za kema huhaviza hanige'za, ana ke eri'za keaga hunte'naku, mago'a farisi vahe'ene, Heroti naga'ane huzmantege'za vu'naze. ¹⁴Zamagrama Jisasinte'ma ne-eza anage hu'naze, Hurami ne'moka, tagra antahi'none, kagra tamagege nehunka, mago vahekura koro nosunka, havi vahe'ene fatgo vahe'ene mago'zanke hunka Anumzamofa fatgo kankura rempi huneraminketa nentahune. Hagi knare Sisana takesia amigahumpi omigahune? ¹⁵Hianagi krunage haza nezamageno, anage huno zmasami'ne, na'a higetma Nagrira renahetma negaze? mago zagoa eritma enkena kaneno, ¹⁶hige'za mago zago eri'za eme amizageno, iza amema'ane avone me'ne? Hige'za zmagra hu'za, Sisane hu'za hu'naze. ¹⁷Anante Jisasi'a amanage huno hu'ne, knareki Sisa zana Sisa amigahaze. Hagi Anumzamofa zana, Anumzamofa amigahaze huno hige'za tusiza hu'za antri hu'naze.

Fripinti otino arave hanaza zanku antahige'naza naneke?
(*Mat 22:23-33, Luk 20:27-40*)

¹⁸Mago'a Satusi mono vahe'mo'za (fripinti o'totigahaze nehaza vahe'mo'za) Jisasinte e'za anage hu'za antahige'naze. ¹⁹Hurami ne'moke,

anage huno korapa Mosesi'a avona krerami'ne, mago ne'mo'ma **ara eriteno mofavre ontenu frinkeno'a, nefu ana ara erinuno, mofavre ksentesisigeno, nefu agimo'a fanane osugahie huno avona krente'ne.** (Diu-Kas 25:5-6) ²⁰Hagi 7ni'a kogna mani'nazafinti, agonesa zimimo ara eriteno mofavre ontenu frine. ²¹Nagna'amo ana ara eri'ne. Eriteno mofavre onte frigeno, anante'mo'a anazanke huno ana ara eriteno, mofavre ontenu fri'ne. ²²Ana 7ni'a kogna naga'mo'za, magore hu'za mofavre kse onte fri vgaretageno, ana ara henka'a fri'ne. ²³Fri'pintima oti knazupa, ana maka kognamo'za fri'pintima oti'nageno'a, iza a' manigahie? Na'ankure maka ana 7ni'a kognamo'za ana ara kazo eritere hute'za fri'naze. ²⁴Jisasi'a anage huno zmasami'ne, hantagama hazana, tamagra Anumzamofu avontafepi kre'nea kea antahitma ketma osuta, Anumzamofu hihamu'a onkenetma nehazafigure. ²⁵Na'ankure fri'nehnafinti'ma oti snazana, arave hu'zana omnesigeno, ara vasi omi ami hu'zana omnesigeno, monafinka ankeru vahe'kna hu'za manigahaze. ²⁶Hianagi tamage nanekema me'neana frite'za otigahaze. Anumzamofu onensa zafa tevenerefinti Mosesenku ke higeno antahiteno, avontafepi krente'neana omne'negeta hamprita onkenetma nehazo? Anumzamofu amanage huno asami'ne, *nagra Abrahamu Anumza mani'na, Aisaki Anumza mani'na Jekopu Anumza mani'noe.* (Eks-Uti 3:2, 6) ²⁷Huno hu'negu, Agra fri vahe'mokizmi Anumzana omani'neanki, ksefa hu'za mani'naza vahe'mokizmi Anumza manine, tamagra tusi'a hantaga nehaze.

Ugota hu'nea kasegemofu naneke
(*Mat 22:34-40, Luk 10:25-28*)

²⁸Hagi mago kasegere ugagota hu'nea ne'mo eme antahiana ke hakare nehazageno, Jisasi'a so'eza huno kenona zamirera nezmasamigeno, ananke eme nentahino, Jisasi'na antahigeno, maka kasegefina ina kasegemofu vugota hu'ne? ²⁹Higeno Jisasi'a amanage huno hu'ne, kagota kasegea amanahu me'ne, *Israeli vahe'mota antahiho, Ramo'a tagri Anumzane. Rana agrake mani'ne.* ³⁰Kagra kagu'areti Anumza ka'amofona avesinto, maka kamema'areti hunka avesinto, maka antahintahi ka'areti hunka avesinto, maka hanave ka'areti hunka avesinto hu'ne. (Diu-Uti 6:4-5) ³¹Anantera amanahu kasege me'ne, *kragagu kavesi nentanaza hunka tva'onkare'ma mani'nenimofona avesinto.* (Lev-Pris 19:18) Ama tare kasegemofona mago kasegemofu'e huno znagateore'ne ³²Kasegere ugota hu'nea ne'mo'a anage hu'ne, Hurami ne'moka, tamage hunka hane, Agra magoke mani'neankino magore huno amefiga'a vahera omani'ne. ³³Ana hanigeta Anumzamofona tagu'areti avesinteta, maka antahintahireti avesinteta, maka hanavereti avesinteta, tagragu tavesi nentonaza huta tva'onte maninesaza nagara zmavesinte sunazamo'a, kre sramna vuzane,

Anumzamofu hakare zanka'a ami'zana agatereno ugagotaza me'ne.
³⁴Jisasima antahiana ana ne'moma kenona'a hu so'e higeno, anage huno asami'ne, kagra Anumzamofu kuma tava'onte mani'nane. Higeno mago'a vahe'mo'za antahige zankura koro hu'za antahi onke'naze.

Kraisi'a aza mofavre hu'za hu'naza naneke

(Mat 22:41-46, Luk 20:41-44)

³⁵Jisasi'ma ra mono nompri rempi hunezamino, anage hu'ne, na'ante kasegere ugagota hunaza vahe'mo'za Kraisinkura, Deviti nemofo'e nehaze?

³⁶Ruotge Avamumo Daviti azeri otigeno amanage hu'ne, *Ramo'a anage huno Ranimofonkura hu'ne, Nazantmaga kaziga trate manige'na, ha' vaheka'a kagafinka azeri fenkamu atraneno hu'ne.* (Sam-Zga 110:1)

³⁷Devitima agra'ama huno Ranimo'e hanigeno'a, nankna huno Deviti mofavre manigahie?

Kasegere ugagota hu'naza vaheku kva hanaza naneke

(Mat 23:1-36, Luk 20:45-47)

³⁸Rempima huzamifina Jisasi'a anage huno mago'ene zmasami'ne, kasegere ugagota hu'naza vahekura kva hiho. Zamagra za'za kukena hu'za maketi kumapi hakare vahe'mo'za nezmage'za muse huzmante zanku zmavesi vahere. ³⁹Hanki osi mono nompri vugota hu'nea trate unemaniza, nezama nepina zmagi eri trate nemanize. ⁴⁰Kento a'nemokizmi krunage hu'za feno zimi eneri'za zamo, eama hu'zanku zaza nunamu nehaze. Ana hu'negu ama anazamofu mizama'a, agatere'za ranknaza erigahaze.

Kento a'mo ofa zago ante'nea naneke

(Luk 21:1-4)

⁴¹Jisasi'a ra mono nompri, zagoma nentaza taferomofu tva'onte mani'neni zagoma eme antazana zmage'ne. Feno zimi me'nea vahe'mo'za rama'a zago eme ante'naze. ⁴²Ana nehageno amunte omane kento a'mo eno, tare osi koranke zago mago toza avamente me'nea erino ana taferopi eme netregeno, ⁴³Jisasi'a amage'ma nentaza disaipol nagara ke hige'za ageno anage huno zmasami'ne, tamage hu'na neramasmue, ama amunte omane kento a'mo rama'a zagoa ruga'a vahera zmagetereno taferopina eme ante'ne. ⁴⁴Na'ankure maka vahe'mo'za rama'a ante'nafinti, osi' ofa zago'a eme ante'naze. Hianagi ama kento a'mo'a amunte omnefta hunefinti eri'neama'a ante vga reneankino, miza seno neneno manisiazana omane'ne.

Ra mono no tapage hugahie hu'nea naneke

(Mat 24:1-2, Luk 21:5-6)

13 ¹Ra mono nompinti atiramigeno, amage'ma nentaza disaipol nagapinti mago'mo anage hu'ne, Hurami ne'moke, asinentike

havereti hiro naro nontamina ki'nazanki ko! ²Higeno Jisasi'a anage huno zmasami'ne, tamagra ama hironaro nontami negazo? Mago havemo'a, mago havemofo agofetura omane'tfa hugahie. Mika havemo fragu vazi ramigahie.

Maka'zama vgarenaku hania knafi fore hanizamofu naneke

(Mat 24:3-14, Luk 21:7-19)

³Anante ra mono nomofu kantu kaziga, Olive agonare Jisasi'a marerino umaninege'za, Pita'ma, Jemisi'ma, Joni'ma, Endru'ma hu'za zamagrake emanine'za Jisasi'na antahige'naze. ⁴Tagrira tasamio, nankna zupa anazana fore hugahie? Anazama fore hunaku'ma hanigeno'a, nankna avame'za fore hinketa ketenunkeno ana knazana fore hugahie? hu'za hu'naze. ⁵Jisasi'a agafa huno zmasami'ne, mago'mo havige huno tmavareno havi kante vu'zankura, kva hiho. ⁶Rama'a vahe'mo'za Nagri nagifi ne-eza anage hugahaze, Nagra ana ne' ama'i neoe nehu'za, rama'a vahe havi kante zmvarentegahaze. ⁷Hanki ha'ma hania kema nentahita, ha'mofu zaho nanekema antahi sanuta korora osiho. E'ina hu'zana fore hugahie. Hianagi vgare kna ome'ne. ⁸Hanki anantera mago kumate naga'mo'za, oti'za mago kumate nagara zmahegahaze. Mago kaziga vahe'mo'za oti'za, mago kaziga vahera ha' rezmantegahaze. Ana nehnageno mago'a kumapina imi e'nerisigeno, mago'a kumapina agate'za fore hugahie. Ama anazamo'a, a'moma mofavre kasentenaku higeno, agafa huno ata negriankna ataza fore hugahie.

⁹Hanki tamagra tamia kva hutma maniho. Kanisol vahete tmavare'za nevu'za, osi mono nompri tamavre'za knonkeve ome nerami'za, rankuma kva vahete'ene kini vahe zamavure tmavrentesageta otigahaze. Na'ankure nagriteku ana hanageno, e'i anazama fore'ma haniana nagri nagenkema eri'ama hutma nezmasami'za zanteku fore hugahie. ¹⁰Hanki esera maka mopane mopanena vahe'mo'za knare musenkea huama hanageno antahi vgaretesageno'e. ¹¹Keaga hurmanteku tmazeri'za vnagetma, na'ane huta hugahune hutma antahintahi hakare osiho. Ana knafima hiho hunoma hania nanekea amane hiho. Na'ankure ana nanekea tamagra'a osugahazanki, Ruotage Avamumo hugahie. ¹²Ana knafi nefuna ahe frinogu avare nezaminkeno, nefa'a nemofona avreno ahe frinogu anazanke nehinkeno, mofavremo'za anazanke huza nerera nefana zmahe frinogu avare zamigahaze. ¹³Maka vahe'mo'za tmagrira zmarimpa kna hunermante'za ha' reramantegahaze. Na'ankure Nagri nagimo'a tmagripi me'negu hu'za anara hurmante'gahaze. Hianagi iza'o oti hanavetino manino vu refarega vanimofona agu vazigahie.

Maka'za agtereno haviza hania zamofu naneke

(Mat 24:15-28, Luk 21:20-24)

¹⁴Jisasi'a anage huno zmasamine, nanekema hampri snamota, nehamprita ama hiho. Tusi'a havizantfa huno agotenesizamo, agra

otiga osu'nenia trate otina, ana knazupa Judiana mani'nesaza veamo'za freza agonare viho. (Dan 9:27, 11:31, 12:11) ¹⁵Nomofa agofetuma mani'nesamo'za, uramiza nompintira mago'a zana eriza atioramigahaze. ¹⁶Hozafima mani'ne snimo'a, kuma'aregati kukena'a eme e'orino, koro fregahie. ¹⁷Ananknafima amu'ene hu'nesnia a'negu'ene, mofavre aminte mani'nesnia a'negura, nasunku huzmantoe. ¹⁸Hianagi nunamuna nehinkeno, tusi'a zasi knafina anazana forera osino. ¹⁹Na'ankure ananknafina tusi'a knaza fore hugahie. Anumzamo mopa tro hu'nereti eno menima ehanatinerera, fore osu'neankna knaza fore hugahie. Hagi henka'a ana hukna knaza fore osutfa hugahie. ²⁰Ramo'a ana knama eri atupa osanigeno'a, mago'a vahera omanigahie. Hianagi Nagri vahere hunefintu huhampri'nea vahekuma agesama antahiteno, ana kna eri atupa hugahie. ²¹Ana knafi mago'a vahe'mo'za hu'za, keho ama'i kraisi'e huge, agra antu mani'ne hanigetma tamentintia osutfa hiho! ²²Na'ankure ana knafina mago'a havige kraisi'e huza efore nehu'za, kasnampa vahe efore hu'za, haviza hu'za kagu'vazane avame'za hugahaze. Anama hanazana Anumzamo'ma huhampri zmante'nea vahe'mokizmi, rezmataga hu'naku hugahaze. Hianagi zmagra Anumzamo'ma huhampri zmantenea vahe zmazeri savari hu'naku anara hugahaze. ²³Hagi tamagra kva hutma maniho! Ana maka'zana fore osunege'na, tamagrira neramasamue.

Vahe'mofo Mofavremo ete esianknamofo naneke

(Mat 24:29-31, Luk 21:25-28)

²⁴Hianagi ana knafina tusi'a knazamo vgama resigeno'a, zagemo hani hanigeno, ikamo'a remsa osanigeno, ²⁵monafinti hanafi tamimo'za atafri neraminke'za, monafi me'nea hanave zantamimo'za tore hugahaze. (Aisa 13:10, 34:4, Joel 2:31-32) ²⁶Anante Vahe'mofo Mofavremo'a hampompi, tusi'a hihamu'ane msa'afi ne-esigeta kegahaze. (Dan 7:13) ²⁷Anante ankeri vahe'a huzmantena, Anumzamo huhampri zamante'nea vahera mona mopa ome tre emetre kazizatira ome zmavare eme zmavare hu'za zmazeri atru hugahaze.

Fiki zafamofo fronka naneke

(Mat 24:32-35, Luk 21:29-33)

²⁸Ama fronka kema fiki zafare'ma hanua fronka kereti antahizana eriho. Azanku'namo asinareno amosrema nehegetma, hago zgegna tava'o nehie hutma nentahize. ²⁹Tamagra anahu zama fore'ma hanigetma negesnutma, hago Vahemofo Mofavre esia kna'a tava'o huno kafante me'ne hutma tamagesa antahiho. ³⁰Tamage hu'na tamagrira neramasamue. Ama knafi veamota ofri mani'nesnageno, ana zana fore hugahie. ³¹Monane mopane fanane hugahianagi, Nagri nanekemo'a fanane osu mevava hugahie.

Jisasi'ma esia kna mago vahe'mo'e huno ontahine hu'nea naneke
(*Mat 24:36-44*)

³²Hianagi mago vahe'mo'e huno anazama fore'ma hania knane zgenena ontahi'ne. Monare nemaniza ankeru vahe'mo'za ontahizageno, Mofavre'amo'a ontahi'ne. Nenfa Agrake ana kna antahi'ne. ³³Kva hunetma retro hutma maniho. Na'anakure tamagra anazama efore'ma hania kna ontahinaze. ³⁴Amanahu hugahie, mago ne'mo afete vunaku, kazokzo eriza vahe'a noma'a kegva hiho hunezmanteno, magoke magoke eri'za vahe'a eri'za refko hunezamino, kafante kva nekura kavu antenka maninenka kva hu so'e huo huno hunte'ne. ³⁵E'ina hu'negu tamagra anahu kna huta, kva hu so'e huta maniho. Nomofu nfa'amo esnia kna ontahinaze. Kinaga esifi, kenage amu'no esifi, kokore ke nehinkeno esifi, nantera esifi ontahinaze. ³⁶Aru mase nenageno, ame huno eno eme tamageno eri fore hanigi, kva hutma maniho. ³⁷Hanki tmagri'ma neramasmuana mifka veaku nehue. Kva huso'e hiho.

Kva vahe'mo'za Jisasi ahesnageno frisia ke hu'naza naneke
(*Mat 26:1-5, Luk 22:1-2, Jon 11:45-53*)

14 ¹Anumzamo Israeli vea kinafinti zmare'nea knagu antahimi'za zo'ore breti nenaza kna zahufa tare zgegna me'nege'za, ra mono kva vahe'mo'zane, kasegere ugagota hu'naza vahe'mo'za, Jisasi havige hunte'za oku azerizama ahesaza kanku hake'za ahe fri'naku huge antahige hu'naze. ²Na'ankure mafka vahe'mo'za ana ne'zama (pasova) nenaza knare'ma ana'ma hanunke'za, ke hakare nehu'za ha' azeri oti'za gughaze.

Mago a'mo Jisasina mna nentake masave tagino frente'nea naneke
(*Mat 26:6-13, Jon 12:1-8*)

³Jisasi'a Betani kumate ko fugo namure'nea ne'mofo Saimoni nomp, zmaza tununte manine'za trateti ne'za nenageno, mago a'mo zago'amo'a mareri'nea, mananentake masave zafa rafunareti tro hu'naza, alabasta tafempi erino e'ne. Ana tafe avaza'a runagino Jisasina anumpi taginte'ne. ⁴Hianagi mago'amo'za anampi mani'namo'za zmasigu nehu'za, zamagra zmagra anage hu'naze, na'a higeno ana masavena amne tagi netre? ⁵Mizante atreta 300ti'a zago nazana erita zamunte omane vahe zmuntetine. Hianagi nahigenka amnefina tagi netrane? Ana nehu'za ana ara kesu'naze. ⁶Hianagi Jisasi'a amanage huno zamasmine, atrenkeno manino, nahigeta ama ara kna nemize? agra knare so'eza hunenante. ⁷Hianagi zamunte omane veara, hakare kna tamagra ne maninenageta, ina knare'ma, knare tmavu tmavama huzmante'nakuma hanutma, amne huzamantegahaze. Hianagi Nagra hakare kna tamagra nena omanigahue.

⁸ Agra nazano hunantenaku hiazana hago hunante. Kerifima ufresugu masave frenanteno retro hunante. ⁹ Nagra tamage hu'na neramasamue, inantego knare musenkeni'a, eri'za kokankoka ome huama hanarega, ama a'mo hu'nea avu'avamofa agenkea, nehnage'za antahigahaze.

Judasi komoru huno Jisasina ha' vahe avrezmisia naneke
(*Mat 26:14-16, Luk 22:3-6*)

¹⁰ Tuelufu'a amage'ma nentaza disaipol nagapinti, Judas Iskarioti'a Jisasina komoru huno avrezamisia naneke vugota mono kva vahera ome zmasami'ne. ¹¹ Ana nanekema nentahiza muse hunte'naze. Judasina zago kamigahune hu'za huvempa kea asamizageno, Jisasima komoru huno ha' vahe zmazampi avare'zamisia, kanku agafa huno hakre'ne.

Vgare ne'za Jisasi'a disaipol naga'ane ne'nea naneke
(*Mat 26:17-25, Luk 22:7-14, Jon 13:21-30*)

¹² (Zo'ore breti nenaza kna efore higeno) e'se knazupa kinafinti Anumzamo'ma ozmahe zmagatere'nea kna antahimiza sipisipi afu anenta aheza kre sramna nevaza knazupa, Jisasima amage nentaza disaipol nagamo'za anage hu'za antahige'naze, inantega Kagrira kinafinti zmare'nea knagu antahimi'za nenaza (Pasova) ne'zana retro hugantesunegu kvenesi'e? ¹³ Jisasi'a tare disaipol ne'tre amage'ma nentaza nagapinti znasmi'no, Jerusale kumapi ufresakeno'a, mago ne'mo ti fi kavofi tifino ne-enketa ome tutagiha hunesuta, ana ne' avaririta vugaha'e.

¹⁴ Ana ne'mo ina nompino umrerisiana, ana nomofo nefana amanage huta antahige'o, Rempi hurami ne'mo'a kagriku huno, inantega disaipol nagania'ne Anumzamo ozmaheno zamagtere'nea zanku antahimiza nenaza nezana, kankmuna me'nea negahuno hu'ne? ¹⁵ Hanunkeno'a mago hunaraginte nomofo anaga kaziga, ra kakamu me'nesifi agra tanaveri hugahie. Anampina ne'zane sipa ko retro hunte'naze. Ana nomp mareritna nezana ome retro huranteho. ¹⁶ Anage hige'ne ana netre moke vu'ne, rankumate vu'na'e. Anante Jisasi'ma zmasami'nea kante fore higene ke'na'e. Anumzamo ozmahe zmagatere'nea knagu antahimiza nenaza ne'zana ome retro hu'na'e. ¹⁷ Kinaga sege'za, Jisasi ene amagama nentaza 12fu'a disaipol naga'ane e'naze. ¹⁸ Ne'zane sipare mani'neza ne'za nenageno, Jisasi'a amanage huno zamasmi'ne, tamage hu'na neramasamue, amafima magoka nezama nenompinti, mago'moka komoru hunka ha' vahe zmazampi navrentegahane. ¹⁹ Zmarimpamo'a ana kegu kna nehige'za, mago mago'mo'za nagra anara osugahue hu'za hutere hu'naze! ²⁰ Jisasi'a kenona zmi'e amanage huno zmasami'ne, 12fu'a nagamotafinti, Nagrane magoka zompafinti breti areno nenesnimo'e. ²¹ Na'ankure Anumzamofa avontafepi krente'nea kante, Vahe'mofo

Mofavremo'a vugahie. Hianagi Vahe'mofo mofavrema komoru huno ha' vahe zmazampima avrente'simo'a, knaza erigahiankina nasunku huntoe. Nererama kase onteasina knare'zantfa hisine!

Jisasi'a Bretine wainine zamige'za ne'naza naneke
(*Mat 26:26-30, Luk 22:15-20, 1 Kor 11:23-25*)

²²Ne'zama nenageno, Jisasi'a mago'a brete erino Anumzamofu antahigegenom asomu huntegenom, tamanasino nezmino amanage huno zamasmine, Ama'i Nagri navufe, erita neho. ²³Hagi waini tintafe erino Anumzamofu nunamu huno antahigegenom asomu huntegenom, zamige'za maka'mo'za anampinti ne'naze. ²⁴Nenageno amanage huno zamasmine, ama'i Nagri korane, ama ana koramo Anumzane huhagerafita manisaza manizana eri kasefa hugahie. Maka'mofonku huno tagine. ²⁵Tamage hu'na nerasmue, Ama waini ragamofu tima'a mago'ene one'na henka'a Anumzamofu kumapi kasefa waini negahue.

²⁶Mono zgame hute'za, atirami'za Olive Agonarega vu'naze.

Pita'a amagena Jisasi humisnia naneke
(*Mat 26:31-35, Luk 22:31-34, Jon 13:36-38*)

²⁷Jisasi'a amanage huno zamasmine, tamagra makamota natreta fregahaze. Na'ankure Anumzamofu avontafepina amanage huno krentegenom me'ne, *Anumzamo'na sipsipi afu kva vahe'mofona, ahanena sipsipi'mo'za panani hu'za ufre efre hugahaze* hu'ne. (Sek 13:7)

²⁸Hianagi fritena otisuna, tamagrira vugota hurmante'na Galili vugahue. ²⁹Pita'a anage huno Jisasi'na asamine, mika'mo'za katre'za vnazanagi, nagra katrena ovutfu hugahue. ³⁰Pitana kenona Jisasi'a amanage huno asmine, Tamage hu'na negasmue, meni kenagera tare zupa kokoremo'a krafa osu'nesigenka, tagufa zupa Jisasi'na onke'noa nere hunka vahane hugahane. ³¹Hianagi Pita'a agra'a kere hu hankavetino, vahane huogantegosue nehuno, amne kagranena frigahue huno hu'ne. Hige'za mika'mo'za ana kege'za hu'naze.

Jisasi'a Getsameni hozafi nunamu hu'nea naneke
(*Mat 26:36-46, Luk 22:39-46*)

³²Jisasi'ene amage nentaza disaipol naga'mo'za Getsamenie nehazare ehnti'naze. Anante Jisasi'a zmasamino, amare mani'nenkena nunamuna haneno.

³³Anante Pitanki, Jemisinki, Joninki huno zmareno nevigeno, agu'amo'a tusi'gna nehigeno, asunku hu'ne. ³⁴Jisasi'a amanage huno zamasmine, nagu' namemo'a tusi kna navenesino nahe friza nehianki, amare mani'neta kva hiho. ³⁵Nehuno osi'a vugamuteno mopafi vuttrakahu maseno, Anumzamofonte nunamu ome nehuno, knare'ma hanigeno'a, ana

knamo'a evu nagateresie hu'ne. ³⁶Agra huno, Aba, Nfanimoke! Maka'zana amane hugahane, ama kapua eri atro, Nagri navesira ovarario, Kagra kavese avaririo. ³⁷Ana huteno eno eme amagama nentea disaipol nagama zmageana masenageno, Pitanku amanage huno antahige'ne, Saimoniga kavu mase'nano? Knare osi'agnafina kva krigahampi? ³⁸Kvahunka maninenka, nunamu nehunka revatgazama esifina evuoramio. Avamumo'a avenesianagi, avufamofona hanave'a nomane. ³⁹Ete mago'ane vuno, anahu kna nunamu ome hu'ne. ⁴⁰Agrama mago'ene ete eno eme zmageana, mase'nagenokino zamuma hari huzamo'a kna huzmante'ne. Na'ane huta ke'arera hugahune hu'za kegura hake'naze. ⁴¹Jisasi'a mago'ene tagufa zupa zmagrite eno, amanage hu'ne, tamavu nemseta manigasa nehazo? Ha vgare! Nagrira knani'a ama eanki keho. Vahe'mofo Mofavrea kumi vahe'mokizmi zmazampi komoru hu'za avrente'gahaze. ⁴²Otinketa tagra vamenno! Keho Nagri'ma komoru huno ha' vahe zmazampima navrentesia nera, ama erava'o nehie.

Komoru hige'za Jisasi azeri'naza naneke
(*Mat 26:47-56, Luk 22:47-53, Jon 18:3-12*)

⁴³Anankea huvga ore'negenno, amage'ma nentaza 12fu'a disaipol nagapinti mago'zmimo, Judas Iskarioti anante ehнатine. Agri'enenasondia vahe'mo'za kaziknone, kumpa kno zmine eri'neza, prisi kva vahe'mo'zane, kasegere ugagota hu'naza vahe'mo'zane, ugota kva vahe'mo'za huzmantege'za e'naze. ⁴⁴Judasi'a ha' vahe zmazampi komoru huno avrezmi ne'mo anage hu'ne, amanahu avame'za hugahuanki keho, ome agi'ma antakoma hanuana, e'i ana neki ome azerita kegva huta avreta viho. ⁴⁵Judasi'ma anantema ne-eno'a, Jisasinte hantka huno vuno, Hurami Nemoke, nehuno agira antako hu'ne. ⁴⁶Anante mafka vahe'mo'za zmaza ante'za, azeri'naze. ⁴⁷Anante otinazafinti mago'mo kazinknoma'a erisaga huno, ugagota prisi ne'mofo kazokzo eriza ne'mofo agesa rukfri atre'ne. ⁴⁸Jisasi'a amanage huno zmasami'ne, Nahigeta Nagri nazeriku kazintamine kumpa knontaminena enerita kumzafa vahe zmazeriku nehzankna hutma neaze? ⁴⁹Maka knane knane, ra mono nOMPI rempi huneramugeta, naze'ori'naze. Hianagi amama fore'ma nehizana, korapa avontafepi kre'nea kemofo avufga'a fore nehie. ⁵⁰Anage nehige'za amage'ma nentaza nagamo'za, atre'za koro fre'naze. ⁵¹Mago nehaza nera amage anteno vu'nea ne'mo, mago'a kukena osu'neanki zaza kukenage'za hu'nea ne' azeri'naze. ⁵²Hianagi ana zaza kukena'a ruzafi atreno, avufa avapa koro fre'ne.

Jisasina avre'za mono kanisol vahete vu'naza naneke
(*Mat 26:57-68, Luk 22:54-55,63-71, Jon 18:13-14,19-24*)

⁵³Jisasina avare'za ugagota prisi kva nete vzageno, ranra prisi kva vahe'mo'zane ranra kva vahe'mo'zane, kasegere ugota hu'naza vahe'mo'za

atru hu'naze. ⁵⁴Pita'a, Jisasina amefi afete avaririno, ugagota prisi ne'mofo kumapi ufre'ne. Teve hegare'nare avufa ome tonehino ha' kva vahe'ene umani'ne. ⁵⁵Ugagota prisi vahe'mo'zane, maka kanisol vahe'mo'za Jisasina havige hunte'za ahesnaza ke agafa'agu hakre'naze. Hianagi magore hu'za ke'za eri fore'osu'naze. ⁵⁶Rama'a vahe'mo'za havige hunte'nazankino, ana ke zmimo'a magoke kantera ovu'ne.

⁵⁷Mago'a mo'za oti'za amanage hu'za havige hunte'za, ⁵⁸tagra nentahunkeno ama ne'mo anage hu'ne, ra mono nona vahe'mo zmazanuti ki'naza no tapage hunetrena, tagufa knamoyo agu'afi vahe'mo azanuti onki'nea mono no ru kigahue hu'ne. ⁵⁹Hianagi kezamimo'a fatgo osu'ne.

⁶⁰Anante ugagota prisi kva ne'mo zamuga otino, anage huno Jisasina antahige'ne, na'ane hunka kezimirera huzmante'gahane? Na'anku Kagrira keaga hunegantaze? ⁶¹Hianagi ke nona'a osu akoheno mani'negeno, mago'ene ugota prisi ne'mo'a antahigeno, Kagra Kraisigo, Mrerisa Anumzamoyo mofavremokafi? ⁶²Jisasi'a huno, *E'i Nagre* kagra negesankeno, Vahe'moyo Mofavremo Anumzamoyona *azantmaga kaziga manino* hampompi tusi'a hanave'ane egahie. (Eks-Utr 3:14, Sam-Zga 110:1) ⁶³Anankema nentahino, ugota prisi ne'mo agra'a kukena eri tagato nehuno anage hu'ne. Na'anku mago'enena keagama hufore hunte vahekura hakegahune. ⁶⁴Hagi tamagra nentahizageno Ramoyona huhaviza hunte'ne! Tamagra na'ane hutma hugahaze? Makamo'za huza Anumzamoyo huhaviza hunteankino frisie hu'za hunte'naze. ⁶⁵Anante mago'amo'za zmavetu ahente'za avu kisu hune'za, zmaza knonu nehe'za, Kagra kasnampa ke hunka, iza negahefi hufore huo. Mago'a ha' kva vahe'mo'zanena avregantu atre'za avugosafi ahe'naze.

Pita'a Jisasinku, onke'noe hu'nea naneke
(*Mat 26:69-75, Luk 22:56-62, Jon 18:15-18,25-27*)

⁶⁶Pita'a ufenkamuteno kva nemofo kumapi mani'negeno, anante ugagota prisi nemofo eri'za mofane zgafinti mago'mo e'no, ⁶⁷Pita'ma teve tonehino mani'negeno eme negeno'a, kagranena Nazareti kumateti Jisasi'ene vanoma nehana ne' mani'nane hu'ne. ⁶⁸Hianagi Pita'a vahane huno, nagra antahina kena osu'nogenka nehane! Anante kama emrerite nevigeno mago kokorege hu'ne. ⁶⁹Ete ana mofa'mo mago'ene Pita negeno anante oti'naza vahe zmasmino, e'i nera Jisasi amage anteno vano nehia nere huno hu'ne! ⁷⁰Hianagi ete Pita'a, mago'ene vahane hu'ne. Anante oti'naza vahe'mo'za, osiagna manige'za Pitanku anage hu'za, tamage kagra mago zmimoke. Na'ankure Galili ne' tfa mani'nane. ⁷¹Anante Pita'a ontahinoa neku nehaze nehuno, nagra tamage ana nekuma havigema hanenkeno'a, huvempa huankino Anumzamoyo nazeri haviza hanie huno, ⁷²nehigeno, ame huno mago'ane anante kokorege nehigeno, Pita'a, Jisasi'ma asmi'nea kegu agesa antahi'ne. Tare zupa

kokorege osunenigenka, tagufa zupa Nagrikura onkenoe hunka vahane hugahanema huno asami'nea kegu agesa nentahino zavite'ne.

Jisasina Paerotinte avare'za vu'naza naneke
(*Mat 27:1-2,11-14, Luk 23:1-5, Jon 18:28-38*)

15 ¹Nanterame ranra prisi mono kva vahe'mo'zane, ranra kva vahe'mo'zane, kasegere ugagota hu'naza vahe'mo'zane, maka kanisol vahe'mo'za, ame hu'za ome atru hute'za, Jisasina nofi kinte'za avre'za Paeroti ome ami'naze. ²Paeroti'a agenoka huno, Kagra Jiu vahe'mokizmi kini mani'nano? huno Jisasina antahige'ne. E'ima kagra nehanane huno Jisasi'a hu'ne. ³Anante ranra prisi kva vahe'mo'za, Jisasinku rama'a haviza hu'ne hu'za hunte'naze. ⁴Paeroti'a mago'ane agenoka huno ko, Kagrira rama'a ke hunegantazanki, Kagra ke zmirera kenona hugahampi? ⁵Hianagi Jisasi'a ana kemofono nona' osu mani'nege, Paeroti'a tusiza huno antri nehuno agogogu hu'ne.

Jisasi ahe nefrinka Barabas tamio hu'naza naneke
(*Mat 27:15-26, Luk 23:13-25, Jon 18:39-19:16*)

⁶Kafune kafune Anumzamo kinafinti z mavre'nea knama egeno'a, Paeroti'a kina vahepintima z mavesimofonku hazageno kazufe netrea kna e'ne. ⁷Hagi ana knafi mago nera Barabasi'e nehia ne'ene, mago'a kamani vahe'mozane ha' hu'naza knafi, vahe zmahe frinaza zanku kina huzmante'naza vahe'ene anampina mani'naze. ⁸Hagi maka vea'mo'za Paerotinte e'za, ana kna'ma egeno nehiaza huno kina vahe katufe atresnigu antahige'naze. ⁹Anante Paeroti'a kenona huno anage hu'ne, Jiu vahe kini ne' katufe tamisuegu tmave'nesio? ¹⁰Na'ankure agra, ranra prisi kva vahe'mo'za kanive renente'za, avare'za eme ami'zama'a ko antahi'ne. ¹¹Hianagi ranra prisi kva vahe'mo'za maka vahe zmarimpa rekehuz'a, Barabasi kazufe tamiho hutma hiho hu'za zmasami'naze. ¹²Anante Paeroti'a mago'ene kenona huno, Jiu vahe kinie hutma nehaza nera, na'a hunesuegu tmave'nesie? ¹³Hige'za ete mago'ane kezati'za, aheta kekazafare hantiho hu'naze. ¹⁴Hianagi Paeroti'a anage huno zmasami'ne, na'a kefoza hune, inankna kefoza hu'negeta aheta hantiho nehaze? Hianagi zmagra mago'ene ranke hu'za, ahe friho hu'naze. ¹⁵Na'ankure Paeroti'a ana maka vea'mokizmi zmarimpamo so'e hania kazigati, Barabasi kazufe nezamino, Jisasina sefu amiho hige'za, sefu amitazageno keka zafare ahe'za hantisagu avrezmi'ne.

Sondia vahe'mo'za Jisasina azanva ante'naza naneke
(*Mat 27:27-31, Jon 19:2-3*)

¹⁶Anante sondia vahe'mo'za avare'za mrrerisa kumapi ufre'naze. (E'i ana kumara Gavana ne'mofo kumapi) maka Roma sondia vahetamina ome

ke hutru hu'naze. ¹⁷Zamagra fitunke kukena hunente'za, ave'ave nofite kini vahe'mokizmi fetorikna huza fetori tro hu'za asenire antaninte'naze. ¹⁸Kezanke hunte'za, Jiu vahe'mofo kinimokagura muse hugantone. ¹⁹Mago'ane kno eriza asenire nemasagi'za, z mavetu ahenente'za, zmarena renamagiza, pri hu'za havi mono hunte'naze. ²⁰Zamagrama azanava anteteza fitunke kukena erizafi netre'za, ete Agri kukena eri huntete'za, keka zafare aheza hantinaku megia'avare'za vu'naze.

Keka zafare Jisasina ahe'naza naneke

²¹Sairini kumateti ne' Saimoni, (Aleksendane Rufusikizni neznafe) fegu'ati enevige'za, keka zafa'a erio hu'za hunente'za kofintageno eri'ne. ²²Jisasina avare'za Golgote nehaza agonare uhnati'naze. (Tagri kefima rukrahe'ma hanunana, anu zaferine hu'ne.) ²³Anante waini tine mere zafa arima'ane magopi taginte'za eri havia hute'za tagiami'zana, one atre'ne.

²⁴Hagi rugeka zafare ahete'za, mago'mo tagatere simo erisie nehu'za taisi zokogo re'za kukena'a refko hu'naze. ²⁵Nanterama zage hanatino 9 kiloki hige'za, Jisasina rugeka zafare ahe'naze.

²⁶Ahe'naza nanekema avoma krente'nazana, JIU VAHE'MOKIZMI KINI NERE, huza krente'naze. ²⁷Ana nehu'za tare kumzafa netrena magoka znahe'za, magomofona azantmaga'a nehantiza, magomofona hoga'a hanti'naze. ²⁸[Ana nehzageno korapa'ma Anumzamofa'avontafepi kre'nea kemofo avufga'a efore' hu'ne. Ana kemo'a, hazenke vahe'kna hugahie hu'ne (Aisa 53:12)]. ²⁹Hagi anante'ma vute ete nehu'za vahe'mo'za azanva ke hu'za, Oho! Kagra ra mono nona tapage hunka tagufa knafi kigahue hu'nana nere, nehu'za zmage'na ru'naze. ³⁰Kagra ka'a kaza hunka keka zafaretira eramio, hu'naze! ³¹Anahukna hu'za ranra prisi kva vahe'mo'zane kasegere ugagota hu'naza vahe'mo'za, azanva ke hunte'za, ru vahe azama nehiaza huno Agra'a aza osugahifi? ³²Atregeno Kraisi'a Israeli vahe'mokizmi kini ne'mo'a, keka zafaretira menina eraminketa negeta, tamentinti hamaneno! Tare ne'trema keka zafare'ma ahe'za hanti'naza ne'tremokea, anazanke huke Jisasina azanava ke hunte'na'e.

Jisasi fri'nea naneke

(Mat 27:45-56, Luk 23:44-49, Jon 19:28-30)

³³Ana knazupa zgemo'a anuntu age higeno, maka ana mopafina hanimo refitegeno vuno kinaga 3 kiloki higeno rumsa hu'ne. ³⁴Tri (3) kiloki higeno Jisasi'a agra kefi ranke huno kezatino, ELOI ELOI LEMA SABATANI? Ana kemo'a anage hu'ne, ANUMZANIMOKE ANUMZANIMOKE, NAHIGENKA KAMAGENA HUNENAMINE? (Sam-Zga 22:1)

³⁵Hanki tva'onte mani'naza vahe'mo'za nentahi'za, anage hu'naze, antahiho, Ilaijanku ke nehie hu'za hu'naze. ³⁶Hagi mago'mo aga reno

vuno mi'mi'tata hu'nea waini timpi kapukua ome reteno, zotare vazigase huno erino Jisasi nesigu eme nemino anage hu'ne, atrenenketa Ilajjama eme avarefenka atresigura kamneno! ³⁷Hianagi Jisasi'a ran krafa nehuno, vgare asimu anteteno fri'ne. ³⁸Ana nehigeno ra mono nomofo agu'afi hanti'naza tvaravemo, anagamuti ruhakeke hutare huno henkamu erami'ne. ³⁹Hanki 100teti'a sondia vahete kva (centurian) ne'mo Jisasina avuga mani'nenonefrino hiazana keteno, anage huno hu'ne. Tmage e'i nera Anumzamofa Mofavre mani'ne huno hu'ne! ⁴⁰Mago'a anemo'za ogantu'a mani'ne'za uruha ke'naze. Ana a'nefina, Makdala kumateti Meriki, Saromeki mago Meri'a (osi Jemisine, Josefekizni neznareraki) hu'za mani'naze. ⁴¹Ana a'ne zgamo'za Jisasi Galili mopare mani'nege'za amage nente'za aza nehaza ane zgane, mago'a anampina Jerusale nege'za avaririza e'naza ane zgane mani'naze.

Jisasi asente'naza naneke

(Mat 27:57-61, Luk 23:50-56, Jon 19:38-42)

⁴²Anazama fore hu'neana Frante zupa kinage. Mni fru hukna esigu (Sabat) retro tra nehaza kna e'ne. ⁴³Arimatia kumateti Josefe'a koro osu hanave enerino, Jisasi avufa'ama erisigu Paeroti ome antahige'ne. (Ana nera kanisol vahepina agi me'negeno, Anumzamofa Kuma esigu nentahino aveganentea nere.) ⁴⁴Jisasima frine higeno'a, Paeroti antri nehuno, 100teti'a sondia vahete kva (centurian) ne' ke huno frinesigu antahige'ne. ⁴⁵Ana sondia kva ne'mo hago fri'ne huno Paerotina asmigeno, knareki avufga erinka vuo huno Josefena hunte'ne. ⁴⁶Josefe'ma efeke tavrave miza huno avufa'a eri mopafi atreno, ana efeke tavravenu kazrinteno, havefi frage'za tro hunte'naza kerifi ome asenteno, have rekrehe huno kama efrete runkni re'ne. ⁴⁷Makdala kumateti Meriki, Meri Josefe nereraki huke anama asentea kumara ke'na'e.

Jisasi'a fripinti oti'nea naneke

16 ¹Mni fruhu kna (Sabat) vagarege'za Makdalati Meriki, Maria Jemisi nereraki, Salomeki hu'za mananentake masave Jisasi avufare ome frentenaku miza se'naze. ²Ana knamofa ese zupa (Sonta) nantera zge nehnatige'za, Jisasi kerirega vu'naze. ³Nevu'za ontahige antahige hu'za, kerimofo kafantema rehiza hu'nea havea iza rekrehe hutregahie, hu'za hume vu'naze. ⁴Hianagi tusi'a haveagi, ko revahe hutreneege'za ome ke'naze. ⁵Anante have kerigampi ufre'za kazana, mago nehaza ne'mo efeke kukena huno tmaga'a kaziga mani'negeno ome nege'za zmagogogu hu'naze. ⁶Hianagi anage huno zmasami'ne tmagogogura osiho, Nazareti Jisasima keka zafarema ahe'naza ne'ku nehakaze. Hianagi Agra ko otine. Amafina omanine, avufa'ama ante'nazarera ami'nagi keho! ⁷Hianagi vutma amage'ma nentaza disaipol naga'ane, Pitanena ome

zmasamiho, Agra vugota huno Galili vu'ne, koma tmasami'nea kante antetma anantega Jisasina ome kegahaze. ⁸Anagemama hige'za zmagare'za keria atre'za atinerami'za, zmahirahi nerege'za zmagogogu hu'naze. Na'ankure zmagara koro nehu'za, mago vahere hu'za ozmasmi'naze.

Jisasi'a amage'nentaza disaipol nagate efore hu'nea naneke
(*Mat 28:9-10, Jon 20:11-18*)

⁹[Hagi ana knamofo ese zupa (Sonta), nanterame Jisasi'a fri'nefinti otiteno, esera Makdala kumate a' Meri, 7ni'a havi avamu agu'afi maninogeno eri atrente'nea ate efore hu'ne. ¹⁰Jisasi'ene vano nehza vahe'mo'za zavi krafage nehazageno ana a'mo ome zmasmi'ne. ¹¹Ana a'mo'a, Jisasi'a otino asimuna erino maninege'na ke'noe hunoma hia kegura, antahi omi'naze.

Tare amage'ma nenta'a disaipol netremoake Jisasi ke'na'a naneke
(*Luk 24:13-35*)

¹²Ana'ma hutegenoma tare ne'tremo'kea Jerusale atreke fegi'a nevakeno, Jisasi avufagamo'a ruzahene nehigeno znagrite efore hu'ne. ¹³Fore nehige'ne kete'ne rukrehe hu'ne e'ne, mago'a mani'namokizmi eme zmasamige'za, anankegura zamentinti osu'naze.

Jisasi'a amage nentza naga'a eri'za zmi'nea naneke
(*Mat 28:16-20, Luk 24:36-49, Jon 20:19-23, Apo 1:6-8*)

¹⁴Ana huteno 11ni'a amage'ma nentaza disaipol nagatera, ne'za nene'za maninageno, Jisasi'a zmagrite efore nehuno, frinefinti otine hu'za zmasaminaza kere antahi ozami'naza zankura, nahigeta tamentintia osu'naze huno ke zmasu'ne. ¹⁵Anage huteno, maka moparega vutma knare musenkea ome huama hutma, hakare vahera zmasamiho. ¹⁶Hagi iza'o Nagriku amentinti nehuno, mono ti fre snimofona Anumzamo'a agu'vazina knare huno manigahie. Hianagi iza'o amentinti osanimo'a, keagafi manino fanana hugahie. ¹⁷Hagi zamentinti hanamo'za amanahu avame'za erigahaze. Nagri nagirera havi avamura hunente'za, kasefa zamageru arugahaze. ¹⁸Ha' osifa'vea zmazanu aze'neri'za, avuataga zama nesnaza'zamo'a zmazeri haviza nosinke'za, kri vahete zmazama antesageno'a, krizamimo'a amane hinke'za, knare hu'za manigahaze.

Jisasina avregeno monafi mareri'nea naneke
(*Luk 24:50-53, Apo 1:9-11*)

¹⁹Anage huno zamasmitegeno, Anumzamo'a Jisasina avareno monafi marerino, azantmaga kaziga ome antegenoma mani'ne. ²⁰Ana huno vutege'za, amage'ma nentaza nagamo'za maka kaziga vano nehu'za, Ramofona kea huama nehazageno, Jisasi'a ana kezmi'a eri hanavetino avame'zane, kaguva'zanena anama hazankefina hu'ne.]

Knare Musenke Luku Kre'nea Naneke

Luku kre'nea avontafemofonaneke

Luku ama avona Tiofolisi kre ami'nea naneke

1 ¹Tiofolisiga, korapara rama'a vahe'mo'za zmazanu eritru hute'za, Anumzamo tagripi erifore hu'nea zamofonaneke kre'naze. ²Ese agafare'ma Ramofonari'za e'neri'za zamavunuma ke'naza vahe'mo'za, anama ke'nazaza krente'naza hunerasamizageta, ama ana naneke krente'none. ³Ana hu'negu ese agafare'ma fore'ma hige'za krente'naza zana, rezagane so'e hu'na kogeno knare'tfa hunantege'na, anama hu'nea kante ante'na, knare ne'moka Tiofolisiga kre'negamue. ⁴E'i anazanku koma antahinana tamage naneke, nentahinka tamage huogonehue.

Jonima ksentesia zamofonaneke ke ankeromo Sekaraia asami'nea naneke

⁵Herotima kinima Judia kaziga mani'nea knafina, mago prisi nera Sekaraia'e nehia nera, Abaiza nagapinti ne' mani'ne. Hagi nenaro agi'a Elisabeti'e, Aroni nagapinti efore hu'ne. ⁶Ana aravemokea Anumzamofonaneke avurera fatgo hu'ne nemani'ne, maka kasegene tra kea amage nentene, mago havi avu'avara osuke, fatgo huke Ramofontere mani'na'e. ⁷Hu'neangi mofavre onte'na'e. Na'ankure Elisabeti'a mofavre ontone naravo mani'gene tvava ozafa re'na'e.

⁸Mago zupa Sekaraia ene ra mono nOMPI Anumzamofonte kre sramnavu prisi eri'za eneri'za nagamo'za, zamagrama eri'zama eneri'za kna ege'za emetru hu'naze. ⁹Prisi vahe'mo'za koma zamuzmapina kre sramna vunaku taisi zokago razageno, iza agimo'ma e'amama himofonante'ne ra mono nOMPI ufreno Ramofonte kre sramna nevia kante, Sekaraina ana hu'za huntageno kre sramna mananentake'za hu'naku ufre'ne. ¹⁰Hagi rama'a vahemo'za fegi'a ra mono no agu'afi manine'za, ana gnamofonaneke agu'afina (hour) nunamu nehazageno agu'afina mananentake'zana kre sramna vu erizana eri'naze. ¹¹Magora Ramofonaneke

ankeromo kre sramnavu tra'mofona tmaga kaziga efore huno oti'ne.

¹²Ana'ma higeno'a Sekaraiama ankeroma negeno'a, antri nehuno koro hu'ne. ¹³Hianagi ankeromo'a anage huno hu'ne, Sekaraiaga korora osuo, na'ankure nunamunka'a Anumzamo'a antahi'neankino, neganaro Elisabeti'a mago ne'mofavre kasentegahie. Agi'a Joni'e hunka antemigahane.

¹⁴Ana mofavre ksentenkeno krimpa so'e nehina muse hugahane. Hanki rama'a vahe'mo'za ana mofavrema ksentente kema nentahiza anazanke hu'za muse hugahaze. ¹⁵Na'ankure Ramofo avurera ra vahe trohuno manigahie. Agra waini tine, hanave tinena onetfa hugahie. Na'ankure nerera rimpafi maninenigeno'a Ruotge Avamumo'a agu'afi fre avitegahie. ¹⁶Ana mofavremo'a hakare Israeli vahe'mokizmi zamazeri rukrahe hinke'za, Ramofo Anumza zimire egahaze. ¹⁷Ana nehuno agra Ramofona ugota huno nevuno, Ilaija'ma eri'neankna hanavene avamu'ene enerino, ***afahemokizmia zmagu'a zmagu'a zmazeri rukrehe hina mofavrezmire ne-enageno*** keontahi vahe'mokizamia zmazeri rukrehe hinke'za kentahi vahe manisaza zamo'a, Ramo'ma esiazamofo ka retro huntegahie. (Mal 4:5-6)

¹⁸Hanki Sekaraia anage huno ankeromomo asami'ne, nankna hanige'na nagra kena antahina hugahue? Nagra ozafa rogeno, a'nimo'a anahukna huno tvavate'ne higeno, ¹⁹ankeromo'a anage huno asami'ne, nagra ankeromo'ne' Gabrieline, Anumzamomofo tva'aonte nemanuankino, Anumzamo hunanteno knare musenke erinka ome asamio huno hunantege'na, eme negasamue. (Dan 8:16) ²⁰Hanki kagra knare ke negasamugenka kamentinti osanku, kagerura orunka mni'nenankeno ana kna forehina kea hugahane. ²¹Hagi megia'ra ra mono nompia Sekaraia avega maninaza vahe'mo'za, agafa hu'za zmagesa hakare nehu'za, na'a higeno agru huno Ruotage hu'nea nompina zazakna nemanie hu'za hu'naze. ²²Hianagi agrama megia ne-eno'a kea eme huozami avame name hige'za, zamagrama zmagesama antahizana, mago'aza agru huno routge nompina efore higeno ke'ne hu'za hu'naze. ²³Ra mono nompima kre sramnavu eriza kna'amo vgaregeno, atreno noma'arega vu'ne.

²⁴Mago'a gna evigeno, nenaro Elisabeti amu'ene huno mni frakino mani'negenog, 5fu'a ika enevigeno, amanage huno hu'ne. ²⁵Amazana Ramo asunku hunenanteno vahe'mo'zama mofavre onte a're hu'za nehu'za nagazema eri nenamizana eri atre'nante.

Jisasima ksentesia zamomofo naneke

²⁶Elisabeti 6si'a ika amu'ene huno mani'negenog, mago ankeromomofo agi'a Gebrieli'e nehimomofo Anumzamo huntengono, Galili kaziga osi kuma Nazaretie nehaza kumate uhanatino, ²⁷Maria'a vene omase'nea mofara, Josefe Deviti negeho a' erigahie huza huhampriante'naza mofate

uhanati'ne. ²⁸Ana ankeromo Mariante ehanatino anage hu'ne, knare kne Mariaga, Anumzamo'ma avesigantenemoka, Ramo'a kagrane mni'ne. ²⁹Hianagi ana mofamo'a, ana musenkema nentahino'a, antahintahi hakare nehuno, ama kea nankna agu'agesa me'nea musenke nehie huno hu'ne. ³⁰Ana higeno ankeromo'a ana mofamofonku anage hu'ne, korora osuo Mariaga, na'ankure Anumzamo'a kagrira antahi muse hunegante. ³¹Hanki kma antahio, kagra kamu'ene hunka ne'mofavre ksntenka agi'a, Jisasi'e hunka antegahane. ³²Ana mofavremo ra vahe fore nehinke'za vahemo'za, Marerisa Anumzamofu Mofavre nehnageno, negeho Deviti kini trara, Anumzamo'a eri aminigeno kva hugahie. ³³Agra, Jekopu nagate kegva huzmantevava nehinkeno, kini erizama'amo ene Agrama kegva hania kumamo'a mevava hugahie. ³⁴Maria'a anage huno ankeromofu asami'ne, inankna huno fore huku higenka nehane, nagra venena omasenoanki? ³⁵Ankeromo'a kenona'a anage huno asami'ne, Ruotge Avamumo kagrite ne-enkenka, Marerisa Anumzamofu hihamu'amo refitegantegahie. E'ina hu'negu ksentesana Mofavremo'a ruotge hanigeno, Anumzamofu mofavre hu'za hugahaze. ³⁶Hanki ko, negamomo Elizabeti'a anahukna huno tavava'tefinka amu'ene hu'ne. Naravo a' manino mofavre onte are hu'nazanagi, menina amu'ene higeno' 6si'a ika agaterene. ³⁷Na'ankure Anumzamofontera mago'zamo'e huno amuho osugahie. ³⁸Higeno Mari'a anage hu'ne, izo nagra Ramofu kazokzo eriza are, atregeno kema hana kante efore hino, higeno ankeromo atreno vu'ne.

Maria'a Elizabeti ome kenaku vu'nea naneke

³⁹Ana knafina Maria agona kumatega ame huno otino Judia kaziga rankumate uhanatino, ⁴⁰Sekaraia nOMPI umarerino, knare kne huno Elisabetina humuse huntene. ⁴¹Mariama knare kne huntea kema, Elisabetima netahigeno'a, rimpafi mani'nea mofavremo muse nehuno, haru huno marerigeno Ruotage Avamumo'a Elisabetina agu'afi frevite'ne. ⁴²Ana higeno ana amo'a ranke huno, maka a'nemofu asomura agatereno kagrira rama'a asomu Anumzamo'a huneganteno, karimpafima mani'nea mofavrea asomu huntene! ⁴³Nagra iza'na mani'nogeno Ranimofu nerera'a, eno eme nage. ⁴⁴Hanki antahio, kagra humuse hunka, anama knare kne hunka nehankena nentahugen'o'a, narimpafi mani'nea mofavremo'a haru huno marenerino muse hu'ne. ⁴⁵Hagi Ramo'ma hu'nea kemofu kamentinti hanku, asomu hunegantena, anama hu'nea kemofu, kagripi avufa'a efore hugahie.

Maria'a Anumzamofu muse hunenteno zgame hu'nea naneke

⁴⁶Maria amanage hu'ne, nagu'amo'a Ramofu rafi amigeno, ⁴⁷nagri avamunimo'a naguvasi Anumzamofu agafa huno muse huntene.

48 Na'ankure Agra anteramina kazokzo eriza vahe'ama mni'noana navu'navara nage'ne. Menima agafa huno vaniana maka vahe'mo'za Anumzamo'a asomu hunte'ne hu'za hugahaze. 49 Na'ankure Hihamu'ane Anumzamo'a raza hunante'ne, Agri agi'a ruotage hu'nemo'e. 50 Henkama efore'ma huterema hanaza nagapinti'ma, iza'zo Agriku koro hanamokizmia asuragizmanteno zamaza hugahie. 51 Ramo'a hanavenentake avu'avaza azanura eri fore'ma nehuno, antahintahizmifima zmagima eri'za mareneri'za vahera zmahe panani hu'ne. 52 Agra hanave kini vahera, kini tratetira zmazuhu fenkama netreno, hanave'a omane vahera ana kini trate zamavre antene. 53 Zmagaku haza vahera, knare'zanu erivite'nezmanteno, fenomo avitenea vahera, zmaza zamavapa huzmanteg'e'za nevaze. 54 Agra eri'za vahe'a Israeli vahe zmaza nehuno, asunku huzmantegahue huno huvempa hu'nea kegura agera nokanie. 55 Tahim'omofo koma mevava huvempa ke Abrahanku asamino, agehemo fore hunante fore hunante knane knane hu'noma esia vahe zamaza huku hunte'ne. 56 Maria anage huno Elisabeti asamiteno, 3'a ika agranena maniteno noma'arega vu'ne.

Elisabeti'a Joni kasente'nea naneke

57 Hagi Elisabeti mofavre kasentesia kna egeno, ne' mofavre ksente'ne. 58 Ana a'mofo nagamo'zane, agri kumapi nagamo'za Ramofo asuntagizamo'ma Elisabetinte'ma eama hu'nea kema nentahiza rama'a musenkase hu'naze. 59 Eit knazupa Mosesese kasegemo'ma hu'nea kante ante'za avufa tga huku e'za, nefa agire Sekaraia'e huta agi'a asamresune hu'za hu'naze. 60 Hianagi nerera'a kenona huno, ama mofavre'mofo agi'a Joni'e huta antegahune higeno, 61 zamagra anage hu'naze. Tamagri nagapina mago'mofo agi'a Joni'e agine vahera omani'ne. 62 Hu'za nehu'za, nefana zmazanu avame'name hu'za iza'e hunka agi'a antegahane hu'za antahigageno, 63 avontafe eritma eho huno azanu avame'name hige'za eriza eme amizageno, agi'a Joni'e huno kre zamige'za nege'za antri hute'za, hakare zamagesa nentahizageno, 64 ame huno Sekaraia agimo'a aka higeno, agefunamo agafa huno eri'za erigeno, Anumzamofa agi erisaga hu'ne. 65 Hagi ana higeno, anama megaginea kumate maka vahe'mokizimi tusi zamagogo nefege'za, maka Judia agona kumatega ana agenkea hugantugma hu'naze. 66 Maka ana naneke antahimo'za zmagu'afi netre'za, anage hu'naze. Henka ama ana mofavremo'a nankna vahe manigahie? Na'ankure Anumzamofa hanavemo'a agrane me'ne.

Sekaraia'a Anumzamofa ragi nemino kasnampa ke hu'nea naneke

67 Hagi nefa, Sekeraiana Ruotge Avamumo agu'afi frevitegeno, amanage huno kasnampa kea hu'ne,

68 Israeli vahe'mofo Rana, ra agi amisune. Agra'a vahe'a zmaza huno zmagu'vazinaku e'ne. 69 Tagri Anumzamofa, Agri eri'za vahe'a Deviti

nagapinti hankave'nentake ne' kefozampinti tahokeno taza hania ne' neramie. ⁷⁰Korapara Ramo'a ruotage kasnampa vahe'mofo zmagipi huvazino kea hu'ne. ⁷¹Menina ha' vahetimofo azampinti taza nehuno, maka antahi haviza hurantesaza vahepintira taza hugahie. ⁷²Amazama hiana tagehe'i asunku hunezmanteno, korapa huhagerafino huvempa huno zamasm'nea hanave kasegegu, agesa nentahino eriamanehie. ⁷³Huvempa huhagerafi kema neregeho Abrahanku huntene. ⁷⁴Ha' vahe'mofo zmazampintira tagu'vazinketa, koro osu manineta erizama'a erintegahune. ⁷⁵Mani ruotge nehuta, fatgo avu'ava huta, Agri avurera hakare gna manivava hugahu'ne. ⁷⁶Hagi kagra ama mofavre'moka, Marerisa Anumzamomo kasnampa vahere hugahaze. Na'ankure kagra Ramofona vugotenka Agri kana retro huntegahane. ⁷⁷Kagra, Agri vahera Anumzamo'ma zmaguma vazino kumizimi eri apasezmante'nia kea zmasami'sanke'za, zmasunku hanageno zamagu'vazigahie. Agra monafi msa huntengeno eme remsha hugahie. ⁷⁸Na'ankure Anumzamo avesi ranteno fru avu'avama huranteazamo'a, nanterama zagemo monafinti hanatino remsa hiankna huno remsa hurantegahie. ⁷⁹Zamagrama hanimpi manine'za frizamomo turinapi mni'namokizmia masa nezamino, tagrira tazeri fatgo huno rimpa fru kante tavereno vugahie. ⁸⁰Jonima ra huno avamupima hanaveti'teno, ka'ma mopafi vuno umani'negeno, kna'ageno Israeli vahepina eama hu'ne.

Maria'a Jisasi ksente'nea naneke

(Mat 1:18-25)

2 ¹Ana knafi mika Roma kamani vahe'mo'za kva hu'naza mopafina, Roma rankva ne' agi'a Sisa Ogastusi'a kasege erinteno, maka vahe'mo'za zamagia eme kreho hu'ne. ²Hagi Siria mopafina Kuiriniasi Gavana mni'nere, ana knafi ese kna agafa hu'za zamagia kre'naze. ³Ana hige'za maka vahe'mo'za zamagi kre'naku mopa agafa zimire vutere hu'naze. ⁴Josefe'a agranena Galilitira atreno Judia kaziga mmerino Deviti kuma agi'a Nazaretie nehaza kumate vu'ne. Na'ankure agra Deviti nagapinti nere. ⁵Josefe'a a'isa kinte'nea a' nevareno, znagi kre'naku amu'ene hu'negene vu'na'e. ⁶Hagi anantega umaninakeno, Mariana mofavrema kasentesia kna egeno, ⁷ese ne' mofavre kasenteno tavravenu ano vazino, bulimakamomo ne'za zuompafi antegenomase'ne. Na'ankure miza seno mase nontamina ana mika vahe'moke hiza higeno'e.

Ankerom'za sipsisipi afu kva vahe zamasm'i'naza naneke

⁸Hagi ana kuma tva'onte, sipsisipi kva vahe'mo'za kenage sipsisipi kva hu'za meg'i'a mani'nageno, ⁹ame huno ankeromo efore nehigeno, Ramomo msa'amo anamokizmi remsa hunezmantege'za koro hu'naze. ¹⁰Hianagi ankeromo anage huno zmasami'ne, kore osuta antahi so'e hiho,

nagra knare musenke eri'na neonkino, maka ama mopafi vahe'mo'za tusi muse hugahaze. ¹¹Na'ankure menina Deviti kumatera, tmagri'ma tamagu'vazinia mofavre kasente'ne. Hanki ana nera Ramo, Kraisi'e. ¹²Hanki avame'za ome kesnazana amana hu'ne, ana mofavre tavaravefi antegafino bulimaka ne'za zuompafi ante'nenketa ome kegahaze. ¹³Anage nehigeno, ame huno rama'a ankeromo'za monafinti anante efore hu'za, Anumzamofa agi erisaga nehu'za anage hu'za,

¹⁴Monafi mrrerisa kumapi nemnia Anumzamo'a Ra agi erino. Hagi mopafina vahe'moza zmarimpa frune maniho, Anumzamo'a rimpafu huzmante!

Sipsipi kva vahe'mo'za Jisasi ome ke'naza naneke

¹⁵Anage hute'za ankeru vahe'mo'za zamatre'za monafi ete marerizage'za, sipsipi afu kva vahe'mo'za zamagragu anage hu'za, erinketa Ramo menina Betrehe kumate hentofazana forehie huno tasamiazana ome kesune, ¹⁶nehu'za ame hu'za oti'za vu'za ome kazana Maria'ene Josefeka, mofavre'zinia bulimakamofa ne'za zuompafi antemase nege'za ome ke fore hu'naze.

¹⁷Sipsipi kva vahemo'za ome ke fore nehu'za, ankeru vahe'mo'zama ana mofavregu hu'naza kea, nererane nefanena znasami'naze. ¹⁸Hagi ana kema maka vahe'mo'za antahi'namo'za, antri nehu'za antahintahi hakare hu'naze. ¹⁹Hianagi Maria ana nanekema haza kea nentahino, agu'afi ana maka kea nenteno ana kea agera okani'ne. ²⁰Hagi sipsipi kva vahe'mo'za rukrahe hu'za nevu'za, ankeru vahe'mo'za hu'naza kemofa nena'a maka fore hige'za, nege'za nentahiza hu'naza zanku, Anumzamofa muse hunente'za, Agi'a erisaga hume vu'naze. ²¹8 knazupa avufa tga nehu'za, agi'a Jisasi'e hu'za antemi'naze. Ana agi'a ankeromo nerera rimpafima fore osu'negeno Jisasi'e hunka agi'a antegahane hu'nea kante ante'za agi'a ante ami'naze.

Josefe'ene Mariakea Jisasina avare'ne ra monompi vu'na'a naneke

²²Hagi zmazeri agruhu knama vagaregeno, Mose kasegemo'ma hu'nea kante ante'ne Josefe ene Mariakea Jisasina avare'ne Jerusale kumate ra mono nompia vu'na'e. ²³Ramofa kasegefi krente'neana, ***Maka ese ne'mofavrema kasentesiana ramofa ami'nigeno, ruotge mofavre manigahie hu'ne.*** (Ekso-Uti 13:2) ²⁴Ramofa kasegefi huno, kre srmanama huntasazana, ***Tare maho namanuro, tare kasefa namanu kre sramana vugahaze hu'nea kante ante'ne ome ana hu'na'e.*** (Lev-Pri 12:8)

²⁵Hagi mago nera Jerusale kumate mani'nea ne' agi'a Simioni'e. Ana nera fatgo nekino, kazigazi huno Anumzamofa amage nevuno, Israeli vahe'mokizmi zamahoke ahesnia vahe fore hanigu avega anteno mani'negeno, Ruotge Avamumo'a agripina avite'ne. ²⁶Ruotge Avamumo

korapa averi huno, ofri mani'nenka, Ra Anumzamo taza hania ne' Kraisina huntena fore hinkenka ketenka frigahne, huno asami'negeno antahino mani'ne. ²⁷Ana higeno Simionina Ruotage Avamumo azeri otigeno, ra mono nOMPI marerino umani'negeno, Jisasi nerera ene nefakea avare'ne kasegemoma hu'neaza huke e'na'e. ²⁸Simioni ana mofavre nevareno, Anumzamofa ra agi erisaga nehuno amanage huno hu'ne.

²⁹Ramoka kazokzo eri'za vaheka'amona, huvempa kema hunante'nanazana hago fore hige'na koe. Hagi natrege'na kema hunana kante ante'na narimpa frune fri'nenno. ³⁰Na'ankure tahokeno taza hanimofona, nagra navunu koe, ³¹Kagra korapa retro hunte'namo maka vahe zamufi efore hie. ³²Agra masagino maka megia vahetera remsa hunezmantena, Israeli vahe kamofona ra agi amigahie. ³³Ana mofavremofo nerera ene nefakea ana kema huntea kegu tusiza hu'ne, antri nehune znagesa antahi'na'e. ³⁴Ana huteno, Simioni'a asomu ke hunezmanteno, anage huno Mariana asami'ne, antahi so'e huo. Ama mofavre kamo'a rama'a Israeli vahe'mofo zmazeri traka nehuno, mago'a nagara zmazeri onetino, mago avame'zakna huno mani'nena, rama'a vahe'mo'za zamefi humigahaze. ³⁵Ana hina tamage maka vahe'mofo oku'a antahintahimofona eri ama nehina, kagri'enena asne kazimo tumoka'a reaza hughahie.

Ana'e nehaza a'mofo naneke

³⁶Hagi anampina anahu kna huno kasnampa ara agi'a Ana'e, Fanuel mofakino, Asa nagapintire. Ana a'mo ve erino neve'ene 7ni'a kafuzage maninegeno, neve frigetegenno, tavava teno mani'ne. ³⁷Ana a'mo kentoza huno maninegeno kafuzage'amo'a 84'a hu'negeno mono nona notreno, monora Anumzamofona hunenteno, neza a'o huno nunamuna kenage'ene feru enena nehuno manine. ³⁸Anama nehigeno anante ana 'a eno, Anumzamofa susu hunenteno, Jerusale vahe'mota taza hunka tavaresanegu kavega antenona ne' fore hane, huno ana mofavregu hune.

Ete Nazarete vu'naza naneke

³⁹Hagi Josefe ene Mariakea Ramofa kasegemo'ma hu'neazana ana mika huteke, ete Galili mopare vu'za, Nazarete kumazinire umani'naze.

⁴⁰Ana hu'ne umaninakeno, Mofavre'zinimo nena huno hanave netino, knare antahintahifi avitegeno, Anumzamofa asunkuzamo'a Agrane me'ne.

Jisasi avare'ne Jerusale ra mono' nOMPI vu'na'a naneke

⁴¹Maka kafuma ne-egenoa Jisasi nerera ene nefakea, Anumzamoa Israeli vahe kinafinti ozmaheno zmagaterenea kna (Pasova) fore'ma nehigekea, Jerusalemi vutere hu'na'e. ⁴²Hagi Jisasi'a 12fu'a kafuzage

higeno, koma neha'aza hu'ne ra knamofu neza nenaza kna fore higeno avare'ne marerine vu'na'e. ⁴³Hianagi ne'za neknamo vagamaregeno, nontegama vunaku neazageno, Jisasi'a Jerusale kumate mani'negene, nerera ene nefakea onke atreke e'na'e. ⁴⁴Hianagi znagrama znagesa antahi'ana, magoka e'nona vahe'ene ne-e hu'ne nentahine nevakeno kinagase'ne. Kinaga onke'ne rone'zinine, mago'a vahe zamantahigeana, a'o tagranena nome hu'naze. ⁴⁵Hakreke erifore osuke, ete rukrehe huke Jerusale ome hakenaku vu'na'e. ⁴⁶Tri'a zagegnama enevigene, ra mono nomp kasegemofu rempi huzami vahe'mofu amunompi manineno, kema hazana nentahino zmantahige kea nehigeno, ome kene eri fore hu'na'e. ⁴⁷Hagi Jisasi'ma antahino keno nehuno, kenonazamima hiazankura, maka'mo'za ana kema nentahiza, zamagra antri hu'za hakare antahintahi hu'naze. ⁴⁸Hagi nererake nefake nege'ne, antri nehune, nerera'a anage huno hu'ne. Mofavre timoka na'a higenka amanahu kavukvara hunerantane? Ko negafa'ene, nagreranena amuhohuta kagrikura nehako'e. ⁴⁹Hianagi Jisasi'a kenona huno, nahigeta Nagrikura nehaka'e? Nafa'nimofu nomp manigahuanki tanagra ontahina'o? ⁵⁰Hianagi Anagama hia kemofu agafa'a nerera ene nefakea antahi amara osu'na'e. ⁵¹Anante Jisasi'a nerera'ene nefa'ene Nasareti uramino umanineno, nererane nefane kea amage ante'ne. Hianagi nerera'a makazama hiazana agu'afi erintegenome'ne. ⁵²Jisasi'a knare antahintahizane hanavene nena nehigeno, Anumzamo'a avesinentegenome, vahe'mo'zanena avesinte'naze.

Mono ti frezmante Joni mono hu'nea naneke

(Mat 3:1-12, Mak 1:18, Jon 1:19-28)

3 ¹Taiberias Sisama Romu kumate 15ni'a zage kafuma kinima mni'negeno'a, Pontius Pailoti'a Judia mopare ugagoteno kva mni'geno, Heroti Antipasi'a rankva Galili manigeno, nefu Filipi'a rankva Ituriane, Trakoniasi kaziga mni'geno, Laiseniasi'a rankva Abilini kumate mni'ne. ²Ana knafina Anasike, Kaiafasikea mono nonte ugagota rakva mani'na'e. Higeno Anumzamofu kemo, vahe omani hagege kokampi Sekaraia ne'mofu Joninte e'ne. ³Joni'a mika Jodani rantima me'nea kaziga vano nehuno, tamagu'a rukrahe nehutma mono ti nefrenkeno, kumi tamia atreramtano huno mono ke hu'ne. ⁴Kasnampa ne' Aisaia avontafepina amanage huno krente'ne, *mago vahe'mofu agerumo'a, vahe omani ka'ma kopinti kezatino, Ramo'ma esia kana retro nehuta, Agri kana azeri ante fatgo huntaho hu'ne.* ⁵Mika keria antevineteta, mika agona eri agupo nehutma, *kazaki nesia zantamina eri fatgo nehutma, haviza huno knare osu'nesia kantamina erintefatgo, nehinkeno,* ⁶ana mika vahe'moza Anumzamo'ma tahokema heazana kegahaze. (Aisa 40:3-5) ⁷Higeno Joni'a, agrite'ma mono ti frerantesie hu'za e'naza vahe krerfa, anage huno zamasmine, tamagra ha' osifave'mofu mofavre nagare!

Aza hanigetma Anumzamofu rimpa hezampintira korera fregahaze?
 8 E'ina hu'negu, tamagrama tamagu'ama rukrehema hu'nenutma knare tamavutmava hinkeno hago zmagu'a rukrehe hu'naze hu'za hugahaze. Tamagra agafa hutma Abrahamu'a tagri nerageho mani'ne huta osutfa hiho. Na'ankure tamagri'ma neramasmuana, Anumzamo'a amne ama haveramintetira Abrahamuna mofavrea erifore humigahie. 9 Menina hago sasumemo'a zafa antaginaku agafafi kriri'ne, haginno anampintima knare ragama reontesia zafa antagino tevefi asaga huno kregahie.

10 Hige'za ana vahe kevumo'za Jonina anage hu'za antahige'naze. Hagi tagra na'a hugahu'ne? 11 Hu'za antahi'gageno, Joni'a, zamagari kenona anage huno zamasmine, azagama tare kenama ante'nesamoka, magora onte'nesimofu ome fako humio, hagi azagama ne'zama ante'nesamoka, anazanke hunka fako huzamio. 12 Takisi zago zonegiza vahe'mo'zane, ti frerantegahie hu'za enamoza'nenana, Jonina anage hu'za antahige'naze. Rempi huzami nemoke, tagranena nankna hugahune? 13 Agra anage huno zamasmine, kvamo'ma eriho hu'nesia kana arugateretma mago'ene zgoa zo'onkiho. 14 Anante mago'a Sondia vahemo'za antahige'naze, Hagi tagaranena na'a hugahune? Hzageno Joni'a anage huno zamagrira zamasmine, Vahe'mokizami zagoa tutu huzamanteta havigereti rezmataga hutma e'oriho. Hagi tmarimpa fru hutma mizantami erifatgo hiho.

15 Anagama hianke vahe'mo'za nentahi'za, Joninkura Kraisi hago ama e'nefi nehu'za, tare tagufa zamagesa antahi'naze. 16 Joni'a mika'mokizmi kenona anage hu'ne, nagra amane tintafanteti fre'neramantoe. Hianagi magoma ne'emo'a nagrira nagatereno tusi hihamu'ane ne' egahie. Nagra amuha osu'noankina Agari aganomofu nofira katu ofegahue. Agra mono tina Ruotage Avamuteti'ene, tevereti'ene freramantegahie. 17 Agra witi eri herahuhu fokua azampi eri'no, witi hona'a hare kuma harafi nehuno, nena'a witi ante nompri eri'nenteno, hona'a vga ore tevefi kre fanene hugahie.

18 Ana huno amanahu kante, Joni'a rama'a knare antahintahi erinteno, vahera knare musenkea zamasmine.

Heroti'a Joni kina hunte'nea naneke

19 Hianagi Joni'a ra kva ne', Herotina haviza hu'nane huno hanavetino asmine, na'ankure nefu nenaro rehanereno Herodiasina a' erinte'neazanku'ene, havi avu'avazama hiazanku anagea hunte'ne.
 20 Heroti'a mago'ene ana agofetu kefozama hu'neana, Jonina kina hunte'ne.

Joni'a mono ti Jisasi frente'nea naneke

(Mat 3:13-17, Mak 1:9-11)

21 Maka veamo'za mono ti fretageno, Jisasi enena mono ti freteno, nunamu nehigeno mona kafamo'a anagigeno, 22 Ruotage Avamumo'a maho

namagna huno eramino avufare emanigeno, monafinkati mago agerumo'a anage huno, Mofavre nimoka tusiza hu'na Kagrikura muse hunegantoe.

Jisasi ahi'mokizmi zamagi kre'nea naneke

(Mat 1:1-17)

²³ Jisasi'ma mono eri'za ma'ama erigafa hu'neana, 30ti'a kafuzage naza huteno erigafa hu'ne. Hanki vea'mo'za zamagesa antahizana, Josefe mofavre mani'ne, hu'za zamagesa antahi'naze. Hanki Josefe nefa agi'a Eli'e. ²⁴ Eli nefa agi'a Matati'e. Matati nefa agi'a Livae'e. Livae nefa agi'a Melki'e. Melki nefa agi'a Janai'e. Janai nefa agi'a Josefe'e. ²⁵ Hagi Josefe nefa agi'a Matataiasi'e. Matataiasi nefa agi'a Emosi'e. Emosi nefa agi'a Nahomu'e. Nahomu nefa agi'a Esli'e. Esli nefa agi'a Nagai'e. ²⁶ Hagi Nagai nefa agi'a Meati'e. Meati nefa agi'a Matataiasi'e. Matataiasi nefa agi'a Sime'i'e. Simei nefa agi'a Joseki'e. Joseki nefa agi'a Jota'e. ²⁷ Hagi Jota nefa agi'a Joanani'e. Joanani nefa agi'a Resa'e. Resa nefa agi'a Selubabeli'e. Selubabeli nefa agi'a Sieltieli'e. Sieltieli nefa agi'a Neri'e. ²⁸ Hagi Neri nefa agi'a Melki'e. Melki nefa agi'a Eti'e. Eti nefa agi'a Kosamu'e. Kosamu nefa agi'a Elmadamu'e. Eladamu nefa agi'a Er'e. ²⁹ Er nefa agi'a Josua'e. Josua nefa agi'a Eliesae'e. Eliesae nefa agi'a Jorimi'e. Jorimi nefa agi'a Mateti'e. Mateti nefa agi'a Livai'e. ³⁰ Hagi Livai nefa agi'a Simioni'e. Simioni nefa agi'a Juda'e. Juda nefa agi'a Josefe'e. Josefe nefa agi'a Jonamu'e. Jonamu nefa agi'a Eliakimi'e. ³¹ Hagi Eliakimi nefa agi'a Melea'e. Melea nefa agi'a Mena'e. Mena nefa agi'a Matata'e. Matata nefa agi'a Neteni'e. Neteni nefa agi'a Deviti'e. ³² Hagi Deviti nefa agi'a Jesi'e. Jesi nefa agi'a Obeti'e. Obeti nefa agi'a Boasi'e. Boasi nefa agi'a Salmoni'e. Salmoni nefa agi'a Nasoni'e. ³³ Hagi Nasoni nefa agi'a Aminatabu'e. Aminatabu nefa agi'a Edmini'e. Edmini nefa agi'a Arni'e. Arni nefa agi'a Hesroni'e. Hesroni nefa agi'a Peresi'e. Peresi nefa agi'a Juda'e. ³⁴ Hagi Juda nefa agi'a Jekopu'e. Jekopu nefa agi'a Aisaki'e. Aisaki nefa agi'a Abrahamu'e. Abrahamu nefa agi'a Tera'e. Tera nefa agi'a Neho'e. ³⁵ Hagi Neho nefa agi'a Seruki'e. Seruki nefa agi'a Reu'e. Reu nefa agi'a Peleki'e. Peleki nefa agi'a Ebe'e. Ebe nefa agi'a Sila'e. ³⁶ Hagi Sila nefa agi'a Kenani'e. Kenani nefa agi'a Arfaksati'e. Arfaksati nefa agi'a Semi'e. Semi nefa agi'a Noa'e. Noa nefa agi'a Lemeki'e. ³⁷ Lemeki nefa agi'a Metusela'e. Metusela nefa agi'a Inoku'e. Inoku nefa agi'a Jareti'e. Jareti nefa agi'a Mahalale'e. Mahalale nefa agi'a Kenani'e. ³⁸ Kenani nefa agi'a Enosi'e. Enosi nefa agi'a Seti'e. Seti nefa agi'a Adamu'e. Adamu nefa agi'a Anumzane.

Sata'a revatga Jisasina hu'nea naneke

(Mat 4:1-11, Mak 1:12-13)

4 ¹ Jisasi'a Jodani timpri mono ti fretegeno, Ruotage Avamumo agu'afi efre viteno avareno ka'ma kopi vu'ne. ² 40ti'a zgeferupi Satana

mago agi'a hankromofu kvamo, ne'za a'o huno mni'nea kna'afi Jisasina revatga hu'ne. Anama nehigeno Jisasi'a agaku hu'ne. ³Sata'a amanage huno Jisasinku hu'ne, Kagrama Anumzamofu mofavre mani'nesnunka ama havegura breti fore huo hunka hugeno breti fore hino. ⁴Jisasi'a ana kemofo nona'a amanage hu'ne, avontafepi anage huno krentene. *Vahe'mo'za breti nesafintikera zmasimura e'origahaze huno krente'ne.* (Diu-Kas 8:3) ⁵Sata'a Jisasina avareno zaza agonare marerino, maka ama mopafima me'nea ranra kumatamina ame huno averi'ne. ⁶Ana huteno Sata'a amanage huno asami'ne, maka'zana nagrike kvafi me'neakina, ama ana makazana kamigahue. Na'ankure ama ana mikazana, izano aminaku'ma hanumofona amane amigahue. ⁷E'ina hunegu Kagrama krenarenka mono hunantesankena, ama ana makazana kaminugeno kagriza segahie huno higeno, Jisasi'a ananke nona'a anage huno hu'ne, ⁸avontafepi anage huno kre'ne, *Kagra ranka'a anumzamofu monora hunentenka, agri eri'zanke erigahane huno krente'ne.* (Diu-Kas 6:13) ⁹Anante Sata'a Jisasina avareno Jerusale kumate vuno, ra mono nomofu amumpare ome nenteno, amanage huno asami'ne, Kagra Anumzamofu mofavre mani'nenunka fenamufi takauro, ¹⁰na'ankure avontafepi anage huno krente'ne, ***Anumzamo'a ankeru vahe'a huzmantenke'za kva hugantesageno,*** ¹¹***Havemo kagia taga hu'zanku zamazampi kavresga hanageno, kagia taga osugahie huno krente'ne,*** (Sam-Zga 91:11-12) ¹²Jisasi ana kemofo nona'a anage huno asami'ne, avontafepi anage huno krente'ne, *Ranka'a anumzamofona rehenka onko huno hu'ne.* (Diu-Kas 6:16) ¹³Sata'ma mika revatga huvagareteno, henka'a kankamuma fore hanigeno revatga hanigu atreno vu'ne.

Jisasi'a eri'zama'a erigafa hu'nea naneke

¹⁴Jisasi'a ete Galili mopare Avamumofu hihamufi vigeno, agenke'amo ana mopafina vuno eno hu'ne. ¹⁵Ana nehuno Jisasi'a, agafa huno osi mono no zimifi mono kea nehige'za, agi erisga hu'naze.

Nazarete vahe'mo'za Jisasi zamarimpa ahenteza zamefi'huminaza naneke

(Mat 13:53-58, Mak 6:1-6)

¹⁶Hagi Jisasi'a nenama hu'nea kumate Nazarete eno, nehiaza huno mni fruhu knazupa (sabat) osi mono nompri marerino avontafe hamprinaku o'netige'za, ¹⁷Kasnampa ne' Aisaia avontafe eri'za eme nemigeno, eri vakanereno, hakreno amanage huno kre'nea ke hampri'ne, ¹⁸*Ramofu avamumo nagrane emanine. Na'ankure agra huhampri nanteno, zamunte omane vahepi knare musenka huama huo huno hunante'ne. Agra hunanteno huama hugeno, kinafi maninesaza vahemo'za katufe'za nevnageno, zamu suhu vahemo'za negesageno, vahemo'za zmazeri haviza*

nehanaza nagamoza fru hu'za nemnisagena, ¹⁹Ramo tamaza huno tmazeri so'ema hiazankura huama hu'na tmasaminaku e'noe. (Aisa 61:1-2)

²⁰Anage huno hampriteno, ana avontafe regazarino, avontafemofokva ne' nemino manige'za, ana osi mono nompimaninamo'za zamua Agri kete'za maninaze. ²¹Ana huteno agafa huno zamasmine, Amama hamprugetma antahiza kemofo avufa'a meni fore nehie. ²²Hagi maka vahe'mo'za knare kema hia kegura antri nehu'za, mago'ene ontahige antahige nehu'za, ama Josefe mofavre omaninefi? hu'za nehazageno, ²³Jisasi'a anage huno zmasamine, tamage hutma huvame kea hunantegahaze. Tusa ne'moka kagra kavufa kazeri knare huo! nehuno anage hu'ne, Kapeniam kumate kaguvazama erifore hu'nanketa antahinonanki, e'i anazana kumaka'are huo hutma hugahaze. ²⁴Tamage hu'na neramasamue. Magore huno kasnampa vahe'mofona kuma'afinti vahe'mo'za ke'a antahi omigahaze. ²⁵Hianagi tamage hu'na neramasamue, Israeli vahepina rama'a kento'ane Ilaija knafina maninageno, monafinti 3'a kafugi 6si'a ikana kora origeno, tusi aga ateza maka mopafina fore hu'ne. ²⁶Ana hu'neanagi Ilajana huntengeno Israeli mni'naza kento a'nerera ovu'neanki, rurega kento ate huntengeno Sarafat kumate Saidoni mopare vu'ne. (Jem 5:17-18, 1 Kin 17:1-16)

²⁷Hanki Israeli mopafina, rama'a fugo namuma zmare'nea vahera kasnampa ne' Elisa knafina maninazanagi, mago'mofone huno ana vahepina fugo namumo'a vgareonte'neanki, Siria ne' Nemaninke ana fugo namumo'a vgaarentene. (2 Kin 5:1-14)

²⁸Anage hige'za, osi mono nompimaninaza maka vahe'mo'za nentahiza tusiza hu'za zmarimpa ahente'naze. ²⁹Zamagra oti'za Jisasinara kumateti retufe'za, kuma zmimofo zava ankinare aretufe atrenaku vu'naze. ³⁰Hianagi Jisasi'a amu'no zimifinti nezamatreno vu'ne.

Jisasi'a agru osu avamu hunte'nea naneke

(Mak 1:21-28)

³¹Ana huteno Kapaniamu rankumate Galili kaziga uramino umanineno, mni fruhu knarera (sabat) mono kea rempi huzamine. ³²Zamagra rempima huzamia kegu zmagogogu hu'naze. Na'ankure hanave'a me'nea vahe'mo'ma nehiaza huno rempi huzamine. ³³Hanki osi mono nompina agru osu havi avamumo agu'a fre'nea vahemo manineno, ranke huno kezatine. ³⁴Ee! Tatregeta manimaneno Nazareti Jisasiga, Kagra tazeri haviza hu'naku ne-eampi? Tagra antahinone, Kagra izage, Kagra Anumzamofona Ruotge hu'namoke! ³⁵Hianagi Jisasi'a kesuno kea osu atrenka atiramio! Higeno havi avamumo ana nera amuno zimifi rutraka hunetreno, azeri haviza osu atiramino vu'ne. ³⁶Ana nehige'za mafka vahe'mo'za antri nehu'za zamagogogu nehu'za ke ohumi ahumi hu'za anage hu'naze. Nankna hihamu'ane ke ama ne'mo'a nehie?

Na'ankure agi me'nea vahe'mo nehiaza huno tusi'a hihamu hanave'areti, agru osu havi avamura huntegeno ke'a antahino atineramie! ³⁷Ana higeno Jisasi agenke'amo ana mopa kagiafina vuno eno huv gare'ne.

Jisasi'a Pita nenemo azeri knamarena naneke

(Mat 8:14-17, Mak 1:29-34)

³⁸Jisasi ana osi mono nompinti atiramino Saimon nOMPI ufre'ne. Saimoni nenemo avufga teve ha kri erino mase'nege'za, aza haniegu Jisasi asami'naze. ³⁹Jisasi'a ana a'te vuno, teveha kri huntegeno fanane higeno, ame huno ana a'mo'a otino ne'za kre'zmante'ne.

Jisasi'a ruzahu ruzahu kri erinaza vahe zamazeri so'e hu'nea naneke

⁴⁰Zage uramino kinaga sege'za, ruzahu ruzahu kri eri'za mase'naza vahe'mokizmi, naga'zmimo'za zamavre'za Jisasinte e'naze. Ageno magoke magoke'mofona azanu zamako hutere nehigeno, ana krizmimo atre zamante'ne. ⁴¹Ana hukna huno rama'a vahepinti, havi avamutamina huzmantege'za atinerami'za ranke hu'za, Kagra Anumzamofu mofavre! Hu'neanagi Agra zmazeri korino, e'inage osiho huno hu'ne. Na'ankure Kraisi'e hu'za zamagra ko antahi'nazageno'e.

Jisasi'a Judia kaziga mono ke zamasmine'nea naneke

(Mak 1:35-39)

⁴²Jisasi maseno ko' atigeno ka'ma moparega vu'nege'za, vahe'mo'za hakre'za ome ke'za erifore nehu'za tagrane manigahanki, tatrenka ovuo hu'za kazigzi hu'za antahige'naze. ⁴³Hianagi Jisasi'a anage huno zmasami'ne, Nagra Anumzamofu kuma'mofu knare musenkea aruga'a kumapine huama huna vugahie. E'ina agafare Anumzamo'a hunantege'na ama mopafina e'noe. ⁴⁴Ana nehuno mago'ene Judia osi mono nontamimpi vuno, vahera mono kea ome zmasamino vano hu'ne.

Jisasi'a ese aposel naga zmavare'nea naneke

(Mat 4:18-22, Mak 1:16-20)

5 ¹Mago knazupa Jisasi'a Genesareti tiru ankenare otino mani'nege'za, tusi'a vahe kevumo'za Anumzamofu naneke antahinaku ome eritruhu'za manititipa hu'naze. ²Ana tiru ankenare tare onensa vente me'negeni ke'ne. Hianagi nozamema nehaza nagamo'za anampintira urami'za, kukozimi umaniza sese hu'naze. ³Mago ventefi Agra umrerine, ana suzana Saimoni ventefi mrrerino antahigegeni osi'a tinkenaretira aretufe ogantu'a atre'ne. Hagi Jisasi'a anampi marerino tamu mani'neni, mika vahe mono kea ana onensa ventefinti zamasmine. ⁴Ana nanekema huvama nereno'a Saimoninku anage hu'ne, Antuma timoma avu'hanihanima huneama'afi aretufe kantu antenka, kukonka'a

nozamema avazu hananku atrenkago. ⁵Hianagi Saimoni'a kenona'a anage hu'ne, Ramoke, tagra tusi amuho huta meni keragera noza azeri naku tusi'a amuho eri'za erinonanagi, magora aze'oritfaza hu'none. Hianagi Kagrama hana kere kukoni'a ataregahue. ⁶Anama hute'za zamagra tusi nozamezga azerizageno kuko zamimoa agafa huno tagato hu'za hu'ne. ⁷Anama hige'za, zamagra mago onensa ventefima maninaza knampa zamirega eme zamaza hihogu kezanke hugantu atrage'za zamagra e'za tarega onensa venterarena emeri avitageno, anantarega ventemokea tirami'za hu'na'e. ⁸Hianagi Saimon Pita'a negeno'a, Jisasi agafi renareno anage hu'ne, Ramoka nagri navatetira ogantua vuo. Na'ankure nagra kumimo avite'nea ne'tfa mani'noe! ⁹Na'ankure Pita'ene, ruga'a nagama agrane mani'naza nagamo'za nozamema zamagrama azeri'naza zankura, tusi'za hu'za antri hu'naze. ¹⁰E'i anazanke huke Zebedi ne'mofo Jemisike, Jonikea znagogogu hu'na'e, Saimoni ene tragote'za erizana e'nerizane. Higeno Jisasi'a Saimoninku anage huno asami'ne, Korera osuo, amaretima agafa hunka vnanana, vahera zamavregahane. ¹¹Onensa vente'zamia eri'za tinkenare'ma vute'za, mika zazmia anante netre'za, Jisasi amage ante'naze.

Jisasi fugo namu re'nea ne' azeri knamare'nea naneke
(*Mat 8:1-4, Mak 1:40-45*)

¹²Jisasi'ma mago ra kumapima umani'negeno'a, mago nera fugo namumo miko avufga azeri anovazi'nea ne'mo, Agrite e'ne. Jisasima eme negeno'a, avugosaregati mopafi prihuno unemaseno anage hu'ne, Ramoka nazeri so'e hunaku'ma kvemasisigenka, Kagra amane nazeri so'e huo. ¹³Higeno Jisasi'a azana avufare avako nehuno anage hu'ne, Nagrima navesiana, kagra so'e huo higeno, ana fugo namumo'a ame huno ana zupage atrente'ne. ¹⁴Anante Agra ana ne'ku hunteno, vahera ozamasmio. Hianagi kagra Prisi nete vunka, kagraka'a ome averinka Mosesima huneagante, ofa erinka ome hugeno, fugo namumo'a hago vgare hu'za vahoma kageho. ¹⁵Hianagi anama hu'nea avu'avazamofo kemo vuno eno higeno, tusi'a vahe kevumo'za Agri ke nentahisageno, krizmia eriamane hanie hu'za e'naze. ¹⁶Hianagi anama hutageno, akoheno Jisasi'a zamatreno vahe omani ka'ma kopi viazamo nunamu ome hutere hu'ne.

Jisasi'a agia sti'nea ne' azeri knamare'nea naneke
(*Mat 9:1-8, Mak 2:1-12*)

¹⁷Mago knazupa Jisasima rempima hu'nezamige'za anampina Farisi vaheki, kasegerema ugagote'naza vahe'enena tavaoma'are mani'naze. (Zamagara mago mago kumateti Galilitima, Judiati'ma, Jerusaletima hu'za Agrane emani'naze.) Higeno Ra Anumzamamofo vahe'ma zamazeri knamare hanavea, Agripi me'negeno zmazeri so'e hu'ne. ¹⁸Anama hutegenoa anante, mago'a

vahe'mo'za sesenku hu'za avufa fri'nea ne' zafa hu'za e'naze. Zamagara ana krinera Jisasi avuga eri'za ufre'za ome antenaku ana'ana hu'naze. ¹⁹Hianagi eri'za ufre kankamuna hakare'za erifore osu'naze. Na'ankure tusi'a vahekrefamo hiza hazageno, ana'nera eri'za nomote mareri'za, no amumpa eri akasine'za ana sesenku'aga atrageno vahe amu'nompinti Jisasina avuga fatgo huno uramine. ²⁰Jisasi'ma ana nagamokizmi zamentintima negeno'a, Agra anage hu'ne, Ronenimoke, miko kumika'a ama apase kantoe. ²¹Anante kasegere ugagota hunaza vahe'ene, Farisi vahe'moza agafa hu'za ke hakare hu'za, ama nera i'za Anumzamofona huhaviza nehie? Iza Agra huno kumira apasenegantoe nehie. Anumzamoke kumira apasegahianki? ²²Hianagi Jisasi'a ha'arente antahintahima antahi'zana nezmageno, Agra anage hu'ne, nahigetma tamagra e'inahu antahintahia tmagu'afina nehaze? ²³Inana kemo oza hanigena hugahue, Kumika'a apasegantoe kemopi, Otinka vuo hanua kemo'e? ²⁴Hu'neanagi e'inahu hanigenka, kagra kenka antahinka nehunka, Vahe'mofo Mofavremo'a ama'na mopafina, hanavea eri'neankino kumira amane apase zamantegahie hunka hugahane. Nehuno ana avufga fri'nea nera asami'ne, Nagra negasmue, otinka sesenkuka'a enerinka nonkarega vuo huno hunte'ne. ²⁵Hagi zamagri zamufi ame' huno otino, mase'nea tafe'a enerino Anumzamofa agi erisaga hume noma'arega vu'ne. ²⁶Anama hiazamo zamagrira zamazeri zamanovazige'za, ananteti agafa hu'za Anumzamofa agia erisga nehazageno, kore'zamo zamagripina avitege'za, ruzahu zantafa menina kone, hu'za hu'naze.

Jisasi'a Livai agi hu'nea naneke

(Mat 9:9-13, Mak 2:13-17)

²⁷Anama huteno Agra megia' nevuno omegeana, takisi zago zonegia nera agi'a Liva'e mago'a agi'a Matiue nehaza ne'mo zago zogi nomp mani'negeno agriku huno, Namage eno. ²⁸Higeno agra miko'zana anante netreno, otino amage'anteno vu'ne. ²⁹Hagi Livae'a tusi'a ne'za noma'afi Jisasina krentenege'za, anantega takisi zagoma zogi vahe krerafane, ruga'a vahe enena zamaza tununte kave'ne sipare zanagrane atru hu'za mani'naze. ³⁰Farisi vahe'ene, kasegere ugagota hu'naza vahe'mo'za, Jisasi amage nentaza disaipol nagara kanunkanu hu'za ke ha' rezmante'za anage hu'naze, na'ahigetma tamagra kave ene, tinena takisi zagoma eneriza naga'ene, kumike naga'enena nenaze? ³¹Jisasi'a kenona huzamanteno anage hu'ne, knare huza mani'nesaza vahe'mo'za tusa vahekura ohakegahaze. Hagi krima erinesaza vahe'mo'za tusa vahekura hakegahaze. ³²Nagra fatgo vahera zamagi hukura ome'noe, hagi kumi vahe'moza zamagu'a rukrehe hihogu e'noe.

Kave a'o huno nunamu hu'zamofa naneke

(Mat 9:14-17, Mak 2:18-22)

³³Mago'a vahe'mo'za Jisasina amanager hu'za asmi'naze, Jonima amage'ma nentaza disaipol nagamo'za, hakare zupa ne'zana a'o hu'za

mani'ne'za nunamu huvava hu'naze. Hagi Farisi mono vahe'mo'za anazanke nehazanagi, Kagrima kamage'ma nentaza nagamo'za nezane, tinena nevava nehaze. ³⁴Anage hazageno Jisasi'a kenona anage zamagriku hu'ne, Tamagra, mago ne'moma aravema hukuma mni'nenigeta, ana ne'mofo rune'amofonkura, nezana a'o huta maniho hugahazo? Ana ne'ma maninenigeta anara osugahaze. ³⁵Hianagi mago kna ne-eankino, aravema huku'ma hunesimofoma zamagripinti avretesigeza, e'i ana knafina nezana a'o hugahaze. ³⁶Jisasi'a anazanke huno mago fronka kea zamasmine. Mago'mo'a kahefa kenaretira tagato huno atafa kenarera anteno ohatigahie. E'inama hanigeno'a, kasefa kena eri tagato hanigeno, kasefa kenamo'a korapa kenarera mago knara osugahie. ³⁷Ana hanigeno magomo'e huno kahefa wainia, afu akuruteti tro hunte'nea atafa waini taferopina tagi ovazigahie. Anama haniana, kahefa wainimo'a ana akru taferora rezoreno prohuno tagiramisigeno, ana akarura erihaviza hutregahie. ³⁸Anama hunakura, kasefa wainia, kasefa waini akru tafempi tagi vazigahaze. ³⁹Mago'mo'a, atafa wainima netesuno'a, kasefa wainigura aveosigahie. Na'ankure Agra huno, atafa suamo'a knare'za hu'ne huno hugahie.

Jisasi'a mani fruhu knamofu Ra mani'nea naneke

(Mat 12:1-8, Mak 2:23-28)

6 ¹Mago mni fruhu kna (Sabat) zupa Jisasi'a witi hozafi ufreno nevig'e'za, amage nentaza disaipol naga'amo'za mago'a witi rga eritaniza, zamazampi arekasegasufe'za ne'naze. ²Ana nehazage'za mago'a Farisi vahe'mo'za anage hu'naze, nahigetma osihoma hu'neazana mni fruhu kna (Sabat) zupa nehaze? ³Jisasi'a kenona zamire anage hu'ne, Tamagra hampritma ontahi'nazo, Deviti'ene, naga'anema, zamagatege'za hu'naza zana? ⁴Anumzamofu seli mono nompina mrerino, nagru hu'nea breti erino ne'neana, kasegemo'a o'e huno magomo'a onegahianki, prisi vahe'moke'za negahie hu'nea bretiagi, Deviti'a neneno naga'a zami'ne? ⁵Nehuno zamagriku anage hu'ne. Vahemofu Mofavremo'a, Agranena mni fruhu knamofu (Sabat) Ra manine.

Jisasi'a mni fruhukna zupa aza sti'nea ne'mofo azeri so'e hu'nea naneke

(Mat 12:9-14, Mak 3:1-6)

⁶Hagi ru mani fruhu kna zupa (sabat) Jisasi'a osi mono nomp (sinagok) mrerino mono naneke rempi hu'nezamigeno, mago nera tamaga kaziga azamo'a sti'nea ne' mani'ne. ⁷Kasegere ugagota hu'naza vahe'ene, Farisi vahe'mo'zanena, zamua ante'soe hu'za kete'za mani'naze. Jisasima mni fru knarema ana nera azeri'soe hanige'za, hagi zamagra kegafa erifore hu'za Agrira azerinaku, kete'za mani'naze. ⁸Hianagi inakna antahintahima hu'nazana, Agra ko antahino keno nehuno, azama haviza hu'nea neku

huno, ama maka vahe zamavure otinka eno! Higeno ana ne'mo otino e'ne. ⁹Jisasi'a zamagriku anage hu'ne, Nagra tmantahinegoe, mni fruhu kna (Sabat) zupa knare zama hanuna zamo kasegefina knarera hunefi, havi tavutavama hanuna zamo knarera hu'ne? Vahera zamaza hugahumpi, vahera zamazeri haviza hugahune? ¹⁰Arukrahe huno ome zamagege, eme zamagama huteno Jisasi'a azamo'ma stinea ne'ku anage huno asami'ne, Kzana arusuto! Higeno agra ana hu'ne. Anama higeno'a, azamo'a eteno so'e hu'ne. ¹¹Hianagi kasegere ugagota hu'naza vahe'ene, Farisi vahera zamarimpamo'a aka hege'za, Jisasina naza hunteghahune hu'za zamagra zamagra kehugantu hugama hu'naze.

Jisasi'a 12fu'a aposel naga huhampri'nea naneke

(Mat 10:1-4, Mak 3:13-19)

¹²Anaknafina Jisasi'a nunamu hunaku agonarega marerino, Anumzamofontega ana kenegera nunamu ome nehigeno ko atune. ¹³Ko'ma netigeno'a amagama nentaza disaipol naga'a kehige'za ageno, anampinti 12fu'a aposolo nagare huno huhampri'no, zmagi'a zami'ne. ¹⁴Saimoninku Pita'e huno mago agi'a nenteno, nefunku Endru'e hu'ne. Hagi Jemisi'e, Joni'e, Filipi'e, Bataromio'e. ¹⁵Matiu'e Tomasi'e, Alfiasi nemofu Jemisi'e, Saimoni Zealeti nagapinti nere. ¹⁶Hanki Jemisi nemofu agi'a Judasi'e. Hagi mago ne'mofu agi'a Judas Isakarioti'e, ha' vahe'mokizami zmazampi Jisasina komoru huno avarentesia nere.

Jisasi hakare'a vahe krizmi zmazeri knamarena naneke

(Mat 4:23-25)

¹⁷Jisasi'a amage'ma nentaza disaipol naga'ane agonaregati erami'za agupofi eme otinege'za, anante amage'ma nentaza tusi'a disaipol veamo'za eritru nehazageno, maka Judia kazigatiki Jerusaletiki, Saitonitiki, Taia hageri ankena regati'enena, ¹⁸ana vea'mo'za Jisasi naneke nentahisageno krizimi zmazeri knamresiegu emeri atru nehazageno, agru osu havi avamumo'za zmazeri haviza hu'naza vahera zmazeri knamare'ne. ¹⁹Tusi veamo'za avako hunaku hu'naze. Na'ankure tusi'a hihamumo Agripinti ne-egeno, avakoma hia vahera maka krizmimo'a atrezmante'ne.

Muse hanaza zamofu naneke

²⁰Jisasi'a amage'ma nentaza disaipol naga'a zamufi nezmageno, amange huno zmasami'ne. Tamamunte omane vahe'mota muse hiho. Na'ankure Anumzamofu Kumara tamagrira. ²¹Tamagaku'ma menina nehanamota, muse hiho. Na'ankure tamagrira Anumzamo'a tamaminigetma neramu hugahaze. Zavi'ma menima netenamota muse hiho. Na'ankure tamagra kiza regahaze. ²²Vahe'moza antahi haviza hunermante'za, tamahenati'za, kema neramasu'za, Vahe'mofu Mofavre'reku huza havi tamagima tamisazana! Anumzamo'a

asomu huramantegahie. ²³Ana knazupa musenkase hugahaze. Na'ankure mizantimimo'a rama'a monafina me'ne. Na'ankure korapa zmagehe'za anahukna kasnampa vahera huzmante'naze. ²⁴Hianagi fenone vahe'mota tmasunku hutma ranknazampi manigahaze. Na'ankure tamagra ko tamazeri so'e hu'zana erivite'naze. ²⁵Menima tamagrama knare hutma ne'za neramu nehaza vahe'motma ranknazampi manigahaze. Na'ankure tmagaku hugahaze. Menima kizama neraza vahe'mota, tamagra ranknazampi manigahaze. Na'ankure tusi zavi krafa hugahaze. ²⁶Mika vahe'mo'za knare vahe mani'naze hu'za tmagriku'ma nehza vahe'mota ranknazampi manigahaze. Na'ankure zamagri nezmageho'za havige kasnampa vahetera anahukna huzmante'naze.

Ha' vahe'zmimofa avesintesaza zamofa naneke

(Mat 5:38-48, 7:12)

²⁷Hianagi anage hu'na neramasamue, izagato kema hugeta nentahimota, ha' vahetamia zamamesi nezmanteta, antahi haviza huneramantesaza vahera, knare tmavutmava huzmanteho. ²⁸Tamazeri havizahu ke huramantesaza vahera, asomu ke hunezmanteta, havi z mavu'zmava huramantesaza vahera nunamu huzmanteho. ²⁹Kameragente kahesimofona, rukrahe hugeno mago kazigane kaheno. Nakre kuka'a erisimofona, atregeno sioti ka'ane erino. ³⁰Mago'a zanku kantahi'gesagenka zami'nenana vahe'mokizmia, ete ome hanavege huzmantenka e'orio. ³¹Kagri'ma rumo'zama so'e zmuzma hugantesazegu'ma kave'nesiankna hunka rumokizmia, kagra so'e kavukva huzmanto. ³²Tamagri'ma tamesintesia vahe'ma, zmesi zmantesuta, nankna knare'za erigahaze? Na'ankure kumi' vahe'mo'zanena, zmesizmantaza vahera zamagri'nenana anahukna hu'za zmesi nezmantaze. ³³Tamagrama, knare zamavuzmava huramantesaza vahe'ma, knare tamavutmava huzmentesuta, nankna knare'za erigahaze? Na'ankure kumi vahe'mo'za anahukna z mavuzmava zamaganena nehze. ³⁴Nofi'ma hu'za erite'za, ete anama'a eme namigahaze hunka antahi nezaminka zamisanana, nankna knare'za erigahaze? Kumi' vahe'mo'zanena anahukna hu'za kumi vahe'mofozana erite'za, ete nofima hu'nazana ana maka eme apanesaze. ³⁵Hianagi ha' vahe tamia tamavesinezmanteta knare tamavutmava hunezmanteta nofi'ma hu'za erisazana mago'zana ete nona'a erigahune huta ontahiho. E'i'nama hanuta mizantamimo'a rama'a me'nenana, tamagra Mrerisa Anumzamofa mofavrerami manigahaze. Na'ankure susu hunontaza vahe'ene, havi vahe'mokizmi'a so'e hunezmantaze. ³⁶Nafatmimo'ma asunku hunermanteaza hutma, tamaganena tmasunku huzmanteho.

Vahe refko hu'zamofa naneke

(Mat 7:1-5)

³⁷Rumokizmi maniza refako'ma huozmantesanke'na, kagri mni'zanena Anumzamo'a refako huogantegahie. Vahe'mofa kumi'zmi

atrezmantesnage'za Anumzamo'a tamagri'enena kumitamia atreramantegahie. Haviza huramantesia vahe'mokizmi kumizmi atrezmante'nage'za tamagri'enena atreramantegahaze. ³⁸Vahe'ma kagrama zaminakeno'a kagri'enena anazanke huno negamino, knare'za huno reutrako traku huno kamina, aviteno herafiramino evugahie. Na'ankure kagrama vahe'ma zamisana avamente, kagri enena anazanke huno kamigahie.

³⁹Jisasi'a anage huno fronka kea zmasami'ne. Avu asuhu ne'mo'a, ete mago avu asuhu nera avazu huno vugahifi? I'o znagra ana taregamoke kerifi uoramigaha'e. ⁴⁰Mago avo noma nehimo'a, rempima humi nera agateore'ne. Hianagi iza'o rempima humia antahiza eri vgareteno rempima huzami vahekna nehie. ⁴¹Na'a higenka kugusopa negafu avufima me'neana negenka, tusi'a zafa kofa kavufima me'neana ke'so'e nosane? ⁴²Nankna hunka negafunkura, nenefuo osasi'za kavufi me'neana natregena eri atraneno nehunka, tusi'a zafa kofa kavufi me'neana ke so'e nosano? Kagra tavre vahe mni'nane! Ese'zana tusi'a zafa kofa kavufi me'neana eri atrenka, kavua ke so'e nehunka, osi kugusopa negafu avufi me'neana eritregahane.

Zafane, raga'amofa naneke

(Mat 7:16-20, 12:33-35)

⁴³Na'ankure knare zafamo'a havi raga'a renonte. Hagi havi zafamo'a knare rga renonte. ⁴⁴Na'ankure magoke magoke zafamo'a agra'a gna rgama rentenire kegahane. Ave'ave trazampintira vahe'moza fiki rga noragize. Ave'ave trazampintira vahe'mo'za krepri rga noragize. ⁴⁵Knare vahe'mofona agu'afima knare'zama antegenome'neazamo, knare'zana efore nehie. Hanki havi vahe'mofona agu'afina haviza antegenome'neazamo, haviza efore nehie. Na'ankure nanknazama agu'afima me'neazana, agi'mo hufore nehie.

Tare netremoke noma kisa'a zamofa naneke

(Mat 7:24-27)

⁴⁶Nahigeta Nagrikura, Ramo'e Ramo'e nehutma, kema tmasamuazana nosaze? ⁴⁷Iza'o Nagrite ne-eno huankema antahino amage' anankemofa ante'mofona, Nagra kaveri hugahue. Ana'mo'a ama anahu'kna hu'ne. ⁴⁸Agra mago ne'mo no kiankna hu'neankino, mopa kafino uramino have omeri fore huteno, ana agofetu ki'ne. Tima hageno eno ana nona eritagana vazinaku hianagi, eri torera osugahie. Na'ankure hanave nentake hu'nea havere nona ki'ne. ⁴⁹Hianagi, Nagri ke nentahino amagenonte'mo'a, noma'a kahepampi kiankna hu'neakino tima hagenoma eno emeri tagana vazitregeno, pasaru huno evu ramino haviza hiakna hugahie.

**Jisasi'a sondia vahe'mokizmi kva ne'mofo eri'za ne' azeri
knamare'nea naneke
(Mat 8:5-13)**

7 ¹Jisasi'ma ana miko veama rempima huzami vgareteno zmatreno Kapeneam kumate vu'ne. ²Mago 100ti'a sondia vahete kva nera, vahe'mo'za antahi nemiza ne'mofo, kazokzo eriza ne'amo'a, kri erino fri'za nehigeno, ³ana sondia vahete kva ne'mo'a Jisasi kema nentahino, Jiu ra vahe'mokizmi huzmantege'za kazokzo eri'za vahe'a eme azeri so'e hunteniegu ome antahigenaku Jisasintega vu'naze. ⁴Zamagrama Jisasinte enehnati'za amanage hu'za hanaveti'za antahige'naze. Ana sondia kva nera knare'za nehia ne'kinka, Kagra amne aza hugahane. ⁵Na'ankure agra tagrikura avesineranteno, osi mono nontinena ki'ne. ⁶Jisasi'a magoka zamagrane vuno, no tva'onte uravao nehigeno, ana sondia kva ne'mo rone'amokizimi huzmantege'za Jisasinte vu'za, huzmante'nea kea ome asami'naze. Ramoka nagri nontegama ezankura amuho osuo. Na'ankure nagri nontega kagrama e'arera knarera osu'noe. E'ina hu'nogu, Kagrite'ma esuana knare osu'noe. ⁷E'ina hu'nogu, Kagrite'ma esuana knare osu'noe. Hianagi eri'za vahe'nimofo magoke ke hugeno kri'amo'a amne hunteno. ⁸Na'ankure nagranena rankva ne'mofo agoraga'a mani'noge'za, ete sondia vahe'mo'za, nagri nagorga mni'nage'na, nagrama amamofonku hu'na, vuo hugeno, agra nevie, magomofonku eno hugeno, agra ne-e. Kazokzo eri'za vahenigu hu'na, e'ina huo hugeno anaza nehie. ⁹Jisasi'ma ana ne'mofo kema nentahino'a tusi'a antri nehuno, rukrahe huno avariri'za vu'naza vaheku anage huno zmasami'ne. Magore hu'na Israeli vahepina amanahu amentintine vahera onketfa hu'noe. ¹⁰Huzmantege'za e'naza vahe'mo'za rukrahe hu'za nontega ome kazana, ana kazokzo eri'za ne'mo knamreno mani'nege'za ome ke'naze.

Kento a'mofo nemofo azeri oti'nea naneke

¹¹Anama huteno henka Jisasi'a Nainie nehaza rankumate amage'ma nentaza disaipol naga'ane nevig'e'za, tusi'a veamo'za avariri'za magoka vu'naze. ¹²Ana kuma kasante nevigeno, mago fri'nea nera eri'za atirami'zma e'naze. Ana a'mofona magoke mofavregino, kento'a mani'negeno ana kumapi tusi'a vahe krefamo'za ana a'enena e'naze. ¹³Ramo ana a'ma ome negeno'a asunku hunenteno, zavira oto nehuno, ¹⁴anante eno sesenku'are ome avako nehigeza, zafa hu'za nevaza vahe'mo'za anante oti'naze. Jisasi'a anage hu'ne, nehazavemoka Nagra otio hu'na kagrikura nehue! ¹⁵Anama fri'nea ne'mo otino nemnino, agafa huno keaga nehigeno, Jisasi'a ana nera avazuhuno nererana ami'ne. ¹⁶Tusi koro nehu'za Anumzamofa agi erisaga hu'za anage hu'naze. Agatererfa kasnampa ne' amu'nontifina efore nehigeno! Anumzamo'a

Agra'a vahe'a eno zamaza nehie hu'naze! ¹⁷Ama anazama Jisasi'ma hiazamofa agenkem'o'a maka Judiane mika megaginea kumatmipina vuno eno hu'ne.

Joni'a tare amage'ma nenta'a ne'trena huznantegeke
Jisasinte vuna'a naneke
(Mat 11:2-19)

¹⁸Mono ti frente Jonima amage'ma nentaza disaipol nagamo'za makazama Jisasi'ma hu'neazamofa agenke'a ome Jonina asamizageno, tare amage'manenta'a disaipol ne'tre kehuno, ¹⁹Jisasi ome antahige'ogu huznanteno, Kagra egahiema hu'nea ne Mesaiaga tazama hunka taguvazi ne'pi, Rumofonku avega antegahuno? ²⁰Higeno ana netremoke e'ne anage hu'ne Jisasina asami'na'e. Mono ti fre Joni'a amanage huno hurantegeta kantahigenaku neo'e. Kagra egahiema higeta avegama ante'nona tazahu ne' Mesaiagafi, rumofonku avega antegahuno? ²¹Anakna fatgorera hakare rumofa rumofa kri eri'naza vea Jisasi'a zamazeri so'e nehuno, havi avamutmi zmagu'afinti hunezmanteno, rama'a zmurga asu hu'nea vahera zmazeri hari huzmante'ne. ²²Ana huteno anage huno kenona zanirera, znasami'ne, vuta nazano negeta nentahita ha'azana Jonina ome asami'o, zamavu asu hu'nea vahe'mo'za hari nehazageno, zmagia haviza hu'namo'za zmagia refatgo nehazageno, fogu kri erinaza vahera neganamrazageno, zmagesa ankanire vahe'mo'za nentahizageno, fri vahe'mo'za onetizageno, zamunte omne vahe'pina knare musenkea huama nehie. ²³Hanki iza'o Nagri'ma ha'ma reonantesimo'a muse hugahie. ²⁴Joninkema eri'ne e'na'a netremokea vutakeno, Jisasi'a agafa huno tusi'a veapi Joninku huno, ka'ma kopima vu'nazana na'a kenaku vu'naze? Jaho'mo hakema eri tagosi hu'nea zampi? I'o. ²⁵Hianagi Na'a ome kenaku vu'naze? Fru fru huno konariri'ane kukena hu'nea vahe ome kenafi? I'o, knare konariri'ane kukenama hu'za, so'e zampima nemaniza vahera, kini vahe nomp nemanize! ²⁶Hianagi na'a ome kenaku vu'naze? Kasnampa nepi? Izo tamage hu'na nerasmue. Ana ne'mo mika kasnampa vahera zmagatere'ne. ²⁷E'i ana nekura avontafepina amanage huno krente'ne, *Ko, nagri ke erino vu vahera, huntogeno ugagota huganteno neviankino, agra kana variganteno vugahie.* (Mal 3:1)

²⁸Nagra neramasamue, a'nemo'za kase zmante'nafintira mago'mo'e huno Jonina agatere'nea nera omni'ne, ana nehigeno Anumzamofa Kumapina osi hu'nemo, agrira agetere'ne. ²⁹Maka vahe'mozane havige hu'za takesi zgo eneriza vahe'mo'zanena ana nanekema nentahiza, Anumzamofa avu'avazamo'a fatgo hu'ne hu'naze. Na'ankure Joni'ma mono tifle zmantene'gu ana hu'naze. ³⁰Hianagi Farisi mono vahe'mozane, kasegere ugagota hu'naza vahe'mo'za, Anumzamo'ma zamagri'ma mzaza hunaku retro hu'neazana zmefi humi'naze. Na'ankure zamagrira Joni'a

mono tina fre ozmante'ne. ³¹Hagi na'ante huntena ama knafi vahe'mofo avu'avazankura avame kea hugahue. Zamagra nankna hu'naze hu'na hanue? ³²Zamagra mofavre'ramimo'za maketi kumapi mani'ne'za kehugantigama hiaza nehaze. *Tagra konke tafe ronanagi, tamagra avoa noraze, zavite zgame hunanagi zavira notaze.* ³³Na'ankure mono tifrente Joni eno, bretine waini tine nonegetma, tamagra hutma havi avamu agripi mni'ne hu'naze. ³⁴Vahe'mofo Mofavremo eno ne'zane tine nenegetma, tamagra hutma, keho ne'za nevava nehuno, waini ti neneno, takesi zago eneriza vahe ene kumi vahe'ene raru huno nemanie nehaze! ³⁵Hianagi knare antahintahizana Agri'ma avaririza vahepi eriamaneh.

Kumike a'mo avununu ene masavenu ene Jisasi agare frente'nea naneke

³⁶Mago Farisi ne'mo, Jisasi ne'za agrane ome nesniegu agi higeno vu'ne. Farisi ne'mofo noma'afi ne'zane trate aza tununte anteno mni'ne. ³⁷Anante ana kumateti mago kumi a'mo, Farisi ne'mofo nompi Jisasima nezama nene kema nentahino, mago mananentake masave aravasta have tafempi me'negeno erino eno, ³⁸amefiga'a agare emaniteno, zavi neteno avunuteti agia sese nehuno, azokanu eri ho'mu nehuno, agia antako nehuno, mana nentake masave tagino agare frente'ne. ³⁹Hagi Jisasima ke higeno e'nea Farisi ne'mo anazana negeno, amanage huno agu'afina agesa antahi'ne, ama kasnampa ne'ma mni'neresina, kumi' hu'nea a'mo avako Agrira nehiankino, agafa'a keno antahino nehuno kumi are huno hisine. ⁴⁰Jisasi'a Saimoni antahintahia negeno kenona'a huno, naneke kasminaku nehue higeno, Saimoni'a huno, knareki Rempi hurami ne'moka amne kea huo. ⁴¹Magora nofihu zago netrea ne'mo'a, tare ne'tre zgoa zname. Magomo'a 500ti zgo nofi huno erigeno, mago'mo'a 5fu'a zota erine. ⁴²Hanki ana zgomofo nona'a hu'ne amiga osakeno, knareki atre'o, huno huznante'ne. Iza agtereno ana zgoma nofitema netrea nekura avesinenteno tusi musena huntegahie? ⁴³Saimoni'a kenona anage hu'ne, nagesama antahuana rama'a zgoma nofi'ma hu'nemo'e. Higeno Jisasi'a huno, tamage hufatgo hunka hane. ⁴⁴Anante rukrehe huno ana ara negeno, Saimoninku huno, kagra ama'i ara negano? Nagra nonka'afi emarerugenka nagia sese hanua tina afi onami'nane. Hianagi ko, ama a'mo'a avunuteti nagia sese nehuno, azokateti erihomu hunante'ne. ⁴⁵Kagra nonka'afi enefrogenka nantako hunka onavre'nane. Hianagi nonka'afi efreogatira ama amo'a agafa huno nagiamofona antako huvava hu'ne. ⁴⁶Kagra masavena taginka nanumpina freonante'nane. Hianagi ama a'mo mananentake masevena tagino nagiamofona masavena frenante'ne. ⁴⁷E'ina agafare Saimoniga anage kagriku nehue, rama'a kumi ama amo hu'nege'na eri atrentogeno rama'azampi avesinenante. Hianagi osi'a kumi'ma atrente'nomo'a osi'a avesinenante. ⁴⁸Ana huteno Jisasi'a ana a'ku anage huno asami'ne, kumika'a eritregantoe. ⁴⁹Hianagi trate'ma

agrane zmaza tununte ante'za mani'namo'za, zamagra'a anage hu'naze. Iza'e ama nera, kumi'ma erinetreana? ⁵⁰Jisasi amanage huno ana ara asmi'ne, kamentintimo kaguvazianki, krimpa frune vuo.

Mago'a a'nemo'za Jisasina aza hu'naza naneke

8 ¹Mago'agna evutegeneno Jisasi'a rankuma tamimpine, osi kuma tamimpi vano nehuno, Knare Musenkea rempi hunezamino, Anumzamofu Kumamofu kea huama nehigeno, 12fu'a amagama nentaza disaipol nagamo'za magoka vano hu'naze. ²Hagi mago'a, havi avamu mni'negeno eri atrezmante'nea a'nene, krizimifinti zamazeri so'e hu'nea a'nene vu'naze. Anampina Makdala kumateti Meri'e nehaza a' 7ni'a havi avamu hufegi atre'nea a'ki, ³Joana Kusa nenaro'e (Heroti eri'za vahe'mofu kva nere) Susana ene, mago'a rama'a a'nema zamagra'a fenozampinti Jisasima azama nehaza a'nene vu'naze.

Mago ne'mo avimaza rurani'nea fronka naneke

(Mat 13:1-23, Mak 4:1-20)

⁴Tusi'a vahe krefamo'za eritru hu'za mani'nageno, mago'a ranra kumateti veamo'za Jisasinte azageno, amanage huno fronka kea zamasmine. ⁵Hozafi avimza rurani ne'mo'a, avimaza rurano nevigeno, mago'a avimzamo'a kampi evuramigeno rentroko hazageno, namamo eme ne'ne. ⁶Mago'a avimzamo'a have mopafi evuramino hage'ne, hianagi tima'a omnenehu huno amagino osapa re'ne. ⁷Hanki mago'a avimzamo'a ave'ave trazampi evuramino ave'ave trazane magoka hageno mrerigeno, ave'ave trazamo hageno ki rentrako hu'ne. ⁸Hanki mago'a rima'ane mopafi evuramino hageno 100ti'a raga'a agatereno rente'ne. Anage huteno ranke huno, iza'o agesama me'nenigeno'a ama nanekema antahisimo'a antahise hino!

⁹Amage'ma nentaza disaipol naga'amo'za, ana fronka kemofu agafa'agu, nankna agu'agesa me'ne hu'za Jisasina antahige'naze. ¹⁰Agra anage huno zmasamine, tamagra Anumzamofu kumapi oku'azana nentahize. Hianagi mago'amo'za fronka kege nentahize. Ana nehu'za, *kegahazanagi onkegahaze, antahigahazanagi antahise huza agafa'a antahi amara osugahaze.* (Aisa 6:9-10)

¹¹Ana fronka kemofu agafa'a amanahu me'ne. Ana avimazana Anumzamofu ke me'ne. ¹²Hanki mago'a avimaza kamofu ankinare evurami'neana, Anumzamofu kema antahinaze. Hianagi aru zamentinti nehu'za so'e hu'za mni'zanku, Sata'a eno zamagu'afinti ana kea emeri atre'ne. ¹³Hanki mago'a avimazana havege mopafi evurami'neana, Anumzamofu kema nentahi'za muse huza eri'nazanagi, rafuna ore'naze. Osi'a knafi zmentinti nehu'za, rezmatga'zama ege'za traka hu'za atre'za nevaze. ¹⁴Hagi ave'ave trazampima evurami'nea avimzana, Anumzamofu

kea antahi'naze. Hianagi zamavufamofa zavamesi zankuke nehu'za, mopafi zanku antahintahi hakare nehu'za, fenoma eri'za mni'zazmima eri so'e hanaza zankuke antahintahi hakare nehazageno, anazamo kintrako hige'za, rga renontaze. ¹⁵Hianagi tima'ane mopafima rurani'nea avimzana, Anumzamofa kea e'i anamo'za antahite'za azeri antrako hu'za, tamage hu'za fatgo zmarimpareti nena raga'a rente'za kazigazi hu'za nevaze.

Tavi'ma rekrū nehaza zamofa naneke

(Mak 4:21-25)

¹⁶Mago vahe'mo'e huno tavira rekrū huno, kavofi runkni rentege, sipa kampina antege nosaze. Hianagi tavira amate ante'nazageno remsa hu'negeno, nompima efraza vahe'mo'za negaze. ¹⁷Na'ankure mago'zamo'a fraoki'nigeno, oku'ama me'nesiazamo'a magore huno frara kino omne'nenige'za onkegahaze. Hanki eama masare hanige'za maka vahe'mo'za kegahaze. ¹⁸Ana hu'negu kva hu'neta antahi ankereho, iza'o mago'ama eri'nenimofona mago'ane amigahie. Hianagi iza'o e'orinenimofona, eri'noe huno agesama antahisiam'a, anama'a hanare vga regahie.

Jisasi'a nererane afuheinku'ene hu'nea naneke

(Mat 12:46-50, Mak 3:31-35)

¹⁹Jisasi'a nerera'ene agnahe'zane agritega e'naze, hianagi zamagra tvaoma'arera ovu'naze. Na'ankure tusi'a vea mani'nazageno'e. ²⁰Ana higeno Jisaina asami'za, negarera'ene kaganahe'za kavega ante'za megia' otine'za kagenaku nehaze hu'za asami'naze. ²¹Hianagi kenona zimirera anage huno zmasami'ne, nenrera ene naganaha'za, Anumzamofa ke'ma antahi'za amage'ma nentamo'za mani'naze.

Hagerimo kranto kranto nehigeno Jisasi ke higeno

rurava he'nea naneke

(Mat 8:23-27, Mak 4:35-41)

²²Mago zupa Jisasi'a amage'ma nentaza disaipol naga'ane ventifi mrenerino anage huno zmasami'ne, timofo kantu kaziga vanune hige'za vu'naze. ²³Ana hu'za nevazageno, Jisasi'a avu mase'negeno, tusi'a zaho'mo eramino timofona eri kranto kranto nehuno, ventefi mrrerino erinakriza nehige'za zmagogofene. ²⁴Zamagra Jisasi'a eme azeri oti'za anage hu'naze. Ramoke, Ramoke, tagra tinakrita fri'za nehune hazageno, Jisasi'a otino zahoku'ene kranto kranto nehia timofona kesigeno, timo'a rurava he'ne. ²⁵Anante Jisasi'a anage huno amage'ma nentaza disaipol nagakura zmasami'ne, tamentintia iga me'ne? Hianagi zamagra zmagogo nefege'za antri nehu'za, zamagra zamagra anage hu'naze. Iza'e ama nera Agra tine zahomofonku enena ke higeno amagera nenta'e?

**Mago negi ne'mofo agu'afinti Jisasi havi avamutmi
huzmante'nea naneke
(Mat 8:28-34, Mak 5:1-20)**

²⁶ Ana hutege'za zamagra venti eriza Geres a mopafi kantu kaziga Galili timofona vu'naze. ²⁷ Anante uhnati'zageno Jisasi'ma ventefinti takau reno uneramigeno, ana kumateti mago nera havi avamu'mo agu'afi fre'nea ne'mo eme tutagiha hunte'ne. Ana ne'mo'a zaza knafi kukena'a nosuno, nompina omanine. Hianagi vahe asenentaza havegampi nemniane. ²⁸ Ana nemo Jisasima negeno'a, avuga eme traka humaseno, ranke huno anage hu'ne, Jisasiga Mrerisa Anumzamofa mofavremoka nataro! Keke hugantoanki nazeri havizana osuo! ²⁹ Na'ankure Jisasi'a ko ana agru osu havi avamukura ana nemofona atrenka atiramio huno hanave ke hunte'ne'geno'e. Ana havi avamumo rama'a zupa retufenetregeno, ana kumate vahe'mo'za agiare azante seni nofinu anakinte'za kavagri'za mani'nazane. Hianagi ana ne'mo'a, nofira rukno hunetregeno, havi avamumo'a avreno ka'ma kotamimpi vu'ne. ³⁰ Anante Jisasi'a anage huno antahige'ne, Kagika'a izage? Ana ne'mo anage hu'ne. Nagini'a hakare'mone. Na'ankure rama'a havi avamu agu'afina maninegu hu'ne. ³¹ Ana agru osu havi avamumo'za hu'za, keke hugantonanki hanave kea hurantegeta ro'a omane kerifina ovamneno hu'za hu'naze. ³² Hagi rama'a afutamimo'a agonamofa asoparega ne'za nene'za mani'nageno, havi avamumo'za zamatresige'za vnagu Jisasina keke hunte'za, tataregeta antu afu tamimofa zmaguafi uframneno hu'za antahigageno, knareki viho huno huzmante'ne. ³³ Hanki havi avamumo'za ana ne'mofo agu'afinti atirami'za afu'mokizmi zmagu'afi ufrage'za, agonaregati zmagare'za zavateti tirupi takauramiza ti nakri'za fri'naze.

³⁴ Afu kva vahe'mo'za anazama fore hiaza nege'za, koro fre'za ra kumate'ene osi kumate'ene vu'za, anama fore hiazamofa kea ome zmasami'naze. ³⁵ Anazama hiazanku vahe'mo'za ome kenaku Jisasinte e'naze. Zamagrama eme kazana, havi avamuma atirami'nea nera Jisasi agafi kukena huno knare antahintahi erino maninege'za eme nege'za koro hu'naze. ³⁶ Anazama fore hige'za ke'naza vahe'mo'za, inaknahuno ana havi avamuma agu'ama fre'nea nera azeri so'e hunte'ne. Ana agenkea onke'namokizmi zmasami'naze. ³⁷ Anante maka Gesarin vahe'mo'zane, ana kaziga mani'naza vahe'mo'za hanavetiza, tatrenka vuo hu'naze. Na'ankure zamagra tusi zmano vazige'ze. Ana hazageno Jisasi'a ventefi marerino zmatreno ete vu'ne. ³⁸ Havi avamu'mo'za atirami'nea ne'mo atresigeno avaririno vanigu antahige'ne. Hianagi Jisasi'a ana nera hunenteno anage hu'ne. ³⁹ Kuma ka'arega ete vunka, Anumzamo'ma huganteazana vaheka'a ome zmasamio huno Jisasi hiazanku, rukrehe huno ran kumapi nevuno, maka vahera knare'za huno azeri so'ema hunte'neazana huama huno zmasamino vu'ne.

**Jisasi'a kva ne'mofo mofa fri'nefinti azeri otinaku nevuno korankri
eri'nea a'mofo eri so'e hunte'nea naneke
(Mat 9:18-26, Mak 5:21-43)**

⁴⁰Anantegatima ete Jisasima egeno'a, tusi'a veamo'za muse hu'za avre'naze. Na'ankure zamagra avega ante'za mani'nazaretire. ⁴¹Anante Jairusi'e nehaza ne'mo osi mono nomofo kva nekino, Jisasi agiafi eme rena reno noma'afima esigu tutu huno antahige'ne. ⁴²Na'ankure 12fu'a kafunaza hu'nea magoke mofa'amo, fri'za nehigeno hu'ne.

Jisasi'ma kantegama nevigeno, hakare vea'mo'za oretufe aretufe hu'za vu'naze. ⁴³Anampina mago ara 12fu'a kafu zgefi korankria eri'nea a' mani'ne. Hianagi mago vahe'mo'e huno ana ara azeri so'e osu'ne. ⁴⁴Ana a'mo Jisasi'na amefigati zaza kena'amofa atumpare eme avako higeno, ana korankrimo'a ame huno vgarente'ne. ⁴⁵Anante Jisasi'a zmantahigeno, iza navako hu'ne? Hige'za zamagra onke'none hu'za hazegeno, Pita'a huno kva nimoka, tusi'a vahekrefamo'za rugagagiza kavate reutrako hu'naze. ⁴⁶Hianagi Jisasi'a anage hu'ne, magomo navako hu'ne, na'ankure Nagripintira mago'a hanave'nimo'a natreno vu'negena nehue. ⁴⁷Ana a'mo'ma keno antahinoma hiana, frakigama nosuno'a ahirahi neregeno avuga eme traka humaseno, eme avako higeno, kri'amoma ame huno vgarente'nea kea maka vahe zmasami'ne. ⁴⁸Anante Jisasi'a anage huno ana ara asami'ne, Mofamoke, kamentintimo kazeri so'e hianki krimpa frune vuo. ⁴⁹Jisasi anagama nehigeno, mago ne'mo osi mono nomofo kava ne' Jairus nontegati eno, anage huno eme asami'ne. Mofa kamo'a fri'neanki mago'anena, Rempima hurami nera kna omio. ⁵⁰Hianagi Jisasi' ananke nentahino, anage huno kenona hu'ne. Kagra korora osuo, kamentinti hugeno ana mofamo'a knamareno manino. ⁵¹Hanki nonte'ma eteno'a mago'a vahera zmatrege'za uofre'naze. Hanki Pitane, Jonine, Jemisine ana mofamofa nefane nererane ke hige'za zamagrake uofre'naze. ⁵²Anampina maka zamagra zavi nete'za tusi krafa ana mofaku nehazageno Jisasi'a anage hu'ne, ofri amne mase'neanki zavira oteho. ⁵³Ana veamo'za agiza re'naze. Na'ankure ana mofamo'a frinege'za ke'nazagure. ⁵⁴Hianagi Jisasi'a akoheno azante azeri otino anage hu'ne, Mofavre'moka otio. ⁵⁵Ana mofamofa agu amemo ete agu'afi efregeno, ame huno otigeno, neza aminkeno neno huno zmasami'ne. ⁵⁶Ana mofa'mofa nerera'ene nefakea antri nehakeno, amama huazana vahera ozmasamitfa hi'o huno znasami'ne.

**Jisasi'a 12fu'a Aposol naga'a huzmante'nea naneke
(Mat 10:5-15, Mak 6:7-13)**

9 ¹Jisasi'ma 12fu'a amage'ma nentaza disaipol naga'a ke hutruma huteno maka havi avamu ene krinema eritresaza hanavene

hihamune zami'ne. ²Hanki Anumzamofu Kumamofu huama nehu'za, kri vahe zmazeri knamarehogu huzmante'ne. ³Agra anage huno zmasami'ne, mago zantfane hutma erineta oviho. Azompafi kupi bretifi zgofi tare kukena erinetma oviho. ⁴Mago kumate'ma vutma mago nompima umrerinutma, ana nonte manineta, atreta vunakuma hanutma, atretma rankumara viho. ⁵Inaregama vanagenoma vahe'mo'za ontamaresnageta, ana kumateti atreta vukuma hanuta, tmagiareti kugusopa rupopo hunetretma vinkeno, ana avu'avazama hanaza zamo'a hazenkefi manize hugahie. ⁶Hanki anage'ma hutege'za, atre'za kumatamimpi vu'za eza nehu'za, knare musenke huama nehu'za, hakare kaziga kri vahera zmazeri knamare'naze.

Heroti'a Jisasi agenke nentahino hakare agha antahi'nea naneke
(*Mat 14:1-2, Mak 6:14-29*)

⁷Ana knafi Heroti'a rankva ne'mo, ana makaza fore hu'neazamofu agenke'a nentahino, antahintahi hakare hu'ne. Na'ankure mago'a vahe'mo'za mono ti frezamante Joni frinefinti oti'ne nehazageno, ⁸mago'amo'za Ilaija efore hie nehazageno, mago'amo'za mago korapa kasnampa ne' fri'nefinti oti'ne hu'naze. ⁹Heroti'a anage hu'ne, nagra Jonina ko agha akafri'noanagi, iza e'inahuzana nehige'na agenke'a nentahue? Anage nehuno, Herotia Jisasina kenaku hu'ne.

Jisasi'a 5 tauseni'a vea ne'za zami'nea naneke
(*Mat 14:13-21, Mak 6:30-44, Jon 6:1-14*)

¹⁰Aposolo nagamo'za vu'nazaregati ete ehnatiza, eri'zama eri'naza zamofu kea mika Jisasina eme asmi vgare'naze. Anante zamagriki zmarege'za anampinti atre'za Betsaide nehaza kumate vu'naze. ¹¹Hianagi tusi'a vahe krerfamo'za Jisasi'ma vu'ne kema nentahiza avaririza vu'naze. Agra muse huno nezamavreno, Anumzamofu kumamofu ke huama huno nezmasamino, krizmima eri atrenogu'ma zmesi'nea vahe'mokizmi kria zmazeri knamre'ne. ¹²Hanki kinagaseno hanima hu'za hiazanku, 12fu'a aposel nagamo'za e'za Jisasina eme asami'naze. Ama vahe krefa huzmantege'za tva'onte kuma tamimpina vu'za e'za hu'za mase nonku'ene, ne'za zimigu'ene ome hakreho. Na'ankure vahe omani kokampi mani'none. ¹³Hianagi Jisasi'a anage huno zmasami'ne, tamagra nezana zaminke'za neho. Zamagra kenona hu'za, tagra rama'a nezana e'orinonanki, 5fu'a bretigi tare nozamegi huta eri'none. ¹⁴Anampina 5 tauseni'a venene mni'naze. (Anampina a'nene mofavreramina ohamprine) Anante Jisasi'a amage'ma nentaza disaipol nagaku huzmanteno, zmasaminke'za 50ti'a refko hu'za mago mago kevufina manitere hiho. ¹⁵Anama Jisasi'ma zmasamiaza hu'za amagama nentaza disaipol nagamo'za, ana maka vahera zmazeri atru hutere hige'za

mani'naze. ¹⁶Jisasi'a 5fu'a Bretine tare noza'ene erino, monafi kesga huno negeno, Anumzamofu susu hunteteno, ana Bretiramina eritamanasi zamizmi nehige'za, ana amagama nentaza disaipol nagamo'za eri'zami'naze. ¹⁷Ana mikomo'za nazageno zamuma hutege'za, meama'a eritru hu'za 12fu'a eka eka kupi eriri'naze.

Pita'a Jisasi agafa'a huama hu'nea naneke

(Mat 16:13-19, Mak 8:27-29)

¹⁸Mago zupa agraku Jisasi'a nunamu nehigeno, amagama nentaza disaipol nagamo'za, tv'a'onte mani'nazageno anage huno zmantahige'ne, Nagrikura veamo'za iza'e hu'za neheze? ¹⁹Zamagra kenona'a anage hu'za hu'naze, Ti frente Joni'e hu'za mago'amo'za nehazageno, mago'amo'za Ilaija'e nehazageno, mago'amo'a korapa kasnampa ne' frinefinti oti'negahie hu'za nehaze. ²⁰Jisasi'a amanage huno zmantahige'ne. Hianagi tamagra iza'e hutma Nagrikura nehaze? Pita'a ana kenona huno, Kagra Anumzamofu hugantegenka (tahoke henka tagu'vazine e'nana) Kraisige.

Jisasi'a friteno otisiazamofu naneke

(Mat 16:20-28, Mak 8:30-9:1)

²¹Hianagi Jisasi'a amana kea mago vahere hutma ozmasmitfa hiho huno hunezmante'no, ²²anage hu'ne, Vahe'mofu mofavremo'a ruzahu ruzahu knazampi unefresigeno, mono kva vahe'mozane, ugagota prisi vahe'mo'zane, kasegere ugota hu'naza vahe'moza, zmefi humiza ahesageno friteno, tagufa knare otigahie.

²³Anante Jisasi'a ana maka'mokizmigu anage huno zmasami'ne, iza'o namage'ma antenaku'ma hanimo'a, agra'agura age'neknino maka knafina keka zafa'a erino navaririgahie. ²⁴Na'ankure iza'o asimua'eriso'e hu'naku hanimo'a, asimua'atregahie. Hagi iza'o Nagriku huno asimua'atresimo'a, asimua'erigahie. ²⁵Mago vahe'moma ama mopafi zankuke nehuno, agra'a agu'amema atresiana, nankna so'eza'erigahie. ²⁶Iza'o nagriku'ene keniagu'ene agazema hunante'simofona, Vahe'mofu Mofavremo'ma Agra'a masa'afine, Nefa masa'afine ruotge ankeru vahe zgamofu masafinema esuno'a agrira eme agaze huntegahie. ²⁷Hianagi Nagra tamage hu'na neramasamue, amama otinazafintira, mago'amatma ofrinetma Anumzamofu kumara kegahaze.

Jisasi avufamo masanentake hu'nea naneke

(Mat 17:1-8, Mak 9:2-8)

²⁸Anagama Jisasima huteno, 8ti'a kna evutegeni, Pitama, Jonima, Jemisima, huno nezamavreno, agonarega nunamu hunaku vu'naze.

²⁹Nunamuma ome nehigeno, avugosamo'a ruzahu higeno, kukena

zamagra ana nanekemofa agu'agesa'a antahi ama osu'za, azeri akona osu'naze. Ana nehu'za ana kegura koro hu'za antahi onke'naze.

Iza ra vahe manigahie hu'nea naneke

(Mat 18:1-5, Mak 9:33-37)

⁴⁶Jisasima amage nentaza disaipol nagamo'za, agafa hu'za iza rana manigahie hu'za zamagra zamagra hu'naze. ⁴⁷Hianagi Jisasi'a zamagu'afi nezmageno, osi mofavre avazu huno eme azeri o'netino, ⁴⁸anage huno zmasami'ne, Iza'o ama mofavrema Nagri Nagifi avreno azeri so'ema huntesimo'a, Nagri navreno nazeri so'e hunantegahie. Iza'o Nagrima naveresimo'a, hunantegenana e'nomofa avaregahie. Na'ankure iza'o amuno tamifi anteramino manisimo'a, maka'motma tmagatereno ra vahe manigahie.

Ha'ma reoramante'samo'za tamagri vahe mani'nea naneke

(Mak 9:38)

⁴⁹Joni'a kenona anage hu'ne, Kva nemoka, negonkeno Kagri kagifi, mago ne'mo havi avamura hunetregeta anara osuo huta i'o hunte'none. Na'ankure agra kamagera anteno tagranena vano nosigu hu'none. ⁵⁰Hianagi Jisasi'a anage huno zmasami'ne, tamagra i'o huonteho. Na'ankure tamagrama ha'ma reormantesamo'za, tamagri vahe mani'naze.

Jisasi'a amagama nentaza naga'ane Jerusale vu'nea naneke

⁵¹Agrama monafima marerisia knamo tva'oma nehigeno, Jisasi'a Jerusale kumate vunaku hanave agesa antahi'ne. ⁵²Agra mago'a ke eriza vugotahu vahe huzmante'ne. Zamagra Samaria kumate nevnu'za, mago'azana ko ome retro hu'nenageno vunaku huzmante'ne. ⁵³Hianagi anampi vahe'mo'za ozamavre'naze. Na'ankure Agra Jerusale vunaku hu'negeze. ⁵⁴Ozamavre'nage'ne amagama nentaza disaipol naga'afinti Jemisike Jonike nentahike amanage hu'ne Jisasi antahige'na'e, Ramoka tagra ha'manena monafinti tevemo eramino zamaresniegu nehano? ⁵⁵Hianagi Jisasi'a rukrahe huno ke'znasutege'za, ⁵⁶ana kumara atre'za ru kumatega vu'naze.

Jisasi'a amage antesaza zanku hu'nea naneke

⁵⁷Kantega zamagrama nevzageno, mago vahe'mo Jisasinku huno inantegama vnantega nagra kamage' ante'na vugahue. ⁵⁸Jisasi'a anage huno asami'ne, afi' kramokizmia nozimia mopagampi me'negeno, monafi namamofona nozamia me'ne. Hianagi Vahe'mofa Mofavre'mofona anu anteharege huno mase'za omane'ne. ⁵⁹Jisasi'a magomofonku huno, enka namage emento. Hianagi agra ke'nona huno, Ramoka kotazana, natregena vuna nenfana ome asenteteno. ⁶⁰Hianagi Jisasi'a huno,

atregeno fri vahe'mo'za, fri vahera asezmanteho. Hianagi kagra vunka Anumzamofu kumaku ome huama huo huno asami'ne. ⁶¹Mago'mo enena anage huno asami'ne, Ramoka naganena kamage antegahue. Hianagi natrege'na nonirega vuna nagani'a ome huso'e huzmantetena, ena kamage emeantaneno higeno, ⁶²Jisasi'a anage huno asmi'ne, mago'moma hozama erino nevuno, rukrehe rukrehe huno vanimo'a, Anumzamofu Kumapina vugara osu'ne.

Jisasi'a 72'a vahe huzmantenea naneke

10 ¹Ama anazama huteno, Ramo'a 72'a vahe huhampri zmanteno, Agra'ama vunaku'ma hia rankuma ene maka osi kuma tamimpi, ugot'e'za vihogu tare tare huzmantetere hu'ne. ²Jisasi'a anage huno zmasami'ne, hozafina rama'a ne'zamo'a nena huno meanagi, hoza vasage vahe'mo'za osi'a mani'naze. E'ina hu'ne'gu nunamu hutma hozamofu Nefa antahigenkeno, eriza vahera huntkeno hoza ome vasageno. ³Tamagra viho! Hianagi antahiho, sipsipi afu anenta naga, afi' kra nagamofu amunompi huzmanteanakna hu'na huneramantoe. ⁴Tamagra zagoma eriri kura erita ovutma, kura erita ovutma, tmagamofu anona e'ori nevutma, kantegama vahe'ma zmagesuta huso'e sa'e huo zmanteho. ⁵Ina nompima ufresuta ese'zana ama nompina, Anumzamofu rimpa fruzamo mesie hutma ome hiho. ⁶Ana nomofu nefama rimpa fru ne'ma mni'nesnigeno'a, tamagri tamarimpa fruzamo'a, agrite megahie. Hianagi rimpa frune vahe'ma omni'nenkeno'a, ana asomu kemo rukrehe huno ete tamagrite egahie. ⁷Anama vnaza nompia umaninetma nazanoma tamisazana nenetma tina neho. Na'ankure eriza vahe'mo'a mizama'a e'nerie. Ru nontamimpina vutma etma osiho. ⁸Rankumate nevnageno vahe'mo'za tamavrente'za, neza retroma huramantesa zana neho. ⁹Ana kumate kri erinesaza vahera krizmia zmazeri so'e nehutma, anage hutma zmasamiho. Anumzamofu kumamo'a tmagrite erava'o nehie hiho! ¹⁰Hianagi ina kumatema vnagenoma vahe'mo'za otamavresagetma, atretma ana kuma kampi nevanutma anage hiho. ¹¹Tamagri kumate kugusopa tagia agusareti rupopo hutrona zamo'enena, Anumzamofu ha' renermante nehie. Hianagi antahiho, Anumzamofu kumamo'a ko tamagrite e'ne. ¹²Antahiho, Nagra anage hu'na neramasamue. Anumzamofu ma refko hania knazupa, Sodomu kumate vahe'mo'zama erisaza knazana, tamagra ageteretma ra knaza erigahaze.

Korasine Betsaida kumate vahe'mo'za kea ontahi'naza naneke (Mat 11:20-24)

¹³Nasunku hurmantoe Korasin vahe'mota! Nasunku hurmantoe Betsaida vahe'mota! Na'ankure kaguvazama tamagripi hu'nozana, Taiane Saidoni kumate huasina, ko zmasunku kukena nehu'za, tanefa fre'za

zmasunku hu'za zmagua'a rukrehe hazasine. ¹⁴Hianagi Anumzamoma vahema refkoma hania knazupa, Taia vahe'mo'zane Saidoni vahe'mozanema erisaza knazana, tamagra agatereta ranknaza erigahaze. ¹⁵Tamagra Kapaniamu kumate vahe'mota monafi marerigahazafi? A'o, tamavretresigetma fri vahe kumapi (Hedes) vugahaze. ¹⁶Anante Jisasi'a disaipol nagakura anage huno zmasamine, Iza'o tamagri kema antahi tamamisamo'za, Nagri ke antahi namigahaze. Iza'o tamagrima tmatresamo'za Nagri natregahaze. Hagi Nagrima natresimo'a hunantege'na e'nomofa atregahie.

72'a eri'za vahe' mo'za rukrahe' hu'za e'naza naneke

¹⁷Henka 72'a vahe'mo'za huzmantege'za vute'za ete muse hume neza, anage eme hu'naze. Ramoka havi avamumo'zanena Kagri kagifi hunezmantonke'za ketia amage ante'naze! ¹⁸Jisasi'a ana kezmirera anage hu'ne, Sata'a monafinti kopsinamo hiankna huno takauneregena ke'noe! ¹⁹Antahiho, Nagra osifavene ha' segintavene, rehapati hihamua neramina, ha' vahe'mokizmi mika hanavema azeri ageteresaza hanavea tami'noankino, mago'zamo tmazeri haviza osutfu hugahie. ²⁰Hianagi havi avamumo tagri ketia antahino amage antene hutma musena osiho. Hanki tamagri tmagima Anumzamo'ma monafi krente'neazanku musena hiho.

Jisasi'a Anumzamofa muse hunte'nea naneke
(*Mat 11:25-27, 13:16-17*)

²¹Ana zupage, Ruotge Avamumo azeri muse Jisasina higeno, anage huno hu'ne. Nafanimoka monane mopamofa Ramoka susu huna muse hugantoe. Na'ankure kagra amazama antahizane vahe'mofontera erifra nekinka, osi mofavre nagakna hu'naza nagate eri ama nehane. Izo, Nafanimoka ama'i kagrime kavesiaza hu'nane. ²²Jisasi'ma nunamu huvgamareteno agafa huno kea zmasami'ne. Nafanimoka makazana kegvalu hihamu namine. Mago vahe'mo'a, izane Nagrira ke'za antahiza osu'nazanki, Nefake antahine, Nefa'a iza'e, Nemofoke antahine. Nemofoma avesite zmvrea vahe'mokizmia, Nefana zamaveri nehie. ²³Anante Jisasi'a rukrehe huno amage'ma nentaza disaipol nagara zamagrike anage huno zmasami'ne, e'ima negazazama kesaza vahe'mokizmia asomu huzmantegahie. ²⁴Na'ankure anage hu'na neramasamue, korapara rama'a kasnampa vahe'mo'zane, kini vahe'mo'za e'ima negaza'zana kenaku hunazanagi, anazana oke'naze. Nentahizaza antahinaku hu'nazanagi ontahi'naze.

Sameria ne'mo ha' vahe'agu asuntgi'nea fronka naneke

²⁵Hagi mago ne'ra kasegere ugota hu'nea ne'mo otino, Jisasi rehenokanaku anage hu'ne. Rempu hurami nemoka, nankna hutena manivava

asimura erigahue? ²⁶Jisasi'a kenona'a anage huno asmine, Na'ane huno kasegefina krentene? Nankna hunka ana kasegemofu agu'agesa hamprinka kenka antahinka hunane? ²⁷Higeno ana kasegere ugagota hu'nea nemo'a kenona huno, **Anumzankamofona maka tumokareti'ene, kagu kamenteti'ene hanave kareti'ene, maka antahintahi kareti'ene avesinentenka, tva'onkare mni'nemofona, kagragu'ma kavemasinentanaza hunka, kavesinto.** (Diu-Kas 6:5, Lev-Pri 19:18)

²⁸Jisasi'a anage huno kenona'a asami'ne, Kagra fatgo hunka kenonana hananki, anama hana kema amage'ma antesunka kasimura erigahane.

²⁹Hianagi ana ne'mo, agra'a fatgo hu'noe hunaku anage huno Jisasina antahigene, tvaonte'ma nemniza nagakuma hanana inamokizmigiu hane? ³⁰Jisasi' kenona'a fronka ke huno, Mago ne'mo Jerusale kumateti Jeriko vunaku uneramigeno, kumzafa vahe'mo'za eme ahe'za kutuma'a nehanare'za, kuken'a eri vroro hutre'za ahetrageno fri'za huno nemasege'za, atre'za fre'naze. ³¹Mago prisi ne'mo ana kante uramino nevuno ana nera ome ke'ne. Hianagi ana nera eme agatereno magokazigati vu'ne. ³²Anahu kna huno Livae ne'mo'a eramino, eme keme agatereno vu'ne. ³³Hianagi magora Sameria ne'mo'a ana ne'ma masenea kantega ne-eno, eme negeno asuragi ante'ne. ³⁴Ana huteno ana nete eno, ahenaza avufga'are, masavene wainine tagino frenenteno anakintene. Ana huteno donki afu'amofu agumpi avrenteno, avreno miza seza nemasaza nomp'i ome anteno, ana kenege kegva hunte'ne. ³⁵Nanterana otino ana nomofu kva nera, tare silva zago nemino anage hu'ne. Nama'a zagoma atrenka mago'ane kegavama krintesanama'a, etenama esu'na atrenesanama'a eme miza segantegahue nehuno vu'ne. ³⁶Ana 3'a vahepintira ina ne'mo kagrama kagesama antahinana, anama kumazafa vahe'mo'za ahe'naza ne'mofona tva'onte neknara huno manigahie?

³⁷Kasegere ugota hu'nea ne'mo huno, asunkuma hunte'nea ne'mo'e higeno, vunka anahukna ome huo huno Jisasi'a hunte'ne.

Jisasi'a Matane Mariakizni no nantu vu'nea naneke

³⁸Jisasi'ene amage'ma nentaza disipol naga'ane kantega nevu'za, mago kumapi zamagra vazageno, Mata'e nehaza a'mo Jisasina agi hige'za noma'afi ufre'naze. ³⁹Matana nenunkna agi'a Meri'e hu'za nehaza a'kino, Ramofu agafi mani'nenno, kema hiana antahine. ⁴⁰Hianagi Mata'a ne'zama retromahu erizanku antahintahi hakare nehuno, Jisasinte eno anage hu'ne. Ramoka kagra nogano, nenanuknama natregena maka nezama nagrake'ma retroma nehuana? Huntegeno eme naza hino. ⁴¹Hianagi Ramo'a, kenona'a anage hu'ne, Mata, Mata, kagra antahintahi hakare maka'zanku nehunka antahigna nehane. ⁴²Hianagi magoke'zantfa razana me'ne, e'i anazana Meri'a hentofaza huhampriankino, anazana agripintira eri otregahaze.

Nunamuma huzamofa naneke

(Mat 6:9-13, 7:7-11)

11 ¹Mago zupa, Jisasi'a magokaziga manineno nunamu huvgaretegeno, amagemata nentea disaipol ne'mo anage huno ome antahigene. Ramoka nunamuma hu'zana, Joni'ma amagemata nentaza disaipol naga'ama huzami'neaza hunka rempi huramio huno antahigene. ²Agra anage huno zmasami'ne, nunamuma hanutma anage hiho, Tfatimoka Kagri Kagimo'a ruotge huno mesie. Kagri kumamo'a e'nie. ³Magoke magoke zge knafima nesuna nezana (bretia) neraminka, ⁴kumitia apaserantegeta, tagranena anazanke huta miko kumima hurantesamokizmia atrezmantamnenno. Hagi tatregeta reravataga zampina u'oframnenno.

⁵Anante Jisasi'a anage huno zmasami'ne, hagi magomoka roneka'amofontega kenage vunka, tagufa breti namitegena, henka nonahuna kamineno, ⁶na'ankure rone nimo'a afeteti eno emaninegena, neza amisuazana omanenegenata nehue hanankenno'a, ⁷nomofa agu'afinti ana ne'mo kenona anage hugahie. Ko kafa erigi'na mofavre'ni'ane, naganena tafete mase'nonanki, mago'zana eri onkamigahuanki eme nazeri oraotio hugahie. ⁸Nagra negasamue, nomofa agu'afima mani'nea ne'mo'a, arone'amo mani'neanagi otino agrira ne'za omigahie. Hianagi na'ankure kazikazima hania zanku avesinesiamata amigahie. ⁹Ana hu'negu negasamu'e, antahigegenata, anazana kamino, hakesunka, kenka eri fore hugahane. Kafante vagre vagre hugeno, kafamo'a anagi kantegahie. ¹⁰Na'ankure antahigazata vahe'mo'za e'nerize. Hakraza vahe'mo'za, keza eri fore nehaze, kafante vagre vagre hanamokizmia, kafana anagi zmantegahie. ¹¹Ina ne'mo amuno tamifinti, mofavre'amo'ma aganetenkeno nozamegu'ma antahigesigeno'a, nozamea omi osifavea amigahio? ¹²Hifi kokore amuku'ma antahigesigeno'a, amane segintave (Scorpion) amigahio? ¹³Hanki tamagra havizama nehzamota, tamagra antahinaze. Knare museza mofavretmia nezamize. Mago'ane monafi mani'nea Neramafata, Ruotge Avamuku'ma antahigazata vahera zamigahie!

Jisasine havi Avamumofa Belsebul naneke

(Mat 12:22-30, Mak 3:20-27)

¹⁴Mago zupa agerumata eritagne havi avamu mago ne'pinti Jisasi'a humegi atrene. Ana havi avamumata atineramigeno, kema nosia nemo'a agafa huno kea nehige'za, tusi'ata veamo'za antri hu'naze. ¹⁵Hianagi mago'amo'za hu'za, Belsebul, havi hankromofona, ugagota havi hankromofa hanavefi, Agra havi avamu hunente hu'naze. ¹⁶Mago'amo'za rehe'za kenaku, agafa hu'za monafinti mago avame'za huraveri huo hu'za hankavetizata antahige'naze. ¹⁷Hianagi Jisasi'ata antahintahizmia

negeno, anage huno zmasmi'ne, mago rankumo amu'nompinti refko huno ha' orente arente haniana, taregamoke haviza hugaha'e. Mago nOMPI nagamoma amu'nompinti refkoma hanuno'a traka huno haviza hugahie. ¹⁸Hagi Satama agra'a naga'ane amu'nompinti refko huno ha' orente arente haniana, nankna huno ana rankuma'amo'a oti hankavetigahie? Tamantahimanegoana, na'ankure tamagra hutma, Belsebul ugagota havi hankromofu hanavefi, havi hankrora hunente hazazanku nehue. ¹⁹Hagi Nagra'ma ugagota havi hankromofu Belsebul hanavefima, havi hankroma hantesugeno'a, iza hanavefi tamagri'ma tamagemama nentaza naga'mo'za hunentaze? E'ina hu'neankiza zamagra refko hurmantegahaze. ²⁰Hianagi Anumzamofu hanaveretima havi avamu hunentesuana, Anumzamofu kumamo'a ko tamagrira tamagaterene. ²¹Hanave ne'moma kuma'ama kegva huno manisigeno'a, maka zama'amo'a mane so'e hugahie. ²²Hianagi mago hanavenentake ne'mo'ma ha' eme hunteno agateresuno'a, maka ati keve'ane, so'e zama'a erino ome refko hugahie. ²³Iza'o NAGRANEMA nomanimo'a ha' renenante. Iza'o NAGRANE emeritru nosimo'a panini huno nefre.

Havi avamumo'za ete neaza naneke

(Mat 12:43-45)

²⁴AgRU OSU havi avamumo vahepinti atiramino vuteno, ti omane'nea kokampi nevuno, manigsahu kumaku hakeana onkeno anage hu'ne. Ete rukrahe hu'na ko'ma mani'no'a vahe'mofu agu'afi vanue nehuno, ²⁵vuno ana nonte ome keana, nona harafi huno eri so'ehu fatgo hunte'ne. ²⁶Anante ete vuno mago'a 7ni'a havi avu'ava agetereno nehia avamutmi ome zmareno ege'za, ufre'za umani'naze. Hankino ana nemofona henka nomanizamo'a, kote nomnizana agatereno havizantfa hu'ne.

Muse hanaza naneke

²⁷JISASI anage huno nehigeno, mago a'mo vea kevumofu amuno'zimifi mani'neni kezatino, amanage hu'ne, Negrera kasegateni ami kami'nemo'a muse hugahie. ²⁸Hianagi Jisasi'a kenona huno, ana hu'neanagi Anumzamofu nanekema nentahino amagemama nentemo, agatereno musena hugahie.

Jona avame'zamofu naneke

(Mat 12:38-42)

²⁹TUSI'a vea krefamo'za mago'ane etruhu rama nahazageno, Jisasi agafa huno anage hu'ne, ama knafi vahera havi vahe mani'ne'za avame'za kenaku nantahinegaze. Hianagi mago avame'za okegahazanki, Jona avame zanke kegahaze. ³⁰Na'ankure Ninive kumate vahe'mokizmire, Jona'a avame'za mani'neankna huno, Vahe'mofu Mofavremo enena

anahukna huno menima mani'naza vahe'motarera huramaverina keгахaze. ³¹Anumzamo'ma vahe'ma refko huno keagama huzmantesia knarera, Sauti kaziga Siba kumateti Quini a'mo'a otino, Anumzamo'ma keagama refkoma hanirera, ama knafi vahera keontahi vahe mni'naze huno keaga huzmantegahie. Na'ankure ana Quini amo'a afete'arega mni'neanagi, Solomoni knare antahintahi'a antahinaku e'ne. Hianagi antahiho, mago nera Solomonima agaterenea nera amuno tamifina mni'ne. ³²Anumzamo'ma vahe'ma refkoma hania knarera, Ninive vahe'mo'za oti'za ama knafi vahera keontahi vahe mni'naze hu'za keaga huzmantegahaze. Na'ankure Jona'ma hia kerera zmagu'a rukrehe hu'naze. Hanki keho, Jonama agaterenezana amafi mni'ne. (Jona 3:4-10,1 Kin 10:1-13)

Tavufgamofu tavimofu naneke

(Mat 5:15, 6:22-23)

³³Vahe'mo'za tavira rekru hu'za oku'a antege, ekaeka kupina eririza refinotaze. Hianagi tavira tagiza tavima rekru hunte azotare antenesageno, remsa hu'nenige'za ufresaza vahe'mo'za keгахaze. ³⁴Tamavurgamo'a tamavufgamofu tavire, tamavurgamoma keama nehanageno'a, maka tamavufgamofu msa hugahie. Hianagi haviza hanigeno'a maka tamavufgamofu hani hugahie. ³⁵Hanki tamagripima me'nea tavi'moma hanima huzankura, kva hiho. ³⁶E'ina hu'negu maka tamavufgafima msamoma avimatenenkeno'a, tamavufgafima hanina omnenena, maka tamavufgamofu tavimoma hiaza huno remsa hu vgaregahie.

Jisasi'a farisi mono kva vahe kezmasu'nea naneke

³⁷Jisasima ana kea huvgaretegeno, mago Farisi ne'mo huno, nigrane feru nezana eme no huno antahigegeni, vuno neza nenaza trate aza tununte (reclined) umanine. ³⁸Ana Farisi ne'moma keama, zamagra Farisi vahe'mo'zama zmazama sesema hute'za nezama nenazaza osu, Jisasima nezama amne nenegeni'a, antri hu'ne.

³⁹Hianagi Ramo'a anage huno ana nera asamine, tamagrama Farisi vahe'motma kapune, pletinena amega sese nehaze. Hianagi tamagu'afina kumazafa zamo'ene, havi avu'avazamo avitene. ⁴⁰Tamagra negi vahe mni'naze, Agra amegama troma hunemo'a, agu'afinena trora osunefi? ⁴¹Tamagrama erinenaza zama, muse nehutma tamaguareti zmamunte omne vahema zmamisazana, tamagrira maka zantamimo'a agru hugahie.

⁴²Hianagi Farisi vahe'mota kva hiho! Na'ankure tamagra izane aruine, maka hozafi mananentake nezana 10ni'a kevufinti, mago kevua refko huta nemizanagi, Anumzamofu fatgo avu'avazane, avesizamofona netreta, vahera so'e hunozmantaze. ⁴³Kva hiho Farisi vahe'motma!

Na'ankure tamagra osi mono nontamimpi ugota trate mani'zanku tamavenesigetma, maketi kumatamimpi vahe'mo'za antahiramiza husgama huramantezankuke nehaze. ⁴⁴Tamagra Kva hiho! Fri vahe'mokizmi keru refiteankna huta mni'nage'za, vahe'mo'za ana agofetu ontahiza vano nehaze.

⁴⁵Kasegere ugagota hu'naza vahepinti magomo kenona anage hu'ne, rempi hurami ne'moka, Kagrama ama kema hanana, tagriku'ene huhaviza hurantane huno hu'ne. ⁴⁶Hianagi Jisasi'a amanage hu'ne, kasegere ugagota hu'naza vahe'motmanena kva hiho. Na'ankure tamagra vahe'mokizmia tusi'a knaza zamizage'za kanagu hu'za eri'za nevazagetma, tamagra mago tamazankoa antetma knaza zmia e'norize. ⁴⁷Tamagra kva hiho! Na'ankure korapama neramagehozama zmahe'naza kasnampa vahe'mokizmia keru tamagra negafize. ⁴⁸E'i ana avu'avazamofona, tamagra vahera zmaveri hutma, neramagehoma hu'neazankura knare hu'ne hutma nehaze. Na'ankure neramageho'za kasnampa vahera zmahe fri'nazagetma, tamagra kerizmia kafinentaze. ⁴⁹E'i ana agafare, tamagri havi tamavu tamavazamofonku, Anumzamofu knare antahintahimofu kemo'enena huno, nagra kasnampa vahe'ene, aposol nagara huntesuseno e'nagetma, mago'amokizmia zamahe nefritma, mago'amokizmia zmazeri haviza hugahaze hu'ne. ⁵⁰E'ina hu'negu, mona mopama fore'ma hu'neregatima kasnampa vahe'ma zmahe'za korazmima eritagi atre'za e'naza zantera, nona hu'za menignafima mni'naza vahe'mo'za knazana erigahaze. ⁵¹Ebolima ahegeno korama'ama tagiraminere'ti eno, kre sramna vu itane ra mono nomofu amu'nompima Sekaraiama ahazageno, korama'ama tagitre'nea knarema ehanatinea vahe'mokizmi koramofu nona'a, tamage ama knafi vahe'motare refko huno nona huramantegahie. ⁵²Kasegere ugagota hu'naza vahe'motma kva hiho! Na'ankure antahintahizama eri ki nofira erinetretma, tamagra'a anampina unofreta, anampima ufrenaku'ma nehaza vahe'mokizmi kana rehi'za hunezmantaze. ⁵³Jisasima anama huteno, ananteti atreno nevig'e'za, kasegere ugagota hunaza vahe'mo'zane, Farisi vahe'mo'zanena agafa hu'za zmarimpa henente'za, rama'a zanku agenoka nehu'za, ⁵⁴mago'a kema hanifinti azerinaza kanku hake'naze.

Vahekura kore osu, Anumza'mofonku koro hanaza naneke
(*Mat 10:26-27*)

12 ¹Anama nehazage'za mika veamo'za emeritru nehazageno, rama'a tauseni'a vahe'mo'za titipa hu'za zamagiare'ti orentrako arentrako hu'naze. Pusantera Jisasi'a rukrehe huno, amage' nentaza disaipol naga'a zamavumro ante'ne, Farisi vahe zamuzmakura havige vaheki kva hiho. ²Ana hanigeno mago'zamo'a refi'otegahie. Hakare'za oku'a me'nesnia zana, henka'a amate fore hugahie. Hakare zama refitenesnia'zamo'a,

amate hanige'za kegahaze. ³Ina kna kema hanimpima hu'nesana kemo'a, masare eama hanigeza vahe'mo'za antahigahaze. Hagi sumikema oku'a hunaraginte'pinkama hu'nesanana, anagamu nomumpare marerino huama hanige'za antahigahaze.

(Mat 10:28-31)

⁴Rone'nimotma, Nagra neramasamue, avufga'ma ahe fri'simofonkura korera osiho. Anama hutesu'za henka'a, mago enena zamagra anara huoramantegahaze. ⁵Hu'neanagi Nagra kore kea huneramantoe, anahukna huno tamaheno teve kampi kresimofokorera huntegahaze. Tamagri'ma tamahe frino hanave'areti tevefima tamasga hu'tresimofokorera hunteto. Nagra neramasamue, Agri korera hunteto! ⁶5fu'a kisave nama tare kasage zagore netrazanki, Anumzamo'a ana namazgagura agera nokanie. ⁷Hagi tamagerafa nehue, tamasenirema me'nea tamazokara maka ko'hampari'ne. Korera osiho! Tamagara rama'a kisave namazga agateretma ra'za mani'naze.

(Mat 10:32-33, 12:32, 10:19-20)

⁸Nagra neramasamue, iza'o Nagri nagi nagenkema vahe'mokizmi zmavurema huama hanimofona, Vahe'mofu Mofavremo'a, Anumzamofu ankeromokizimi zamurera agi'a huama hugahie. ⁹Hu'neanagi mago'mo'ma Nagriku'ma onke'noe huno vahe zamufi hufrakisi'mofona, Anumzamofu ankeromokizimi zamavurera Naganena, zamagrira ozmagenoe hunahu frakizmantegahue. ¹⁰Hagi iza'o Vahe'mofu Mofavremago kema huhaviza huntessimofona, kumi'a eri atrentegahie. Ana hugahianagi iza'o Ruotage Avamumofu huhaviza huntessimofona, kumi'a atreontegahie.

¹¹Hu'neanagi, osi mono nonte kva vahete'ene, ruga'a kva vahetema tamavre'za vnageta, nanege hugahune hutma tamagesa ontahiho.

¹²Na'ankure Ruotage Avamumo kema huku'ma hanaza kea rempi huramisigetma ana knafina hugahaze.

Rama'a feno ante'nea ne'mofu naneke

¹³Tusi'a veapinti magomo'a amanage huno Jisasinku hu'ne, Rempi hurami nemoke, nenfuna asamigeno nerfama erisanti haregaha'e huno anterante'nea zampintira, refako hunamino. ¹⁴Jisasi'a ana kenona huno, kagri'ene negafu amu'nompina, iza kva mani'nenka kezani'a nentahinka refko huzananto huno hunante'ne? ¹⁵Anante amanage huno zamasmine, Kva hiho! Maka'a ruzahu ruzahu agraguke antahizamofona ha' renenteta, kva huta maniho, vahe'mofu mni'zana fenoma erizampina omnene. ¹⁶Nehuno fronka ke zamasmino anage hu'ne, Mago afufenone ne'mofu hozamo'a, so'eza huno hakare'a rga

rentene. ¹⁷Ana nemo'a anage huno aghesa antahine, nezani'a erintesua nona omneanki nagra nankna hugahue? ¹⁸Nagra nezama erinte nona tagna vazina erira huno kitena, anampi maka nezane, mago'a zani'a erintegahue huno antahine. ¹⁹Anantera nagrani'agura anage hugahue, nagra rama'a kafufima nazama hania zantamina eritru huankina mni fru hu'nena tine nezane nenena musenkase hugahue hu'ne. ²⁰Hianagi ana ne'ku Anumzamo'a anage hu'ne, kagra neginagi vahe maninane! Meni kenageke frigahananki, maka'za eri atru hu'nanazana iza erigahie hu'ne? ²¹E'inahu'za zamagra'aguke nentahiza mopafi fenozmima eritru hanaza vahe'mokizmia fore huzamigahie. Hianagi Anumzamofontera e'inahu vahe'mokizmia fenozazmi omnene vahe mani'naze hugahie.

Avufamofu azahu zanku antahintahi hakare hu'zamofu naneke
(*Mat 6:25-34*)

²²E'i ana agafare Jisasi'a amanage huno amagemu nentaza disaipol nagara zamasmu'ne. Tamagra tmavufagura antahintahi hakare osiho. Nane'za neneta manigahune, nankukena antanita tavufa refitegahune. ²³Na'ankure tasimuma erita manizamo'a nezana ageteregeno, tavufamo'a kukenama hu'zana agaterene. ²⁴Namamofu keho, Zamagra hoza kriza nezana nogafize. Nezama erinte'za nesaza nona omne'neanagi, Anumzamo nezana nezamie. Kagra namamofona agaterenka raza vahera mani'nane. ²⁵Mago'mo tamagripintira antahintahi hakarema haniazamo'a, asimu'a osi'a erizaza hugahie? ²⁶Tamagrama ama osizama osanutma, na'a higeta mago'a zankura antahintahi hakare nehaze? ²⁷Inozamo'ma hageno amosrema neheza keho. Zamagra mragu'za atiza kukena hatiza nontanize. Hianagi Nagra neramasamue, kini ne' Solomonima avasese ane kukena hu'neanagi, ama inazamofu mosaremo agetereno knarezantfa hu'ne. ²⁸Hianagi Anumzamo'a meni mesigeno okima eriza tevefima kresnaza inozana e'inahukna huno kukena hunezmanteanki, Osi tamentintine vahera! Anumzamo'a agetereno vahe'mota kukena huormantegosio? ²⁹Naneza neneta, nati negahune hanaza zamo'a antahintahi hakare oramino. ³⁰Na'ankure zamentinti osu vahe'mo'za anazankura tusi'za hu'za nehakaze. Hianagi tmagri, Neramafa'a atupama hanaza'zana ko antahino keno hu'ne. ³¹Hu'neanagi kotazana, Anumzamofu kumaku haketenkeno, ana miko atupama hanaza zana tamigahie.

Monare hirozama eritru hanunazamofu naneke
(*Mat 6:19-21*)

³²Onensa sipisipi afu kevumota korora osiho. Na'ankure tamagri Nafatmimo'a, mona kuma'a muse huno tamiku hu'ne. ³³Afufeno tamia zgore atretma, zgo erita amunte omne vahe nezminkeno monafi

fenozantamimo'a meno, anazamo'a monafina havizana osuno, kumzafa noseno, havi kfamo'za eri haviza osu kumapi antegahaze. ³⁴Na'ankure feno zanka'ama menenirega, anantegage kagu'a antegahane.

Ramo'ma esia zanku kva hu'za manisaza naneke

³⁵Kukena tamia huta, tro huta mani'neta, tavi tamia rekru hutma maniho. ³⁶Kva'zmimo arave hu nezantegati esigu kva huza manine'za, kafante eme vagre vagre nehigeza, ame hu'za anagi nentazakna huta kva huta maniho. ³⁷Kazokzo eriza vahe'mo'za, kva zmimoma esigu kva hu'za mni'nesaza vahe'mo'za muse hugahaze. Tmage hu'na neramasamue, Agra'a ana kva nemo amu'nofi nehuno, kukena'a eri atupa huteno, eri'za vahe'a hanige'za zmaza tununte mni kaginesageno, kavera agra eme zamigahie. ³⁸Kenege esio, kotu avame esio, zamunte'za kva hu'za maninesageno, eme zmagesia kazokzo eriza vahe'mo'za, muse hugahaze. ³⁹Hu'neanagi ama'nakea antahiho, mago nomofo nefama e'i knazupa kumzafa vahe'mo'za noni'a tagna vazigahaze huno antahinesuno'a, kvagrino mani'neneno zmatresige'za noma'a tagna vaziza uofregahaze. ⁴⁰Tamagranena tamavu anteta kva huta maniho. Vahe'mofo Mofavremo'a, omegahie huta hanaza knafi, egahianki kva hutma maniho.

Havi eri'za vaheku'ene knare eri'za vaheku'ene hu'nea naneke
(*Mat 24:45-51*)

⁴¹Pita'a anage huno antahige'ne, Ramoka ama fronka kea tagrikuke nehampi, maka vaheku'ene nehane? ⁴²Anante Ramo huno, knare antahizanteti eri'zama'a erifatgo nehania ne'mofo kva'amo'a, huntkeno mago'a eri'za vahe'a kva krinezmanteno, nezama nesaza zana kna fatgore refko huzamisia vahera iza'e? ⁴³Ana kazokzo eriza ne'mo'ma eri'zama enerino mani'nenigeno, kva'amo'ma eme kenimo'a, asomu erigahie. ⁴⁴Tamage hu'na nerasmue. Ana nera kva'amo'a huhamprintkeno, maka zama'a kegva hugahie. ⁴⁵Hianagi ana kazokzo eri'za ne'mo agu'afi huno, kvanimo'a zaza kna maniteno egahie nehuno, agafa huno eri'zama eneriza kazokzo eri'za vene'nene, a'enene nezmaheno, nezana neneno, aka ti neno neginagi nehuno, ⁴⁶kva'amo egahie huno antahiominesia knarema esuno'a, eme ahenorutaneteno, zamentinti osu vahe'mo'za manisaza kumapi antegahie. ⁴⁷Hanki ina kazokzo eriza ne'mo'ma, kva'amofu avesizama keno antahino hu'neneno, ana avesimofonte kva osuno, amagama ontesimofona rama'a zampi azeri haviza hugahie. ⁴⁸Hianagi iza'o antahino keno osu'neneno, knaza erigaza hu'nesimo'a, osia knokeve erigahie. Maka vahe'ma rama'ama zminemofompintira, mago'ane rama'a ante agofetu hu'za amisazegu hugahie. Hagi izano antahimino rama'a ami'nenimofompintira, mago'ane rama'a erinaku aghesa antahigahie.

Jisasi'a amu'nontifi atane'za erino e'nea naneke
(*Mat 10:34-36*)

⁴⁹Nagra ama mopa teve taginteku e'noe. Nagri'ma navesiana tevea rukru hanie! ⁵⁰Hianagi tusi'a knazamo navega ante'neankina ti freankna hu'na, ana kanazampina ufretena atiramisugeno, ana knazupa vgaregahie! ⁵¹Tamagrama tamegsama antahizana, ama mopafina rimpa fru'za erina enofi? A'o, amu'notamifina atane'za eri'na e'noe. ⁵²Meninena mago nOMPI 5fu'a naga mani'nenamo'za amuno zmifina atane'za fore hanigeno, tagufamo'za refko hu'za taremokiznia ha' reznentena, taremokea tagufamokizmia ha' rezmantegaha'e. ⁵³Famo tremokea refko huke, nefa'a nemofo ha' rentena, nemofo'a nefa ha' rentegahie. Anazanke huno nerera'a refko huno mofa'amofo ha' rente'na, mofa'amo'a nererana ha' rentegahie. Mago a'mo'a nenofersona ha' rentesigeno, nenofero'a, vemofon nererana ha' rentegahie.

(*Mat 16:2-3*)

⁵⁴Hagi Jisasi'a anage huteno, tusi'a veara anage huno zmasami'ne, kazageno hampomo zge ufretagama reraga higeta, ame huta ko arugahie nehazageno, kora nerie. ⁵⁵Hanki mago kaziga asoparegati (sauti) zahoma erigeta, zge ha hugahie nehazageno, ana nehie. ⁵⁶Tamagra tavre vahere! Tamagra mopafine monafinema fore hiazana refko hutma negaze. Hianagi menima ama knafima fore'ma hiazana na'a higetma refko hutma nonkaze?

(*Mat 5:25-26*)

⁵⁷Hagi nahigetma tamagra'a refko hutma fatgoma hu'neazana nonkaze? ⁵⁸Na'ankure magomo naneke huganteku kavreno kanisol vahete nevanigenka, karankama nevanuta, ko keaga hunka agranena erifatgo huo. Anama osnanana ana ne'mo kavreno ke refkohu nete vanigeno, kavreno kina nonte kva nete kantena, kina hugantegahie. ⁵⁹Nagra anage hu'na neramasamue, ana kina nOMPI mani'neta, zgoma miza segahaze huno hurmantenesiam'a miza sevgareteta atiramigahaze.

Agu'a rukrahe osnimo'a fanane hania naneke

13 ¹Jisasi'ma anante mani'negeno, Galili vahe'ma Paeroti zamahe frino korazmi erino Anumzamofonte kre sramna vu'zane eri havia huzamige'za, kre sramna vu'naza nanekea mago'a vahe'mo'za eme asmizageno, ²Jisasi'a anage huno eme zmasami'ne, tamagra tamagesa antahizana, ana Galili vahe'mo'za mago'a Galili vahe'mokizmi zmagetere'za tusi'a kumi hu'nazankino anazamo hige'za, ama knazana enerize hutma nehazo? ³Nagra neramasamue, a'o. Hianagi tamagrama

tamagu'a rukrehe osanutma, mikamotma anahu hutma frigahaze. ⁴Hifi tamagra antahizana 18ni'a vahe'ma Siloamu kumate zaza nomo kriteno zmahe fri'nea vahe'mokizmi kumi'zmimo'a, maka Jerusale mani'naza vahetmimofo kefozana zmagetere'za hu'naza vahe fri'naze huta nehazo? ⁵Nagra i'o hu'na neramasamue. Hianagi tamagu'a rukrahe osnutma e'inahu kna hutma tamagranena mika frigahaze.

Raga'a ore'nea fiki zafamofon fronka naneke

⁶Anage nehuno, Jisasi'a ama fronka ke zmasami'ne, mago ne'mofona waini hoza'afina, fiki zafa kri'neankino, nena raga'ama rente'nenigu ome keana, raga'a reonte'ne. ⁷Hoza nefa'a, ana hoza'ama kegva kri'nea neku huno kamago, tagufa kafu zgefima etevute hu'na koana, ama zafamo'a raga'a reonteanke antagitro! Nahanigeno mopamofon tima'a eri vgaragahie? ⁸Higeno hozare kegva nehia ne'mo'a, hoza nefana anage huno asami'ne, atregeno ama kafufina me'nena, agafafina mopa kafina mago'a azeri masavema hu'zana antanena, ⁹rgama anaga'a kafufima renteniana, knare hugahie. Hanki raga'ama reontesigenka eme antagi atresane huno asami'ne.

Jisasi'a mni fruhu kna zupa mago ara azeri so'e hunte'nea naneke

¹⁰Mni fruhu (Sabati) knazupa Jisasi'a osi mono nOMPI umrerino rempi hunezmigeno, ¹¹mago ara 18ni'a kafu zgefi havi avamumo amagena azeri fagagigeno, pripri huno vano nehuno, oti fatgo huno vano nosia a' ¹²Jisasi'a negeno ke higeno egeno, ama amoka, krimofo kinafintira katufegantoe. ¹³Nehuno ana a'mofo agofetu azana antegenon, ame huno ana kriamo'a vgarageno oti fatgo nehuno, agafa huno Anumzamofon agi erisaga hu'ne. ¹⁴Hianagi osi mono nonte kva ne'mofona rimpa he'ne. Na'ankure Jisasi'ma manifru knazupa (sabat) ana a'mofo eri so'e hunte'negu, maka veara amanage huno zamasmine. 6si'a eri'za eneruna kna me'negu, tamazeri so'e hanie hanutma, e'i ana knafi egahaze. Hanki mni fruhu (sabat) knazupa tmazeri so'e hanie hutma omeho. ¹⁵Hianagi Ramo'a ana kenona'a anage'a huno asami'ne, tamagra tavre vahe mani'naze. Makamotma mni fruhu (sabat) knazupa burimaka tamifi, donki tamimofona kegina zmifinti ti nesnagu katufeta zmavareta novazo? ¹⁶Hanki ama ara Abraha mofakino, Sata'a zaza kna 18ni'a kafuzgefi kina rentegenon mani'nege'na, mni fruhu (sabat) knazupa katufe netrogeta, mni fruhu knagi anahura osuo hutma nehazo? ¹⁷Anagama nehigeno'a, ke ha'ma rentaza vahe'mo'za zmagazegu nehazageno, maka veamo'za hirozantfama hu'neazankura muse hu'naze.

Zistigune mastet zafa avima'agu hu'nea fronka naneke
(Mat 13:31-33, Mak 4:30-32)

¹⁸Anante Jisasi'a amanage hu'ne, Anumzamofon kumara inankna hu'ne? Nazante avame kea huntena hugahue? ¹⁹Masteti zafamofon raga'a, osi

raga'a me'negeni, mago nemo erino hoza'afi krigeno hageno ra zafa segeno, hare'za vanoma nehaza nmamo'za azankunate no zmi eme kizankna hu'ne.

²⁰Mago'ane Jisasi'a anage huno hu'ne, Nazante avame kea Anumzamofu kumakura huntena hugahue? ²¹Amanahu kna hu'ne, mago a'mo sikoni krenaku rama'a flauapi, osi'a zisti herafinteno eri havia huntengeno, ana mikaflauamo zonerea kna hu'ne.

Osi kahamofu naneke

(Mat 7:13-14,21-23)

²²Anage huteno, Jisasi'a ranra kuma'tamimpine, osi kuma'tamimpi ufreno rempi huzamime Jerusale vunaku nevigeno, ²³mago vahe'mo amanage huno antahige'ne, Ramoka Anumzamo'ma zmaguma vazi'nea vahera osi'a mani'nafi? Jisasi'a anage huno zmasami'ne. ²⁴Osi kafantema ufrenakura hanavetita ufreho. Na'ankure rama'a vahe'mo'za osi kafanteti ufrenakura hanazanagi, uofregahaze. ²⁵Nomofu nfa'amo otino kafa erigina, kafante eme otineta vagre vagre nehuta, Ramoka kafa anagiranto! Hanageno ana ne'mo'a huno, igati vahe mani'naze, tamagrira ontmage'noe huno hugahie. ²⁶Hanigetma tamagra anage hugahaze. Kagrane magopi mani'neta ne'zane, tinena neneta kumatifi rempi huraminketa antahi'nomota neone hanageno, ²⁷Nagra ontamagenoanki, igati vahe mani'naze, Kefozanke hu vahe'mota amafintira manigneo huno huramantegahie. ²⁸Anampina zavira neteta tmavera anikreki nehuta, Abrahamune Aisakine Jekopune, maka kasnampa vahera Anumzamofu kumapina kegahaze. Hu'neanagi tamagrira tamasgafetrena megia manineta krafa hugahaze. ²⁹E'ina hanigeno maka veamo'za zge hanati kazigati'ene, zge fre kazigati'ene, ruga raga soparegati'ene Anumzamofu kumapi eme eri atru hu'za zmaza tununte (recline) manigagine'za ne'za netrute ne'zana negahze. ³⁰Hanki henka mni'nenaza vahe'mo'za ugota hanageno, ugota hu'nenaza vahe'moza uhenkategahaze.

Jisasi'a Jerusale vaheku asuntgi zamante'nea naneke

(Mat 23:37-39)

³¹Anagama nehigeno, Farisi vahe'mo'za e'za amanage hu'za Jisasi asmi'naze, atrenka amafintira ru kaziga vuo. Na'ankure Heroti'a kahenaku nehie. ³²Jisasi'a huno, afi' kragna vahera amanage huta ome asmiho, antahiho havi avamu'tamina hunentena, kri vahera menine oki'nenazma zmazeri neganamrena, anante knazupa eri'zama erivgareku e'nore uhnatigahue. ³³Tamaga Nagra menine oki'nenazma vuna tagufa knazupa uhnatigahue. Na'ankure kasnampa nera, Jerusale kumamofu megia ahe ofrigahaze. ³⁴Jerusale kumare, Jerusale kumare, Kva huo! Anumzamo huntengeno kagriku'ma e'nea kasnampa vahera zmahenefrita,

havenkno zamahe'naze! Nama'a zupa Nagra mofavre raminka'a, a' kokoremo anenta'a agekona kampi azeri franekiaza hunaku huanagi, tamagrira tamave'nosie! ³⁵Antahiho, nonkumatmimo'a vahe omni kokankna hugahie. Nagra anage hu'na neramasamue, tamagra Nagrira onage maninesageno mago knama esigetma, anage hugahaze. *Ramofogifi ne-emofona asomu huntésie hutma hugahaze.*

Jisasi'a kri eri'nea ne' manifruhu kna zupa eri so'e hunte'nea naneke

14 ¹Mago mni fruhu knazupa (sabati) Jisasi'a Farisi kva ne'mofo nompri ne'za nenaku vuno umani'nege'za, nankna hugahie hu'za zamagra kete'za mani'naze. ²Ana higeno avuga mago nera avufga zore krimo azeri haviza hu'nea ne' mani'ne. ³Kasegere ugota hu'naza vahe ene, Farisi vahera Jisasi'a anage huno zmantahigene. Mni fruhu knazupa (Sabat) knare vahera zmazeri so'e hugahumpi osugahune? ⁴Hianagi zamagra ke osu manizageno, ana nera avufare azerino kri'a azeri so'e huteno huntogeno vu'ne. ⁵Ana huteno anage huno zmasami'ne, inamoka mofavrekamo'o bulimaka afukamo ti afi kerifi uraminenigenka, mni fruhu (sabati) knazupa ame hutma ome avare anaga oteghazo? ⁶Zamagra ana kemofono nona'a hugara osu'naze.

Anteramino manizamofono naneke

⁷Jisasi'a kegeno ne'za nehogu ke hazage'za e'naza vahemo'za, ra zmagima eri trateke emanizageno, Jisasi'a anage huno fronka kea zmasami'ne. ⁸Mago'a vahe'mo'ma, tamagri'ma ke hanigetma arave hu nezantema vanutma, ra agima ami tratera uomniho. Na'ankure mago vahera tmagrira tmagaterenesi'a vahera kea hu'nesigu'enene. ⁹Hagi ana taregamota tanagi hu'nesimo eno, traka'a ama ne' amio huno hanigenka, kagazegu nehunka atrenka refarega umanigahane. ¹⁰Tamagima hanigetma vanutma henka trate umani'nenkeno, tamagima higeta vu'nazamo'ma esuno'a, anage huno hugahie. Ronenimota, enagagateho hanigetma, maka trate'ma mani'naza vahe zmufina ra tmagia erigahaze. ¹¹Na'ankure maka vahe'mo'za zmvufga ra hanamokizmia, Anumzamo'a zmazeri fenka tregahie. Hianagi zamagra zmvufga anteramisamokizmia, Anumzamo'a zmazeri sga hugahie.

¹²Anage nehuno, neza nehoguma ke hige'za e'naza kva nera asamino, ra ne'za kresnunka roneka'ane, kafu kaganaha'ine, vaheka'ane afufeno zimine vahe'ene zamagrike zamagi osuo. Ru ana vahe'mo'za kagri'enena ke hu'za nona hu'za kamsigenka mizanka'a erigahane. ¹³Hu'neanagi ra nezama retroma nehanunka, zmunte omne vahe'ene, agia aza stinesia vahe'ene, aga havizahu vahe'ene, avusu hu'nesnia vahe kea huge'za eho. ¹⁴E'inahu vahe'mo'za nona hu'za kamigara osu'nazankinka, kagra asomu erigahane. Na'ankure fatgo vahe'mo'za frinesafintima otisaza knazupa mizanka'a erigahane.

¹⁵Mago'mo nezane trate zamaza tununte mni'nafinti ana kema hia nentahino, anage huno Jisasina asmi'ne. Maka vahe'mo'za Anumzamofu Kumapima bretima nesamo'za asomu erigahaze! ¹⁶Hianagi Jisasi'a ana kemofu nona'a anage huno asmi'ne, Mago ne'mo ra ne'za retro huteno hakarea vea ana nezante eho huno ke hu'ne. (Mat 22:1-10) ¹⁷Ne'zama nesaza kna egeno, kazokzo eri'za vahe'a huntenu, koma zamagi hu'noa vahete vunka eho hunka ome zmasamio. Na'ankure mizantamia hagu retro huramante'ne hunka ome zmasamige'za eho. ¹⁸Hianagi maka'mo'za hu'za tasunku hunanki, eri'zanti me'ne hu'naze. Ese'mo'a anage huno ana kazokzo eriza nera asmi'ne. Nagra mago mopa mizasenoa ome kegahuankina, nasunku huanki ovugahue. ¹⁹Anante'mo'a anage hu'ne, 10ni'a hoza eri burimakao miza sentenorega vu'na ome avame ante'na kegahuankina, nasunku huanki omegahue. ²⁰Anante'mo'a anage hu'ne, meni ara eri'noanki'na omegahue. ²¹Ana kazokzo eriza ne'mo rukrehe huno kva'amofonte eno eme asmi'geno, kva nemo'a rimpahigeno, ana kazokzo eri'za nera anage huno asmi'ne. Ame hunka ra kumamofu osi kampine ra kampine nevunka, afufenozmi omne'nesnia vahe'ene, zmagia zmaza stinesia vahe'ene, zamaga haviza hu'nesnaza vahe'ene, zamavu asu hu'nesnia vahe'ene zamavrenka amare eno huno hunte'ne. ²²Anante kazokzo eri'za ne'mo huno kva'nimoka, kema hunantanazana hagu huanagi nompina mago'a kankamuna me'ne higeno, ²³kva ne'mo'a anage huno kazokzo eri'za nera asmi'ne. Atiraminka ranra kampine nomofu kegina kante vunka tutu hunka ome zmasamige'za, e'za noni'afina emani aviteho. ²⁴Na'ankure Nagra anage hu'na negasamue, magore hu'za koma zmagima hu'noa vahe'mo'za, nezani'afintira onetfa hugahaze.

Agesa antahi so'e hutenu Jisasi amage vaniazamofu naneke

²⁵Jisasina tusi'a vea krerfamo'za amage avaririza nevzageno, rukrehe huno amaganage huno zamasmi'ne.

²⁶Mago'mo Nagrite enaku nehuno, nefane nererane a'amofone, mofavre'ane afuhe'ine, asarehe'ine, agra'agu'enema ha'ma reontesimo'a, Nagri disaipol omanigahie. ²⁷Iza'o agra'a keka zafa erigofino Nagri namage omesimo'a, Nagri disaipol omanigahie. ²⁸Iza'o tmagripintima zaza noma kinaku hanuno'a, kotazana manineno nama'a zgonu nona ki vgaregahue huno refaku huno ketenu nona kino. ²⁹Zaza no kinaku eri agafa huno tra'a tro huntetenu, ki vga oresigeno, kesnaza vahe'mo'za hunte'za agiza nere'za, ³⁰ama ne'mo'a knare huno nona agafa hianagi, nona kivgaregara osie hu'za hugahaze.

³¹Hagi mago kini ne'mo, mago kini nema ha'ma ome huntenukura, esera mani'nenon antahino nagrira 10 tauseni'a sondia vaheni'a maninazankita 20 tauseni'a sondia vahe'mozama ha'ma eme hurantesaza vahera zmageteregahumpi, zmagete oregahune huno refko huno nege. ³²Ha'ma

agateragama osnuno'a, ha' vahe'amoma afete ne-esigeno, agra mago'a vahe huzmantenke'za vu'za agri agi eriza mago'aza ome huhampri nezmante'za ha'ma osu'za zmarimpa fru hu'za manisagu ome asmigahaze. ³³Ana hu'negu mago'mo'e huno, miko'zama'amofu amagena huomisimo'a, Nagri disaipol omanigahie.

Hage'mofu fronka naneke

³⁴Hagemo'a knare hu'neanagi, haga'ama omnena, ete inankna huno haga'a erigahie? ³⁵E'i haviza hu'neni mopamofonena masevena amigara osu'neankino, atresigeno amnezankna hugahie. Iza'o agha me'nenigeno nentahisimo'a, atregheno agha antahise hino.

Sipisipi afu fanane hu'nea fronka naneke

(Mat 18:12-14)

15 ¹Hanki maka takisi zgo e'neriza vahe'mo'zane, kumi vahe'mo'za Jisasinte erava'o hu'za naneke'a antahinaku hu'naze. ²Hianagi Farisi vahe'ene kasegere ugha hu'naza (sraib) vahe'mo'za zamagra'a ke hugantu hugama hu'za, ama nemo'a kumi vahe zmareno nezana zamagrane magopi nene hu'za nehazageno, ³Jisasi' ana kenona amanage huno fronka kea zmasami'ne, ⁴Mago'moma tamagripintima, 100ti'a sipisipi ante'nenifinti mago'mo fanane hanigeno'a inankna hugahie? ⁹⁹ni'a atrenigeno agupofi mani'nenageno, fananema hu'nemofonku hakeva hakeva huno keno erifore hugahie. ⁵Ome keno eri fore huteno, afunte avrenteno muse nehuno, ⁶avreno nontema ehnatino'a, roneamokizmine tva'onte'ma nemniza nagara ke hanige'za esageno, anage huno zmasamigahie. Muse nagri ene eme hinketo. Na'ankure fnanema hu'nea sipisipia hago hakena eri fore hu'noe huno hugahie! ⁷Hanki nagra amanage hu'na neramasmue. Anahukna kante, ⁹⁹ni'a vahe'mo'za fatgo hu'nazankiza zmagu'a rukrehe osugahazanagi, mago kumi vahe'mo, agu'a rukrehe hanigeno'a monafina tusi muse nehaze.

Zgomo nompi fanane hu'nea fronka naneke

⁸Jisasi'a mago'ane huno, mago a'mo'ma 10ni'a zgo ante'nenifinti, magoke zgoma fanane hu'nenkeno'a, rampe tavi taginteno noma'a harafi huno hakeva hakeva huno keno eri fore hugahie. ⁹Ana a'mo'ma ome ke fore huteno'a, rone'agu'ene, tva'oma'are nemniza vaheku'enena zmasamino, Muse nagrane eme hinketo, na'ankure zgonima fnanema hu'neana hago hakena erifore hu'noe huno hugahie! ¹⁰Hanki amanage hu'na neramasmue, anahu kante mago kumi vahe'mo'ma agu'ama rukrahe'ma nehige'za, Anumzamofu ankeromo'za tusi muse nehaze.

Tare kognafinti mago'mo nefa atreno vu'nea fronka naneke

¹¹Jisasi amanage huno zmasmi'ne, Mago ne'mo tare ne' mofavre znante'ne. ¹²Agonesa ne'amo nfa'amofonku anage huno asami'ne, afufeno

ka'a nagrama eri snuama'a refko hunka namisnane higeno, nefa'a fenoma'a refko huno znami'ne. ¹³Zaza kna omnineno agonesa ne'amo, fenoma'a erino afete moparega vu'no anantega umani'нено, aza osu havi avu'avazante fenozama ome atre eme atre hu'ne. ¹⁴Maka'zama'a atre vgaretegeno, ana mopafina tusi agate'za fore higeno, ana ne'mofona mago'zama'a omnigeno tusi'a agazanku hu'ne. ¹⁵Ana higeno mago mopa agafa nete vuno, erizampi avresigu ome antahigegeneno, ana nemo'a afu'a kegva hinogu huntegeneno afu kevuma mni'narega vu'ne. ¹⁶Magore huno vahe'mo'za nezana omizageno, afumo'za kohe akru'a nenazafinti nemu hu'naku agesa antahintahi hu'ne. ¹⁷Hianagi agrama knare antahintahima e'nerino'a, agra'a anage hu'ne. Mika'a nenfa eri'za vahe'mo'za rama'a breti nenaze. Hianagi nagra amafi mni'nena nagakura fri'za hue! ¹⁸Nagra otina nenfante vuna, anage hu'na ome asamigahue. Nafanimoka Anumzamofonte'ene kagriteru kumi hu'nogu, ¹⁹ne'nimo'e hunka kagra nagrikura osunka, eri'za vaheka'agna hunka navro hu'na hugahue huno agesa antahine. ²⁰Anage huteno otino nefantega e'ne, ogamanu ne-egeneno, nfa'amo negeno asuntaginteno, agareno vuno ome agazafeno, agi antako hu'ne. ²¹Ana nehigeno ana ne'amo anage huno nfa'amofu ome asmi'ne, Nafa'nimoke, Anumzamofonte ene kagrite enena kumi hu'noe. E'ina hu'negu ne'nimo'e hunka nagrikura hugara osu'noe. Hanki eri'za vahe'ni'e hunka huo. ²²Hianagi nfa'amo'a kazokzo eri'za vahe'agu anage huno zmasamine, ame hutma hentofa kena erita eme antaninentetma, azampina asane agia anone eme antaninteho. ²³Agaho bulimakamo afovage hu'nesia avreta eme ahetma, krenketa neneta maka'mota musena hamneno. ²⁴Na'ankure ama ne'nimo'a fri'neanagi, ete asimu eri'ne. Fanane hu'neanagi, ete hago ehnatine, nehige'za tusi'za hu'za muse hu'naze.

²⁵Hagi zge ne'mofavre'amo ehnatino nomofu tva'onte ne-eno, zavena neheza avogema hazana nentahino, ²⁶mago eri'za vahe ke huno, na'a anamafina nehaze huno antahige'ne. ²⁷Ana ne'mo anage huno asmi'ne, Negagna'a e'hanatigeno negfa'a afovage hu'nea bulimaka aheno kreg'e'za nene'ze. Na'ankure negagnana mago'zamo'a azeri haviza osigeno ete ehnatigeno'e huno asmine. ²⁸Hianagi nempu'amofona rimpa hegeneno, ana nompima ufrezankura avesra hu'ne. Nefa'a megia atiramino mofavre'a azeri fru huke hu'ne. ²⁹Hianagi ana nona'a amanage huno nfa'amofona asmi'ne, kma antahio! Kagri eri'zana kzahu'na vu'noe. Rama'a zgekufufi erizanka'a erinegantena, mago zupe hu'na keka'a rufu'otaginoe. Ana nehugenka magore hunka osi memena naminkena, rone ni'amozanena aheta kreta neneta musena osu'noe. ³⁰Hianagi ama mofavre kamoma maka zanka'a monko avu'avazante ome atre vgareno eri haviza huteno egenka, kagra afovage bulimakao ahenka krente'nane. ³¹Higeno nefa'a anage huno asmi'ne, ne'nimoka kagra hakare zupa nigrane

mani'nanankino, makazama ante'noana, Kagri su'a me'ne. ³²Hianagi tagra neza neneta muse huntegahune. Na'ankure ama negagna'a frine huta hunoanagi, kasefa mani'ne. Fanane hu'ne huta hunanagi, efore hu'ne huno asami'ne.

Fatgo osu kva eri'za vahe'mofo fronka naneke

16 ¹Jisasi'a, mago'ene amage nentaza disaipol naga'amokizmi anage huno fronka kea zamasmine, magora afu'fenone ne'mo, fenoma'are ugagota huno kva nehia eri'za ne'mo, fenoma'a eri havia hu'nea naneke, ²nentahino ugagota eri'za ne'a agi higeno egeno, na'a hu'nana naneke antahi'noe? Mafka eri'zama erinana avontafe ka'a erinka enka eme erifatgo huo. Na'ankure kagra mago'ene ugagota kva omanigahane huno higeno, ³ana ugagota eri'za kva ne'mo amanahu ke agra'a agu'afi antahine, na'a nagra hugahue. Kva ni'amo'a eri'za ni'a eri atreanki? Nagrira hoza eri hanaveni'a omnegahiankina vaheku nzahuo huzankura nagaze hugahie huno nehuno, ⁴Nagra naza hugahue hago antahue, ugagotahu kva eri'zani'afinti hunante'na, vahemo'za muse hunante'za navare'za nozmifi ome nantegahaze. ⁵Nehuno ozafa'amofa zama nofi huno eri'nea vahe, mago mago ke higeza ageno, ese'ma emofa agra anage huno antahige'ne, nama'a ozafa'nimofa'zana nofira hunka eri'nane? ⁶Higeno ana ne'mo anage hu'ne, 100ti'a Olivi masaventafe eri'noe higeno, ana fenonte ugagota hu'nea kva ne'mo anage hu'ne, ame hunka mopafi maninka avontafeka'a erinka 50ti'a masaventafene hunka avona krento huno asami'ne. ⁷Anante rumo egeno ana ugagota kva eri'za ne'mo antahige'ne, Nama'a kagra nofira hu'nane? Higeno ana ne'mo'a 100ti'a witi'gure higeno, ugagota eri'za kva nemo'a huno avon tafe erinka 80ti'a witi'gure hunka avona krento hu'ne. ⁸Henka kva ne'mo'a, fenozante ugagota huno kvahu so'e osu'nea kva ne' muse hunte'ne. Na'ankure antahiza me'nea kva vahemo nehiaza hu'negure. Hagi ama knafi vahe'mo'za zamagra'zantera knare hu'za kva nehu'za tavi msare'ma nemniza vahera zamagateneraze. ⁹Amanage hu'na nagra neramasmue, fenoma erinka ama mopafi fatgo osu'zantema netrana zana, netrenka vahera zamazeri knampa huzmante'negeno, ana fenoma vagama resige'za, muse hu'za kavare'za mani vava nozamirega vugahaze. ¹⁰Mago'mo'ma osi'zantema so'e huno kegvahu fatgo hanimo'a, anahu kna huno ra'zana kegvahu fatgo hugahie. Hagi osi'zama kegvahu fatgo osanimo'a, ra'zana kegvahu fatgo osugahie. ¹¹Kagrama ama mopafi fenozama kegvahu fatgo osnankeno'a, iza tamage fenoma kvama kri'zana kamigahie? ¹²Kagrama vahe'zama kva huhaviza hanankeno'a, kagri'zana iza kamigahie. ¹³Mago eri'za ne'mo'a tare ozafarera eri'zana e'origahie, mago'mofona antahi haviza hunenteno, mago'mofona avesi onteguhie. Huge mago'mo'ene mani trago neteno, mago'mofona atregahie. Kagra Anumzante ene zgorera eri'zana eri'ontegahane.

Farisi vaheku kore ke mago'ene huzamante'nea naneke

(Mat 11:12-13, 5:31-32, Mak 10:11-12)

¹⁴Farisi vahe'mo'za ana maka ke nentahi'za, (zgogu zamesi zamesi nehaza nagamo'za) agiza nere'za, hupri hunte'naze. ¹⁵Hu'neanagi Jisasi'a amanage huno zamasmine, vahe'mofo zamavurera tamagra fatgo vahere hutma nehazanagi, Anumzamo'a tmagu'a ke'ne. Na'ankure vahemo'zama kanarezantfa me'ne nehaza'zamo'a, Anumzamofu avufina havizantfa me'ne. ¹⁶Mosese kasegene, kasnampa vahe'mofo kea huama huno Joni knare eme atre'ne, ananteti e'neana Anumzamofu kumamofu musenke huama nehigeno, hakare vahemo'za hanaveti'za ana kumapi vanagura kazigazi hu'za nevaze. ¹⁷Hu'neanagi amane fru huno monane, mopanena fanane hugahianagi, osi avone kasegemo'a vaga oregahie.

Jisasi'a arave netanaza zanku hu'nea naneke

(Mat 5:31-32)

¹⁸Iza'o a'ma netreno ru a'ma erinuno'a, anamo'a monko'za hugahie. Hagi mago ne'mo'ma, ve'a atre'nesi'a a' erisanimo'a, monkoza hugahie huno hu'ne.

Afufenone ne'ene Lasarusi'kizni naneke

¹⁹Jisasi'a amanage hu'ne, Mago ne'mo afufenoma'a hakare me'negeno tusi'a zgo atreno, koranke kukena nehuno, asanema nehia ne'za knane knane erino neneno, so'e huno mani'ne. ²⁰Ana nehigeno noma'a kasante mago ne', fenoma'a omane'nea fugo namune ne' antazageno manitere nehiane. Ana ne'mofo agi'a Lasarusi'e. ²¹Lasarusi' maseno mani'nenno, feno ne'mo ne'za nenesigeno ankra heramisiama'a erina nesue huno nehuno emani'negeno, kramo'za namuma'areti zamagnefu'nanu hu'ne hane hu'naze. ²²Anante amunte omane nera frige'za, ankeru vahe'mo'za eri'za Abrahamu nemnia kumate vu'naze. Vutageno afufeno nera anante frige'za eri'za ome asentageno, ²³hagi tevefi manineno tusiza huno ata negrigeno kenagamuteno Abrahamuke Lasarusikea, afete magopi mani'nakeno zamage'ne. ²⁴Neznageno kezatino, Abrahamuga nfa'nimoka teve nenrege'na natagu nehuanki kasuntagi nantenka, Lasarusi huntengeno timpi azanko agona'a reteno nagefu'nare eme rentenkeno fru hunanteno hu'ne. ²⁵Abrahamu'a amanage huno asmi'ne, Mofavre'moka kagesa antahio. Mopafi mani'nenka knare zampi mani'nankeno Lasarusi'a haviza huno mani'ne. Hu'neanagi menina Lasarusi'a fruzampi emani'negenka kagra kata zampi mani'nane. ²⁶Hanki mago'zana amanahu kna'za me'ne. Tamagri'ene tagri'ene amu'nompina tusi'a tinka me'negeno, hagro hu'neankita tamagra nehanarega tkaheta vu'zanku ene tagritega ezankura tusi'a amuhu hurantegahie. ²⁷Anante anage

higeno, afufenone ne'mo amanage hu'ne. Nafa'nimoka Abrahamuga muse hugantoanki Lasarusina huntegeno nenfa nontega vino, ²⁸na'ankure nafa'nimofono nompina 5fu'a nafuhe'ina zamatre'na e'noanki, Lasarusina huntegeno hanave'nentake kore ke ome huzmasamisige'za tusi'a ata eri kumapina omeho hu'ne. ²⁹Hu'neanagi Abrahamu'a kenona huno, Moses nanekene kasnampa vahe'mokizmi nanekea me'neanki'za zamagra ana nanekea antahigahaze. ³⁰Ana hianangi afufenoma'ane ne'mo'a anage hu'ne, a'o nfa'nimoke huno higeno, Abrahamu'a anage hu'ne, frinefinti otino ome zamasamisiana zamagu'a rukrehera hugahazo! ³¹Ana hianangi Abrahamu amanage huno asami'ne, I'o. Moses nanekene, kasnampa vahe'mokizmi nanekema nontahisu'za, inankna hu'za fripinti otino ome zamasami'nia kerera zamagu'a rukrehe hugahaze huno hu'ne.

Kefoza nehza naneke

(Mat 18:6-7,21-22, Mak 9:42)

17 ¹Jisasi'a amanage huno amagama nentaza disaipol naga'a zmasami'ne, rehenozana egahie. Hianangi iza'o reramatga nehimofonkura nasunku huntoe! ²Witi refuzafu nepaza havere nofi anakiza, anankempi rentete'za, hagerimpi atrenageno uramisiana knare zantfa hugahie. Neone nagapinti magomofono azeri trakama huzankura, ³tamagra kva hiho! Neramafuma kumima hanigeta, haviza nehane huta hinkeno, agu'ama rukrehema hanigeta, kumi'a atrentegahaze. ⁴Ana ne'mo'ma mago knamofono agu'afi 7ni' zupa kumi huramanteno, ana kefozama'agu agu'a rukrahe huno 7ni'a zupa eno nasunku hue hanigeta, kumi'a atrentegahaze.

⁵Aposol naga'amo'za, Ramofona anage hu'za asmi'naze, tamentintia eri ra huo hu'za hazageno, ⁶Ramo'a anage huno zmasamine, tamagrama tamementintimo mastet zafa rgagna hu'nenigeta, mulberi zafagura amne tasagi hunka hagerimpi ome regrio hanageno'a, ketamia amage'anteno amne anara hugahie.

Eri'za vahe'mofo naneke

⁷Ina'imoka amuno tamifina kazokzo eri'za vahe ka'amo hoza tinka eri'zano, sipisipi kegva nehaniregati enkeno'a, ame hunka emaninka ne'zana no hugahio? ⁸Hu'neanagi kva'amo'a amanahu kea kazokzo eri'za ne'agura osugahio, kukenaka'a eri hutenska nezama nesuazana retro hunenantege'na, tine nezanena netesugenka, henka tine nezane kagra negahane hugahio? ⁹Hanki agra kazokzo eri'za ne'agura musenka huontegahio? Na'ankure huo hunoma hunte'neazana hu'ne. ¹⁰Ana hu'negu kaganena, maka'zama Anumzamo huo huno hugante'neazama hanunka anage huo, tagra knare osunona kazokzo eriza vahemota, Anumzamo eriho huno hurante'nea eri'za e'nerune huta hugahaze.

Jisasi'a 10ni'a fugo namune vahe zamazeri so'e hu'nea naneke

¹¹Jisasi'a Jerusale vunaku nevuno, Sameria kuma'ene Galili kumamoyo amunompi agatereno vu'ne. ¹²Nevuno mago kumapi ufregeno, 10ni'a fugo namune vahe'moza ogamnu otiza mani'ne'za ome tutagiha hunte'naze. ¹³Amanage hu'za kezati'naze, Jisasi'a kva ne'moke, kasuntgi ranto! hu'za nehazageno, ¹⁴Jisasi'a nezmageno amanage huno zamasmine, Tamagra vuta prisi vahete tamavufga ome zamaveri hiho, hige'za nevhazageno fugo namuzmimo'a amne higeza agru hu'naze. ¹⁵Hagi mago'zmimo'a keana avufgamo so'e higeno, rukrahe huno ranke huno Anumzamoyo agi erisaga nehuno, ¹⁶Jisasi' agafi avugosaregati epi huno, susu huno musenke huntene. Ana nera Sameria nere. ¹⁷Anante Jisasi'a anage hu'ne, 10ni'a vahe'mokizmi fugo namumo'a so'e hige'za agru hu'naze. Hianagi 9ni'a vahe zga iga mni'naze? ¹⁸Mago vahe'mo'a eama huno Anumzamofona ra agi omigeno, ama megia' ne'mokepi? ¹⁹Jisasi'a anage huno ana ne'mofonku hu'ne, kamentintimo kazeri so'e hianka otinka vuo.

Vahe'moyo Mofavre'mo enaku nehanigeno fore'ma haniazamoyo naneke
(*Mat 24:23-28,37-41*)

²⁰Farisi vahe'mo'za Anumzamoyo kumakura, ina knare egahie hu'za Jisasi'a antahigazageno, kenona zimirera anage hu'ne, Anumzamoyo kumara mago avame'zane esigeta onkesageno, ²¹zamagra amagi keho huge, antugi keho huza osugahaze. Na'ankure Anumzamoyo kumamo'a ko tamagri amunompi me'ne. ²²Anage nehuno, amagama nentaza disaipol naga'a zmasamino, mago kna ne-eankino, ana knarera Vahe'moyo Mofavre kenaku hanazanagi, tamagra onketfa hugahaze. ²³Zmagra anage hu'za tmasamigahaze, antufi mni'neanki keho huge! Amafi mni'neanki keho! Hanigetma anantega ovuta, zmavaririta ana vahera oviho. ²⁴Vahemoyo Mofavre'ma esia kna'arera kopsi'namo monare rurarage huno remsa nehigeno, mago kazigati remsa huno mago kaziga atuparega neviaankna hugahie. ²⁵Hu'neanagi ese'zana Agra rama'a knazampi unefresigeno, ama mni'nona gnafi vahe'moza zmefi humigahaze. ²⁶Noa knafima hu'nazaza hu'za, Vahe'moyo Mofavremoma enaku'ma hania knafina, anahu zamavuzma nehu'za, ²⁷zamagra nezana nene'za, tina nene'za, arave nehu'za, ara masi omi ami nehazageno, Noa'a vente agu'afi mrerigeno, timo'a miko zmahe refite'ne. (Jen-Agf 7) ²⁸Loti gnafinena anahukna hu'za, nezana nene'za, tina nene'za, miza neseza, zgore netre'za hoza negriza nona negiza hu'naze. ²⁹Hianagi Lotima zamatrengo Sodomu kumapinti atiramino vu'nea knazupa, tefizo hu'nea havemo ko riza huno zmahe refite'ne. ³⁰Vahe'moyo Mofavrema eama hunaku'ma hania knarera, anahukna zmavuzmava hugahaze. ³¹Ana

knazupa nomofu agofetu mani'nenigeno, fenezama'a agu'afi me'nesimo'a eramino fenoma'a erino ati oramigahie. Anahukna huno hozafima mni'nenimo'a rukrehe huno omeno. ³²Hanki Loti nenaronte fore hu'nea zanku tamagesa antahiho. (Jen-Agf 19:24-26) ³³Iza'o asimu'a azeri kona hunaku hanimo'a, asimu'a atregahianki, iza'o asimu'a atresimo'a, asimu'a erigahie. ³⁴Hanki nagra anage hu'na neramasamue. Ana knazupa tare vahe sipare kenage mase'nesnake'no, mago'mofo nevreno mago'mofo atregahie. ³⁵Tare atre'mokea witi raga'a refuzafunepeke mani'nesnapinti, magomofu nevreno mago'mofo atregahie. ³⁶Hagi tare netremoke hozafi mani'nesnakeno, mago'mofona nevreno, mago'mofona atregahie. ³⁷Anankemofu nona zamagra Jisasinku hu'za, Ramoka inantega anazana fore hugahie? Hu'za amage'ma nentaza disaipol nagamo'za antahigazageno, anage huno zmasami'ne, fri'nea avufgama, me'nesirega anantega tumpa namamo'za eri atru hugahaze.

Kento a'te huntenu nunamu huzamofonku hu'nea fronka naneke

18 ¹Zmavesra osu maka zupa nunamu hanagu, fronka ke Jisasi'a amagemu nentaza disaipol naga'a anage huno zmasamine. ²Mago rankumatera ke refkohu (jas) kva nera mni'neakino, Anumzamofonku korera nosuno, vahe'mokizmia zmagefenkami netrea nere. ³Magora kento ara ana rankumapina mni'nea amo, ke refko nehia kva nete eva eva nehuno, anage hu'ne. Mago vahe'mo nazeri haviza nehianki naza huo hu'ne. ⁴Mago'a knafina ana amofu kea antahi omi'neanagi, henka anage huno agesa antahine. Nagra Anumzamofonkura korera nosu'na, vahe'mokizmia zmagefenkami netroanagi, ⁵ama kento a'mo tutu hunenantenu hakare zupa evava nehuno nazeri navesra nehianki, ru evava huno nazeri naveresra hanigi aza hanue hu'ne. ⁶Ramo'a anage huno zamasm'i'ne, fatgo osu ke refkohu kva nemo'ma hu'nea kegu tamagesa antahiho hu'ne. ⁷Hanki Anumzamo'ma huhampri zmantenea vahe'mo'za, hanine zgene antahigevava nehnageno'a, zmasuragizmantenu zavikezmia ontahigahio? ⁸Amanage hu'na neramasamue. Agra ame huno zmasu ragizmantenu zamaza hugahie. Ana hugahianagi Vahe'mofo Mofavre'moma esuno'a, Agra ama mopafi vahe'mofo zmentinti emezmagegahifi emezmagegahie?

Farisi ne'ene takisi zgo eneria ne'mofo fronka naneke

⁹Mago'ane fronka kea huno, zamagrazmigu antahi'za tagra fatgo vahe mani'none nehu'za, ruga'amo'za knare osu vahe mani'naze hu'za zmagefenkami netrazamokizmi zmasami'ne, ¹⁰tare netremoke nunamu hunaku ra mono nomp'i mreri'na'e. Magora Farisi nere, magora takisi zgo e'neria nere. ¹¹Farisi ne'mo'a otinenu anage huno agra'agu nunamu hu'ne. Anumzamoka nagra susus huna muse nehue, mago'a vaheknama

osu'na havige huno musufa nesea vaheknara nosuna, kefoza nehaza vahekna osu'na, arave netanaza vahekna nosuna, ama takesi zgo eneria ne'kna osu'noe. ¹²Maka sontamofa agu'afina tare zupa nezana a'o nehuna, makazama atrena zgoma erufintira, musezana mago kevu refko huna Anumzamofona nemue. ¹³Hianagi takisi zgoma e'neria ne'mo ogantu otino manino monafinka kesga huno nonkeno, kepri huno amimizare amasagino amanage hu'ne. Kumike vahe mni'noanki Anumzamoka kasuntaginanto huno hu'ne! ¹⁴Amanage huna neramasamue, takisi eneria ne'mo'a Farisi ne'mofona agetereno Anumzamofa avurera fatgo huteno noma'arega vu'ne. Na'ankure agra avufga erisaga hanimofona, Anumzamo'a azeri fenka atregahie. Hianagi iza'o avufama anteramisimofona, Anumzamo'a azeri sga hugahie.

Jisasi'a neonse mofavre'rami asomu ke huzmante'nea naneke
(*Mat 19:13-15, Mak 10:13-16*)

¹⁵Mago'a veamo'za ne'one mofavre'zmia Jisasi zamufare zmavako nehuno, asomu ke huzmantenogu zmavre'za neageno, amage'ma nentaza disaipol nagamo'za nege'za, ke zmasu'naze. ¹⁶Hianagi Jisasi'a amagama nentaza disaipol nagara zmagi huno zamasmine, zmatrenke'za ne'one mofavre ramina Nagrite eho. Kazmia renkanire ozmanteho. Na'ankure Anumzamofa Kumara, e'inhua vahe'mokizmi kuma me'ne. ¹⁷Tmage hu'na neramasmue, iza'zo ama mofavre'mo'za enerizankna hu'za Anumzamofa Kumama e'orisamo'za, uofregahaze.

Afufenoma'ane kahefa kva ne'mofa naneke
(*Mat 19:16-30, Mak 10:17-31*)

¹⁸Mago afufenone kva ne'mo amanage huno Jisasina antahige'ne, Knare Rempi Hurami Ne'moke, nankna hutena manivava asimura erigahue? ¹⁹Jisasi'a anage huno kenona ana nemofona asmi'ne. Na'a higenka Nagrikura knare hunane hunka nehane? Mago vahe'mo'a knarera osu'neanki, Anumzana magokemo knarera hu'ne. ²⁰Hanki kagra kasegea antahinane, rumofo aro vea avazu osuo. Vahera aheofrio. Maka'zana musufa oso. Ru vahe'mofonkura rempagari kea osuo. Negrerane negfane keznia erizafa huo, hu'nea kea antahinane. (Eks-Uti 20:12-16, Diu-Kas 5:16-20)

²¹Huno Jisasi'a higeno, ana kva ne'mo'a mofavre mani'na enoregatira ana mika kesegea amage ante'na e'noe, huno higeno, ²²Jisasi' ana ke antahiteno amanage huno ana ne'mofona asmi'ne, mago zantfa atupara hu'nane, maka zanka'a zgore atrenka zgo erinka, zamunte omne vahe nezamigeno, monafi fenonka'a mesigenka enka eme namage anto. ²³Hianagi ama ana naneke nentahino, rimpagna afufenoma'agura hu'ne. Na'ankure agra tusi'a afufeno antenegu ana hu'ne. ²⁴Jisasi'a ana nemofo

negeno anage hu'ne, fenozmine vahe'mo'za Anumzamofu Kumapima vunaku'ma hanazana tusi'a mraguzatigahaze! ²⁵Na'ankure kemorimo'za fru hu'za kena hati nekazamofu kampina ufregahazanagi, afufenone vahe'mo'za tusi'a mraguzati'za Anumzamofu Kumapina ufregahaze. ²⁶Anampi mni'naza vahe'mo'za ana ne'kuma asamia kema nentahiza, hagi iza manivava asimura erigahie hu'za antahigenaze? ²⁷Hianagi Jisasi'a anage hu'ne, makazama vahe'mota osugazana, Anumzamo'a amne hugahie higeno, ²⁸Pita'a amanage huno hu'ne. Ko, mika zantia atreta, Kagri kamage anteta neone. ²⁹Higeno Jisasi'a anage huno zmasami'ne, tamage hu'na neramasamue, magomo'a noma'o nenarono, afu aganano, nererano nefano, mofavre'ama Anumzamofu Kumaku'ma huno atresimo'a, ³⁰amama mni'nea knafina rama'azantmi e'nerino, henkama esia knafina monarera, manivava asimura erigahie.

Jisasi mago'ane frisniazanku zamasmine naneke
(*Mat 20:17-19, Mak 10:32-34*)

³¹Jisasi'a 12fu'a amage'nentaza disaipol naga'a zmarekanti anteno, anage huno zmasami'ne, antahiho, Tagra Jerusale kumate marerita vanunkeno, maka kema kasnampa vahe'mo'za, Vahe'mofu Mofavregu hu'za kre'naza kemofu avufa'a fore hugahie. ³²Na'ankure megia vahe zmazampi avare amisageno, azanva ke hunente'za, azeri haviza nehu'za, avetu ahentegahaze. ³³Ana nehu'za, sefu amite'za, ahefrisageno friteno, ete tagufa knazupa otigahie. ³⁴Hianagi amage'ma nentaza disaipol nagamo'za fritena otigahue hiankemofu agafa'amo'a frakino oku'a me'negeno, ana kemofu agafa'a antahi amara osu'naze.

Batimiasi avurga azeri hari hunte'nea naneke
(*Mat 20:29-34, Mak 10:46-52*)

³⁵Jisasi'ma Jeriko kumate vugofa nehigeno, mago avusuhu ne'mo kamofu ankenarega meme nehuno mni'neno, ³⁶antahigeno rama'a vahe enevzageno, naza fore nehie? huno zmantahigege'za, ³⁷zamagra asmi'za, Nazareti kumateti ne' Jisasi enevie nehazageno, ³⁸Ranke huno kezatino, Jisasio Deviti Nemofoga kasuntginanto! Higeno, ³⁹kotama vaza vahe'mo'za ana ke nentahi'za kesu'za, kea osunka kagira hamunkinka manio hu'naze. Hianagi mago'ane kezatino, Deviti Nemofoga kasuntginanto! ⁴⁰Jisasi'a neviretira anante uotino, kehinkeno eno hige'za, ana nera ome avare'za erava'o hazageno, anage huno antahige'ne. ⁴¹Na'a huganteku hugenka nehane? Higeno, Ramoka ete navua kesuegu nehue! ⁴²Jisasi'a anage huno asmi'ne. Kamentintimo kazeri hari hianki kavua ko higeno, ⁴³avurgamo'a ame huno anante hari higeno, ete knare huno negeno, Jisasina amage'anteno nevuno, Anumzamofu agi erisaga nehige'za, miko vahe'mo'za nege'za zamaganena Anumzamofu agi erisaga hu'naze.

Sakiasi naneke

19 ¹Jisasi'a Jeriko rankumapi ufreno nevigeno, ²mago nera Sakiasi'e nehaza nera, takesi zgo eneriza vahe'mokizmi kva nekino, afufeno ne' mani'ne. ³Nankna ne' Jisasi'a mni'ne huno Sakiasi'a kenaku hianagi, tusi'a vahe'mo'za rehiza huntazageno onke'ne. Na'ankure agra upa ne' mni'ne. ⁴Ana higeno agareno vugoteno, vunaku'ma hiakante me'nea sikamo zafare umrerino kenigu mni'ne. Na'ankure Jisasi'a ana kante enaku higeno'e. ⁵Jisasi'a anama maninere ne-eno, kenagamuteno negeno anage huno asami'ne, Sakiasiga ame hunka eramio, na'ankure menina kagri nompipi umanigahue. ⁶Higeno Sakias'a ame huno eramino, muse nehuno avreno noma'arega vu'ne. ⁷Ana'ma hige'za maka vahe'mo'za nege'za, ke hakare hunte'za, kumi vahe'mofo nompina nantura antenente hu'naze. ⁸Hanki Sakiasi'a otino amanage huno Ramofona asmi'ne. Ramoka antahio, fenoni'a amu'nompinti refko hu'na zmunte omne vahe nezamina, nagrama rezmatga hu'na eri'noazana refko hu'na 4'a zupa zamigahue. ⁹Jisasi'a amanage huno asami'ne, menina ama nompipi mni'naza vahetera, Anumzamo'a zmahokeno zmavre'neazamo ko ene. Na'ankure agranena Abrahamu mofavre mni'ne. ¹⁰Na'ankure vahe'mofo Mofavremo'a, fanane hu'naza vahe hakeno zmavarenaku e'ne.

10ni'a eri'za vahe fronka naneke

¹¹Ana nenekema nentahizageno, Jisasi'a mago'ane fronka kea zmasami'ne, na'ankure mago'a vahe'mo'za antahizana, Anumzamofokumara ame huno egahie hu'za nentahizageno, Jisasi'a Jerusale tvaonte mni'nenoz masamino, ¹²mago ne'mo'a mago kumatega vuno anantega kva umniteno ete enaku nehuno, ¹³10ni'a kazokzo eri'za vahe kehuno, 10ni'a zgo nezamino, anage huno zmasami'ne, eri'za kante erinenteta mago'a zgoa retro nehinkena etena henka egahue.

¹⁴Hianagi ana kumapi nemaniza vahe'mo'za zmasivazinte'za, mago'amokizmi huzmantage'za vu'za anage hu'naze. Tagra ama ne'moma kvagri rante'zankura tave'osie hu'naze. ¹⁵Ana kumama omeriteno ete eno, kazokzo eri'za naga'a koma zami'nea zagoretira, nankna huza mago'a zgoa retrora hu'naze keno antahino hunaku zamagi hu'ne. ¹⁶Ese ne'mo' eno anage hu'ne, Ramoka tare zotama zago nami'nantetira, mago'ane ana zagoretira eri'za erina 200ti zgoa retro hune, higeno, ¹⁷ana ne'mo'a anage huno asami'ne, so'e hunka eri'za erinane, knare eri'za nemoka, na'ankure osi'zante knare hunka kegva hu'nanku, menina 10ni'a rankuma kegva hugahane higeno, ¹⁸anante'mo' eno anage hu'ne, Ra'moka tare zotama zgoma nami'nantetira eriza erina 100ti zgoa retro hu'noe higeno, ¹⁹Ana ra nemo'a anage agri enenkura huno asami'ne, kagranena 5fu'a kuma kegva hugahane huno asmi'ne. ²⁰Mago'mo anante

eno anage hu'ne, Ramoka, zgoma nami'nana hankasipifi ante'novzitena ante'noankina ama erina oe. ²¹Na'ankure kagra kema hunka hugahue hanazana nehunka (hihamu ne' mni'nenka), kagra rumo'za kri'nazaza enerinka, onkrinanazana negafinka nehanku kore hu'na fraki'noane. ²²Ana ne'mo'a anage huno asmi'ne, Kagrama hana kere, kefo kazokzo nemoka kagrira refko hugahue. Kagra ontahinane, nagra himamu ne' mni'nenka, nagra ontenoazana enerina, okri'noazana e'nerugenka antahinane? ²³Na'a higenka zgoni'a zgoma nentaza nompri antenankeno, ruguheno mago'a erifore nehigena ehanatina e'orue? ²⁴Anage huteno, anante otinaza vaheku anage huno zmasami'ne, tare zota'a zgo eritma 200ti zgoma erifore hu'nea nemofo amiho. ²⁵Ana vahe'mo'za anage hu'za ana nekura hu'naze. Ramoka, agra 10ni'a zgoa ko eri'ne hu'za hu'naze. ²⁶Hanki amanage hu'na neramasamue, maka vahe'mozama rama'a erinesamokizmia, mago'ane anteaguheno zamigahie. Hianagi e'orinesimofompintira, erineniama'a hanaregahue. ²⁷Hianagi ama ha' vahe'nimo'za, kvama nagra huzmantezankura zmesra hunantaze vahera, zmvavreta nagri navure zmaheta rukafritreho huno hu'ne. ²⁸Jisasi anage huno zamasmitemo, ugagota huzmanteno Jerusale kumate vu'naku vu'ne.

Jisasi'a Jerusale kumate nevig'e'za amrara hu'naza naneke
(*Mat 21:1-11, Mak 11:1-11, Jon 12:12-19*)

²⁹Jisasima Jerusale vunaku Betfakene Betani kumatema nevuno, Olive nehaze agonare erava'o nehuno, amagama nenta'a disaipol ne'trena huznanteno, ³⁰anage huno znasamine, ugota huta antu kumapi ufreta ome kesa'ana, vahe'mo'za agofetura mni'za ovu'nesaza donki afu kinare mni'nesigeta kesuta'a, kazufeta avazu huta amare e'o. ³¹Mago'a vahe'mo'zama tamantahige'za na'a hunaku katunefa'e? Hanigeta anage huta znasamiho, Ramomofona eri'za me'negeni hurantegeta'e hi'o. ³²Jisasima anage huno huznantegeke vu'ne ome ka'ana, kema huzananteneaza hu'negene ome ke fore hu'na'e. ³³Nofi'ma ana donki rentenea ome katu nefakeno, ana donki afumofa nfa'amo'a znantahigeno, Na'a hunaku e'i afura katu nefa'e? huno znantahigege'ne, ³⁴Ramofona eri'za me'negeni hurantegeta eme katu nefo'e hu'na'e. ³⁵Ana hutene avare'ne Jisasinte uhnatikeno, zamagra nakre kuzmi ana donkimofa agofetu zafiza antegeni Jisasi'a agofetu mni'ne. ³⁶Jisasi'ma nevig'e'za nakrekuzmi zafiza kampi tafe vasinte'nageno ana agofetu vu'ne. ³⁷Ana'ma huno Olive agonare vu kantema umanehnatikeno, maka amagama nentaza disaipol nagamo'za, Anumzamofa agi erisaga hu'naze. Na'ankure maka kaguvazama higeza kenaza zanku ranke hu'za musenkase nehu'za amrara hu'za, ³⁸ranke hu'za, **Ramofa agifima ne-emofona ra agi amisune.** Monafina rimpa fru menkeno, Anumzamofa hihamu hanavemo'a mrerigateresie. (Sam-Zga 118:26, 148:1) ³⁹Ana veapinti

mago'a farisi vahe'mo'za hu'za anage huza asmi'naze, Rempi hurami nemoka, kamagama nentaza disaipol nagaka'a ke zmasuge'za anage osiho huza asmi'naze. ⁴⁰Hianagi Jisasi'a kenona anage hu'ne, zamagrama kema tagnenageno'a hankami havemo'za, Anumzamofa agi'a erisaga hugahaze!

Jerusale kumate vaheku Jisasi zavite'nea naneke

⁴¹Jisasima Jerusale kuma tvaonte vugofa huno, ana ran kuma'ma negeno zavi neteno, ⁴²anage hu'ne, ama knare'ma kagrima krimpa fruma hu'zama fore'ma nehiazana, kagra nonkane! Hianagi kagri kavurera rimpa fruzamo'a frakino me'negenka nonkane. ⁴³Na'ankure mago'a kna ne-eankino, ha' vahe'timimo'za eme tamavazi kagiza, maka asopa eme regagi ramante'za, ⁴⁴makazantmi eritagna vazi atresigeno, mopafi fragu vaziramino mena, tamagri'ene mofavretmine haviza nehanageno, zamagra mago havea atresageno mago havemofo agofetura omnegahie. Na'ankure kagrima Anumzamo'ma kazama hiazana kenka antahinka osu'nane.

Ra mono nOMPI maketi nehzageno Jisasi'a zamahe fegi te'nea naneke (Mat 21:12-17, Mak 11:15-19, Jon 2:13-22)

⁴⁵Jisasi'a ra mono nonte vuno, miza neseza zgore netraza nagamofona, agafa huno zamahe meg'i netreno, ⁴⁶amanage huno zamasm'i'ne, anage huno avontafepina krentene, *Nagri nomo'a nunamu hu no megahie*. Hianagi kumzafa vahe'mofo nokna nehaze. (Ais 56:7, Jer 7:11) ⁴⁷Mago mago knarera Jisasi'a ra mono nOMPI rempi huzami'ne. Hianagi prisi vahe'mo'zane, kasegere ugagota hu'naza vahe'mo'zane, ranra vahe'mo'zanena azeri haviza hanaza kanku hakre'naze. ⁴⁸Jisasima azeri haviza hanaza kana keza eri fore osu'naze. Na'ankure maka vahe'mo'za Jisasima hu'nea ke antahinazageno'e.

Hihamu'agu Jisasi antahige'naza naneke (Mat 21:23-27, Mak 11:27-33)

20 ¹Mago zupa ra mono nOMPI mani'neno, knare musenkea Jisasi'a vea'mokizmi rempi hunezmigeno, prisi vahe'mo'zane, kasegere ugota hu'naza vahe'mo'zane, ranra vahe'mo'zanena eme nege'za, ²anage hu'za Jisasinkura asmi'naze, nankna himamu eri'nenka amazana nehampi tasamio, hifi i'za ama hihamua kaminegenka nehane? ³Jisasi'a kenona anage hu'ne, Nagranena tamagrira tamagenoka hugahuanki nasmiho. ⁴Joni'ma mono ti frezmante'neazana, vahe'mofo eri'zampi, monafinti eri'za eri fore hu'neo? ⁵Huno zamantahigege'za, zamagra zamagra hugantu hugama hu'za, Monareti eriza erifore hu'ne huta hanunkeno'a, nahigeta Jonima hu'neazankura tamentinti osu'naze? Huno hugahie. ⁶Hianagi tagrama huta mopafi vahe'mofo eri'zanema hanunkeno'a,

maka vahe'mo'za have knonu tahefrigahaze. Na'ankure zamagra ko keza antahiza Joni'a kasnampa ne' mni'ne hu'naze. ⁷Anage hu'za nehu'za, Jisasi kenona hunte'za, mono tima frentezana igati e'neo tagra ontahi'none hazageno, ⁸anage huno Jisasi'a zamagrira zmasami'ne, nagranena i'za hihamu namigena e'nerufi ontamasmigahue huno hu'ne.

Waini hoza kva hu'nea vahe'mofo fronka naneke
(*Mat 21:33-46, Mak 12:1-12*)

⁹Hagi Jisasi'a veamokizmia amanahu fronka kea agafa huno zamasmine. Mago ne'mo'a waini hoza anteteno, kna'are kna'are mizaseterehu (rent) vahete waini hoza'a netreno, afete zazakna umaninaku vu'ne. ¹⁰Waini ragama tagi knarera kazokzo eri'za ne'a, waini hozama kegva hu'ne'za mizasetere hugahune hu'naza vahete huntengeno vu'ne. Hianagi ana waini hoza kegva hu'naza vahe'mo'za kanonkeve nemiza, huntageno aza avapa vu'ne. ¹¹Ete mago'ane, mago kazokzo eri'za ne'a huntengeno vigeno, zamagra knokeve nemiza azeri agaze hazageno, aza avapa vu'ne. ¹²Anante ana hozamofo nefa'a, ete mago'ane rumofo huntengeno vigeno, anazanke hu'za ahe kuzafa nente'za, ana hozafintira asagfe atre'naze. ¹³Na'a nagra hugahue? huno ana hozamofo nefa'a nehuno, nagrama navesi navesima hunentoa ne' mofavreni'a huntenugeno vanige'za, zamagra antahimigahazafi huno hu'ne. ¹⁴Hianagi waini hozama kegva hu'naza vahe'mo'za nege'za, zamagra zamagra hu'za, amana mofavre'mo nefazana erisanti haregahianki, enketa aheta erisantima haresiazama'a erisune hu'naze. ¹⁵Anage nehu'za azeri'za ana hozafinti mate nevu'za ahageno fri'ne. Hanki e'i anama hanageno'a hoza nfa'amo'a, na'a zamagrira huzmantegahie? ¹⁶Hoza nefa'a Agra eno ana vahera eme zmahe nefrino, ana waini hoza rumokizmi hanare zamigahie. Jisasima ana kema hige'za nentahiza, anahura osugahie hu'za zamagra hu'naze! ¹⁷Hianagi Jisasi'a nezmageno anage hu'ne, na'ante amanage huno avontafepina krentene. *Nogi vahe'mo'za zmesra huntaza havemo'a, no renegetete ugagota huno azeri hanaveti have fore hu'ne?* (Sam-Zga 118:22) ¹⁸Maka vahe'ma ana have agofetuma takauresamo'za, kori kofagofa hugahaze. Hianagi ana havemoma iza agofetu takauresuno'a, rehapatishigeno kugusopa fore hugahaze.

Takisi zgo amizanku Jisasi antahige'naza naneke
(*Mat 22:15-22, Mak 12:13-17*)

¹⁹Kasegere ugota hu'naza vahe'mozane, prisi vahe'mo'za Jisatina anante azerinaku hunazanagi, vaheku kore hu'naze. Na'ankure Agrama fronka kema hu'neana zamagrama nehaza zamuzmaku hu'negeze. ²⁰Ana nehu'za znavu anteza keteza manine'za, afure vahe huzmantege'za, fatgo vahekna huza umnine'za kema hania kere azeriza ugagota vahete

(gavana) vnige'za, kva vahete avrenente'za kegaga huntehogu vu'naze. ²¹Zamagra anage hu'za Jisasina agenoka hu'za, tagra antahinone, Rempi hurami nemoka, kema nehunka rempi huzaminana fatgo hunka nehunka, mago vahe aza huzankuke nosunka, rempima huzaminana fatgo hunka Anumzamofu avu'avazankuke nehane. ²²Hanki Roma kva ne' Sisama takisi zgo nemunazamo'a knare hunefi, haviza hu'ne? ²³Hianagi Jisasi'a revatga hunaku'ma hazana ko negeno, amanage huno zamasmine, ²⁴Naveri hinkena mago zgoa kaneno, iza amema'a megeno, na'ane hu'za anantera krente'naze? Higeno, zamagra Sisa amema'e hu'za hu'naze. ²⁵Jisasi'a anage huno zmasamine, Sisa zama me'neniana Sisa amiho. Hagi Anumzamofu zama me'neniana Anumzamofu amiho. ²⁶Hige'za rama'a vahe zamavufi manineno kea nehige'za, zamagra revatga hu'za ke'afintira magore hu'za azerigara nosu'za, kenona zmima hiankegura antri hu'za kea osu'naze.

Fri vahe otizanku Jisasi antahige'naza naneke

(Mat 22:23-33, Mak 12:18-27)

²⁷Anante mago'a Sadusi vahe'mo'za, fripintira o'otigahaze nehaza vahe'mo'za, Jisasinte e'za, ²⁸anage hu'za antahige'naze. Rempi hurami ne'moka, Mose'a anage huno avontafema kreraminefina hu'ne, ***Nempuamo a' erino manineno, mofavre kaseonteno frinigeno, negna ana ara erino, nefu mofavre erifore hino huno hu'ne.*** (Diu-Kas 25:5-6) ²⁹Hanki 7ni'a kogna mani'nazankino nempuzmimo ara erino mofavre onte manineno frigeno, ³⁰negna ana ara eri'ne. Eriteno mofavre onte manineno fri'ne. ³¹Anantemo'a anazanke huno ana ara erinteno, mofavre onteno frine. Anahukna hu'za ana maka'mo'za ana ara eri'za mofavre kaseonte manine'za fri'naze. ³²Fri vgaretazageno henkarfana ana ara fri'ne. ³³Hanki fri'nafinti oti snaza knazupa, inamofu a' manigahie? Na'ankure ana maka 7ni'amo'za ana ara erintenaze, hu'za hzageno, ³⁴Jisasi amanage huno zamasmine, ama knafi mani'naza vahe'mo'za ara e'neriza, ara masi ome ami nehaze. ³⁵Hianagi Anumzamoma huno, veamo'za fri'nenafintima oti'za henka manigahaze hu'nea veamo'za, arave osu'za, ara masi omi ami osugahaze. ³⁶Na'ankure zamagra mago'ane ofrigahaze. Na'ankure zamagra ankeru vahekna hu'za, Anumzamofu Mofavre nemniza, kerifinti oti'nea mofavregna hu'za manigahaze. ³⁷Hianagi frite'za oti'naza zankura, Mose'enena osi zafafinti teve anefa nehigeno ke'neazamofu naneke krenefina eriana huno, *Abrahamuma, Jekopuma, Aisaki Ra mni'noe* huno hu'ne. (Ekso-Uti 3:6) ³⁸Hagi Agra fri vahe'mofu Aumzana omnine. Hianagi zmasimu eri'za nemniza vahe'mofu Anumza mni'ne. Na'ankure mikamo'za agriteti zmasimu eriza mni'naze. ³⁹Mago'a kasegere ugota hu'naza vahe'mo'za kenona'a hu'za, Rempi Hurami Ne'moka knare ke hane hu'za hu'naze. ⁴⁰Na'ankure mago'ene Jisasi'ma mago'azankuma agenoka hugara osu'za, antahionke'naze.

Kraisia iza nemofoe hu'nea naneke

(Mat 22:41-46, Mak 12:35-37)

⁴¹Anante Jisasi'a amanage huno zamantahige'ne, inankna hu'negu zamagra Kraisinkura Deviti nemofoe hu'naze? ⁴²Na'ankure Deviti'a zgame avontafepina huno, *Ramo'a nagri Ramofonku huno, nazantmaga kaziga mani'negena*, ⁴³ha' vaheka'a kagiafi zmare antanena zmagofetu otio hu'ne.

(Sam-Zga 110:1) ⁴⁴E'ina hu'negu Deviti'ma Ranimo'e hu'neana, inankna huno Deviti mofavrea Ramo'a manigahie?

Jisasi'a mono kva vahemokizmi mani'za zimigu hu'nea naneke

(Mat 23:1-36, Mak 12:38-40)

⁴⁵Hakare veamo'za ana naneke nentahizageno, Jisasi'a amage'ma nentaza disaipol nagakura anage huno zmasami'ne, ⁴⁶kasegere ugota hu'naza vahekura kva hiho. Zaza kukena hu'za vahe z mavuga vu'zankuke nehu'za, maketi kumapi vahe'mo'za antahinezmiza hu frufra huzmantesaza zanku nehu'za, osi mono nOMPI ugota trate manisaza zanku nehu'za, ra nezama nezupa, knare trate mni'zankuke nentahize. ⁴⁷Kento a'nemokizmi fenozantami havige hu'za eneriza, anaza nosaza vahekna hu'za, vahe'mo'za antahiramisazegu zaza nunamu nehaze. E'inahukna z mavuzmava nehaza vahera, refkoma hania zupa tusi'a knaza zamigahie.

Kento a'mo mono nOMPI zgo ante'nea naneke

(Mak 12:41-44)

21 ¹Jisasi ranmono nOMPI mani'nenno kesga huno nezmagege'za, feno vahe'mo'za zgoma ante taferopi ofa zgoa ante'naze. ²Hagi amunte omne kento a'mo tare osi zgo ana taferopi netregeno ke'ne. ³Jisasi'a anage huno hu'ne, Tamage hu'na neramasamue, ama amunte omne kento amo'a makamokizmia zamagtereno ante'ne. ⁴Na'ankure zamagra rama'a antenafinti, taferopina mago'a eme ante'naze. Hianagi ama amo'a omnetfa hunefinti, agri'ma aza hanigeno manisiam'a miko ante vgarene.

Vgare knafima fore'ma hania avame'zamofa naneke

(Mat 24:1-2, Mak 13:1-2)

⁵Mago'a amagama nentaza disaipol nagamo'za ra mono no knare have eri'za no negiza, vahe'mo'za museza eri'za ementazaza, eriza avasese hunte'naza zantaminku naneke nehzageno, Jisasi'a amanage hu'ne.

⁶Amazama me'negeta negazazana, magokna esigeno'a mago havemo'e huno, mago havemofa agofetura atresageno omnegosianki, ana maka tagna vazitregahie.

(Mat 24:3-14, Mak 13:3-13)

⁷Hige'za, ana kegu anage hu'za antahige'za, rempi hurami ne'moka, nanknafi anazana fore hugahie? Ana knama atupama hinkeno'a nankna avame'za fore hinketa ketesunkeno anazana fore hugahie? ⁸Jisasi'a anage hu'ne, tamagra kva huneta atrenkeno mago'a vahe'mo'za havi kantera tamavreza oviho. Na'ankure rama'a vahe'mo'za Nagri nagifina eza anage hugahaze, nagra ana neki, hago knamo'a koftahie hanigeta, tamagra zamage anteta ovutfahiho. ⁹Tamagra ha'ma hanaza agenkene, hazenkeza fore'ma haniazamofa agenkema antahisuta korera osiho, na'ankure ese'zana anazana fore hugahianagi, ame huno vgarekna omegahie. ¹⁰Jisasi mago'ane huno, mago rankumate vahe'mo'za, mago rankumate vahera hara huntisigeno, mago kinimofa naga'mo, mago kinimofa naga hara huntisigeno, ¹¹tusi'a imi enerisigeno, mago'a kaziga tusi'a kri fore nehinkeno, mago'a kaziga tusi'a zamaga netenkeno, monarera ruzahu ruzahu avameza fore huno vahera zmazeri zmagogofegahie. ¹²Hu'neanagi anazana fore osu'ne, esera tamagrira tmazeri'za kanonkeve neramami'za, tamavre'za osi mono nompine, kina nompine ome neramante'za, kini vahete'ene kamani vahetera, Nagri nagireku hu'za tamavre'za vugahaze. ¹³Zamagrama e'inama hanaza zamo'a, mago kankamu tamamisigeta, Nagri nagi nagenkea huama zamagrira hugahaze. ¹⁴Ana hu'negu antahiantahi hakare hutma, inaknahu ke huta tagra'a tagu vazigahune hutma osiho. ¹⁵Na'ankure Nagra nanekema hanaza kene antahintahine tamisugeta, kea hanageno, kema huramantesaza vahe'mo'za, ana kema hanazana eri otregahaze. ¹⁶Hianagi tamagritami tamarera tamafazane, tamafuhezane, tamagri'a nagamo'zane, ronetamimozane, komoru hu'za mago'amota tamahe frigahaze. ¹⁷Hagi maka'mo'za, tamagrira antahi haviza huramantegahaze. Na'ankure Nagri nagima tamagripi me'neazanteku anara hugahazanagi, ¹⁸magore huno tamasenifi tamazokamo'a fanane osugahie. ¹⁹Tamagrama ana knazampima oti hanavetita vanutma tamasimura erigahaze. ²⁰Hianagi tamagrama negesageno sondia vahe'mo'za Jerusale kumama eme regagisagetma, Jerusale kuma azeri haviza hu'zamo'a egofta hie hutma antahiho. ²¹Anama hanigeno'a Judiaama mni'naza vahe'mo'za freza agonarega vnageno, rankumamofa amunompi mni'nesamo'za atre'za vinkeno, megia mani'nesamo'za rankumapina uofreho. ²²Na'ankure ama'i ana kna, Anumzamo kefozazmire nona'a huzmante knagino, maka avontafepi krentenea kea eama hugahie. ²³Zmu'enema hu'nesaza anene, ana knafi mofavrema ami nemiza nagamofonkura nasunku huzmantoe. Na'ankure Anumzamofa tusi'a rimpahie knazamo, ama mopafine vahete'enena egahie. ²⁴Hagi bainati kazinu eme zmahe nefriza, zma'vre'za maka kokantega kina ome hunezmantesageno, Jerusale kumama megia vahe'mo'za zmagiareti regugupa negrisageno, megia vahe'mofo knamo'a vgaregahie.

Vahe'mofo Mofavrema esia naneke

²⁵ Jisasi'a anage hu'ne, avame'zana zgerema ikante'ma ofunte fore nehina, mopafina vahe'mokizmia antahintahizmimo'a savri nehina, hanavezmi nomnenkeno, hagerimo kranto kranto huno tusi'a agasasa nerina nentahiza tusi'a kore hugahaze. (Joel 2:31) ²⁶ Mopafima fore'ma hanizamofu nege'za vahe'mo'za zamu evuevu hanige'za traka hu'za masegahaze. Na'ankure monafima me'nea hanave zantamimo'a toretore hinke'za anara hugahaze. ²⁷ Ana nehina Vahe'mofo Mofavremo'a hampompi himamu'ane, tusi'a ms'afi ne-ena kegahaze. (Dan 7:13) ²⁸ Hianagi ana maka'za erigafa huno fore nehinketa, oti hanavetita tamasenia antesga hutma keho. Na'ankure tamagri'ma tamavresia knamo'a egofta nehie.

Zafamofu fronka naneke (Mat 24:32-35, Mak 13:28-31)

²⁹ Anante Jisasi'a anage huno mago fronka kea zamasmine, fiki zafare'ene maka ruga'a zafataminte keta antahita hiho. ³⁰ Zafamo'ma kasefa asinama regeta, zagegna fore hunaku higeno'e hutma nehaze. ³¹ E'inahu avame'zama negesutma, Anumzamofu kumara kofta hie hutma tamagesa antahiho. ³² Nagra tamage hu'na nerasmue, ama knafi mani'naza veamo'za ofri mani'nesnageno, ana maka'zana fore hugahie. ³³ Monane mopane fanane hugahianagi, Nagri kemo'a fanane osu mevava hugahie.

Eri'za vahe'a mo'za kva hanaza naneke

³⁴ Jisasi'a mago'ane anage hu'ne, tamagra kva hiho. Ru negi ti neta negineneta, makazana kva huso'e nosuta, tmavufamofu zanku antahintahi hakare hanagi, e'inahuma hanageno'a krifumo zgagafa azeriankna hu'nenigeno, ana knamo'a ame huno onkesageno tmagritera efore hugahie. ³⁵ Na'ankure maka ama mopafi mni'naza vahete ana knamo'a efore hugahie. ³⁶ Hanki tamagra maka knafina kva hutma maninetma, nunamuna huvava nehutma, hankavetita mni'neta ana maka knazama efore'ma haniana agateneretma, Vahe'mofo Mofavrema esigura avega anteho.

³⁷ Mago mago knafina ra mono nompri veara rempi hunezmino, kinagasegeno'a Olivie huza nehaza agonare mrerino umanine. ³⁸ Hagi maka vahe'mo'za nanterampi otiza rempima huzamisige'za antahisagu ra mono nompri vu'naze.

Judasi'a komoru hinkeno Jisasi azerisnaza naneke (Mat 26:1-5, Mak 14:1-2, Jon 11:45-53)

22 ¹ Anumzamou Israeli vahe ozmahe zamagterenege'za ana knagu antahimiza, (Pasova) zo'ore bretima kreza nenaza kna fore hu'za nehige'za, ² ugagota prisi vahe'mo'zane kasegere ugota hu'naza vahe'mo'za

Jisasima ahefrisaza kanku hake'naze. Na'ankure vahetaminku kore hu'naze. ³Ana nehzageno, Jisasima amage'manentaza 12fu'a disaipol nagapinti, mago zmimofo Judasinku, Iskarioti'e nehaza ne' agu'afi Sata'a ufrene. ⁴Hagi ana ne'mo prisi vahe'ene, ra mono nonte kegva nehaza vahe'mokizmi kva vahetaminte vuno, Jisasima komoru huno avare zamisige'za ahesaza kea ome retro hu'naze. ⁵Zamagra muse nehu'za, mago zmarimpa hu'za zgo amisaza naneke hu'naze. ⁶Judasi'a mago rimpa ana kerera huteno, Jisasima Agraku mni'nenigeno, komoru huno avrezamisia kankamunku hakre'ne.

**Tare disaipol netre'moke Anumzamo ozmahe zmagaterenea (Pasova)
ne'za retrotra hana'a naneke**

(Mat 26:17-25, Mak 14:12-21, Jon 13:21-30)

⁷Anantera zo'ore bretima nenaza kna ege'za, ese knazupa sipisipi anenta ahe'za kre sramna (Pasova) nevaza kna fore hu'ne. ⁸Anante Jisasi'a Pitane Jonigizni amanage huno huznante'ne, Isareli vahe Anumzamo ozmahe zmagaterenea zanku antahimiza nenaza ne'za retro hinketa ome namneno. ⁹Zanagra anage hu'na'e, inante ome retro hanu'egu nehane? huke hakeno, ¹⁰Jisasi'a anage huno znasami'ne, tanagra rankumapi ufresakeno'a, mago ne'mo kavofi tina afino afunte nevnigetna ome kesnutna, avaririta umarerisia nompfi ufre'o. ¹¹Ana nomofo nefana anage huta asami'o, Rempi hurami ne'mo'a anage kagrikura hu'ne. Anumzamo Israeli vahe ozmahe zamagaterene'negu zmagesa antahimiza nenaza ne'zana, inantega namage nentaza disaipol nagani'anena negahune hune huta ome asami'o? ¹²Anagema hanakeno'a, agofetu nomofona, ra kankamu hunaragintenefinka ko retro hunteneakino, tanaveri hanigeta, anante nezana retro hugaha'e. ¹³Higene znagra vune ome ka'ana, kehiaza huno makazana fore higene, ana nezana ome retro hu'na'e.

Ramofo ne'za ne'naza naneke

(Mat 26:26-30, Mak 14:22-26, 1 Kor 11:23-25)

¹⁴Ana ne'za nesnaza kna egeno, Jisasi'ene aposol nagamo'za, ne'za nenaku trate zmaza tununte magopi mani'naze. ¹⁵Anante anage huno zmasami'ne, Nagra knazampina uofrenena, Anumzamo ozmaheno zmagaterenea zanku antahimiza nenaza ne'za tamagrane nesuazankura tusiza huno navesie. ¹⁶Na'ankure Nagra anage hu'na neramasamue, Nagra mago'ene amanahu ne'za onenesugeno, henka Anumzamofu Kumapi avufa'a fore hugahie. ¹⁷Anagema huteno, waini ti me'nea kapu erino Anumzamofu susu hunteteno, anage huno hu'ne, ¹⁸ama'i waini tina eriomi ami hutma magopinti neho. Na'ankure Nagra anage huna neramasamue, Nagra magore hu'na waini tina onena

maninenugeno, Anumzamofu Kumara egahie. ¹⁹Hagi Jisasi'a Bretima erino Anumzamofu susu hunteteno korino nezamino anage hu'ne. Ama'i Nagri navufa tamagrikure huno tami'neanki, nenesutma tamagesa antahinamiho. ²⁰Ne'zama netageno'a, anahukna huno kapu erino anage huno zamasmine, ama'i korani'afi kasefa huvempage hagerafita maninunku tamagritera tagitroe. ²¹Hu'neanagi keho, komoru huno ha' vahe zmazampi navrentesnia ne'mo, nigrane magote mni'nenone neza nene. ²²Tamage hu'na neramasamue, Anumzamo hu'nea kante anteno, Vahe'mofu Mofavre'mofontera fore hugahianagi, ha' vahe vahe'mofu zmazampima avrentesimofona, nasunku huntoe! ²³Anage hige'za zamagra zamagra ontahige antahige hu'za, iza e'inahu'zana hu'naku higeno nehie? hu'za hu'naze.

Iza pusa vahe manigahie? hu'za fra vazi'naza naneke

²⁴Jisasima amage'ma nentaza disaipol nagamo'za, zamagra zamagra kehakare hu'za, i'za amu'nontifina ra vahera manigahie hu'za nehazageno, ²⁵Jisasi'a anage huno zmasami'ne, megi'a vahe'mokizmi kinimo'za zmagra'a vahe'a kegva krineza huzmantaza kea amage'nentaze. Hankve kva mni'noe haza vahe'mo'za, maka vahe'mokizmi rone mani'none hu'za nehaze. ²⁶Hianagi tamagra anara osugahaze. Hanki mago'moma rama amu'nontamifima mni'naku hanimo'a, osi'tfa maniho. Kva vahe maniku amu'nontamifi hanimo'a, eri'za vahetami manigahie. ²⁷Hanki i'za rankvama manigahie. Nezane trate aza tununte maninemopi? Nezama retroma nehimo'e? Hianagi tamagri amu'nompina, Nagra ne'zama refkoma nehia vahekna hu'na mani'noe. ²⁸Miko knazama e'nerugeta, tamagra nonatrazze. ²⁹Nenfama kuma'ama nami'neaza hu'na, Anumzamofu kumara neramuankita, ³⁰anahukna hutma tamagra Nagri kumapina, Nigrane kini trate maninetma, tine nezane nenetma, Israeli vahe'mokizmi 12fu'a naga nofimofona kini trate maninetma refko huzmantegahaze.

Pita'a Jisasi amagena humisnia naneke

(*Mat 26:31-35, Mak 14:27-31, Jon 13:36-38*)

³¹Saimonivoe Saimonivoe, Kagra antahio, witi rgamofu anoma'a hareankna huno Sata'a regaheno kenaku nehie. ³²Hianagi Saimoniga kagrikura nunamu hugantenoankino, kamentintimo'a evu oramigahie. Hanki henkama rukrahe'ma hanunka, kagra kafuhe'ina zamazeri hanavetio. ³³Hianagi Pita'a anage hu'ne, Ramoka, nagra tro hunoankina, Kagra kina nompivi nanana, nigrane vugahu'e. Frisanana nigrane frigahu'e. ³⁴Anage Agra hu'ne, Pitaga Nagra negasamue, meni kenage kokorege osu'nenkenka, Jisasina onke'noe, hunka tagufa zupa vahane hugahane. ³⁵Nehuno anage huno zmasami'ne, Nagrama erizania

omerisazeguma hunermantena, zgo eriri ku'ene, agia nona erineta ovihoma hugeta vzana, tamagra magozankura upara hu'nazafi? Hige'za zamagra hu'za, i'o atupara osu'none hu'naze. ³⁶Jisasi'a anage huno zmasami'ne, hianagi menina, zgoma eriri kura enerita, anahukna hutma kura eneritma, bainati kaziknoma e'orinenamotma nakre (saket) kutmia zgore atretma zgo eritma bainati kazinknoma magora mizaseho. ³⁷Na'ankure Nagra anage hu'na neramasamue, avontafipima krente'nea kemo'a, *kumi vahe'ene Agrira hampri'naze hu'neana*, Nagriku huno krentenea kemo'a nagrite eama hugahie. (Aisa 53:12) ³⁸Hige'za amage'ma nentaza disaipol nagamo'za amanage hu'za hu'naze, Ramoka ko, tare kzi eri'none hu'za hzageno, Sa eri'naze, huno zamasm'i'ne.

Jisasi'a Getsameni hozafi nunamu hu'nea naneke

(Mat 26:36-46, Mak 14:32-42)

³⁹Jisasi anage huteno, nompinti atiramino koma nehiaza huno Olivi agonare nevig'e'za, amagama nentaza disaipol nagamo'za avariri'za vu'naze. ⁴⁰Jisasi'ma ana agonare uhnatiteno, amanage huno zmasami'ne, nunamu nehutma rehezama esigetma evuoramiho. ⁴¹Anage huteno, have matevazageno uneramia avamente zmatreno vuno, ome renarenamagino agafa huno nunamu huno, ⁴²anage hu'ne, Nenfaga Kagri kavesima me'nenigenka ama knazana eri atrenanto. Hianagi nagri navesira ovaririnka, Kagra kavesi avaririo, huno nehigeno, ⁴³anante monafinti mago ankeromo Agrite efore huno azeri hankavetine. ⁴⁴Jisasina tusiza huno kna'avenesigeno, mago'ane hanavetino nunamu nehigeno, kora amunasisi huno mopafi tagiramine. ⁴⁵Nunamuma huteno otino vuno ome zmageana, amagama nentaza disaipol nagara zmasunkuma hazazamo kna zamesino, zmazeri zamavutoko hige'za mase'nazageno, ⁴⁶anage huno zmasamine, nahigeta tamavura mase'naze? Reramahe'za esigetma traka hu'zanku, otitma nunamu hiho.

Judasia'a komoru huno Jisasina ha' vahe zmazampi avrentenia naneke

(Mat 26:47-56, Mak 14:43-50, Jon 18:3-11)

⁴⁷Jisasi'a anage huno nezmasamigeno, hakare vahe'mo'za eri hantage'za neazageno, ananpina 12fu'a amagama nentaza disaipol nagapintira magozamimo, Judasi'ema nehaza ne'mo zmavreno ne-eno, eama huno Jisasina agi'antako hu'naku e'ne. ⁴⁸Hianagi Jisasi'a amanage huno Judasina asami'ne, Judasiga nagri antako nehunka, komoru hunka ha' vahe zmazampi, Vahe'mofo Mofavre avrente'za nehampi? ⁴⁹Anama hige'za, Jisasi'enema mani'namo'za fore'ma hunaku'ma hiazana nege'za, Ramoka, bainati kazinkanonu zamantagi sanune? nehzageno, ⁵⁰magozmimo kazinkno erino ugagota prisi nemofo kazokzo eri'za nera tmaga kaziga agesa antagi akre'ne. ⁵¹Hianagi Jisasi'a anage hu'ne, atro,

amanahuzana mago'ane osuo nehuno, agesare avako higeno so'e hu'ne. ⁵²Anante Jisasi'a ugota prisi vaheku'ene, mono nOMPI kegva nehaza vaheku'ene, mono kva vahe'mo'za azerinakuma aza vahekura anage huno zmasami'ne, Tamagra bainati kazinknonu'ene kumpa kanonu kumzafa vahema azerinakuma hiaza hutma hara renantenaku neazo? ⁵³Hakare zupa kna'ane kna'ane ra mono nOMPI tamagrane magopi mani'noana nazeori'naze. Hanki ama kna tamagrizane. Hanizamofu hanavemo'a agatere.

Pita'a Jisasinku onke'noe, hu'nea naneke

(Mat 26:57-58,69-75, Mak 14:53-54,66-72, Jon 18:12-18,25-27)

⁵⁴Jisasina azerite'za avre'za ugota prisi ne'mofo nonte nevazageno, Pita'a zमारिरिनो ogamu'a e'ne. ⁵⁵Ugota prisi nemofo kuma amunOMPI teve hugrete'za, mni'nageno, anampi Pita'a zamagrane umani'ne. ⁵⁶Mago eri'za mofamo'a Pita'a teve anefate mni'negeno ke'nene huno negeno, ama nera Jisasi'ene nemnia nere. ⁵⁷Hianagi Pita'a anage hu'ne, ama a'moka nagra antahina kena osunoa neku nehane huno vahane hu'ne. ⁵⁸Anante osi'agna evigeno, mago nemo negeno Pitanku huno, kagranena mago zmimoke! Hianagi Pita'a huno, ama ne'moka nagra ana nera omani'noe! Hu'ne. ⁵⁹Mago'a osi'a knama evigeno, mago ne'mo eno mago'ane hankavetino, ama nera agrane vano nehigena kenoa nere. Na'ankure agranena Galili ne' mani'ne. ⁶⁰Hianagi Pita'a anage hu'ne, ama nemoka, nagra kena antahina osu'noa neku nehane nehigeno, kokorege hu'ne. ⁶¹Ramo'a rukrahe huno Pita negegeno, kokoremo ageru orunenigenka, 3'a zupa vahane hugahane huno, Ramoma asami'nea kegu Pita'a agesa antahine. ⁶²Pita'a megia vuno tusiza huno zavi ome ate'ne.

Jisasina azanva ke hu'naza naneke

(Mat 26:67-68, Mak 14:65)

⁶³Hagi Jisasima azeri'namo'za azanava ke hunenteza kano nemiza, ⁶⁴avua kisu hunente'za, iza negehefi kasnampa ke hunka huama huo hu'za antahige'naze. ⁶⁵Mago'ane hakare azanava ke hunente'za, huhaviza hunte'naze.

Jisasina avare'za kanisol vahete vu'naza naneke

(Mat 26:59-66, Mak 14:55-64, Jon 18:19-24)

⁶⁶Nanterama segeno'a, kva vahezgane, ugota prisi vahe'ene, kasegere ugota hu'naza vahe'mo'za, Jisasina avare'za mono kanisol vahete vu'za anage hu'naze, ⁶⁷Kagra Kraisiga maninenunka, tasamio hazanagi, Jisasi'a anage huno zmasami'ne, Nagrama tmasamisuetma, tamentintia osugahaze. ⁶⁸Hanki Nagrama tmantahiganena, tamagra kenonani'a osugahaze. hu'ne. ⁶⁹Hianagi amaretima vniana, Vahe'mofo Mofavremo'a,

Anumzamofu hanavefi azantmaga'a kaziga manigahie. (Sam-Zga 110:1)
 70 Hige'za zamagra makamo'za hu'za, kagra Anumzamofu mofavre
 mani'nampi? Hu'za hazageno, izo Nagra anane, hige'za 71 anante zamagra
 hu'za, mago'enena na'ane hanigeta antahisunku antahigegahune.
 Na'ankure tagra nentahunkeno Agra'a agipinti Anumzamofu mofavre
 mani'noe hu'ne.

Jisasina Paerotinte avre'za vu'naza naneke
(Mat 27:1-2,11-14, Mak 15:1-5, Jon 18:28-38)

23 1 Ana maka vahe'mo'za erihantage'za Paerotinte, Jisasina avre'za
 vu'za, 2 amanage hu'za erigafa hu'za naneke hunte'za, tagra
 konkono ama ne'mo'a havi kante Jiu vahetia zmareno nevuno, Sisana
 takesi zgoa omiho nehuno, Agra'agura huno Nagra Kraisina kini mani'noe
 hu'ne. 3 Ana hazageno, Paeroti'a Jisasina anage huno antahigene, Kagra
 Jiu vahe'mofo kinio? Jisasi'a ana kenona'a anage huno hu'ne, Ha e'i
 kagraka'a nehane. 4 Anante Paeroti'a ugagota prisi vahe'ene, ana vahe
 kevugura anage huno zmasamine, nagra ama ne'mofompina mago
 hazenke zama'a kena eri fore osue. 5 Hianagi zamagra hu hankveti'za,
 agra rama'a vahe'mokizmi zmarimpa zmazeri otino, maka Judia kaziga
 rempi huzamine. Anazamo Galiliti agafa huno amarera ehnatine.

Paeroti'a Jisasina avreta Herotinte viho hu'nea naneke

6 Paeroti ana naneke nentahino'a, Jisasi'a Galili ne' mani'neo huno
 hu'ne. 7 Hagi Paerotima antahiana, Jisasi'a Heroti kvagrinea mopafinti
 e'ne nehuno'a, Herotinte huntene. Herotia ana knafina Jerusale
 emaninegeno huntengeno avare'za vu'naze. 8 Herotinte avare'za vzageno,
 Heroti'a Jisasima negeno'a tusi muse hu'ne. Na'ankure Jisasina agenke'a
 hakare zupa antahitere nehuno, magokna Agra kaguvaza eri fore
 hanigena kesue huno antahinegu hu'ne. 9 Heroti'a rama'a antahige
 naneke hianagi, Jisasi'a kenona'a osu mani'ne. 10 Hagi ugagota prisi
 vahe'mo'zane, kasegere ugota hu'naza vahe'mo'za, anante oti'za
 mani'ne'za, hu hankveti'za Jisasina kegaga hunte'naze. 11 Hanki Heroti'ene
 sondia vahe'ane, Jisasina revatga vatago nehu'za, azanava anteza azeri
 haviza hute'za, knare avonke kukena eri antaninente'za, huzmantege'za
 Paerotinte ete avre'za vu'naze. 12 Na'ankure znagra kora ha' vahe tro hune
 manina'ankino, ana knazupage, Paeroti'ene Herotikea erimago znarimpa
 hu'na'e.

Paeroti'a Jisasina zminea nanenke

13 Hagi Paeroti'a ugota prisi vahezgane, kva vahezgane, vahetamine
 kehutru huno, 14 anage huno zmasami'ne, ama ne'ma avretma nagritema
 aza nekura hutma, vahetamina avreno havikante nevie hutma hazanagi

keho, nagrama tamagri tamavuga Agri'ma rezagnena koana, tamagrama hunentaza kemofona agafa'a kena erifore osue. ¹⁵Heroti'enena magozahu antahintahi hu'negu, ama nera hunteteno tagritega e'ne. Antahiho, ama ne'ra magore huno ahefriga hazenke osu'ne. ¹⁶E'ina hu'negu, kanonkeve amitena atresugeno vugahie huno Paeroti'a hu'ne.

Barabasi katufegeno vu'nea naneke

¹⁷[Amanahukna nehazane, kafune kafunena Anumzamo Israeli vahe ozmahe zamagtere'negu antahimi ne'za neknarera, Paeroti'a kina nompinti mago vahe kazufe zamitere nehiane.] ¹⁸Hianagi maka vahe'mo'za ranke hu'za kezati'za, Jisasina avreta ome ahenefrita, Barabasi katufe tamio! hu'naze. ¹⁹[Barabasi'a, Jerusale rankumate kamani vahe ha' renezmanteno, mago vahe ahefrigeza kina hunteteno mani'nea nere.] ²⁰Paeroti Jisasima atresigeno vanigu, mago'ene veara zamantahigene. ²¹Hianagi zamagra mago'ane kezatiza, rugeka zafare aheta hantiho! Rugeka zafare aheta hantiho! Huza nehazageno, ²²Paeroti'a mago'ene 3'a zupa zamantahigeno, nagafarere? Nankna hazenke ama ne'mo'a hu'negeta nehaze? Nagrama kena eri fore'ma huana, friga hazenke'a osu'ne. E'ina hu'negu nagra kanonkeve amitena atresugeno vugahie. ²³Hianagi zamagra kazigazi hu'za, rankefinti antahige'za, rugeka zafare ahefrio hu'zama hazankemo, Paerotina agu'a azeri rukrehe hu'ne. ²⁴Hagi kema hazare, Paeroti'a antahintahi'a retrohuno Jisasinkura ahefrio hu'ne. ²⁵Hagi zamagrama kamani vahe ha' renezmanteno vahe zmahe fri'nege'za kina hunte'naza ne'kuma antahigaza ne' katufe nezamino, hanki Jisasina ahefrisunema hazagu avarezamine.

Jisasina rugeka' zafare' ahe'naza naneke (Mat 27:32-44, Mak 15:21-32, Jon 19:17-27)

²⁶Jisasima avare'za nevazageno mago Sailiniti (Afrika) nera agi'a Saimonikino, Jerusale ne-ege'za kantega ome nege'za, Jisasi rugeka zafa erio hu'za eri kofintageno erino Jisasina avaririno vu'ne. ²⁷Jisasina tusi'a vea kevumo'za avaririza nevazageno, ananpina mago'a a'nenagamo'za zamasunku hunente'za, zavite'za vu'naze. ²⁸Hianagi Jisasi'a rukrahe huno nezmageno amanage huno zamasmine, Jerusale kumate a'nemota nagrikura zavira oteta, tamagragu'ene mofavre timigu'enenku zavira ateho. ²⁹Antahiho, mago kna ne-eankiza vahe'mo'za anage hugahaze, narvo a'ne mo'zane, mofavre onte'anene, mofavre ami anuntage nosnamo'za muse hiho hu'za hugahaze. ³⁰*Ana nehu'za zamagra agafa huza, ra agonamoka ankrisenka refiteranto, hu'za nehu'za, osi 'agonapura refiteranto hu'za hugahaze.* (Hos 10:8) ³¹Na'ankure kasefa huno me'nenia zafamofoma e'inahuma hunteteno, osapama ana zafamoma renkenoa, inanknaza fore hugahie?

³²Tare kumzafa netrene, Jisasine magoka zanahe frisazegu zanavre'za vu'naze. ³³Aseni zaferine (Golkote) nehaza agonarema zamagra vute'za, Jisasine tare kumzafa netrena keka zafare zmahe'za hanti'naze. Magomofona Jisasi azantmaga ahe'za nehantiza, magomofona aza hoga hanti'naze. ³⁴Hianagi Jisasi'a anage hu'ne, nafanimoke, ontahine'za anara nehazanki, kumizmia atrezmanto. Anage nehige'za sondia vahe'mo'za zaza kena'a refko huza erinaku taisi zokogo re'naze. (Sam-Zga 22:18) ³⁵Ana nehazageno, hakare veamo'za anante otine'za uruha nehazageno, kva vahe'mo'zanena azanvanke hunte'za, vahe'mokizmia zamza nehia neki, Anumzamo huhamprintenemo Krasima mani'nesuno'a atregeno agra agu'vazisnigura kamaneno hu'za nehazageno, ³⁶Sondia vahe'mo'zanena azanava ke nehu'za, akahenea waini tina eme nemiza, ³⁷Kagra Jiu vahe'mokizmi kinima mani'nesunka, kagra ka'a kaguvazio! hu'za hu'naze. ³⁸Hanki asenirega anage hu'za avona kreza ome hentenaze, ***ama'i Jiu vahe'mokizmi kinie.***

³⁹Mago kumzafa ne'ma aheza hantinaza nemo'enena Jisasina kesuno, Kagra Kraisinga omninano? Kagra'ka'a kagu'nevazinka, tagri'enena taguvzio! ⁴⁰Hianagi mago'mo'a azerikorino, kagra Anumzamofonkura korera nosano? Ana mikomota anahukna knazampi mani'none. ⁴¹Tagra tamage huta hazenke hu'noa zamofona nona'a, eriga knaza eneru'e. Hianagi ama ne'mo'a mago hazenke osu'ne. ⁴²Anantera anage huno ana ne'mo'a hu'ne, Jisasiga hihamukafima manisunka kagesa antahinamio. ⁴³Jisasi'a anage huno ana nera asami'ne, tamage huna negasamue, kagra menina nagrane mona avasesezama'ane kumapina Paradais umanigahane.

Jisasi' fri'nea naneke

(Mat 27:45-46, Mak 15:33-41, Jon 19:28-30)

⁴⁴Tuelufu kilokinaza higeno, maka mopafina hanimo refitegeno, kinaga 3 kilokuma higeno rumsa hu'ne. ⁴⁵Na'ankure zgemo'a ananknafina remsa osu'ne. Hagi ra mono nOMPI tafinaza tavravemo'a amu'nompinti ruhakeke huno fenkamu uramine. ⁴⁶Jisasi'a ranke huno, Nfa'nimoka kagri kazampi avamuni'a antoe nehuno vgare asimu atreno frine. (Sam-Zga 31:5) ⁴⁷Sondia vahe'mokizmi kva ne'mo anazama hiazama negeno'a, agafa huno Anumzamofona agi erisaga nehuno, tamage ama fatgo ne'kino hazenkea omnene hu'ne. ⁴⁸Hanki maka vea kevumo'za anazama fore hu'neaza ome kete'za ne-eza, zamasunku zampi zamarimpare zamaza refiteriri huza vu'naze. ⁴⁹Hanki maka Jisasi rone'amo'zane, Galili kazigati Agrane e'naza a'nene, ogantu umani'ne'za ana zama fore hiazana ke'naze.

Jisasi erisente'naza naneke

⁵⁰Mago nera Josefe'e nehaza nekino knare huno fatgo avu'va ene ne', kanisol vahepina mani'ne. ⁵¹Kanisol vahe'mo'za, Jisasima ahenakuma

kema retroma hazankerera agra mago rimpa osu'nea nere. Ana nera Jiu vahe'mofo rankumapinti Aramatia nekino, Anumzamofu kumaku avega ante'ne. ⁵²Ana ne'mo Jisasi avufga erino ome asentenigu, Paeroti ome antahigeteno, ⁵³vuno rugeka zafareti Jisasi avufga ome eri fenkma atreno, efeke tavravefi anovazino erino have fregeno hanagatitenea kampi ome antene. Magore huno ana havegampina kora fri vahera ome onteneffi ome ante'ne. ⁵⁴Mni fruhu kna (Sabat) eza hige'za ana knarera retrotra nehaza kna fore hu'ne. ⁵⁵Galiliti Jisasi amagama ante'za e'naza a'nemo'za, ana havegampima avufga'ama antazana ke'naze. ⁵⁶Anante rukrahe hu'za vu'za mana nentake'zane, masvene retro ome hu'naze. Mni fruhu kna (Sabat) zupa kasegemoma hu'nea kante anteza manigsa hu'naze.

Jisasi'a fri'nefinti oti'nea naneke

24 ¹Hanki ese knazupa Sonta nanterana rumsa osu'nege'za, mananentake'zama tro hu'nazaza eri'za Jisasima havegampi ome ante'narega vu'naze. ²Hagi zamagrama vu'za ome kazana, ana havegantema runkanirenea havea rezahe hutrenage'za kenaze. ³Hianagi zamagrama havegampima ufre'za kazana, Ramofo Jisasi avufga omnenege'za ome ke'naze. ⁴Avufa'a nonke'za tusi zamagesa nentahizageno, masanentake huno efeke kukena hu'na'a netremoke ame hune anante otinake'za, ⁵ana a'nemo'zama zmagogogu nehu'za, kepri hu'za mani'nage'no, ana netremoke anage hu'ne zmasami'naze. Na'a higeta ksefa huno mani'nea vahekura, fri vahe kumapina nehakraze? ⁶Amafina Agra omanine, frinefintira ko otine. Hanki tamagrane Galili mani'nenno tamasmine kegu tamagesa antahiho. ⁷Vahe'mofo Mofavrea kumike vahe'mofo zmazampi avrentena, rugeka zafare ahesnageno friteno, tagufa kna manino otigahie, huno hu'nea kegu tamagesa antahiho, ⁸hu'ne nehake'za, ana a'nemo'za Jisasima hu'nea kegu zmagesa nentahiza, ⁹ana havegana atre'za rukrehe hu'za vu'za, ¹¹ni'a amagama nentaza naga'ane, ruga'amokizminena maka naneke ome zamasmu vgare'naze. ¹⁰Hanki ana a'nemokizmi zamagi'a, Makdala kumateti' a' Mariaki, magora Joanaki, Jemisi nerera agi'a Maria ene, mago'a a'nemo'zane, ana nanekea aposolo nagara ome zmasami'naze. ¹¹Hianagi anankema nentahiza amne kehaze nehu'za, anakegura zmentinti osu'naze. ¹²Hianagi Pita'a otino agareno vuno havegante ome kepri huno agu'afi keana, efeke tavravema anakintenaza tavravege me'negeno negeno, rukrahe huno anazanku tusiza huno agha antahime vu'ne.

Tare netremoke Emeus vu kantega Jisasi ke'na'a nanake

¹³Ana zupage tare amagama nenta'a disaipol netremokea Emeus nehaza kumate vuna'e. Ana kumateti Jerusale vnazana 11 kilomitanaza

me'ne. ¹⁴Znagra maka'za fore'ma hu'nea zanku naneke hume nevakeno, ¹⁵Jisasi'a Agra'a ehnatige'za magoka ana netrene vu'naze. ¹⁶Hianagi zanavurgamofona rehiza higene Jisasi'e huke ke anke orena'e. ¹⁷Jisasi'a anage huno znasamine, na'anku ama nenekea tanagra hugantugma hutna nea'e? huno znantahigegene anante znasunku nehuke uotina'e. ¹⁸Hagi magomofu agi'a Kriopasi'e nehaza ne'mo ana kemofu nona'a huno, kagrake'za Jerusale nantu antenka ne-enka amagnafima fore huneazana ontahinano? ¹⁹Jisasi'a anage huno znasami'ne, nanknaza fore hu'negeta neha'e? Higene Nazareti Jisasinte'ma fore hu'neazanku nehue. Agra kasnampa ne'kino, Anumzamofu avure ene, maka vahemofu avurera, erizama'amo'ene keamo'enana hanavenentake hu'nea ne'ma, ²⁰ugagota pris vahe'mozane, kva vahetimo'zane ahesageno frisniegu, avarezamizage'za ahe'za keka zafare hantinaza ne'ku nehue. ²¹Hianagi tagrama tagesa antahunana, Israeli vahe'mota knazantifinti tahoke ahesia nere huta nentahune. Tmage ama anazana fore'ma hu'neana 3'a kna evu'ne. ²²Hianagi tagripinti ana havegante nanterame ome ke'naza, a'nemo'za antri huna ke eme tasamiza, ²³avufa'a omne'nege'za ome negazageno, avana kazankna huke, tare ankeru netremoke, kasefa huno Jisasi'a mani'ne huke huna'a naneke eme tasmi'naze. ²⁴Tagripinti mago'amo'za havegantega anaza ome kenaku vu'naze. Mika zanku'ma ana anemo'za hu'nazaza ome kazanagi, Jisasina onke'naze. ²⁵Jisasi'a amanage huno znasami'ne, Kasnampa vahe'mo'za hu'naza maka nanekegura negi nenetma tamagu'afina tamentintia nosaze! ²⁶Kraisi'a ataza eriteno, msa'afi ufresiana, knarera osugahio? I'o. ²⁷Huteno anante agafa huno, Mosesinteti vuno maka kasnampa vahe'mozama, Agrikuma huza krentenaza kea znasamime vu'ne. ²⁸Hagi znagrama vunaku'ma hu'na'a kumate unehnatizageno, Jisasi'a ana kumara agatereno vaniaza hu'ne. ²⁹Hianagi hanavetike agaterenka ovugahane huke znagra nehuke, hanihuza nehianki masetenka vnane hu'ne kazigazi hakeno, ana nompri znagrane umreri'ne. ³⁰Jisasima nezama nenaku aza tununte tratema umanineno breti erino, Anumzamofu susu hunteteno, tamanasino agafa huno neznamigeno, ³¹zanavurgamo hari higeke Jisasi'e huke ke ankerakeno, Jisasi'a ru fnane hu'ne. ³²Znagra znagra anage hu'na'e, kantegama neokenoma keagama nerasamino, Anumzamofu avontafepinti kema eriana nehigene'a, tagu'amo'a otianagi, keta antahita osu'no'e. ³³Znagra anage nehuke, ame huke rukrehe huke Jerusale kumate vuna'e. Jisasima amagama nentaza 11ni'a disaipol nagamozane, mago'a naga'moza'nena eri atru hu'nage'za ome nezmagake'za, ³⁴Zamagra anage hu'naze, tamage Ramo'a otino, Saimoninte ufore hu'ne! Huza nehazageno, ³⁵ana amagama nenta'a disaipol netremoke kantega fore hu'neazane, breti erino tamanasino znamigeke, Jisasina ke ankerena'a agenke huama hu'na'e.

Jisasi mago'ane amage'ma nentaza vahete efore hu'nea naneke

³⁶Anazanku'ma naneke nehazageno'a, Jisasi'a amu'no zimifi efore huno otineno anage hu'ne, tamarimpa frune maniho. ³⁷Hianagi zamagra havi avamu negone hu'za zamagesa nentahi'za, antri hu'za koro hu'naze. ³⁸Ana nehazageno Jisasi'a anage huno zmasamine. Nahigeta korera nehuta, tare tamagutmagesa nentahize? ³⁹Ama Nagrani'a mni'noanki nagane, nazanena navako hutma keho. Na'ankure Nagrima hu'neaza huno, hankromofona avufgane zaferinanena omnene. ⁴⁰Anagemama huteno'a, agane, azane anamokizmi zameri hu'ne. ⁴¹Na'ankure zamagra tusi muse nehu'za, antri nehu'za zamentinti nosazageno, Jisasi'a anage hu'ne, tamagra mago'a nezana antenazafi? ⁴²Zamagra kre hagege huntenea nozame eri amizageno, ⁴³anamokizmi zamure erino nenege'za ke'naze.

⁴⁴Jisasi'a anage huno zamasm'i'ne, Nagra tamagrane mani'nena, anage huno'e, maka kema Nagriku hu'za Mosese kasegefine, kasnampa vahe'mo'za krenaza kefine, zgame avontafepima krentenea zamo'a nena'a fore hugahie. ⁴⁵Anante Jisasi'a zamaza huno antahintahizmia zmazeri ama hige'za, maka Anumzamofa avontafepima krente'nea kea antahini hu'naze. ⁴⁶Agra anage huno zmasami'ne, avontafepina amanage huno krentene, Kraisina ahesageno ata erino friteno, tagufa knare otigahie. ⁴⁷Vahe'mo'za Agri agifi, zamagu'a rukrahe hanageno, Anumzamo'a kefozazimi eritrezamantesia kea, Jerusale kumate erigafa hute'za, mika kokankoka vahete vugahaze. ⁴⁸Tamagra Nagritema fore higetma kenaza zana huama hugahaze. ⁴⁹Hanki antahiho, Nfa'nimo huvempa huno tamigahue hu'nemofona, huntesusugeno tamagrite egahie. Hu'neanagi tamagra (Jerusale) rankumapi manineta monafinti hanavea eriteta vuta eta hiho.

Jisasi'a ete monare mreri'nea naneke

⁵⁰Jisasi'a anage huteno zamavreno Betani vuno azana erisaga hunagamuteno, asomu ke huzmantene. ⁵¹Anama hunezmantegno, Anumzamo'a avregeno zmatreno monafi mareri'ne. ⁵²Zamagra mono huntete'za, tusi musenkase hume Jerusale kumate ete vu'naze. ⁵³Ana hute'za ra mono nomp'i mreri'za Anumzamofa agi erisaga huvava hu'naze.

Knare Musenke Joni Kre'nea Naneke

Kemo vahe fore hu'nea naneke

1 ¹Ese agafare Ke me'neane, higeno ana Kemo'a Anumzane me'ne, ana Kea e'i Anumzane. ²Ese agafarera Agra Anumzane tragoteno mani'neane. ³Maka'zana Agrake'za tro hu'ne, hagi mago'zana ru kampilira fore osu'ne, makazana Agrake tro hu'ne. ⁴Agripi asimura me'ne, hagi ana asimumo'a vahe'mofo Msa'e. ⁵Ana msamo'a hanizana remsa huntreankino hanizamo'a agateore'ne.

⁶Mago nera Anumzamo huntegeno e'ne, Ana nemofo agi'a Joni'e. ⁷Ana ne'ma e'neana, Msamofo naneke hanigu e'ne. Ana hanige'za naneke'a nentahiza zamentinti hugahaze. ⁸Agra ana msa omni'ne, hanki ana msamofo naneke hu'ama hanigu e'ne.

⁹Agra tamage msamo ama mopafi maka vahe remsa huzmentesigu egahie. ¹⁰Ama mopafi Agra mani'ne, hagi Agra'a ama mopa tro hu'ne hu'neanagi, ama mopafi vahe'mo'za Agrira antahi'za ke'za osu'naze. ¹¹Agra'a vaheku huno e'ne, hianagi Agri vahe'mo'za ovre'naze. ¹²Hianagi iza'zo nevareza Agri agifima zamentinti nehaza vahe'mokizmia, Agra'a hugnare hige'za Anumzamofu mofavre se'naze. ¹³Mofavremo'za arera afa zamesitero, vahe avesitero neve avesitera forera osunazanki, Anumzamo zamazeri fore hu'ne.

¹⁴Ana Kemo vahe fore huteno, tagri'ene mani'ne. Agri msazama'a tagra ke'none, magoke ante'nea Ne'mo hanave'ane msa zama'a Nefantegati e'ne. Asunku zamo'ene tmage kemo'a avite'nea Nere. ¹⁵Joni'a huama huno Agriku hu'ne. Agra kezatino amanage hu'ne, nagrama amama nehuana Agriku nehue, nagri nmage'ma ne-emo'a, nagrira nagateretfa hune. Na'ankure nagra fore osu'nogeno Agra pusante fore huno mani'neane. ¹⁶Higeta tagra ana maka'mota hakare zana Agripi avitenefinti eri'none, asunku huranteno muse zama'a agumpi agumpi huno neramie. ¹⁷Na'ankure kasegea Mosesempi tami'ne. Hagi asunku'zane tamage kea, Jisas Kraisiimpi tami'ne. ¹⁸Mopafi vahe'mo'a magore huno Anumzana

onketfa hu'ne. Anumzamofu mofavre magoke mani'neni, Nfa'amofu aumpinka mani'ne, Agra'a Anumzana mani'neni huama hu'ne.

Joni'a agra'agu hu'nea naneke
(*Mat 3:1-12, Mak 1:1-8, Luk 3:1-18*)

¹⁹Ama Joni agi agenke, Jiu kva vahe'moza, mono kva pris vahe'ene Livai vahera Jerusale kumateti huma zamantage'za antahige'ku vu'za, Kagra azage? hu'za ome antahige'naze. ²⁰Antahigageno'a, agra huama nehuno vahane osu'ne, huama huno, Nagra tmazahu nera Kraisi'na omni'noe. ²¹Hige'za, hagi azaga mani'nane? Ilaijago? hu'za hzageno, a'o, nagra Ilaijana omni'noe huno hige'za, kagra kasnampa nero? hu'za antahigageno, Agra kezmi nona huno i'o huno hune. ²²Hurantagetama e'nona vahe ome zamasmisunku nehune. Azaga mani'nane huta kagrikura ome zamasmigahune? Kagragura azage hunka nehane? ²³Agra anage hu'ne, ***Nagra mago Kezanke ka'ma mopafi mani'neni keza netiana Ramofu ka azeri ante fatgo hiho hu'nea Aisaia kasnampa ne'mo korapa hunte'nea mani'noe.*** (Aisa 40:3)

²⁴Hu'zmantage'za e'naza Farisi vahe'mo'za, ²⁵zamagra antahige'za, amanage agriku hu'naze, kagra Kraisi'gafi, Ilaijagafi, mago Kasnampa ne'ma omninenka, nahigenka mono tina fre nezmantane? ²⁶Joni'a kenonazamire anage hu'ne, nagra amne tintfanteti mono tina frenermantoe. Hu'neanagi tmagripina magora tamagra onke'naza ne' oti'ne. ²⁷E'ima Agra nagri nmage'ma esnimo'e, Agri aga'nona knare osu'noankina katu ofegahue. ²⁸Ana nanekea Betani kumara Jodani timofu asoparega antahige'naze, anante Joni'a mono tina frezamante'ne.

²⁹Anante kotigeno Jisasi'a agrite egeno negeno, Joni amanage hu'ne, keho, Anumzamofu sipisipi anentara, ama mopafi vahe'mokizmi kumira, Agra eri atregahie! ³⁰Ama'ne ana nera, Agriku'ma hu'na nagrama kema hu'noana, nagri namge'ma esnia nera, nagri'ra nagtereno ra agi eri'nea nere, nagra fore osu'nogeno, Agra korapa Agraragisa mani'nea nere. ³¹Nagra antahi'na ke'na Agrira osu'noanagi, Israeli vahemo'za Agrira antahiza keza hnaze hu'na, nagra ena mono tina eme frezmante'noe. ³²Joni'a huama huno amanage hu'ne, Nagra kogeno Avamura maho nmamo hiaza huno monafinti eramino Agrite emanige'na ke'noe. ³³Nagra ke'na antahi'na Agrira osu'noanagi, Agra'a hunantegeni mono tina frente'noa ne'mo nagrikura anage hu'ne, kankenoma avamu'mo monafinkati'ma, eramino Agrite'ma emani'nea ne'mo, Agra Ruotge Avamupi mono tina fre zamantegahie hu'ne. ³⁴Nagrani'a kete'na, huama hu'na ama Anumzamofu mofavre hu'na neramasmue.

Jisasi ese disaipol eri'za vahe'a zamavre'nea naneke

³⁵Anante zupa Joni'a, amagama nenta'a disaipol netrema'ane oti'neni,
³⁶Jisasi ne-egeni Joni'a negeni amanage huno hu'ne, Kehi, amu

Anumzamofa Sipisipi anentare, ³⁷anage hige'ne, Joni amagama nenta'a disaipol netremoke nentahi'ne, Jisasi amage'anteke vu'na'e. ³⁸Jisasi'a amage'a nevakeno rukrahe huno neznageno, Na'anku nehakra'e? huno znantahigege'ne, Hurami ne'moka inante Kagra nemnine? hu'ne antahigena'e. ³⁹Agra anage znagriku hu'ne, E'netna tanagratani'a emege'o hige'ne, Agrane vuke nemnia nonkuma omenege'ne ana zupa Agrane mani'nakeno, 4 kiloki hu'ne. ⁴⁰Ana nanterana mago'mo Joni hiankema antahiteno Jisasi amage'ma vu'nea nera Endru'e, Saimon Pitana nefu'e. ⁴¹Hagi Endru'a, Jisasi keteno pusante Endru'a nefu Saimoni keno, amamage huno asmi'ne, Tagra hago Mesaiana hakreta erifore hu'none. (E'i ana agima eri rukrehe'ma hu'neana Kraisi'e hu'ne.) ⁴²Jisasi'ne Endru'a, Saimonina avreno vu'ne. Vigeno Jisasi'a negeno anage huno asmi'ne, kagra Saimonige Joni nemofoga mani'nane, kagri kagi'a Sifasi'e hugahaze.^a (E'i ana agima eri rukrehe'ma hu'neana Pita'e hu'ne.)

Jisasi'a Filipine Nataniel kizni znagi hu'nea naneke

⁴³Mseno kotigeno Jisasi'a Galili vunaku nehuno Filipi ome negeno, Nagri namage anto hu'ne. ⁴⁴Hanki Filipi'a Betsaidati ne' Androne, Pita kiznia ra kuma zani'areti nere. ⁴⁵Filipi'a, Natanieli'e nehaza ne' kefore huteno amamage huno asmi'ne, Mosesi ene Kasnampa vahe'mo'zama avo tafepima agenke'ama krente naza Ne'ma, Nazareti kumateti Josefe nemofa Jisasi'e hu'naza nera hago hakreta erifore hu'none, huno asmi'ne. ⁴⁶Natanieli'a anage huno Filipina antahige'ne, Nazaretia knare'zana efore hugahio? Filipi'a anage hu'ne, kagrak'a enka emego. ⁴⁷Natanieli Agritega ne-egeno Jisasi'a negeno amamage hu'ne, keho, tmage Israeli vahere, agu'afina havige hu'zana omne'ne! ⁴⁸Nataniel Agriku anage hu'ne. Kagra inankna hunka nagrira nage'nane? Jisasi ke'nona huno amamage hu'ne, Filipi'a kagi osu'negenka fiki zafa agafafi mani'nanke'na ko kage'noe. ⁴⁹Higeno Natanieli'a Agri ke'nona amamage hu'ne, Hurami nere, Kagra fatgo hunka Anumzamofa nemofoga mani'nane. Kagra Israeli vahe'mokizmi Kini nere. ⁵⁰Higeno, Jisasi'a ke'are anage huno asmi'ne, Na'ankure Nagrama hu'na fiki zafa agafafi mani'nanke'na kage'noema huazanku kmentinti nehano? Henka'a agtere'neaza ruzahu'za kagra kegahane. ⁵¹Higeno Agra amamage huno Natanielina asmi'ne, Tamagerafa hu'na Nagra kagrira negasamue, kagra negesankeno mona kafamo'a anagisigeno, Anumzamofa ankeri zgamo'a, Vahe'mofa Mofavrere mrerino tamino nehnigenka kegahane.

Tintfanu waini tro hu'nea naneke

2 ¹Tareknamofa efi knazupa, arave hunaku Kana kumate Galili kaziga nehzageno, Jisasi nerera'a anante mani'ne. ²Ana hige'za Jisasi'ne

^a Pita'e agimofa agafa'a have hu'ne.

Agri amage nentaza disaipol naga'anena, aravema huku hzarega zamagi hazage'za vu'naze. ³Wainima vgaregeno'a, Jisasi nerera'a asmi'no, waini tina sago vgare'ne huno Agrira asmi'ne. ⁴Jisasi'a nererana amanage huno asmi'ne, ama a' moke, Nagra naza ama zampina huku hugenka nehane? Nagri kna zahufa efore osu'ne. ⁵Jisasina nerera'a eri'za vaheku anage huno zamasm'i'ne, Agrama inankna kema tmagrima tmasminia'zana hiho. ⁶Higeno keana 6si'a havereti tro hunte ti afi kavo Juda vahe'mokizmi avu'avapina kvofinti ankehi'za tina fre'za avu sese nehazane, tina mago 100 lita azeritere huga tin kvorami me'ne. ⁷Jisasi'a eri'za vahe huzmanteno ana kvo zgafi ti ome afi viteho hige'za tina ome afi vite'naze. ⁸Higeno Jisasi anage hu'ne, anampinti mago'a afita ne'zante kva hu'nea nera ome amiho, hige'za afi'za ome ami'naze. ⁹Ana ne'mo tima neno keana waini ti fore higeno, igati efore hu'neo antahino keno osu'ne, (hagi tima omeffi'naza vahe'moza ke'naze), kavete kva hu'nea ne'mo aravema hia ne' asmi'no, ¹⁰maka vahe'moza pusante knare wainia tgi zamige'za kema hazage'za, aza vahe'moza netageno, anante evurami'nea waini'a tgi zamige'za nenaze. Nehazanagi kagra knare wainia ante'nanteti menina eri fore hane! ¹¹Agra'a kaguva avu'ava zama'a erigafa huno Jisasi'a Galili kaziga Kana kumate nehuno, Agri'a hihamu msa zama'a eri ama hige'za, Agri amage nentaza disaipol naga'mo'za Agrite zamentinti hu'naze. ¹²Anama huteno Jisasi'a Kapenium urami'ne, Agrane nerera ene afuhe'zane amagemata nentaza disaipol naga'anena ana kumate vu'za mago'a zzegna umani'naze.

Ra mono nompinti Jisasi'a zamahenati'nea naneke
(*Mat 21:12-13, Mak 11:15-17, Luk 19:45-46*)

¹³Jiu vahe'ma kinafinti zamare'nea (Pasova) neza'ne knamo kofta higeno Jisasi'a Jerusale kumate mreri'ne. ¹⁴Vuno ra mono nompimi omege'neana vahe'mo'a vurimakama, sipisipi'ma, maho nmane, zgo rezahe nehza vahe'moza tra omente emente hu'za maketi nehzageno ome zamage'ne. ¹⁵Ome zamageteno nofite kno tro hiazamo ra mono nompintira sipisipi'ne vurimakane vahe'ene zamahenati'netreno zgoma re'zahema nehaza naga'mokizmi zgoa ruherafi netreno, ita zamia eriruvahe huherfi'ne. ¹⁶Maho nmama maketima nehza vaheku, Ama nma avreta viho. Nfa'nimofono nona maketi kumara eri tro osugahaze, huno zamasm'i'ne. ¹⁷Agri amage nentaza disaipol nagamo'za, kasnampa vahe'mo'za avontafepi kre'nea kegu zamagesa antahi'naze. Amanage huno kre'ne **Kagri noma kegva hu'na mani'navesizamo'a nagu'afina tusiza huno navenesie.** (Sam-Zga 69:9) ¹⁸Jiu vahe'mo'za Agriku anage hu'naze, Kagra inankna avame'za tagrira huraverisanketa negeta ama nera mrerisa nere huta hugahune? ¹⁹Jisasi'a ana kemofo nona'a amanage hu'ne. Ama ra mono nona tgana vazitma eri haviza hinkeno tagufa

zgegna manite'na azeri oti'нено, huno hige'za, ²⁰ anante Jiu vahe'mo'za anage hu'naze, 46si'a zgegfu eri fri'za ama mono nona ki'naze. Hagi Kagra inankna hunka tagufa zge knafina kigahane? ²¹ Hianagi ra mono nonku'ma kema hu'neana, Agra avufa mono nonku hu'ne. ²² Anagama hu'nere, fri'nefinti'ma otige'za, Agri amage nentaza disaipol nagamo'za e'inahu zanku hu'ne hu'za zamagesa antahi'naze. Nentahi'za avon tafemo hu'nea kere ene, Jisasi'ma hu'nea nanekere zamagesa nentahi'za zamentinti hu'naze.

Jisasi'a maka vahe zamagu'a ke'nea naneke

²³ Kinafinti zamavre'nea kna antahimiza (Pasova) muse ne'zama ne'knare Jerusale mani'nege'za, hakaremo'za Agri agire zamentinti nehu'za, kaguvazama Agrama hiazana ke'naze. ²⁴ Hu'nazanagi, Jisasi'a Agra kzigatira antahiozmi'ne. Na'ankure miko vahera Agra zamantahino zamage'ne. ²⁵ Na'ankure, Agra antahiantahizankura upara osuneankino magomo'a hugesa osugahie. Na'ankure, Agra vahe'mofo agu'afina na'a me'neo, ko antahino keno hu'ne.

Nikodimasi'a, Jisasi antahige'nea naneke

3 ¹ Farisi vahepinti mago nera agi'a Nikodimasi, Jiu vahe'mokizmi mono kanisol ne' mani'ne. ² E'i ana ne'mo'a kenage hanimpi Jisasinte eno amanage huno antahige'ne. Hurami ne'moka antahi'none, Kagra hurami ne' Anumzamofontegati e'nane. Mago'mo'a Kagra hanaza huno amanahu avame zana osugahie, Anumzamo agrane mani'nesimo hugahie. ³ Jisasi kenona'a amanage huno asmi'ne, tamagerafa hu'na ama kea negasmue. Runema ksefa osnimo'a, Anumzamofu kumapina uofregahie, ⁴ Nikodimasi'a kenona'a huno, inankna huno ra vahe'mo'a ete osi mofavregna huno fore hugahie? Ete ra vahe'mo'a anta'amofu arimpafi ufrenkeno eteno ksente'gahifi? ⁵ Higeno Jisasi'a ana kemofo nona'a amanage huno asmi'ne, Tamagerafa hu'na kagrira negasmue. Aza'o tinteti'ene Avamuteti'ene ksefa osnimo'a, Anumzamofu kumapina uofregahie, ⁶ Mopafi vahe'mo ksente'nesiana vahere. Hanki Ruotge Avamu'mo eri fore hu'nesiazana avamure. ⁷ Amama ksamisua zankura Nagriku hie hunka kmanogura osunka, kagra etenka ksefa mofavre hampro, ⁸ Zahomo'a inantega vunaku hirega nevigenka agerutfama'a nentahine. Hagi inantegati eteno, inantega nevio antahinka kenka nosane. E'ina hu'za mika vahe'mo'za Avamupina ksefara nehaze. ⁹ Nikodimasi'a ana zanku, amanahu zamo'a inankna hugahie? huno higeno, ¹⁰ Jisasi'a ana kemofo nona'a amanage huno hu'ne, Israeli vahe'mokizmi rempi huzami ne' mani'nenka, ama nanekea antahi amara nosano? ¹¹ Tmagerfa hu'na negasmue. Kema nehunana, antahita keta hu'nona zanku huama nehunkenka, ana nanekegura kagra antahi

noramine. ¹² Mopafi zanku'ma negasmi'sugenka kagrama kmentintima osnunka, ina kna hunka monafi zanku'ma kasami'suana kamentintina hugahane? ¹³ Mago'mo'a monafinka mrerino ovu'ne. Hagi Agra monafinkati'ma erami'neana, Vahe'mofo Mofavremo erami'ne. ¹⁴ Mosese hagage kokampi osifa'vema erintesga hu'nea kna hu'za, Vahe'mofo Mofavrea azeri antesga hugahaze.^b

¹⁵ Hanigeno aza'o, Agripi amentinti hanimo'a, manivava asimu erigahie.

¹⁶ Anumzamo tusiza huno mopafi vaheku avesi nezmanteno, magoke ante'nea Ne'mofavre'a zami'ne. Agrite zamentinti hanamo'za fananne osu'za manivava hugahaze. ¹⁷ Na'ankure Anumzamo Mofavre'a huntegeno ama mopafima e'neana, mopafi vahe refko hinogu huntegeno ome'ne. Hagi Agripinkati vahe'mo'za zamagu'vazizana erisaze huno huntegeno erami'ne. ¹⁸ Aza'o Agripitema amentintima himofona refko huno nanekea hunonte, iza'o Agrite'ma amentintima nosimofona, trate ko avrenteno keaga hunte'ne. Na'ankure Anumzamofona magoke Mofavre'amofa agirera, agra amentinti osigu ana nehie. ¹⁹ Nanekema huzmante'siana, ama kemofa agafare huzmantegahie. Msamo'a ama mopafima efregeno'a, vahe'mo'za hni avu'ava'zanku avesinente'za msamofona avesi onte'naze. Na'ankure havi zamu'zmake'za hu'naze. ²⁰ Aza'o hvizama nehia vahe'mo'a, tvi'mofona zamesra hunente'za, msarera nomaze. Na'ankure haviza nehazazamo eama huzanku nomaze. ²¹ Hu'neanagi aza'o tamage avu'ava'ma nehimo'a tvitera egahie. Na'ankure hakaremo'za nege'za Anumzamofa avenesiaza nehie hu'za hugahaze.

Joni'a Jisasinku hu'nea naneke

²² Ananteti Jisasi'a amage nentaza disaipol naga'ane, Judia kaziga vu'za vahe'ene mago'a kna umani'ne'za mono tina fre zamante'naze. ²³ E'i ana knafi Joni'a, Salim kumamofa tava'onte Ainoni kumate mono tina frezmante'ne. Na'ankure anantega rama'a tina me'nege'za vahe'mo'za ete'vute hu'za mono tina fre'naze. ²⁴ Na'ankure Jonina kina huonte'naza knafine.

²⁵ Ana nehzage'za Jonima amage nentaza disaipol naga'ane, mago Jiu ne' ene, Juda vahe'mokizmi avu'avapi ti fre'za avu sese nehaza zanku keaga hu'naze. ²⁶ Nehu'za Joninte e'za amanage hu'za asmi'naze. Hurami (Rabbai) ne'moke, Jodan timofo kantu kaziga kagrane mani'neama, Agriagi hu'ama hu'nana ne'mo'a, mono ti fre nezmantege'za mika vahe'mo'za Agrite nevaze. ²⁷ Joni'a anage hu'ne, mago vahe'mo'a, mago zana e'origahie, ana hugahianagi monafinkati mago'zama amisigeno'a amne erigahie. ²⁸ Tamagra tmi antahi'nage'na amanahu kea hu'noe, Nagra Kraisi'na omni'noe hu'na hu'noe. Hianagi Agrira azeri henka atreno,

^b Nam-Ham 21:9

nagrira pusante hunantege'na e'noe. ²⁹Mago vemo'ma a'ma erinaku nehigeno rone'amo oti'nenno antahi nemino, aravema huku hia vahe'mofo ageruku muse nehie, e'ina higu nagrira muse zamo'a avite'ne. ³⁰Agri agimo mrieri anagamu atresigeno, nagri nagimo uramisie.

³¹Agra anagamiti e'nemo'a maka'zana agtere'ne, aza'o ama mopafinti'ma e'nesimo'a, ama mopafi vahekino, ama mopafi zankuke kea hugahie. Agra aza'o monafinkati'ma e'nemo'a, Agra maka'zamofona zamagtere'ne. ³²Agrama antahino keno hu'nea zante Agra naneke'a huama nehie, hianagi mago'mo'e huno agi agenke'a antahi anira osu'naze. ³³Iza'o, Agri agi agenke'a erimo'a, tamage huno Anumzamofona nanekegura nehie. ³⁴Na'ankure Agrira Anumzamofona huntege'no e'neankino, Anumzamofona keaga nehie. Na'ankure Agra refko osuga'are Avamura aviteno ami'ne. ³⁵Nefa'a, Nemofona avesinteno mika'zana kva hugahie huno, Agri azampi ante'ne. ³⁶Aza'o Nemofona amentinti hanimo'a manivava asimura erigahie. Hagi iza'o Nemofona kema rutagresimo'a asimura e'origahie. Hagi Anumzamofona tusi'a rimpaha knazamo agrite megahie.

Jisasi'a Sameria a'ene kegaga hu'nea naneke

4 ¹Jisasi'a antahiana Farisi vahe'mo'za hu'za Jisasi'a, Jonina agatereno rama'a amage antesaza disaipol nagara zamazeritru huno, mono tina frenezmente hu'za nehazanke antahi'ne. ²(Anage hzanagi Jisasi'a Agra'a mono tina freozmente'ne. Hagi Agri'ma amage nentaza disaipol nagamo'za mono tina fre zamante'naze.) ³Judias kaza atreno Agra mago'ene Galili vu'ne. ⁴Galilima vunakura Samaria mopa kazigati nevza kantega rugitgino vu'ne. ⁵Anante Samaria mopa kaziga nevuno, ana mopafi mago kuma agi'a Saikar nehazare uhanati'ne. Korapara Jekopu'a ana mopa tva'oma'are me'nea mopa, Josefena ami'neane. ⁶Ana kuma tva'onte Jekopuna tinkeri'a me'ne. Hagi Jisasi'a kama e'nea zamo avesra higeno ana tinkeri'e umanigsa hu'ne. Feru avame zgeha higeno anante umani'ne.

⁷Anante mago Samaria a'mo ti afinaku ana tinkeri'e egeno, Jisasi'a ana a'mofonku, Tina a'fi namio ⁸huno hune. Na'ankure Agri amage nentaza disaipol nagara ran kumategati ne'za mizasenuku zamagra vu'nazageno mani'nenno hu'ne. ⁹Anage higeno ana Samaria a'mo Jisasi'a huno Kagra Jiu ne' mani'nananki nahigenka Samaria a' monagura, tina a'fi namio hunka nantahi'negane? (Na'ankure Jiu vahe'mo'za Samaria vahe'enenaga tragote'za nomnize.) ¹⁰Jisasi'a ana ke nona'a asmi'ne, Anumzamofona negamia musezama antahi'nenkasina, iza'o kantahigeno kagriku'ma, tina a'fi namige'na na'nenno nehia ne'ma kagra antahigankeno, Agra asimura eri tina kamisine. ¹¹Ana a'mo Agriku huno Ra ne'moke Kagra tima afisana tafena e'ori'nankeno tinkeri'mo'a zaza huno urami'ne. Hagi Kagra igati ana asimura eri tina afigahane? ¹²Jekopu neragehona Kagra agterenka

onaga'a mani'nampi? Na'ankure agra ama tinkeria tamine, agra ana tinkerifinti nenege'za, mofavre naga'amozone afu'zga'amoza ne'naza tine. ¹³Jisasi'a ana a'mofo ke nona'a huno asmi'ne, Maka'mo'za ama tima nesnuza ete ru'ene tinkura zamesigahie. ¹⁴Hianagi izano Nagrama amisua tima nesuno'a, mago'ene tinkura ave'osigahie. Hianagi Nagrama aminaku nehua timo'a, kampu'i timo hiaza huno agu'afi me'neni, evava nehuno manivava asimu amigahie. ¹⁵Ana a'mo Agriku amanage hu'ne, Ra nemoka, ana tina namigeno, nagrira tinkura nave'osisige'na tima afi'zantera afetera oma'neni, huno hu'ne. ¹⁶Agra ana aku huno, Vunka, negvena ome ke hunka avrenka amare eno. ¹⁷Ana a'mo kenona'a huno asmi'ne, Nagra ve onte'noe higeno, Jisasi ana ara asmine, kagra vema onte'noe hunkama nehanana tamage hunka nehane, ¹⁸na'ankure kagra kotenka 5fu'a ve eri'nane, hagi menima kagrane mani'nea vea negve'a omni'ne. E'igu kagra tamage hunka nenasmine. ¹⁹Ana a'mo Agrira asmino, Ra nemoke, nagrama negagoana Kagra mago kasnampa ne' mani'nane. ²⁰Tagri tfahe'za ama agonafi monora hunte'naze. Jiu vahe'motma Jerusale kumateke monora huntegahaze hutma tamagra nehaze. ²¹Jisasi'a amanage huno ana ara asmi'ne, Ama a'moka, kema hanua kerera kmentinti huo, mago kna ne'eankino efore'mahina, ama agonafino, Jerusale kumatero tamagra Nerfantera monora huontegahaze. ²²Tamagra ontahi'naza zante monora nehaze, tagra antahi'nona zante monora nehune. Na'ankure vahe'ma zamaguvazizana Jiu vahe'motafi me'ne. ²³Hianagi mago kna ne-ea knamo'a hago menina ama fore hu'ne. Nenfama tamage mono hunteku hanamo'za, avamupi tamage avu'avateti monora huntegahaze. E'inahu hu'za mono'ma huntesa vaheku Nenfama nehakre. ²⁴Na'ankure Anumzana Agra Avamure, hu'negu mono'ma hunteku hanamo'za, zamagra zamagu'areti avamuzmifi tamage monora huntegahaze. ²⁵Ana a'mo Agrira amanage huno asmi'ne, nagra antahi'noe Mesaia'a (tazahu ne') egahie, (Kraisie hu'zama agima ante'naza nera),^c ana ne'ma esnuno'a, maka'zana tasmi ama hanigeta antahi'gahune. ²⁶Jisasi'a ana ara asmino, ama nanekema nehua ne'mona ana ne' Mesaia'ne.

²⁷Anage nehakeno Jisasi amage' nentaza disaipol nagara anante enehanatiza, ana a'ene naneke nehige'za antri nehu'za hakare antahintahi hu'nazanagi, nazanku nehakre huge, nazanku a'ene kegaga nehie? Hunora mago'mo'a antahi onke'ne. ²⁸Anante ana a'mo tinkvo'a netreno, rankumatega viazamo vene'ne zga ome zamasmino, ²⁹Eta eme keho, maka'zama hu'noa zanku'ma huama huno nasmi'nea nera, Kraisie'ma hu'naza ne' e'negahie? ³⁰Ome zamasmige'za, rankumara atre'za zamagra atirami'za Agritega e'naze.

^c Hibru kefina Mesaia'a hu'neana tazahu nere, Griki kefina Kraisie hu'neana tazahu nere, English kefina Savior hu'neana tazahu nere hu'ne.

³¹ Vahe'ma zamarenaku vu'nege'za amage nentaza disaipol nagamo'za Jisasina tutu hunte'za, hurami ne'moka (Rabbai), ne'zana no hu'naze. ³² Hianagi Jisasi'a zamasm'i'no, Nagrama nesua ne'zama me'neana tamagra onke'naze, huno zamasm'i'ne. ³³ Anage hige'za amage nentaza disaipol nagamo'za, ke ohumi ahumi nehu'za, zamagra hu'za mago'mo ne'zana eme amigeno ne'nenno Agra nehifi? ³⁴ Jisasi amanage huno zamagrira zamasm'i'ne, Nagri ne'zana aza'o hunantege'na e'nomofu avesite eri'zama'a eri vgare snugu hunantege'na e'noe. ³⁵ 4'a ika maniteta tamagra hozama hamre kna me'ne huta nosafi? Nagra neramasmuanki keho, kesga hutma hozafina tmua keho, ne'zamo afureno ta'nefa ruherafino hoza hamre kna kofta nehie. ³⁶ Ana ne'zama hamre'namo'za hago mizazamia knare hu'za eri'naze. Hagi ana rga'ama hamre'nazana manivava mani'zante vahe'za zamare'za vu'naze, ana nehina aza'o hozama hankresnimo'ene, hozama hamresi'mokea, znagu'a musena magoka hugaha'e. ³⁷ Na'ankure ama ana nanekea tamage ke me'ne. Mago'mo hoza hankretegeno, rumo hoza nehamre hu'za nehaze. ³⁸ Tamagra zamaza hutma avimzana ose'naza hozafi Nagra huneramantoe, rumo'za amuhu hu'za eri'za hankre'naza hozafi, tamagra ne'za hamre'sagu huneramantoe. ³⁹ Samaria rankumateti hakare vahe'mo'za Agrite zamentinti hu'naze. Na'ankure ana a'moma huama hu'nege maka'zama nagra ko'ma hu'noa zana, Agra huama hunante'ne. ⁴⁰ E'inage hige'za, Samaria vahe'mo'za Jisasinte e'za, tagrane manigahane hu'za hanaveti'za antahigageno, Agra tare zgegna zamagrane mani'ne. ⁴¹ Jisasi'ma zamasmia ke nentahi'za, hakare'a ontahi'naza vahe'mo'zane zamentinti hu'naze. ⁴² Zamagra ana ara amanage hu'za asm'i'naze, kagrama hana kegukera tamentinti nosune, hagi tagra tagesafinti antahita tamentinti nehune. Agra tamage maka kokankoka vahemota tzahu nere.

⁴³ Tare zge knama maniteno, Jisasi'a ana kumara atreno Galili vu'ne. ⁴⁴ Na'ankure Jisasi'a Agra'a huama huno, Kasnampa (profet) vahe agi'a mopa agafa'arera erisaga osugahaze huno hu'ne. ⁴⁵ Hagi anante Galilima ehanatige'za, Galili vahe'mo'za Agrira muse hu'za avare'naze, na'ankure Jerusale kumate kinafinti zamare'nea muse ne'za ne'knarema (pasova) Agrama maka'za hige'za ke'nagure. Zamagranena kinafinti zamare'nea muse ne'za ne knarera (pasova) Jerusale vu'neza ke'nareti muse hunte'naze.

Kamani ne'mofo mofavre krifinti azeri knamre'nea naneke

⁴⁶ Ana hzageno Kana Galili kaziga, tinteti waini'ma trohu'nea kumate eteno e'ne. Anante mago kamani eri'za ne'mofo mofavre'mo Kapenium kumate kri erino mse'ne. ⁴⁷ Jisasi'a Judia atreno Galili kaziga ehanatia kema nentahino'a, kri eri'nea mofavre'mofo nefa'a Agrite viazamo asuragi kefinti, enka mofavre ni'a eme azeri so'e huo huno nemofo'a fri'kante

mse'negeneno antahige'ne. ⁴⁸Anage higeno Jisasi'a asmino, avame'zane kaguvaza hanuazana ketetage'za, tamagra tamentintia hugahazo! ⁴⁹Ana kamani eri'za ne'mo Jisasinku huno, Ramoke mofavreni'a frisanigi ko eramio. ⁵⁰Jisasi ana ne' asmino, nonkarega vuo, negamofa'ofrino amne mani'ne. Ana ne'mo tamage Jisasi'a nehie huno amentinti nehuno atreno ete noma'arega vu'ne. ⁵¹Atreno kantega uneramige'za, kazokzo eri'za vahe'amo'za eme asmi'za, negamofona kri'a atrentegeno mani'ne hu'za eme asmi'naze. ⁵²Anagemama hu'za asmizageno kri'ama atrente'nea knagu zamantahigege'za zamagra asmi'za, okina wan kiloki higeno avufa teve hazamo'a atrente'ne. ⁵³Anagemama nehzageno nefa'a agesa antahi'ne, Jisasi'a ana knareku huno, Negamofa'ofri amne mani'ne huno hu'ne, nehuno agrane noma'afi nemniza naga'ane, maka'moza zamentinti hu'naze. ⁵⁴Ama'i ru'ene Jisasi'ma avame'za tro higeno'a, Agra Judia kazigama atreno Galili ehanatia knafina tare avame'za tro hu'ne.

**Mni fruhu kna zupa (Sabat) Betsaida tirute Jisasi'a,
mago vahe azeri so'e hu'nea naneke**

5 ¹Ana maka'zama higeno agteretegeno, Jiu vahe'mo'za mono nehza kna fore higeno, Jisasi'a Jerusale kumate mreri'ne.

²Jerusale kuma'mofo kaha hagente'za, Sipsisipi Kafane hu'naza tvaonte mago tiru me'nege'za, Hibru kefina Betsaida^d hu'za nehaze. Anantera 5fu'a hanko no kinte'naze. ³⁻⁴Ana hanko nontera hakare'a kri vahera mse'za mani'naze, zamusuhu vahe'ene zamagia krere hu'nea vahe'ene zamaga zamaza sti'nea vahe'ene mani'naze.^e ⁵Mago nera 38ti'a kafufi kri eri'nea ne', ana tirutera mseno mani'ne. ⁶Anante mseno mani'negeneno Jisasi'a negeno, za'za kna ana krifina mse'ne huno antahi'ne. Jisasi'a anage huno asmi'ne, Kagesama antahinana krika'a knare hugantesie hunka nentahino? ⁷Ana kri ne'mo kenona'a asmino, Ra vahe'moka timoma kazama nehanigeno navreno ome nantesia vahera omni'nege'na, ana'ana hu'na nevuge'za rumo'za tirupina nagtere'za unermize. ⁸Jisasi'a nentahino ana neku huno, Otinka, naverisaka'a renamginka e'nerinka vuo. ⁹Hantaka huno kri'amo atrentegeno, tafe'a erirenamgino e'nerino otino agafa huno kana vu'ne.

Ana kna mni fruhu kna (Sabat) zupa ana kaguvazana hu'ne. ¹⁰Ana hige'za Jiu kva vahe'mo'za kri'ama eri amne huntea ne' antahige'naze, menina mni fruhu (Sabat) kna meno nagru hu'neankinka, naverisaka'a erinka vano osu'gahane. ¹¹Hianagi kri'a eri amne hu'nea ne'mo zamasmine, agra aza'o kri'nima eri amne hu'nea ne'mo Agra nasmino,

^d tare kampi kre'ne, magora, Bezaida, magora Betsaida ^e Mago'a antahi'zane vahemo'za antahizana, Anumzamo ankeri huntengeno ana tiru'ma ome eri kaza nehnigeno ana tirupi ese'ma tmi'nea vahe'mofo kri'amo vgaretere hu'ne.

naverisaka'a erisaga hunka vuo huno hunante'ne. ¹² Zamagra, agrira antahige'naze, Iza ana nera huganteno, naverisaka'a eri kofinka vuo huno hugante'ne? ¹³ Hianagi azeri so'ema hunte'nea ne'mo'a, iza anara hu'neo antahino keno osu'ne, na'ankure Jisasi'a maka vahepi ruhavia huno vu'ne. ¹⁴ Henka Jisasi'a ana nera ra mono nomp i ome kefore huno asmi'ne, ko, krika'a hago vgare, mago'ene kumira osuo, e'inama hanunka tusi'a knaza henka'a erigahane. ¹⁵ Ana ne'mo'a atreno viazamo, Jiu vahera ome zamasmimo, Jisasi kri'nia eri amane hunante'ne huno zamasmime.

Jisasi'a, Anumzane mago tragave hu'noe hu'nea naneke

¹⁶ E'inage hige'za, Jiu kva vahe'mo'za agafa hu'za Jisasina azanva hu'naze, na'ankure ana zantmina mago'a, mni fruhu kna (Sabat) zupa hu'nea zante ana hu'naze. ¹⁷ Hianagi Agra zamasmimo, Nenfa'a meninena eri'zana otreno e'neriankina, Nagra'nea eri'zana enerue. ¹⁸ E'i ana agafare, Jiu kva vahe'mo'za Agri ahenaku mraguza'ati'za maka kanku hakre'naze. Na'ankure Agra mni fruhu kasege hantagia zantekukera ana osu'naze. Hagi Agra Anumzanku Nenfa'e nehuno, Agra Anumzane mago tragave hu'noe, hia zante'ene ahenaku hu'naze.

¹⁹ E'inage hzageno Jisasi kenona zmirera amanage huno zamasmime, Nagra tamagerafa hu'na neramasmue, Nemofa'a Agra'a avesitera mago'zana hugaosu'neankino, ke'nesigeno Nefa'ma huveri'nesia zanke, Nemofa'a anazanke hugahie. ²⁰ Na'ankure Nenfa'a, Nemofona avinenteno, Agra maka'zama nehia zana averi nehie. Ana nehuno Nefa'a agtereno tusi'aza averi hugahie. Anama hanigeta tamagra antri hugahaze. ²¹ Na'ankure Nenfa'a fri' vahe'ma zamazeri otino, asimu nezmia kna huno, Nemofa'a azano, Agri'ma avesi'nimofona asimura amigahie. ²² Na'ankure Nenfa'a Agra veara refko osugahie. Hagi maka vahe'ma refko hu'zana, Nemofa ami'ne. ²³ Ana hina maka'mo'za Nemofa agi'a erisaga hugahaze. Nefa agima erisaga nehza kna hu'za, aza'o Nemofa agima erisaga osnimo'a, huntogeno'ma e'nea Nefana, anazanke huno agi'a erisaga nosie. ²⁴ Nagra tamage hu'na neramasmue, aza'o Nagri naneke nentahino hunantege'na e'nomofonte amentinti hanimo'a, manivava asimu enerino, vahe'ma refko hania knafina, fri'zana agtereno asimu erino manigahie.

²⁵ Nagra tamage hu'na neramasmue, knamo'a kofta huno ne-eno hago menina ama efore hu'ne, fri'naza vahe'mo'za Anumzamofa Ne' mofavremofa ageru nentahi'za, ana ageru'ma antahisnamo'za manigahaze. ²⁶ Na'ankure Nefa'a asimu erino mani'zamofa agafa'a Agripi me'ne. Nemofona anahu kna huno asimu erino mani'zamofa agafa'a Agri ami'ne. ²⁷ Ana nehuno Agra Nemofona kema hugnare hunte hanavea (atoriti) ami'neankino, vahe'ma refko hu'zana Agri ami'ne, na'ankure Agra Vahe'mofa Mofavre. ²⁸ Ana kegura antria osiho, na'ankure mago

knama fore'ma hina kerifi asezamante'naza vahe'mo'za Anumzamofu Mofavre'agerura antahi'za, ²⁹oti'za esnageno knare avu'ava hu'nesaza nagamo'za, oti'za ksefa mani'za erigahaze. Hagi kefo avu'avazampi mani'ne'za fri'ne hanamokizmia, refako huno naneke huzmantegahie. ³⁰Nagra navesitera mago'azana osugahue. Anumzamofu ke nentahi'na anante zganena refko nehue. Ana kema refko'ma huana mago kante ante'na nezganoe. Na'ankure Nagra navesi'zantera kenontoe, hagi Agrama hunantege'na e'nomofu avesite refkoa nehue.

Jisasi avu'ava zamofu huama hu'nea naneke

³¹Nagrama, tamage nehue hu'na NAGRANI'AGU huama hanuana, Nagra havige hugahue. ³²Hianagi Nagri nagenkema rumo huama (testimoni) nehige'na, Agrama Nagriku huama hianke nentahi'na, tamage nehie hu'na nehue. ³³Tamagra Joninte vahe huzmantage'za ome antahi'nazana, Joni'a tamage nanekege huzmasmi'ne. ³⁴Hu'neanagi Nagrama hua kema e'neruana, mopafi vahepintira e'norue. Hianagi Nagrama nehuana tmagri'ma tmaza hanigu nehue. ³⁵Joni'a lampe tvi kna huno tvi'nereno remsa hurmantegeta, ana tvi'kura osasi'a knafi tmagu'a musena hu'naze. ³⁶Hianagi Nagrama hanua navu'navamo'a, Joni'ma hu'nea avu'avazana agtere'ne. Na'ankure Nenfa'ma nami'nea eri'za Nagra eri vgaesnugu e'nerue, ana eri'zama e'nerua eri'zamo, Nagrira eriamu hugahie, na'ankure Nfa'nimo hunantege'na e'noe. ³⁷Nenfa'ma hunantege'na Nagrama e'noana, Nagriku huama Agra hu'ne. Hianagi tamagra mago'a knarera Agri agerura ontahitma, avugosa onke'naze. ³⁸Agri nanekemo'a tamagri tamagu'afina omne'ne, na'ankure Agrama hunantege'na Nagrama e'nogura, tamagra tamentintia Agritera nosaze. ³⁹Tamagra Anumzamofu avontafepi nehakraze, na'ankure tamagra mani'vava mani'zana hago eri'none hutma nentahize. Hianagi e'i ana avontafemo'a Nagriku huama nehie. ⁴⁰Hianagi Nagrite'ma e'netma tmasimu eri'zankura tamagrira tamavesra nehie.

⁴¹Nagrira vahe'mo'za nagi erisaga (glori) hihogura nosue. ⁴²Hianagi Nagra tamagrira tamage'noe, Anumzamofu avesinte'zana tamagri tamagu'afina omne'ne. ⁴³Nagra, Nenfa agifi e'nogeta tamagra nonavraze, hagi mago'mo agra agire'ma esnimofona ame huta avregahaze. ⁴⁴Tamagra inankna huta tamentintia hugahaze, tamagri'ma ru vahe'mo'za tmagima erisaga nehazana, magoke Anumzamo tmagri'ma muse hurmante'sia zankura ohakre'gahazo? ⁴⁵Nefante naneke hurantegahie hutma Nagrikura tamagesa ontahiho, kema hurmantesia nera Mosese'e, Mosesete tamagu'a antetma tamentintina hu'naze. ⁴⁶Hianagi tamagrama tamage hutma Mosesente'ma tamentinti hunetasina, Nagrite ene tamentinti hazasine, na'ankure agrama kre'neana, Nagriku huno kre'ne. ⁴⁷Hianagi Mosesema kre'nea nanekema

tamentinti osnutma, inankna huta tamagra Nagri nanekegura
tamentintia hugahaze?

Jisasi 5 tauseni'a vea ne'za zami'nea naneke
(*Mat 14:13-21, Mak 6:30-44, Luk 9:10-17*)

6 ¹Anazama vgaregeno'a, anantetira Jisasi'a zamatreño Galili mago kaziga vu'ne, mago agi'a Taiberias tirure hu'za nehaze. ²Tusi'a vahe krerfamo'za Agrira avariri'za vu'naze, na'ankure krime vase'naza vahe'ma kaguvazana huno zamazeri so'e hige'za nege'za avariri'za vu'naze. ³Anante Jisasi'a agonarega mrerino amage nentaza disaipol naga'ane Agrane anante umani'naze. ⁴Hagi Jiu vahe kinafinti zamare'nea kna (Pasova) muse hu'za ne'za ne kna'zmi atupa hu'ne. ⁵Anante Jisasi'a, keganti kegma huno keama hakare vahe krerfa Agritega neageno Filipina asmino, Inantegati Bretia miza hanunke'za ama vahe'mo'za negahaze? ⁶Ama kema Jisasi'a hiana Filipina reheni ke'ne, na'ankure Agra inankna zano hni'ana antahi'neni, reheni antahige'ne. ⁷Filipi'a ke nona'a amanage huno asmi'ne, 2 hantreti'a silva zgoreti^f mizama hania Bretimo'a, mago'mago'mo'ma osi'a neterema haniana ama vea krerfafina knarera huozmantegahie. ⁸Agri amagemanentea disaipol ne' Endru, Saimon Pita negna amanage huno Jisasi'a asmi'ne, ⁹Amagi mago osi mofavre emani'neni 5fu'a bali Bretigi, tare nozamegi huno eri'neanagi, asi'amo'a inankna huno ama veapina knarera hugahie? ¹⁰Jisasi'a amanage huno hu'ne, ke huge'za mopafi maniho. Anampina trazamo hu'nefi 5 tauseni'a vahe'naza mopafi mani'nage'za, vene'ne age hampri'naze. ¹¹Jisasi'a Breti erino Anumzamofonte nunamu hunteteno, erigorino mani'nare refko huno nezmino, anazanke huno nozamea zamige'za nenazageno zamu hu'ne. ¹²Nazageno zamu'ma higeno'a, Agri'ma amage' nentaza disaipol naga'a zamasmimo, atraza ne'zama'a eri atru hiho, e'inahinkeno amne zankna osnie. ¹³Anage hige'za eri atru hzageno, 5fu'a bali Bretima kori'za ne'naza atupa atupa'a, 12fu'a eka'eka kupi eriri'naze. ¹⁴E'ina hige'za veamo'za ana kaguvazama Agrama hiaza nege'za, zamagra anage hu'naze. Ama'i tamage huno Kasnampa nere, ama mopafima henka'a egahie hu'za hu'naza ne' mani'ne. (Diu-Kas 18:15)

Jisasi'a ti agofetu vu'nea naneke
(*Mat 14:22-33, Mak 6:45-52*)

¹⁵Ana vahe'mo'za zamagraregati eme azeriza kini kvazmi manisie hu'za azeri otiku hzageno, Jisasi'a antahino keno nehuno, anantetira zamatreño agonarega Agraku mreri'ne.

¹⁶Kinaga sege'za, Agri amage' nentaza disaipol naga'mo'za ana kumara atre'za hagerintega urami'naze. ¹⁷Anante ventefi marerite'za, hagerina

^f eiti'a ikamofo mizane

tkahe'za Kapenium vu'naze. Hago haninkigeno Jisasi'a zamagrama mani'narega uohanati'ne. ¹⁸Hagerimo'a tusiza huno kranto kranto hu'ne, na'ankure tusi'a zaho'mo atufeno egeno ana hu'ne. ¹⁹Ana nehige'za kuta azotareti tina vakakiza 5fu'o, 6si'a kilo mita naza nevu'za zamagra kazana Jisasi'a hagerimofu agofetu ne-eno ventemofu erava'o hige'za nege'za, zamagra tusi zamanogu hu'naze. ²⁰Hianagi Jisasi'a anage huno zamasmine, ama Nagragi, korera osiho. ²¹Anante zamagra zamagu'areti muse nehu'za, Agrira ventefi avrentazageno, vunaku zamagesa antahi'naza mopare ana ventemofu ame huno uhanati'ne.

Jisasi asimu eri bretigu huzmasmi'nea naneke

²²Vase'za ko'atige'za, ana hagerimofu ankenare mani'naza vahetmimo'za kazana magore huno onensa vente ramimpintira omne'neanki mago me'ne, anampina Agri amage nentaza disaipol naga'enena Jisasi'a mreorige'za ke'naze. Hianagi Agri'ma amage' nentaza nagamo'za zamagraku vu'naze. ²³Hianagi mago'a ne'one vente rami Taiberias kumateti e'za, Jisasi susu huteno breti zamige'za ne'naza mopa tva'onte ehnati'naz e. ²⁴Ehnati'za kazama Jisasi'ene, Agri'ma amage nentaza disaipol naga'anema omninage'za nege'za, zamagra osasi vente ramimpi mreri'za, Jisasinku hakre'za Kapenium vu'naze.

²⁵Ome hakre'za hagerimofu kantu kaziga Jisasima azeri fore nehu'za, amanage hu'za Agrira antahige'naze, Hurami ne'moka (Rabbai) Kagra nazupa amarera e'nane? ²⁶Jisasi'a kenonazmia anage huno zamasmine, Tamage hu'na Nagra neramasmue, tamagra Nagriku nehakra'zana, kaguvazma hua zantekura nohakraze. Hagi tamagra bretima nazageno tmu'ma hia zanteku nehakraze. ²⁷Fanane hania ne'zantera eri'zana e'oriho. Hagi fanane osu manevava hanaza ne'zanku nentahita eri'zana eriho, e'i ana ne'zana Vahe'mofu Mofavremo tamigahie. Na'ankure Nefa, Anumzamo azanko avoma'a retro huno Agri hugnare hunte'ne. ²⁸Anankere zamagra anage hu'za Jisasina asmi'naze, tagra naza huteta, Anumzamo'ma hania eri'zana erigahune? ²⁹Jisasi kenona'a huno zamasmine, Anumzamofu amanahu eri'za erihogu avenesie, Agri'ma huntogeno e'nemofonte tamentinti hiho. ³⁰Anankere zamagra Agri asmi'naze, Kagra na'a avame'zana nehnanketa negeta, tamage huta Kagriteri tamentinti'a hugahune? Kagra nankna'za hugahane? ³¹Tagri tfahe'za ka'ma mopafi mana ne'za ne'naze, hu'za krente'naze, ***Agra monafinti breti neho huno zami'ne.*** (Eks-Uti 16:4-36) ³²Anante Jisasi'a zamagrira zamasmine, Nagra tamage, rfa hu'na neramasmue, Mosese'a monafinti bretia agra ontami'ne, hagi menina tamage bretia Nagri Nenfa monafinti neramie. ³³Na'ankure Anumzamofu bretia e'i ama monafinti eramineankino, miko mopafi vahera zamasi mu zamigahie. ³⁴Zamagra anante Jisasina asmi'naze, Ramoke, e'i ana bretia maka'zupa tmivava

huo. ³⁵Jisasi anage huno zamasmine, Nagra asimu eri Bretia mani'noe, aza'o Nagrite esnimo'a aga'zankura osugahie. Hagi aza'o Nagriku amentinti hanimofona tinkura mago'ene ave'ositfa hugahie.

³⁶Hianagi Nagra nerasmue, tamagra ko Nagrira nage'nazanagi, tamagra tamentintia nosaze. ³⁷Maka vahe'ma Nenfa'ma, Nagri'ma nenmia vahe'mo'za Nagrite egahaze, hanige'na Nagrite'ma esimofona Nagra vuo hu'na retufe otregahue. ³⁸Na'ankure Nagra monafinti erami'noe, Nagra navesi'za hunaku ome'noe, hagi hunantege'na e'nomofa avesite erinaku e'noe. ³⁹Anumzamo hunantege'na Nagra e'nomofa avesira anahu hu'ne! Nagri'ma maka vahe'ma nami'nefintira mago'moe huno fnane osugahie, hagina vgare knarera zamazeri otigahue. ⁴⁰Na'ankure Nenfa avesi'zana amanahu hu'ne, maka'mo'za Nemofo nege'za Agrite zamentinti huntesimo'za manivava zamasimu erisage'na, vgamaresia knarera Nagrani'a azeri otigahue.

⁴¹E'igu Jiu vahe'mo'za Agrikura ke hakare hu'naze, na'ankure Agrama huno Nagra ana breti monafinti erami'noe hiazante zamarimpa haviza nehige'za ke hakare hu'naze. ⁴²Zamagra anage hu'naze, ama Jisasi'ma, Josefe nemofo, nefane nereranema negona nepi? Nankna huno menia monafinti Nagra e'noe huno nehie? ⁴³Jisasi'a ana kemofo nona'a, amanage huno zamasmine, Tamagra tamarimpa havizana osutma ke hakare osiho. ⁴⁴Mago'mo'a Nagriteri omegahie, Nenfa'ma hunantege'na e'nomo agu'a avazu hanigeno Nagrite esige'na, vgare kna zupa azeri otigahue. ⁴⁵Kasnampa vahe'mo'za amanage hu'za Avontafepina kre'naze, *Ana hanigeno Anumzamo maka'mokizmia huzmasmigahie.* (Aisa 54:13) Maka'mo'za Nenfa ke nentahi'za rempi hanamo'za Nagrite egahaze ⁴⁶Mago mo'e huno Nefana onke'ne, Anumzane mani'neni e'nemo Agrake Nefana ke'ne. ⁴⁷Tamage hu'na Nagra nerasmue, aza'o amentinti hanimo manivava asimura erigahie. ⁴⁸Nagra'ni'a manivava hu'mofo Bretia mani'noe. ⁴⁹Tmagehe'za ka'ma mopafi mana nete'za zamagra fri'naze. ⁵⁰Ama'ina Bretia monafinti ermi'neankino, mago'mo'ma nesuno'a ofri manigahie. ⁵¹Nagra ksefa mani'zamofa breti monafinti eramino'e, mago'mo ama ana Bretima nesuno'a, agra manivava hugahie, E'i ana Bretia Nagri navufa me'ne, ana navufamo maka mopafi vahe manivava asimu zamigahie.

⁵²Anage nehige'za anante Jiu vahe'mo'za nentahi'za, zamagra ke hugantigma hu'za anage hu'naze, Inankna huno ama ne' mo'a Agra avufa tamisigeta nenaku hunkeno nehie? ⁵³Ananku Jisasi'a anage huno zamasmine, Tamage rfa hu'na nerasmue, Vahe'mofo Mofavre'mofo avufane, korane onesutma tamasi eritma mani'zana tamagripina omnegahie. ⁵⁴Mago'mo, Nagri navufa neneno, Nagri kora nesimo'a manivava asimu erisanige'na, Nagra vgare knazupa azeri otigahue. ⁵⁵Na'ankure Nagri navufamo'a tamage ne'zane, higeno Nagri

koramo'a tamage ti me'ne. ⁵⁶Mago'mo Nagri navufa neneno, Nagri korama nesnimo'a, agra Nagripi manige'na, Nagra agripi nemnue. ⁵⁷Mani'nea Nenfa, Nagrira hunante'ne, na'ankure Nenfa'ma mani'negu Nagra mani'noankino, aza'o Nagri'ma nesimo'a, Nagra mani'nogu agra manigahie. ⁵⁸Ama'i monafinti ermi'nea breti me'ne. Tmagehe'za ka'ma mopafi nete'za fri'naza ne'zana omne'ne, aza'o mago'mo ama bretima nesimo'a manivava hugahie. ⁵⁹Ama naneke zga Kapenium Jiu vahe osi mono nOMPI (sinagog) mani'nenno Agra'a rempi huzami'nea naneke.

Mago'a Jisasi amage nentaza namoza atre'za vu'naza naneke

⁶⁰Anazanku hu'za hakare'a Jisasi amage nentaza disaipol naga'mo'za, ama ana nanekema nentahi'za, ama kna'nentake naneke nehianki, iza aghesa anteno antahigahie? hu'za hu'naze. ⁶¹Hianagi Jisasi'ma hiankemo amage' nentaza disaipol nagara zamarimpa eri haviza hzageno, nezmageno, Jisasi amanage huno zamantahige'ne, Amama hua nanekegu tmarimpa kna nehazo? ⁶²Inankna hugahie, Vahe'mofo Mofavremo'ma negesageno ko'ma mani'nerega ete marerisigetma na'ane hugahaze? ⁶³Avamu'mo asimura neramie, tavufgamo'a mago'zana eri fore osugahie. Kema nagrama tamagrira neramasmua kemo'a, avamu ene ksefa mani'zane me'ne. ⁶⁴Hianagi mago'amota tamentintia nosaze. Na'ankure ese agafareti Jisasi'a zamentinti osnaza vahera, nezmageno iza'o komoru hanige'za Agri'ma ahe simofona agu'a ko ke'ne. ⁶⁵Anante Agra anange hu'ne, ama'na agafare nagra tmagrira tmasmi'noe, mago'mo'a Nagritera omegahie, Nenfa'ma avare namisimoke'za egahie.

Pita'a amentinti'a huama hu'nea naneke

⁶⁶Ana kema hiazanku Agri amage nentaza disaipol nagapintira ruga'amo'za atre'za, Agranena vano osu'naze. ⁶⁷E'igu Jisasi'a 12fu'a naga'a zamantahige'ne, Tamagrane natretma vunaku nehazafi? ⁶⁸Saimon Pita'a ana kemofo nona'a Agri asmino, Rantimoka izante katreta vunaku hunkenka nehane? Kagri kemo manivava asimura nemie. ⁶⁹Tagra tamentinti nehuta Kagrira antahita keta hu'none, Kagra magoke Anumzamofu Ruotge' ne', hugantegenka e'nane. ⁷⁰Jisasi'a ke nona'a zamagri zamasmie'ne, Nagra 12fu'a nagara huhampri tmante'noe, hianagi mago'moka havi avamu mani'nane. ⁷¹E'i anagemu hu'neana Saimon Iskarioti nemofo Judasinku hu'ne, na'ankure 12fu'a nagapinti, agra mago zmmimoma henkama komoru huno Jisasima ha' vahe zmazampii avrezamisigeno ahesamofonku hune.

Fugagi no ki'neza, muse ne'za nenaza knafi fore hu'nea naneke

7 ¹Ana nanekema huteno Galili kaziga vano nehuno, Judia kaziga vu'zankura ave'osi'ne, na'ankure Jiu kva vahe'mo'za ahenaku ke

retro nehzageno ovu'ne. ²Jiu vahe'mo'za fugagi nOMPI mani'neza, kave eri'za eme ante'za muse hu'za ne'za nekna kofa hu'ne. (Lev-Pri 23:34)
³Ananku hu'za afu'agnahe'za Jisasi asmi'naze, Amafina atrenka Judia kaziga vuge'za, Kagri kamagenentaza disaipol naga'mo'za, Kagrama eri fore nehana avame'zana kageho. ⁴Na'ankure mago'mo'a oku'a mago'zana osugahie. Vahe'mo'ma amate antahino keno haniema hanunka, avamezama maka mopafi vahete Kagraka'a kzeri ama hunka huge'za kageho, hu'za hu'naze. ⁵Na'ankure Agri afu'agnahe'za anazanke hu'za, Agritera zamentinti osu'naze. ⁶Anazanku Jisasi'a zamagrira zamasmino, Nagri knamo'a kofta osu'ne, hagi tamagra amne vano hugahaze. ⁷Mopafi vahe'mo'za tmagrikura zamarimpa aheormantegahaze. Hagi Nagrira zamarimpa ahenantegahaze, na'ankure Nagrama huama hu'na avu'ava tmimo'a haviza hu'ne, huazanteku ana nehaze. ⁸Tamagra'tmi ana muse nezantera mreriho, Nagra ana muse nezantera ovugosue, na'ankure Nagri knamo'a ehnati'ne. ⁹Ama ana nanekema zamasmitemo, Galili kaziga mani'ne.

¹⁰Hianagi Agri afu'agnahe'za ana muse ne'zantera mareritazageno, anante Agraku anazanke huno zamage'a mrerino, oku'a vu'ne. ¹¹Ana hige'za Jiu kva vahe'mo'za Agriku ana muse ne'za nekna nehakre'za anage hu'naze. Inantega Jisasi'a mani'nesie? hu'za hu'naze. ¹²Jisasinku ana vahe kevufinti sumi ke ohumi ahumi hu'za Agra knare Ne' mani'ne, nehage'za ruga'amo'za huza a'o havi ne'kino, vahera zamavreno havi kante nevie hu'naze. ¹³Anage hzanagi mago'mo'e huno eri amateno Agrikura osu'ne, Jiu kva vaheku kore hu'za ana osu'naze.

Jisasi Jerusale mrerino ran mono nOMPI rempi huzami'nea naneke

¹⁴Hianagi muse ne'zante mani'nageno knamo'a amu'nOMPI egeno Jisasi'a ra mono nOMPI mrerino, ome agafa huno rempi huzami'ne.
¹⁵Rempi hunezmige'za Jiu kva vahe'mo'za nentahi'za antri nehu'za, anage hu'naze. Inantegati ama ne'mo'a antahi'zana eri'nesnie, avonona osu'nea ne'mo'a? ¹⁶Ana kemofo nona'a Jisasi'a amanage hu'ne, Nagrama rempima huneramuaana, Nagri zana omne'ne, Nagri'ma hunantegena e'nomofo Agri sune. ¹⁷Aza'o agu'amo otinkeno Anumzamomofo avesi'za huku hanimo'a, rempima nehuana agra antahino, Anumzamofonteti e'nefi, Nagrani'a navesite nehufi refko huno kegahie. ¹⁸Agra'a agu'areti nehanimo'a, agra avufa erira hunaku nehie. Hagi huntenejeno e'nemofo agi erira nehimo, Agra tamage vahe mani'ne. Hagi mago kzaki zama'a Agripina omne'ne. ¹⁹Mosese'a kasegea taminefi, ontami'negeta, mika'mota ana kasegea amagera nontazo? Tamagra nahigeta nahe frinakura nehaze? ²⁰Ana vahe kevumo'za ke nona'a asmi'naze, Kagri kagu'afina havi avamu mani'ne! Iza Kagrira kaheku higenka nehane? ²¹Jisasi ke nona'a zamasmine, Nagra magoke avame'za hu'noe, anazanku maka'mota antri hu'naze. ²²Ama ana

agafare Moses'e'a eit (8) zupa mofavre zamufa tga hiho hu'ne. Na'ankure Mosesena agripintira ome'ne. Hagi tmagri tamagehe'impinti e'ne, higetma mni fruhu kna zupa (sabat) vahe zamufa tga nehaze. ²³Mago ne'mo avufa mni fruhu kna zupa tga hanigetma, Moses'e kasege ruhanontagie nehaze. Hagi tamagrira tmarimpa nehe, na'ankure Nagrama vahe'ma mni fruhu knazupa avufa eri so'e hunte'noa zamo tmasia ne'vzio? ²⁴Amega zamufarera vahera refko hutma keaga (kotim) huozmanteho. Hagi fatgo avu'avate refko huta nanekea huzmanteho.

²⁵Anage hige'za mago'a Jerusale kumate vahe'mo'za amanage hu'naze, Ama'na Nera aheku'ma nehakraza nepi? ²⁶Keho, Agra amate kevumokizmi zamufi naneke nehiana nahige'za kea nosaze? Kva vahe'mo'za Agrama Kraisi mani'negura, antahi'nafi? ²⁷Ana hu'neanagi, tagra antahi'none igati ama nera e'neo, hianagi ina knarema Kraisi'ma esiana, mago ne'mo'a Agra igati e'neo ontahigahie. ²⁸E'i anage nehzageno Jisasi'a ra mono kumapinti (tempol) kezatino rempi hunezmino anage hu'ne, Tamagra, Nagri ene, inantegati Nagra e'noe tarezana hago antahita, ke'naze. Hagi Nagra navesitera ome'noe, hianagi aza'o hunantege'na e'nomo, Agrake tamage nere, tamagra ana nera onke'naze. ²⁹Nagra, Anumzamofona ke'na antahi'noe, na'ankure Nagra, Agritegati Agra hunantege'na e'noe. ³⁰Anage hige'za Jisasi'na azerinaku hu'nazanagi, mago'mo'a aze'orine, na'ankure Agri kna zahufa ome'ne. ³¹Hianagi ana vahe kevufinti hakaremo'za, Agrite zamentinti nehu'za anage hu'naze, Mesaia'ma^s esuno'a, Agra hakare'a avame'zama ama ne'moma nehia zana agtereno hugahifi ana osugahie?

³²Atru hu'naza vahe'mo'za Jisasinku sumi ke hugantu hugma nehzage'za, Farisi vahe'mo'za nentahi'za, vugote'naza mono kva (Pris) vahe'mo'zane Farisi vahe'mo'za, Jisasi azerihogu ra mono nonte kegva hu'naza vahe (tempol gats) huzmantage'za vu'naze. ³³Anazanku Jisasi zamasmine, osi'a kna tamagra ne manite'na, ete Agrama hunantege'na e'noa Netega Nagra vugahue.

³⁴Tamagra, Nagrikura hakre gahazanagi, Nagria nagefore osugahaze. Hagi Nagrama umani'surega tamagra ovugahaze. ³⁵Jiu kva vahe'mo'za zamagra zamagra ke hugantu hugma nehu'za anage hu'naze, Inantega Agra vnigeta Agrira onkeku hunkeno nehie? Agra tatreno Jiu vahe'mo'za Griki umani'naza vahe ene, Griki vahe rempi huzamiku Jisasi'a nehio? ³⁶Ina knahu ke Agra huno, Tamagra, Nagrikura hakre'gahazanagi, Nagria nage fore osugahaze, hagi Nagrama mani'nesurega tamagra vuga osu'naze huno nehie?

Manivava Tinku'ene, Avamu'enenku Jisasi'a rempi huzami'nea naneke

³⁷Ne'za nene'za musenkase nehzageno, vgare kna zupa ran knagino, Jisasi otino kezatino anage hu'ne, Tinku avesinimofona, atrenkeno

^s Anumzamo huntengeno e'ne. Hibru kefina Mesaia'e nehaze, hagi Grik vahe kefina, Kraisi'e nehaze.

Nagrite eno eme neno. ³⁸Anumzamofa avontafepi kre'nere, Aza'o, Nagrite amentinti nehnimo'a negahie, **Agri agu'afinti manivava timo hageno evugahie.** (Aisa 58:11) ³⁹Hianagi Agrama amanahu kema hu'neana Ruotge Avamuku hu'ne, Agrite zamentinti hanamo'za erisagu hu'ne, na'ankure Jisasi'a ra agi e'orineno, Ruotge Avamura eoraminegeno hu'ne.

Tarefi refko hu'za Jisasinku hu'naza naneke

⁴⁰Ana kema mago'a vahemo'za nentahi'za, amanage hu'naze, Ama'i tamage huno Kasnampa ne' mani'ne hu'za hu'naze. ⁴¹Ruga'amo'za anage hu'naze, Ama'i Kraisi'e nehzageno, ruga'amo'za hu'za, Galili kzigatira tamage Kraisi'a omesnifigure? ⁴²Anumzamofa avontafe'mo huno, Deviti nagapinti Betrehemia Kraisi'a fore hugahie. Deviti mani'nenno hu'nea kumateku osu'nazo? (Sam-Zga 89:3-4, Maik 5:2) ⁴³Ana vahe kevfufinti Agriku hu'za antahi'za zamifi refko hu'naze, ⁴⁴Mago'amo'za Jisasina azerinaku hu'nazanagi, mago'mo'e huno aze'orine.

Kva vahe'mo'za Jisasinte zamentinti osu'naza naneke

⁴⁵Anante ra mono nonte kva vahe'mo'za azage'za, vugota pris kva vahe'ene Farisi vahe'mo'za anage hu'naze, nahigetma Jisasina avretma ome'naze? ⁴⁶Ana ra mono nonte kva vahe'mo'za kenona'a hu'za, Mago ne'mo'a kora higeta ontahi'nona naneke, ama ne'mo'a nehie. ⁴⁷Farisi vahe'mo'za kenona'zmirera amanage hu'za zamantahige'naze. Tamagri'enena anazanke huno havi kante tmareno nevifi? ⁴⁸Mago ran kva vahe'motafi, Farisi vahe'mota, Jisasintera tamentintia nehumpi nosu'ne? ⁴⁹Hianagi ama vahe kevua, kasegema ontahi'nagu havizamofa agu'afi mani'naze. ⁵⁰Nikodimasi'ma kenagepi Jisasinte vu'nea kva ne'mo, amu'no zamifi mani'nereti amanage huno zamasmine. ⁵¹Tagri kase kemo'a mago nera refko huno kegaga hunonteanke, pusante agripinti na'a hu'nesie kea eriteno, tamagefi havige huteno keaga huntegahie. (Diu-Kas 17:6) ⁵²Zamagra kenona'a asmi'naze, Kagra anazanke hunka Galili kazigati e'nampi? Anumzamofa avon tafepi hamprinka ko, mago kasnampa (profet) nera Galilia fore osugahie, hu'za Nikodimasi asmi'naze. ⁵³[^hAna nanekema hute'za, mago mago'mo noma'arega vuno eno hu'ne.

Vere a'mo ru vene vase'nea naneke

8 ¹Hianagi Jisasi'a Olivi Agonare vu'ne. ²Nanterame otino Agra ra mono kumapi eteno ege'za, maka vahe'mo'za Agrite ageno, Agra tamumnino agafa huno rempi huzami'ne. ³Kasegere ugagota hu'naza vahe'mo'zane, Farisi vahe'mo'za ru vene monko'za hu'nea a' avare'za, ana nomofa amu'nompi eme

^h Mago'a vahe'mo'za antahizana Jon 7:53–8:11 vu'nea kea korapa avo tafepina omne'neanki, mago'a vahe'mo'za henka'a kre'naze.

azeri oti'za, ⁴zamagra anage hu'za Jisasina asmi'naze, Hurami ne'moka, ama a'mo'a monko'za nehigeta keta eri fore hu'none. ⁵Mosese kasegemo'a huramino, monko'za hu'nesia a'nea, have knonu ahe friho hu'ne. Hagi Kagra na'ane hunka hugahane? ⁶Zamagra anagama hu'nazana Jisasi revatga hu'za naneke huntenaku, kema huntesaza agafa'a keza eri fore hunaku hu'naze. Hianagi Jisasi kepri huno azankonu mopare avon kre'ne. ⁷Hianagi zamagra kazigzi hu'za antahi'negageno, Jisasi otino amanage huno zamagrira zamasm'i'ne, aza'o amu'nontamifi'ma kumi'a omne'nenimo, pusantera havea erino aheno. ⁸Ete pri huno mago'ane azankonu mopare avon kre'ne. ⁹Ana naneke zamagra nentahi'za, esera ranra vahe atirami'za nevzageno, ana amage'a magoke magoke'mo'za atirami'za vutere hu'za vuhna hzageno, Jisasi'ene ana a' ene znagrake anampina mani'na'e. ¹⁰Jisasi'a otino anage huno ana ara asmi'ne, kaheku'ma haza vahera iga vaze? Magora iza ke naneke hugantegahie? ¹¹Ana a'mo anage hu'ne, Ramoka mago'mo nanekea hunonante, anante Jisasi'a huno naganena nanekea huogantegahue. Kagra nevunka, menintetira agafa hunka mago'ene kumira osuo.]

Jisasi'a mopafi vahe'mokizmi msa'zimi mani'nea naneke

¹²Anante Jisasi'a mago'ene anage huno zamasm'i'ne, Nagra'ni'a ama mopamofa Msa mani'noe, aza'o namge'ma esimo'a hanimpina vano osugahie. Hianagi asimu eri Msa erigahie. ¹³Nehigeno Farisi vahe'mo'za anage hu'za asmi'naze, Kagrama kema nehanana, Kagra kagenke huama nehane, Kagrama huama nehanana tamagea nosane. ¹⁴Jisasi'a anankemofa nona'a amanage huno zamasm'i'ne, e'ima Nagrama ke huama Nragru'ma nehuana, Nagri naneke'mo'a tamage, na'ankure Nagra igati e'na, ete'na iga vugahuo, Nagra antahi'noe, hianagi Nagra igati e'na, iga Nagra vugahuo tamagra ontahi'naze. ¹⁵Amega zamuzmate tamagra vahera refko nehaze, Nagra mago vahera menina refko nosue. ¹⁶Hianagi Nagrama mago'mofa refko huntegahue hanuana, Nagrama troma hanua antahi'zamo'a fatgo hugahie, na'ankure Nagrakera refko nosue, hianagi Nagra ne hunantege'na e'noa Nenfa ene refko nehu'e. ¹⁷Tamagri kasegefina anage huno krente'ne, tare vahe tremoke ke'ne'na'a zankuma (witness) hana'ana tamage. (Diu-Kas 17:6, 19:15) ¹⁸Nagra tamage ke huama Nagra'ni'agu nehugeno, hunantegenana e'noa Nenfa'a Nagriku tamage huno huama nehie. ¹⁹Zamagra amanage hu'za asmi'naze, Negfa'a iga mani'ne? Jisasi'a kenona'a zamasm'i'ne, Nagri'ma onage nesnutma Nenfana antahita keta osugahaze, hagi tamagra ma Nagri'ma nage'anke resuta, anahu kna hutma Nenfana kegahaze. ²⁰Ama naneke'ma hu'neana ra mono nOMPI zgoma nentazare mani'neni, Jisasi'a rempi hunezmige'za mago'mo'a aze'ori'ne, na'ankure Agri kna'a ome'ne.

Vahe'mo'za Jisasima vanirega ovugahaze hu'nea naneke

²¹Anante ete mago'ene anage huno zamasm'i'ne, Nagra tmatre'na vnugeta Nagrikura hakregahaze, tamagra kumi tmifi frigahaze, Nagrama

vnurega tamagra ovugosaze. ²² Jiu kva vahe'mo'za anage hu'naze, agrazante ahe fri'naku nehifi, Agra huno Nagrama vanurega, tamagra ovugahaze hunoma nehiana? ²³ Jisasi anage huno zamasmine, tamagra amafinti vahe mani'naze, Nagra anagamutire, tamagra ama mopafi vahe mani'naze, Nagra ama mopafi vahera omni'noe. ²⁴ E'ina hu'negu, kumi'tamifi tamagra frigahaze hu'na Nagra neramasmue, na'ankure tamagra ma ama kema nehia Nera ama'ne, hutma tamentintima osnazana, tamagra kumi tamifi frigahaze. (Ekso-Uti 3:14, Jon 8:28, 8:58, 13:19, 18:5-8) ²⁵ Zamagra anage hu'za Jisasina asmine, Kagra izage? Jisasi'a anage huno zamasmine, na'ane hu'na ese agafarera Nagra tmasamine? ²⁶ Nagra rama'a zanku keaga nehu'na tamagrira refko hurmante'naku nehue. Hianagi hunantege'na e'nomo'a tamage Nere, Agripinti antahi'noa ke, Nagra ama mopafi vahera nezmasmue. ²⁷ Nefanku Agra nehige'za zamagra antahi ama osu'naze. ²⁸ Jisasi'a anage hu'ne, tamagrama Vahe'mofo Mofavrema azeri sgama hanutma, tamagra antahi ankeretma Agra ama ana Nere hugahaze, Nagra'ni'a nagesafintira nosuanki, Nenfa'ma rempi hunamine'nea ke'age nehue. ²⁹ Anumzamo hunantege'na e'nomo, Negrane nemnie, Agra natrege'na Nagrakera nomanue. Na'ankure Nagrama, Agri avesizama huvava huazankura, Agra muse nehie. ³⁰ Anagama nehige'za rama'a vahe'mo'za Agrite zamentinti hu'naze.

Abrahamu mofavre zgane, Sata mofavremokizmi naneke

³¹ Jisasi'a, Jiu vahe zamentinti hu'namokizmia amange huno zamasmine, Nanekenia miko knama erizafa huvava hanuta, tamagra Nagri namage ante disaipol naga manigahaze. ³² Ana nehutma tamagra tamage naneke antahisnageno, ana tamage nanekemo katufe tmantegahie. ³³ Zamagra kenona'a anage hu'naze, tagra Abrahamu agehete, magore huta mago netera kazokzo eri'zana e'ori'none, Kagra nahigenka katufe tmantesageta amne vugahaze hunka nehane?

³⁴ Jisasi'a anage huno zamasmine, tamagerafa hu'na tamagrira nermasmue, maka kumi'ma nehza vahe'mo'za kumi'mofo kazokzo vahe mani'naze. ³⁵ Kazokzo vahe'mo'a nompina manivava nosie, hanki mofavremoke nompina manivava nehie. ³⁶ E'inahigu Nemofoma katufe tmantena knare hutma mani so'e hugahaze. ³⁷ Nagra antahi'noe, tamagra Abrahamu ageheta mani'nazanagi' Nagri nahe frinaku kanku nehakaze, na'ankure Nagri nanekemo'a tamagri tamagu'afina omne'ne. ³⁸ Nagrama kema nehuana, Nenfa'ene mani'nena ke'noa zanku neramasmue, tamagrama nehazana neramafampinti'ma antahinazaza nehaze.

³⁹ Zamagra kenona'a Jisasina anage hu'za asmine, Abrahamu'a tagri nerfa'e, Jisasi'a anage huno zamasmine, a'o, tamagra ma Abrahamu mofavrema mani'nenutma Abrahamu hu'nesia avu'ava hugahaze. ⁴⁰ Nagra

tamage naneke Anumza'mofompinti antahi'noa ke neramasmue, hianagi Nagrira nahe'za nehaze. Abrahamu'a e'inahura osu'neaza tamagra hunaku nehaze. ⁴¹Tamagra neramafa avesiza nehaze. Zamagra kenona'a anage hu'naze, tagra savri avu'avatetira fore osu'none, tagrira magoke Nerfa, Anumzana Agrake mani'ne. ⁴²Jisasi'a anage huno zamagrira zamasmine, Anumzamo'ma tmagri nerfa'ma mani'neasiana, tamagra Nagrira navesi nantasine, na'ankure Nagra efore hu'noana, Anumzamo hunantege'na e'noe. Nagrani'a navesitera ome'noe, hagi Anumzamo hunantege'na e'noe. ⁴³Nahigeta kema hua nanekea antahi amara nosaze? Na'ankure Nagrama hua nanekea antahi ama nosazagu, ana nehaze. ⁴⁴Tamagra Sata mofavre naga mani'naze, ana hunetma nermafama avenesia avu'avaza nehaze. Ese agafare vahe ahe fri'nea ne' mani'nenno, tamage nanekemofona amage nonte. Na'ankure tamage kea agripina omne'ne. Kema hifina, havigege nehie, agra avu'ava zanku kea nehie. Na'ankure havige ne' mani'nenno, havigemofa nefa'e. ⁴⁵Hianagi na'ankure Nagra tamage nehugetma, tamagra nanekeniarera tamentintia nosaze. ⁴⁶Amama, mani'nafitira izaga Nagrikura kumi hu'ne hunka nanekea hunantegahane? Nagrama tamage nehusugetma, nahnigetma tamentintia osugahaze? ⁴⁷Aza'o Anumzamofa naga mani'nenimo'a, Anumzamofa naneke nentahie, ama'na agafare tamagra nontahize. Na'ankure tamagra Anumzamofa nagara omni'naze.

⁴⁸Jiu vahe'mo'za anage hu'za kenona'a asmi'naze, hufatgo huta negasmune, Kagra Sameria vahe mani'nankeno hankromo kagu'afi fre'nefi? ⁴⁹Jisasi'a anage huno kenona hu'ne, Nagrira naga'afina hankrora omni'ne, hianagi Nagra Nenfa ra agi nemugetma, tamagra Nagrira nazeri fenka nenatra'ze. ⁵⁰Nagra ra nagi erinakura nosuanki, Anumzamo Nagri nagi'a eri ra nehuno, naneketi refko hurantegahie. ⁵¹Tamagerfa hu'na neramasmue, Keni'a nentahimo'a, agra ofrigahie. ⁵²Jiu vahe'mo'za Jisasinku anage hu'za asami'naze, menina tagra antahi'none, hankromo kagu'afi mani'ne. Abrahamu'a fri'negenno, kasnampa vahe'mo'zanena anazanke hu'za fri'nazagenka, Kagra anage nehane, iza'o nanekenia avariri simo'a, agra ofrigahie hunka nehane. ⁵³Abrahamu nerfa'a ko fri'neanki, Kagra agtere'nano? Kasnampa vahera ko fri'nazanki! Kagra kagesa antahinana aza'ne hunka nehane? ⁵⁴Jisasi'a anage huno zamasmine, Nagra nagi erira hanuana, ana Nagimo'a amnezasegahie. Hianagi Nenfa'a Nagri nagi erira nehigeta, Agrikura tamagra hutma, Agra, tagri Anumzane nehaze. ⁵⁵Tamagra Agrira antahinomize, hianagi Nagra antahi'na ke'na Agrira hu'noe, hankina Nagrama hu'na, Agrira antahi'na kena osu'noe hanuana, havige hu'na tmagrikna hugahue, hianagi Nagra Anumzamofona antahina kena hu'nena, ke'a erizafa nehue. ⁵⁶Neramafa Abrahamu'a Nagri kna kenaku muse nehuno, keteno tusi'a muse hu'ne. ⁵⁷Jiu vahe'mo'za Jisasinku anage hu'naze, Kagra 50'a kafuzge

osu'nane, Kagra Abrahamuna ke'nano? ⁵⁸Jisasi'a anage huno zamasmine, tamagerafa hu'na nerasmue, korapa Abrahamuna kse onte'nage'na, Nagra mani'noane. ⁵⁹E'inagemahiazanku have eri'za mate vuza ahe'za hu'naze. Hianagi Jisasi'a ra mono nompinti (tempol) oku'a atiramino fegi'a vu'ne.

Avurga asu' hu'nea ne'mofo naneke

9 ¹Anama Jisasi'a vugatereno nevuno, mago nera reranku'afinti avu asuhu'nea ne' ksente'nea omege'ne. ²Agri amage nentaza disaipol nagamo'za antahige'za, Hurami ne'moka (Rabbai) aza kumira hu'negenoma avu asuhu nera ksente'ne, agra'afi nererapi nefa'e? ³Jisasi'a amanage huno kenona hu'ne, ama ne'mo kumira osigeno, nerera nefa kumira osu'ne. Hu'neanagi e'i zama fore hu'neana Anumzamofu eri'zamo agripinti eriana hanigu e'inahu hu'ne. ⁴Hunantege'na e'noa ne'mofo eri'zana, tagra zgema me'nesire Agri eri'zana erisune. Hanima esigeno'a mago vahemo'a erizana e'origahie. ⁵Nagrama ama mopafima emani'noana, Nagra ama mopafi vahe'mofo Tvire. ⁶Anage Agra huteno, mopare avetu heno eri igri huno, higogna huteno, ana mopa tarega avure frenenteno, ⁷amanage huno asmi'ne, Vunka Silomu tirupi ti omefro. (Silomue hu'nea kemofu agafa'a, huntogeno vu'ne hu'ne.) Ana hutegenovuno ti ome freteno, avurga hari higeno mika'zana negeno e'ne. ⁸E'ina hige'za, ana ne'mofo tvaonte nemni'za vahe'mo'zane, ana ne'mo keza netige'za negaza vahe'mo'zanena amanage hu'naze, Ama ne'mo mani'nenokezatinomeme nehigeta negona nepi ru nere? ⁹Mago'amo'za anage hu'naze, ama ana nere nehazageno, mago'amo'za hanaveti'za anage hu'naze, a'o agra ana ne' kna'nehie. Ana ne'mo huno, nagra ana ne' mani'noe, huno zamasmine! ¹⁰Zamagra anage hu'za antahige'naze, Inankna hankeno kavurga erihari hugante'ne? hu'za agenoka hu'naze. ¹¹Agra ana ke'nona anage hu'ne, mago ne'ma Jisasi'e nehaza ne'mo, mopa erino tinuti eri igri huteno navurgare frenanteno, amanage huno nasmi'ne, Siloamu vunka tirupi omefro hige'na, vu'na tina ome frogeno, navu rgamo'a hari hige'na navua ke'noe. ¹²Zamagra ana ne'ku anage hu'naze, kvuma eri so'e hu'nea nera inantega mani'ne? Hzageno avuma azeri harima hunte'nea ne'mo'a, nagra onke'noe hu'ne.

Farisi vahe'mo'za avurga eri hari hu'nea ne' antahige'naza naneke

¹³Anama avu asu hu'negenoa azeri hari hu'nea nera, avare'za Farisi vahete vu'naze. ¹⁴Anankna mni fruhu kna (sabat) zupa Jisasi'a hapara erino avurga erihari hu'negeze. ¹⁵Anante Farisi vahe'mo'za mago'ene antahige'za, nankna hankeno kavumo'a hari hu'ne hzageno, ana avuma eri so'e hunte'nea ne'mo anage huno zamasmine, Agra hapa erino navure frenantege'na, ti ome frogeno navumo'a hari hige'na ke'noe.

16 E'ina hu'negu mago'a Farisi vahe'mo'za anage hu'naze, e'i ana nera Anumzamoa huntegeno ome'ne, na'ankure mni fruhu kna ana ne'mo kegva nosie. Hianagi mago'amo'za anage hu'naze, inankna huno kumi ne'mo'a amanahu kaguvazana erifore hugahie? Anage nehu'za keha're'za amu'nompinti vahera refko hu'naze. 17 Ana hute'za mago'ene avuma asu hu'negenoma, eriso'e hu'nea nera antahige'za, na'ane hunka kavurgama eriso'e hu'nea nekura nehane? Ana ne'mo huno, Agra kasnampa nere.

18 Jiu kva vahe'mo'za, avurga asu osu'nea neku nehaze, nehu'za zamentinti osu'za, ana ne'mofo nererane nefane znagi hu'naze. 19 Zamagra nererane, nefane znantahige'naze, ama'i mofavrea avu asuhu'negeta ksente'na'o? Hanki inankna huno menina avua nege? 20 Nererake, nefake kenona'a anage hu'na'e, Tagra antahi'no'e, ama tagri mofavre, avu asu hu'nea ksente'no'e. 21 Hianagi tagra antahita keta osu'none, menima avuma nege'zane, aza avua eri so'e hunte'neo ontahi'no'e. Agra ra vahe mani'neanki, antahigenkeno agra tmasmino. 22 Nererake nefakea amanahu kema hu'na'ana, na'ankure Jiu mono kva vaheku koro hu'ke anage hu'na'e. Na'ankure Jiu mono kva vahe'mo'za ke retro hu'za, mago'mo Jisasinku Kraisi'e huno, huama hanimofona, Jiu mono nompinti (Sinagog) ahe natigahune, hu'naze. 23 Ana ke agafare nererake nefakea hu'ke, agra ra vaheki agri antahige'ho hu'na'e.

24 Ete mago'ene, ko'ma avu asuhu'nea ne' agi hu'za asmi'naze, Anumzamomo avure tamage hunka huo, kavu eri hari hu'nea nera, kumi ne' mani'negeta tagra antahi'none. 25 Ana ne'mo anage hu'ne, nagra ontahi'noe Agra kumi ne' mani'neo, magoke'zama nagra antahi'noana, navua asu hu'neane, hagi menina navu negoe. 26 Anante Farisi vahe'mo'za asmi'za, Jisasi'a nankna'za kagrira hugante'ne? Inankna huno Agra kavurga erihari hu'ne? 27 Avuma eriharima huntenea ne'mo anage hu'ne, nagra ko tmasmi'noanagi ontahi'nazo. Nahigetma ru'ene antahinakura nehaze? Tamagra nena Agri amage'ante disaipol naga maninaku nehazafi? 28 Zamagra ana kemofo nona'a knara kefinti fra vazinte'za, kagra Agri amage nentana disaipol ne' mani'nananki, tagra Mosesa amage nentona vahe mani'none! 29 Anumzamomo Mosesena kea humigeta tagra antahi'none, hianagi ama'i nera igati e'neo, tagra ontahi'none. 30 Ana ne'mo anage huno zamasmie, ama ruzahu'zama hu'nea nera, Agra igati eno, navurga erihari hige'na ke'noe, tamagra ontahi'naze! 31 Tagra antahi'none, kumi vahera Anumzamoa antahinomie, hianagi iza'o mono hunenteno Agri amage' ante fatgohani'mofona, Anumzamomo antahiamigahie. 32 Mona mopa fore hu'nea knareti, avu asu hu'nea vahera mago ne'mo'e huno avurga eri hari hie kea ontahi'none. 33 Ama ne'ma Anumzamofontegatima ome'nesuno'a, Agra mago'zana osugahie. 34 Farisi vahe'mo'za anage hu'naze, Kagrira miko kumi'zampi ksegante negenka, tagri rempi hurami'za nehano? Anage nehu'za Jiu mono nompintira (Sinagog) avazu hu'za, atufe atrageno vu'ne.

Avamupi zamu asuhu'nea naneke

³⁵Ana ne'ma avazuhu megi atraze kea Jisasi'a nentahino, ome kefore huno Agra amanage hu'ne, Kagra Vahe'mofo Mofavrere kmentinti nehano? ³⁶Ana ne'mo anage hu'ne, Agra iza'e ramoka, nagrama Agrite namentinti'ma hanuana? ³⁷Jisasi'a anage huno asmi'ne, kagra Agrira negane, e'i ana ne'mo kagri'enena keaga nehie. ³⁸Avuma eri hari hu'nea ne'mo anage hu'ne, Ranimoka nagra namentinti hue, nehuno anante mono hunte'ne. ³⁹Jisasi'a amanage hu'ne, Vahe refko hunaku ama mopafina ermi'noe, e'ina hanugeno zamuma nonke'samo'za kesageno, zamuma negesa'mokizmi zamumo'a asu hugahie. ⁴⁰Mago'a Farisi vahe Agrane anante mani'namo'za, ana naneke nentahi'za anage hu'za Jisasina antahige'naze, Tagri tavumo'enena asu hu'nefi? ⁴¹Jisasi'a anage huno zamasmine, tamavurgamo asu hu'neasina kumi'tmia omne sine, hianagi tamagra huta tavua negone nehzagu, kumi'mo'a tmagripina megahie.

Jisasi'a Knare Sipisipi Kva Nere

10 ¹Nagra tamagerafa hu'na neramasmue, iza'o sipisipi keginamofokafanteti agu'afi uofreno, ruganteti tka'uresimo'a, kumzafa ne'kino, vahe'za avazu hugahie. ²Hianagi iza'o kahantegati ufresimo'a sipisipi kva fatgo mani'ne. ³Kafante kva ne'mo agrira kafana anagintegenogeno, sipisipimo'za agri ageru nentahize. Ana afu kva ne'mo Agri'a sipisipimokizmi zamagi neheno, zamavreno vugota nehie. ⁴Agrama afu'zga'ama zamavre atru huteno, vugoteno nevig'e'za, amage' avriri'za nevze. Na'ankure zamagra agerura antahi ani' nehu'za amage vu'naze. ⁵Onke'nesaza nera, tamage hu'za zamagra amagera ovugahaze. Hagi atre'za fregahaze, na'ankure zamagra ontahi'nesaza agerutera kore hugahaze. ⁶Jisasi'a fronka kefinti zamasmineanagi, zamagra nankna kema Agrama zamasmiana, ana kemofo agafa'a zmagra antahi ama osu'naze.

⁷Ana hzageno Jisasi'a mago'ene zamasmino, Tmagerfa hu'na tmagrikura nehue, Sipisipimokizmi kafana Nagra'ni'a mani'noe. ⁸Ko'ma egote'za e'naza vahe'mo'za, kumza vahekiza, vahe'za avazu hugahaze. Hianagi sipisipimo'za zamagerura ontahigahaze. ⁹Nagra'ni'a kafana mani'noe, iza'o Nagri'teti efresimo'a knare huno mani'nenogeno, efreno atiramino nehuno knare tra'zankura hakregahie. ¹⁰Hanki kumzafa vahe'ma esuno'a, kumzafa seno, ahe nefrino, eri haviza hunaku egahie. Nagrama e'noana zamagra zamasmu e'neri'za, ana asimu eri avitetfa hanazegu e'noe. ¹¹Nagra'ni'a knare sipisipi kva ne' mani'noe, Knare sipisipi kva vahe'mo'a Agra'a sipisipireku huno asimura atregahie. ¹²Zgo erinakuma avrema antesigeno erizama erisia ne'mo'a, sipisipi kva omnino sipisipi nefa'a omni'neankino, kesigeno afi krama esigeno'a, sipisipia

atreno fresigeno, afi' kramo (wulf) zamagene reno zamahe panani hugahie. ¹³Na'ankure agrira zgo erizante avrente'nazankino sipisipigura aghesa ontahino, agra zamatrengo fregahie. ¹⁴Nagra'ni'a knare sipisipi kva mani'noe, Nagra sipisipi nagani'a ke'na antahi'na huge'za, zamagra Nagrira nage'za nantahi'za hu'naze. ¹⁵Ana hu'negu Nenfa'a, Nagrira nageno nantahino nehige'na, Nagranena Nenfana age'na antahi'na hu'noe, Nagra nasimura sipisipimokizmire atregahue. ¹⁶Ruga'a sipisipini'a ama kegina agu'afina omni'naze, Nagra anahu kna hu'na zamaresuge'za, nagerura nentahi'za, zamagra magoke afu kevu hu'za mani'nageno, magoke afu kva vahe manigahie. ¹⁷Ama'na agafare Nenfa'a avesin'enante, na'ankure Nagra nasimura atretena, hagi ete nasimura erigahue. ¹⁸Mago'mo'a nasimura Nagripintira eriotre'gahie, hianagi Nagra'ni'a navesite antregahue. Nagrira hanaveni'a me'neankina antete'na, Nagripi hanavea me'neankina ete nasimura erigahue. Ama'na kea Nenfa nasamino huo hu'neankina hugahue.

¹⁹Na'ankure anagema hiazanku, Jiu vahe'mo'za zamagra'zmi mago'ene tarefi refko hu'naze. ²⁰Rama'amo'za hu'za, kefo hankro'mo agu'a fre'negenon negi neneanki, nahigetma naneke'a nentahi'ze? ²¹Mago'amo'za anage hu'naze, hankro'mo agu'afi fre'nea vahe nanekea omne'ne. Hankromo'a avu asuhu vahera erihari hanigeno kegahifi, onkegahie?

**Mono no kafa anagi'naza kna eme antege'za ne'za
neku, hazare Jisasi'a hanati'nea naneke**

²²Anante mono noma renagi'za Anumzamofon ami'naza ne'zane kna Jerusale kumate fore hu'ne. ²³Zasi ko atu knafi, Ra mono kumapi Jisasi'a, Solomon agire asamare'naza no kinte'nafi vano hu'ne. ²⁴Jiu kva vahe'mo'za Jisasi'a eme regagi'za, anage hu'za asmi'naze, nama'a kna kagra tazeri antesanketa kvega antegahune? Kagra Kraisiga mani'nenunka huama hunka amne tasmio. ²⁵Jisasi'a kenona zamire anage huno zamasmine, Nagra ko tamasminogetma, tamagra tamentinti nosaze, mika eri'zama Nenfa agifima enerua eri'zamo, Nagri nazeri ama nehie. ²⁶Hianagi tamagra tamentintia nosaze, na'ankure Nagri sipisipia tamagra omni'naze. ²⁷Nagri sipisipimo'za nagerura nentahize, hige'na Nagra zamantahi'noge'za, Nagrira namage neaze, ²⁸Nagra, mani'vava zamasmimura nezmue. Hagi zamagra fanene osugahaze. Mago ne'mo'a nazampintira ohanaregahie. ²⁹Nenfa'ma ana vahe nami'nemo, maka zampina ra hu'neankino, mago'moe huno Nenfa azampintira ohanaregahie. ³⁰Nenfa'ene, Nagranena magoke mani'noe.

³¹Huno nehige'za Jiu kva vahe'mo'za ahe frinaku ru'ene havekno eri'naze. ³²Jisasi amanage huno zamasmine, Nenfantegati knare eri'zana hakare'a hurmeri'noanki, ama anampintira ina erizanteku hutma have knonura naheku nehaze? ³³Jiu kva vahe'mo'za ke nona'a anage hu'naze,

knare eri'zama eri'nana zantera tagra have knonura onkahe'gosune, hianagi Anumzana huhaviza nehunka, kagra amne vahe'moka, Anumza mani'noema hanazanku kaheku nehune. ³⁴Jisasi'a kenona'a zamasmine, tamagri kasegefina na'ane huno korapara krente'ne, *Anumzamo'a huno, tamagra tmia anumza mani'naze hu'ne?* (Sam-Zga 82:35) ³⁵E'ina higu Anumzamofa nanekemo'a zamagrute e'nea nagaku huno, anumza tmine hanuno'a, (Anumzamofa avontafepe krente'naza kemo'a fuotgigahie). ³⁶Nenfa'a nazeri ruotge huteno, hunantege'na ama mopafi e'nogu, tamagra Anumzamofa huhaviza hunentane huta Nagrikura nehaze, na'ankure Nagra hu'na Anumzamofa mofavre huazankuro? ³⁷Nagrama Nenfa eri'zama e'norisuana, tamagra Nagritera tamentintia osiho. ³⁸Hianagi Nagra eri'zama'a e'nerugetagi, tamagra tamentintia Nagrikura nosaze, eri'zama eruazante negetma tamentinti hiho, e'inama hanuta keta antahita hanazana, Nagra Nenfampi manugeno, Nenfa'a Nagripi mani'ne hugahaze. ³⁹Mago'ene azerinaku nehzageno, zamatreno rufanene hu'ne. ⁴⁰Jisasi'a eteno Jodani ti takaheno Joni mono ti ese'ma frezmante'nea kaziga vuno, anantega umani'ne. ⁴¹Hakare vahe'mo'za mani'nerega uhnati'za amanage hu'naze, Joni'a mago avame'za osu'ne, ana hu'neanagi Joni'ma ama ne'ku'ma maka kema hu'neana tamage hu'ne. ⁴²Ana hige'za, anante rama'a vahe'mo'za Jisasinte zamentinti hu'naze.

Lasarusi fri'zamofa naneke

11 ¹Mago nera Lasarusi'e nehza ne'mo kri eri'ne. Agra Betanitere, Maria ene nenunkna Matake nemni'a kumate nere. ²Maria Ramofa manantake masavenu agare frenteteno, anu azokateti ana aga eri ho'mu hu'nea a'mofa nesaro kria eri'ne. ³Ana nanunkna'moke Jisasintega kea atrenteke, anage hu'na'e, Ramoka antahio, Kagrama avesima nentamo'a kri eri'ne. ⁴Higeno Jisasi'a ana ke nentahino, anage hu'ne, Ana krimo'a fri kantera avreno ovugahie, na'ankure Anumzamofa ra agi ami'nigeno, ana zantetira Anumzamofa Mofavremo ra agi erigahie. ⁵Jisasi'a Matane nenunknane, Lasarusine avesizamante'ne. ⁶Lasarusi kri eri'ne nanekema hzageno nentahino'a, tare zge'gna anama mani'nea kumate mani'ne. ⁷Ana huteno amage'nentaza disaipol nagaku huno, Judia kaziga ete vanu'ne huno zamasmine. ⁸Amage' nentaza disaipol nagamo'za anage hu'za asmi'naze, Hurami ne'moke (Rabbi), Jiu kva vahe'mo'za mensitfama have knonu kahenaku nehzarega, Kagra ete vu'za nehano? ⁹Jisasi'a kenona zamire anage hu'ne, 12fu'a kna (aua) mago zgefina omne'nefi? Mago vahe'mo'ma zge ferupima vanuno'a agra traka osugahie, na'ankure ama mopafi msa agra nege. ¹⁰Hu'neanagi mago'mo hanimpima vanuno'a ome traka hugahie, na'ankure msa agripina omne'ne. ¹¹Anagama huteno, mago'ene Jisasi'a anage hu'ne, ronetimo Lasarusi'a avu mse'ne, hianagi menina Nagra ome azeri otigahue.

12 Amage nentaza disaipol nagamo'za anage hu'naze, Ramoka, agra avu'ma mse'nesuno'a, knare hugahie. 13 Jisasi'ma hu'neana, Lasarus ko fri'nea zanku hu'neanagi, zamagrama antahizana amne avu mse'zanku nehie hu'za antahi'naze. 14 Jisasi'a anante huama huno zamasmine, Lasarusi'a ko fri'ne, 15 Tamagri tamaza hanigu Nagra muse nehu'na, ana kumatera omni'noe, e'ina hanigeta tamagra tamentinti hugahaze. Hianagi erinketa agritega vamneno. 16 E'ina hianagi Tomasi (Didimasi'e hu'neana kugavezare) nehaza ne'mo, magoka Jisasi amage nentaza disaipol nagaku huno, tagranena erinketa vuta Agrane ufri'maneno hu'ne.

Matane, Maria kizni Jisasi'a ke huznami'nea naneke

17 Jisasi ana kumate uhnatino, ome antahiana Lasarusina ko kerifi asentageno, 4'a zgegna evu'ne. 18 Betani kumara Jerusale tva'onte 3 kilo mitanaza me'ne. 19 Rama'a Jiu vahe'mo'za e'za Matane Maria kiznia, neznasaro fri'negeza e'za zname rentinti hu'naze. 20 Jisasi ne-e hia kema Matama nentahino, kantega ome kenaku vu'ne. Hianagi Maria'a nomp mani'ne. 21 Mata'a, Jisasina ome keno anage huno asmi'ne, Ramoka, Kagrama amafima mani'nantesina, nensaro Lasarusi'a ofrisine. 22 Hianagi meninena nagra antahi'noe, na'anku'ma Anumzamof antahige'sankeno'a, Anumzamo'a anazana kmigahie. 23 Jisasi'a kenona huno asmi'ne, negsaro Lasarusi'a ete otino asimu erigahie. 24 Mata'a amanage huno Jisasina asmi'ne, nagra antahi'noe, henkama otisaza zupa vgare knarera, agra otino asimu erigahie. 25 Jisasi'a amanage huno Matana asmi'ne, Fripinti otino asimu erino mani'zamof agafa'a Nagra mani'noe, iza'o Nagrite'ma amentinti hanimo'a, frigahianagi asimu erino manigahie. 26 Maka vahe'mo'za mani'neza Nagrite zamentinti hanazana, ofri'tfa hugahaze. Amama nehua kegura kagra kmentintia nehampi? 27 Mata'a anage huno asmi'ne, izo Ramoka, nagra namentinti hue, Kagra Kraisige, Anumzamof mofavre'moka Kagra ama mopafi erami'nane.

28 Mata'a anage huteno, vuno nenunkna Mariana sumi huno agesafi asmi'ne, Hurami ne'mo ne-eno kagriku ke nehie, huno asmi'geno, 29 ana kema nentahino'a, ame' huno Jisasinte vu'ne. 30 Jisasi'a ana kumapina uofreno, kantega Matama omegene'ne mani'negeno, Maria'a emege'ne. 31 Anante Jiu vahe'mo'za Maria'ene nomp ame rentinti hu'za mani'nareti, kageno'ma agra ame' huno otino megia' vige'za, zamagra amage nevu'za, keriare zvi ome ate'naku nevie hu'za antahi'naze. 32 E'ina higeno, Maria'a Jisasi mani'nere eno eme negeno, agiafi emaseno, anage huno asmi'ne, Ramoka Kagrama amafi mani'nantesina, nensaro Lasarusi'a ofrisine. 33 Jisasima kegeno zavi'ma netegeno'a, ana a'ene e'naza Jiu vahe'mo'zane zvi atageno, Jisasi'a nezmageno avamupina tusi'za huno rimpamo'a kna nehigeno, 34 Jisasi'a zamantahigeno, inantega ana nera asente'naze? Zamagra kenona hu'za Agrira asmi'naze, Ramoka enka emego. 35 Jisasi'a

zvi' ate'ne. ³⁶Zamasuma ragiku'ma e'naza Jiu vahe'mo'za anage hu'naze, Keho agrira tusi'za huno avesinte'ne! ³⁷Hianagi mago'amo'za anage hu'naze, ama ne'mo avu suhu ne' eri hari hunte'neankino, Agra Lasarusina mago'a zana huntogeno ofrino manisimpi?

Lasarusina kerifinti Jisasi'a azeri oti'nea naneke

³⁸Anante Jisasi mago'ene, rimpamo'a kna nehigeno ana ne'mofo kerire uhanati'ne. Havega me'nege'za ufreakantera have eri'za runkani re'naze. ³⁹Jisasi'a hunoana have rezahe hutreho, higeno fri'nea ne'mofo nesaro Mata anage huno asmi'ne, Ramoka, menina kno hi'mana vugahie, na'ankure 4'a zgegna ko mani'ne. ⁴⁰Jisasi'a anage huno ana ara asmi'ne, Ko kasmi'noe, kagrama kmentinti hnunka Anumzamofa hankve'a (glori) kegahane hu'na kasmi'nofi? ⁴¹Nentahi'za ana have rezahe hutre'naze. Anante Jisasi'a kesga hunagamuteno, anage hu'ne, Nenfaga, Nagra muse hugantoe, Kagra ke'nia antahi nami'nane. ⁴²Nagra antahi'noe, hakare zupa keni'a nentahine, hianagi kema nehuana ama oti'za mani'naza vaheku hu'na Nagra nehue, Kagra hunantake'na e'noe hu'za zamagra zamentinti hanagu nehue. ⁴³Jisasi'a anagama huteno'a, kezatino Lasarusiga, atiraminka eno! ⁴⁴Higeno fri'nea ne'mo atiramino e'ne, agiane, azanena, tavrave nofi'nu ana'neki'za, avugosa tavravenu anovazinageno Jisasi'a zamasmimo, Tavarave'a vakneta eri atrenkeno vino.

Jiu kva vahe'mo'za Jisasi ahenaku hu'naza naneke

(Mat 26:1-5, Mak 14:1-2, Luk 22:1-2)

⁴⁵E'ina hige'za, rama'a Jiu vahe Maria'ene e'namo'za, Jisasi'ma hiaza nege'za, Agrite zamentinti hu'naze. ⁴⁶Hianagi mago'amo'za vu'za Farisi mono vahete uhnati'za, Jisasi'ma hu'nea zamofa naneke ome zamasmimaze. ⁴⁷E'ina higeno, vugota mono vahe'ene (Sanhedrin), Farisi vahe'mo'za magopi eme atru hu'za anage hu'naze, Na'a menina hugahune? Ama ne'mo'a rama'a kaguvaza nehie. ⁴⁸Atresnunkeno anazanke huno Agra vaniana, maka vahe'mo'za Agrite zamentinti hanageno, Romu vahe'mo'za e'za ra mono nontine, mopatinena tarega hanaregahaze. ⁴⁹Anante mago'zmimo, Kaiafasi ra mono kva (hai pris) ana kafufina mani'nea ne'mo, anage huno zamasmimaze, tamagra mago'za antahintahitamifina nontahize. ⁵⁰Na'a hanigeno maka kumatine, mopatia eri havizana hugahie? Atrenkeno magoke'mo miko vahekura frisnie. ⁵¹Kazafasi'a agra antahi'zampinti ama kea osu'ne, hianagi ana kafufina ran mono kva (hai pris) mani'neni, kasnampa ke huno Jisasima frino maka Jiu vahe zamaza hania zanku hu'ne, ⁵²Nehuno Jiu kuma vaheke Agra zamaza osugahie, e'inama hanuno'a hazagre'za vu'za e'za hu'naza vahera zamazeri mago hanige'za Anumzamofa mofavre manigahaze. ⁵³E'i ana knareti erigafa hu'za, Jisasi ahe frisaza ke retro hu'naze.

⁵⁴E'inama hazazanku Jisasi'a mago'ene Jiu vahe zamurera kana onte'ne. Hianagi atreno vuno mago ka'ma kokampi me'nea rankuma kaziga Efraimie nehazarega amage' nentaza naga'ane umani'naze.

⁵⁵Menina Anumzamo Jiu vahe kinafinti zamare'nea knare (Pasova) ne'za ne kna atupa nehige'za, rama'amo'za kuma'zmi atre'za Jerusale mreri'za, ne'za nesagu zamagrazmi zmazeri agru huza retro hu'naze. ⁵⁶Ana nehu'za ra mono nomofo (tempol) kumapi oti'za mani'neza Jisasinku nehakre'za, zamagra zamagra anage hunaze. Na'ane hutma tamage'sa nentahize? Agra ama (Pasova) nezantera egahifi, omegahie? ⁵⁷Vugota hu'naza prisi vahe'ene, Farisi vahe'mo'za, anage hu'za rama'a vahepi hu'naze, iza'o Jisasima kesimo'a, eme tasamisigeta tagra azerisune hu'naze.

Maria'a, Jisasi agiare masave frente'nea naneke

(Mat 26:6-13, Mak 14:3-9)

12 ¹Kinafinti Jiu vahe zamare'nea kna (Pasova) Gsi'a zgegna atupa nehigeno, fri'nefinti azeri oti'nea ne' Lasarusi'ma nemnia kumate Jisasi'a Betani uhanati'ne. ²Anante Jisasima hu'nea nezana retro hunte'naze. Mata'a ne'za netigeno Lasarusi'ene, mago'a vahe'ene kave'ne sipare mani'naze. ³Trazamofu rafu'nareti tro hu'naza msavena, zgo'amo mreri'nea masaventafe Maria'a erino, Jisasina agiare tagino frenteteno, anu azokateti eri ho'mu huntegeno, ana nomofona mana'amo avite'ne. ⁴Hianagi Judas Iskariot, mago amage nentea disaipol ne'mo, komoru huno Jisasina avreno ha' vahe zamazampi antesimo anage hu'ne, ⁵na'a hanigeta ama msavena 3 hantreti'a silva zgorera atreta, zgo eritaⁱ zamunte omne vahera zamaza osugahunu? ⁶Menima Judas Iskariotima ama kema nehiana, na'ankure agra zamunte omne vahe zamaza hunaku nentahino nosie, hagi agra kumza nere. Zgo tafente kva nehia nekino, ome nentazana osi'a anampinkati musufa eritere nehia ne'mo anage higeno, ⁷Jisasi'a anage hu'ne, Asenante'saza knagu avega ante'nea zanki, atrenkeno agra ana hino. ⁸Na'ankure zamunte omne vahe'mo'za maka kna tamagra ne manigahaze, hianagi Nagra, tamagra nena maka kna omnigahue. ⁹Maka Jiu vahe'mo'za antahizana Jisasi emani'ne hige'za, zamagra Jisasinke kenaku ome'nazanki, Lasarusima, fri'nefinti azeri oti'nea ne' kenaku e'naze. ¹⁰Ana nehu'za vugota prisi vahe'mo'za Lasarusi'nena ahe frinaku ke anaki'naze. ¹¹Na'ankure Lasarusinte'ma fore hu'nea'zanku, rama'a Jiu vahe'mo'za atre'za nevu'za Jisasinte zamentinti hu'naze.

Jisasima Jerusalem ufre'nea naneke

(Mat 21:1-11, Mak 11:1-11, Luk 19:28-40)

¹²Anante nanterana rama'a vahe'mo'za, kinafinti zamare'nea knagu antahimiza ne'za (Pasova) nenaza knare e'namo'za, Jisasi'a Jerusale ne-ea

ⁱ 11 ni'a ikamofo mizan kna hu'ne.

ke antahi'naze. ¹³Antahite'za tofe zafamofo ani'na hantagi'za e'neri'za, ome ke'za amrara nehu'za kezati'za, *Tza huogu ke'za netune! (Hosana!) Ramofo Agifi ne-ea nera agi'a hentesga hanune! Israeli vahemofokinia agi'a hentesga hanune!* ¹⁴Jisasi'a mago agaho ve tonki afu keteno, agumpi mrerino mani'ne, kasnampa vahe'mo'za korapa krente'naza kemo efore hu'ne. ¹⁵*Korera osiho Saion veara, Keho tmagri Kinimo, agaho ve donki afumofogumpi manino ne-e.* (Zek 9:9) ¹⁶Agri amage nentaza disaipol naga'mo'za e'inama pusante hiazana antahi so'e osu'naze. Hianagi Jisasi'ma hanave'afi mrerino, Ra agi erige'za zamagra zamagesa nentahi'za, e'i Agriku huno avontafepina krente'negenogeno, amazana Agrite fore hie hu'naze. ¹⁷Ana higeno, rama'a vahe'mo'za, Jisasi'a kerifinti Lasarusi azeri otige'za ke'naza vahe'mo'za, mago'ene ome huama hume vu'naze. ¹⁸Ama'na agafare, vahe'mo'za anahu kna hu'za ome Agrira ke'naze. Na'ankure vahe'mo'za nosaza kaguvaza (mirakol) hu'nea ke nentahi'za ome ke'naze. ¹⁹Ana hige'za Farisi vahe'mo'za ohumi ahumi hu'za zamagra anage hu'naze, keho tagrira neratre'za maka vea'mo'za Jisasi amage avriri'za nevze.

Griki vahe'mo'za Jisasi kenaku hakre'naza naneke

²⁰Ana zupage Griki vahepinti mago'a vahe'mo'za, kinafinti zamare'nea ne'za ne'knare mono hunaku mreri'naze. ²¹Ana vahe'mo'za Galili kazigati Betsaida kumateti ne' Filipinte uhaniti'za antahige'za, ramoka Jisasi kenaku nehune. ²²Filipi'a eno Andruna eme asmitege'ne, tarega'moke vu'ke, Jisasina ome asmi'na'e. ²³Jisasi'a anage huno kenona zani'arera hu'ne, Vahe'mofo Mofavremo ra agi erisia kna atupa nehie. ²⁴Tamage hu'na neramasmue, witi rgamo'ma mopafi taniramino ofrisigeno'a anante megahie. Hianagi taniramino mopa agu'afi frisisigeno'a rama'a rga'a rentegahie. ²⁵Aza'o agragu'ma avesi antesimo'a, mani'zama'a eri haviza hugahie. Iza'o ama mopafi mani'zama'a ha'rentesimo'a, manivava asimu erigahie. ²⁶Iza'o, Nagri eri'za erinaku hanimo'a, namage eno, Nagrama umnisure, eri'za vahe nimo'enena anante umanigahie, iza'o, Nagri eri'za erisimofona, Nenfa'a ra agi amigahie.

Jisasi'a frisia ke zamasmineane naneke

²⁷Menina Nagu namemo kna navenesiarki, na'ane hu'na Nagra hugahue, Nafa'nimoka, ama knare (aua) fore hania knazampinti naza huo, hianagi ama'na agafare ama knarera (aua) e'noe. ²⁸Nafa'nimoka, ra kagi erio. Anante mago ageru monafinti eno amanage hu'ne, hago Nagra erisaga hu'noanki'na, rune Nagra erisaga hugahue hu'ne. ²⁹Rama'a vahe'ma atru hu'za anante oti'namo'za, ana ageru nentahi'za, monage nehie nehzageno, mago'amo'za ankeromo naneke hu nemigahie hu'za hu'naze. ³⁰Jisasi kenona'a anage hu'ne, ama'na agerura Nagri naza

hunakura nosianki, tmagri tmaza hunaku nehie. ³¹Menina ama mopa refkoku knae, menina ama mopafi kva hu'nea nera retufe atregahie. ³²Hanki, Nagri'ma mopafinti nazeri'sga hanige'na, hakare vahera zamare Nagrarega atregahue, ³³E'inagemama hu'neana, fri'zamo avate'ma fore hanigeno frisnigu huama hu'ne. ³⁴Hakare vahema atru hu'namo'za, Agrikura amanage hu'naze, tagrama kasegefinti antahi'nonana, Kraisi'a manivava hugahie hu'neanki, nahigenka Kagra hunka, Vahe'mofo Mofavre azeri sga hugahie nehane? Iza'e ana Vahe'mofo Mofavre'a? ³⁵Jisasi'a kenona anage huno zamasmine, Osi'a knafi Msamo'a tmagri amu nompina me'ne. Msama me'nenire kana nentenkeno hanimo'a tmagate oreno, iza'o hanimpima nevimo'a, iga nevio antahino keno nosie. ³⁶Msama me'nenire, kagra Msagura kmentinti'a huo, e'inama hanunka kagra Msamofo mofavre manigahane. Jisasi'a anage huteno, Agra zamatreno vuno ome frakino mani'ne.

Jisasi'a vahepi eri'za eri'nea zamo fore hu'nea naneke

³⁷Jisasi'a rama'a kaguvaza (mirakol) huzmeri hu'neanagi, zamagra zamentintia Agritera osu'naze. ³⁸Ana higeno kasnampa ne'mo Aisaia hu'nea kemofa avufa'a fore nehie, ***Ramoka iza tagri kerera amentintia nehie? Ramofo hanave'amo'a izante eama hu'ne?*** (Aisa 53:1) ³⁹E'i ana agafare vahe'mo'za zamentinti osugahaze, Aisaia'a mago ene anage hu'ne, ⁴⁰***Ramo zamurga erisu nehuno, zamarimpa kafana erigi'ne, e'ina hanige'za zamurga nonke'za, zamarimpa erigisige'za zamagu zamagesa antahi ama nosuza, zamagu'a rukrehe osnaga'na, zmazeri so'e osugahue hu'ne.*** (Aisa 6:10)

⁴¹Ama'i zanku'ma Aisaia'ma hu'neana, na'ankure Jisasi'a hanave'afi mani'negeno ke'negu huno, Agriku hu'ne.

⁴²Ana hianagi hakare'a mono kva vahe'mo'za zamentinti Agrite hu'naze. Hianagi Farisi vaheku kore hu'za Jisasi'a, Kraisi'e hu'za huama osu'naze, anagemama hanage'za mono nompinti (Sinagog) zamahe fegi atre'zanku kore hu'za osu'naze, ⁴³Na'ankure vahe'mo'za husga huzmante zanku nehu'za, Anumzamo husga huzmante zankura ontahi'naze.

Jisasi'a vgare naneke'a vahe zamufi hu'nea naneke

⁴⁴Jisasi'a ranke huno amanage hu'ne, iza'o Nagrite amentinti hanimo'a, Nagritekera amentinti osugahianki, Agrama hunantege'na e'nomofonte amentinti hugahie. ⁴⁵Iza'o Nagri'ma nenagemo'a, hunantege'na e'nomofone nege. ⁴⁶Nagra ama mopafi Msa e'noe, maka vahe'mo'za Nagrite zamentinti hanamo'za hanimpina omnigahaze. ⁴⁷Iza'o nanekenia nentahino, namage nome simofona kea huontegahue, na'ankure Nagra ama mopafi vahe refko hunaku ome'noe, hianagi mopafi vahe zamaza hu'na zamavrenaku e'noe. ⁴⁸Iza'o Nagri nenatreno, ke'nia

ontahisimofona, e'i anamofona refko'ma haniana, ama nanekema nehua nanekemo maka'za vgare knare, henka'a refko huntegahie. ⁴⁹Na'ankure Nagrani'a antahintahifinti ama nanekea nosue, hianagi Nfanimo Agra hunantege'na e'nomo, zamasmio hianke ana nanek'e'age nehue. ⁵⁰Nagra antahi'noe, e'i Agri kasege'a manivava asimure, e'ina hu'negu Nagrama nehua kea Nenfa'ma huoma hia ke'age nehue.

Amage'ma nentaza disaipol naga Jisasi'a zamaga sese hu'nea naneke

13 ¹Menina kinafinti zamare'nea knagu antahimiza (Pasova) ne'za nekna atupa higeno, Jisasi'a antahi'ne, ama mopa atreno Nefantega vnia kna egeno, amage nentaza disaipol nagara, Agrama zamesi nezmantea zamo'a atupare ehnati'ne.

²Jisasi'a amage' nentaza disaipol naga'ane ne'za nenegeno, Hankromo (Sata) Judas Iskariot, Saimon nemofo rimpafi ha' vahe zamazampi komoru huno avrentesia antahi'zana eme ante'ne. ³Jisasi'a antahi'ne, Nefa'a maka'zana Agri azampi ante'ne, Anumzamofonteti e'neankino, ete Anumzamofonte vugahie. ⁴Ne'za nenafinti otino, anakre ku'a zafi nenteno, tauri erino afafafi rugagino anakine. ⁵Anante Jisasi'a zompafi ti taginteno, amage nentaza disaipol naga zamaga agafa huno sese huteno, afafafi rugagi'nea taurinu zamagia eriho'mu huzmante'ne. ⁶Anante Saimon Pitante aga sese hunte'naku egeno, agra Jisasinku anage hu'ne, Ramoka nagia sese hugahano? ⁷Jisasi'a kenona anage huno asmi'ne, menima ama nehuazana kagra ontahi'nane, hianagi henka'a antahi ama hugahane. ⁸Pita'a anage huno Jisasina asmi'ne, Kagra nagia sese osu'tfa hugahane! Jisasi anage huno kenona'a hu'ne, Nagra kagiama sese osnugenka, Ngranena omnigahane. ⁹Saimon Pita'a anage huno Jisasina asmi'ne, Ramoka nagiarfana sesera osuo, hianagi anazanke hunka nazane, nanune sese huo! ¹⁰Jisasi'a anage huno asmi'ne, iza'o ko'ma tima fre'nemo'a, agiage sese hugahie, e'ina nehuno avu sese huno mani'gahie. Hanki kagra ko avu sese hu'nane, hianagi ana maka'mota avu sese osu'naze. ¹¹Na'ankure mago'mo komoru huno ha' vahe zamazampima avrentesimofona, Agra ko antahi'ne, e'ina hu'nea agafare, tamagra maka'mota avu sese osu'naze hu'ne.

¹²Anage huteno Jisasi'a zamagia sese huvga rezmantete'no, Nakre ku'a erino mani'nenno hu'nere umniteno, Jisasi'a anage huno zamsmi'ne, amazama tmagri'ma hunermantoana antahi'nazo? ¹³Tamagra Nagrikura rempi hurami Ne'ene, Rantie nehazana, tamagra tamage nehaze, Nagra ana nere. ¹⁴Nagrama Rantimi manina, hurmasmi Ne'mona tmagia sese hunermantesugeta, tamagra nena anazanke huta rumokizmi zamagia, sese ohunte ahunte hiho. ¹⁵Nagra hurmeri nehuanki, tamagranena anahu kna hutma rumokizmi'a zamagia sese huzmantegahaze. ¹⁶Tamage hu'na Nagra nermasmue, kazokzo eri'za vahe'mo'a kva'amofona agateoregahie.

Kema erino vnimo'a, katogema huntogeno vu'nemofona agateore'ne.
 17 Tamagrama amazama keta antahita nehuta, anazama hanutma asomu erigahaze.

Jisasima komoru hu'za ahesaza naneke
 (Mat 26:20-25, Mak 14:17-21, Luk 22:21-23)

18 Makamotagura nosue, Nagra huhampri'noa vahera antahi'noe. Hianagi Anumzamofu avontafepe kre'nea nanekea eri knare hugahie. *Nagrane brete nenemo ha' renantegahie huno kre'neana, hago avufga'a fore hugahie.* (Sam-Zga 41:9) 19 Meninena Nagra anazana efore osu'nege'na nerasmue, anazama efore'ma hanigeta, tamagra tamentinti nehuta, ana nere hutma Nagrikura hugahaze. 20 Tamage hu'na nerasmue, Nagrama huntugenogenu vnia vahe, avrenogenu azeri so'e huntogenu'a, Nagri navrenogenu nazeri so'e huntantegahie. Iza'ogenu Nagri'ma nazeri so'e hanimo'a, Agra huntantegenogenu e'nomofogenu azeri so'e hugahie.

21 Jisasima anage huvogama retengo, agu'amo kna nehigengo anage hu'ne, Tamage hu'na nermasmue, tamagripinti mago'mo ha' vahe azampina navre antegahie. 22 Amage nentaza disaipol naga'mo'za zamagra zamagra oge age nehu'za, inamo anara hunaku higengo nehie hu'za hu'naze. 23 Amage' nentaza disaipol nagapinti, Jisasi'ma avesi nentemo, azantmaga kaziga tvaonte mani'ne. 24 Ana higengo Saimon Pita'a avesima nentega disaipol ne'ra avame'ne huno, izanku Jisasi'a nehie antahigengaka ko huno asmni'ne. 25 Anante avesima nentega ne'mo, Jisasi asumpi mase kantitengo, anage huno Agrira antahigene, Ramoka ana nera iza'e? 26 Jisasi'a kenona anage hu'ne, bretima sosifima rete'na amisuana e'i ana nere, nehuno bretia sosifi retengo, Saimon Iskarioti nemofogenu Judasina ami'ne. 27 Ana bretima netegengo, Sata'a havi avamumogenu kvamo agu'afi ufrene. E'ina nehigengo Jisasi anage huno asmi'ne, ina knazama hunaku'ma hnunka, kvune antenka huo. 28 Mani'ne'za ne'za ne'naza vahe'mo'za, anama Judasinku'ma hia kea na'a agafare hu'nefi, antahi amara osu'naze. 29 Judasi zogenu taferote (bogisi) kva nehia neki'za, mago'amo'za antahizana mago'a upama hunona ne'za ome miza sege, amunte omne vahe, zogenu ome zaminogenu Jisasi'a hunente hu'za zamagesa antahinaze. 30 Ana higengo, Judasi'a bretima nehana nehuno'a, atiramino megia vu'ne. (Ko hani hu'negengo ana hu'ne.)

Kasefa tvumro tante'nea naneke
 (Mat 26:31-35, Mak 14:27-31, Luk 22:31-34)

31 Judasi'ma megia vute'genogenu, Jisasi anage hu'ne, menina Vahemogenu Mofavremogenu ra agi erisigengo, Anumzamogenu'a ra agi Agriteti eri'nia kna nee. 32 Anumzamogenu ra agi Agriteti eritesunogenu'a, anazanke huno Anumzamogenu ra agi Agrira amigahie, nehuno hantaka'a ra agi amigahie. 33 Mofavre

zgamota antahiho, Nagra osi'a knafi tamagra nena manigahue. Tamagra Nagrikura hakregahaze, Jiu mono kva vahera ananke ko zamasm'noe. Meninena ana kege nermasmue, Nagrama inantega vnurega tamagra omegahaze. ³⁴Nagra kasefa kasege tamagrira neramue, Nagrama navesi neramantoa kna huta rumokizmia zmesinezmanteta, anahu kna hutma ovesinte avesinte hiho. ³⁵Tamagrama mago'mofo ovesinte avesinte nehnage'za, maka vahe'mo'za nege'za, tamagra Nagri namage nentaza disaipol naga mani'naze hu'za hugahaze.

³⁶Saimon Pita'a anage huno Jisasinku hu'ne, Ramoka, kagra iga vunaku nehane higeno? Jisasi'a ana kenona'a huno, Nagrama vanurega, menina kagra navaririnka omegahane, hianagi kagra henka egahane. ³⁷Pita'a anage Jisasinku hu'ne, Ramoke, na'a hanige'na nagra menina Kagri kmagera omegahue? Nagra Kagriteku hu'na frinaku menina tro nehue. ³⁸Jisasi'a kenona'a anage huno asmi'ne, Nagriku hunka frigahano? Tamage hu'na negasmue, Nagrikura onke'noe hunka 3'a zupa vahane hutesankeno, henka kokorega hugahie.

Jisasi'a vgare naneke amage nentaza disaipol naga zamasm'nea naneke

14 ¹Atrenkeno tmagu'amo'a kna osino, Anumzamofonte tamentinti nehuta, anahu kna huta Nagrite'ene tamentinti hiho. ²Nenfa nompina rama'a hunaraginte nona me'ne, omne'neresina Nagra ko tamasmusine, Nagra, nonkuma tmia ome retro hunaku nevue. ³Nagrama vu'na nonkuma tmi ome retro hutesu'na, ete e'na eme tmaresugeta, Nagrama umnisure, tamagra Negrane umani'gahaze. ⁴Hagi Nagra inantega vugahuo, tamagra antahi'naze. ⁵Tomasi'a anage huno Jisasi asmi'ne, Ramoke tagra ontahi'none, iga Kagra vugahane, tagra inankna huta ana kana kegahune? ⁶Jisasi'a anage huno asmi'ne, Nagra kana mani'na, tamage ke manina, asimumofa agafa Nagra mani'noe, mago'mo'a aru kantetira Nenfatera ovugahie. A'o, Nagriteti vugahie. ⁷Nagri'ma nagenka nantahinka kagra hantesina, Nenfana anahu kna hunka kenka antahinka kagra hantesine, meni agafa hunka Agrira nentahinka negane. ⁸Filipi'a anage huno Agri asmi'ne, Ramoke Negfana tveri hugeno tagrira knare huranteno. ⁹Jisasi'a anage huno asmi'ne, Nagra kagranena rama'a kna mani'noanki, kagra nahigenka Nagrira onage'nane? Iza'o Nagri'ma nagemo'a, Nenfana ke'ne! Nahigenka kagra hunka, Negfana naveri huo hunka nehane? ¹⁰Nenfampi Nagra manugeno, Nenfa'a Nagripi mani'ne hua kegura, nahigenka kmentintia nosane? Nagra nagesafinti kea kagrira nonkasmue, hianagi Nenfa'a nagu'afi mani'nemo, Agra kaguvaza hu eri'za e'nerie. ¹¹Tamentintima hanazana, Nagra Nenfampi manugeno, Nenfa'a Nagripi mani'ne hiho, hu'neanagi ana'ma osnutma kaguvazama eri forehu eri'zama eri'nogu nentahitma tamentinti hugahaze.

¹²Tamage hu'na Nagra neramasmue, iza'o Nagrite amentinti hanimo'a, Nagrama e'nerua eri'zana anahu kna huno kaguvazama eri forehu eri'za

e'nerino, Nagatereno ra eri'za erigahie, na'ankure Nagra Nenfantega vugahue. ¹³Inankna zanku'ma Nagri nagifi nantahigesazana, Nagra amne hugahue. Nefa'a ra agi Nemofompinti erigahie. ¹⁴Tamagrama inankna zankuro Nagri nagifima nantahi kesage'na, Nagra anazana amne hugahue.

Jisasi'a Avamumofu eri'zanku rempi huzami'nea naneke

¹⁵Nagri'ma navesinantesuta kasegeni'a amage antegahaze. ¹⁶Nenfana antahigesugeno, Agra mago tmaza hu'zana tamisnigeno, Agra tamagra ne manivava hugahie. ¹⁷E'i ana tmaza hu'zana tamage Routge Avamure, ama mopafi vahe'mo'za e'origahaze, na'ankure zamagra ke'za antahi'za osu'naze. Hianagi tamagra Agrira (Avamura) antahi'naze, na'ankure Agra tamagra ne mani'neni, tmagu'afi manigahie.

¹⁸Nagra tmatresugetma megusa mofavregna huta omnigahaze, Nagra tmagrite egahue. ¹⁹Osi'a knafi mopafi vahe'mo'za Nagrira onagegahaze, hianagi tamagra Nagrira nagegahaze. Na'ankure Nagra mani'noankita, tamagra nena anahu kna huta manigahaze. ²⁰E'i ana knazupa, tamagra antahigahaze Nagra Nenfana agu'afi mnugeta, tamagra Nagri nagu'afi manisagena, Nagra tmagri tmagu'afi manigahue. ²¹Iza'o Nagri kasegema amage antesimo'a, Nagrira avesinantegahie, iza'o Nagri'ma avesinantenimofona Nenfala agrira avesintegahie, hnige'na Nagra avesintena, Nagra'ni'a agrite efore hugahue. ²²Ru Judasi amanage huno Ramofona antahige'ne, nankna hunka Kagra tagrite eama nehunka, ama mopafi vahetera eamara osugahane? ²³Jisasi'a ana kenona'a anage huno zamasmine, iza'o Nagri'ma avesi nantesimo'a, ke'nia amage antesigeno, Nenfala avesintena tagra, agrane emanigahune. ²⁴Iza'o Nagri'ma avesi onantesimo'a, Nagri kea amage ontegahie. Ama kema nentahizana Nagri kea omne'ne, hianagi Nenfama hunantege'na e'nomofu ke nontahize.

²⁵Ama zantminku Nagra nehuana, tamagra ne mani'nena nehue. ²⁶Hianagi tmaza hu'zana, Ruotge Avamu, Nenfala Nagri nagifi huntisigeno eno, Agra maka'zanku eme rempi huramigahie. Nagrama maka'zanku tmasmi'noana hurmagesa hugahie.

²⁷Tamarimpa fru Nagra tamagripi nentoe, Nagra narimpa frua tamagri neramue, ama mopafi vahe'mo'za nermizankna tamarimpa frua Nagra noramue. Atrenkeno tamaguamo'a kna nosina korora osiho. ²⁸tamagra nentahizage'na Nagra tmagrira tmasmi'na, tmatre'na vute'na, ete tmagrite egahue hu'noe. Tamagrama Nagri navesinantesuta muse hugahaze, na'ankure Nagra Nenfantega vugahue, Nagrira Nenfala nagtereno Ra mani'ne. ²⁹Nagra menina fore osu'negena neramasmue, fore'ma hania zupa, tamagra Nagrite tamentinti hugahaze. ³⁰Nagra za'zatera nanekea ontasmigahue, ama mopa kva nehia ne' Sata'a hago ne-e, agrira hanave'a omne'neankino, Nagrira nagateoregahie. ³¹Hianagi ama mopafi

vahe'mo'a antahino keno hugahie, Nagra Nenfana navesinentoe, Nagra Nenfa'ma huo hunoma humanante'neaza nehuanki, otinketa amafintira vamneno.

Waini zafane, azankuna'amofo naneke

15 ¹Nagra tamage waini zafamofo nena'a mani'noe. Nenfa'a waini hozamofo nefa'e. ²Hakare azankuna'amo Nagripi me'nenno rga reontesimofona, Agra akafri netreno, hakare azankuna'amo rga rentesiana, mago'ene traga huno eri fatgo hanigeno, aguhenno rga reontegahie. ³Tamagra ko agru hu'naze, na'ankure kema tmasmi'noa kemo tmazeri agru hu'ne. ⁴Nagri nagu'afi emaninenke'na, Nagra tmagri tmagu'afi mani'nenno. Zafa azankuna'amo agra avesitera rga'a reontegahie, waini zafare azankuna'amo ru okamre snuno'a rga reontegahie. Hagi Nagrite'ma ruokamare'sutma rga'a reontegahaze. ⁵Nagra waini zafa mani'nogeta, tamagra azankuna'a mani'naze. Iza'o Nagripi manige'na agripi mani'nomo'a, rama'a rga renente, Nagri'ma natresuta mago'zana osu'tfa hugahaze. ⁶Mago'mo vahe'mo'ma Nagri nagu'afi omnisimofona, azankuna eritru hu'nazageno osaparea kna hina, mate vu'za tevefi kregahaze. ⁷Tamagrama, Nagri nagu'afi mani'ne'nageno, naneke ni'amo tamagri tmagu'afi me'nena, tmesinia zankuma nantahigesazana amne erigahaze. ⁸Tamagra rama'a rga renentenkeno, Nenfa'a ra agi erisige'za nege'za, Nagri namage nentaza disaipol vahere hu'za tamagrikura hugahaze. ⁹Nenfa'ma, Nagri'ma navesi nante'neaza hu'na, Nagranena anahu kna hu'na tmesi nermantoanki, ana navesimofu agu'afi manihio. ¹⁰Tamagrama kasege ni'ama amage' antesuta, tamagra Nagri navesimofu agu'afi manigahaze, Nagrama, Nenfa kasegema amage ante'na, Agri avesizamofu agu'afi mani'noankna huta manigahaze. ¹¹Ama zanku'ma Nagra nermasmuana, Nagri muse zamo tmagri tmagu'afi me'nigeno, musezantmimo'a avitegahie.

¹²Ama'i Nagri kasege, tmararunku ovesinte, avesinte hiho, Nagrama, tmagri'ma navesi tmante'noa kna hiho. ¹³Mago'mo'ma rone'agu avesinteno, agra asimuma atreno frisimo'a, tusi'a ugota hu'nea avesiza huzmerigahie. ¹⁴Nagrama neramasmua kasegema amage antesutma Tamagra, Nagri rone manigahaze. ¹⁵Nagra ru'ene kazokzo eri'za vahe'ni'e hu'na tmagrikura osugahue, na'ankure kazokzo eri'za vahe'mo'a kva'amo'ma hiazana ontahi'ne. Hianagi Nagra rone'nimote hu'na tmagrikura nehue, na'ankure Nenfantegati maka'zama Nagrama antahuazana, tmagrira neramasmue. ¹⁶Tamagra, Nagrira huhampri'onante'naze, hianagi Nagra, tmagrira huhampri'tamantena, tmazeri oti'noe, vuta nena rga'a ome rentesageno, ana rgamo me'nena, na'ankuro Nagri nagifi Nenfama antahigesageno'a, Agra amne tmigahie. ¹⁷Nagra ama kasege neramasmue, tmararuna ovesinte avesinte hiho.

Ama mopafi vahe'mo'za ha' rezmante'saza naneke

¹⁸Jisasi amanage huno zamasmine, ama mopafi vahe'mo'za ha' rermantesaza zanku kva hiho, na'ankure ese agafare, Nagri ha' renante'naze. ¹⁹Ama'na mopafi vahe mani'naresina, ama mopafi vahe'mo'za tagri vahere hu'za zamesi rmantasine, ana hu'neanagi na'ankure tamagra ama mopafi vahera omni'naze. Hianagi Nagra ama mopafinti tmagrira tmavre'noe, ana agafare ama mopafi vahe'mo'za hara reramantegahaze. ²⁰Ko'ma tmasmi'noa kegu tamagesa antahiho, kazokzo eri'za ne'amo'a, kva vahe'a knara osu'ne. Nagri'ma nazanva ante'nesu'za, tamagri enena anahu kna hu'za tmazanva antegahaze, ke'ni'a amage antenare'sina, tmagri kea ana zanke hu'za antahizasine. ²¹Hianagi Nagri nagimo tmagripi me'nenigeno'a, e'ina hu'zana hurmantegahaze, na'ankure hunantege'na e'nomofona ke'za antahi'za osu'nagu ana hurmategahaze. ²²Nagrama naneke e'na eme ozmasmuasina, zamagrira kumi'zmi omne sine. Hianagi menina kumi'zmia eri fraki ka zamia omnegahie. ²³Nagri'ma ha'ma renantesimo'a, ana zanke huno Nenfana ha' renente. ²⁴Mago'a vahe'mo'za e'orinaza kaguva eri'zama zamagri amu'nompi e'ori'noasinia, kumi'zmia omnesine. Hianagi menina kaguva eri'zani'a kazanagi, Nagri'ene Nenfana ha' renerantaze. ²⁵Menima anazama nehazana, zamagri kasegefi kre'naza ke eri knare nehaze, *Mago havizana Nagra osunoge'za, hara retenantaze.* (Sam-Zga 69:4) ²⁶Tmazama hu'zama huntugeno Nenfantegati tmagrite esuno'a, Agra Tmage Avamukino Nagri nagenkea eriamu hugahie. ²⁷Tamaganena ana zanke hutma Nagri nanekea huama hugahaze, na'ankure tamagra Negrane mani'nage'na, eri'zana eri agafa hu'na eri'noe.

16 ¹Ru tamentintifinti evuramizanku, ama nanekea menina neramasmue. ²Jiu vahe mono nompinti (sinagog) tmahe anati atregahaze, mago kna ne-eankino, tmahefrisu'za zamagesa antahisazana Anumzamofu eri'za e'nerune hu'za antahigahaze. ³E'ina hu'za zamagra hurmantegahaze, na'ankure Nenfane Nagri enena ontahi'nagu anara hurmantegahaze. ⁴Hianagi ama zanku Nagra nermasmuankino, ana zgegna (aua) efore'ma hina, Nagrama tmasmi'noa kegu tamagra antahigahaze. Ese agafare Nagra ontmasmi'noe, na'ankure Nagra tamagra ne mani'nogu ontmasmi'noe.

Ruotge Avamu'mo eri'za erisia naneke

⁵Hianagi menina Agra hunantege'na e'nomofonte, Nagra vunaku nehugeta mago'moka nantahigenka, iga vunaku nehane hunka nantahi nonkane? ⁶Hianagi vugahue hu'na Nagrama tamasmua kemo, tamagri tamagu'a erigna nehie. ⁷Hianagi Nagra tamage neramasmue, tamagrime eme tamaza hanigu vugahue, na'ankure Nagrama tmatre'na ovanugeno'a,

tmaza hu'zana tmagritera omegahie. Hianagi Nagrama vanuna, huntanena, Agra tamagritega egahie. ⁸Hankino Agra esuno'a, mopafi vahe'mokizmi kumi'ene, Anumzamofa fatgo avu'ava zane, henkama refko huno keaga huzmantesiaza zameri nehuno, ⁹kumi zamimofonku zamasmigahie. Na'ankure zamagra Nagritera zamentintia osu'naze. ¹⁰Na'ankure fatgo navu'nava hanuana, Nenfantega vanugeta, tamagra Nagrira onagegahaze. ¹¹Hagi kema refko haniaza eme huramerigahie, na'ankure ama mopa kva hu'nemofona hago keaga hunte'noe.

¹²Nagra mago'a rama'a naneke tamasmusine, hianagi menina tamagra antahise osugahaze. ¹³Hianagi Tmage Avamu'ma esuno'a, agu'vazi zamanteno tamage nanekemofa eri ama huno tasmigahie. Na'ankure Agra'a antahintahi'ane, hanave'arera ana nanekea osugahie, hianagi na'ano Agrama antahisia kege nehuno, henkama esia zamofonku tasmigahie. ¹⁴Avamumo'a, Nagri nagi erisaga hugahie, na'ankure Nagripi me'neazana erino tmagrira tasmigahie. ¹⁵Maka'zama Nenfama ante'neana Nagri'zane, e'ina hu'negu, Avamumo'a Nagripinti ana nanekea erino tamagrira tasmigahie.

Musezamo zamarimpa knazamofa kumara erigahie hu'nea naneke

¹⁶Osi'a knafi omni'nanena tamagra onagegahaze, hagi ete osia knafi tamagra nagegahaze. ¹⁷Mago'a amage' nentaza disaipol naga'mo'za zamagra zamagra ohumi ahumi nehu'za anage hu'naze, ama'i nankna naneke tasmino, osi'a knafi tamagra onagegahaze nehuno, ete osi'a knafi nagegahaze nehie. Na'ankure Nagra Nenfante vugahue nehie? ¹⁸Amage' nentaza disaipol naga'mo'za anage hu'naze, ama'i na'anku Agra anage huno, osi'a knafine nehie? Tagra ontahi'none, na'anku Agra nehifi ontahi'none hu'za hu'naze. ¹⁹Zamagra antahigenaku Jisasina nehazageno nentahino, anage huno zamasmine, Nagra hu'na, osi'a knafi onageta, ete osi'a knafi nagegahaze hua kegu, tamagra antahintahi hakare nehazo? ²⁰Tamagerfa hu'na neramasmue. Tamagra tamavunu nehina ranke huta zavira ategahaze, hianagi ama mopafi vahe'mo'za muse hugahaze. Tamagra tamarimpa kna hugahazanagi ete tmarimpa knamo'a eri rukrahe hanigeta, muse hugahaze. ²¹A'mo mofavrema nenteno'a atagu nehie, na'ankure mofavrema ksente kna egeno'e, hianagi mofavrema ksente'no'a, ana atagura agesa nontahie. Na'ankure ama mopafi mofavrema ksentea muse nehie. ²²E'i ana hu'negu tamagra menina zavira netaze, hianagi Nagra henka nermagesugeno, tamagu'amo muse nehina, mago'mo ana musezana tamagripintira eri otregahie. ²³Ana knarera Nagrira mago'zankura nantahi onkegahaze. Tamagerafa hu'na tamagrira neramasmue, Nenfama mago zanku'ma Nagri nagifima antahigesageno'a, amne tamigahie. ²⁴Korapara Nagri nagifina mago'zankura nantahi onke'naze. Nantahigetma tamagra erigahaze, e'ina hanageno muse zantmimo'a avitegahie.

²⁵Nagra amanage hu'na fronka kefinti neramasmue, mago kna ne-
eanki'na, ana kna zupa fronka kefintira ontamasmigahue. Hianagi huama
hu'na Nenfankura tasmigahue. ²⁶E'i ana knazupa, Nagri nagifi Nenfana
antahigegahaze. Nagra tamagri tamagi eri'na, Nenfana asmigahue
hu'na nosue. ²⁷Hagi Nenfana tmagrira Agra'a avesinermante, na'ankure
tamagra Nagrira tamavesinenteta Nagrikura Anumzamofonteti e'ne huta
tamentinti hu'naze. ²⁸Nagra Nenfantegati e'na, ama mopafina e'noe,
hianagi ama mopa ete atre'na Nenfana hirega vugahue.

²⁹Agri amage' nentaza disaipol naga'mo'za anage hu'naze, ko menina
Kagra amate ke huama nehunka, fronka kea osane. ³⁰Tagra menina
antahi'none, Kagra maka'zana antahi'nane, mago zankura vahe'mo'a
kagenoka osugahie. E'ina'ma hanazante tagra tamentinti nehuta,
Anumzantegati e'nane huta nehune. ³¹Jisasi'a kenona huno, Menina
tamagra tamentinti nehazo? ³²Keho, knamo'a (aua) hago eno ama
e'ne, mago mago'moka nonkarega nevunka, natresanke'na Nagrake
manigahue, ana hugahazanagi Nagrakera omnigahue, na'ankure Nenfana
Nagrane mani'ne. ³³Ama'ina naneke Nagra neramasmuana, Nagripinti
tamarimpa fru erigahaze. Ama mopafina hazenke zane, kasuzamo
eghianagi, oti hanavetiho, na'ankure Nagra ama mopa hago agtere'noe.

Jisasi'a ra agi aminogu Nefantega nunamu hu'nea naneke

17 ¹Jisasi ana naneke huvareteno, Agra kesga huno monafi negeno
amanage hu'ne, Nenfana hago kna (aua) eforehie, Negamofona ra
agi amigeno, Negamofa anazanke huno, Kagrira rankagi kamino. ²Maka
vahete kvahu hihamu ami'nane, ana hankeno maka ami'nana vahera,
Agra zamaza huno manivava mani'za zamigahie. ³Ama'i manivava
mani'zane hu'za, zamagra kage'za antahi'za nehu'za, magoketfa tamage
Anumzane nehu'za, Jisas Kraisi huntankeno e'ne hugahaze. ⁴Nagra ama
mopafi Kagri kagi eri ra hu'na, Nagri'ma eri'za erio hunka nami'nana
eri'zana hago eri vgare'noe. ⁵Menia Nenfana, Kagra kaziga navrento,
korapa'ma mopa fore osu'nera mani'neta hu'no'a konariri zampi, Kagrane
umanisu'e. (Eks-Utr 3:14)

⁶Nagra Kagri kagi kagenkeka'a kokankoka vahe'pinti'ma avare
nami'nana vahera zamasmu ama hu'noe. Zamagra Kagrika'a vahe, Nagrira
nami'nane, hagi zamagra keka'a antahi'za amage' ante'naze. ⁷Menia maka
nami'nana zankura, Kagra nami'nane hu'za antahigahaze. ⁸Na'ankure
Kagrama nasmi'nana kea Nagra zamasmu'noe. Zamagra anankeka eneri'za
Nagrikura tamage Agriteti e'ne nehu'za, Agra huntengeno e'ne hu'za
zamentinti nehaze.

⁹Nagra, zamagri zamagi' eri'na nunamuna nehue. Nagra kokankoka
vahe zamagi' eri'na nosue, hagi Nagri'ma nami'nana vahe zamagi' eri'na
nunamuna nehue, na'ankure zamagra Kagri suza mani'naze. ¹⁰Hagi

maka Nagri vahe'mo'za, Kagri vahere, maka Kagri vahera, Nagri vahere, ana vahe'mo'za Nagrira ra nagi nenamize. ¹¹Mago'ene Nagra ama mopafina omanigahue, zamagra'zmi ama mopafina manigahaze, hige'na Nagra Kagritega neoe. Ruotge hunana Nenfaga, Kagrama ante nami'nana nagifi zamavu vazi'sankeza, tagrama mago hu'nonankna hu'za zamagra mago hugahaze. ¹²Nagra zamagranema mani'nena, Kagri kagire manisnaze hu'na zamagu'vazina kva huzmante'noe. Kagrama nami'namokizmia mago'mo'a fnane osu'ne, hianagi magoke'mofo fanane hinogura huhamprinte'ne, ana hanigeno Anumzamofa avontafe'mo hu'nea kantera avufa'a fore hugahie. (Sam-Zga 41:9) ¹³Hu'neanagi Nagra, Kagrite menina ne-e'na, ama mopafina Nagra amanahu kea nehuankino, Nagri muse zamo'a (joy) zamagripi avitegahie. ¹⁴Nagra, Kagri nanekea ko zamasmie'noe, huge'za mopa kagi'afi vahe'mo'za zamesra huzmante'naze, na'ankure zamagra ama mopafi vahera omni'naze, Nagrama ama mopafi vahe'ma omni'noa kna hu'naze. ¹⁵Nagra ama mopareti zamavre atrogura nosue, hagi havi ne'mofo azampinti zamazeri anovazisanegu nehue. ¹⁶Zamagra ama mopafi vahera omni'naze, Nagra enena anahu hu'na, ama mopafi vahera omni'noe. ¹⁷Tamage kefi zamazeri avusese hunka zamazeri otge huo. Kagri keka'amo'a tamage. ¹⁸Kagrama hunantanke'na ama mopafina e'noankina, Nagra ana zanke hu'na mopa kagi'afi hunezmantoe. ¹⁹Nagra zamagri huzmeri'na avusese hu'na mani otage hu'noe, ana nehuanki'za zamagranena anazanke hu'za Kagrite avusese nehu'za, tamage hu'za mani otage hugahaze.

²⁰Nagrma namage nentaza disaipol nagakuke hu'na nunamuna nosue, hagi ke'ni'a huama nehzage'za, Nagrite zamentinti hanaza naga'enenku nehue, ²¹ana hanuge'za zamagra maka'mo'za magoke hu'za, Nenfaga, Nagrane mago huta mani'no'a kna hu'za, Tagra ene mago hu'za zamagra mani'nesage'za, kokankokati vahe'mo'za nege'za, Kagra huntankeno e'ne hu'za zamentinti hugahaze. ²²Kagrama hanavema Nagri nami'nana hanavea, Nagra zamagri zami'noe, ana hanuge'za zamagra mago hu'za manisaze. Tagrama mago huta mani'no'a kna hu'za manisazegu zami'noe. ²³Nagra zamagripi manugenka, Kagra, Nagripi mani'nane, hanige'za zamagra magoke zamarimpa hu'za manigahaze. Ana hananke'za ama mopafi vahe'mo'za nege'za, Kagra huntankeno ama mopafina e'ne hu'za nentahi sakenka, Nagri'ma kvesi nante'nana kna hunka, zamavesi zamantegahane. ²⁴Nenfaga, Nagri'ma nami'nana vahe'zga, Nagrama manisufi manisazegu navenesie, ana hu'ne'za Nagri'ma nami'nana hanavea kesaze, na'ankure Kagra korapa mopa omne'nea knafi, Nagrite kagu'a antenka hanavea nami'nane. ²⁵Fatgo Nenfaga, kokankoka vahe'mo'za kage'za antahi'za osu'gahazanagi, Nagra kage'na kantahi'na hu'noe, hagi amama namage'nentaza naga'moza antahi'za, Kagra huntankeno e'ne hu'za nehaze. ²⁶Nagra, Kagri kagi'a hu'ama hu'na zamagrira nezmasamue, hagi'na mago'ene hagerfi'na hu'ama

hu'na zamasmigahue, kvesima nenantana kvesi zamo'a, zamagri zamagu'afi mesige'na, Nagra anazanke hu'na zamagripi manigahue.

Judasi'a ha' vahe zamazampi Jisasi avarente'nea naneke
(*Mat 26:47-56, Mak 14:43-50, Luk 22:47-53*)

18 ¹Ana nanekema huvareteno, Jisasi'a atreno disaipol naga'ane Kidron agupofi vute'za, ananteti vumare'za mago knagune zafa hoza me'nefi vu'naze. ²Judasima komoru huntesia ne'mo'a, ana zafa knagune hoza ke'ne, na'ankure Jisasi'a disaipol naga'ane knagune hozafi mago'a knafina zamareno vutere'ma higeno ke'ne. ³Higeno Judasi'a mago'a Roma sondia kevune, ra mono nonte kva nehaza naga'ene (Gat), vugote'naza prisi vahe'ene, Farisi vahe'enena olivi zafa hozafi tosine, tafentavi'ene, ha'zane eri'nageno zamavreno vu'ne. ⁴Mika'zama Agrite fore haniazana, na'ankure Jisasi antahino keno nehuno, Azanku nehakraze? huno zamantahige'ne. ⁵Zamagra ana kemofo nona'a Agriku hu'za, Nazareti kumateti Jisasinku nehakrone, hzageno, Nagra ana Nere. Judasima komoru huno ha' vahe zamazampi avrentesia ne'mo zamagrane anante oti'ne. ⁶Jisasi'ma anage zamagriku huno, Nagra ana Nere hige'za, zamefiti vu'za mopafi traka truku humse'naze. ⁷Ana hzageno, Jisasi'a mago'ene zamantahige'ne, tamagra azanku nehakraze? Hige'za zamagra hu'za, Nazareti kumateti Jisasinku nehakrone. ⁸Jisasi'a ke nona'a huno, Ko'ma Nagra ana Nere hu'na tmasmio'ne, Nagriku'ma nehakrehanuta, ama vahera zamatenke'za viho. ⁹Agrama hu'neana, ko'ma Agra'ama hunte'nea kemofo nena'a fore hinogu hu'ne. Kagrama nami'nana vahepintira magore hu'na Nagra zamatroge'za afe osu'naze, hu'nea kegu hu'ne. ¹⁰Pita'a ra kazinkno (bainat) eri'nereti anoma'afinti avazu hia zamo vugote'nea prisi ne'mofo kazokzo eri'za nera tamaga kaziga agesa ahe tavrofe atre'ne. Ana kazokzo eri'za ne'mofo agi'a Malakusi'e. ¹¹Ana higeno Jisasi'a, Pitanku huno, Kazinka'a anoma'afi vazinto. Nenfa'ma nami'nea tin tafempintira (kapu) Nagra onesuo?

Jisasina avare'za Anasinte vu'naza naneke

¹²Anante mago sondia kevune, sondia vahete vugota huno kvakri zmante'nea ne'ene, Jiu vahe'mokizmi ati vahe'mo'zane, Jisasi azeri'za azante nofi kinte'naze. ¹³Anakite'za esera Anasinte avare'za vu'naze, na'ankure agra Kaiafasi nenemo'e, Kaiafasi'a ana kafumofu agu'afina vugota prisi ne' mani'ne. ¹⁴Korapara Kaiafasi Jiu kva vahera antahintahizamino, hakare vahe'mokizmi nona huno magoke ne'mo frigahie huno hu'neane.

Pita'a, onke'noe huno Jisasinku hu'nea naneke
(*Mat 26:69-70, Mak 14:66-68, Luk 22:55-57*)

¹⁵Saimon Pita ene, magora Jisasima amage' nentea disaipoli ne'ene Jisasima avare'za Anasinte vazage'za anantega zamavririke vu'na'e.

E'i anama vu'nea disaipoli nera, prisi ne'mo'a ke'nea disaipoli nere. ¹⁶Hianagi, Saimon Pita'a kasante fegi'a otino mani'ne. Ana higeno Jisasi amage' nentea disaipoli nera vugota pris ne'mo ke'nea ne'mo atiramino, kazokzo eri'za mofa'mo kafante kva hu'nea mofa asamigeno, Pitana avreno agu'afi emareri'ne. ¹⁷Anante kazokzo eri'za mofa'ma kafante kva nehia mofa'mo Pitanku amange huno antahige'ne, Kagra ama Ne' amage' nentana disaipol nere, tamage ana nepi? Huno antahigegeno, A'o, Nagra ru nere. ¹⁸Anantera kazokzo eri'za vahe'ene, nonte kva nehaza vahe'ene, tanknuzare teve hegre'za oti'za mani kagi'naze. Na'ankure zasi hige'za teve tohiku hugre'naze. Pita'enena ana tevere uoti'nenno teve tohi'ne.

Anasi'a, Jisasi agenoka hu'nea naneke
(*Mat 26:59-66, Mak 14:55-64, Luk 22:66-71*)

¹⁹Ana zama fore nehigeno'a, vugota pris ne'mo, amage nentaza disaipol naga'ene, rempi'ma huzami'nea kegu Jisasina agenoka hu'ne. ²⁰Jisasi ana kenona'a anage hu'ne, Nagra amate mika kaziga naneke hu'noe. Nagra maka zupa Jiu vahe osi mono nompine (sinagog) ra mono noma (tempol), Jiu vahe maka atru nehaza nomofo megia' rempihuzami'noe, Nagra magore huna oku'a nanekea huozmi'noe. ²¹Na'anku Nagria nantahi negane? Nentahizage'na huzmasmi'noa vahe zamantahigenka ko, Nagrama hu'noa nanekea, zamagra antahi'naze. ²²Jisasi'ma ana nanekema higeno'a, mago ra mono nonte kva nehia ne'mo, Jisasina avugosafi ruhapatino neheno amange hu'ne, E'inahu hunka vugota pris vahe kerera ke nona hugahano? ²³Jisasi ke nona huno agri asmi'ne, Havigema hu'nesua zanku'ma nehanugenka, havizani'a hufore huo, hianagi tamage kema nehuana nahigenka kagra knonkevea nenamine? ²⁴Higeno anante Anasi'a nofira ovasneno huntogeno, Kaiafasi vugota pris nete avare'za vu'naze.

Pita'a onke'noe huno, Jisasinku mago'ene, tare zupa hu'nea naneke
(*Mat 26:71-75, Mak 14:69-72, Luk 22:58-62*)

²⁵Saimon Pita'a oti'nenno teve tonehige'za, tevere mani'naza vahe'mo'za antahige'za, Kagra'nena e'ina ne' amage' nentana disaipol ne' mani'nampi? Hu'za antahigageno, Pita'a vahane huno, A'o nagra ru nere. ²⁶Mago vugota pris ne'mofo kazokzo eri'za ne'ma, Pita kazi knonteti (bainat) aghesa rutavrofe atre'nea ne'mofona nefu' Pitanku huno, Zafa hozafi Agrane mani'nanke'na kagrira kage'noa nepi, ru nere? ²⁷Higeno, Pita'a mago'ene vahane nehigeno, ana amage hantaka'a, kokoremo ageru ru'ne.

Jisasi avare'za Paelati nete vu'naza naneke
(*Mat 27:1-2,11-14, Mak 15:1-5, Luk 23:1-5*)

²⁸Ananteti zamagra Kaiafasintetira ko'atu avame Jisasina avare'za Roma ugagota kva (gavana) ne'mofo nonte vu'naze. Vunazanagi zamagra

ugagota nemofo kumapina uofre'naze. Ana zamo zamazeri pehena resige'za, Hibru vahe kinafinti zamare'nea knagu antahimiza neza nenaza knare ovuzanku ana hzageno, ²⁹Paeroti ne'mo zamagritega megia' atiramino eno anage hu'ne, Ama'na nera nankemofo agafare nanekea hu'nentaze? Huno zamantahige'ne. ³⁰Zamagra kenona hu'za asmi'naze, ama ne'mo'ma hazenke ne'ma omni'nesina, tagra avreta kagritera omosine. ³¹Hzageno Paeroti'a zamasmine, tamagratami avaretma tamagri kasegemo hu'nesia kante Agrira keaga huntaho. Jiu vahe'mo'za Paerotinku anage hu'naze. Tagrira vahe'ma zamahe fri'zantera i'o hurante'naze. ³²Ana kema hu'nazana, Jisasi'ma korapa Agrama fritenoma otinia zankuma zamasmine'nea kemo e'ama hu'ne.

³³E'ina higeno, anante Paeroti'a eteno ugagota vahe (gavana) nOMPI vuno, Jisasina kehuno, Kagra Jiu vahe'mokizmi Kinifi? Huno antahige'ne. ³⁴Jisasi kenona huno, Kagra kagesafinti ke nehampi, mago'a vahe'mo'za Nagri'kura kasmi nagenka nehano? ³⁵Paeroti'a ke nona huno, Nagra Jiu ne' mani'nofi? Kagri vahe'mo'zane, ra mono kva vahe'mo'za (hai pris) Kagrira kzerite'za, kvare'za eme nami'naze. Kagra na'a hu'nantere? ³⁶Jisasi ke nona'a hu'ne, Nagri kumara ama mopafina omne'ne. Ama mopare kva vahe mani'noresina eri'za vahenimo'za, Nagritekura ha' hazage'za, Nagrira navre'za Jiu vahera ozamizasine, hianagi Nagri kumara ama mopafina omne'ne. ³⁷E'inage higeno Paeroti'a asmi'ne, higenka Kagra kinio? Jisasi ke nona'a hu'ne, Kagra Nagriku'ma kinie nehanana tamage. Ama'na kegafare Nagra ama mopafina efore hu'noe. Nagra ama'na agafare ama mopafina e'noe, tamage naneke huama hunaku e'noe. Maka vahe'mo'za tamage nanekegu zamave'ma nesimo'za, Nagri nagerute zamagesa ante'za nentahiza tamage nehaze. ³⁸Paeroti'a antahige'ne, tamage nanekea inanknahu ke me'ne? Anagama huteno'a, megia' atiramino Jiu kva vahete vuno anage hu'ne, Mago havizana nagra, Agripina ke'na erifore osue. ³⁹Hu'neanagi tamagri avu'avate kinafinti tamavare'nea (Pasova) knare mago ne' kinafinti azeri atretere hugahue hu'negu, tamagra ma antahizana nagra kinafintira, Jiu vahe'motma Kini ne' hunte'sugeno vanio? ⁴⁰Hige'za kezati'za amanage hu'naze, Ama'na nera avare otre'gahane, hagi Barabasi avare atro, Barabasi'a kumzafa ne'ku hu'naze.

Paeroti'a Jisasina kinafinti azeri atre'naku hu'nea naneke

(Mat 27:15-31, Mak 15:6-20, Luk 23:13-25)

19 ¹Anante Paeroti'a huzmantege'za Jisasina sefu ami'naze. ²Anante sondia vahe'mo'za ave'ave nofite kini vahe'mokizmi fetorikna huza tro hute'za, Jisasi anunte antani nente'za, koranke kukena hunte'naze. ³Zamagra Agrite ete'vute nehu'za, Husga hunte'za ankaza nente'za, Keho, ama Jiu vahe'mokizmi kinia! Nehu'za avugosafi mago'ene

ruhapa hapa hu'za ahe'naze. ⁴Mago'ene Paeroti'a ete atiramino, Jiu kva vaheku amanage huno zamasmine, Keho, ama ne'ma nagrama avare'na tmagrite'ma neoana, antahisazana mago keaga Agri'ma hunte'zana omne'ne. ⁵Anante Jisasina ave'ave nofite fetori'ene, koranke kukena antani antetageno, atiramino e'ne. Paeroti'a anage hu'ne, Keho, ama Nera! ⁶Vugote'naza pris vahe'ene, mono no kegva nehza vahe'mo'za (gad) Agri'ma nege'za amanage hu'za kezati'naze, aheta hantiho, aheta hantiho! Hzageno Paeroti'a zamasmine, Tamagratmi avretma rugeka zafare ome aheho, na'ankure nagra mago hazenke'a omne'nege'na negoe, huno zamasmine. ⁷Jiu kva vahe'mo'za ke nona'a amanage hu'naze, Tagrira kasegetia me'ne, hagi ana kase kemofo amage' anteno Agra frigahie. Na'ankure Agra Anumzamofa Ne'mofavre mani'noe huno hu'ne. ⁸Ana kema Paeroti'a nentahino, tusiza huno agra mago'ene amanogura hu'ne. ⁹Eteno Paeroti'a kuma'afi ufreno, Jisasinku anage hu'ne, Kagra igati e'nane? Hianagi Jisasi'a magore huno agri kenona'a osu'ne. ¹⁰Ke osigeno, Paeroti'a anage huno asmine, kema hunami'zankura nahigeno kave nosie? Kagra ontahi'nano, Kagri'ma katufe katre hanavene, rugeka zafare kahena hanti hanavema nagrama eri'noana? ¹¹Jisasi ke nona'a asmine, Kagra Anumzamoma hanavema onkamasina, Nagri'ma kegva hunantega hanavea e'orintesine, hagi monafinkati ne'mo hanigenka anara hugahane. Na'ankure navreno kzampima eme ante'nemo'a, kagrira kagatereno tusi'a kumi hu'ne. ¹²Ana kema antahiteno'a Paeroti'a aza huno katufe atrenaku tusiza huno agesa antahi'ne. Hianagi Jiu kva vahe'mo'za kezati'za, kagrama ama ne'ma katufe atresunka, kagra Sisa knampa omni'nane! Mago'mo kini manigahue hanimo'a, Sisana ha' rentegahie. ¹³Paeroti'a ana kema haza nentahino, Jisasi avare fegi'a atreno naneke fgagohu trate umani'ne, ana kumamofa agi'a, Havereti simeni hunte'naza kumare nehaze, hagi Hibru/Arami kefina, Gabate hu'za nehaze.

¹⁴Jiu vahe'mo'za kinafinti zamare'nea knagu antahimiza nenaza (Pasova) ne'za retro tra hunaku nehzageno, zgemo'a feru asegeno Paeroti'a Jiu vaheku huno, Keho, ama tamagri Kinia! ¹⁵Anagema hige'za kezanke hu'za, Avretma viho, avretma viho, Agrira ahetma hantiho! Nehzageno Paeroti'a zamantahige'ne, Nagra, tamagri Kinia ahena hantisuo? Hige'za pris vahe'mo'za ke nona'a hu'za, Tagri kinia magora omni'neanki, Sisa agrake mani'ne. ¹⁶Anagema hzageno Paeroti'a Jisasina ahe'zama keka zafare hantihogu zamige'za Jisasina azeri'naze.

Keka zafare Jisasi ahe'naza naneke

(Mat 27:32-44, Mak 15:21-32, Luk 23:26-43)

¹⁷Anante Jisasi'a keka zafa'a erino, vahe anu zaferine nehaza mopare, Hibru kefina Golgote nehazare erino vu'ne. ¹⁸E'i anante Jisasina nehe'za, tare netrena ruga raga asopare znahe'za rugeka zafare nehanti'za,

Agrira amu'nompi hanti'naze. ¹⁹Paeroti'a mago avona kreno, ana keka zafare hanti'ne. Anage huno kre'ne, JISASI'A NAZARETI NERE, JIU VAHE'MOKIZMI KINIE. ²⁰Huno krente'nege'za hakare Jiu vahe'mo'za hampri'za ke'naze. Na'ankure Jisasima ahe'za hanti'naza mopa, rankuma tva'onte me'ne, ana kema krente'neana Hibru kefine, Latini kefine, Griki kefima huno ana avona krentene. ²¹Anante Jiu vahe'mokizmi vugota pris vahe'mo'za Paerotina asmi'za, Jiu vahe'mokizmi Kinie hunka onkrenka, hagi Agra'a huno, Nagra Jiu vahe'mokizmi Kinie huno hu'ne hunka kro hu'za asmi'naze. ²²Paeroti'a ke nonazmire zamasmino, Inankna keo nagrama krente'noana hago krente'noe.

²³Anante sondia vahe'mo'za, Jisasi rugeka zafare ahe'za hantite'za, amegati kukena'a eri refko hu'za 4'a kevu ante'naze, mago'mo mago kevu eritere hu'are, avate kukena'ama hati'nazana eri mago hu'za anagamuti hati'za fenkamu urami'naze. ²⁴Hige'za sondia vahe'mo'za ke hugantu hugma hu'za, erisagnera osinkero, hagi satu zokago reta kesune, aza erisifi, e'i ana kemo Anumzamofa avon tafe'mo hu'nea ke eriana hu'ne, ***Zamagra amega kena'ni'a amu'no zamifi fagago hu'za eri'naze, zamagra nagri kenarera, taisi zokago re'naze.*** (Sam-Zga 22:18) Anama kre'naza kante anteza sondi'a vahe'mo'za ana kemofa eri knare hu'naze.

²⁵Hianagi Jisasi ahe'za hanti'naza keka zafamofa agafafina, Agri nereraki, nererana nenunknaki, Klopas nenaro Mariaki, Magdala kumateti Mariaki hu'za oti'naze. ²⁶Nerera'ene, amage' nentegeni avesi nentea disaipoli ne' ene anante oti'nakeno Jisasi'ma neznageno'a, Agra nereranku huno, Amoka ko, ama'ne kagri ne'mofavrea! ²⁷Anante amage' nentea disaipoli neku hu'ne, Ko, kagri negrera'a ama'ne! Ana knareti agafa huno amage' nentea disaipoli ne'mo ana ara avreno noma'are vu'ne.

Jisasi fri'nea naneke

(Mat 27:45-56, Mak 15:33-41, Luk 23:44-49)

²⁸Anama huteno'a, Jisasi antahino keno hiana maka'zamo hago vgaregeno, Anumzamofa avontafemo hu'nea kea eriknare huteno, *tinku navenesie*, huno hu'ne. (Sam-Zga 69:21) ²⁹Mago mopa kavofi akake waini ti aviteno anante menege'za, kapuki eri'za hisopu zafare anakite'za, ana aka waini timpi rete'za (spons) erisaga hu'za agite ante'naze. ³⁰Ana hzageno Jisasi'ma ana akake waini tima neteno'a, Agra hu'ne, Ha vgare! nehuno Agra kepri huno avamu'a atre'ne.

³¹Anante retrotra huknazmi me'negu hu'za, mni fruhu kna (sabat) efregahianki rugeka zafare kerfa'a omnesie hu'naze, (na'ankure kinafinti zamavre'nea knagu antahimiza ne'za nenaza knane, mni fruhu (sabat) knanena magoka ra kna'zmi me'negu hu'za,) Jiu kva vahe'mo'za huza, zamagia ru hantagi tenketa, anante fri kerfa eri mopafi atreta, erita vamneno hu'za Paeroti antahige'naze. ³²Higeno sondia vahe'mo'za e'za,

Jisasine znahe'za hanti'naza netremo'kizni znaga ru hantagi'naze, pusante mago'mofo ru'hantagiteno, mago'mofona henka ana hu'ne. ³³Hianagi Jisasinte'ma e'za eme kazana, ko fri'nege'za tarega agia ruha'ontagi'naze. ³⁴Hianagi mago sondia ne'mo krugru kevereti Agrira asopafi regeno, hantaka huno korane, avufa rimo'ene herfino evu'ne. ³⁵E'i ana zama ke'nea ne'mo ama naneke huama huno kre'ne, agrama hu'nea naneke tamage hu'ne, agra antahi'nenom tamage huno nehie. Ana hanigenka kagranena anazanke hunka kmentinti hugahane. ³⁶Na'ankure ama anazama fore hu'neana, Anumzamofom avontafepi kre'nea nanekemo nena'a fore hanigu huno, **agri zaferina magore huza ruha ontagigahaze hu'ne** (Sam-Zga 34:20) ³⁷Ete mago avontafemo mago'ene huno, **Zamagra zamuma kesazana, agri'ma krugru asopafi re'namofonte kegahaze** huno hu'ne. (Sek 12:10)

Jisasima havegampi eri asente'naza naneke
(Mat 27:57-61, Mak 15:42-47, Luk 23:50-56)

³⁸Anazama vgaregeno Arimatia kumateti ne' Josefe, Jisasi amage' nentea disaipoli ne'mo, Jiu kva vahe koro nehuno oku'a Jisasi fri'kerfa erino vanigu Paerotina antahige'ne. Antahige'geno Paeroti'a hugnare huntengeno agra vuno Jisasi fri'kerfa ome erino vu'ne. ³⁹Nikodimasi mago kenage, Jisasinte e'nea ne'mo, Josefe'ene tragoteno eno, mana nentake msavena miane, alone, magopi tagi havia hu'nea masvena kna'zanimom 34 kilo'naza hu'nea erino vu'ne. ⁴⁰Anante znagra Jisasi fri'kerfa eri'ne, ana masaventami avufare frente'ne, tvarave tafepi frikerfa'a kargina'e. Jiu vahe'mo'za vahe ase nezmante'za nehaza avu'ava hu'na'e. ⁴¹Anama ahe'za Agri'ma hanti'naza kaziga hoza me'negeno, anante ksefa havegana, vahera ase ozmante'naza havega ana hozafina me'ne. ⁴²E'ina hu'negu Jiu vahe'mokizmi mni fru hunaku retro tra nehaza kna'zmi (sabat) atupa hige'za, ana tva'onte me'nea havegampi Jisasina eri'za ome asente'naze.

Jisasi fri'nefinti oti'nea naneke
(Mat 28:1-8, Mak 16:1-8, Luk 24:1-12)

20 ¹Pusa zgegna Sonta zupa msa osu'negeno, ko'atu hanimpi Magdala kumateti Maria, Jisasi asente'naza kerirega kenaku uhnatino ome keana, ana keru agite runknire'naza havea ko atufe atre'negeno ome ke'ne. ²Ome keama agite renkanire have retufe atre'nageno, ete rukrahe huno agareno eno Saimon Pitane, mago amage nentengeno Jisasi avesin'entea disaipoli ne'ene eme znasmi'ne. Ramofo fri'kerfa'a kerifintira hago erisaga hu'za iga Agrira ome ante'nafi onke'none. ³Zanasamige'ne Pita'ene mago'ma amage' ante'nea disaipoli ne'ene ana keru ome kenaku vu'na'e. ⁴Tarega'moke znaga re'ne nevapinti, mago'ma amage' ante'nea disaipol ne'mo, Pitana agtereno kagota huno

asente'naza havegantera uhanati'ne. ⁵Uhnatino upri huno ome keana anoma vazinte'naza tavrave (linen) anante me'negeno ke'ne, hagi agra ana havegamofu agu'afinka umre ori'ne. ⁶Anante Saimon Pita'a amage'a ne-ereti ehnatino ana havegampi evumareri'ne, marerino ome keana avufare karagi'naza tavrave anantera me'negeno ke'ne, ⁷avugosafi tavravene Jisasi anunte karaginte'naza tavravene, avufare karaginte'naza tavravenena, omne'negeno ke'ne. Hianagi avugosafi tavravea regazri'za rure antageno me'negeno ke'ne. ⁸Anante amage nentea disaipoli ne'ma ese'ma kerire ehanati'nemo, mrrerino ome negeno tamage huno amentinti hu'ne. ⁹Na'ankure Anumzamofu avontafepima Jisasi friteno otigahie hu'naza nanekea, zamagra antahi ani osune'za ana hu'naze. ¹⁰Ana huteke tarega amage' nenta'a disaipol ne'tremo, noznirega atre'ne vu'na'e.

Magdala kumateti Mariante Jisasi efore hu'nea naneke

(Mat 28:9-10, Mak 16:9-11)

¹¹Hianagi Maria'a fegi'a ana havegante oti'neni zvi neteno mani'ne. Zavi netereti pri huno ana have kamofu agu'afinka keana, ¹²tare ankeri netremo efe kukena hute'ne mani'nakeno, Jisasi antemse'nare znage'ne, mago'mo agama me'nea kaziga manigeno, mago'mo asenima me'nea kaziga manigeno hu'na'e. ¹³Znagra ana a'mofonku amange hu'na'e, Ama a'moka na'anku zvira netane? Maria ke nonazniri huno, na'ankure Ranimofona inantega eri'za vu'nazo, inantega ante'nazo nagra ontahi'noe. ¹⁴Anagema a'mo huteno rukrahe'ma hiana, Jisasi anante oti'negeno keanagi, Jisasi'e huno ontahi'ne. ¹⁵Jisasi ana a'ku huno, A'moka na'anku zavira netane? Azanku nehakrane? Na'ankure ana a'mo antahiana hoza kva nehia nere nehuno Agriku hu'ne, Kva vahe'moka, Jisasi inante ome ante'nampi naveri hananke'na Agrira ome eri'na vugahue ¹⁶Jisasi ana a'ku hu'ne, Maria! Higeno a'mo rukrehe huno Jisasi Hibu kefinti, Rabonai! (ana kemofu agafa'a Hibu kefina Hurami ne're) hu'ne. ¹⁷Jisasi'a ke nona'a huno, Nagra eme navako osuo, na'ankure Nenfante mreori'noe, hianagi vunka nafu'heina ome zamasmio, Nagra eme Nerfante, Nagra mrrerigahue. Nagra Anumzane tmagri Anumza mani'nerega, vugahie hunka ome zamasmio, ¹⁸Magdala kumateti Maria'a ete rukrahe huno eazamo, amage' nentaza disaipol naga'a eme zamasmio, Nagra Ranimofona ke'noe! Ana a'mo Jisasi'ma hu'nea ke eme zamasmio'ne.

Amage' nentaza disaipol naga amu'nomp Jisasi efore hu'nea naneke

(Mat 28:16-20, Mak 16:14-18, Luk 24:36-49)

¹⁹Ana zupa kinaga, eri'za knamofona ese zupa Sonta, haninkige'za amage nentaza disaipol naga'mo'za Jiu kva vaheku zamagoro hu'za kafa eri ki'za no agu'afi mani'nageno, Jisasi eazamo amu'nozmifi eme otino

zamagriku anage hu'ne, Tamarimpamo fru hino, huno zamasmi'ne. ²⁰Anagema Agra huvgareteno, tarega azane, ratimpa avufane zamaveri higeza nege'za amage' nentaza disaipol nagamo'za, Rantie hu'za muse hu'naze. ²¹Ru'ene Jisasi zamasmi'ne, Tamarimpamo fru hino, Nenfa hunantege'na e'noaza hu'na, Nagra anazanke hu'na huneramantoe. ²²Anage Agra huteno, Jisasi asimua zamagrite huhu huvazi nezmanteno, Ruotge Avamu eriho. ²³Hagi tamagra vahe'mokizmi kumi atre zamantesageno'a, kumi'zmia atre zamantegahie, hagi tamagra ma kumi'zmi atre ozmante sageno'a, atre ozmante'gahie.

Tomasi, Jisasinku hu'nea naneke

²⁴Hianagi Tomasi, mago 12fu'a amagema nentaza disaipol nagapinti, Didimasi'e nehazana, ana agimofu agu'agesa kugavezare nehaza ne'mo Jisasi'ma e'nea zupa omni'negeno e'ne. ²⁵Ana hu'negu mago'a amage nentaza disaipol nagamo'za asmi'za, Tagra Ramofona ke'none! Hianagi agra ke nona zamire zamasmimo, Azante niri afuhe nege'na niri afuhete avako nehu'na, ratimpare nazama avako hutesu'nage, nagra namentintia hugahue.

²⁶7'a zgegna agaterege'za, rosaza hu'za amage' nentaza disaipol nagamo'za, Tomasi'ene magopi kafana erigi'za mani'nazageno, zamagri amu'nompi Jisasi eme otino, Tamarimpa fru eriho, huno hu'ne. ²⁷Anante Tomasinku huno, Kza antegma atenka kza avozareti, Nagri nazana avako hunka ko. Kza antegma atenka nasopare antenka ko. Kmentintifina krogro onkio, hianagi kamentinti huo. ²⁸Tomasi ke nona huno Jisasi asmi'ne, Nagri Ranimoka, nagri Anumzane! ²⁹Jisasi agriku hu'ne, Kagra Nagri nagetenka kmentintia hugahampi? Onage'neza zamentinti hanamo'za, Asomura erigahaze, huno Jisasi'a hu'ne.

³⁰E'izanku hakare'a kaguvazama Jisasi'a amage nentaza disaipol naga'mokizmi zamufi huzmeri'ne. Ana zantmina ama avontafepina kre onte'noe. ³¹Hianagi ama kre'naza avomo hugasmisigenka kmentinti nehunka, Jisasi'a Tzahu ne', Anumzamofu Ne'mofavre, Kraisi'e hunka kmentinti hanunka kagra manivava mani'zana Agri agireti erigahane.

Jisasi 7ni'a disaipol naga'are Galili efore huzami'nea naneke

21 ¹Henka'a Jisasi'a mago'ene Taeberias mago agi'a Galili tiru ankenare, amate efore huzmerige'za amage' nentaza disaipol naga'amo'za ke'naze. Ama'amokizmire efore hige'za ke'naze. ²Saimon Pita'ma, Tomasi mago agi'a Didimasi'ma, Natanael Kana kumateti ne'ene, Zebedi nemofokegi, tare amage' nenta'a disaipol netrene atru hu'za mani'naze. ³Saimon Pita zamasmimo, nagra nozame kuko atreku nevue higeno, tagra anazanke huta magoka vugahune, nehu'za ventefi mreri'za vu'naze. Ana kengera magore hu'za nozamea avazu osu'naze.

⁴Anante ko'ma atigeno, nanterana Jisasi'a tinkenare oti'neanagi, amage nentaza disaipol naga'mo'za, Jisasi'e hu'za keso'e osu'naze. ⁵Anante Jisasi zamasmine, Mofavre nagare tamagra nozamea avazu osu'naze, tamageo? Huno zamantahigege'za, zamagra ke nona'a izo avazu osu'none, hu'za hu'naze. ⁶Agra zamasmino, kukon tmia eritma ventemfofo tmaga kazigati omo atretma, mago'a nozamea avazu hugahaze. Hige'za ana kukoma atrete'za, avazu hu'zanku kasgeke hu'naze, na'ankure rama'a nozamemo ana kukompi frevitege'za ana hu'naze. ⁷Jisasi'ma avesi nentea disaipol ne'mo Pitanku anage hu'ne, antu e'i Ramo'e! Saimon Pita'ma antahiamma Rane higeno'a, amega kukena'a eri hankre'ne, (na'ankure timpi eri'za erinaku agra atova hutre'nereti ana hu'ne), timpi tkaureno nagosa runo ti ankenarega vu'ne. ⁸Hianagi mago'a amage' nentaza disaipol naga'mo'za osi ventefi e'naze, na'ankure mopa afete'are omne'negeze. Hagi 100ti'a mita zaza'a hu'nege'za nozame zgamo avi'ma te'nea kukona avazu huzma e'naze.

⁹Zamagrama tinkenare e'za eme kazana tanknuza (sakol) teve hegre'nare, mago nozamene, breti'ne ana tevere menege'za ome ke'naze. ¹⁰Jisasi, zamagriku huno, Menima azeri'za nozamefinti mago'a eritma eho. ¹¹Higeno Saimon Pita'a ventefi mmerino ana kukona avazu huno tinkenare e'ne. Ranra nozamea 153'amo avite'ne, mago'a rama'a nozamemo kukompina ufre'neanagi, ana kukona tagato osu'ne. ¹²Jisasi'a zamagriku anage hu'ne, Eta nantera ne'za eme neho. Hianangi amage' nentaza disaipol nagapinti mago'mo, Kagra azage, hu'za antahige'zankura koro hu'naze, na'ankure zamagra Rane hu'za ko antahi'naze. ¹³Jisasi eno breti emerino zamagrira nezmino, nozamea anazanke huno zami'ne. ¹⁴Fri'nefinti Jisasi'ma otino zameri'neana, tagufa (3) zupa amate efore huzmerige'za amage' nentaza disaipol naga'mo'za ke'naze.

Jisasi'a Pitanku sipisipi zgani'a kva huo hu'nea naneke

¹⁵Nantera ne'zama nehna hutageno, Jisasi'a Saimon Pitanku huno, Saimon, Joni nemofoga, kagra ama vahe'zga zamagterenka Nagrikura kvesinenantampi? Huno antahi'gegeno, Ozo Ramoka, Kagra antahi'nane, nagra navesi negantoe. Jisasi'a asmimo, sipisipi nagani'a ne'za zamio. ¹⁶Jisasi'a tare zupa mago'ene asmi'ne, Saimoni, Joni nemofoga, Nagrikura kve'nesio? Ozo, Ramoka, Kagra antahi'nane nagra Kagrira navesi negantoe, Jisasi agriku hu'ne, Sipisipi zga'ni'a kegva huo. ¹⁷Jisasi'a tagufa zupa ana kege huno asmi'ne, Saimon, Joni nemofoga, Nagrikura kvesi nenantano? Higeno Pita'a arimpa kna hu'ne, na'ankure tagufa zupama Nagrikura kve'nesio? Huno antahigea zankure. Pita'a Agriku hu'ne, Ramoka, Kagra maka'zana antahi'nane. Nagrama navesi negantoana Kagra antahi'nane. Higeno Jisasi ke nona'a asmimo, Sipisipi zga'ni'a ne'zana zamio hu'ne. ¹⁸Tmagerfa hu'na negasmue, Kagrama kahefa'ma

mani'nantera kenakarera kamu'nofi hunka kvesi'zante kana vano hu'nane, hianagi ranafa resunka, kzana rutaesanke'za rumo'za kagrira kukena hugante'za, ovuku hanantega kavare'za vugahaze. ¹⁹(Menima Jisasi'ma hu'neana, Pitama henka frino Anumzamofoma ra agi ami'nia zanku huama hu'ne.) Ana kema Agra huteno, Jisasi'a Pita asmimo, Namage anto! Huno asmi'ne.

Pitane, Jisasima avesi nentea aposol ne'mofo naneke

²⁰Pita'a rukrahe huno keana, Jisasi avesi avesi hunentegeni amage' nentea disaipoli ne'mo znavaririno e'ne. Ana nera Jisasi ahihi'zafi umase tragoteno ne'zama nenafima antahigeno, Ramoke, iza Kagrira vahe zamazampina kazerino antegahie? Huno antahige'nea ne' e'ne. ²¹Pita'ma ana ne' negeno'a, Jisasina antahige'ne, Ramoke, ama nera nankna hugahie? ²²Jisasi ke nona'a agri asmimo, Nagrama, Agriku mani'nesige'na ete'na esuema hanua knarera, kagri'zana omne'neanki, na'ane hugahane? Kagra namage anto! ²³Higeno anama hu'nea kemo'a Jisasinte zamentinti nehaza nagate vuno eno higeno, ama'na disaipol nera ofrigahie hu'naze. Hianagi Jisasi'a, agrikura ofrigahie huno osu'ne, hianagi frisiko manisio Nagrama mani'nesigena e'tena esue hanuazamo'a kagri'zana omne'neanki, na'ane hugahane? huno hu'ne.

²⁴Ama'na disaipol ne'mo agra'a amazana huama huno ana zantamina kre'ne, hige'ta tagra antahita agri kegura (testimoni) tamage huta nehune.

²⁵Hagi hakare ruga'a zama Jisasi'a hu'nea zana me'ne, ana maka'zama avon tafepima kre'neresina, nagrama antahuana ama mopafina avon tafemo'a titipa higeno, anama kraza avontafe ante kankamuna omneresine.

Aposol Vahe'mo'kizmi Erizamofa Naneke

Jisasi monafinka mreri'nea naneke

1 ¹Nagra Luku'na, ese avontafe'ma kre'nofina, Tiofolisiga ko kasmi'noe, Jisasi'ma agafa huno hakarezama nehuno rempima hunezamigeno, ²avreno monafinka vu'nea knare ehanati'ne. Hianagi vunaku nehuno Agrama zamavare'nea aposol nagara ruotge Avamu'mo aza higeno, eri'zama erisaza'zanku zamasm'i'ne. ³Ana amage nentea aposol nagateke, atama erino fri'nefinti otino, Nagra mani'noe huno 40ti'a zage'gnafina zamavure vano nehuno, anahu kna huno Agra rama'a kampinti, ruzahu ruzahu ke nehuno, mika'zama Anumzamofa kumapima me'nea avu'ava zanku kea nehige'za nege'za antahi'naze. ⁴Ko'ma zamagrane mani'nenoa, anage huno huzmante'ne, Jerusale kumara otretfa hiho, hianagi Nenfa'ma huvempa huno huhampri nante'nea zanku'ma tmasmi'noana avega antetma maniho. ⁵Na'ankure Joni'a tintfanu mono tina frezmante'ne, hianagi ama knaretira upa knafi, tamagra ruotge Avamuteti tina fregahaze.

⁶Aposol nagamo'za eritru hu'za magopi manite'za, agafa hu'za Jisasina antahige'naze. Ramoka amagna, Israeli vahe'mokizmi nomani'za zamazeri fatgo nehu'na, kva krizmantegahue hu'nana knafi? ⁷Agra anage huno zamasm'i'ne, tamagri'zana omane'neakita tamasmisugeta ontahigahaze, nanknarero, nanknafino Nenfa'a agra hanave'afi, anankna huhamprinte'ne. ⁸Hu'neanagi ruotge Avamumo tamagrite esigetma, tusi'a hanave eritetma, Nagri nagenkea Jerusale kumate huama nehutma, Judiane Sameriane huama nehutma, afete mopa omeatre eme atre arega ome huama hugahaze. ⁹Ana naneke zamasmitemo, negageno hampompi ufreg'e'za onke'naze. ¹⁰Monafi kete'za mani'nageno, ame' huno efeke kukena hu'na'a ne'tremoke anante oti'ne'ne, ¹¹anage hu'na'e, Galili vahe'mote na'a higetma amarera oti'netma monafinka negaze? Ama ana Jisasi tmatreno monafi negageno mreri'neaza huno, ete anahu kna huno egahie, huke zamasm'i'na'e.

Judasi nona'a mago'mofo huhamprinte'naza naneke

¹²Anante mago agona Olivie nehaza agona atre'za Jerusale e'naze, e'i ana agona Jerusale tva'onte me'ne, kama vu'amo'a, mani fruhu kna zupa vute'za neaza avamente me'nea agone. (1 kilomita avamenteku hu'ne.)

¹³Zamagrama Jerusale ufrete'za, nemaniza nOMPI anagame umreri'za hunaragintepinka mani'naze. Pita ene Joniki, Jemisi ene Endruki, Filipi'ene Tomasiki, Bataromio ene Matiuki, Jemisi Alfiasi nemofo ene Saimon Zelaiotiki, Judasi nemofo Jemisiki hu'za anampi umani'naze. ¹⁴Maka ana naga'mo'za magoke antahintahifi maka'zupa nunamu nehu'za mago'a a'nene, Meri Jisasi nerera'zane, Jisasi nefu'za mani'naze.

¹⁵Ana knafina zamentinti nehaza nagapinti Pita'a 120ti'a naza naga amu'no zamifi otino anage hu'ne. ¹⁶Nafuhete, Ruotge Avamumo ko Deviti asmigeno avontafe krente'neana, Judasi zamareno vige'za ha' vahe'mo'za azeri'naze kemo'a avufa'a forehie. ¹⁷Tagrane mani'neni, agra ama mono eri'zana eri'ne. ¹⁸(Menina Judasi havi avu'ava'mo ana mopa miza se'ne, ana mopafi kanahegeno rimpamo tagatiramine. ¹⁹E'ina huno frige'za Jerusale kumate vahe'mo'za ana naneke nentahi'za ana mopagu Aramu kefi Hakaltemie hu'naze, zamagra kefina Korantmi'nea mope hu'naze.) ²⁰Anazanku Zgame avontafipina anage huno kre'ne, ***Atregeno mago'zana noma'afina omaneno, Anampina atregeno mago vahere huno omanino,*** (Sam-Zga 69:25), ***Atregeno mago vahe'mo agri nona erino, eri'zana erino huno avona krente'ne.*** (Sam-Zga 109:8) ²¹Ana hu'negu tagra mago ne azeri otisunkeno, Judasi nona erisie. Ana ne'mo'a tagrane maka knama, Ramo Jisasi'ma mani'nereti vuno, ²²Joni'ma mono tima fre ante'nea knareti eno, tagripinti avareno monafi vu'neaza ke'nenimo, fri'nefinti oti'neazana huama huno tagranena vano hugahie. ²³Ana hute'za tare ne'tre znazeri oti'naze, Josefenu Banabasi'e (nehaza ne'kino mago' agi'a Jastusi'e) magora Matiasi'e. ²⁴Ana hute'za nunamu hu'za, Ramoka kagra hakare vahe'mofo zamarimpa ke'nane. Hanki ama tare ne' trenpintira, inamofu huhampri antenampi taveriho. ²⁵Ama ana eri'za erinogura, kamagama'ante'nea aposol ne' Judasi eri'zana atreno kuma'arega vu'ne. ²⁶Anante mago'zokago (lots) Tais zokago reza kazageno, Matiasi huhampri'naza su'amo eama hige'za, Matiasi azeri otizageno, 1lni'a aposol nagapi ufre'ne.

Kasefa hoza vasage knare (Pentikos) Avamumo erami'nea naneke

2 ¹Kasefa hoza vasage kna Pentikos ege'za, aposol nagamoza mago nOMPI atru hu'naze. ²Ana hu'za mani'nageno amehuno zaho'mofo agasasamo hiaza huno, tusi'a agasasa runo monafinti eramino mani'naza nOMPI avite'ne. ³Tevemofu agefu'nagana huno, tagareno vuno eno huno, magoke magoke'mofonte emani'ne. ⁴Maka'mofona Ruotge Avamu'mo

zamagu'afi viteno, zamazeri otige'za, Avamu'mo zamasamia kante ante'za, agafa hu'za aru agerupinti kea hu'naze.

⁵Ana knafina knare hu'za amage ante'naza Juda vahe'mo'za, mopane mopane kotegati e'za Jerusale kumate emani'naze. ⁶Ana agasasa fore nehige'za, miko vahe'mo'za atru hu'za na'a fore nehie hu'naze. Na'ankure mago mago'mo'a agra'a agerupi antahitere hu'ne. ⁷Zamagra antri nehu'za anage hu'naze, ana maka Galili vahe'mo'za kea nehazanki na'a fore nehie? ⁸Na'a higeta tagra mago mago'mota tagra mofavremota nehuna tagerupina nentahune? ⁹Tagra rukotegati rukotegati (Amama mani'nona vahera) Patia mopareti'ene, Medes mopareti'ene Elami mopareti'ene, Mesopotemia mopareti'ene, Judia mopareti'ene, Kapatasia mopareti'ene, Pontasi mopareti'ene, Esia mopareti'ene, ¹⁰Frigia mopareti'ene, Pamfilia mopareti'ene, Isipi mopareti'ene, Livia kazigati'ene, Sairini mopareti ene, Romuti nantu vahe'ene, Hibru vahe'ene, megi'a vahe'mo'za zamagu'a rukrahe hu'naza vahe'ene. ¹¹Kriti mopareti'ene Arab mopareti vahe'mota tagra hanavenentake avu'ava'zama Anumzamo'ma hia zana tagerupi nentahune! ¹²Maka'mo'za mago'ene na'a fore nehie nehu'za, tusi'za hu'za antahintahi hakare hu'naze. Zamagra'a ohumi ahumi nehu'za anage hu'naze, Na'a amazana fore nehie? ¹³Hianagi mago'amo'za anama haza zankura anage hu'za zamagi'za nereza, zamagra kahefa waini ti ne'za negi nenegahaze! Hu'za hu'naze.

Pita mono ke huama hu'nea naneke

¹⁴Hianagi Pita otino 11ni'a amage' nentaza naga'ane mani'neni, ranke huno zamasmino, tamagra Judia vahe'ene, miko Jerusale mani'namota ama huankea tamagesa anteta antahi ankereho. ¹⁵Amama kema nehaza zanku'ma tamagesa hakare nehazana, menina nantera 9 kiloki hu'neanki'za, zamagra negi tina one'naze. ¹⁶Hu'neanagi ama'i korapa kasnampa ne'mo, Joeli hu'nea nanekemofa avufa'a meni negaze. ¹⁷Hagi vagare knafina, Anumzamo'a anage hu'ne, ***Nagra Avamuni'a vahepi eri herafi atresugeno, tamagri ne'mofa tamimo, kasnampa kea huama nehina, kasefa vahe'mo'za ava'na keaza nehanageno, ranafa tamimo'za ava'na kegahaze.*** ¹⁸***Nagri eri'za^a vahete'ene, vene'nere ene, a'nerera Nagra Avamu'ni'a ana knafina eri herafi atresugeno zamagra kasnampa kea hugahaze.*** ¹⁹***Nagra monafina ruzahu'za eri fore nehu'na, kaguva avame'za ama mopafina erifore nehu'na, korane, tevene, hampone tokira hugahie.*** ²⁰***Zgemo'a rukrahe huno hani hanigeno, ikamo'a kora hanigeno, henka tusi'a hanave'nentake Ramofo kna egahie.*** ²¹***Ana nehanigeno miko vahe'mo'za, Ramofo agi hanta nevazisamo'za zamu'vazinke'za knare kuma erigahaze.*** (Jol 2:28-32)

^a bondslave, hu'nea kemofa agafa'amo'a, magomo, mago'a kafufi rumofonte eri'za eri nentesigeno, henka zgoa amigahie hu'ne hagerafina'e.

²²Israeli vahe'motma ama kea antahiho, Nazareti ne' Jisasina, Anumzamo azeri oti'nea ne'mo, kaguva zane ruzahu'zane, avame'zana Anumzamo'a, Agripi runtanino amuno tamifina eri'zana erigeta, keta antahita hu'naze. ²³Ama ana nera, Anumzamo antahino ahegahaze huno korapa retro hu'nea kante antetma, tamagra avaretma megia vahe zamazampi antage'za, keka zafare hanto ahegeno fri'ne. ²⁴Hianagi Anumzamo'a fri'nefinti azeri otino, fri'zamofa atazampinti azeri so'e hu'ne. Na'ankure frizamofa hanave'amo'a azerintega osu'ne. ²⁵Deviti'a amanahu ke agriku hu'ne, ***Nagra maka zupa negogeno, Ramo'a navuga nemanie, na'ankure Agra nza tmaga'a mani'neankino, nazeri kazara osugahie.*** ²⁶***E'ina hu'negu nagu'amo'a so'e nehanigeno, nagipintira tusi'a musenkemo atiramigahie. Navufamo'enena anazanke huno fore'ma haniazanku avega anteno manigahie.*** ²⁷***Na'ankure kagra nagu'namena fri vahe kumapina (Heidis), otregahane, huge atresankeno Ruotge hu'nemo'a kerifina okasrigahie.*** ²⁸***Kagra mani'zanimofa kana ko eri'ama hunami vare'nane. Kagrama navate'ma nemaninkeno'a, musezamo avinete,*** huno Deviti'a hu'ne. (Sam-Zga 16:8-11)

²⁹Nafuhete, nagra fatgo hu'na neramasmu'e, mago tahiti'a Deviti'a frige'za asentageno, kerimo'a menina tagrane me'ne. ³⁰Na'ankure agra kasnampa nekino antahine, Anumzamo'a mago negeho avareno tra'are (kini trate) antesigeno mani'nigu averino huvempa hu'ne. ³¹Deviti'a kegamuteno, Kraisi friteno otisniazana ke'ne, fri vahe kumapina (Heidis) avufamo'a atresigeno zaza kna omaneno, onkasrisia zanku hu'ne. (Sam-Zga 16:10)

³²E'i ana Jisasina, Anumzamo'a fri'nefinti azeri otigeta, tagra maka'mota tavufinti ke'nona zanku nehune. ³³Ana higeno Anumzamo ragi nemino, azantamaga kaziga'a avarentegenog, huvempama hu'nea Ruotge Avamura Nefampinti erino, eritagitregeta menina negeta nentahita nehaze. ³⁴Na'ankure Deviti'a monafinka mareori'neanagi, Deviti agra'a huno, ***Ramo'a, nagri Ramofonku huno, Naza tamaga kaziga mani'nege'na,*** ³⁵***Nagra ha' vaheka'a zamazerina kagia tra antesugenka, kagiareti arentako hugahane*** huno hu'ne. (Sam-Zga 110:1)

³⁶E'ina hu'negu, maka Israeli vahe'motma tamage hutma antahi ankereho, tamagrama aheta hanti'naza nera, Anumzamo azeri otigeno, Ra vahe tro huno Kraisi mani'ne.

Pita ke antahi'naza naneke

³⁷Ana kema zamagrama nentahizageno, kemo'a zamarimpafi agonaza zamareaza hige'za, Pitanku ene ruga'a aposol nagaku anage hu'naze, tafuhete tagra na'a hugahune? ³⁸Hazageno, Pita'a zamagrikura anage

hu'ne, tamagu'a rukrahe nehutma, Jisas Kraisi agifi mono tina frenkeno, kumi'timia apaseramante'na, ruotge Avamu'mofo museza tamagra erigahaze. ³⁹Na'ankure huvempama hu'neana tamagri'ene, mofavre tamimofonku'ene, afete mani'namokizmigu'ene, ruga'a vahera tagri Ra Anumzamo zamagi hanige'za, Agrite egahaze. ⁴⁰Rama'a ruga'a ke Pita'a huama nehuno, zamazahuke zamasami'ne. Kefo zampima mani'naza vahe'pintira, manigneta manisaza zamo tamagu'vazina, knare huta manigahaze. ⁴¹Agri kere zamentintima haza nagapintira, monoti fre'naze, anazupage tima fre'nazana, 3tauseni'a nazamo'za fre'naze.

Ese zamentinti vahe'mo'za mono hu'naza naneke

⁴²Ana vahe'mo'za aposol nagamokizmi naneke antahiza atru hu'za monora rempi hu'za nentahiza, magopi breti kori'za nene'za (Lords sapa) nunamuna hu'naze. ⁴³Aposol nagamo'za hakare ruzahu'zane, kuguva'zana erifore nehazageno, maka'a vahe'mo'za nege'za zamanogu nehu'za amazana na'za fore'nehie hu'naze. ⁴⁴Hanki Jisasinku zamentinti hu'naza vahe'mo'za tragote'za nemani'za, maka'za zamia omi'ami nehu'za, ⁴⁵mago'a zazamine, mopa zaminena agafa hu'za zagore atrage'za, miza'sage'za zago eri'za upama hu'naza vahe refako hu'za zami'naze. ⁴⁶Maka kna ra mono (tempol) kumapi atru hu'za mono kea nehu'za, zamagu'a anterami'za, zamarimpa fruregati nonte nonte Bretia koriza nene'za kave'zamia fako hutere hu'naze. ⁴⁷Anumzamofa agi hentesga nehazageno, mago'a vahe'mo'za ana vahe'mokizmi muse huzmante'naze. Ana nehazageno Anumzamo zamagu'ma vazi'nea vahe'mo'za mago mago kna rama'a efare'naze.

Aga sati'nea ne' eriso'e hunte'nea naneke

3 ¹Mago zupa, Pita'ene Jonikea, ra mono nontega nunamuhu knare, mago kiniga 3 kiloki higeke marerike nevakeno, ²mago nera, nerera agu'afinti agia frinea ksente'nea nera zafa hu'za vazaza'mo'za ra mono nomofo kasana, knare so'e kasane hu'za agia nehare ome ante'naze. Mika zupa anante ome ante'nageno mani'neno, mono nompima umreriza vahekura, azama hanagu meme nehiane. ³Ana nemo'a znagege'ne Pita'ene Jonikea ra mono nompumi umreri'snuanki nehakeno, ana ne'mo'a zgogu znantahige'ne. ⁴Hianagi Pitake Jonikea avufi kefatago huke negeke, kma tagrira tago! Huno Pita'a hu'ne. ⁵Higeno, ana ne'mo mago'a zana zanagritegati erigahue huno agu'agesa antahi'ne. ⁶Hianagi Pita'a anage hu'ne, silvane, kolinena e'ori'noanki, nagrama eri'nozana kamigahue. Jisas Kraisi Nazareti ne'mofo agifi, otinka vuo! ⁷Nehuno Pita'a azantmaga'a ana nera azerino azerioti'ne. Anama nehigeno'a ame' huno agia avozamo'ene, agia avu'a zaferinamo'a hanaveti'ne. ⁸Higeno agra haru huno marerino tamino nehuno, agia reno vu'ne. Pita'ene

Joni'ene magoka ra mono'nompi nevuno, haru huno marerino tamino huno nevuno, musenkase huno Anumzamofu agi erisaga hu'ne. ⁹Ana hige'za miko vahe'mo'za negageno nevuno, Anumzamofu agia hesga hu'ne, ¹⁰hige'za mika vahe'mo'za nege'za, ra mono (tempol) nomofu knare so'e kasante mani'neni zagogu meme nehia ne'mo amanahura nehianagi, nankna hu'neha hu'za tusi'a antri nehu'za zamagogogu hu'naze.

Pita'a ra mono nompi mono ke hu'nea naneke

¹¹Pitane Joni kizni ana ne'mo zanazeri'negeke, mika vahe krefamo'za magoka zamagare'za zamagritega Solomonine hu'za humegi atre'naza nompi, vano nehaza kante tusi zamagogogu nehu'za e'naze. ¹²Hianagi anama hazaza Pita'a negeno, anage huno ana vahe'zga zamasmine, Israeli vahe'motma nahigeta amanahu zankura antri nehutma, tamagogogura nehuta, tagrira uruhara neragaze? Tagritia hanaveretiro, Anumzamofu avu'ava hu'azamo azeri otigeno kana vifi? I'o, ¹³Abrahamune, Aisakine, Jekopu Anumzana tafahe'i Anumzamo kesga nehia eri'za Ne'a Jisasina, Paeroti atrenigeno vunaku nehigeta, tamagra ma azeritma ha' vahe azampi ahenogu nenteta, Paeroti ne'mofu avufi tamefi humi'naze.

¹⁴Hianagi tamagra fatgo huno ruotge hu'nea Nera, tamefi humitma vahe'ma ahenefria neku avare atreho, hazage'za avare'za tamami'naze.

¹⁵Hagi tamagra Asimu'mofu agafa ahe fri'nazanagi, Anumzamo azeriotti nemofu, tagra tamage huta tavufinti ke'no'a zanku nehu'e. ¹⁶Hagi Jisasi, Agri agire tamentinti hu'azamo, e'i ama ana agimo amama negaza nera azeri knare hu'ne. Hagi Jisasinte amentinti hu'nea zamo, mika vahe'moka kavufina agrira azeri so'e hu'ne.

¹⁷Menina nafuhete, nagra tamantahi'noe, ontahinetma Jisasima tamavutamavama hunte'nazana, kva tamimo'za nehazankna hutma ontahinetma hu'naze. ¹⁸Hagi korapa Anumzamo'a, Kasnampa vahepima runtandinoma, Kraisia ata hoza erigahie hu'noma hunte'neazamo, ana kante efore hu'ne. ¹⁹E'i zanku, kasunku hunka kagu'a rukarehe hunka, Anumzamofu egeno, kumika'a eri atregantegahie. ²⁰Ana knafi Rantimofu avateti kahefa hanave ne'e sigeno, hagi ko'ma Agra'ma hramante'nea nera Kraisia huntisigeno egahie. E'i Jisasi'e. ²¹Ama ana Nera monamo avare'anagamu tenesigeno umani'nenigeno, Anumzamo'a mika zana azeri kasefa hugahie, Anumzamo ko' huama hu'ne, korapa knafima ruotge kasnampa vahe'mofu zamagipi huvempa hu'naze.

²²Mosese'a huno, ***Ra Anumzamo'a kasnampa nera nagrikna huno tamagri nagapinti azeri otigahie. Agrama na'ane kema haniana, ke'a erizafa hunka amage anto.*** ²³***Mika vahe'mo'za ana kasnampa ne'mofu kema ontahisnamo'kizmia, zamahe nefrino, vahe'afintira zamahenati tregahie.*** ²⁴Anahu kante maka Samuelinteti'ma eno erami'naza kasnampa vahe'moza, ke nehu'za huama hu'nazana, ama knagu hu'naze.

(Diu-Kas 18:15-19) ²⁵Tamagra kasnampa vahe'mokizmi mofavre, Anumzamo'ma tmafah'e'zanema huvempa huno huhagerafinea kemofa mofavre mani'naze, Abrahamunku'ma huno, **Kagri ka'a mofavrefinti, hakare kogna, famomo'a ama mopafina asomura erigahaze** hu'ne. (Jen-Agf 22:18) ²⁶Na'ankure Anumzamo'a pusante eri'za Ne'a azeri otigeno tagrite e'ne, havi zampintira magoke magoke'mota, tazeri rukarahe huno asomu hurante'ne.

Pitane Jonigizni znazeri'naza naneke

4 ¹Pita'ene Jonikema ana vahe zganema keaga nehake'za, prisi vahe'ene ra mono nonte kva nehaza kva vahe'mokizmi kva'neki, Sadusi vaheki hu'za znagrite e'naze. ²Na'ankure keagama hapina, vahe'ma frisutma, Jisasi hanavefi etetma otigahaze huno zamasmia kegu zamarimpagna hu'naze. ³Ana higeno znazerino kina nOMPI ome znantege'ne mase'na'e. Na'ankure hago kinaga se'negenoe. ⁴Hianagi mika kema antahi'naza vahe krerafamo'za zamentinti hu'nazana, venene'agema hamprinazana ⁵tauseni'a nazampi mareri'ne.

⁵Msakeno ko atigeno, kasegere ugagota hunaza vahe'ene mono nonte kva vahe'ene Jerusalemi etru hu'naze. ⁶Ugagota hu'nea prisi ne' Ananaisi'a anampina mani'ne. Hagi Kaiafasi'ma Joni'ma Aleksendaki, ugagota hu'nea prisi ne'mofo nagapinti ruga'a mani'naze. ⁷Amu'no zamifima Pitane Joni kizni zanzeri otite'za, agafa hu'za znantahige'naze, Inankna hankavereti ene iza agifi amanahu'zana hu'na'e? ⁸Pitana Ruotge Avamu'mo avite'nea ne'mo, zamagri kenona anage hu'ne, tra kere ugagota hu'naza vahe'ene ranra kva vahere, ⁹menima knare tavutva'ma kri ne'ma hunte'no'a zantema, tagri'ma refko hutma tagesnazana, na'amo higeno ama nera kri'amo'a atrente'ne nehazana, ¹⁰tamagra ne Israeli vahe'enena antahi ankereho. E'i Nazareti Jisas Kraisima tamagra ma aheta hantizageno, Anumzamo'ma azeri otineama, e'ina ne'mofo agire, amama tamugama otine'nea nera kri'amo'a knare hunteteno otine. ¹¹Ama ana Jisasina, **Tamagra nogi vahe'motma tamavesra hutma retufe atre'naza haveagi, e'i ana havemo'a no renagentete azeri hanaveti have fore hu'ne.** (Sam-Zga 118:22) ¹²Mago vahe'mo'e huno tza huga osu'ne, na'ankure ama mopafi vahe'motafina, tahokehehesia agi'a ontami'neanki, magoke ne' Jisas Kraisi agifi, Anumzamo'a tahokehegahie. ¹³Anante'ma ana vahe'mo'za znagazana, Pitake Jonikea, kema ha'ana korera osake'za, zanagrira antahi ama hu'za, avonona osuke, nontega ne'tremoke Jisasi'enena mani'na'e hu'za antahi ama nehu'za tusi antri nehu'za, nankna'za fore nehie hu'naze. ¹⁴Ana higeno azeri so'e hunte'nea ne', znaganema otine'ge'za nege'za, anazanku kema huznantekea omane'ne. ¹⁵Hianagi kva vahe'mo'za huznantegeke ana atru zamifintima atirami'ne fegia vake'ne, zamagrazmi ke hugantugma hu'za, ¹⁶anage

hu'naze, ama netrena na'a huznantegahune? Na'ankure ama kri ne' azeri so'e'ma hu'nea kaguvazamo'a, mika Jerusale mani'naza vahe'pina amate hige'za hago ke'nazankita tagra onke'none huta hufra okigahune. ¹⁷Hianagi ama kemo'ma mago'ane vahepima vuno'eno osanigura, kore ke znasamisunke'ne, mago'ane ama ana agirera mago'a vahera ozanasmisaze huta zanasamisune. ¹⁸Pitane, Joninena ke hzageke efrake'za zanasmi'za, mago ene Jisasi agirera vahera zamasmige, rempi huzamige osutfu hi'o, hu'naze. ¹⁹Hianagi Pitake Jonikea, anage huke ke nona zamire hu'na'e, Anumzamofu avurera knare, tmagri ke antahisupi, Anumzamofu ke antahigahu'e, tamagra tmi fako huta antahiho. ²⁰Na'ankure tagra keta antahita huno'a zante keaga nehuankita, tagra'ma kema tagane'zamo'a amuhu hurantegahie. ²¹Anama hu'za mago'ane korekema huznantete'za, kina huzanante kankmuna hake'za eri fore osu'za hu'zanantage'ne vu'na'e. Na'ankure ana mika vahe'mo'za e'inahu zama fore hiazankura Anumzamofu ra agi amizage'za nege'za, vaheku koro hu'naze. ²²Na'ankure ana nera 40ti'a zgekfu agatere'nea nete ana avame'zana fore huno azeri so'e hu'ne.

Jisasima amage'nentaza vahe'mo'za hanave erinaku nunamu hu'naze

²³Huma znantegekea, va'azamo'ke, prisi vahe'mo'zane, ranra vahe'mozama makazama humaznante'naza kea magoka zamentinti nehaza naga ome zamasmina'e. ²⁴Ana kema nentahi'za, mago zamagu zamagesare zamagerura erintesga huza Anumzantega anage huza hu'naze. Maka'zamofu Ramoke, Kagra monane, mopane, hagerine, hagi mika zama anampinkama me'nea zantmina trohu'nane, ²⁵Kagra ka'a Avamukafi hankeno Deviti nerafa eri'za ne'kamofu agipi huvazinkeno anage hu'ne, **Na'a hige'za kokankoka vahe'mo'za zamasigura nehu'za, osuga'zana huku retro nehaze?** ²⁶**Ama mopafi kini vahe'mo'za magote etru hazage'za, trakere ugagota vahe'tmimo'za zogitru hu'za Ramokane, Kraisinena ha' reneznantaze.** (Sam-Zga 2:1-2) ²⁷Na'ankure tamagerafa huno Herotiki, Pointus Pailatiki, megia vahe'ene, Israeli vahe ene, ama rankumapina zogitru hute'za, Ruotge eri'za Ne'ka'a huhamprinte'nana Jisasina ha' rentaze.

Tamage e'i ana avamente Heroti'ene Paeroti'ene ru vahe'ene Israel vahe'mo'zane ama kumate eri atru hu'za manine'za kagri mofavre kagrama hampri'nana nera Jisasina ahenaku hu'naze. ²⁸Himamu hanaveka'afima ko antahinka egahie hunka retro hunte'nanazamo efore nehie. ²⁹Hagi menina Ramoka, amama tazeri kore'ma hunerantaza'zana ko, tagra kagri eri'za vaheki, tazeri hanavetigeta oti hampona huneta Kagri nanekea huama hugahune. ³⁰Kagra kri vahe'ma krizmima zamazeri amane huzantema, tazama nentesunkeka avame zane, kaguva zanena, Kagri ka'a ruotge eri'za ne' Jisasi agire eri fore huo. ³¹Nunamu

hutageno, anama zogitru hu'za mani'naza nomo'a kazakaza higeno, ruotge Avamumo'a zamagu'afi avitege'za, Anumzamofu nanekea reku osu'za agafa hu'za hu'naze.

Fenoza fako huza omi ami hu'naza naneke

³²Jisasinte zamentinti nehaza vahe'mo'za raru hu'za mago zamarimpare ene antahintahire nemni'za, tagri' zane hu'za osu'za havia mika'zana omiami nehu'za mani'naze. ³³Tusi'a hanavereti aposol nagamo'za, Ramo'ma Jisasi'ma fripinti oti'nea nanekea huama nehazageno, zamentintima haza nagara tusi'a asunku huzmante'ne. ³⁴Anampima mani'naza kevufintira mago'zankura mago'mo'a upara osu'ne, na'ankure inamofoma mopa'a me'neo, noma'a me'nemo'a zagore atreno ana zago erino, ³⁵aposol naga eme zamizage'za, fako hu'za zagogu'ma upa'ma hu'naza vahe zami'naze. ³⁶Hagi mago Livae nera, Saiprus hageri amuragozafi ksente'nea nera Josefe'e, mago agi'a aposol nagamo'za antemi'nazana Banabasi'e. (Ana agimofu agafa'a, zamazeri hankaveti ke zamasmu mofavre.) ³⁷Hanki agripina mopa'a menegeno ana mopa zagore atreno, ana zagoa erino viazamo aposol nagamofu ome zami'ne.

Ananaiasi ene Safairake knaza eri'na'a naneke

5 ¹Ana hutegenu Ananaiasi ene nenaru Safaira enena anahuke, mopa zania zagore atreteke, ²nenaru'a mago rimpa huno antahi'negenu, mago'a zagoa refako huno agra suna nentenu, mago'a zagoa erino aposol naga ome zami'ne. ³Hu'neanagi Pita'a anage hu'ne, nahigeno Ananaiasiga Sata'a kaguafina efregenka ruotge Avamura revataga hunka mago'a zgoa mopama atrantetira refko hunte'nane? ⁴Zagore'ma otre'nantera, kagri mopa megenu, zagore'ma atrantera, kagri kavesite me'neane. Na'a higenka amanahu antahintahia kagu'afina antahi'nane? Kagra vahe rezmataga osananki, Anumzamofu revtaga hane. ⁵Hagi anankema nentahino'a, Ananaiasi'a traka huno frige'za, anankema antahiza nagatera tusi'a kore'zamo zamagrite e'ne. ⁶Anante nehazave nagamo'za azeri antenu vazite'za, eri'za ome asente'naze.

⁷Tri'a aua evigeno nenaru'a anazama fore hu'neana ontahinenu anante e'ne. ⁸Pita'a, anage huno Safairana antahige'ne, zgorema mopama atra'ana, mizana asma'areke atrenampi? nasamio higeno agra anage hu'ne, Izo atreno'a mizana asi'ne higeno, ⁹Pita'a amanage huno Safairana asamine, Nahigetna kagrane negave'enena mago tanarimpa huta Ramofu Avamura rehetu nega'e? Negavema ome asentete'za aza vahera, kasante oti'nazanki ko, kagrira anazanke hu'za eri'za vugahaze. ¹⁰Anage nehigeno agafi hantaka'a traka huno frige'za, nehazave zgamo'za emegazana hago fri'nege'za, erizafa hu'za vazazamo'za, nevema asente'naza asopare ome

asente'naze. ¹¹Higeno tusi'a kore zamo ana mika mono vahete'ene, ana zama hia kema antahi'naza vahete enena e'ne.

Aposol nagamoza hakare vahe zamazeri so'e hu'naze

¹²Aposol nagamofo zamazantera, rama'a avame'zane, kuguva zamo mika vahetera fore hige'za, ra mono nOMPI, Solomonie' hu'za hunaraginte'pinka ana mika vahe'tamimo'za mago zamarimpa huza magopi atru hu'naze. ¹³Magore hu'za anampintira zamagripina hageorafinazanagi, mika vahe'moza kentahiza, agazone hunezmante'za husga huzmante'naze. ¹⁴Hanki hakare vahe krerfamo'za a'nea, venenea hu'za Ramofonte zamentintia hu'za, rama'a vahekrerfa efre'naze. ¹⁵Ana higeno mika vahe'mo'za Pita'ma ene vanigeno, amemo'a hagutesie huza kri vahera sesenku huza zafa hu'za kampi, nosiva masi'ne'za zmantage'za mase'naze. ¹⁶Anazanke huno ranra kuma'ma Jerusalemi me'nefintira, kari'erinea vahepi, havi avamu'mo agu'afi fre'nea vahe tmina zamare'za ageno, maka vahera zamazeri so'e hu'ne.

Aposol naga kina huzmante'naza naneke

¹⁷Hianagi ugagota prisi kva ne'mofo, agri kvafima erizama e'neri'za nagamo'za, (sadusi nagare) aposol nagara kanive rezmante'naze. ¹⁸Zamagra e'za aposol naga eme zamazeri'za mika vahe'mokizmi kina nOMPI omezmante'naze. ¹⁹Hu'neanagi ana kenegera Ramofo ankeromo'a eno kina vahe kafantmina eme anagino, zamareno atineramino, anage huno zamasmine, ²⁰Ra mono nOMPI vutma vahepi omo otitma kahefa mani'za eri'zamofa keaga mika zamasmihio. ²¹Anankema nentahiza, zahufa ko'ma atiamafifi, ra mono nOMPI umareri'za agafa hu'za rempi huzami'naze.

Anante mono nonte ugota kva ne'ene (hae pris), agranema nemni'za naga'ane e'za, kanisol (Senhidren) vahe ke hige'za atru nehazageno, ana maka Isareli kva vahetminena ke hutru hute'za, kina nonte kva vahetega ke atre'za, kinama hu'naza aposol vahera zamaretma eho hu'naze. ²²Hu'neanagi kina nonte eri'za vahe'mo'za kina nOMPI eme kazana onke'za, ete'za naneke eri'za vazazamo'za ome zamasmiz'za, ²³anage hu'naze, Ome konana kina nona nofinu hentrako hunte'za, kerage kva vahe'ene ana nonte kegva hu'naza vahe'mo'za kafante otiza mani'naze. Hu'neanagi tagrama anagitama ufronana, agu'afina mago vahere huta onke'none. ²⁴Ra mono'nontema kegva nehaza (tempol kat) vahe'mofonte ugagota hu'nea kva ne'ene, mono nonte ugota kva (hae prisi) vahe'mo'za anankema nentahiz'za, tusi'za hu'za hava nehu'za antahintahi hu'naze. Amanahu'zamo'a nankna hugahie hu'naze. ²⁵Hu'neanagi mago vahe'mo eno, kinama ome huzmante'naza vahe'mo'za, mono nOMPI otine'za, vahe'zgarmi mono naneke rempi hu'nezmize huno zamasmine. ²⁶Mono

nonte kva nehia ne'mo'a, magoka sondia vahe'ene vazazamo'za, ana aposol nagara ome zamavare'za e'nazanagi, sondia vahe'mo'za akohe'za agazone hu'za zamavare'za e'naze. (Na'ankure vahe'mo'za have knonu zamahe frizanku kore hu'za razana osu zamare'za e'naze.)

²⁷Ome zamare'za ana aposol nagara ete'za kanisol (Senhidren) vahe zamure eme zamazeri oti'naze. Mono nontema ugote'nea nemo'a (hae prisi) zamantahigeno anage hu'ne, ²⁸tagra menina hanave kea huta, mago'anena ama ana agifina vahera rempi huozmitfa hiho huramantone. Keho amama rempima huzamiza zamo'a Jerusale kumapina antahi vgaraze, hankino Jisasima ahe'nazana tagriku ahe'naze hutma huneranta'ze. ²⁹Hu'neanagi Pita'ene ruga'a aposol nagamo'za kenona zamire anage hu'naze, Anumzamofu ke'age nentahita ama mopafi vahe'mofonkea ontahigahune. ³⁰Tagri tafaha'e'i Anumzamo, keka zafarema ahetma hantinaza nera Jisasina azeri otine. ³¹Anumzamo'a azeri otino aza tmaga kaziga'a anteno, ugagota kva ne' taguvazi nere hu'ne. Agrite Israeli vahe'mo'za zamagu'a rukrahe hanageno, kumizmia eri atrezmantegahie. ³²Higeta tagra e'i ana zama fore'ma hu'neana keteta, ama ananke hu'ama nehune. Ana higeno tagrama ke'nonazana ruotge Avamumo'a keteno huama hu'ne, kema antahiza avariri'za vahera Anumzamo'a zami'ne.

³³Kva vahe'mo'za anankema nentahi'zageno'a, tusi zamarimpa hege'za zamahe frinaku hu'naze. ³⁴Hianagi Farisi nera Gamalieli'e nehaza ne'mo tra kemofu (lo) kagota huno rempi hunezmige'za, rama'a vahe'mo'za antahinemiza ne'kino otino, osia kna ama vene'ne zga zamare megia zamanteho huno huzmante'ne. ³⁵Anante amanage huno kansol vahera zamasmine, Israeli vahe'mote, Inazama huzmante'gahune hutma kema retroma hana'zana, antahi so'e hunetma anazana huzmanteho. ³⁶Mago'a kna koma evunefina, Tiutasi'a otino, Nagra ra vahe mani'noe hige'za, vahera 400ti'a naza vene'nemo'za, agranena eme hagerafi'naze. Hianagi agrira ahefri'zage'za, amage'ma nentaza naga'moza atre'za panini hazageno mago'zana osu'ne. ³⁷Anama hutegenoa ana mefiga, mago Galiliti nera, Judasi'e nehaza ne'mo, zamagi kre'za erifatago haza knare otino, mago'a vahera zamare agrarega atre'nea nera anazanke huno fri'geza amage'ma antenaza naga'mo'za panini hu'naze. ³⁸E'inahu'za fore hu'negu, tamagrira ama nanekea neramasmue, ama nagara mago kea huozmanteta zamatreho. Na'ankure, mopafi vahe'mo'ma amanahu'zama hanigeno'a, amne'zankna hugahie. ³⁹Hianagi Anumzantegati'ma ne'esigetma keaga huozmantegahaze. Anama hanutma aru Anumzamofu ha'rentezanku nehue, hige'za nentahi'za zamatre'naze.

⁴⁰Kanisol vahe'mo'za ana zamumro kema nentahi'za, ana aposol nagara kehu'agu'a zamante'za zamazeri'za tusi sefu zamite'za, mago'anena Jisasi agifina nanekea osutfu hiho nehu'za, zmatrage'za vu'naze. ⁴¹Hige'za

aposal nagamo'za ana kanisol naga zamureti'ma zamatre'za nevu'za, Anumzamofa avure mani'neta Jisasi agire'ma eriga knaza erune, nehu'za muse hume vu'naze. ⁴²Hanki hakare knafina, ra mono nomp'i'ne, nonte nontera nevu'za Jisasi'a, tazahu ne' Kraisi'e hu'za knare muse kea rempi hunezmi'za huama hu'naze.

Ese 7ni'a mono kva vahe huhampri zamante'naza naneke

6 ¹Anama haza knafina, amage nentaza disaipol nagamo'za ra hu'za ame'nanempi mareri'zageno, Griki kema nehaza Jiu vahe'mo'za, Hibru kema nehaza Jiu kuma agafa vahetmina kanive rezamante'za, mika zupa kave'ma fakoma hazana kento a'ne nagara antahi nozamize hu'za hu'naze. ²Hage'za 12fu'a aposol nagamo'za ana mika amage'ma nentaza disaipol kevu zamasmizage'za emeritru hazage'za anage hu'naze. Ne'zama fakohu avu'avazamo'a, Anumzamofa nanekema hu'zampina tazeorigahie. ³E'ina hu'negu tafuhete, tamagra amu'no tamifinti keso'e hutma 7ni'a vahema zamu'zmamo knare'ma hu'nesnia vahe'ma, Avamu'ene knare antahi'zamo'ma avitenesia vahe zamazeri otinke'za, esageta tagra ama erizana refako huta zamazampi antesune. ⁴Hu'neanagi tagratia nunamu hu'zante'ene, Anumzamofa naneke'a huama huta veamofona zamasmita maka knafina vugahune. ⁵Ana mika vahe kevumokizmia zamesige'za, ana hugahune nehu'za, ana 70ti'a vahe hampri'naze, mago ne'ma hampona amentintine ne' Ruotge Avamu'mo agu'afima avite'nea nera Stiveni huhampri'za Filipinki Prokulusinki Nikenanki Taimoninki Pamenasima, mago Antioku ne' Nikolasi'a megia nagapinti ne'mo agu'a akrehe huno Jiu monopi amentinti nehia ne' huhampri'za zamaretru hu'naze. ⁶Ana hute'za ana vene'ne zga zamare'za aposol nagate vazage'za zamaza ante'za, nunamu huzmante'naze.

⁷Anumzamofa kemo'a mago'ane ra huno nevigeno, amagemata nentaza disaipol nagamo'za Jerusalemi kumapina rama'a efore nehageno, ra'ma'a Jiu prisi vahe'mo'za zamentinti hu'za ke amage'anteme vu'naze.

Stiveni azeri'naza naneke

⁸Ana higeno, Stivenina Anumzamofa asunkuzamo'ene hihamumo avite'negeno, tusi'a kaguva zane, avame'zanena vahe'mokizmi amunompi erifore hu'ne. ⁹Hianagi mago'a vene'nezga, Hibru osi mono nona (Sinagog) vahe zamazeri atre monore nehazafinti Sairini kumate'ene Aleksandria kumate'ene, mago'a Silisiane, Esia rankuma'mo kegva hu'nefinti (provins) vahe'mo'za oti'za Stiveni keha rente'naze. ¹⁰Hianagi Stiveni'ma knare Avamupine, knare antahizampine kema hiazamofona, zamagra magore hu'za kea osu'naze. ¹¹Anante zamagra oku'a mago'a vahera anage hiho hu'za zamasm'i'naze; Tagra nentahunkeno Mosesene, Anumzanena zanazeri havizahu kea hu'ne hutma hiho hu'naze. ¹²Ana

kema hazazamo vahera zamarimpa zamazeri otigeza, ranra vahe'mo'zane kasere ugagota hunaza vahe'mo'zanena oti'za Stivenina eme avazu hu'za kanisol (Senhitren) vahe zamure vu'naze. ¹³Zamagra pusante havigema hunte vahe zamaretageno, ana vahe'mo'za hu'za ama ne'mo'a, ontagneno Mosesese kasegegu'ene, ra mono nonku enena huhaviza hunte'ne hu'za hu'naze. ¹⁴Na'ankure tagra nentahunkeno ama nemo'a amanage huno hu'ne, Nazareti Jisasi'a eri haviza ruotge mono nona nehuno, Mosesi'ma tami'nea avu'ava'zana, eriatreno kahefa avu'ava eri fore hunaku nehie. ¹⁵Anankema huntaza fakohu'za kenaku nehu'za ana mika kva vahe'mo'za avugosafima kazana, avugosamo'a ankeri vahe'mofo avugosamo msa hiaza hige'za ke'naze.

Stiveni hu'nea naneke

7 ¹Ugagota prisi ne'mo'a Stiveniga, amama hunegantaza kemo'a tamagefi? ²Higeno Stiveni'a huno, nafuhetane nafaheta mika'motma nagri kea antahiho, nerageho Abrahamu'a, Mesapotamia mani'negeni, Msanentake Anumzamo'a avure ehanati'tegeni henka'a atreno Harania umani'negeni, ³Anumzamo'a amanage huno asami'ne, **Vaheka'ane mopaka'anena atrenka, kaveri hanua mopare vuo.** (Jen-Agf 12:1)

⁴Anante Kaldia mopa atreno, Harani kumate umani'ne. Anante Abrahamu nefa frigeno, Anumzamo'a huntegeni amama menima mani'nana mopare e'ne.

⁵Anumzamo'a mago mopa manisana zane huno Abrahamuna omi'ne, mago osi atupa'e huno refako huomi'ne. Mofavrea onte'tfa hunananagi Anumzamo'a huvempa hu'ne, ana hu'neanagi Nagra kagri'ene mofavre zgaka'a henka zamigahue huno hu'ne. ⁶Hianagi Anumzamo'a amanahu ke huno Abrahamuna asami'ne, **Kagehe'za ru vahe mopafi, mopazmi omne vahe umanigahaze. 400 ti'a zgegfu'mofo agu'afina, mopa agafa vahe'mo'za kazokzo eri'za vahe zamavrente'za, kva huso'e huozmantegahaze.** ⁷Hianagi Nagrani'a kazokzo eri'za zamisaza mopare vahera, nona'a zamazeri haviza huzmantegahue, huno Anumzamo'a hu'ne. **Anama hute'za henka zamagra atre'za e'za ama mopare Nagrira eme nagi hanta vazigahaze.** (Jen-Agf 15:13-14)

⁸Anumzamo'a Abrahamu'ene huvempa hagerafikea huno oku avufama tagahu naneke hutegeni, Abrahamu'a, Aisakina nefaza higeno 8'a zgegnama nemaniana, oku avufa taga hu'naze. Aisaki'a Jekopu nefaza higeno, Jekopua 12fu'a tagehemofona nezmafa mani'ne. (Jen-Agf 17:10-14)

⁹Ana tagehe'mo'za Josefena kanive rente'za mizante atrage'za ru vahe'mo'za avare'za Isipi vu'naze. Ana hu'nazanagi Anumzamo'a agrane mani'neni, ¹⁰knama nemizageno'a aza nehuno, knare avu'vazane, antahizana Josefena amigeno, Isipi kini ne'mofo Fero avurera knare

higeno, Fero'a huntengeno ugagota kva Isipia hu'nenno, noma'afima me'neazane nemanina vahetera anazanke huno kegva hu'ne. ¹¹ Anante Isipi mopare'ene Kenani moparera ne'zana fanane higeno, vahe'mo'za tusi'a zamagate'zampi mani'zage'za, tagehe'za mago kavera hakare'za eri fore osu'naze. ¹² Hianagi ne'zana Isipi me'ne kema Jekopu'a nentahino'a, tagehemofona esete ne'za omerihogu huzmantege'za vu'naze. ¹³ Anante'ma mago'ane (second time) vazageno'a, Josefe'ne huno agra'agu huama higeno, Fero'a, Josefe afuhe'za e'naza kea antahi'ne. ¹⁴ Anantera Josefe'a ke naneke atrenteno nefa Jekopunku ene ana miko tuzgarazga'agura nagritega eho huno hu'ne, ana mika'a 75fu'e. ¹⁵ Hanki Jekopu'a Isipi umani'nenno, anantega agrane tagehezanena fri'naze. ¹⁶ Anantegatira zaferina'a eri'za Sekemu vazazamo'za, Abrahamuma zagoma atreno Hamori mofavre nagapinti'ma mago'a zagoreti'ma mizama asente'nea kerigampi Sekamu ome asente'naze. (Jen-Agf 50:13)

¹⁷ Hu'neanagi, Anumzamo'ma, Abrahamuma huvempama hunte'nea knamo'a kofta huno eku nehigeno, Isipima tagri vahe'ma mani'naza vahe'mo'za tusi vahe krerfa fore hu'naze. ¹⁸ Henka Josefema antahino keno osu'nea kini ne' Isipi fore huno kegva hu'ne. ¹⁹ Ana kinimo'a vahetia rezmatga nehuno, tagehe'ina havi avu'ava hunezmanteno kasefa mofavrema ksentenazana megia zamatrenke'za friho huno huhanavetine. (Ekso-Uti 1:8–2:15) ²⁰ Anama hianknafi Mosesena ksentengeno Anumzamofa avurera hentofa mofavre fore huteno, 3'a ikamofa agu'afina nefa nompia manitegeno, ²¹ henka avare'za megia ometrageno, Fero mofamo'a avareno agri'a mofavregna huno kegva hu'ne. ²² Mosesa Isipi vahe'mofo antahi'zana rempi huno maka eriteno, kema hu'zampine, avu'ava'zama'afina hankave nentake ne' fore huno mani'ne.

²³ Hu'neanagi 40ti'a zagegafu huku'ma nehuno'a nafuhe, Israeli vahera nantu antezmante nagesahie huno antahi'ne. ²⁴ Mosesa nevuno keana Isipi ne'mo, Israeli kazokzo eri'za nera nehegeno negeno, Israeli ne'mofo ahoke heno Isipi nera ahe fri'ne. ²⁵ Mosesa antahiana agri vahe'mo'za antahi ama hu'za, nagripi huvazino Anumzamo'a huntengeno tagrira tahokeheno tavarenaku e'ne hu'za hugahaze huno antahine, hianagi zamagra Mosesena antahi omi'naze. ²⁶ Umaseno nanterana Mosesa nevuno keana, tare Israeli ne'tremoke ha' nehakeno, zanarimpa zanazeri fru hunaku, agra amu'nozni'ni vuno znazeri atrenaku nehuno anage hu'ne, Ama ve rarena, tanagra kogna mani'na'e. Nahigeta hara neha'e? ²⁷ Magomo'ma haviza huno ahe frinaku nehimo'a, Mosesena retufe kanti netreno anage hu'ne, ***aza kva mani'nenka tagrira refako hurantegahane?*** ²⁸ ***Kagra okima Isipi ne'ma hae fri'nananankna hunka nagrira nahe frinaku nehampi?*** (Ekso-Uti 2:14) ²⁹ Ana kema hia Mosesa nentahino, Isipia atreno viazamo, Midieni mopare anantega rurega vahe umani'ne. Mosesa ma Midienima umani'nenno'a, tare ne'mofavre kseznante'ne.

³⁰Foti'a zgegfuma agateregeno mago ankeromo hagage kokampi Sainai agonamofu agiafi osi zafafi teve srasra huno nerefi fore humi'ne. ³¹Mosesema anazama negeno'a, naza fore nehieha nehuno kenakuma etvaoma higeno'a, Ra Anumzamo keza tino, ³²***Nagra kagri kagehei Anumzane, Abrahamuma Aisakima Jekopu Anumzane,*** huno higeno, Mosesena, tusi ahirahitegeno avuge'zankura tusi agogogu nehuno uravao osu'ne. ³³Higeno Anumzamo'a Mosesena anage huno asami'ne, ***Kagia nona, kagaretira zafitro, na'ankure e'ima otinana mopa, Ruotge hu'nea mopare oti'nane.*** ³⁴***Vahe'nima Isipima manine'za knama e'neriza zana tamage hu'na Nagra ke'noe, zamata hozama zamizage'za krafa kema nehazana Nagra nentahina zamaza hunaku menina erami'noe. Menina kagra eno, hugantesugenka, etenka Isipi vugahane.***

³⁵E'ima ana Mosesima zamesra hunente'za, anagema hu'za, ***Iza kagrira kva mani'nenka vahera refko huo*** huno huntene'mofo, e'i ana nera Anumzamo'a hunteno, kva ne' mani'nenka, zamazahu ne' manio huno Anumzamofu ankeromofu azampi osi zafafinti efore huno hunte'ne, ³⁶Ana ne'mo zamavreno nevuno Isipi mopare ene koranke hagerinte'ene ka'ma hagege mopafina kaguvazane avame'zana 40ti'a zgegfufina huzmeri hu'ne. ³⁷Ama ana Mosesi, Israeli vahe'z gagura huno, Anumzamo'a kasnampa vahe'tmia tmagri'pintira nagrima hiaza huno azeri otigahie. ³⁸E'i ana ne'mo, vahe kevumokizmi amu'nompima ka'ma mopafi mani'negeno ankeromo Sinae agonafima tagri tagehemokizmi, Anumzamo kea huntene'geno asimu erino mani naneke erino'ma eme tmi'nea nere. ³⁹Tagri tagehe'za ke'a antahizanku zamefi hunemi'za, retufeganti netre'za, zamagu'afina Isipigura tusi zamagesa antahi'naze. ⁴⁰Eronina amanage hu'za asmi'naze, ***Kagotama hurantesia anumza'tmina tro huranto, na'ankure ama ana Mosesema Isipi mopareti tvarenoma e'nea nera na'a fore humi'nefi tagra antahita keta osu'none hu'naze.*** ⁴¹Hige'za ana knafina kolire havi anumzana bulimaka anenta kna huza tro hu'za, kre sramna avuga vunente'za anama zamazanuma troma hazazankura muse hunte'naze. (Ekso-Uti 32:1-10) ⁴²Hu'neanagi Anumzamo'a amagena huzmantege'za, zamagra havi anumzantema zagerema, ofunte'ma ikante monora hunte'naze, ko'ma kasnampa vahe'moma krente'neana ***tamagra Israeli vahe'mota ka'ma kokampima kre sramna vu'nazana foti'a zage kafufima Israeli vahemota Nagrite kre sramna vu'nafi? A'o. Nagrite kre sramna ovu'naze.*** ⁴³***Tamagra Moleki havi seli mono no erita magoka ne-eta, Rafani havi anumzamofu ofu eritma ne-etma, havi anumzamofu amema'a mono huntenuku tro hu'naze. Ana hu'negu ama mopafintira tamazeri atranenketma Babilon umanigahaze.*** (Emo 5:25-27)

⁴⁴***Tagri neragehoza seli mono no zamia eri'za magoka ka'ma kopi vu'naze. Anumzamo'ma Mosesi asamino e'inahu hunka tro huo huno***

hunte'nea kante ante'za, anahu kna hu'za trohu fatgo hu'naze. (Ekso-Uti 25:9) ⁴⁵Henka tagehe'za ana seli mono nona e'neriza, zamagra ana mopafi Josua'ene naga'amo'zanena megia' vahe'mofo mopafi ha'hu'za eri'za mani'neza, seli mono nona kiza mani'nageno henka Deviti kna e'ne. ⁴⁶Anumzamofa avesi zamo'a Devitinte megeno, Anumzamoka natregena ra mono nonka'a kineno huno antahige'ne, Jekopu Anumzamoma manisia no kinaku hu'ne. ⁴⁷Hu'neanagi Solomoni'a Agri ra mono nona kinte'ne. (1 Kin 6:1) ⁴⁸Hu'neanagi, Mareri Agatere'nea Anumzamoma vahe'mo azanteti kinte nompina omanigahie huno, Kasnampa ne'mo hunte'ne, ⁴⁹***Mona kumara trani'e, Mopa nagiamofa trare, inankna no Nagrira kinantegahaze? huno Ramo'a hu'ne.*** ⁵⁰***Mika'zana monafine mopafinena Nagrake tro hu'noe.*** (Aisa 66:1-2)

⁵¹Tamagra ke ontahi vahe mani'nageno tamaguamo ene tamagesamo'a tamage kemofona ifo nehie! Tamagra Ruotge Avamumofona tamagehemoma hu'nea kna hutma maka kna tmefi hunemize!
⁵²Kasnampa vahepintira ina'na vahe tamagehe'za zamahe ofri'naze? Fatgoma Hu'nemo'ma esia zamofoma ko'ma huama'ma hu'naza vahera, zamagra zamahe fri'nazanki, tamagratmi menina komoru huta zamahe fri vahe fore nehaze. ⁵³Korapara Anumzamoma kasege'a ankeromokizmi zamazampi antege'za, eri'za eme tamasmigetma antahi'nazana, ana nanekea tamagra amagera ontetma kea rutagare'naze.

Have knonu Stiveni ahe'naza naneke

⁵⁴Ana kema Jiu kva vahe'mo'za nentahi'za, tusi zamasi vazige'za zame'anikreki hu'naze. ⁵⁵Hianagi Stivenina Ruotge Avamumo agu'afi efregeno, kefatgo hunagamuteno monafinka Anumzamofa msa'zana negeno, Jisasi'a Anumzamofa azantamaga kaziga'a oti'negeno ke'ne. ⁵⁶Nehuno agra anage hu'ne, Keho Monamo'a anagige'na negogeno, Vahe'mofo mofavremo'a Anumzamofa azantmaga'a oti'negena negoe. ⁵⁷Hianagi, zamagra tusi'za hu'za rankege nehu'za, zamagesa rekani nere'za, magoka zamagare'za Stivenina ome azeri'naze. ⁵⁸Rankumapinti retufe'za megiam a ete'za, agafa hu'za have knonu ahe'naze. Ana nehazage'za, havige hunteza huama hanigeta antahi sune hu'naza vahe'mo'za amega nakreku'zamia hate'za mago nehazavea, Soli'e nehaza ne'mofo agafi eme ante'naze, (Apo 6:13) ⁵⁹Stivenima have knonu nehageno'a, Ramofa agi aheno amanage hu'ne, Ramoka Jisasige, avamuni'a erio! ⁶⁰Anage huteno rena reno ranke huno amanage hu'ne, Ramoka kumi'zami'a aze'orinka atrezmanto, huno nehuno fri'ne.

Soli'a mono vahe zamazeri haviza hu'nea naneke

8 ¹Stiveni'ma ahe friza zankura Solina rimpamo'a so'e hu'ne.
 Jerusale kumapina mono vahe'ma zamahe'zamo'a tusiza huno ana

knarera avitege'za, maka vahe zgamo'za panini hu'za fre'za Judia kaziga nevezage'za, Samaria kaziga nevezage'za aposol vahe'age mani'naze. ²Knare hu'za fatgoma hu'naza vahe'amo'za Stiveni asenente'za, tusi zamasunku hu'za zavike agriku hu'naze. ³Hianagi Soli'a, mono vahe zamazeri haviza nehuno, mago'mago nompina vuno eno huno vene'nene, a'nene zamazuhu z mavazu hu meg i nezmatreno zamavreno kina ome huzmante'ne.

Filipi'a Sameria kaziga Jisasi agenke ome huama hu'nea naneke

⁴Anante e'ima zamahe pananima hige'za fre'naza vahe'mo'za, maka kumate kumate vutere hu'za mono kea hu'naze. ⁵Filipi'a, Sameria rankumate viazamo, Kraisinku zamagrite huama ome hu'ne. ⁶Filipi'ma hia nanekema tusi'a vahe'mo'za nentahiza, avame'zama hiazante'ma nege'za nentahiza, magoke antahintahire mika vahe krerafamo'za zamagesa ante'za antahi'naze. ⁷Na'ankure havi avamu'tamima zamagu'afima mani'naza vahe'pintira, havi avamutmimo'a tusi'a kezati'za krafa nehu'za atirami'naze. Hagi mika zamufa fri'nea vahe'ene, kama vano nosaza vahera kri zamimo'a knare huzmante'ne. ⁸Higeno ana rankumapina tusi'a museza fore hu'ne.

⁹Ana rankumatera, Saimoni'e nehaza ne'mo, afa' vahe'mofo avu'ava'za eri fore huvava nehia nera mani'neakino, Sameria vahera huzamerige'za tusi'a zamagogogu nehu'za antri nehageno, agra ra ne' mani'noe huno hu'ne. ¹⁰Ositetima vuno rante'ma vu'nea vahe'mo'za, ke'ankere'za nege'za ana mika vahe'mo'za agri ke nentahi'za anage hu'naze, Ama nera, Ra Anumzamomo hanavegino, tusi'a hanave hu'za hu'naze. ¹¹Hige'za agri ke'are antahi'za amage hu'naze. Na'ankure agrama zaza knafi havige nehuno, zagoreno eri fore hu'neazanku ana hu'naze. ¹²Ana hu'nazanagi Anumzamomo kumamomo avu'avaku'ene, Jisas Kraisi agire knare musenkema Filipi huama nehige'za zamentintima nehu'za, vene'nene, a'nemo'zanena erigafa hu'za monoti fre'naze. ¹³Saimoni'enena amentinti nehuno henka mono tina nefreno eteno ovu'are Filipi'ene mani'ne. Hagi mika ruzahu zane ra avame'zama hiaza fore higeno negeno tusi agogogu nehuno antri hu'ne.

¹⁴Jerusale mani'naza aposol vahe'mo'za antahizama Samaria vahe'mo'za Anumzamomo naneke erize kema nentahi'za, Pitane Joni kizni huznante'naze. ¹⁵Zanagrama uramina'ana nunamu huzmante'sake'za Ruotge Avamu'ma erisnagu urami'na'e. ¹⁶Na'ankure mago mago'mofontera Ruotge Avamumo ome'nege'za, ko Ramofo Jisasi agire mono tinke fre'naze. ¹⁷Anante Pita'ene Jonikea agafa huke zanzama ana Sameria vahe'mokizmi zamufare antake'za Ruotge Avamura eri'naze. ¹⁸Hianagi Saimoni'ma kegeno Aposol vahe tfamo'zama zamazatfama antaza zante'ma Ruotge Avamu'ma zamigeno'a, agra zagoma zanamikema

nehuno'a, ¹⁹anage hu'ne, amana hanave'a nagri'enena nami'nenkena ina vahe'tema nazama antesugeza anahu'za Ruotge Avamura eriho. ²⁰Hianagi Pita'a, agrikura anage hu'ne, zago ka'ane kagranena haviza hugahie. Na'ankure kagrama kagesama antahinana zagoreti Anumzamofu muse'zana miza hugahue hunka nehane. ²¹Kagrira ama erizampina mago erizanka'a omanetfa hu'ne. Na'ankure Anumzamofu avurera, tumoka'amo'a knarera osu'tfa hu'ne. ²²E'i zanku kefo kavukva zanka'a neterenka, kagu'a rukarehe hunka havizama nehana zana atrenka, Ramofonte nunamu nehugeno, kagu'amo'a knarema hanigeno'a kumi ka'a atregantegahie. ²³Na'ankure nagrama navuma kagoana, kagra kanive nerenka, kumi'mo kagina hugantegenka mani'nane, huno Pita'a higeno, ²⁴Saimoni'a ke nona anage hu'ne, nagrikura, tanagra Ramofontega nunamuna hikeno, kema hu'na'a zamo'a nagriteru ometfa hino hu'ne. ²⁵Anante'ma Pita'ene Jonikema hamponatine, Ramofu nanekema huama'ma hutekea, ete Jerusale vunaku nevuke, Sameria vahe'mokizmi nonkumapi mono naneke hume vuna'e.

Filipi'a Itiopia rankva ne'mofu Jisasi nanekea asami'nea naneke

²⁶Anante mago Ramofu ankeromu Filipina asamino, Sameriatira otinka Jerusale kaziga Gaza urami'nea kantega kavugosa huntenska vuo. E'i, hagage ka'ma kopi vuo huno asamigeno, ²⁷nevigeno magora agonkna'za hari'nea Itiopia nera, kantesi'e nehaza Itiopia kuini a'mofu zagore kegavama hu'nea ne'mo, Jerusale mono eme huteno eteno kuma'arega nevigeno, ²⁸hosimo renteno avazu huno vano nehia karisifi manino nevuno, kasnampa ne' Aisaia krente'nea avontafera hamprime nevigeno, ²⁹Avamumo'a Filipina asami'no, vunka antuma hosimo renteno avazuma hu'nea karisire urava'o huo higeno, ³⁰Filipi'a agiarenu agrite viazamo ome antahiana, Aisaia kasnampa ne'mofu naneke nehamprigeno nentahino, amama nehamprina nanekea, kagra antahiana nehano? Huno antahige'geno, ³¹Agra huno mago'mo'ma huonasamisigena, inankna hu'na antahi amara hugahue? Nehuno Filipina ke higeno umarerino agrane umani'ne. ³²Ana ne'mo'ma hampri'nea avontafemo'a, amanahu ke hu'ne, *Sipisipi afu'ma ananke taga hunaku avare'za nevazankna hu'za nevu'za, sipisipi afu anenta azoka taga hunaku nehazageno, agira aka huno krafa osu'nea kna huno, Agra agira aka osu'ne.* ³³*Agri azeri agaze hu'za knare fatgo zamuzmara huonte'naze. Na'ankure ko'ma Agri asimura ama mopafintira eri'nazana, nankna huno Agra mofavre antegahie?* (Aisa 53:7-8) ³⁴Anante ke'nonama hifina, agonkna'zama hari'nea ne'mo'a anage huno, Filipinkura hu'ne, muse hugantoanki (plis) azanku kasnampa ne'mo'a ama kea hu'ne, agri'agu hu'nefi, hipi ruga'a vaheku hu'ne? ³⁵Filipi'a anama hampri'nea avontafepinti nanekea agafa huno, Jisasi knare musenka ana nera asmi'ne. ³⁶Anama hu'za

karankama nevu'za mago'a ti me'nere ageno, agonkna'zama hari'nea ne'mo'a, Keho! Ti me'neaki! Na'amo mono tima frezanifina nazerigahie? huno nehigeno, ³⁷[Filipi amanage huno hu'ne, tamage hunka maka kagu'areti Jisasinku kmentinti hanunka tina fregahane nehigeno ozo hu'ne. Anumzamofono nemofo Jisasi Kraisi'a mani'ne, hu'na nentahue, huno hu'ne,]^b ³⁸ana hosimo renteno avazu nehia karisia ana ne'mo kehigeno azerigeno, anantarega'moke uramike tinte vuke, Filipi'a agonkna'za hari'nea nera mono tina tigua repanogino frente'ne. ³⁹Anama huteke timpinti'ma megi'a akeno'a, Ramofo Avamumo Filipina avaresga huno vigeno, agonkna'zama hari'nea ne'mo'a mago'ane nonkeno, tusi muse hume karanka vu'ne. ⁴⁰Hianagi Filipi'a Azotasi kumate mani'nenonankna hu'na e'noeha huno agra'a keno erifore hu'ne. Ana kazigama nevuno'a mika ranra kumatera mono kea hutere hume nevuno Sisaria kumate uhanati'ne.

Soli agu'a rukarehe hu'nea naneke

9 ¹Ana knafinke Soli'a ana zanke huno Ramofo amage' nentaza disaipol nagara zamahe frinaku tusi asi nevazigeno, rimpa henezmanteno, ugota prisi nete vuno, ²ome antahigegenomago'a avona kremigeno erino Damaskasi vuno atruma nehu'za mono nehazanontamimpi (sinagogs) marerino huama huno, agrama veo, aro Kraisti amage' nentaza vahe'ma zamagesuno'a, kina rezmanteno etenozamareno Jerusale vugahie huno kre'ne. ³Agrama vuno Damaskasi urava'o nehigeno'a, ame huno monafinkati hanavenentake tavi'mo agrite remsa huntigeno, ⁴traka huno mopafima nemseno'a, agrama mago kezankema antahi'nea kemo'a anage hu'ne, Sol! Sol! Na'a higenka Nagrira kna nenamine? ⁵Higeno kenona'a, Ramoka, Kagra izage? huno higeno, Agra huno, Nagra Jisasine, kagrama knama nenamina Nere. ⁶Hu'neanagi otinka ana kumapi ufrenka vuge'za, kagrama nankna'zama hanana zamofono kea kasmigahaze. ⁷Soli enema nevaza vene'nemo'za kea osu'za oti'za mani'ne'za, kema hia agerura antahi'nazanagi, mago vahera onke'naze. ⁸Soli'a mopafinti otigeno, avumo'a hari hu'neanagi, mago'zana onke'ne. Magoka vu'naza vahe'mo'za azante avazu hu'za Damaskasia avare'za ufare'naze. ⁹Taregi magoki zagene haninena, avua onkenone'zane, ti'nena oneno amane mani'ne.

¹⁰Magora Jisasi amage' nentea nera, Ananaiasi'e nehaza ne'mo Damaskasi kumatera mani'nenono, avana keankna huno negegeno, Ramo'a anage huno asami'ne, Ananaisi'o! Higeno ke nona hunteno, ama mani'noe Ramoka. ¹¹Anante Ramo'a asamino, otinka fatgoe nehaza

^b ³⁷ Mago'a antahintahi krerfane vahemo'za zamagesama antahi'zana, ese avontafepina teti sevenifima me'nea kea omnene hu'za onkre'naze.

kuma kampi vunka, Judasi nonte vunka, Terasiti nera, Soli'e nehaza neku ome zamantahigo, na'ankure menina manino nunamu huvava nehie. ¹²Ana nehigeno Soli'ma ava'nagna'zama kefina, Ananaisi'ema nehaza ne'mo efrea zamo avuma kesigura azanteno nunamu hunentegeno, ana avanagnazampina ke'ne. ¹³Hianagi Ananaisi'a ke'nona'a huno, Ra Anumzamoka nagra rama'a vahepinti, nama'a vahe krerafama Kagrite'ma zamentintima nehaza vahe'ma Jerusale kumapima mani'naza zamahe'neana ana ne'mofo agenkea nagra antahi'noe. ¹⁴Nehuno ama kumapi eno, ugagota kva (hai pris) vahe'mo'za hugnare huntageno, iza'o Kagri kagima ahesaza vahera zamareno kina huzamante kva agi eri'ne. ¹⁵Hianagi Ramo'a anage huno agrira asami'ne, Vuo, na'ankure agrira ko huhampri ante'noakino, Nagri eri'za ne' manigahie. Hagi Nagri nagi nagenkea erino megia' vahete'ene, kini vahete'ene, Israeli vahetera vugahie. ¹⁶Na'ankure nama'a kna'zama Nagri nagire'ma eri'sia zana, Nagra averi hugahue. ¹⁷Huno higeno, Ananaisi otino mani'nea nonte vuno, azama omenteno nunamuma hunteteno anage huno asami'ne, nenafu Soliga, kantegama neankenno, Ra Jisasi'ma kagrite efore'ma hu'nemo, kagrama etenka kavu negenka, Ruotge Avamura eri avitesane huno hunantege'na nagra e'noe. ¹⁸Anagemo nehigeno'a, ame huno avuragafinti irikna'zamo knope ramigeno, avua eteno negeno otino mono ti fre'ne. ¹⁹Hagi anante ne'za neno hanavema e'nerino'a, Jisasi'ma amage' nentaza disaipol naga'ene Damaskas mago'a kna mani'ne. ²⁰Ame huno, ana zupage Jisasi agigenkea osi mono nomp marerino, ama Nera Anumzamomo Mofavre huno huama huno zamasm'i'ne. ²¹Hige'za maka antahiza vahe'mo'za tusiza hu'za antri nehu'za, anage hu'naze, Ama'na nera Jerusalema mani'nenno, Jisasi agire'ma zamazeri havizama nehia nero? Menina eno Jisasi agima huama nehaza vahera kina huzamanteno zamareno ugotra ra mono (hetprisi) kva vahete vunaku ne-eo? Hu'naze. ²²Hianagi Soli'a, antahintahi'afina hageno nevuno Jisasi'ema nehaza nera tazahu ne' Kraisi'e huno eri ama huno tusiza huno hanavetino nehigeno, ana kema Damaskasima mani'naza Jiu vahe'mo'za, nentahiza inankna huta nanekea huntetene ha hu'za kea osu'naze. ²³Mago'a knama evutege'za, Jiu vahe'mo'za komoru hu'za Solina ahenaku hu'naze. ²⁴Hu'nazanagi ana komoru hu'naza kemo'a Soli agesafi efre'ne. Zgene haninena ahe fri'snagu zamurga ra vihu kafante ke ankerete'za mani'naze. ²⁵Hu'nazanagi, Polima amage'nentaza disaipol nagamo'za kerage'afi avare'za eka eka kupi antete'za, kumamomo vihu keginamomo megia' kankamumpi nofi rentete'za mago kaziga avazu nehu'za atrageno urami'ne.

Soli'a Jerusale kumate ete vu'nea naneke

²⁶Jerusale ema nehanatino'a, Jisasi amage nentaza disaipol nagapi hagerafigahue huno hianagi, agrikura tusi kore nehu'za agra Jisasi

amage' nentea nere hu'za maka'mo'za antahi'za zamifina ontahi'naze. ²⁷Hianagi Banabasi'a, Solina avareno aposol nagate viazamo, Jisasima kampi kegeno keaga humi'neazane, Damaskas mani'nenno hanavetino'ma Jisasi agifima keaga hu'neazanku ene, agigenke'a hu'ama huno aposol vahera zamasmine. ²⁸Ana huteno Soli'a zamagrane mani'nenno, Jerusalemia fru huno vuno eno huno, Jisasi agigura korera osuno hanavetino keaga huama hu'ne. ²⁹Agra keaga nehuno, Griki kema nehaza Jiu vahe'enen, keha hu'nazanagi, zamagra ahe frisnaza kanku hakare'naze. ³⁰Hige'za mono afuhe'za anankema nentahi'za, avare'za Sisaria urami'za ometrageno Tasisi vu'ne.

³¹Anante Judia kazigane Galili kazigane Sameriana nemaniza mono vahe'mo'za, hagera hu'za nevu'za zamarimpa fru hu'za nemani'za, Anumzamofonku kore hunentageno, Ruotge Avamu'mo zamazeri hanavenetige'za, rama'a mono vahe fore hu'naze.

Pita'a Ainiasi azeri oti'nea naneke

³²Pita'a mago'a kumate kagino vano vano huteno, agra Lida kumate mani'naza (saints) mono nagatega erami'ne. ³³Anampina mago nera Ainiasi'e nehaza ne' 8ti'a zgegfu'mofo agu'afi avufa fri kri erino sipa'a atreno novia ne' keno erifore huteno, ³⁴Pita'a anage huno asami'ne, Ainiasiga, Jisas Kraisi'a krika'a kazeri so'e huganteanki, otinka tafeka'a atrenka vuo, higeno anante ame huno oti'ne. ³⁵Ana hige'za ana mika Lidane, Saroni kumate ene mani'namo'za agri nege'za, Ra Anumzamofonte zamagu'a rukarehe hu'naze.

³⁶Jopa kumatera Jisasi amage nentea a'mofo agi'a Tavita'e. Ana a'mofo agima (Griki kefi eri rukarehe'ma hazana Dokasi'e hu'naze. Ama ana agimofo agafa'a, dia afure hu'ne) agripina knare eri'zamo avite'negeno upa'ma nehu'za zamasunku zampima nemaniza naga miko zupa zamaza hu'ne. ³⁷Anankafina kri erino fri'geno, avufama tinu sesema huntete'za eri'za vazazamo'za, anaga nomofo hunaragintepinka ome ante'naze.

³⁸Jopa kumamo'a Lida kuma tva'onte me'ne, Pita'a anantega Lida kumate mani'ne hianke nentahiza, Jisasi amage nentaza disaipol nagamo'za tare ne'tre huznantageke, vuke hamp'o'nage huke, Tagriku tavega ontenka muse hugantonaki (plis) ko eno huke ome asami'na'e. ³⁹Anankema asamikeno nentahino'a, Pita'a otino zanagrane vu'ne. Uma hanatige'za, avare'za anaga agofetu nomofo hunaragintepinka vu'naze. Miko kento a'nemo'za agrane oti'ne'za, zavira nete'za Dokasi'ma zamagranema ofri mani'nenno tro hu'nea zanra kukenarami'ne, ruga'a kukenane averi'naze. ⁴⁰Hianagi Pita'a ana mika vahera megia hunezmanteno, rena reno nunamu hu'ne. Huteno fri vahe kerafarega rukarehe huno, Tabitaga otio! Higeno avua hari huno, Pitana negeno oti'ne. ⁴¹Nehuno Pita'a aza antegantuteno azeri oti'ne. Anama nehuno

zamentintima nehaza naga'ene, kento a'ne nagara kehuno asimu erie huno avazu huno eme zami'ne. ⁴²Anama hia nanekemo'a Jopa kokampina zamukino vuno eno higeno, rama'a vahe krerfamo'za Ra Anumzamofonte zamentinti hu'naze. ⁴³Pita'a mago'a zaza kna, afu akruteti hanave'zantami tro nehia ne' Saimoni'ene Jopa mani'ne.

Pita'a, Koniliasi ome kenaku vu'nea naneke

10 ¹Sisaria kumatera mago nera Koniliasi'e nehaza ne'mo, Italie hu'za nehaza 100ti'a Roma Sondia vahete ugagota kva nera, ²megi'a nagapinti monoku aghesa nentahino, noma'afi nemaniza naga'ane, Anumzamofu kore hunenteno, zamunte omane vahera ne'zane, kukena muse huno nezamino, Anumzantega nunamuna huvava nehia nere. ³Mago kinaga ferura 3 kilokinaza higeno, agra kefatgo huno ava'nagna'za kegeno, Anumzamofu ankeromo efreno anage hu'ne, Koniliasio! higeno, ⁴tusi kore huno uruha negeno anage hu'ne, Ramoka, na'ahie. Higeno agra anage huno asami'ne, nunamu ka'ane, zamunte omane vahe'ma zamaza nehana kavukvara Anumzamo'a ko antahino keno hu'ne. ⁵Menina mago'a vahera huzamantege'za Saimoni'e nehu'za, mago agi'a Pita'e hu'za nehaza netega Jopa vu'za ome kehinkeno eno. ⁶Mago nera Saimoni'e hu'za nehaza nera, afu akruteti hanave'za tro nehia ne'mo, hageri ankenare noma'a me'nefi anampi Pita'a mani'ne. ⁷Kema humia ankeroma atreno vigeno, agrite eri'za erinenta'a netre'ne, mago sondia ne'mo monoku aghesa antahintahi nehuno agri tvaonte nemni'a ne' ene kehige'za e'naze. ⁸Mika kema zamasmitemo huzmantege'za, Jopa vu'naze.

⁹Anante kna zupa kantega vu'za ranku'ma tvaonte'ma vzageno'a zgemo'ma feru asegeno, Pita'a no agofetu nunamu hunaku mareri'ne. ¹⁰Huteno aga'zamo higeno ne'za nenaku nehige'za ne'zama retroma nehazageno'a, avu evuevu higeno nemaseno ava'na keankna huno, ¹¹kegeno monamo'a hagaru higeno, mago'zana, tusi'a tavarave'gnaza 4'a atupare atupare azerino mopafi atrageno erami'ne. ¹²Anampina ruzahu ruzahu 4'a agazane zgarmi'ne, ama mopafi zge havu nehia zgane, zahopi hareno vono nehia nama zgagi hu'za mani'naze. ¹³Anama higeno'a mago ageru'mo agrite eno Pitaga, otinka ahenka no! ¹⁴Anage hianagi Pita'a huno i'o Ramoka, na'ankure nagra magore hu'na onetfa hu'noe. Vahe'mo'zama nonaza kfane, avusese osuno ruotage osu'nea zgagfa onegahue. ¹⁵Higeno mago'ene eteno ana ageru'mo agrite eno, ina kna'zama Anumzamo'ma azeri avusese hu'nesia zankura, avusese osu'ne hunka osuo. ¹⁶Anahu'zana 3'a zupa fore hutegeno, anazana ame huno erino monafinka mreri'ne.

¹⁷Pita'a agu'afi nentahino, nazafore hige'na koeha huno aghesa omeantahi emeantahi nehigeno, Koniliasi'ma huzmantege'za aza nagamo'za Saimoni nonku zamantahigeke hu'za, kagina kafante eme oti'ne'za, ¹⁸kezati'za

Saimoniku mago'agi'a Pita'ema hu'za nehaza agine nera amifina mani'neo hu'za zamantahige'naze. ¹⁹Ava'na kna'zama ke'nea zanku Pita'a a gesa nentahigeno, Avamu'mo asami'no, Ko, 3'a nagamo'za kagriku nehakaze. ²⁰Hianagi kagesa ontahinka otinka uraminka zamagrane vuo, na'ankure Nagra hu'zmantoge'za e'naze. ²¹Pita'a ana nagate uramino anage huno zamasmine, antahiho, ama nagritfanku nehakraze, nagafare tamagra e'naze? ²²Hige'za zamagra anage hu'naze, mago sondia vahe kva nera, Koniliasi'e megia' ne'mo fatgo huno Anumzamofonku kore nehia nekino, mika Jiu vahe krerafamo knare nere hu'za nehaza ne'mofo Ruotge hu'nea ankeromo asamigeno, kagriku noniarega eno keaga eme nasminkena antahineno huno hurantegeta e'none. ²³Higeno Pita'a zamarenompi zamantege'za masete'za, ko ati'geno otino zamagrane nevig'e'za Jopatira ruga'a zamentinti nehaza afuhe'za agrane vu'naze. ²⁴Hute'za anante knazupa, Sisaria uhanati'naze. Koniliasi'a egahaze nehuno, naga'ane tragoteno nemaniam knampa'aramina kehutru hu'ne. ²⁵Pita'a noma'afi e'fregeno'a, Koniliasi'a negeno, agafi rena omereno mono hunte'ne. ²⁶Pita'a avazuhu o'netino anage hu'ne, Otio! Nagra amama hanaza hu'na vahetfa mni'noe. ²⁷Nehuno agranema keaga hume nevu'ne, nompima ufreno omegena rama'a vahe krerafa atru hu'za mani'naze. ²⁸Pita'a omenezmageno amanage huno zamasmine, Tamagratmi ko kasegea antahitma ketma hu'naze, megia' vahepinti mago'mo'a Jiu vahe'ene tragotezano, nantuma antente zakuma i'o hu'za hampo'na kasegema ante'nazana antahi'nazanagi, Anumzamo'a naverino, mago'mofonkura haviza hu'ne huge, avusese osu'ne hu'na osugahue. ²⁹E'ina hu'negu nagriku'ma kema hu'nana ke antahina e'noana, ke huhaviza hurmantezani'a omane'ne, higena nagra kantahinegoe, na'amofa agafare nagrikura huzmantanke'za vu'naze? Huno antahigegen, ³⁰Koneliasi'a kenona'a anage hu'ne, 4'a knama evia knafina noni'afi mani'nena, amanahu knare tri kilokia nunamu nehu'na, koana ame huno mago nera msa'nentake kukena hu'nea ne'mo navuga eme o'netino, ³¹anage hu'ne, Koniliasiga nunamu nehunka, zamunte omane vahe'ma zamaza nehana kavukvara Anumzamo'a ko antahino keno hu'ne. ³²E'izanku vahera huzmantege'za Jopa vu'za Saimoninku, mago'agi'a Pita'e hu'za nehaza nera ke humisageno eno. Zgagfa akuruteti hampo'naza tro nehia nera, Saimoni'e nehia ne'mofo nomp hageri ankenare mani'ne. ³³Hige'na avega otena ko huzmantoge'za kagritega vazagenka knare'za hunka e'nane. E'inahu'ma hu'negu menina, mika'mota Anumzamofa avurera emeritru hu'none. Ramo'ma tagriku'ma ome zamasmio huno hugantegenka e'nana nanekea tasmio.

Pita' zamasmine naneke

³⁴Higeno Pita'a amanage hu'ne, tamagerafa hu'na menina antahue, Anumzamo'a rukna rukna huno vahera zamesi nozmanteanki, magoke

avamente avesinezmante. ³⁵Hianagi mika kotegati vahe'mo'za (nation) Agri'ma koro hunte'za, fatgoma hu'neazama nehaza vahera, Agra avesi nezmanteno, Agrarega zamarenente. ³⁶Nagra antah'inoe, tamagra ko knare musenkema Israeli vahe'ma zamasmineana antahi'naze. Anumzamofu rimpa fruzana Jisasi Kraisi efore hu'ne, Agra mika zamofu Rane. ³⁷Tamagratmi ko antahita ketma hu'naze, Judia kokampi Galiliti erigafa hu'ne, henka Joni'a mono tima frenezmente kea huama hu'ne. ³⁸Tamagra ko antahi'naze Nazareti Jisasi inankna huno Anumzamo'a Ruotge Avamuteti'ene hanave areti'ene huhamprinte'ne. Ana higeno Jisasi'a vano huno knare hunezmanteno, Sata'ma knama nezmia vahera zamazeri so'e huzmante'ne, na'ankure Anumzamo'a Agrane mani'negeno ana hu'ne. ³⁹Tagra mika'zama Judia mopafine Jerusalema hiazama tvuma keta antahita hu'nona vahere. Zamagra anazanke hu'za avare'za keka zafare hantite'za ahe fri'naze. ⁴⁰Hu'neanagi ama ana Nera, Anumzamo'a taregi magoki knazupa azeri otino, azeri anteama hu'ne. ⁴¹Mika vahe'mo'za onke'nazanagi, tagra ke'none, Anumzamo ko'ma huhampri tante'nea vahe'mota ke'none, Agrama fripinti'ma otigeta, ne'zane tinema ne'nona vahere. ⁴²Mono kea vahera ome zamasmihuno huhanavetino huranteno, kore ke huzmanteta, Anumzamo azeri antesga huno fri vahete'ene mani vahetera keaga Jisasi'ke refko huzmantegahie. ⁴³Agrikura korapa mika kasnampa (profeti) vahe'mo'za kea hunte'za, miko'mo'ma Agri agire'ma amentinti hanimofona, kumi'a atrengahie hu'naze.

Megi'a vahe'mo'za Ruotge Avamu eri'naza naneke

⁴⁴Pita'ma ana naneke nehigeno'a, Ruotge Avamu'mo ana mika nanekema nentahiza vahete e'ramine. ⁴⁵Hige'za zamufama tagahu'nea vahe'pinti zamentintima nehaza vahe'ma Pita'enema e'naza vahe'mo'za, megia vahete'enena Ruotge Avamu'mofo muse zamo'a herafiramie hu'za tusi antari nehu'za rama'a antahintahi hu'naze. ⁴⁶Na'ankure zamagra nentahize'za, ruzahu ruzahu zamagerupinti Anumzamofu muse hunte'za Agi'a hesga hu'naze. Anante Pita'a huama huno, ⁴⁷tamagerafa huno, magomo'a timpima vahe'mo'ma mono tima fre'zankura i'o osugahie. Menima Ruotge Avamu'ma tagra erunakna hu'za eri'nazankita, mono tima frezamante zampina iza i'o hurantegahie? ⁴⁸Anante Jisas Kraisi agire mono ti freho huno hampo'nantake ke zamasmine. Mago'agna tagrane manitenka, vugahane hu'za agrira antahige'naze.

Pita'a eri'zama eri'nea kea, Jerusale eri amahu'nea naneke

11 ¹Menina Anumzamofu aposol naga ene mago'a Judia nemni'za mono naga'mo'za, megia vahe'mo'za (Gentiles) Anumzamofu naneke eri'naze naneke antahi'naze. ²Ana huteno Pita'a Jerusale kumate

mrerino vige'za, zamufama tgahu (circumcised) zamentinti vahe'mo'za agriku ke hakare hunente'za, ³kagra zamufa tga osu vahe nOMPI vunka ne'zana zamagrane omene'nane. ⁴Hu'neanagi Pita'a ke aseni'are erinte erinte huno huama hu'ne, ⁵Nagra Jopa ran (city) kumapi manine'na nunamu hute'na mase'нена ава'nagna'za kogeno, mago tavrave'gna zamo erami'ne, atupare atupare azeri'нено atregeno monafinti eramino nagrite e'ne. ⁶Keankere'na ana tavravefi koana, 4'a agiaza hunte'nea z gagfa ama mopafi mani'neane, trampi zgane asagugati vano nehia zgane afi' namaramine ke'noe. ⁷Nagra nentahugeno mago agerumo'a anage nagrikura hu'ne, Pitaga otinka, ahenka no hu'ne! ⁸Hu'neanagi nagra anage hu'noe, Ra'moka nagru hu'nanke'na nonoa z gagfagina onegahue hu'na hu'noe! ⁹Hianagi ana ageru'mo mago'ene anage monafinti hu'ne, Anumzamo'ma azeri agruma hu'neniazana, haviza huno agaru osu'ne hunka osuo! ¹⁰Anazana tagufa (tri) zupa fore huteno, ete ana mika'zana avazu higeno monafi mareri'ne. ¹¹Anama nehigeno, Sisaria kumateti huzmantege'za tagufa vahe'mo'za, nemanua nonte ehnati'naze. ¹²Avamumo nasamino i'o osunka ana vahe'ene amane vuo hige'na, 6si'a nenafu'za nagrane azageta Konilias nontega vu'none. ¹³Koniliasi kegeno ankeromo noma'afi oti'нено asami'nea kea, anage huno tasami'ne, huzamantege'za Jopa vu'za Saimoni'e nehaza ne', mago agi'a Pitana avare'za esageno, ¹⁴agra mono naneke neramasaminkeno, kagri'ene mika nagaka'anena, kefo zantmifinti tamahoke ahegahie. ¹⁵Anante naneke erigafa hu'na nehugeno, Ruotge Avamu'mo zamagrite erami'ne, ese'ma tagrite e'neaza huno emani'ne. ¹⁶Ana hige'na Ramo'ma huno, Joni'a tinu mono tina fre ramante'neankina, Avamunu tina frermantegahue hu'nea kegu nagesa antahi'noe. ¹⁷Ana hu'negu Anumzamo'ma magozahu muse'zama (gift) zamagri'ma zami'neana, anahu kna huno Agra Ramofo Jisasi Kraisinte tamentinti nehunkeno tami'neaza hu'negu, iza'na nagra Anumzamofu eri'zankura i'o huzamantegahue? ¹⁸Ana kema zamagrama antahite'za, kema huzmanteku'ma hazana netre'za, Anumzamofu ra agi ami'za anage hu'naze, Anumzamo'a megia vahera zamarege'za zamagu'a rukarehe hu'za zamasi'mu e'nerize hu'naze.

Antioku nemaniza vahe'mo'za mono eri'za eri'naza naneke

¹⁹Ananknafi Stivenina ahe nefri'za mago'a nagara zamahe fragu vazige'za, atre'za Fonesiane, Saiprasine, Antiokune, nevu'za ru vahete mono osu, Jiu vaheteke mono kea ome zamasi'naze. ²⁰Hu'neanagi Saipras vahe'ene Sairini vahe'mo'za zamagripinti mago'a Antioku e'za, agafa hu'za Ramofo Jisasi knare musenkea huama hu'za Griki vahe zamasi'naze. ²¹Ramofo hihamumo zamagripi me'negu, tusi'a vahe'mo'za zamagu'a rukarehe hu'za Ramofonte zamentinti hu'naze. ²²Anama zamagrama hazankemo'a, Jerusale mono vahete ege'za

nentahi'za, zamagra Banabasi huntageno Antioku vu'ne. ²³Agrama eno Anumzamoma asunku'ma humazmanteaza negeno, muse nehuno zamazeri hanaveti ke zamasmino, tamage huta tmaguareti Ramofonte maniho hu'ne. ²⁴Banabasi'a knare ne' mani'nenono, Avamupi avitenono amentinti hu'negeno, maka vahe'mo'za Ramofonte e'naze.

²⁵Ana huteno Banabasi'a Tasisi kuma atreno Soli omegenaku vuno, ²⁶ome ke fore huteno avareno Antioku kumate uhanati'na'e. Ana kafufina Banabasi'ene Solikea mono vahe'zga mono kea hunezamikeno tusi'a vahe fore hu'ne. Anante amage'ma nentea disaipol naga'mo'za pusa (kristen) mono vahere huno zamagi'a eri'naze.

²⁷Ana knafina mago'a kasnampa vahe'mo'za Jerusaleti erami'za, Antioku kumate ehanati'naze. ²⁸Mago'zmia Agabasi'e hu'za nehaza ne'mo, otino Avamumofono hanavefi maka mopafina agate'za fore hugahie huno hu'ne. Romu kamanimo kva kri'nea mopa ramimpi, ana kemofono avufga'a (Klaodias Sisama ran kva emania knafi fore hu'ne). ²⁹Jisasi amage'ma nentamo'za, mago mago'mo'za zagoma eri'naza avamente eritru huta Judia mani'naza tafuheintega (mono nagate) zamaga'zanku hugahazanki atre'zmantesune nehu'za, ³⁰anante eri tru hute'za, mono vahe'mo'za, Banabasine Soli kizani znamige'ne, Jerusale mono kva vahetega eri'ne vu'na'e.

Jemisi ahene frino, Pitana kina hunte'nea naneke

12 ¹Ana knafina Kini Heroti'a mago'a mono vahe zamahe, frinaku zamazeri'ne. ²Joni nefu Jemisi azeri'za zanra kazinu ahe fri'naze. ³Anama hiazama Agrama kegenono Juda vahe'mo'za musema hazageno'a, Pitana azerino kina huntaku hu'ne. (Zo'ore brete muse hu'za nenaza knare, anara hu'ne.) ⁴Heroti'a, Pitama azeriteno avareno 4'a sondia vahe kevumofono (16) zamazampi ome antege'za, oza aza hu'za kava kri'naze. Heroti'a Pasova ne'za netesageno, amefi'a maka vahe zamufi Pitana azeri ama hunaku antahi'ne. ⁵Ana higeno Pita'a kina nompino mani'nege'za, mono vahe'zgamo'za Anumzamofontega hampo'nati'za nunamu hunte'naze.

⁶Ana kenegera masenkeno okina Heroti'a avareno keaga huntegahianki nehigeno, Pita'a tare sondia netremokizni amunompino masenegeno, tarega azantera seni nofiteti kina rentenageno, kva vahe'mo'za kina vahete kava kri'za kafante mani'naze. ⁷Ana nehigeno ame huno, Ramofono ankeromono efore higeno, masamo kina vahe nona remsa hu'ne. Ankeromono Pitana asoparega aheno ame hunka otio! Higeno seni nofimo'a Pita azantetira evurami'ne. ⁸Ankeromono'a amanage huno Pitana asami'ne, Kamunofirano nehunka kaga nona vazio, higeno Pita'a agano antanine. Anante ankeromono anage huno asami'ne, anakre kuka'a nentaninka namage' eno hu'ne. ⁹Pita'a amage' avaririno nevuno, ankeromono'ma azama hiazana

agra antahino keno osu'neanagi, agra avana keaza hu'ne. ¹⁰Ese kafante kava hu'naza sondia vahe'ene, anante kafante kava hu'naza sondia vahe zamagterete'ne, ran kumapi vu kafana aenireti hagente'nea ran kafante akeno agra'a kafamo'a anagige'ne atirami'ne osi kampi nevakeno, ankeromo'a ame huno atreno vu'ne, ¹¹Pita'a agrake nevuno amanage hu'ne, menina nagra antahi'noe, Ra Anumzamo'a ankeroma'a huntogeno, Heroti'ene Jiu vahe'mo'za maka'zama hunantenaku hazafintira naza huno katufe natre'ne.

¹²Anante Pitama anama hiaza antahino keno nehuno, Jonina mago agi'a Maki'e nehaza ne'mofo nerera Meri nontega, maka vahe'mo'za mani'neza nunamu nehazarega vu'ne ¹³Anante Pita eno megia kafante eme vagare vagare higeno'a, Roda'e nehaza eri'za mofa'mo eno eme antahi'ne ¹⁴Pita ageruma nentahino'a, ana kafana onagi atreno tusi muse nehuno, agareno vuno Pita'a kafante oti'ne huno ana vahe zga ome zamasm'i'ne. ¹⁵Hu'neanagi zamagra anage ana mofakura hu'naze, Kagra negi nenegahane! Ana mofamo hanavetino tamage Pita'e nehige'za, kagra ankeroma'a ke'negahane hu'za mago'ane hu'naze. ¹⁶Pita vagare vagare nehigeno zamagrama kafa anagi'za nege'za, nankna huno e'neha hu'za tusi'a antri hu'naze. ¹⁷Agra azanu avame hige'za akohe'za mani'zageno Ramo'ma kina nompinti azama huno avare atre'nea kea zamasm'i'ne. Ana huteno anage hu'ne, Jemisine mono nafuheina ama ana nanekea zamasmih'o huteno atreno ru kumatega vu'ne.

¹⁸Ko'ma atige'za, kina nonte'ma kva hu'naza sondia vahe'mo'za tusiza hu'za Pita'a na'a hu'neha hu'za rama'a antahintahi hu'naze. ¹⁹Anante Heroti'ma hakareno keama, keno erifore nosuno'a kavama hu'naza vahera kegaga huzmanteno tamagra frigahaze hige'za, zamahe friku zamare'za vazageno, henka Judiatira atreno uramino Sisaria umani'ne.

Heroti fri'nea naneke

²⁰Anante Heroti'a Taia kumate vahe'ene, Saito kumate vahe'mokizmigura arimpa ahezamantege'za, zamagra mago zamarimpa hu'za agrite emeri atru hu'za, Kini ne'mofo tva'onte eri'za ne' Blastusi, zamaza hinogu rimpa azeri fru hute'za, knare nomanizama kini ne'mo'ma zamisigu antahige'naze. Na'ankure zamagrama kave'ma e'nerizana kini Heroti'ma kava kri'nea mopafinti e'neri'ze. ²¹Mago kna erintaza knazupa, Kini Heroti'a kini vahe kukena huteno, keaga refakohu trate mani'nenno zamagrira rama'a keaga zamasm'i'ne. ²²Hu'neanagi tusi'a vahe'mo'za agafa hu'za rankehu'za mago anumzamof'o agerure, hanki vahe'mofo agerura omane'ne! hu'naze. ²³Ana kema nehazama'a, mago Ramofo ankeromo Herotina ahe tre'ne, na'ankure Anumzamof'o ra agi omigeno agrira knimo amprigeno fri'ne.

²⁴Hu'neanagi Anumzamof'o kemo'a hageno rura huno vuno eno hu'ne.

²⁵Banabasi'ene Solikea Jerusale mono eri'zama eri vgareteke, Jon Makina nevareke ete Antioku kumate vu'na'e.

Banabasine Solikizni mono erizante huznante'naza naneke

13 ¹Antiokua mono nontema menima mani'naza kasnampa vahe'ene, rempi huzmi vahera ama'a mani'naze, Banabasiki, Simioni (aganumpa nere hu'za nehaze ne'ki), Lusiusi'a Sairini ne'ki, kumate ugagota kva (Gavana) ne' Heroti knampa, magoka ositeti rasena'a ne' Maeniaki, Soliki hu'za mani'naze.

²Anamo'za Ramofonte mono hunente'za, ne'za a'o hu'za nunamu nehzageno, Ruotge Avamu'mo'a anage hu'ne, Banabasine Soli kizni huhampri znante'keno, eri'za eriogu hua eri'zana eri'o hu'ne. ³Ana hute'za ne'zama a'o hu'za mani'neza henka zamazana znagofetu ante'za nunamu hute'za huzamantake'ne vu'na'e.

Poli'ene Banabasike Saiprasi kumapi mono hu'na'a naneke

⁴Banabasine Soli kiznia Ruotge Avamu'mo huznantege'ne Sulisia uramike osi voti omerike Saipras ti amunompi me'nea kumate vu'na'e. ⁵Zamagrama Saramisi kumate vute'za, agafa hu'za Anumzamofa kea Jiu vahe osi mono nomp (Sinagog) huama hu'naze. Zanaza hanigu Joninena avare'ke umani'naze. (Mago agi'a Jon Maki'e.) ⁶Zamagrama maka ti amunompi kumatami agatere'za nevu'za Pafosi uhanati'za zago nereno Jiu vahepi havige kasnampa nera, Bar Jisasi'e nehaza nera mani'negeke ke'na'e. ⁷Ana nera, Segias Paulosi knare antahizamo agatere'nea ne' Romu kamanimo huhamprintegeneno ana ti amunompi kuma kava hu'nea ne' ene mani'ne, ana kamani kva (gavana) ne'mo Banabasine Soli kizni Anumzamofa ke eme asamiogu zanagi hu'ne. ⁸Hu'neanagi amene ne' Elimasi'a zago nereno ha' arezmanteno ana kamani kva ne'mo amentinti osanie hu'ne. (Elimasi'e huno Griki kefi hu'neana, avuatga huno zago nereno vahe zamahe fri nere hu'ne.) ⁹Hu'neanagi Solina, mago agi'a Poli'e, Ruotge Avamumo'a agu'afi avinetegeneno avua kefatago huno negeno, ¹⁰anage hu'ne, kagripina havige avu'avamo'ene havizahu zamo'a avite'ne, Sata mofavre mani'nenka, fatgo avu'avamofona ha' arenentane, kagra fatgo osu avu'avara netrenka, Anumzamofa fatgo avu'avara osugahampi? ¹¹Menina ko, Anumzamofa azamo'a ha' reganteankino kavurgamo'a asu hanigenka, osi'a knafina kavua onkegahane! higeno ame huno avumo'a su higeno azante azerino vanohu vaheku hakre'ne. ¹²Anante kamani (Gavana) kva ne'mo anazama agrite fore hiaza negeno, amentinti hu'ne. Na'ankure agra tusi'za huno Ramofonkema rempima humia zankura antri hu'ne.

Poli'ene Banabasike Pisidia Antioku kumate mani'na'e.

¹³Anante Poli'ene agrane vu'naza vahe'mo'za Pafosi kuma atre'za hagerimpi vu'za Pega kumate Pamfalia kaziga ehnatinaze. Hianangi

Joni'a anante ome zanatreno ete Jerusale kumate vu'ne. ¹⁴Pega kumara atreke, zanagra Pisidi Antioku ehanatike, mni fruhu knazupa osi mono nOMPI (sinagog) marerike umani'na'e. ¹⁵Kasegene kasnampa vahe kema hampri vagarete'za osi mono nOMPI kva vahe'mo'za ke atrezmante'za anage hu'naze, tafuheta mago'a tazeri hanaveti ke eri'nenutma amane hugahaze. ¹⁶Hazageno Poli'a anante otino azanu avame huno anage hu'ne,

Israel vahe'motmane megia vahe'ma Anumzamofonku koroma nehaza'motma antahiho. ¹⁷Ama'i Israeli vahe'mofo Anumzamo'a, tagri tagehe'ina huhampri zamanteno, ru vahe kumapima umani'nageno zamazeri knare zantfa Isipi kumapina nehuno hihamu'areti anampintira zamare megia atre'ne. ¹⁸40ti'a naza kafufi ka'ma mopafi zamareno ome zamantege'za mani'naze. ¹⁹7ni'a ranra kumatamimpi mani'naza Kenani vahe zamahe hana huteno, Anumzamo'a ana mopafi vahe'amo'za manisagu mopa erizamige'za zamagra mopa erise'za mani'naze. ²⁰Anazama fore'ma hu'neana 450'a zgefufu nazampi fore hu'ne. Anama huteno'a henka kva vahe azeri otigeno kva krizmantege'za mani'za e'za kasnampa ne' Samueli'gnare ehnati'naze. ²¹Anante kini ne' tamisane hu'za antahigageno, Anumzamo'a Kisi nemofo Benzameni naga nofipinti ne' Soli zamigeno, 40ti'a zgefufu kini manino kva huzmante'ne. ²²Anumzamo'a kini Solina azeri netreno, Deviti azeri otigeno kini manino kva huzmante'ne. Agra anage huno Devitinkura hu'ne, ***Nagra kogeno Jesi nemofo Deviti'a, Nagri'ma nagu'afima navenesia'zana agra nevaririno, maka'zama huo hanuazana hugahie.*** (Sam-Zga 89:20, 1 Sam 13:14) ²³Ama ana ne'mofo negehompinti, Israeli vahe'mota tahoke'ma heno tazahu nera Jisasina huvempa hu'nea kante anteno tami'ne. ²⁴Jisasi'ma hakare'a Israeli vahe zamufi eama osu'negeno, Joni'a huama huno mono tina fretma tmagu'a rukrehe hiho huno maka Israeli vahe'mota tasami'ne. ²⁵Hu'neanagi Joni'ma huhamprunte'nea eri'zama'a eri vga reteno'a, mago'ene anage hu'ne, Iza'e hutma nagrikura nentahize? Nagra ana nera omni'noe. Hu'neanagi antahiho, mago'mo'a namage ne-e. Nagra knarera osu'noankina agia anontema anaki'nea nofira katu ofegahue huno hu'ne.

²⁶Nafuhetma Abrahamu agigo azankomofo nagare, amama Anumzanku koro nehu'za tamagrane mani'naza megia vahe'motma kumipinti tazahu kea tagrite atregeno e'ne. ²⁷Na'ankure Jerusale mani'naza vahe'mo'zane, kva vahe'zmimo'zanena Agra taza hu'nere hu'za ke'za antahi'za osu'naze. Kasnampa vahe'mo'za Agriku hu'za kre'naza kea maka mni fruhu (sabat) mono knare'ma hampri'za nentahi'za, antahiso'e osu'za ahenaku huhaviza hunte'naza kemo'a, avufa'a fore hu'ne. ²⁸Ahe fri agafagura ke'za erifore osu'za, zamagra Paerotinte vu'za, antahige'za ahe frio hu'za hu'naze. ²⁹Agriku'ma hu'zama avon tafepi krente'naza

maka nanekea huvgarete'za, keka zafareti erifenka atre'za eri'za vu'za kerifi ome ante'naze. ³⁰Hu'neanagi Anumzamo'a fri kragefe'nefinti azeri otigeno, ³¹Galiliti amage' ante'za Jerusalem mareri'za e'naza vahe'taminte rama'a zupa efore hu'ne. E'ima ke'naza nagamo'za vahepina huama hu'za menina zamasmigahaze. ³²Hanki neragehokizmima huvempa huzmante'nea knare musenke tagrama neramasmunana, ³³ama ana huvempa kea, Anumzamo'a tagrite eri knare huranteno Agra'a mofavre'aza huneranteno, Jisasinena azeri oti'ne, ko'ma tare zgame avon tafepi krente'nea kante, ***Kagra mofavreni'a menina mani'nanke'na, Nagra negafa'na manigahue huno huama hu'ne.*** (Sam-Zga 2:7)

³⁴Hu'neanagi e'ima hunte'nere, Anumzamo'a tamage huno Jisasina azeri oti'neakino mago'anena frino onkasritfa hu'ne, Anumzamo'a anage huno hu'ne, ***Nagra agru huno ruotge hu'nea huvempa asomu ke Devitima ami'noana, menina tamagrira tamigahue,*** (Aisa 55:3) ³⁵E'ina hu'negu mago'ene zgame avon tafepina anage huno kre'ne, ***Kagra atresankeno ruotge hu'nemo'a onkasrigahie.*** (Sam-Zga 16:10)

³⁶Deviti'a, agrama manino e'nea knafina Anumzamo'ma erigahane huno hunte'nea eri'zana eri vagareteno, frige'za negehoma asentena fi ome asentageno avufamo'a kasri'ne. ³⁷Hu'neanagi Jisasina fri'nefinti Anumzamo azeri otigeno onkasri'ne. ³⁸E'ina hu'negu nenafutma antahita keta hiho, ama ana ne'pinti kumi tamia eri atresia ke huama hu'na neramasmune. ³⁹Ama ana nete'ma zamentinti hanu'za fatgo vahe manigahaze. Mosese kasegemo'a tamazeri fatgo osugahie. ⁴⁰Ana hu'negu tamagra kava hu'nenkeno, kasnampa vahe'mo'za hu'naza nanekemo'a tmagritera fore osino. ⁴¹***Kiza zokago kema nehaza vahe'tmina, keho! Tamano nevazinketma antri hutma fritma haviza hugahaze! Nagra knare eri'za enerugetma tamentinti'a nosaze. Vahe'mo'ma tamasmigineta tamentintia osugahaze, huno kre'ne.*** (Hava 1:5)

⁴²Anage huteke Poli'ene Banabasike atineramikeno, vahe'mo'za ama ana nanekea ru mni fruhu kna (sabat) zupa knare eme tasmigaha'o, hu'za zanasmi'naze. ⁴³Mono'ma osi mono nomp (sinagog) huvgarete'za, vu'za e'za nehageno, rama'a Jiu vahe'mo'zane, Anumzanku koro nehaza megia vahe'mo'za, Poline Banabasi kizani zanavriri'za nevzage'ne, zamazeri hanaveti ke hu'ne, Anumzamofu asunkuzampina hanavetita maniho hu'ne ana vahera zamasmina'e.

⁴⁴Hanki anante Mni fruhu kna (Sabat) zupa, ran kumapi mani'naza vahe'mo'za kuma azute'za Ramofu ke antahinaku emeritru hu'naze. ⁴⁵Mika vahe eritru nehage'za Jiu mono vahe'mo'za nezmage'za kanive reneznantegeni Poli hiankegura mago zamarimpa huoznante'za, ana vahe'mo'za ha' reznante'naze. ⁴⁶Poli'ene Banabasi'kea hanavetike koro osu anage hu'na'e, Esera Juda vahe'motma Anumzamofu nanekea tmasmi'nonanagi, tamagra tmefi ana kea hunemitma fatgoma hutma

mani'netma manivava asimu erizankura tame'nosigu, megi'a vahete tagra rukarehe nehu'e. ⁴⁷Ramo'a amanage huno hanavege hurante'ne, ***Nagra huhampri kantoankinka, kagra megi'a vahera tvi zami mani'nenka, kumipinti zamazahu kea erinka mopa atupare uhanatigahane huno tasami'ne.*** (Aisa 42:6, 49:6)

⁴⁸Megi'a vahe'mo'za ana naneke nentahiza muse nehu'za, Ramofo kegu tusi'za hu'za musenkase nehazageno, mani'vava zamasimu erigahaze huno huhampri zamante'nea vahe'mo'za zamentinti hu'naze. ⁴⁹Ana hazageno Ramofo kemo ana mopa kaziga haezganino vuno eno hu'ne. ⁵⁰Hu'neanagi Jiu vahe'mo'za, Anumzamofonku koro nehu'za zamagi me'nea a'nene, zamagi me'nea vene'nene zamarimpare ke hu'za zamazeri otige'za, Poline Banabasi kiznia, ana mopa kazigatira zamahe anati tre'naze. ⁵¹Zanahe anatzageke, zanagiareti kugusopa rupopo hutra'azamo'a, huzmerino e'izama hazazamo'a knare osiaza hazankino knazamo'a tmagripi megahie nehuke, Ikoniamu atreke vu'na'e. ⁵²Hu'neanagi Antioku kumate'ma zamentinti nehu'za Ramofo amage nentaza nagapina muse'zamo'ene Ruotge Avamu'mo'a avite'ne.

Poli'ene Banabasike Ikoniamu kumate mani'na'a naneke

14 ¹Antioku mani'nakeno fore hu'neankna kna'za fore hu'ne, Poli'ene Banabasikea Ikoniamu kumate vuke, Jiu vahe osi mono nomp (sinagog) hamp'natike hakare vahe'mo antahi ama hu'are, mono kea huama nehake'za, rama'amo'za Jiu vahe'ene Griki vahe kevumo'za zamentinti hu'naze. ²Hu'neanagi Jiu vahe'mo'za zamentinti ana kegura nosuza, megi'a vahe antahintahi eri savri hazage'za, ana netrena ha' rezanante'naze. ³Ana hazageno mago'a knafina anantega mani'neke, mono kea hanavetike Ramofonkura nehune, asunku'zamofu kea nehakeno, avame'zane kaguvazanena zanagri znazampi eri fore hu'ne. ⁴Hu'neanagi ana ran kumapi mani'naza vahe krerafamo'za amu'nompinti refako hu'za, mago'amo'za Jiu vahetega vazage'za, mago'amo'za aposol vahetega vu'za hagerafi'naze. ⁵Megi'a vahe'ene Jiu vahe'mo'zane kva vahe zamine, zamazeri haviza huta have knonu tare netrena zanahefrigahune hu'za nehazageke, ⁶Poli'ene Banabasikea ananke nentahi'ne, freke Likoniamu rankumamofu osi kumatrena Listrane Debine ana kaziga asoparega meno vu'nea mopare umani'na'e. ⁷Anantega umani'neke mago'ene Knare Muse Kea huama hu'ne zamasmu'na'e.

Poli'ene Banabasikea Listrane kumate mani'na'a naneke

⁸Listrane kumatere mago'aga havizahu ne' ksente'nea ne' mani'ne, ksente'neregatira kana vano nosia nere. ⁹Ana ne'mo Poli'ma huama hianke mani'nen antahine. Poli'a ana ne'ma avufi kefatgo huno negeno'a, amentinti nehiankino knare huntegahie nehuno, ¹⁰ran ke

huno asami'ne, kagareti oti fatgo huo huno higeno, ana ne'mo, haru huno marerino tamino nehuno otino vu'ne. ¹¹ Poli'ma hiazama ana vahe tamimo'za nege'za, Lakonia kefinti ranke hu'za anumzantamimo vahe fore huno tagrite ne-e hu'za hu'naze! ¹² Zamagra Banabasinku Ziusi (havi anumzane) nehu'za, Polinku Hemesi'e (havi anumzane) hu'za kahefa zanagi ante'naze. Na'ankure Poli'a ke ne'ku hu'naze. ¹³ Ziusi havige anumzamofono mono nona, ran kumamofona megia, tva'onte me'nea nomofono kva ne'mo'a mago'a, bulimakaona nevareno mago'a avasase'zantamine erino ran kumamofono kahante vige'za, agrane ana mika vahe'mo'za kre sramna huznantenaku hu'naze. ¹⁴ Hu'neanagi aposol Poli'ene Banabasikea ananke nentahike kukena zani'a tagato tagatu nehu'ne, zanagare'ne ana vahetamimofono amunompi ufre'ne kezatike anage hu'na'e. ¹⁵ Ama vahe'motma, na'a amazana nehaze? tagra vahetafa mani'neta tamagri kna hu'no'e! Tagra knare musenke huama huta neramasmu'e, ana hanunketa tmazama osuno havi zampintira atretma, Agra monane mopane, hagerine maka'zama tro huno asimuno anteno mani'nea Anumzante monora huntegahaze. ¹⁶ Korapa knafima mani'naza vahera, Anumzamono zamatrege'za maka mopafi vahe'mo'za zamagra zamesia kante vu'za e'za hu'naze. ¹⁷ Hu'neanagi Agrama knare'zama hu'neana fraoki'neanki, monafinti kora atregeno runo ne'za raga rente'geno eri knare hunermanteno tmesia ne'zana neramino musezana tamagu'afina ante'ne. ¹⁸ Anahu kea hu'neanagi kresramna vuznantenaku hu'nazana vahe'ma i'ono huzmantenaku hu'noana, tusi'a amuhono hurante'ne. ¹⁹ Hu'neanagi Jiu vahe'mo'za Antiokuno kumateti'ene Ikoniano kumateti e'za, havige nehie hu'za zamagrarega eme zamavrente'za, Polina have knonuno ahe'za avazuno hu'za rankumapintino ati rami'za megia frie hu'za zamagesa nentahiza ome atre'naze. ²⁰ Hu'neanagi Anumzamofono amage nentazano disaipol naga'mo'za, regorave nehazageno anampintino otino ran kumapinkano eteno ufarene. Maseke nanterana Banabasi'ene atre'ne Debi vu'na'e.

Poli'ene Banabasi kea ete Antiokuno rukrahe hu'ne vu'na'a naneke

²¹ Ana ran kumate'ma knare muse ke (gutnius) huama hakeno rama'a vahe'mo'za, amage ante disaipol naga fore hazageno, zanagra Listra kumate'ene Ikoniane Antiokuno kumate vu'na'e. ²² Zanagra Jisasi amage' nentazano disaipol naga zamagu'a zamazeri hanaveti ke hunezmasmike, hanavetita tamentintifina maniho, Anumzamofono kumapimano vunakumano hanuta, rama'a knazampino ufreteta henka vugahune hu'na'e. ²³ Ana nehuke, mono kva vahe (elda) mago'a mono nonte zamazeri onetike ne'zana a'ono huneke nunamuno nehune, zanamentintimano neha'a Ramofono azampino zamante'na'e.

²⁴ Anantetino Pisidi'a distrikifino ufareke agatera'azamoke, Pamfiliano provinsifino ehanati'na'e. ²⁵ Zanagra Pega kumate mono naneke ome

huteke, Ataria kumate urami'na'e. ²⁶ Anantetira atre'ne ventifi marerike ete Antioku kumate vu'na'e, korapara ana kumateti Anumzamofa asunkuzampi huzamantake'ne vunate ete ehanatina'e. ²⁷ Zanagrama ehanatike mono vahezga eme zamazeri atru huteke, makazama Anumzamo'ma zanagripima hu'neazana nezamasmi'ne, megi'a vahete kama eri hagro hige'za zamentinti hu'naza ke zamasm'i'na'e. ²⁸ Ana kumate Anumzamofa amage' nentaza disaipol naga'ene zazakna mani'na'e.

Jerusale kumate atru hu'naza naneke

(Gal 2:1-10)

15 ¹ Mago'a vahe'mo'za Judia kazigati e'za Antioku ehanati'za amanage hu'za amage' nentaza nagara rempi huzami'naze, Mosese hu'nea kere amage' antetma tamavufa taga hiho, anama osanutma tamahoke heno tamaza osugahie. ² Poli'ene Banabasi kema ke hakare ana vahe'enema hugantigama hutageno, mono vahe zgamo'za Poline Banabasine amu'no zamifinti mago'a vahe'mo'zane kehakare hu'nazaza eri fatgo hunaku mago'a, aposol naga'ene mono kva vahe'ene (eldas) mago zamarimpa osu'naza keaga huza eri fatgo hunaku Jerusale vu'naze. ³ Ana hige'za mono nagamo'za, huzamantege'za, Fonesiane Sameria ufare'za agatere'za maka megi'a vahe'tamimo'za zamagu'a rukarehe hu'naza kea mono vahe'zga zamasmige'za tusi'za hu'za muse hu'naze. ⁴ Zamagrama Jerusale uhanatizage'za, mono vahe'mo'zane, mago'a aposol naga'ene mono kva vahe'mo'za (eldas) muse hu'za zamara'ge'za, maka'zama Anumzamo zamagrite'ma hu'neazana huama hu'za zamasm'i'naze. ⁵ Hu'neanagi mago'a Farisi mono vahepinti, zamagua rukarehe hu'za Kraisinte zamentinti hu'namo'za, oti'za anage hu'naze, megi'a vahe'mo'za zamufama taga hute'za Mosesi kasegema amage antesazana knare hugahie.

⁶ Aposol naga'ene mono kva (eldas) vahe'mo'za atru hu'za ana naneke erifatgo hu'naze. ⁷ Eri atru hu'za zazate kea refako hu'za antahizageno, Pita otino ana nanekemofa nona'a amanage huno zamasm'i'ne, nenfutma, tamagra antahi'naze mago'a kna evigeno, Anumzamo'a nagri huhamprinanteno, megi'a vahepi mono kea huo huno hunantege'na, hugeno knare musen ke antahi'za zamentinti hu'naze. ⁸ Higeno Anumzamo vahe'mofo agu'a keno antahino hu'nemo'a, zamagritera eriamu huno Ruotge Avamura zami'ne, na'ankure tagri'ma hu'neazana huno zami'ne. ⁹ Hankino tagrira Anumzamo'a ruzana huranteno, zamagrira ruzana huozmante'ne, zamentinti nehazageno zamagu'a zamazeri agru hu'ne. ¹⁰ Hagi menina nahigetma Anumzamofona rimpa he'zana nehutma, bulumaka'amofa zamanankempi anaki nezmantaza kna knanentake agare namare zafa (Yoke) Jisasi amage nentaza disaipol

nagapina nentaze. Tagri nerageho'ene, tagranena eriga osu'nonankna knazana zaminaku nehazo? ¹¹Hu'neanagi tagrama tamentintima nehunana, Ramofo Jisasi asunku'zamo kefo zantifinti tahoke heno zamagri hu'nea kante anteno taza hu'ne.

¹²Atru hu'naza maka vahetamimo'za, ke osu mani'nage'za Polike Banabasikea kaguva'zane avame'zanema zanagripinti Anumzamo'ma megia' vahe'ma huzmante'nea zana zamasm'na'e. ¹³Ana nanekema huvgamaretageno, Jemisi'a anage huno kenona hu'ne, nafuhetma ke'ni'a antahiho, ¹⁴Saimoni anage huno huama hu'ne, Anumzamo'a megia' vahera zamare'na Nagra'ni'a vahere hu'na huhampri zamantegahue hu'ne. ¹⁵Kasnampa vahe'mo'za krente'naza kemo'a, ama kenena mago kna hu'ne, ¹⁶**Anama hutesu'na, ete Nagra e'na Deviti noma karite'neana etena eme kigahue. Nagra'ni'a havizama hu'nea nona eriso'e hugahue.**^c ¹⁷**Ana nehanena miko vahe'mo'za, Ra'monagu nehakesagena, zamagima hesuana, mika megia' vahera Nagri vahere hu'na zamagrikura hugahue, huno mika'zama troma hu'nea Ramo'a hu'ne,** (Emo 9:11-12) ¹⁸Korapama evu'nea knafina amazana antahino keno hu'neane.

¹⁹E'ina hu'negu, huvgare nanekea nagra (Jemisi'na) amanage nehue, tagra mago'anena knazana ozamisune, na'ankure megia' vahe'mo'za amu'no zamifinti rukarehe hu'za Anumzamofonte e'naze. ²⁰Hu'neanagi avo kreta amanage huta zamazeri haviza huzampintira manigneta maniho huta zamasm' snune. Havi anumzamofu ami'nesia zane, monko avu'avazane, anankema tga osu zgagfane, korama me'ne'nia ame'a oneho huta zamasmisune. ²¹Na'ankure tagra antahinone, ofenka'a knareti eno menima e'neana, Mosese kasege'a huama hakare kumatera nehu'za, maka mni fruhu knarera (Sabat) osi mono (sinagog) nomp' umareri'za hampri'za nezamasmize.

Megia' vahe zamentinti nehazamokizmi avo krezmi'nea naneke

²²Anante aposol naga'ene, mono kva vahe'mo'zane, maka mono kevumo'za amuno zamifinti huhampri zamanteneana, Judasinku Basabasi nehaza ne'ene Sailasi'a ana naga'amofu kva ne' zamine huhampri zananteke, Poline Banabasi kizni Antioku vihogu huzmante'ne. ²³Ama'na avon karentage'za eri'za vu'naze, aposol nagategati'ene mono kva vahe'motane, tamagri tamafuheta megia' tafuhetane nerasarogta Antiokune Siriane, Silisiamana mani'namotarega musen ke huramantone. ²⁴Kema antahunkeno'a, mago'a vahe'mo'za tagripinti vu'za, huozmantenona ke ome tmasmi'za kemo'a, kna neramino antahintahitami tmazeri savari hu'naze. ²⁵Tagra mago tarimpa huta tagri

^c **15:16** Deviti nonkuma hu'neana, e'i avame ke huno agrama kva hu'nea kumaku (kindom) hu'ne.

aroneti Banabasine Poline magoka ama vahera huhampri zamanteta huzamantesunke'za vanaze. ²⁶Zanagra zanavufa tagri Ramofo Jisasi Kraisi agi'are atre'za neha'a netre'ne. ²⁷E'ina hu'negu Judasine Sailasi kizni huzmantonankino, zanagra zani'a ama kemofona ome hamprike tamasmigahaze. ²⁸Na'ankure knare'ma hu'neana, Ruotge Avamu'ene tagranena, ruga'a knazana ontaminaku nehunanki, ama kemofa avaririgahaze.

²⁹Ana hu'neanki havi anumzamofa ami'nesia zane korama'a me'nenia ame'ane, anankema tagaosu zgagfa onetma monko'zana osugahaze. Tamagrama amazama osutma maniganeta manisazana knare hugahaze. Tamarimpa frune maniho.

³⁰Ana hute'za zamagra atre'za Antioku urami'za, maka naga ome zamazeri atru hute'za anama kre'naza avona zami'naze. ³¹Rankema hu'za ana avoma hampritageno, vahe'tamimo'za zamazeri hanaveti kema hazazankura, tusi'a musenkase hu'naze. ³²Hagi Judasike Sailasikea zngaranena kasanampa netrenkike, so'e hu'za mani'saza kene zamazeri hanaveti ke nezmasmike, zamentinti nagara zaza naneke hu'ne zamasm'i'na'e. ³³⁻³⁴Mago'agna manitakeno, ana kumate zamentinti nehaza naga'mo'za, tanarimpa farune vi'o hu'za huznantageke, e'na'a vahetega eteke vu'na'e. ³⁵Hu'neanagi Poli'ene Banabasikea, rama'a rempi huzami vahe'ene Antioku kumate mani'ne'za rempi hunezami'za Ramofonkea huama hu'za zamasm'i'naze.

Polike Banabasikea mago zanarimpa osuke atane'na'a naneke

³⁶Henka'a mago'a kna evutegeni, Poli'a Banabasina amanage huno asami'ne, ete vuta maka kumapi zamentinti nagara, Anumzamofa kema zamasm'i'no'ana, nankna nehazafi ome zamagesu'e. ³⁷Banabasi'a, Joninku mago agi'a Maki'e nehaza ne' avare'neta vanu'e hu'ne, ³⁸Hianagi ko'ma avareke Pamfili'a kumate nevakeno, zanatre'no eri'za e'o'ri vu'negu Poli'a hamponatino i'o, avareta ovugahu'e hu'ne. ³⁹Hu'nege'ne anazanteku fra vaziteke, otare atre hu'na'e. Banabasi'a Makina avareno votifi marerino Saiprasi ti amunompi kumate vu'na'e. ⁴⁰Hu'neanagi Poli'a Sailasi avarena vugahue nehige'za, Anumzamofa asunku'zane knare vi'o hu'za mono afuhe'zane asarahehe'zanena musen ke huznantageke atreke vuna'e. ⁴¹Siriane Silisi'a kumapi Poli'a ufreno nevuno, mono vahera zamazeri hanavetive vu'ne.

Polike Sailasikea Timoti avare'ne vu'na'a naneke

16 ¹Poli'a Debe kumate ene Listra kumate'ene ne-eno, mago nera Timoti'e nehaza ne'kino, nerera'a Jiu a'mo amentinti nehia a'mofa mofavre. Hianagi nefa'a Griki ne' mani'ne. ²Listrane Ikoniam mani'naza zamentinti naga'mo'za knare nere hu'za nehaza nere. ³Poli'a avareno

Timoti vunaku nehuno, avufa taga huntene, na'ankure mago'a Jiu vahera ana kumatera mani'nageno ana hu'ne, makamo'za antahi'naze agri nefa'a Griki ne' mani'ne. ⁴Zamagrama kumate kumate ufare'za nevu'za, aposol naga'mozane mono (elda) kva vahe'mo'zama Jerusale kumate hu'naza kea megia' zamentinti vahe'mo'za avaririsaze hu'naza ke ome zamasm'i'naze. ⁵Anama higeno mono vahe'mo'za zamentintifina hanave e'nerizageno, mago mago knafina rama'a vahe efare efare hu'za ra hu'naze.

Poli'a Masedonia ne'mofonku ava'nagna'za ke'nea naneke

⁶Zamagra Pamfaliane, Galasia kaziga ugater'e'za nevzageno, Ruotge Avamu'mo mono ke Esia kaziga huzanku i'o huno huzamantege'za agater'e'za vu'naze. ⁷Zamagrama Misia kaziga ete'za, Bitania kaziga vunaku hu'nazanagi, Jisasi Avamu'mo zamatrege'za ovu'naze. ⁸Ana hige'za zamagra Misia agater'e'za, Troasi rankumate urami'za vu'naze. ⁹Keragera Poli'a mago ava'nagnaza efore higeno keana, Masedonia ne'mo otino mani'nenno asamino, tagritega erakahenka Masedonia eme taza huo huno nehigeno ke'ne! ¹⁰Ana ava'nagnaza Poli'a ketegeta, Anumzamo tasmino Masedonia vutma knare musenke ome zamasm'iho nehiankita, ame huta ome zamasmisune huta hu'none.

Filipai kumate ehanati'naza naneke

¹¹Troasi kumateti votia erigantu atreta hagerimpi vufatgo huta Samotresi vuta, ugatereta anante kna zupa Niapolisi kumate uhanati'none. ¹²Anantetira atreta Filipai kumate vu'none, anama mani kagi'naza kumamofo, ran kumare Masedonia, Romu kamanimo kavagri'nea kumate mago'a kna ana kumate mani'none. ¹³Mni fruhu knazupa rankumamofo kafampinti atiramita tinkenare nevuta, tagesama antahunana mago'a Jiu vahe'mo'za nunamu nehaza kumara me'negahie nehuta, a'ne naga mani'nageta anante umanita agafa huta, ana a'ne naga'enena kea hu'none. ¹⁴Mago ara agi'a Lidia'e nehaza a'mo knare konariri'ane fitu tavrave hatino zagore netrea a'mo, Taitaria rankumateti a' mani'nenno Anumzamofonte mono hunentea a'mo kema hu'na kea antahi'ne. Anumzamo'a agu'a eri rukrehe higeno Poli'ma hiankea antahi'ne. ¹⁵Ana a'ene noma'afi nemaniz'a naga'anema mono tima frete'za, anage huno Lidi'a tantahigeke hu'ne, tamagra nagriku'ma Ramofonte mani tragotenoma mani'ne hanutma noni'afi eta emaniho, huno hampo'natino tantahigeke higeta noma'afi vuta umani'none.

Kina nompi zamante'nea naneke

¹⁶Anante nunamuhu kumatega vunaku nevunkeno, kazokzo mofa'mo'a eme tage'ne. Ana mofara havi avamu'mo agu'afi mani'nenno henkama fore'ma haniaza hufore nehigeno, kva'amo'za hufore'ma nehige'za knare

zago e'nerizane. ¹⁷Hanki ana mofa'mo Poline tagri tamefi tavririno ne-eno kezatino zmasamine, ama vahera Marerisa Anumzamofa kazokzo eri'za eneri'za vahere. Ama vahe'mo'za kefozantamifinti tmahoke aheno tamavaresia naneke tamasmiku neaze. ¹⁸Hakare knafina ana mofa'mo anazanke hu'ne. Hu'neanagi Poli'ma anankege antahiazamo'a avesra higeno, rukrehe huno ana avamuku anage hu'ne, Nagra Jisas Kraisi agifi hugantoanki atiraminka evuo! Higeno ana mofara atreno atirami'ne.

¹⁹Hu'neanagi ana mofa'mofo kva vahe'mo'za zamema ante'za zgoma e'neriza zama vige'za, Poline Sailasi'kizni zamagra ome zanazerite'za, zanavazu hu'za kva vahe'zgare maketi kumapi uhanati'naze.

²⁰Zamagrama kagota hu'za ke fakohu (megistret) kva vahe zgare zanavare'za vute'za anage hu'naze. Ama netremokea tagri ran kumapi vahera zamazeri savari neha'e, na'ankure zanagra Juda netrenkike, ²¹zanagrama vahe'ma rempi hunezmike amaza hiho ha'azamo'a, Romu vahe'mota tavutava'za ha'renerante. ²²Rama'a vahe'mo'za eri atru hu'za ha' rezmantageno, ke fakohu kva ne'mo Poline Sailasi kizni kukena zani'a eri vararo hutreteno, knonteti knonkeve zanami'o huno huzmante'ne. ²³Tusiza hu'za sefu knonkeve znamite'za, kina nOMPI zanavare'za ome matevu'za nezanatre'za, kina kva ne'ku hunte'za, kegva huso'e huo hu'za asami'naze. ²⁴Ke fakohu kva vahe'mo'za, kina nOMPI kva ne'ku, kina nOMPI avarento hia ke antahiteno, agu'afinka me'nea kinanOMPI zanavarenteno, zafafi zanagia erinteno anaki znantege'ne mani'na'e.

²⁵Kenage amunOMPI Polike Sailasikea, Anumzamofontega nunamune zgame'ene nehakeno, ruga'a kina vahe'mo'za zanantahi'naze. ²⁶Ana nehakeno ame huno tusi'a imi enerigeno kina vahe nomofo agafa'amo'a tore tore hu'ne. Ame huno maka kafamo'a anagigeno, maka kina vahe zamazampi rente'naza nofimo'a evurami'ne. ²⁷Kina vahete kva ne'mo'a avu vase'nefinti otino, keana kafana anagi vgare'negenog, kazinknoma'a erino agra'a ahefrinaku hu'ne, na'ankure agesama antahiana hago kina vahe'zgamog'za fre'naze hanuno ana hu'ne. ²⁸Hu'neanagi Poli'a amanage huno ranke hu'ne, kagra kavufarera mago'zana osuo, na'ankure tagra ama ofreta maka mani'none! ²⁹Tavi tagita eho huteno ana kina nOMPINKA ufareno Poline Sailasi kizni zanagiafi ahirahi neregenog utraka huno umase'ne. ³⁰Anante otino zanavrenog atiramino fegi nevunog, amanage hunog zanantahige'ne, Ina kna hanugenog kefo zaniafinti nahoke ahegahie? ³¹Ana ke'arera anage hu'na'e, Ramofo Jisasinku kamentintig nehugenog, kefozanka'afinti kahoke neheno, nonka'afima nemanig'za naga'mozanema zamentintima hanagenog'am zamahoke ahegahie. ³²Anage nehuke Ramofonke nesamike, maka noma'afima mani'nazog vahera zamasami'na'e. ³³Ana kenageke kina nonteg kva nemo'a zanavufafig zanahe'nazog namuna sese huznantetegenog, agri'ene noma'afig mani'nazog nagarog mono ti ana keregeke frezmante'na'e. ³⁴Kina nonteg kva ne'mog zanavrenog noma'afig

ufareno ne'za ome tro huznanteteno, Anumzante amentinti hia zankura, tusiza huno ana miko noma'afima nemaniza naga'anena musena hu'naze.

³⁵Nantera ko'atigeno ke fakohu kva vahe'mo'za, ati vahe zga huzamanteno anage hu'ne, zanatrenke'za ana ne'trena vi'o hu'naze.

³⁶Kina nonte kva ne'mo Polina amanahu ke ome asami'ne. Ke fakohu kva vahe'mo'za (jas) zanazeri meg'i'a zanatre'o hunantage'na e'noe, hagi menina atiramita tanarimpa frune vi'o huno zanasmi'ne. ³⁷Hu'neanagi Poli'a ati vahe'mokizmi ke nona'a amange huno zamasm'i'ne. Zamagra rama'a vahe zamufi knare ke agafa e'orine'za havige zante takenaze, tagranena Romu mopa agafa vahe mani'nonanagi, kinafi tavare'za emerante'naze. Hagi menina oku'a hurantenaku nehazo? Tamage anara osu'tfa hugahaze! Zamagra'zmi e'za eme tavare meg'i tatregahaze.

³⁸Ana naneke ati vahe'mo'za ke fakohu kva vahe ome nezamasmige'za nentahi'za, Poli'ene Sailasike Romu vahe mani'no'e hukema ha'azanku zamagogo fege'za koro hu'naze. ³⁹Ana hute'za vu'za Polina zamasunku ke ome huznantete'za, zanavre'za atirami'za ama ran (siti) kumara atreta vi'o hu'za mago'ane huzanante'naze. ⁴⁰Anama kina nompinti atiramitekea Lidia nontega vutene, zamentinti nehaza naga ome nezamageke, zamazeri hanaveti ke hunezmanteke atreke vu'na'e.

Poli'ene Sailasikea Tesalonaika kumate manina'a naneke

17 ¹Amfipolisine Apoloniane ran kumatre ugatere'za vute'za, henka Tesalonaika rankumate Jiu vahe osi mono no (sinagog) anantega menere e'naze. ²Poli'a Jiu vahe'mo'za osi mono nozmifi mani'nageno marerino, korapa agrama nehiaza huno, tagufa mni fruhu kna (Sabat) zupa avontafepinti kea zamasmino, ³ana kemofo agafa'a eriana nehuno huzamerino, Kraisina ahesnageno ata eriteno fripintira otigahie hu'ne. Ama ana Jisasinku'ma nehuana e'i Kraisi'e. ⁴Mago'a Jiu vahe'mo'zane, rama'a Anumzanku koro nehaza Griki vahe'mo'zane, zamagine a'nemo'zanana Poline Sailasi ene tragote'za hagerafi'za mani'naze. ⁵Hu'neanagi zamarimpa zamazeri otige'za Jiu vahe'mo'za antahi haviza hunezmante'za, kanivere'za kefo vahe maketi kumapi zamazeritru hu'za, ran kumapi ranke hute'za ana vahe'mo'za Jasoni nona tagana taganu vazi'za, Poline Sailasi kiznigu hake'za zanavre'za atru nehazafi vunaku hu'naze. ⁶Ana vahe'mo'za Poline Sailasi kizanima hake'za erifore nosu'za, Jasonine, mago'a zamentinti nehaza afuhe'inena zamazu hu'za rankumamofo kva (siti ofisa) vahete vu'za ranke hu'za anage huzmante'naze, ama vahe'mo'za mopane mopane hazenke eri fore nehaza vahera ama e'naze. ⁷Hagino Jesoni'a muse huno nantu vahe noma'afi osi'agna manihogu zamarente'ne! Zamagra Sisa hanave tra kea ha' renente'za anage hu'naze, mago kinima mani'neana agi'a Jisasi'e hu'za nehaze! ⁸Ana vahe'mo'za rama'a vahe'zga zamazerisavri nehazageno, rankumamofo kva vahe'mo'za ana kea antahi'naze. ⁹Anante

ran kumamofo kva vahe'mo'za Jesoni ene zamentinti naga'mo'za mizasaza zago erite'za, henka zamatrage'za vu'naze.

Beria kumate Poli'ene Sailasike mani'na'a naneke

¹⁰Zamentinti naga'mo'za ame hu'za Poline Sailasinena kenageke huznantage'ke, Beria ran kumate vu'na'e. Uhanatiteke Jiu vahe osi mono nonte vu'na'e. ¹¹Ana Jiu vahe'mo'za antahi'za zamimo'a knare huno ama hu'negu, Tesalonaikama nemaniza Jiu vahe'mo'za nehazaza osu'naze. Na'ankure mono kema ha'ana muse hu'za eneri'za, tamage amagemo'a hu'nefi hu'za maka zupa avon tafepi ke'ankere'naze. ¹²E'ina hu'negu rama'a Jiu vahe'mo'za zamentinti nehazageno, zamagima me'nea Griki a'nene vene'nemo'zanena zamentinti hu'naze. ¹³Hu'neanagi Tesalonaika mani'naza Jiu vahe'mo'za antahizama, Poli'a Anumzamofu kea Beria ome huama nehie kema nentahi'za, zamagranena anantega e'za, keomente emente hu'za, zamagu zamagesa eri savari hu'naze. ¹⁴Anante Anumzante mani'naza naga'mo'za, Polina huntageno ame huno hagerinkena vu'ne, hianagi Sailasi'ene Timotikea anante Beria kumate mani'na'e. ¹⁵Hanki Poli'ene vu'naza vahe'mo'za, avega hu'za Antens ran kumate ome netrazageno, Sailasine Timoti kiznigu nagritega ame huke e'o kema humazamantetege'za, atre'za ete Beria vu'naze.

Poli Atens ran kumate mani'nea naneke

¹⁶Poli'ma Atens kumate zanavega anteno mani'negeno, rimpamo'a kna nehigeno asunku hu'ne, na'ankure ana kumapina havige anumza tro'ma hunte'naza'zamo'a, rama'a me'negeno negeno ana hu'ne. ¹⁷Ana huteno mago'a Jiu vahe'ene, Anumzamofonku koro nehaza megia vahe'ene osi mono nomp i ome zamaretru huno nezasmimo, maketi kumapi maka kna emeri atruma haza vahera nanekea zamasmine. ¹⁸Anahu kna huno mago'a Epikurien vahe'ene, Stoik vahe'mo'zanena vahe'mofo nomani'zama rezagane'zama negaza vahe'mo'za (Filosofa) kehakare hunentageno mago'amo'za anage hu'za antahi'naze, Nankna ke ama neginagi vahe'mo'a hunaku nehie? Ruga'amo'za hu'za, Agra ru anumzanku nehia nere. Na'ankure Jisasi agi agenkene, fripintima oti'nea knare musenkegu hu'naze. ¹⁹Ana hutege'za Polina avareza (areopagus) kanisol vahe'mo'za ke erifatgo nehazare vu'za anage hu'naze, Knare ama'i kahefa kema rempima hunezamina kea hananketa antahisumpi? ²⁰Na'ankure tagra tagesa hakare huna ke kagra nehane, hagi ke agafa'amo'a na'ane hu'nefi antahinaku nehune. ²¹Maka Antens vahe'ene ru mopareti vahe'mo'za ana kumapi emani'naza vahe'mo'za knazimi'a atre'za manine'za kahefa zama fore hia zamofu naneke huge antahige hu'naze.

²²Ana higeno Poli'a kanisol vahe'mo'za ke erifatgo nehazare otino (Areopagus) anage hu'ne, Antens vahe'mota, nagrama koana hakarezante

tamagra monora hunentaze. ²³Na'ankure nagra vano nehuna urava'o hu'na rezagane'na monoma hunentaza'zama koana, mago itama (alta) husga huntenarera anage hutma krente'naze, ontahinona Anumzanetege hutma hu'naze. E'ina hu'negu ontahinetma mono'ma hunentaza zamofonku, e'i nagra huama hu'na neramasmue. ²⁴Ama mopane maka'zama me'neaza tro hu'nea Anumzamo, Agra'a monafine mopafinena Ra mani'neni, vahe'mo'za zamazanu ki'naza mono nompina nomanie. ²⁵Mago'a zankura atupara nosigeno vahe'mo'za zamazanu tro hu'za aza nosaze. Na'ankure agra'a asimu anteno mani'zana zamigeno zamasimu antageno, maka'zana hakare vahe'mofona nezamie. ²⁶Magoke vahepinti Agra maka kaziga kuma ante'za manisaza vahera tro hu'ne. Mopafi manivitesazegu nehuno, manisnaza kna'a nenteno, kumama manisaza kumara, kankamu zamino e'ire manigahaze huno huzmantetere hu'ne. ²⁷Anumzamofonku hake'za nege'za, agrikura zamazama hu'za hake'za erifore hu'nazanagi, agra tagrira magoke magokemota afetera omani'ne. ²⁸Na'ankure agripi manineta mika'zana nehuta, ama mopafina manita neone, mago'a tamagri fronka kemo'a anage hu'ne. Na'ankure tagranena agripinti fore hu'none. ²⁹Anumzampinti fore huta mani'none hanuta, kolima silvare'ma, havereti'ma vahe'mo'zama antahintahi zamiretima tro huntea zankura Anumzamo e'inahu kna hu'ne huta ontahisune. ³⁰E'inahu hu'za zamagena hu'miza e'naza kna'a, Anumzamo'a agha ontahi'ne, hagi menina agra miko kaziga vahera hankave nentake ke huno, tamagu'a rukarehe hiho huno hu'ne. ³¹Na'ankure ama mopama Agrama refako hania kna, agra'a fatgo avu'ava zampi ko huhampri tegeno me'ne. Mago ne' huhampri ante'neana miko vahera amate huzameri huno fri'nefinti azeri oti'ne.

³²Fri'nefinti azeri oti'nea naneke nehige'za nentahiza, mago'amo'za agiza re'naze. Hianagi mago'amo'za anage hu'naze, mago'ane ama naneke hananketa antahigahune hu'naze. ³³Poli'a havige mono kumara (Areopagus) atreno vu'ne. ³⁴Hu'neanagi mago'a vahe'mo'za Poli'ene hagerafi'za zamentinti hu'naze. Anampintira magora Dionisiosie nehaza nera kanisol vahe'mo'za ke erifatago nehaza kumate kanisol nere, magora Damarisie nehaza a'ene mago'amo'za zamentinti hu'naze.

Poli'a Korinti kumate mani'nea naneke

18 ¹Ana amefiga'a, Poli'a Anten kumara atreno Korinti vu'ne. ²Anatega mago Jiu ne' ome keno erifore hu'neana, Pontusi kasente'naza ne' agi'a Akuila'e, mensin'tfa nenaro Prisila ene Italiti ena'e. Na'ankure Sisa Klaodiasia'na mika Jiu vahe'ma Romu nemani'za vahera atretma viho huno huzmantegeno Poli'a zanagri ome zanage'ne. ³Na'ankure agrama mago'zahu eri'zama e'nerigu huno magopi zanagri'ene mani'neni eri'zana eri'ne, (na'ankure zamagra mago kna eri'za antahine'za nofiteti seli

no nehatiza nagare). ⁴Nehuno mika mni fruhu kna (Sabat) zupa atru nehu'za mono nehaza osi mono nOMPI, marerino mono naneke huno, Jiu vahe'ene Griki vahera masevenke huno zamarimpa eri vakaneno zamasm'ne.

⁵Masedoniati Sailasi'ene Timotike eramike akeno, Poli'a agafa huno mika Jiu vahera zamazeri atru huno mono kege'za maka kna nezamasm'no, Jisasi'a, Agra'a tazahunu taguvazi nere huno eriyama huno zamasm'ne.

⁶Ana nehigezama ha'ma rente'za krunagemu huntaza vahera anakre ku'a (saket) zafino kugusopa rupopo nehuno anage huno zamasm'ne, tamagri kora kumimo'a tamagritami tamasenire megahie! Nagripina mago knazani'a omane'tfa hugahie. Amareti agafa huno vaniana, Jiu vahe'rompage megia' vahete vugahue. ⁷Huno nezamasm'no Poli'a anante osi mono nontetira atreno, mago megia' nera agi'a Taitus Jastusi'e nehaza ne'mo, Anumzante mono hunentea ne'mofo nontega atru nehu'za mono nehaza nomofo asopare me'ne'geno vu'ne. ⁸Atru nehu'za mono nehaza nonte kegva nehia nera (presitent) Krispusi'e nehaza ne'ene, mika agri kvafi nemaniza vahe'mo'za Ramofonte zamentinti hu'naze. Ana nanekema nentahi'za, rama'a Korinti vahe'mo'za zamentinti hu'za mono ti fre'naze. ⁹Ramo'a kerage ava'nagna zampi anage huno Polina asami'ne, korera osuo, keaga huvava nehunka, keagama hu'zana azeoritfa huo. ¹⁰Na'ankure Nagra kagrane manigahuankino, kahe frikura mago'mo'a kagri kavufarera azana onte'tfa hugahie, na'ankure ama'na rankumapina Nagri vahera rama'a mani'naze, nehigeno ke'ne. ¹¹Higeno anampina mago kafugi sigisi'a ika mani'nenno, ana vahera Anumzamofu keaga rempi huzami'ne.

Poli'a Gavana ne' Kalio avuga oti'ne

¹²Kalio'ma, ugagota ra kvama (Gavana) Akaea kumatema mani'nege'za, Jiu vahe'mo'za oti'za mago antahintahi eri retro hu'za, avare'za ke refakohu trate (koti nonte) vu'za, ¹³anage hu'naze, ama ne'mo'a ruzahu huno tagri tra kemo'a osu'nea kante, vahekura mono antahiho huno nezmasmie nehazageno, ¹⁴Poli'ma agi'reaka hu'na ke hanuanki huno higeno, Kalio'a amanage huno Jiu vahera zamasm'ne, mago'a hazenke zankuro, tusi'a havi kefo zanku Jiu vahe'motmama hanazana, knare hanige'na, nagra tamagri kerera hagerfigahue. ¹⁵Hianagi amama hunentaza kemo'a tamagra kegu'ene tamagigu'ene, tamagratmi kasege eri hankave netizanki tamagratmi erifatgo hiho. Nagrira nave'osigu ama'na naneke'a erifatgo osugahue. ¹⁶Anante kema refakohu tratetira agra'a zamahe natitrene. ¹⁷Anante mika'mo'za mono nonte kva nehia ne' Sosteni azeri'za kema refkohu tramofu avuga agafa hu'za hae'naze. Ana hu'nazanagi Galio'a ana zankura agesa ontahi'ne.

Poli'a Antioku kumate Siria ehanati'nea naneke

¹⁸Mago'a rama'a knama Korinti kumate Poli'a maniteno'a, afuhe'mokizmia hufu huno mani'neho hunezmanteno, votifi hageri

tkaheno Siria nevicegeke Prisila'ene Akuilake agrane vu'na'e. Na'ankure Anumzamofu avure'ma huvempama hu'negu, Sensarea kumate Poli'a anuzokara vagateno erivo'vo hu'ne. ¹⁹Efesasi uhanatite'za, anante Poli'a Prisila'ne, Akuilagizni'a ome nezanetreno, agra osi mono nomp umarerino, Jiu vahe'ene naneke hugantugma hu'za antahi'naze. ²⁰Antahige'za za'zakna tagrane manisane nehazageno, knarere huno osu'ne. ²¹Hianagi hufu hunezmanteno anage hu'ne, Anumzamofu avesi'zama me'nenige'na, ete'na tamagritega egahue. Anage nehuno Efesasi'ti'ma votifi,

²²vuno Saeseria unehanatino, Jerusalem umarerino mono vahera musenke hunezmanteno, anantetira Antioku urami'ne. ²³Antioku'ma mago'a knama maniteno, ana kumara atreno mago'mago kumate Galasiane Fezianena vano huno Jisasi amage nentaza disaipol nagara zamazeri hampo'na hu'ne.

Apolosi mono eri'za agafa huno eri'nea naneke

²⁴Mago Jiu nera, agi'a Apolosi'e, Aleksandria kumate kasente'naza nera, knare keaga nehuno avontafera antahi ankere'nea ne'mo Efesasi e'ne. ²⁵Agri'ma Ramofu Jisasi kanku rempi humizageno, hampo'natinu huzmenerino keaga nehuno, Joni'ma tima frezmante'nea zantfa antahi'neanagi, Jisasi avu'ava'mofu nanekea fatgo huno huzamasmi'ne. ²⁶Agra korora osuno, agafa huno osi mono nompina hu'ama huno mono nompina keaga hu'neanagi, zanagrama agri kema nentahikea, Prisilake, Akuilakea avareke va'azamoke Anumzamofu avu'avara mago'ene huhagro huke fatgo kante asami'na'e. ²⁷Akaea vuku Apolosi'a nentahige'za, mono (kristen) naga'mo'za azeri hanavetike nesamiza huso'e sa'e hunente'za, Jisasi amage nentaza disaipol nagatega azeri so'e hiho hu'za avonkretrenaze. Anante'ma unehanatino'a, Anumzamofu asunku'zamo zamaza hige'za zamentinti nehaza nagara tusi'a zampi zamaza hu'ne. ²⁸Na'ankure agra hampo'natinu Jiu vahera zamazeri hagro huno, mika vahe zamufi avontafepinti eriamu huno Jisasi'a Tazahu Nere (Kraisie) hu'ne.

Joni amage' nentaza disaipol nagamo'za

Efesasi kumate mani'naza naneke

19 ¹Apolosi'ma Korintima mani'negeno, Poli'a agu'afinka kuma tamimpi ufreno vuno Efesasi kumate uhnatinu, mago'a disaipol naga anantega ome zamageno erifore nehuno, ²zamagriku anage hu'ne, tamagra ma tamentintima hu'nazana, hago Ruotge Avamura erinafi? Agriku anage hu'naze. A'o Ruotge Avamura mani'ne huta tagra ontahitfa hu'none. ³Hazageno Poli'a zamantahige'ne, Nazamofonte mono tina fre'naze? Zamagra ke'nona hu'za, Joni'ma ti fre'zama huraveri'nea zantere. ⁴Poli'a huno, Joni'ma tima frezmante'neana, zamasunku

hu'za zamagu'a rukarehe hanaza tine huno frezmantene. Vahera zamasmino, agri amage'ma ne'emofonte Jisasimpi tamentinti hiho hu'ne. ⁵Anankema antahite'za, Jisasi Ramofo agifi mono ti fre'naze. ⁶Hagi Poli'ma zamagrite azama antegenoa, Ruotge Avamu'mo'a zamagrite ege'za, agafa hu'za ruzamageru ruzmageru neru'za, henkama esiazamofo kasnampa kea huama hu'naze. ⁷Ana mika vene'nea 12fu'a naza eritru hu'naze.

Poli'a Efesas mani'nenono erizana hagerafino mago'ene eri'ne

⁸Hagi 3'a ikamofo agu'afina, Poli'a osi mono nompri ufreno korera osuno, antahintahizamia eriamu huno agrarega zamatreku Anumzamamofo avu'ava zankura huankereno zamasmine. ⁹Hu'neanagi mago'amo'za antahi'za zami'mo'a hampo'na atige'za, zamentinti hu'zankura zamagena hunente'za, ana vahe'mokizmi zamufi Ramofo avariri kankura huhaviza hunentageno, zamagrira nezamatreno, Jisasi amage' nentaza disaipol naga nezamavreno, mago nera Tairanusie nehaza ne'mofo rempi huzami nonte via'zamo, mika zupa vahe'ene keaga hu'ne. ¹⁰Amanahu'zana tare kafufi fore huno vu'ne, tarega Jiu vahe'ene Griki vahe'ma Esia provinsifi nemaniza vahe'mo'za Ramofo naneke antahisazegu anahura hu'ne.

Skevana seveni'a mofavre naga'mokizmi naneke

¹¹Anumzamo'a Poli azampi huvazino rama'a ruzahu ruzahu avame'za mago'ane erifore hu'ne. ¹²Ana hinogu asime nehamia nosivane (ankasipimo'ene), masine'za kave kre kenane (apronimo'a), Poli avufare eme avako hute'za, eri'za kri vahe zamufare ome antageno, krizmimo'a vgaregeno, havi avamumo'a zamagripintira atirami'ne. ¹³Mago kevu Jiu vahe'mo'za retro hu'za mago mago kumate vano vano nehu'za, Jisasi agifi huvame hu'za havi avamura huntenuku nehu'za, ana huvava hu'za nevu'za anage hu'naze. Poli'ma huama nehia Jisasi agifi atiramio huta tagra hunegantone. ¹⁴Mago Jiu vahe'mokizmi rankva nera Skeva'e nehaza ne'mofona, 7ni'a mofavre zga'amo'za anahu'zana hu'naze. ¹⁵Hianagi ana havi avamu'mo'a ke'nona zamire huno zamasmine, Jisasina nagra ke'na antahi'na hu'na, Polina ke'noe, hagi tamagra izagate? ¹⁶Higeno agu'afima havige avamu'ma fre'nea ne'mo'a zamagumpi takaureno, himamutino zamaheno rehapatige'za, korankno eneriza ana nompinti atiramiza zamufa zamapake fre'naze. ¹⁷Efesasi kumate nemaniza Jiu vahe'ene Griki vahe'mo'zane ana ke nentahizageno, tusiza huno zamagogo nefege'za Anumza Jisasi agi'a erisaga hu'naze. ¹⁸Rama'a zamentinti vahe'mo'za eama hu'za zamasunku hu'za, havi zamuzma'zana eriamu hu'naze. ¹⁹Huama nehu'za zamene vahe'mo'zane avuatga vahe'mo'zane kre'naza avontafe tamina eri'za amate hakare vahe zamure tevefi kre hana hu'naze. Ana avontafe miza se'naza zgoa 50 tauseni'a zgo atre'naze.^d ²⁰Ramofo hanavere, e'inahu'zana fore nehigeno, Ramofo nanekemo vuno eno huno hankavetino me'ne.

^d 19:19 mago mago zgomofu kna'amo'a, 50 tauseni'a zge'gnareke eri'za eneriza miza e'neri'za zgogu hu'ne.

²¹Anazana fore hutegeno Poli'a Masedonia kaziga vute'na Griki kaziga nevu'na Jerusale kumate vute'na, henka'a Romu kuma enena ome kegahue huno agha antahine. ²²Tare azahu netrema, Timotine Erastusine huzanantegeke Masedonia kaziga vakeno, osi'agna Poli'a, agra Esia mani'ne.

²³Ana knafina, Jisasi Kamofonkura tusi'a hazenke Efesasia fore hu'ne. ²⁴Na'ankure magora silvare tuzampaza tro nehia ne'mofo agi'a Demetriasikino, silvareti mago amema'a trohu'neana, Atemasi mono hunentea kna'za tro hu'ne. Anazama tro'ma nehaza naga'mo'za, tusi'a zgokrerafa anazantetira tro'nehaze. ²⁵Demetriasi'a anahu erizama antahi'naza eri'za vahera kehutru huno anage hu'ne. Ama vahe'motagi, amanahu eri'zantetira zgokrerafa erifore nehune hu'ne. ²⁶Hanki tamagra ketma antahitma nehaze, Efesasi ana nosianki, Esia kokampina Polima vahetamima kehiazamo, vahe'mo'ma azanteti'ma trohu'nea anumzana, e'i tamage huno anumzana omanitfa hune huno tusi'a vahe krerafa zamazeri ruvahe nehie. ²⁷Hago menina hazenke fore hu'ne, tagri zgo erizankera eri havizana osugahie. Hianagi so'e a' anumza Atemisi mono nomo'a amne zankna hanigeno, Esia kokampi vahe'mo'zane, ama mopa kagi'afi vahe'mozama, mono hunentaza vahe'mo'za atre'sageno, ana a'mofo hanave'amo'a haviza hugahie.

²⁸Anankema nentahi'za, zamarimpamo'a haviza nehige'za oti'za keza ati'za Efesasia so'e rantia, Atemisi'a agrake mani'ne! ²⁹Higeno rankumapina rama'a kereso nehu'za, vahe'mo'za magoka zamagare'za krina nehazage'za mani'neza negaza kumapi (stetium) ufre'za, Mesadoniati Poli'enema e'na'a netre Gaiusine Aristakusikiznia zanavazu hu'za vu'naze. ³⁰Poli'ma ana vahe'zgamoma atru hu'nefima ufreku'ma nehige'za, Jisasi amage nentaza disaipol naga'mo'za otre'naze. ³¹Higeno mago'ene mago'a Esia kumate kva vahera, Polina knampa'agi'za anama atru hu'nafina keke huntonanki uofreno hu'za hampo'nati'za kea atrente'naze. ³²Higeno mago'amo'a magoke zanku kezati'zageno, mago'amo'a otage zanku kezati'zageno, anama atru hu'za negaza vahe'mo'za tusi savari nehazageno, rama'amo'za nahige'za atru hu'nazo ama'osu'naze. ³³Vahe'pintira Aleksandana Jiu vahe'mo'za atufe'za zamuga eme nente'za, ama ana zamofu keaga eriamu hunka zamasmio hu'za huhanavetinaze. Aleksanda'a ama ana vahe'mo'zama hazankere nona huzmanteku azana antesga hu'ne. ³⁴Hu'neanagi kazama Aleksanda'a Jiu ne'ma mani'nege'za nege'za, ana mika vahe'mo'za magoke kere zamagerura erinte'za, 2'a auamofu agu'afina kezati'za, Efesasi'tira knare huno agatererfa rantia, Atemisi agrake mani'ne! ³⁵Rankumapima avoma negrea (kuskus) ne'mo ana vahe kevua zamazeri rava huteno anage hu'ne. Efesasi vahe'motma antahiho, ina vahe'mo antahino keno osu'ne? Efesasia ranku'mamo'a Atemasi agetererfa ra anumzamofu

mono nona kegva nehie. Ana a'mofo amema'ama monafinti'ma asga hurami'ne. ³⁶Ana hu'negu ama anazankura ke hakare osugahaze, taganetma mani'netma ame'amara osutma tamage'sa antahitetma anazana hugahaze. ³⁷Na'ankure tamagra ma, ama ana vene'nema zamaretma e'nazana, ra mono nompintira kumazafa ose'na'e, tagrama anteneta mono hunentona a' anumzankura (goddess) huhavizana huonte'na'e. ³⁸E'ina'ma Demetriasi'o agrane eri'za eneriza naga'mo'zama rumokizmima huzmante'nesigetma ke refakohu nonte zamaretma vinke'za, kva vahe'mofo zamure keaga hugantu hugama hugahaze. ³⁹Hu'neanagi mago'anema keagama hunaku hanutma, vahe'ma atruhu'za keagama azerirva nehaza knazupa kanisol vahete mareritma azerirava hugahaze. ⁴⁰Na'ankure menima ke hakarema nehuna zankuma, Romu rankva vahe'mo'za tantahigesageta hazenkefi manigahune. Na'ankure eriana huta zamasmisuna knare agafa'a omane'ne. ⁴¹E'inahu kema huno nezmasmino'a, ana atrua eritrege'za vuza e'za hu'naze.

Poli'a Masedonia kzigane Gris kazigane vu'nea naneke

20 ¹Ana ke hakarema haza'zamo vgaregeno, Jisasi amage nentaza disaipol nagara Poli'a kehige'za emeritru hazageno, zamumro kea anteteno, hufu huno knareki manineho hunezmanteno, atreno Masedonia vu'ne. ²Ana mopa kazigama vano huno rama'a keretima zamentinti naga zamazeri hanavematiteno, Grisi ehanati'ne. ³Anatega 3'a ika maniteno, Siria kaziga ventefi vunaku'ma nehigeno, mago'a Jiu vahe'mo'za haenaku ke retro haza nanekema nentahino'a, eteno Masedonia mopafi kampi vunaku Poli'a agha antahi'ne. ⁴Mago'a vahe'mo'za Poli'ene vu'nazana, Beria kumateti ne' Sopati, Perusi nemofoki, Tesalonikati Aristakusi'ene Sekanduskegi, Debe kumateti Gaiusiki, Esia kumateti Timotiki, Tikikusiki, Trofimasiz'za vu'naze. ⁵Ama ana vene'nemo'za vugote'za Troasi ome tavega ante'naze. ⁶Zo'ore bretima Juda vahe'mota nenona kna'mofo amefiga'a hompama vagaregeta, Filipai kumara atreta ventefi mmerita 5fu'a zge ferupi nevuta, Troasi kumate tavega ante'nare uhnatita ana kumate mago sonta umani'none.

⁷Ana Sontamofo pusa kna're bretima kori'za (komonion) neku eritruma nehunkeno'a, Poli'a oki vugahue huno agha nentahi'no keaga nezmasmino, mono kea huvava nehigeno kerage amu'no ase'ne. ⁸Anagamu kino mareri'nea nomofo hunaraginte pinka rama'a rampe tvira manenegeta atrua hu'none. ⁹Hagi mago nehaza nera agi'a Jutikasi'e, zaho kamofu atupare (windo) marerino mani'neni, Poli'ma keagama huvava huno nevigeno'a, antahirega avukoko higeno, mase himarenefinti, tagufa nonteti anagamuti asaga huramino ahe fri'ne. ¹⁰Hianagi Poli'a uramino agri agumpi umseno azana rugagino anu'nekino tmasunkura osiho hu'ne. Tamagra antria osiho, na'ankure agra ofri'neanki amne mani'ne

huno hu'ne. ¹¹ Nehuno Poli'a eteno anagamu marerino, bretima korige'za netageno, za'za kna zamagranena keaga nehigeno ko'atigeno zamatreno vu'ne. ¹² Ana nehazavea ofrino mani'nege'za muse nehu'za avare'za nontega vu'naze.

Ventefi Mailitusi uhanati'nea naneke

¹³ Ananteti tagra ventefi umarerita Asosi vunaku nehuta, Polina avarenteta vunaku tagesa antahi'none, na'ankure ama kana agra'a azeri antefatgo huno, agra mopafi vugahue huno aghesa antahi'ne. ¹⁴ Asosima rutagiha higeta, agrira ventefi avarentata, Miteleni ti amunompi me'nea ran kumate vunaku vuvava hu'none. ¹⁵ Anantetira maseta mago knarera ventefi nevunkeno ko'atigeta, Kiosi tinkenare uhanatita, mago knarera Samosi uhanatita, hagi ana kna'mofo amefiga'a Mailitusi vu'none. ¹⁶ Na'ankure Poli'a Efesasia agateregahue huno antahi'ne, na'ankure Esia za'za kna omani'na ko knare'ma hanuna Jerusale nagra mani'nesugeno hompa (pentikos) kna fore hugahie hu'ne.

¹⁷ Mailatusi uhanatite'za, Poli'a ke atrezmanteno Efesasi mono nonte kva (elda) vahe'zga eme nageho hu'ne. ¹⁸ Ke hige'za agrite ageno, amanage huno zamasmine, Pusante'ma Esia mopare nagiamo rentoa zupa, tamagripima maka zupa mani'na e'noana, tamagratmi ko ketma antahi'naze.

Esia kaziga e'na tamagrane nemanugeta nagri agafa'a nage'naze. ¹⁹ Jiu vahe'mo'za nazeri havizahu kema retro'ma haza zamo'a tusi'a knazamo nagri navufare ege'na anterami'na zavira nete'na, Ramofo erizana eri'noe. ²⁰ Tamagri'ma tamaza hania kea, korera osu'na huama hu'na tamasmugetma antahi'naze. Vahe'pina neramasmine, nonte nontera tamasmugetma ko antahi'naze. ²¹ Jiu vahe'ene Griki vahera hu'ama hu'na tamagu'a rukarehe hutma Anumzante ne-etma, Ranti Jisasinte tamentinti hiho hu'na zamasmine. ²² Hagi menina Ruotge Avamu'mofo ke amage antena, nagra Jerusalemi nevue, nagri navufarera na'a fore hugahio, ontahi'noe. ²³ Hankino Ruotge Avamu'mo nagrira nasamino, mika ranra kumapina, kina hu'zamo'ene kna'zamo'enena kavega ante'ne hu'ne. ²⁴ Hu'neanagi navufagura nagesa nontahue, tusi'a zana eri'zani'a erivaga nere'na, Ra Jisasi'ma eri'zama namino vahe'ma zamasmio hu'nea eri'za eri'na Anumzamofa asunku zankura knare naneke vahera zamasmigahue. ²⁵ Hagi menina nagra antahi'noankitma, azago menima Anumzamofa kumakuma neramasmumota, mago'enena nagri navugosafina onke'tfa hugahaze. ²⁶ E'ina hu'negu, meni nagra huama hu'na nerasmue, miko vahe'mofo koran kumimo'a nagritera ome'tfa hugahie. ²⁷ Na'ankure Anumzamofa miko avesizama'a nagra korera osu'na hu'ama hu'na nerasmue. ²⁸ Tamagratmia kegva nehutma, lama afu kevua kegva hiho, Ruotge Avamu'mo tamazeri antegetma

kva hu'naze. Agrama magoke Mofavre ama huntogeno koranteti'ma mizama ase'nea Anumzamofono mono nagara zamazeri fatgo hutma kavagri zamantegahaze. ²⁹Nagrama tamatrena vanugeno'a amefiga, nagra antahi'noankino, mago'a afi' kra esaniazamo lama afu kevua zamazeri savri hugahie. ³⁰Kagri ka'a nagapinti enena vahe'mo'a otino tamage kea eri ruvahe hu'za rempi hunezmi'za, Jisasima amage' nentaza disaipol nagara zamagrarega zamavrenteku hugahaze. ³¹E'ina hu'negu tamavura omase kava hute maniho, tamagesama antahi ankeresazana tagufa zagegfumofono agu'afina hanine zgenena ontaganena kazigzi hu'na zavira nete'na, mago'mago'moka kavumarora ante'noe. ³²Hagi menina nagra Anumzante'ene, Agri asunku'zamofono kere maniho hu'na huneramantoe. Ama kemo'a tamazeri hanave netina, ruotage'ma hu'za mani'naza nagapi tamagra erisanti haregahaze. ³³Mago'moka silvaguro, Goliguro, kukenagu nagra kenasane nehu'na keaga nosue. ³⁴Tamagratmi ko antahita keta hu'naze, ina zanku'ma nagri'ene, magoka vano nehuna naga'enema atupa'ma nehunazana, ama anazamo erifore huno neramie. ³⁵Ana mika zampina nagra ko hugaveri'noe, anahu'ma hunka hanavetinka eri'zama erisanana, hanave'a omane vahera aza nehunka, Ramofono Jisasinkere kagesa antahio, Agra'a anage hu'ne, ami'zamofono asomumo'a, eri'zamofono agaterene hu'ne.

³⁶Poli'ma ana nanekema huvama nereno'a, agra renareno zamagrane nunamu hu'ne. ³⁷Anampina zamagra tusi zavi'ateza Polina anankempi azeri anuki'za antako hu'naze. ³⁸Kema huno mago'ene onagegahaze hu'nea kegura, tusi zamasunku hu'naze. Nehu'za ventema me'nerega avare'za vu'naze.

Poli'a Jerusale kumate vu'nea naneke

21 ¹Tagra anama huteta, zamatrete ventea atufegantu hagerimpi atreta fatgo huta vuta, Kozie nehaza hageri amunompi me'nea osi mopare (ailen) vuta, nanterana Roodsie nehaza kumate (ailen) uhanatiteta, anantetira Patara mopare uhanati'none. ²Patara atreta, Fonesia kumate vunaku nehia vente keta eri fore huteta, miza huta marerunkeno atreno timpipi vu'ne. ³Saiprasima ventemo unemnia kuma hoga kaziga agatereta, Siria Provinsifi vuta, Taia kumate umani'none. Na'ankure ventemo'a mago'a fenona anante eri netregete. ⁴Jisasima amage'ma nentaza disaipol nagara ome nezmageta, ana kumate 7ni'a kna mani'none. Zamagra mago'ene Avamu'mo zamazeri otige'za Poliga Jerusale ovuo hu'za hu'naze. ⁵Ananknama vagaregeta, atreta kantega nevunkeno, ana mika'mo'zane, a'ne zamine, mofavre naga'zamine tagrane magoka vazageta ana kumara atreta vu'none. Hagerinkena vuta tarena reta nunamuna ome huteta, ⁶mani'neho huta mago mago'mokizmi hunezmanteta ventifi marerita nevunke'za, zamagra rukrahe hu'za nozimirega vu'naze.

7Tagra Taia kumara atreta vuva vuva huta Tolemeas uhanatiteta, mono nagara ome nezmatagita anante magokna mani'none. 8Nanterana ana kumara atreta, Siseria ehanatita mono nehia ne' (evangelis) Filipia 7ni'a naga mono kva zamazeri otinafinti mago zamimofononte umani'none. (Apo 6:1-6) 9Ana ne'mofona 4'a ve e'ori kasnampa mofane'zga'a mani'naze. 10Anante mago'a kna mani'nonkeno, mago kasnampa nera Agabasi'e nehaza ne'mo, Judia kazigati eramino anante e'ne. 11Tagra mani'nontega Agabasi'a eno, Polina amunofi'a (belt) erino agra azante ene agiare renenteno anage hu'ne, Ruotge Avamu'mo'a anage hie, Amanahu kante Jerusale mani'naza Jiu vahe'mo'za ama amunofi'mofonofana azeri'za kina rente'za megia' vahe zamazampi antegahaze. 12Ana naneke antahiteta, tagrane anampi nemani'za vahe'ene kazigazi huta, Poliga Jerusalea mareorio huta asami'none. 13Anante Poli'a kenona zamirera anage hu'ne, Tamagra nahigetma zavira netetma, narimpamofona nazeri kna nehaze? Na'ankure nofinukera nazeri'za anaki nantehogukera trora osuanki, Ramofo Jisasi agire Jerusale fri'naku retro nehue. 14Na'ankure agra ketia ontahisiazana higea, tagra kea osuta Ramofo avesi'zamo fore hanie huta hu'none.

15Ana knama evutegeta trotra nehuta otita Jerusale vu'none. 16Mago'a Sisaria kumate nemniza disaipol nagamo'za tagrane ne-eza tavare'za Saiprasi ne' Masoni nompivi vazageta, korapa amage nentea disaipol ne'mofononmpi umanigahune hu'nona ne'mofononmpi umani'none.

17Jerusale uhanatunke'za Anumzamofononaga'mo'za muse nehu'za tavatagi'za knare hutma aze hu'naze. 18Uvasonkeno ko'ma atigeno, Poli'a, Jemisine maka mono kva vahe'zgamma (eldas) mani'naza ome zamagenaku tagrane vu'ne. 19Poli'a ome zamageno zamatagiteno, agra agafa huno mago' mago'zama Anumzamoma' mono eri'za megia' vahepima e'nerigeno hu'neazana zamasmine. 20Ama ana nanekema antahite'za, Anumzamofononagi erisaga hu'naze. Zamagra anage hu'za Polina asaminaze, kagra nerafuga antahio, nama'a tausenia' Jiu vahe'mo'za zamentinti nehu'za, Mosese Kasege'ne amage' nentaza vahe'mo'zanena hamp'onati'za amage' nentaze. 21Mago'a vahe'mo'za anage hu'za kagrikura zamasmine, kagra maka Jiu vahe'mo'za megia' vahepi mani'nazana, Mosese Kasegemo'a taza osugahie hunka nehunka, mofavreramina zamufa taga huozmanteho nehunka, tagri tavu'tvamofononavu'ava osugahaze hunka hu'nananke antahinone. 22Tagra na'a hugahune? Kagrama kamama e'nana nanekema zamagra antahisu'za tamage hugahaze. 23Ana hu'negu tagrama kasmisunaza huo. 4'a vene'nemo'za Anumzamofonononhuvempa hu'za mani'naze. 24Hanki zamavarenka kagrane magoka tamazeri agru nehutma, zamazoka'ma haresazazana miza sezmantegahane. E'ina hananke'za, maka vahe'mo'za antahi'za kema hazage'za kagrikuma antahinazana tamage hu'naze hugahaze. Hu'neanagi kagraka'a kasegea

amage antenka manigahane. ²⁵Hu'neanagi megi'a vahe'ma zamentinti nehaza vahetega, tagra avonkreta, havi anumzante kre sramna vuntesia zgagfane, korane anankema taga osu zgagfane onetma, monko'zana atreho huta tagesa antahiteta kre zami'none. (Apo 15:29) ²⁶Nanterana Poli'a zamareno agrane ana vahe'ma zamazeri agru huteno, ra mono nOMPI vuno, ana zupa mago mago'mofonte kre sramna vuno azeri agaruhu kna vgaregahie huno ome zamasmine.

Polina ra mono nOMPI mani'nege'za azeri'naze

²⁷Ni'a kna vagare'za nehigeno, Esia provinsifinti Jiu vahe'mo'za ra mono nOMPI mani'nege'za nege'za, rama'a vahe zamarimpa zamazeri otige'za Polina azeneri'za, ²⁸anage hu'za ranke hu'naze, Israeli vahe'mote taza hiho! Ama ne'mo'a hakare kaziga mani'naza vahetamina rempi hunezmino, vahetine kasegetine, ra mono nontia ha' renente! Mago'enenaga Grika vahera zamareno ra mono nomofo agu'afi nevuno, ruotage hu'nea ra mono nona eri pehena nehie! ²⁹Zamagra negageno Efesasiti nera Trofimasia, Poli'ene Jerusalemi vano nehige'za negaza ne'ku, ra mono nomofo agu'afinka avreno marerinegahie hu'za zamagesa antahi'naze. ³⁰Maka vahe'mo'za eritru hu'za zamaga re'za e'za, Polina azeri'za avazu hu'za ra mono nomofo agu'afinti atimaneramizageno'a, ame hu'za ra mono nonkafana erigi'naze. ³¹Polima ahe friku'ma nehzageno, anampinti vahe'mo'za zamaga re'za vu'za, maka Jerusale vahe'mo'za ha' nehaze hu'za sondia vahete kva nehia nera ome asmi'naze. ³²Ana sondia kva ne'mo'a ame' huno sondia vahe'zga nezmareno, mago'a vahe'mokizmi kva vahe'zga (sensulien, hantretia sondia vahete kva nera) zamarege'za, zamaga re'za ana vahete e'naze. Polima ahenaku nehaza vahe'mo'za, sondia vahe'mokizmi kva ne'ene, sondia vahe'zgama nezamage'za, ohe'za atre'naze. ³³Anante sondia kva ne'mo'a Polina ome azeriteno, huzmantege'za tare seni nofinu anakintetageno, anante sondia kva ne'mo'a, zamantahige'ne, Agra aza'e, agra na'a hu'ne? ³⁴Hu'neanagi tusa vahe tamimpinti mago'amo'za ranke hu'za ra kefinti mago zanku kereso nehazageno, mago'amo'za ruge nehazageno, sondia kva ne'mo'a ke agafa'a keno eri fore osu'ne. Na'ankure rama'a vahe'mo'za kehakare nehazageno ontahino, Polina avareta sondia vahe kumapi viho hige'za avare'za vu'naze. ³⁵Agrama latare'ma ege'za, Polina sondia vahe'mo'za azerisga hu'za mareri'naze. Na'ankure rama'a vahe'mo'za ahenaku nehazageno'e. ³⁶Rama'a vahe tamimo'za zamavariri'za nevu'za kezatiza, Ahe friho! Ahe friho! hu'naze.

³⁷Polima avare'za sondia vahe kumapi ufre'za nehazageno sondia kva ne' asamino, knare mago'a kea kasmisufi? Higeno ana ne'mo, Grika kea antahi'nano? huno Polina antahige'ne. ³⁸Kagra Isipi ne'ma, mago'a knafima ugota hunka, 4 tauseni'a vahe'ma kamani vahe ha'ma

rezmanteku'ma hu'naza venene'ma zamarenka hagege kokampi vu'nana nepi, ru nere? ³⁹Poli'a kenona anage hu'ne, nagra Jiu nere Tasis kumateti Sirisia provinsfinti, agatere'nea ran kumatetire. Knare natrenankena ama vahetamina kea zamasmigahuo higeno, ⁴⁰Ana sondia kva ne'mo knareki kea huo higeno, Poli'a latare oti'nenno azanu avame hige'za keresoma nehazazana eri taganageno, antahi'naza Aramu (Hibru) kefinti, anage huno zamasmine.

Poli'a agu'vazi keaga hu'nea naneke

22 ¹Nafu'nafaheta, amama nagrama navufa nagu'vazi kema nehua kea anta'hiho. ²Zamagrama antahizama, Aramu (Hibru) kefinti kema nehige'za nentahi'za, mago'ane zamagasasankea eri anterami'naze. Anante Poli'a anage hu'ne, ³nagra Jiu nere, Tasis kumate Silisia ksenante'ne. Hianagi ama ran kumapi ra hutena Gamalieli hikanaga avonona hu'na, tagehemofu kasegemo hu'nea kante ante'na Anumzamofu avu'avara hanaveti'na avariri fatgo hu'noe. Tamagrama nehazaza hu'na Anumzamofona amage ante'na vu'noe. ⁴Nagra amanahu hu'na, zamentinti vahera nezamahe'na, zamahe fri'za nehu'na, vene'ne a'nenena kina rezamante'na zamare'na kina nomp'i ome zamante'noe. ⁵Ugagota prisi ne'mo'ene, maka kanisol (senhidren) vahe'mo'za, amama nehuazankura tamage hu'za tamasmigahaze. Zamagra mago'a avona kre'nami'za erinka Damaskasi nemniza kafuhe'intega vuo hazage'na, nagra kina ome rezmante'na zamare'na e'na, Jerusale zamata hoza zamihogu kantega vu'noe.

⁶Nagrama vuvava hu'na Damaskasi urava'o nehugeno'a, feru'naza monafinkati msa'nentake tvi'mo ame' huno remsa hunante kagine. ⁷Anante nagra traka hu'na mopafi evuramugeno, mago ageru nentahugeno anage huno nagriku hu'ne, Sol, Sol, na'a higenka Nagrira nazeri havizana nehane? ⁸Nagra ke nona'a, azage Ra'moka? hu'na nehugeno, Agra anage huno nasami'ne, Nazareteti Jisasi'na nazeri haviza nehane huno hu'ne. ⁹Nagrane vu'naza vahe'mo'za ana msa ke'nazanagi, nanekema hunamia kea antahi ama osu'naze. ¹⁰Ana hige'na nagra na'a hugahue Ramoka? hu'na antahigogeno, Ramo'a nagrikura anage hu'ne, Otinka Damaskasi vugeno, maka'zama hugahane hu'na huhampri kante'noa'zana kasamino. ¹¹Na'ankure tavi'mofu msamo navurga erihaviza hige'na navua onkoge'za, magokama vu'nona vahe'mo'za Damaskasia nazante navazu hu'za ufre'naze.

¹²Ana kumate mago nera mani'neana agi'a Ananaisi kasegemofu avariri fatgo nehige'za, anampima nemni'za maka Jiu vahe'mo'za, knare nere nehaza ne'mo, ¹³mani'nore eme otino nagriku anage hu'ne, Soliga nenafuge, kavurgamo'a so'e huganteno! Higeno ame' huno navumo'a hari hige'na kesga hu'na ana ne' ke'noe. ¹⁴Anante agra anage huno nasami'ne,

tagehe'mokizmi Anumzamo ko kagrira huhampriganteno, Agri avesi'za antahinka kenka nehunka, Fatgo Hu'nea Ne' Jisasi negenka, Agra'a agipinti'ma hania kea antahigahane. ¹⁵Na'ankure Agrama kagri'ma eri kaverigenka, negenka nentahinka hu'nana kea, huama hunka maka vahera zamasmigahane. ¹⁶Na'a higenka avega antenka mani'nane? Otinka mono ti nefrenka, agihanta nevazigeno kumi ka'a sese huganteno hu'ne.

¹⁷Ana hutege'na ete rukarahe hu'na Jerusale kumate e'na, ranmono nompni nunamu nehu'na avanagna'za kogeno, ¹⁸Ramo'a negogeno anage huno nasami'ne, Hantaka'a Jerusalea atrenka ame' hunka vuo, na'ankure Nagri nagenkema kagrama hanana kea ontahigahaze. ¹⁹Nagra kenona'a anage hu'noe, Ramoka Kagrite'ma osi mono nompni mono nehu'za, zamentintima nehaza vahe'ma kina nompni zamare nente'na, zamazeri havizama nehu'na zamahenoazana ko antahi'naze. ²⁰Kagri kema huama nehia ne'ma Stivenima ahe'za korama'a erimegi atraza'zana, nagrani'a tava'onte mani'nena, mago narimpa nehu'na, ahe'naza vahe'mokizmi anakare ku'zamirera kava hu'nogeza ahe'naze. ²¹Anante Ramo'a anage huno nasami'ne. Vuo! Na'ankure afete hugante'nugenka megia' vahepi ke'ni'a erinka ome zamasmigahane hu'ne.

²²Ana vahetamimo'za antahime nevazareti'ma, megia' vaheku'ma agrama kema hiana nentahi'za zamagerura eri mago hu'za ranke hu'za, ama mopafintira azeri atreho! Agra ama mopafi manigara osu'ne! ²³Rankege nehu'za, kukena'zami zafima netare'za, kugusopa kate'za zahopi mate vu'naze. ²⁴Ana'ma haza'zanku Romu sondia kva ne'mo'a, Polina ete avaretma sondia vahe kumapi ufrehu huno huzmante'ne. Agra zamasmimo kao akaruteti trohunte nofi knonu sefu kno Polina ome nehetma antahige'ho, Jiu vahe'mo'za nanke agafare amanahu ranke Polina hunentafi, huno huzmante'ne. ²⁵Knoma ahenaku azama azeri antesga nehazageno, Poli'a anante otino mani'nea sondia kva ne' (sensulien, hantretia sondia vahete kva nera), asami'ne, Knare hu'negu hazenke'a omane Romu vahere huno maninesia vahera ke agafa'a eri fatgo osu'nesiazantera ahegahazafi? ²⁶Sondia vahete kva ne'mo, ana kema nentahino, ugagota sondia nete vuno, kema hianke ome asamino, anage hu'ne, kagra na'a huntenaku nehane? Na'ankure ama'na nera Romu nere huno mani'nea nere. ²⁷Anante ugagota sondia kva ne'mo otino eno Polina anage huno antahige'ne, Kagra nasamio Romu ne' mani'nano? higeno agra hu'ne, ozo. ²⁸Ana ugagota sondia kva ne'mo, kenona'a anage hu'ne, Nagrama Romu vahe mani'nakura rama'a zgo mizase'na mani'noe. Hianagi Poli'a kenona'a huno nagri'enenana ama mopare nere huno nenfa'a mani'nenano, ome kasenantege'na, Romu nere hu'na mani'noe, ²⁹Polima sefu ami'za nehaza vahe'mo'za ame hu'za atre'za mani ogantu ogama nehazageno, ugagota sondia kva ne'mo antahiama Poli'ma Romu ne' mani'nege'za anakinte'naza zankura kore hu'ne.

Poli mono kanisol (Senhidren) vahepi mani'nenno ke hu'nea naneke

³⁰Maseno ko'atigeno Romu sondia vahete ugagota kva ne'mo'a, Na'a agafare Jiu vahe'mo'za kea Polina hunte'naze antahino keno hunaku kazufe netreno, prisi vaheku'ene kanisol vahe'zga ke hige'za atru hu'naze. Anante Polina avareno eramino zamuga eme ante'ne.

23 ¹Poli'a kanisol vahe'zaga zamufi keankere'nenno anage hu'ne, Nenfugate nagra magore hu'na havizana osu'noe. Fatgo huno ama' nagu'nagesare Anumzamofa avurera manina ena ama knarera ehanatue. ²Anagema higeno, ugagota prisi ne' Ananaisi'a anante oti'naza vaheku Polina agi ruhapatitma aheho huzmante'ne. ³Anante Poli'a anage agrikura hu'ne, Anumzamo'a kagrira kahegahie. Kagra amega fatgo hu'na knare hu'noe nehananagi, kagu'afinka haviza hu'nane! Kagra amare mani'nenka kasegemo'ma hu'nere antenka refako hunenantane. Kasegea rutagarenka aheho hunka hunezmantano? ⁴Ana tva'onte oti'naza vahe'mo'za anage hu'naze, kagra Anumzamofa hai prisi ne' huhaviza huntenuku nehampi? Hu'za hazageno, ⁵Poli'a kenona zamire anage hu'ne, nenafugata ugagota prisi ne' mani'ne hu'na nagra ontahi'noe, na'ankure anage huno avon tafepina krente'ne, ***kagri vahete'ma kva hu'nea vahera huhavizana huonto hu'ne.*** (Ekso-Uti 22:28)

⁶Anante Polima nezmagege'za anama eri tru hu'naza vahepina, Satusi vahe'ene mago'a Farisi vahe mani'nageno nezmageno, ranke huno anage hu'ne, nafu naganaheta nagra Farisi neki, nenfa'a Farisi ne'mo kasenantege'na mani'noe. Nagri'ma kema hunenantazana, nagrama namentinti hu'na fripinti otigahie hu'na huazanku kea hunenantaze! ⁷Anage'ma hige'za, Farisi vahe'ene Satusi vahe'mo'za atruma hu'nafinti amu'nompinti refako hu'za ana kegu fra vazi'naze. ⁸Na'ankure Satusi vahe'mo'za fripinti o'otigahie nehu'za, ankeru vahera omanine nehu'za, avamura omani'ne hu'nazanagi, Farisi vahe'mo'za ana maka'zana me'ne hu'za antahi'naze. ⁹Anampinti kezati'za ranke hu'za kea nehazage'za, mago'a Farisi nagapinti kasegere ugagota hu'naza vahe'mo'za oti'za hanave ke hu'za, mago hazenke'a ama nera keta eri forera osu'none. Avamu'mo'o, ankeromo'ma kema huminesigeno'a na'a hugahie? ¹⁰Tusi ke hafra nehazageno, Romu sondia kva ne'mo aru Poli avazu hu'za azeri taganape'zanku sondia vahera huzamanteno, uramitma Polina hanavetitma zamagripintira avaretma sondia vahe kumapi efareho hu'ne.

¹¹Ana kenage Ramo Polina tava'oma'are oti'nenno anage huno asami'ne, Oti hanavetio, Jerusalema Nagri nagi nagenke huama hu'nanaza hunka Romu kumatera anazanke hunka ome huama hugahane.

Poli ahenaku hu'naza naneke

¹²Ko'atige'za nanterampi mago'a Jiu vahe'mo'za eri atru hu'za, hanave ke huvempa hu'za Polima ahesnaza naneke retro nehu'za, ne'zane tine a'o

huta mani'neta Polina ahesunkeno frisnie, hu'za huhankaveti'za kea retro hu'naze. ¹³Anampima nanekema hu'za retro'ma hu'nazana 40ti'a vahera agatere'za mani'neza retro hu'naze. ¹⁴Zamagra ra prisi vahete'ene mono kva (elda) vahe'zgare vu'za anage ome hu'naze. Tagra kea huvempa huta mago'zana one'mani'neta, Polina ahe farigahune hu'za hu'naze. ¹⁵Hanki menina kagrane, kanisol vahe'motma sondia kva vaheku ke eri fatgo hugahunanki avreta eramiho hinke'za, avare'za eramisnageta, amare erava'o osu'nenageta kantega kavagrita mani'neta, ahe frisune.

¹⁶Hianagi Poli nesaro ne' mofavremo ahegahune hazanke nentahino, eno sondia vahe kumapi efareno Polina kahe ke nehaze huno asami'ne. ¹⁷Poli'a mago kina vahete kva ne' (sensulien), ke huno asami'ne, Avarenka ama arisera ugagota sondia kva nete vuo, na'ankure mago'a kea agra ome asamigahie huno huntene. ¹⁸Ana higeno hantreti'a sondia vahete kva ne'mo (sensulien,) ana arisera avareno ugagota sondia kva nete vuno, Poli'a hunanteno avarenka ama arisera ugagota sondia kva ne'te vuo, na'ankure agra mago'a kea ome asamigahie, hige'na avare'na e'noe. ¹⁹Ana ugagota sondia kva ne'mo azante avazuhuganti ataregene, zanagraku umani'neke, anage huno antahige'ne, Na'ane naneke nasaminaku hu'nane? ²⁰Ana arise'mo'a anage huno asami'ne, Jiu vahe'mo'za mago zamarimpa nehu'za, havige hu'za kantahigesagenka Polina avarenka okina kanisol vahetega uramisanke'za, keaga refako hu'za mago'ene hake'za ke'naku hu'naze. ²¹Ana hu'negu zamatrege'za anara osiho, na'ankure 40ti'a nazana agatere'naza vahe'mo'za ahe'nakura hu'naze. Zamagra kea huvempa hu'za, ne'zane tine oneneta ahe frigahune nehu'za menina zamagri kere'ma mago karimpa hananku, kavega ante'za mani'naze. ²²Anante ugagota sondia kva ne'mo'a ana risera hunenteno, hamponage asamino, vanunka ama nanekea kva nera ome asami'noe hunka, mago'mofona osamitfa huo.

²³Anante ugagota sondia kva ne'mo, sondia vahete kva ne'tre (sensulien), ke higeke akeno, anage huno zanasmi'ne, 200ti'a sondia vahera huge'za Siseria kumate vugahazanki tro hiho, anampina 70ti'a hosifi vano nehu'za ha' nehaza sondia vaheki 200ti'a karugaru kevereti ha' nehaza sondia vaheki hu'za meni kenagera 9 kiloki vugahazanki tro hiho. Polina hosi afu'zgafintira mago'a amigeno agumpi manina avaretma kva huntetma, Gavana ne' Feliksinte viho huno zamasmie'ne. ²⁴Polina hosi afu'zgafintira mago'a amigeno agumpi manina avaretma kva huntetma Gavana ne' Feliksinte viho huno zamasmie'ne. ²⁵Agra avoma kre'neana amanahu kante kre tre'ne, ²⁶Nagra Klotiasi Lisiasi'na, knare Gavana kva nemokarega Feliksiga musenke kre'negamue, ²⁷Ama nera Jiu vahe'mo'za azeri'za ahe'za nehazage'na, sondia vahe'niane e'na aza hu'na avare'noe. Na'ankure nagrama antahuana Romu ne' mani'noe higeta avareta e'none. ²⁸Na'anteku nanekea hunentazo nagra antahinaku,

zamagri kanisol vahete avare'na urami'noe. ²⁹Nagrama kena erifore'ma huana, zamagra'zimi kasegereku hu'za ke hakare hunte'naze, hianagi ahe fri kankamune kina hunte kea kena eri fore osu'noe. ³⁰Ahenaku kema retro'ma haza naneke eme nenasmige'na, ama nera ame hu'na kagritega huntogeno ne-egena, ke ha'ma rentaza vahera magoka kagri kavure kea hundesazegu huzmantoge'za neaze huno krente'ne.

³¹Ana hige'za sondia vahe'mo'za kema huzmantea kante ante'za, Polina avare'za kenageke Antipatris rankumate vunaku vu'naze. ³²Mase'za nantera hosifima vano hu'za ha' nehaza sondia vahera zamatrege'za avare'za vazage'za, mago'amo'za ete sondia vahe kumatega e'naze. ³³Hosifima vano nehu'za ha'ma nehaza vahe'mo'za, Sisariama e'za ana avona Gavana ne'ma eme nemi'za, Polina eme ami'naze. ³⁴Ana Gavana ne'mo avoma hamprino nentahino, anage huno antahige'ne, Kagra ina provinsifinti nere? Higeno Poli'a huno nagra Sirisia nere higeno antahiteno, ³⁵anage hu'ne, kema hugante'naza vahe'ma esage'na, keka'a antahigahue. Higeno anante Heroti kina nOMPI Polina avaretma ome anteho hu'ne.

Polina keaga hunte'naza naneke

24 ¹fu'agna evigeno ugagota prisi ne' Ananaisi'a, mono kva (elda) vahe'ene, mago aza huno kemahu nera (loya) Tetulusi nevareno, Polina Gavana ne' avufima kema hunte kea anakite'za e'naze. ²Polima kema higeno egeno'a, Tetilusi'a agafa huno Gavana ne'te ke ha' Polina renteno anage hu'ne,

Tagra knare'za huta kagrama kavama krirantanketa tarimpa fru huta nemanita, hanki ama kumapima kahefa'zama efare'neana kagrama antahinka kenka retro'ma hanazante efare'ne. ³Feliksiga knare hu'nane. Mika kazigane, mika zama hanazankura tagra kageta antahita nehuta tusi'a muse hunegantone. ⁴Hu'neanagi kagrira mago'ene knaka'a kaze'origahuankina anage hu'na negasmue, muse hugantonanki osia kema hanuana kagrama nehana kante antenka ketia antahiramio. ⁵Tagrama keta eri fore hunana ama'na nera hazanke nere, rama'a vahe zamazeri agrarega anteno, maka kokantega Jiu vahera keha renezmanteno, Nazarenie nehaza mono naga'mokizmi kva mani'ne. ⁶⁻⁷Anama hu'nenno'a, agra ra mono nontia eri haviza nehigeta azeri none. ⁸Kagrama antahingenka kesunka maka'zanku'ma huma nentonazana kagraka'a antahigahane. ⁹Jiu vahe'mo'zanena Tetilusi kere hagerafi'za, ama'na kema nehiana tamage hu'za hunte'naze.

Naneke hunentageno kenona'a Poli'a Feliksi asami'ne

¹⁰Gavana ne'mo Poli ke hinogu revumi humigeno, Poli'a anage hu'ne, Na'ankure nagra antahi'noe, kagra ama mopafina kema refakohu zantera rama'a kafufi mani'nanku, nagra korera osu'na nazama hania

kea hugahue. ¹¹Kagra ka'a ana kea eriamu hunka antahi ankeregahane, 12fu'a kna'nazana agatereno eovu'nege'na Jerusale mono hu'naku mareri'noe. ¹²Zamagrama nagazana, nagra mago vahe'enena fra ovazi'na, ra mono nonpintira keaga hu'na, rama'a vahe kevua zamazeri savari hu'na nagrarega zamare'ozmante'na, osi mono nonpintiro rankumapinti'enena zamavre nagrarega ontoge'za onke'naze. ¹³Hankinka zamagrama kema hunante'nakuma nehaza ke agafa'a kagriteri eri forera osugahaze. ¹⁴Hu'neanagi nagra huama hu'na tamagama kasamisua, tagigomomo Anumzante monora hunte'noe, Jisasi'ma hu'nea Kama, (sektie hu'zama nehazare) maka Mosesi Kasegemo'ma hu'neazante namentinti nehu'na, kasnampa vahe'mo'zama kre'naza kante avaririnoe. ¹⁵Nagra Anumzamofonte namentinti hu'noe, zamagrama zamentinti hu'naza kna hu'noankino, fatgo vahe'ene, havi vahe'mo'za frite'za otigahaze hu'na namentinti nehue. ¹⁶Ama'na ke agafare, nagra maragu'zatina Anumzamomo avure'ene, vahe'mokizmi zamurera mani fatgo nehue. ¹⁷Mago'a zagegafu evutege'na, zamunte omane vahe'nia, museza (gift) nezami'na, Anumzamofonte ofa antenaku Jerusalea vu'noe. ¹⁸Anama nehuge'za ra mono nompni nage'za eri fore nehu'za, nazeri agruma Anumzamofonte hu'noa zankura, vahe kevumo'zo mago'a rankea huonante'naze. ¹⁹Hu'neanagi mago'a Esia provinsifinti Jiu vahera, amare menina kagri kavure mani'ne'za, nagrima hunante keaga me'neresina hunantasine. ²⁰Anama osanu'za ama vahe'mo'za, nankna hazenke hu'nofi agafa'a hugahaze. Kanisol vahe zamure'ma oti'nenana hu'noa kea hufore hugahaze. ²¹Hagi mago'zana kea ranke hu'na kanisol vahe zamure'ma oti'nenana hu'noe. Menina keagama hunenantazana fripinti otigahaze hu'na huazante hunenantaze.

²²Anante Feliksi'a Jisasima amage'ma antekana ko antahi'neankino, kema antahi kna eriza'za nehuno anage hu'ne, Lisiasi'ma ugagota sondia kva ne'ma eramisige'na keka'a antahigahue huteno, ²³100ti'a sondia vahete kva (sensulien) ne'ku Polina kava karinto hu'ne. Hianagi atregeno fru huno nemanina naga'amo'zama nazano upama haniazama eme aminaku hanigeta, i'o huozmanteho hu'ne.

Polia kazigazi huno mago'ene Feliksi ene kea hu'ne

²⁴Mago'agna evigeno, Feliksi ene nenaro Drusilake e'na'e, ana ara Jiu a're. Feliksi'a huzmantege'za Polina ome kehazageno eno, Jisas Kraisinte'ma amentinti hu'nea kea eme zanasmi'ne. ²⁵Polima fatgo zanku'ene, avufama kava krino manizanku'ene keagare'ma vahe'ma refako'ma hania zanku'ma kema nehigeno'a, Feliksi'a tusi koro nehuno anage hu'ne, Menina vu'nege'na henka kankamuma mesige'na ke hanugenka ete eno huno asami'ne. ²⁶Anama nehuno'a agesama antahi'ana Poli'a zago namigahie nehuno, ama ana agafare mago'agna Polina ke

higeno etere huno agranena keaga hu'ne. ²⁷Tare zgegafu agateregeno'a, Pesius Festusi'a, Gavana eri'zana Feliksi no erino eri'ne, na'ankure Feliksi'a Jiu vahe zamazeri muse hu'naku Polina atregeno kina nOMPI mani'ne.

Poli'a keaga'a erino Sisante vu'nea naneke

25 ¹Festusi'a Gavana erizante Saesaria tagufa kna enemanino, Saesariatira atreno Jerusale vu'ne. ²Higeno ugagota mono kva vahe'ene Jiu vahepinti zamagi me'nea vahe'mo'za, Polina havige hu'za keaga eme agrite hunte'naze. ³Polima kema hunte'suna keaga antahi ramigahano hu'za antahige'naze. Festusiga huizo hunka atregeno Poli'a Jerusalemia vino hu'za hampo'na ke hunte'naze. Na'ankure avare'za nevnage'za kantega ome ahe fri'naku keaga tro hunte'neza hu'naze. ⁴Hianagi Festusi'a kenona huno, Polina ko azeri'za kina hunte'za azerintageno Saesaria mani'neankina, nagra upa knafi atreno Saesaria vugahie, hu'ne. ⁵Nehuno anage hu'ne, Zamatrenke'za kva vahe' kamo'za nagrane urami'za, ama ana nepima mago'a havizama hu'nesniazama me'nesige'za kesu'za, zamagra keaga agrira hunteho.

⁶Festusi'a zamagranema 8ti'o 10ni'a kna agateoreno, osi'a knama maniteno'a Saeseria uramino, hagi mago knarera keaga refakohu trate unemanino, Polina avareta eho huno huzmante'ne. ⁷Poli'ma ehanatige'za, Jerusaleti e'naza Jiu vahe'mo'za, azeri amunOMPI ante'za otigagine'za, rama'a hampo'nantake kea huntaza kemofona agafa omane tfa hu'ne. ⁸Agri'ama azama hania nanekea Poli'a anage hu'ne, Nagra Jiu vahe Tra Kea eri haviza osu'noe, ra mono nona eri haviza osuge, Sisana havizana huontetfa hu'noe. ⁹Hianagi Festusi'a Jiu vahe'mo'za musema hunesaza kazigati Poli antahigeno, kagra knare Jerusalemia mareri'nanke'na naneke ka'a ome antahigahufi? ¹⁰Higeno Poli'a kenona'arera anage hu'ne, Nagri'ma keagama hunantekure hazare, Sisa'ma keagama refako nehia tra'are menina oti'noe. Nagra Jiu vahera havizana huozmantetfa hu'noe. Ama tamageginka kagra ko antahi ankere'nane. ¹¹Hagi nagrama haviza hunesuge'za frigahane hu'za zamagra hanazana, fri'zankura korera ofregahue. Hu'neanagi zamagrama mago kema hunantesaza kemo'ma tamage agafa'ama omanenesiana, mago nemo'a amuha osu'neankino zamagri zamazampina navare onteguhie. Nagra ama keaga Sisante retufentoankino agra refako hugahie, ¹²higeno Festusi'a kanisol vahe'enema atru huno keagama huteno'a, ke'nona hunteno, hago nasaminka Sisante retufentoe hanankinka Sisante vugahane huno asami'ne.

Festusi'a antahintahi aminogu Agripa antahige'ne

¹³Mago'agna evutegeni kuni nera Agripake nesaro Benaisikea, Festasi antahimi'ne nantu antenteke Saeseria urami'na'e. ¹⁴Anantega

mago'a za'za kna umani'nakeno, Poli agenkea Festusi'a antahintahi'a erinaku Agripiana anage huno asmi'ne, Feliksi'a mago nera kina nomp ante'ne. ¹⁵Jeruselemi mani'noge'za, mono'nonte ugagota kva (hae pris) vahe'ene, Jiu ranra (eldas) vahe'mo'za, agri agenkea nenasmi'za hugeta hae frimaneno hu'za nantahige'naze. ¹⁶Nagra kenona zamire anage hu'noe, Romu vahe'mofo avu'ava'mo'a, keagama mago vahe'ma hunteku'ma hanimo'a, agri'ma keagama hunteku'ma hanamokizmi zamure otino, agri'ma hunesaza kemofona azahu nanekea hutesige'za henka avaremigahaze. ¹⁷Hu'neanki'na amare'ma atruma hazage'na, ama ana kea huretufe onte'noe. Hagi anante knazupa keagama refakohu trate unemani'na, avaretma egahaze hu'noe. ¹⁸Keaga hunteku'ma haza vahe'mo'za oti'za zamagrama keaga hunte'nazana, havizama hu'nesia zante keaga hunte'gahaze hu'na nagesama antahinoa kantera huonte'naze. ¹⁹Hagi zamagrazmi mono'mofo zanku'ene mago nera Jisasi'e hu'za nehaza ne'ma fri'nea zanku'ma, Poli'ma huno mani'ne hu'nea zanku agenoka humare'za agripi atre'naze. ²⁰Agri'ma hunentaza kemofo agafa'a, nagra ke'na erifore osua kazigati Jeruselemi eteno vanige'za amanahu keagama hunte'naza kea ome erifatgo husanifi hu'na knarerema hanigu antahige'noe. ²¹Hianagi Poli'ma huno ete nazeri antenkena kina nomp mani'nesugeno, Sisa'a na'ane keaga hunantegahifi antahineno hige'na, nagra hanavege huzmantoanki'za, agrira kava krinte'nesagena, inanknarero eri fatgoma hutesu'na, Sisantera (Empira) hunesugeno vugahie. ²²Nehigeno anante Agripa'a anage huno Festasina asami'ne, naganena ana ne'mofo kea nagra'ni'a nagesafinti antahinaku nehue, higeno Festusi'a okine huno Agripiana asami'ne.

Kini Agripiane Benasikizani zanavuga keagare Poli'a oti'nea naneke

²³Hianagi anante knarera, Agripake Benasikea mizama'amo marerisa kukena huteke, ana vahe'zgama atruma hu'naza tusi'a nomp ha' kaziga keagare'ma ugagote'naza kva vahe'ene (commanding officers), rankumapi ranra kva vahe'ene ufrageno Festusi'a ke huzmantege'za Polina avare'za e'naze. ²⁴Efrageno Festusi'a anage hu'ne, Kini ne' Agripagane miko tagrane mani'naza vahe'motma ama nera keho, maka Jiu vahe krerafamo'za keaga hunte'niku nagrite eri'za Jeruselemine amafinema eri'za e'nazana kezati'za, Polina hae frisnageno mago'enena amafina omanigahie hu'naze. ²⁵Hu'neanagi nagrama hakena erifore'ma huana, agri'ma ahe friga agafa omanetfa hu'ne. Hagi agrama ana kumate'ma ugagote'nea ne' Sisante'ma keaga'ama mago'ene retufentoe hu'negu, nagra Polina avaretrenaku nagesa antahi'noane. ²⁶Hu'neanagi agri nanekema, nagrama kre'na rani'a (lord) amiga keaga nagripina omanetfaza hu'negu tmagrite'ene amu Kini ne' Agripaga tamagra ma haketma keso'e hutesage'na, nagra avona kresue hu'na Polina avare'na tamagritera neoe. ²⁷Na'ankure nagrama nagesama

nentahuana mago kina ne'ma keaga huntaza kemo'ma, knare agafa omnesire'ma huntezamo'a knarera osugahie.

Poli agra'a agu'vazisia ke kini ne' Agripa asami'nea naneke

26 ¹Agripa'a, Polinku huno knarere hugantoanki naneke ka'a huama hugahane higeno, Poli'a azana ometre emetre nehuno ahoke'ma ahekeaga agafa huno hu'ne.

²Jiu vahe'mo'za nagri'ma ha'ma renante'za navare'za tratema neazana ana mika zamofa agafa'a amananki Kini ne' Agripaga antahi'ankero, nagra tusi'a muse hu'na kagri kavurera oti'na, Jiu vahe'mo'zama hunante'naza kemofa nona'a huzmantegahue. ³Hanki Jiu vahe'mokizmi zamuzma'ene, Jiu vahe'mo'zama keframa nehaza zana, kagra ko kenka antahinka hu'nananki, kema hanua keaga akohenka mani'nenka rezaganenka antahio.

⁴Nagra inankna navu'navate osi'niaretira mani'na nehaza nera asete'na, esetetira vahe'niafine Jerusalemima mani'na e'noana, mika Jiu vahe krerafamo'za ko antahi'za ke'za hu'naze. ⁵Zamagra antahi'naze, na'ankure korapa nagrira nage'za antahi'naze. Zamagra huama hu'naku zamagesa nentahisu'za, tagri mono'mofa kasegemo'ma, o'ema huno hu'nea kante ante'na avariri fatgo hu'na nagra Farisi nere hu'na mani'noane. ⁶Hige'na menina ama keagarera eme oti'noe, na'ankure Anumzamo'ma tagehe'ima huvempama huzmante'nea kere namentinti hu'na, mani'noe. ⁷Tagri 12fu'a naga'nofiku huvempa huno erigahaze hu'nea kere zamua kete'za mani'ne'za, zagene haninena hanaveti'za monora hunentaze. E'i anazante'ma navuma ketena namentintima hu'noa zanteku, Juda vahe'mo'za nagrira hafra hunenantaze. Mareri'namoke! (king) ⁸Na'a higetma ama vahe'motma Anumzamo'ma fri vahera zamazeri oti'zankura tamentinti nosaze?

⁹Nagrama nagesama antahi'noana tamageza nehue nehu'na hanaveti'na, Nazareti Jisasi agi'a eri haviza hu'noe. ¹⁰Jerusalemi kumapina amanahu'zana hu'noe. Rama'a Anumzante mani'naza vahetamina, Jiu mono nompima ugagote'naza prisi vahe'mo'zanena hugnare hazage'na zamare'na kina huzamante'na, zamahe frinaku'ma haza vahetera naganena nazante'na izo huge'za zamahe'naze. ¹¹Hanki hakare zupa maka osi mono nOMPI mareri'na Anumzama huhaviza huntaho hu'na zamahe'noe. Na'ankure nagra tusi'za hu'na narimpa hezmante'noe. Ru moparegane me'nea ra kumapina ufre'na zamahe'noe.

Poli'a agu'a rukrehe hu'nea naneke

(Apo 9:3-19, 22:6-16)

¹²Anama nehuge'za, mono'nonte ugagota kva vahe'mo'za hugnare hu'za hanave nenami'za hunantage'na Damaskasi nevu'na, ¹³zagemo'a

anuntu age12 kiloki higeno, mareri'namokagi (king) monafinkatira msa a'mo'a zagea agatere'nea tv'i'mo nevugeno, nagrane magokama vu'nona nagate enena remsa mika hugagi'ne. ¹⁴Ana higeta ana mika'mota traka huta mopafima nemsonkeno, mago kezamo'a Aramu (Hibru) kefinti antahugeno anage hu'ne, Sol, Sol, na'a higenka Nagrira nenahane? Nagri'ma nenahanana, kagra ka'a agonazante tarunehane. ¹⁵Hige'na azage Ramoka? hugeno Ramo'a huno, nenahamo'na Nagra Jisasi'ne. ¹⁶Hianagi otio, na'ankure ama'na agafare, Nagra kavurera efore hue, korapa ama kagrira eri'za ne' kazeri otisugenka, amama kana zane, Nagri'ma naganane, Nagrama kaveri hanuazana huama hugahane hu'na huganteno hu'ne. ¹⁷Nagra Jiu vahe ka'afinti'ene megia' vahepintira kza hu'na kava hunegante'na, Nagra hugantesugenka zamagrite vunka, ¹⁸zamurga erihari hananke'za hani'zampintira atre'za msare egahaze. Hagi Sata hanavefintira Anumzamofa hanavere esageno, kumi'zamia atrezamantesnige'za, Nagrite zamentinti hazage'na, kumi'zmi eri fanane hu'noa naga'enena erigahaze huno hu'ne.

Poli'a eri'zama'amofonku hu'nea naneke

¹⁹Ana hu'negu, Kini Agripaga, monafinkati'ma ege'na ava'nagnazama ke'noazama amage'ma onte'zamo'a amuho hunantegahie. ²⁰Hu'neanagi pusantera Damaskasi vahe zamasmite'na, Jerusalemine maka Judia vahe'enena zamasmite'na megia' vahe'enena anazanke hu'na zamasmia'na, tmagu'a rukarehe hutma Anumzante nevinkeno, tamu'tmama hanaza zamo'a, hago tamagua rukarehe hu'naze hino. ²¹E'ina kegafare mago'a Jiu vahe'mo'za ra mono nompintira navuzuhu fegi'atre'za, nahe fri'nakura nehaze. ²²Anumzamo'a nagrira naza hiazana keme e'na ama knarera oe. Hagi ama oti'na mika vahera osi'mofonteti vuno ramofonte'ma vu'neana, nagra huama hu'na nezmasmue. Mago'a kea nosuanagi, Mosese'ene, kasnampa vahe'mo'zama hu'za, e'inahu'zana fore hugahie hu'naza'zamo fore nehie. ²³Kema hu'za Kraisi'a ataza erino friteno pusante fri'pintira otino, Jiu vahete'ene megia' vahetera tavi'a eri ama hugahie hu'naze.

²⁴Polima agra'ama agu'mavazisia zamofa keagama nehiana, Festusi'a ranke huno Poliga hago ifo nehano! Ra'ma'a zama rempi hu'nana zamo kagrira kazeri savari'nehie! ²⁵Higeno Poli'a huno, Nagrira antahintahinimo'a havizana osu'ne, Festasiga so'e ne' mani'nane. Hianagi nagrama nehua nanekea tamage hu'na fatgo antahintahizanteti nehue. ²⁶Amana kema nehuana Kini ne'mo'a antahino keno hu'negu nagra agritera hu'ama hu'na nehue. Ama anazanku'ma nehuana kinimofa avurera fra'okine. ²⁷Kini ne' Agripaga kasnampa vahe kegu kamentinti'a nehampi? Nagra antahi'noe, kagra kamentinti nehane. ²⁸Higeno Kini Agripa'a Polinku anage hu'ne, Kagrama kagesa antahinana ama atupa knafina nazeri rukarehe hanankena, nagra mono ne' manigahufi?

²⁹Anage higeno Poli'a kenona'a huno, atupa knafino, za'za knafino nagra Anumzantega nunamu nehue, kagrikukera nosuanki ama menima mani'ne'za nagrama huanke'ma nentahiza vahe'mo'za, nagrikna hihogu nehuankino, ama'na seni nofinura kina reozmante'saze. ³⁰Anage hige'za, Kini neki, Gavana neki Benesiki, zamagranema mani'naza vahe'amoza oti'naze. ³¹Oti'za ana noma atre'za fegi'a nevu'za, ke huganti hugama hu'za anage hu'naze. Ama'na nera mago knare ke agafa omaneneankita ahe frige' kina huntege osu'tfa hugahune, hu'za hu'naze. ³²Agripa'a, Festusi asmi'no, Sisante'ma vugahue osiasina, ama nera katufe atosine.

Poli'a ventefi marerino Romu kumatega vu'nea naneke

27 ¹Italima tina takaheta vugahaze hutageta, mago ruotage hu'za empra 100ti'a sondia vahete kva nehia ne' (sensulien) Juliasi kegva hinogu, Poline, ruga'a kina vahera, avaremi'naze. ²Atramutiti Esia kaziga rama'a vente manitere nehia kumate manitere huno, vunaku nehia ventefi marerita hagerimpi vu'none. Aristakusi'a Tesalonika ra kumapinti nera, Masedoniatikino tagrane vu'ne. ³Maseno ko'ati zupa Saidon uhanati'none. Juliasi'a knarere huno Polina huntegeno, amane vunka knampa ka'a ome nezmagenka, kzama hu'zana zamagripinti erigahane huno huntegeno vu'ne. ⁴Hagi Saidonia atreta Siprusi ti amu'nompi me'nea kuma asogita vu'none. Na'ankure zaho'mo'a tusiza huno himamutino hagerina erivnapene. ⁵Silisiane Pamfilia hagerina arugitagita vunazamota, Maira rankumate Lisia provinsifi umani'none. ⁶Anante sondia kva ne'mo'a Aleksandriati ventemo, Itali vunaku nehia vente keteno, anampi tavare antegeta vu'none. ⁷Akoheta rama'a kna ana'ana huta vu'none. Tusi knazampi Sindasia ehanati'none, na'ankure zaho'mo'a tusi himamu reno kana renkaniregeta mago'anena ovuta, Kriti ti amunompi me'nea mopa asogita Salmoni vu'none. ⁸Agatereta tusi amuho huta Lasia kuma tavaonte, Fea Haveni e'none.

Hagerimpi zaho ko'atu'nea naneke

⁹Rama'a knamo'a tagateretegno, hagerimpi vuna kamo'a menina hazenke atie, na'ankure Jiu vahe'mo'za kave'ma a'o hukna agateregno, hampo'na zaho ko atu knafi efrone, Poli'a antahintahi zamino, ¹⁰anage hu'ne, ama ve'nene zage, nagrama nentahuana, amama vuku'ma nehuna kamofona rama'a hazenkefi ufreta rama'a zanti atregahune, feno'zane ventegeropage, tagranena tasimura atregahune huno zamasmine. ¹¹Hianagi sondia vahete kva ne'mo'a, ventere'ma aze'neria ne' ene, ventemofo nefake ha'a nanekea nentahino, hagi Poli'ma hiankea ontahi'ne. ¹²Na'ankure zahoko'atu knafima ventemo'ma umani kumamo'a knarera osu'ne. Rama'amo'za mago'zmarimpa hu'za, knarekita vugahune hu'naze. Zamagesama antahizana Foniksi uhanatigahune

hu'za antahi'naze. Kritima ventemo'ma unemania kumamo'a rugaruga asoparega zge ufre kaziga (notwest sautwest) avugosa hunte'negeni zaho ko atu knafina anante umanigahune hu'naze.

¹³Kanti sauti kazigati agazone zaho emarerige'za, hago knare hiankita amane vugahu'ne nehu'za, timpia umaniku erinetraza zana anka avazuhu ventefi nenteza, Kriti kaziga vu'za mopa tva'onte vu'naze. ¹⁴Hianagi tusa' not isti'e hu'za nehaza zahokomo avunenteno Kriti kazigati tusa himamutino e'ne. ¹⁵Zaho komo'a vente'a eme amasagino azeri rava higeno, ventemo'a azeri agatere'zana osigeta tagrati atronkeno zaho komo taretufeno vu'ne. ¹⁶Kautie nehaza ti amunompi mopa asogita tagareta nevuta, tusa amuhu hunerantegeta tazama husia onensa ventea avazu huno ne-ea ventea erinteanaga atre'none. ¹⁷Osi ventema erianaga atrete'za, nofi eri'za ra ventere azerisigu kitragote'naze. Vene'ne zgamoz'a ventemo Sitisitinkenare ome hae'zankura tusa kore nehu'za zamazeri knama hanige'za ti avozare'ma akohe'za vanagu, kna'age'zama rente'naza nofira eritrete'za atrageno zaho'mo zamatufeno vu'ne. ¹⁸Maseno ko'atige'za mago'a fenona ventefintira eri atre'naze, na'ankure zaho komo'a tusa hampomatino ahegantugama huno azeri nakari'za hige'za ana hu'naze. ¹⁹Nampa 3knazupa ventemofu eri'za zantamina mago'a asga hu'za mate'vu atre'naze. ²⁰Tagra zagene hanafi'enema mika knafima hanatigetata onkonkeno zahoko'mo'ma knare osigeno'a, knare hugahune huta tagesama antahi'nona zamo'a amane zankna hu'ne.

²¹Za'za kna ne'zana one'za manizageno, Poli'a amunozamifi otino anage hu'ne, ama vene'nemotma nagrama huanke amage antetma Krititima atretma omazasina amanahu hazenkene tuzampaza zantamima atraza zana otrasine. ²²Hanki menima tamasmisua korera osiho, na'ankure amama mani'naza amunompintira mago'moka fanane osugahananki ventemoke fanane hugahie. ²³Na'ankure meni keragera nagrama Agri vahe mani'nena erizama'a erinentoa Anumzamofu ankeromo'a navuga eme otino, ²⁴anage hu'ne, Poliga antahio korera osunka amane Sisa avurera ome otio, kagranema ana mika ventefima neza nagara Anumzamofu asunku huramanteno tamaza hugahie hu'ne. ²⁵E'inage hu'negu ama vene'nezga korera osiho, na'ankure nagra Anumzamofonku namentinti nehuankino nasami'nea kante fatgo huno taza hugahie. ²⁶Hu'neanagi mago ti amunompi mopare atresunkeno zaho'mo ventea atufeno have ome amitenorukaha hanie.

²⁷14ni'a kenage'mofu agu'afima zaho'moma tatufeno Adriatikihageri amunompima nevigeno'a, kerage amunompina ventefi eri'za vahe'moz'a hago mopare neone hu'za zamagesa antahi'naze. ²⁸Nehu'za nofi tu'mitare knaza eri renente'za, eri hagerimpi re'za kazana, 40ti'a mita fenkagame urami'ne. Osi'a ogantu'a vuza mago'ane ana nofira erire'za kazana, 30ti'a mita timofu zaza a'mo'a urami'nege'za ke'naze. ²⁹Have haegahune hu'za

tusi zamagogogu nehu'za, ventema umaniku'ma nehige'za erinetrazaza anka 4'a asgahu netre'za, ko'ma atusigu nunamu hu'naze. ³⁰Anante ventefi eri'za vahe'mo'za ventefinti atre'za fre'naku nehu'za, havige hu'za nofite kna'nentak'e'za eri netraze nehazage'za osi voti hagerimpi eri atre'naze. ³¹Poli'a sondia vahete kva ne'ene ruga'a sondia vahera zamasamino, Ama'na vene'ne zgama ventefima omani'snazana tamagra frigahaze hu'ne. ³²Hige'za sondia vahe'mo'za ana dinkire'ma kinte'naza nofira traga hutragenno hagerimpi mareno vu'ne.

³³Ko'atumasa huku higeno, Poli'a mika vaheku ne'za neho huno nezmasmino anage hu'ne, 14ni'a kna'mofo agu'afina naza fore hugahieha hutma ne'zama onetma mago'zama osutma e'naze. ³⁴E'inama hu'nagu mago'a ne'zana neho hu'na neramasmue na'ankure, tamagri'ma tamazeri hampo'na hanigetma manisnagu nehue. Na'ankure magore hunka osi hazenkea mago'moka e'oritfa hugahane. ³⁵Anagemata huteno'a, ana mika vahe'zamufi breti erino Anumzantega nunamu hunteno, korino agafa huno ne'ne. ³⁶Ana huno hakare vahera zamazeri hampo'na huke hige'za zamesite ne'zana eri'naze. ³⁷Ana miko vahe'ma vente agu'afima mani'nonana, 276'a vahe mani'none. ³⁸Anahu'za zamesiama'a nezamu nehu'za, ventemo'ma oza hanigu witi'a eri'za hagerimpi matevu atrenaze.

Ventea zaho komo eri tagana vazineane naneke

³⁹Ko'ma atige'za, mago mopa ke'nazanagi ana mopa antahi'za ke'za osu'naze, hianagi timo eri mago huno ufreno knare kahepa ruherafi'nege'za kete'za, knare hanuno'a zahomo vente'a atufeno anante vugahie hu'za antahi'naze. ⁴⁰Hige'za vente'ma azerino nemanina nofira tgahu'za eri timpi netre'za, ventema azeri ante fatgo higeno nevia apa knonte'ma ki'naza nofira vakane'naze. Anante avugama me'nea selia eri zaho kantega netre'za, hageri ankena kefatago hu'za vu'naze. ⁴¹Ventemo'a have ome amasgino anampi vuno'eno osu'are agi'mo'a runtanigeno, ruga ragati hagerimo'a avunema anteno riga'a rutamana hutre'ne. ⁴²E'i sondia vahe'mo'za kina vahe zamahe frinaku ke retro hu'naze. Hanki mago'mo'a zanagora aruno tatareno ofregahie hu'za hu'naze. ⁴³Hu'nazanagi, sondia vahete kva ne'mo'a' Poli'na avare so'e huno aza huno vuku agha nentahino, sondia vahe'mo'za kina vahera ozmahesaze nehuno, azagama zanago ruga hu'nesamoka ventefintira takaurenka pusante tinkenare vugahaze huno hige'za, ⁴⁴mago'amota, zafa atupare azeritma nevusageno, ventemofa atupare aze'nerita vugahaze, hige'za ana'ma hazana knare hu'za mopare vu'naze.

Malta ti amunompi me'nea mopafi Poli mani'nea naneke

28 ¹Knare huta mopare'ma unehanatita konana Maltae nehaza ti amunompi mopa ke'none. ²Anampima nemaniza vahe'mo'za

knare so'e zamuzma hu'za tavarente'naze. Tusi'a teve hegare'za tazeri so'e hu'naze na'ankure, tusi ko'aruno zasi hige'za ana hu'naze.

³Poli'ma teve zogino erino eme tevefima negregeno, tevemo'a amuho higeno ana tevefinti mago ha' osifa'vemo hanatino Poli azante haninkofigeno, arisonamo'a kizu'vazu hu'ne. ⁴Kuma agafa vahe'mo'za kazageno osifa'vemo Poli azante haninkofi nege'za, zamagra'a anage hugantugma hu'za, ama'na nera vahe zamahe nefria nepigure, hankino hagerimpi frigara knare huno freno e'neanagi, tagri a' anumzamo refako husiana atre'sigeno Poli'a omanigahie. ⁵Hianagi Poli'a ana ha' osifavea tevefi rutafri atregeno ata hoza omi'ne. ⁶Zamagra'ma antahi'zana, avufamo'a zorege mopafi traka huno frigahie hu'za nentahi'za, za'za kna kete'za mani'zana, mago'zana agritera fore osige'za, antahizazmia rukarehe hu'za ama'na nera anumzampigure hu'za hu'naze.

⁷Ana kumate'ma me'nea mopagerfa, ana ti amunompi mopare ugagota hu'nea ne' Pabliasi'e nehaza ne'mofona, agupo mopa'a me'nea ne'mo, muse nehuno tavareno noma'are vuno, 3'a kna'mofo agu'afina tazeri so'e hurante'ne. ⁸Anama hifina Pabliasi nefana amuho ave'nesino korarifa renagigeno vase'nege'za ome ke'naze. Poli'a omegeno nunamu hunteteno, avufare azana agofetu antegeno, kri'a amane hunte'ne. ⁹Anazama fore hige'za, maka ana ti amunompi mopare'ma nemaniza kri vahera anahu'za ageno kri'zamia eri amane huzmante'ne. ¹⁰Zamagranena, tagrira husga huneranteza, vunaku'ma trotra nehunke'za, ina zanku'ma upa'ma hu'nazana ventefi eri'za ome tami'naze.

Poli'a Rom kumate uhanati'nea naneke

¹¹3'a ika maniteta, ana ti amunompi kumate'ma zaho ko'ma ati'geno ko'ma emani'nea Aleksandria ventefi vu'none. Ana vente'mofo avuga kugaveza anumzane huno tare kogna tremo'kizni zname me'ne. ¹²Vuta 3'a kna (3 dei) Sirakusi kumate ome azerita mani'none. ¹³Anantetira rugagita Rigiamu hanati'none. Masonkeno ko'atigeno zage fretegati zaho egeta anagame'a mago knarera Puteoli uhanatuna zamota, ¹⁴anampi mago'a tafuhe'ina ome zamageta erifore hunke'za, ke hazageta zamagranena mago sonda umani'none. Ananteti Romu e'none. ¹⁵Hago tagriku'ma emani'naze kema Romu mani'naza tafuhe'za nentahi'za vahe'ma e'nazana, Apiasi kante maketi kumapinti ne'ageno, 3'a no mizase'za nemasaza nonteti tagri'ma tavataginakura e'naze. Poli'ma nezmageno'a hanave e'nerino, Anumzamofu muse hunte'ne.

¹⁶Romuma ufronke'za, kagra kvesi'zante kvama hugante'nia sondia ne'ene manio hu'za Polinkura hunte'naze.

¹⁷3'a kna'mofo amefia, Poli'a kehige'za Juda kva vahera emeritru hazageno, Juda kva vaheku anage hu'ne, Nafuheta nagra mago havizana vahetia huozmante'na tafahe'i zamuzmara eri haviza osu'noanagi, nagrira

kina vahekna hu'za Jerusalemitira navare'za Romu vahe zamazampi eme natre'naze. ¹⁸Romu vahe'mo'za nagrira refko hu'za nagete'za, katufe natrenaku hu'naze. Na'ankure nahe friku'ma hunanta'zana, kegafa'n nagrripina omane'tfa hu'ne. ¹⁹Hianagi Juda vahe'mo'za ana kerera ke ha' renantage'na, rankva Sisa kenakure hu'noe. Hu'neanagi nagrama antahuana mago keaga nagra'ni'a vahera huozmantegahue hu'noe. ²⁰E'ina hu'negu nagra neramage'na tamagra ne keaga huku nehue. Na'ankure Israeli vahe'mo'za zamentinti hu'za, zamage'sama nentahiza zante ana agafare nagrira ama'na kina nofira renante'naze. ²¹Hige'za anage hu'za asami'naze, Judia kazigatira kagri nanekea avona kre'za atrageta e'ori'none. Hanki tafuhe'za anantegatira e'za naneke'a eme antege, kagri havi kavukva zamofu nanekea ontasmitfa hu'naze. ²²Hianagi menina kagripinti kema antahinaku nehune, na'ankure mika kotegati vahe'mo'za antahu'nana ama ana kevugura (sekt) huhaviza huneramantaze. ²³Agranema atru hu'za keaga husnaza knama erinte fatgoma hutage'za, rama'a vahe'mo'za nemasefinka e'za eme negageno, ana zupa Mosese kasegefinti ene kasnampa vahe'mo'zama krente'naza kefinti erino Anumzamofu mona kuma avu'avazana hu'ama huno nezmasmino, ama ana Jisasi avu'ava zante'ma zamentinti hanagu nanterana agafa huno nezmasmigeno kinaga ome ase'ne. ²⁴Poli'ma kema hia kemo'a mago'amokizmia antahintahi zmia zamare agrarega zamante'ne, mago'amo'za antahi'za zamentinti huzankura zamesra hu'naze. ²⁵Zamagra zamagra hugantigma hu'za mago zamarimpa nosu'za, atre'za nevazageno, Poli'a vagare keaga huno, Ruotge Avamu'mo tamagehe'ima keaga huzami'neana, kasnampa ne' Aisaiampi huvazino hufatgo hu'ne. ²⁶Ana vahete vutma anage hiho, ***tamage hutma kea antahi'gahazanagi, amara osu'tfaza hugahaze, tamagerafa hutma kegahazanagi, keanke oregahaze.*** ²⁷***Na'ankure ama ana vahe'mokizmi zamagu'amo'a amara huno hagro osu'nege'za kema antahi'zana, zamagesamo'a antahiso'e nosie, hagi zamavurga asuki'nege'za zamavua nonke'za zamagesaretira nontahi'za, zamagu'amo'a amara osanige'za, rukrahe hu'za omesage'na zamazeri onkanamregahue hu'ne.*** (Aisa 6:9-10)

²⁸⁻²⁹E'ina hu'negu tamagra antahi ankeresazana, Anumzamamo tahokehe'zana megia vahete atregeno e'ne hu'zama zamagra antahigahaze.^e ³⁰Poli'a, agra'ama ikante mizaseno ne'mania nompina, tare zgegafufi anampina mani'nege'za, agri'ma kekure hu'za amokizmia so'e huzmante'ne. ³¹Korera osuno Anumzamofu mona kumamofu avu'ava zana hu'ama nehuno, Ramofu Jisasi avu'ava zamofu nanekea rempi hunezamigeno mago'mo'a aze'orino i'o huonte'ne.

^e **28:29** Tuenti naenifima me'nea kea omane'ne hu'za korapa antahi'zane vahe'mo'za hu'naze. Anagama Polima huvarege'za, Juda vahe'mo'za atre'za nevazageno, zamagra zamagra oni'vrare oni'vrare nehu'za vu'zaeza hu'naze.

Poli'a Romu Vahe Avonkre Zami'nea Naneke

Poli'a musenke Romu vahe atrezmante'nea naneke

1 ¹Nagra Poli'na, Kraisi Jisasi kazokzo eri'za ne'mo'na, Anumzamo aposol eri'za erio huno huhampri'nanteno, knare musenke'a huama hanugu nazeri ruotge hunantene. ²Korapa Anumzamo huvempa kea kasnampa vahe'amokizmi zmasamige'za, Ruotge Avontafepi krente'naze. ³E'i ana Mofavre'a Deviti naga nofipinti, ne'mo ama mopafi avufga erino efore hu'ne. ⁴Hagi Ruotge Avamumo'a hihamu'ane huama huno, Anumzamofu Mofavre azeri oti'negeta, Jisas Kraisi'a Rantimo'e nehune. ⁵Jisas Kraisi azampi Anumzamo'a asunku huranteno, Agri agifi Anumzamo'a aposol eri'zama miko megia' vahetema erisunku huhampri'antene. E'ina hu'negu zmagra Agri Agifina amagera nente'za zamentintia hugahaze. ⁶Tamaganena Jisas Kraisi nagare hu'zama mani'naza nagapi mani'naze.

⁷Anumzamo'ma tmavesinteno kema higeta mika Romu kumate mni ruotge hutma mni'naza nagamotarega, Anumza Nafatimofone Rantimofu Jisasi Kraisi asunku'zamo'ene, rimpa fruzamo'a tamagra ne megahie.

Poli'a Romu vunaku antahintahi hu'nea naneke

⁸Kota'zana, Jisas Kraisi agifi, Anumza ni'amofona maka'motamagura susu huntue. Na'ankure tamagra tamentintima haza zamofu kea, mika kotega huama nehaze. ⁹Na'ankure Anumzamofoma nagra maka nagu'aretima eri'zama'a erinentena, Nemofo knare musenkema huama nehumo, tamagriku'ma nentahi'na nunamuma nehuazana, nageno antahino nehie. ¹⁰Mika zupa nunamuma hufina, Anumzamofu avesima menesigena, tamagritega esugura nunamuna huvava nehue. ¹¹Na'ankure tamagri'ma eme neramagena, Avamumofu musezama nagripi me'neazama nerami'nugeno, tamazeri hanavetisia zankura tusi'za huno navenesie. ¹²E'i ana zana, tamagri tamentinti azeri hankaveti ke neramasami'nea, nagri'enea ana zanke huta nazeri hanaveti kea

nenasamisageta tamentintifina oti hanavetita manigahune. ¹³Nafuhetane nasaraheta antahisazegu nehue. Nagra nantu eme antenermantena eri'za tamagripi enerisugeno, megi'a nagapi hu'neaza huno Avamumofu rga'a tamagripi efore hanigena kesua zankura, rama'a zupa antahintahini'a retro hu'noanagi mago'a zamo nazerigena, omena mani'nogeno menina ama knarera ehanatie. ¹⁴Eri'za eri'na, Griki vahe'ene, ko knafi vahekna vahe'ene antahintahiza me'nea vahe'ene, antahintahiza omne vahe'mokizmine, zmaza hanugu Nagrira hunantene. ¹⁵E'ina hu'negu Romu kumate mni'naza nagamotarega, Anumzamofu knare musenkema eme huama hu'na tamasamizankura tusi'za huno navenesie.

Knare musenkemofu hankve'amofu naneke

¹⁶Na'ankure Kraisi knare musenkegura nagazea nosue. Na'ankure e'i Anumzamofu hanave'a anampina me'neankino, iza'zo zamentintima hanamokizmia zmahonekeno, Jiu vahe esera zamavreteno, anante megi'a vahera zamavregahie. ¹⁷Na'ankure ama ana knare musenkefi, Anumzamo fatgo avu'avaza hurante'nea avu'avamo'a efore hu'ne. Eri agafa huneretima vuno vagaretema uhanatisiana, amentintima hu'zamo azeri ruotagera hugahie. Avontafepi huno, ***Fatgo vahe'mo'za zamentinti zanteti zamasimura eri'za manigahaze*** hu'ne. (Hab 2:4)

Maka kumiku Anumzamo rimpa ahente'nea naneke

¹⁸Na'ankure Anumzamo'a, Agra'a monafinkatira rimpahazana eri'ama huno, Anumzamofu fatgo avu'ava nosu'za, fatgo osu zmavuzmava nehaza vahe'mozama ana zamuzmateti'ma, tamage kemofu rentrako nehaza vahera ha'rezamantegahie. ¹⁹Na'ankure Anumzamofoku'ma ke'za antahizama huzantmina amuno zmifina ama hu'ne. Na'ankure ko Anumzamo avu'avazama'a eriamana huno zmaveri hu'ne. ²⁰Hakare'zama troma higeno fore'ma hu'neregatima e'neana, Anumzamofu mevava avu'avazana ke'naze. Hianagi hakare'zama erifore huneregatima e'neana hakarezamo'a Anumzamo'ma tro hunte'nea avamente nege'za vahe'mo'za negaze. E'i ana agafare Anumzamofu oku me'nea hankave efore hige'za negazankiza, vahe'mo'za onke'none hu'za osugahaze. ²¹Hu'negu Anumzamofona ke'za antahiza hu'nezagi, zamagra Anumzane hu'za ra agi'a nomiza, humuse hunontaze. Hagi zamagri'a neginagi antahintahizamo zmazeri savri hige'na, zmagu'amo'a hanizampi neme. ²²Zamagra antahizane vahe mani'none hu'za nehazanagi, zamagra neginagi vahe fore nehaze. ²³Hagi zamagra manivava Anumzamofu ra agima amigazana, erimare'za fri'naza vahe'mofu amema'agi, nmaramimofu amema'agi, 4'a agazane zagagfamofu amema'agi, zmurugufati vano nehaza zgaramimofu amema'a tro hunte'naza zante ra agi nemize.

²⁴E'ina hu'nagu Anumzamo'a zmatrege'za, zamagra zamaguareti zamavesintaza kefo avu'avazampi unefre'za, kefoza huno havizantfa hu'nea avu'avaza zamagra zamufgare ohunte ahunte nehu'za, zamufga eri haviza hu'naze. ²⁵Anumzamofa tamage kea, havigereti eri revahe nehu'za, Anumzamo, Agra'a troma hunte'nea zgaraminte monora hunte'za amage nente'za, troma hu'nea Anumzamofa ra agia amivava hugazanagi anara nosaze. Tamage. ²⁶Ama anahu agafare Anumzamo'a zmatrege'za, vahe'mofoma agaze ami avu'avazamofa zmavesizampi nehaze. Ane'mo'za osuga zmavu'zmava hu'za zmagra zmagra havi zamavu'zmavara nehaze. ²⁷Anahukna hu'za, venene'mo'za a'nene veazana hugazanagi, netre'za, venenemo'za zmagra zmagra monkozama hu'zanku tusiza huno zamavenesige'za, zamagaze hu avu'avaza zmagra zmagra nehaze. Ana kumima hazazamofa, mizama'a zmagra'a zamata enerize.

²⁸Zamagrama Anumzamofa zmefi hunte'za agorga'ama omninazana neginagi zane hu'za nehaza zanku, Anumzamo'a atregeno havi antahintahizazmimo rentrako hige'za, osuga avu'avazana nehaze. ²⁹Zamagripina hakare havi kefo avu'ava zamo'a avitege'za, kefo zmuzma nehu'za, veva osu agraguke antahizane, vahe'mofo avesi onte'zama, antahi mugizama, vahe ahefri'zama, ke ha' huza kanive oreare huzama, krunage hu'zama, vahe'mofo fruge huonte'zama, vahe'mofo amefi ke hu'zane, ³⁰vahe'mofo avufintanke huno hu kofinte'zama, Anumzamofa antahiomizama, veganokno huzama, agra'ama erintesga hu zmavuzmava nehu'za, kasefa kefo avu'avaza eri fore nehu'za, zmarera zmafa agorga nomnize. ³¹E'inahu vahepina knare antahintahizana omanegeno, rumofoma antahimizana omanegeno, vahe'mofoma avesinteno, asunku huntezana omanene. ³²Zamagra ko Anumzamofa kasegemo'ma fatgo osu zmavu'zmavama hanaza vahe'mo'za frigahaze hu'nea kea antahinazanagi, ana kesegea amage nonte'za, ana kefo avu'avazana nehu'za, mago'ane rumokizmia hiho hu'za antahintahia zamizage'za nehaze.

Anumzamo fatgo huno refako haniazamofa naneke

2 ¹E'ina hu'negu tamagra antahisazana rumo'za haviza hu'naze hutma refko huzmante gahazanagi, tamagranena anahukna hutma havi vahe mani'nazankitma mago'a kea osugahaze. Tamagrama rumokizmigu havi vahe maninazankiza zamata erigahaze hutama huzmantesazana, tamagranena anahukna hu'nazankino, tamagri'enenana anazanke hurmantegahie. Na'ankure rumofoma refko nehamoka, kagranena ana hukna hu'nane. ²Hagi antahi'none, Anumzamo'a fatgo avu'avazanteti, iza'o anazama hania vahera refko huno knazana amigahie. ³Kagra rumozama anazama hazana refko hunezmantananki, nahigenka kagra zamagrikna hunananki, Anumzamo'ma refko huzmantesnifintira agateregahue hunka nehane? ⁴Kagra nonkano knaza

amunanagi knarezantfa huno agazone huneranteno, akoheranteno mani Anumzamo'ma kagri'enema mani'neana? E'i anazamo'a kagritera amneza me'nefi? Kagra nonkano knare'ma hunegantenoma kumipintima kagu'a rukrahema hnazegu'ma knama kaminoma ne-eazana nontahino? ⁵Hianagi krimpa'mo hankavetigenka kumimofoma kamagena humizankura kavenosie. E'i kagra'a, kefoza huno havizantfa hu'nea mizama erisana mizanka'a eri atru nehane. Na'ankure Anumzamo'a rimpahе kna ne-enkino fatgo refakozama'a erinte'ama hugahie. ⁶Anumzamo'a znavu'zamavama nehanaza avamente, magoke magokemofona mizana amitere hugahie. ⁷Iza'zo knare zamuzma huvava hu'za nevu'za, ra zmagima erisagu nehake'za, himamu hankave erisigu nehake'za, haviza osniazanku nehakesamokizmia, Anumzamo manivava zmasimura zamigahie. ⁸Hu'neanagi Agra rimpa he'zana rukaha hutresigeno, iza'zoma zamagraguke nentahiza, tamage ke'mofo amage'ante zanku zamagena hunemiza, kefo avu'ava nehanaza vahete egahie. ⁹Kefoza huno havizantfa hu'nea knazamo, kefozama huvava hu'za nevanaza vahetera egahie. Esera Jiu vahete eteno, anahukna huno megia' vahete enena egahie. ¹⁰Hu'neanagi masanentake avasesezama, ragi eri'zama, rimpa fruzana makama knare'zama nehza vahe Anumzamo'a zamigahie. Esera Jiu vahe zamiteno, anantera anahukna huno megia' vahera zamigahie. ¹¹Na'ankure Anumzamo'a magoke mofonkuke osuno, fatgo avesizanteti ana miko vahera refko nehie.

¹²Na'ankure megia' vahe'mo'za Anumzamofu kasege krenteneana ontahine'za kumira hugahazanagi, zamahe fanene hugahie. Jiu vahe'mo'za Anumzamofu kasege eri'naza vahe'mozama kumi'ma hanazana, ana kasegereti refkoa huzmanteno knazana zamigahie. ¹³Hu'negu kasegema antahike'zama nehamo'za, Anumzamofu avurera fatgo osu'naze. Hianagi kasegema amage nentaza vahe'mo'za Anumzamofu avufina fatgoa hu'naze. ¹⁴Na'ankure megia' vahe'mo'za Anumzamofu kasegema krente'neana e'orinazanagi, zamagra zamagu'afina ko havizanki knarezanki hu'za nentahiza amage nentaze. ¹⁵E'inahuma hazazamo zamagrira Anumzamofu kasegema zamagu'afi krenteneana erinteamo nehaze. Ana hu'negu zamagra zamagu'afi nentahizageno, antahintahiza'zmimo zmasamino, knare'za nehazanki haviza nehaze huno nezmasamie. ¹⁶Hagi mago kna ne-enkino Anumzamo'a Jisas Kraisimpi ana miko vahe'mofo oku'a antahintahizmia refko hugahie. Ama knare musenkemo hu'nea kante neramasamue.

Kasegemo Jiu vahe'mokizmi kegaga huzmantesia naneke

¹⁷Tamagra Jiu vahe mani'none nehutma, Anumzamofu kasegemofonte manineta, Anumzamo'ene tragoteta mni'none hutma tamagra tamavufa erisaga nehaze. ¹⁸Tamagra Agri'ma avesinea zana inazamo fatgo higeno,

havizana hune ko antahinaze. Na'ankure agri kasegema korapa rempi huramigeta antahi'naze. ¹⁹Tamagra zamavu asuhu vahe'mokizmi kama zamaveri nehuta, hanimpima mani'naza vahe'mokizmi tavi mni'none huta nehaza zankura, knare'za nehune hutma nehaze. ²⁰Tamagra tamagesama antahizana vahe'mo'zama neginagi avu'avaza nehaza vahe'mokizmi kana zamaveri nehune nehuta, mofavremokizmi Anumzamofa kana rempi hunezamune huta nehaze. Na'ankure Anumzamofa kasegefina, knare antahizane tamage'zana antahi vgare'none huta nentahize. ²¹Tamagrama vahe'mokizmi rempi hunezamita, hagi nahigeta tamagra'a rempi huta nontahize? Tamagra musufa oseho huta nezmasamize. Hianagi tamagra'a musufa nosazo? ²²Tamagra ru venenene anene monkoza osiho huta nehazanagi, tamagra'a anazana nosazo? Tamagra havi anumzante mono huonteho nehuta, mono nozmifintira kumzafa nosazo? ²³Tamagra kasegema antahinaza zankura tamufga erisaga nehaze. Hu'neanagi kasegema rutagrazana Anumzamofona ra agi eri haviza nehaze. ²⁴Na'ankure avontafepima hu'neana, ***Megi'a vahe'mozama Anumzamofa agima huhavizama nehazana, na'ankure tamagrama haza avu'ava zante anahu kea nehaze*** hu'ne. (Ais 52:5, Izik 36:20)

²⁵Na'ankure Jiu vahe'motma tavufga tgahu tamavutamava zamoma knarema hanie hanutma, kasegemofa amagama antesageno'e. Hianagi kasegema rutagrenageno'a tamavufga taga nehaza tamavutamavazamo'a amne'zankna hugahie. ²⁶Hagi megia vahe'mo'za zamavufga taga osune'za, Anumzamofa kasegema amagama'antesazana, zamufga taga osu'naza zamo'a zamufga tgahu vahekna hugahaze. ²⁷Tamage amega avufga tga osu, megia vahepinti iza'o Anumzamofa kasege amagama antesimo, Jiu vahe oku tamavufga tga hu'nesaza vahe'mota Anumzamofa kasege amage nontesaza vahe'motagu keagafi manigahaze hu'za hurmantegahaze. ²⁸Hu'negu tamagra tamage Jiu vahera omani'naze. Na'ankure Jiu vahe'mo'zama kasenermante'za oku tamavufga tgama hurmante'naza zamo'e. ²⁹Tamage Jiu vahema mni'nakuma hanuza, kasegemofa amage antegahaze. Tamage oku avufgama tga huzana agu'afi tumo'amofa Anumzamofa Avamumo erifore hugahianki, amega avufgare erifore osugahie. E'inama nehaza vahe'mo'za vahe'mofa tegatirompage, Anumzamofontegati ra zmagima erisaza zanku nehakaze.

Anumzamofa fatgo avu'avazamofa naneke

3 ¹Jiu vaherema nehazana, nankna knare'za eriforera nehaze? Hifi oku'a tavufgama tgahu tavutava zampintira na'a taza hu'zana enerune? ²Anampina rama'a tamaza hu'za me'negeta enerize! Ese zana Anumzamofa oku me'nea ke'a Jiu vaheku antahiramino eri'ama hu'ne. ³Ana hanigeno mago'amo'zama zamentintima osanageno'a, ana zamentintima osnazazamo'a, Anumzamo'ma huvempa hu'nea ke'a

rufutagigahifi? ⁴I'o, Anumzamoke fatgo hu'neanki, maka vahe'mota havige vahe mani'none. Avontafepima krente'neana ***Kema hananana vahe'mo'za tamage hu'za nehnagenka kegagare kavrentesazana zamageteregahane*** hu'ne. (Sam-Zga 51:4)

⁵Hianagi tagri fatgo osu tavu'tavazamo'ma, Anumzamofa fatgo avu'avazama eri fore'ma nehanigeta, tagra na'ane huta hugahune? Anumzamoma rimpaheranteno knazama tamisiana, e'i fatgo avu'ava hugahifi? (Vahe'mota antahintahire, ama'ina kea nehue.) ⁶I'o, Anumzamoma fatgoma osu'nesuno'a mopafi vahe'ene mikozana refko huga osu'neankino, inankna huno refko hugahie? ⁷Nagri havigemo'ma Anumzamofa fatgo avu'avazampine masa'afima eama hanigeno'a, na'ante Anumzamoma kumi vahe mani'nane huno hugahie? ⁸Hagi mago'amo'za tananke nekafricanakna hu'za kegaga zamifintira kea nehu'za, mago'ane kumira nehanunkeno knare'za efore hanie hu'za nehaze. Iza'o e'inahukna nanekema nehanimofona kna erinogu nehie.

Miko vahera kumi vaheke mani'naze hu'nea naneke

⁹Na'ane huta hugahune, tagra Jiu vahe'mota mago'a nagara zamagetereta knare hu'none hugahumpi? I'o, na'ankure tagra ko ana miko Jiu vahero, megia vahera kumimofa hankavemo refitezmantenegeta zamageta antahita hu'none. Hagi Jiu vahe'mota ru vahera zmageterenompi?

¹⁰Avontafepi krentenena, ***Magora fatgo vahera omanine. Magore huno omnitfa hu'ne.*** ¹¹***Magore huno amanahu antahizane vahera omanine. Mago'mo'e huno anumzamofonkura nohakre.*** ¹²***Miko vahe'mo'za zamagena hunemi'za, ana miko'mo'za haviza nehaze. Magore huno knare'za nehia vahera omanine. Magore huno omanitfa hu'ne.*** (Sam-Zga 14:1-3) ¹³***Zamagerumo'a neginagi huno mati kerigamo hagaro hurianakna nehie. Zamagefunafina havigemo avite'ne. Ha' osifavemofa avuatga zama'amo zamagitera me'ne.*** (Sam-Zga 5:9)

¹⁴***Zamagitera vahema sifinama huntezane, aka kegagamo avite'ne.*** (Sam-Zga 10:7) ¹⁵***Vahe'ma zamahe fri zantera ame'ama nehaze.***

¹⁶***Inantego vazana vahe'ma zamazeri haviza hu'zane vahe'mofoma knama amizamo nezmavararie.*** ¹⁷***Inankna hu'za zamarimpa frua erigahaze zamagra ontahinaze.*** (Ais 59:7-8) ¹⁸***Anumzamofonku koro hu'zana nomane.*** (Sam-Zga 36:1)

¹⁹Tagra antahi'none kasegama krente'nea kemo'a kasegema eri'naza vahe nezmasamie. Ana hanigeno mago'mo'a huno nagra ftago vahe mni'noe huno osugahie. I'o miko mopafi vahe'mota Anumzamofa avurera hazenketi me'nea vahe mni'none. ²⁰Na'ankure kasegemo'ma hu'neazama avarari zampintira, Anumzamofa avufina mago vahe'mo'a fatgo vahe mani'noe huno osugahie. Na'ankure kasegemo, kumimofa keno antahino huzana erifore nehie.

Tamentintimo hanigeta fatgo vahe manisuna naneke

²¹Hu'neanagi menina Anumzamofa fatgozana, kasege amage'ante zantetirompage, kasefa ka taveri hu'ne. Korapama Mosesema krente'nea avompima huvempa nehigeno, kasnampa vahe'mo'za hu'naza kante efore nehie. ²²Tagrama fatgo huta Anumzamofonte manisuna hanuta, Jisas Kraisinte tamentintia hanunkeno, Anumzamo'a fatgo vahe mni'naze huno hurantegahie. Mago kana omnetfa hu'ne. I'o. ²³Na'ankure maka'mota kumi huta Anumzamofa hanave'ane kumapina umanigara osuta, atupa hu'nonane. ²⁴Anumzamo'a knare erizama asuragiranteno Kraisimpi eri'nea zanteti, tamagra fatgo vahe mani'naze hu'ne. Agra e'i anazana Kraisimpi miza seranteno katufegeta, kumipintira fru huta mani'none. ²⁵Anumzamo'a, Jisasina tamigeno kumitimofa nona huno korama'a tagino, kumitia apaserante'nea zamo'a Anumzamo'a agru huno fatgo huneankita, Agritema tamentinti hanuta Anumzamofontera egahune. Anumzamo'ma e'inhahu hu'neazamo, Anumzamo'a fatgo hu'ne nehie. Ko'ma kumi hu'naza vahe'ma akoheno mni'nenokumizmia atrezmante'nea zamo'a eama hu'ne. E'ina zamo'enena eriamahuno Jisasimpima zamentintima haza vahe'ma nezmavrea zamo'a taveri huno Anumzamo'a fatgo hu'ne nehie. ²⁶Na'ankure e'i anazama hiazanteti, Agra'a fatgozana meni knafina eriamahune. Hanigeno kumi vahe'mo'za fatgo vahe mni'naze haniana, e'i Jisasi Kraisimpima zamentinti hanaza vaheku Anumzamo'a fatgo vahere huno huzmantegahie.

²⁷Tagra naza hunonkeno Anumzamo'a tavrenegu tavufga erisaga hugahune? Kasegema amage'ma ante avu'avazamopi? Knare erizama e'nerunazamo'o? I'o. Tamentintima hu'zamo tavufama erisaga hu'zana agaterene. ²⁸Tagri'ma tazeri knarema higeta Anumzamofa avure'ma fatgo hunonana kasegema amage'ante zampitiro'ompge tamentintima hunkeno tazeri fatgo hu'ne. ²⁹Agra, Jiu vahe'mokizimi Anumzanke mani'nefi? Agra megia vahe'mokizimi Anumzanke maninefi? I'o, Agra ana mikomota Anumza mani'ne. ³⁰Zamufga taga hu'naza vahe'ene, zamufa taga osu vahe'mofona, Magoke Anumzanke mani'neankino, zamentintima haza vaheku fatgo vahe mani'naze nehie. ³¹Hagi tagra tamentintiguke nehuta, kasegegura amnezane hugahumpi? I'o, tagrama tamentintima hanuta kasegemofona tamage huta avariri fatgo hugahune.

Abrahamu amentinti higeno Anumzamo'a fatgo nere huno hu'nea naneke

4 ¹Abrahamu'a tagrikna vahe mni'nenok, neregeho mni'neaki, na'ane huta hugahune? ²Hagi agri eri'zamoma hanigeno fatgo hu'noe huno Abrahamu'a avufga erinte mrerigahie. Hu'neanagi Anumzamofa avurera knarera osugahie. ³Na'ankure avontafemo'a anage huno hu'ne,

Abrahamu'a Anumzamofonte amentinti higeno, Anumzamo'a fatgo nere huno Abrahamunkura hu'ne. (Jen-Agf 15:6) ⁴Vahe'mo'za eri'zama enerizana muse'za zmisazegu e'norezanki, miza erinaku enerize ⁵Hu'neanagi vahe'mo'za eri'za eri'zazantera Anumzamo'a fatgo vahere huno hunozamante, hu'neanagi Anumzamo'a kefozanti eritrene hu'za zamentintima hazageno, fatgo vahere huno hunezmante. ⁶Deviti'a anahukna huno ama anazanku nanekema hu'neana, Anumzamo'ma kumi vahekuma fatgo vahere huno hu'nea asomu kema hu'nea nanekefina huno, ***7Anumzamo'ma magomofu hazenke zama'ane, kumi'ama atrentesimo'a muse hiho.*** ⁸***Kumi hu'nesia zankuma ramoma kumi hu'ne huno osaniazankura muse hino.*** (Sam-Zga 32:1-2)

⁹Ama ana asomura Jiu vahe'mofo zanke me'nefi, oku zamavufga taga osu megia vahe'mokizimi zanene? Tagra Abrahamunkura, Anumzamo'a fatgo nere huno hu'ne huta nehune. Na'ankure agra amentinti hu'negenoe. ¹⁰Hu'neanagi inankna higeno anazana efore hu'ne? Agra oku avufga tga hutegeno fatgo nere huno hu'nefi, oku avufga tga osu'negenoe? Ana hu'neankita hufra okigosune. Abrahamu'a oku avufga tga osu'negenoe Anumzamo'a avarene. ¹¹Oku avufgama tga hu'zana amentinti huzamofu avame zankino, ko Abrahamu'a amentinti higeno Anumzamo'a avregeno, fatgo nere huno huntene. Oku avufgama tga osunere anagea huntene. E'ina hu'negu oku zamavufga tga osu vahe'mo'za zamentintima haza vahe'mokiziminena, Anumzamo'a fatgo hu'naze huno huzmantesigeno, Abrahamu'a avamupina nezmafaza hugahie. ¹²Anazanke huno oku zamufga tga hu'nazamo'za Abrahamuma oku avufga tga osu'nenoe amentinti higeno, fatgo nere hu'neakna hu'za zamentinti hanaza vahe'mokizimia, Abrahamu'a avamupina nezmafaza mani'ne.

Zamentintima nehaza vahe'mokizmigu huvempa kea huzmante'nea naneke

¹³Na'ankure Anumzamo'ma Abrahamune agehe'mokizimi huvempa ke huzmanteno, ana miko mopa zami'neana Anumzamofu kasege amage antezantera ozami'ne. Hianagi Anumzamo'enema amentintifima fatgo huno mania zante ami'ne. ¹⁴Hagi Anumzamo huvempa huzmante'nemo'za kasege avriri zampinti huvempa huzmante'neazama erizasina zmentinti hu'zamo'a nena rga'a oregeno, huvempa hu'nea kemo'enena amne'za sesine. ¹⁵Hu'negu kasege'mo'a arimpahe'za avreno ne-e. Hianagi kasegema omneresina kasegema rutagre'zana omanesine.

¹⁶E'ina hu'negu Anumzamo huvempa huzmante'neazana zmentinti haza vahe'mo'za enerize. E'i ana musezana Moses kasege amage nentesio, nontesio Abrahamuma hu'neankna amentintima hanimo erigahie. Hu'negu Abrahamu'a ana miko zamentini vahe'mokizimi nezamafa'e. ¹⁷E'i ana zanku avontafepina Anumzamo'a asamino, kagra

rama'a vahe'mokizmi nezmafaza hugahane hu'ne. E'i anazama fore hu'neana na'ankure Anumzamo'a fri'naza vahera zamasimu nezamino, hakarea'zana Agra erifore hu'ne huno Abrahamu'a amentinti hu'nea zantere. (Jen-Agf 17:5) ¹⁸Amentintima huzamofona amuha hu'zana omaneanagi, Abrahamu'a ana miko vahe'mokizmi nezmafana manigahue amentinti azeri hankavetinegeno, Anumzamo'a negeno fatgo nere huntene. *Kagehe'moza hakare hanageno hamprigara osugosie* hu'ne. (Jen-Agf 15:5) ¹⁹Abrahamu'a 100 ti'a kafuzge maniteno keana avufgamo'a mofavre eri fore huga osigeno, Sara enena tvavateno mofavre ksentega osu'neanagi, Abrahamu'a amentinti hu'neazana otre'ne. ²⁰Anumzamo'ma huvempa hunte'nea zankura Abrahamu'a tare rimpa osu'neanki, amentintimo'a mago'ane hankavenetigeno anazamo'a Anumzamofona ragia ami'ne. ²¹Anumzamo'a huvempama hunante'neazana amane hunantegahie huno rimpa fru Abrahamu'a erine. ²²E'ina hu'negu Abrahamuma amentinti hu'nea zanku, Anumzamo'a fatgo nere huno huntene. ²³Anumzamo Abrahamunku fatgo nere huno hunte'neana, agrake azahu'za erisia zanku huno kreonte'neanki, ²⁴tagriku enenku huno krente'naze. Jisasi'ma fri'nefinti azeri oti'nea Rantimofonte tamentinti hunentonkeno, Anumzamo'a tazeri agru hunerantene. ²⁵Na'ankure tagri kumiku Jisasina atregeno efri'nemofa azeri oti'nea zamo, Anumzamofa avurera tagrira tazeri fatgo vahera se'ne.

Anumzamo fatgo vahere huno nehiazamofa naneke

5 ¹E'ina hu'negu tamentinti hanuta Anumzamofa avufina fatgo vahera manigahune. Na'ankure Jisasi Kraisi Rantimoma hu'nea zamo higeta, tagra Anumzamo'enena trimpa fru huta nemanune. ²Na'ankure Kraisiimpi tamentinti hu'nazamo tavreno amama mreri agatere'nea kumapi efregeta menina otineta, hankavea e'nereta, Anumzamo'ma msazama'anema esigura avega ante'nonazamo higeta musena nehune. ³Tagrama knafima ufresuta muse hanune. Na'ankure tagra antahi'none, e'i ana knazampina knare hu'neankino taza hanigeta oti hanavetineta ana knazama enerita kazigazi huta vugahune. ⁴Knazama erino kazigazi huno vu'zamo'a tavutava fore higeno, ana zamo'a Anumzamo tavregahie amuhazana eriamana nehie. ⁵Hagi amuhama humita avega anteta mani'nona zamo'a, amuhama hu'nazana erinotre. Na'ankure tagra antahi'none Anumzamo'ma Ruotge Avamu tamigeno, avesizama'a Ruotge Avamu'afi huvazino tagu'afi eritagi avinete.

⁶Tagrati'a taza hugara osu'nonkeno, Kraisi'a kumitigura kna fatgo'are efri'ne. ⁷Tamage mago'mo'a fatgo vahekura frisanue huno osugahie. Hagi mago'mo knare'ma hanuno'a, amne knare vahekura frigahie. ⁸Hianagi Anumzamo'a tusiza huno avesirantenea zama eriamana hu'neana, kumi vahe mani'nonkeno Kraisi'na huntengeno, tagri kumiku huno efri'ne.

⁹Hagi Kraisi koramo sese hurantegeta, Anumzamofu avurera fatgo vahe mani nonankino, tamage huno Anumzamofu rimpa hezampintira tavu'vazigahie. ¹⁰Na'ankure Anumzamofu ha' vahekna huta mni'nonkeno, Nemofo frizampi Anumzamo ete mago'ane tazeri mago hu'ne. E'ina hu'neankino Anumzamo'ma rimpa herante'nea zampintira Kraisi asimuteti, tagri'ma taza huno tagu'vazizana erigahune. ¹¹Hu'negu Rantimofu Jisasi Kraisimpi Anumzamofu musena huntegahune. Na'ankure Rantimofu Jisas Kraisimpi ete mago'ane, Anumzamo'a tazeri mago hu'ne.

Adamu'ne Kraisi'gizni naneke

¹²E'ina hu'negu magoke ne'mo kumi higeno, ama mopafina kumimo'a efre'ne. Kumimo'a friza avareno egeno, frizamo'a ra huno maka vahetera vuno eno hu'ne. Hu'negu maka vahera kumi vahe mni'none. (Jen-Agf 3) ¹³Kumimo'a ama mopafina ko efore hutegeni, henka kasegea zamine. Na'ankure kasegema omneneresina, e'i kumi nehaze huno huozmantesine. ¹⁴Hianagi fri'zamofu hanavemo'a Adamu knaretima eno Mosese knarema ehanati'neana meno e'ne. Adamu hu'neakna kumi osu'nazanki, frike'za hu'naze. Adamu'a henkama Kraisima esia Ne'mofu avame'za efore hu'ne.

¹⁵Hu'neanagi Adamu kumimo'ene, Anumzamofu knare musezamo'enena magoknara osu'ne. Na'ankure magoke ne'mofu Adamu kumimo frizana rama'a vahetera avareno ege'za fri'naze. Hianagi Rana Anumzane, mago nera Jisas Kraisimpi knare asunkuzane kumiti apase atrerante zana tamine. ¹⁶Asunkuzama'afi Anumzamo tami'nea musezamofu raga'amo'a mago ne'mo'ma kumi'ma hu'nea zamofu raga'agnara osu'ne. Na'ankure Adamu kumimo knaza avareno e'ne. Hianagi Anumzamo'ma amne tami'mea musezamo, Anumzamofu avurera tazeri agru hune. ¹⁷Na'ankure magoke ne'mo Adamu kumi higeno, agri kumite fri zamo'a vahera kva'gri zamanteno e'neanagi, Anumzamofu asuntgi'zane fatgo musezama'afi manisamo'za fri zamofone kumimofu hanavea magoke Ne' Kraisi Jisasimpi azeri ageteregahaze.

¹⁸Magokemo Adamu hu'nea kumimo maka vahe'mofontera knazana erino e'ne. Hianagi magoke ne'mo Kraisi fatgo avu'ava hu'neazamo tazeri agru higeta, Anumzamo'enena fatgo huta nemanita, kasefa manizana hakaremota eri'none. ¹⁹Magoke ne'mo ke hantagi'nea avu'avazamo higeno, rama'a vahe'mofu kumi vahere huzmante'ne. E'ina kante magoke Ne'mo ke erizafa hu'nea avu'ava'zamo rama'a vahera zmazeri fatgo vahe tro huzmantegahie. ²⁰Anumzamoma kasegema zami'neana miko vahe'mo'za kumima nehazaza kesazegu zamine. Hianagi vahe'mo'zama rama'a kumima hzageno'a, Anumzamofu knare asunku'zamo'a mago'ane rama'a nehie. ²¹Ana hukna huno kumimo miko

vahera kegva hu'nenno fri'zana avrezamigeno, menina Anumzamofoknare asunku'zamo fatgo avu'avazana eritamisigeno, Jisas Kraisi Rantimofompinti manivava asimura erigahune.

Kumimofok hankave eritre'nea naneke

6 ¹Hagi tagra na'ane huta hugahune, mago'ane kumira nehanukeno Anumzamo'a asunku hurantevava hugahio? ²To anara osufta hugahie. Tagra kumi'ma huzampina ko fri'none, nahigeta kumipina manita neone? ³Hifi Jisas Kraisi enema mikamota hagerefita mono ti freankna huta friteta, oti'nazana tamagra ontahinazo? ⁴E'ina hu'negu tagra mono tima fronazamo'a, Kraisi ene frunke'za aserente'naze nehie. Hagi Kraisima fripintima azeri oti'neaza huno, Nefa'a Agra'a hankave'anu fripintira tazeri otine. Higeta tagranena kasefa manizampi mni'none.

⁵Tagrama Kraisi ene hagerafita frinonema hanuta, anahukna huno tagri'enena tazeri'otisigeta tasimura erigahune. ⁶Tagra antahinone kumi tavutavazana Jisasi'ene rugeka zafare hantigeno, kumimofok hankavea tagripintira eritrene. Tagra mago'ane kumimofok kazokzo eri'za vahera omani'none. ⁷Na'ankure iza'o fri'nemo'a, kumimofok kinafintira katufentegenofru huno mni'ne. ⁸Hagi tagra Kraisi'ene frisuta, tamentintima hunana tagranena Kraisi'ene manigahune. ⁹Tagra ama ana zankura antahi'none. Na'ankure Kraisi'a fripintira oti'neankino, mago'anena ofrisigeno fri'zamo'a kegva huontegahie. ¹⁰Agra magoke zupa frino kumimofok hankave eritrene. Hu'neanagi Agra menina asimurino mni'neankino, ete mago'enena ofrigahie. ¹¹Hagi tamagra 'a refkoko huta antahiho, ko kumimofok hankavefintira fri'none huta nehuta, Kraisi Jisasimpi, Anumzamo'ene kasefa huta mani'none huta hiho.

¹²E'ina hu'negu atrenkeno amega tmavufgamofona kumimo'a kvagrioramantena, tavufgamofok havi avesizana ovaririho. ¹³Atrenkeno mago tmavufgamo kumimofok eri'zana e'norina, Anumzamofok tamavufgokami vgareho. Na'ankure tamagra ko fri'nazane, hu'neanagi menina kasefa maniza erita mani'naze. Hagi ana miko tamavufgamo'a knare'zama eriforehu erizaza me'nenkeno, Anumzamofona rago amino. ¹⁴Na'ankure kasegemofok agorga'a omni'naze. Hagi Anumzamofok asuntgi zamofok agorga'a mni'nazago, kumimo'a kva huormantegahie.

Fatgo avu'ava zamofok kazokzo eriza vahe manisune hu'nea naneke

¹⁵Mago'ene kasegemofok kvafina omni'none. Anumzamofok asunku'zamo taza hu'ne. Ana hu'negu mago'ene kumira hugahumpi? A'o, ana osugahune. ¹⁶Tamagra amage antegahune hanaza zamofok kazokzo eri'za vahe'ma mni'nazana ontahinazo? Tamagra amne kumimofok kazokzo eri'za vahera manigahazanagi, ana zamo fri kante tamavrenovugahie. Anumzamofok amage antesutma fatgo nomaniza erigahaze.

¹⁷Anumzamofona muse huntého, korapara kumimofó kazokzo eri'za vahe mani'nazanagi, menina tamagu'areti rempima huramuazana amage'nentaze. ¹⁸Menina kumimofó kazokzoma hu' kinafina omani'naze. Hagi tamagra fatgo zamofó kazokzo eri'za vahe mani'naze. ¹⁹Na'ankure vahe'motama kefo tavu'tvama nehunazante, nagra antahintahitamia eriana hu'naku kazokzo eri'za vahete ene kva vahetera hunte'na nehue. Korapara kasege ha'nentagita agru huno avu sese osu tamavutamava huta vu'nazanagi, menina atretma fatgozamofó kazokzo eri'za vahe nemnita, agru nehutma ruotge huta manigahaze.

²⁰Hagi kumi'mofó kazokzo eriza vahema mni'nazageno'a fatgo avu'ava zamo'a kina reormantenie. ²¹E'ina hu'negu nankna tamazahuza erinaze? Ko'ma hu'naza tamavutamava zamo'a menina tamagaze nehie. Ana avu'avazamo'a friza erifore nehie. ²²Hu'neanagi menina kumimo'a kina reoramantegetma Anumzamofó kazokzo eri'za vahe'a mani'nazageno, e'i ana avu'avazampinti tamazahu'zana enerizageno, sese huramanteno tamazeri ruotage huno, manivava tamasimu tamamigahie. ²³Na'ankure kumimofó mizana fri'zane. Hu'neanagi Anumzamofó muse'zana, Kraisi Jisasi Rantimofompi mago'za hunterompge, amne manivava asimura tamine.

Kasegemo kina reorantesia naneke

7 ¹Nenfugtane nasaraheta, tamagra ko kasegea antahita keta hu'nazanki ontahi'nazo, asimuma erino mani'nea vahera kasegemo kegva huntégeno mni'ne. Hagi frisigeno'a kasegemo'a kegva huontegahie? ²Hu'neanagi avame kema huntena hanuana, mago a'mo'ma vema erisigeno'a, ana a'mofona kasegemo kina rentesigeno, nevema asimuma erinoma maninesigeno'a neve'ene manigahie. Hianagi nevema frisigeno'a, ana kasegemofó kinafina omnigahie. ³Hagi neve'ma ofri mani'nesnigenoma ru vema erisiana agra monko avu'avaza hugahie. Hagi nevema fri sigeno'a kasegemo'a kina reontegahiankino, ru vema eri'sniana monko avu'avazana osugahie.

⁴E'ina hu'negu, nafuhetane nasaraheta tamagra Jisasi'ene tragotaza zamo'a ko Jisasi'ene frita, kasegemofó agorga omni'naze. Hagi menina Jisasi'ma ko fripintima azeri otinemo'ene erimago huta Anumzamo'ma avenesia avu'ava zana hugahune. ⁵Kumi tavutavamo kegva hurantenegeno'a, kumima hu' tavesizamo'a tagu'afina efore nehie. Hagi kasegemo'a havi tavutvamofó avesiza azeri otigeta, kumira hunkeno frizana avreno ne-e. ⁶Hu'neanagi tagra ko kasegemofó kinafintira katuferantegeta fru huta mni'none. Na'ankure Kraisi'ene frunkeno mago'ene kasegemofó kinafintira tavre'ne. Hianagi menina amne Anumzamofó erizana erinenteta, korapa tavutva huta kasegefima krente'naza kemofó amage' antezanopage, Avamumofó kasefa kante vugahune.

Kumi'enema ha'ma huzamofa naneke

⁷Hagi na'ane hugahu'ne, Nagra kasegemo'a kumi me'ne nehufi? I'o. Tamage kasegea kumira omnene. Hianagi kasegemo kumira tamaveri nehie. Nagrama rumofa zankuma kenunu huzana, kumire hu'na antahi ama osuanagi, kasegemo eriana higena keama nehue. ⁸Hianagi kumimo'a ama ana kasegefinti kankamunku keno tavu masevemahu tavesizana, tagu'afina erifore nehie. Kasegema omnesigeno'a kumimo'a hankave'a omanesigeno frigahie. ⁹Kasegema ontahinorera nasimu erina mni'noane. Hianagi kasegema egeno'a kumimo'a asimuna erino mni'gena nagra fri'noe. ¹⁰Ana kasegemofo eri'zana vahemofa asimuna ami'zanagi, nagra kasegefintira nasimura e'noruaniki, kasegemo'a nahenefrie.

¹¹Na'ankure, kumimo'a kasegefinti kankamuma'a keno erifore huno renavatga higena kumimo'a nahe frine. ¹²Hianagi kasegemo'a ruotge higena, kasegema hunte'neana ruotage huno fatgo huno knare hu'ne.

¹³Hianagi inankna hugahie, kasegema knarezane nehuazamo nahe nefrifi? I'o, kumi'mo'a knare zampinti frizana erifore nehie. Hu'negu kumimo'a haviza hu'ne huno Anumzamofa eritaveri higea negone.

¹⁴Hu'negu, kasegefina hazenkea omanene, na'ankure mopare navufga erina maninogu kumimofa kazokzo eri'za vahe' mizante atreankna nehie. ¹⁵Nagra'ama nehua navunavara kena antahina nosue, na'ankure nagra fatgo zama hunakurema huazana nosue. Hianagi navesarama huntana osugahue huna huaza nehue. ¹⁶Hianagi nagri'ma navenosia zama hanuna, Anumzamofa kasegemo knare hu'ne hugahue. ¹⁷E'ina hu'negu nagrani'a kefozana nosuaniki, kumimo nagu'afi me'nenona ana kefozana nehie. ¹⁸Higena nagra antahi'noe, knare zana nagu'afina omanene. Knare zana hu'nakure huna nentahuanagi anazana hugara nosue. ¹⁹Nagrama knare'zama hugahue'ma huazana nosue, hagi havi'zama osugahue huaza nehue. ²⁰Hagi menima osnuema huazama nehnuna, e'i nagrani'a nosue. Hianagi nagu'afi kumimo me'nenona anazana erifore nehie. ²¹E'ina hu'negu nagrama kasegema koana, fatgo zama hunakure huazana kumimo tvaonire me'neankina ana zana nosue. ²²Nagra Anumzamofa kasegea ana miko nagu'areti navesinentoe. ²³Hianagi nagu'afina ru kasege me'nea zamo antahintahini'anena hara nehie, e'i ana kasegemo nagu'afi me'nenona nazeri kumi'mofa kasegere kina vahe'nenante. ²⁴Nagra haviza huna keforenoanki, iza ama fri navufga naza hugahie? ²⁵Nagra Jisas Kraisi Rantimofompi Anumzamofona muse huntone, Anumzamofa kasege antahintahiniareti amage nentuanagi, amega navufgamo'a kumimofa kazokzo eri'za e'nerie.

Jisasi'a kefo zanti eri fanane nehuno, Ruotge Avamu tmi'nea naneke

8 ¹Ana hu'negu menina Kraisi Jisasi'ene hagerfi'naza vahera, havi vahere huozamantegosie. ²Na'ankure Jisas Kraisiimpi asimuma

ami Avamumofu kasegemo, kumimofone fri'zamofu kasegefintira kazuferamantene. ³Mosese kasegemo'a tazahugara osu'ne, na'ankure amega tavufgamo kumike hianagi, Anumzamofu'a tazahunaku ru kankamu retro huno Agra'a Mofavre tamigeno mopafi avufga erino tagrikna hu'neanagi, Anumzamofu Agra'a Mofavre museza tamigeno kumimofu hankavea ahe fanane hu'ne. ⁴Fatgo huta kasegemo hu'neankante manisunegu Anumzamofu'a anazana hurantene. Higeta menina tagra ko'ma kefozama nehunazana netreta, Ruotge Avamumofu avesizante nevune. ⁵Mopafi zamufga'mofu avesizama nevririzamokizmia, antahintahiza zmimo'a mopafi zama huzankuke nentahize. Avamupima nevaza vahera Avamumofu zankuke nentahize. ⁶Hu'negu ko'ma kumima nehuna tavutava zanku'ma antahizamofu'a fri kante tavreno nevie. Hianagi atrenkeno Avamumofu antahintahitamia kva huramantena asimu erino rimpa frune manizampina viho. ⁷Hu'negu iza'zo kumimofu avu'ava zampima mani'namo'za Anumzamofu'ona ha' renentaze. E'inahu antahintahine vahe'mo'za Anumzamofu kasege agorga'a nomaniza, Anumzamofu kasegea amagera antegara osu'naze. ⁸E'ina hu'negu kumi avu'avazampima mani'naza vahe'mo'za Anumzamofu avu'avara nosaze. ⁹Hu'neanagi kagrira kumi kavukavazamo'a kava hunogante. Hagi Anumzamofu Avamumofu kva hunegante. Tamage huno Anumzamofu Avamu'mo tamagu'afima mani'nenketa, Avamumofu kvafi manigahaze. Antahiho, Kraisi Avamumofu zamagu'afima omani'nenimo'za, Kraisi vahera omani'naze. ¹⁰Kumimo amega tamavufga tamahe frigahianagi, Kraisima tamagu'afima maninesnigeta tamasimu erita fatgo vahe manigahaze. Na'ankure Anumzamofu tamavrene. ¹¹Hagi Anumzamofu Avamu'mo Jisasi'ma frinefinti' azeri oti'nea Avamu'mo'ma tamagu'afima mni'nesnigeno'a, Kraisima fripinti azeri oti'neaza huno tamagu'afina ana avamu mani'neankino, amega tamavufgamofu'ona asimu amigahie. ¹²E'ina hu'negu knare nefutane nasarahete, mopafi tavufgamofu avesizana oviritfa hugahune. ¹³Hu'negu tamagrama kumimofu avesi avariritma manisnuta frigahaze. Hu'neanagi Avamumofu hanaverema kumi tamavutmazamofu ahefrisuta, tamasimu erita manigahaze. ¹⁴Na'ankure maka veamo'za Anumzamofu Avamuma atrazageno, kama vnazana zmazeri fatgoma nehamo'za, Anumzamofu mofavre mani'naze. ¹⁵Ana hu'negu tamazeri kazokzo eri'za vahe tamanteno tamazeri korohu Avamura tamagra e'orinaze. Hianagi tamagra Anumzamofu mofavre hu Avamu erineta Anumzamofonkura Aba, Nerafa'e nehune! ¹⁶Ruotge Avamumofu tagri avamura taza higeta huama huta, tagra Anumzamofu mofavre mani'none nehune. ¹⁷Tagrama Anumzamofu mofavre mni'nesnuta, Anumzamofu hupri rantenea zamofu'ona Kraisi'ene magoka erisinti haregahune, Kraisi'ma hu'neaza huta knazama erisuta, Kraisi'ene magoka rantagi erita manigahune.

Henka'a masazamofa naneke

¹⁸Nagrama nentahuana, menima e'neruna tatazamofona, henka'ama omerisuna masazamo'a ageteretfaza hugahie. ¹⁹Na'ankure ana miko zama Anumzamoma tro'ma huzamante'nea zantmimo'za, henka'ama Anumzamofa mofavremo'zama e'ama'ma hanaza knagura, tusiza hu'za nazupa fore hugahie hu'za avegantaze. ²⁰E'i anaza tmimo'za zamagra'a zamvesitera mani haviza hu'za mni'neza ome haviza hu'za novaze, hagi Anumzamoma hiho hige'za anara nehaze. ²¹Ama knare'zama fore hanige'za kesagu nentahize, havi'zama hu'za negasriza kinafintira kazufe'za Anumzamofa mofavre ramimofa mago'zama kina re'ozmantege'za amne nemniza avasese kuma'afi ufregahze. ²²Na'ankure hago antahinone, Anumzamoma maka tro huzmantenea zamo'za, a'nemo'za mofavre ksentenaku hzageno zmata kria kna zmata negrige'za mni'neza ama knarera enehanatize. ²³E'i ana zantamimoke'za zmata e'norizanki, tagranena Anumzamoma kumipinti miza serantenemota, Ruotge Avamumofa ese rga'a kna huneta tagua'fina krigi neruta, tusiza huta Anumzamoma tazeri mofavre'a zama hanigura avega nentone. E'i ana zana kinafi tavufgamo mni'neza Anumzamoma katufesnigeta fru huta mni'snuna zanku avega nentone. ²⁴Ama ana zama fore hanigu nentahunkeno tagura nevazie. Hu'neanagi fore hanigu antahintahi hu'zama fore hanigeno kesiana, e'i fore hanigu antahitahi hu'zana omnene. Hagi koma fore higeno ke'nea zankura iza fore hanigeno kesigura nentahie. ²⁵Hu'neanagi onke'nona zama fore hanigeta kesunku antahintahima nehanuta, agozone huta mni'neta hanavetita avega nentone.

²⁶E'ina hukna kante, Ruotge Avamumoma hanavetima omnenea vahemota tza nehie. Nazanku nunamuna hugahune, e'i ontahi nonanagi, Ruotge Avamumoma Agra'a tagri taza huno nunamu hunerante. ²⁷Hagi Anumzamoma vahemota tagu'a negemo Ruotage Avamumofa antahintahia antahine. Na'ankure Ruotge Avamumoma Anumzamofa avesiza avririno mono vea kevumofonku nunamu hunezmantie.

²⁸Tagra antahinone, Anumzamoma Agri'ma aves'nentamokizmi so'eza zamigu maka zamapina erizana enerize. E'ina vahera Anumzamoma Agri'a avesi avririhogu zamagi hu'ne. ²⁹Hu'negu Anumzamoma korapa antahineno Nemofo kna hihogu huhamprizamante'ne, hanageno Nemofo'a rama'a mofavre nagapina kota mofavre manigahie. ³⁰Huhamprima nezamanteno'a, Agrite ehogu ke hu'ne, Agra'a fatgo vahere huno hunezmanteno, Agra'a zamazeri antesga huno ra zamagi zami'ne.

Anumzamofa avesizamo'a oratresnia naneke

³¹Hagi ama ana knare'zama hurantea zankura na'ane huta huga hune? Anumzamoma tazama hu'nesigeno'a, iza hara rerantegahie?

³²Anumzamo'a Nemofona aze'orino makamotagu huno tamineakino, hakarezana tamigahie. ³³Anumzamo'ma huhampri zmantenea vahera iza keaga huzmantegahie? Agra e'i Anumzamo fatgo vahere huno hurantene. ³⁴Iza huhaviza hurantegahie? Ko Jisas Kraisi'a tagrikura efrino otino Anumzamofona azantmaga kaziga umani'nenno, tagri tagri erino Anumzamofontera nunamuna hunerante. ³⁵Kraisi avesi zampintira nazamo tazeri atregahie? Tusi'a kna zamopi, amuhoma hurante zamopi, tazeri haviza huzamopi, tatamanegria zamopi, kukenagu atupa hanuna zamopi hazenke zamo'a tagripima Jisasi avesizama me'neana eri otregahie. ³⁶Avontafemo'a anage hu'ne, ***Kagrikure nehu'za maka kna tahe nefrize. Sipsipi afumofa ananke akafriankna nehaze*** hu'ne. (Sam-Zga 44:22)

³⁷Hakare'zana hurantega hazanagi, agatere hankavetia Kraisi avesirante'nemo manine. ³⁸Nagrama hankave antahintahima nentahuana, frizamo'o, asimu erino manizamo'o, ankeromo'zo, havi avamumozo, meni fore nehza zamozo, henka'a fore hanaza zamozo, mago'a hihamu hankvemozo, ³⁹amunagumu menesia zamo'zo, fenkagamu menesia zamo'zo, makaza Anumzamo tro huzmante'nea zampinti mago' zamo'e huno Anumzamofa avesizama, Jisas Kraisi Rantmofompi menea avesi zampintira tazeri otregahie.

Israeli vahe'mo'za Kraisina zamavesra hunte'naza naneke

9 ¹Havigea nosuanki, Kraisimpi tamage hu'na nehue. Ruotage Avamumo ene nagu'a kenegena ama' nagunagesareti ama kea tamage nehue. ²Tusi'a nasuza enerugeno, tumo niamo'a nata krivava nehie. ³Na'ankure, nagrima navesiana Anumzamo'a Jekopu nagara z mavresiegu navenesie, Kraisima nagri navesima avaririnigena, nagra nunamuna hanenkeno Agra'a vahepintira nahe natitrena, nenafu'za nagri nona erigahaze. ⁴Zamagra Israeli vahera Anumzamo'a zamavrege'za Agri mofavregna hu'naze. Anumzamo zamagripi masazama'a eri ama hu'ne. Agra'a huvempa huno, Agrane zamazeri hagenerefino kasege'a zamine. Agra'a monoma huntesa kankmuna neramino, knare zama erisuna zanku'ma huvempa hurantenea tamine. ⁵Zamagri nezmagehoma zmagima me'nea nagapinti Kraisi'a efore hu'ne. Kraisi'a, Agra Anumza mni'nenno makazamofa aseni mni'negu maka knafina, Agrike agi'a hentesga huvava hugahune! Tamage.

⁶Anumzamo'ma Israeli vaheku'ma huvempa huzamante'nea kea eri raga orenefi? I'o, na'ankure makama Israeli vahepima fore hu'naza vahe'mo'za Anumzamofa vahekera omani'naze! ⁷Abrahamumpinti fore hu'naza vahe mani'nazanagi, e'i ana zamo'a zamazeri tamage Abrahamu mofavrea nose. Na'ankure avontafemo huno, Abrahamu'a mago'a mofavre'zga zamante'neanagi, ***mofavreka'a Aisakimpinti kagri***

vahe fore **hugahaze** huno hu'ne. (Jen-Agf 21:12) ⁸E'i vahe'mota kasenentona kna huno Abrahamu ksezmanete'nea mofavremo'za, ana miko Anumzamofa mofavregera omni'naze. Hagi Anumzamoma huvempama huzmanete'neo'za, Abrahamu mofavrea mni'naze. ⁹Na'ankure Anumzamo'a huvempa huno, **Ama ana knare'ma anaga'a kafurema esu'na, Sera'a ne'mofavre kasentegahie** hu'ne. (Jen-Agf 18:10) ¹⁰E'i ana mofavrea nerageho Aisakie. Hagi Aisaki'a, Rebeka ara erigeno, kugave'za mofavre kaseznantene. ¹¹Zanagrira kase ozanantenegeke, havizane knare zanena osu'nakeno, ko Anumzamo'a nezanrerana kea asmine. (E'i ana kemo huama huno, Anumzamo agra'a erizakante vahe'mokizimia ko huhamprizmantene. ¹²Hianagi knare avu'avazantera keno kea osu'ne.) Neznarerana Anumzamo asmino **Nempu'amo ngana'amofa katoza humigahie** huno hu'ne. (Jen-Agf 25:23) ¹³Anumzamofa avontafepi krente'nea kante, **Jekopuna navesinentuanagi, Isona navesra hunentoe hu'ne.** (Mal 1:2-3)

¹⁴Hagi na'ane hugahune? Anumzamo'a fatgozana nosie huta hugahuno? To anara osugahie! ¹⁵Na'ankure Anumzamo'a amanage huno' Mosesena asmi'ne, **Izano narimpa fru huntenaku humofona, narimpa fru hunentena, izano nasurgintenaku humofona nasurginentoe hu'ne.** (Eks-Uti 33:19)

¹⁶E'ina hu'negu Anumzamo'a vahe'mota tavesite'ene erizanterompge, Agra'a avesizante asuragirante'ne. ¹⁷Na'ankure Anumzamofa Avontafepina Anumzamo'a Feronkura anage huno asamine, **Nagrama huhamprigantogenka kagrama mani'nanana, agafa'a me'nerere. Na'ankure Nagri hankavemo'a kagripi eama nehanigeno, Nagri nagimofona huama hu'za kokankoka vanageno, ra huno vuno'eno hugahie hu'ne.** (Eks-Uti 9:16)

¹⁸E'ina hu'negu Anumzamo'a izano asuraginte'naku himofona asuraginenteno, izano rimpama eriginakuma himofona erinegie.

Anumzamofa rimpa hezane asuntgizamofa naneke

¹⁹Tamagra anage huta nagrikura hugahaze. Na'a higeno Anumzamo'a tamagrikura keontahi vahere huno nehie? Agra hugahaze huno hiazana tamagra nehazafi? ²⁰I'o, e'i anahukna kea osiho. Tamagra izagata, vahetafamota Anumzamofona tro huhaviza hurantene huta nehaze? Tro'ma hunteneasia zamo'a, tro'ma hunteneasimofona, nahigenka amanahuknara hunka trohunantene huno huntegahifi? ²¹Mopa kvoma tro nehanimo'ma, moparetima kvoma tromahunaku'ma hanuno'a, amane magoke moparetira konariri zama ante kvoa tro nehuno, havizama haniazana ante kavo tro osugahifi? ²²E'i ana kanteke Anumzamo'a, rimpahazana eriana nehuno, hankave'a eriana hugahie. Hianagi Agra ra zampi akoheno mni'nenono zmazeri haviza hania vahekura zaza knafina

zmaveganente. ²³E'i ana zama hu'neana, Agri'a mrerinea masa'zama eriamu huno asunku'ma huzmantenea vahetera eriamu hu'ne. E'i anazana ko Agra'a retro huzmante'nemo'za erigahaze. ²⁴Jiu vahepinti'ene, megi'a vahepintima zmavaretere hunefina, tagranena anampina mani'none.

²⁵Hoseama kasnampa kema hu'nefina, ***Ru vahekura Nagri vahere nehuna, navesi'ozmantenesua vahekura navesizmantegahue*** huno hugahie. (Hos 2:1, 23) ²⁶***E'ina hanugeno, tamagra Nagri vahera omni'naze huno zmasmi'nesia kumatera, ksefa huno mni'nea Anumzamofu mofavre'rmine hu'za hugahaze.*** (Hos 1:10)

²⁷Kasnampa ne'mo Aisaia Israeli vaheku huno, ***Israeli vahe'mo'za rama'a hu'za hagerinkenafi kasepankna hu'nazanagi anampinti osi'amokizmi Anumzamo'a zmaguvazigahie.*** ²⁸***Na'ankure Ramo'a fatgo avu'avazampi ame huno maka mopafi vahera refko huzmantegahie.*** (Ais 10:22, 23)

²⁹Ko'ma Aisaia hu'nea kante, ***Hihamu'ane Ramo tagehe'mokizmia zmahokeno osia zmatrege'za mni'naze. Anama osuneresina Sodomune Komora kumate vahe'mo'za fanene huvgare'naza kna huta fanene huvgarontesine.*** (Ais 1:9)

Israeli vahe'moza zmentinti osu'naza naneke

³⁰Hagi na'ane huta hugahune? Megi'a vahe'mo'za Anumzamofu avufi fatgo vahe mani'zankura nohakazanagi, zamentinti hzageno Anumzamo'a fatgo vahe mani'naze nehie. ³¹Hu'neanagi Israeli vahe'mo'za fatgo vahe manisunegu mraguzatiza kasegemofu nevaririzanagi, ana zamofona nena'a eriforera osu'naze. ³²Na'a hige'za anara osu'naze? Na'ankure zmagra zmentintia osu'naze. Hianagi eri'zama erisazanteti fatgo vahera Anumzamofu avurera manigahune nehu'za, agigozmi havereti tanafa nehaze. ³³Anumzamofu avontafepi krenteneana anage hu'ne, ***Keho, Saionia vahe'mokizmi zmagigozmi have ante'noankino, vahe'mo'za zmagigo zmite'za tanafa hugahaze. Hagi iza'o Agrite amentinti hanimo'a agzegura osugosie*** hu'ne. (Ais 8:14, 28:16)

Amentinti hu'zamo zamahokesia naneke

10 ¹Nafuhetane, nasaraheta, nagri'ma nagu'afima navenesigena Jiu vaheku'ma Anumzamofontega nunamuma nehuana, zamahokeno zmaza hanigu nentahue. ²Na'ankure nagra anage hu'na Israeli vahekura huama nehue, Anumzamofona antahimiza avesi avu'avara hanavetiza nevaririzanagi, Anumzamofu antahizana antahi amara hu'za novaririze. ³Na'ankure Anumzamofu fatgo avu'avazankura nohakrazanki, zamagra'a zmavuzmavateti fatgo zmavuzmavara erifore hugahune nehu'za, Anumzamofu fatgo avu'avazamofu agorga'a nomnize. ⁴Na'ankure miko kasegemofona, Kraisi'a emeri knare huvgarene. E'i ana agafare iza'zo

Agrite'ma zamentintima hanamo'za Anumzamofu avurera fatgo vahe manigahaze.

⁵Fatgo avu'avazankuma Mosese kasegemoma hu'nea kante krente'neana, ***Ina ne'mo kasegemoma hu'nea kante fatgo avu'avazama hanimo'a, ana fatgo avu'avazanteti asimu erigahie hu'ne.*** (Lev-Pri 18:5)

⁶Hu'neanagi amentintiretima Anumzamofu avure'ma fatgo huno mani'zankura anage hu'ne, iza monafinka vuno Kraisina tazahinogura avrefenkamia tamigahie hunka kagu'afina ontahio. ⁷Hifi iza fri vahe kerifina uramino, Kraisina fripintira avreno mrrerigahie? ⁸Hu'neanagi na'ane huno hu'ne? ***Kemo'a tvaonka'are me'ne, e'i ana kea kagipine tumo ka'afine me'ne.*** (Diu-Kas 30:12-14) E'i ana kea amentinti kemofonku tagra huama nehune. ⁹Hagi tamagra'ma tamagipinti huama huta Jisasi'a Ramo'e nehutma, Anumzamofu fripinti Jisasina azeri oti'ne huta tamagu'areti tamentinti hanageno'a, tmaguvazigahie. ¹⁰Na'ankure tamagu'areti tamentinti hazageno, Anumzamofu fatgo vahere nehigeta, tamaginuti huama nehazageno, tamahokera nehie. ¹¹Avontafemo hu'nea kante, ***Iza'o Agrite amentinti hanimofona agaze huontegahie*** hu'ne. (Ais 28:16)

¹²Na'ankure mago'zamo'a Jiu vahe'ene megia vahe'mokigizmi amu'nonpina ruzahura osu'ne. Magoke Ramo ana mikamokizmi Rana mani'neni, Agritegama kezamatiza vahera rama'a asomu hunezmante.

¹³Na'ankure ***iza'zo Ramofu agima ahesaza vahera zmaguvazigahie.*** (Jol 2:32)

¹⁴Hagi zamentintima hunontesamoza, inankna hu'za zmaza hinogura antahigegahaze. Hagi inankna hu'za Agri agenkema ontehinesu'za zmentintia hugahaze? Hagi agenke ama huamahu vahema omninesigeno'a, inankna huno antahi amara hugahie? ¹⁵Hagi kema erino ome huama hu vahema humaozmante'snage'za inankna hu'za mono kea huamara hugahaze? ***Knare musenkema eri'zama aza vahe'mokizmi zmagamo'a hentofaza hu'ne huno Avontafepi krente'ne.*** (Ais 52:7)

¹⁶Hu'neanagi ana maka vahe'mo'za knare musenke e'ori'naze. E'inanku kasnampa nemo' Aisaia huno, ***Ramoka iza ama ana kemofontera amentintia hugahie hu'ne?*** (Ais 53:1) ¹⁷E'ina hu'negu vahe'mo'za ke nanenke nentahizageno zamentintia erionetie nehaze. E'i ana kea Kraisi knare musenke me'ne.

¹⁸Hu'neanagi nagra amanage hu'na nehue. Tamage Israeli vahe'mo'za ana nanenkea antahinafi? Izo zamagra antahi'naze. Anumzamofu avontafepi hu'neana, ***zmagenkemo'a ama mopamofona maka kaziga vuno eno hu'ne. Zamagri kemo'a maka kokankoka vuno eno hu'ne.*** (Sam-Zga 19:4)

¹⁹Mago'ane nagra tamantahinegoe, Israeli vahe'mo'za antahinira osu'nazafi? Kotazana Mosese'a amanage huno hu'ne, ***Nagra megia***

vahekuke hanugenka knive regahane. Antahizazmi omnenea vahekuke hanena, krimpa hegahie hu'ne. (Diu-Kas 32:21)

²⁰Hagi Asaia'a hakavetino anage hu'ne, *Nagrikura nohakraza vahe'moza, nagefore hu'naze. Nantahi nogaza vahete Nagra'a eama huge'za nenagaze.* (Ais 65:1)

²¹Hu'neanagi Israeli vahekura amanage huno Anumzamo'a hu'ne, *Nagra hakare zupa zamavrenakura nazana rutaneroanagi, ke'ni'a zamefi hunenamiza namagera nontazage* hu'ne. (Ais 65:2)

Anumzamo Israeli vahera avesra huozmantenea naneke

11 ¹Hagi amanage hu'na nehue, Anumzamo'a Agra'a vahera avesra huzmantenefi? I'o anara osugahie. Na'ankure nagranena Israeli nere, Benjamini nagapinti Abrahamu negehone. ²Anumzamo'a Agra'a vahe korapa huhampri'zmante'nea vahekino ozmatre'ne. Ontahi'nazafi mono Avontafe'moma kasnampa ne' Ilaijanku'ma hu'neana? Ilaija'a Israeli vahekura amanage huno Anumzamofontega nunamuna hu'ne, ³*Ramoke, kasnampa vahe'ka'a zmahe nefriza, kre'sramna vu itaraminka'a tgana vazinetre'za, nahe frinaku nagrake mni'noge'za nehakraze.*

(1 Kin 1:10) ⁴Hu'neanagi na'ane huno Anumzamo'a ke nona'a huntene?

7 tauseni'a vahera, Bali havi anumzantera zmarena reza mono huonte'namokizmia zmazeri frakuge'za mni'naze. (1 Kin 19:18)

⁵E'inahu kna menina hu'ne. Maka Israeli vahe'mo'za Anumzamofona zmagenana humizafinti, osi'a naga Anumzamo'a asuragi zmanteno huhampri zmantemo'za mni'naze. ⁶Hagi Anumzamo'ma asunku huzmanteno huhamprima zmantene'sniana, e'i eriza enerizazante anara osu'ne. Hagi eri'za enerizazantema huhamprima zmante'simpga asuntagizamo'a, asuntagizana omnesine.

⁷Hagi na'a fore hu'ne? Israeli vahe'mo'za fatgo vahe manisune hute'za ana'ana hu'za vu'nazanagi, fatgo vahera osenazanagi, huhamprima zmante'nea vahe'mo'za fatgo vahera sazageno, ruga'amokizmia zmarimpamo'a hanavetige'za, Anumzamofa kea ontahi'naze. ⁸Avontafepi krenteneana, *Anumzamo'a zamazeri zmavutoko hu avamu nezmino, zmavua onke'sazegu reso nehuno, ke ontahisazegu zimagesa renknirege'za, ontahiza manime e'za ama knare ehanati'naze.* (Diu-Kas 29:4, Ais 29:10) ⁹Hagi Devitia amanage huno hu'ne, *Zmatrenkeno rama'a ne'zama ne tratema eri atru huno nezamo'a, kukomo zmazeria kna nehuno, zmagigo zmi havere tanafa hazankna nehina mizazmia eriho.* ¹⁰*Zmatregeno zmurgamo'a hanintiri nehinke'za nonkeza, zmagenamo fagagina pri hute'zage maka kna mniho.* (Sam-Zga 69:22-23)

Anumzamo megi'a vahe zmavresnia naneke

¹¹Mago'ane zmantahinegoe, Israeli vahe'mo'zama tanafa hu'za traka hu'nazana ete oraotinaku traka hu'nazafi? I'o trakama hu'nazana

otigahaze. Hu'neanagi Anumzamofu zmeffi humiza nona'a, Anumzamofu megia vahe'mokizmia havi avu'ava'zampintira zmaresige'za, Israeli vahe'mo'za megia'a vahera knive rezmantegahaze. ¹²Hagi Israeli vahe'mo'za kumi'ma hu'nazazamo, kokankoka vahetega marerisa asomura vu'ne. Trakama hu'naza zamo'a marerisa asomura megia'a vahe'mokizmia huzmantene. Hu'neanagi Israeli vahe'mo'za Anumzamofoma zmeffima huomizasina, inanknahu asomu kokankoka vahe'mo'za erizasine.

¹³Ana maka kema nehuana, megia'a vahe'mota tamagriku nehue. Anumzamofu megia'a vahe'mokizmi aposol manio huno huhampri'nantenegu ama ana eri'zamo'a nagripina kota eri'zani'a me'ne. ¹⁴Mago'a kankamumpinti megia'a vahe'mota tamagripi eri'zani'a enerisugeno, Jiu vahe'nimo'za kniveneresageno, zmahoke ahesiegu nehue. ¹⁵Na'ankure Israeli vahe'mo'za Anumzamofu zmeffi humiza zamo, kokankoka vahera Agrane zmazeri mago zmarimpa hu'ne. Hagi inankna hugahie Israeli vahe'ma Anumzamofu ma ete zmaresnia zamo'a, e'i fripinti oti'za zmasimu erizankna hugahaze! ¹⁶Bretima krenaku heru'ma anteneza anampintima esera refko hu'za kre'za Anumzamofoma nemisageno'a, ana maka herunte'naza bretimo'a ruotage hugahie. Zafa'mofu rafunamo'ma ruotgema hu'nenkeno'a, ana maka azankunamo'enena ruotge hugahie.

¹⁷Hu'neanagi olivi zafa'mofu mago'a azankuna'aramina hantgi zmatreno, tmagrira afi olivi zafa'mofu azankuna'a mni'nazageno, tmavreno olivi zafare rukamrerantegeta amunozmifi mni'neta, zamagrane knare msavena agafafinti enerize. ¹⁸Hu'negu tamagra azankuna'a mni'none hutma rantmagia e'oriho. Na'ankure tamagra rafunamofona aza nosazanki, arfunafinti tmaza hu'zana enerize. ¹⁹Tamagra anage hugahaze, tagri rukamre'rantesnigu azankuna'aramina hantgi zmatrene. ²⁰E'i tamage, Jiu vahe'mo'za zmentinti osazagu hantgi nezmatreno, megia'a vahe'mota tamentinti hzagu tmazeri rukamre rmantene. Tamagra'agura antahisga osutma, Anumzamofonku koro huntaho. ²¹Na'ankure Anumzamofu ma olivi zafamofu azankuna'a eri hantgima zmatrenesuno'a, tamagri enena tmatresigeta omnigosaze. ²²E'ina hu'negu Anumzamofu fru avu'ava ene hihamu avu'ava'anenku tamagesa antahiho. Trakama hzamokizmia Anumzamofu zmazeri haviza neheie. Hianagi tamagrira fru avu'ava hurmantegahie. Tamagrama Anumzamofu fru avu'avazma huta ovnageno'a, ru tamagri enena ana zanke huno hantgi tamatregahie. ²³Hagi Israeli vahe'mo'za zmentinti osu zmavuzmavapinti zmagu'a rukrehe hanageno'a, ete Anumzamofu ana azankunara erino zafarera rukamregahie. Na'ankure Anumzamofu amne anara huga hu'neankino, amne anara hugahie. ²⁴Na'ankure tamagra afi olivi zafamofu azankuna'a mni'nazageno, taga huno olivi zafa fatgore rukamreramanteneakino, Olivi zafa azankuna'a erino ete olivi zafa fatgorera rukamre zmantesigeno'a, knarezantfa hugahie.

Anumzamo maka Israeli vahe zamaguvazisia naneke

²⁵Nafuhetane nasaraheta, ama oku kea antahini hnazegu nagrira nave'nesie. Antahi'zantmifina antahizane vahe' mni'none huta rantmagia e'oriho. Mago'a Israeli vahe'mokizmi zmarimpamo'a erigineankino, mani'nenageno Anumzamo'a megia' vahera z mavregahie hu'neama'a efregahaze. ²⁶Anumzamo'a ana maka Israeli vahera eteno z mavregahie, Anumzamofu avontafepi krentenea kante, ***Vahe'ma knazampintima z mavre nera, Saioniti egahie. Agra Jekopu nagapintira Anumzane tragoteno omni avu'avazana emeri atregahie.*** ²⁷***Koma Nagrama huvempa huhagerafi kema huzmante'noa kemofu amage antena, kumi'zmia eritre z mantegahue*** hu'ne. (Ais 59:20-21)

²⁸Israeli vahe'mo'za Anumzamofu ha' vahekna hu'nazageno, knare musenkemo'a megia' vahemotarega ne-e. Hianagi zamagrira huhampri z mante'neankino, zmesizmentene. Na'ankure z magehemofonku huno zmesizmantene. ²⁹Na'ankure Anumzamo'ma muse'zama zmi'nea vahepintira, ete ana zana e'origahaze. ³⁰Korapara tamagrama megia' vahe'mota Anumzamofu kea amagera ontenazanagi, Anumzamofu kema Israeli vahe'mo'za menina ontahizageno, Anumzamo'a tmagrira asuragi tmantene. ³¹Ana hu'negu Jiu vahe'mo'za Anumzamofu kea amagera ontazageno, Anumzamofu rimpa fruzamo'a megia' vahe'mota tmagrite e'neankino, ana hukna huno tamagriterite ete vugahie. ³²Anumzamo'a maka vahe'mokizmi asuragizmantenaku ana maka'mokizmi zmatrege'za ke ontahi avu'avazamifi, kina hu'za mani'naze.

³³Iza Anumzamofu marerisa fenozama'agi, antahizama'agi, knare antahintahizama'a refko huno kegahie? Anumzamofu knare antahintahizama'ane avu'avazama'a refako huta antahiamara huga osu'none.

³⁴***Iza Ramofu antahi'zana antahino keno hu'ne? Hifi iza antahintahi'amo agaterenesigeno Ramofona antahintahia amigahie?***

³⁵***Hagi iza Ramofona esera agatereno razana ami'nesigu, ete Ramo'a nona huno mizasentegahie?*** (Jop 35:7)

³⁶Na'ankure Agripinti ana maka zamo'a fore nehuno, Agri hankavefi mikozamo'a me'ne. Miko zupa Ragi Agra erivava hanie, Tamage.

Tavufga Anumzamofu amisuna zamofu nanenke

12 ¹E'ina hu'negu, nafu'naganaheta tamantahinegoe, Anumzamo asuragirmante'nea zanku nentahitma, tamagra'a asimu erino manineno, Anumzamofonte kre sramna viankna hutma amivareta tamavufa nemita, mani ruotge nehutma, Anumzamofu rahi amiho. E'i avamupima mono huzamofu tamavutmavare. ²Ama mopafi avu'avazanena tagrora oteho. Hianagi tamagra atrenkeno

antahintahitamia Anumzamo tmazeri kasefa nehanigeno, tamavutamava zamo'a ruzaha hino. Anama hanuta, tamage Anumzamofa avesizamofa, knare huno haviza osuno, fatgo hu'ne huta eriyama hugahaze.

³Na'ankure Anumzamofa asunkuzamofa'areti asumaraginantenereti, maka motarega amanage nehue, tamagratmigura antahinkeno rana osenketa, vahe'mofa zama nemaniza kante maniho. Tamagra'a tamavutamava refako hutma negeta, Anumzamo tamami'nea tamentintireti, tamagra ina avamente maninafi refko hutma keho. ⁴Magoke tavufgafina tagiagi, tazanki tavurgagi tagonagi tagiki huno me'ne, hakare'aza me'neanagi e'i ana'maka zamo'za magoke eri'zana enorize. ⁵Tagri tavufgamo hu'neankna huta tagra rama'a vahe mani'nonanagi, tagra Kraimpina magoke avufga mni'neta, ruzahu ruzahu avufga'a mani'none. ⁶Anumzamofa Agra'a asunkuzanteti, ruzahu ruzahu eri'zama eri'zamofa muse'zana magoke magoke'mota tamitere hu'ne. Hu'ne Anumzamofa kasnampa kema hu hankavema kaminesigenka, Anumzamofa kaminesia kamentinti avamente huama huo. ⁷Ru vahe'mokizmi zamazahu musezama tagripima menesigeta, so'e zantfa huta zamaza hanune. Hagi rempi huzame musezama erinesuta, rempi huzami so'e hanune. ⁸Iza'o ru vahe'mokizmi zamazeri hankaveti musezama agripima me'nesigeno'a, zamazeri hankavetigahie. Hagi vevahu musezama agripima me'nesigeno'a, mago'a zankuma atupama hanaza vahera zamisige'za rama'a erigahaze. Hagi Anumzamofa vahe kva huzamante hankavema aminesiana, agra'a ana eri'zana agu'areti huno eriso'e huno erino. Hagi vahema so'e hunte musezama erinesimo'a, musezampinti so'e zana huzmaverino.

Avesintezamofa nanenke

⁹Tamage hutma vahe'mofona zmavesizmanteho. Kefo avu'avazana tamagena hunenteta, knare avu'avazana azeri hankavetiho. ¹⁰Tamagra tamage hutma ovesinte avesinte nehuta, tamagra tamavufga anteneramitama, arumokizmi husga huzamanteho. ¹¹Tamavesra osutma hanavetitma eri'zana erinkeno, Avamumofa tamazeri otina Ramofa eri'zana eriho. ¹²Fore hanigu hankave antahintahima hunemiza zankura musena nehuta, tusi'a knazama fore'ma hanigetma kazikazi huta nevtuma nunamu huvava hiho. ¹³Anumzamofa vahe'mofa zama mago'a zankuma atupa hanagetama, zmazama hanagura tro huta maniho. Onkenesnaza vahema esnageta nontamifi kehuta zamavrenteho.

¹⁴Knama tamisamokizmia asomu ke huzmanteho. Anumzamofa asomu huramantesie nehutma, zmazeri haviza hanie hutma osiho. ¹⁵Musema hanaza vahe'enena muse nehuta, zavi'ma atesnaza vahe'enena zavira ateho. ¹⁶Ovesinte avesinte huta magoke avamente maniho. Tamagra tamavufga erisaga osiho, hianagi agi omane vahe'ene manizanku tamavesino. Tamagra ana miko'zana antahi'none huta osiho. ¹⁷Mago

vahe'mo'ma havizama huramantena, ana nona'a haviza huonteho. Ana mikozama hanafina fatgo tamavutmava nehinke'za, miko vahe'mo'za tamageho. ¹⁸Tamagrama ana hugahanutma, miko vahe'enena tmarimpa fru huta manigahaze. ¹⁹Rone'nimota mago'mo haviza hurmantena nona'a huonteho, hagi Anumzamofa fatgo rimpa hezampi atrenkeno vino. Na'ankure avontafepina anage huno krentene, ***Nagra'a nona'a huzamantena mizana zamigahue huno, Ramo hu'ne.*** (Diu-Kas 32:35) ²⁰***Hianagi ha'ma rermantesaza vahe'moza zmagakuma hanageta, nezana zamiho. Tinku'ma zamavesina, tina zaminke'za neho. E'i ana huknazama hanazana, zamagrama nehaza zmavuzmava zankura zmagaze hugahaze.*** (Prov-Knr 25:21-22) ²¹Tamagra atrenkeno havi avu'avazamo'a tamazeri agate'oreno, hianagi knare tamavutamava hutma havi avu'avara agatereho.

Kamani vahe'mokizmi agorga'a manizamofa naneke

13 ¹Kamani vahe'mokizmi agorga ana mikomota anteramita manigahune. Na'ankure miko hanavea Anumzamofontegati e'neankino, Anumzamo hankavea kamani vahe'mokizmia zamige'za fore hu'za mani'naze. ²Hu'negu iza'o kamani vahe'ma ha'rentesimo'a, Anumzamofa trake ha'rentean kino, ana knazana agra'a erigahie. ³Na'ankure kamani vahe'ma mani'nazana, fatgo zama haza vahe zamazeri korera nosaze. Hianagi kefozama haza vahe zamazeri korera nehaze. Kamani vahe'ma kore huozmantesue hanunka, fatgo kavukva nehuge'za, kazeri antesga hiho. ⁴Kamani vahe'ma mani'nazana tamagri knare zanku huzmantege'za mani'nazanki'za, Anumzamofa eri'za vahere. Hianagi kagrama hazenkema nehanunka, korera hugahane. Na'ankure zamagra hazenkema hanaza vahe'mokizmi, knomazamino zmazeri fatgohu hakavea eri'naze, kano zamiza zamazeri fatgo hanaza agafare, Anumzamo'a zmantege'za mani'naze. ⁵E'ina hu'negu Kamani vahe'mokizmi zmagorgama mani'zamo'a knare hu'ne. Hianagi zmaheno zmazeri ante fatgo huzankukerompage, tagra'a tagu'tagesafina fatgo'za nehune huta antahigahune. ⁶Ama ana agafare takisi zagoa miza nehune. Na'ankure kamani vahera Anumzamofa eri'za vahe mani'naze, hakare'a knazupa zmagra vahe'ma kvagrizmante eri'za enerize ⁷Ana miko vahe'mokizmi zama eri'nesanazana etenka zamio, takisi zagoma amio hunesizana neminka, fenoma mizasenanten takesi miza huo hanigenka miza nehunka, kore huzmanteho hu'nesaza vahera, kore hunezmanteta, rahi zmagi zmiho hunesia vahera, ra agi zamiho.

Avesintezamofa naneke

⁸Atrenkeno nofima hu'zamo'a tamagripina omaneno, hagi rumokizmi zamavesinte nofimoke tamagripine meno. Na'ankure tva'ontamirema

nemanizamokizmigu avesintezamo'a, kasegemoma hu'nea kea eama nehie. ⁹Na'ankure kasegefina amanage hu'ne, ***Ru vene a'enenamonko'zana osuo, Vahera zmahe'ofrio, kumzafa oso, vahe zantera kegnunu osuo*** hu'ne. (Eks-Uti 20:13-17) Ruga'a kasegemo'za ama magoke kasegefi me'naze. E'i ana kasegemo huno, ***kagraguma kavesi nentanankna hunka, tva'onkare maninesimofona avesinto*** hu'ne. (Lev-Pri 13:9) ¹⁰Tva'ontema mni'namokizmi avesintezamo'a havizana omnene. E'i ana hu'negu vahe'ma zmesintezamo'a kasege eriknare nehaze.

¹¹Tamagra ama anahu tamavutamava hiho, na'ankure tamagra antahinaze, menina knamo'a kofa hu'nefi mni'nonanki, masenazafintira otiho. Na'ankure tahokeno tavrezamo'a, tagu'ama rukrehema hunontetima amare'ma ehnatiana, hago menina erava'o nehie.

¹²Hanizamo'a kofta huno vagaresigeno, masama fore'ma hania zamo'a kofta hu'ne. Ana hu'negu hanizamofu avu'ava zama nehuna zana netreta, msamofu ha' kukena hanune. ¹³Ana hu'negu msarema nehazankna huta knare tavutava nehuta, hanizamofu muse zampina omanita, aka tina oneta neginagi osuta, monkozana nosuta, monko avu'ava huzampina omanita, mago rimpa osu avu'avazampine omnita kanive oreho.

¹⁴Hu'neanagi atrenkeno, Ramo, Jisas Kraisi tamagripina mani'nenno, kefozama hu tavesizana eri atreno.

Hanave amentintine hanave'a omne amentintimofu naneke

14 ¹Zamentintifima hanavema otinesamokizmia tamagraraga zmvarenentetma, antahintahifina knare hu'ne haviza hu'ne hutma zmentinti zmimofona refko huozmanteho. ²Na'ankure mago'amokizmi zamentintimo'a knare hu'neankita makazana amane negahune nehaze. Hianagi mago'amokizmi zamentintimo'a hanave'otineankiza, hozafi nezanke nenaze. ³Hagi fatgo hune huno nehuno maka'zama ne'nesnimo'a, anama nosanimofoma kefenkami ote'no. Hagi mago'a nezama nonesnamo'za, maka'zama nenesnamokizmia refko huozamanteho. Na'ankure Anumzamofu zmvarene. ⁴Kagra izaga rumofu eri'za vahera refko hunezmantane? Agri'a kva'amo refko huntenu, kagra eriza ka'are otigahananki, kagra evuramigahananki huno huntegahie. Hu'negu Ramoke azeri otisigeno, otino manigahie.

⁵Anahukna kante mago'mo mago zgegnamo ruotage huno ruga'a zgegna zmagaterene huno agesa nentahisigeno, ete rumo'a ana'maka zgegnamo'za mago'zanke hune huno agesa nentahie. Mago mago'mo'ma, mago knaguma knare hu'ne hunoma antahinemia knagura, atrenkeno tamarimpamo'a fruhino. ⁶Iza'o mago zge'gnamo ruotge hune nehuno, Anumzamofu mono huntesia, agra e'i Anumzamofu mono hunente. Iza'o ruzahu ruzahu neza nenesimo'a, Anumzamofonku nentahiza negahaze. Na'ankure zamagra Anumzamofu susu huntete'za nenaze.

7Na'ankure tagra tasimu erita mani'nonana tagra'a suzana omanene, nefruna zana tagri'a zana omanene. 8Na'ankure tasimuma eritama mani'nonana, Ramofonte nemanune. Hagi frunana Ramofonte nefrune. E'ina hu'negu frisuno, tasimu erita manisunana Rantimof'o'za me'ne. 9E'i ama ana agafare, Kraisi'a friteno ete otino asimu erino manine. Hu'negu asimu erino mani'nea vahe'ene, fri'naza vahe'mokizmi Ra mani'ne.

10Hu'negu, nahigenka mono negafu amentintigura knare osu'ne hunka refako hunantane? Hifi nahigenka mono negafuna hufenkami netrane? Na'ankure ana maka'mota Anumzamo refako hurantesia tratera otigahune. 11Na'ankure Mono Avontafepi amanage huno krentene, **Ramo'a amanage nehie, tamage nasimu erina maninesnuge'za maka vahe'mo'za Nagrite zmarena neresageno, anamiko vahe'mo'za, huama hu'za Anumzamofona ragi amigahaze** hu'ne. (Ais 45:23)

12Ana hu'neankita magoke magokemota Anumzamofona maka'zama nehuna zamofa kea asamigahune.

13E'ina hu'negu rumokizmima refko hunezmantona zana atreho. Tamagra'ma antahintahitamima retroma hanazana, mono neramafu zamentintifi zmagigo zamino, zamazeri tanafahu havegna huta omanisune hiho. 14Ranimo Jisasi'a eriana higena kena atahinama huana, mago'zamo'e huno agru osu'ne huta osugahune, magozamo agru osune hunkama antahisanana, e'i ana zamo'a kagriteri agru osugahie. 15Hagi mago'a zama nenesana zankuma mono negafuma antahi havizama nehanigenka, kagra mago'ane avesi zampina nomanine. Atrenkeno nezama nesasazamo'a Kraisi'ma zamagrikuma huno fri'neamokizmia zmarimpa zamazeri haviza osino. 16Ana nehuta atrenke'za knare hune huta tamentinti nehanaza zankura, havizane hu'za osiho. 17Na'ankure Anumzamofa Kumara, neza ne'zane, ti nezana omanene. Hianagi Ruotge Avamupi fatgo avu'avazane, arimpa fru'zane, musenkase hu'za me'ne. 18Na'ankure iza'o Kraisima ama ana avu'avatetima avaririsimofona, Anumzamo'a muse hunetesigeno, vahe'mo'za nege'za hugnare huntegahaze. 19E'ina hu'negu atrenketa musezama mono kevufima fore'ma hanea zanku nehuta, tagra'ragara ozeri hankaveti, azeri hanaveti huta tamentintifina hageta ra hanune. 20Nezantekure huta Anumzamofa eri'zana eri haviza osiho, ana miko'zamo'a avusese hu'ne. Hianagi knarema osu'niana, mago'mo'ma nefu azeri tanafa hunaku'ma nesia zamo'e. 21Ame'a onesuno, negi ti onesuno, mago'azama hanunazamo mono nerafu amentintia azeri tanafa osanunana knare hugahie. 22Kamentintima hanana, kagra Anumzamofa hanave kamentinti hunemine. Iza'o amentintima nehania zanku'ma antahintahafima haviza nosue huno osnimo'a muse hino. 23Hu'neanagi tare antahintahi nehuno, nesimo'a haviza hane huno agu'amo'a nesamie. Na'ankure amentinti huteno none, haginano ana miko'zama amentintima osu'nenano hania zamo'a kumire.

Ru vaheku antahizmisuna naneke

15 ¹Tamentinti zampima hanavema tinomota, hanavema otinesamokizmia zamaza hanune. Hagi tagra'ama taza huzankukera ontahisune. ²Mago'magomota tava'ontirema nemanisamokizmi knare'zanku huta zmaza nehanunke'za, zmentintifina hanaveti'za hage'za marerisaze. ³Na'ankure Kraisi'enena agra'a avufga aza haniazankura ontahineanki, avontafepina amanage huno krentene, **Vahe'mo'za huhavizama hugantazana, nagri nagofetu hunteghaze** hu'ne. (Sam-Zga 69:9) ⁴Na'ankure ko Anumzamofa avontafepima miko kema krente'naza kemo'a, tazeri antefatgo nehuno, tazeri hankavetisigeta knazantifina kazigzi huta nevuta, fore'ma hugahie huno avontafepi krente'nea zankura avega antegahune. ⁵Anumzamo knazantifima tazeri hankavetigeta kazigazi huta nevumo, Kraisimpina mago tamarimpama huzana tamisigeta, magoke huta manigahune. ⁶E'ina hu'negu ana mikomota mago tamarimpa nehuta, tagrira erinte mago huta, tagu'areti Rantimofa Jisas Kraisi Nefa, Anumzamofona rahi amisune.

⁷E'ina hu'negu, Kraisima tamagrima tamavre'neaza huta, tamafuheina zamavareho, ana hanageno Anumzamo'a rahi erigahie. ⁸Antahiho, Anumzamo'ma Israeli vahe'mokizmi nezmageho huvempa huzmante'nea kea eriana hanige'za kesazegu, Kraisia eri'za vahekna huno zamagritera e'ne. ⁹Ana hu'negu megi'a vahe'mo'za Anumzamo'ma asunkuma huzmante'nea zankura, rahi amigahaze huno avontafepi krentene, **E'ina hu'negu nagra megi'a vahepina rankagi negamina, nagra zgamera hu'na kagi'a erisaga hugahue** hu'ne. (Sam-Zga 18:49) ¹⁰Mago'ane amanage hu'ne, **Megi'a vahe'mota, Agri vahe ene musenkase hiho** hu'ne. (Diu-Kas 32:43) ¹¹Ete mago'ane amanage hune, **Ramofona rahi amiho, maka megi'a vahe'mota, ana miko mopafi vahe'mota ahi erisaga hiho** hu'ne. (Sam-Zga 117:1) ¹²Ete mago'ane kasnampa ne'mo Aisaia anage hu'ne, **Jesimpinti efore hanimo'a, Agra megi'a vahe'mokizmi kva mani'nenke'za, Agrite zmazama huzankura amuhara hugahaze hu'ne.** (Ais 11:10)

¹³Fore'ma haniguma amuhama nehunazamofa Anumzamo, miko musezane rimpa fruzana tamentintifina antevinetena, Ruotge Avamumofa hankavefi fore'ma hanigura amuhara hugahaze.

¹⁴Nafu nagnahete nagrani'a antahuana, tamagripina knare tamavut mavamo'ene mika'a antahizamo avite'nena, ozeri fatgo azeri fatgo hugahaze. ¹⁵Hianagi mago'a nanekegu avompima hankavetina kreraminoana, Anumzamo'ma asunku'ma hunante'neazanteti ete mago'ane huramagesama hanigu krerami'noe. ¹⁶Kraisi Jisasi eri'za erina megi'a vahetega prisi vahe' kna hu'na, Anumzamofa knare musenke huama nehue. Ana hanige'za megi'a vahe'mokizmia Ruotge Avamumo

zmazeri ruotage hu'nige'za, Anumzamo muse huno eneria kre sramnagna hugahaze. ¹⁷E'ina hu'negu Anumzamofu eri'zama enerua zankura, Kraisi Jisasimpi knare hu'noe hu'na navufa rana hugahue. ¹⁸Mago'a zankura nagra navufga erisaga osugahuanki, Kraisi'ma nagripima erivgarenea eri'zamo higeno, megia' vahe'mo'za amagera nentaze. ¹⁹Ruotge Avamumofu hankavefine, avame'zane, ruzahu ruzahu'za kaguvaza erifore hu'zamofu hanavere, Kraisi musenkea Jerusaleti huama hu'na Ilirikium kaziga (Masedonia-Italy) ome huvgare'noe. ²⁰Hianagi nagra, Kraisi agima nohaza vahepi knare musenke huama hu'na zmasamisuegu, tusi'za huno navesiankina nagra rumo'za kinaza tratera nona nonkue. ²¹Hu'neanagi mono avontafepina amanage huno krentene: ***Agri agi agenkema ozmasminesaza vahe'mo'za negesnage'za, Agri agi agenkema ontahinamo'za antahi ama hugahaze hu'ne.*** (Ais 52:15)

Polia Romu vahe ome zmagenaku antahintahi retro hu'nea naneke

²²Nagra nantuma antena eme tamagenaku'ma huana ama agafare ome'noe, na'ankure ama kumapina mono naneke huama nehune. ²³Hianagi nagra ama kaziga menina hago eri'zana eri vgare'noe, haginno rama'a kafufima emema tamagesue hu'na avegama ante'noa zamo'a tusi'za huno navesie. ²⁴Nagra Speini kumate vunaku antahintahia retro nehuankino, vanuna onsi'a kna tamagrane umaninena mono kea nehu'na, vunaku'ma hanugetma naza hanagena vugahue. ²⁵Hianagi Nagra menina mono kevu naga museza antezmantazaza zaminaku, Jerusale kumatega nevue. ²⁶Na'ankure Masedonia kumateti ene Akaia kumateti mono kevu'mo'za muse hu'za Jerusale kumate mono kevu'mokizmi amu'nozmifi, zamunte omne nagamokizmi zgo eritru hazagena erina nevue. ²⁷Zamagra zagoma eri atruma hazazankura tusi'a muse hu'naze. Zamagrama antahizana nofi hu'nazaza katufeankna hu'naze. Na'ankure megia' vahe'mo'za Avamumofu asomuma eri'naza zanku, Jiu vahera amega zamufamofu zmaza hu'za zami'naze. ²⁸Hagi ama ana erizama erivanerena, ana zama zamivaretasuna, nagra Speini kumate enevanuna, eme tamageme vugahue. ²⁹Nagra antahinoe tmagritegama esu'na, Kraisi asomumo avitenenkena egahue.

³⁰Nafu'nganahete, nagra tamantahigoe, Rantimofu Jisas Kraisine Ruotage Avamumofu avesizante, amama amuhoma e'nerua zantera nagri'ene eme hagerefitu, Anumzamofontega nunamu hunantesazegu nehue. ³¹Nunamu nehinkeno zmentinti osu Judia vahepintira Anumzamo nagu'nevazina, Jerusale mani'naza vahe'mo'za kema hanuana antahinamiho. ³²Hanigena Anumzamofu avesizama me'nena, nagra tamagritega muse hu'na egahue. Hanigeta tagra ozeri hankaveti azeri hankaveti hugahune ³³Hagi menina rimpa fru Anumzamo tamagrane manisie. Tamage.

Polia musenke afuhe'i huzmante'nea naneke

16 ¹Senkeria kumateti dikeni mono eriza e'neria nersaro Fibina knare'za huntaszegu nehue. ²Muse hutma Anumzamofu nagapina rahi me'nea vahekna huta Ramofompina nevareta, nazankuro atupama haniazana aza hihogu nehue. Hagi ana a'mo knare huno nagri'ene rama'a vahe'mokizmi tza nehia aki, knare huta aza hiho.

³Krais Jisasimpima magokama eri'zama e'nerunamokiznia Prisirane Akuilakizania muse keni'a znasamiho. ⁴Tamage nagrikura znasimu atresna'aza neha'e, nagrakera keke hunoznantoanki, ana miko megia' mono naga'mo'za musenke hurantaze. ⁵Anahukna huta nozni'afima atru nehaza mono nagara musenke huzamantoe. Esia kazigati, kotama Kraisinte agu'a rukrahe hu'nea roneniamotofo, Epenetusi musenke huntoe. ⁶Maria tamagriku huno hanavetino eri'zama eneria a'mofona musenke hugantene hutma asamiho. ⁷Nagri'a nagapinti Antronikasi ene Juniake, nagrane magoka kina hu'namokizni musenke huznantene hiho. Aposol nagamo'za ke'za antahiza hu'naza netrene. Znagra kota Kraisintera znagu'a rukrehe hutakena, nagra henka nagu'a rukrehe hu'noe. ⁸Ampliatulina, Ramofompi navesinentua roneniamotofo musenke hunteto. ⁹Magoka Kraisi eri'za e'neruna ne' Ubanusina musenke hunentena, knare roneni'a Stekisina musenke hunteto. ¹⁰Kraisi eri'za tamage huno eneria ne' Apelesi musenke hunentena, Aristobulusi nompimemniza nagara, musenkea huzmantoe. ¹¹Nagri nagapinti ne' Herotionina musenke hugantene hutma asamiho. Nasisusi nompimemni'nazana nagakura musenke huramante huta znasamiho. ¹²Ramofonte eri'za hanavetike eneri'a atre Traifena ene Traifosakigiznia musenke huranantene huta znasamiho. Ramofonte tusi'za huno hanavetino eri'zama enerige'na navesinento'a a'mofo Pesisinena musenke hugante'ne huta znasamiho. ¹³Rufusina Ramo, Agri'a suzane huno huhamprinteno avrenemofone, agri nerera'a nagri'enena nenareraza hu'nea ara musenke hugantene huta asamiho. ¹⁴Asinkritusima, Flegonima, Hemesima, Patrovasima, Hemasiz'anema nemaniza tafuhe'ine, tasarahehe'ina musenke huramantene huta znasamiho. ¹⁵Filogusima, Juriamana, Nereusi ene nesaro a' ene, Olimpasi ene, ana miko Anumzamofonte mani'nazana nagatega musenke huramantene hutma znasamiho. ¹⁶Maka Kraisi mono nagamo'za tmagri'tega musenke atrazageno vie. Fatgo huno ruotge hu'nea avu'ava hutma agi hene, agona ahene hutma maniho.

Poli'a vgare znavumro zmante'nea naneke

¹⁷Nafu nagnahete, hankavetina ama kea neramasamue, Amu'notamifima atane'zama avrenente'za, koma rempi huramigeta antahi'naza ke'ma, havigeretima eme rempi huramiza tamentintima

eri kragogo negiza vahekura, kva hunetma mani kore hutma ogantu'a maniho. ¹⁸Na'ankure e'i ana vahe'mo'za Rantimofu Kraisi eri'zana e'norizanki, zamagra'a knare zankuke nentahize. Haga huno masave ke zmireti, fatgo zmavu'zmavama nehza nagara zamarevatga nehaze. ¹⁹Kema amage nentaza tamavutmavamofu nanekea maka vahe'mo'za antahivgare'naze. Hianagi tmagrikura musezanimofu avite'ne. Hianagi nagri'ma navenesiana, knare antahintahizanteti tamagra knare'ma hu'nesia avu'ava nehutma kefozana osiho. ²⁰Arimpa fru Anumzamo'a kofa huno Satana, kagafi azeri antefenka anteno rehapatigahie. Rantimofu Jisasi Kraisi asuntgizamo'a tamagra ne mesie.

²¹Magoka eri'za eneru'a ne'mo Timoti musenke atreramante. Anahukna hu'za nagri nagamo'za, Lusiusima, Jesonima Sosipeta'zanena musenke hurmantaze.

²²Nagra Tertiusina, Poli ke nehigena ama avoma kre'noa ne'mo'na musenke Ra'mofompi hurmantoe.

²³⁻²⁴Kaiusia noma'afi nagri ene mono kevu nagamota tavrentegeta muse huta amafi nemnuna ne'mo, tamagritega musenke atreramante. Erastusi'a rankumamofu zgore kegva hu'nea rankva ne'mo ene Kuatusi'a, mono nerafu, tmagritega musenke atrermantaze. [Rantimofu Jisas Kraisi asomumo maka tamagrane mesnie.]

²⁵Anumzamo'a tmagrira knare musenkema neramasamua kante tmazeri hankavetise. E'i Jisasi Kraisi knare musenkene, vahe'mota tmavresigu korapa oku'a retro hunte'nea naneke neramasamue.

²⁶Hianagi manivava Anumzamo huzamantege'za, kasnampa vahe'mo'za avontafepina krente'naze. Ama ana kemo'a megia vahete eama hige'za, maka kaziga vahe'mo'za negaze. Hu'negu zamaganena nege'za zamentinti nehu'za amage antesazegure. ²⁷Agrake, knare antahizane Anumzamo, Jisas Kraisimpi, ra agi'a erivava hugahie. Tamage.

Poli'a Korinti

Vahe'mokizmi Ese

Avonkrezami'nea Naneke

1 ¹Poli'na nagra, Anumzamo Agra'a avesite Kraisi Jisasi aposol eri'za vahere hu'nemo'na nerafu Sostenesi'ene.

²Korinti kumate nemniza Anumzamofono mono nagamotarega, Kraisi Jisasi'ma tmazeri avusese hurmantegeta ruotge (saints) huta mani'naza nagatega nevuno, mika vahe kokankoka mni'ne'za, tagri Rantie hu'za agi nehaza vahetegane, zamagri ene tagri ene Jisas Kraisi'a Rantimofono kea kreneramune.

³Nafati, Anumzantegati ene, Ranti Jisas Kraistintegati asunkuzane, rimpa fruzamo'a tamagritega vie.

Poli'a musenke Anumzamofono hunte'nea naneke

⁴Tamagrikura Anumzamofontega musenke huvava nehue, na'ankure Anumzamo'a asunkuzana, Kraisi Jisasi'ma tami'ne. ⁵Hanki Agripinti, keaga hu'zampine, antahintahizatamifina knare nehutma, maka'zampina eri avi'netaze. ⁶Na'ankure Kraisinku'ma huama hu'na tamasmimoazamo, tamagripina eritamage nese. ⁷E'izanku maka Avamupi neramia musezampina atupa nosuta, Rantimo Jisas Kraisi'ma eama hanigu, tamagu'areti avegantaze. ⁸Hanavea tamisigeta referera uhanatigahaze. Ana hanigetma Rantimofono Jisas Kraisi'ma esia kna zupa hazenke tamia omnegahie. ⁹Anumzamo'a ke hunte'nere ana kemofono amage'ante Ne'mo, Agra'a Nemofono Jisas Kraisi Rantimofone trogoteta magopi manisunegu, tagia hu'ne.

Mono vahe'mokizmi amunompi knaza me'nea naneke

¹⁰Nenafugata hanaveti'na tamantahinegoe, Rantimofono Jisas Kraisi agifi miko'motma mago tamarimpa ohunte ahunte nehanageno amunontamifi atane'zana omneno. Ana hanutma fatgo hutma magoke antahi'zampine, tamagesa antahi'zampinena eri mago hugahaze. ¹¹Nafuhetane

nasareheta, mago'a ke ha'ma amu'nontamifima me'nea zankura, Kloesi nagapinti mago'a vahe'mo'za eme nasmi'naze. ¹²Nagra ama kegu nehue, tamagripinti mago'mo huno, Nagra Poli amage'nentoe higeno, mago'mo huno nagra Apolosi amage'nentoe higeno, rumo'a huno, nagra Sifas (Pita) amage'nentoe higeno, eteno rumo'a huno, nagra Kraisi amage'nentoe nehie. ¹³Kraisti'a Agra ataneno refako hu'nefi? A'o anara osu'ne. Tamagritekura Poli keka zafarera fri'nefi? A'o anara osu'ne. Tamagra Poli agifi tina fre'nazafi? A'o anara osu'naze. ¹⁴Nagra Anumzamofona muse huntoe, na'ankure mono tina magore hu'na tina freormante'noe. Hianagi Krispusine Gaiusikizni zanagrike fre znante'noe. ¹⁵Ana hu'negu mago'mo'a huno Poli agifi mono tina fregante'noe huno osugahie. ¹⁶Izo, nagra Stefanasi nomp nemaniza naga mono tina frezamante'noe. Ananteti e'neana mago'a vahera mono tina frezmante'nesuo antahinagekani'noe. ¹⁷Ana hu'negu Kraisi'a mono ti frezamtogura huonante'ne. Hianagi knare musenke huama hanane huno hunante'ne. Hagi ama mopafi mreri antahi'zampinti, Kraisi'ma keka zafare fri'nea zamofu hanave'a eriotregahue.

Kraisti'a Anumzamofu knare antahi'zama'ane himamu'a mni'nea naneke

¹⁸Fnanema hanaza vahe'mo'za keka zafamofu nanekegura neginagi naneke hu'za nentahize. Hu'neanagi tagri'ma tagu'vazino tavre'nea vahe'mota, e'i Anumzamofu himamu'e huta nehune. ¹⁹Ana hu'negu, korapa avontafe'ma krente'nefina anage hu'ne, ***knare antahi'zane vahe'mofu antahi'zana eri haviza nehu'na, antahi ankere vahe'mofu antahi'zana eri atregahue*** huno hu'ne. (Aisa 29:14)

²⁰Antahi'zane nera ina mani'ne? Avontafe'ma kre antahi'zane nera ina mani'ne? Ama knafi ke hafra hu nera ina mani'ne? Anumzamo ama mopafi antahi'zane vahera, antahintahi'zazmia zmazeri neginagi nehie. ²¹Anumzamofu antahintahimo'a ama hu'negenokino, zmatrege'za ama mopafi vahe'mo'za zmagra'a antahi'zantetira Agrira antahi ama nosaze. Hianagi Anumzamo'a musema nehiana, vahe'mo'za neginagi naneke hu'za nehaza nanekema huama hunke'za zmentinti nehaza vahe zmahoneke. ²²Tmage, Jiu vahe'mo'za avame'za ketete hu'za antahinegazageno, Griki vahe'mo'za antahintahi'zanku nehakrazanagi, ²³tagra Kraisi rugeka zafare ahe'za hanti'naza naneke huama nehunazamo'a, Jiu vahe'mokizmia zmagigo zamino zmazeri tanafahu havegna nehuno, megia vahetera neginagi nanekegna nehie. ²⁴Hu'neanagi, ana Jiu vahe ene megia (Griki) vahetera, Anumzamo'ma zamagima hu'nea vahe'mo'za, Kraisi'a Anumzamofu hankavene, antahintahizama'e hu'za nehaze. ²⁵Na'ankure Anumzamofu neginagizane hu'za, nehaza zamo vahe'mofu antahintahizana agatenereno, Anumzamofu hanave'a omne'ne hazazamo'a vahe'mofu hanavea agatere'ne.

²⁶Nafuheta kma antahiho, inankna vahe mani'nageno tamagia hu'nefi vahe'mofo zamurera antahi'zane vahera omni'nazane, rama'amota hanave vahera omani'nonane, rama'amota zmagine nagapintira omni'nonanagi, ²⁷Anumzamo'a, mopafi vahe'mo'za antahintahizmi omane'ne nehu'za, kafenkami netraza vahepi erizana erino, knare antahintahine vahe mani'none haza vahera, Anumzamo'a zamazeri zamagaze nehuno, hanave'a omne'ne huza haza vahepi eri'zana erino, hanave vahere hu'za haza vahera zamagaze erinezmie. ²⁸Ana nehuno zmagi omnene huza ke fenkami atraza vahepi, Anumzamo'a huvazino zmagine hanave vahera zmazeri zamagaze nehie. ²⁹E'ina hu'negu mago'mo'a Anumzamofu avufina avufaga mareorigahie. ³⁰Hu'neanagi, Agrama eri'nea eri'zamo higeta, Kraisi Jisasimpi mani'naze. Kraisi'a Anumzamofontegati knare antahintahi zantia efore hu'neana, e'i fatgo avu'ava'zane, mani ruotge huno mani'zane, miza hurante Ne' mani'ne. ³¹Ana hu'negu Anumzamofu avontafepina anage huno krente'ne, ***Avufga antemreriku hanimo'a, Ramofoma antahino keno hu'neazanku avufga antemrerigahie*** hu'ne. (Jer 9:23-24)

Poli'a Korinti vahe'mokizmi zamentintigu hu'nea naneke

2 ¹Nenfugtane nasareheta, tamagrite'ma e'noana, haganentake ke'ni'areti ene knare antahintahi zanteti Anumzamofu agenke tmasminakura ome'noe. ²Nagra'ma antahi'zama retro hu'noana, tamagrane mani'nufina mago'zankura ontahigahuanki, Jisas Kraisiama ahe'za rugeka zafare hanti'naza zankuke antahigahue. ³Tmagri'enema manuana hanave'nia omnege'na, kore nehu'na, nahirahi zampi mani'ne'na, ⁴rempima hunerami'na, nanekema huama nehuana, tamagri tmagu'a eri vakanenaku knare antahintahi zampintira osu'noanki, Ruotge Avamumo hihamu hanave'a erinte ama nehie. ⁵E'ina hu'negu tamentintimo'a vahe'mofo knare antahintahi zampina omneno, Anumzamofu himamu hanavefi meno.

⁶Tagrama knare antahintahizamofu keagama nehunana, zmentintifima nena hu'naza vahepi nehune. Hianagi ama knare antahintahigu'ma nehunana, ama knafino, ama mopafi fanane hanaza kva vahetmimofu knare antahintahi zankura nosune. ⁷Tagrama nehunana Anumzamofu knare antahintahia, korapa oku'a retro huntogeno me'neazanku nehune. Ana antahintahizana mopa fore osu'negeno oku me'neana, e'i ana antahintahizana, menima tagrama knare hanunku retro huntene. ⁸Ana antahintahizana magore huno meni gnafi kva vahe'mo'za antahi ama osu'naze. Na'ankure antahi ama hu'nazasina, hanave'ane Ramofona ahe'za keka zafarera ohantizasine. ⁹Hu'neanagi, avontafepi kre'nea kante ante'za, ***avurgamo onkegeno, agesamo ontahigeno, vahe'mo'za antahi'za ke'za osu'nazana Agriku zamavesi nentamokizimi Anumzamo retro huzmante'ne.*** (Aisa 64:4)

¹⁰Hu'neanagi Anumzamoa, Ruotge Avamu'afi huvazino, tagritera eriamana nehie. Na'ankure Avamu'mo mika zana hakareno, Anumzamofoku'a antahizama'a erinte ama nehie. ¹¹Na'ankure, iza vahepintira mago vahe'mofo antahizampima me'nesia antahizana keno antahino hugahie? Agri'a avamu'moke agu'afi me'nesia antahizana keno antahino hugahie. Anahukna kante Anumzamofoku'a agu'agesa mago'mo'e huno antahino keno osugahie. Anumzamofoku'afi antahino keno hugahie. ¹²Menina hago Avamura eri'none, ama mopafi avamurompage Anumzamofontegati Avamure, e'ina hu'negu Anumzamomane neramiazane antahita keta hugahune. ¹³Mika kema nehunana, vahe'mo rempi huorami'nea antahintahi nosune. Anumzamofoku'afi rempi hurami'nea antahintahire nehunankino, ana Avamu'mo taza higeta, avamu antahizampi Avamu'mofo nanekea eri ante mago huta eriamanehune.

¹⁴Hu'neanagi Anumzamofoku'afi Avamu'ene omani'nea vahe'mo'a, Anumzamofoku'afi Avamutegati esiazana e'origahie. Na'ankure zmagra anazama kesazana neginagi zankna hanige'za, antahiamara osugahaze. Na'ankure zamagra Avamu'mo zmaza hanige'za antahiankeregahaze. ¹⁵Hu'neanagi aza'o Avamu'ene mani'nesimo'a, mika'zana refko huno antahiaman hugahie. Ana hugahianagi mago'mo'e huno Avamu'ene mani'nesimofona refko huno ageno antahino osugahie.

¹⁶***Iza Ramofo agu'agesa antahino keno nehuno antahintahiamigahie?*** hu'ne. (Aisa 40:13) Hianagi Kraisi antahintahizana, tagra eri'none.

**Mono eri'za vahe'mofo eri'zana, Anumzamomane tevenuti
kreno refko huno kesia zamofomane naneke**

3 ¹Nenafugatane nasareheta tamagra ne ko'ma mani'noana, avamupi nena hu'za mani'naza vahe'mo'za nehazaza hu'na nagra noramasamue. Hianagi mopafi avu'avazampi mani'nagu Kraisimpina osi mofavre mani'nazage'na neramasmue. ²Nagra rempima huramufina amiri tamiaza nehu'na, hanave ne'zana noramue, na'ankure tamagra hanave ne'zana eriga osu'naze. Tamage, tamagra hanave ne'zana eri avamentera omani'naze. ³Na'ankure mopafi vahe'mo'za nehazankna nehaze. Na'ankure knive nereta, ke fra amu'nontamifina nehaze. Tamagra ama mopafi vahe'tfa omani'nafi? Tamagra mopafi avu'ava zampi vano hiazana nosazafi? ⁴Na'ankure mago'mo'a huno, nagra Poli amage nentoe nehigeno, rumo'a nagra Apolos amage nentoe nehiana, tamagra mono ontahiaman vahe mani'nazo?

⁵Apolosi'a inanknahu nere? Poli'na iza'ne? Tagra eri'za vahetfa mani'no'e. Ramo hurantegeta tagra eri'zana e'neru'e. Anumzamomane tagripi huvazino tamaza higeta tamentinti'a hu'naza eri'za ne' tre'ne. ⁶Nagra

avimza asogeno, Apolosi'a ti ami'ne. Hianagi Anumzamoke azeri nena nehie. ⁷Anahigu avimza kri'nemo' o tima ami'nemo enena razana omne'neanki, Anumzamo maka zana azerinena nehie. ⁸Avimzama ase'nemo'ene tima ami'nemo enena magoke eri'zanke e'neriankino, eri'zama eri'na'a avamente ante'ne miza zani'a erigaha'e. ⁹Na'ankure tagra Anumzamofu eri'za vahe manuketa, tamagra Anumzamofu hozane, nonkna hutma mani'naze.

¹⁰Anumzamo'a asunku zama'areti nami'nea avamente, nogi antahi'zane vahekna hu'na nomagi trara eri agafa hunte'noge'za, mago'a vahe'mo'za anante negize. Hianagi magoke magokemo'a, nankna huno kinaku hanuno'a, kva hu'nenno ana agofetura nona kino. ¹¹Hianagi mago'mo'e huno ru tratera nona eri agafa huno onkino, ko'ma ki'nea trateke kino, e'i Jisas Kraisi Agrake ana trara mani'ne. ¹²Anante'ma mago'amo'za kisazana koliretiro, silva retiro, zgo'amo mreri'nea haveretiro, zafaretiro, rampa zantetiro, hofareti negizankna nehazankino, ¹³magoke magokemofona eri'zama'amo'a eama hugahie. Refkoma hania knarera tevereti kreno eri'zama'amofona nena'a eriamu hugahie. Na'ankure magoke magokemo e'neria eri'zamofu hanave'a, tevenu kreno eriamu huno kegahie. ¹⁴Hagi iza ana tra'mofu agofetu eri'za eri'nesia eri'zamo tevema oresigeno'a, mizama'a erigahie. ¹⁵Mago'mofu eri'zamo tevemo tevga resigeno'a, ana eri'zamo'a haviza huno fanane hugahianagi, ana ne'mofona, tevefinti ahokeno avreankna hugahie.

¹⁶Tamagra Anumzamofu mono no mani'nageno, Anumzamofu Avamu'mo'ma tamagu'afima mani'neana ontahi'nazo? ¹⁷Iza'o Anumzamofu noma erihaviza hanigeno'a, Anumzamo'a anamofona azeri haviza hugahie. Na'ankure Anumzamofu nomo'a ruotge hu'negenka, kagra ana no mani'nane.

¹⁸Mago vahe'mo antahintahi huno, nagra knare antahi'zane vahe ama knafina mani'noe hania vahe'mo'a, agra'a ravatga osino. Hanki atrenkeno neginagi vahe maniteno, henka knare antahi'zane vahera efore hino. ¹⁹Na'ankure ama mopafi knare antahi'zamo'a neginagi avu'ava Anumzamofu avufina me'ne. Hanki anage huno Anumzamofu avontafepina krente'ne, ***knare antahi'zane vahe'mo'za knare antahi'za zmireti, vahe rezmatga hunaku hazana, Anumzamo'a zmazenerie.*** (Jop 5:13) ²⁰Mago'ane avontafepina anage hu'ne, ***Ramo'a knare antahi'zane vahe'mofu agafa'a keno antahino hiana, amnezankna nehie.***

(Sam-Zga 94:11) ²¹Ana hu'negu mago'mo ugota hurmante'simfonkura tmavufa ra osiho, na'ankure maka'zana tmagri'zane. ²²Poli'na fi, Apolosi pi, Sefasi pi (Pita), ama mopafi kasefa huno mni'zampi, fri zampi, meni knafi, henkama esiankna maka tamagri'za me'ne. ²³Tamagra Kraisi suza manizageno, Kraisi'a Anumzamofu su'za mani'ne.

Kraisi Aposol naga'amofu naneke

4 ¹Atregeno vahe'mo'za tagriku'ma antahi ramisazana, Kraisi eriza vahere hu'za nehu'za, Anumzamofu oku'zama eri ama neha'a netre'ne hugahaze. ²Hanki menima kva hugahane huno antahi ami'nesimo'a, kvahu fatgo nehinkeno, tamage hu'za hugahaze. ³Nagra nagesa nontahue, Kagrama refko hunante'nano, vahe'mo'za nehaza keagafi (kot) refako'ma hunante'nazana, tamage hu'na nagra'agura refko nosue. ⁴Nragu'ma antahuana nagu nagesamo'a ama hu'ne, hianagi e'izankura nagra'niagura fatgo hu'noe hu'na nosue. E'i Anumzamo Agrake refko nagrira hunantegahie. ⁵E'ina hu'negu refko osuta atreta avega ante'nenkeno, huhamprinte'nea knama Ramo'ma esuno'a, Agra hanimpi oku'a frakino vahe'mofu tumopi me'neasizana, emeri ama nehuno, vahe'mofu agu'afi me'nesiazana eriana hugahie. E'i anankna magoke magoke'mofona, Anumzamo huzmasga huzmantegahie.

⁶Menina nenfugatane nensarogata nagrare' ene Apolosinte'ene huntena nehuana, tamagri'ma tamaza hanigu nehue. Ana hanigeta ama kema nehu'a kemofu agu'agesa keta antahita hugahaze. Avoma krente'nea kante anteramita nemanita, mago'mofu hufenkami netreta, magomofu husga huontegahaze. ⁷Na'amo vahepintira tamagrira tamazeri ruzahura nehie? Naza tamagra ante'naza zana Anumzamo'a, ontami'ne? Hagi koma tamimi'neana, na'a higeta tamufa erira huta e'ori'none huta nehaze?

⁸Tamagri'ma tamesiazana ko eri avite'naze! Tamagra ko tusi'a feno ante'naze. Tagra tamaza osu'nonanagi, tamagra ko kini vahe mani'naze! Tamage nagri'ma navesiana, tamagra ko kini vahe mani'nesage'na, tagranena anahukna huta kini vahe manigahune. ⁹Nagrama nagesama antahuana, Anumzamo'a tagri Aposol vahe'motafi huvazino, henkarfana erinte ama nehie. Vahe'mo'zama ahefrisie hu'za nehazankna nehune, na'ankure ama mopafi vahe'mo'za hunte'za kiza razankna nehunkeno, ankeromo'zane vahe'mo'za neragaze. ¹⁰Tagra Kraisi agimo'ma mareriniiazanku negi vahe mani'none, hianagi tamagra Kraisimpina antahi'zane vahe mani'naze! Tagrira hanavetia omneanagi, tamagra hanave vahe mani'naze! Tamagri tmagi hesga nehazanagi, tagrira tagi hupri nehaze. ¹¹Hanki meninena, ne'zankura tga'neteno, tinku tave nesino, kukena timo haviza nehigeno, knona neramizageno, noma mani so'e hu'zana nomne. ¹²Tagra'a tazampinti mraguzatita, eri'za erita ne'zana erifore nehune. Tagri'ma kema huhaviza hurantageta, asomu ke hunezmantone, tahageta oti hanavetita anagna e'nerune. ¹³Vahe'mo'za havigema hurantageta, anankegura ontahita akoheta eri mago huta nemanune, tagra ama mopamofu kugusopa manineta, vahe'mofu agote'za orogofavegna huta meninena mani'none.

¹⁴Ama nanekea, tamagaze hinogu kre'noramuaniki, nagra navesinentoa mofavre ni'agna hu'na tamavumro nentoe. ¹⁵Na'ankure tamagrira 10

tauseni'a vahe'mo'za Kraisimpi kva kriramante'ne'za tamazeri fatgo hugahazanagi, tamagrira rama'a neramafa omnigahie. Na'ankure nagra Krai Jisasimpinti neramafa'za hu'na mani'ne'na, knare musenkea neramasamue. ¹⁶E'ina hu'negu nagra huhanveti'na neramasamuanke, nagri navu'nava eriho. ¹⁷Ama ana agafare Timotina tamagritega huntogeno vie. Ramofompina kentahino amage nentege'na navesinentoa mofavre ni'agino, agra nagrama Kraisimpima mani'na neozana huramagesa nehuno, hakare kaziga maka mono nompimpi rempima hunermuankna hugahie. ¹⁸Mago'a mota nagrikura, Omegahie huta nentahita, tamagra tmavufga erisaga nehaze. ¹⁹Hianagi nagra Anumzamofa ave'sizama me'nenige'na ame hu'na esu'na, zamufga rahu vahe'mo'zama nehza kegera eme ke'na eri fore osugahuanki, nankna himamu eri'nazafi eme zmagegahue. ²⁰Na'ankure Anumzamofa Kumara kege hu'za omne'neanki, hihamu'ane hanave'a me'ne. ²¹Tamagrira na'anku tmavenesie? Nagra sefu knone e'na eme tamazeri ftago hanufi, avesinte'zane rimpa fruzane esue?

Monko avu'avazanku i'o hu'nea naneke

5 ¹Amanahu nanake eme hzage'na antahi'noe, mago monko avu'ava zamo'a tamagri amunompimpi fore hu'ne, megia vahe'mo'za amanahu havi avu'avara nosaze. Ama ana avu'avamo'a amanahu hu'ne, mago'mo'a nefa a'ma eri'neazanku nehue. ²Higetma tamagaze nehuta, tamasunku hugahazanagi, tusi tamavufga ra nehaze. Anazama hu'nemofona amu'nontmfintira avre atregahaze.

³Tmage huno navufgamo'a tamagra nena anampina omni'noanagi, avamunimo'a tamagra ne mni'nege'na, iza'o anazama hu'nemofona, anampi mani'neni hiza hu'na hago refko hunte'na ke'noe. ⁴Tamagrama Rantimofa Jisasi agifima eritruma hanafina, Rantimofa Jisasi hanavefi, avamupi tamagra ne manigahue. ⁵Nagrama nehuana, ana nera sata azampi avre'trenkeno amega avufga azeri haviza nehinkeno, Ramo esnia knarera avamu'a agu'vazigahie.

⁶Tamagra tamagi erisaga nehazageno knarera nosie. Sikonima herazafima, osi'a zistima antageno ana mika'zama azeri zonereana tamagra ontahi'nazafi? ⁷Korapa zistia erinetretma, tamagra kasefa zo-ore bretigna hutma maniho. E'i ana avamente tamage zo-ore breti mani'naze. Na'ankure Kraisima atama eri'neazamo'a, kinafinti ozmahe zmagetere'nea knare antahimi'za nenaza (Pasova) sipsipi afu fri'neankna hu'ne. ⁸Ana hu'negu ana knare'ma muse hanunana, korapa zistima ante'nea bretia, kumi ene havi avu'avateti nosune. Hianagi ana knare musema hanunana, zo'ore bretia, e'i tamage kene, tamage avu'avateti ene musena hugahune.

⁹Ko'ma avoma krerami'nofina monko avu'ava zampi mani'nesia vahe ene tragotetma omaniho hu'na hu'noe. ¹⁰Nagra nehuana megia vahe'mo'za monko avu'ava nehazampi, vahe'mofozanku ke zmanunu

nehaza vahepi, zamagraguke nentahiza vahepi, krunage hu'za musufa nesaza vahepi, havi anumzante mono hunentaza vahe'ene tragotetma omnihogura nosue. Tamagrama amanahu vahe'ma zmatre varegahunema hanutma, ama mopa atrevgareho. ¹¹Hu'neanagi nagrama avoma krerami'nofina, mago ne'mo'ma Kraisinte namentinti nehue nehuno, monko avu'avaza nehuno, vahe zante kenunu nehuno, havi anumzante mono hunenteno, vahe huhaviza hunenteno, aka ti neno neginagi neneno, havige huno kumzafa zante hania vahe'ene, tragoteta ne'zana onetfa hiho hu'na hu'noe. ¹²Megi'a mani'naza vahe'ma refko'ma huzmante eri'zana nagri zana omne'ne. Hianagi mono agu'afima mni'nea vahera, tamagra amne refko huzmantegahaze. ¹³Hu'neanagi Anumzamomegi'a mni'naza vahera refko huzmantegahie. ***Amu'nontamifinti havi avu'ava'ma hania nera, tamagra'a ahenati atreho.*** (Diu-Kas 17:7)

Mono vahe'mo'za kegaga ohunte ahunte osnaza naneke

6 ¹Mago mono neramafu'ma hazenke hurmantesigetma keagare avretma vunaku'ma hanutma, mono kva vahete avretma vuga'zanagi, nahigetma fatgo osu megia kva vahetera avretma nevaze? ²Anumzamofonaga'mo'za ama mopama mago kna refko'ma hnazazana, tamagra ontahi'nazafi? Hagi mopafi vahe'ma tamagrama refkoma hu'nesutma, na'a hanigetma tamagra neonse keagama amu'no tmifima fore'ma hiankea erifatgo osugahaze? ³Tagrama henkama ankeronaga'ma refko'ma huzmante'sunana ontahi'nazo? Nahigetma onensa hazenkea refko osugahaze! ⁴Hu'negu amu'nontamifima mago tamarimpa osu'zama fore'ma higeta, tamagra nahigetma mono nompima zmagima omne'nea vahera huzmantage'za, ana kema refko hutera o'netize? ⁵Ama kema nehuana tmagaze hinogu nehue! Tamagripina magora keaga refkohu knare antahintahine vahera omni'negeno nehiaza nehaze. ⁶E'ina hugaragi, mono ne'mo'ma, mono nefuma keaga huntenakura, avreno fegia vahe'mofo zamufi hunente.

⁷Na'a hanigeta ana knazana tamagra 'a e'origahaze? Na'a higeta havizama hurmantazana atrenozmantaze? E'inama hazazamo'a tamagerafa huno tmagrira tmazeri fenkami netre. ⁸Hianagi tamagratmi kefozana nehutma, reramata nehaze. E'inahu'ma nehazana, mono tmafuhe'ine tmasarehe'ina kefozama hazana atrenozmantaze.

⁹Anumzamofokumara fatgo osu veamo'za erisanti ohregahaze hu'nea kea tamagra ontahi'nazafi? Atrenkeno tmagri'a antahintahimo'a tmazeri havia osino! Monko avu'ava'zamo azeri haviama nehia vahe'ma, amema'a omne zante monoma hunentea vahe'ma, ru vemofo a'nene, aravema hu'nea vemo'o, a'mo'ma atreno ru vene savri nehiane, vene'nemo vene'nene monko'za nehia vahe'mo'zane, ¹⁰kumzafa vahe'ene, vahe'zante kenunu nehia vahe'ene, aka ti neno havia huno neginagi nehia vahe'ene,

vahe'mokizmi zmarimpa zmazeri havizahu ke nehaza vahe'ene, krunage nehaza vahe'mo'za, Anumzamofu Kumapina uofregahaze. ¹¹Mago'amota e'inahu vahe korapara mni'nazanagi, Anumzamo sese hurmanteno, tmazeri ruotge hu'ne. Na'ankure Ramofu Jisas Kraisi Agifine, Anumzantimofu Ruotage Avamupi higetma, tamagra Anumzamofu avufina fatgo vahe mni'naze.

Tavufgamo'a Anumzamofu su'a me'nea naneke

¹²Miko'zana knare hu'neanki'na amne hugahue hunka hugahanagi, anampintira ana miko'zamo'a kaza osugahie. Ana hugahianagi, mago'zantere hu'na kazokzo huontesue. ¹³Ne'zana narimpamofu suzane, narimpamo'a nezamofu suzanagi, ana taregara Anumzamo'a znazeri haviza hugahie. Kavufga monko avu'ava'za hunka eri haviza hu'zana omne'neanki, Ramofu suza menegeno Ramo'a, tvufgamofu su'ane. ¹⁴Anumzamo'a Ramofona azeri oti'neankino, tagri enena anazanke huno, Agri'a hanavereti tazeri otigahie.

¹⁵Tamagri tamavufgamo'a, Kraisi avufgama me'neana tamagra ontahi'nafi? Amane Kraisi avufa eri'na monko avu'ava zante'ma atresuana knare hugahifi? I'o ana osutfa hugahie! ¹⁶Huge, iza'o savri a'ene monkozama himo'a, ana a'ene mago zanavufga eri'nesa'ana ontahi'nazafi? Na'ankure avontafepina amanahu ke hu'ne, ***Taremokea erimago znavufa segaha'e hu'ne.*** (Jen-Agf 2:24)

¹⁷Hianagi mago'moma Ramo'ene hagerafino manisimo'a, avamupina znagra magoke Agranena hu'ke mani'nae. ¹⁸Savari monko avu'ava zampintira atretma freho! Mika kumi'ma mago'mago vahe'mo'ma nehiana, megia'avufare nehianagi, iza'o savari monko'za nehimo'a, agra'a avufga azeri kumi'nehie. ¹⁹Tmavufamo'a Ruotage Avamumofu mono no me'negeno, Ruotge Avamuma Anumzamo'ma tmagri'ma tmi'nea avamumo'ma anampinkama mni'neana tamagra ontahi'nazo? E'ina hu'negu tamagra 'a su'ana omni'naze. ²⁰Na'ankure tmagrira Anumzamo'a ko tusi'a mizanteti miza sermante'ne. E'ina hu'negu tamavufgareti Anumzamofu Agi'a erisaga hugahaze.

Arave hu'zamofu naneke

7 ¹Mago ne'mo'ma a'ma e'orisiana knare hugahio hutma avompima kre'naza zanku, menina kenona nehue. ²Na'ankure monko avu'ava'za hu'zanku, mago mago vemo'a agra'a, a' antenkeno, mago mago a'nemo'a agra'a ve antegahie. ³Vemo'a agra'a a'ene masenkeno, a'mo'a anazanke huno ve'ane masegahie. ⁴A'mo'a agra'a avufgamofu kva omani'neanagi vemo kva hu'ne. Ana hukna huno vemo'a agra'a avufga kva osu'neanki, a'amo kva hu'ne. ⁵Tanavufa eri mago huzankura i'o osi'o. Hianagi mago tanarimpa hutna mago'a kna amne mani'neta, nunamu hanu'e hanuta'a,

amne anara hugaha'e. Hianagi anama hutesutna ete ko eme tragoteta mani'o. E'i ana hutna tanavufamofa avesizana kegva nehnakeno, Sata'ma retanaheno ke'niana, evu oramigaha'e. ⁶Amagama nehuana nagrama nagesa antahiramua kazigatire, hagi ama kema nehuana ana hihogu tutu hunormantoe. ⁷Nagra nagesama antahuana, nagrama a' e'ori manuanakna hu'za hakare vahe'mo'za manisazegu nehue. Hianagi mago mago'mo'za rumofo rumofo museza Anumzamofonteti eri'naze. Mago'amo'za ama mani'noaza hazageno, mago'amo'a arave hu'za mani'naze.

⁸Arave osu vahe'ene, kento vahe'mota knare'ma hurmantesiana, nagrama mani'noaza hanageno'e hu'na nehue. ⁹Hu'neanagi tmavufamofa avesizama kva hu'za omne'nesige'za, zmatrenke'za ve eri, a' eri hiho. Ana hanagu knare'ma haniana ve eri, a' eri hu'za mani'nesageno monkozamofa zmavesi'zana omnegahie.

¹⁰Ko'ma arave hu'naza vahe'motarega kasege huneramantoe, nagri kasegeompage Ra Anumzamofa kasege. A'mo'a ve'a otreno. ¹¹(Hu'neanagi anama hanuno'a, atrenkeno ve e'ori amne manino, huge znarimpa eri mago huke, ete neve ene, eri hagerafikeno), vemo'a a'amofona otregahie.

¹²Ruga'amotagu anage nehue, Ra Anumzamofa keompage nagra nehue, mago neramafu a'mo amentinti nosnianagi, agri ene muse huno neminsigeno'a, agra nenarona otregahie. ¹³Anahukna huno mago a'mo eri'nesia vemo, amentinti nosnianagi, agrane muse huno neminsigeno'a, nevena otregahie. ¹⁴Ana hu'negu amentinti osu ve'mo'a, nenaro ene maniazamo azeri avusese nehigeno, amentinti nosia a'mofona neve enema maniazamo, azeri avusese nehie. Ana'ma osnigeno'a mofavre zgazniamo'a agrua osisine. Hu'neanagi menina zamagrira zmazeri ruotge nehie. ¹⁵Hu'neanagi amentinti nosanimo ve atre, a' atre hukuma haniana, zmaze'ori zmatrenke'za ana hiho, amama mani'naza nomaniz'anzpina nerafuno, neresarona mago'zamo'a kina reozmanteno. Hianagi tarimpa frune manisunegu, Ra Anumzamofa tagi hu'ne. ¹⁶Hu'negu inankna hunka a'moka, ve'kamofa avu'ava'zana antahigahane? Hifi inankna hunka vemoka, akamofa avu'ava'zana antahigahane?

**Nankna huta mani'nonkeno Anumzamofa tagi
hu'ne, anankante manisuna naneke**

¹⁷Ra Anumzamofa magoke magoke'mofoma inankna avamente mni'nesigeno, Anumzamofa agima hu'nesimo'a, ana avamente manino. Ama anahukna tra ke miko mono nopina nezamasamue. ¹⁸Mago'a vene'nemotma oku tmavufa tga hu'nazageno tamagi hu'nenigetma, tamagra oku tamufgama taga hu'neaza eriso'e hu'zankura maragu'za otiho. Mago'amo'za oku zamufga tga osu'nenke'za, zamagi hu'nesimo'za, zamagra oku zamufga tga osiho. ¹⁹Avufgama taga hu'zane, avufgama tga osu'zamo'a amane'za me'ne. Hianagi Anumzamofa kasegema amage

ante'za razana me'ne. ²⁰Zamatrenke'za mago mago vene'nemo'za ina avamente mani'nageno zmagi hu'ne, ana avamente maniho. ²¹Kazokzo eri'za vahe mani'nankeno, Anumzamo'a kagi hu'nefi? E'i zankura kagesa ontahio. Ana hu'neanagi kagrama kankamu me'nesigenka kina vahe'ma omninaku hanunka, amne kagra ana hugahane. ²²Hu'negu i'zano, kazokzo eri'za vahe mani'nesigeno, Ramo agi hu'nesimo'a, Ramofompina kina vahera omnigahie. Anankanteke kina vahe'ma omni'nenigeno agi hunesimo'a, Kraisi kazakzo eri'za vahe manigahie. ²³Tamagrira tusi'a mizanteti ko miza sermante'neanki, vahe'mokizmi kazokzo eri'za vahera omaniho. ²⁴Inankna kante mago'mo'a mani'negeno agi hu'ne, nenfuga nensaroga, atregeno ana kante Anumzamofompina manino.

Arave osu vahe'mofo nanake

²⁵Arave osu vaheku'ma nantahige'naza zankura Anumzantegatira mago kasegea e'ori'noe. Hu'neanagi nagra Ramo'a asunku zama'areti huvempa hunantege'na mani'nomo'na, nagrani'a antahi'za hu'ama nehue. ²⁶Hu'negu nagrama antahuana, menima fore nehia hazenke'zampina, ana ne'mo mani'nesia kante'ma mani'nigeno'a, so'e hugahie. ²⁷Ko'ma, a'ma eri'nesunka, a'kamofu atre zankura ontahio. A'ma eritenka atrenesunka, a'ma erizankura ohakro. ²⁸Hu'neanagi arave hu'nesamoka, kumira osu'nane. Hu'negu vene omase mofa'mo aravema haniana, kumira osugahie. Ana hugahianagi, aravema hanimo'a ana nomanizampina rama'a knazampi ufregahie. Tamaza hanigu ama nanekea nehue. ²⁹E'igu amanage hu'na nehue, nenfugata nensarogata, knamo'a atupa hu'negu, aza'o a'ma antenesimo'a, a' onte vahekna huno manino. ³⁰Zmavunu nehanimo'za zavi ote vahe kna hu'za maninkeno, musema nehanaza vahe'mo'za muse osu vahe kna hanageno, mizanesesimo'a, fenoma'a omane vahe kna huno manino. ³¹Ama mopafi zama eri'nenimofona atrenkeno anazamo'a razana oseno. Na'ankure ama mopane anampima menima me'neazamo'a, fanene hugahie.

³²Nagrama nentahuana ama mopafi zankura antahintahi hakarea osihogu nehue. Aravema osu'nea ne'mo'a, Ramofonku antahintahi nehuno, Ramofo azeri muse huzankuke hinogu nehue. ³³Hu'neanagi arave hu'nesia ne'mo'a, ama mopafi zanku antahintahi'amo'a nehinkeno, nenaro azeri muse huzanku antahigahie. ³⁴Ana hu'negenokino ana ne'mofona avesizamo'a fako nehie. Arave osu a'mo'o, mofamo'enena Ramofo zanku antahintahi neha'e. Avufgare ene avamupina ruotage hugahie. Hu'neanagi arave hu'nenia a'mo'a, ama mopafi zanku antahintahi nehuno, nevena inankna hu'na azeri muse hugahue nehie. ³⁵E'i ama ke'ma nehuana, tamagri'ma tamazeri hanavetinigu nehu'na, i'o hunoramante'na tamazeri amuho nosue. Hu'neanagi mopafizamo tamazeri fako hinketa, havizampina uofreta Ramofonte hanavetita manihogu neramasamue.

³⁶Hianagi, mago ne'mo'ma vene omase mofa a'erinaku nehanigeno, ve erigahie huno huntonesia knamo agateresigeno, a'eri avesizamo ra hanigeno'a, akoheno omniga osaniana, e'i kumira omneneanki atrenkeno arave hino. ³⁷Hu'neanagi mago ne'mo'ma antahintahi'afi huvempama huno, a' e'origahue huno hu'nesuno'a, agra avesizama kegva nehuno hantka hantako osnigeno'a knare hugahie. ³⁸Hu'negu agra'a vene omase mofa'ma a'ma erigahie hu'nesimofoma a'ma erisiana knare hugahie. Hu'neanagi aza'o a'ma e'orimo'a knare zantfa hu'ne.

³⁹Neve'ma ofrino mani'nesigeno'a, nenaro'a neve a' tfa mani'neanangi, neve'ma frisigeno'a amane Ramofonte mani'nesia vea erigahie. ⁴⁰Hu'neanagi nagrama antahuana, ana a'moma vema e'ori'ma amanema manisiana, rama'a muse hugahie. Nagrama antahuana Anumzamofa Avamumo nasamianke neramasamue hu'na nehue.

Havi anumzante kre sramnavunte'zamofa naneke

8 ¹Vahe'mo'za kaza osu'za havige anumza zmazanteti tro hunte'ne'za, kresramna vunte'naza ne'zanku krenami'naza zanku tmasami'za hue. Tagra antahi'none ana mikamota antahizana eri'none. Antahi'zamo'a tavufa erisaga hianagi, avesinte'zamo'a zmazeri hanavenetie. ²Mago'a vahe'mo'zama hakare'zana antahi vgare'none hu'za antahigahazanagi, zahufa zamagrama antahiga avamentera antahi'naze. ³Hu'neanagi iza'o Anumzamofonku avesinentemofona, Anumzamo'a agrira antahino keno hu'ne.

⁴E'ina hu'negu vahe'mo'za kaza' osu havige anumza zmazanteti tro hunte'ne'za, kresramna vumentaza ne'za ne'zamofonkura, tagra antahi'none, ama mopafi havi anumzana amnezane. Hagi mago anumzana omani'neanagi, mona mopa tro hu'nea Anumzana, Agra magoke mani'ne. ⁵Na'ankure rama'a zanku monafine mopafinena anumzane hu'za nehazanagi, tamage hakare'a anumzane, hakare'a ra mani'neanagi, ⁶tagrira magoke Anumzana Nerfakino hakare'zana Agri konkomp fore higeta, tagra Agrite manunkeno, Agra magoke Rantia Jisas Kraisi mani'ne. Agripinti mikazana Anumzamo'a tro higeta, tagranena Agripinti tasimura e'nerune.

⁷Hu'neanagi ama ana antahizana ana mika'mo'za antahi'naze. Na'ankure mago'amo'za, havi anumzankura tamage'zane hu'za nentahi'za, antahintahimo'a meninena me'negenokino, nezama kresramna hunte'naza ne'zana nenaze. Zamagra zmagesama antahizana tamage huta Anumzamofa mono hunentone nehu'za, ne'zana nenageno zamagu zmagesamo'a savri nehie. ⁸Hu'neanagi ne'zamo hinketa Anumzamofontera uravao osugahune. Ne'za onesunazamo'a, tazeri haviza osuge, ne'za nesunazamo'a tazeri knare osuge hugahie. ⁹Tamagra antahi oza hutma hanaza zamo, zmentintifi hanave oti'naza vahera zmagigo

zami havegna huzankura kva hiho. ¹⁰Na'ankure antahintahi zmimo hanave oti'nesaza vahe'mokizmi zamufi knare antahintahine vahe'mota havi anumzamofu mono nompri ne'za nenesanke'za, ru zmagu'afi me'nea zmagu zmagesa eri hankavetisanke'za, kaza osu havige anumzante kresramana vu'nesaza ne'za nenaze hu'za hugahaze. ¹¹Ana hu'negu mreri antahi'zanka'amo hanave'a omne'nesia antahi'zane mono naga, Kraisi zamagriku huno fri'nesia naga zmazeri haviza hugahie. ¹²E'ina higu ama ana kazigati hanave'a omne negafuno, negasaroma kumipi avrente'sanana, agu'agesa azeri haviza hu'nanankinka, kagra Kraisintera kumi hu'nane. ¹³E'ina hu'negu, ne'zamo'ma nenefuno nensaroma kumipi avarentesige'na, nagra mago'ane kresramna vu'nesia afu'mofo ame'a onesuzamo'a, mago'mofona kumipina avreontegosue.

Poli'a miza e'ori aposol eri'zama eri'nea zamofu naneke

9 ¹Nagra kina vahe omani'nofi? Nagra Jisasi aposol eri'za vahera omni'nofi? Jisasina Rantimofona onke'nofi? Tamagra Ramofonte eri'za eri'noa rga'a omni'nazafi? ²Hianagi mago'a vahe'mo'zama antahizana aposol vahera omni'ne nehazanagi, tamage tamagritera aposol vahe mani'noe. Na'ankure Ramofonte aposel eri'za eri'noa zamofu nena rga'a tamagra mani'naze.

³Nagra refkoma hunantaza vahekura amanage hu'na kenona hunezmantoe. ⁴Mizantigna huta kave ene tinema erisunazamo'a, e'i knarera osu'nefi? ⁵Aposol naga'ene Jisasi agnahe'zane Pita'enema hu'nazaza huta zmentintine a'nea eri'neta, zmavareta vanoma hanunana, e'i knarera osu'nefi? ⁶Hanki, Banabasi ene nigrane tagra'ake zgo eri'za erita kegva hanuke'za, mago'amo'za anara osugahazafi? ⁷Ha'ma nehia vahera, agra'a erizama'arera, agra'a miza senentefi? I'o ru vahe'mo'za mizana nemie. Iza'o vaini hozama kri'nemo'a, rga'a krepia tagino nonefi? Iza'o sipisipi afuzga kegva nehimo'a, ami rima'a tatino nonefi? Ozo agra tatino nene.

⁸Nagra, vahe antahi'za avaririna kea nehufi? Anumzamofu kasegemo ene hu'neaza nehue. ⁹Na'ankure Mosese kasegefina krente'ne, ***tamagra bulimaka'o afu'mo'ma witi akru'ma nehresifina, agitera ana'okinenkeno anampintira ne'zana zogino neneno witia hareno hu'neana bulimakaonku hu'nefi? A'o.*** (Diu-Kas 25:4) Anumzamofu bulimakao afukuke ama kea hu'nefi? A'o. ¹⁰Ama tamage tagriku hu'nefi? Izo, tagriku huno krente'ne, hoza erisimo ne'zama nesigu amuhara nehanigeno, witi akru hre'nimo enena anampinti'ma ne'zama refko huno erisigu amuhara hugaha'e. Mono eri'za vahera, monoma zmasamisia vahe'mo'za, miza sezmanteho. ¹¹Tagrama Avamumofu avimzama tamagripima negrita, amega tavufgare zama tmagripinti erisunazamo razana me'nefi? Amne osi'azana erigahie. ¹²Hanki mago'amo'za kema

eme huama hza vahe'ma zmaza nehanuta, tagri enena tagesga huta mizana ontamigosazafi? Tagra hugazanagi nosune. Na'ankure Kraisi knare musenkemofa kama renkni rezanku anaknaza e'nerue. ¹³Ra mono nompima eri'zama e'neriza vahe'mo'za, kre sramna vunaku ra mono nompia eri'za neaza ne'zampinti, ne'za zmia e'nerize. Higeno kre sramnavu itare eri'za e'neriza vahe'mo'za, ne'za zmia kre sramna vu itareti e'nerizanki tamagra ontahi'nazo? ¹⁴E'inahu kna kante, Ramo'a huno, Iza'zo mono ke hanaza vahe'mo'za, zamaza hu'zana, mono kema hanage'za antahisaza vahepinti erigahaze. (Luk 10:7-9)

¹⁵Hu'neanagi nagra hugazanagi nosue. Nagra ama avoma kreneramuana, mago'za hunantehogura nosue. Na'ankure nagrama agi omne vahekna hu'na frisugeno'a, knare hugahie. ¹⁶Na'ankure nagra knare musenke hanuazankura nagia e'origahue. Mono kema hu'zana Anumzamo huo huno hunante'nea eri'zanki'na ana eri'zama e'orisuna nagra havizantfa hugahie. ¹⁷Nagra navesite knare musenkemofonte miza e'ori eri'za erisu'na, mizama'a me'neanki'na erigahue. Hianagi navesite'ma e'norinuna, Anumzamo antahinamino, kegva huo hunante'nea eri'zanki'na e'nerue. ¹⁸Nagra na'a mizani'a erigahue? Nagrama knare musenkema tmasamua zankura miza seho hunormantoe, ana hu'negu knare musenkerera mizana eriga'zanagi e'norue.

¹⁹Na'ankure mago vahetera kina vahekna osu'noe, nagra hakare vahe'mofa kazokzo eri'za vahe mani'ne'na, rama'a vahera zmavregahue. ²⁰Jiu vahe'ma zmavarenakura zamagrikna hu'na mani'ne'na nezmavroe, nagra'a kasegemofa agorga omni'noanagi, kasegemofa agorga mni namokizmia, kasegemofa agorga mani vahe kna hu'ne'na nezmavroe. ²¹Kasegema e'ori namokizmi zmavrenakura, kasege e'ori vahe kna hu'na mni'ne'na nezmavroe. Nagra Anumzamofa kasegema avariri zantera mni'noanagi, nagra Kraisi kasegemofa agorga'a mni'ne'na, kasegemofa agorga'a omni'namokizmi nezmavroe. ²²Hanavezimi omne'nemokizmirera, hanaveni'a omne vahe kna hu'na mani'ne'na nezmavroe. Nagra maka vahetera zamagrama mani'naza avutigati hu'na mani'ne'na nezmavre'na, mago'amokizmia zmagu'vazino zmaho'ma kenigu mika'zana nehue. ²³Ama ana miko'zama nehuana, knare musenkegu hu'na nehue. E'ina hanige'na anampintira nagra'a asomura erigahue.

²⁴Zmagare zokago vahe'mo'za zmagama razafina, hakare vahe'mo'za zmaga nerazanangi, magoke'mo zamagatereno mizana e'nerianki ontahi'nazo? E'ina hukna kante tamaganeretma mizana erigahaze. ²⁵Mika'mo'za zokagopima ufrenaku'ma hazamo'za, zmufamofa zmesizana maka'zampina kegva nehu'za, zamagra zmesi'zana novaririze. Mizama eri'zana osiagnafi meno haviza nehie. Hianagi tagrama erisuna mizamo'a mevava hugahie.

²⁶E'ina hu'negu nagrama nagama neroana, uhnatigahue hu'na hu'nore uhnatinaku nagare'na nevue. E'inahu kanteke nagrama nazama atroana, amne zahopina notroanki, ahegahue hu'na huazana nehoe. ²⁷Vahe'mokizmi mono ke zmasamite'na, ru nagrani'a miza e'orizanku, nagrani'a navufga hanaveti'na amasagugeno, nagri navesi'za nevaririe.

**Korapa Israeli vahe'mo'za hu'naza havi znavu'zma
hu'zanku kva hanuna naneke**

10 ¹Na'ankure nafuheta, Nagrama nentahuana, antahi ama hnazegu nehue, korapara tagehe'za hampomofa agorga'a nevu'za, hagerina takah'e'naze. ²E'i ana zamo'a mika vahe'mo'za mono ti freankna hampompine hagerimpina nehu'za, Mosese avariri'nazana, ³ana mika'mo'za ana hukna avamupi ne'za nene'za, ⁴ana mika'mo'za anahukna hu'za avamupi ti ne'naze. Na'ankure zamagrama tima ne'nazana, zamaganema ne-ea avamupi havereti ne'nazankino, ana havea Kraisi'e. (Eks-Uti 17:6, Nam-Ham 20:11) ⁵Hu'neanagi rama'amo'za Anumzamo'a muse osiaza hute'za, ka'ma mopafina ufri efri hu'naze.

⁶E'inahu zama zamagripima fore'ma hu'neazamo'a, tagritera avame'za me'neni huraverina, e'inahu kefo avu'ava'zana kerasane osugahune. ⁷Tamagra mago'a vahe'mo'za hu'nazaza hutma havige anumzante monora huonteho. Amanage huno Anumzamofa avontafepina krente'ne, ***havige anumzante mono hunente'za, ne'zane tine nene'za, oti'za monko avu'avaza hu'naze.*** (Eks-Uti 32:6) ⁸Mago'amo'za monko avu'avaza nehu'za, ana zagefinke 23 tauseni'a vahe fri'nazankna hu'zanku, tagra monko avu'ava'zana osanune. ⁹Ramofoma rehe'nazankna huta tagra rehetu onkesune, mago'amo'za anahu kna hzageno, ha osifave'mo zmahe fri'ne. ¹⁰Ke hakare hu'nazankna osnune, mago'amo'zama anahu kna hzageno, vahe'ma zmahefri ankeromo zmahe fri'ne. ¹¹Ama ana zantmima zmagrite fore'ma hu'neazamo'a, tagri rempi huramiza me'neni tazeri fatgo hanigu krente'ne. Ama vgare knafima ehnatisia zanku hu'ne. ¹²Kagrama oti hanaveti'noe hunka nentahisunka, traka hu'zanku kva huo! ¹³Antahio! revatga zama ne-eana kagritekera nome, hakare'a vahete neankna huno ne-e. Anumzamo'a Agra knare hu'neankino atresigeno, ana revatgazamo'a hanavetino kazeri otregahie. Revatgaza ne-enkeno'a katresigenka evuoramigahananki, kana kaverina oti hanavetinka manigahane.

¹⁴E'ina hu'negu knare rone'nimota havige anumzantetira manigneta maniho. ¹⁵Nagra kema nehuana knare antahizane vahe'motma neramasamue. Tamagra refko hutma nagra nehua kea antahigahaze. ¹⁶Tagrama kapufinti tima nenakura, Anumzamofa susu hunteteta nenone. E'i ana kapufinti tima erifko'ma nehunana, Kraisi korana omne'nefi? Tagra bretima korita, erifko huta nenonana, e'i Kraisi avufga omne'nefi? ¹⁷Hianagi

magoke breti me'negu, ana maka'mota hakare mani'none nehunanagi, magoke tavufga me'ne. Na'ankure mago bretireti refko huta nenone.

¹⁸Israeli vahe'mo'za hu'naza zanku tamagesa antahiho, kresramna vu itaretira refko hu'za ne'zana nonazafi? I'o nenaze. ¹⁹Hagi nagra na'anku nehue? Havige anumzantaminte kresramna vunentaza zana amnezane, havi anumzana amnezane hu'na nehue. ²⁰I'o hue! Fegi'a vahe'mo'za anankavera Anumzamofontera kre sramna vunontazanki, havi avamutaminte kresramna vunentaze. Nagri'ma nave'nesiana havi avamutaminte tragoteta omnihogu nehue. ²¹Tamagra havi hankromofu kapufinti tagitma nenetma, ete Ramofu kapufinti enena tagitma onegahaze. Havi hankromofu tafepinti nenetma, ete Ramofu tafepintira onegahaze. ²²Tagra Ramofu azeri asivazinaku nehumpi? E'ina'ma hanunana tagri hanavemo'a, Ramofu hankavea agetere'ne nehumpi? I'o.

Hakare zama hanumpina Anumzamofu agi'a erisaga hanuna naneke

²³Tagra mika'zana amne hugahunanagi, ana mika'zamo'a taza osugahie. Tagra mika'zana amne hugahaze huta hugahunanagi, ana mika'zamo'a, tazeri hanave otigahie. ²⁴Tagri'ma tazeri knare huzankukera ontahisunanki, tva'ontire'ma nemnizamokizmi zmazeri knare'ma hanunazanku antahisune.

²⁵Amne ana miko ame'ama zgore'ma atresazana mizaseta negahazanagi, ana ame'a agura igati eri'naze hutma zmantahiogeho. Ru tmagu tamagesa eri haviza hugahie. ²⁶***Na'ankure mopane anamiko zama agu'afima me'neazana, Ramofozanke me'ne.*** (Sam-Zga 24:1) ²⁷Mago amentinti osu vahe'mo'ma kagi hanigenka vanunka, afu ame'ama kamisiazana nenenka antahige' antahagera osuo, ru antahintahi ka'a eri savri hugahane. ²⁸Hianagi mago'mo kasamino, havi anumzante kresramna vunte'nea afu ame'e hanigenka onegahane. Na'ankure ana kamisimofu knare'zanku hunka onegeno, anama kamisimo'a kefozane huno antahigahie. ²⁹Kagrika'a antahintahizankura nosuanagi, rumofu antahintahizanku nehue. Inankna hu'za nagra navesite'ma huazana refko antahintahifina nehaze? ³⁰Hanki nagra Anumzamofu susu huntete'na ne'zama noazankura, na'anku haviza nehie hutma nehaze?

³¹Hanki, kave nesano tinesano inankna'zama hanunka, Anumzamofu agi erisaga hu'zanke huo. ³²Mago'mofone hunka Jiu vahepino, Griki vahepino, Anumzamofu vahepinena, zmazeri tanafa hu havegnara osiho. ³³Nagranena anahukna hu'na maka'zama huazampina, maka vahe'mo'zama muse hanazaza nehu'na, nagra knare'zankura nosuanagi, hakare vahe'mokizmi knare'zanku nehanugeno, rama'amokizmia Anumzamo zamagu'vazigahie.

Mono hunte'zamofu naneke

11 ¹Nagrama Jisas Kraisi nege'na nevararuaza hutma nagri navu'nava negeta avaririho. ²Nagra, tmagrira tamazeri

antesgahue. Na'ankure ana miko'zama hazafima tamage'sa antahi nenamitma, antahi'zama rempima huramino'a kante azeri antroko hu'naze. ³Hu'neanagi menina tamagra ma antahياما hnazegu'ma nehuana, mika vene'nemokizmi aseni'a Kraisi manigeno, a'nemofa asenia vene'ne manigeno, Anumzamo'a, Kraisi aseni'a mani'ne. ⁴Mika vene'nemo'za tavrave zmanunte'ma refitene'za nunamuma hanazano, kasnampa kema hanaza zamo'a zmagra'a zmaseni zmazeri agaze hugahaze. ⁵Hianagi mika a'nemo'za zmanunte refi'otene'za nunamu hanazo, kasnampa kema hanazana zmagra'a, zmaseni zmazeri zamagaze nehaze. Na'ankure agra magoke mani'nen, aseni azoka'ma vazagatetre'nea a'negna nehuno, asenimofona agaze erinemie. ⁶Na'ankure mago a'mo'ma azoka'ma refi'otesuno'a, agra azokara taga hutregahie. Hianagi azoka'ma tagahu zamo'ene, azoka'ma vazagate'zamo'ma a'nemofona agaze'za me'ne hanuno'a, atresageno anuntera refitegahie. ⁷Na'ankure mago ne'mo'a asenirera refi'oteno, agra Anumzamofa amema'ane rahi ami vahe mani'ne, hu'neanagi a'mo'a ve'mofa rahi vahe mani'ne. ⁸Na'ankure, vemo'a, a'pintira eforera osu'neanki, a'mo ve'mofopintira efore hu'ne. ⁹A'mofonkure huno vea trora osu'neanki, vemofonku huno a'ra tro hu'ne. ¹⁰E'ina hu'negu a'mo'a asenirera avame'za refitenkeno, anazamo'a mago'mofa kva'fi mani'ne huno ankeromokizmi zmaveri hugahie. ¹¹Ana hianagi, Anumzamofompina a'mo'a, agra'akera oraoti'neanki, vemofa hanavefi manigeno, vemo'a agrakera oraoti'neanki a'mofa hanavefi oti'ne. ¹²Na'ankure a'mo'a vahemofopinti efore higeno, anahukna huno vemofona a'mo ksenente. E'ina hu'negu, mika'zamo'a Anumzamofopinti efore hu'ne. ¹³Tamagra'a refko hiho, amne a'mo'a asenirera tvaravenura refi'ote'nen Anumzamofontera nunamu haniazamo'a knare hugahifi? ¹⁴Vemofoma zanra azoka'ma hunte'nesiana agra agaze hugahifi? ¹⁵Hianagi a'mofoma zanra azoka'ma hunte'nesiana agra'konaririzane. Na'ankure, zanra azoka'ma ami'neana, refitentenogu ami'ne. ¹⁶Hu'neanagi mago'mo'ma ke hafra amana kegu'ma haniana, nagrama hanuana, tagra ru tavutva ovaririgahune. Maka Anumzamofa veamo'za anahukna antahi'za erigahaze.

¹⁷Ama'i ke avariri hogu'ma kreneramua ke'fina, tamagrira tamazeri sga nosue, na'ankure tamagrama emeri atruma hazafina, knare'zana fore nosianki, havizanke fore nehie. ¹⁸Na'ankure ese knare'ma nagra antahi'noana, tamagra mono kevu naga mani'none hutma etru hazafina, rama'a atane'za megeno mago tamarimpa hu'zana omane'ne. Anankema nentahi'na tamagefi hu'na hu'noe. ¹⁹Tamage amu'no tamifina atane'zana me'ne. E'ina hanageno Anumzamo refko huno hu izo huzmante'nesamo'za amu'nontifina eama hugahaze. ²⁰E'ina hu'negu tamagrama eritru hazafina tivo ne'za (Lord's Supper) nenaku eritru nosaze. ²¹Na'ankure tamagrama ne'zama neneta ruga'amokizmigura zmavegaonte ko nenaze.

Mago amo'za zamaga ene nemanizageno, mago'amo'za negi ti nene'za tusi neginenaze. ²²Tamagrira tine ne'zanema nesaza nontamia omne'nefi? Hifi tamagra mono no azeri haviza nehutma, zamunte omne nagamokizmi zmazeri zmagaze hu'naku nehazo? Nagra na'ane ke hurmantegahue? Nagra tamagrira husga hugahufi? I'o. Ama ana zankura tmagrira husga osugahue.

²³Na'ankure Nagra Ramo rempi hunami'neaza, ete rempi huneramue. Jisas Kraisina komoru hu'za ha' vahe zmazampima avrentenaku haza kenagera, Agra breti erino, ²⁴Anumzamofu susu hunteteno, ana breti ko'nerino amanage hu'ne, Ama'i Nagri navufa, tamagriku hu'na neramuanki, neneta antahinamiho. (Mat 26:27, Mak 14:24) ²⁵Hagi ne'zana netageno, anahukna huno waini kapu erisaga huno amanage hu'ne. Ama'i waini kapua, kasefa hagerafi ke kora niareti nehue, amana hutma maka knama waini tima nenenutma tamagesa antahinamiho. ²⁶Na'ankure ama breti, ama kapufinti'ene nesaza zupa, anazamo'a Ramofo friza huama nehanigeno, ete Ramo'a egahie. (Mat 26:26-28, Mak 14:22-24, Luk 22:17-19) ²⁷E'ina hu'negu iza'o havi avu'ava hu'nenno, breti Ramofo kapufinti nesimo'a, Ramofo avufgafine korama'arera kefoza huno, kumi hugahie. ²⁸Mago'mo'ma breti, kapufinti neku'ma hanuno'a, agra'a avu'ava'zana refko huteno, ana breti kapufintira negahie. ²⁹Na'ankure mago'mo breti tine neneno, Ramofo avufga, nenoe huno antahi ama osnimo'a, agra'a azeri haviza nehie. ³⁰E'ina hu'negu, amu'no tamifintira hakare'amo'za hanavea omne amne hige'za, kria erizageno mago'amo'za ko fri'naze. ³¹Hianagi tagra'ama refko huta tazeri fatgo osu'nesuta, keagafi manigahune. ³²Hianagi Ramo'ma tagri'ma refko'ma nehiana, ama mopafi vahe'ma huhampri zmante'nea knazampina uofresunegu tazeri ante fatgo nehie.

³³E'ina hu'negu, nenfugata nensarogata tamagra ne'zama nenaku emeri atruma hanuta, zmavega ante'nenkeno maka etru hutenketa neho. ³⁴Hagi mago'mofoma aga'matesigeno'a, agra nonkuma'arega neteno eno. Na'ankure tamagra ma etruma hanafina, refko ohunte ahunte zana omnegahie. Hagi mago'azana, henkama esu'na emeri fatgo hugahue.

Ruotge Avamupi ruzahu ruzahu eri'za erisnaza naneke

12 ¹Hagi nafuhegatane nensarogata avamu'mofo muse zanku'ma hu'naza zamofonku eriana hu'na tmasami'za hue. ²Tamagra ko'ma kaza osu havige anumzante'ma mni'naza no manizantmia antahi'naze. Ke osu anumza antre'za tro hunte'naza zamo tmavazu higetma, avaririta fanane hukante vu'naze. ³E'ina hu'negu nagra anage hu'na antahintahima eriana hanugura neramasamue, magore huno Anumzamofu Avamu'ma agu'afima mni'ne'nia vahe'mo'a Jisasina huhaviza huontegahie. Hagi mago'mo'e huno Jisasi'a Ra mni'ne huno osugahanagi, Ruotge Avamu'mo aza hanigenoke'za hugahie.

⁴Hagi hakare'a ruzahu ruzahu museza me'neanagi, magoke Avamu'moke'za neramie. ⁵Ruzahu ruzahu mono eri'za me'neanagi, Ramo'a magoke mani'ne. ⁶Hagi ruzahu ruzahu kankamumpinti eri'zana e'nerianagi, magoke Anumzamo hakare zampine, mika vahepina e'nerie. ⁷Hu'neanagi Avamu'mofo eri'zamo'a magoke magoke'mofonte, mikomofa so'eza efore hanigu ko tami'ne. ⁸Hagi mago'mofona Avamupina knare antahintahiza (wisdom) nemino, mago'mofona ama' antahi'za (knowledge) nemie. Hianagi magoke Avamu'mo, ⁹mago'mofona amentinti hu'za nemino, mago'mofona vahe'ma azeri knamre museza ami'ne. Hianagi magoke Avamu'mo zanami'ne. ¹⁰Hagi mago'mofona ruzahu ruzahu kaguvaza eri fore hu museza nemino, mago'mofona kasnampa ke huamahu museza nemino, mago'mofona avamutmima rezagneno ke museza nemino, mago'mofona ruzahu ruzahu zmegeru'ma ru museza nemino, hagi mago'mofona ruzahu ruzahu zmageru'ma rukrehe hu museza ami'ne. ¹¹Hianagi magoke ana Avamu'moke, mika'a eri'zana erifore nehie. Hagi agra'a avesite magoke magoke'mofona nazano aminaku'ma hia musezana refko huno nemie.

Anumzamofa naga'mota Jisasi avufgagna huta mani'nona naneke

¹²Anahukna huno vahe'mofona magoke avufa me'neanagi, ru avufgamo ru avufgamo rekanuhegeno, magoke vahera fore huno mni'ne. Kraisi'a anahukna hu'ne. ¹³Na'ankure mago'amota Jiu vahe manunkeno, mago'amota Griki vahe mni'none. Mago'amota kazokzo eri'za vahe manunkeno, mago'amota amne vahe mni'none. Hianagi tagra magoke Avamupi tina freta, magoke avufafi mni'none. Ana higeta ana miko'mota magoke Avamupinti tazahu'zana e'nerune.

¹⁴Hagi magoke tavufa me'neanagi, ru tavufa ru tavufamo rekanuhegeno tavufa fore hu'ne. ¹⁵Hagi agamo huno, nagra azana omni'noanki'na, mago avufa omni'noe haniana, e'i ana kema haniazamo'a, avufafintira azeri otregahie. ¹⁶Hagi agesamo huno, nagra avurga omninoanki'na, mago avufa omni'noe haniana, e'i ana kema haniazamo'a, avufafintira azeri otregahie. ¹⁷Hianagi mika avufamo'ma avurgage'za mesigeno'a, inafinti kea antahigahie? Hianagi mika avufamo agesage mesigeno'a, inafinti mna antahigahie? ¹⁸Ana hu'negu tamage Anumzamo'a, magoke magoke tavufa eri mago huno ante'neankino, Anumzamo agra'a avesite mesie huno hire mete mete hu'ne. ¹⁹Hu'neanagi mika avufamo magoke avufgage'ma mesiana, avufamo'a inankna huno mesine? ²⁰Ana hu'negu hakare avufgamo eme rekanuhegeno, magoke avufa fore huno me'ne. ²¹Hagi avurgamo'a azamofonkura huno, kagrama nazama hu'zankura antahi nonkamue huno osugahie. Ananzanke huno asenimo'a agamofonkura huno, kagrama nazama huzankura, nagra antahi nogamue huno osugahie. ²²Hianagi mago'a tavufamokizmia

hanave zmi omne'ne huta huna zmufamo'za, ra eri'za e'nerize. ²³Hagi tagrama knare osu'ne huta huna tavufamofona knare'za hunenteta, hagi tageze tavufe huta huna tavufamofona kukena huzmanteta refi'netone. ²⁴Knare'ma huno amate me'nea tavufamo'za mago'zankura upara nosaze. Ana nehunanagi, Anumzamo'a ana miko tavufa eri magoke higeno, tavufamofona eri magoke huno knare osu tavufamo'za knare'za nehaze. ²⁵E'ina hanigeno avufamo'a atne'za amu'nozmfina omnegahie. Hagi anahukna huno amu'no zmifina oza aza huno mani'za megahie. ²⁶Hagi mago kaziga avufamo ata hozama eri sigeno'a, mika'mo'za ana atazana erigahaze. Hagi mago kaziga'a avufamo ra agima erinkeno'a, ana miko avufamo'za muse hugahaze.

²⁷Menina tamagra Kraisi avufa mni'naze. Hagi magoke magoke'mota, mago avufga'a manite manite hu'naze. ²⁸Hagi, mono eri'za erisagu Anumzamo huhamprizmante'nea vahera, esera aposol nagare, anantera kasanampa vahere, anantera rempi huzami vahere. Ana huteno Anumzamo'a kaguvazama hu vahe zmazeri otino, mago'amokizmia vahe'ma krifintima zmazeri kanamre muse'za nezamino, mago'amokizmia vahe'ma zamaza hu muse'za nezamino, mago'amokizmia kva eri'za eri muse'za nezamino, mago'amokizmia ruzahu ruzahu ageru ru muse'za zami'ne. ²⁹Mika'mo'za aposol nagake mani'nazafi? Mika'mo'za kasanampa vaheke mani'nazafi? Mika'mo'za rempi huzami vaheke mani'nazafi? Mika'mo'za kaguvaza hu vaheke mani'nazafi? ³⁰Mika'mo'za vahe'ma zmazeri knamre museza eri vaheke mani'nazafi? Mika'mo'za ruzahu, ruzahu zmageru, ru vaheke mani'nazafi? Mika'mo'za zmageru rekrehehu vaheke mani'nazafi? I'o anara osugahaze. ³¹Hu'neanagi tamagu'areti huta agetere'nea muse zankura tmavesinteho. Nagra mago knare'zantfa huno mreri'nea kana tamaveri hugahue.

Avesinte zamofa naneke

13 ¹Nagrama vahe zmagerupintiro, ankeru vahe'mokizimi zmagerura rugahuanagi, vahe'ma avesinte'zama omne'nenke'na, bero'mo ra ageru riankna nehu'na, zavena ahageno ageru riankna hugahue. ²Hagi kasnampa ke hu muse'zane mika e'neri'na, Anumzamofu oku antahizama'a e'neri'na, mika knare antahi'zana e'neri'na, nagra mika hanave namentintia hanugeno agona retufega hugahianagi, avesinte'zama omne'nenigeno'a ana miko'za hanua zamo'a amnezankna hugahie. ³Hagi nagrama maka'zani'a atre'na, zamunte omne vahe ne'za nezami'na, atresugeno tevefi navufa krefnane hugahianagi, nagripima vahe'ma avesinte'zama omne'nesigeno'a, ana miko'zamo'a amnezankna hugahie.

⁴Avesinte'zana, agazone huno mni'zane, avesinte'zana so'e avu'ava hu'zane, avesinte'zana kenunu hu'za omneno, ra agi eri'zana omne'ne, avesinte'zana avufga ra hu avu'ava hu'zana omne'ne, ⁵veganokno'zana

omne'ne, agraguke antahi'zana omne'ne, agra ame'ama huno asi ovazi'zane, rumo haviza hunte'nea zanku nontahino agekanino mani'zane. ⁶Avesinte'zamo'a havi avu'ava'zankura musena nosie. Hagi tamagezanku musena nehie. ⁷Avesinte'zamo'a, agazone huno mni'nenoma maka knazana e'nerino, amentinti nehuno, maka'za fore hugahie huno nentahino, maka knazana erino vu'za me'ne.

⁸Avesinte'zamo'a vgaoregahie. Ana hu'neanagi kasnampa ke hu'zamo ene, ru vahe zmageru ru'zamo ene, knare antahintahizamo'a vgaregahie. ⁹Na'ankure tagra osi'a antahi'none. Anama antahi'nona avamente kasnampa kea huama nehune. ¹⁰Hu'neanagi ana miko'zamofa fatgozama esigeno'a, osi'a zama nentahuna zamo'a fnane hugahie. ¹¹Ko'ma mofavre'ma mni'norera, mofavremo nehiaza hu'na nanekea nehu'na, antahintahia nehu'na, nagesa antahi'na refko'ma hu'noana mofavremo'za nehazaza hu'noe. Hu'neanagi rama nese'na, mofavre avu'ava'zana atre'noe. ¹²E'ina hu'negu kapopima avugosa ke so'e osiankna menina nehunanki, henka'a Anumzamofa avufi oge age hugahune. Menina Agrira osi'a ke'na antahi'na hu'noanagi, henka'a kena antahi'na hugahue. Agrama nagri'ma maka nageno antahini hu'neankna hugahue. ¹³Hagi ama'i tagufa'azamo mevava hugahie, amentintihu zane, fore hugahie huno antahi amuha hu'zane, avesinte zane me'ne. Hu'neanagi ana tagufa zampintira, avesinte'zamo agatereno tusi'a zana me'ne.

Kasnampa ke hu muse'zamofone, ru zamageru ru muse zamofa naneke

14 ¹Avesinte'zamofa kana, nevaririnka Avamu'mofo musezantaminkura tusiza hunka kavesinto. Hianagi Avamumofa musezantaminkura, kasnampa ke huama huzanku kavesinto. ²Na'ankure mago'mo ru ageru araniana vahetega norie. Hagi Anumzamofontega ru agerura nerie. Na'ankure mago'mo'a ana agerura antahi ama nosianagi, agra'a avamupi frakino oku me'nea ageru nerie. ³Hu'neanagi iza'o kasnampa ke nehimo'a, vahe zmazeri hankavenetino, zmazahuke nezmasamino, zamarimpa zmazeri so'e huke zmasamigahie. ⁴Iza'o ru ageru nerimo'a, agra'a azeri hanavenetie. Hu'neanagi iza'o kasnampa ke nehimo'a, mono kevumofa zmazeri hanavenetie. ⁵Nagri'ma navemanesiana, maka'mota ru tamageru'ma aranazegu navenesie. Hu'neanagi ra navesi'zana, maka'motma kasnampa ke hiho nehue. Hagi iza'o kasnampa ke nehimo'a, ru ageru nerimofona azeri agatere'ne. Hu'neanagi ru agerutamima nerimo'ma, ana ageru'mofo agu'agesa eri ama hanigeno'a, mono kevua zmazeri hanavetigahie.

⁶Menina nenfugatane nasareheheta, tamagrite ne-ena ru agerutmima ranuana, inankna huta tmaza hu'zana erigahaze? Hagi nagra eriamanehu'na, antahintahi nerami'na, kasnampa kene nehu'na, rempi hunerami'na, eriamanehu'na tmasamisugenoke, antahi amara hugahaze.

7E'i asimu omne zantamimo, konkemo'ene zavenamo'ene ageru neriankana huno, ageru ru so'ema osaniana nankna hu'za ana konkene zavenamokea znageru'ma arana'ana antahi amara hugahaze? ⁸Hagi ufemo'ma krafa hu so'ema osnigeno'a, iza ha'ma hanigura retro hugahie? ⁹Tamagranena e'i anahukna hugahaze. Vahe'mo'za nentahisaza zmageru'ma aranageno'a knare hugahie. Ru zmageru'ma aranage'za, nankna hu'za vahe'mo'za ana ketmia antahi amara hugahaze? Ana keka'amo'a amne'zankna hugahie. ¹⁰Mopafina hakare'a ruzahu ruzahu zmageru me'ne, anamokizmi zmageru'mofona agafa'a me'ne. ¹¹Hagi ru ageru arania kemofo agafa'ama antahi ama'ma osnuana, nagra agritera ru vahe kna hunentesnugeno, agranena nagritera ru vahekna hunantegahie. ¹²Kagri'enena e'inahukna hugahie. Kagra avamu'mofo musezantminkura tusi'a antahintahi hanunka, Anumzamofa antahigegenoma maka mono kevuma zmaza hania Ruotge Avamu'mofo muse'zana tamino.

¹³E'ina hu'negu, iza'o ru ageru aranimoma, ana kema agra'a rekrehe hu'zankura, nunamu huno Anumzamofa antahigeno. ¹⁴Na'ankure nagrama ru agerupinti nunamu hanuana, avamu ni'amo nunamuna nehie. Hianagi antahintahi ni'afina nena'a nomane. ¹⁵Hu'negu nagra na'a hugahue? Antahintahi'nireti nunamuna nehu'na, Avamu'niareti ene nunamuna hugahue. Avamu'niareti zamera nehu'na, antahintahi'niareti enena zamera hugahue. ¹⁶Ana hu'negu kagrama avamupintike Anumzamofa agima erisaga nehnakeno'a, inankna hu'za ana ageru'ma nornamo'za antahiamara hu'za, kagrama hanana kerera tamage hugahaze? Na'ankure kagrama agima erisaga hanana kea antahi ama nosaze. ¹⁷Na'ankure kagra knare zantfa hunka Anumzamofa musenke huntegahane. Hu'neanagi rumofona aza hunka azeri hankve otigahane. ¹⁸Nagrama mika'motma tamagetere'na rama'a ru agerupinti'ma neruazankura, Anumzamofona susu huntoe. ¹⁹Hu'neanagi nagri'ma navemanesiana mono kevufima, antahi ama huga 5fu'a kema hanugeno, ruga'amokizmima knare antahintahi zami'zamo'a, ru agerupinti'ma (10 tausen'i'a) kema hanuana agatere'ne.

²⁰Nenafugatane nasarehetma, osi mofavregna huta antahintahia osiho, havi avu'ava huzankura aminte mofavre'gna hiho. Hagi antahintahi tamifina ra vahe kna huta maniho.

²¹***Nagri'ni'a vahepina ontahinaza agerupinti kea hunezami'na, ru vahe zamagipi huvazi'na hugahuanagi, antahigosaze,*** huno avontafepina hu'ne. (Aisa 28:11-12)

²²Hu'negu ru ageru'ma ru'zana e'i avame'zane, zamentinti hu'naza vahe'mokizmi avame zanompage, zamentinti osu vahe'mokizmi avame'zane. Hu'neanagi kasnampa kema hu'zana, zamentinti osu vahe'mokizmi zmaza hu'zankurompage, zamentinti hu'naza vahe'mokizmi zmaza hugahie. ²³E'ina hu'negu maka mono kevumo'zama eme atru

nehu'zama ana maka'mozama ru ageru tmima nernage'zama, ana ageru'ma noranamo'zo, zmentinti nosnamo'za efresu'za, tamagra neginagi nehaze hu'za hugahaze. ²⁴Hu'neanagi maka'motma kasnampa kema nehanageno, zmentinti nosnamo'zo, kasanampa kema nosnamo'zama efresu'za, ana maka'mota hanaza kemo eriamana hinkeno, kumi'a agra negeno, nagra kumi vahe mani'noe huno refko hugahie. ²⁵Ana hanigeno agu'afima oku me'ne'nia agu'agesamo'a efore hanigeno, agra avugosaregati arena reno umaseno, Anumzamofona mono hunenteno, hu'ama huno tamage Anumzamo'a tamagrane amu'nontamifi mani'ne huno hugahie.

Anumzamofonte so'e mono hunesaza zamofa naneke

²⁶E'ina hu'negu nenfugatane nasareheheta na'a efore hugahie? Eme atru hanaza zupa, mago'mo mono zgamera nehinkeno, mago'mo rempi huneraminkeno, mago'mo ksefa'za Anumzamo averi haniaza huama nehinkeno, mago'mo ru ageru nerinkeno, mago'mo rekrehe hugahie. Hagi e'i ana maka'zama hanaza zamo'a, knare huno mono kevua zamaza huno, Ramofompina zmazeri hankavetigahie. ²⁷Iza'o ru ageru'ma aranuno'a, taremoke ana znagerura ri'o. Hagi tagufa agetere'amo'za oriho. Mago'mo ru agerura nerina, mago'mo rekrehe hunete'na hiho. ²⁸Hu'neanagi rekrehe hu vahe'ma omni'nenana, ru ageru ru vahe'mo'a akoheno taganeno mono kevufina mani'nenana, agra'agu'ene Anumzamofontega agerura akoheno rugahie. ²⁹Zametrenke'za tareo tagufa kasnampa vahe'mo'za kasnampa ke'a nehanage'za ruga'amo'za ana nanekea refko hu'za antahiho. ³⁰Hianagi Anumzamo mopafi mani'nesimofonte'ma ksefa'za averi nehina, kotama kema nehanimo'a, kea osu taganeno mani'nenkeno, kea huama hugahie. ³¹Hagi tamagra maka'mota amne kasnampa kea magoke magoke'mota hutehute nehnageno, maka'mofona antahintahia nezamino, zamazeri hankavetigahie. ³²Kasnampa kema hu avamu'mofo agorga'a mani'ne'za, kasnampa vahe'mo'za knazmima esige'za, kasnampa kea hutere hugahaze. ³³Na'ankure Anumzamo'a ke'onke'za eri savrisavra osu Anumzana omani'ne, hagi rimpia fru Anumzane. Maka Anumzamofa mono kevu naga zmazeri ruotge hu'neakna hiho. ³⁴Mono kevuma eritru hanafina, a'nemo'za akohe'za vene'nemofa zmagorga maniho. Na'ankure kema hu'zankura hu izo huozmante'naze. Tra kemo'ma hu'nea kante ante'za venenemofa zmagorga'a maniho. ³⁵A'nemo'za mago'a zanku antahisunema hanu'za, nontega nezmave antahige'ho, na'ankure a'mo mono kevufi ke hu'zamo'a knarera osu'ne. ³⁶Tamagrama antahizana Anumzamofa kema antahizamo'a, tamagripinti agafa huno, tamagripinke vgaregahie hutma Korinti vahe'mota nehazafi? I'o, tamagra havige nehaze.

³⁷Mago'mo'ma huno kasnampa vahe mani'noe huge, avamupi antahizane vahe mani'noe huno hanimofona, atrenkeno anamo'a

amama kreramua avona, Ramo huo huno hunte'nea kasege huno agra'a antahi'ama hino. ³⁸Hagi ama avoma keno antahino osanimofona, agrira ke'za antahi'za osugahaze. ³⁹Ana hu'negu nafu nagnaheta kasnampa ke hu'zankura tusiza huno tamenesinketa, ru agerupinti'ma ru'zana aseovaziho. ⁴⁰Hianagi maka zama hanaza zamo'a, fatgo huno knare kante hiho.

Jisasi fri'nefinti oti'nea naneke

15 ¹Hanki nenfugatane nasarehegata Anumzamofa knare musenke ko tmasamugeta eri'neta, oti hanavetita anankere tamentinti hu'naza naneke hurmagesa hunaku nehue. ²Ama'i ana knare musenkereti tmahokeno tamagu'vazineanki, tamagra ma amama huama nehua kema azeri akonama osnageno'a, tamentintimo'a amne'zankna hugahie.

³Na'ankure miko'zama agatere'neazana nagra ko erite'na, neramasmue. E'i anazana Anumzamofa avontafepi kre'nea kante Kraisi tagri kumiku huno efri'ne. ⁴Anumzamofa avontafepi krente'nea kante ante'za asentetageno maniteno tgufa knare oti'ne. ⁵Pitante (Sifas) ufore huteno, ete 12fu'a amage'ma nentaza disaipol nagate ufore hu'ne. ⁶Ana huteno 500ti'a agatere'a amage'ante disaipol naga mni'nazafi ufore hige'za ana miko'mo'za ke'naze. Anampintira rama'amo'za menina ofri manizageno, hagi mago'amo'za fri'naze. ⁷Hanki anante Jemisinte ufore huteno, ete maka aposol nagate efore nehuno, ⁸hagi henka'arfana, kasentega kna me'negeno ame huno kasenante'nea ne', e'i nagrite efore hu'ne. ⁹Na'ankure Anumzamofa aposol nagapina nagra henka vahere, nagrikura tamagra Anumzamofa eri'za vahere hutma huga vahera omni'noe. Na'ankure Anumzamofa mono nagamokizmi ha' rezmante'noe. ¹⁰Hu'neanagi Anumzamofa asunku'zanteti nagra amanahu kna hu'na mni'noe. Hagi nagri'ma asunku'ma hunante'neazamo'a amne zankanara osu'ne. Ete ana miko eri'za nagara zmagatere'na erizana mago'ane eri'noana nagra'niompage, Anumzamofa asunkuzamo'a nigrane me'nege'na eri'noe. ¹¹Hanki nagra huama hanuo, zamagra eri'za naga'mo'za huama hnazo, tagra ana nanekege huama nehunketa tamagra tamentintia hu'naze.

Maka fri vahe oti'snaza naneke

¹²Hagi Kraisi'a fripinti oti'ne hu'za huama hu'nazana, inanka huta mago'amota amu'nontmfintira, vahe'mo'za fripintira o'notize huta nehze? ¹³Hu'neanagi friteno oti'zama omneneresina, Kraisi enena ora otisine. ¹⁴Anumzamofa Kraisi'a fripinti azeri ora oti'neresina, mono nanekema huama hu'nazamo'a amne'zankna higeno, tamagri tamentintimo'enena amne'zankna hisine. ¹⁵Mago ene Anumzamofona havige eri'za vahere huno tazeri fore hisine. Na'ankure Jisasi fri'nefinti Anumzamofa azerioti'ne huta tagrama hanuna zamo'a, Anumzamofona ha'rentegahie.

Jisasi'a ora'otineresina, fri'namo'za ora'otizaresine. ¹⁶Na'ankure fri'nea vahera azeri orantiasina, Kraisinena azeri ora otisine. ¹⁷Hanki Kraisima azeri oraotineasina tamagri tamentintimo'a amnezanka higeta, tamagra kumipi manizasine. ¹⁸Hagi Kraisinku zamentinti nehu'za fri'naza vahe'mo'za fanene hazasine. ¹⁹Kraisimpi menima tasimu erita mni'nona nomnizampike taza hugahie huta tamentinti hanunana, vahe'mo'za zmasunku hunezmantaza vahera zmagatereta, tusi'a zmasunku hurantesaza vahe manigahune.

²⁰Hu'neanagi Kraisina fripinti Anumzamo azeri oti'neazamo'a, fri'naza vahe'mokizmia ese ne'za hozafinti eriankna hu'ne. ²¹Na'ankure magoke ne'pinti fri'zana egeno, anahukna huno friteno oti'zana magoke nepinti e'ne. ²²Anahukna hu'za Adamu fri'neaza hu'za maka naga'amo'za frisnageno, anahukna hu'za Kraisi'ma kasefa huno asimu'ma eri'neaza hu'za, naga'amo'za zmasimura erigahaze. ²³Hu'neanagi mago magomofona fripinti'ma azeri oti'siana kankamuma'a metere hu'ne. Esera Kraisi oti'neankino anantera, Agrama ete esnia knafina, Kraisi naga'moza otigahaze. ²⁴Anantera mika'zama vgare knamo esigeno, Jisasi'a maka hanave kumatamine vahe'ene, ugagota kva vahe ene mika ama mopafi hanavema zmahe fanane hute'nuno'a, Kraisi'a hanave'a Nefa Anumzamofa azampi antegahie. ²⁵Na'ankure miko'zamo'a Kraisi kvafi me'nenigeno, mika ha' vahe'amokizmia zmazeri fenkamitegahie. ²⁶Henka rfama, azeri fanene haniana fri'zamo ha'ma reneranteazana, ahe fanane hugahie. **²⁷Na'ankure avontafepi amanage hu'ne, mika'za kegvahu hanavea Anumzamo'a Kraisi ami'ne.** (Sam-Zga 8:6) Hu'neanagi ana hanavea Anumzamo'a Kraisi ami'neankino, Anumzamo'a Kraisi agorga omanine. ²⁸Mika'zana Kraisi'a agatereteno, Agri'ma hankavema ami'nemofa, Nefa Anumzamofa agorga maninkeno, Anumzamo hakare zampine, mika kaziga manigahie.

²⁹Fripinti'ma azeri oti'zama omne'neresina, na'a hugahaze fri vahe zmaza hukure hu'za mono ti nefraza vahe'moza? Ana fri vahe'mo'zama o'otisageno'a, hagi na'ante fri vahera zmaza hukure hu'za mono tina nefraze?

³⁰Hagi nahigeta tagranena hazenke zampina hakaregna nemnune? ³¹Tmage hu'na, nenfugata nensarogta neramasmue. Ranti Kraisi Jisasimpi mani'nena tamagriku muse nehuazamo'a, mika zupa fri'za hutere nehue. ³²Efesasi kumapima afi' zgane ha'ma hu'noana, tamagrama antahizana nagra na'a eri'noe? Hanki fri vahe'mo'za o'otizaresina, **menina ne'zane tine negahune, na'ankure okina frigahune.** ³³Hanki negi vahera omniho. Havi zamavuzmava nehaza vahe'mo'zane utagroteta mnisazana tmazeri havige vahe aseghaze. ³⁴Tamagra knare antahintahi enerita kumira osiho. Na'ankure mago'amotma Anumzamofona keta antahita osu'nazagu, ama kema nehuana tamagaze hinogu nehue.

Fripinti azeri otisia avufgamofa naneke

³⁵ Hu'neanagi mago'mo'a anage hugahie. Inankna huno fri vahera zamazeri otigahie? Inanknahu zamufgane otigahaze? ³⁶ Kagra Neginenane! Avimazama mopafi ase'nankeno'a fritenoke rutaha huno nehage. ³⁷ Avimzama nesanana rutareno ko hage'nea zana nonkrine. Hianagi witi avimazapi ru avimazana amne ase'nankeno henka hageno ruzahura nehie. ³⁸ Hu'neanagi Anumzamo Agra'a avesite mika avimzamofona, mago mago avimzamofona agri'a avufga'a amite amite hu'ne. ³⁹ Maka zgamofona mago'zahu avufga omne'ne. Vahe'mota mago'zahu tvufgane manunkeno, zgagafamo'za ruzahu zmavufga erizageno, nmamo'za ruzahu zmufga erizageno, noza'mo'za ru zmufga eri'naze. ⁴⁰ Anahukna huno monare avufga megeno, mopare avufga me'ne. Hu'neanagi monare avasese zana mago megeno, mopare avasese zana ete me'ne. ⁴¹ Hanki zgemofona mago avasaseza megeno, ikamofona ru avasaseza megeno, hanafitamimofona ru avasase zana me'ne. Na'ankure mago mago hanafi'mo'a, agra'a avasasezane me'ne.

⁴² E'inahu kna huno fri vahe'mokizmi zmazeri otisia zupa, kahefa zamufga fore hugahie. Kerifi asentesia avufga fanane hugahie. Hanki fripinti ete otisania avufga, fanane osu mevava hugahie. ⁴³ Hanki kasrino knare osu'nenia avufga asentegahie. Hianagi azeri otisia avufga, knare huno masa'ane avufgare azeri otigahie. Hanave'a omne avufga asentegahanagi, hanave nentake avufga azeri otigahie. ⁴⁴ Asentesnia avufga mopafi avufga asentegahie. Azeri otisnia avufga, monare avufga azeri otigahie. Ana hu'negu mopare avufga me'nesigeno'a, anazanke huno monare avufgane megahie. ⁴⁵ Anumzamofa avontafepi anage huno krente'ne, ***Ese nera Adamu tro higeno, asimura erino mani'ne.*** (Jen-Agf 2:7) Hagi henka fore hu'nea Ada'a zamasimu zami Avamu efore hu'ne. ⁴⁶ Hu'neanagi esera monare avufga fore osu'ne. Hagi esera mopare avufga fore hutegeni, henka monare avufga fore nehie.

⁴⁷ Kota nera mopafinti kugupa erino tro higeno asimura erino mni'ne. Hianagi henka nera Kraisi monafinkati e'ne. ⁴⁸ Anahukna huno mopare nera manigeno, mopafi vahe'enena mani'naze. Hagi anahukna huno monare nera manigeno, monare vahe'enena mani'naze. ⁴⁹ Menina mopare tro hu'nea ne'kna huno tro hurante'neankita, anahukna huta henka'a monafinkati ne' kna hugahune. ⁵⁰ Nenafugta nensarogta amanage hu'na neramasamue, ama tavufgarera Anumzamofa Kumara erisanti oharegahune. Anahu kna huno fnanene hu'zamo'a manevava zana erisanti oharegahie.

⁵¹ Oku naneke tmasami'za huanki antahiho, mika'mota ofrigahunanagi tagra ruzahie hugahune. ⁵² Mago knama esigeno'a, tvurga keramage nehuna kna huno, vgare ufenkrafa hanigeno'a, ana fri'naza vahe'mo'za

o'netisageta mika kasefa huta mni'nomota tavufamo'a ruzahе hanigeta onkasari hanave tavufa erigahune. ⁵³Na'ankure kasri avufgamo'a onksari avufga eri hankrenkeno, fri avufgamo'a ofri avufga eri hankregahie.

⁵⁴Hu'neanagi ana kasri avufgamo onkasri tvufga erisigeno'a, fri avufgamo'a ofri avufga erina, avontafepi amanage huno kre'nea kemo e'ama hugahie: *fri'zana Anumzamo ahe fanane hugahie!* (Aisa 25:8)

⁵⁵*Fri'zamoka ina hanaveka'a me'ne? Fri'zamoka atama neminazanka'a ina me'ne?*

(Hos 13:14) ⁵⁶Kumi'mo fri'zamofa atazana eri fore nehigeno, kumi'mo'a hanave'a kasegefinti e'nerie. ⁵⁷Hu'neanagi Anumzamofa muse huntесune, Rantimofa Jisasi Kraisimpi taza higeta hara agatenerone.

⁵⁸E'ina hu'negu tusiza hu'na navesi nermantoa nenfugata nensarogta, oti hanavetita kaza osu maniho. Hakare zupa Ramofa eri'zama eri'zankuke nentahita mniho. Hagi antahio, Ramofa eri'zama tamamu'nama nehagegetma e'neriza zamo'a amnezanknara osugahie.

Anumzamofa amage nentaza vahe'mokizmi zago hage'zamisnaza naneke

16 ¹Jerusale kumate mni'naza mono nagamokizmi zgoma eri atruma nehza zanku hu'za hue, Galesia kaziga mni'naza mono naga'ma hiho hu'na huzmante'noaza hiho. ²Hakare Sontamofona ese knare, tamagra mago mago'mota zgo'ma erisafintira, erisnaza avamente refko hutma eri atru hu'nenke'na, nagra esua knafi eri tru huzankura osaneno. ³Nagrama uhanatisu'na huhampri' zmante'nesamokizmia, huzmanta'nenana, ana musezamofa agofetura avonkrenta'nenana eri'za Jerusale kumate vugahaze. ⁴Hagi nagrama vuga'ma hanugeno'a, zamagra nagrane vugahaze.

⁵Hu'neanagi nagra Masetonia vute'na, henka tamagritega egahue. Na'ankure Masetoniati ru kitagi'na vugahue. ⁶Tamagrane osi'agna umanisuo, ete zasi ko'ma atu ikampina tamagra ne mni vgaresugeta, inantegama vunaku'ma hanurega naza hu'tma hunante'nage'na vugahue. ⁷Na'ankure nagri'ma navenesiana menima vanu'na tamageme vuku nosuanki, Anumzamofa avesima me'nenke'na mago'a zaza kna tamagra ne umani'ne'na vanuegu nehue. ⁸Hu'neanagi Efesasi kumate mani'nesugeno, Avamu'mo erami'nea (Pentikos) kna efore hugahie. ⁹Na'ankure eri'zamo'ma knare huno vuga kana rama'a efore nehigeno, rama'a vahe'mozanena ha renenantaze.

¹⁰Hanki Timoti esigeta, nagra Ramofa eri'za e'nerua kna huno e'neria neki, ke'amofona antahi nemita azeri so'e hiho. ¹¹Kva hunenteta agi eri haviza huonteho. Hanki ana nehuta aza nehageno mani'nenano, fru huno nagra mni'ne'nurega ehntatisnie. Timoti'ene mago'a nafu naganahе'zane ete esnagu zmavega ante'na mani'noe.

¹²Hu'neanagi Apolosi, nerafu kazigagu hu'za hue. Tmagritegama nerafuzanema esia kazigatira, nagra razampi azeri hanaveti kea nesamue. Hagi menima esiana agri'a avesi omne'neanagi, kankamuma me'nenkeno'a egahie.

Huv gare ke zmazeri hanavetinaku zamasmine naneke

¹³Kava nehuta, tamentinti zampi oti hanavenetita, korera osu hanavetita maniho. ¹⁴Maka'zama hanaza'zampina tamavesinte avu'ava zampinti hiho.

¹⁵Nenfugta nensarogta tamagra antahi'naze, (Stefanisi ene noma'afi mani'nazana, ese'ma Akaia kumateti zmagu'a rukrehe hu'naza nagare. Ana hute'za zamagra zamagu'a mono eri'zampi ami vganere'za mono eri'za e'neri'za nagare). ¹⁶Hanki tamagranena e'inahukna vahe'mofo avu'ava avaririta mani'neta, hagi anahukna eri'zama zmaza hu'za erisazamokizmine, nezmavariritma zmagorga'a manihogu neramasamue. ¹⁷Stefanisi ene Fotunatusi'ene Akiasi'zama aza'zankura nagra muse hu'no'e. Na'ankure tamagra ma huga'zana osazage'za zamagra eme naza hu'naze. ¹⁸Na'ankure knare antahintahi nami'za avamu'nifina nazeri fru nehu'za, tamagri'ene ana hu'naze. E'inahukna vahetmina zamege so'e hiho.

¹⁹Esia kaziga mani'naza mono naga'mo'za muse ke atrermantaze. Akuira ene Prisila ene noznifima nemniza mono nagamo'zanena anahukna hu'za zmagu'areti musenkea atrenermantaze. ²⁰Maka Anumzamofu naga'mo'za musenkezmia atre nermantaze. Hanki tamagra nena anazanke huta mono naga'mota muse ohunte ahunte hiho.

²¹Poli'na nagra, ama musenkea, nagra nazampinti kre neramue. ²²Hanki Ramofoma avesi ontesnimo'a, sifnafi manino haviza hugahie. Rantimoka eno! ²³Hanki Ramofu Jisasi asunku zamo'a tamagra ne mesnie. ²⁴Nagri nevesi'zamo'a maka Kraisi Jisasi'pima mni'naza naga'motarega mesnie. Tmage.

Poli'a Korinti

Vahe'mokizmi Anante (2)

Avonkrezami'nea Nanake

1 ¹ Ama avona Poli'na Anumzamo, Kraisi Jisasi aposol eri'za vahe manio huno huhamprinante ne'mo'nane, Timoti nerafu'ene kreneramu'e. Ama ana avona, Korinti mono nagate'ene ana miko Akai (Greece) kaziga Anumzamofomo mono naga'ma mni'narega kreneramu'e. ² Anumzanti nafatimofone, Ranti Kraisi Jisasi asunkuzamo'ene rimpa fruzamo'a tamagra ne mesie.

Hazenkefi ufresageno Anumzamo zmazeri fru hania naneke

³ Rantimofomo Kraisi Jisasi Nefa, Anumzamo Agrake mika asuragi zamofomo agafa'a mani'nenono, tazeri fruma nehimofomo agi erisaga huta musena huntasune. ⁴ Mika knazantifina Agra tazeri fru nehie. E'inahu hu'negu Anumzamo'ma tagri'ma hu'neakna huta rumokizmia knafima mni'nesageta zmazeri fru hanune. ⁵ Na'ankure Jisasi Kraisi'ma, rama'a ataza eri'neankita, tagranena tata anahukna huta enerunanagi, anahukna huno Kraisi rimpa fruzamo'a tagu'afina avinete. ⁶ Tamagri knare zanku'ene tmahoma kezanku'ene, tagrira tazeri havizana hugahaze. Tamagrama fru huta manisagu, Anumzamo'a tagrira tazeri fru nehie. E'i ana zamo'ma eama nehiana, akoheno manineno, tagrama eneruna kna knazama e'nerimofonte efore nehie. ⁷ Ana hu'negu hanave antahintahi nehuta amuhama huramunana, tagrama erisuna tatazampintima, tamagra'enenema erisazana, tamagra anazanke huta Anumzamo'ma fruzama tamisifintira erigahaze.

⁸ Nenfutane nasarehetanena antahigahaze, Esia kaziga kumapina knazampi ufre'nonana, ana kna'zamo'a tazerino arentakro nehuno, tagri hanavea tazeri agateregeta, ana knazana eriga osuta hago nefrumpi huta antahi'none. ⁹ Tamage, tagrama tagu'afima antahunana, trake'mo refko huranteno frigahaze huno hianakna nehune. Hianagi e'inahuzama fore'ma nehiana, tagra hanavegura ontahigahunanki, Anumzamo'ma

fri'nea vahe'ma zmazeri onetia hanavegu antahigahune. ¹⁰Hagi fri kankamupintira tahokeno tavreneankino, ete rune, neravrena tagra amuhara Agriku nehanunkeno Anumzamo'a mago'ane tahokeheno tagu vazigahie. ¹¹Tamagrama nunamu hutma taza hazazamo'ma eama hiana, rama'a vahe'mo'za hu musena hu'naze. Na'ankure tagrima kegva krirantezanku nunamuna hazageno, Anumzamo'a ana nunamuntia antahizmino taza hu'ne.

Poli'a Korinti vahe'mokizmia rezmatga osu'nea naneke

¹²Tagrama musema hunana, tamagra manuna knafina ama' tagutagesama tagu'afima e'nerita, hakareza hu'nazampi mni fatgo nehuta, ruotge huta nemnita, Anumzamofa so'e avu'avazante nemnita, ama mopafi antahizankura nontahize. ¹³Na'ankure avoma kreraminofina, tamagrama nehampritma antahini osuga'zana kreonte'noanki, nagrama antahuana, mikošana amatfa hu'naze. ¹⁴Meninena tagrira antahirami so'e osugahazanagi, Rantimo Jisasi Kraisi esia zupa, tamagra musena tagrikura nehanageta, tagranena anazanke huta tmagrikura musena hugahune.

¹⁵Nagra tamage ko kena antahina huneramina, ese'ma retro hu'noana, tamagritema esu'azamo'a tare asomura erigahaze. ¹⁶Masetoniama enevuna eme tamageme evute'na, ete anantegatima esugeta tamagra naza hanage'na Judia vugahue. ¹⁷Nahigeno enaku'ma retroma hu'neana atreno ome huta nantahigegahaze? Nagrikura antahintahini'a retrora osu'nefi huta hugahaze? Hifi nagra ama mopafi vahe'mo'za i'o hugazanku izo nehu'za, izo hugazanku i'o nehazankna vahere hutma nagrikura nehazo? ¹⁸Hu'neanagi Anumzamo'a Agra'a ke'are oti ne'kina, tagranema neramasamuna nanekemo'a, tamagama huta izo hanuta, izo hugahune. I'oma hanuta, i'o hugahune. ¹⁹Na'ankure, Anumzamofa mofavre Jisasi Kraisi agi agenkema nagrangi, Timotiki, Sailasiki hutama nerasmunana, Jisasi Kraisi, Anumzamofa nemofa'a Agra izoma nehuno'a, i'o osu Ne'mofa agenke huama huta neramasamune. ²⁰Anumzamo'ma mika huvempa kema huntea kemo'a, Jisasimpi avufga'a efore hu'ne. E'i ana hu'negu, Jisasi agima husga huta tmage huta hu'nazamo, Anumzamofona ra agi nemie. ²¹Hagi Agrake Anumzamo, tagri'ene tamagri enena tazeri hanavetino, Kraisimpina huhampritante'ne. ²²Avame'za Avamu'areti tagu'afi anteneranteno Nagri vahere huno hu'ne. Henkama hakare'za tamisiazamofa huvempa hu'ne.

²³Hianagi, Anumzamoke nagri nagu'namena keno antahino hu'ne. Nagra tamage nehuankino Anumzamoke ana tamage keni'a refko hunantegahie. Ana agafare Korinti kumatera mago'ane ome'noe, na'ankure nagra hanave kefinti eme tamazeri fatgo osugahue.

²⁴Hianagi tamagri tamentintimofa kvagrirmante'nakura nosunanki,

magoka tamagrane eriza erisunketa tamagra muse hugahaze. Na'ankre tamentintifina, tamagra oti hanavetigahaze.

2 ¹E'ina hu'nagu nagra henkama tamagri'ma tamage'naku esu'na, amanahukna nasuzampina mago'ane omesue hu'na nagesa nentahue. ²Na'ankure nagrama tamarimpa eri haviza hanenkeno'a, iza nagrira nazeri muse hugahie? Hianagi tamagri'ma, tamarimpa knama eritamumotma nazeri muse hugahaze. ³E'ina hu'negu, amanahukna avona kre neramue. Nagrama esoa knarera, nazeri musema nehaza nagara, zmarimpa kna eri ozamisue. Tamage nagra antahi'noe, tamagra musema hanage'na, nagranena muse hugahue. ⁴Narimpamo'a tusigna nehige'na zavi netena, ama avona kreneramue. Tamarimpa tamazeri kna hunakurompage, nagrama nagu'afima navesineramantoaza antahiana hnazegu kreneramue.

Vahe'mofo kumi'a atrentezamofonanenke

⁵Mago'mo'ma tamarimpa knazama eritamiana, tamagrama hazaza hu'na nagra rama'a narimpagna hunontoe. Na'ankure anamofona mago'a arimpa kna eriominakure. ⁶Rama'amota anamofona ko mago tamarimpa hunontazageno, anazama hu'nea knazamofonavamente mizama'a e'nerie. ⁷Ru arimpa haviza hu'zamo azeri haviza hanigeno asunkuzampi mani'zankura, kumi'a atrenteteta azeri so'e hiho. ⁸Ana hu'negu nagra huhankaveti'na nehuanki, tamagrama tamavesi'nentaza zana erinte ama hinke'za keho. ⁹Ama avoma kreramua agafa'a, ana miko ke tmasami'noa kemofonamagera nentafi, reramahe'na kenaku kreneramue. ¹⁰Hagi tamagrama mago vahema kumizmi atrezamantesazana, nagranena kumizmia atrenezmantoe. Na'ankure nagra kumizmia atrenezmantoe, [kumima atrezmantegazama menenkena tamage huna atrenezmantoe], Kraisi avurera tamagrama knarema hanagu atrenezamantoe. ¹¹E'inahukna hanuta Sata reravataga hania zampintira evuoramisune. Na'ankure ko Sata raraheno kenaku tro hunte'nea havi antahizama'a, keta antahita hu'none.

Poli'a Taitusi kenaku hu'nea naneke

¹²Nagrama Troasi kumate Kraisi knare musenke huama hunaku uhnatugeno'a, Ramo'a kankamuna erinaginantene. ¹³Hianagi narimpa fru e'ori'noe. Na'ankure nenafu Taetusi'a tamagri tamagenkea erino ome'neazanku, Troasia atre'na Masedonia nevu'na, hufu huramantoe.

Anumzamofonankavefi Sata agteresanananeke

¹⁴Na'ankure Anumzamofonavurera tagra Kraisina mana nentake zankna huta mani'neta, zamagumavazi'nea vahete ene fnanene hanaza vahetera knare mna viankna nehuta susu hunentone. ¹⁵Kraisine

hagerfi'nonku knare mna nevia kna nehanunkeno, Anumzamo'a muse nehie. Ana naneke vuno eno nehigu mna nentahizankna hu'za maka vahe'mo'za nentahize. Kefoza zimifinti zamahoke nehea vahe'mo'zane kefoza zimifinti zamahoke nohea vahe'mo'zane nentahize. ¹⁶Fananema hanamokizmirera fri hi'mana nevie. Hianagi tasimuma erita manisuna vahe'motarera, asimu erino mani mana vugahie. Hianagi i'za ama ana erizana eriga hu'ne? ¹⁷Mago'amo'za zgo erigahune, nehu'za Anumzamofono naneke huama nehzana, tagria Anumzamo hurantegeta fatgo huta huama nehune. Huama nehunana Kraisi'a tagu'afi nemanigeta Anumzamofono avure huama' nehune.

Anumzamo kasefa huno hagerafi'nea naneke

3 ¹Tagra mago'ane agafa huta tavufga erisaga hunaku nehumpi? Hifi tamagra, tagri tavufa erisagahu avo kreho nehumpi, hifi rumo'za avon kre'za tagri husga hihogu nehune? ²Tamagra'a tagri avona mani'naze. Ko tagu'afi krentenege'za miko vahe'mo'za nehampriza antahiza ke'za nehaze. ³Kraisintegati kretregeno e'nea avontafe kna huta eama nehazageta, tagra kegva nehune. Ana avona avo zotaretira onkre'neanki, kasefa huno mani'nea Anumzamofono Avamuteti krente'ne. Hagi ana avona havere kreonte'neanki, vahe'mofo tumopi krentene.

⁴Ama ana miko zankura Kraisimpina, Anumzamofono tamentinti nehuta hankave e'nerune. ⁵Ana miko zama nehuna zankura, tagra'a hankavere nehune huta osugahune. Hianagi Anumzamo agra'a hankavereti hunerante. ⁶Agra anazanke huno tagrira huranteno hankave tamigeta kasefa hagerafi kea hu'nea zamofono kegva hu'neta erizana e'nerune. Avompima krentenea zankura nosunanki, avamupi zanku nehune. Na'ankure Avompima krente zamo'a zamahe nefrie. Hianagi avamumo'a, zmasimu nezamie.

⁷Hagi, havere erivakakino krentenea avompinti frizana avareno neazamofono erizamo masa'ane ne-e. Hu'negu Israeli vahe'moza, ***zamavuginki hige'za Mosena avugosafina onke'naze, na'ankure masazamo avugosafintira remsa hige'za nonkageno, ana msamo'a akoheno avugosafintira resu hu'ne.*** (Diu-Kas 35) ⁸Hagi Ruotge Avamumofono erizamo'a mago'ane agatereno hanave'ane hihamua omanegosifi? ⁹Na'ankure vahe'mofoma knama nemia erizamofono msa'ane hankave'a me'nenigeno'a, fatgo erizamo'a agetereno ra msa'ane hankave'a megahie. ¹⁰Anumzamofono tusi'a msa'ne hanave'amoma me'neana kasefa erizamo'a Anumzamoma erinea zamo, koma Anumzamoma eri'nea erizamofono msa'a agaterene. Ana higeno ko erizamofono msa'mo'a ko vgarene. ¹¹Hanki fanane hunoma nevania zamo'a hankave'a me'nenigeno'a, mago'ane mevava huno vania zamo'a, hankavemo'a agateregahie.

¹²E'ina hu'negu tagra fore'ma hanigu amuha nehuta, kea hankavetita nehune. ¹³Tagra Mosese knara osu'none, *agra avugosafi tavravenu refitenegeno, Israeli vahe'moza avugosafi msazamo'ma fnanema hiama'a onke'naze.* (Diu-Kas 34:33-35) ¹⁴Hianagi antahintahiza zmimo'a hanavetino antro higeza maniza neazageno, ama knare ehanatine. Na'ankure korapa huhagerafi kasegema nehamprizageno'a, ana tavravemo'a refiteno ne-egeno, Kraisiimpi ana tavravea eritrene. ¹⁵Hianagi meninena Mosese'ma krente'nea avo hamprizana, ana tavravemo antahintahizamia refite'ne. ¹⁶Hu'neanagi vahe'mozama Ramofontema zmagu'ama rukrehema hzageno, refimatezmantenea tavravea erinetre. ¹⁷Ana hu'negu Ramo'a Avamukino, Ramofo Avamuma me'nesirega, kinarente'zana omanegahie. ¹⁸Hianagi miko tavugosa refi'ote vahe'mota, Ramofo msazama'amo'a tagrite remsa nehigeta, kapomo hiankna huta remsa huta Agri'kna hunkeno, Ramo'a avamukino, agri msazamo'a mago'ane tagripina remsa nehie.

Mopa kavofi knare fenozantmi me'nea zamofa naneke

4 ¹E'ina hu'negu Anumzamomo'ama asuragi rante'neazamo higeta, tagra ama erizana e'nerune, e'igu tagrira tavesra nosie. ²Hianagi tagra agazegu huno oku'a huga avu'avara nosune, vahe'mokizmi rezmatga huta zmazeri havizahu avu'avazana nosuta, Anumzamomo' kegaga eriruvahe huta vahe'mokizmia rezmatga nosune. Hianagi Anumzamomo avure ene vahe'mokizmi antahizampina, tagripina tamage'zamo eama hanigeza kegahaze. ³Tagrama knare musenke huama hunazamo'ma ama'ma nosiana, fananema hanaza vahe'mo'za amara nosaze. ⁴Ama mopafi havige anumzamo, Sata'a zamentinti nosaza vahera antahintahizamia refinetege'za, knare musenkemomo msa Kraisina Anumzamomo amema'a nonkaze. ⁵Na'ankure tagra'a naneke huama nosunanki, Jisas Kraisi'a Ra mani'negeta, tagra Jisas Kraisinku huta tamagri kazokzo eriza vahe mani'none. ⁶E'ina hu'negu korapara Anumzamo huno, hanimpina tavimo'a remsa hino hu'nemomo masamo, tagrite emani'nenno tavi'a taguafina remsa nehigeta, tagra Jisasi Kraisi avugosa negeta, tagra tusi'a msane hanavene ke'noe.

⁷Hianagi tagra mopa kavogna hunonkeno zgo'amo mareri'nea fenomo agu'afinka me'neakna hu'none. Tamage hankevea tagritegatira nomeanki, Anumzamofontegati ne-e. ⁸Hakare kazigati knazamo'a trentarako nehianagi, ana knazamo'a trentarako nosie, antahintahitimo'a savri hianagi tamentintia notrone. ⁹Knaza tamizanagi, Anumzamo'a noratre, tahe tatarazanagi, tazeri haviza nosaze. ¹⁰Tagra mika zupa, tavufgafina Jisasi fri'za erita vano nehunke'za, Jisasi nomani'zana, tagri tavufafi anazanke huno eama hige'za negaze. ¹¹Na'ankure tasimu'ma erita mani'nomota Jisasi fri'zankuma huama hunazanku, hakare zupa fri

kantera tavrenenteankino, Jisasi nomani'zana, ama amega tavufgare eama hanige'za kegahaze. ¹²Ana higeno fri'zamo'a tagripina eriza e'nerie. Hianagi asimu erino manizamo'a tamagripina eriza e'nerie.

¹³E'ina hu'negu anama tamentinti nehunkeno avontafepima krenteana anage hu'ne, ***Nagra namentinti hute'na, kea huama hu'noehu'ne.*** (Sam-Zga 116:10) Tagranena tamentinti nehunku kea huama nehune. ¹⁴Na'ankure tagra antahi'none, Ramo, Jisasi'ma fri'nefinti azeri oti'nea Anumzamo, tagrira anazanke huno Jisasi ene magoka tazeriotino, tamagri ene tagri'enenaga Agri'a avurera tavrentegahie. ¹⁵Tamagri knarezanku, ama ana miko zana nehunankino, Anumzamofa asunkuzamo ra huno rama'a vahete vuno eno hania'zamo'a, Anumzamofa ra agi amino musema hunte'zamo avitegahie.

¹⁶Ana hu'negu tavresra nosie. Tamage tavufgamo'a frino negasrianagi, knane knanena avamutumofona erikasefa nehie. ¹⁷Hanki meni tagritema osi knazama fore nehiazamo'a, tagrira monafima umani vava hanunaza retro huneranteankita, knare huta monafi umani vava nehuta, knarezama omerisunazamo'a, makazana agateregahie. ¹⁸Hagi negonazantera tavua onkesunanki, onke'nonazante tavua kesune. Na'ankure negona zamoa omanegosie, hianagi okenona zamo'a mevava hugahie.

Kasefa tavufgamofa naneke

5 ¹Na'ankure tagra antahi'none, ama mopafi seri nopima mani'nona nomo'ma tagna vaziramisigeno'a, tagria mevava nontia (tavufga) vah'e'mo azanteti tro osu'neanki, Anumzamo tro hunteteno monafinka me'neankino mevava hugahie. ²Na'ankure ama nompi (tavufga) mani'neta tamage tusiza huta kragira neruta, monare kasefa mevava kukena huzankura tusiza huno tavenesigeta, avega ante'none. ³Na'ankure tagra ana kukenama hanuta, tagra tavufga tavapara omanigahune. ⁴Tagrama ama mopafi tavufgare'ma mani'neta tusiza huta kragira nerune. Na'akure tagra tavufa tavapako omnita kukena hunaku nehune. Hianagi monare kukena antaninunkeno asimuma erino manizamo fri tavufga ahe fanane hanigeta, mevava tavufga erigahune. ⁵Anumzamo'a ama agafare trohuranteno, Agra'a huhampirante'nea zampinti esera Avamu'a amne tamineankita, antahita keta hanuna, makazana amne tamigahie.

⁶E'ina hu'negu tagra hakare zupa hanavenetita, ama tavufgare'ma mani'neta zahufa Ramo enena omni'none huta nentahune. ⁷Na'ankure tagra onke'nonanagi, tamentinti nehune. ⁸Tagrira taguamo'a hankave e'nerigeta ama tavufga atreta Ramo'ene umanisunazanku tavenesie. ⁹E'ina hu'negu ama mopafima manisunano, Ramo ene umanisunano, Anumzamofoma ra agima amisunazankuke nehune. ¹⁰Na'ankure tagra ana miko'mota Kraisi avuga keaga refkohu trate otisunkeno, magoke magokemota ama tavufgare mani'neta, knare'zamo havizano hu'nesuna avamente anteno, mizana tamitere hugahie.

Vahe'ma avreno Anumzamofonte vu'zamofu naneke

¹¹E'ina hu'negu Ramofu koro hunte'za antahi'ama hunonku, hanavetita vahe'mokizimi antahintahia eriyama huta nezamavrone. Hianagi Anumzamo'a tageno antahino hu'ne, hagi nagrama nentahuana tamagranena tageta antahita nehaze. ¹²Tagra'a tavufga tamagrite mago'ane erisagahu kazigatira nosunanki, tagriku'ma tamavufgama erisagama hanazazanku nehune, hu'negu amega zamufare'za nege'za znavufga ra nehu'za, zmaguafizama nonkaza vahera, kenona huzmantegahaze. ¹³Na'ankure tagrama neginagizama nehanuta, e'i Anumzamo rahi erisiegu nehune. Hagi tagrama fatgo antahintahitirema manisuta, e'i tamagri knarezankure. ¹⁴Kraisi avesizamo kva huranteno tazeri onetigetata tagra antahinone, na'ankure magokemo, miko'mofonku huno frine, e'ina hu'negu ana miko'mota fri'none. ¹⁵Hagi Agra miko'mofonku fri'negu, iza'o kasefa huno maninesimo'a, agra'a vesizantera omanigahe. Hianagi zamagriku'ma huno fri'teno oti'nemofu Kraisi avesizante manigahaze.

¹⁶E'ina hu'negu menintetima agafa huno vaniana, vahe'mokizimia amega zamufgarera refko huozmantesune. Ana hu'negu tagranena anahukna huta Kraisina amega avufgare refakora hunte'nonanagi, menina antahi'none anara nosune. ¹⁷E'ina hu'negu mago'mo'ma Kraisimpima manisimofona Anumzamo'a azeri kasefa vahe fore nehie. Antahi ani huo, korapa avu'avamo'a fnane nehigeno, kasefa avu'ava fore nehie. ¹⁸Ama ana kasefa huno mani avu'avara Anumzamofontegati e'ne. Kraisimpi tagrira tazeri mago nehuno, erimago huno mani erizana tagri tamine. ¹⁹Na'ankure Anumzamo'a Kraisimpi ama mopafi vahera, Agrane tazeri mago hu'ne, vahe'mo'zama kumi'ma hu'nazana antahizmino nona hunozmante. Hagi erimago huno manizamofu knare naneke huama hanunegu, tagrira tami'ne. ²⁰E'ina hu'negu tagra Kraisi agi erita mani'none. Higeno Anumzamo'a vahe'agura tagripi huvazino kea nehie. Ana hita tagra Kraisinku huama nehanunketa tamagra Anumzamo'enena erimago hugahaze. ²¹Na'ankure Anumzamo'a kumi'a omnenea ne'mofu Kraisina tagri kumiku, azeri kumi vahekna nehuno, tagri kumira Agumpi erinte'nea zamo, tagrira Anumzamofu avure tazeri fatgo vahera nese.

Aposol naga'mo'za eri'zama e'neriza rama'a knaza eri'naza naneke

6 ¹Tagra eri'zama e'nerunana magoka Anumzamo'ene e'neruna nagamota hankavetita neramasmune, Anumzamofu asunku'zana eriteta, atrenkeno amnezanknara osino. ²Na'ankure Anumzamo'a anage hu'ne, ***Kna fatgore ketmia nentahi'na, tamagama'vazikna fatgore tmaza hu'noe*** hu'ne. (Ais 49:8) Antahiho, menina Anumzamo'ma tagu'vazino tmavre'naku'ma hunte'nea kna fatgore menina mani'none.

Poli'ma knazampi ufreniazamofa naneke

³Mago'mo'ma kama vanoma nehifina, tagra zamazeri tanafahu have erinteaknara nosune. Ana hu'negu tagrama eruna erizamofontera vahe'mo'za tazeri tagaze osugahaze. ⁴Hakare'azama humpina Anumzamofa eriza vahe mni'none huta eriamana nehune. Hakare'a knazampima ufronana kazigazi huta nevuta, maka tatafima nevuta, knazampina ufronke'za, ⁵kanonkevea neramiza, kina nonpina tavrenentazageno, erizamo'a amuhu nehigeta, tavura omaseta ne'zana ononkeno, tagazankura nehuta, ⁶manifatgo huta nemanita, antahintahia e'nerita, akoheta nemanita, so'e avu'avazana nehuta, Ruotge Avamupina nemnita, tamage avesizamofa avu'avazana nehuta, ⁷tamage kema huama nehumpine, Anumzamofa hankavefina, fatgo mani'zamofa ha'zamoa tamaga tazampine hoga tazampina me'negeno, ⁸mago'amo'za rantagia neramizageno, mago'amo'za husaga hunorantaze. Tamage kea hunerantazageno, havige kea hunerantaze. Tagra tamage vahe mni'nonanagi, krunagea vahere hunerantaze. ⁹Tagrira tage'za antahiza osu vahe kna nehunanagi, tagrira miko vahe'mo'za tage'za antahiza hu'naze. Fri avamente knazampina nevunanagi, kasefa huta nemanune, kanonkeve tami'nazanagi tahe ofri'naze. ¹⁰Tasuzampi mani'nonanagi, muse huvava nehune, tamuntera omane'neanagi, rama'a vahe zmaza hunke'za feno vahera nemnize. Fenona onte'nonanagi (avamupina) feno vahekna nehune.

¹¹Korinti kumate vahe'mota, magozana fra'nokunanki, tagu'areti tamage huta kea nermasamune. ¹²Tagra tamagrira tavesi nermanteta tagu'a kafana anagi nermantonanagi, tamagra tavesi noranteta, tamagu'a kafana anaginantaze. ¹³Nagra neramasamue, tamagrira osi mofavre asmiaza hu'na nermasamuanki, tamagranena tamagu'a kafana anagiranteho.

Kefozane tragoteta omnisuna naneke

¹⁴Anumzamofonte zamentinti nosnaza vahe'enena tagroteta omaniho. Inankna huno fatgo avu'avazane, kasegema ovariri avu'avamokea erimago hugaha'e? Msazane hanizanena inankna hune erimagora hugaha'e? ¹⁵Kraisia inankna huno Sata'enena mago rimpa hugahie? Nankna huno amentinti nehia vahe'mo'a, amentinti osu vahe'enena, mago antahintahirera manigaha'e? ¹⁶Hagi inankna huno Anumzamofa mono none, havi anumzamofa mono nomo'a erimago znarimpa hugaha'e? Na'ankure tagra asimu erino maninea Anumzamofa mono noma'a mani'none. Anumzamo'a anage hu'ne, ***Nagra zamagu'afi mani'nenana, zamagri'ene kana vano hugahue. Nagra zamagri Anumza mani'nugeno, zamagra nagri vahe manigahaze*** hu'ne.

(Lev-Pri 26:12) *17*E'ina hu'negu, *zamentinti osu vahepintira atiramita rure maniho* huno Ramo'a hu'ne. *Agruma osu'nesia zana avako osnage'na, Nagra eme tamavregahue.* *18**Nagra neramafana mani'nanena, tamagra mofavre zgania manigahaze huno Hanavenentake Ra Anumzamo hu'ne.* (Ais 52:11)

7 *1*Na'ankure tagrira Anumzamo huvempa hurante'negu, navesima neramantoa ronanimota, tagra'a tazeri avusese hanune. Ama tavufgafine avamupima miko kefozamo'ma tazeri haviza hania zampintira, mani ruotage nehuta Anumzamofu koro huntunesune.

**Korinti vahe'mo'za zamagu'a rukrahe
hu'nageno Poli muse hu'nea naneke**

*2*Tamagra tamarimpa tamiho. Tagra mago vahera havizana huonte'none, mago vahera azeri haviza osu'none, mago vahera tagra knare'zankura revatga huta azeri haviza osu'none. *3*Nagrama ama'i kema nehuana, tamagra havi vahe mani'naze hunoramantoe. Na'ankure koma tamasimi'none, tagra tamagri ene magoka manisuno, tamagri'ene magoka frisunana tamagra antahintahifi mni'naze. *4*Nagra tamagrira razampi antahinerami'na, tamagrikura tusi muse nehugeno, nagu'amo'a fru nehigeno, tamagrama hazazamo'a nagrira naza higena, mika knazanifina tusi muse nehue.

*5*Na'ankure tagrama Masedonianema efronkeno'a, ama tavufgamo'a manifru osu'ne, rama'a knazamo mika asoparegati egeta hapi ufronkeno, tagu'amo'a kore nehie. *6*Hu'neanagi knazamo zamazeri haviza nehia vahe'mokizmi zamazeri hankavenetia Anumzamo tazeri hankavetineana, e'i Taitusi'ma e'nea zamo'e. *7*Agrama e'nea zamokero'ompage, agri'ma azeri hankaveti'naza'zamo'e. Agra nagriku'ma navegama ante'naza'zamofu nanekea nenasamino, nazano fore'ma higeta tamasuzampima maninaza'zamofone, nagriku'ma nentahiza'zamofu nanekema nasamigeta, mago'ane tusi muse hu'noe. *8*Na'ankure avoma kreramisua zamo'enema tamasuzampima tamavrentesuana, nagra e'i anazankura nagesa ontahigosue, na'ankure e'i anazamo'a osi'a knafi tamatazana tamigahie. *9*Nagra menima avoma atreramantesua zankura muse nehue. Tamagri tamazeri tamagaze hunakuro ompage, tamata neraminketa tamagu'a rukrehe hanazegure. Na'ankure Anumzamo, vahe'amo'za erisazeguma avenesiankna tasuza e'nerisunkeno, tamaza hanigeta tagripintira mago'a knazana e'origahaze. *10*Na'ankure Anumzamo'a tagripima me'nea tasunku zampi huvazino taza hanigeta, kumira atreta tagu'a rukrehe hanunkeno taguravazina, tagra knazantigura tagesa ontahigahune. Hianagi tasunkuke nehuta tagu'a rukrehe osnunana, fri'za erifore hugahie. *11*Keho Anumzamo'ma neramia knazamoma tagripima asunku'za erifore nehiana, tamazeri o'netigeta kazigazi huta

tamagra'a tamazeri ama nehuta, antahi haviza nehuta, tamagu'afi kore nehuta, nagri'ma nagezankura tusiza huno tamavenesigeta, hanavetita havizama hu'nea vahera zmazeri fatgo nehuta, makazama hanafina fatgo zanke'za hiho. ¹²Ana hu'negu iza havizana higeno, iza havizana huntene hu'na, e'i agafare avona krenoramue. Anumzamofu avufina inankna huta kva krinerantaze, tamagra eriamu hugahaze. ¹³E'i ana miko'za hazazamo'a, trimpa so'e nehie. Amama tarimpamo'ma so'ema hirema mago'ene musema huramantonana, Taitusima konkeno musema nehuno avamu'afima tamagripintima fruzama eriazankura muse hune. ¹⁴Tamagriku'ma musema nehua zankura, ko agrira asami'noe. Hagi tamagra nazeri nageze osu'naze, nagra tamagege'za tamasm'i'noe. Hu'negu tamagriku'ma muse nehune huta Taitusima nesamuna zamo'a, tamage'za efore hugahie. ¹⁵Taitusi'a agri'ma nevreta, ke'ama mikomota antahinemita, kore hunteta amagama antenaza zankura, tusiza huno tamagrikura antahineramino agera nokanie. ¹⁶Nagra tusiza hu'na muse nehu'na, hakarezana amne hugahaze hu'na antahineramue.

Muse huno Anumzamofu ami'zamofu naneke

8 ¹Nenfugata, Anumzamofu asunku'zama'areti, Masedonia mono vahera zamaza hu'nea zamofu agenke tagra tmasaminaku nehune. ²Zamagripina tusi'a knaza fore nehige'za, zmarevatga zampi ufrenazanagi, zmarimpa kna nosu'za, ra muse nehu'za, fenozami omneneanagi, zamagu'areti fenona zami'naze. ³Na'ankure nagra eriamu hu'na tamasmiza hue, zamagrama amiga'a avamentera agatere'za, zamagra'a zmavesite rama'a nezamize. ⁴E'ina nehu'za, Anumzamofu naga'ma Jerusale mni'naza naga'ma, zamazahu muse'zama zamagranema zamizankura, tusiza hu'za tantahigevava hu'naze. ⁵Hagi e'inahu hugahaze huta tagesa antahi ozamunanagi, pusazana zamagrazmi Ramofu amite'za, Anumzamofu avesite tagrira tami'naze. ⁶E'i ana hu'negu zgo eritruhu eri'za tagripima erigafa hu'nemo, Taitusi'a tamagrane umani'nenno tamazahina, ana erizana eri vgaregahaze. ⁷Hianagi tamagra hakare zampina knare hu'naze, tamentinti zampima, kegaga huzampima, mika Anumzamofu erizankura kazigazi nehuta, tagrikura tamavesi nerantaze. Ana hukana huta amizampina vugota hutma muse'zampinti zamiho. ⁸Nagra ama kema nehuana, amiho hu'na huhankvetina hunormantoe. Hianagi rumo'za kazigazi hu'za nezamizankna huta zmavesinezmenteta, zamigahazafi hu'na reramahena kenaku nehue. ⁹Na'ankure Rantimofu Jisasi Kraisi asunku'zana tamagra antahi'naze. Fenone nemo'agi, tamagriku huno amunte omne nekna hu'ne, e'i anama hu'neana Jisasi amunte omnezama'afinti feno vahe tamazeri feno vahe fore hanigure. ¹⁰Zago eritruhu erizamofonku nagrani'a antahiantahi hu'ama huzahue. Koma evia kafure zgo eritru huno ami eri'zana

tamagra'a erigafa huneta, ana erizankukera osunazanki, tamagu'areti ene huta ami'naze. ¹¹Menina ana erizana eri vagaresageno, tamagu'areti tamavenesigeta zgo ami eriza eri vagaregahune huta hu'nazazamo'a, zgo ante'naza avamente magozahu hugahie. ¹²Na'ankure mago'mo'ma feno amizamofu avesizama me'nenkeno'a, onte'nesia avamentera omigahianki, nazano ante'nea avamente aminigeno'a, Anumzamofu muse hugahie. (Mak 12:41-44) ¹³Tagri tavesimo'a ruga'amokizmi nezamisageza fru hu'za manisnageta, tamagra atupa huta manisnaze nosunanagi, mni'naza avamente manisnazegu nehune. ¹⁴Menina tamagripi rama'a me'negu, atupa hu'za mani'naza vahe zamaza hanageno, henka'a tamagrama atupa hanageno'a tamaza hugahaze. E'i ana hanuta magoke avamente manigahaze. ¹⁵Anumzamofu avontafepi anage huno krente'ne, ***Rama'neza eritru hu'namo'za agatere'za rama'a nontaze, hagi osia'a nezama eri tru hunamoza atupara osu'naze.*** (Diu-Kas 16:18)

¹⁶Tamagriku kazigazi hu'na antahi neramuankna antahintahi, Taitus ami'nea Anumzamofu muse hunentoe. ¹⁷Na'ankure Taitusi'a tagrama hu'na nanekereke ovianki, tamagenakura agra'a avesi'rmantene, kazigazi huno tamagritega e'ne. ¹⁸Mago nerafu, Jisasi knare muse ke huama nehige'za maka mono vahe'mo'za agenke'a antahinaza nera, tagra huntonkeno Taitusi ene vu'na'e. ¹⁹Ana nera mono vahe'moza Jerusalema zgoma omezminaku'ma hanunana, tagrane vugahie hu'za huhamprintenea ne'mo, tagranena vugahie. Anumzamofu ra agi aminaku anara nehuta, tamage huta zamaza hu'zana eriamu hugahune. ²⁰Hanki mago'mo'e huno antahi haviza huorantenogu, rama'a vahe'mota magoka ana musezama tami'neazana kva huta erita neone. ²¹Anumzamofu avurekera fatgo huta omanisunanki, vahemofu avure enena fatgo huta manisunazanku tavenesie. ²²Ete mago nerafuna hakare zupa rehetu konana, mikazampina fatgo huno nemnino, Korinti vahe'motagu antahineramino tmaza hunaku nehia nera, Taitusi zane vugahaze. ²³Hanki Taitusi'a tmaza hu'naku nagrane eriza e'neria nere. Hagi agrane tare vna'a nerafukiznia mono nagapinti huznente'naze. Kraisi agi erisaga nehza vahe nevaze. ²⁴E'ina hu'negu zamesi'nezmanteta zmazeri so'e nehinke'za, Anumzamofu nagamo'za nege'za, Poli'ma Korinti vahe'mokizmi zamavu'zmavaku'ma nehiana tamage hu'ne hu'za hugahaze.

Jerusale mani'naza Anumzamofu naga ofa zgo zamaza hnaza naneke

9 ¹Jerusale mni'naza Anumzamofu naga zgo zamisune hu'naza zankura avona nagra kretamimi'na huramagesa hugara osu'noe. ²Na'ankure nagra antahi'noe, tamagu'amo otigeta zamaza hunaku retro'ma hu'nazana, Masedonia mono vahe, musezampinti zamasamina amanage huno'e, ko'ma evia kafufina Griki kaziga Akaia kumate nemniza vahe'mo'za, Juda

vahe zamaza hu'naku ko retro hu'naze hu'na tamagriku zamasm'noge'za, nentahiza zmagu'amo otige'za hakare vahe'mo'za anahukna huta zamigahune hu'naze. ³Hianagi Taitusine tare nerafukizni tamagrama mni'narega nagra hunezmantoe. Tamagri tami'naku ko retro hu'naze hu'na hu'noa kema zmasaminoa zamo'a, amnezankna hanigi, tro hunenke'za viho. ⁴Masedonia vahe'ene ru nevnugeno, ana zgo eri tru osunesageta, ko eritru hu'naze hu'na hu'noa ke'mo'a, amnezankna hinketa, tamagrane naganena tagazegu hugahune. ⁵E'ina hu'zanku nagrama nagesa antahuana nerafukizmima huzmantesunke'za tamagra mni'narega vugotesageta, koma eritru huta zamigahune hu'naza zgoa retro hu'nesageta vugahune. E'ina nehuta muse hutma zgoa nezamizageta, tagra zgotamia tutu huta avazu nosune.

⁶Nagra menina amanage nehue, osi'a avimzama nesaza vahe'mo'za, osi'a ana avamente nezana nevasgaze. Hanki rama'a avimaza nesaza vahe'mo'za, ana avamente rama'a nezana nevasgaze. ⁷Ana hu'negu magoke magokemotma aminaku'ma hanutma, tamagu'afima amigahune hutma tamagesa antahinesazama'a amiho. Vahe'mo tutu hinketa tamarimpa knazanena omiho. Na'ankure muse huno ami'mofonku, Anumzamo'a avenesie. ⁸Anumzamo'a knare huno makazampina asunkuzama'a eri avitermantena, aviteta mani'neta, mika zupa rama'a me'nesnifinti knare tamavu'tmava huta vahe'mofona zamaza hugahaze. ⁹Anumzamofu avontafepinema krente'neana, ***Iza'o refko huno amunte omane vahe, musezama nezmia vahe'mofona, Fatgo avu'avazama'amo mevava hugahie*** hu'ne. (Sam-Zga 112:9)

¹⁰Anumzamo hozama kri vahe'mofona avimzana nezamino, bretia nezane huno nezamie. Anahukna huno avimzana veva huno erira nehina, fatgo avu'avazantamimo'a rga'a nerena, rama'a nevasageta mago'ane vahe'mofona zamaza hugahaze. ¹¹Hakare zampina rama'a asomu hunermantena, vahe'ma zmaza hanazana rama'a zmaza nehnageno, Anumzamofona ra agi ami'za susu huntegahaze. ¹²Na'ankure ama'i vahe'ma azahu erizama e'nerizazamo'a, Anumzamofu nagakera zmaza nosianki, Anumzamofu susu huntetzampinti, ra agi amizamo'enena avinete. ¹³Na'ankure vahe'ma zmaza huta knazami erizamo, knare tamavuta eriamu hina nege'za, Kraisi knare musenkemofona amagenentaze hu'za huama nehu'za, Anumzamofona ra agi erisaga hugahaze. ¹⁴Nunamuzamifina tamagrikura antahineramiza nunamuna hunermantaze. Na'ankure Anumzamofu mriagatere asunkuzamo tamagrite'ma me'neazanku anara nehaze. ¹⁵Vahe'mota e'inahu kna nehie huta erinteama osuga muse zama neramiazankura, Anumzamofona susu huntesine.

Poli'a erizama'a azeri hanavetike hu'nea naneke

10 ¹Nagrani'a Poli'na, Kraisi anterami avu'avazampinti'ene fru avu'avazanteti tamantahinegoe. Nagra tamagranema mani'nena

fru avu'ava huramante'noanagi, afete'ma mani'nena hanave naneke huneramantoe. ²Nagrama tamagritega vanu'na hankve kea osnuegu nentahue. Hianagi nagra esu'na tagriku'ma vahe'mofo antahintireti havi eri'za e'nerize nehaza vahe'mofona hanavege eme huzmantegahue. ³Tamage mopafi vahe mani'nonanagi, mopafi vahe'mo'za hzaza huta hara nosune. ⁴Ha'ma huzantamima azeri'nonana, ama mopafi ha'zana omne'ne. Anumzamofa hankve ha'za me'neankino, Sata vihua ahe'nafru hugahie. ⁵Tagra hakare'a havi antahintahine havigemo'enema renkani renentegeno vahe'mo Anumzamofona antahi ama nosia antahintahizmia, zmazeri rukrehe hanunke'za Kraisi amagera antegahaze. ⁶Tamagrama amage'ma ante ftagoma hanageta, veganokno nehu'za, ke rutrage'namokizmia, ana nona'a knaza zamigahune.

⁷Tamagra mago'amota amega avufgage negeta agu'afina nonkaze. Hagi Kraisi vahe mani'noe huno hanave antahintahi nentahinimo'a, atregeno agra'a agu'afi refko huno negeno, nagra Kraisi vahe mani'noe huno nentahina, tagra'enena Kraisi vahe mni'none hugahune. ⁸Na'ankure Ramo'ma kva vahe manigahaze huno tazeri otigeta mni'neta tavufga rama nehunana, tamagri tamazeri so'e hunaku anara nehunanki, tamazeri haviza hunakura anara nosunankita, tagra tagazegura osugahune. ⁹Hanki tmazeri koro hunaku ama avontamina krenoramue. ¹⁰Na'ankure mago'amo'za amanage nehaze, Poli'a avontafepina hankave ke kreneramino, tavure'ma ne-eno'a, akoheno kea nehige'za, amnege nehie hu'za nehaze. ¹¹Hanki anagema nehnana vahe'moka antahio. Avontafe'tamimpima hanave kema krerami'nonankna huta tagrama esuta, hanavege eme hugahune. ¹²Na'ankure mago'amo'za knare vahe mani'none nehaza vahera nezmageta, tagratia zamagriteri refko huta nonkone. Hianagi zmagra'a mani'naza avamente refko hu'za nege'za, tagra knare vahe mni'none hu'za refko hu'za negaza vahe'mo'za, negi vahe mani'naze.

¹³Hianagi tagra mni'nona avamena agatereta tavufa ra osugahune, hianagi Anumzamo'ma e'inahu huta erizana erita kegva huzmanteho huno hurante'nesia avamente mni'neta, kegva hurmantegahune. ¹⁴Na'ankure tagrama ese knazupa Kraisi Knare MusenKe, erita tamagrama mani'narega Anumzamo'ma eriho hu'nea avamente Korintima mni'naza nagamotare uhanitinona zamofonkura, agatereta tavufga erisaga nosune. ¹⁵Magore huta rumo'za eri'za eri'nazazante tavufga ra osu'none. Hianagi tagripima fore hanigeta kesune huta antahi neramunana, tamagri tamentintimo nehagenkeno, erizama tamagripima erisunazamo'a ra huno hageno vanie huta nehune. ¹⁶Ana hu'negu, mago'mo'e huno Knare MusenKe huama osu'naza afete kumatamimpina, tagra ome huama huta vugahune. Na'ankure koma erizama rumo'za e'rinesaza kumatamimpina ome e'nerisunkeno tagenoka

osnazegu nehune. ¹⁷Hianagi avontafepina anage hu'ne, *iza'o avufga rama hu'nakuma hanimo'a, Ramofoma keno antahino hu'neazanku avufga ra hino.* (Jer 9:24) ¹⁸Na'ankure agra'agu knare hu'noe huno nehimo'ompage, Anumzamo'ma hu izo hu'nesimoke agra'agura musena hugahie.

Havige Aposol vahe'mokizmi kemo amate efore hania naneke

11 ¹Nagra neginagi naneke huzahuanki akoheta mni'neta antahiho. ²Kraisinte knare hutma mnisazegu hanave antahintahi nehue. Nagrama magoke vere, Kraisinte manisazema hu'noane. Vene omaseno agru hu'nea a'kna hu'nesage'na, tamagrira Kraisinte tamavrentesuegu nehue. ³Hu'neanagi nagra kore'ma huana, krunage osifavemo Ivi revatga hu'neakna huno tamagrira, reramataga nehinketa fatgo huta, ruotge hu'neta Kraisi amage nevza kana netreta tamagena humizanku nehue. ⁴Tagra Jisasi naneke nermasamunketma nentahitma, Ruotge Avamura e'nerita nanekema tamasamunana antahi rami'naze. Hianagi tamagra atrazageno ru vahe'mo'za ne-eza, ru mago Jisasi nanekene, ru Avamumofu naneke nermasmigeta, nentahita fru hutma ana nanekemofu amage nentaze. ⁵Ana hankave aposol eri'zama e'neriza vahe'mokizmia, nagra zamagri zmagorga'a omni'noankiza, zamagra nagateore'naze. ⁶Hianagi nagra nana naneke hu'zana rempi hu'na ontahi'noanagi, antahintahi zania me'ne. Hakare kampinti, eriamu hu'nogeta makazana ke'naze.

⁷Nagrania anteneramina, tamagrama knare hnazegu mizama'a omne Anumzamofu Knare Musenke tamasamua zamo'a, kefoza hu'na kumi nehufi? ⁸Nagra tamagri'ma tamaza hunakura musufa aseankna hu'na ru mono nagatetira musezamia erina, tamagri eme tamaza hugeta, tamagra mizana ose amne e'nenerize. ⁹Hagi tamagrane mani'nena magozankuma atupahua knafina, magomofona kna ami'na nazahuo hu'na osu'noe. Masedoniati e'naza nerafu'za, atupama huazantamina namizage'na eriknare hu'noe. Nagrira naza hnazegura knazana noramuankina, henka'anena anazanke hu'na knazana ontamigahue. ¹⁰Tamage huno Kraisi tamage nanekemo nagu'afi me'nesigena, nagri'ma naza osazazankura Akaia kumate Grisi kaziga huama nehanuge'za, tagano hu'za huonantegahaze. ¹¹Na'a hige'na e'inahu naneke nehue? Tamagrikura nave'nosifi? A'o tamagrikura navenesie, Anumzamo'a antahine.

¹²Hianagi nagrama amama nehua navunavara hu'na nevanenke'za, zamagrama nagriku'ma mago'zanke hu'none nehu'za zamufga rama nehazana ahepasaru hanenkeno evuramigahie. ¹³E'inahu vahe'mo'za havige aposol vahe mani'ne'za, havige eri'za vahe mani'ne'za, amega zamufarera Kraisi aposol mani'none nehazanagi, zmagu'afina krunage

apospel vahe mni'naze. ¹⁴Na'ankure antri osiho, Sata'enena krunage huno msa ankeru vahe kna hugahie. ¹⁵E'ina hu'negu antri osiho. Sata eri'za vahe'mo'za krunaza hu'za fatgo eri'za vahekna hugahaze. Ana nona'a eri'zama e'neri'za avamente mizama'a, henka'a erigahaze.

Poli'a Kraisi erizante knaza eri'nea naneke

¹⁶Mago'ane nerasmue, mago'mo'e huno nagrikura neginagi nere huno antahintahia osino. Hianagi neginagi nere huta antahinenamisuta, osi'a nagranena navufga erisagahu nanekema hanuana, neginagi vahe'mofoma antahimia kna huta antahinamiho. ¹⁷Nagra'agu'ma husagama nehuna, neginagi vahe kna nehuana, Ramo huo huno osu'nea naneke nehue. ¹⁸Hakare vahe'mo'za zamagra zamavufga, ama mopafi vahe'mo'za hazaza hu'za erisaga nehagu, nagranena anahukna huna navufga erisaga hugahue. ¹⁹Tamagra neginagi vahe'mokizmia knare huta antahinezamize, na'ankure tamagra knare antahintahine vahe mani'naze. ²⁰Tamage, tamagra zamatrazage'za vahe'mo'za tamazeri kazokzo eri'za vahe kna huneramante'za, reramatga nehu'za, tamagripinti musufa e'neriza, zamagra zamufga eri sga nehu'za tamavugosafi neramahazageta ke nosaze. ²¹Nasunku huanki tagrira hanavetia omaneneankita e'ima hazazana osugahune! Hianagi mago vahe'mo'ma agra'a avufgama erisaga hinkena, nagranena anazanke hu'na navufga erisaga hugahue.

²²Ana vahera Hibru vahepi? Nagranena Hibru nere. Zamagra Israeli vahepi? Nagranena Israeli nere. Zamagra Abrahamu nagapinti efore hunazafi? Nagranena Abrahamu nagapinti efore hu'noe. ²³Zamagra Kraisi eriza vahepi? Ama nanekema hanuana neginagi vahe'mo'za nehazankna nehue. Nagra zamagterena tusiza hu'na Anumzamofu eri'za e'nerina, zamagterena kina nompina rama'a zupa manina, rama'a zupa kanonutira nahetere hazage'na frikante vu'noe. ²⁴5fu'a zupa, Jiu kva vahe'moza kefo vahe hampriza nezmahaza kna huza 39ni'a zupa sefu knonkeve namiza navufga rutraga hutere hu'naze. ²⁵3'a zupa kumpa knonuti knonkeve nami'naze. Hanki magoke zupa have knonu nahenaze. 3'a zupa ventefi nevugeno haviza huno hageri tamigena, tina nakrikatetena, mago zageferuki, mago haninki huna hageri amunompi mani'noe.

²⁶Hakare zupa vano hufina, rama'a hazenkefi ufre'noe, ti nehegefi tina marekanetogeno, kumzafa vahe'mo'za nahe'za nehazageno, nagrini'a naga'mo'zane, megia vahe'mo'za nahe'kate'naze. Rankumapi manige, ka'ma kokampina nevuge'za nazeri haviza hu'za nehazegeno, hage'rumpima fnane hu'za nehugeno, havige nerafu'zanena nazeri haviza hu'za hu'naze. ²⁷Amuho hu'na tusi'a eriza e'nerina, mago'a kenagera navura ovase'noe. Nezane tine omnegenaga nagazanku nehugeno, tinku enena navesine. Kukenani'a omanegenaga zasimo enena nazeri haviza hu'ne. ²⁸E'i ana knazama eri'nofinena, mago mago knafina mono kevugura, inankna hu'za nemanize hu'na tusi antahiantahi

nehuazamo'a kna nami'ne. ²⁹Mono vahe hanave'a omanegeni, nagrira hanaveni'a me'ne? Mago'mo kumipima ufregena, nagra narimpa kna hu'noe.

³⁰Navufga erisaga hanuna, nagrira hankaveniama omanenea zama naverima nehiazanku navufga ra hugahue. ³¹Anumza Rantimofa Jisasi Nefa antahinege'na tamage nehuankino, ra agia erivava hugahie.

³²Damaskasi kumate'ma maninoa knafina, Kini Aretasi agorga'a mani'nea gavana ne'mo, rankumamofa kafantaminte mni'neni nazerinaku kava vahe huzamantegeza kava hu'naze. ³³Hianagi nagrama zamatre'na frenoana eka'eka kupi mani'noge'za nofite azerine'za natrazagena, zaho eri kampinti (windo) fegu'a uramina zamatre'na fre'noe. (Apo 9:24-25)

Poli'a avanagnaza ke'nea naneke

12 ¹Navufgama erisaga huzampintira mago'zana e'noruanagi, Ramo oku'ame'nea zane avanagnaza naveri hu'neazanku navufga erisagahu kea hugahue. ²Nagra antahi'noe, 14ni'a kafu evunefina Kraisi ene hagerafi'nea ne'mo, nampa 3 monafinka (mareri agatere kumate) marerineana amega avufgarero, avamupino manineno mreri'neo nagra ontahi'noe, Anumzamoke antahine. ³Ana nera nagra ontahi'noe, amega avufgarero avamupino, nagra ontahi'noe, Anumzamoke antahine. ⁴Hianagi Monafi (Paradise) avreno marerigeno, agra vahe'mo huama osuga'za ome antahine. ⁵E'i anazama naveri hu'nea ne'mofonku hu'na navufga ra hugahue, hianagi nagra'agura navufga ra osugahue, hagi hanaveniama omanenesiazanku navufga ra hugahue. ⁶Nagra navufga rama hanuana neginagi vahekna osugahue. Na'ankure nagra tamage nanekege'za hugahue. Hianagi nagrira antahi ra huonantesazanki keniare'ene navunava zaniare kesazegu mago'zana nosue. ⁷Na'ankure oku'ma me'nea knarezantafama Anumzamoke naveri higena ke'noe. Hianagi e'inazante negena ra nagi erizankura, nekzagna zamo navufgafi nenreana, e'i Sata eriza vahe'mo nata nenamino, nazeri haviza nehiankina navufga ra osnugu anara nehie. ⁸Ama ana natama negriazana Ramo eritrenantesegu, 3'a zupa kazigazi hu'na antahige'noe. ⁹Hianagi Ramo'a amanage huno nasmine, Nagri nasunkuzamo'a knare kagrira hugantene. Na'ankure hanave ka'a omanesirera, Nagri hanavemo'a knare hugantegahie. E'ina hu'negu, Ramofo hankavemo'a knarezantafa huno refite nantegahiankina hanaveni'a omanesifina muse nehuna navufga ra hugahue. ¹⁰E'ina hu'negu, kema nasazano, nazeri haviza hanazo, knaza fore hanio, amuho erisua knafina rama'a muse nehuna, narimpa fru hu'na hanavenia omnea knafina nemanue. Na'ankure Kraisi'na hu'na hanaveni'a omanea knafina, hanavenia e'nerue.

Poli'a Korinti vahe'mo'za zmentintifina hankaveti'za manisagu krezaminea naneke

¹¹Tamagra nagrira knare hu'ne hutma nazeri ante'ama hugaragi, netreta nagrira nazeri neginagi vahekna nehaza zankura, nagra navufga ra nehue.

Na'ankure nagra amneza mani'noanagi, ugota aposol vahepina henkarfana omani'noe. ¹²Tamage aposol vahe'mofo avame'za tamagri amunompi hunoazama kesazana, avame'zama, kagu'vazama hanavenentike eri'za erino kazigazi huno vanimo'e. ¹³Na'ankure mago'zahu navunava ana miko mono nagapina nehuana, magoke'zama nagrama huoramante'noana tamagrama kva hunantesazeguma knama orami'nozamo'e. E'i kefozama hu'nesuana nasunku huanki kefozania atrenanteho.

¹⁴Hanki antahiho, ko tare zupa ome tamage'noe, meni mago'ene ome tamageku nehuankina tamagrira kna ontamigahue. Na'ankure mofavremo'za nerera nefazana kva hunonteanke, Nererake nefake mofavre'amo erinizana antenteno nevuno kegva hunente. Ana hunegu tamagripintira mago'zana e'origahuanki, tamagri tamagu tamemo so'e hanigu navenesigena nehue. ¹⁵Tamagri manizanku hu'na nagra navufgane, maka'zaniane neramue. Hagi rama'azampima navesineramantesugeta, tamagra osi'a tamavesinantegahazo?

¹⁶E'inahukna hu'negu tamage hu'na knazana noramue. Hianagi tamagrama antahizana krunage nehuno musufasenaku nehie hutma nagrikura neheze. ¹⁷Nagrama huzmantoge'zama tamagrira tamaza hinogu vu'naza mono vahepintira, mago'a nazahuzana reramatga hu'na enerufi? A'o nagra anara osu'noe. ¹⁸Nagrama, Taitusine mago nerafunema tutu hu'na huznantogene tamagritega vuna'ana Taitusi'a reramatga huno mago'a azahu zana erinefi? I'o tamagra antahi'naze, Taitusi'ene naganena magoke avamuteti magozahu huta eriza e'neru'e.

¹⁹Tamagrama tamagesa antahizana, tagrikura zmagra'a ke erihanavetinaku nehaze hutma tamagesa nentahizafi? Tamage e'inahu tamagesa nentahizanagi, Anumzamomo avurera Kraisinku keaga nehuta tamagrira tamaza hanigeta hageta mrisisaza zanku tamavesi neramantona nerafugatagu nehune. ²⁰Na'ankure nagri'ma namnomavaziana esua zupa nagri'ma naveosi nesiazama tamagripima eme nege'na tamave'osinesizama huzankure. Nagri'ma namnovaziana, tamagripima eme neramege'na, amunontamifi ke ha' huzama, kanive rezama, arimpa hezama, atanezama, havige ohunte ahunte huzama, ogenke agenke huzama, veganokno huzama, manifatgo osuno makaza erisavri hu avu'avazanku nehue. ²¹Nagra ete'na ome tamagesua zupa, Anumzamo tamagri tamavufima nazeri nagaze huzankura kore hue. Na'ankure hakaremotma korapa kumitami'a tamagu'a rukrehe osu'naze. Tamagra savri avu'avaza nehutma, monko avu'avaza nehutma, agazehu avu'avaza hu tamaga tevava nehiazankura nagrira zavite nagesa nehie.

Korinti vahe'mo'zama manizazmi refko hu'za kesaza naneke

13 ¹Ko tare zupa tamagrira eme tamagenoreti, menina eme tamage'naku neoe. Hagi avontafemo'a anage hu'ne. ***Mika tamage***

kemofona tareo tagufa vahe'mofo nanekemo hutmagea hanigeno, anankemo'a tamagea megahie. (Diu-Kas 19:15)

²Nagra ese'ma ete'na anantema e'norera, kava huta maniho nanekea ko tamasmi'noe. Hagi menina tamagri enena omninoanagi, mago'ane kumima nehaza vahetamine, mago'a vahetaminena kva huta manisaza nanekea neramasamue. Nagrama henkama esnuna kumima nehaza vahera tamazo onkigahuanki, knaza emeramigahue. ³Kraisima nagri nagipi huvazino nehia kemofa agafa'a kesuneguma nehaza zankura, emeri ama hugahie. Kraisi'ma tamagripima erizama eneriana fru huno e'norianki hanavetino erizana enerie. Agra himamu hankave tamagripina me'ne.

⁴Tamage, hanave'a omanegeno keka zafarera fri'ne. Menina Agra, Anumzamofa hankavere kasefa huno asimu erino mani'ne. Na'ankure tagri'enena anahukna huno hanavetia omneanagi, Kraisi'ni mani'neta Anumzamofa hanave erineta, ana hanavereti tamagripina erizana e'nerune.

⁵Tamagratmi'a avame antetma tamagu'a refko huta keho, tamentintifi maninazafi? Hifi tamagra'a tamaguafina refko huta nonkazafi, Jisas Kraisi'ma tamaguafina mni'neana, Agrira keta antahita nosaze.

⁶Hianagi nagrama namentintima huana, tagratia rehezampintira evunoramune huta antahita keta hugahaze. ⁷Havi avu'ava osihogu Anumzamofontega nunamuna nehune. Hanki erizantimofonku vahe'mo'za huknare hihogura nunamuna nosune. Hianagi erizantimo'a eamara huno knarera osnianagi, tamagra fatgo tamavutmava hihogu nunamuna nehune. ⁸Na'ankure tagra tamage kemofa ha'renenteta rutagregara osunonanagi, tamage kemofonke amage antegahune. ⁹Tagra muse nehune, na'ankure tagrira hankavetia omne'neanagi, tamagrira hanavetmia me'negu, tamazeri knare zantfa haniegu nunamuna hunermantone. ¹⁰Na'ankure tamagri'enena omani'noanagi, ama agafare avona krenetamuanki'na, nagrama tamagranema manisuna knazana ontaminaku nehue. Ramo'ma himamuma nami'nea hanavereti, tamazeri haviza hunakura nosuanki, tamazeri hanavetisugeta hagetma tamentintifina marerisazegu nehue.

¹¹Hagi nafu nagnaheta huvhare nanekea anage hu'na kreneramue, muse nehuta, mago'ane tamamentintifina hanavenetita, ozeri hanaveti azeri hanaveti nehuta, magoke antahintahi enerita, tamarimpa fru nehinkeno, avesinte zamofone, Anumzamofa rimpa fruzamo'a tamagrane megahie. ¹²Mago magomofona avataginka azeri fru huo. ¹³Miko Anumzamofa nagamo'za musenke atreramantaze.

¹⁴Hagi Ramofo Jisas Kraisi asunku zamo'ene Anumzamofa avesi zamo'ene Avamumo'enema tagroteno mni' avu'avazamo'a mikomotmafi mesie.

Poli'a Galesia Vahe'mokizmi Avonkrezmi'nea Naneke

1 ¹Nagra Poli'na aposol ne'mo'na, ama eri'zana mago'a vahe'mo hunantege, mago'a naga'mo'za erio hazagena e'norue. Hianagi Anumza Nafatimo Jisas Kraisi fri'nefinti azeri otinemo'ene, ²maka nagrane mni'naza nafuhezanena, Galesia mani'naza mono nagamotarega musenkea atreneramantone.

³Anumza Nafatimofone Ranti Jisas Kraisi asunkuzamo'ene rimpa fruzamo'a tamagrane mesie. ⁴Jisasi asimu'a atreno kumitia atterante'ne. E'inama hu'neana Anumza Nafatimofa avesi avaririno, mopafima amama meni mni'nona kefo avu'avazampinti tahokeno tazahunaku anara hu'ne. ⁵Ana hu'negu Anumzamo ra agia, Agra'a eri vava hugahie! Tamage.

Magoke knare musenkemofa naneke

⁶Nagra antri hue, Anumzamo'a Jisasi asunkuzanteti tamagi hu'nea nagamota netretma, ruzahu musenkemofa amage nentaze. ⁷Hanki ru knare musenkea omnene, mago'amo'za tmazeri savri hu'za Jisas Kraisi knare musenkea erisavri hunaku nehaze. ⁸Hianagi tagraneno, monafinti ankeri vahe'mo, ko'ma tamasmi'nona knare musenke atre'za, ru kema tmasamisazana, kasusifi manigahaze! ⁹Ko'ma tmasmi'nona ke menina mago'ene neramasamue, Ko'ma knare musenkema huama hunketa antahi'naza kemofoma ha'ma rente kazigatima kema hanimo'a, kasusifi manigahie!

¹⁰Na'ankure nagrama e'inagama nehuana, vahe'mo'za antahi so'e hunantege, Anumzamo antahi so'e hunantenogu nehufi? Hifi nagrama mraguzamanetuaana vahe'mo'za antahi muse hunantehogupi? Nagrama vahe'mo'za antahi muse hunante'nazegu'ma nehanuna, Nagra Kraisi kazokzo eri'za vahera omni'noe.

Poli'a eri'zama'agu azeri hanaveti ke hu'nea naneke

¹¹Na'ankure nenafugata nagri'ma navesiana, knare musenkema huama nehuana, vahe'mofo antahintahireti hunoramie huta antahi ama hnazegu

nehue. ¹²Na'ankure ama ana kea vahepinti e'orina, vahe'mo'za rempia huonami'naze. Hianagi oku'a frakinea kea Jisasi eriamu huno nami'ne.

¹³Na'ankure korapama Jiu vahe'mota avu'avaza nehua knafina, Anumzamofu avu'ava nehue nehu'na, mono nagama nezmahena, zmazeri havizama hu'noana tamagra ko antahi'naze. (Apo 8:3) ¹⁴Nagra tusi hanaveti'na tagehe'mokizmi zamuzmara amage'nentogeno, anama huazamo'a nagri navuma mni'naza, Jiu vahe'mokizmia zamuzmamofona zmagatere'noe. Nagra tusi hanavetina nagehemofu avu'avara avaririnoe. ¹⁵Hianagi nagra nenrera rimpafina forera osu'nogeno, korapa Anumzamofu Agra'a asunkuzanteti huhamprinantenemo muse hunanteno, ¹⁶Agra'a nemofona naveri hige'na, megia' vahepina knare musenkea huama nehue. Mago vahe'mokizmia ame hu'na nagra zmantahi'onke'noe. ¹⁷Jerusale kumate nagra mareorina, ko'ma mni'naza aposol nagara ome ozmage'noe. Hianagi nagra Arabia kumate vute'na, ete mago'ene Damasakas kumate vu'noe. ¹⁸Ana hute'na, 3'a kafu evige'na, Jerusale kumate vu'na, Pita'ene kea ome nehu'na, 15ni'agna anante mni'noe. ¹⁹Hianagi mago'a mono nenafugizmia ozmage'noanki, Ramofu negna Jemisinke ke'noe. (Apo 9:26-30, 11:29-30)

²⁰Nagrama amama kreneramuana, Anumzamofu avufina tamage hu'na reramatga nosue. ²¹Ana hute'na Jerusale kumara atre'na Siriane, Silisia kaziga vu'noe. ²²Judia kazigama mono nagama Kraisimpi mni'namo'za, nagrira navufina onage'naze. ²³Hianagi tagrama tamentintima nehunkeno, nerahegeta agenke'a nentahuna ne'mo'a, amentintimofu kea huama nehie hu'za nagrikura hu'naze. ²⁴Na'ankure nagrite'ma fore'ma hu'neazankura, Anumzamofu agi erisaga hu'naze.

Poli'a Jerusale vuno aposol vahe'ene ke ome hu'nea naneke

(Apo 15)

2 ¹14ni'a kafuzge manite'na, Jerusale kumate Banavasi'ene ete mmerita nevuta, Taitusina avreta vu'no'e. ²E'inama hu'noana na'ankure oku'a fraki'nea nanekea, Anumzamofu nagri naveri hu'nea naneke megia' vahepi huama hu'noa kea ome zmasami'noe. Menima e'nerua erizamo'ene, ko'ma eri'noa eri'zamo'a amnezanknara osinogu kva vahe zamagrike ome zamasami'noe. ³Hianagi Taitusi'a Griki ne'mo nagri'ene vano nehia neragi, kva vahe'mo'za mago zmarimpa hu'za, oku avufga tga huzankura mago kea osu'naze. ⁴Hianagi havige mono nerafu'za mono vahekna hu'za atrumahumpi enefre'za, Kraisi Jisasimpi fruhuta mni'nonazana tavre'za korapa avu'avazampi kinarerante'naku efre'naze. ⁵Hianagi tagra tamage knare musenkemo tamagrane mesiegu, zamagri kea antahiozamita kankamuna ozamunke'za, havige mono nerafu'za tagrikura ke hara hurante'naze. ⁶Hianagi ra zmagima eri'naza vahe'mokizmia, ra zmagima eri'nazo, ra zmagi e'ori'nazo nagra ana zankura nontahue.

Anumzamo'enena ra zmagigura nontahie. Ana zmagima me'nea vahe'mo'za mago kea nagri kerera osu'naze. ⁷Hianagi zamagrama ke'za antahizama hazana, Pitama zamufga tgahu Jiu vahete knare musenke ome huama hinogu hunte'neaza huno, nagrira zamufga tga osu'naza megi'a vahete knare musenkea huama huogu hunante'ne hu'za ke'za antahiza hu'naze. ⁸Na'ankure zmuftga tgahu Jiu vahempima Pitama aposol erizante huntogeno vu'nea Anumzamo, nagri'enena aposol erizana zmuftga tga osu megi'a vahepina eriogu hunante'ne. ⁹Anumzamo'ma asunkuzama'areti nami'nea eri'zana, Jemisima, Pitama, Jonima zamagra mono erizamofona hagaza zafa mani'ne'za ke'ama nehu'za, Banabasine nagri'enena megi'a vahepi eri'za omerisu'egu magoka hurantageta megi'a vahepina vu'no'e. Hagi Jiu vahete zmagra eri'zana erisageta, tagra megi'a vahepi eri'zana erigahu'e.

¹⁰Zamagra zamunte omane vahe zamaza huzankura antahizamiho hu'za hurante'naze. E'i ana eri'zana nagrira tusi'za huno navesisige'na erinaku nehua erizanku hu'naze.

Pita haviza higeno Poli'a kesuno azeri fatgo hu'nea naneke

¹¹Hianagi Pita'ma Antioku kumate ehnatige'na, haviza hu'nane hu'na avufi kesu'noe. ¹²Na'ankure Jemisima huzmante'nea vahe'mo'zama omenageno'a, Pita'a knare huno megi'a vahe'enena magopinti ne'zana netere hu'ne. Hianagi mago'a vahe'ma Jemisi'ma huzmantege'za neageno'a, Pita'a anamokizmia zamatrengo agragu umanine. Na'ankure zamufga tga hu'naza vaheku koro hu'no'e. ¹³Maka Jiu vahe'mo'za, anahukna hu'za krana zamuzma nehazageno, ana zamo'enena, Banabasina avazu hu'ne. ¹⁴Hianagi nagrama kogeno, knare musenkefi fatgo hu'za omnizagena, maka'mokizmi zamufi anage hu'na Pitana asmi'noe, kagra Jiu ne' mni'nenka, megi'a vahekna hunka nemaninka, Jiu vahekna hunka omnio. Nankna hunka megi'a vahe'mokizmia, Jiu vahe'moza nehazaza hiho hunka nehane?

Jisasi Kraisinte zamentinti hanaza vahera Anumzamo'a Fatgo vahere huno nehia naneke

¹⁵Tagra Jiu vahe mani'neta, megi'a vahe'mokizmi amu'nompina, kumi vahera omani'none. ¹⁶Tamagerafa huno vahe'mo'za kasegemofu erizantetira fatgo vahera omanigahaze. Hianagi Jisasi Kraisinte'ma zmentinti hazamo'za fatgo vahera nemnizankita, tagranena Jisasi Kraisinte tamentinti nehuta fatgo vahera nemnunankino, kasegema avaririzamo tazeri fatgo vahera noseankita, Jisasi Kraisinte tamentinti hanunazamo fatgo vahera nemnunanki, kasegema avaririzamo'a vahe'mota tazeri fatgo nosie. Kasegemo'a mago vahera azeri fatgo osugahie. ¹⁷Tagrama Jiu vahe'motama Kraisimpima tazeri fatgo hu

kanku'ma nehakesumota, kesunana kumi vahe mani'none hugahune. Ama'i ana zamo'a huno Kraisi higeta kumira nehumpi? Anara nosune. ¹⁸Ko'ma atre'noa kasegema eri kasefa hanu'na, nagra kumi vahe mnigahue. ¹⁹Na'ankure kasegemo'a fri kante navrentege'na, kasegefina ko fri'noanagi, menina ama kanteti Anumzanena nasimu eri'na mani'noe. Nagrira Kraisi'ene rugeka zafare nahe'za hantizage'na, Agrane ko fri'noe. ²⁰Nagra Kraisi'ene keka zafare ko fri'noankina, menima mni'noana nagra'a omani'noanki, Kraisi nagu'afina mani'negena, nagrama ama navufare'ma mani'noana, Anumzamofa Nemofonte namentinti nehu'na Agra'a avesinanteno asimua nami'nemofonte mani'noe. ²¹Nagra Anumzamofona asunku'zana namage'na hunemi'na eri amnezankna osugahue. Tagrama kasegema avaririsunkeno, Anumzamo taguvazigahie hanunkeno'a, Jisasi'ma frino tazeri agruma hu'neazamo'a amnezakna hugahie.

Kasegene Jisasinte tamentinti hanunazamofa naneke

3 ¹Tamagra neginagi Galesia vahere, Nagra Jisasima rugeka zafare ahegeno fri'nea kea ko huama hugeta antahi'nazanagi, ina ne'mo antahintahitama tamazeri savrira nehie? ²Nagra mago'za tamagripintira kena erifore hu'za hue. Tamagrama Ruotge Avamuma eri'nazana, kasegemofa erizanteti eri'nazafi, ke nentahita tamentinti nehuta eri'naze. ³Tamagra negi nenazafi? Avamumo eri agafa hu'nea eri'zana, tamagratami hanavereti erivgare'za nehazo? ⁴Nagrama nagesama antahuana tamagrama ko'ma knazama eri'nazana, amane eri'nazo? Nagrama nagesa antahuana amne knazana e'ori'naze. ⁵Anumzamo'ma Ruotge Avamu'a neramamino, kaguvazama tamagripima erifore hu'neana, Mosese kasege avaririzageno anara hu'nefi? Anumzamofa ke nentahita, Agrite tamamentinti hzageno anara hu'ne?

⁶Avontafemo'a anage hu'ne, **Abrahamu'a amentinti higeno, Anumzamo'a fatgo nere huno agrikura hu'ne.** (Jen-Agf 15:6) ⁷E'ina hu'negu antahita ketama hanazana, zamentintima haza vahe'mozage, Abrahamu mofavre mni'naze. ⁸Avontafepina anage huno krente'ne, Anumzamo'a megia vahera zmentinti hanageno z mavregahie huno hu'ne. E'ina hu'negu Anumzamo'a anage huno Abrahamuna knare musenkea asmino, **maka mopafi vahe'mo'za kagripinti asomura erigahaze** huno hune. (Jen-Agf 12:3) ⁹E'ina hu'negu iza'o amentintima hanimo'a, amentinti ne'ma Abrahamuma ami'nea asomura erigahie.

¹⁰Na'ankure kasegema avaririzante Anumzamo'a muse hunantegahie hanimo'a, kausifi mani'ne. Anumzamofa avontafepina anage hu'ne, **mika vahe'mo'za mika kasegema amage'ma ontesnamo'za kausifi manigahaze hu'ne.** (Diu-Kas 27:26) ¹¹Hagi mago vahe'mo'e huno kasegema amage'ma antezampintira Anumzamofa avufina fatgo vahera

omnigahie. Na'ankure **fatgo vahera zamentintima hanagu manigahaze**. (Hava 2:4) ¹²E'inahukna hianagi, kasegemo'a amentinti hu'zana omnene, **iza'zo e'inahu hu'za kasegemofo amage'ma nentesazamo'za, ana kasegere manigahaze**. (Lev-Pri 18:5)

¹³Kasegemofo kazusifintira Kraisi'a mizaseranteno taza hu'neankino, ana kazusia Agra'a erino taza hu'ne. Na'ankure anage huno avontafepina krentene, **maka vahe'mo'za keka zafare'ma hanti'nesamo'za kazusifi mani'naze** hu'ne. (Diu-Kas 21:22, 23) ¹⁴E'ina hanunkeno Abrahamuma huhampitenea asomumo'a, Kraisi Jisasimpinti megia vahepina nevanigeta, tagra huvempa hu'nea Avamura tamentinti hanuta erigahune.

Kasegene Anumzamo'ma huvempa hunea kemofa naneke

¹⁵Nenfugate, Nagra vahe'mo'zama maka knama nehaza zmavuzmavate hunte'na tamamiza hue, vahe'mo'ma mago'zama hu'naku mago rimpama hu'za kema hagerafinesaza kea, mago vahe'mo'a rugea huntege, eri atrege osugahie. ¹⁶Korapara Anumzamo'a Abrahamunku'ene agripinti fore hania mofavregu huvempa kea hunte'ne. Agra kagri mofavreramine huno osu'ne. Agra rama'a mofavre raminkura osu'ne. Magoke mofavregu huno anage hu'ne, **kagripinti fore'ma hanimo'ema** hu'neana, e'i Kraisinku hu'ne. (Jen-Agf 17:7) ¹⁷Hanki Nagrama nehuana amanage nehue, esera Anumzamo'a Abrahamu'ene huvempa hutegeno, 430ti'a kafuzge evutegeno, henka kasegea efore hu'neankino, kasegemo'a Anumzamo'ma huvempama hu'nea kea eri otregahie. ¹⁸Na'ankure erisanti haregahaze hunesiazamo kasegefima manenesiana, huvempa hu'nea kefina omnesine. Hianagi Anumzamo'a Abrahamuna huvempa hunte'ne.

¹⁹E'inama hu'nesiana, na'a agafare kasegea ami'ne? Kasegema zami'neana vahe'mo'za kefozama nehazaza keama hnazegu zami'ne. Hianagi ama ana kasegema avaririzamo'a memevuno, Anumzamo huvempama hu'nea Mofavrema esia knare ome vgaregahie. E'i anazamo'a mago'ane ruzahu hu'ne. Anumzamo'a ankeru vahera kasegea zamige'za, Anumzane, vahe'mofone amuno ne' Mosese ami'naze. ²⁰Tare vahe'moke kema hagerafinaku'ma hanunkeno'a, amuno ne' mni'nenkene anara hugaragi, Anumzamo Agra'a huvempa Abrahamuna hunte'ne.

²¹Kasegemo'a Anumzamo huvempa hu'nea kene mago znarimpa osu'napi? A'o, anara osu'ne! Hagi maka kasegemo'ma kasefa tasimuma tamisiana, tagra ana kasegege amage'nenteta Anumzamofa avurera fatgo vahera manusine. ²²Hianagi Anumzamofa avontafemo'a anage hu'ne, Kumi'mo'a maka vahera kina huzmante'negu, Anumzamo'ma huvempa hu'neazama erisazana magoke kana, Jisasi Kraisinte zamentinti hanamo'za erigahaze.

²³Hianagi amentintima omenegeno, kasegemo kina rerantegeta manita neonkeno tamentinti hu'zana efore hu'ne.

Tamentinti hanuta Anumzamofa mofavre manisuna naneke

²⁴E'ina hu'negu kasegemo'a kvagiranteno Jisas Kraisi knare ehnati'neankita, tagrama tamentinti hanuta Anumzamofa avurera fatgo vahera manigahune. ²⁵Hianagi tamentinti hu'zamo fore'ma hu'nea knafi mni'nonankino, kasegemo'a kegva kriorantegahie.

²⁶Na'ankure tamagra maka'mota Jisas Kraisi'ne'ma tamentintima nehuta, Anumzamofa mofavre mani'naze. ²⁷Na'ankure tamagra maka'mota Jisas Kraisi'ne' mono tina nefreta, Kraisi'ne' kukena hiaza nehaze. ²⁸Hanki Jiu vahero Griki vahera omnita, kazokzo vahe'ene amne vahera omnita, veo aro omni'naze. Na'ankure tamagra maka'mota Kraisi'ne' Jisasimpina magoke mani'naze. ²⁹Hagi tamagrama Kraisi'ne' vahe'ma mni'nenuta, tamagra Abrahamu negehogata mni'neta, erisanti haregahazema huno Anumzamofa huvempa hunte'nea vahera manigahaze.

Kraisi erizanteti Anumzamofa mofavre maninaze hu'nea naneke

4 ¹Nagra anage hu'na nehue, nefa fenozama erisanti'ne' ne'mo'ma osi mofavrema mni'nenuno'a, maka'zana agri'za megahianagi, kazokzo eri'za vahekna huno manigahie. ²Hianagi ana mofavremo'a fenozama kegva hu'naza vahe'ene, agri'ma kegva hu'naza vahe'mofo agorga'a mni'nenigeno, nefa'ma fenozama erisanti haregahane hunte'nesia kna efore hugahie. ³Anahukna kante tagranena mofavrema mni'neta, ama mopama kegva hu'naza avamutamimofa zmagorga'a mni'neta kazokzo hu'nonane. ⁴Hianagi humante'nea kna fatgoma egeno'a, Anumzamofa mofavre'a huntegeno, a'mo ana mofavre kasentegno, kasegemofa agorga efore hu'ne. ⁵Ana hu'negu kasegemofa agorga mni'naza vahera, Agra mizaseranteno tamavresigeta, avreno kri'nea vahekna huta, Agri mofavre manigahune. ⁶Na'ankure tamagra mofavre'a mani'nageno, Anumzamofa mofavre'amofa Avamu huntegeno, tagu'afi emani'ne'no tazeri otino, Aba,^a Nafa'o huno nehie. ⁷E'ina hu'negu mago'ene kazokzo eri'za vahera tamagra omani'naze. Hianagi Anumzamofa mofavre'a mni'naze. Ana hu'nazagu fenozama'a erisanti'ne' vahe mni'naze.

Poli'a Galesia vaheku hakare agha antahi'nea naneke

⁸Tamagra korapara Anumzana keta antahita osu'neta, amne zanku, anumzantie huta nehazageno, kina reramantegeta anuzamofa kazokzo vahe mni'nazane. ⁹Hianagi menina Anuzamofona keta antahita hazageno, Anuzamofa'ne'na tamagrira tamegeno antahino hu'neanki, nahigeta tamagena hunemita, haviza huno hanave'a omne avamute nehuta, mago'ane kazokzo eri'za vahe'a manisune huta nehazo?

^a 4:6 Kriki vahe kefina Aba hu'neana nenafo hu'ne.

¹⁰Tamagra Anumzamo'ma muse huramante kazigati, mago knazupo, ikantero, kafurero, knane knanena makazana huge, osugera nehaze.

¹¹Tamagrikura tusi'za hu'na eri'zana eri'noankino, ana eri'zamo amnezankna huzankura nagra tusiza hu'na kore hue.

¹²Nafuheta nagrama hu'noankna hutma, tamagra Jiu vahe'mokizmi kasegemofu kinafina omnihogu navenesige'na tamantahinegoe, hanage'na naganena tamagrikna hanuegu nehue. Tamagra mago hazenkea nagrira huonante'naze. ¹³Hianagi tamagra antahita keta hu'naze. Navufafina kri me'nege'na, knare musenkea huama hu'na ese knazupa tamasami'noe. ¹⁴Nagri krimo'a knaza tamagrira tami'ne, hianagi ana krima eri'noazankura tamagra tamavugosa huonantege, tamagena huonami'naze. Hianagi tamagra nagrira Anumzamofu ankeru avreankna huge, Kraisi Jisas avreankna hutma navre'naze. ¹⁵Hianagi ana musezantamia iga menina me'ne? Nagra tamage hu'na tamagrikura huama nehue. Tamagra ana knazupa tusiza huta nazahunaku hu'nazankita, tamagrama tamavuma tagatita nazamahugama huneresina, amne anara hazasine. ¹⁶Tamage kema neramasamuazamo, tamagri ha' vahera nemanufi? ¹⁷Antahiho, e'i ana vahe'mo'za tamagrira masavenke hu'za tavrenaku nehazanagi, tamagrira tamaza hunakura anara nosaze. Zamagra nagriteti tamavazu hu'za zamagrarega antesageta zmaza hnazegu anara nehaze. ¹⁸Hianagi nagrama omnisua knafine, maka zupa knare tamavutmava'ma huzanku'ma hanavematisazana, e'i knare zantfa hugahie. ¹⁹Mofavre'nimote Anumzamofu mofavre'manita, Kraisimpina nena vahekna hutma maniho. Tamagri'ma tamaza hunaku'ma nehugenofu a'nemo mofavre kasentenaku ata negriankna nata negrie. ²⁰Hianagi nagra nagesa antahuana tamagrane menina umani'ne'na, fruhuna kea hu'naku nehue. Na'ankure nagra nankna hu'na tamaza hugahue, antahintahinimo'a savri hue.

Serane Hegane fronka naneke

²¹Tamagra nasmiho, kasegemofu agorga'a manize nehaze vahe'mota, tamagra kasegemofu hu'nea kea ontahinazo? ²²Na'ankure anage huno avontafepina krentene, ***Abrahamuna tare ne' mofavre'a mani'na'e, mago mofavrea kazokzo a'mofu mofavregi, magora kazokzo osu a'mofu ne' mofavre mani'ne.*** (Jen-Agf 16:15, 21:2) ²³Hianagi kato a'mo Hega ne' mofavrema ksente'neana mopafi vahe'mo'za nehazaza huno ksente'ne, Sera'a kazokzo osu a'mo'a Anumzamo huvempa hu'nea ne' mofavre ksente'ne. ²⁴Ama ana a'tremokizni kemo'a Anumzamo'ma Agra'a vahe'enema hagerafino manisaza kemofo erinte'ama hu'ne. Hega'a kazokzo a'mo'a Sainai agonafima Anumzamo'ma hagerafinea kemofo hu avame huno mani'ne. Agri nagapintima fore'ma haza nagamo'za kasegemofona kazokzo naga mani'naze. ²⁵Hega'a Arabia kaziga Sainai

agonane, menima me'nea Jerusale rankuma hu avame huno mani'ne. Na'ankure agrane mofavre'aramine kazokzo naga mani'naze. ²⁶Hianagi anagamu monafi me'nea Jerusalea, tagri nerarera kazokzo osu a'mo hu avame huno mani'ne. ²⁷Na'ankure anage huno avontafepina krentene, *Muse huo mofavre kase onte a'moka, mofavre antezampi katama nogrimoka, ranke hunka kezatio. Na'ankure mofavrema kase onte a'moka nevema mani'nea ara agaterenka, rama'a mofavre kasentegahane.* (Ais 54:1)

²⁸Hagi nenafugata, tamagra Anumzamo Abrahamu huvempa hunte'nea mofavre Aisakinkna hutma mani'naze. ²⁹Hianagi vahe'mo'za mofavrema erifore nehaza kantetima kasema ante'nea mofavremo'a, Avamumofokantetima fore'ma hu'nea mofavre'a hazenke ami'ne. Meninena anahu avu'avazana me'ne. (Jen-Agf 21:9) ³⁰Hianagi avontafemo'a na'ane huno hu'ne? Kazokzo a'ene mofavre'anena avare atreho hu'ne. Agra mago'azana e'origahianki, kazokzo osu a'mofok ne' mofavremo maka'zana erisinti haregahie huno hu'ne. (Jen-Agf 21:10-12) ³¹E'ina hu'negu nenafugata, tagra kazokzo a'mofok mofavrea omni'nonanki, kazokzo osu a'mofok mofavre'rami mani'none.

Kraisimpina fru huta manisunazamofok naneke

5 ¹Kraisi'a kinafinti katufe tamente'neanki kina vahekna huta omnita, oti hanavetita nemnita, ete mago'ane kasegemofok kinafina omaniho.

²Antahiho, Nagra Poli'na amanage hu'na neramasamue, tamagra tamavufgama atresage'za tga hurmante'nesazana, Kraisi'a tamaza osugahie. ³Mago'ane anage nehue, maka zmufama taga hu'naza vahe'mota, maka kasegea amage'antegahaze. ⁴Tamagra Anumzamofok avurera kasegefintira fatgo vahera manigahune hutma nehaze. Kraisimpintira ko huramatre'neankita, tamagra Anumzamofok asunku'zampintira evurami'naze. ⁵Na'ankure tagra Avamumok taza higeta tamentinti nehuta, fatgo vahere huno hurantesigu amuhara nehune. ⁶Na'ankure tamavufa tga hu'nazo, tamavufa tga osunaza zana Kraisimpina amneza me'ne. Hianagi tamentinti nehunkeno anazamo tazeri otigeta, ovesinte avesinte nehuna avu'avazamok razana me'ne.

⁷Kotera knare huta tamentintifina tamaga re'nazanagi, iza ru antahintahi tamamino asevazirmantegetma tamage kema amage'ma nentazazana netraze? ⁸Hagi anama ru antahintahi tamamino asevazinermente'nea vahera, tamagima hu'nea Anumzamok'a huonte'nea vahe'mo nehie. ⁹Hanki osi'a zisimok'a, flauamofona heruntazagenok'a maka azeri zonere. ¹⁰Hanki tamagra Ramofok vahe mni'nazankina, nagra antahi'noe. Nagrama huankea antahinenamitma amagera nentaze. Iza'ok ana hazekema erifore'ma nehia vahe'mok'a ra hazenkefi manigahie. ¹¹Hianagi nafuhete, nagrama tamavufgama tga hihoguk'ma huamama

nehanugeno'a, na'a hige'za nagrira nazeri haviza nehaze? Keka zafamofu kemo'a zmagigo zamitnafa hu havegna nehiazamo'a amanezankna hugahie. ¹²Nagri'ma navesiana e'ima hazenkema neramia nagamo'za, zamagra oku zamavufgama tga nehu'za, zmagonknazama harisazana knare hugahie.

¹³Tamagra nenafugata Anumzamo'ma tamagima hu'neana kinafintira katufeta manisazegegu kea hu'ne. Ru tamagra antahita hago kinafintira katufeta mni'none nehuta, korapa tamarimpamofu avu'ava hanagi, anara osugahaze. Tamagra ovesinte avesinte hu avu'ava zampinti oza aza hiho. ¹⁴Na'ankure maka kasegemo'a magoke kasegefi eri knare hu'ne, anagemo'a anage hu'ne, ***Tavaonkarema mani'nesamokizmia, kragagu'ma kavesintanaza hunka zmavesintegahane*** hu'ne. (Lev-Pri 19:18) ¹⁵Hianagi tamagra afi zgakafamo hiaza huta, ompri ampri hanutma tamagratami tamazeri haviza hutma fnanene hugahazanki kva hiho.

Avamumofu hanavefi mni'zamofu naneke

¹⁶Hianagi anage hu'na neramasamue, Avamu'ene kama vanoma hanazana, tamavufgamofu avesizamo'a, Avamumofu avesizanena ha'rentegeno, Avamumofu avesizamo'a avufgamofu avesizamo'a ha'renenteankino, amu'nozani'fina ha' orente arente'za me'neankinka, nazano hunaku'ma hanana zana osugahane. ¹⁸Hianagi tamagrama atresageno Avamumo'ma tamazeri fatgo huno vanigeta, tamagra kasegemofu agorga omanigahaze.

¹⁹Ama tavufgamofu avesizamo'a amanahu'za me'negeta negone. Monko avu'avazane, agru osu avu'avazane, havi avu'avazane, ²⁰havi anumzante mono huntezane, avotga zane, ha' hu'zane, fravazi'zane, knive re'zane, asi vazi'zane, vaheku agesa ontahi zane, veganokno hu'zane, vahe refko hu'zane, ²¹rumofu zanku nofi ahe'zane, ti neneno negi ne'zane, atru hu'za ruga'a savri' zamofu naneke hu'zane. E'inahukna tavutavazana eri fore nehie. Ko'ma tamasminoana meni mago'ene nerasmue. E'inahu zamavu'zmavama nehaza vahe'mo'za Anumzamofu kumapi omanigahaze.

²²Hianagi Avamumofu avu'avazana avesinte'zane muse'zane, rimpa fru'zane, akoheno mni'zane, vahe so'e hunte avu'ava zane, knare avu'ava hu'zane, ke amage'anteno avariri fatgo'hu avu'avazane, ²³akoheno fru avu'ava hu'zane, agra'a avesiza kegva huzamofona mago kasegemo'a hara reontegahie. ²⁴Hagi Krais Jisasimpi mani'namo'za, zamufamofu avu'avazane, zmesi'zanena rugeka zafare ahe fri'naze. ²⁵Tagrama Ruotge Avamu'enema maninesuta, atrenunkeno maka kama vano huzantifina Ruotge Avamumo kana taveri huno vanie. ²⁶Hanki atrenketa tagra tagi erira nosuta, vahera zmarimpa zmazeri otikea nosuta, kanive orente arente osanune.

Oza aza huta knaza erisuna naneke

6 ¹Nenafugta magotamimo'ma kumipima evuramisigeta, Ruotge Avamumofu nevaririsamota, ana kumapima evuramizankura tamagra'a kegva hu'netma, fru avu'avazampinti e'inahu vahera azeri fatgo hugahaze. ²Knazama oza aza hutma erinutma, Kraisi kasegea eri knare hugahaze. ³Na'ankure mago'mo'ma agima omneneimo, nagi me'ne huno agesama antahisiana, agra'a revatga hugahie. ⁴Hianagi magoke magokemo'a agra'a eri'za rezagneno kesoe huteno, agrama e'nerisia erizankura agi'a erisaga haniazamo'a agafa'a megahie. Hanki rumoma enerisia erizantera, agra eri'zana erinteno rezagneno onkegahie. ⁵Na'ankure magoke magokemo'a agra'a eri'zamofonte knazama'a eritere hugahie.

⁶Mago'mo'ma Anumzamofu kema rempima hunezamisimofona, rempima hunezamige'za e'nerizamo'za, mika knare'zazamia refko hu'za amigahaze.

⁷Kagraka'a regavatga nehunka, Anumzamofona azeri haviza hu naneke huonto, nazano kagrama kri'nesana zana, kagraka'a kafigahane. ⁸Na'ankure vahe'mo'ma agra'a havi avu'avazama kri'nenia zana, agra'a havi avu'avazana kafigahie. Hianagi iza'o Avamumofu avesiza avaririno kri'nenimo'a, Manivava asimu erigahie. ⁹E'ina hanigu knare avu'avama hu'zankura tavesra osanie. Tagrama hanavetita erizama erisuta, nezama kafi knazupa knare ne'za kafigahune. ¹⁰E'ina hu'negu tagrama vahe'ma zmaza huga kankamuma fore'ma hanigetma, maka vahera knare tavutva hunezamita, Ramofonte'ma zamentintima nehaza nagara zamazahutfaza hugahaze.

Poli'a huv gare zmavumro zmante'nea naneke

¹¹Hanki nagrani'a nazampinti ama ranra avontamimpinti avoma krerami'noanki, tamagra keho. ¹²Zamagrama tamavufgama tga hiho hu'za tutu hunermantaza vahe'mo'za, tagra knare hu'none hu'za nehu'za, Kraisi keka zafagu'ma huama nehu'za, knazama eri'zankura zmave'nosige'za anara nehaze. ¹³Na'ankure zamagra'a zmavufama tga hu'naza vahe'mo'za, zamagra kasegea amagera nontaze. Hianagi tamagra tamavufa tga hanage'za, ana tmavufgarekura zamagra zmavufga ra hu'naku neheze. ¹⁴Hianagi nagra mago'zantere hu'na navufga erisaga osugahuanki, Rantimo Jisasi Kraisi nagriku huno rugeka zafare fri'nea zankuke navufga ra nehanugeno, Rugeka zafare'ma Kraesima eri'nea eri'zanteti ama mopafi kefo navu'nava'zamo'a ko nagripintira frigena, naganena ama mopafi avu'ava zampina ko fri'noe. ¹⁵Na'ankure avufama tga hanio, avufama tga osniana razana omnene, hianagi agu'a rukrehe huno kasefa'ma huno mani'zamo tamagezana me'ne. ¹⁶Hanki

ama trakemo ke hu'nea kante ante'za vano nehaza vahe'mofona, rimpa fru'zane, asunku'zamo'a zamagrane me'nenā, tamage Anumzamofō Israeli vahe manigahaze.

¹⁷Hanki menintetima vaniana, mago vahe'mo'e huno hazenkea onamino, na'ankure Jisasima ahazageno avufgare fore hu'neankna afuhe, nagri navufarera ana nafuhe me'ne.

¹⁸Rantimofō Jisasi Kraisi asunku'zamo'a tamagri avamu'ene mesie. Tamage.

Poli'a Efesasi Vahe'mokizmi Avonkrezmi'nea Naneke

1 ¹Poli'na, Kraisi Jisasi aposol eri'za ne'mo'na Anumzamo Agra'a avesite huhampri nantenege'na, Efesasi kumate zmentinti nehaza naga'ma (Saints) mani'ne'za, Kraisi Jisasi tamage zamentinti nehu'za amage' nentaza vahetega ama avona kre netroe. ²Anumza Nerafantegati ene Ranti Jisasi Kraisintegati asunku'zane, rimpa fruzane tamagritega vie.

Kraisimpi mono agampu'zana me'ne

³Anumzamofa ra agi amisune, Ranti Jisasi Kraisi Nefa'ma mona kumapinti Kraisimpi, avamupina maka asomura hurante'ne. ⁴Korapara Agra mopa erifore osu'nea knafi agu'areti avesiranteno, Kraisi'ene otage huta fatgo zampi, havizana omanesigeta Agri avure manisnune huno tagrira huhampri'ne. ⁵Korapa Agra huhampri tanteno mofavreni'aza hugahaze huno Jisasi Kraisinteti, tavreno Agrarega tante'ne, Agra'a so'e zanteti antahi ramino ana hu'ne, ⁶Anumzamo, avesinentemofa Jisasi Kraisimpi taza hu'zana eri tagitregeno erami'neazankura, ra agi amisune, ⁷Kraisi koranu tahokeheno miza seneranteno, maka kumitia eri fnane nehuno, tusi'a asunku zama'areti Agra asuragiranteno taza hu'ne, ⁸Agra rama'a zampi tagrira tza hu'ne. Mika fatgo antahintahine, knare tagu tagesa tami'ne. ⁹Korapa Agri'a agu'afi oku'a me'nea antahi'za eriamu huno taveri hu'ne. Kraisi'a zamaza hugahie huno agu'afi atre'nea tzahu'za, Agra'a eriamu hu'ne. ¹⁰Anumzamo ofenka'ati mago knama esia zupa, monane mopane eri mago huno, maka Kraisi kvafi antenaku antahi'neane,

¹¹korapa agafare Anumzamo Agra'a avesite ko antahino keno huteno, maka'zana Kraisinteti erisanti hare'snaze huno tvarenaku huhampri rante'ne. ¹²Tagra ana nehuta, Jiu vahemota Kraisi tamentintima pusante nehumota tagra, Anumzamofona ra agi amigahune. ¹³Tamagranena tamage kema Kraisimpinti ko antahitetma, manivava tamasi'ni eri'zanku Knare MusenKe'are tamentinti nehazageno, Agra Ruotge Avamu'anu azanko avona kreno huhampri (seal) tamanteno

tamamine. ¹⁴Avamu'ama tami'neana agu'areti huhampri tanteno neramino, tahokeheno Anumzamo Agrarega tavrente'negu, muse hunenteta ra agi amisune.

**Poli'a, Efesasi kumate vahe knare zamagu zamagesa
Anumzamo zamisigu nunamu hu'nea naneke**

¹⁵E'ina hu'nea agafare nagraena, Ranti Jisasinte tamagra tamentintima nehza ke'ne, maka Anumzamofa naga otge hu'za nemni'za naga'ma tamavesima nezmantaza zanku nentahi'na, ¹⁶maka zupa nunamuni'afina nagerakani noramante'na, tamagrikura Anumzamofona susu hunentoe. ¹⁷Ana nehugeno Ranti Jisas Kraisi Anumzamo, so'e hihamu'ane msamofa Nfa'amo, knare antahi'zane, tamagu tamagesane, tamage ke'a huama hu antahi'zamofa avamura tamisnigeta Agrira antahita keta nehuta, avamupina ra hugahaze. ¹⁸Nagra nunamu nehuankino antahintahitamofona msa tamina, tamagu'amofa avurgamo hari nehanigetma, Agrama kezatino fore hugahie huno tamagima nehiazana, tamagra kegahaze. Mizama'a mreri'nea zantmi, hihamu'ane msazama'afi Anumzamo'a tamina, Agrite mni ruotge nehaza vahe'mo'zane, tamagra erigahaze. ¹⁹Hanki tagrama tamentinti nehuna vahe'ma agatererfa razama, Agra hanave'a tami'neana, ama ana hihamu'agino, ²⁰tusi'a hihamu'afi Kraisi fri'nefintira, Agra azeri oti'teno monare azantamaga kaziga avare antegeni mani'ne. ²¹Mreri onagate'nea tra'ma kvahu hanavema, hampo'na'ma, makazante kvama hu'neane, mika zamofa agima ko'ma antemi'neane, menima ama mani'nona knafinkerompage, henkama esia knafi'neane agtereno onaga'a manigahie. ²²Maka'zana Kraisi azampi kva hanie huno ante'ne, Agri kvafi maka'zana mono kevumotagu (sios) huno ante'ne, ²³Agri avufamo'a mono nonkna hu'ne, Kraisi mani viteno nemnino maka zampina anazanke huno mani vite'ne.

Fri' vahekna huta mani'nonkeno Jisasimpi tazeri oti'nea naneke

2 ¹Korapara ke ruhanentagita, kumitmifi fri'nazane. ²Tamaganena maka mopafi vahe'mo'za nehazankna huta havi kante nevzane, kumi'tmimo avite'negeta, Sata kerera amage anteta, kankamumpi nemniza hihamu'ane kva avamutamimofa amage' anteta, Sata erizana enerita Anumzamofonte zamagu'a onte'za zamefi hunemi'za vahe'ene nemanizane. ³Zamagri amu'nompina korapara tagranena anazanke huta maka havi tvesi'zante amage ante'none, tagu'afine amega tavufafine tave'manesiazana hutere nehuta, tagra ana kefozampi fore huta amage' nentonkeno, Anumzamofa asi vazi'zamo tagrite ene maka vahete ene e'ne. ⁴Hu'neanagi Anumzamofa asuragi'zamo vite'ne, na'ankure tusi'a avesi'zanu Agra agu'areti tagrira avesi rante'ne. ⁵Kasege'a ruha'nentagita

fri vahe kna huta mani'nonkeno, asunku'zanteti tahokeno, tagrira fri'zampitira, ⁶Kraisimpi tazeri otino magopi mona kuma'are tantegeta, Agrane kini tra'are mani'none, ⁷ana nehuno henkama fore hania knarera, agtere'nea zana Agri'a mrerisa asunku'zanu tagrira Kraisi Jisasimpi tza huno agampu hurantesie. ⁸Na'ankure tamentinti nehzagu asuntgiramanteno tamaza huno tamavre'ne. Tamagra'a knare'za hu'nanaza zante anara osu'neanki Anumzamo museza (gift) tami'ne. ⁹Eri'za eri'nea mizana omnene, e'igu mago vahe'mo'a, agra'a agi erisaga osugahie. ¹⁰Na'ankure tagrira, Agra'a tro hurante'ne, Kraisi Jisasimpi knare eri'za erisnunku, Anumzamo korapa ana kana retro hunte'neankita, knare eri'za enerita ana kantera vugahune.

Kraisimpi tazeri ksefa hu'nea naneke

¹¹E'i zanku tamagra tamagesa antahiho, korapara tamagra megia vahere huta mani'nazane (Gentiles), tamagima ante'nazana, zamufa tga osu vahere nehu'za, zamufama tga nehaza vahe'mo'za, (Jiu) e'i zamazanu zamufa azeri'ne'za tga nehaze. ¹²Tamagra tamagesa antahi ani hiho, tamagra e'i ana knarera Kraisina afe'are mani'nazane, Israeli vahe krerafane omani'nazane, huvempa huno huhagerafi zamante'nea agu'afina omani'nazane, so'e mani'zama eri kankamu tamia omanegeno, tamagri Anumzana mopafina omani'neane. ¹³Hu'neanagi, menina Kraisi Jisasimpi afete'ma kotetma tamagra mani'nazafintira, Kraisi koramo tamavreno tva'oma'are nermante. ¹⁴Na'ankure Agra'a tarimpa fru huno mni'zana (peace) neramino, Jiu vahe ene megia vahe'mota ha' orente arente nehunana tazeri magopi neranteno, amu'nontifima atane'zama me'neana, eritreho tazeri mago hu'ne. ¹⁵Agra'a avufareti ha' orente arente nehu'nazana eri fnane nehuno, Jiu vahe kasege ramine, osi kasege ramimo megia vahe (Gentiles) tazeri fegi atre'nea kasege ramina eri netreno, Agra'a Jiu vahene megia vahemota tazerino magoke vahe tro huneranteno, ke ha'ma nehuna zana tazeri fru huno mago tarimpa hurante'ne. ¹⁶Rugeka zafare Kraisi'a frino ha' frama tamagra'rmagra hu'zana eritreho, tamazeri mago higetma, Anumzamofona magoke avufagna hu'naze. ¹⁷Agra eno rimpa fruzana afete'ma mani'naza vahera mono ke huzmasmi'ne, hagi tva'onte mani'naza vahera arimpa fru huzmante'ne. ¹⁸Na'ankure Agripinti tarega vahe'mota, magoke Avamu e'nerita, Nerfantera vugahune.

¹⁹E'i zanku tamagra menina megia vahe'mota, emani vahe knara osu'naze. Hianagi tamagra Anumzamofona naga'ene noma'afi nemanize. ²⁰Aposol naga'ene kasnampa naga'mo'za, tra' zafagna hu'naze. Kraisi Jisasi'a Agra nomofona renagentete tra havegna hu'ne. ²¹Agripi ana miko nomofona, vazinte zafamo ome vazinte eme vazinte hiankna huno hagera ra huno, Ramofona otage mono noma'a efore nehie. ²²Tamagra ana

nonkna hutma mani'nazageno, Anumzamo'ene Avamu'amo'a ana nompina mani'ne.

Poli'a megia vahepi mono ke hu'nea naneke

3 ¹Ama'na agafare nagra Poli'na Kraisi Jisasi eri'zampi kina tamagri (Gentiles) tamazahu zantere hu'noe. ²Anumzamo asunku hurmanteno tamagritega naneke'ama huamahu eri'zama nami'neana tamagra ko antahinegahaze. ³Anumzamo, oku'a me'nea antahi'zama'eria huna naverige'na, nagra osi'a naneke kote'na avompina kre'noe. ⁴Kegahazema hu'na kre'noa avoma hamprisuta antahi'zaniafi oku'a me'nea antahi'zama Kraisinku'ma hu'noa kea tamagra antahi'ama hugahaze. ⁵E'i ana antahi'zana korapa vahe'moza eriana hige'za antahi'nazane. Hagi menina Agra'a aposol vahete ene kasnampa vahete Avamu'mo eriana nehie. ⁶Ama'i oku'a antahintahigino, megia vahe'mo'za (Gentiles) Jiu vahe'ene mago'zanke hu'za marerisa knare'zana, Anumzamofu mofavre ramine erigahaze. Ana tare kevumo'za knare muse nanekere zamentinti nehu'za, magoke avufa nemani'za, huhampri zamante'nea asomura Kraisi Jisasi'pinti muse huza erigahaze.

⁷Ama Knare Musenkemofu (Gutnius) eri'za vahe nagra mani'noe, Anumzamo asunku hunanteno muse'za hanavea nami'nea hanave'afi eri'zana e'nerue. ⁸Nagra mago'a mono eri'za (saints) vahepina, osi'tfa hu'nogeno asunku hunanteno, urefa erefa'a omne naneke megia vahepi huama huo huna namige'na, Kraisi'pinti knare'za me'neaza eriana hu'na neramasmue. ⁹Nagrira Anumzamo maka'zama tro'ma hu'nea Ne'mo, oku'a ama naneke korapa ante'nea naneke huampri nantege'na, ama naneke hakare'a vahete eriana nehue. ¹⁰E'ina hu'neankino Anumzamofu ruzahu ruzahu knare antahi'zana mono vahe'mo'za eriana hu'naze. Mona kumate kegva nehaza vahe'ene, manisga hu'naza kva vahe'mo'za kegahaze. ¹¹Ama'i korapa monane, mopane tro osu'neni, tro huntogeno me'nea antahintahi Kraisi Jisasi Rantimofompi eri'ama hu'ne. ¹²Na'ankure Kraisi'nte tagra tamentinti nehunku, koro osuta Anumzamofu tvaonte nevune. ¹³E'ina hianagi nagri'ma tusi'a zampi nazeri haviza nehza zankura tamarimpa havizana osiho, e'ima nazeri haviza nehza zamo'a tamagri tamaza hanigeta knare hutma manigahaze.

Poli'a mani hanavetisagu nunamu hu'nea naneke

¹⁴Ama ana agafare, Nerfante narena re'na nunamuna nehue, ¹⁵hakare monafi naga'ene, mopafi naga'mo'za Agripinti zamagia e'nerize. ¹⁶Nagra nunamu nehue, Agra'a m'rerisa knare'za huhampri tamanteno hanave'afi tamazeri hampo'na hanigu, Agra'a Avamu vahe'mofu agu'afinka ante'ne. ¹⁷E'ina hanageno, tamentinti nehzagu Kraisi'a tamagu'afi mani'nesigetma, tamagra mopafi zafamo rafu'na reno oti hanave tiankna huta Anumzane,

tamararuhe'i kizmia tmagu'areti zmavesi zmantegahaze. ¹⁸Ana nehutma maka Anumzamofu naga'mo'za (saints) nentahizankna hutma kagatahu'ane, zaza'ane, atrure'ane, zaza huno fenka urami'nea avesizana kegahaze. ¹⁹Ana nehutma Kraisi agu'areti avesima rante'nea zamo'a antahi'zana agtere'neakitma ketma antahitma nehutma, tusi'a zantfa me'neankitma ana mikora antahi amara osugahaze. E'ina hanigetma tamagra knare mani'zane hanavene Anumzamofontegati avi'mateno nezazana kegahaze.

²⁰Menina Agri'ma antahima negona zampina agtereno mevite'neakino, tagu tagesama nentahunazana agtereno amne anazana hugahie. Agri hanavemo tagu'afi eri'za e'nerie, ²¹Ana hanigeno maka mono vahe'mo'za, Kraisi Jisasimpi, Anumzamofu agi'a erisga huvava hugahaze. Tamage.

Kraisi ene hagerafita manisuna naneke

4 ¹E'ina hu'negu nagra Ramofu kina vahe'mo'na, knare hutma mani'zantamifi kana nevutma, tamagima higetma eri'naza zanku hampo'nati'na tamavumro nentoe. ²Tamavufga anteramitma, agazone hutma ru vahe'ene nemnitma, ke hakare osutma fru hutma, vahe'mofu antahizamitma zamesi zamantegahaze. ³Hakare zupa hanavetima Avamu'ene tragotetma nemanitma, hamprima tamanteno anaki'ma tamante'nea fruzana erigahaze. ⁴Tagra mika'mota magoke avufane, magoke Avamu me'neankino, e'ima tagi hu'neana magoke Anumzamofu naga fore hanunku tagi hu'ne. ⁵Magoke Rantia manino, magoke tamentintimeno, magoke mono ti nefrone. ⁶Anumza Nerfa'a maka'mota magoke mani'nenokva huneranteno, maka'za kva nehuno maka'zampina mani'ne. ⁷Hu'neanagi magoke magoke'mota asunku'zana ruzahu ruzahu muse'za Kraisi'a tami'ne. ⁸E'ina hu'negu avon tafepina anage hu'ne, ***Agra anagamu mrenerino'a, Agra vugota huno kina vahe zamareno vu'ne. Agra'a vahera muse'za zami'ne.*** (Sam-Zga 68:18) ⁹Menina anage nehzankea me'ne, anagamu mareri'ne, ana kemofona nankna agu'agesa me'ne, Agra anazanke huno mopa agu'afi urami'neana? ¹⁰Agra urami'nemo otino mrerino maka mona agtereno afete mani'neankino, Agra hakare zampina mani avitegahie. ¹¹Mago'a nagara Agra aposol eri'za nezmino, mago'a nagara kasnampa eri'za nezmino, mago'a nagara mono ke huamahu eri'za nezmino, mago'a nagara mono kevu kegva kri eriza nezmino, mago'a nagara rempi huzmi eriza zami'ne. ¹²Eri'za erisaza'zama, naga'amokizmi (Saints) zami'neana, non kiazahu'za Kraisi avufa eri ra hugahaze, ¹³ana nehuta Anumzamofu Mofavre'are tamentintifina eri mago huta keta antahita nehuta, hanave enerita Ramofonte nena vahetfa nemnita, Kraisi avu'avapina aviteta Agri kna huta maniho. ¹⁴Ana agafare tagra osi mofavregna huta omni'nunkeno, hagerimo erikranto kranto hiankna tamentintifina osnie. Na'ankure mago'amo'za ruzahu ke hunerasmi'za, anankeahavige hu'za

eri tamage keгна ke nerasmize. ¹⁵Hianagi tamage ke nehuta, tagu'areti zamesi nezmanteta, hageta nena nehanunkeno maka'zamofona Kraisi aseni'a manigahie. ¹⁶Agripi miko avufamo omoni, emeni huno azeri hanavetisigeno, magoke magoke avufamo'a ruzahu ruzahu eri'za e'nerino, miko avufamo'a ra huno knare avesi'zampi hagegahie.

Ruotge huta manisuna naneke

¹⁷Ramofu hanave'afi anage hu'na neramasamue, mono nontahiza vahe knara (Gentiles) osiho, zamagra hzanegre'za mago'zana zamagu'areti hugara osu'naze. ¹⁸Antahi'za zamifina hani hige'za, Anumzamofu mani'zampintira atre'za meg'i'a nemanize, na'ankure zamagra antahi'za ke'za nosazageno, zamagu'amo'a hanveti'ne. ¹⁹Ana nehu'za zamagra havizane knare'zane kegva nosu'za, zamesi'zamofu kefu avu'ava zampi nevazageno, zamagri mani'zampina maka havizamofu avesi'zamo avite'ne. ²⁰Hu'neanagi tamagra, e'inhau zampintira Kraisina rempi huta ontahi'naze. ²¹Tamagrama ko Agriku'ma nentahizageno Agripima rempi hurami'nea zana, Jisasimpi tamage nanekea me'ne. ²²Korapa ama mopafi kasri avu'avaza mani'zantamifi me'neane, maka havi tamagu tamagesa me'neane, havige avu'ava'zanena atreho. ²³Ana nehuta antahintahifine, avamupi ksefa huta manigahaze. ²⁴Ksefa vahe tro huta nemanita, Anumzankna huta fatgo avu'ava zampi ruotage huta tamage ke'afi manigahaze.

²⁵E'ina hu'negu magoke magoke'motma havige osutma tamage hiho. Mago avufagna hutma mono kevu mani'nonanki, tva'ontamire ru vahe'ma mani'nesiana havigea huonteho. ²⁶Tamarimpa hegahianagi, ana zampina kumira osiho, tamarimpa hesuta zaza kna omanita ko eri so'e hutkeno zge'a ufreno. ²⁷Hankromofona (Satana) mago kankmuna tamagra omiho. ²⁸Musufa ne'ma mani nesuno'a musufa oseno. Hianagi agra azampinti eri'za erino knare'zana erifore nehuno, zamagrazmi zamaza huga osu'nesaza nagara zamaza hugahie. ²⁹Hanki tamagipintira vahe'mokizmia havi nanekeke urinke'neni ozmasmitma, zamaza nehutma, hanaveti'za manisaza nanekege nehnageno, antahisamokizmi'a zamaza hugahie. ³⁰Anumzamofu Avamura mani'zantamifina rimpagna eriomihio. Tmagesa antahiho, Avamu'mo agra azanko avoma'a kreno tamagra nagri nagare hu'neankino, esnia knarera tamaza huno tamavregahie. ³¹Rimpa hevava hu'zane, maka rimpa haviza huno ha' hu'zane, rimpa he'zane, rankege hu'zane, vahe zamefi'a ke hu'zana netretma, maka vahe kna zami'zana atreho. ³²Agazone hutma vaheku tamasuntgi nezmantetma, Kraisiimpi kumitia Anumzamo eri atre'rante'neankna hutma, kumi'zmia atre'zmanteho.

Avesi'zampi manisnaza naneke

5 ¹E'ina hu'negu Anumzamo nehia avu'avakna hutma tamavutnavara hiho, nankure tamagrira agu'areti avesi nermantea mofavre'a

mani'naze, ² tamagra vaheku tamavesi nezmanteta, Kraisi'ma agu'areti avesiranteno agra'a avufga atreno tazama hu'neakna nehutma, Agra'a avufa tagriteku huno Anumzamofontega mananentake'za kre sramna vu'neakna hiho.

³ Hianagi monko'zano, kefo avu'avazano, agraguke avemasi'zana tamagripina omne tfaza hino, Anumzamofu otage nagapina (saints) e'inahu zana amu'no zamifina omnegahie. ⁴ Kefo'zamofu naneke osutma, vahe agze ami nanekene, zokago vakago nanekea ana maka netretma Anumzamofu muse huntaho. ⁵ Na'ankure tamagra antahi ankere'naze, monko'za nehza vahe'ene, kefo avu'ava nehaza vahe'ene, vahe'zante kezmasane nehaza vahe'ene, havi anumzante mono hunentaza vahe'mo'za, Kraisine, Anumzamofu kumara e'origahaze.

Anumzamofu msazama'afi manisnuna naneke

⁶ Atrenkeno mago nemo'a avufa'a omne keretira reramatga osino, na'ankure e'i ana zamo Anumzamofu rimpa he'zana erino kema nontahiza vahetera ne-e. ⁷ E'i zanku ana vahe'enena tragotetma omaniho. ⁸ Na'ankure korapara hanizampi mani'nazane, hianagi menina Ramofu Msafi mofavre'aza hutma, ana msafi vano hutma maniho. ⁹ Na'ankure msazamofu raga'a, knare'zama hu'zane, fatgozama hu'zane, tamage kema hu'za fore nehie. ¹⁰ Mraguzatitma Rantamimofu avema nesiaza rempi hiho. ¹¹ Rga'a reonteno hani avu'ava zantera tragora otetma, ke huta eriana hiho, ¹² na'ankure asane osuga'zanku vahe'mokizmi zamagesafina havizama oku'a nehaza zankura tagaze hugahianki hutma antahitma osiho. ¹³ Hianagi msamo remsa maka zantmina higeno'a, oku'a me'nea kefo zantmimo'a amate efore nehie. ¹⁴ Na'ankure hakarezama tvi'mo'ma eri ama nehigeno, e'i ana agafare amanage hu'ne, ***kavu'ma mse'namoka kavunaso, fri'pintira otio, Ana hanankeno Kraisi'a remsa hugantegahie.*** (Ais 26:19)

¹⁵ E'i zanku kama vano hananana kva huo, antahi'za omne vahe knara osunka, antahi'za me'nea vahe kna huo, ¹⁶ kazigzi hutma maka knafina knare eri'za e'neritma maniho, na'ankure menina kefozamo hakare hu'neanknafi nemanune. ¹⁷ E'i zanku tamagra negi vahe knara osutma, Rantimofu avesizama hanaza zankuke tamagesa antahiho. ¹⁸ Waini tina netma negia oneho, na'ankure anazamo tamazeri haviza hugahie. Hianagi atrenkeno Avamu'mo tamagu'afina avitena, ¹⁹ atruma nehanutma, Deviti zgame ene (Sams), mono zgame'ene, avamu'mofu zgame nehutma, Rantmimofona tamagu'areti musena hunenteta, ²⁰ hakare zupa maka zampina Ranti Jisas Kraisi agifi, Anumza Nafatimofona musena huntaho.

Aravemokizmi naneke

²¹ Kraisina antahi'nemitma rumokizmia ovesinte avesinte hiho.

²² Anemotma, Ramofu agorga nemniza kna huta tamavenanehe'i agorga

maniho. ²³Na'ankure vemo'a, a'mofona aseni'a mani'ne. Kraisi'a anahu kna huno mono kevumofa aseni'a mani'ne. Agra ana mono kevu mofo avufa'a mani'nenozo aza huno avare'ne. ²⁴Hianagi mono kevumo'za Kraisi kvafi nemnizankna hu'za, a'nemo'za nezmave kvafi maka'zana anazanke hu'za hugahaze. ²⁵Vene'nemotma, a'ne tmia tamagu'areti zmavesi zamanteho, Kraisi'ma mono kevu'agu agu'areti avesi zamanteno zamahoke heno ana a'ku (sios) fri'nea kna hiho. ²⁶Ana nehuno Agra'a mono naga'mofona zamazeri ruotge huzmanteno tinuti sese hiankna huno ke'anuzi sese huzmante'ne. ²⁷Anama hu'neana zamavreno Agrarega zamantesige'za, ana mono kevumo'za msazampima pehena omneno, kasmu' oneno, avufa ohakne: otage hu'za fatgo zampi hazenke omnenke'za manisnazegu ana hu'ne. ²⁸Hagi anazanke hu'za vene'nemo'za a'ne zamia, zamagra zamufagu zamavema nesia kna hu'za zmavesi zamanteho. Aza'o nenaronku avesima nentemo'a, agra'agu avesinente. ²⁹Na'ankure maka vahe'mo'za zamagra zamufagura zamagora note, hianagi zamagra zamufagu avesinte'za ne'za nemi'za, kegva hazankna huno Kraisi'a mono' kevu'are kegva nehie. ³⁰Na'ankure tagra Agri mago avufa mani'nene. ³¹E'i ana agafare **Vemo'a nefane, nererane znatreno, nenaro'ene eri hagerafige'ne, tarega'mokea magoke znavufaza hugaha'e.** (*Anumzamofa avon tafepi amanage huno krente'ne*). (Jen-Agf 2:24)

³²Amama oku'a me'nea antahi'zamo'a, razantfa se'ne, hu'neanagi nagrama nehuanu Kraisinku ene, mono kevu'agu nehue. ³³Anahuga hianagi, amu'nontamifina mago mago'mo'a nenaronkura avesi nenteno agra avufagu agha nentahiankna nehnigeno, nenaro'a anazanke huno nevena antahi nemino ke'a erizafa hugahie.

Famo'ene tramemofa naneke

6 ¹Mofavremotma, tamarera tamafa ke antahizmita amage anteho, tamagra Rantimofa suza mani'naze, e'inhau'ma hanageno'a knare hugahie. ²Pusa kasege'ne, huvempa ke'ne agu'afina me'negu, Neramrerane neramafa ke antahitma amage anteho.

³E'inama hanutma knare hugahaze, ana nehutma za'za kna'a ama mopafina manigahaze. (Ekso-Uti 20:12) ⁴Zamafaheta mofavre nagatmia zamarimpa eri haviza osiho, hanki zamazeri fatgo nehutma zamavumro nezmantetma, Ramo'ma hu'neankante antetma huzmasmiho.

Kazokzo eri'za vahe'ene kva vahe'zmimofa naneke

⁵Kazokzo eri'za vahe'motma, tamagra kva tamima mani'nesimofonku kore hunentetma tamahirahi neresigeta kezimia amage anteta, tamagu'areti kazigzi huta, Kraisi eri'za enerizankna huta erihio. ⁶Mopafi kva vahe'tmimo nermagesageta eri'zana erisunke'za muse hnaze osiho. Hianagi Kraisi kazokzo

eri'za vahe nesampreta, tamagu'areti Anumzamofu avemanesia zanke hugahaze. ⁷Mopafi vahe'mokizmi eri'zana e'norizanki, so'e tamarimpareti Ramofu eri'zana eriho. ⁸Antahiankero, mago'mo'ma knare eri'zama enerisuno'a, e'i ana knare eri'zamofu nona'a Ramofonteti mizana erigahie. Kazokzo eri'za ne'mopi amne ne'mopi mago'zahu zanke huke mizana erigaha'e.

⁹Hanki kva vahe'motma, eri'za vahe'tmia mago'zahu tamavutma hunezmantetma, zamazeri korera osiho, monafi nemnia kva ne'mo tarega'motma kva mani'ne, hankino Agra mago'mofona azeri knare nehuno, mago'mofona azeri havizana osugahie.

Sondia vahe kna huta Avamupi manisuna naneke

¹⁰Hanki vgare nanekema tamasmisuana, Ramofonte hanavetitma Agri hihamu'mofu hanavefi manigahaze. ¹¹Maka Anumzamofu ha' kukena eri hankreho, ana nehutma Sata'ma reraamatgama hania zampina oti hanavetitma manigahaze. ¹²Na'ankure tagra mopafi vahe'enea hara nosune, hagi mopafi kva hu'naza vahe'ene, hihamune havi avamutamine, mopafi hanizamofu kva hu'naza ha' vahe'ene, mona kankamumpi kefozamofu ha' avamu'ene hara nehune. ¹³E'i zanku maka Anumzamofu ha' kukena hiho, ana hu'netma havi knafine ana maka'zama hanafina oti hanave tighahaze. ¹⁴E'i zanku oti hanavenetita, tamage kereti tamu nofira nehutma, fatgo avu'ava'zana tamahihizarera hanko antea kna hiho. ¹⁵Knare musenkefinti e'nea rimpa fru kea, tamagia ano antea kna nehuta, hanavetita otigahaze. ¹⁶Maka zampina, tamentintimo'a hanko tamigna hu'nena, Sata'ma teve taginteno'ma tamagritega ahetsisigeno esnia kevea resu hugahie. ¹⁷Anumzamo tamagu vazino tamazahu'nea antahintahia, fetori kna hutma antegahaze. Avamu'mofu kazinknona Anumzamofu naneke eneritma, ¹⁸maka zupa nunamu huvava nehutma, nunamuna hutma antahigeho, ana nehanutma tamagra kva hu'netma kazigzi hutma maka eri'za vahakura (kristen) nunamu hutma Anumzamofona antahigeho. ¹⁹Ana nehutma nagriku nunamu hutma antahigenkeno, nagira erioza hanige'na korera osu'na hanavetina oku'a me'nea naneke huama hu'na knare musenkea zamasm'nenno. ²⁰Na'ankure nagri'ma nazeri oti'nege'na, Agri agi eri'na seni nofite kina hu'na mani'nena, ana nanekema hanufina nagra hanaveti'na mni'nena huama ha'nenno.

Huvigare naneke

²¹Hu'neanagi, nagrama mani'noa zamofona, Tikikusima tavesinentona nerafu'ma, Rantimofu eri'za ne'mo maka nanekea tamasmisigeta tamagra antahigahaze. ²²Nagra anazanku hu'na huntogeno tamagritega neviankitma tagenke'a nentahisageno tamagu'a tamazeri hanavetigahie.

²³Tafuhetane, tasareheta tamamentinti nehutma ovesinte avesintema nehaza naga'motma, Anumza Nerafanteti'ene, Ranti Jisas Kraisine rimpa fruzamo'a tamagrane mesie. ²⁴Asunku zamo'a Ranti Jisas Kraisinku avesinentaza vahepi me'nenkeno, avesi'ma nentaza zamo'a vga oregahie. Tamage.

Poli'a Filipai Vahe'mokizmi Avonkrezmi'nea Naneke

1 ¹Poli'nane, Timoti'ene Kraisi Jisasi kazokzo eri'zampi tragoteta kina hu'neta, Filipai kumate Anumzamofa naga Kraisi Jisasinte tamentinti nehaza vahe'ene mono kva nagamotane, eri'za tamaza hu'za eneriza naga'motma kre neramu'e. ²Anumza nafatimo'ene Ranti Jisasi Kraisi enena asuragiramanteno, rimpa fruzana agampu hurmanteno tamisie.

Poli'a Filipai vahe muse huzmanteno nunamu huzmante'nea naneke

³Hakare zupa tamagriku nagesa nentahi'na Anumzamofa muse hunentena, ⁴maka nunamunia'fina musezamo avi'netege'na nunamu nehu'na maka'motma antahi neramue. ⁵Ese'ma agafa hutma mono antahi'naza knareti tamagra nagri'ene tragoteta knare musenke huama hume menina neaze. ⁶Na'ankure nagra antahi'noe, Anumzamo tamagripi knare eri'zama erigafa hu'nea eri'za erime nevnageno, Kraisi Jisasi esnia knare eri vgaregahie. ⁷Na'ankure maka'motma nagu'areti antahi nerami'na, Anumzamofa knare musenkea huama nehugu kina nompine, megiane ruga'a vahepi, asunku'zana tarega'mota e'neru'e. ⁸Na'ankure Kraisi Jisasi asuragirmantea zankura, nagra tusi'za hu'na nagesa nentahuankino, Anumzamo nagrira huama hugahie. ⁹Nagra nunamuna huneramantoe, vaheku'ma avesizamante'zamo tamagripi me'nenono ra nehnigetma, tamage antahi'zampine, knare tamagu tamagesafi hagegahaze. ¹⁰Ana nehutma maka'zana refko hutma negetma, so'e zantfama hu'nesnia zanku nentahitma, avusese hutma fatgo zampi mani'nesnageno Kraisi'a eteno egahie. ¹¹Fatgo avu'ava'zama Jisasi Kraisi eri fore'ma nehiazamo tagripi avinete'na, vahe'mo'za nege'za Anumzamofona ra agi nemiza, agi'a erisaga hugahaze.

Poli'a kina nompini mani'nenono, knare musenke hu'nea naneke

¹²Nafuhetane nasaraheta kma antahiho, kinafima mani'noa zamo knare musenkea (gospol) eri ra higeno vuno eno nehie. ¹³E'ina hu'negu, Kraisi eri'zante kina hu'noa agafare, maka kinimofa avufare kva nehaza

vahe'mo'zane, maka vahe'mo'za nentahize. ¹⁴Kinama hu'noa agafare maka nenfu'zane nasarhe'zane zamagu'areti Rantimofona antahi nemi'za, korora osu'za hanaveti'za Anumzamofa nanekea zamagiteti huama nehaze.

¹⁵Antahi'none, mago'amo'za hu'za tagra Kraisi naneke huama hugaragi nehu'za, ha' renenantaze. Hianagi mago'amo'za fatgo kante nehaze.

¹⁶Fatgo avu'avapi e'neriza naga'mo'za, nagrira zamesi nenante'za Kraisi naneke huama nehaze. Anumzamo'a nagrira navreno ege'na, Knare MusenKe'agura kehara neroge'za nentahiza, ¹⁷ha'ma renenantaza vahe'mo'za zamagra zamesi'zante Kraisi nanekea huama nehaze. Tamage zamagu'areti nosaze, hagi kina nompima nagri amuhu namisagu ana nehaze. ¹⁸Ana nehu'za amega zamagitetiro zamaguaretiro Kraisinkura huama nehaze. E'inama nehaza zankura nagra nagu'a muse nehue. Tamage, naguafina nagra muse nehue.

¹⁹Na'ankure nagra antahi'noe, kina nomp mani'nogetma, nunamu nehaza zamo'ene, Jisasi Kraisi Avamu'mo naza huno nazeri atregahie.

²⁰Nagra mani'ne'na antahuampi, namema eritena antahuana, mago'zama nagazema erinami'zana osufa hugahue. Hagi mika zupa nagra Kraisinte hanaveti'na manigahue, korapa'ma mani'noaza hu'na manisnuo, frisnua zamo'a, Kraisi rahi amigahie. ²¹Na'ankure nagrama ksefa'ma manisnuana Kraisinte manigahue. Hagi frisnuana knare'zantfa erigahue. ²²Hianagi nagrama mopa navufane mani'ne'na, eri'zama erisua zamo rga rentegahie. Nagra ina kamofa avaririgahufi ontahi'noe. ²³Hianagi tarega kazigati e'nea zamo navazu huno rentrako hu'nenante, na'ankure fri'nama Krais'ene umani'snua zamo'a knare zantfa hugahie. ²⁴Hanki mopa navufane mani'nua zamo'a mago'ene tamagri tmaza hugahie. ²⁵Nagra nagu'areti antahi'noe, tamagrane tragote'na miko eri'za e'nerisugeno, eri'zamo ra hanigetma negetma, tamentintimofa muse'zama'a kegahaze. ²⁶Nagri'ma Kraisi Jisasi'ma hunante'nea zankura nagrama ete'na tamagrane umani'nenketa, musena hugahaze. ²⁷Kraisi knare musenke'amo hu'nesia kante anteta mani'nenke'na eme tamagegahuo, ontamagegahuo, magoke tamagu tamagesare ene antahintahi tmifina hanavetitma mani'netma, Knare MusenKe'afi tamentintia nehinke'na tmantahi'nenno. ²⁸Keha'ma renermantaza vahe'mo'za, zamagra'zmi hakare kampinti traka hugahaze. Hianagi tamagra tmazahu'za erigahaze. E'i ana avame zana Anumzamo tamigahie. ²⁹Na'ankure Kraisinte tamentinti nehaza zantekukera ontami'ne, hianagi Agri eri'zampi kna erisnazegu, tamaza hu'ne. ³⁰Kote'na knazama eri'noana tamagra nage'naze, knafima nemanuana meninena nentahize, ama ana hara tamagrane tragoteta nehune.

Mago tarimpa huta manineta rumokizmima zamaza hanuna naneke

2 ¹E'ina higu tamarimpa tamazeri hanaveti kema Kraisinte me'nesiampi, asuragirmanteno avesi tmante'zampi, Avamupi atruma hu'zampi, avesima

ante'zane, asunku'zane me'nesiana, ²nagri muse zane, eri hagerafitma magoke antahintahire'ene, magoke avesizante'ene, magoke tmagu tamagesane, magoke avamupine, magoke antahintahire manigahaze. ³Inankna zama hanaza zantera ra tamagesa ontahita, tamagragukera ontahiho. Hagi tamavufa anteramita, rumofona antahi nemita husga huzmanteho. ⁴Tamagra zankera kegva osiho, hagi ru vahe zanena kegva hiho. ⁵Tamagra magozahu tamavutma rumokizmia huzmanteho, Kraisi Jisasimpima me'nea avu'ava rumokizmia huzmanteho. ⁶Ana hu'neanagi Anumzane mago kna huno mani'nea ne'mo, Kraisi'a Anumzankna hu'na manisnue huno agesa ontahi'ne. ⁷Agra avufagura antahi amneza seno, agi omne kazokzo eri'za vahe kna huno, mopafi vahe avu'avate efore hu'ne. ⁸Kraisi'a avufa antermino, ke erizafa huteno, fri kante ruhiza huno, keka zafare fri'ne. ⁹Na'ankure ana agafare, Anumzamo azeri antesga nehuno, musezama (gift) Agri'ma ami'neana, maka'zamofa agi'a agtere'nea agi ami'ne. ¹⁰Ana hu'negu Jisasi agirera monafine, mopafine, mopa agu'afine, maka'zamo agrite rena rentegahie. ¹¹Ana nehnigeno maka vahe'mo'za Jisas Kraisi'a Rane hu'za zamagiteti huama nehu'za, Anumza Nerfa'a hanave'afi mani'ne hugahaze.

Vahe'mokizmi amu'no zamifi tvi kna hu'za mani'naza naneke

¹²E'izanku navesi neramantoa nafuhetma, tamagranema mani'nogetma ke'ni'a erizafa nehazankna hutma, omanisua knafina ke'ni'a amage anteho, tamagra tmazama hu'nea zanku hutma tmano nevazino, tamahirahi nerena kazigazi hutma amage anteho. ¹³Na'ankure Anumzamo tamagripi eri'za e'nerie, Agra tmagu'a tamazeri otigetma kezafa hutma eri'zama'a e'neriza zane, Agri avesi avariri hanave'a tami'ne.

¹⁴Maka'zama hanafina, havi tamarimpa osutma hafra nosutma tamarimpa frune maninetma hugahaze. ¹⁵Anama hanage'za, vahe'mo'za neramagesagetma fatgo hutma, ketmia omnesigetma nemanitma, Anumzamofa mofavre tro hutma nemanitma, havige huormantesagetma, kazaki'zampi kazigzi nehnaza vahe amu'no zamifina nemanitma, ofumo remsa hiaza hutma ama mopafina remsa huzmantegahaze. ¹⁶Kasefa hu'za mani'zamofa naneke azeri hanavetihio, ana nehnage'na Kraisi ete esia knafi neramage'na hanave'afi muse nehu'na nagare'na nevu'na eri'zama eri'nozamo'a amane zankna osu'ne hu'na hugahie. ¹⁷Hianagi ana zanke hu'zama waini ofagna hu'zama korani'a tagi netre'za, kre sramna neviaza hanaza zamo'a tamentintia tamaza nehina, nagra nagu'areti musena neha'nena, tamagrane muse hugahaze. ¹⁸Tamagriku'enenana, nagra tutu huneramantoe, tamagra anazanke hutma musena nehutma, nagri'enenana tragotetma musenkase hugahaze.

Timoti'ene Epafroditusike eri'za erisna'a naneke

¹⁹Hianagi nagra nagesama nentahuana, Timotina osi'a knafi Ranti Jisasi avesizama me'nenkena huntanenkeno tamagrama mni'nazarega

vugahie. Ana nehnigetma tamagra inankna hutma nemnizafi eme nasmsig'e'na antahi'na musena hugahue. ²⁰Na'ankure magora Timoti kna agu'ane vahera, tamagri'ma tamema'nesia zama huga hu'nea nera omani'ne. ²¹Na'ankure zamagra maka'mo'za zamagri'ma zamenesia zante kegva nehu'za, Kraisi Jisasi zana kegva nosaze. ²²Hianagi tamagra antahi'naze, Timotima tamage knare eri'za eri'neana, agra nagrane tragoteno knare musenke (gospol) hura nehuno, mofavremo nefa aza nehiankna huno, eri'zana naza huno eri'ne. ²³E'izanku nagrama nagesama nentahuana, ame' hu'na huntesusugeno tamagritega vugahie. Inankna zano nagrite'ma fore'ma hanigu kete'na huntesusugeno vugahie. ²⁴Nagra, Ramofonte nagu'a nentoe (trast), osi'a knafi tamagrira eme tamagenaku nagra nagesa nentahue.

²⁵Hianagi nagra antahuana tamagritega Epafroditusi'a vugahie. Nagri nenfu magoke eri'za enerita, tragoteta ha' nehu'a ne' (sondia), agra tamagri naneke erino eme nasmsinia ne'kino, upama nehuazana naza nehia nere. ²⁶Na'ankure agra maka'motma tamagezanku hugeno antahintahi'amo kna higeno avufa ata eri'ne. Na'ankure tamagra krima eri'nea kema antahi'nagu ana hu'ne. ²⁷Na'ankure tamage krima eri'neana frikante ruhiza huteno kanamre'ne. Hianagi Anumzamo asuntagi ante'ne, agri'keku anara osu'ne, nagriku'ene huno ana hu'ne, ana hina nasuzamo agofetu agofetu hu'zanku, azeri oti'ne. ²⁸E'ina hu'negu huntanena vanigetma negetma muse nehnagena, nagra tamagrikura nagesa ontahina fru huna manigahue. ²⁹Uhnatisige'tma Rantimofa agifi tmagu'a muse nehutma avreho, e'inahu vahera antahi nezamita muse huta zamavreho. ³⁰Na'ankure maka'motma afete mani'netma naza osazageno tamagri nona huno, Epafroditusi'a avufagura agesa ontahino eme naza nehuno, Kraisi eri'zanku huno fri' kante ruhiza hu'ne.

Tamage kene havi ke avu'avamofo naneke

3 ¹Hagi, nafuheta vgare naneke'ni'a nehuana, Ramofonku musenkase huntaho. Ete'na tamagri'ma kegva kritmantesia nanekema mago'ene avoma negroa zamo'a navesra nosie.

²Kragna vahekura kva hiho, havi mono eri'za vahekura kva hiho, ³Tagra tamage tavufa tgahu vahe mani'none. Na'ankure Anumzamofa Avamupi husga huta Kraisi Jisasina mono hunenteta, vahe'mo'za zamufama tga nehaza zampina antahi muhara nosune. ⁴Nagranena zamufa tgahu zampina antahi muhara nehuanagi, mago vahe'mo'ma antahintahi anteno antahi muha'ma zamufa tgahu zampima haniana, nagra ana vahera zamagatere'na onaga'a mani'noe. ⁵Nagrira nenarera kasenantege'na 8'a zgegna manuge'za, navufa taga hazage'na, Jiu kora mani'noe. Hagi Benjamen nagapinti fore hu'na, nagra Jiu vahetfa tamage mani'noe. Farisi vahe mani'nena Jiu vahe kasege

amage ante'noe. ⁶Nagra navesite hanaveti'na mono vahera kna nezamina, nagra Jiu vahe kasege amage ante'na magore huna mago kasegea agateore'na, avariri fatgo huna hantaga osu'noe. ⁷Hu'neanagi inankna'zama hu'noazana netre'na, anazana amnezane nehu'na, Kraisi amage'nentoe. ⁸E'i ana zantamimpina, nagra maka'za netre'na agtere'nea antahintahi'afi Kraisi Jisasina Ranimofa antahinagena nehu'na, Agri amage anteku maka'zana amnezane hu'na netre'na, Kraisi amage' nentoe. ⁹Agra'ene tragote'na mani'ne'na, nagra'ni'a kasege avarurua kanteti fatgoa osu'noe. Hianagi Kraisinte tamentinti nehunkeno, Anumzamo fatgo vahere hunerante. ¹⁰Nagra ke'na antahi'na Jisasina nehu'na, fri'nefinti azeri oti'nea hanave'a nege'na, nagra Agrama fri'neaza hu'na nataza eri'na frinaku nehue. ¹¹E'ina hu'na mani'ne'na, fri'nefinti oti'neankna hunaku naganena nentahue.

Kazigzi hunka vugota hanana naneke

¹²Nagra hago anazana eri'noe hu'na nosue, ko fatgo hu'na mani'noe hu'na nosue. Hianagi nagra kazigzi hu'na nevu'na esnia knafima naza hu'zama erisugu nentahi'na, Kraisi Jisasi'ma namisnia zanku nentahue. ¹³Mago tamentinti nehuna nafuhetane, nsareheta sago fatgo vahe nagra mani'ne'na hago anazana azeri'noe hu'na osugahue. Hianagi korapa'zana nage'nekni'na, henkama esiazamofa azerinaku kazigzi nehue. ¹⁴Anumzamo Kraisi Jisasimpi nagi hu'nege'na anagamuti miza omerisugu kazigzi hu'na nagare'na nevue.

¹⁵E'ina hu'negu maka antahi'zampi ra hu'nomota, fatgo avu'ava nehuta, ruzahu antahintahi hanazana Anumzamo anazana eri tamaveri hugahie. ¹⁶Hanki tamage kema, ko'ma antahi'nona kea azerikona hu'neta amage'antegahune.

¹⁷Nafuheta nasareheta nagra nehua navunavakna nehutma, tagrama rempi huzaminona tavutavazama amagama nentaza vahera ke'so'e hiho. ¹⁸Hakare'a zupa ko tamasmi'noe, menine mago ene anankege neramasmugeno navunura nehie. Na'ankure zamagri zamuzmazamo'a tamage huno Kraisi'na rugeka zafa'a ha'arenente. ¹⁹Zamagrama fri'snazana, ka vu'zazmimo'a havizantfa hugahie. Zamarimpamofa avesizamo oti oti huno anumza zamigna nehige'za, zamagaze osige'za, havi avu'ava zanku muse nehu'za, mopafi zankuke zamagra nentahize. ²⁰Tagri kumara monare me'negeta, Tazahu ne'ma eramisigu negeta tagesa are'are nehuta, Ranti Jisas Kraisi'ma esigu avega ante'none. ²¹Agra hanave omne fri tavufa eri rukrahe huranteno, hankve avufa kna huno eri tro huneranteno, ana hankave'anu hakare zana kegva hugahie.

Mono avu'avaza hanaza naneke

4 ¹Nenfugta nensarogta, nagra navesi neramante'na tamage'naku nehumotma, tamagra nagri musezane, eri'zama eri'noazamofa

nena'a mani'naze. E'ina hu'negu arone'nimota tamage hutma Ramofonte tamagra mani hanavetita maniho.

²Nagra tanasmuanki, Yodia ene Sintikigata'a Ramofo suza mani'naku mago tanarimpa hutna mani'o. ³Nagra kantahinegoe, magoka eri'za e'nerumoka, ama a'trena zanaza huo, znagra hanavetine nigrane megia' vahera knare musenkea zamasm'none. Ana nehuke znagra Klemeni ene mago'a eri'za vahe'enena, zamagia asimu eri avontafepi krente'ne.

⁴Hakare zupa Ramofonkura muse hiho, ete mago ene nerasmue, muse hiho! ⁵Tamagra atrenke'za knare tamavu'tmavara vahe'mo'za keho, Ramo esia kna tva'o nehie. ⁶Mago'a zankura tamagesa ontahitma, hakare zankura nunamu nehutma, upama hu'nesaza zanku Anumzamofone samitma, hakare zama huramante'nea zankura, Anumzamofona muse huntaho. ⁷Anumzamofone rimpa frumoa, agtere'neankitma vahe'mota antahita keta osuga hu'nonankino, tamagu'ane, antahintahi tamia Kraisi Jisasi kva huramantegahie.

⁸Vgare nanekea nafuhetane nasarhetma maka knafina tamavutamavama hanazana, na'amo tamage zana me'ne, na'ante vahe'mo'a antahi nemie, na'amo fatgoa hu'ne, na'amo avu sese hu'ne, na'amo vahe'mofona asane hugahie. Na'amo agia erisaga hugahie. So'e zantfama me'neniane, husga hunte'zama me'nesiana, anazante antahintahi nehutma hampona hutma maniho. ⁹Nagrama nehugetma rempi nehutma e'neritma, nentahitma ke'naza avu'avaza nehinkeno, rimpa fru Anumzamo'a tamagrane manigahie.

Poli muse hu'nea naneke

¹⁰Tamagrama nagriku'ma maka zupa tamagesa mago'ene antahi nenamiza zankura, nagra tusiza hu'na Ramofona muse huntentoe. Hianagi upa knafina tamagrama nazahu kankamuna omane'ne. ¹¹Mago'a zanku upa nehu'na ama kea nosue, nagra antahi'noe, mago'a zana rama'a antesuo, osia ante'nesuana, musenke hugahue. ¹²Nagra maka zanku upa'ma huanknafine, mika'zama meknafinena, nagra hakare oku'a me'nea kankmuna rempi nehue. Namu hanio, nagatesio, rama'a antesuo ontesuana akohena fru hu'na manigahue. ¹³Kraisi'a hanavea nenamigena, Agri hanavefi maka'zana amne hugahue.

¹⁴Hu'neanagi nagri knazampina tragotetma, knare hutma tamagra naza hu'naze. ¹⁵Tamagra Filipai kumate vahe'motma antahi'naze, knare musenkema pusante Masedonia atrete'na huama'ma hu'noana, mago mono nomo'e huno naganena eme tragoteno, zagonazana eme onamizagena e'orinoe. Hagi tamagrake nami'naze. ¹⁶Tesalonaika mani'nogetma anahukna hutma mago'a zupa muse'zana atupamahure nami'naze. ¹⁷Ama kema nehuana mago museza namihogu meme huna tamantahinogoe, hagi veva'ma hu'nare, Anumzamoma henka mizama

tamamisigu nehue. ¹⁸Na'ankure rama'aza nagrira namizageno avite'ne, upa'ma hu'noa zama'a mika eri'noe. Na'ankure Epafrotitusi musezama antageno erino e'nefina mananentake zama, kre sramna vu ofagna nehigeno, Anumzamo'a muse huno e'inahu musezana e'nerie. ¹⁹Nagri Anumzamo, hakare upa'ma hanaza zana tamigahie. Agri'a hanave'amo avite'negeno Kraisi Jisasimpi runtanino tamigahie. ²⁰Menina tagri Anumzana tafati'mofo hanavemo mevava hugahie. Tamage.

Vgare musenke

²¹Kraisi Jisasi naga'mota musenke huneramantoe. Nafuhe'zane, nigrane magopi nemnizamo'za musenke hurmantaze. ²²Maka Anumzamofa naga'mo'za musenke hurmantaze. Sisa nampi nemnizamo'za musenke hurmantaze.

²³Ranti Jisasi Kraisi asunku'zamo magoke magokemotma tamagra ne mesnie.

Poli'a Kolosi Vahe'mokizmi Avonkrezmi'nea Naneke

1 ¹Nagra Poli'na, Anumzamo Agra'a avesizante Jisas Kraisi aposol manio hu'nemo'nane, Timoti nerafu'ene ama avona kreneramu'e. ²Kolosi kumate'ma Anumzamofona nagama, ke amage'antetma fatgo hutma Kraisimpima nemniza tafuhe'motarega, Anumza Nafatimofontegati asunku'zane, rimpa fruzamo'a tamagritega vie.

Poli'a Anumzamofona susu hunenteno nunamu huzmante'nea naneke

³Tagrama maka knama tamagriku'ma nunamu hunermanteta, Rantimofona Jisas Kraisi Nefa Anumzamofona susu hunento'e. ⁴Na'ankure tamagrama Jisas Kraisinte'ma tamentintima nehutma, Anumzamofona nagaku'ma tamavesi nezmantaza zamofona tamagenke nentahuna zanku hu'none. ⁵Tagrama tamage knare musenke nentahita, fore'ma hanigeta kesune huta avegama ante'naza zamofompinti, amentinti hu'zane, avesinte'zana monafi anteramantegenome'ne. ⁶Ana knare musenkemo'a tamagrite e'neankino, miko kokankoka ama ana knare musenkemo'a hageno raga'a renente. Tamagrama ese knazupa ana knare musenkema nentahitma, Anumzamofona asunkuzana tamage hutma antahi ama hu'naze. ⁷Tamagra ko Epafra tagrane magoka kazokzo eriza eneruna nerafu rempi hramimigeta antahi'naze. Tamagriku huno tagrira tazahanigu Kraisi eriza enerino, ⁸rumokizmigu zmavesintezama Ruotage Avamumo neramamia zanku agra eme nerasamie.

Poli'a Kolosi vahe'mokizmi Anumzamofona zamaza hanigu nunamu hu'nea naneke

⁹Hanki e'iana agafare, tagrama tamagenkema antahuna knaretima e'neana, tagra tamagrira Anumzamofona Agra'a avesite avamupi knare antahizane, antahi ama hu'zana antevitermantesiegu nunamuna huvava huta antahi'negone. ¹⁰Ana nehutma tamagra hakare'zama hanaza zamo'a, Ramofona avurera knare nehuno, Ramofona raga amisageno, ana miko knare erizantimo'a raga renentekeno, Anumzamofona knare antahizampi

hageta mrerigahaze. ¹¹ Agri'a msanetake hankavereti tamazeri hankavetinketa kazikazi huta nevuta, akoheta agazone huta musezampi manigahaze. ¹² Tamazeri knarema hanigetma Anumzamofa nagamo'za erisintiharegahaze hu'nea masanentake kumakura, Nafatimofona miko zupa susu hunentone.

¹³ Na'ankure hanizamfo hanavefintira taza huno tavreno avesinentea Ne' Mofavre'amofa kumapi nerante. ¹⁴ Agrama kefozampinti mizaseranteno, kumitima apaserante nemofompi nerante.

Poli'a Kraisinku Ra manine hu'nea naneke

¹⁵ Kraisi'a onkenona Anumzamofa amema'agino, ana miko'zama Anumzamoma tro hunte'nea zantamimofona Agra e'se mofavre mani'ne. ¹⁶ Na'ankure Agrake'za anamiko zana tro huntene, monafima me'nea zantamima, mopafima me'nea zantamima, negona zantamima, nonkona zantamima, kini vahe traro, ruzahu ruzahu kumaro, kegvahu vahero ruzahu hankavea, Agrake tro hunte'neakino Agri zantami me'ne. ¹⁷ Agra ana miko'zamo'a fore osu'negeno mani'neakino, ana mikozana Agrake'za azeri manumanu hu'ne. ¹⁸ Kraisi'a Agranena mono kevu nagamofa aseni'a manine. Fri'naza vahepintira Agra esera fripintira oti'negu, anamiko zampina Agrake aseni'a mani'ne. ¹⁹ Na'ankure Nemofompima Anumzamoma Agra'a manivitesigu musena nehie. ²⁰ Keka zafare tagiramine koranteti, monafine mopafina rimpa fruzana avrenteno, Kraisimpi ana mikozana Anumzamoma emeri hagerafino, erimago huno Agreaga avrentene.

²¹ Korapara tamagrama kefo tamavutmavama nehuta, antahintahi tamifina Anumzamofa ha' vahema manineta afete mani'nazane. ²² Hianagi menina Kraisi'a ama avufgare eme frino, tamazeri mago huno Anumzamofa avurera tamazeri ruotge hu'neakino, magomo'a kea huoramantege, hazenke vahere huoramantesigetma, havigema huramante zampintira fru hutma manigahaze. ²³ Hianagi tamage kegura tamamentinti huvava nehutma, anankere oti hanavetiho. Fore hanigeta kesnaza zanku'ma knare musenkefinti antahi'naza zana otreho. Ana knare musenkea miko ama mopafi zantaminte huama hu'nazankita ko antahinaze. Nagra Polina e'i anankemofa eri'za vahe mani'noe.

²⁴ Tamagriku'ma hu'na natama e'neruazankura nagra muse nehue. Na'ankure Kraisi'ma atama erimete'nea zamo'a ama navufarera natazana erivinetanki, mono kevumotma, Kraisi avufga mani'naze. ²⁵ Nagrama vahetema kegvahu eri'za vahe'ama mani'noana, tamagrama tamaza huzama erisagu hunantege'na, ana miko Anumzamofa nanekea huama nehue. ²⁶ Ama ana nanekea oku'a ante frakino koma maniza e'naza vahepine, ana knafine anteneane. Hianagi menina Anumzamofa nagatera eri ante'ama nehie. ²⁷ Anumzamoma Agra'a avesite oku'a me'nea kea taveri

hu'ne. Ama ana kea knare hu'neankino, maka vahemokizmi zamaza hugahie. Ama ana kea Kraisi agra tamagrane mani'neakino tamavreno vanigetma so'ezana kuma'afinti ome erigahaze. ²⁸Hu'negu miko kaziga vunana Kraisinkura, Anumzamo'ma tami'nea knare antahintahireti kegvaahiho nanekea nezmasamita rempia hunezamune. Na'ankure Anumzamofontera fatgo hu'za Kraisi'ene tragote'za manisazegu anara nehu'ne. ²⁹E'ina hu'negu Kraisima maka hankavema naminereti tusi hankavetina eri'zana e'nerue.

Kasefa nomanizamofu naneke

2 ¹Tamagri ene mago'a Leodisiana nemaniza mono nagamo'zane, mago'amozanema nagri'ma nage'za antahiza osu'namokizmi zamaza hu'naku maragu'zama netuazana antahi ama hnazegu nehue. ²Nagrama eri'zama e'neruazamofu agafa, zamagu'a zamazeri hankavenetisuge'za zmavesizampina erimago nehu'za, knare antahizampina avinetezma, Anumzamofu oku fraki'nea zama'a antahi ama hanazana, e'i Kraisi'e. ³E'i Agripi miko knare antahintahizamo'ene, miko antahizana frakino, zgo nomp me'neakna huno me'ne. ⁴Ama kema neramasamuana mago'mo atrenkeno knare masevenke'afinti reramatga osino. ⁵Na'ankure ama navufgarera tamagri'enena omani'noanagi, avamupina tamagrane mani'noankina tamagrama mani fatgo nehutma Kraisinte'ma hankave tamentinti nehazazama kenugura muse nehue.

Kraisi ene tragoteta kasefa tasimu erisuna naneke

⁶Hanki e'ina hu'negu Kraisi Jisasina, Rane hunka ko avrenananki, Agra'ene magoka vano huo. ⁷Tamagra Agripi zafamo arafu'nareno oti hanavetiankana nehutma, nomo hanave zafare oti hanavetiaza hutma onetitma, knare musenkera oti hanave netitma, maka knafina Anumzamofona susu huntaho.

⁸Kva hunetma zamatrenke'za agafa'a omane antahintahi zantetira tamazeri neginagi osiho. Keaga zamimo'a knare'za hugahianagi, zamagra ama mopafi avamumofu hanavefinti e'neaza rempi huneramizanki, Kraisintegati enea'zana rempi hunoramize. ⁹Na'ankure Kraisi'a tagrikna huno ama avufgare mani'negeno, Anumzamofu avu'avamo'a mika Agripi avitene. ¹⁰Hagi Kraisi'a ana miko hankavene, ana miko asenia mani'nemofu avu'avara tamagripi anamiko fore hanie huno tamami'ne. ¹¹Tamagra kumi tamavutamaza atrazazamo Kraisimpina oku tamavufga taga hu'naze. E'i vahe'mo azantetira ana tamavufga taga osu'neanki, Kraisima eri'nea eri'zamo anara huramantene. ¹²Mono tima frazana Agri'ene frizageno aseramantegeta tamentintima hzageno'a, Anumzamoma Kraisima fripinti azeri otinemofo hankavemo, magoka Kraisi'ene tamazeri otine. ¹³Tamagrama kumipi frinetma, kumira

otrenageno, Anumzamo'a Kraisi'ene magoka tamazeri kasefa nehuno, mika kefozantamia eri atreramante'ne. ¹⁴Mosese kasegemoma keagama huneranteazana Anumzamo'a tagritetira eritreno Kraisi keka zafare hantine. ¹⁵Hankave avamutamimofu hankavene hankave zantamimofu hankavea keka zafare erinetreno, Anumzamo'a miko vahe zamaveri amate huno, ana mikozamofu hankavea Kraisi'a keka zafare eri netreno zmazeri haviza huno zmazeri amnezankna hutre'ne.

¹⁶Hanki atrenkeno vahe'mo'a ne'za nezantero, ti nezantero, kasefa ikante ne'za retro huno nezantero, mono atru huknarero, manifruhu knagura refako huormanteho. ¹⁷Ama anazantamina henkama esia zantamimofu amema'e. Hu'neanagi Kraisi'a tamageza mni'ne. ¹⁸Mago'mo'ma avanama kenesia zankuma huno, tamagra anteramita ankeromofu mono huntaho hanigetma, tamagra atrenkeno tamagrira tamazeri fenka otreno. E'inahu vahe'mo'za korapa zamarimpampfu avu'ava nevaririza, zamagrama antahizana zmagra'ake knare antahizana eri'none hu'za zmauvu'ga ra nehaze. ¹⁹Hianagi Kraisi'ma asenima mni'nea avufgamofonte zamagra rekanuhe'za omani'naze. Na'ankure Kraisi'ma asenima mni'nea avufgamofona hanavea nemino, agruna nofi'mo zaferinafi hagerafigeno kora nofi'mo vuno eno higeno, Anumzamofu hanavere nehage.

²⁰Tamagra Kraisi'ene frizageno, Agra ama mopafi havi Avamumofu hankavefintira kazufe tamantegetma fru hutma mani'nazagu, nahigetma ama mopafi tra keramintera amagera antevava nehaze. ²¹Ana tra kemo'a huno azeri avako osutma, neta onketma, avakora osiho hu'ne! ²²E'inahu tra kea mopafi vahe'mo rempi huneramiankino, ana tra kema amagama nentaza zamo'a amnezankna hugahie. ²³Ana tra kema avaririsamo'za knare'za nehune hu'za hugahaze. Zamagra tamagritema eama hanazana, Anumzamofoma mago'ane avesintezama, anteramino manizama, avufgamofu avesizama kegva hazankna hugahaze. Hianagi zamagra taza huza korapa tamavesizana eri atregara osugahaze.

Kasefa huta manisunazamofu naneke

3 ¹Kagrira Kraisi'ene fripinti Anumzamo'a kazeri otinegu, kagu'a monafinka me'nea zantaminte anto, Kraisi'ma Anumzamofu azantamaga kazigama mani'nere. ²Monare zanku tamagesa areare nehuta, mopafi zankura tamagesa arerera osiho. ³Tamagra frizageno, tamasimumo'a Kraisi ene frakino Anumzamofompi me'ne. ⁴Kraisi'a tagri tasimu maninemo eama hania zupa, tagranena Kraisi'ene hanavenetake masazama'afi e'ama hugahane.

⁵Tamagripima ama mopafi kefo tamavutamava me'nesiana ahefriho. Ana avu'avara monko avu'avazama, agru osu avu'avazama, rumofu zantema kenunu hu'zama, havi agu'agesa antahizama, agraguke antahi

avu'avazama, e'inahu avu'avazamo'a havi anumzante mono hunteakna hu'neanki atreho. ⁶Na'ankure e'inahu avu'avama nehaza vahete Anumzamofu rimpahazamo'a egahie. ⁷Tamagra korapara anahukna kante vono nehutma, ana avu'avazampi mani'nazane. ⁸Hianagi menina mika havi avu'avazana eritreho, havi asivazi'zama rimpahazama, havizama rumokizmi huzmante'zama, urinkema hu'zana atreho. ⁹Korapa tamavufgamofu havi avu'avazana ko atrenazanki, orevatga arevatga osiho. ¹⁰Hagi menina magoke magoke'motma kasefa vahe nemanitma, troma huramante'nea nekna maka kna nehutma, mago'ene agrira antahi ama hugahaze. ¹¹Amafina Griki vahera omanigeno Jiu vahera omanigeno, avufga tga hu'nea vahero, avufga taga osu vahero, Sintiene vahero, Barberien vahero, kazokzo eri'za vahero, kina osu vahero, Kraisi'a ana miko'za mani'neankino, Kraisi mikamotafina mani'ne.

¹²E'ina hu'negu Anumzamoma huhampri ramantegeta ruotge hazageno'a, Agra tusiza huno avesiramantenege, tamagra rumokizmia tamasunku huzmanteta zmazeri so'e nehutma, vahe'mofu knare tamavu'tamava hunezmanteta, anteramita nemanita, agazone tamavutamava nehuta, akoheno avega anteno mani tamavutmavara kukena hiaza hiho. ¹³Mago'moma havizama hugantenesigenka ana knazana e'nerinka, Ramo'ma kumika'a atreganteneaza hunka ana havizama hugantenesimofona, havizama'a atrento. ¹⁴Avesimantezamo ana miko avu'avara agaterenege, rumokizmi zamavesizamanteho. Avesi'ante avu'avazamo ana miko knare avu'avazana azeri manumanu hu'ne. ¹⁵Kraisi rimpa fruzana atrenkeno tamagu'afina kegva hurmanteno, na'ankure tamarimpa fru huta manisazegu kehigetma mago avufga mani'nazanki, miko zupa Anumzamofona susu hunteho.

¹⁶Atrenkeno Kraisi nanekemo'a tamagu'afina meviteneana, miko knare antahintahireti rempi hunezamita zmazeri fatgo nehutma, Anumzamofu avontafepi zgamera nehutma, krente zgamera nehutma, mono zgamera hutma Anumzamofona tamagu'areti susu huntegahaze. ¹⁷Kegaga hanampino, eri'za erisampina, Rantimofu Jisasi agifi makazana huo. Jisasimpi Anumza Nafatimofona susu huntegahune.

Mono nagamofu naneke

¹⁸A'nemotma neramave agorga'a anteramitma maniho, e'inama hanazana Ramofu avurera knare hu'ne. ¹⁹Venenemota a'netamimofona zmavesinezamanteta, tamarimpa haviza huozmanteho. ²⁰Mofavre'mota mika zupa neramarera tamafa ke amage anteho, na'ankure Ramo'a muse hugahie. ²¹Zamafaheta mofavre nagamokizmia zamarimpa knama erizamizana osiho, ru zamagra knarera osu'none hu'za antahigahaze.

²²Kazokzo eri'za vahe'motma maka'zama hanafina ama mopare kva vahe'mofu agorga'a mani'netma hakare'a zama hanafina kva vahe tamimo

tamavesi tamantesia kazigati, zamavureke eri'zana e'oriho. Hianagi Ranka'amofa ra agi nemitma, tamagu'areti hutma kva tamimofa erizana eriho. ²³Ana miko erizama erisanana, kagu'areti hunka Ramofa eri'za e'nerinanki erio. Ama mopafi kva vahekamofa eri'zankera e'norine. ²⁴Kagra Ramofontegatima musezana erisintiharegahane hu'nea zana erisana zankura ko antahinane. E'i Ramofa Kraisi erizama enerinane. ²⁵Hianagi iza'o hazenkema hanimofona, Anumzamo'a hazenkema hanirera nona'a huntegahie, hagi magomofonkuke hu Anumzana omani'ne.

4 ¹Kva vahe'mota, kazokzo eri'za vahetamia fatgo huno knarema hu'nesia tamavutamava hunezmanteta magomofonkukera osiho, na'ankure tamagra antahi'naze, tamagri'enena mago Kva vahetamia monafinka mani'ne.

Nunamu huzanku zamazeri hankaveti naneke

²Nunamuma hu'zana azeri hankavetineta, kava huta mani'neta Anumzamofoma susuhunte avu'avazana otreho. ³Hagi tagri'enena nunamu hunerantenkeno, Anumzamo'a kana erifore hina nanekema hanunazamo'a, vuno eno hanigeta, Kraisi naneke'ama oku me'nea kea erinteama hamneno. Na'ankure nagrira ana nanekema huama huazanteku kina hunante'naze. ⁴Nunamu nehinkeno nanekema huama hanua nanekemo'a, ama hino.

⁵Zamentinti osu vahema maninesafina, kakamuma fore hanigetma hakarezama hanazana kva hunetma, ama antahintahi zanteti knare tamavutmava huzamaveri hiho. ⁶Maka zupa vahe'mofoma zmazeri so'ehu nanekege nehinke'za, zamagrama antahisazana, ketamimo'a knare huno haga hino. Tamantahige nanekema hanazana, trohuneta knare hutma kenona huzamanteho.

Poli'a huvgare naneke'a hu'nea naneke

⁷Tikikusina, tusi'za hu'na navesinentoa nenafukino, vahe kegvalu eri'zana agu'areti tamage huno e'nerino, nagrane magoka Ramofonte kazokzo eri'za eneru'a nekino, ana miko nagri nagenkea eme tamasamigahie. ⁸Nagra ama agafare huntogeno tamagritega e'ne. Nankna huta tagra amafina eri'zana e'nerune, anazamofa naneke eme neramasamino tamagu'a tamazeri hankavetigahie. ⁹Nagra huntogeno Onesimusi'a tikikusi ene e-e. Agra tamagripinti magotamimokino, tamage huno agu'areti eri'zana enerigeta tavesinentona nerafukino, agra Tikikusi'ene esu'ne ana miko'zama tagrite'ma fore'ma nehiazamofa agenkea eme tamasamigaha'e.

¹⁰Aristakusi'a nagrane kina huta kina nOMPI manino'a ne'mo musenke atreneramantegeni, anazanke huno Banabasina nefu, Maki'a musenke

hurasante. Ko'ma agri agenkea tamasmino nekino, tamagritega esigetma muse hutma avreho. ¹¹Hagi Jisasi'e hu'za nehaza ne'mofo mago agi'a Jastusikino, agranena musenke atreramante. Zamuvufga tgahu Jiu vahepinti e'inama'amo'za naganena magoka Anumzamofokumakura eri'zana eneri'za knare hu'za nazeri hanaveneti'za nagare. ¹²Epafrasi'a Kraiz Jisasi kazokzo eri'za ne' tamagri kumateti nekino, musenke atreramante. Agra tamagrikura tusi'za huno, Anumzamo'ma avesinea kante tamaza hanigeta oti hanavenetita, nena vahekna nehutma ana mikomotma hakare zampina ama hnazegu nunamuna maka zupa huneramante nere. ¹³Nagra agrikura huama hu'na tamasamiza hue, agra tusiza huno tamagriku'ene Laodisia kumate'ene mono nagamotane, Hierapolisi mono nagamotagura tusi'za huno aghesa antahineramia nere. ¹⁴Nerafu tusa ne' Luku ene Demasikea musenke atreramantaze.

¹⁵Nagri musenkea Laodisia kumate mani'naza mono naga'ene Nimfa'ema nehaza a'ene noma'afima atruma hu'za monoma nehaza nagara ome zmasamiho. ¹⁶Tamagrama ama ana avoma hampri vgamaretasuta, Laodisia mono nagara zaminke'za zamaganena hamprisageta, tamaganena zamagri avona hampriho. ¹⁷Hagi Arkipasina asamiho, Anumzamo'ma kami'nea eri'zana kva hu'nenka erivgaro hutama asamiho.

¹⁸Poli'na nigrani'a nazampinti ama musenkea kreramue. Kinafima mani'noa zankura tamagera kanionanteho. Anumzamofokumakura Asunkuzamo'a tamagrane mesie.

Poli'a Tesalonaika Vahe'mokizmi Ese Avonkrezami'nea Naneke

1 ¹Nagra Polinagi, Sailasi'ene Timotigata ama avona Tesalonaika kumate Anumzamofompi mani'naza nagamotarega kreneramune. Anumza Nafatine, Ranti Jisas Kraisi asunkuzamo'ene, rimpa fruzamo'a tamagrane mesie.

²Maka kna tagra, tamagrikura Anumzamofona susu hunenteta, nunamuna huneramantone. ³Na'ankure tamagrama Anumza Nafatimofonte tamentinti nehuta, erizama enerita, avesintezamofu eriza enerita, Rantimo Jisas Kraisi'ma eforema hanigu, kazigazi hutma Anumza Nafatimofu avure e'nerizazankura antahirami vava nehune.

⁴Nafuhete, tagra antahi'none, Anumzamo'a avesineramanteno, Agri'a vahe mnisazegu huhampitamante'ne. ⁵Na'ankure tagrama knare musenkema nehunana, ke'age nosune. Hianagi Ruotge Avamumofu hanavere tagu'areti huta huama nehunanki, tagra inakna vahe'mota tamagrira tamaza hunakura nehune, tamagra tageta antahita hu'naze. ⁶Tamagranena, tagrama nehunaza tavaririta nehuta, Ramo'ma nehiankna nehutma, tamagra Anumzamofu naneke e'nerizageno, rama'a knazana neramizanagi, Ruotge Avamumofu tamazeri otigetma muse nehaze. ⁷Ana hu'negu tamagra maka Masedoniane Akaia kumate mni'naza mono vahetera, mago knare avamezankna hutma mani'naze. ⁸Na'ankure Ramofu kemo'a tamagripinti agerura runo e'neana, Masedoniane Akaia kumateke agerura orune. Hianagi tamagrama Anumzamofontema tamamentintima hu'naza zamo'a maka kumatega vuno eno hige'za antahinazankita, tagra mago kea osugahune. ⁹Na'ankure rama'a vahe'mo'za tamagrama neravreta, havi anumzama tamefi hunemitma, kasefa huno mani'nea tamage Anumzamofontema tamamentinti hu'naza zana tasami'naze. ¹⁰Hagi monafinti Anumzamofu mofavremo esigu avega anteta mani'nomofu, frinefinti azeri oti'nea Ne' Jisasi, Anumzamofu rimpa hezampinti tahokeno taguvazi'nea zankura kea neheze.

Poli'a Tesalonaika kumate eriza eri'nea naneke

2 ¹Nenafugata tamagra antahi'naze, tamagritegama esunazamo'a amnezanknara osugahie. ²Tagri'ma Filipai kumate'ma tazeri haviza nehu'za, nerahe'za hu'nazazana, tamagra antahi'naze. Hianagi Anumzamomo'ma tazeri hanavetigeta, Agri knare musenkea huama huta tamagri'enena neramasamunkeno, maka vahe'mo'za ha'rerante'naze. (Apo 16:19-24, 17:1-9) ³Tagrira oku'a antahintahitia omnene, tamagri'ma tagrarega tamavrenenteta, havige huta reramatga nosune. ⁴Hianagi anahukna huno Anumzamomo'a tagrira tageno antahino huteno, knare musenkema huama hu erizana, taminegeta e'nerunanki, vahe'mo'za muse hurantesazegura nosunankino, Anumzamomo Agra'a tagu'afina refko huno nerage. ⁵Na'ankure tamagra ko antahi'nazageno huama hugahie. Tamagrira masavena noramita, mago zantamigura ke tanunu nehuta ama kea nosune. ⁶Tagrama nehunana, tamagro, mago'a vahe'mo'za tagi erisga hurantesazegu nosune. ⁷Tamage, Kraisi aposol vahe'ma mni'nonazamo knazana tamigahianagi, tagra akoheta mani fru nehuta, mofavrema nererama amima nemino kegvama hunteankna nehune. ⁸Tagra razampi tamagrira tamavesi neramanteta, Anumzamomo Knare Musenkegera noramasamunanki, tagrati tavufganena neramamune. Na'ankure tamagra raza tagri tavurera mani'naze.

⁹Nenafugata tamagra antahi'naze, kenage'ene feru'enema tamuna nehagegeta maraguzatita tagrima taza haniazanku erizana e'nerita, Anumzamomo Knare Musenkea huama nehunana, magomomo knaza eri amisunegu anara nosune. ¹⁰Tamagra antahinazageno, Anumzamomo'enena tamamentintima Kraisintema nehaza nagamotare'ma hunona ruotage tavutavara, tageno antahino hu'ne. Tagra fatgo tavutavara Anumzamomo avufi nehuta, havi tavutavazana osu'none. ¹¹Tamagra antahinaze, ne'fama mofavre'amomo tutu hunteno azeri hanaveti ke asamiankna tavutavama huramantenona zana tageta antahita hu'naze. ¹²Tagra ana nehanunketma tamagrama kama vnazana, Anumzamomo'ma tamagi nehuno, Agri'a masanentake kuma erigahaze hu'nea Ne'momo so'e kumapi vugahaze.

¹³Maka kna tagra Anumzamomofona susu hunentone, tamagrama tamametintima hu'naza zankura, ana kema huama hunketma tamagrama erinazana, vahe'momo ke eriaza hutma e'ori'naze. Hianagi tamagra Anumzamomo tamage ke eri'naze. ¹⁴Na'ankure nerafugta, Anumzamomo nagama Kraisi Jisasimpi Judiama mni'naza naga'mokizmi zmavuzmava zmavaririta tamagra hiho. Na'ankure zamagranena anahukna hu'za tamagri vahe'mo'za knazama tamami'neaza huza, zamagri'enena Jiu vahete'ma hu'nazaza hu'naze. ¹⁵Jiu vahe'mo'za Ramofona nehe'za, kasnampa vahe'mokizmia nezmahe'za, tagrira tahe'za tretufe

netre'za, zamagra Anumzamo'a muse osiaza nehu'za, maka vahera ha'rezmante'naze. ¹⁶Megi'a vahe'mofontema zmahokeheno zmaguvazisia kema huama nehunkeno, rehiza hunerantazageno, anama hazazamo'a kumima hu avamena agatereno avite'ne. Hianagi e'inahukna vahetera, henka Anumzamofu rimpapezamo zamagritera megahie.

Poli'a Tesalonaika vahe zmagesia zankura tusiza huno avesi'nea naneke

¹⁷Hianagi nenafugate tagra osia knafi tamagri' enena omanunanagi, tagra tamagrikura tagera okanitfa hu'none. Tamagrima eme tamagezankura tusiza nehuta, eme tamagenaku nehune. ¹⁸Na'ankure tagra tamagritega enaku nehune. Nagra Poli'na enaku nehuana, Sata'a kana rehiza hunerante. ¹⁹Ranti Jisasi Kraisi'ma esia knazupa, na'amo tazeri amuhama humisunazantia mesigeno, nazamo musema hanunazana mesigeno, tazeri antesgahu kini fetoritia Rantimofu avurera megahie? Tamagra ana musezantia mani'naze. ²⁰Tamagriteti, tagra ra tagi enerita musena hugahune.

**Poli'a Timoti huntogeno Tesalonaika vahe
zmazeri hanavetina hu'nea naneke**

3 ¹Hanki tamagri'ma eme tamesesuna tavesizamo, marerigeta manigama nosuta, knarema haniana, Atens kumate manigahune hu'none. ²Ana nehuta nerafu Timoti'a, Anumzamofu eriza ne'mo Kraisi knare musenkemofu eriza e'neria ne'mo, eme tamamentinti tamazeri hanavenetino, tamazeri hanaveti kea tamasaminogu hunte'none. ³Tagri'ma tavesiana, mago'amtoma amama tagrama e'neruna knazankura antahigna osiho. Tamagra antahinaze, tagrikura knazana erigahaze hu'naza vahe mni'none. ⁴Na'ankure tamage huta tamagra nema korapama mni'neta tamasami vava huta, knazampina ufregahune huta hunonankino, ana knazamo'a, antahinaza kante fore huno evu'ne. ⁵E'ina agafare nagrama avega antena manigama nosuna, reramatagamahu ne'moma reramatga huzanku koro nehuna, tagrama erizama tamagripima eri'nona erizamo amnezankna huzanku, tamamentinti eme kenogu nagra Timoti hunte'noe.

Timoti knare naneke erino ne-egeno Poli'a muse hu'nea naneke

⁶Hianagi menina Timoti'a tagrite eno, tamagrama tamamentinti nehutma ovesinte avesintema nehaza zankura, musenke eme nerasamino, antahi so'ema humanerantaza zanku'ene, tamagrima tamagenaku nehunankna hutma, tagrima tagenakuma nehaza zankura eme tasamine. ⁷Ama'na agafare, nenfugta vahe'mo'zama knazama tamiza tatazampima unefronkeno'a, tamagrama tamentintima hu'naza zamo maka knazantifina tazeri hanavenetie. ⁸Na'ankure tagrama menima tasimu

erita mni'nonana, tamagrama Ramofompi hanavetitama mni'naza zamo higeta tasimura erita mani'none. ⁹Tagra Anumzamofu susu hunentone. Tamagrama hazazamo higeta, Anumzamofu avurera tagra musena nehune. ¹⁰Hanine zgenena tamavufima tamagezankura nunamuna hanavetita huvava nehuta, tamamentintifima atupama hu'nesazana, tagra tamazeri hanavetigahune. ¹¹Menina tagri Nerafa Anumzamofu'ene, Jisasi Rantimokea vanuna kana taveri hanaketa tamagritega vugahune. ¹²Tagri'ma tavesiana, Ramo'a vahe'ma avesinte avu'avazana eri aviteramantesigetma aviteta maninetma, magoke magokemotma ovesinte avesinte nehutma, tamagri'ma tamavesi neramantonaza hutma, ana miko vahera zmavesizmanteho. ¹³E'ina hu'neankino, Jisasi'a maka Naga'anema esia knarera tamazeri hanavetina, maka hazenketami omnena, ruotge huta nemanita, manifatgo nehuta, Anumza Nafatimofu avurera hazenke'tamia omanegahie. Tamage.

Anumzamo muse hania kante manisunazamofu naneke

4 ¹Nafu naganaheta Ramofu Jisasimpi mani'naza nagamota, rempima huraminona kante antetma manihogu tagra tutu huneramanteta, tamazeri hanavenetunanki, tamagrama nehazaza hutma, mago'ane hanavetita ana avu'avara hiho. ²Na'ankure tagrama kasegema, Ramofu Jisasi hanavetifima tamasamunketma ketma antahitma hu'naze. ³Na'ankure ama'i Anumzamofu avesizane, mani agru hutma maka monko avu'avazampina maniho. ⁴Tamagra mago magomotma tamavufga kegva nehutma, tamazeri agru nehutma, ruotge hutma maniho. ⁵Tamagra havi tamagu tamagesamofona kazokzo vahe'agnara nosutma, Anumzamofu keno antahino osu vahe'mo'za nehaza zana osiho. ⁶Tamagra Ramofu amagama nentesamokizmia, rezmatga hutma mono Neramafu a'nea zmazeri savri osiho. Antahiho, ko tamavumro tamantenone. Iza'o e'inahu avu'avazama hanimofona, ana hazenke'arera, Ramo'a azeri haviza hugahie hu'none. ⁷Na'ankure Anumzamofu'ma tagrima tagima hu'nea agafa'a, agru osu avu'avaza avaririhogu tagi osu'neanki, mani ruotge hanunegu tagi hu'ne. ⁸E'ina hunegu iza'o ama kema amefima hunentemo'a, vahe'mofu ke amagena hunonteaniki, Anumzamo Ruotge Avamuma tamaminemofu naneke amagena hunemie.

⁹Nenfugta avesintezamofona mago'ene avona kreta, ovesinte avesinte hiho huta osugahunanki, Anumzamo ovesinte avesinte hu'zana ko rempi huramine. ¹⁰Na'ankure tamage, maka Masedonia kumate mani'naza tafuhegata, makamotma ovesinte avesinte ko hu'naze. Hianagi tafuhegata huhanavetike tamasamita, mago'ene ovesinte avesinte hiho huta neramasamune. ¹¹Tamagra fruma huno manizankura hanavetitma maninetma, tamagra'a erizana eriho. Koma hihoma hu'na tamasami'nonaza hutma, tamagratami tamazanu eri'zana erigahaze.

12 E'inahukna nehutma, megi'ama mani'naza vahetera, knare tmavutmava nehutma, mago'a zankura atupara osugahaze.

Fri'naza vahe'mo'za otisaza naneke

13 Nafuhegta, mono nerafuza koma fri'namo'za nankna hugahazafi, tamagra ketma antahitma nehutma, Jisasi'ma esigu amuhama nosaza vahe'mo'za zavimanetaza zana osugahaze. 14 Na'ankure tagrama tamentintima hunana Jisasi'a friteno oti'neankino, anahukna huno Anumzamoa'a zmentintine vahe'ma fri'naza vahera zmazeri otisige'za, Jisasi'ma esiankna zupa magoka egahaze. 15 Na'ankure amanahu kante Ramofonkea neramasamune, mani'nona vahe'mota ovunenukeno, fri'naza vahe'mo'za otiza ugota hu'za marerigahaze. 16 Ramo'a Agra'a monafinti eneramino, hanavege huno kezanke nehanigeno, ugota ankeromo'a ageru nerinkeno, Anumzamofu ufemo krafa nehanigeno, vahe'mo'za Kraisinte zamentinti hute'za frinesaza vahe'mo'za kote'za kerifintira otigahaze. 17 Anantera tagrama ofritama maninesuna vahe'mota, tavresigeta mrrerita hampompi omeri mago huteta, magoka anagamu Ramofona ome tutagiha hunenteta, maka kna Agrane manivava hugahune. 18 E'ina hu'negu ama nanekenu, magoke magokemofona ozmazeri hanaveti azmezeri hanaveti hiho.

Ramo'ma ete esnigu tro huta manisnuna naneke

5 1 Nagra anazama efore'ma hania zamofonkea, e'i knarero, e'ina zupa fore hugahie hu'na nenafugta kreoramigahue. 2 Na'ankure tamagratmi antahi'naze, Ramo'ma esianknamo'a, kumazafa vahe kenage eankna huno egahie. 3 Vahe'mo'za hu'za knare huta mani'none nehu'za, tarimpa fru huta manisoe hune hu'za hanaza knafi! Ame huno zmazeri haviza hu'zamo'a zamagritera, anemo'za mofavre antenaku'ma nehazageno zamata negriankna zmata negrina, zamagra ana knazampintira mani onkanegahaze. 4 Hianagi tamagra nenafugate, hanimpina omninazankino, ana knamo'a kumazafa vahe'mo'za hanimpi azanknara hanigeta antri osugahaze. 5 Na'ankure tamagra maka'motma tavite vahe maninetma, msare vahe mni'naze. Tagra kenage vahera omanita, hanimpi vahera omani'none. 6 E'ina hu'negu atrenketa mago'amo'za nemasazaza huta omaseta, tavumo'a hari nehina, ama' antahintahi e'nerita kva huta manigahune. 7 Na'ankure zmavuma masaza vahe'mo'za kenegeke nemasageno, aka tima nenaza vahe'mo'za, kenegeke aka tina nene'za neginenaze. 8 Hianagi tagra masare vahe mni'nonanki, atrenketa ama' tagutagesa nentahita, tamentintima huzane, vahe'ma avesinte avu'avazana tamimizare hanko reheriaza nehuta, Jisasi'ma taguvazino tavresiazanku nentahita amuhama nehunazana, fetori anteaza huta antegahune. 9 Na'ankure Anumzamoa'a rimpahe'zama'a

erigahaze huno huorantene. Hianagi Ranti Jisasi Kraissimpinti tahokeno taguvazizana erisunegu huhampirante'ne. ¹⁰Jisasi'a tagriku huno fri'neankita, fri'nazo tasimu erita mani'nono, tagra Agrane magopi manisunku huno fri'ne. ¹¹E'ina hu'negu mago magomotma, ozeri hanaveti azeri hanaveti nehutma, menima nehazaza hutma mago magomofona zmazeri hanavetita maniho.

Mono vahe'mo'za hanaza zamuzmazamofa neneke

¹²Hianagi nenfugata, tusi maraguzatiza Ramofonte manisaza'zamofa nanekema rempima hunerami'za mono kva vahetamimofona, kegva huzmanteho huta neramasamune. ¹³Hagi erizama e'neriza zanku zmesizmanteta, zamagrira zamagi erisaga nehuta, magoke magokemotma tamarimpa frune maniho.

¹⁴Nerafugate, tagra tamazeri otike hanunketma erizama e'ori zmesrama nehaza vahera zmazeri fatgo nehutma, koroma nehaza vahera zmazeri hankavenetitma, hanavema oti'nesaza vahera zmazeri hanavetiho. Ana nehutma maka vahe enena fru hutma maniho.

¹⁵Mago'mo'e huno havizama huntessimofona, nona'a havizana huonteno. Hianagi maka kna knare avu'avaza ohunte ahunte nehutma, maka vahetera anahukna tamavutmava huzmanteho. ¹⁶Makazupa muse hiho. ¹⁷Nunamuna otretma makakna huvava hiho. ¹⁸Hakare'zampina Anumzamofona susu huntého, na'ankure Jisasi Krasimpima e'inahu tamavutamavama huzankura Anumzamofona avenesie. ¹⁹Tamagra Ruotge Avamumofa teve ahesu hu avu'avazana osiho. ²⁰Kasnampa kemofona antahi amnezanknara osiho. ²¹Hianagi rezaganetma makazana ke so'e nehutma, knarema hunesiazana azeri akona hiho. ²²Ana nehutma, maka havi avu'ava zampintira maniganeta maniho.

²³Hagi rimpa fru Anumzamo'a, Agra maka sese huramanteno tamazeri ruotage nehuno, avamutamine, tamagu tamene, tamavufanena kegva huramantena, Ranti Jisasi Kraisi'ma esianknarera kema hurantezana omanetfa hugahie. ²⁴Anumzamo'ma tamagima hunemo'a, fatgo huno ke'are amage antegahiankino, Agra anahukna huno eriknare huramantegahie. ²⁵Nenfugate tagrikura nunamuna huranteho.

²⁶Maka tafu'hemotma mono tamavutamava hutma tamafukre tamafakre hiho. ²⁷Nagra hanave ke tamasamuanki, ama avona hamprinke'za, maka tafuhe'za antahiho. ²⁸Hagi Rantimofa Jisas Kraisi asunku'zamo'a tamagrane mesie.

Poli'a Tesalonaika

Vahe'mokizmi Anante (2)

Avonkrezmi'nea Naneke

1 ¹Nagra Poli'nagi Sailasi'ene Timotigata Tesalonaika mni'naza mono nagamota Anumza Nafatine, Ranti Jisasi Kraisinte tragotetma mni'nazamotarega, ama avona kre'neramunankino, ²Anumza Nafatimofone, Ranti Jisasi Kraisi Asunku'zamo'ene rimpa fruzamo'a tamagrane mesie.

Tesalonaika vahe'mo'za zmentintifina oti hanavetinaza zanku Poli'a susu huzmante'nea naneke

³Nenfugata maka knama tamagriku'ma tagesa nentahita Anumzamofona susu hunentonazamo'a, e'i knare'zantfa hu'ne. Na'ankure tamagri tamentintimo'a rura huno nevigetma, magoke magokemotma ovesinte avesintema nehaza zamo'a hageno ra nehie. ⁴E'ina hu'negu, tamentinti nehutma, maka tamazeri havizama nehazafine, knazama tamizafima kazikazi hutmaneaza zankura, Anumzamofono mono nagamofono amu'nompina tamagri tamagenkema nezamasamita, tamagrikura akaginerone.

⁵E'i ana maka'zamo'a Anumzamo'a fatgo refko zama'a erifore nehiankino, e'inahukna tamatazama e'neriza zampi Anumzamo'a tamazeri retro nehina, Anumzamofono kumara erigahaze. ⁶Na'ankure Anumzamo fatgo zanke nehia Nekino, tamazeri havizama nehaza vahera, nona'a huno zmazeri haviza hugahie. ⁷Hianagi Ramo Jisasi'ma monafintima hanavenentake ankeri vahe'anema, teve anefa'ane eama hanuno'a, Agra kanazampintira tamazeri o'za nehuno, tagri'enenan knazantifintira eme tazeri o'za hugahie. ⁸Hanki Anumzamofono ke'za antahiza nosuza, Ranti Jisasi Kraisi knare musenke novaririza vahera, nona'a huno knazana eme zamigahie. ⁹Ama ana vahe'mo'za havi mizazami e'neriza, Ramofonteti'ene hanavenentake masa'afintira atre'za afete'are mni'ne'za, zamata erivava hugahaze. ¹⁰Anazama fore'ma

haniana Ramoma ete esianknarera Agri vahe'ma mni'naza vahe'mo'zama ra agima nemisafina, tamagranena ana vahe amu'nompi maninetma, ra agi amigahaze. Na'ankure tagrama Agriku'ma huama hu'na kerera, tamagra tamentinti hu'naze.

**Poli'a Tesalonaika vahe'mo'za hankveti'za manisnagu
Anumzamofa antahige'nea naneke**

¹¹Anumzamo huhampri tamantenegeta tamagrikura nunamuna huneramantonankino, Anumzamofa tamazeri knare hina, Agri vahe manigahaze. Tagra nunamuna huvava nehunankino, Anumzamofa hanavemo'a tamaza nehina, maka knare'zama hunaku'ma nehaza zana nehuta, tamamentinti hutma hugahunema nehazazana hugahaze. ¹²E'inahuma hanutma Ramofa Jisas Kraisi Agi erihentesga nehnageno, Anumzantine Ranti Jisas Kraisi'enena asunkuzama'areti tamagi erisaga hugahie.

Kasege rutagre ne'mofa naneke

2 ¹Nerefugata Ranti Jisasi Kraisi'ma esigeta, Agranema tagrama ome atru hanuna zamofonkura, menina anage huta tagra tamantahinegone. ²Mago'a vahe'mo'za tamasamiza Ramofa kna hago fore hu'ne hu'za tamasamisazo, mago vahe'mo huno Ruotge Avamumo e'inahu kasnampa kea nasamie huge, mago ke huama nehuno hanio, mago vahe'mo huno, e'inahukna avona hamprita konema hanageta, e'inahu kema antahisutma, antri nehutma ame hutma antahintahi tamifina antahigna osiho. ³Atrenkeno mago kampintira vahe'mo'za reramatga osino, na'ankure ana kna fore osu'nenigeno, kote'zana rama'a vahe'mo'za Anumzamofona zamefi humitesageno, kasegema rutagre ne'mo'a efore nehina, ana ne'mofona azeri haviza hugahie. ⁴Ana ne'mo'a agra'a maka'zama anumzane hu'za mono hunentaza'zane, mago'a mono hunentaza zantamina ha'renezmanteno, Nagra ra mni'noe huno Anumzamofa ra mono nompi trate nemnino, agra'a azeri ama huno Anumza mni'noe huno hugahie. ⁵Tamagra ontahi'nazo, koma tamagranema mni'nena e'inahu vahera fore hugahie hu'na tamasaminoana? ⁶Hagi menina nazamo kana rehiza huntene, tamagra antahi'naze, e'ina hu'neankino agra'a kna fatgore ana ne'mo'a eama hugahie. ⁷Na'ankure kasegema rutagre hanavemo'a oku'a erizana ko e'neriankino, ana kama rehiza hu'nemofona azeri kami atretenkeno, kasegema rutagre ne'mo'a eama hugahie. ⁸Anantera kasegema rutagre ne'mo'a eama hanigeno, Jisas'a agipinti zahonu huharafu huno ahenefrino, Agrama esia hihamu masa'amo, ana nera ahefri vgaregahie. ⁹Anama hania ne'mo'a, Sata hanavereti hanavenentakezane, kaguvazane, havige avame'za erifore nehanigeno, ¹⁰Anumzamofa

zamagu'ma vazisigu'ma tamage kema zami'neana, zamagra zamentintia osu atre'nazagu, Agra mika havige avu'ava zante'ma fananema hu kantema nevaza vahera rezamatga hugahie. ¹¹Na'ankure e'ina agafare Anumzamo'a antahintahizamia zamazeri savari hinke'za, havige zante zmentintia nehu'za, ¹²tamage kerera zamentinti nosu'za, havi avu'avazama hu'zanku muse nehazankino, ana miko'mokizimia refko huzamanteno knazana zamigahie.

Oti hanaveti zamofa naneke

¹³Hianagi tamagriku huta maka kna tagra Anumzamofona susu hunentone. Ramo'ma avesi'neramantea nenafugata e'se agafare Anumzamo'a tamagu'vazinaku huhampri' ramante'neankino, Avamuteti'ene tamage kerema tamentintima nehazageno, tamazeri ruotge hu'ne. ¹⁴Tagrama knare musenkema huama hunazampi, Anumzamo'a tamavare kana retro higetma, Ranti Jisas Kraisi hihamu masazama'a e'nerize. ¹⁵Ana hu'negu nenafugata avoma kreneramita, repima hurami'nona kerera azeri hanavetita oti hanavetiho. ¹⁶Menina Ranti Jisasi Kraisine, Anumza Nafatimo, avesinerante'mo mani vava mani'zane, knare amuhazane asunkuzama'areti neramino, ¹⁷tamazeri so'e nehuno, kema hanazano, maka knare erizama erisazana, tamagu'a tamazeri hanavetigahie.

Poli'a nunamu hutesazegu Tesalonaika vahe zmantahige'nea naneke

3 ¹Hanki huvigare nanekea, nenafugata nunamu hunerantenkeno, tamagripima hu'neazana huno Ramofo nanekemo'a, maka kokantega ame huno vuno e'no nehina, rahi amiho. ²Ana nehanageno, tagrira fatgo osu vahe'ene havi vahepintira tahokeno tavregahie. Na'ankure zmagra maka'mo'za zamentinti osu vahe mni'naze. ³Hianagi Ramo'a hugahuema haniaza hu'nekino, havi avu'avazama hu ne'moma tamazeri haviza huzankura kegva huramantegahie. ⁴Tagra, tamagrikura hugahaze huta Ramofompina antahineramunankita, tamagrama nehazazana mago'ene nehutma, hihoma hutama huramante'nonazana hugahaze. ⁵Ramo'a tamagrira Anumzamofa avesizana tamagu'afina eriana nehina, Kraisi'ma hu'neaza hutma kazigazi hutma vugahaze.

⁶Menina nenafugata anage huta hanave kea neramasamune, Ranti Jisasi Kraisi agifina, erizama eri naneke repima hunezamunke'za novaririza, feru nemaniza tafuhe'ina zmatretma ogantu maniho. ⁷Na'ankure tamagra antahinaze, tagrama repima hurami'nona avu'avazamofa negetma avaririho. Na'ankure tagra amu'nontamifima tavesrama osu, ⁸magomofa bretia amanea erita o'nenonanki mizaseta neneta, tamagrira knama tamizankura maraguzatita hanine zgenena erizana e'nerune. ⁹Hianagi tagra mago'a neza taminageta e'rinakura

nosunanagi, tagra knare tavutavama huza tamaveri hanunketma, tamagra ana tavu'tavaza avaririhogu nehune. ¹⁰Na'ankure tamagranema manineta, amanahu avu'avaza hugahaze huta hanave kea tamasami'none. Mago vahe'mo'ma erizama e'orinakuma hania vahe'mo'a, nezana onegahie. ¹¹Na'ankure tagrama antahunana amu'rontamifina mago'amo'za erizana e'noriza, vahe'mofo zanku zamagenke nehu'za, eriza e'ori feru vahe nemanize. ¹²Menina e'inahu vahe'mofona, Ramofo Jisas Kraisimpina hanavege huta zmazeri hanave'netita, akohe'za mni'ne'za zamagrazmi zamazampinti erizana eri'za, nomanizazmia retro hu'za maniho huta nehune. ¹³Hianagi tamagra nerafugata, knare tamavu'tmavama huzankura tamavesra osino huta nehune. ¹⁴Iza'o ama avompima kre'nona kemofoma amagama ontesimofona, anamofona kenhunetma, agranena tragoteta omaninkeno agra agazegu hino. ¹⁵Hugahianagi, ha vahetamignara anamofona huonteho, hianagi nerafuga haviza hunane hutma azeri fatgo hiho.

Poli'a huv gare ke hu'nea naneke

¹⁶Menina rimpa fru Ramo, Agra'a maka knama hakare'zama hanafina, tamarimpa frua tamigahie. Ramo'a makamotane manisie. ¹⁷Nagra'a Polina ama musenkea nazanko avona nentena, e'inahukna hu'na krenoankita kegahaze. ¹⁸Rantimofo Jisasi Kraisi asunkuzamo'a makamotma tamagrane mesie.

Poli'a Timoti Ese

Avonkremitanea Naneke

1 ¹Nagra Poli'na, Kraisi Jisasi eri'za ne'mo'na Anumza Tzahu ne'ene Kraisi Jisasi humanantenate, emema tvaresigu Rantimofa aveganentoa aposol ne'mona, ²Timotiga nagri tamage mofavremoka mago tamentinti nehu'mokarega, Anumza Nerafantegati ene Kraisi Jisasi Ranti'mo'a asunku huganteno asurgi'zane, arimpa fruzamo'a kamisigeno kagrane mesie.

Havige mono hunezmiza vaheku kva hanaza naneke

³Masedonia katre'na vunaku nehu'na, nagra tutu hugante'noe, Efesas mani'nenka havi mono huku hanaza nagara, anara osiho hunka nezmasminka, ⁴havige hanaza kegu antahi zamige, korapa fore hu'nesia knihe kerera antahiozmiho. Na'ankure ana zamo'a hafra fore huno tmaza osina, Anumza'mofontegati erinaku tamentinti hanaza zana e'origahaze. ⁵Hianagi tagrama rempi hune'zmuna zamofa agafa'a, zamesi nezmante'za zamagu'areti agru hu'ne'za, knare zamagu'zamage sareti zamentinti hugahaze. ⁶Na'ankure mago'a rempihuzmi vahe'mo'za knare'zana agtere'za hazagre'za nevu'za, zamaza osugazanku havi naneke nehantagaze. ⁷Kasege huzmasmi vahe nesampra'zanagi, zamagra ana kema hazanke antahinira osu'ne'za, antahi'none nehu'za zamufa eri mreri'zageno kemo'a nena'a nomne.

⁸Hu'neanagi tagra antahi'none, kasegemo'a knare hu'negeta, ana kasegema Anumzamo hu'nere, amage anteta avariri sunkeno'a knare hugahie. ⁹Hagi tagranena antahi'none kasegema tmi'neana fatgozama nehaza vahe'mokizmigire huno ozami'ne, Hagi kasegema ovariri'za ha'nentake nehu'za, Anumzamofa avu'ava nosu'za kumi' nehaza vahe'ene mani otage osu'za, otage huno mani'zanku huhavi'za nehu'za, nezmafano nezamrerano zamahe nefri'za, vahe zamahe nefri'za, ¹⁰monko'za nehaza vahe'ene, vemo vene mse'zane, vahe kumzafa nesea vahe'ene, agi'ari vahe'ene, hu'nesia zanteku vahane hu' vahe'ene, knare'za rempi huzmi zanku huhaviza hu vahe'ene, ¹¹msa'nentake konarari'ane

knare musenke'afi (gospol) asomu'ane Anumzamo, huzamasmio huno huhamprinante'ne.

¹²Krais Jisasi tagri Ramo, hihamu nami'negu muse hunentoe, na'ankure Agra nagri antahi namiteno, erizani'a erigahane huno huhampri nante'ne. ¹³Hianagi korapara Anumzamofona nagra azanva ke nehu'na, amage' nentaza vahera zamazeri kore' nehu'na, tusiza hu'na Jisasi agifi amage' nentaza vahera ha' rezmante'noe. Ana hu'noanagi asunku hunante'ne, na'ankure antahi'na ke'na osu'nena namentinti osu'nogu anara hu'noe; ¹⁴Ra Anumzamofa asunku zamo'a agtereno avite'ne, amentintine avesizanemo'a Krais Jisasimpi me'negeta negone. ¹⁵Ama'i tamage nanekegino, hakare'a vahe'mo'za zamentinti hugahaze. Na'ankure Krais Jisasi'a kefoza nehaza vahe zamahokehesigu ama mopafina erami'ne. Ana agu'afina nagra zamagtere'na hakare vahera kefo'zana hu'noe. ¹⁶Ana hu'noanagi, nagriku esera asuntagi nante'ne, nagrite vahe'mo'za avame zana nege'za, Agrite kumi' vahe'mo'za esnagu agazone huno zamega anteno mani'ne, Krais Jisasinte zamagra zamentinti nehu'za, ksefa hu'za mni vavahu nomni'zana erigahaze. ¹⁷Menine maka knafi manivava nehia Kini nera, ofrino, vahe'mo onke, magoke Anumzana, konariri'ane manivava hugahie. Tmage.

¹⁸Magoke tamentinti nehu'a mofavre Timotiga, ama avompi kre negamua nanekegu, kagesa antahio. Ko'ma mago'mofonku Anumzamofa naneke asmigeno, kagriku huama hu'nea kasnampa kefi hankve tinka Rantimofa ha'pina, knare hunka hara huo. ¹⁹Kmentinti azeri hanavetinenka, kagu kagesareti knare antahintahi huo, na'ankure mago'a vahe'mo'za zamenosige'za zamentintifina atre'za vente (ship) eritagnavaziankna nehaze. ²⁰Ana agu'afina Haimenasi ene Aleksandake, e'inahu avamera hu'na'e. Ananku hu'na Sata azampi znante'noe, Sata'a kna nezanaminke'ne rempi huteke, Anumzamofa agi'a azanva kea huontesa'e hu'na hu'noe.

Maka veaku nunamu huzmante'suna naneke

2 ¹Anumzamofa agihanta vazi'zana pusaza me'ne. Nunamu huta agihanta nevezita, tagrima tvesi'nia zanku antahinegeta, muse hunenteta, maka vahe zamagi erita zamaza hanigu antahige'snune, ²Kini vaheku'ene maka kva krinerantaza vaheku'ene nunamu huzmante'sune, ana nehnunke'za kva huso'e nehnageta, agzone huta, fruzampi Anumza avu'avate ene fatgo mani'zampi so'e huta magoke'pi manigahune. ³E'inahu zamo'a Anumza Tzahu ne'mofo (Savior) avufina knare nehigeno musena nehie. ⁴Kefo zampinti tahoke he'nea ne'mo, maka vahemo'za tamage naneke antahi'za zamasimu erisazegu avenesie. ⁵Na'ankure Anumzana magoke mani'ne. Anumzane, vahe'mota amu'nompina, anazanke huno amu'no nera magoke mani'ne, ana nera Krais Jisasi'e. ⁶Tusi'a mizanteti

Agra'a avufga atreteno, maka veara miza seranteno, Anumzamomo huhampri ante'nea kna eri ama hu'ne. ⁷Ana zanteku huno nagrira nazeri oti'ne, Anumzamomo mono naneke zamasm'i'nea antahisnagu, nazeri oti'nea aposol ne'mo'na, nagra tamage nehue, havigea nosue. Zamufga tga osu vahe (gentiles) rempi huzminena zamentinti hu'za tamage nanekea antahihogu huama nehue.

⁸E'ina hu'negu nagri'ma nave'nesiana hakare'a kumate vene'nemo'za, ruotage zamazana antesga hu'za nunamuna nehu'za, kevu hu'neza fra vazi'za ke hakare osiho.

A'nemo'za zamavuzmavama hanaza zamomo naneke

⁹Nagri'ma nave'nesiana, anahu'kna a'nemo'za zamavasese hanafina hugahaze, kukena knare'za hu'za masigahaze, kukena hanazana vahe'mo'za kezmasane hu'zane, zamanu zamazoka hane'zane, kolire trohunenaza avasase zane, hage rimpinti zane (pearl), marerisa kukena osiho. ¹⁰Hu'neanagi Anumzamomo amage' nentonema hanaza a'nemo'za, knare avu'ava nehu'za, ana avu'avateti knare avasese hiaza hu'za hugahaze. ¹¹A'mo'a akohe'no rempi humisia ke erizafa nehuno, ke amage' anteno, agzone huno manigahie. ¹²Hu'neanagi nagra a'nemo'za vene'ne rempi huzmi zankuro, kva mani'zankura navenosie, e'igu agzone hu'za mani'snaze. ¹³Na'ankure koteno ve Adamu tro huteno, henka'a ara, Ivina tro hu'ne. ¹⁴Adamuntera revatga zana fore osu'ne, hagi a'momo revatga higeno, kumi'pina traka hu'ne. ¹⁵Hu'neanagi a'nemo'za mofavrema kse nezmante'za, zamentinti nehu'za, ovesinte avesinte nehu'za, mani ruotage hu'za nemni'za, zamagu'ane zamagi'ene, kva hanaza zamo knare mani'za erigahaze.

Mono nonte kva hnaza vahe'ene Dikeni vahe'momo naneke

3 ¹Ama'i tamage naneke, iza'o mono kva manigahue hanimo'a, knare eri'zane huno erino. ²Kvama hania ne'mo'a amanahu hino, hazenke'a omneno, magoke a' anteno, manizama'a kva nehuno, fatgo zanke nehuno, avufa antermino nemnino, nantu antentesia vahe agampu nehuno, agra knare'za rempi huzmi ne' nemnino, ³hanave rina neno negi oneno, hafra osuno, hagi arimpa fru nehuno, ke hakare osuno, zgogu avesinte'zana atreno. ⁴Agra knare huno naga'a kva nehuno, mofavre zga'a zamazeri fatgo hanige'za, knare kante maniho. ⁵Hu'neanagi naga'a kvagri so'e nosnimo'a, ina kna huno Anumzamomo mono' nona kegva hugahie? ⁶Menima agu'a rukrahe hu'nesnia nera, mono kva ne' manisnie hunka ame'ama hunka azeri o'otio. Agra avufa erisaga nehnigeno Sata'a ana hanifi efreno azeri traka hugahie. ⁷Hagi monopi omani megia vahe'mo'za nege'za, knare nere nehnigeno, agra havi avu'avapina uramino Sata krifufina ohegahie.

⁸Dikenima manisia ne'mo'a, anahu kna huno avu'avapina fatgo huno mani'нено, tare agerura oruno, hanave tintera osuno, havi kantetira zgoa e'orino, ⁹e'inara osuno ani' agu' agesare mani'нено, Anumzamofonte hanave amentinti hu'neana, azeri hampo'na hino. ¹⁰Ana eri'zana erigahazanki hu'nenka, esera avame antenka eri'za zamige'za knare hu'zama erisagenka, dikeni eri'zana zamige'za eriho.

¹¹Ane zamimo'zanena anahu kna hu'za knare hu'za nemni'za, vahe zamefi'a ke osu'za, knare avu'ava hu'za fatgo zanke hakareza hanafina nehnage'za antahi zamigahaze. ¹²Dikenima manisimo'a magoke a' anteno, mofavre naga'a knare huno kegva negrino, noma'afi zantmine, vahe enena kegva krigahie. ¹³Ana dikeni eri'zama knare hu'za erisamo'za knare zamagi eneriza, eri'za zamifina otine'za, korera osu'za Krai Jisasintera hanaveti'za zamentinti hugahaze.

¹⁴Nagra ama avoma kre atrogeno kagritega viana, zaza kna omninesakena ko e'naku nehue. ¹⁵Hianagi mago'a zamo'ma nazerinke'na omesugenka, nagrama avoma kre troana kagra kenka antahinka hu'nane, vahe'mo'za inankna hu'za Anumzamofono nagara zamagra kegva hugahaze, kasefa huno mni'nea Anumzamofono mono nonte'ma, atru re'nea anumza zafa, tamage kemofo agafa'e. ¹⁶Maka vahe'mota mago trimpa nehune, Anumzamofono avu'avapi tamentintima hu'zamo'a eama nehie, ***Kraisi'a avufa erino eama higeno, Avamu'mo fatgo avu'ava eriana higeno, ankeromozaga kageno, Kraisi agi agenke hakare kaziga huama higeno, miko mopane mopane vahe'mo'za zamentinti hzageno, tusi'a msa'nentake konariri'afi avreno mreri'ne.***

Havigema nehza vahe'mokizmi naneke

4 ¹Hu'neanagi Ruotge Avamumo huama huno nerasmie, mago'a kna esnia knafina mago'amo'za zamentinti atre'za evunerami'za, rezmatagahu avamu'ene, hankro'mofono naneke rempi huzamisage'za zamagesa anteza antahigahaze. ²Havige vahe'mo'za zamagra hu'za, amanahu vahe mani'none nehza vahe'mo'za havi kereti rezmatga nehu'za, knare zamagu zamagesa zamagu'afi me'neana, havi kereti zamagu'a kre hagege nehze. ³Ana vahe'mo'za arave osugahaze nehu'za, mago'a kavera oneho hanazana, tamage ke'arema tamentinti nehutma nentahimota Anumzamoma tro hunte'nea zana muse hunenteta susu huta erigahaze. ⁴Na'ankure hakare'zama Anumzamoma tro hunte'nea zamo'a, knare hu'negu mago'zana otreta tamagra susu hunentetma amne erigahaze. ⁵Na'ankure Anumzamofono ke'mo' ene, nunamumo azeri agru hu'ne.

Timotima knare eri'za ne' manisia naneke

⁶Ama kema monopi mani'naza kafuhe'ima zamasmisunka, kagra Krai Jisasi knare eri'za ne' nemninka, hanavetinka hakare zupa

kamentintifine, mono kemofo nehunka, amage'ma nentampina hagegahane. ⁷Hu'neanagi kagra maninka tvava'nemofu knihe kerera fra ovazio, hagi kagra knaka'ane, hanaveka'a Anumzamofu avu'avapi kzeri hanavetio. ⁸Hanki amega tvufa azeri hanaveti hanuna zamo'a, osi'a knafi tza hu'zana eri gahunanagi, Anumza avu'avapi (godliness) maka'za hanuna zamo'a, huhampri'negu meni mani'zampina tza nehuno, henka mani'zampinena tza hugahie. ⁹Ama nanekea tamage naneke me'negu antahi hanavetita erisnune. ¹⁰Amana zante amuhu huta eri'zana enerita mragu'za netune, na'ankure kasefa huno mani'nea Anumzamoma esnigu tagra tamentinti nehune, mika zamentinti nehza vahe zamahokehe nere. (Savior)

¹¹Menima negasmua kea huankerenka huzamige'za amage anteho. ¹²Atregeno mago vahe'mo'a nehza ne' mani'nane huno kagehenkamu otreho, hianagi zamentintima nehza nagatera avame zankna hunka keka'afine, kavu kvapine, zamesi zamante zane, kamentintifine, agru hu'zane, huzmeri hugahane. ¹³Nagra egahuanki, hakare vahera zamazeri atru hunka avontafera hamprinka mono nanekea huama hunka rempi huzamio. ¹⁴Kagra kagera oknitfa huo, Anumza naneke huama (profesi) hzagenka anampinti Avamu'mofo muse'za (gift) erinke'za, mono kva vahe'mo'za zamaza ante'za eri'za eriogu huhampri kante'naze. ¹⁵Mika zupa kagra ama erizana kegva nehunka, anampinka eri'zana enerisankeno nena'a fore hanige'za vahe'mo'za kegahze. ¹⁶Kagrama kavukvama nehanazana kegvanegrinka, rempima vahema hunezmuna kenena kegva nehunka, maka zupa anazanke hunka nevanankeno'a, Anumzamokagrira kagunevazino, keka'a antahinamokizmia zmagu'vazigahie.

Kento a'nemofu naneke

5 ¹Ranra vahekura rankea huontenka, negafanku'ma nehanaza hunka fru kefinti antahigo, hanki kahefa vahera negfuma huntenu nehanaza hunka azeri so'e nehunka, ²ranra a'nea negrerama huntenu kna huntenu, kahefa a'nea, negasaroma huntenuknana hunka knare antahintahifi fatgo kazigati kva huzmanto.

³Mago kva krintega vahe'ma omni'nesia kento a'nea, kva krizamanteho. ⁴Hu'neanagi mago kento a'ma mofavre'afi, negehoma maninesuno'a esera zamagra rempi hu'za mono'mo hu'nea kante nozamifi zamarera zamafaza kva krizmantenaza nona hu'za kva huzmanteho, Anumzamofona e'inahu zanku ave'nesie. ⁵Ana hianagi agraku nemnesia kento a'mo, Anumzante amentinti nehuno hanine zgene nunamuna huno Anumzana antahigegahie. ⁶Hu'neanagi mago kento a'mo agri'ma avonesia zankuke agha nentahimo'a, kahefa mani'neanagi avamupina ko fri'ne. ⁷Vahe tmina ama naneke zamasmige'za avaririho, e'ina hananke'za mago'amo'za

ke huzmante kanku hakegahaze. ⁸Hianagi mago'mo kora fatgo'a zamazeri so'e osuno, naga'a zamazeri so'e osnimo'a, amentintimo'a amne zankna hanigeno, zamentinti nosnaza vahera zamagtereno haviza hugahie.

⁹Hanki kento a'nea zamazama hunaku zamagima kresafina 60ti'a zge kafuma huno, nevente mani fatgo hu'nesia kento a' aza hugahaze. ¹⁰Ana kentomo knare avu'ava nehiaza negesageno, mofavre zga'a negrino, aru vahe agampu nehuno, mono kva vahe zamaga sese nehuno, knafi mani'nesaza vahe zamaza nehuno, ana eri'zama'a arimpa amino knare huno erigahie. ¹¹Hu'neanagi kahefa kento a'nea zamaza hunaku zamagima kresafina onkreho, na'ankure zamesi'zamo zamazu hanige'za Kraisiimpi hanaveti'za nemniza'za atre'za ve erigahaze. ¹²Ko'ma huvempa hu'naza kea anama hazazamo rufu'tagige'za, kea eri'za zamufafi eme nentaze. ¹³Eri'za e'ori amne mani'neza, ru nOMPI ru nOMPI mrreritere nehu'za, nosuna naneke nehu'za, rumofo nanekere zamefiga'a ke hu'za vano nehu'za, osuga naneke nehaze. ¹⁴Nagrama nagesa nentahuana, kahefa kento a'nemo'za ve eri'za mofavre nente'za, no zamia kegva nehnage'za, huhavi'za huzmanteku hanaza vahe'mo'za kegura hakregahaze. ¹⁵Na'ankure mago'amo'za hago kana atre'za Sata nevririze. ¹⁶Hagi mago amentinti nehnia a'mo naga'afi kento a'nema mani'nesazana, agra knare'za huno ana a'neramina zamaza hanigeno'a, mono vahera kna eri ozamisageno, zamagra'zmi zamaza huga osune'naza kento a'nea, mono vahe'mo'za zamaza hugahaze.

Elda kva vahe'mokizmi naneke

¹⁷Elda vahera, Anumzamofu eri'zante kvagri so'e nehza vahera, zamagi erisaga nehuta antegna huta zamiho (dabol ona), e'ima hanaveti'za mono ke nehu'za, rempima hunezmi'za vahera zamaza hugahaze. ¹⁸E'i ana kante mono avo tafe'mo amanage hu'ne, ***Bulimakamo witi rga refuzafupeno anoma'a neharesigenka, zamagitera nofira ana'okiho.*** (Diu-Kas 25:4) Anazanke huno eri'zama erisia nona'a mizama'a erigahie. (Luk 10:7)

¹⁹Elda ne'ku rumo'za kna ami ke huntesa kea ontahio, hianagi tagufa vahe'mo'o, tare vahe'mo'ma huramage hanigenka ana nanekea antahio. ²⁰Hanki kumi'ma nehza kva vahera, hakare vahe zamufi zamazeri fatgo nehuge'za, maka vahe'mo'za nege'za, kumi' huzankura kore hugahaze. ²¹Anumzamofu avufine, Kraisi Jisasi avufine, huhampri zamante'nea ankeru vahe'zmufi kasamuanki, ama nanekea amage' antenka vahera refko osunka, mago zanke hunka zamesi zamanto. ²²Ame'ama hunka kzana mago vahetera antenka mono eri'za erisie hunka azeri o'otio. Mago'a vahe'mo'za kumi' hanafina kagra ana kumi'zampintira kagra manigru hunka manio.

²³Tinkera onenka, osi'a waini tina nenegeni krimpamofona kza hino, na'ankure hakare zupa krima enerinkure.

²⁴Mago'a vahe'mofo kumi'mo'a amate me'ne, kegaga hunte knare koteno vugahie. Hanki mago'amokizmi kumi'moa frakino me'neankino henka efore hugahie. ²⁵Anahu kante, hakare vahe'mokizmi knare zamuzmamo'a amate me'ne. E'ina higeno mago'a vahe'mofo knare zamuzmamo'a oku'a me'neankino, henka'a efore hugahie.

Mono ke hanaza vahe'mo'za amage' ante'snaza naneke

6 ¹Hakare mono nentahi'za zgo e'ori kazokzo eri'za enerimo'za kva vahezmi'a razampi antahinezmisage'za, nege'za Anumzamofogagi'ane, tagrama knare kema nezmasmuna kea huhaviza osugahaze. ²Iza'o amentintima nehnia ne'mo kva'a mani'nesigeno'a, kea ruha'ontagino, na'ankure zamagra neramafuze. Hianagi hakare zupa knare hu'za eriza'zmia eriho, na'ankure e'ima e'nerina eri'zana amentinti nehigeta tvesi'nentona kva ne'mo azahuzana erigahie. Ama'i naneke rempi hunezminka zamasmio.

³Hanki mago'a vahe'mo havige naneke nehnigeno, Ranti Jisas Kraisi nanekene, mago'zahu nosnigenka, e'inahu nanekemo'a knare Anumzamofogavua'ava enena trago'otene, ⁴agra agu'agesa eri antemrenerino mago'zana antahi ama nosie, hianagi agra mago arimpa osu nanekere agenoka nehuno, nanekegu ke hakare nehigeno, e'i anampintira efore hiana rumofo zanku kesane nehuno, fra nevzino, rimpa oti'oti nehinkeno, vahe'ku huhaviza hunenteno, vahe antahi haviza hunenteno, ⁵maka'zupa zamagu'amo knare osu'nea vahe ene fra nevziza, zamagu zamagesamo haviza hu'nea vahe'mo'za tamage kea nosaze. Zamagrama antahi'zana Anumzamofoganekefintira feno erisanti haregahune nehaze. ⁶Ana hu'neanagi Anumzamofogavua'ava nehu'za agzone hu'za mani'snamo'za, knare zantfa erigahaze. ⁷Ksema nerantageta ama mopafina mago'zana erita ome'none, hagi ama mopama atesuta mago'zana erita ovugahune. ⁸Hagi ne'zantine kukenatima me'nenigeta, e'i ana zankura agzone huta nemnita muse hanune. ⁹Ana hianagi feno vahe maniku hanaza vahe'mo'za, rezmatagafi evurami'za krifu aheaza hanageno, maka havi avua'vamofogamesi'zampi negi vahe kna nehu'za, zamazeri haviza huzante kezmasane hanageno, ana vahera zamahe haviza huno havi kampi zamareno uramigahie. ¹⁰Zgogu avesi avesihu avua'vamofogagafae. Mago'a vahe'mo'za zgogu nehakre'za zamentinti atre'za afete nevzageno, zamasuzamo mani'za zamifina agonazamo kota zmahea kna nehie.

¹¹Hu'neanagi havizampintira atrenka nefrenka, Anumzamofogavua'ava maninananki, fatgo zanke nehunka, Anumzamofogavua'ava nehunka, kmentinti nehunka, kvesi nezmantenka, hanavetinka nevunka fru hunka manio. ¹²Kmentintimofogahara knare ha' nehunka, kagima higenka manivava asimuma eri'nanana azeri hanavetio, hakare vahe

zamufi kagra ko huama hu'nane. ¹³Nagra Anumzamofu avufi negasmue, maka'zama asimu ami'nea ne'ene, Kraisi Jisasi tamage kema Pontias Pailoti avufima huama hu'negu, ¹⁴kagra ana kasegea eri haviza osunka kva hu'negeno, tagri Rantimo Jisas Kraisi efore hino. ¹⁵Agra knama ante'nere fatgo huno egahie, Agrake asomu'ane vugota hu'nea kva ne'ma (sovereign) kinimo'kizmi Kinie, ra'mokizmi Rane, ¹⁶Agrake'za ofrino mani'vava hugahie, tusi'a msa'afi mani'neankiza vahe'mo'za urva'o osugahaze. Mago'mo'e huno onke'neanki'za onkegahaze. Agripi Ra agine, hanave'anena mevava hugahie. Tmage.

¹⁷Ama mopafi feno vahe mani'naza vahera huzamasmige'za, ana fenozantera zamufa ra osu'za, ana fenozantera zamentinti osiho, hianagi Anumzamofonte zamentinti hiho, Agrama maka'zama tmigeta eneruna'zanku huta muse hugahune. ¹⁸Zamagrira huzamasmige'za knare'za nehu'za, knare eri'zamo feno zamigna hanige'za, upama hu'nesaza vahe zamaza hu'zanku nentahi'za, feno zamia retro hiho, ¹⁹E'inama hanu'za, zamagra henka'a esnia knafima erisnaza zamofu agafa'a knare hu'za eri atru nehu'za, ana hu'za azerisaza zanteti tamage mani'zana erigahaze.

²⁰Timotiga, Anumzamo antahi kamino kmi'nea erizantera kvagri fatgo huo, avufa'a omne'nea nanekegu hafra hugante'nazana, kamefi hunezminka havigema hanaza vahera antahi'ozamio. ²¹Ana nehu'za mago'amo'za zamentintia atre'za ru'are vu'naze. Anumzamofu asunku'zamo kagrane mesie.

Poli'a Timoti Anante (2)

Avonkremin'nea Naneke

Musenke

1 ¹Nagra Poli'na, Kraisi Jisasi aposol ne'mo'na Anumzamo Agra avesite huhamprinanteno knare mni'zana Kraisi Jisasi huhamprine. ²Timotiga navesinegantoa mofavre nimoka, asuragiganteno asunku'zane arimpa fruzana Anumza nerfantegati ene Kraisi Jisasi Ranti'mo'a kza huno kamigahie.

Timoti musenke hunteno azeri hanaveti'nea naneke

³Nagra Anumzamofu muse hunentoe, nagehe'za hu'nazankna hu'na, erizama'a knare nagu nagesareti kinagane nanterane hakare zupa nunamuma hufina kagrikura antahi negamue. ⁴Kavunu herfi'nana zanku nentahi'na mago kna kagesua nagesa nentahue. Anama hanugeno nagrira muse zamo'a avitegahie. ⁵Nagra antahi'noe kagra kagu'areti kmentintia nehane, kota'zana negageho Lois ene negrera Yunesi'ke znantentintia hunana kna huno kagripina kmentintia me'ne hu'na nentahue. ⁶E'izanku Anumzamofu musezama (gift) kagu'afima kami'neana hugre kru huo, nazama kavufgare nentogeno, kami'nea zanku hugagesa nehue. ⁷Na'ankure Anumzamo'a kore huno fraki Avamura ontami'ne. Hianagi hanave'ane, avesiene, avufga antermino kentahi avamu tmi'ne.

⁸Hu'negu Rantimofu naneke huama hu'zantera kagzegura osuo, nagrama Agri kinama hu'nogura kagazea osuo. Hagi nagrane tragotenka knazana knare musenkerera (gospel) Anumzamofu hanavefi erio.

⁹Kefo zantifinti tza huno tvareno ruotge kezampinti tagihu'ne. Mago knare eriza eri'nona zanteku anara osu'ne, hagi Agra agafa'a me'negu huno asunku'zanteti Kraisi Jisasi ofenka'ati tza hu'neazamo mevava nehie. ¹⁰Hianagi menia tzahu ne' Kraisi Jisasi eriana nehuno, fri'zana eri netreno, tasimu neramino ofri manivava mani'zana knare musenkeafi (gospel) eriana nehie. ¹¹Ananku huno Anumzamo'a huhamprinantenege'na ke'a huama nehuna, aposol eri'zana e'nerina,

vahera knare musenkea rempia hunezmue. ¹²Na'ankure e'ina nehua agafare natazana e'nerue. Hianagi nagazema hu'zamo'a nazeri otregahie. Na'ankure nagra izantero namentintima nehumofona antahi'na kena nehuna, eri'zama'a erinentoana, Agra antahineankino kva kri ante'nenkeno ana kna efore hugahie. ¹³Nagripinti knare nanekema azerinana kea azeri hanavetio, kmentinti hu'zampino, avesi'zana, e'i Krai Jisasimpi me'ne. ¹⁴Ruotge Avamu'ma tagu'afi maninemo kza nehanigenka, antahi kamino kami'nea kmentinti'a kegva huo.

¹⁵Kagra antahi'nane maka Esia kaziga mani'naza vahe'mo'za natre'za uvu evuma hu'nazana, ana agu'afina Figelusi ene Hemogenesi'ke natrena'e. ¹⁶Nagrama seni nofite kina nompima mani'nogeno, agazegu osuno nazama hu'nerera, Onesiforusi nagara Ra Anumzamo asuntgi anteno aza hanie. ¹⁷Hianagi Romu kumate emani'nenon nagriku avune anteno hakreno ne-eno eme nage forehu'ne. ¹⁸Onesiforusina anama hu'nerera, Kraisi'ma esnia zupa Ra Anumzamo asuntaginteno aza hanie. Hanki nama'a zupo agra nazama hiana, Efesasi kumatera kagra ke'nane.

Timoti hanavetino knazampi manisia naneke

2 ¹Timotiga navesinegantoa ne'nimoka, Krai Jisasimpi hagerfino asunkuma hunegantegu hunka hanavetinka manio. ²Kagra nentahinke'na maka vahe zamufi huzmasmino'a kema amage nentaza vahera huzamasmige'za, zamagra anazanke hu'za ruga'a vahera rempi huzamiho. ³Kagra nagrama enerua kna kataza enerinka, Krai Jisasi knare sondia vahe'agna huo. ⁴Kraisi sondia ne'mo'a mopafi mani'zampina uvazi evazia nosie. Na'ankure huhampri ante'no sondia eri'za ami'nea ne' azeri muse hugahie. ⁵Ana zanke huno mago ne'mo zokagopi taragino nevuno, kasege amage' ontesimo'a muse'zana kini fetorira e'origahie. ⁶Hanavetino hoza enerisia ne'mo hoza'afi fore hania ne'zana ese'zana erino negahie. ⁷Negasmua naneke antahi ani' huo, Ra Anumzamo ana kemofa agafa'a hunegasmina, hakare zana antahigahane.

⁸Jisas Kraisinku kagesa are'are huo, fripinti eteno oti'ne, Daviti negeho'e, knare musenke (gospol) huama nehue. ⁹Na'ankure nagra ana zanteku hu'na knazana eneri'na hazenke vahe kna hu'na kina nehue. Hu'neanagi Anumzamofa nanekemo'a kina osugahie. ¹⁰Na'ankure ana agafare maka vahe'mo'za knare hanazegu kna zampina mase'na oti'na nehue. Ana hanuge'za hamprima zamante'nea nagamo'za Krai Jisasi'a zamaresige'za manivava konariri msa'a (glori) erigahaze. ¹¹Ama'i tamage naneke, Jisasi'ene fri'nomota, agrane ksefa huta manigahune. ¹²Knazama hanavetita mani'neta tagrama erisunana, henka'a Agrane kini kva vahe tro huta manigahune. Agriku ontahi'none huta tagrama hanunkeno'a, tagrikura ontamage'noe huno Agra nena hugahie. ¹³Tagra tamentintia nosunanagi, Agra ke'a ruotagregahie, na'ankure Agra havigea osugahie.

Havi naneke hunezmasmiza vahe zamazeri fatgo hania naneke

¹⁴Maka vahera huzmagesa huge'za ama ana nanekea antahiho. Kazigazi hunka Anumzamofu avufina zamazeri atru nehuge'za, ana nanekegura ke hakare osu'za fra ovaziho. Fra nevazisage'za antahisaza vahe'mokizmia zamazeri havia hugahie. ¹⁵Eri'zanka'a kazigzi hunka e'nerigeno, Anumzamofu negageno erizanka'agu muse hunegantena, kagazegura osugahane. Ana nehinkenka tamage naneke'a hufatgo hunka huama hugahane.

¹⁶Hianagi avufa'a omne mopafi zante hantaka hantoko naneke hanafina manigno, na'ankure ana zamo'a zamaza osnige'za havi anumzamofu avu'ava hugahaze. ¹⁷Ana naneke zamimo'a zamufgafi (gengrin, kensa), fugo namumo tera huno via kna nehie. Ana nanekema nehaza vahe'pina, tare netre mokizni znagi'a Himenasi'ene Filetusike, ¹⁸tamage naneke atre'ne hzagrena'a netremoke fri'zanzpinti oti'zana hago fore hu'ne nehune, mago'a zamentintine vahera zamarimpa kna erinezmi'e. ¹⁹Ana hu'neanagi Anumzamofu nanekemo avempa huno arafuna reno me'ne, azanko avo (seal) me'negeno amanage huno kre'ne, Ra Anumzamofu nagare hu'za mani'naza vahera zamantahino keno hu'ne. Maka agi hanta nevaziza Ra Anumzane nehaza vahe'mo'za kefo mani'zampina maniagetagi'za maniho.

²⁰Menia mago ra nompina kolire ene silivareke tro hu'naza tinkvogera omne'ne, hagi mago'a zafare ene mopare trohu'naza tinkvone me'ne, mago'a kavomo'a ra agi amigahie. Hanki mago'a kavomo'a, ra agi'a omigahie.

²¹Hu'negu, mago'mo ana kefo zanzpinti agu'a sese hanimo'a, ra agi ami' tintafe kna hugahie. Zamazeri otage hanige'za, ozafa zamimofu eri'zampina knare hu'za eriga nehu'za, maka knare eri'zama erisagu zamu ante'za manigahaze. ²²Menia kahefa vahe'mo'za kefo avu'avazanku zamagesa nentahizankna osunka atrenka fro, fatgo zamofu nevaririnka, kmentinti nehunka, vaheku kvesinezmantenka fru hunka manio. Iza'o fatgo huno nemnino, Ra Anumzamofu agihanta nevzisia vahe'ene manio. ²³Hu'neanagi negi neno antahi'za omne vahe knara osuo, antahi sankeno'ma hafra huga hu'nesia kegura kamefi humio. ²⁴Ra Anumzamofu vahemo'za kefra ovazi snaze, hianagi vahera zamesi nezmante'za, rempi hunezmi'za, hazenke huzmante'saza vahe enena agzone hu'za maniho, ²⁵Fru huta fru kefinti ke hakare hurmantesamokizmia zamazeri fatgo hiho. E'ina hanageno ana ke ontahisaza vahera Anumzamofu zamaza hina, zamagu'a rukrahe nehu'za tamage kea antahi'za keza hugahaze. ²⁶Anahina zamagu'a ante fatgo nehu'za, Sata kifopima ahe'nazana katufegahaze. Sata'a kina huzmante'nege'za avesizama nevaririza zanzpintira atre'za vugahaze.

Mona Mopa vgaresia knafi fore hania kna'zamofu naneke

3 ¹Hianagi kagra Timotiga antahi ani' huo, mona mopa vgaresia knama upa'ma hanigeno'a, tusi'a knaza fore hugahie. ²Na'ankure

ana knama fore hanige'za, vahe'mo'za zamagraguke zamagesa nentahi'za, zgogu zamesinente'za, zamagra zamufga ra nehu'za, vahe zamage henkami netre'za, urinkege nehu'za, zamarera zamafa naneke erizafa osu'za, vahera muse kea huozmante'za, agru hu'za omnigahaze. ³Vaheku zamasunku osu'za, mago zamarimpa hu'za eri fatgo osu'za, vahe zamarimpa nere'za, vahe zamefiga'a ke nehu'za, manirva ohe'za, vahe zamata zamizanku'ke nehu'za, knare'zama hu'zankura zameosigahie. ⁴Komoru (betray) hunezmante'za, vaheku antahiozmi'za, osu'naza zante havige hu'za zmavufga ra nehu'za, mopafi mani'zante zamesinente'za, Anumzama avesi antega kana atregahaze. ⁵Zamagra Anumzamofomo avu'avara amega zamufareti nehu'za, zamagra tusi'a hanave Anumzamofompi me'neana zamefi hunemize. E'inama nehaza vahera nezmatrenka mani rure hunka manio. ⁶Na'ankure amu'no zamifina mago'a vahe'mo'za vahe nOMPI antagrige antagrige hu'za mreneri'za, zamagu'amo hanave otigeno kumipi kna zamisige'za mani'naza a'nemokizmi, kereti zamazeri havia hazage'za, naneke'zmi erizafa nehu'za zamavemanesia zante hakare'a havizana erifore nehaze. ⁷Mika'zupa ana a'nea rempi huzamige'za netahizanagi, tamage nanekea antahi ama nosaze. ⁸Janesi'ene Jambresikea korapara Mosesena ke ha'rentena'e, ana zanke hu'za rempi huzmi vahe'mo'za ke tamagemofona ha'renentaze. Antahintahi zamimo'a savri hige'za, zamentintimo'a haviza hu'ne. ⁹Hu'neanagi zamagra magore hu'za tagateoregahaze. Maka vahe'mo'za kesazana antahintahi'zamimo'a neginagi hu'naze. Janesi'ene Jambresike negi nena'a kna hugahaze.

¹⁰Timotiga rempi hunezmua kere nevaririne, nagri mani'zane, mago'za hunaku nagesa antahuane, namentinti huane, kfeffa osu'na ako nehena, navesi nezmante'na, knafi nemni'na anazanku osu kazigzi nehua zante nevaririne. ¹¹Nazanva ante'za nahe'zanasuza nehu'za, nataza nenami'za neganke'za Antioku kumate'ma hu'nazana, Ikonium kumate ene Listra kumate enema, nazanva hu'za nahe'za nasu'za nehzage'na kna zampina mse'na oti'na nehue. Ana hzanagi ana miko zampintira Ra Anumzamo nahokeheno nazeri natre'ne! ¹²Tamage, aza'o Krai Jisasimpi hagerfino Anumzamofomo avu'avate mani'naku hanimofona, vahe'mo'za knara zamante'za zamazeri haviza hugahaze. ¹³Hianagi havi vahe'mo'zane krunage nehza vahemo'zanena, haviza nehaza zampintira agtere'za tusi'a havizampi ufregahaze. Vahe'ma rezmatga nehza'zantera, ana zanke hu'za zamagri'enena rezmatga hugahaze. ¹⁴Ana hugahzanagi kagra, kazigzi hunka ko'ma rempima hunka antahinana kea azeri hanavetio. tagrama rempima hugami'nonazana kagra antahinka kenka hu'nane. ¹⁵Osi'moka otage avon tafepima me'nea nanekea antahime enka e'nane, e'i ana nanekemo knare kagukagesa negamina kmentinti nehunka, Krai Jisasipinti kahokeno kagu'vazizana erigahane. ¹⁶Anumzamo

huzamasmige'za maka ruotage avontafepi me'nea nanekea kre'nazankino, huzmi'sanana knare azahuzana me'neankino zamazeri fatgo nehuno, kazaki'zana eri fatgo nehuno, huzmeri hanige'za fatgo avu'ava hu'zankuke zamagesa antahigahaze. ¹⁷Na'ankure Anumzamofu vahe'mo'za atupa'ma hu'zankura ana nanekemo vite'zmante'nea, maka knare'za zamia erigahaze.

Poli'a Timotina antahi amino erizanke asmi'nea naneke

4 ¹Timotiga Anumzamofu avufine, Kraisi Jisasima kasefa huza mani'naza vahe'ene, fri' vahe'ene refko huzmantesia ne'mofu avufi, Agra'ama eama nehinkeno, Agri'a mona kumamo efore hania knagura, ²knare nanekea huzamasmio, kva hu'nenka kna'arero amne knarero, havi knarera zamazeri fatgo nehunka, hazenke hanazana, hanave kefinti zamazeri fatgo nehunka, kzone kefinti zamazeri fru nehunka, kavesra osunka kazigzi hunka knare naneke huama huo. ³Na'ankure mago knama enke'za vahe'mo'za knare kema antahizankura zamesra nehu'za, zamagra zamesiza nevariri'za zamesisia nanekema hanaza vahe zamage antegahaze. ⁴Tamage kea zamesra hunente'za agafa'a omne kere zamagu'a ante'za zamavririgahaze. ⁵Hu'neanagi kagra knare antahintahi e'nerinka, maka knaza fore hanifina katazana e'nerinka, kazigzi hunka Kraisintega vahera zamare anto, Anumzamofu eri'zama kami'nea erizana erivgaro.

⁶Na'ankure nagrira hago kofta knafi, waini ti ofa hazankna hu'za korani'a eri tagi atregahaze. Nagrama vanua knani'mo'a hago atupa nehie. ⁷Nagra namentinti'a azeri hanavetina mani'nea, knare ha' hu'na nagiamu re'na e'noana hago ehnatue. ⁸Henka tagenoka hania zupa, fatgo avu'avazamofu kini fetori antani nantesiana antenante'ne. E'i Ra Anumzamofu fatgo huno naneke fgagohu ne'mo, ana knama ehntasia zupa namigahie, nagrikera onmigahie. Hagi maka veama avesi nente'za eama hanigu Agri avegamanentaza nagamozane erigahaze.

Timotima, Polinte'ma esiazamofu naneke

⁹Nagrama mni'norega ame'hunka esnanegu nentahue. ¹⁰Na'ankure Demasi'a, ama mopafi zanku avenesigeno, nagrira natreno Tesalonaika kumate vu'ne. Kreseni'a Galesia kumate vigeno, Taitusi'a Dalmatia kumatega vu'ne. ¹¹Luku agrake nagranena mani'ne. Makina esnunka avrenka eno, nagri'ma naza hunoma eri'za erisigu egahie. ¹²Hianagi Tikikusina nagra huntogeno Efesasi kumatega vu'ne. ¹³Hanki Timotiga ne-enka anakre ku'nia Troas kumate Kapusi nompia atre'na e'noana e'nerinka, mago'a avontafe'ene, zgagfa akrute kre'naza avontafe ante'noane erinka eno. ¹⁴Alexandama kopama kreno tuzampaza tro nehia ne'mo'a, tusiza huno natazana nami'ne. Ra Anumzamofu anazantera

nona'a hunteghahie. ¹⁵Kagra ana ne'kura kvagrio, na'ankure agra hanavetino huama nehuna kerera hara renerante. ¹⁶Hianagi ese'ma nanekefima otuge'za magomo'e huno navega osu'ne, natre'za vu'za e'za hu'naze, ana zankure huno Agra nona'a huozmantesie. ¹⁷Hianagi Ra Anumzamo onatreno nagrane mani'nenon hanave nami'ne, ana higeno nagrama nehua nanekemo'a ama hnige'za, maka zamufga tga osu vahe'mo'za antahigahaze. Ananku huno nagrira nahoke aheno laionimofo agipintira navzu hutre'ne. ¹⁸Ra Anumzamo maka havizampinti nahoke heno nenavreno, Agra nemnia kumate monafinka kva hunanteno navreno vugahie. Agra konariri nentake msa'afi nemnimofo agi'a maka zupa hentesga huvava hanune. Tmage.

¹⁹Prisilane Akuila kizniregane, Onesiforus nompi nemniza nagategane musenke vie. ²⁰Erastusi'a Korinti kumate manige'na, Trofiasi'a kri erige'na Maeletus kumate nagra atre'na e'noe. ²¹Kafegfa hunka zasi ikana ohnati'nesigenka eno. Ebulusi'a musenke atregante, anazanke huno Pudensi'ene, Linusi'ma, Klaudia'ma, maka tafuhe'zane, tsarahe'zane muse ke atregantaze. ²²Ra Anumzamo kagri avamu'ene manisie. Asunku'zamo'a kagrane mesie.

Poli'a Taitusi

Avonkremin'nea Naneke

Musenke

1 ¹Anumzamofu eri'zampi nagra Poli'na kina hu'nena, Jisas Kraisi aposol ne'mo'na, Anumzamo huhampri zamante'nea vahe zamentinti zamazeri hampo'na nehanuge'za tamage antahi'zamofu amage'nente'za, anumzamofu (godly) avu'avapi fatgo hu'za mani'nesageno, ²manivava asimu fore hanigu tamentinti nehuta avega antesune. Havige osu Anumzamo ama mopa fore osu'negeno, korapa huvempa hunte'neane. ³Hianagi Agra hunte'nea kna efore higeno, ke'amo eama higeno, mono ke hu'zana nagri hunantege'na, Anumza Tzahu ne'mofu (Savior) kasege'afi nehue.

⁴Taitusiga tamage mofavre'nimoka, mago'ke tamentinti nehu'a ne'mokarega ama avona kre negamue,

Arimpa fruzane, asunku'zanena, Anumza Nerfantegati ene, Kraisi Jisasi tazahunu taguvazi ne'mo'a asunkuzama'aretira karimpa frua kamigahie.

Taitusiga Kritima eri'za erisana naneke

⁵Nagrama Kritima katre'na vu'noana amanahure, kagra inazama vgaore'nesia zana eri fatgo hunka, mono nonte vugota vahera (elda) magoke magoke kumate nagrama kasamisure zamazeri otitere huo.

⁶Hanki mono kva vahe'ma zamazeri otisunka, hazenke'a omane, magoke a' ante'nesia vahe, mofavre zga'amo zamentinti nehina, ke amge'a nentesageno, mofavre zga'agu hazenke nehaze huza nosnia vahe azeri otio. ⁷E'igu mono kva vahera hazenke'a omneno, na'ankure Anumzamofu eri'zante kegva hugahie. Agra'a avesi'za ovaririno, ame huno rimpa aka oheno, aka tinte negia oneno, ke hakare osuno, havi kanteti feno e'norisia vahe azeri otigahane. ⁸Hu'neanagi vaheku vhaku'ma nehuno, knare'zanku avenesino, agra'a mani'za kegva nehuno, fatgo avu'ava nehuno, mani otge nehuno, ke amage' nenteno, ⁹tamage kema husmi'naza kere amentinti nehuno, agra mago'amokizmia so'e ke nezmasmino, huhaviza hanamokizmi'a zamazeri fatgo nehuno, zamaverihugahie.

¹⁰Na'ankure maka vahe'mo'za vugote'naza vahe kea ha' renente'za, rumokizmigu krunage nehu'za rezmatga nehzana Jiu nagama vene'ne zamufa tga nehaza naga'ene tragote'naza vahe'mo'za anara nehaze. ¹¹Zamasminke'za zamagira hamunki'za maniho, na'ankure zamagra maka famo, tramena havi kefinti huzmasmi'za tamage kefintira, zamazeri havi kampi nezmataze. Zamagra zgo erinaku ana nehaze. ¹²Mago Kriti ne' amu'no zamafi korapa kasnampa ne' (profet) mani'nea ne'mo, zamagriku amanage hu'ne, Kriti vahe'mo'za maka zupa havigege nehu'za afi' zgagfagna hu'za mani'naze. Feru vahe mani'ne'za, zamagra zamarimpa eri avite zanku'ke nehaze. ¹³Ama kea tamage naneke, hu'negu hampo'na kefinti huge'za, zamentintifina fatgo huza mani'ne'za, ¹⁴Jiu vahe'mokizmi kanihe kere'ene, kase ke zamirera, tamagesa antahiozmiho zamagra tamage kea zamefi humi'za novaririze. ¹⁵Tamage, hakare veamo'za avusesema hu'nenageno'a hakare zamo'a avusese hu'ne. Hianagi zamentinti osu namokizmi'a, mago zamo'a avusese osu'ne. Tmage zamagu zamagesamo ene antahintahi zamimo'a haviza hu'ne. ¹⁶Zamagra Anumzamofona antahita keta hu'none hu'za zamagitetira nehaze. Hu'nazanagi, mani'zazmifina zamagra zamefi Agrira hunemize. Zamuzma antaza zamo'a kasri'ne, kea amage' onte'za, mago knare'za hugara osu'naze.

Knare avu'avapi rempi huzmisia naneke

2 ¹Hianagi kagrama rempi huzmisanana, tamage kema hu'nesia ke'age (doctrine) huzamasmio. ²Ranra venenea rempi huzamige'za, fru kefinti kea antemse'za ranke osu'za, knare zmavuzmava nehu'za, knare zamagu'zamagesa antahiho. Hankave zamentinti nehu'za vaheku zamesi nezmante'za, kragogo onkiza hanaveti'za maniho.

³Ana zanke hunka ranra a'ne rempi huzamige'za, mikaza hanafina Anumzamofa agorga mani'ne'za, vahe agenke osu' aka timo'a zamazeri havia osnige'za knare'za rempi huzamiho. ⁴Ana nehu'za zamagra zahufa a'ne nagara zamumro antesage'za, ve' zmine, mofavre zaminena zamesi zmantegahaze. ⁵Knare zamagu'zamagesa nentahiza avusese hu'za mani'ne'za, vaheku vhaku nehu'za, nezme agorga'a mani'nesage'za nege'za Anumzamofa nanekea huhaviza osugahaze.

Nehzave'mokizmi naneke

⁶Anahu kna hunka nehazave nagara zamumro antege'za, kegva hu'za maniho. ⁷Hakare'zama hanampina knare avu'ava huzamio. Huzameri hanampina zokago vakago osunka tamage ke'age nehunka, ⁸tamage ke'age huzamasmigeno mago'mo'a huhaviza huoganteno. E'ina hanankeno aza'o huhaviza hugantesimo'a agzegu hugahie. Na'ankure zamagra havigema hurante zankura hakregahaze.

⁹Kazokzo eri'za vahera rempi huzamige'za mika'zama hanafina kva vahe'mokizmi zamagorga mani'ne'za zamazeri muse nehu'za, ke nona'a huozmante'za, ¹⁰mago'zazamia kumzana oseho. Hagi eri'zana antahizami'are erifatgo nehnageno, e'i anazamo Anumza tzahu ne'mofo mani'za huzmerisage'za nege'za, mono nontahisaza kva vahe'mozane, megi'a vahe'mo'za zamagu'a rukrahe hugahaze.

¹¹Hu'neanagi Anumzamofa asunku zamo vahe'avare'zana hakare vahete erino efore hu'ne. ¹²Tagri rempi huramino mono ontahi avu'avazane, ama mopafi zanku avesi'zanena atreho nehuno, hagi tmufa kva huta, fatgo huta anumza (godly) avu'avate ama kna'afina maniho, ¹³ana knama esigu avega anteneta muse nehune, tusi'a msa'afi efore hanigu, Ra Anumzantima, Tzahu ne' Kraisi Jisasi esigu avega ante'none. ¹⁴Tagriku huno Agra'a avufga atreno kefo'zampinti miza seranteno tvare atre'ne, Agri'a vahere huno sese huranteno, tvare Agrarega tante'negu, muse nehuta knare'zanke hanune.

¹⁵Mika'zana kagripi hampo'na huno me'neanki rempi hunezminka, hampo'na tinka nezmasminka, zamazeri fatgo nehuge'za, kagrikura amne vahere hu'za osiho.

Monopi omani vahe'mokizmi zamerisana avu'avamofa naneke

3 ¹Kagra vahera huzmageza huge'za, ugagota huno kva hu'nesia nero, kamanifi agi me'nesia ne'mo hania kea amage' ante'za mani'ne'za, knare'zama hu'zanku trohu'za maka'zupa maniho. ²Zamagra mago mofonkura amefiga'a kea huonte'za, agazone zampi nemni'za, zamarimpa fru hu'za mani'ne'za, maka vahera agazone huzmanteho,

³Korapara mago'a knafina tagra'neana, haviza huta knare osuta negi neneta, ke ru hanentagita, havige reravatga hzageta, kefo zamofa avu'avapi kina hu'neta, vahe'mofo zanku kersane nehuta, vahe antahi haviza hunezmanteta, tagrati antahi haviza ohu ahu hu'none. Vahe zamatagri naneke nehunkeno,

⁴Anumzama, tagri Tzahu ne'mofo Agri'a knare muse'zane, avesi'zanemo eama hu'ne. ⁵Agrama tza hu'neana, knare fatgozama hu'na zankure huno tza osu'ne, hanki Agra'a asunku huranteno tza hu'ne. Agrama tza hu'neana sese huranteno, tazeri ksefa mofavre seranteno Ruotge Avamuteti tazeri ksefa hu'ne. ⁶Anama hu'neana Jisasi Kraisi tzahu ne', Agripi Avamura azeri usasi okino tagi tregeno e'ne. ⁷Hu'neankita tahokeheno asunku zama'areti, kumpinti tazeri fatgo hu'negu huhamprima tantegeta avegama ante'nona mani'vava mani'zana erigahune. ⁸Ama'na nanekea antahi ankerenka, antahi ani' hanana naneke nehue. Hagi amama ksami'nua nanekea kagra hanavetinka vahera zamasmige'za, Anumzamofonte zamagu'a nentesamo'za kva hu'ne'za knare zanke'za hugahaze. Ama zamo'a knare'za fore nehuno, vahera zamaza hugahie.

⁹Hu'neanagi, antahi'za omne vahe kna hunka havi kegura fra vazige, korapa zamagehe'za forehu anante anante hu'za e'naza vahe zamagireku ene Juda vahe kase kegura fra ovazio. Na'ankure e'i anazamo'a mago knare'zana erifore osuno, haviza eri fore hugahie. ¹⁰Hanki tmazeri refko huku hnimofona pusante agesa eritenka, anante mago'ene avumro antegenoma kema ontahisigenka, anantera mago'zana osunka kmagena humio. ¹¹Kagra e'inahu vahera kumi' vahe mani'ne hunka antahinka kenka hugahane, agra'a kefoza hiazamo azeri haviza nehie.

Huvhare naneke

¹²Atemasimpi, Tikikusino hunte'sugenoma kagritega erizanka'a kza huku esnigenka, ame hunka nagritega Nikopolisi kumate eno, na'ankure zasi ko'ma atania knafina, ana kumate umaniku nagesa nentahue.

¹³Hanavetinka Zenasi ke refkohu (lawyer) ne'ene, Apolosi kiznia ka vu zaznifina znaza hugeke magozankura upara osi'o. ¹⁴Tagri vahe'mo'za knare'za hu'zanku zamagesa nentahi'za, mani'za zamifi atupa hu'ne'za zamaza hania zanku hanaveti'za eri fore nehu'za, ferura amnea omniho.

¹⁵Maka nagrane nemnimo'za musenke hurmantaze. Zamesima nerante'za, zamentinti nehza vahetega musenke vie. Anumzamofa asunku'zamo tamagra ne megahie. Tamage.

Poli'a Filimon

Avonkremin'nea Naneke

¹Nagra Poli'na, Kraisi Jisasi erizante kina hu'nomo'nane, nenafu Timoti'ene ama avona, Filimoniga magoka eri'za enerita tavesinegantona rone timokaregane, ²nersaro Apiane, magoka Anumzamofu eri'zama e'neruna ne' Arkipusine mono naga'ma, nonka'afima atruma nehaza nagamotaregane ama avona kreneramune.

³Anumza Nurfane Ranti Jisas Kraisi asunku'zamo'ene arimpa fruzamo'a tamagrane mesie.

Filimoni amentintizane avesinte avu'avazamofu naneke

⁴Mika zupa nunamuma hufina, kagriku'ma antahinegami'na, Anumzani'amofona susu hunentoe. ⁵Na'ankure mono naga'ma kavesinezmantenka, Ramofu Jisasinte'ma kamentintima nehana zamofu kea, nagra antahi'noe. ⁶Hagi nagrama nunamuma nehuana, kamentintima nehana zana kagrama tazeri hanavetikema nerasamina zamo'a, antahintahizanka'a erira nehina, Kraissimpima makamota asomu'ma me'neazana antahi ama hugahane. ⁷Hu'negu rama'a muse nehu'na hanave enerue, na'ankure kagra nerfuga mono nagamokizmi zamagu'a zamazeri hanavenetinkenka muse nehu'na fruhu'na nemanue.

Filimoni'a, Onesimusima avesintesiazanku hu'nea naneke

⁸E'ina hu'negu, nagrira Kraisi'a nazeri hanaveti'neankina hanave ke hu'na fatgoza huo hu'na hugantegaragi, ⁹Nagra Poli'na, Kraisi Jisasi erizante kina hu'noa ne'mona, navesigantoa kazigati, kazeri otike huna kantahinegoe. ¹⁰Kina nOMPI mani'nena azeri nenamofuza hu'noa mofavreni'a Onisimusinku, nagra kazeri otike hu'na kantahi'negoe. ¹¹Kotera kagri kavurera mago eri'za eriga osu'neanagi, menina kagrite'ene nagrite'enena, eri'zama'amo'a me'nea ne' efore nehie.

¹²Kagritega etena, Onisimusina tumoni'agna hu'nemofu nagra huntogeno nevie. ¹³Knare musenkegu'ma kina hu'na maninofi, kagri no erino manineno naza haniegu navenesie. ¹⁴Hianagi kagrama

ontahinesanke'nama, nagrama mago'zama huntesua zankura navenosie. Hagi nagra aza huo hanuazanku, aza hu'zankura navenosianki, kagraka'a kavesite aza huo.

¹⁵Na'ankure amana agafarepi Onisimusima osia knafima kagri'ma katreneana, ete avresankeno kagrane manivava haniegu anara hu'ne. ¹⁶Menina Onisusia mago'ane kazokzo eri'za nera omanine. Hianagi nagritera kazokzo eri'za vahera agatereno navesinentoa nenfu'e. Hu'neanagi menina kagritera amega tavufare'ene Ramofompina mago'ane mono nerafu manine ¹⁷Hagi naganema tragoteta eri'zama e'neru'a zanku'ma nentahisunka, nagri'ma nenavranaza hunka Onisimusina avro. ¹⁸Mago'za nehuno haviza hugantenesio, mago nofi hu'nesiana nagra miza hugahue. ¹⁹Poli'na Nagra'a nazanu ama avona krenegamue. Nagra nona hu'na mizana hugahue. Nagra kagu kamemofona kaza hunoanagi, kagra nofira hunantenane hu'na nosue. ²⁰Tamage nenfuga, Ramofompina knare hunantenka, Kraisimpina nagu'a nazeri kasefahu kea nasami'nanegu nehue.

²¹Nagra kantahi'negoazana, agaterenka hugahane hu'na antahinegamina, ama avona krenegamue.

²²Hagi anama nehanunka noma emasesuazana retro hunanto, na'ankure nagra amuha nehuankino, nunamu tamia Anumzamo'a antahino, kinafintira katufe natresagena vu'naku avegantoe.

Poli'ma musenke atrezamante'nea naneke

²³Kraisi Jisasi erizanku hu'za magoka kina hurante'naza ne'mo, Epafrasi'a musenkea atregante. ²⁴Anahukna hu'za magoka eri'za eneruna nagamo'zanena, Makima Aristakusima, Demasima, Luku'ma, musenkea atregantaze.

²⁵Ranti Jisasi Kraisi asunku'zamo'a tamagrane mesie.

Hibru Vahe

Avonkrezmi'nea Naneke

Anumzamo huvgare ke Nemofonku hu'nea neneke

- 1** ¹ Anumzamo'a korapara tagehe'mokizmia, kasnampa vahepi huvazino rama'a zupa ruzahu ruzahu kazigati kegaga huzami'ne. ² Hianagi menima vgare knafina Nemofompi huvazino keaga huramiana, e'i ana Mofavre'amofa azampinti ama mopa erifore hu'nemofa maka'zana erisinti harete'ne. ³ Ne'mofavre'amofompi Anumzamofa msazama'amo'a remsa nehigeno, Agrikna huno mani'neni, Agri'a hanave ke'areti maka'zana erigasefa huno nevuno, kumi'ma eri agruhu eri'zama eriteno, Marerisgahu Anumzamofa azantamaga kaziga monafinka mani'ne. ⁴ E'ina hu'negu ankerontamimofona zmagetereno rahi e'nerigeno, Anumzamo'ma Agima ami'nea agimo'a makamokizmia zmagaterene. ⁵ Na'ankure Anumzamo'a ina ankeronku huno, ***kagra Ne' Mofavreni'a manisnankena, menina, Nagra negafana manigahue?*** nehuno, ete mago'ane huno, ***Nagra negafana mani'nenugenka, Kagra Mofavreni'a manigahane?*** hu'ne. (Sam-Zga 2:7, 2 7:14, 1 Kro-Zam 17:13) ⁶ Hagi zage mofavre'ama avreno ama mopafima ne-eno'a, atrenkeno ana miko Anumzamofa ankeromo'za mono hunteho hu'ne. ⁷ Anumzamo'a ankerozga'agura huno, ***zamazeri zaho kna hugahue nehuno, eri'za vahe'agura zamazeri teve anefakna hugahue*** hu'ne. (Sam-Zga 104:4) ⁸ Hu'neanagi Ne' mofavre'agura huno, ***Anumzamoka, kinia mni'vava hugahane. Kagra ftago kavukavateti kinia maninka kegva hugahane.*** ⁹ ***Kagra fatgo zamofa avesinentenka kasegema rutagre avu'avazana kavesra hunentane. E'ina hu'negu Anumzamo'a kagri Anumzankino, magokama maninaza nagapinti kavreno musezamofa masave frenegante.*** (Sam-Zga 45:6,7) ¹⁰ ***Hagi Ramoka ese agafarera Kagra'a ama mopamofa trara tro nehunka, monafi me'nea zantamina Kagra'a kazampinti trohu'nane.*** ¹¹ ***Zamagra frigahazanangi, Kagra maninka nevananke'za,***

tavravemo atafareno havizahiankna mikamo'za hugahaze. ¹² *Kagra zamagrira harontafe eri ragazariankna hunezmantenanke'za, kukena hutreankna hugahazanagi, Kagra saganera osunka manivava hugahane.* (Sam-Zga 102:25-27)

¹³ Hianagi ina ankeronku Anumzamo'a huno, *kagra nazantamaga kaziga mani'negena ha' vaheka'a zamazeri kagra tra antaneno hu'ne?* (Sam-Zga 110:1) ¹⁴ Hagi ankeru vahera eri'za vahere, zamagra avamutaminkino Anumzamo'a zamahokeno zmavaresia vahete kegva huzamante'nigu huzmantege'za e'naze.

Anumzamo'ma tavreneana razane hu'nea naneke

2 ¹ Na'ankure e'ina agafare ko'ma antahi'nona kemofona antahini' nehuta atreta akoheta ogamu'a ovanune. ² Na'ankure Anumzamo ankeru vahepi huvazino nehia ke'mo'a, tamage huno efore nehie. Kasegema rutagrezane ke ontahizamofona, mizama'a me'ne hunesiana, ³ Anumzamo'ma tahoke'neazama tamagenama humisuta, tagra inankna huta rimpa hezana agateregahune? Ama ana tahoke'zana esetera Ramo hu'ama higeno, Agrite'ma zamentintima nehaza vahete amara higeta ke'none. ⁴ Anumzamo'a avamezampima, kaguvazampima, ruzahu ruzahu kaguvazampi huama nehuno, Avamumofu musezanena Agra'a avesite refko huno nezamie.

Anumzamo'ma tavre'neaza razana hu'nea naneke

⁵ Henkama esia mopaguma nehuna mopa, ankeru vahe'mo'za kva hiho huno huozamante'ne. ⁶ Hagi avontafepina anage hu'naze. *Vahera na'a mni'negenka kagra antahintahia hunemine? Vahe'mofo mofavregura antahinemine?* ⁷ *Kagra atupa knafi ankeru vahe'mokizmi zamagorga Agrira avrenentenka, msazanka'areti kini fetori antenentenka, husga hunentenka, makazama tro'ma huntanana zantera huntankeno kegva nehigenka, Kagra makazana Agri kvafi ante'nane.* ⁸ *Kagra maka'zana agri kvafi ante'nane.* Na'ankure mago'zamo'a agri kvafintira mani oganegahianki maka'zamo'a Agri kvafinke me'ne. Hianagi menima konana, maka'zamo'a Agri kvafina omanene. (Sam-Zga 8:4-6) ⁹ Osia knafi ankeru agorga azeri fenkate'nea nera tagra Jisasina kenone, menina azeri antesga huno msazama'areti kini fetori antente'ne. Hu'negu Anumzamo asuragirantenegu mikamotagu huno frizampina ufrene. ¹⁰ Ana miko'zana Anumzamofu zantami megeno, ana maka zantamina Agri'a hankavereti trohune. Hagi ana miko Anumzamofu mofavre nagara zamahokeno zamaza hanige'za masazama'afina manisazegu Anumzamo'a fatgo huno kumi'a omanenea Ne' Jisasina tamigeno atazana eri'ne.

¹¹ Na'ankure vahe'ma zamazeri agru hu'nemo'ene, agruma hu'naza nagamo'za, magoke ne'pinti fore hu'nazankino, nensaro nenafuo huno

huzankura agazea nosie. ¹²Agra anage hu'ne, ***Nagra nafuhemokizaminte kagia huama nehuna, ana miko vahe'ma atru hunesifi, zgamera huna kagika'a ahesaga hugahue.*** ¹³Mago'ane anage hu'ne, ***Nagra antahimina agripi namenantoe, Nagra Anumzamo'ma nami'nea mofavre zgane ama mani'noe*** hu'ne.

Jisasi'a tagri tazahuku fore hu'nea naneke

¹⁴Mofavre'mo'za zamavufgane korane mani'nagu, Agranena zamagrikna huno ama avufare eme frino, fri'zamofu hankavema sata'ma kinama hurante'nea hanavea azeri amnezankna hu'ne. ¹⁵Hagi fri'zamofu korozampima kazokzo eri'za vahekna hu'za kina hu'za mani'namokizmia kazufe zmantege'za fruhu'za mani'naze. ¹⁶Na'ankure Agra ankeru zmaza hu'nakura ome'neanki, Abrahamumpintima fore'ma hu'naza nagamokizmi zmaza hu'naku e'ne. ¹⁷E'ina hu'negu Agri'a nefune nesaroma hunentea avu'ava huno mika'zampina nehuno, Agra Anumzamofu avurera asuragiranteno ke'are oti fatgohu prisi ne' nemanino, vahe'mokizmia kumizmi nona huno magoke zupa apasezmante ne' mani'ne. ¹⁸Na'ankure Agra reheni kezampi ufreno ataza eri'nemo, tamarehe zampima unefrazamota tamaza hugahie.

Jisasi'a Mosesena agaterene hu'nea naneke

3 ¹E'ina hu'negu ruotage hu'naza mono nerafugata, tagrama huama nehuna Jisasinkura Aposol ne' mareri agaterenea prisi nere hutma antahi amiho. ²Mosesena tamage huno Anumzamo huhampri antegeni mika vahe'afi mani fatgo huno mni'neankna huno, huhampri ante'nemofonte Jisasi'a mani fatgo huno mani'ne. ³Hu'neanagi Jisasi'a Mosesena agatereno ra agi erigahie. Nomagi vahe'mo'zama noma ki'naza nomofoma agaterene'za ra zamagi enerizankna hugahie. ⁴Na'ankure ana miko nona vahe'mo'za negizanagi, Anumzamo mika'zana trohune. ⁵Mose'e'a mika vahe'afina eri'zana avariri fatgo huno eneria nekino, henkama fore'ma hanizamofu avame'za mni'ne. ⁶Hianagi Ne' mofavre'amo Kraisi'a Anumzamofu vahetera kva mani'ne. Hagi tagra ana vahe mani'nonankita, koro osu hankavetita nemanita, fore'ma hanigeta kesuna zanku'ma musema nehunazana otresune.

Zamentinti osu'zanku kva hanaza zamofu naneke

⁷Hu'negu Ruotge Avamumo huno, ***Menima Agri ageruma nentahisutma,*** ⁸***korapa ka'ma kopi tamagehe'mo'za Anumzamofu rehe'za ke'nazankna huno, tamagu'amo'a hankave otino.*** ⁹***40ti'a kafu zgefima kaguvazama erifore huge'za ke'nazanagi, tamagehemo'za renahe'za ke'naze*** ¹⁰***E'ina hu'negu, e'i ananknafi vahekura narimpa henezamante'na, anage hu'noe, zamagu'amo'a savri huvava nehige'za,***

Nagri kana kenira nosaze. ¹¹*Hu'negu narimpa he'zmantena huvempa hu'na, zamagra manifru kumanifina uofregosaze hu'noe.* (Sam-Zga 95:7-11, Eks-Uti 17:1-7) ¹²Nafuheta kva hu'neta kumi'mo'ene tamentinti osu'zamoma asimu anteno mni'nea Anumzamofonteti'ma, tamavretre zankura magoke magokemotma kva hiho.

¹³Hianagi menima knama me'nenire, mago magomotma ozeri hanaveti, azeri hanaveti maka kna nehinkeno, kumi'mofo havigemo'a rehiza huoramanteno. ¹⁴Na'ankure ese'ma Agritema ne-eta, tamentintima hu'nonazama azeri hankavetisuta, Kraisi'ene tragoteta vgaretera uhanatigahune. ¹⁵Avontafemo'a anage hu'ne, **Menina Agri ageruma nentahisuta, koma neramagehozama zmefima humi'nazaza huta, Agritera tamagu'a kafana eri'onkiho** hu'ne.

¹⁶Zamagra iza'za Anumzamofu ke nentahiza hara rente'naze? Zamagrira Mosese'a Isipitira zamavreno omenemozafi? ¹⁷Hagi Anumzamofona iza'za 40ti'a zage kafufina azeri rimpa he'naze? Zamagra ka'ma kokampima kumi'ma hu'za fri'nazamoze. ¹⁸Hagi inamokizmigu Anumzamo'a hankave ke huno, mani fruhu kuma ni'afina tamagerafa hu'za uofregahaze hu'ne? Zamagra ke'ama amage'ma onte'namoze. ¹⁹Tagra refkoma huta konana zamagra zamentintia osu'nazagu, ama ana vahe'mo'za manifruhu kumapima uofre'naze.

**Anumzamofu vahe'mo'za manigsa hanaza zanku
huvempa huzamante'nea naneke**

4 ¹E'ina hu'negu manifruhu kumapi ufregahaze huno huvempama hu'nea knama menesire, mago'tamimo'ma ana manifru hu kumapima uofre'zankura, kore nehutma kva hiho. ²Na'ankure koma Israeli vahe'tema knare musenkema huama hige'za antahi'nazaza hu'za huama hazageta nentahune. Hianagi anankema antahi'naza kemo'a zamaza osu'ne, na'ankure zmagra ana knare musenkerera zamentintia osu'nazageno'e. ³Na'ankure Anumzamo'ma hu'nea kante anteta tamentinti nehumotage manifruhu kumapina ufregahune. Esera ama mopama tro'ma hiregati mni fru hu kumara ko trohu vgareneankino, zmentitima nosaza nagakura Anumzamo huno, **Nagra Narimpa henezmate'na huvempa kenia huama nehuanki'za, zamagra tamage hu'za manifru kuma niafina uofregosaze.** ⁴Na'ankure avontafepina 7ni knazupa manifru huzankura anage hu'ne, **Anumzamo'a 7ni knazupa eri'zana atreno manifru nehie hu'ne.** (Jen-Agf 2:2)

⁵Hianagi mago'ane ama nanekefina huno, **zamagra manifruhu kumanifina uofregahaze** hu'ne. ⁶E'ina hu'negu manifru kumapima uofre'zamo'a ko me'neanagi, ese'ma knare musenkema huama hige'za antahi'namo'za uofre'nazana, na'ankure zmagra ke'ama amagama onte'nazazamo hige'za uofre'naze. ⁷Hu'negu Anumzamo'a manifruhu

kumapima ufrezankura rugna huhamprintene, e'i ana kna meninku Deviti ko hu'nea ke huno avontafepina hu'ne. **Hagi menina Nagrama Anumzamona kema nehanigeta nentahisuta, tamagu'a kafana eri onkiho hu'ne.**

⁸Hu'negu Josua'ma manifru kumama zamineresina, Anumzamo'a ru manifruhu knagura mago'ane kea osiresine. ⁹Hu'negu Anumzamo'ma eri'zama erivgareteno mni fru hu'neaza huno, mani fruhuzamo'a, Agri vahera zahufa zmavega ante'ne. ¹⁰Hu'negu iza'o Anumzamofu manifru zampima ufre'nakuma hanim'o'a, Aumzamoma ama mopama trohu vga reteno manifru hu'neaza hu'za, erizazmi eri vgarete'za manifru hugahaze.

¹¹E'ina hu'negu manifruhu kumapima ufre'zankura hankavenetita, ke ontahi vahe'mo'za ke runetrage'za fanane hunazankna huzankura kva hanune. ¹²Na'ankure Anumzamofu kemo'a kasefa huno me'neni, eri'za enerino, tarega kaziga asanenea kazimofu asenezama'a agatereno, kantu tagu tamemofone, avamutifine ufreno tagahu rurerure nehuno, kantu tagrunamo hagerafi'nefine, zaferinamofu asinu'afi ufreno tga nehuno, tavutavazane tagutagesamofu avesizana refko nehie.

¹³Mago'zamo'e huno Anumzamofu avurera, Agrama tro'ma hunte'nea zantamimo'a fraokigosie. Hianagi refkoma hanimofu avurera, ana maka'zamo'a amateke'za nehanigeta, tagranena tamage kege asamigahune.

Jisasi'a ugota prisi nere hu'nea naneke

¹⁴E'ina hu'negu tagrira mareri ageteresa prisi nera monafinka ufrenemofonte, Anumzamofu Ne' Mofavrere Jisasinte tamentintia azeri hankavetisune. ¹⁵Hu'negu tagrima antahineramino, asunku'ma hurantega ugota prisi ne'tia mani'ne. Na'ankure miko tagrama unefrona rehe'zampina Agranena ufreneanagi, kumira osu'ne. ¹⁶Hu'negu korera osu hanavetita asunku Anumzamofu tramofu avuga ne-eta, asunkuzane avesirantezanena, atupama hanuna knafina erinunkeno taza hugahie.

5 ¹Miko prisi vahera vahe'pinti zamavre'za huzamantage'za Anumzamofu avurera vahe'mokizmi zamagi eri'za mani'ne'za Anumzamofontega museza kre sramana vunente'za, kumiku kresramana vunte eri'za vahere. ²Hagi antahizazmi omne vahe'mo'zane kankuma hazagraza vahe'mokizimia agazone huzamanteno zamaza nehiane, na'ankure agra anahukna huno hanavea omnene. ³E'i ana agafare agra'a kumikura kresramana nevuno, vahe'mokizmi kumikura kre sramana vugahie. ⁴Ama ana eri'zana mago vahe'mo'a agra'a e'norianki, Aronima huntengeno eri'neaza huno, Anumzamo huzamantage'za e'nerize.

⁵Hu'negu Kraisi'a prisi vahe mani'noe huno agra'a azerintesga osu'neanki, azerintesgama hu'neana Anumzamo Agriku huno, **Kagra menina, Nagri mofavre manisankena, Nagra Negafana manigahue**

hu'ne. (Sam-Zga 2:7) ⁶Hagi mago kaziga avontafepina Anumzamo'a huno, ***Kagra manivava prisi, Melkisedeki kna hunka manigahane*** hu'ne. (Sam-Zga 110:4)

⁷Jisasi'ma ama mopafima mani'nenoa, fripinti Agri'ma azama hanimonfonku, Anumzamofontega kezatino zavineteno, nunamu huno antahinegegeno, Anumzamo'a nunamuma'a antahi ami'ne, na'ankure Agra Anumzamofu antahimizana me'negeno'e. ⁸Jisasi'a, Anumzamofu mofavre mani'neanagi, Agrama atazama eri'nea zampinti, kema antahino amage antezana rempi huno antahine. ⁹E'i ana atazama eri'nea agofetu Anumzamo'a fatgo nere hunteteno, maka Agri'ma amage'ma antaza vahe'mokizmirera, manivava hanagu zmahokenea zamofu agafa'a mani'ne. ¹⁰Hagi ko Anumzamo huno, Melkisedeki mni'neankna Ugota Prisi ne' efore hugahie huno hunte'nea nere.

Avamupima hagezanku hunea naneke

¹¹Rama'a ama nazamofu nanakea me'negeta tamasmi'naku hunanagi, eriamama huno tamasmi'amo'a amuhohie, na'ankure kema ame hutma antahi ama hu'zamo'a amuhu huneramante ¹²Menina ko rempi hu'zami vahe manizaresinagi, tamagra zahufa aminte mofavregna nehutma hanave nezana negara osu'nazankita, avontafepintira Anumzamofu zankura mago'ane fruma hu'nesiata rempi huramigahaze. ¹³Ami rima nemaniza vahe'mo'za mofavregna hu'nazankita, fatgo avu'avazane havi avu'avazane hu'za antahi amara nosaze. ¹⁴Hu'neanagi hanave nezana, nenama hu'ne'za, fatgozanki havizanki hu'za kenima nehu'za, fatgozama nehaza vahe'mokizmi nezane.

Kazigazi huta Anumzamofu avaririta vanuna naneke

6 ¹E'ina hu'negu Kraisinku'ma onensi mofavremofu hiaza huta rempima huneramuna zana netretma, nena vahe avamente mani'nenketa, ko'ma fri avu'avazampintima tamagu'a rukrehe hutma Anumzamofonte tmamentinti hiho huta tmasaminona kea, tamasami vava huta ovugahune. ²Mono tima frezamofu nanekegi, azama anteno nunamuma hu'zamofu nanekegi, fripinti'ma oti zamofu nanekegi, eteno henkama refko hanigeta manivava hanaza'zamofu naneke mago'ane huama huta tamasami vava osugahune. ³Anumzamo'ma hu izoma hurantenesigeta, amane anazana hugahune. ⁴Hianagi iza'zo koma huzamige'za nentahiza, monafi musezama ke'za antahiza nehu'za, Avamura e'neriza, ⁵Anumzamofu knare naneke ko eneriza, henkama esianknamofu hankave ke'za antahiza hu'nesamozama, ⁶atre'za megia' zante vute'za, etema e'za zamagu'ama eme rukrahema hu'zamo'a, tusi'a amuhu huzamantegahie. Na'ankure kefozama hazazamo'a, Anumzamofu Mofavrea mago'ane aheza keka zafare nehantiza, vahe avufina agazea eri nemize. ⁷Ko'mo'ma mopafi runteteno, avimzamo koti anivazu

huno hageno nena rga'a retegeno Anumzamo ana mopa asomura hunenteno, hozama hankorino avimazama hankrenemofa aza nehie. ⁸Hu'neanagi ave'ave trazamo'ene havi trazama nehagea mopa, magoa eri'za eriga osu'neankino, ana mopa Anumzamo hanigeno haviza hinkeno, tevemo tevgaregahie.

⁹Nafuheta tagra ama anahukna ke nehunanagi, tagra antahinone ama anazamo'a tamagritera fore osugahianki, tagra antahima tamunana knare tamavutnavama nehanageno, tamagu vazigahie huta nehune. ¹⁰Anumzamo'a mago'mofonkuke osu'ne'kino, amuhu huta eri'zama'ama erinenteta Agri'ma avesinenteta ruga'a mono vahema kegva huzmanteta nevaza zankura agera okanigahie. ¹¹Hianagi tagri'ma tavenesiana, kasefama huta ama mopare'ma mani'nenare vahe'ma avesintezana azeri hanavetineta vgare knarera unehanatita, amuhama hu'nemiza zana omerigahaze. ¹²E'ina hu'negu feru vahera omaniho. Hianagi amentintifine akohe'za avegante avu'avazampi manine'za huvempa huzmante'nea zantamima erisintihare'naza vahekna hiho.

Anumzamofa huvempa kegu amentinti huzamofa naneke

¹³Anumzamo huvempa kema Abrahamana hunteneana, magora Agri agetere anumzana omani'neankino Agra'a Agifi huvempa kea Abrahamana huntene. ¹⁴***Nagra tamage kagrira asomu hunegantena, kagripinti fore'ma hanaza vahera zamazeri ra hanenkeza rama'a vahe efore hugahaze*** hu'ne. (Jen-Agf 22:16, 17)

¹⁵Hu'negu akoheno avega anteno mni'neni Abrahamu'a, Anumzamo huvempama hunte'neazana erine. ¹⁶Hagi vahe'mo'zama huvempa kema hunakura, zamagrira zamagaterenea vahe'mofa zmagire hunte'za huvempa kezamia nehazageno, knazama amu'nozmifima me'neazana eriana higeno vga nere. ¹⁷Anahukna huno Anumzamo'a huvempa hu'neankino, anama huvempa hu'nea kemofona azeri hanavetino, erisanti haregahaze hu'nea vahetera huvempa huzmantene. ¹⁸Anumzamo'a huvempa hu'nea ke'ane, hugahuema hu'nea kemoke eri'ante amama hiana, Anumzamo'a havigea osugahie hu'ne. Ana hu'negu tagra maka havizama ne-enketa, Agritega freta vuta kasefa hanavea ome enerita, fore'ma hanigu tamentintima nehu'naza azeri hanavetigahune. ¹⁹Fore hanigu'ma tamentintima nehunazamo'a, ventemofa azerintegeni nemanianofikna nehuno, tagutamemofona azerino ra mono nomofona agu'afinka hantinaza tavaravemofona' agatereno ruotge hu'nefinka tamentintima nehuna zamo'a ome rusi nehie. ²⁰Jisasi'ma tagri tagi erino vugoteno ufrenemo, Melkisedeki nona erino mani'vava Ugota Prisi nera mani'ne.

Melkisedekima prisi mani'nea zamofa naneke

(Jen-Agf 14:17-20)

7 ¹Ama ana Melkisedeki'a Salemi vahe'mokizmi kini ne' mani'neni, marerisa Anumzamofa prisi ne' manine. Hagi Abrahamuma kini

vahe'ma ha'ma huno zamagatereteno, nevigeno'a karanka Melkisedeki'a tutagiha hunteno asomura huntene ²Higeno Abrahamu'a maka'zama erino e'nefintira, nazantrema'a kevu erinteno, refako huno mago kevua Melkisedekina ami'ne. Hagi Melkisedeki'e agimofu agu'agesamo'a, fatgo avu'avazamofu kini nere hu'ne. Nehuno Salemi kini nerema hu'nea agu'agesamo'a, rimpa fruzamofu kini nere hu'ne. ³Nerera'ene nefakea omanine, agigo azankomo'a omanigeno, kasente kna'a omanegeno, fri'nea agenke'a omanegeno, Anumzamofu mofavregna huno prisi ne mani vava hu'ne.

⁴Melkisedeki'a ra ne' mani'neanki antahiho. Abrahamu tagigomo agranena ra ne' mni'neanagi, hapintima eri'noma e'nea zantampintira nazantrema'a kevu refko huteno, anampintira knare'zantfama hu'nea kevua magora Melkisedekina ami'ne. ⁵Mosese kasegemo'a maka'zama antenesafintira 10ni'a nazantrema'a kevu refko hu'nesageno, mago kevua prisi vahe'mo'za erigahaze huno krente'ne. E'i anazana zmagra'a nagapinti ene erigahaze hu'ne. Na'ankure zamaganena Abrahamu naga mni'naze. ⁶Hianagi Melkisedeki'a Livai nagapintira omani'neanagi Abrahamu'ma nazantrema'a kevu refko hutenefintira, anampintira mago knare'zantfama hu'nea kevua eri'ne. Hagi Melkisedekia Abrahamuna asomura hunte'ne, ko'ma rama'azankuma huvempama hunte'nea nere. ⁷Hianagi mago kea huontegosune, asomuma nemia ne'mo'a asomu eneria nera agaterene. ⁸Prisi vahe'ma nazantrema'a kevu refko huntene mago kevuma refakoma huta nezamuna vahe'mo'za fri vgare'naze. Melkisedekia zamagatereno ra vahe manine, na'ankure agrikura huama hu'za manino vugahie huno hu'ne. ⁹Livai nagamo'za nazantrema'a kevu refko hunte'nafinti mago kevua eneriza vahe'mo'za ko Abrahamupi Melkisedekina zmagra nazantrema'a kevu refko hunteneafintira mago kevua ami'naze. ¹⁰Na'ankure Melkisedekima Abrahamuma tutagihama hunteno, nazantrema'a kevu refko huno mago kevuma ami'neana, agripintira Livai vahe'mo'za zahufa forera osu'nazegeno'e.

Melkisedeki'a Jisasi avamezankna huno mni'neazamofu naneke

¹¹Mosese kasegemo'a huno, Livai nagapintike prisi vahera manigahie huno hige'za mni'nazanagi, ana prisi vahe'mo'za mago vahera zmazeri knarera osu'nazagu mago Melkisedekikna prisi ne'ma fore'ma haniana, Aron nagapinti rompage, ru nagapinti fore'ma hanigeno knarera hugahie hu'ne. ¹²Ana hu'negu prisi eri'zamoma zahema nehanageno'a, tra ke mo'enena anahukna huno zahe hugahie. ¹³Na'ankure menima keagama nehuna prisi nera, kre sramanavu itare, kre sramna nevaza prisi vahepinti rompage ru nagapinti fore hugahie. ¹⁴Nagrama nehuana Rantimo'a Jiu nagapinti e'ne. Hagi Mosese'a ana nagapinti prisi vahera fore hugahie huno osu'nea nagapinti fore hu'ne.

¹⁵ Ama ana miko zantamimo'a eriamu huno, magora Melkisedeki kna prisi ne' menina efore nehie hu'ne. ¹⁶ Jisasi'ma prisi ne'ma mani'nena tagehe'mo'zama nehazaza huno Livai nagapinti prisi nera omani'neanki, manivava asimumofu hankave prisi ne' mani'ne. ¹⁷ Avontafemo'a agrikura huno, ***Melkisedeki kna hunka manivava prisi nere hu'ne***, (Sam-Zga 110:4)

¹⁸ Ama ana kanteti erizama'ama omane hankave'a omane korapa kesegea retufeganti atrene. ¹⁹ Na'ankure kasegemo'a ana mikozana eriknarera nosie. Hianagi knare'zama fore hugahiema huta amuhama hunemunazamo noma'a e'nerino Anumzamofonte tavreno urava'o nehie.

²⁰ Anumzamo Agra'a huvempa huno, Kraisi Agrake prisi nera mika zupa manigahie hu'ne. Hianagi mago'a prisi vahe'ma fore'ma hazageno'a, e'inahukna huvempa kea Anumzamo'a huozmante'ne. ²¹ Huvempa kema hu'neana, ***Nagra Ramo'na, huvempa ke hugantoankina antahintahini'a zahera osugahue. Kagra manivava prisi ne' manigahane*** hu'ne.

²² Na'ankure Anumzamo huvempama hunte'negu, Jisasi'a knare hagerafi huvempa kema tamigahue hu'nea Ne' mani'ne.

²³ Rama'a vahe'mo'za prisi eri'zana eri'naze, na'ankure zamagra nefrizageno, rumo'za eri'zazmia eritere hu'naze. ²⁴ Hianagi Jisasi'a manivava prisi ne' mni'nigeno, Agri prisi eri'zamo'a mevava hugahie.

²⁵ E'ina hu'negu Agrite'ma etenoma, Anumzamofontema esimofona magoke zupa agu'vazinkeno mni vava hugahie. Na'ankure Agra manivava hu'nenno, Anumzamofontega nunamu huno zamaza nehie.

²⁶ E'inahukna ugagota prisi ne'mo tazeri knarera hugahie. Na'ankure Agra ruotge huno kumi'a omanegenno kumi'mo magore huno azeri haviza osu'ne. Menina kumi vahepinti azeri ruotge higeno, monafinka rahi erino mani'ne. ²⁷ Agra ruga'a prisi vahe'mo'zama nehazaza huno mika kna kresrama vuvava nosie. Zamagra kumikura kresramana vute'za, vahe'mokizmi kumikura kre sramana nevazanagi, Jisasi'a magoke zupa Agra avufga eme aguza runo, maka vahe kumikura keka zafarera fri'ne. ²⁸ Na'ankure kasegemo'a hanavezami omane ugagota prisi vahe huhamprizante. Hianagi Anumzamo huvempa hunte'nea kemo'a kasegemofo amefi'a e'neana, Agri'a Ne'mofavremo mikazana emeri knare'zantfa nehuno manivava hugahie.

Kraisi'a ugota prisi ne' mni'ne hu'nea naneke

8 ¹ Tagrama nehunazamofu agafa'a ama'ne, tagrira Ugagota Prisi ne'tia monafinka mrieri agaterenea kini trate Anumzamofu azantamaga kaziga mani'ne. ² Agra monafinka tamame seri mono nomofu agu'afi Prisi eri'za eri ne' manino, eri'zana e'nerie. Ana seri mono nona vahe'mo'za zamazantetira onki'nazanki, Ramo ki'ne. ³ Miko ugota prisi vahe'mo'za musezane, kresramana vu'za eri'za ome kre sramana nevazankino, tagri

Ugagota Prisi Ne'mo kresramana vugahie. ⁴ Ama mopafima mani'neresina prisi nera omnisine, na'ankure kasegemoma hu'neaza hu'za ko rama'a ugagota prisi vahe mani'ne'za musezana eri'za Anumzamofontega kresramana vunentaze. ⁵ E'i ama mopafi mono nompri kresramana vu eri'zama enerizana, monafinkama tamazama me'nea zamofa avame'za me'ne. Na'ankure Mosesema seri mono noma kinakuma retro nehigeno'a, Anumzamo'a Mosesena hanave ke asamino, *e'sema ama agonare mikozama kaveri hu'noa kante antenka, seri nona kio huno huntene.* (Ekso-Uti 25:40)

⁶ Hianagi Jisasima eri'nea prisi eri'zamo'a mago'a prisi vahe'mo'zama e'neriza eri'zana agaterenegeno, Agra amuno ne' tagri'ene Anumzamofontera manino, koma huvempama hu'nea hagerafi, kea agatereno mani'ne. ⁷ Na'ankure kote hagerafi huvempa ke'mo'ma knare'zantfa huneresina, menina mago'ane henka hagerafi huvempa kea osiresine.

⁸ Hianagi vahepima Anumzamo hazenkema keno erifore nehuno'a, anage hu'ne, *Ramo'a huno Antahiho mago kna ne'eankina, ana knarera kasefa huvempa keni'a Israeli vahete ene Jiu vahe'motarera hugahue.* ⁹ *Ama ana hagerafi huvempa kenimo'a korapama nezamagehoma zamazante zamavazuhuna Isipi mopafinti zmvarena atineramina hunte'noa hagerafi huvempa kegnara osugahie. Zamagra ana hagerafi huvempa kerera mani fatgo osu'nazagu, Nagra namage'na huzami'noe huno Ramo'a hu'ne.* ¹⁰ *Hianagi Israeli vahetera ama kasefa hagerafi huvempa ke Ramo huno, henka'a Nagra kasegea antahintahi zmifine zamagu'afine krenentena, Nagra zamagri Anumza maninenke'za zamagra nagri vahe manigahaze hu'ne.* ¹¹ *Ana knazupa zamagra ko Ramofona ke'za antahiza hu'nazankiza, tava'o zamire'ma mani'nesaza vahema rempi huzami zankura osugahaze. Osi vahetetima vuno ra vahetema vaniana, magore hu'za rempi huzamiza tamagra Ramofona antahinazo hu'za osugahaze.* ¹² *Na'ankure nasunku hunezmante'na, Nagra kumizamia atrenezamante'na henka'a ana kumizamigura nagesa ontahigosue hu'ne.* (Jere 31:31-34)

¹³ Anumzamo'ma ama kasefa hagerafi huvempa kema nehuno'a kote hagerafi huvempa kegura huno, kna'amo'a vgarenkeno, ko'zama me'nesia zamofona eri'zama'a omanenkeno fanane hugahie hu'ne.

Jiu vahe'mokizmi ra mono nomofo naneke
(Lev-Pri 25:10-40)

9 ¹ Korapa hagerafi huvempa kemofona mono hu trake'a megeno mono hunte seri mono nona ama mopafina me'ne. ² Seri mono nompina tarefi hunaragintene. Ese'ma hunaragintepinka tavima rekru hunte azota megeno, nezante sipa megeno ana agofetura breti me'ne.

E'i anama hunaragi ante'neama'agura ruotge hu'ne hu'za nehaze. ³Hagi anantera tavrave tafizageno amefiga'agura ruotage huno ruotge hu'ne hu'za hu'naze. ⁴Anampinka mananentake'za kre manavu ita korire tro huntenaza megeno, erihagerefi huvempe ke hu'za nehazaza vogisi zafareti trohu'naza me'ne. Ana vogisimofona agu'afina korire trohunaza kavofi mana neza megeno, Aroni azompare agatama hagenea megeno, hagerafi huvempama hu'nea kasegea haverera me'ne. ⁵Ana vogisimofa agofetura kumimofa nona huno apasezane, korireti tare masanentake ankeri tro huntengeno, znagekonanu rutareke ana vogisia refitakeno me'ne. Hianagi menina ana miko'zamofa agafa'a eri ama osugahue.

⁶E'i anazantamima ese hunaragintepima noma'arema eriante fatgoma hutegeno, prisi vahe'mo'za mazeriza atiramiza hu'za mono eri'zana e'nerize. ⁷Hianagi ugagota prisi ne'moke mago kafumofona, magoke kna zupa seri mono nomofa agu'afinka hunaragi antengeno ruotge huno, ruotge hu'nefinka, agra kumite'ene vahe'mo'za kefoza nehu'ne hu'za ontahine'za nehaza kumi apase kora erino unefre. (Lev-Pri 16:) ⁸E'i ana avu'avazampinti Ruotge Avamumo'a eriana huno seri nomofa kafanteti ufreta Anumzamofone vu'zama me'nesigeno'a Anumzamofoma keno antahinoma hu'zamo'a amuhu hugahie hu'ne. ⁹E'i ana seri mono nomo'a menima fore'ma haniaza taveri hu'ne. Na'ankure prisi vahe'mo'zama kre sramanama vazazamo'a zamagu zmagasafima me'nea antahintahizazmia zmazeri amara osugahie. ¹⁰Na'ankure ama ana avu'avazamo'a ne'za nezane ti nezane, tagiama tazama sesema huzamofonkuke nehuno, amegazama atupa'a knafima vgaresigeno'a, knarezama esiazanku hu'ne.

Kraisia tama kresramane hu'nea naneke

¹¹Hu'negu Kraisia ana miko knare zantamima esiazamofa Ugagota Prisi Ne' mani'ne. Agra monafinka mago vahe'mofa azamo tro osigeno, knarezantfa hu'nea seri nompri ufrene. ¹²Hagi magoke zupa miko knama kresramnama vuzankura Kraisia korana erino ruotge huno ruotge hu'nefinka ufrene. Hianagi e'i ana korana memene anenta kaomofa koranompaga, Agra'a koranuti tagu'vazino mni vavama hanunkura miza sene.

¹³Ko avu'avapina meme koranki, bulimakamofa koranki a' kasefa kaomofa tevefi krenaza osa'areti, pehenama hu'nesafintira zamazeri agru hugahie hu'za hu'naze. ¹⁴Hagi tamagesa antahiho, Kraisia koramo'a razankrefa me'neankino, fri avu'avazama nehunkeno tagutagesa azeri agru higeta, kasefa huno mni'nea Anumzamofona monora hunentone. Na'ankure manivava Avamumofa hankavere, Kraisia kefozama'a omne ne'mo, Anumzamofontera Agra'a avufga tagri kumikura aguza rune.

¹⁵E'i ana agafare Kraisia vahe'mokizmine Anumzamofa amu'no nera kasefa hagerafi huvempa kea mani'ne. Ana hu'negu huhamprima

zmantene'mo'za vahe'mo'za Anumzamo manivava maniza erisinti haregahaze hu'neazana erigahaze. Na'ankure Kraisi'a frino, kotema hagerafi kefi manine'za kumima hu'nazana kumizmia mizasezmanteno katufe zmante'ne. ¹⁶Mago vahe'mo'ma frisigeno fenezama'ama henkama erisinti haregahie hunteneimo'a, avegante'nenigeno ana nemo'a fritenkeno, ana zama'a erisinti haregahie. ¹⁷Na'ankure frisugenka erisanti haregahane hu'ne'mo'ma frisigeno, erisantima haresimo'a amne erigahie. Hagi amigahuema hunesimoma kasefa huno maninesigeno'a, magore huno anazama erisanti haregahane huno hunesizana e'origahie. ¹⁸E'i ana agafare zgagafamofo korantetira kote hagerafi huvempa kemofu eri hanaveti'naze.

¹⁹Na'ankure Mosesema Anumzamofu kasegema hamprinoma vahema nezamasino'a, anenta bulimakaomofu korane mememofu korana tine eri hava huteno, erino hisopue nehia trazamofu aninaretie'ene koranke hu'nea sipisipi azokateti Anumzamofu kasege me'nea avontafete ene vahetera, ana korana rutari hu'ne. ²⁰Huteno anage huno zamasmine, **ama koramo'a Anumzamo'ma hagerafi huvempa kema hiho huno tagrima hurante'nea eri hanavenetie.** (Diu-Kas 24:8) ²¹Ana kanteke, anahukna huno korana seri mono nonte'ene kresramnama nevaza eriza zantamintera rutri huntene. ²²Mosese kasegemo'ma hu'nea kanteke, tamage huno ana mikozamo'a korantetike sesehu agru hugahie. Na'ankure mago zga aheno korana erifegu otreresina kumima atrentezana omaneresine. (Diu-Kas 24:6-8)

²³E'ina hu'negu ama mopafi seli mono none agu'afima me'nea zantaminena, monafinkama me'neazamofu avamezane, zga kfamofu koranteti azeri agru hugahie. Hianagi tamage zama monafinkama me'nea zantamina azeri agruma husniana, zga kfamofu korama ageterenea koranteti azeri agru hugahie. ²⁴Na'ankure Kraisi'a vahe'mo azanu ki'nea mono nompina uofrene. Hagi mona kumapi tagriku huno Anumzamofontera amuno nera mani'ne. Mono hunte'naku kintenaza mono nompia Agra uofrene. Na'ankure monafinka me'nea mono nomofu avamezane. ²⁵Hagi e'ima uofreneana, Agra'a avufgama aguzama ru'neana, ama mopafi prisi vahe'mo'zama kafugu kafugu magoke knage'za ruotge hune hu'za nehazafi, zga kfamofu kora eri'za ufre'za kresramana vuvava hazanknara osu'ne. ²⁶Hanki anara hugara hu'nesiana, ama mopama troma huneregatira fri vava huno visine. Hianagi anara osu'ne. Kumi'mofu hanavema eri atrenaku, Agra'a avufga tagrikure huno vgare knafi avufga agu'za runo magoke zupa, ana maka knamofonkura fri'ne. ²⁷Hu'negu vahe'mofonku'ma hunteneana, magoke zupa fritesuno'a kegagarera otigahie huno huntene. ²⁸Hu'negu Kraisi'a magoke zupa frino rama'a vahe kumira eritrezamtene. Agrama henkama esu'no'a kumiti eritrerante'nakura omegahianki, Agriku'ma tusiza hu'za avegama ante'namokizmi zmahokeno zmvarenaku egahie.

Kraisia magoke zupa miko vahekura fri'neazamofa naneke

10 ¹Ko avu'avazama Mosese kasegefi me'neana henka knare'zama esiazamofa avame'za me'ne. Hu'negu ko avu'avazampima mago'anena anahukna zana huvava hu'za kafugu kafugura vugahazanagi, monoma huntenaku'ma haza vahe'mokizmi, ana zamo'a zamazeri agru osutfu hu'ne. ²Hagi koma kresramna nevaza'zamoma monoma nehaza vahe'mokizmi kumi'ma sese hu'neresina, kresramna vuvava nosu'za, zamagu zmagasafina kumi me'ne hu'za ontahizasine. ³Hu'neanagi e'i ana kresramnamo'a kafugu kafuguma hu'naza kumimofa huzmagesa hutere nehie. ⁴Na'ankure burimakaomofa koramo ene mememofa koramo'a kumira sese hugara osu'ne. ⁵E'i ana agafare Kraisima ama mopafima ne-eno'a Anumzamofona anage huno asamine, **Vahe'mofa kumitema zgagfa korama kre sramnama vuzankura kavenosie. Hianagi Kagri kemofa amage antesuegu ama navufga nami'nane.** ⁶Kumitema zga kfama mika kre sramna vuzankura, **Kagra musena nosane.** ⁷Nagra anage nehue, koma Anumzamoka avontafemo Nagriku hu'nea kante, **Kagri kavesi avaririnaku ama e'noe** hu'ne. (Sam-Zga 40:6-8) ⁸Kasegemo'a rempi huramino, kresramna vuzane musezane erinka enka kumika'agura kre sramnavuo hu'ne. Hianagi nahigeno Kraisia ama ana zankura huama huno Anumzamofona avenosie hu'ne? ⁹Anantera Agra anage hu'ne, **Kagri kavesima avaririnaku Nagra e'noe** hu'ne. Agra ese hagerafi huvempa kea eri netreno, henka huvempa ke eri agafa hu'ne. (Sam-Zga 40:7-8) ¹⁰Jisas Kraisia Anumzamofa avosite Agra'a avufga magoke zupa tamigeno mika kna, mika vahera tazeri ruotge hu'ne.

¹¹Knane knane prisi vahe'mo'za otine'za mono eri'za zamige'za ana hukna hu'za kre sramana vuvava nehazazamo'a kumiti eritregara osu'ne.

¹²Hianagi tagri Ugagota Prisi nemo'a magoke zupa tagri knare zanku, Agra'a avufga Anumzamofa amigeno, kumitigura avufa agu'zarutegeno, **Agra Anumzamofa azantamaga kaziga mani'ne.** (Sam-Zga 110:1)

¹³Agra anante avega anteno mani'negeno, **ha'marentaza vahera zmavre agafi antegeno, zmagra aga tra trohu'za mni'naze.** ¹⁴Na'ankure magoke zupa avufga agu'za ru'nea zamo, zmazeri ruotge hu'naza nagamokizmia, miko zupa zamazeri knare'zantfa nehie.

¹⁵Ruotge Avamumo'a ama ana zankura tagritera huama huno esera anage hu'ne, ¹⁶**Vahe'niarera kasefa hagerafi huvempa kea ana knarera hugahue huno Ramo'a hu'ne. Nagra kasegea zamagu'afi nentena antahintahizamifi krentegahue** hu'ne. (Jer 31:33-34) ¹⁷Anantera anage hune, **Kumi nehu'za kasegema rutagre zmavuzmava nehaza zankura, Nagra mago'ene nagesa ontahigosue** hu'ne. ¹⁸Hagi ko'ma kumi'ma atrentenesigeno'a, mago'ane kumikura kresramna ovugosie.

Hanavetino kazigazi huno vuzamofo naneke

¹⁹E'ina hu'negu nafuheta hanavetita Jisasi koranteti azeri Ruotge hu'nefinka ufrenune. ²⁰Jisasima tagriku'ma fri'neazamo, kasefa huno asimu eri kama tavravemo runkaniregeno, Ruotgema hu'nefinka kana anagirante'ne. ²¹Hagi tagri Mreri Agatere Prisi Ne'mo, Anumzamofu vahetera kegva hu'negu, ²²erinketa tamage tagu'areti Anumzamofontera antahinemita urava'o hamneno. Na'ankure havi tagutagesamofona, Kraisi koranu tagino sesehu agru higeno tavufgamofona sese hurantene. ²³Fore hugahie huta tamentinti nehuta huama nehuna zana azeri hanavetisune. Na'ankure huvempama hurantenemo'a hugahuema hu'neazana amanehu nere. ²⁴Hagi mago magomotma hanavetita ovesinte avesinte huzanku'ene, knare eri'zama erizankura nentahisunkeno, vahepina eama hanie. ²⁵Jisasi'ma esia knamo'a kofta nehigu, mago'amo'zama magopima atruma hu'zama netrazaza huta, magopima atruma hu'zana otresune. Tamagra antahinaze, Kraisi'ma esiakna hago kofta nehigu, ozeri hanaveti azeri hanaveti hanune.

Kraisima tamagena huomisnuna naneke

²⁶Nafuheta ko'ma tamage kema antahinetama, kumi'ma huvava hanunana, mago'anena ana kumi'ma eriatre kre sramana vu'zana omnegosie. ²⁷Hianagi Anumzamo'ma refkoma hurante zankura tusi kore nehuta, Anumzamofu ha'renentesia vahe'ma amuhonentake tevefima tasegesagu avega antegahaze. ²⁸Hagi iza'o Mosesese kasegemofu agorga'a omanigeno, taremo'o 3'amo'o kete'za ana zanku'ma huama huntege'za, asunkura hunontazanki ahenefrize. (Diu-Kas 17:2-6) ²⁹Hagi, Anumzamofu Mofavrema amagena hunemino, hagerafi huvempa kema kumitima sese hu'nea korama ke'amne zankna nehuno, Anumzamofu asunku'zama vahetegama avreno ne-ea Ruotage Avamumofu arimpa knaza erimisia vahe'mofona, tusi'a kefo'za huntegehianki antahiho. ³⁰Na'ankure tagra antahi'none, Anumzamo'a amanage hu'ne, ***Nagra nona hu'na hara hugahue. Nagra nona huna mizana zamigahue.*** Agra mago'ane hune, ***Nagra nona hu'na mizana zamigahue.*** Agra ete mago'ane hune, ***Ramo Agra'a vahera refko huzmantegahie*** hu'ne. Antahi'none, ³¹kasefa huno mni'nea Anumzamo magomofu azeri haviza hu'naku haniana, ana ne'mo'a koro hugahie.

Hankavetita fatgo huta manisuna naneke

³²Ese'ma Kraisima antahinka kenka hunana knare ete antahigeno vino. Kagesa antahio, tusi'a hazenke zana fore higeno, tusi katazana fore hu'neanagi kamentintia otrenane. ³³Mago'a zupa vahe avufi kazeri ama hu'za kaheza katazana kami'naze. Anahukna hu'za mago'a zupa zmahe'za

zmatama zamiza vahera zamaza hu'nane. ³⁴Kagra kina nompima zamavrentaza vahe enena magoka zamagranena kata enerinka, miko zanka'ama erizagenka muse nehunka, zmatranke'za e'nerize. Na'ankure mevava knare fenozanka'a monafi me'negenka kagra antahinane.

³⁵Hu'negu e'i ana hanave kamentintima Ramofontema hunte'nana zana otro. Na'ankure ana hanave kamentintiretira tusi'a miza erigahane.

³⁶Akohenka maninenka knazana erinka vanunka, Anumzamofa avesi nevaririnka, Anumzamo'ma huhampri kante'neazana erigahane.

³⁷Na'ankure kofta knafi *egahiema hunemo'a avegaonte, ko egahie.*

³⁸*Hu'negu fatgo vahe'mo'za zamentintifi manigahaze. Hianagi iza'o amagenama hunamino natre'noma vanimofona musena huontegosue hu'ne.*

³⁹Hianagi Anumzamofonteti atre'zama nevu'za fanane hnaza vaheknara tagra osanunanki, tagra hugahunema hu'naza nehuna nagakita, taguvaziza erisuna vahe mani'none.

Korapama zmentinti hu'naza vahemofa naneke

11 ¹Amentintima hu'zana, onke'nona zamofa tamage huno fore hugahie huta amuhama nehuna zane. ²Korapa vahe'mo'za zamentinti hu'nazagu, Anumzamo'a fatgo vahere huno huzmantene. ³Tamentinti nehunku, Anumzamo'a ke'areti ama mopane, monanena trohune huta antahi amara nehune. Ana hu'negu menima tavuma negona zana, Anumzamo'a nonkona zanteti tro hu'ne. (Jen-Agf 4:3-10)

⁴Ebeli'a amentinti Anumzamofonte nehuno kre sramana vunte'neazamo, Keni'ma kre sramana vunte'neazana agaterene. Ebeli'a amentinti higeno Anumzamo'a fatgo nere huno huso'e huntene. Ebeli'a ko fri'neanagi amentinti hu'neazamo tagrira meninena hunerasamie. (Jen-Agf 5:21-24)

⁵Enoku'a amentinti higu Anumzamo avregeno ofrineno, monafinka marerigeno onke'naze. Na'ankure ofrino mni'nerera Anumzamofa avurera fatgo huno mni'negeno, Anumzamo muse huntene avare'ne.

⁶Amentintima omane'nesigeno'a, Anumzamofa aveszama avaririzamo'a amuhu huntegahie. Na'ankure iza'o Anumzamofontema esimo'a, agra amentintima haniana, Anumzana mni'neankino, Agriku'ma hakaza vahera mizana nezamie huno antahino. (Jen-Agf 6:13-22)

⁷Anumzamo'a Noana asamigeno amentinti ana kegura nehuno, amageanteno tima hagesifima naga'a zamagu vazisigura ventea tro hu'ne. Fore'ma osu'nea knaza fore hugahie huno Anumzamo'a asamine. Noama amentinti hu'neazamo, ama mopafi vahe'mofa kefo avu'avazazmia eriamia nehigeno, Anumzamo'a fatgo nere huno huntene. (Jen-Agf 12:1-8)

⁸Abrahamu'ma henkama erisinti haresia kumate vinogu Anumzamo'ma huntengeno'a, inankna kumate vinogu huntene ontahi'neanagi, amentinti

nehuno ke amageanteno vu'ne. ⁹Hagi Abrahamu'a Anumzamo'ma hunte'nea moparera amentinti nehuno zoka vahekna huno, seri no ome kino umanine. Ana higeno Asaki'ene Jekopukea anahukna huke Anumzamo'a huvempama hunte'nea zana erisintiharegane hunte'nea netrene magoka ana seri nompina umani'naze. ¹⁰Hakare zupa Abrahamu'a amentinti nehuno, henkama hanave ranku'ma Anumzamo retro hunteteno, Agra'a ki'nea ranku'ma erisigu aveganteno manine. ¹¹Sera'enena tavavategeno avufgamo'a haviza hu'neanagi, amentinti nehuno Anumzamo'ma huvempa hu'nea kemo'a nena'a fore hugahie higu, mofavre kasentene. (Jen-Agf 17:19, 18:11-14, 21:2) ¹²Hagi magoke ne' Abrahamu ozafarenea nepinti, maka fore hu'naza vahe'mo'za, monafi hanafi kna nehu'za, hagerinkenafi kahepankna hu'za ohampriga vahe mni'naze.

¹³Ama ana miko vahe'ma fri'nazana, huvempama huzmante'neazana e'orine'za fri'nazanagi, zamagra zmentinti nehu'za, afete'ma ne-eazama kenaza zankura muse nehu'za, ruregati zoka vahekna hu'za emani'naze. ¹⁴E'ina hukna kema nehaza vahe'mo'za, zamagrama umani so'ema hanaza kumaku nehakaze. ¹⁵Zamagrama e'naza kumategama vunakuma antahintahima hazasina, ete e'naza kumatega vazasine. ¹⁶Hianagi knarema hu'nea kumaku nehakazana mona kumare. E'ina hu'negu Anumzamo'a tamagri Anumza mni'noe huzankura, Agra agazea osugahie. Na'ankure Agra mago ranku'ma retro huzmantene.

¹⁷Anumzamo'a Abrahamuna amentinti reraheno kenaku, Aisakina ahenka kre sramana vunanto hu'ne. Huvempa kema huntentemo Abrahamu'a amentinti nehuno, magoke mofavrea Aisakina ahe fri'za hu'ne. ¹⁸Anumzamo'a Abrahamunku hu'neana, ***Aisakipinti fore hanaza vaheku, Abrahamu ageheze huno hugahaze huntene.*** (Jen-Agf 1:12) ¹⁹Abrahamuma agesama antahi'neana, Aisakima ahe frisugeno'a Anumzamo asimura ete amigahie huno agesa antahine. Hagi ana hu'negu nemofoma avreneazamo frizampinti avrenea avame'za huraveri hu'ne. (Jen-Agf 22:1-18)

²⁰Aisaki'a amentinti hu'negu, Jekopu'ene Isokea henka'a erisa'a asomu kea huvempa huznantene. (Jen-Agf 27:27-29, 39-40) ²¹Jekopu'a amentinti hu'negu, fri'zama nehuno'a Josefena tare mofavreararena asomura hu'nezantenteno kepri huno azompare otineno, monora Anumzamofona huntene. (Jen-Agf 48) ²²Josefe'a amentinti hu'negu, frinaku'ma nehuno'a, hanavetino Israeli vahekura, Isipima atreta vanutma zaferinani'a ramina erineta viho huno huzmantene. (Jen-Agf 50:24-25)

²³Mosese nererake nefakea zanamentinti hu'naku, Mosesema kasentegenoa 3'a ikamofa agu'afina azeri frakintakeno znaganena mani'ne. Na'ankure zanagra ka'ana ana mofavremo'a hentofa mofavre maninegeke, kini nemofo kasegema rutagre zankura korera osu'na'e.

(Eks-Uti 1:22, 2:1-15) ²⁴Mosese'a amentinti hu'negu, zomareno rama nehuno'a Fero mofamofu mofavre hu'za agrikuma huzankura avesra hu'ne. ²⁵Anumzamofu vahe'ma zamazeri havizama hazaza hu'za azeri haviza huzanku agesa nentahino, atupa knafi kumimofu kefo avu'avazampi muse huzankura avesra hu'ne. ²⁶Agra Isipi kumamofu feno erizankura nontahino, Kraisintekuma natama erisuana knare hugahie huno agesa antahine. Na'ankure Anumzamoma henkama ra mizama amizanku anara hu'ne. ²⁷Mosese'a amentinti hu'negu kini ne'mo'ma arimpa ahentezankura koro osu Isipi mopa atreno vu'ne. Na'ankure agra onkenemofonte avuraga kenteno kazigazi huno vu'ne. ²⁸Mosese'a amentinti hu'negu, Israeli vahera zamasimge'za sipsipi ahe'za korana nonkafa zamirera frenazageno, Anumzamofu ankeromo ozamahe zmagaterene. (Eks-Uti 12:21-30)

²⁹Israeli vahe'mo'za Anumzamofonte zmentinti hu'nazagu, hagege moparema hiaza hu'za hagerina takahe'naze. Hianagi Isipi vahe'mo'za anama hazaza hu'za taka henaku hu'nazanagi, ti nakrinaze. (Eks-Uti 14:21-31)

³⁰Israeli vahe'mo'za Anumzamofonte zametinti hu'nazagu, 7ni'a knafina Jeriko kumara kagizageno, vihu keginamo'a fragu vaziramine. (Jos 6:12-21) ³¹Rehapu monko a'mo'agi Anumzamofonte amentinti nehuno, tare afure vahetrena znaza huno zanazeri frakinegu, kuma ane vahe'mo'za keontahiza vahema zmahe frifina agrira ahe ofrine. (Jos 2:1-21, 6:22-25)

³²Hagi na'ane hu'na mago'anena hugahue? Gidionima, Barakima, Samsonima, Jeptama, Devitima, Samueliki, kasanampa vahe'mokizmi zamagenkema tamasamisua knani'a nagrira omne'nene. ³³E'i ana zamentintima haza vahe'mo'za ru kumate vahema ha'ma huzmantazana zmagatenere'za, fatgo zamavuzmava hazagu huvempama hu'nea zana enerizageno, laionimo'a zmaheno none'ne. ³⁴Zamagra tusi'a tevema nereantevea resu nehazageno, kazintetira zamahe friga osu'naze. Zamagrira hanavezmi omaneneanagi hanave vahe nese'za, hapina hanavetiza ha' vahe zamia zamarotago hu'naze. ³⁵A'nemo'za zamavesi nentaza vahe'ma fri'nea vahera azeri otige'za nezmavrazageno, mago'amokizmia kanona zamizanagi, Anumzamofona otre kazigazi hu'za amage'anteza nevu'za, zamagra fripinti oti'za knare zmasimuma erisaza zanku antahintahi hu'naze. ³⁶Mago'amokizmia kiza zokago ke hu'nezamante'za sefu kanonkeve zamiza zmvufga zmahe tragatrago nehu'za, mago'amokizmi'a kina rezmante'za zamavre'za kina hu'nezmantaze. ³⁷Mago'amokizmia have knonu zamahe nefrizageno, mago'a mokizmia sonteti refragi tare nehazageno, mago'amokizmi kaziknonu zamahe fri'ne. Hanki mago'mo'za sipsipine meme akrute kukena nehu'za, zamagara netegen, zmazeri haviza hu'naze. ³⁸Ama

mopafi vahe'mo'za knarera huozamantege'za, ka'ma kokampine, agonafine, have kampima, kerigampina masetere hu'za vano hu'naze.

³⁹E'i ana maka vahe'mo'za zmentinti hazagu, Anumzamo'a hugnare huzmantene. Hu'neanagi Anumzamo'ma huvempa huzamante'nea zana e'orine'za fri'naze. ⁴⁰Ama anazantamina Anumzamo'a knarezantami retro hurantegeneno me'neankino, zamagrama koma erizankura Anumzamo'a avenosianki, tagranema magoka omerisunegu retro hurantene.

Jisasinte negeta tamentinti hanuna naneke

12 ¹E'i ana hu'negu korapama Anumzamofontema zamentintima hu'naza vahe'moza, hamponkna hu'za regagirantenazagu, tazeri knama nehia zane, kumimo'enema rugagino tazeneria zana netreta, Anumzamo'ma tagima hu'nea agamareno tragi zokagopina tagareta kazigazi huta vanune. ²Tagra tavuraga Jisasinte kentesune, tamentintima azeri knarema huzamofo agafa'a mani'ne. Na'ankure Agranena musezamo avega'antenegeneno, agazegura osuno kazigazi huno knazana erino keka zafarera vuteno, menina Anumzamomofo azantamaga kaziga mareri agaterenea tratera mani'ne.

³Kumi vahe'mo'zama e'inahukna knazama Jisasima amizageno kazigazi huno erino vu'neazanku, nentahita tamagu'a kragogo onkita tamentintia otreho. ⁴Kumi'ma agaterenaku'ma hama hutama e'nafina, korana oraginaze.

⁵Hagi tamagra tamagekaninazo, Anumzamo'ma tamazeri hanaveti nanekema mofavre naga'agna huno tavumaroma anteneana anage hu'ne, ***Mofavre'nimoka Anumzamo tamavumaroma antesia zankura amnezane huta antahi oza osiho, tamazeri fatgoma hunaku'ma hanave kema nehanigeno'a tamagu'amo'a kragogo onkino.*** ⁶***Na'ankure Anumzamo'a avesinte'nemofona, azeri fatgo nehie. Na'ankure Nagri mofavre huno himofona, kano amino azeri fatgo nehie*** hu'ne. (Prov-Knr 3:11, 12)

⁷Anumzamo'a Agri mofavregna hu'nageno knazana neramie hutma nentahita kazigazi huta knazana erita viho. Na'ankure ina mofavremomofo nefa'a avumrora nonte huta hugahune. ⁸Anumzamo'a ana miko mofavre zga'a zamazeri fatgo nehie. Hagi kagrima kazeri fatgoma osanigenka, kagra nerera'ene nefa omani mofavregna hugahane. ⁹Hagi ama mopafi nerafaza tazeri fatgoma hazageta antahinezamune. Hagi tagrama avamupi, Nerafa agorga anteramita manisunana manivava osugahunu? ¹⁰Na'ankure ama mopafi nerafaza antahi'naza avamente onasia kafufima manisunku tazeri fatgo nehaze. Hianagi Anumzamoma tazeri fatgoma nehia zamo'a knare'zantfa hu'negu, Agri ruotage zampina manigahune. ¹¹Avumroma antezana musezana omane'neanki atafi ufregahie. Hianagi e'inahukna kantema maninesuno'a, henka mizana arimpa fru erino manigahie.

¹²E'ina hu'negu hanave'a omanea kzane kahirahima nerea krena erinte fatgo huo. ¹³Kagamoma vania kana erintefatgo nehugeno, hanavezmi

nomanegenog zamagamo haviza hu'nesia vahe'mo'za, oti hanavenetiza trakara osu'za kavaririza viho.

¹⁴Miko vahe'enena hanavetinka karimpa fru hunka nemaninka, mani ruotage nehunka, agru hunka manio. Na'ankure mni ruotage osunesimo'a Ramofona onkegahie. ¹⁵Anumzamofog asunkuzampintima evuramizankura ogava agava hiho. Atrenkeno tamarimpa hezamo'a, tamagu'afina akara heno hazenkezana avreno omena, anazantetira miko vahe'mo'za havizana osiho. ¹⁶Atrenkeno kefo avu'avazamo'a tamazeri traka nosina, koma Isoma Anumzamofog amagena hunenteno, ese mofavremo eri asomuma atreneakna osiho. ¹⁷Henkama ana asomuma erinakura agu'areti zavineteno, agu'a rukrahe huno asunkura hu'neanagi agra e'orine. (Jen-Agf 27:30-40)

¹⁸Tamagra ama mopafi Sainai agonare teve anefa nehigeno, haninenkigeno, hanave zahoko netigeno, Israeli vahe'mo'za hu'nazankna agonare ome'naze. ¹⁹Ufe neregeno, mago vahe'mo kezatino nehige'za, Israeli vahe'mo'za zamagogogu nehu'za, Mosesena asamiza hugeno taganeno hu'naze. ²⁰Na'ankure Anumzamog ma zamasimia nanekegura koro hu'naze. **Zagakafamo'enema ana agonarema erava'o hanigenka havenu ahefriho** hune. (Eks-Uti 19:13) ²¹Ana zama fore'ma hige'za ke'naza zankura tusi koro nehazageno, Mosese enena tusiza huno koro nehuno, **nagranena nahirahi neregena koro nehue** huno hu'ne. (Eks-Uti 19:12-22, 20:18-21) ²²Hu'neanagi kagra ko Saion agonare, kasefa huno mni'nea Anumzamofog kumapi monafinka Jerusale kumate, hampriga osu'nea ankerog kevumog'za muse hu'za mni'nafi ehanatinane. ²³Kagra Anumzamofog zage mofavremokizmi zamagi'a monafinka krentenege'za atru hu'nafi e'nane. Kagra Anumzamofonte mika vahe refkog nehia Nete e'nane. Miza sezamantege'za fatgo huza agru huza mni'naza vahe'mofog avamuzmimo mni'nea kumate kagra e'nane. ²⁴Jisasi'ma amuno ne'mog ma kasefa hagerafi huvempa kema huno kora tagitre'nea koramog, Ebeli korana agaterenea Nete e'enane.

Kva hanuna naneke

²⁵Kema neramasamia Anumzamofog kema rutregezankura kava hiho. Na'ankure Israeli vahe'mo'za Sainai agonareti kema zamasamige'za rutagre'nazana Agrira agate'orenazanki, tagra inakna huta monafinti kema rutragesunana Agrira agateregahune? ²⁶Agrama Sainai agonare'ma kema nehigenog, agerumog ama mopa azeri tore hu'ne. Hianagi Agra huvempa huno, **Nagra mago'anena mopagera eritore osugahuanki, monane eritore hugahue** hu'ne. (Hag 2:6) ²⁷E'inahu kema hu'neana, Anumzamog ma ana miko tro'ma hunte'nea zantamimog tagosi hanigeno, tagosi'ma osania zantamimog mevava hugahie.

²⁸E'ina hu'negu tagrama e'neruna kumara eri tagosi osu hanavenentake kuma e'nerune. Hu'negu Anumzamofona muse hunenteta, tagu'a

anteramita Agri'ma avesinigeno muse hania mono huntésune.

²⁹Na'ankure tagri Anumzamo'a srasra huno teno erivgare tevegna hu'ne.

Mono nagamo'za ovesinte avesinte hnaza zamofa naneke

13 ¹Mono nagamota ovesinte avesitema hu avu'ava'zantamimo'a meno vino. ²Ketma antahitma osu'nesaza vahe'ma ne-esagetama nontamifi zamavrente zankura tamagera okanino. Na'ankure mago'amo'za korapara ontahine'za nozamifina znavrentenazana, ankeró vahe anara huzamante'naze. (Jen-Agf 18:1–19:1) ³Hagi kina nompima mani'nesamokizmia kagerakani ozmantenka, kagranema kina nompima mani'nenoma hiaza hunka, kagesa antahizamio. Vahe'mo'za zmazeri haviza hanage'za zmatazampima mni'nesaza vahe'mokizmia, tamagera akani ozmanteta, tagranema tata zampima mni'nenoma hiaza huta knazmia eriho. ⁴Aravema huno a'ane ve'anema manifatgoma huno mni'zana, raza amunontamifina meno, hagi aravema osu' vahe'mo'ma monkozama hanimofone, koma aravema hu'nesimoma atreno, ru vene a'ene monko avu'ava'zama hanimofona, Anumzamo keaga huzmantegahie. ⁵Zagoguma avesi avesi huntézankura kava huo, anama erinesanama'agura museho, na'ankure Anumzamo'a anage hu'ne, ***Nagra kagrira onkatre'na, Nagra namagena huogamigahue*** hu'ne. (Diu-Kas 31:6-8, Jos 1:5) ⁶Hu'negu tagra antahinemita, hanavetita anage hugahune, ***Ramo'a nazahina mani'nogu nagra korera osugahue. Na'a vahetfamo'a hunantegahie?*** hugahune. (Sam-Zga 118:6)

⁷Vugotama huramantenaza vahe'mozama Anumzamofa nanekema tamasminaza kegu tamagesa antahiho. Nomani zazmia refako huta negeta tamentintifina, zamagrikna huta maniho. ⁸Jisas Kraisi'a okima mani'neakna huno menina mani'nenó, anahukna huno hakare'a knafina manivava hugahie. ⁹Hu'negu atrenkeno ruzahu ruzahu kasefa antahintahizamo'a tamavazu huno afetera ovino. Tamaguamofona atrenkeno Anumzamofa asunkuzamo tamazeri hakavetino, mago'amo'za znavu'zmava'zama avaririza ne'zama retro'ma hu'za nezamo'a, tamazeri hanavea notie. ¹⁰Kre sramanavu itatia, tagrira me'neankino, seri mono nompima eri'zama eneri'za prisi vahe'mo'za onetfa hugahaze. ¹¹Jiu vahe'mokizmi znavu'znavapina vugota prisi vahe'mo'za kumimofa nona hu'za zgagfa korana eri'za ruotage'ma hu'nefinka unefraze. Hianagi zgagfamofa zamavufga eri'za kuma'mofona fegi'a negraze. (Lev-Pri 16:27) ¹²Ana hu'negu Jisasi'a vahe'amokizmi kumizmi zmazeri agruma huno zamazeri ruotge hanigura, rankumamofa kasampinti atiramino fegia avufga aguzaruno korana tagine. ¹³Hu'negu kuma'mofa fegu'a Agrite nevuta, Agrama hu'neaza huta tagazezana erigahune. ¹⁴Na'ankure ama mni'nonana rankumatia zoka kumate mani'none, hu'negu tagra henkama ne-ea rankumaku avega anteta mani'none. ¹⁵Ana hu'negu Jisas Agifi,

tagrati tavufga Anumzamofona ami vganereta, ra agia ami'vava nehuta, Agri Agima tagipinti huama hunazamo rga'a fore nehie. ¹⁶Hagi knare tamavu'tamavama nehuta, atupama hanaza vahe'ma zamaza huzankura tamagera okaniho. Na'ankure e'inahukna avu'avapima tagra'ama amivgareta amizankura, Anumzamo'a muse nehie.

¹⁷Vugotama hurmantenesimofona agorga nemanita, ke'zamia amage anteho. Na'ankure zamagra tamagri tamagu'are kegva nehu'za, henkama Anumzamofono refako huzampina tamagri tamagenkema hu'ama hanaza vahe mani'naze. Hagi ana eri'zama erisazana zamatrenke'za musezampinti e'neri'za zamata e'oriho, na'ankure ana zamo'a tamaza osugahie.

¹⁸Nunamuna huranteho, tagra antahunana antahintahitimo'a ama' hu'negeta mikazama hanumpina fatgoza hanunegu tavenesie. ¹⁹Nagra hanavetina tamantahigoanki, nunamu nehinkena tamagritega koftahu'na aneno.

Hu vgare naneke

²⁰Hagi arimpa fru Anumzamo, ugagota sipisipi afu kva ne' Ranti Jisasina fri'nefinti azeri oti'nemofu korama'areti, mevava hagerafi huvempa ke hu'ne. ²¹Agri avesizama'a avaririzantema upama hanarera, maka knare zama'areti tamazeri knare hugahie. Hakare'zana Jisas Kraisimpi nehanunkeno Anumzamo'a muse hanie. Hakarea ra agia Agrake erivava hanie. Tamage.

²²Hagi nafuheta hanavetina ama upa avoma kreramuana tamagesa antahi'so'e hiho. ²³Nagra tamasamuana, ko nerafu Timotina kinafinitira kazufetre'naze. Agrama esige'na, avare'na tamagritega vugahu'e. ²⁴Kava vahetamine, maka mono naga'motarega musenke atreramantoe. Italima mani'naza mono nagamo'zanena musenkea hurmantaze. ²⁵Anumzamofu asunku zamo'a maka nagamotare mesie.

Jemisi Krenea Avontafemofu Naneke

Jemisi kre'nea naneke

1 ¹ Jemisi'na Anumzamofone Ranti Jisas Kraisi kazokzo eri'za ne'mo'na, 12fu'a naga'nofi'ma mopa atretma kokankokama umani emani hu'naza nagamotarega, ama avona kreneramue.

Amentintifi oti hanaveti'neni knaza erizamofu naneke

² Nenfugta knazampima ufresutma, muse zane hutma tamagesa antahiho. ³ Na'ankure tamagra antahi'naze, tamentintima reramaheno ke'zamo'a, knazampima oti hankavetineno, knazama kazigazi huno erino vu'za erifore nehie. ⁴ Hagi maka kna tamagra oti hanavetita, knazana erita nevinkeno, ana tamavutmavazamo'a hanavetino nevina, Anumzamofu avu'avama huzampina, atupara osnageno, fatgo huno knare hugahie.

⁵ Hianagi iza'o knare antahintahigu'ma atupama hanuno'a, Anumzamofu antahigenkeno amino, maka vahe'mo'za nunamu hu'za Agri'ma antahigazamokizmia, rimpa heozmante amne nezmiankino, amne tamigahie. ⁶ Hu'neanagi antahigesimo'a, amentinti nehuno tare agu'agesaretira antahionkeno, na'ankure tare agu'agesareti'ma antahigemofona, zaho erino hage rimomofu eri kranto kranto hiankna nehie. ⁷ E'inahu vahe'mo'a Ramofontegati mago'zana erigahue huno agesa ontahino, ⁸ agra tare antahintahine vahe mni'neankino, mika zama hifina magoke kante anteno nosie.

⁹ Mago'mo amunte omne'nenigeno, Anumzamofu amage nentenimo'a muse hino, Anumzamofu avurera ra agi erine. ¹⁰ Hu'neanagi Anumzamofu feno ne'ma azeri anteramisigeno mani'nesimo'a musehino. Na'ankure feno vahe'mo'za trazamofu mosre'amo hianka hu'za ko fanane hugahaze. ¹¹ Na'ankure zgemo'a amuhu'ane marerino, ana trazana te hagage higeno, amosre'amo'a hagage huno evuramigeno, konariri'amo'a fnane nehie. Anahukna hu'za feno vahe'mo'za, ana fenozmine fanane hugahaze.

¹² Rehe'za ne-esigeno kazigazi huno agatereno vania vahe'mo'a asomu'ma erisiana, kini fetori eriankna huno manivava asimura erigahie. Anumzamo agri avesinentaza vahe ko huhampri zamante'nea, asimu erigahie. ¹³ Mago zamo'ma avazu hanigeno rehezampima ufresuno'a, kefo avu'avazanteti Anumzamo'a renahenoke huno huonteno, na'ankure Agra mago vahera havi avu'avatetira rehenonkegahie. ¹⁴ Hu'neanagi mago magomofona agri'a kefo avesi'zamo, avazu huno rehezampina avarenente. ¹⁵ Hagi havi avu'avazahu avesi'zamo, a'nemo amu'ene hiankna higeno, kumi erifore higeno, kumi'mo hagerama nehuno'a, fri'za eri fore nehie.

¹⁶ Navesineramantoa nafuhetma tamagra'a reramatga osiho. ¹⁷ Mika knare huno fatgo hu'nea, musezana anagamuti eneramie, monafinkati masazamofo Nefantegati ne-e, avu'azama'amo zahe osuno turinamo hiankna huno zaza huteno, atupa huteno osugahie. ¹⁸ Mika'zama troma hu'nea zamofonese ese rga'a manisunku, Agra'a avesite tamage kereti tazeri fore hu'ne.

Ke antahino avariri zamofonaneke

¹⁹ Knare nafuheta, ama kea antahi so'e hiho, mika'motma ame hutma kea antahigahazanagi, akoheta kea nehinkeno tamarimpa oheno.

²⁰ Na'ankure vahe'mofonorimpa he'zamo'a, Anumzamofonofatgo avu'avazana avreno omegahie. ²¹ E'ina hu'negu mika agru osu avu'avazana erinetreta, tamagu'afima kefo avu'avazama me'nesiana erinetretma, anteramitma, tamagu tamema tamagama vazisia nanekema Anumzamo'ma tamagu'afima hankre'neana eriho.

²² Amnea Anumzamofonoke'agera ontahio, kagraka'a regavatga hugahananki, ana nanekemoma hania kante antenka amage anto.

²³ Mago'mo'ma kema nentahino, ana kema amage'ontesiana, agra kapopi avugosa keteno, ²⁴ atreno nevuno anama agra avugosa ke'neana, ame huno age'neknia kna nehie. ²⁵ Hu'neanagi, inamo'ma kinafinti tazeri fru nehia, hentofa kasegefima avuma ke ankenereho, kazigazi huno avaririno antahinesia naneke age'okanino amage'antesimofona, mika'zama hanifina Anumzamo'a, asomu huntegahie.

²⁶ Mago'moka mono vahe'mani'noe nehunka kagefu'na kegva osnanana, kagra'a regavatga hanankeno mono kamo'a amnezankna hugahie.

²⁷ Agru huno fatgo monoku'ma Anumza Nafatimofona ave'nesiana, e'i megusa mofavre'zgane, kento a'ne zga knazampima mani'nesazana kegva hunezmanteta, atrenkeno ama mopafi kefozamo'a tamazeri pehena osino.

Magoke avamente vahe'ma tavesi zmantesanamofonaneke

2 ¹ Nafuhete, hanavenentake msa'ane Rantimofonon Jisasi Kraisimpi tamentinti nehaza vahe'motma, rezogitma mago vahekuke tamavesi onteho. ² Atru hu'nesafima mago feno ne'mo hentofa kukena

erinehankreno, korire asa eri'nentanino efresnigeno, mago amunte omame ne'mo pehenage kukena huno monoma nehanafima efresiana, ³hentofa kukena huno ea feno ne'mofo kesga huntenka anage nehane, ama knare trate emanio nehunka, amunte omame pehenage kukena huno ea ne'ku, amure otio huge ama nagafi mopare emanio nehane. ⁴Tamagra'a amu'nontamifina vahe zmazeri havizahu naneke nehutma, kefo antahizanteti vahera refako nehazafi? ⁵Antahiho, knare nafuheta, Anumzamo'a ama mopafi vahe zamavufi zamunte omame vaheku' zamentintifi feno vahere huno huhampri zamanteno, Anumzamofu kuma erisanti haregahaze huno Agri'ma avesinentaza vahe huvempa huozmante'nefi? ⁶Hu'neanagi zamunte omame nagara zmazeri haviza nehaze. Feno vahe'mo'za knaza neramami'za, tmavare'za naneke hu tratera nevazafi? ⁷Jisasi Kraisi knare agi'ane Ne'mofo nagama mni'nazana, zamagra zmazeri haviza osu'nazafi? Izo zmagra zmazeri haviza hu'naze.

⁸Fatgo hutma avontafepima me'nea kasegema amage'antesnutma, ***tvaontamire'ma nemanisaza vahe'mokizmia tamagraguma tamavesi nentesazaza hutma rumokizmia tamavesi zmanteho***, anama hanutma tamage avu'avaza hugahaze. ⁹Hu'neanagi rezogitma mago vahekuke tamavesi antesazana, kumi hanageno kasegemo'a tamazeri ama'hina, kasegea hantagi vahe manigahaze. ¹⁰Na'ankure, aza'o ana mika kasege amage'nenteno, anampinti Anumzamofoma magoke kasege'a ruhantagisiana, ana mika kasege ruhantagigahie. ¹¹Na'ankure ***rumofo vene, a'ene monko'zana osiho*** huno hu'nea Anumzamo ***vahera ahe ofriho*** huno hu'ne. E'ina hu'negu kagrama rumofo vene, a'ene monko'zana osugahananagi, vahe'ma ahe frisazana e'i kasege hantagi vahe manigahane hu'ne. ¹²Hagi keaga tamifine, tamavu'tamava hanafina, kinafinti tamavre atre'nea kasegemo refako hurantegahie hutma antahiho. ¹³Na'ankure vaheku'ma kasunku huozmante vahe'moka, Anumzamo'a asunkura huogantegosie. Hianagi kagrama vahe'mofoma kasumantagintesanana, Anumzamo'a kagri'enena asuragigante'na vahe'ma refko huknarera, keaga hugante kemofona agateregahane.

**Amentinti nehuno, knare avu'ava osaniana, ana
amentintimo amnezankna hu'zamofu nanake**

¹⁴Nafuhetma, mago ne'mo'ma namentinti nehue nehuno, ana amentintima avu'avapima erinteno osaniana nankna azahu'za erigahie? E'inahu amentintimo'a aguvazigahifi? I'o. ¹⁵Magoke magoke knazupa mago negafu'o, negasaroma kukenaguro, ne'zankuma atupa hu'nenigenka, ¹⁶knareki vuo nagesa antahuana Anumzamo'a knare hugantegahie nehunka, knare kukena nehunka ne'zana negamu huo hunka hunentenka, atupama hunesiazama azama osnanana, e'i kemo'a inankna huno aza

hugahie? ¹⁷Amentinti hu'zamo'enena e'inahu kna hu'ne, tamentinti nehune nehuta, avu'avapima erinteta osanunana, tamentintimo'a amne'zankna hugahie. ¹⁸Ana hu'neanagi mago'mo'a anage hugahie, mago'amokizmi zamentinti me'geno, mago'amokizmia knare erizama eri zamavuzamava me'ne. Nagra anage nehue, knare erizanka'a omnesigena, nagra kamentintia onkegosue. Hianagi nagra knare eri'za niareti kagrira, namentintini'a kaveri hugahue. ¹⁹Tamagra magoke Anumza mani'ne hutma tamentinti nehazana, e'i tamage, havi hankro'mo'zanena anahukna zamentinti nehu'za, kore nehu'za zamahirahi nerege'za mani'naze. ²⁰Kagra negi nagi vahere! Antahi ama'ma huzankura nontahino, eri'zama'a omane kamentintimo'a amnezankna hugahie. ²¹Nerageho Abrahamu, nemofu Aisakima kre sramanavu itare, Anumzamofoma ami'nea zankuma, fatgo nere huno hu'neana ontahinazafi? (Jen-Agf 22:1-14) ²²Antahi ama huo, Abrahamu'ma amentintima hiazamofona avu'avapi erinteno, ana avu'ava higeno amentintima hu'neazana erignare hu'ne. ²³Hagi avontafepi hu'nea kemo'a efore hu'ne, **Abrahamu'a Anumzamofonte amentinti higeno, Anumzamo'a fatgo nere hunte'ne**, ana hu'negu Anumzamofu rone'a mani'ne hu'za vahe'mo'za nehaze. (Jen-agf 15:6) ²⁴Ana hu'negu antahiho, tagra Anumzamofu avure'ma fatgo vahe'ma manisunana, tamentinti'retikerompaga, tamentintima nehuta tavutavapima erinteta hanunkeno, fatgo vahere huno hurantegahie. ²⁵Anahukna huno, Rehapu monko a'mo'a afure vahe'ma noma'afi zamavre frakiteni, ru kampingi zamavre atrege'za vu'naza avu'avazama'amo, Anumzamofu avure fatgo ara mani'ne hu'ne. (Jos 2:1-21) ²⁶Tavufafima tasimu'ma omanesiana frigahune. Hanki anahu'kna huno tamentinti'age nehuta, tavutavapima eriontesunkeno'a, tamentintimo'a frino amne'zankna hugahie.

Tagefu'namofo kegva hanuna naneke

3 ¹Nenafugtane nasarahetanena rempi huzami vahera rama'amota manisune hutma ontahiho, na'ankure tamagra ko antahi'naze, maka rempima hunezamumota Anumzamo'a hanavetino keaga hurantegahie. ²Na'ankure rama'a zampi havizana nehune. Hagi iza'o agrama kema hanifima fatgo osu kegaga huzanku'ma kva'ma hanimo'a, agra soe ne'kino amne mika avufgamofona kvahu so'e nehie. ³Hanki osi ainia hosirimimofo zamagipi tamage'antesie huta nofi renteta, zamazeri rukre hanunkeno'a, amne hosimofo mika avufgamo'a tamage'anteno rukre hugahie. ⁴Hagi vente'mofone keho, tusi'aza me'neanagi ra zahomo retunefe. Hianagi osi zotareti, inantego ventema azeri ne'moma vunakuma hirega, azeri rukre higeno nevie.

⁵Anahukna huno agefuna osi avufgamo'agi, tusi'a veganokno ageru rugahie. Osi teve regregeno, ra avo'no traza afe teaza hugahie! ⁶Hagi

tagefunamo'a tevegna hu'ne. Tagefunafina kefo kemo avite'neankino, amne ana miko kavufamofona eri haviza hugahie. Amne ana miko kavufga teve kampina avrenente. Ana tevea teve kuma'mo taginte'ne. ⁷Na'ankure mika ruzahu ruzahu afi' zagakfama, namazgama, zmasaguregati regrarohe'za vano nehaza zgaramima, hagerimpi zgamofona vahe'mo'za azeri agazone neheze. ⁸Hianagi vahe'mo'a, agefunamofo kegva krino, azeri agazonea osugahie. Vahe'mofo azeri fri avuatgazamo avitegeno, kefo kemoke atirami vava hugahie. ⁹Tagnefunanu Rantimofone, Anumzanena ra znagia nezanamita, ana tagnefunanura Anumzamo agra'gna retro huzmente'nea vahe'mokizmi sifna kea hunezmantone. ¹⁰Ana agipintike asomu kene, sifna kenena atineramie. Nenfugta nasarehetanena e'inhau'zana omneno. ¹¹Amne magoke kampuipintira, tintfane, hagerinena ehanatigaha'o? ¹²Nenfugata nasarahetanena, fiki zafamo'a olivi rga amne rentegahifi, krepri zafamo'a, fiki raga rentegahio? I'o. Anahu kna huno hagerimpintira tintfana fore osugahie.

Knare antahintahizamofa naneke

¹³Aza amu'nontamifintira ama antahintahine mika zampima anihu vahera mani'ne? Ana knare antahintahi'a atrenkeno knare erizama'amoki, avufa anteramino mni avu'ava zamo, erinte ama hino. ¹⁴Hianagi vahe'mofoma antahimugi ante'zamo'ene kagraguke antahizamofa kagu'afi mevitenenigenka, kavufga mreri kavukvatetira tamage kemofa eri amnezanknara osuo. ¹⁵E'inhukna havi antahintahizana, monafintira nomeanki, ama mopafi kefo hankrotegati ne-e. ¹⁶Krimpa mugizane, kavufa antemareri'zama me'nesifina, miko'mako havi avu'ava'zane fatgo osu'zana me'nenigenka kegahane. ¹⁷Hu'neanagi monafinti erami'nea knare antahintahizana, ese'zana agru huno mani antahintahiza me'ne. Rimpa fruma huno mani'zane, miko kna akoheno mani'zane, rumofo ke antahimi'zane, asunku hu'zane knare'zane aviteno nemanie. Mago'mofonkuke hu'zana omaneno tamage avu'avake hu'zane. ¹⁸Rumokizmima zamarimpa fruma erinezamiza vahe'mo'za, zamarimpa fruzamofa avimaza nehankrazanki'za, nena'ama vasagesazana fatgo avu'avaza hamaregahaze.

Anumzamofonte urava'o hanuna naneke

4 ¹Na'amo amu'nontamifina kefra hu'zane, ha' hu'zana eri forenehie? Havi tamavesi'za tamagu'afi me'neni ha'nerea zampinti efore nehifi? ²Mago'a zanku tamave'nesigetma kenunu nehazanagi e'norize. E'ina nehutma vahera zmahe nefrizanagi anazana e'norize. Rumofo zankura ke hakare nehutma franevazitma hara nehazanagi, mago'zana e'nori'ze. Na'ankure Anumzamofona tamagra nunamuna hutma antahinonkaze.

³Tamagrama antahigaza zana e'norize, na'ankure knare osu antahintahireti antahigazagu e'norize. Anama tamisia zana eritma tamagrama tamavenesia zante atregahaze. ⁴Tamagra monko a'nemo hiankna hutma, ru anumzante mono hunentaza vahe'motma, ama mopafi avu'avazamofonte'ma tragoneteta ana avu'avama hanazana, Anumzamofona ha'rentegahazanki tamagra ontahi'nazo? E'ina hu'negu iza'o ama mopafi zante tragotesimo'a, Anumzamofa ha' vahe fore nehie. ⁵Avontafemo'a anage hu'neana, amne ke hu'nefi? Anumzamo'ma Avamu'ama tagu'afi antegeni mani'neana, Agri agorga manisiegu avenesie. E'ina'ma osigeno'a rimpagna nemie. ⁶Hu'neanagi agra razampi asuraginerante, e'ina agafare avontafe'mo'a anage hu'ne, **Anumzamo'a zamufga antemareriza vahe ha'renezmanteno, zamufga anteneramiza vahera asuraginezmante.** ⁷E'ina hu'negu Anumzamofa agorga anteramita nemanitma, Satana ha'renteta retufe atrenkeno tamatreno freno. ⁸Anumzante erava'o hinkeno, Agranena tamagaritera erava'o hino. Kumi vahe'motma tamazana sese nehutma, tare tagufa antahintahine vahera tamagu'a eri avusese hiho. ⁹Kumima nehaza zankura tamasunku nehutma, krafa hutma zaviteho. Kiza zokagoma nehazazana netretma, zavi krafa nehutma musema nehaza zana atretma tamasunku hiho. ¹⁰Anumzamofa avurera tamagra tamavufga anteraminkeno, Agra tamazeri sga hino.

Rumokizmi huhaviza osanuna naneke

¹¹Nafuhetma, huhaviza ohunte ahunte osiho. Iza'o nefuma huhaviza huntege refakoma huntesimo'a, agra kasegemofa huhaviza nehuno, refako nehie. Kasegema refako'ma hananana, kasegea amage nontananki, kasege refako hu vahe nemanine. ¹²Kasege neramino, refakoma hurante Nera Anumzana magoke mani'ne, Agrake tagu'vazige, tahe fanane huge hugahie. Hu'neanagi tamagra azagata neramafuna refako hunentaze?

Henkama esnia zamofa naneke

¹³Menina antahiho, anahukna kema nehazamotma, menino okino rankumapi vuta, mago kafufi umanineta, zago eri'za omerita, mago'ane zgoa (win moni) trohugahune huta hugahaze. ¹⁴Okima tamagrite'ma fore'ma haniazana ontahi'naze. Tamagra nanterampi hamponkna hu'nazankitma osi'a kna manitetma fanane hugahaze. ¹⁵Tamagra anage hugare, Anumzamofa avesima me'nesigeta, tagrama tasimu erita manisuta, e'izana huge, amazana hugahune huta hugaragi, ¹⁶knare hu'none hutma tamufaga marenerize. Ana mika tamufga marerizana kefo avu'ava'za nehaze. ¹⁷E'ina hu'negu, iza'o fatgozama hu'zama antahineno, anazama osanimo'a kumi hugahie.

Feno vahe'mofa zmavumro naneke

5 ¹Menina kea antahiho, feno vahe'motma, tamasunku huta zavi'ateho, na'ankure tamazeri haviza hu'zana tamagrite ne-e.

²Tamagri feno zantamimo'a kasrigeno, hakanomo kukenatamia traga nehigeno, ³koline siliva zgotamimo'a krogro heno amnezankna hu'ne. Fenzana eri atru nehazankino, kegaga refkohu knazupa ana krogro he'zamo'a, tevegna huno tamavufga teno erihna hugahie. ⁴Antahiho, hozatamifi eri'za eneriza vahe'mofo, mizama ozami'naza mizamo'a ranke huno keaga huneramante. Hoza hamare vahe'mofo zavi krafagemo'a, hanavenentake Ramofo agesafi unefre. ⁵Ama mopafima manizana so'e nomanizampi nemanitma, mika tamavesi'zana eriknare nehaze. Tamagra knare neza nenetma tamazeri afovage nehutma, tamahema fri'nianknare neaze. ⁶Tamagri'ma ha'ma huoramante'za hazenkezmia omne vahera, huhaviza hunezamanteta zamahe nefrize.

Knazama akoheno manineno erizamofu naneke

⁷Nafuhetma, tamarimpa antefru hutma mani'netma, Ramo'ma esigura avega anteho. Hoza vahe'mokizmi zamageho, zamarimpa antefru hu'za mani'ne'za, hozazamifima e'se ko runtege, vgare ko runtenige'za hozazamifinti knare nezama hamarenaku avegama nentazankna hiho. ⁸Tamagranena akohetma mani'netma oti hanavetiho, na'ankure Ramo'ma esania knamo'a kofta hu'ne. ⁹Nafuhetane nasarahetanena, keaga refkohu trate otisageno refako huramantegahianki amu'nontamifina ha' orente arente osiho. Refako hu nera kafante otine! ¹⁰Nafuhetma, Anumzamofu Agifima nanekema hu'naza kasnampa vahe'mo'za, akohe'za mnine'za knazama eri'zamofona ko huraveri'naze. ¹¹Antahi'naze, knazampima ufre'za azeri agatere'naza vahera muse hiho hunezamantone. Jopu'ma knazampima kazigzi huno agatere'nea zamofu agenke'ane, henka'ama hunte'nea zamofona antahi'naze. Ramofompina asunku'zane, vahe'ma avesinteno asuraginte'zana avite'ne.

¹²Razana, nenafugatane nensarogata, monarero moparero mago'azantera huntetma huvempa osiho. Iza'o huvempa hunaku'ma hanimo'a, izoma hunakure hanimo'a, i'zo hino, i'o hunakuma hanimo'a, i'o hino, ana'ma osanimo'a henka keagare otigahie.

Tamentinti nehuta nunamu hanunazamofu naneke

¹³Amunontamifima magomo'ma hazenkefi mani'nenuno'a, Agra nunamu Anumzamofonte hino. Amu'nontamifima mago'mo'ma musema nehanuno'a, agra Ramofo agi erisagahu zgame hugahie. ¹⁴Amunontamifina mago'mo'ma krime erinenuno'a, Agra mono kva vahe ke hanige'za, nunamu eme hunente'za Anumzamofu agifi masave frenteho. ¹⁵Hagi zamentinti nehu'za nunamu huntisageno, Ramo'a kri'ma eri'nea vahera azeri neganamreno azeri onetino, kumi'ma hunesiana, kumi'a atrentegahie. ¹⁶E'ina hu'negu kumitamia huama hutma kumira otrente atrente nehutma, nunamu ohunte ahunte nehinkeno, Ramo'a

tamazeri kanamareno, fatgo ne'mofo nunamumo'a hanavenentake hu'neankino eri'za erigahie. ¹⁷Ilaija'a tagri kna ne'mo, ko'ma orinogura hanavenentake huno nunamuna higeno, mopafina 3'a zagekafugi 6si'a ikampina kora oru'ne. ¹⁸Eteno Ilaija nunamu higeno monafinti komo'a tagirano mopafina korarigeno kavera fore hu'ne. (1 Kin 17-18)

¹⁹Nafuhetmane nasarahete, mago'tamimo tamage nanekea atreno hazamagrenesigeno, mago'mo azeri rukrehema hanigeno, ete tamage kantema esiana, ²⁰agra antahino, fri'zampinti agu'nevazino rama'a kumira refitegahie.

Pita'ma Ese Avonkrenea Naneke

1 ¹Nagra Pita'na Jisas Kraisi aposol ne'mo'na, Anumzamo'ma huhampri tamente'nea nagamotma, mopatmi atretma panini hutma Pontusi kazigane, Galesia kazigane, Kapodosia kazigane, Esia kazigane, Bitinia kazigama fretma vu'naza nagamotarega ama avona kreneramue. ²Anumzana Nafatimo'a, ko antahino keno hu'nea kante, Ruotge Avamumo tamazeri agru hu'nea nagamota, Jisas Kraisi amage'ma antageno, korama'a tagitreno sese huramante'nea nagamotma, asunku'zane rimpa fruzamo'a tamagrane aviteno mesie.

Mani vava asimuma erisunazanku amuhama hanuna zamofa naneke

³Ranti Jisasi Kraisi Nefa Anumzamofa agi'a erisaga hanune, Agri'a tusi'a asunkuzamo higeta, tagu'a rukrehe hunkeno kasefa tasimura tamigeta, Jisasi'ma friteno oti'nea zankura amuhara nehune. ⁴Ana kasefa tasimu erisanti harenunana, vga oreno, havizana osuno, fnanene osaniaza monafinka Anumzamo'a anteramante'ne. ⁵Tamagra Anumzamofonte tamentinti hazageno, Anumzamo'a hanave'areti kegva huramante'neankita, so'e hutma manigahaze. Tamagri tamahokeno tamaza hunaku retro huntengeno me'neankino, e'i anazama haniana mona mopa vgamare'nea knazupa eama hugahie. ⁶Anazama erisaza zankura muse nehazanagi, ama atupa knafina ruzahu ruzahu knazama e'nerisageno, ⁷ana knazamo'a tamentintimofona azeri ama huno, kolima tevefi kre agru huno azeri henteofaza hiankna nehiankino, tamentintimo'a koli'a agaterene. E'ina hu'negu ruzahu ruzahu knazama e'nerisageno, tamentintimo'ma hanavematino mesiana, Jisasi'ma eama hania knazupa, husga huramanteno, ra tamagia tamigahie. ⁸Hanki tamagra Agrira onke'nazanagi avesinentetma, menina Agrira onkenazanagi, Agritera tamentinti nehuta, tusi musenkase hunteta agi'a erisaga nehaze. ⁹Tamagrama tamentintima hanaza zamofa mizama'a, Anumzamo'a tamagu tamamena tamagu vazigahie.

¹⁰Hagi ama ana tahokeno taguvazizana, korapara mago'a kasnampa vaha'mo'za asunkuzamo'ma tamagrite'ma esigura kasnampa kea nehu'za,

antahige'za rezagane so'e hu'za ke'naze. ¹¹Kraisi Avamumo zamagripi mni'neni, Kraisi'ma atama eriteno, ra agima erisia zankura zmasamine. Ana nehige'za zmagra Kraisi'a inankna Ne'mo, ina zupa efore hugahie hu'za hu'naze. ¹²Zamagrite'ma eriamama hiana zmagra'a zamaza nosazanagi, tamagriku knare musenkema huama hazafina, monafinti'ma e'nea Ruotge Avamumofu hanavere huama nehaze. Ankeru vahe'mo'za anama huamama hzazama kesagura, tusiza huno zmavesi'ne.

Mani ruotge huta manisnunku Anumzamo tagi hu'nea naneke

¹³E'ina hu'negu retro huta antahintahitama nemanita, tamavufgamofu avesizana kegva negritma, ana miko amuha zantamia, Jisasi'ma eama hanigeno, Anumzamo'a tamaza hania asunkuzante anteho. ¹⁴Ke amage'ante mofavremoza nehazaza nehutma, koma ontahinetma hu'naza tamavutamavamofu avesizana ovaririho. ¹⁵Hianagi Ruotge Hu'nemo'ma tamagima hu'nea ne'kna nehuta, makazama hanafina mni ruotge hiho. ¹⁶Na'ankure anage huno avontafepina krentene, ***tamagra ruotge huta maniho, na'ankure Nagra ruotge hu'noe.*** (Lev-Pri 11:44-45) ¹⁷Tamagrama hutma nerafa'e nehaza Anumzamo'a, Agra magokemofonkuke osu Anumzankino, maka vahe'mo'za zamavuzmavama nehazare refkoa huzmantegahie. Ana hu'negu, ama mopafima zoka vahekna huta atupa knafima mni'nenarera, Anumzamofonku kore hunentetma ra agi amiho. ¹⁸Na'ankure tamagrama ketma antahitma hanazana, korapa tamagehe'za zamaza osu zamavuzmava nehaza kante nevazagu, anampinti miza seramantene. Miza seramante'neana haviza nehiazanu, silvane kolireti miza seoramantene. ¹⁹Hianagi haviza osuno afuhe omne sipisipi anenta, Kraisi mrierisa koranu miza seramante'ne. ²⁰Na'ankure korapa Anumzamo'a, monane mopane tro osu'neni, tazama hanigura Kraisina huhamprinte'ne. Hianagi menina vgare knafina tamagri'ma tamaza hanigu efore hu'ne. ²¹Kraisi taza hige'ta, fripinti azeri otino husga hunte'nea Anumzamofontera tamentintia nehune. E'ina hu'negu tamagra Anumzamofontera tamentinti'a nehutma, amuhara nehaze.

²²Tamagrama tamage kerema amagama antetma nevazazamo, tamazeri agru tamagu tamena hige'ta, neramafuma ovesinte avesinte tamagu'areti nehutma, tamaguareti hutma mago magomota ovesinte avesintea nehaze. ²³Na'ankure tamagra kasefama hu'nazana, haviza nehia avimazanteti rompage, haviza osu avimzama Anumzamofu mevava kea asimu me'nea ke'areti kasefara hu'naze. (Jon 3:1-9) ²⁴E'ina hu'negu avontafepina anage hu'ne, ***maka vahe'mo'za trazankna hunazankino, maka konariri zmimo'a trazamofu amosregna higeno, ana trazamo hagege higeno, amosre'amo evuramiankna hugahaze.***

²⁵***Hianagi Anumzamofu nanekemo'a mevava hugahiankiza,*** ama'i ana naneke huama hu'za tamasami'naze. (Ais 40:6-8)

Kasefa mofavregna huta mani'nuna naneke

2 ¹E'ina hu'negu tamagra vahe'ma azeri havizahu avu'avazane, havige hu'zane, tavrenke hu'zane, kenunu hu avu'avazane, vahe'mofo amefi ke hu'zana netretma, ²meni kasentea mofavremo aminku avesiankna hutma Anumzamofu kegura avenesita, Anumzamofu agru hu'nea nanekea e'neritma nena hugahaze. Ana nehanageno tamagu vazinoma, tamahohe ahe'nea zampina nena hugahaze. ³Hanki e'inama hutma Anumzamo'ma so'ema huneramantea zamofu haga'ama erisuta, Ramo'a so'e hune hutma hugahaze.

Jisasi'a asimu eri have mani'nea naneke

⁴Kraisi'a asimu eri have mni'nemofonte tamagra Agrite neaze. Ana havea vahe'mo'za haviza hu'ne hu'za eri atrenazanagi, Anumzamo'a huhamprintegeno, Agri avurera mrerisa have me'ne. ⁵Tamagranena asimu eri havegna hu'nazageno, avamupi mono nona kiaza nehigetma, avamupi ruotge prisi vahe'mofo nonkna nehutma, Anumzamo avesi'nea ofa Jisasimpi avamupina hunentaze. ⁶Na'ankure anage huno avontafepina me'ne, ***Keho Zaioni agonarera mrerisa have huhamprintoankino, nomofu renagentete azeri hanaveti have me'ne. Hanki iza'o Agrite'ma amentinti hanimo'a, agaze osugahie hu'ne.*** (Ais 28:16)

⁷Hanki tamagrama tamentintima haza vahe'motarera, ana havemo'a mrerisa have me'ne. Hianagi iza'zo zamentintima nosaza vahetera, ***Nogi vahe'mo'za zmvaresara higeza atraza havemo'a, nomofu renagentepinka azeri hanaveti have fore nehuno,*** (Sam-Zga 118:22) ⁸***zmagigo zamino zmazeri tanafa nehuno, zmazeri traka hu have fore hu'ne.*** (Ais 8:14) Na'ankure zamagra trakama nehazana, ke'arera amagera nontazanki'za, traka hu'za haviza hugahaze.

⁹Hianagi Anumzamo tamagrira huhampriramante'nea naga mni'neta, kinimofu prisi naga mni'neta, ruotge hu'nea naga mni'nazageno, Anumzamo'ma Nagri nagare huno hu'nea naga maninazankita, Anumzamo'ma hanimpintima tamagima huno, ruzahu msazama'arema tamante'nea so'ezama'agura huama hugahaze. ¹⁰Hianagi kora tamagra Anumzamofu vahera omni'nazanagi, menina Anumzamofu vahe mani'naze. Tamagra Anumzamofu asunkuzana e'orinazanagi, menina tamagra Anumzamofu asunkuzana eri'naze.

¹¹Navesima neramantoa nenafugta, tamagra zoka vahe mopazmi omne vahekna hutma ama mopafina mni'naze. E'ina hu'negu, tamavufamofu havi avesizamo'ma ha'ma reneramantea zampina uofreho hu'na nagra huneramasamue. ¹²Hagi maka kna tamagra megia vahe'mokizmi amunompima mani'netma, knare tamavutmava nehinke'za, zamagrama huhavizama huramantesu'za, knare tamavutamavaza zamagra nege'za,

Anumzamo'ma refkoma hania knarera, ana tamavutamava hu'naza zankura, Agi erisaga hugahaze.

¹³Tamagra Ramfonku hutma, maka kamani vahe'mofo kea amage nentetma, kini vahera ugagota hu'nagu, kezmia antahitma amage nentetma, ¹⁴Gavana vahe'mo'zanema hanaza kea amage anteho. Hazenke hanaza vahe zmazeri fatgo nehuno, fatgoza hanaza vahe husga huzmantesagu huzmanteg'e'za mni'naze. ¹⁵Na'ankure e'inahu tamavutmavama hanazana Anumzamofa avesiza avaririta fatgo nehanageno, ke ontahi neginagi zmavuzmavama nehaza vahe'mo'za kea osugahaze. ¹⁶Kina vahera omi'nazanki, fru huta mni'nagu, fru huta mni'none nehutma, ana fru tamavutamava zampina antegafita, kefo avu'avazana osutma, Anumzamofa kazokzo eriza vahe maniho. ¹⁷Maka vaheku husga hunezmantetma, maka zamentintima nehaza tamafuhe'ina zmavesinezmantetma, Anumzamofonku kore hunentetma, kini vahe'mokizmi zmagorga maniho.

¹⁸Eri'za vahe'motma, kegvama huramante'nesaza vahe'mokizmia kore huzmantetma zamagorga nemanitma, fru hu'za knarema huramante'naza kva vahe'mokizmi zamagorgagera omanita, havizama huramantesaza kva vahe'mokiminena zmagorga maniho. ¹⁹Tamagrama Anumzamofontema fatgo tamagu tamagesa antahitma mni'nenageno, havigema huramante'za tamazeri havizama hanazana, Anumzamo asomu huramantegahie. ²⁰Tamagrama haviza hu'nenage'za, havizamofa nona hu'za tamazeri haviza hanazana, mago knare'zana e'origahaze. Hianagi tamagrama knare tamavutmazama nehanage'za, tamazeri havizama hanazana, Anumzamo'a asomu huramantegahie.

Kraisi avu'avaza negeta avaririsunazamofa naneke

²¹Na'ankure tamagrira ana knaza erisazegu tamagi hu'ne. Kraisi enena anahukna huno atazana erino huraveri hu'neankita, Agrama hu'neankna tavutava huta avaririgahune. ²²*Agra kumira osuno, mago havigea agipintira osu'ne.* (Ais 53:9) ²³Hanki Agri'ma huhavizama huntageno'a, zamagrira nona huno huhavizana huozmante'ne, Agri'ma azeri havizama huntageno'a, zamagrira nona huozmanteno zmazeri havizahu kea osuno, Anumzamo fatgo huno refko nehimofo antahi nemino, ana knazana Agri azampi antene. ²⁴Agra avufare kumiti erino rugeka zafare hantinegu, tagra kumi'ma huzampina nefrita, fatgo tavutavama huzampina, kasefa huta manigahune. Na'ankure Agri avufgama aguzama ru'nazazamo, tagrira tazeri so'e hu'ne. ²⁵Na'ankure tamagra sipisipi afukna hutma hazagre'nazanagi, menina tamagra rukrehe hutma sipisipi kva ne, tamagu tamemofa kva Nete e'naze.

Aravemofa naneke

3 ¹Anahukna kante, a'nemotma neramave agorga nemaninke'za, mago'a Anumzamofa kema amagama nontesaza neramave'za

nege'za, mago kea osugahazanagi, knare tamavutamavaza nege'za zamagu'a rukrahe hugahaze. ²Na'ankure tamagra anemotma fatgo hutma vetimimifo agorga'a mni'nazagu anara hugahaze. ³Tamagrama a'nemotma tamazokama ki hariritma kolire tamavasese nehutma, kukena nehutma, amega tamavufgare konariri huzankukera osiho. ⁴Hianagi tamagu'afi havizama osania avasesezana, fru huno akoheno mani avasese'za hiho. E'inahu avasese zanku Anumzamofona avenesie. ⁵Na'ankure korapa knafi ruotge hu'za mni'naza a'nemo'za, e'inahukna hu'za zmavasesea hu'ne'za, Anumzamo'ma huvempama huzmante'nea zama fore'ma hanigu Anumzamofonte amuha nehu'za, ve'zamimifo agorga mni'naze. ⁶Anahukna huno Sera'a Abrahamu amage nenteno, ranimo'e huno Abrahamunkura hu'ne, tamagra neramavenku'ma kore'ma osu knare zanke'ma hanutma, Sera mofane manigahaze.

⁷Hanki vene'nemota knare antahintahi avariritma, a'ne tamimozanena so'e hutma maniho. A'nemo'za hanave oti'nagu, knare tamavutmava huzmanteho. Tamagrama antahi'nazana a'nemo'za zamagranena zmasimu erigahaze. E'inahu hutma avaririsageno'a, magozamo'a nunamuma hanaza nunamuntamia rehizara osutfa hugahie.

**Haviza hurantesaza vahemokizmi knare
tavutava huzmantesuna naneke**

⁸Hagi makamotma magopi fru hutma nemanitma, vahe'mokizmia tamasunku hunezmantetma, kogna hutma nemanitma, tamagu'areti so'e tamavutma nehutma, tamagu'a anteramita maniho. ⁹Vahe'mo'za havizama huramantesagetma, nona hutma haviza huozamanteho. Kema huhavizama huramantesageta, nona hutma kea huhavizana huozmanteta, tamagra Anumzamofa antahigenkeno asomu huzmanteno, Anumzamo'ma tamagima hu'neana, e'inahu hnazegu tamagi hu'neankitma, asomura tamagra erisanti haregahaze. ¹⁰*Iza'o knare hu'na manisue huno agesa nentahino, knare knama kesiazanku'ma avesintesimo'a, kefo kema huzankura agefuna kegva nehuno, agipintima havige huzankura kva hino.* ¹¹*Kefo avu'avazampintira atreno, knare avu'avaza nehuno, rimpa fruma huno mni'zanku hakeno avaririno.* ¹²*Na'ankure fatgo vahe'mokizmia Anumzamo'a avua anteno kegva hunezmanteno, nunamuzmia antahi nezamie. Hianagi havi zamavu'zmavama nehaza vahe'mokizmia, Anumzamo'a zmefi huzamino ha'renezmante.* (Sam-Zga 34:12-16)

Knare tavutavama hanunazante tata erisuna naneke

¹³Tamagrama hanavetitma so'e tamavutamava nehnageno'a, iza tamazeri havizana hugahie? ¹⁴Hianagi tamagrama fatgo tamavutamava'ma nehanage'za, tamazeri haviza hugahazanagi tamagra

asomu erigahazanki, korera osuta tamazeri kore hanaza zankura antahintahi hakare osiho ¹⁵Hianagi tamagu'afina Kraisina atrenkeno ruotge huno Rana nemanina, tamagrama fore'ma hanigu amuhama nehutma tamentintima nehaza zanku'ma tamantahima kesageta, maka knafina tro hutma mni'netma, antahinezamita akohetma fru kefinti kenona hunezmanteta, ¹⁶tamagu'tamagesafina ama' huta fatgo hutma maniho. E'inahu'ma hanutma, Kraisi'enema knare'ma hutma mni'naza zanku'ma havigema humaneramantesia vahe'mo'za zmagazegu hugahaze. ¹⁷Na'ankure Anumzamofa avesi'ma me'nenigeta tagrama knare tavutavama nehanunke'zama, tazeri havizama hanazana, knare hugahie. Hianagi tagrama havi tavutavama hanunte'ma, knama tamisazana havizantfa hugahie.

¹⁸Na'ankure Kraisi'a maka vahe'mofa kumiku huno, magoke zupa fatgo ne'mo, fatgo osu vahe'motagu fri'neankino, Agra tavareno Anumzamofonte vanigu ahazageno fritegeno, Anumzamofa Avamu'mo azeri otigeno, kasefa huno mani'ne. ¹⁹Agra vuno kina kumapima mni'naza avamutaminte kea ome huama hu'ne. ²⁰E'i ana avamutamina korapama Noama ventema negigeno, Anumzamofa ke eri atrazanagi, Anumzamofa akoheno zmavega anteno mni'nea avamutamine. Hankino 8ti'a nagamoke'za ana timo'ma zmahe refitegeno'a, zamaguravazine. (Jen-Agf 6-8) ²¹E'i ana timo'a mono tima frezamofa avame zankino, Jisasi Kraisi'ma friteno oti'neazamofa hanavemo tamagura vazi'ne. Hankino mono tima frezamo'a pehena erinotreanki, agru tagutagesareti Anumzamofoma antahimisunazane. ²²Hagi Jisasi'ma monafinka vuno Anumzamofa azantmaga umani'nege'za, maka ankeri vahe'mo'zane, kegva hu'nazamozane, hanavemo'za, Agri agorga'a mani'naze.

Kazigazi huta ovesinte avesinte hanuna naneke

4 ¹E'ina hu'negu Kraisi'ma avufafima atazama eri'neankna nehutma, tamagra anahukna antahintahi erita maniho, na'ankure tamagrama anahu knazama erinutma kumi'ma huzana atregahaze. ²Anahukna huno ama avufanganema mni'nenuno'a, vahe'mofa havi avesizampina ovugahianki, Anumzamofa avesizampi vugahie. ³Tamagra Anumzamofoma keno antahino osu vahekna hutma, zaza kna ama mopafina mni'neta, havi tamagu tamagesa nentahitma, havizamofa avesizampi nemanitma, negi tina nenetma, ranke huta vano nehuta, neza kretma nenetma, havi anumzamofa mono hunte'naze. ⁴Menina korapa arone timimo'za havi tamavutamavara nosazage'za neramage'za, nahige'za tagranena vano nosaze hu'za antri nehu'za, tmazeri haviza huke nehaze. ⁵Hianagi zamagra keagama refkoma hu Jasi nemofonte oti'za, nankna z mavu'zmava hu'nenazana nesamisage'za, fri vahe ene kasefa hu'za mni'naza vahe'enena refko huno keaga huzmantegahie.

⁶E'i ana agafare knare musenkea fri'naza vahete'enena huama hazage'za antahi'naze. Nazano ama zamufare mni'ne'za hu'nesaza zante refko huzmantegahie. Hianagi avamu'zmimo'a, Anumzamofa avesite manigahie.

⁷Makazama vgaesia knamo'a, hago kofta hie, e'ina hu'negu antahintahia hu so'e nehutma, nunamuma hu tamavutamavamofo azeri hanavenetita, kazigazi hutma viho. ⁸Makazama agatere'neazama hanazana, vaheku'ma ovesinte avesinte hu avu'avazana otretfa hiho, na'ankure avesinte avu'avazamo'a, rama'a kumi refinete. ⁹Mono tamafu tamagnazama esageta, so'e tamavutamavaza hunezmantetma, antahi havizana hutma ke hakarea huozmanteho. ¹⁰Magoke magokemotma Anumzamo'a so'e musezama'a taminegu, ana musezanteti rumokizmia so'e tamavutamavaza hunezmantenkeno Anumzamofa so'e avu'avazamo'a, tamagripina aviteno vino. ¹¹Magomo'ma Anumzamofa nanekema huamahu musezama eri'nenimo'a, huama nehina, mago'mo'ma vahe'ma azahu musezama eri'nenimo'a, Anumzamo'ma ami'nea hanavereti vahera aza nehinketa, makazama hanazana Anumzamofoma ra agima amizanke hiho. Na'ankure Jisas Kraisi'a masnentake huno hanave'ane mni'ne. Tamage.

Jisasi'ma hu'neankna huta tataza erisanuna naneke

¹²Ronenimota tamagra reramahe zampima nevazazamo'a, tevefi viaza nehazagu kasefaza fore nehie hutma antria osiho. ¹³Hianangi ana tamatazama e'neriza zankura muse huvava hiho. E'i anazamo'a Kraisi'ma atama eri'neaza nehazankino, Agrama hanavenentake masa'ane eama hanigetma, magokama muse hanaza zamofa retro huneramante. ¹⁴Hanki Kraisi agi tamagripa me'nenige'za, tamazeri haviza hanazana, asomu erigahazanki muse hiho. Na'ankure hanavenentake msa'ane Avamu'ene Anumzamo'enena tamagrane mani'ne. ¹⁵Tamagra vahe ahefrizantero, kumazafa sezantero, mago'a hazenkerero, vahe'mokizmi zante tamagena vazigevazige nehutma, tamata erizanku kegva hiho. ¹⁶Hianagi iza'o mono vahe'ma mni'nenigeno, atama amisaza zankura agazegura osino. Hianagi e'i ana mono agima eri'neazankura, Anumzamofa agi erisaga hino. ¹⁷Na'ankure Anumzamo'ma vahe'ma refko hania kna hago neankino, esera Anumzamo'a Agri'a nagamota refko hugahie. Hanki tagritema agafama huno refkoma hanuno'a, knare musenkerema zamentintima nosaza vahetera, inankna hugahie. ¹⁸Anumzamofa avontafemo'a anage hu'ne, ***fatgo vahe zmaguma'vazizamo'ma amuhoma hanigeno'a, Anumzamofoma atrezama kumima nehaza vahetera, inanknaza fore hugahie?*** (Pro-Knr 11:31)

¹⁹E'ina hu'negu tamagrama Anumzamofa avesizama amage'ma nentenageno, vahe'mo'za tamatazama tamisageta, tamagri'ma tro'ma

hurmente'nemofonte tamentintia nehutma, fatgo tamavutamava huta maniho.

Mono kva vahe'ene kasefa vahe zmavumro naneke

5 ¹E'ina hu'negu mono kva vahe'motma, nagranena tamagrikna huna mono kva ne' mni'nena, Kraisi'a atazana erigena, ke'nomonane, tamagrane magoka Kraisi hanavemo eama hanigeta erisumona neramasamue. ²Sipisipi kva vahemota, Anumzamofu sipisipi kevu nagama kegvama hanazana, vahe'mo higure huta osutma tamaguareti Anumzamofu avesi'mo'ma hu'nea kante kazigazi hutma kegva nehutma, havige hutma zgoma tro hukazigatira anara osiho. ³Tamagri kvafima mni'naza vahetera, ra vahe mni'nonankita kegva huzmantegahune hutma ana vahekura osiho. Hianagi knare tamavutmavaza huzmaveri nehinke'za nege'za, tamavaririhio. ⁴Hagi Kraisi'ma ugota Sipisipi kva ne'ma efore'ma hania zupa, hanave'amo'a vgaore kini fetori eme tamigahie.

⁵Kahefa vahe'mota, anahukna hutma ugagota huramantenesaza ra vahe'mokizmi naneke antahizmita zamage anteho. Makamotma anterami tamavutamavara kukena hiaza nehutma, rumokizmi zmagorga umani emani hiho. Tamage huno avontafemo'a anage hu'ne, ***zmagra zmavufgama erisaga haza vahera Anumzamo'a ha'renezamanteno, zmavufgama anteramiza mni'naza vahera knare hunezmante.*** (Pro-Knr 3:34)

⁶E'ina hu'negu tamagra Anumzamofu hanavenentake azampi anteramita mni'nenkeno, kna fatgore tamazeri antesga hino. ⁷Hakare'a knazantmia Agrite atreho, na'ankure Agra tamagrira kva huneramante. ⁸Tamagra negia onetma, kva hutma maniho. Ha' vahe'timimo Sata'a agra laionigna huno akoheno rerakaureno krafa huno vano nehuno, ahenoma nesia vaheku nehake.

⁹Hu'neanagi, tamentinti azeri hankavetineta, Satana retufe atreho. Antahi'naze, Anumzamofu amage nentaza vahe'ma, mika kaziga tmafuhe'zane tmasaro'zane magozahu knazane, zamata zana e'nerize. ¹⁰Hanki atupa'a knafi tamatazana erigahazanagi, tamagri'ma Kraisi manivava msa'afima tamagima hu'nea Anumzamo'ma tamazeri knaretfu nehuno, knare hu'naze huno huneramanteno, tamazeri hanavetina, oti hanavetita manigahaze. ¹¹Maka hanavea Agrite me'nenno, mevava hugahie. Tamage.

Atupa naneke

¹²Hanki Sailasi'a nazahigeta ama atupa avona kre'no'e, nagrama kena antahinama agri'ma huana, fatgo huno Ramofona amage nentea nenafu mni'ne. Nagra ama atupa avoma kreneramuana, tamazeri hanaveti

ke hu'na, Anumzamofu tamage asunku zankura kreneramuanki, ana asunkuzantera oti hanavetiho. ¹³Anumzamo'ma huhampri zamantege'za, Babilonima mni'naza naga'mo'za, musenke atreramantaze. Maki'a nagri mofavreni'agna hu'nemo'a, musenkea atreramante. ¹⁴Magoke magokemotma fatgo huno ruotge hu'nea avu'ava hutma, agi hene agona ahene hutma maniho. Kraimpima mni'naza nagamotma, rimpa fruzamo'a tamagrane mesie.

Pita'ma Anante (2)

Avonkre'nea Naneke

1 ¹Nagra Saimoni Pitana, Jisas Kraisi kazokzo eriza aposol ne'mo'na, ana miko tagrama hunakna huta Anumzama Jisas Kraisi tamagu'mavazi ne'mo'ma Anumzamofontema tazeri fatgoma nehia Nete'ma tamentintima nehazamotarega, ama avona kreneramue.

²Anumzamo'a asunku zama'areti'ene, rimpafu zanteti, Ranti Jisasi Kraisima kenka antahinkama hunana antahintahi zampina, asomu hunegante'na mago'ane hagenka mrerigahane.

Anumzamofompima hageno marerizamofo nanake

³Tagrama Jisasima kenima nehunkeno'a, Agri'a hankavemo mika zanku'ma Agri'ma avonesia avu'ava zampima upama hunazana neramie. Agri'a hanave masazama'ane, knare avu'avazama'a erisunegu, tagrira tagi hu'ne. ⁴E'i ama anazampi mareri agatereno, knarezantfa hu'nea huvempa kea huhampirante'ne, hu'negu tagranena, Agri'a avu'avazama'a nehuta, ama mopafi kefo tavesizamofu havizampintira agateregahune. ⁵E'ina hu'negu ama ana agafare tamentintimo'ma hage ra hanigura mago'ane hanavetita, knare tmavutmava nehutma, knare tamavutamavatetira, knare antahintahi eneritma, ⁶ana knare antahintahireti tamavufamofu aveszana kegva nehutma, tamavufamofu aveszama kegva huzanteti, knazama erita nevutma, knazama erino vuzantetira, Anumzamofu avu'avaza nehutma, ⁷Anumzamofu avu'avazantetira, neramafuna knare tamavutmava hunezmanteta ovesinte avesinte hiho. ⁸Tamagripima ama ana avu'avazama me'nesigeta hageta mrerisageno'a, e'i ana tamavutamavazamo'a eri amama haniana, Ranti Jisas Kraisima ketma antahitmama hunazazamo'a amnezanknara osugahianki, nena rga'a rentegahie. ⁹Hianagi iza'o e'inhau avu'avazama nosanim'o'a, avua asu huge, avua afetera nonkeankino, koma Anumzamo'ma kumi'ama azeri agru huno atrente'neazankura agenekanie. ¹⁰E'ina hu'negu nenafugata, hakarezama hanafina, Anumzamo huhamprintanteno tagi hune hutma hanavetitma ketma antahitma nehutma, mani fatgo hiho. Na'ankure

tamagrama e'inahu tamavutamavama hanutma trakara osugahaze.

¹¹E'inahu kantema vnageno'a, Ranti Jisas Kraisi'ma taguvazi nemo'a, manivava kuma'amofa kafana anagi hagro hanigeta ufregahaze.

¹²E'ina hu'negu tamagra ana tamage nanekema antahita oti hanaveti'nazanagi, nagra huramagesa huvava hugahue. ¹³Nagrama kena antahina huana, ama mopafima kasefa hu'na mni'nenuna, nagra huramagesa huvava hanuana knare hu'ne. ¹⁴Na'ankure Ranti Jisas Kraisi'a nasamino ko naveri hu'neankina, ama mopafina zazakna omanigahue. ¹⁵E'i ana agafare hanavetina erizana eneruankita, nagrama fri'na vanugetma, anama huramagesa nehua kegura, tamagera okanigahaze.

¹⁶Na'ankure antahizane vahe'mo'zama nehazaza huta, tagra Ranti Jisas Kraisima esiazankura havigea nosune. Hianagi Mrerisa msa'ane mni'negeta tagra tavufinti ke'nona zanku neramasamune.

¹⁷Na'ankure Anumza Nafatimo Agra'a ra agi nemino, masa'a eriamu nehuno, hanavenentake masa'afinti anage huno Jisasinkura hu'ne, ama'i Nagri Mofavre, navesinentena muse hunentoa Mofavre'ni'e hu'ne.

¹⁸Higeta tagra'a agonafima mni'nonkeno ana kea monafinti higeta antahi'none. (Mat 17:1-8, Mak 9:2-8, Luk 9:28-36) ¹⁹Ana higeta tagra kasanampa vahe'mozama hu'naza kea antahi amama nehuta tamentinti hu'none, e'ina hu'negu tamagra ana kemofona keni nehinkeno, zamagri kemo'a hanimpima tavimo remsa huno viankna nehina, nantera ofumo, Kraisi'a tamaguafinti remsa hugahie. (Nam-Ham 24:17, Rev-Huf 22:16) ²⁰Hianagi tamagrama antahiamama hanazana, magore huno avon tafepima me'nea kasnampa kea, kasnampa vahe'mo'za zmagra'a zmagesafintira kreonte'naze. ²¹Na'ankure vahe'mo'za zmagra'a zmavesite, ana kasnampa kea kreonte'naze. Hianagi Anumzamo'ma hu'neankea Ruotge Avamumo zmazeri otige'za krente'naze.

Havi kasnampa vahe'mofo naneke

2 ¹Hianagi havige kasnampa vahera, amu'nozmifinti oti'neankino, anahukna huno mago'a havige rempi hurami vahera amu'nontamifinti oti'za, zamagra fraki'za maka krunage hu'za, tamentinti azeri haviza hu'naku anara nehu'za, Ramo'ma miza sezmente'nemofona zamefi hu'nemi'za, tusi'a knaza zamagrazmi zmagofetu erintegahaze.

²Rama'a vahe'mo'za zmagra'a monkozamofa zmavesi'za nevaririsageno, anazanteku tamage kemofona huhaviza hunte'gahaze. ³Anama nehaza vahera maka zanku kezmanunu hu vaheki'za, havi kereti tamazeri savri hugahaze. Hianagi Anumzamo'a korapa zmazeri haviza hunaku krunage vahera huhampri zmante'neankino, anama zmazeri havizama haniazamo'a ne-e.

⁴Na'ankure ankeri vahe'mozama kumi'ma hazageno'a Anumzamo'a ozamatre'ne, hianagi zmasga huno teve kumapi zmatrege'za, haninentake

kerifi mni'ne'za, keagarema otisageno refkoma haniazanku avega ante'za mni'naze. ⁵Hianagi korapa knafi vahera, ozamatreno zmahe frivgarene. Hianagi fatgo avu'avazankuke kea huama nehia ne' Noanki 7ni'a naga'agi huno nozmaheno, kefo avu'avazama nehaza vahera, tusi'a ko tinu zmahe frivgarene. ⁶Hagi anahukna huno Agrama Sodom Komora vahe'ma tevereti'ma zmahe fanane hige'za, tanefa'ma samprenazazamo'a, mago avame'za me'nenno hutaveri huno, Anumzamofu avu'avama osnaza vahera zmahe fanane hugahie huno nehie. (Jen-Agf 19:24) ⁷Hanki kefo monko avu'avaza nehu'za, zamagra fatgo osu zamavuzmava nehazageno rimpagna hunezmantea fatgo nera Lotina, Anumzamofu agu'vazine. ⁸Na'ankure fatgo ne'moma zamagri amunompi mni'nenno, nezmageno nentahino nehige'za, kasege rutagre zmaguzmagavama knane knanema nehazageno'a, rimpagna hutere hu'ne. (Jen-Agf 19:29) ⁹Hankino e'i Anumzamofu fatgo avu'avama nehaza vahema, zamagu'mavazi'nea kankamuna antahineankino, hazenke zampintira zmagu nevazino, havi zmagu'zmagavama hanaza vahe'mo'za menintetira knazampi manime vu'za, vahe'ma refkoma huzmante knarera uhnatigahaze. ¹⁰Mago'a vahe'mo'za havi miza erigahaze, e'inahu vahe'mo'za zmaguamo'a otige'za, monko'za hu zmagesama nentahiza, tra kea kefenkami netre'za, ana vahe'mo'za zmagu'fuga ra nehu'za, ugota ankeru vahema huhaviza huzankura korora nosaze. ¹¹Ana nehazanagi ankeromo'za, knare hu'za hanavenentake vahe mni'nazanagi, zamagra Ramofu avurera vahe'mofona refkoa hunozmantaze. ¹²Hianagi ana havige rempima huzami vahe'mo'za zgakfagna vaheki'za, zmazeri'za zmahe frisaza vahe fore hu'nazankino, zamagri zmaguzmagesamo zmazerino zmahe frigahie. Zamagra havizankuke nehu'za mago'zana ontahi'naze. Hianagi zamagri havi zmaguzmagavamo zmahe frigahie. ¹³Zamagra havi zmaguzmava nehazanki'za, mizama'a haviza erigahaze. Zamagrama zmagesama antahizana, musenkase huta aka tina zge ferupina negahune nehu'za, havi zmaguzmagesareti nezama kaganema nenazazamo'a, zamagraguke antahi zmaguzmava nehu'za, zmagazehu zmaguzmagavama hu'za nevazankino, ana zmagu'zmagavamo'a, zmazeri haviza hugahie. ¹⁴Maka kna, zamagra rumofu a'ene, rumofu venema savrima huzankuke nentahiza, havi zmagu'zmagavama huzana otre'za huvava nehu'za, zamagra mago'a vahe'mofona fru hu'za rezmatga nehazageno, zamagraguke antahi antahintahi zmimo'a avi'nete. Hianagi zamagra hazenkegu nehakaze! ¹⁵Zamagra fatgo kana atre'za hza negraze. Beori nemofo Balamu'ma havi avu'ava nehuno, miza erinaku avenesiaza hu'za fatgo osu kante nevaze. ¹⁶Hianagi donkimo keosu zgamo vahe'mofu zmageru aruno, Balamuna Beori nemofo neginagi avu'avazamofona azeri fatgo hu'ne. (Nam-Ham 22:1–24:25)

¹⁷E'inahu vahe'mo'za kampui tinkerimo taneankna nehu'za, hampomo korimpena retufeno viankna hu'za kankekanke nehazanki'no,

haninentake teve kumamo'a zmavega ante'ne. ¹⁸ Ana vahe'mo'za rankege nehu'za, havige ke zamireku zamavufga ra nehu'za, vahera zamazeri oti ke hu'za monko zamavuzmava nehu'za, maka zamagra zamavufarera monko zamavuzmava nehaze. Zamagra monko zamavuzmavamofu zamesizana notre'za, e'inhau zamavuzmava nehu'za zamentintimo hanave oti'nea vahera zamami'mi hu'za zamavazu nehaze. ¹⁹ Ana nehu'za, maka vahekura fru hutma manihou hu'za huvempa ke hunezmantazanagi, zamagra havi zamaguzmagesamofu kazokzo eri'za vahe mni'naze. Na'ankure vahe'mo'za nankna zamuzmama nehazazamofu kazokzo eri'za vahe mni'naze. ²⁰ Na'ankure zamagrama ama mopafi havi avu'avaza atre'za, Ranti, Taguvazi Ne'ma Jisas Kraesima ke'za antahiza hu'nesaza zama, ete atre'za koma mni'naza havi avu'avapima ufresu'za, ese'ma mni'naza havi avu'avara agatere'za, havizantfa hu'za manigahaze. ²¹ Na'ankure fatgo avu'avamofu kama ke'za antahizama osu'neza, ruotge kasegema rutragazasina knarezantfa hisine. ²² Nanknaza zamagriteria fore'ma hu'neana, knare antahizamofu tamage kemo'a anage hu'ne, ***kramo'a ete eno amu'ma atitreneana eme ne'negeno, afumo'a sese huno agruma hu'neana, ete atreno ome hapa negrie hu'ne.***

Ramo'ma esania zamofu naneke

3 ¹ Navesi neramantou rone'nimota, ama'i anante avo kreneramuankita tamage antahizana eneritma, tamagera okanisazegu tamazeri hanaveti ke neramasamue. ² Anumzamofu ruotge kasnampa vahe'mo'zama hu'naza ke'mo'a, avufa'a fore hugahie. Ranti Taguvazi Ne'mo aposol vahepi huvazino tamasami'nia kasegea tamagera okaniho. ³ Hu'neanangi tamagrama ketma antahitma hanazana, vgama reknafina, tamage kema huhaviza hu vahe'mo'za, tamage kemofona huhaviza nehu'za, zamagra'a havi zmaguzmagesa nevaririza, ⁴ anage hugahaze, egahue huno Rantimimo'ma huvempama hu'neana, omeanki inazupa egahie? hu'za hugahaze. Korapa'ma mni'naza kva vahe'mo'za frizageno, ese agafa huno maka'zama troma hu'neazamo'a, zahera osuno anankante me'neaza huno me'ne. ⁵ Korapara Anumzamofu ke nehigeno mona fore nehigeno, tinke me'nefinti mopa eri fore hu'neazamofu kea zmage'nekanize. ⁶ Anantera ama mopafima me'nea zantamina, tusi'a tinu ahe fanane hu'ne. ⁷ Hianagi ama mopane monane henkama refkoma hanianknarera Agra tevenuti kre fanane hugahue, huno kea huntengeno me'ne. Hagi Anumzamofu avu'avama nosaza vahe'enena zmahe fnanene hugahie.

⁸ Hianagi navesi neramantou ronanimota amazana tamagera okaniho, Ramofontera mago zge ferumo'a ltauseni'a zgekufugna higeno, ltauseni'a zgekafumo'a magoke zge ferukna hu'ne. ⁹ Ramo'a huvempama hu'nea kerera, mago'a vahe'mo'zama nentahizaza huno akoheno eri'zana

e'norie. Hagi akoheno kavega anteno mani'neni, mago'a vahe'mo'za fanane osnaze huno mni'ne. Hianagi maka vahe'mo'za zamagu'a rukrehe hnazegu zamavega anteno mni'ne.

Monane mopane fanane hania naneke

¹⁰Rantimoma esianknamo'a kumzafa vahe'mo'za ontasmi'za neazankna hanigeno, monafima me'neazamo'a ra ageru neruno fanane hanigeno, tusi'a amuhonentake tevemo makazama ama mopafi me'neazana tefanane hugahie.

¹¹E'inahu kante ana makazamo vgaregahianki, tamagra inankna hutma manigahze. Mani ruotge nehuta, Anumzamofa fatgo avu'avaza nehutma, mni'nenkeno anazana fore hino. ¹²Ananknama esie hanutma eriza enerinkeno, ame huno eno. Anankna zupa tevemo mona te fanane nehanigeno, makazana te mramra huno, te mekitrere hugahie. ¹³Hianagi Anumzamo'a ko huvempa huranteno kasefa monane mopane tro hanugeneno, fatgo avu'avazamo ke megahie hu'ne. E'i anazama fore hanigu avega ante'none.

¹⁴E'ina hu'negu ronanimota, tamagra anazama fore'ma hanigura avega ante'nazanki, tamagrattmia tamazeri agru hutma Anumzanena tamarimpa frune nemanita, hazenkezana omnena, keaga huramante'zana omnena, ananknagura avega anteta maniho. ¹⁵Anumzamo'ma akoheno tavega anteno mni'neazankura tamagera okaniho. Na'ankure Agra maka vahe zmahokeno zmagu vazinakure, nerafu Poli'enena ama anazankura Anumzamo'ma knare antahintahima aminereti kretamine. ¹⁶Ama anazankuma huno Polima maka avoma kre'nea avomofoma tagrama antahiana hu'zamo'a amuhu hu'ne. Mago'amo'za ana kemofo rempi hu'za ontahiza, mnifatgo nosaza vahe'mo'za, ana nanekea ru agu'agesa rukrehe hu'za neramasamize. Zamagra anahukna hu'za mago'a avontafepi kenena erirukrehe nehu'za, zamagra'a kanazana zmagufare erigonefize. ¹⁷Hagi ronanimote, e'inahuzana fore hugahie huna ko tamasami'noe! E'ina hanigeta havi vahe'mofo zamavuzmava'zamo tamavareno havi kante vuzankura kva hu'netma, traka huzankura oti hanavetiho. ¹⁸Hianagi Ranti Taguvazi Ne' Jisasi Kraisi asunkuzane, Agri antahintahi zampi hagea ra hiho. Menine henkanena, Agra'a hihamu msa'afi ra agi'a erivava hugahie. Tamage.

Joni'a Ese Avonkre'nea Naneke

Anumzamofu mofavre'gna huta manisuna naneke

1 ¹Ama Kea ese agafare korapa me'nea ke, nentahita tavunu negeta, konazana tazanu avako nehuta, asimu eri Keguu nehune. ²Ana asimu'mo eama higeta tagra negeta, huama huta mevava asimura, Nefa ene me'nea tagrite eama hu'neazanku neramasmune. ³Keta antahita hu'nonazanku, tagra tamagri enena neramasmunankita, tamagra tagri'ene emeri mago hutma manisageta, tamage huta Nefane, Nemofo Jisas Kraisi'enena tragoteta manigahune. ⁴Tagra ama naneke negronankino, ama anazamo musezantia avitesiegu nehune.

Anumzana msa mani'negu, tagra msare vano hanuna naneke

⁵Menina knare musenke Agripinti antahi'nona ke neramasmune, Anumzana msa mani'neakino, Agripina hanizana magore huno omanetfa hu'ne. ⁶Tagrama huta Agrane vano nehune huta nehuta, hanizampima vano hanunana tagra havige nehuta, tamage kemofona amage nontone. ⁷Hu'neanagi tagrama msare'ma vano huta, Agrama msare mani'nea kna'ma nehuta, tagra trogoteta manisunkeno'a, Anumzamofu Nemofo Jisasi koramo mika kefozanti sese hunerante. ⁸Tagrama huta, kumi osu'none hanuta, tagra'a reravatga hanunkeno, tamage kemo'a tagri tagu'afina omanegahie. ⁹Hianagi tagrama kumitima huama hanunkeno'a, Agra tamage huno fatgo hu'neankino, kumitia atreranteno maka fatgo osu avu'avapintira sese hurantegahie. ¹⁰Tagrama huta kumi osu'none hanuta, Anumzamofona azeri havige ne' kna nehunkeno, ke'amo'a tagu'afina nomane.

Kraisi'a amu'no nere hu'nea naneke

2 ¹Osi mofavre'nimota kumi osnazegu ama avona kre'neramue. Hianagi mago vahe'mo'ma kumi'ma haniana, tagrira amu'no netia Nerafa'ene mani'ne, ana nera fatgo ne' Jisas Kraisi'e. ²Agra'a

kumitimofona nona huno apaserante'ne, tagri kumike sese huorante'neanki, maka mopafi vahe kumi'ene sese huzmante'ne.

Anumzamofa kasege amage' antesuna naneke

³ Agri kase kema erizafa nehanuta, Agri vahe'mni'none huta keta antahita hugahune. ⁴ Aza'o huno Anumzamofona antahi'na ke'na hu'noe nehuno, kasege'a amage ontesimo'a, havige vahe mani'neakino, e'inahu vahepina tamage kemo'a agu'afina omanegahie. ⁵ Hianagi aza'o Agri kema amage antesimofona, tamage e'i ana vahepina Anumzamofa avesizamo fatgo huno megahie. E'inama hanigeta tagra antahita keta nehuta, Agripi manigahune. ⁶ Mago'mo'ma Anumzane mani'noe hanimo'a, Jisasi'ma vano hu'nea kna huno vano hugahie.

Kahefa tavumro kna huno tante'nea naneke

⁷ Rone'nimota kasefa kasege krenoramuaniki, korapa'ma antahi'naza kasege neramasamue. Ana naneke pusante'ma antahi'naze. (Jon 13:34) ⁸ Mago kazigama antahisazana, kasefa kasege kreneramue, tamage huno Jisasimpine tmagripinena megahie. Na'ankure hanimo'a hago enevigeno, tamage tavi'mo'a remsa hu'ne. ⁹ Mago'mo'ma msare mani'noe nehuno, Jisasinte amentinti nehia nefuma ha'ma rentesuno'a, hanizampi mani'ne. ¹⁰ Mago'mo'ma amentinti nehia nefunku avesinentemo'a, msare mani'neankino mago'zamo'a azeri traka osugahie. ¹¹ Mago'mo'ma amentinti nehia nefunku antahi haviza huntosuno'a, hanizampi mani'neni, hanizampi kana nevuno, agra iga nevie, ontahi'ne. Na'ankure hanizamo'a avuraga erisu hu'ne.

¹² Osi mofavrenimota ama avoma kre neramuana, Anumzamoa Jisasi agifi kumitimima apaseramantenegu kreneramue. Na'ankure Agri Agire kumitimia apasermante'ne. ¹³ Nagra ama avona, tafahemota kre neramue, ko'ma ese agafare mani'nea nera, ko keta antahita hu'naze. Ama avona kasefa vahe'motma kre neramue, ko Satana agatere'naze. ¹⁴ Nagra ama avona mofavre nagamotarega kre neramue, tamagra ko Nefana ko keta antahita hu'naze. Ra vahe'motarega ama avona kre neramue, ko'ma ese agafare'ma mani'nea Nera ko keta antahita hu'naze. Kahefa vahe'motarega ama avona kre neramue, tamagra ko hanavetizageno, Anumzamofa kemo'a tmagu'afina hanavetino megetma Satana agatere'naze.

¹⁵ Ama mopafi avu'ava zanku'ene, mopafi zanku tamesionteho. Mago vahe'mo'ma ama mopagu'ma avesintosuno'a, Nerafa avesizamo'a agripina omane'ne. ¹⁶ Na'ankure maka mopafi me'neazana, avufamofa avesizane, kenunu hu'zane, agraguke antahi'enena ama mopafizane. Nerafapintira nome-e, hianagi ama mopafinti fore hu'ne. ¹⁷ Ama mopane, maka'a avesizamo'a vgaregahie. Hianagi iza'o Anumzamofa avesima amage'antesimo'a, manivava hugahie.

Havige anti Kraisinku kva hanaza naneke

¹⁸Mofavre nagamote, hago vgare knafi one, ko'ma Kraisima huhaviza hunte havige anti Kraisi fore hugahie higetma antahi'naze. Menina Kraisima huhaviza hunte vahera havige anti Kraisi rama'a hago efore hu'naze. E'i anazama keta antahita nehuta, vgare knafi neone huta nehune. ¹⁹Zamagra tagripinti tatre'za vu'naze, hianagi zamagra tagri naga tfana omani'naze. Na'ankure zamagrama tagri naga'ma mani'naresina, zamagra tagrane manizasine. Hu'neanagi zamagra atre'za tagripinti vu'naza zamo'a, taveri hiana, maka'mo'za tagri nagara omani'naze. ²⁰Hianagi anage hu'na nehue, Ruotage'ma Hu'nemo, Anumzamo tmagrira huhampri ramantegeta, maka'motma ko antahi'naze. ²¹Tamage ke ontahi'naze hu'na avona kre noramue, hianagi tamagra ko antahi'nazankino, ana tamage kefina havigea omane'ne. ²²Iza havige vahera mani'ne? Hianagi Jisasinku Kraisi'a omani'ne huno hufrakisimo'a, agra havige anti kraisi nemanino, Nefane Nemofone amefi huntentimo'a, Kraisi ha' vahe mani'ne. ²³Iza'o Nemofoma onke'noe huno hufrakisimo'a, Nefana ovare'ne. Aza'o nemofonku huama hanim'o'a, Nefana avare'ne. ²⁴Hagi tamagra, ko'ma ese'ma antahi'naza tamage kea atrenkeno tamagripina meno, tamagra ko'ma antahinaza mono kemo tamagripa me'neniget, anahu kna huta Nemofonte'ene Nefampina manigahaze. ²⁵Agra'ama huvempa kema hurante'neana, mani'vava asimu erigahaze huno hurante'ne.

²⁶Ama ana zanku'ma kre neramuana, reramataga huku'ma nehaza vaheku hu'na kre neramue. ²⁷Hagi menina tamagripina huno, huhampri ramante'neaza Avamura Agripinti eri'nazageno tamagu'afi mani'neanki mago vahe'mo'a huramagesa huzankura ontahigahaze. Hu'neanagi Agri Avamu'mo maka'zana rempi huramigahiankino havi kea osu tamage hugahie. Tamasm'i'nea kante antetma Agripa manigahaze.

Anumzamofa mofavre nagamofa naneke

²⁸Hagi menina osi mofavre naganimote, Kraisimpi mani'nenkeno, Agrama efore'ma hanigetma oti hanavenetita, ete esigetma tamagazegura huta korera osugahaze. ²⁹Tamagrama ketma antahita Kraisima hanazama fatgoma Agrama hu'nenigetma, tamaganena ko'ma antahi'nazane, iza'o hakare vahepintima fatgo z mavuzmava hanamokizmia nezmafa manigahie.

Anumzamofa mofavre'gna huta manisuna naneke

3 ¹Kesunana Nerafa'ma rimpama hagerafi ramino avesizama tanteneazana Anumzamofa mofavre hurante'ne. Ana hu'negu tagrikura Anumzamofa mofavre hu'za hugahaze. Tamage! Ama ana

agafare ama mopafi vahe'mo'za antahi orami'naze. Na'ankure zamagra ke'za antahi'za Agrira osu'naze. ²Ronenimote, menina tagra Anumzamofu mofavre mani'none, henkama maninuna nomani'zana eforera osu'ne. Tagra antahita keta hu'none, inanknarero Agrama eama'ma hanigeta, tagra, Agrikna hugahune. Na'ankure tagra negeta Agra e'inahu Nere huta hugahune. ³Ana hu'neankino maka vahe'mo'za zamavuma keteza mani'ne'za zamentintima nehaza vahe'mo'za, zamagrazmi zamazeri agru nehu'za, Jisasi'ma mani'neaza hu'za nemanize.

⁴Maka kumi'ma nehaza vahe'mo'za, kasege runetagraze, hankino kumi'mo'a kasege rutagre'zane. ⁵Hanki tamagra antahi'naze, Jisas Kraisi'a efore'ma hu'neana kumi eri atre'naku e'neakino Agripina kumira omane'ne. ⁶Maka vahe'mo'za Agripima nemaniza vahe'mo'za, kumira nosaze. Kumi'ma nehaza vahe'mo'za, Agrira ke'za antahi'za nosaze. ⁷Osi mofavre naga'mote, atrenkeno mago'a vahe'moza reramatga osiho, fatgo avu'ava nehaza vahe'mo'za fatgo vahe'mani'ne'za, Jisasi'ma mani'neakna hu'za fatgo hu'za nemani'ze. ⁸Mago'mo'ma kumi avu'ava himo'a, Sata vahe nemanie. Na'ankure Sata'a ese agafare kumi hu'negure. Ama ana agafare Anumzamofu mofavremo, eama huno Sata erizana eri haviza hu'naku mopafi efore hu'ne. ⁹Maka vahe'mo'za Anumzamofu mofavre nagapima efore hu'za mani'naza vahe'mo'za kumira nosaze. Na'ankure Anumzamofu avu'ava zamagripi me'neankiza, kumira mago'ena osugahaze. Na'ankure ko Anumzamofu mofavre mani'naze. ¹⁰Ama ana tamavu tmava'mo eriana huno Anumzamofu mofavregi, Sata mofavregi huno eama hanigetma kegahaze. Maka vahe'mo'za fatgo avu'ava nosu'za, amentinti nehia nefunku avesi nontamo'za, Anumzamofu mofavre omani'naze.

**Avesi'zamofu agafa Anumza mani'negu, rumokizmigu
ovesinte avesinte hanuna naneke**

¹¹E'ina hu'negu rumokizmigu ovesinte avesinte hanunana ama'i knare musen (gutnius) kea ese agafare ko antahi'naze. ¹²Kenima hu'neankna osuta, havi ne'mofu avu'ava erino Ebolina avareno ome ahe fri'nea knara osanune. Na'a higeno ahe fri'ne? Na'ankure avu'ava'mo'a haviza hu'negure. Hianagi negna'a fatgo avu'ava hu'neazanteku huno ahe'ne. ¹³E'ina hu'negu nenafugatane nasarahetma ama mopafi vahe'mo'za ha'ma reramantesageta antria osiho. ¹⁴Tagra antahita keta hu'none, fri'zampintira atreta tasimu eri kaziga mani'none, na'ankure amentintima nehia nerafuna avesinentonkure. Iza'o rumokizamiguma avesi nontesimo'a, fri vahekna huno mani'ne. ¹⁵Hakaremo'za zamentinti nagaku'ma (kristen) zamarimpa kna huntesimo'za, vahe ahe fri vahe mani'naze. Tamagra antahi'naze, vahe'ma ahe fri vahepina mani'vava asimura omane'ne. ¹⁶Menina tagrama vahe'ma avesinte'zanku'ma

antahiamama hanunana, Jisasi Agra'a asimura tagriteku huno atre'ne. Ana hu'negu tagranena zamentinti tafuhe'ina tasimu atreta zamaza hugahune. ¹⁷Hianagi iza'o ama mopafi afu feno ante'nesimo, amentinti nehia nefu'ma atupama hu'nenigeno negeno asuragi anteno azama osanigeno'a, nankna huno Anumzamofa avesizamo'a, e'inahu vahepina megahie? ¹⁸Osi mofavre naganimote kereti'ene tagitetikera tavesi negantone huta osanune. Hianagi tavutvapi erinteta tamage huta zamesi zamantesune.

Anumzamofa avure koro osu manisuna naneke

¹⁹Ana tavutva'ma hanuta, tamage tavutava nehune huta tagra keta antahita nehuta, tagutagesamo keaga hunerantena, fru huta Agri avufina manigahune. ²⁰Hu'neanagi tagri taguamo, keaga hurante'niana Anumzamofa tagri tagutagesa agatereno ra hu'neankino, maka'zana Agra antahino keno hu'ne. ²¹Ronenimote, tagu tagesamo keaga huorantesigeta, tagra Anumzamofa avufina knare'zantfa huta hanavetita nemanune. ²²Na'anku'ma antahigona'zana tagra e'nerune, na'ankure Agri kasegea amage nenteta, Agrama muse hiaza nehunkeno'e. ²³Menina ama'i Agri kasege, tagra Agri Nemofo Jisas Kraisi agifi tamentinti nehuta, Agrama hiho huno tami'nea kasegere anteta ovesinte avesinte hugahune. ²⁴Mago vahe'mo'ma Anumzamofa kasegema antahino avaririmo'a Anumzane manigeno, Anumzamofa agrane nemanie. Anumzamofa Avamu'ma tami'nea Avamuteti antahita, Anumzamofa tagrane mani'ne huta hugahune.

Avamutamimofa refko huta kesuna naneke

4 ¹Ronenimote, vahe'mo'za maka avamuteti nehune hanaza zankura tamentinti osiho. Hianagi Anumzamofontegati ne-efi avame anteta keho. Na'ankure rama'a havige kasnampa vahera, ama mopafi vuno eno nehie. ²Amanahu kantegati Anumzamofa avamure hunka kenka eri fore hugahane. Ina vahe'mo huama huno Jisasi'a, Kraisikino mopare avufa erino e'ne hania avamura Anumzamofontegati e'ne. ³Hianagi vahe'mo'ma huama huno, Jisasi'a Anumzamofontegatira ome'ne hania avamura, e'i Anumzamofontegatira ome'neanki, Kraisima huhaviza hunte havige anti Kraisi, ko'ma egahie higetma antahinazana, menina ko ama mopafi fore huno mani'ne. ⁴Mofavre naganimote Anumzamofa mofavre mani'naze. Mani'nageno tamagu'afima mani'nea Avamu'mo'a, mopafima mani'nea havige avamura agatere'ne. ⁵Zamagra ama mopafi vahere, ana hu'nagu kema hazana mopafi zankuke nehazageno, mopafi vahe'mo'za ke'zamia nentahize. ⁶Tagra Anumzamofa nagare, Anumzamofoma keno antahino hu'nemo'a, ketia nentahize. Hianagi Anumzamofa naga'ma omani'namo'za ketia nentahize. E'inama higeta keta antahita huta tamage Avamuki, havige avamuki huta nehune.

Ovesinte avesinte hanuna zamofa naneke

⁷Ronenimote, rumokizmigura ovesinte avesinte hanune, na'ankure avesinte'zana Anumzamofompinti e'ne. Maka vahe'mo'za ovesinte avesintema nehaza vahera, Anumzamo'a nezmafafa'za nehige'za, Anumzamofona ke'za antahi'za nehaze. ⁸Vaheku'ma avesima onte vahe'mo'a, Anumzamofona keno antahino osu'ne. Na'ankure Anumzamo'a avesizamofa agafa'e. ⁹Anumzamo'ma avesi rante'neazama eri taveri hu'neana amane, ana kankamuntetire, Agripinti tasimura erisunegu magoke ante'nea mofavre'a ama mopafina hunteteno e'ne. ¹⁰Ama ana avesi'zana, tamage tagra Anumzamofona avesi ontenonkeno, Agra'a tagrira avesi ranteno, magoke ante'nea Nemofona hunteteno, kumitimofona nona huno apaserante'ne. ¹¹Ronenimote, Anumzamo'ma tagrima avesi rante'nenigeta, anazanke huta rumokizmia tagra ovesinte avesinte hugahune. ¹²Mago vahe'mo'e huno Anumzamofona onke'ne, tagrama rumokizmigu ovesinte avesintema hanunkeno'a, Anumzamo'a tagrane manina, Agri avesizamofa fatgo huno tagrane megahie.

¹³E'ina'ma hanuta tagra antahita keta huta Anumzamo'ene mani'none hanunkeno, Agra tagrane nemanie. Na'ankure Agra'a Avamura tamigeno tagrane mani'ne. ¹⁴Tagra negeta huama huta Nefa'a, Nemofa hunteteno ama mopafi vahe'mota tahoke heno taza hunaku e'ne. ¹⁵Hagi mago'a vahe'mo'ma Jisasinku Anumzamofa mofavre hunoma huamama hanimofona, Anumzamo'a Agripi manigeno, anamo'a Anumzamofompi mani'ne, ¹⁶Tagra keta antahita nehuta, tamentintia Anumzamo'ma avesima rante'nea'zankura nehune. Anumzamo'a avesi'zamofa agafa'e. Hanki iza'o avesizama'afima manisimo'a, Anumzamofompi maninigeno, Anumzamo'a agripi manigahie. ¹⁷Ana avesizamofa fatgo huno tagranema mesigeta, refkoma hania knarera, hanavetita otigahune. Na'ankure ama mopafi mani'nonanagi, Jisasikna huta fatgo huta mani'nonkeno'e. ¹⁸Avesinte zampina koro'ma hu'zana omane'ne, hianagi tamage avesi'zamofa, koroma hu'zana erinetre. Na'ankure koro'ma haniana refko'ma hurante'zankure. Knama eri'zanku'ma koro'ma hanimofona, avesinte'zana fatgo huno agripina omane'ne. ¹⁹Tagripima ovesinte avesinte avu'avama me'neana, na'ankure Agra esera avesirante'ne. ²⁰Hagi mago'mo huno, Anumzamofa navesinentoe nehuno, amentintima nehia nefuma avesi ontesuno'a, havige vahe mani'ne. Na'ankure mago'mo amentinti nehia nefuma negemofama avesi ontesuno'a, Anumzana nonkemofona avesi ontegegahie. ²¹Jisasi'a amanage huno kasegea tami'ne, Anumzamofoma avesintesimo'a, amentinti nehia nefuna ana huno avesintegahie.

Mopafizama agateresuna naneke

5 ¹Iza'o Jisasinku Kraisi'e huno amentinti hanimo'a, Anumzamofa mofavre. Iza'o Nefanku'ma avesintesimo'a, Mofavre'a avesintegahie

²Anama huta ovesinte avesinte hanuta antahita keta nehuta, Anumzamofu mofavre z gagura zamesi nezmantone hugahune. Anama hanuta Anumzamofu avesinenteta, kasege'a amage antegahune. ³Na'ankure ama'i Anumzamofu avesizane, tagra amage nentonkeno, ana kasege'amo'a kna noramie. ⁴Na'ankure maka vahe'moza Anumzamofu nezmafazama himo'za, ama mopafi hanavea agateneraze. Ama mopafi hanavema agatemanerea hanavea, e'i tamentintie. ⁵Iza ama mopafi hanave agatenera? Jisasi'a, Anumzamofu mofavre hazamo'za agateneraze.

Jisasi avu'avazamofu naneke

⁶Jisasi Kraisi'a mopafi e'neana, mono tine, keka zafare kora tagi atrenaku e'ne, tintekera ome'ne. Hianagi mono tine kora tagi atrenaku e'ne huno, Avamu'mo huama nehie. Na'ankure Avamu'mo'a tamage nehie. ⁷Na'ankure 3'amo'za ana zankura huama nehaze, ⁸Avamu'mo'ene, tima frezamo'ene, korama'amo enena mago zamarimpa hu'za huama nehaze. ⁹Tagrama mopafi vahe'mofu avu'avazanku'ma tamage nehanuta, Anumzamofu avu'avazamo'a rankrefa hu'ne. Na'ankure ama ana avu'avazana Anumzamofu avu'avakino, Nemofu Jisasimpi Anumzamofu huama hu'ne. ¹⁰Iza'o Anumzamofu nemofonku'ma amentinti nehimofona Agri kemo'a anamofompi me'ne, Anumzamofonku amentinti osimo'a, Anumzamofonkura havige nere nehie. Na'ankure Anumzamofu Nemofonku'ma huama hu'nea kegura amentintia nosie. ¹¹Hagi amazamo huama hu'ne, Anumzamofu manivava asimura tami'ne, ana asimura Nemofu Jisas Kraisi'ime me'ne. ¹²Hagi iza'o Nemofu Jisasi Kraisi'ime avare'nenimo, ana manivava asimura eri'ne. Iza'o Anumzamofu mofavrema ovare'nenimo'a, ana asimura e'ori'ne.

Manivava nomani'za erizamofonku huhampri'nea naneke

¹³Nagrama ama nanekema negroana, izago Anumzamofu Nemofu agire'ma kamentinti nehamoka, ko ana manivava asimura eri'nane. ¹⁴Ana hu'negu tagra hanavetita Anumzamofu avure vuta, Agri avesizamofu amage nenteta, nazankuro antahigonkeno'a, agra amane ketia nentahie. ¹⁵Hagi tagrama na'ankuro antahigonaza neramigeta antahita keta nehuta, tagra antahi'none mago'a zanku'ma antahigonazana Agripintira e'nerune. ¹⁶Mago'mo'ma kesigeno, amentinti nehia nefu'ma ahe friga kumi'ma hanigeno'a, Anumzamofu antahige'nigeno Anumzamofu friga kumi'ma hu'nenimofu asimura amino, mago'a kumi'mo'a ahe frigahie. Nagra e'inahu kumi'kura nunamuna hino hu'na nosue. ¹⁷Maka fatgo osu avu'avara kumire, hianagi mago'a kumira vahera ahe ofri kumi me'ne.

¹⁸Tagra antahi'none, Anumzamofu mofavre mani'naza naga'mo'za kumira nosaze, hianagi Anumzamofu mofavre'a nagara kva kri nezmanteankino, Sata'a eme zamavakora osugahie.

¹⁹Tagra antahi'none, Anumzamofu mofavre naga mani'nonkeno, ama mopamo'a havige ne' Sata hanavefi me'ne.

²⁰Tagra antahita keta nehune, Jisas Kraisi, Anumzamofu Nemofo eno tamage Anumzana taveri hu'ne. Na'ankure antahi'none, Jisasi'ma e'neazamo tamage Anumzanehu antahintahia tamigeta, tamage Anumzane nehuta, tagra Agripina nemanita, Nemofo Jisas Kraisimpina nemanune. Tamage Anumzane nehuta manivava asimure huta nehune.

²¹Mofavre naganimota, havi anumzamo tamavazu hu'zanku kva hiho.

Joni'a Anante (2)

Avonkre'nea Naneke

¹Nagra mono kva ne'mo'na, huhampri kante'nea a'mokane, mofavre'zga ka'ane nagrama tamage kemofoma navesima nentomo'na, (nagrakerompage, anahu kna hu'za tamage kema antahi'namo'zane tavesi neramantone). ²Na'ankure tamage kemo tagu'afi me'neankino, maka kna tagrane mevava hugahie.

³Asunku'zane asuragirante'zane, Nafati Anumzamofa rimpa fruzamo'ene, Nemofo Jisas Kraisintegatira tamagene, avesinte'zamo'a tagrane megahie. ⁴Nagra tusi muse hue, na'ankure nagrama ke'na erifore'ma huana, mago'a mofavre' naga kamo'za tamage kemo'ma hu'nea kante amage'ante fatgo hu'za nemani'za, Nerafa'ma kema humarante'nea kante ante'za avariri fatgo hu'naze.

Havige mono rempi huzami vaheku kva hanuna naneke

⁵Hu'neanagi menina kantahinegoe, a'moka aru kasegea kre'nogamue, hianagi rumokizimigu ovesinte avesinte hiho huno ese agafare'ma higeta antahi'nona kasege. ⁶Hanki menina avesinte'zane, Agri kasegemo'ma hu'nea kante anteta tagra kana vanune. Ama ana kasegea kagrama ese agafare ko antahi nanankinka, kagra ana kante vu fatgo hugahane.

⁷Na'ankure havige hu'za zamagrarega zamavrente vahera rama'a kokankoka vano nehazankino, Jisasi'a tazahu ne' Kraisikino mopafi avufa erino e'ne huno huama osanimo'a, ana nera havige ne' agrarega zamaretre ne'kino, havige kraisie! ⁸E'i ana hu'negu kava huo, tagrama maraguzatita eri'zama e'nerunazana, atre'zankura kava hanune, hianagi erizama e'neruna zantera, ana miko mizama'a erifatgo hanune. ⁹Iza'o ugoteno nevuno, Kraisima rempima hu'nea kefima omanesimo'a, Anumzamofona avareonte'ne. Iza'o Jisasi'ma rempima hu'nea kefima manisimo'a, Nefane Nemofonena avarente'ne. ¹⁰Mago'a vahe'mo'ma kagrite eno, rempima hu'nea tamage kema erino omesimofona, avarenka nonka'afina antege, mago'a huso'e hunka agazone kea huonto. ¹¹Na'ankure iza'o ana vahe'ma huso'e hunesimo'a, havi avu'ava zama'amofa aza huno ana avu'avaza hugahie.

Vagare naneke

¹²Hakare naneke me'neana nonkre'na tamagra ne magopi umani'ne'na naneke nehamanenko tarimpa so'e hugahie. ¹³Anumzamo huhampri'nea negasaro mofavre naga'mo'za, ferure huramantaze.

Joni'a Nampa 3

Avonkre'nea Naneke

Eri'ama kene, musenke

¹Nagra Joni'na mono kva ne'mona (elda), Gaiusiga knare nenafuga tamage kemofoma navesima nentena, navesima negantoa ne'moka kre'negamue.

²Ronenimoke, nagra nunamu nehuankino hakare zamo'a knare hugantena, kria e'orinka kagu'amo'ma hu'nea kna hunka knare hugahane. ³Na'ankure mago'a nenafu'za e'za tamage kemo'ma kagu'afi me'nea kema huama hazage'na, tamage kemo'ma hu'nea kante mani fatgo hu'nana zankura, nagra tusi muse hu'noe. ⁴Antahuama mofavre naganimo'za tamage kemofompi mani'naze hazazankura, nagra mago'a knama nehua musena, agatere'na tusi muse hu'noe.

Gaiusi azeri hanaveti'nea naneke

⁵Knare rone'nimoke, maka'zama kafuheinte'ene, ru vahete'enema huzmante'nana zamo'a, knare kavukva'ma hunka vu'nanazana eri ama hu'ne. ⁶Kagrama zamesima zamantenka, knare kavukva'ma huma zamante'nana zankura, mono vahe zamure eme huama hu'za tasami'naze. Kama vunaku'ma hanagenka, Anumzamofu knare avu'ava zampi, so'e kavukva huzmantege'za viho. ⁷Na'ankure ana vahe'mo'za, Jisasi Agi'a eri'za vu'za e'za nehu'za, zamagra mago zmazahu'zana mono ontahi vahepintira e'origahaze. ⁸Ana hu'negu, tagra e'inahu vahera zamaza hugahune, ana'ma hanuta tamage kemofu eri'zana magoka tragoteta erigahune.

Diotrefisi'a hazanke nere

⁹Nagra mono naga'motmarega mago avona ko kre rami'noanagi, Diotrefesi'a zamagritera agra avesite ugagota huzmantenaku nehunokino, tagrira tageno antahino osu'ne. ¹⁰E'i ana hu'negu, nagrama esu'na, agrama nehia avu'avamofu kea eme antahinege'na, havigema huma

rante'nea kea antahigahue! E'i ana kege osu'neanki, nerafuzama azageno'a agra muse huno ozmare'ne, hianagi knare kema nehu'za zamazeri so'e huku'ma haza vahera, mono nompintira zamahenatitre'ne!

¹¹Ronenimote havi zamu'zma'ma nehazamokizmi zamavu'zmavara e'oriho. Hianagi knare'ma hu'nenia tamutma hiho. Mago'mo'ma knare avu'ava'ma himo'a Anumzamofa vahe mani'ne, hagi mago'mo'ma havi avu'ava'ma nehimo'a, Anumzamofona onke'ne.

Demitriasi'a hentofa avu'ava hu'nea naneke

¹²Demitriasinkura rama'a vahe'mo'za huama hunentageno, tamage kemo'enena huama hunte'ne. Tagranena anazanke huta huama nehunkenka, kagra antahinka kenka hu'nane, tagrama hunankemo'a tamage me'ne.

Vagare naneke

¹³Hakare avoma kreramisia nanekea me'neanagi, avo zotareti'ma krerami'zankura nagesa nontahue. ¹⁴Hianagi mensintfana tamagenakure hu'na nagesa nentahue, magopi mani'neta keaga hanunegu nehue.

¹⁵Ramofa rimpa fruzamo'a tamagra ne mesie. Amafima nemaniza ronemimo'za musenke huramantaze. Magoke magoke'mokizmi zamagire musenkea huramantaze.

Juti Kre'nea

Avontafemofa Naneke

¹Juti'na, Jemisi nefu'na Jisas Kraisi kazokzo eri'za e'nerumona, Anumza Nafatimofa avesipine, Jisas Kraisi kavafima kehiteta mni'nazamotarega, ama avona kre'neramue. ²Anumzamofa asunkuzanki, arimpa fru'zanki, avesi'zanena mago'ane erisageno, aviteno tamagripina mesie.

Havige rempima huzami vaheku kva hanaza naneke

³Navesi neramantoa nafuheta, Anumzamo'ma tagu'mavazinia zankura huama nehu'na avoma kreramizankura antahintahinimo'a tusiza huno onetige'na retro nehue. Hianagi menina mago'azanku avona kreramisue hu'na huana, Knare Musenkema, Anumzamo'ma Agri'a ruotge hu'nea vahe'arema magoke zupa zmi'neazamo maka kna mevava nehina, tamage nanekere tamentintima nehunazanku, tamentinti otretma hanavetita azeri akona hnazegu tamasmiza nehue. ⁴Na'ankure mago'a mono ontahi vahe'mo'za onkazageno, ko rerakaure'za amuno tamifi efre'naze. Ana vahe'mo'za amanage hugahaze, Anumzamo'a kumira atre'nezamantea zanku amane havi avu'avara hugahune hu'za nehaze. E'inahukna vahe'mo'za inankna henka hugahaze, korapa refako huzamantene. Na'ankure Kva netimofa Ranti Jisas Kraisina ha'rentegahaze.

⁵Ko amana zana maka antahinazanki, huramagesahu kema tamasamisuaana, Ramo'a Israeli vahera miko Isipitira zmagu vazino zamavreno atirami'neanagi, henkama ana Israeli vahe'mo'za, Agrite'ma zmentitima osaza vahera zamahe fanane hu'ne. ⁶Hagi Anumzamoma ankeri vahekuma huno, e'i avamente manihio huzmantege'za ana kemofa agorga'a omanizageno, katuofe kina rezamanteno hanizampi kina huzamantege'za mni'neza, henkama ranknarema refakoma hania knama esigu avega ante'za mani'naze. ⁷Hagi tamagera okaniho, Sodomu rankumate'ma, Gomora rankumate'ma, ana tava'ontema me'nea kuma tamimpima monko avu'avazama hu antahintahimo avitege'za, omane'nea kna monko'za hu'naze. E'i ana kumatamina tevereti zamahe fanane hu'neankino, e'i ana hukna hu'za kefo'zama nehaza vahera, henka'a tevava tevefi mni'ne'za zamata erigahaze. (Jen-Agf 19)

⁸E'i anhukna kante, ana vahe'mo'za zamagra avanama kazazamo zamavufga zmazeri pehenage nehige'za, kavama krizmante'nemofogorga'a nomaniza, msazama'ane nemniza ankerovahetamina huhavizahunezmantaze. ⁹Hu'neanagi Maikoli ugota ankerone'mo, Mosese avufama erinaku keha'ma Sata'enema nereno'a, huhavizana huonte'ne. Hianagi Ramo'a kagrira kea kasuno kea hugantesie huno Satana asami'ne. ¹⁰Hianagi zamagra antahi'za ke'zama osu'naza zankura huhavizahunente'za, afu kra antahintahine mani'ne'za, e'inama hazazamo zmagra'a zmazeri haviza nehaze. ¹¹Zamagra'a kva hiho! Zamagritera havizantfa fore hugahianki, na'ankure Keni'ma kefo avu'avama huno nagna'amofoma ahe fri'neanka nehaze. Hagi Balamu'ma hu'neaza hu'za hakare'a zama hanazana zgore hugahaze. Kora'ma mago rimpasuno ha'ma rezmante avu'avaza nehu'za, fanane hu'neaza hu'za fnanene hugahaze. (Jen-Agf 4:1-8, Nam-Ham 16, 22) ¹²Hagi ana vahe'mo'za Ramofo avesizanku'ma muse huta ne'zama retro'ma hanafina zamagraguke nentahiza zmagazegura nosu'za tamagripima efresu'za, hagerimpi havemo me'nenoventema ahe havizahiankna nehu'za, hampomo eriatru huteno ko'ma orienkna hu'za rama'a huvempa hugahazanagi, anama huvempa hu'nesazazana osugahaze. Zamagra rga'a tagi knafi rga reontezafagna hu'naze. Hanki zafamoforafu'na'aga tasagi hutreankna hanige'zamagoke zupage ofrigosazanki, tare zupa frigahaze. ¹³Zamagra hagerimokranto kranto nehuno, agrenke hiankna hu'za, zmagazehu zmavu'zmavahuhakarehu vahe mani'naze. Zamagra hanafimomagokete mani so'e osuvuno eno hiankna vahe mani'nazankino, haninentake kumapi manivava hanazeguanumzamo'a retro huzmante'ne.

¹⁴Hagi Inoku'a, Adamunteti maniza e'naza vahepintira 7nire ehanati'nea naganofipinti ne'mo ama ana vahekura kasanampa kea hunteno anage hu'ne, Ramo'a hampriga osu'nea ruotge hu'namo'zane ne-eanki keho. ¹⁵Agra ama mopafi vahera refkoma hunezmanteno, Anumzamofonavu'avama nosu'za havi zmavu'zmavanehu'za, Anumzamofoveri'zama e'noriza Agri'ma huhavizama huntesa vahera, hanavetino kea huzmantegahie. ¹⁶Zamagra zamarimpa knage nehu'za, nazinke nehantage'za, kefozama hu'naku'ma hanazaza hugahaze. Zamagra rankege nehu'za ru'mozama zamigima zamizankuke hu vahe manigahaze.

Mani fatgo hu'za manisaza zanku ke hu'nea zamofonaneke

¹⁷Hu'neanagi navesima neramantoa nenafugata tamagera okaniho, Rantimofogisasi Kraisi aposol naga'mo'za tamasimiza, ¹⁸henka vagare knafina hunte'za kiza zokago ke hunte vahe fore nehu'za Anumzamofozamage'na hunemi'za, kefo zamavuzamava hanaza vahe manigahaze. ¹⁹E'ina vahe'mo'za amu'no tamifina atane'zana avare'neramize. Zamagra

ama mopafi vahe'mofo antahintahi nevaririze. Na'ankure Anumzamofu Avamumo'a' zamagripina omanine. ²⁰Hianagi navesima neramantomota tamagra ruotge hu'nea tamentintifina hagetma mrenerita, Ruotge Avamumo'a tamaza nehina nunamuna hiho. ²¹Hagi Anumzamofu avesizampi nemanita, Rantimo Jisas Kraisi asunku zampima manivava manizama tamikema hu'nea zankura tamavresra osu avega anteho.

²²Zamentintimo hanavema otinesia vahera, zmasunku huzmanteta zmaza hiho. ²³Hagi mago'amo'za tevefi ko mani'nazanki, ame huta tevefintira zamaza huta hanageho. Mago'amokizmia tamasunku huzmanteta zmaza hugahazanagi, zamagri kefo'zamoma tamazeri havizama huzankura, tamagra kva hiho.

Huvhare naneke

²⁴Hagi menina Anumzamo'a tanafama ruzankura kegva huneramantena, Agra tavaresigeta Agri'a msafi kunitami omanena, tusi'a musezampi manigahaze. ²⁵Ramo, Jisas Kraisimpi tagu'vazino taza hu'nea Nera, Agrake Anumzamo mani'ne, Tamage. Msazanki, ra agigi, hanavegi, kavatia Agrake korapara mani'neankino menina mani'neni, henka manivava huno vugahie. Tamage.

Revalesen-Hufo Hu'ne

Anumzamo Oku'a Me'nea Ke Joninte Eriama Hu'nea Naneke

Jisasi'a fraki'nea ke Joninte erinte'ama hu'nea naneke

1 ¹ Anumzamo'a eri'za vahe'araminte kofta huno fore'ma haniazana, oku'a me'nea ke Jisasi'a ankeru ne'a amino huntengeno, eriza ne'are Joninte emeri ama hu'ne. ² Joni'a Anumzamofu kea huama nehuno, Jisasi agenkene makazama ke'nea zamofu kea huama hu'ne. ³ Ama kasnampa kema hamprinaza vahe'ene, antahi'naza vahe'ene, ana kema amage'ma antenaza vahe'mo'za asomu erigahaze. Na'ankure anazama fore'ma hania knamo'a, hago kofta nehie.

Seveni'a mono nonte mni'naza vahe'mokizmi krezami'nea naneke

⁴ Nagra Joni'na, ama naneke Esia kaziga 7ni'a mono nonte nagamotarega kreneramue. Hagi korapa mni'neni, menima mni'neankino, henkama mani'nia Anumzamo, Agra'a asuragizane, rimpa fruzana tamina, fru hutma manigahaze. 7ni'a Avamutamima Anumzamofu kini tramofu avugama nemanizamofu, zamagranena zmasu ragiramante'za, tmazeri fru hanigeta, fru hutma nemnisageno, ⁵ Jisas Kraisi fatgo huno, Anumzamofu ke'a huama nehimo, Agra'a fri'naza vahepintira ugagota huno ese oti'nemo, maka mopafi vahe'mokizmi kini vahe kegva huzmante'nea ne'manin'eankino, Agra kumitifima mani'nonkeno, avesiranteno korama'areti mizaseno katufe tantenegu agi'a erisaga hanune. ⁶ Agra'a vahe tazeri retro huneranteno, Anumzamofu eriza erisuna prisi vahe tavareno retro hurante'neankino, Agrake'za maka kna ra agi'a e'nerino hanavea erino, manivava hugahie. Tamage. ⁷ ***Kehe, Agra hampompi ne-eankino***, (Dan 7:13) maka vahe'mo'za negesageno, keka zafare'ma krugruma renaza vahe'mo'zanena negesageno, maka ama mopafi vahe'mo'za zavi krafa hugahaze. Hanki e'ina hu'zana fore

hugahie. Tamage. ⁸Nagrani'a ese agafahu manina (Alfa), vgare mni'noe (Omega). Korapa mni'nena, menina mni'noankina, henka egahue huno hanavenentake Ra Anumzamo'a hu'ne.

Joni'a avanagna zampi Jisasina ke'nea naneke

⁹Nagra Joni'na neramafu'na Anumzamofu kumaku'ma knama enerita Jisasinte'ma kazigazi huta magoka nevumo'na, navre'za ti amunompi Patmosie nehaza mopa, me'nere ome nante'naze. Na'ankure Anumzamofu kereku'ene, Jisasi agenkema huama'ma nehua zanku anara hu'naze.

¹⁰Hanki Ramofu knazupa, nagra avamupi mni'nena nentahugeno, namefigatira mago agerumo'a ra ufereaza huno anage hu'ne, ¹¹Amama kana zantamina avontafe krenka, 7ni'a kumate me'nea mono nontaminte atregeno vino. Efesasima, Smenama, Pegamamima, Taitariama, Sadisima, Fildafiama, Ledosiamu hunka krezamio.

¹²Anagama huno hige'na, rukrehe hu'na ke'ma hia vahe ke'nakuma huana, 7ni'a tavi rekru hunte'naza azota kolire tro hunte'nea me'negenka ke'noe. ¹³Ana lamu tavimofu amu'nompina, Vahe'mofu Mofavregna ne'mo, efeke zaza kukena antaninegeno agia ruhananegenka, kolire tro hunte'naza nofinu afupinti rutahera higeno, asoparega kreramino vu'nege'na ke'noe. ¹⁴Hagi Agri asenimo'ene azokamo'a efenentake huno efeke hampokna higeno, avurgamo'a teve anefakna hu'negenka ke'noe. ¹⁵Ana Ne'mofu agamo'a brasima tevefima krefizo hazageno, masanentake nehiankna nehigeno, agerumo'a rama'a timofu agasasa kemo'ma hiaza hu'ne. ¹⁶Ana ne'mo'a azantmaga 7ni'a hanafi azerinegeno, tare kaziga asane kazimo agipintira atiramino egeno, Agri avugosamo'a zgemo remsa hiankna huno hanavenentake huno remsa hu'ne.

¹⁷Nagrama ana ne'ma nege'na, agafi traka hu'na fri vahekna hugeno, tamaga azanu nagofetu nenteno anage hu'ne, Korera kagra osuo, Nagrani'a ese agafahu mani'na, vgarera mani'noe. ¹⁸Kasefa hu'na mni'nomona ko frite'na, oti'na mani'noanki, keho, henka'a ofri'na manivava hugahue. Fri'zane, fri vahe'mofu kumate ki nofira Nagra azeri'noe. ¹⁹E'ina hu'negu makazama menima kana zane, menima me'neazane, henkama fore'ma haniazanena avontafepi krento. ²⁰Kagrama 7ni'a hanafi'ma tamaga nazampima me'negenka negenka, kolire tavima rekru hunte azotama ke'nanana oku'a agu'agesamo'a amanahu hu'ne, 7ni'a ofuna, 7ni'a mono kumate ankeru vahetami ke'nane, tavi'ma rekru hunte azotama, kolire tro huntenege'na 7ni'a ke'nanana, 7ni'a mono kuma me'negenka ke'nane huno nasamine.

Efesai kumate nemniza mono nagamofu krezami'nea naneke

2 ¹Efesai kumate mono nagamokizmi, ankeromofona amanage hunka krezamio, Nagra 7ni'a hanafira nazantamaga azenerina, 7ni'a

tavi'ma rekru hunte kolire azotaramimofa amunompi vano nehuma'na, nehuanke antahiho.

²Hanavetinka erizama e'nerinka, mragu'zama netinka, maka knazama e'nerinka, kazigazima hunka nevunka, havi zamavu'zmava nehaza vahe'enema tragotenka omaninka, havige hu'za aposol vahe mni'none nehaza vahera refko huzmantenka negenka, havige nehaze hunkama nehanazana, Nagra ke'na antahina hu'noe. ³Nagri nagireku'ma hu'za knama kamizana, kagra akohenka mani'nenka, ana knazana enerinka, kavesragura osunka kazigazi hunka knazana eri'nane. ⁴Hianagi kagrira anage hu'na hugantegahue! Kagrama koma navesi nanteneankna hunka menina, navesi nonantane. ⁵E'ina hu'negu kagrama trakama hunante kagesa nentahinka, ese'ma kagu'a rukrehe nehunka hunana kavukva hunka, kagu'a rukrehe huo. Anama osananke'na, e'na tavika'ama me'neretira emeri atregahue. ⁶Hu'neanagi kagra amanahu nehane, Nikolasi avu'avama nevaririza vahe'mofo znavu'zmavara kavesra hu'zmante'nane. Nagranena navesra hunezmantoa znavu'zmava osu'nane. ⁷Izano agesama me'nenimo'a, Avamumo'ma mono nagate'ma huamama nehia kea antahino, iza'o ha'ma ageteresimofona, Nagra atresugeno, monafinka Anumzamofa hozafi me'nea asimu eri zafa rga negahie.

Smena kumate nemniza mono nagamofa krezami'nea naneke

⁸Hagi Smena kumate maninaza mono nagamokizmi ankeromofona amanage hunka krezamio, Nagra e'se agafahu mani'na, vgare mani'nenana, fritena otina mani'nomona, anage nehue,

⁹Nama'agna kazeri haviza nehazageno, kamunte omne'neana Nagra antahi'noe. Hianagi kagra tusia feno vahe mni'nane, zamagrama Jiu vahe mni'none nehazanagi, zamagra Jiu vahera omni'naze. Hianagi zmagra Sata naga mani'naze. ¹⁰Hanki ko, kagrama knazampi ufresnana knamo'a kofta nehianki korera osuo. Sata'a hanige'za mago'a nagatamia avare'za kina hunente'za, reramahe'za kesageta 10ni'a gnamofo agu'afi knazana erigahazanki, kazigazi huta nevuta ome frisagena, Nagra asimu erino mni fetori tamamigahue. ¹¹Izano agesama me'nenigeno netahisimo'a, Avamu'mo'ma mono nagate'ma huama'ma nehia kea antahise hino, Iza'o ha'ma agateresimofona, anante frizamo'a azeri havizana osugahie.

Pegamam kumate nemniza mono nagamofa krezami'nea naneke

¹²Hagi Pegamam kumate nemaniza mono nagamokizmi ankeromofona amanage hunka krezamio, tarega kaziga asanenea kazima eri'nea ne'mo amanage nehie.

¹³Nagra antahi'noe, Sata'ma kini tra anteno mani'nea kumate mani'nenka, Nagri nagima azeri hanavema'tinanana, Sata'ma mani'nere'ma mni'nankeno, Nagri naneke huama nehia ne'ma, Antipasina

tamagri amu'nompinti avare'za ahe'naze. Ana hazanagi tamagra Nagrite'ma tamamentintima hu'naza zana otretfa hu'naze. ¹⁴Hianagi Nagra osiazanku kea kagrikura huza hue, na'ankure mago'amo'za Baramu'ma rempima Barakima humino, Israeli vahema kumi hihogu zmazeri trakama hukema huno, havi anumzante kre sramna vuntenza ne'za nene'za, monko avu'avazama hihoguma hu'neazana kagra antahinane. ¹⁵Anahukna hu'za Nikolasi'ma rempima hurami'nea kea amu'nontamifina mago'amo'za azeri'naze. ¹⁶E'ina hu'nagu tamagu'a rukrehehiho, anama osanagena ame hu'na e'na, nagipima asane kazima me'nea kazinu, eme ha' huzmantegahue. ¹⁷Izano agesama me'nenimo'a Avamumoma mono nagamofu nesamia naneke antahise hino. Ha'ma agateresimofona, framakinea mana ne'za mago'a nemina, magora efeke have nemina, agi'a ana havere krentenugeno, rumo'a ana agia ontahigahianki, ana havema erisimoke, ana agia antahigahie.

Taiataira kumate nemniza mono nagamofu krezami'nea naneke

¹⁸Taiataira kumate nemaniza mono nagamokizmi ankeromofona amanage hunka kremio, Anumzamofu mofavremofona avurgamo'a teve anefakna nehigeno, agamo'a pehe huno bronsi havegna huno marave marave hu'nemo'a anage hu'ne.

¹⁹Nagra kavukvama hanana antahina ke'na hu'noe. Kagra kavesinenantenka, vahe'mokizmia kavesi nezmantenka, kamentinti nehunka, erizama e'nerinka knazama ne-egenka kazigazi nehunka, ese knama kamentintima hu'nanazana, menima hana kamentintimo'a agatereno so'e zantfa hu'ne. ²⁰Hianagi Nagra anage hu'na hanaveti'na keaga hugantegahue. Jesebelina kasnampa a' mni'noe nehia ara atrankeno, kagrane mani'neni, kazokazo eriza vaheni'a rempi hunezamino, zmavreno havi kante nevig'e'za, monko avu'avazana nehu'za, havi anumzante kresramna vunte'nea ne'zana ne'naze. ²¹Nagra mago'a knaza ami'na, monko avu'avama nehiazana agu'a rukrehe hanie huanagi, agra agu'a rukrehera osu'ne. ²²Keho, Nagra kri ami'nugeno, kri tafete masegahie. Agranema monko avu'avazama nehaza vahe'mo'za, anama nehaza zankuma zmagu'ama rukrehema osnazana, rama'a knazampi ana a'ene ufregahaze. ²³Nagra ana a'mofoma amage'ma nentaza vahera zmahe fri'neni, maka mono vahe'mo'za ke'za antahi'zama hanazana, maka vahe'mofo antahizane, zmagu'zmagesa nege hu'za nehanage'na, magoke magokemozama zmavu'zmavama hanare, mizana zamitere hugahue. ²⁴Hanki mago'a Taiataria mni'nazamota Jesebelima rempi huraminea kea amagera nontetma, rempima huraminea kea azenoritma, Satana oku'a antahintahia nontahitma, zamagrama hu'naza zana osu'nazankina, Nagra mago'a knazana ontamigahue. ²⁵Ana hu'negu nazano menima azerinana zana azeri hanavetinege'na, Nagra a'neni.

²⁶Iza'o ha'ma agatenereno, Nagri navunava huno vgare knarema vanimofona, anamofona Nagra hanave amisugeno, rama'a vahe kegva krizmantegahie. ²⁷Ana nehuno agra kini vahe'moma e'neria aeni azotareti, mopa kavoramima rufuzafu'peankna huno vahetamina kegva hugahie. Nagrama Nenfantegatima vahe'ma kegva hu hanavema, eri'noankna hanave erigahie. ²⁸Ana nehanige'na Nagra nanterama remsa nehia ofuna amigahue. ²⁹Iza'o agesama me'nenigeno nentahisimo'a, Avamu'mo'ma mono nagate'ma huamama nehiana antahise hino.

Sadisi kumate nemniza mono nagamofu krezami'nea naneke

3 ¹Sadisi kumate mono nagamokizmi ankeromofona amanage hunka kremio, Nagra Anumzamofu 7ni'a Avamura nazampina eri'nenana, 7ni'a ofuna eri'nomona, ke'ma hanuana antahiho. Kagrama nehana kavukvara antahina ke'na hu'noe. Maka vahe'mo'za kagra ksefa hunka mni'nane hu'za nehazanagi, kagra ko fri'nane. ²Hanki otinka, kagripima fri vgaregenoma osiazama me'neazamoma fri'zama nehiana, azeri hanavetio. Na'ankure kagrima kagoana, Nagri Anumzamofu avurera, fatgo kavukvara nosane. ³Ana hu'negu ko'ma rempi hugamizagenka, nentahinka eri'nana kea azeri kona nehunka, kagu'a rukrehuo. E'ina hu'negu, kagrama otinka, kagu'ama rukrehe osnanke'na, omegahie hunka kagesa ontahinana knafi, kumazafa vahe'mo'za neazankna hu'na egahue. ⁴Hianagi osi'a naga Sadisi kumate mni'namo'za, havi zmavuzmava osu'za kukena zamia eri pehana osu'nazankiza, zamagra efeke kukena nehu'za, Nagrane kana vugahaze. Na'ankure zamagra Nagrane vuga hu'naze. ⁵Iza'o ha'ma agteresimo'a zmagrikna huno efeke zaza kukena nehanige'na, asimuma erino mani avontafepintira, agi'a reohananevahue. Nenfane, ankeru vahe'amofu zmavurera agi'a huama hugahue. ⁶Iza'o agesama me'nenigeno nentahisimo'a, Avamu'mo'ma mono nagate'ma huamama nehia kea, antahise hino.

Filadelfia kumate nemniza mono nagamofu krezmi'nea naneke

⁷Fildelfia kumate nemaniza mono naga'mokizmi ankeromofona amanage hunka kremio, Agra ruotge huno, tamage Ne'mo, Deviti kinofi eri'neankino, kafama anagisiana, magomo'a eri onkisigeno, erigisiana mago'mo'a eri anagigara osu'nemo anage nehie,

⁸Nagra kavukvaka'a kagena antahina hu'noe, ko, kavuga kahana anaginte'noankino, mago vahemo'a erionkigahie. Na'ankure kagra osi'a hanaveka'a me'nengenka, nanekenia amage nentenka, nagi'a eri frara oki'nane. ⁹Ko, Sata mono nagamo'za hu'za, Jiu vahe mani'none nehu'za havige nehaza vahera, Nagra zmatufesuge'za e'za, tamagri tamagafi eme zmare'nare'za, tamage Nagra tamavesi neramantoe hu'za, zamagra ke'za antahiza hugahaze. ¹⁰Na'ankure kagra kazigazi hunka, Nagri kea amage

ante'nane. Ana hu'nanku ama mopafi miko vahe'mo'zama rehezampima ufresaza knafina, katresugenka rehezampina kagra uofregahane.

¹¹Nagra ame hu'na egahuanki, ko'ma eri'nana zana azeri kona huo, ana'ma osnanke'za rumo'za kini fetori ka'a erigahaze. ¹²Iza'o ha'ma azeri agateresimofona, Anumzanimofa ra mono nompi, no azeri hanaveti anumza'zafa tro hunente'na, agrira atrenugeno atinoramina, Anumzanimofa agine, kasefa Jerusale ku'ma monafinti, Anumzanimofontega atreno eramina kumamofa agi'a krenente'na, Nagra kasefa nagingena krentegahue. ¹³Iza'o agesama me'nenigenoma nentahisimo'a, Avamu'mo'ma mono nagate'ma huamama nehia kea antahise hino.

Laodisia kumate nemniza mono nagamofa krezaminea naneke

¹⁴Laodisia kumate nemaniza mono naga'mokizmi ankeromofona amanage hunka kremio, Nagra tamage nemo'na, maka kea avariri fatgo nehu'na, fatgo hu'na maka kea huama nehumo'na, Nagra maka zama Anumzamo'ma, ese agaferetima troma hu'neazamofa agafa'a mni'nomo'na, ama naneke atrogeno tamagritega e-e.

¹⁵Mika tamavutmava hunazana ke'na antahina hu'noe. Tamagra amuhu osutma, zasira osutma hunazanagi, Nagri'ma nave'ma nesiana, amuhoma hanamotma, amuhu hinkeno, zasima hanamota, zasi hiho. ¹⁶Amuhone zasi'enena osutma, amunonte mni'nagu, Nagra nagripintira amu'ati tamatregahue. ¹⁷Na'ankure kagra anage hunka nehane, rama'aza ante'nena, tusi'a fenone vahe mani'noe hunka nehunka, mago'zankura upara osu'noe hunka nehananagi, kagrama havizantfama hunka, kasunku hugantega kante mni'nenka, kamunte omaneno, kavu asu higenka, kavufa kavapa mni'nanana kagra nonkane. ¹⁸Nagrama kasamisua, tevefima kreno eri agruma hu'nea koli Nagripinti miza setenka, feno vahera nemaninka, efeke zaza kukena miza senka kukena nehugeno, kagaze kavufamo'a amatera nosina, avure fre masave Nagripinti miza senka, fretenka kavua ke so'e huo. ¹⁹Nagrama navesizmantoa nagamofona hanavetina, zmazeri fatgo nehu'na, zmavumarora nentoe. E'ina hu'negu knare tamavu'tmavama huzanku nentahitma, tamagu'a rukrehe huta fatgo huta maniho. ²⁰Keho, Nagra kafante oti'nena vagre vagre nehue. Iza'o Nagri nageru antahino, kafama anagisimofona, Nagra efre'na agrane nezana nesugeno, agra Nagra ne negahie. ²¹Iza'o ha'ma azeri agateresimofona, Nenfa trate'ma ha'ma azeri agaterena mni'noaza huno, ha'ma azeri agateresimofona, atresugeno Nagri trate magoka manigahu'e. ²²Iza'o agesama me'nenigenoma nentahisimo'a, Avamu'mo'ma mono nagate'ma huamama nehia kea antahise hino.

Monafi me'nea zantami Joni'a ke'nea naneke

4 ¹Ama anazama evutege'na, nagra kogeno, mona kafamo'a anagino ruhagro higeno, ese ageruma antahi'noa agerumo ufe krafa hiaza

nehigena antahugeno, Nagrikura anage huno hu'ne, Amare egena, amazama evanigeno, henkama fore'ma hania zana kaveri haneno. ²Anage nehige'na ame hu'na nagra avamupi mni'nena koana, mona kumapina kini tra me'negeno, mago'mo ana kini tratera mni'nege'na ke'noe. ³Ana ne'mofo msa'amo'a rumsa huno jasapa havegna nehuno, koranentike huno konilienie hu'za nehaza havegna hu'ne. Mago furage'namo kini tramofona rugagintegno, zafa asinage huno emerelie nehaza havegna huno remsa hu'ne. ⁴Ana kini tramofona 24'a kini tratami manegorave huntegno, ana 24'a kini tratera ugota kva vahe'mo'za mni'ne'za, efeke zaza kukena hu'za, kolire kini fetori zmasenirera antani'naze. ⁵Ana tra'ma me'nefintira trage huno ko psina enerino, tusi'a monage nehigeno, kini tramofa avuga 7ni'a tavi tevemo'a hagana hagana huno te'ne. E'i ana 7ni'a tevema hagana hagana huno nereana, Anumzamofa 7ni'a Avamutami me'ne. ⁶Hagi ana kini tra'mofo avuga, kapoteti tro huntageno msanetake huno rumarave nehiankna hageri me'geno, ana kini tramofa amu'nompine ruga ruga, 4'a asimu anteno mni'nea zgaramina, z mavugane zmefika z mavurgamo'a avite'nea zgamo'za mni korave hu'nazage'na zmage'noe. ⁷Ese'ma mani'nea zgamo'a Laionigna higeno, anante zgamo'a kaogna higeno, nampa 3zgamofo vahe avugosagna higeno, nampa 4zgamofo hareno vano nehia tumpamofo avugosagna hu'nea zga ke'noe. ⁸Hanki anama kasefa huza maninaza 4'a zgamofo, mago magomofona 6si'a agekona huzmantegno, zmagekonamofo fenkaga kizigane z mavugane zmefi'enena z mavurgamo'a hakare huno avitenege'za, ontage'za zgene hanine anage nehaze, ***Ruotage hu'nane ruotage hunane, Ra Anumzamoka Ruotgera hunane, Hanavenentake hunka, Ko maninenka, menina mni'nanankinka, henka egahane*** nehaze. ⁹Hanki anantema zmasimu anteza mni'naza zgamo'za, kini tratema mani'nea Ne'mofo husga hunte'za, ra agi nemi'za, susu hunte'za Agra manivava hugahie hu'za agia erisaga huvava nehazageno, ¹⁰ana 24'a ugota kva vahe'mo'za, kini tratema mani'nea Ne'mofo avuga z mavugati zmarena omere'za umase'za, manivava nehia Nera mono hunente'za kini fetorira, ana kini tramofa avuga zafi netre'za, anage nehaze: ¹¹Kagrake knare hunka marerinane, tagri Ra maninka, tagri Anumza mni'nane, Kagrake rankagia e'nerinka, kagia erisaga nehageno, hanavekamo'a mrrerinie. Na'ankure Kagri kavesite maka zana efore huno me'ne, hu'za hu'naze.

Avontafe'mofo naneke

5 ¹Hanki kini trate mani'nea Ne'mofo tмага azampine agu'afine amefiga'anena, avo krente'nea avontafera, 7ni'a fukinu rekamrentenegena ke'noe. ²Ana higena kogeno hanavenentake ankeromo ranke huno anage hu'ne, Iza knarera hu'nenimo, ama fukima rekamrentenea avontafera erignopeno erivaka regara hu'ne? ³Hanki monafi mni'nesimo'o,

mopafi mni'nesimo'o, mopa agu'afi mni'nesimo'a, mago'mo'e huno ama ana avontafera erivaka orege, agu'afina erivakareno kegara osu'ne. ⁴Ana hige'na krafage hu'na zavira ate'noe, na'ankure mago'mo'e huno ana avontafera eri vaka orege, agu'afina kegara osu'negene. ⁵Ana 24'a elda kva vahepinti mago'mo anage huno nasamine, zavira otenka ko! Juda naga'nofipinti Deviti negeho ha'ma agaterenea Laionimo, Agra 7ni'a fukina eriganopega hu'neankino ana avontafera erivakarega hu'ne.

Sipisipi afu anenta Joni'a ke'nea naneke

⁶Anante kogeno mago sipisipi anentamo'a kini tramofone, 4'a kasefa hu'za zmasimuma ante'za mni'naza zgaramimofa amunompi oti'nege'za, 24'a elda kva vahe'mo'za regorave hunte'naze. Ana sipisipi anentara korapa ahenaza sipisipi anenta kna hu'ne. Ana sipisipi anentamofona 7ni'a pazive hunteteno, 7ni'a avurga hunte'neankino, e'i ana avurgamo'a Anumzamofa 7ni'a avamutaminkino, maka kaziga mopafi huzmantege'za nevaze. ⁷Hagi Agra vuno tratema mni'nemofa tamaga azampintira avontafera omeri'ne. ⁸Hagi ana sipisipi afu anentamoma avontafe'ma omenerige'za, 4'a zmasimu eri'za mni'naza zgaraminki, 24'a elda kva vahe'mo'za, sipisipi anentamofa agafi zmare'ne'za magoke magoke'mo'za zavena (harp) erine'za, zmente zmente mananentake'zama kre sramnavu'za mevite'nea korire zuompa erinazana, e'i anazana Anumzamofa nagamofa nunamune. ⁹Hagi zmagra kasefa zgame neh'u'za anage hu'naze, Kagra avontafera erinka rekamrente'naza fukintamina eriganopega hu'nane. Na'ankure Kagrira kahe frizagenka koranka'anu, mika nofi nagapinti'ene, zmagerupinti'ene, vahepinti'ene, mopafi vahera mi'za sezmente'nane. ¹⁰Kagraka'a kumaka'afi huhampri zmantanke'za, kinimofa prisi vahe tro huza manizankiza, zamagra ama mopafi veara kegva hu'za manigahaze. ¹¹Anantera nege'na nentahugeno, rama'a ankeri vahe'mo'za kini tramofona regagine'za, kasefa hu'za mni'naza zgamo'zane, 24'a elda kva vahe'mo'zane, tusi'a hampriga osuga'amo'za, ¹²ranke hu'za anage hu'naze, Agri'ma ahazageno fri'nemo, hanavene so'e feno'zane, knare antahizane, himamu hanavene, husga huno ra agia ami'zana Agrake erigahie. ¹³Hanki maka'zama tro huzmantege'za zamasimu ante'za monafine, mopafine mopamofa agu'afi mni'naza zgamo'zane, hagerimpi mani'naza zgamo'za, nentahuge'za anage hu'za, Kini trate'ma mani'nemo'ene sipisipi anentamo'a asomu'ene ra agine, kegvamahu hanavemo'a, Znagrite mevava hugahie hu'za hu'naze. ¹⁴Kasefa hu'za mni'naza 4'a zgamo'za tamage hu'za huvava nehazageno, 24'a elda kva vahe'mo'za zmare'ne'za mono huznante'naze.

Ese fuki avontafeteti eriganonepegeno efeke hosifi e'nea ne'mofo naneke

6 ¹Anante nagra kogeno, sipisipi anentamo 7ni'a fukinu rekamerente'nea avontafepinti, mago fuki eriganonepegeno, 4'a kasefa

hu'za mni'naza zgafinti mago'zmimo'a monage'moma hiaza huno anage hu'ne, eno! ²Higena anante negogeno, efeke hosi afumofu agofetuma mni'nemo'a, ati eri'negeno kini fetorira amigeno, harafa vahe'mo ha' huno zamagtereno viankna huno vu'ne.

³Anante'ma sipisipi anenta'mo nampa 2 fukima rekamrente'nea avontafera, eri kanopegeno, kasefa huno mni'nea zgafinti nampa 2 zgamo'a eno! hu'ne. ⁴Anantera mago koranke hosi atiramino egeno, hosi afumofu agofetu'ma maninemofona hanave amigeno, rimpa fruma erino mopafi mni'zana eritregeno, vahe'mo'za ohefri ahefri hanazegu, bainati kazina agrira ami'ne. (Mat 24:6-7)

⁵Anante nampa 3 fukima rekamare'nea avontafe Agrama eri kanonepegeno, kasefa huno mni'nea nampa 3 zgamo'a anage hu'ne, eno. Hige'na koana mago hanike hosi egeno, ana hosimofu agofetuma mni'nemofona makazama refko huno kna'ama ke'za sigeli azampina me'ne. ⁶Hagi anantera antahugeno monagemo'ma hiaza huno ⁴a kasefa hu'za mni'naza zgaramimofu amu'nompintira anage hu'ne, mago knamofu erizante miza eriakna huno mago osi witi ku erigeno, mago knamofu erizante miza eriakna huno, ³a onesis bali enerinka, masavene waininena eri haviza osunka atregeno me'no hu'ne.

⁷Anantera sipisipi anentamo'a avontafema nampa 4 fukima rukamare'nea eriganopegeno, kasefa huno mani'nea nampa 4 zgamo'a eno! hu'ne. ⁸Higena anantera kogeno, kanifuge hosimofu agofetuma mni'nemofona agi'a, frizane huno me'ne. Higeno fri vahe kumamo'a amage avaririno ne-egeno, vahema zmahe fri hanave amigeno, ⁴a kevu vahema maninafintira, mago kevu vahera bainati kazinu'ene, agama atezamo'ene, krimo'ene ama mopafi ahi zgamo'zane, tusi zgamo'za zamahehana hanage'za frigahaze.

⁹Anantera sipisipi anentamo'ma avontafera nampa 5 fukima rukamare'nea eri kanonepegeno, kre sramnavu ita agafafintira, Anumzamofu ke'ma nentahiza amage'ma nentazageno, zmahage'za fri'namoza, ¹⁰ranke hu'za kezati'za, Ramoka Ruotge hunka tamage nehamoka, Kagra tagri koramofu nona'a, nazupa keaga huzmantenka mopafima mni'naza vahera refko huzmantegahane? hu'naze. ¹¹Hagi efeke kukena anamokizmia hunezmanteno, akoheta osia knafina mani fru hunenkeno, mago'a Anumzamofu naga ene neramafugizmia, tamagri'ma tamahe fri'neaza hu'za zamahe fri vgareteno huno hu'ne.

¹²Anante avontafetema nampa 6 fukima rekamarenteneana, Agra eri kanopegena kogeno, tusi'a imi krefa mopafina erigeno, zagemo'a hinunke kukenagna higeno, ikamo'a korankna huno koranentike higeno, ¹³monafi hanafitamimo'a, hanave zahomo fiki zafamofu eritagosi higeno afuore rgamo tagirami'za huno, mopafi atafri rami'naze. ¹⁴Hagi negogeno monamo'a sagane huno, harontafe regazarino neviankna

huno nevigeno, maka agonamozane, ti amu'nompi me'nea mopamo'za kuma'zamia atre'za vu'naze. ¹⁵Anantera ama mopafi kini vahe'mo'zane, mrrerisa vahe'mo'zane, harafa vahe'mo'zane, feno vahe'mozane, hanave vahe'mo'zane, maka kazokzo eriza vahe'mo'zane, fru hu'za mani'naza vahe'mo'za, zamagra havegampine, agonafi me'nea havefi fraki'naze. ¹⁶Ana nehu'za agonamofonku'ene havemofonkura anage hu'naze. Tagri tagofetu eraminka, kini tratema maninemofu avure'ene, sipisipi anentamofu rimpa herante zampintira refiteranto, ¹⁷Na'ankure Anumzamofone, sipisipi anentamoke znarimpama, kumi vahema aheznante'za refkoma ha'a rankna hago efore nehianki, iza zanavurera otigara hu'ne? hu'za hu'naze.

**144 tauseni'a Israeli vahe'mo'za Anumzamo huhampri
zamante'nea avame'za eri'naza naneke**

7 ¹Anama hutegena kogeno, 4'a rugaraga asoparega ama mopamofona ankeru vahe'mo'za otine'za, 4'a kaziga e'neria zahora zmazampi azerinageno, mopafine hagerimpine, zafafinena zahora e'orine. ²Hagi anantera kogeno mago ankeromo'a zage hanati kazigati ehanatino, manivava Anumzamo hunagru huno nagrızane hu'nea avame'za, erineno mopane hagerine eri haviza hugahaze huzmante'nea 4'a ankeru vahera ranke huno zmasamine. ³Mopane hagerine, zafaraminena zmazeri haviza osu'nenketa, Anumzamofu kazokzo eriza vahetamimofu kokovite avame'zana rekamre antetaneno hu'ne. ⁴Anantera antahugeno avame'za rekamre zmante'nea vahema hamprineana 144 tauseni'a mni'naze. Ana vahera maka Israeli mofavre'ramimofu naga nofipinti vahetami hamprine. ⁵Juda nagapintira 12 tauseni'a huhamprino, avame'za rekamrezmanteno, Rubeni nagapintira 12 tauseni'a huhamprino, avame'za rekamre zamanteno, Gadi nagapintira 12 tauseni'a huhamprino, avame'za rekamre zmanteno, ⁶Asa nagapintira 12 tauseni'a huhamprino, avame'za rekamrezanteno, Naftali nagapintira 12 tauseni'a huhamprino, avame'za rekamrezmanteno, Manase nagapintira 12 tauseni'a huhamprino, avame'za rekamre zmanteno ⁷Simioni nagapintira 12 tauseni'a huhamprino avame'za rekamrezmanteno, Livai nagapintira 12 tauseni'a huhamprino, avame'za rekamrezmanteno, Isaka nagapintira 12 tauseni'a huhamprino, avame'za rekamre zmanteno ⁸Zebuloni nagapintira 12 tauseni'a huhamprino, avame'za rekamrezmanteno, Josefe nagapintira 12 tauseni'a huhamprino, avame'za rekamre zmanteno, Benzameni nagapintira 12 tauseni'a huhamprino, avame'zana rekamrezmantene.

Tusi'a vea kevumo'za Anumzamofu mono hunte'naza naneke

⁹Anazama hutegena kogeno, tusi'a vahekrefa mago'mo'e huno hamprigara osu'nea vahe'mo'za maka kumapinti ene, naga nofipinti ene,

vahepinti ene, maka agerupinti ene, Sipisipi Afu Anentamofa tra'mofo avuga, efeke zaza kukena hu'ne'za, zmazampina tofe zafamofa ani'na hantagi'za erine'za oti'naze. ¹⁰Zamagra ranke hu'za anage hu'naze, tagri Anumzama tratema mni'nemo ene, Sipisipi anentamo'ene, tagu'vazine tahokehena'e hu'za hu'naze. ¹¹Mika manigagi'naza ankeroma vahe'mo'zane, ugagota kva vahe'mo'zane, 4'a kasefa hu'za mni'naza zgamo'za, kini tramofona manikanegi'za zmavugosaregati zmarena'e'za umase'za, Anumzamofona mono hunte'za, ¹²amanage hu'naze, tamage, husgama huntezane, ra agine, knare antahizane, muse huntezane, antahisga huntezane, hihamune hankavea Anumzamo eri vava hugahie tamage hu'naze!

¹³Anante 24'a ugagota kva vahepinti mago'mo nantahigeno, amama efeke zaza kukenama hu'nazana, zamagra iza'za mni'ne'za, igati zmagra e'naze? Hige'na, ¹⁴nagra anage hu'na asami'noe, Ranimoka kagra antahinane hu'na hugeno, Agra anage huno nasami'ne, ama'i zmagra tusi'a hazenkezampi ufretageno ha' vahe'mo'za nezamahazageno, zaza kukenazamia Sipisipi Anentamofa koranteti sese hugaru huzmantageza efeke hu'namoze. ¹⁵Na'ankure ama ana agafare, Anumzamofa kini tra avuga oti'ne'za hanine zgenena Agri ra mono nompri eri'zama'a erinentazankino, tratema mni'nemo'a, Agra kegva huzmantegahie. ¹⁶Zamagrira zmagamate'zane, tinku zmavesizane omnena, zge hara zmave'osina, amuhogura osugahaze. ¹⁷Na'ankure tra'mofo amunompima mni'nea Sipisipi anentamo, kegva huzmanteno asimuna erino mni tinkapuute vanigeno, Anumzamo maka zamavunura eri homu huzmante zgaregahie huno hu'ne.

Sipisipi anentamo nampa 7ni fuki erikanopenea naneke

8 ¹Hanki anante Sipisipi anentamoma avontafeteti nampa 7ni fukima eri kanopegeno, monafina hafu'a auafi^aagasasana eritaganene. ²Anantera Anumzamofa avuga 7ni'a ankeroma vahe oti'namokizmia 7ni'a ufe eri nezamizage'na ke'noe. ³Anantera mago ankeroma kolire tro hunte'nea zuompa erineno kresramna vu itare eme otigeno, Anumzamofa kini tramofa avuga kolire tro hunte'naza kre sramnavu itare Anumzamofa nagamokizmi nunamune erinteno kresramna vanigu rama'a mananentake'zana ami'ne. ⁴Hagi mananentake zamofa tevegumo'ene, Anumzamofa nagamofa nunamumofa mna'amo'a, ankeromofa azampinti mrrerino Anumzamofa avure vu'ne. ⁵Anantera ankeroma'a zuompa erino kre sramnavu itaretira, kolire tro hunte'naza zuompafi tevea tagino eri aviteteno, matevuno mopafi atregeno, tusi'a monage nehigeno, kopsina e'nerigeno, imi eri'ne.

^a 8:1 *hafu'a auafi* tagerupina haf auama krezamo'a amuhu hu'ne.

Nampa 4 ankeromo ufere'nea naneke

⁶Hanki anantera 7ni'a ankeromo'za 7ni'a ufe erine'za, ufe renaku retro hu'naze.

⁷Ese ankeromo uferegeno, komopa ko'ene korane tevea eri havia hu'neana, zamagra mopafi matevu'za atrazageno, tagufa kevufintira, mago kevu mopamo'a teveregenno, tagufa kevu zafafintira, mago kevu zafamo'za teverazageno, maka zafa sinage trazamo'za tevere'naze.

⁸Nampa 2 ankeromo ufe regeno, ra agona gnazamo'a teve neregeno hagerimpi mate vuno atregeno, tagufa hageri me'nefintira, mago hagerimo'a koranke higeno, ⁹tagufa kevu hagerimpi zagrami mni'nafintira, mago kevumo'za frizageno, tagufa kevu venterami me'nefintira, mago kevu ventemo'za haviza hu'naze.

¹⁰Nampa 3 ankeromo'a uferegeno, ra hanafimo monafinti teve taginaku kasagsa hu'za taginafa hiankna tavimo remsa huno atafariramigeno, tagufa kevu tira me'nefinti mago kevu tirante'ene osi tinte ene kampui tinte'ene takau'rene. ¹¹Ana ofumofu agi'a Akahene, hu'za hu'naze. Tagufa kevufinti, mago kevu timo'za akahazageno, rama'a vahe'mo'za ana tina nene'za fri'naze. Na'ankure ana timo'a akahunegenoe.

¹²Nampa 4 ankeromo'a ufe regeno, zgemofona tagufa kevu refko higeno, ikamofona tagufa kevu refko higeno, tagufa kevu hanafitami me'nefintira, magoke magoke kevuzmia amasagigeno haninkine. Mago zge ferumofoma tagufa kevu msama me'nefintira, mago kevu msamo'a hani hu'ne. Hanimo'enena anazanke hu'ne. (Mat 24:29)

¹³Anantera negena antahugeno, mago tumpamo monamofu amunompi hareno enevuno, ranke huno anage hune, kva hiho, kva hiho, mopafima maninaza vahemota hazenke ne-eanki kva hiho, na'ankure 3'a ankeru vahe'mo'za ufena orenazankiza, kofa knafi ufena regahaze!

9 ¹Anantera nampa 5fu ankeromo'a ufe regeno, monafinti hanafimo'a mopafi atafariramigena kogeno, riga omne kerimofu kinofira ami'ne. ²Higeno agra riga omne keria anagigeno, tusi teve nerefinti atiramino eviankna huno, ana kerifintira teve tokimo'a evu'ne. Zgene zahomofona ana kerifinti teve tokimo refitegeno tusi hani hu'ne. ³Anantera ana teve tokipinti kenutamimo atiramino ama mopafi evigeno, segintavemofu hanavema ama mopafima ami'neaza huno hanave zami'ne. ⁴Hanki ana kenutamimofonkura anage huno zmasamine, mopafima me'nea trazana eri havizana osuge, zafasinage huno me'nea trazana eri havizana osuge, zafa eri havizana osiho. Hianagi Anumzamo hunagru hu'nea avame'zama kokovitema rukamre onte'nesia vahe'mokizmige zmazeri havizana hiho hu'ne. ⁵Ana nehazageno anage huno huzmante'ne, vahera zmahe ofrigahazanagi, 5fu'a ikamofu agu'afi zmatazanke zmiho huno huzmante'ne. Ana zamatazama zami'nea knazamo'a segintavemo'ma

vahe'ma zmaprigeno zmatama kriančna zmata krigahie. ⁶Hanige'za ana knafina vahe'mo'za frisaza kanku hakaregahaze. Hianagi ofritfa nehu'za, frinaku hugahazanagi frizamo'a zamagritetira fresige'za ofrigahaze.

⁷Hanki ana kenu tamimofoma ke'noana avu'ava'zmimo'a hosimo hate vunaku retro hiančna nehazageno, zmasenirera kolire tro hunte'naza kini fetori knaza megeno, z mavugosamo'a vahe'mofo z mavugosagna hu'ne. ⁸Zmazokamo'a anemofo zmazokamoma hiaza huno zaza higeno, z mavemo'a laionimofo avemo'ma hiančna hu'ne. ⁹Zamimizarera hankomo'a me'ne, ana hankomo'a, aenire hankogna hu'ne. Zmagekonamofo zmagasasa kemo'a, hosiramimo renteno avazu huno nevía zamo, hate vunaku agareno neviančna agasasaru'ne. ¹⁰Ana kenutamimofona zmarisona me'negeno, ana zmarisonamo'a segintavemofo risonagna hu'negeno ana risonanu vahera nezamare. Ana risonamofona 5fu'a ikampi vahe'mofona zmatama zami hanave'a zami'ne. ¹¹Hanki zamagrira mago kinimo kegva huzmante'ne, ana kinia ariga omne kerimofo kva ankeronkino, agi'a Hibru kefina Abadonie (fri'ne hune) huza nehaze. Mikaza eri havizahu nere nehu'za, Griki kefinena Apolonie huza agi'a neheze.

¹²Hanki nampa 1ni knazankuma kva hiho hu'nea knazamo'a evigeno, tare knazamo ne-eanki kva hiho.

¹³Anante nampa 6si ankeroma uferegeno, nagra antahugeno Anumzamomo avurega kolire tro hunte'naza kresramnavu itareti 4'a pazive me'nefinti mago'mo huno, ¹⁴nampa 6gisi ankeromo ufema erinemofona ana agerumo'a asamino, Yufretis rantintema 4'a ankerona anaki zmantenazana katufe zmantrenke'za viho huno hu'ne. ¹⁵Hanki 4'a ankeroma retroma huzmantege'za mni'naza ankerona katufe zmatrenige'za ana auagi, ana zge knagi, ana ikanki, ana kafumomo kna fatgore, 3'a kevu refko vahera hu'za, mago kevu vahe'mokizmia mika zmahe vgaregahaze. ¹⁶Hagi hosi agumpima mni'naza ha' vahe'mokizmi nampamo'a 200 milioni'a mni'naze nehigena antahi'noe. ¹⁷Hagi amanahu'za avanagnazama kofina ke'noe, hosi afu tamimofo agumpima mni'ne'za eri'za nevaza vahe'mo'za zmimizarema rufite'naza hanko zmimofo avoma'amo'a, koranke nehigeno, hokonke nehigeno, kaninkruke nehigeno, tevene salfa havemo toki nehigeno, ana hosi afutamimofo zmagenopamo'a laioni agenopagna nehigeno, zmagipintira tevene, salfa havemo'a toki hiančna huno atiramino evu'ne. ¹⁸Zmagipintima evu'nea tevemoki, salfa haverema nerea tevemo, ana 3'a knazamo maka kokankonka 3'a kevu vahepinti, mago kevu vahera zmahe vgarege'za fri'naze. ¹⁹Na'ankure hihamu hanavemo'a ana hosimofona zamagipine zmarisonafine me'ne. Ana hosimofona zmarisonamo'a, osifavegna huno asenia huntogeno, ana aseniretira vahe'mofona hazenke zamigahaze.

²⁰Hagi ana knazamo'ma ozmahege'za mni'naza vahe'mo'za, kumi'ma hu'naza zankura zmagu'a rukrehera nosu'za, hankromofona mono

hunonte'za, zamagra'a zmazampinti kolire'ene silvare ene brasire'ene havere'ene, zafa atupare'ene, zmavua onkege zmagesa ontahige kaza osu'za tro hunte'naza zante monora hunte'naze. ²¹Ana nehu'za vahema zmahe nefriza, avuatga ha' nehu'za, monko avu'avama nehu'za, kumzafama nesaza zankura magomo'e huno agu'a rukrehe osu'ne.

Mago ankerone osi avontafemofu naneke

10 ¹Anante mago hanavenentake ankeru kogeno, mona atreno eramigeno kukena hamponu hunteno, furegenamo asenire me'geno, avugosamo'a zgegna higeno, agimo'a no azeri hanaveti avempa zafagna huno teve anefa hu'ne. ²Azampina osi avontafe vakarente'nea eri'ne. Ana ankeromo'a tamaga agia hagerimpi reno, hoga agia mopafi reno otineno, ³ranke huno laionimo ageru neriankna huno agerura nerigeno, 7ni'a monage'mo'za zmagerura ru'naze ⁴Ana zmagerura nerazagena, avompi krentenaku nehugen'o'a, monafinti anage huno hu'ne, 7ni'a mona ageruma antahinana eriginka rekamrenentenka, avontafepina kreontenka atregeno frakino meno huno hu'ne. ⁵Anantera kogeno hagerimpima tamaga agama nenteno, hoga agama mopare'ma ante'nea ankeromo'a tamaga azana monafinka rusute'nagamu atreno, ⁶huvempa kea mnivava nehimofonte huno, ***monane makazama agu'afima me'neazama troma nehuno, mopane makazama agu'afi me'neazama tro nehuno, hagerine makazama agu'afi me'nezama troma hu'nemokino***, mago'ane avega onteguhie. (Ekso-Uti 20:11, Diu-Kas 32:40, Dan 12:7) ⁷Hianagi nampa 7ni ankeromoma ageruma runakuma nehigeno'a, Anumzamoma oku'a ante'nea kea, kasnampa eriza vahetema asami'nea kemo'a efore hugahie.

⁸Anante monafintima koma antahinoa agerumo'a mago'ane kea hunamino anage hu'ne, vunka hagerimpine mopafinema agama reno oti'nea ankeromofu azampima vakarente'nea avontafera omerio huno nasmi'ne. ⁹Hanki anage higena nagra vuna, osi avontafe naminogu ana ankeromofu ome antahigogeno, agra anage huno nasamine, erinka nesankeno'a karimpafina aka hugahianagi, kagitera tumerimoma hiaza huno tusi haga kavesigahie. ¹⁰Ana osi avontafera ankeromofu azampintira nagra omerina nogeno, nagipina tume rimoma hiaza huno haga higena netogeno, narimpafina tusi aka ahe'ne. ¹¹Anante zmagra nagrikura anage hu'naze, kagra mago'ane rama'a vaheku'ene kumataminku'ene, zmagerukuma, kini vahekura kasnampa kea ome hu hu'za hu'naze.

Tare netremoke huama hana'azamofu naneke

11 ¹Anante mago azota anteno mesarim huno ke'za nenamigeno mago'mo huno, Anumzamofu ra mono none, kresramna

vunentaza ita azota antenka mesarim nehunka, anampima monoma hunentaza vahera, hamprinka ko. ²Hagi ra mono nomofo megi'a kumara aozota antenka mesarimia osunka atro, na'ankure megia vahe'mofo zamineankino, 42'a ikampi ruotgema hu'nea rankumara, zmagareti eme repehana hugahaze. ³Hanki ana hanige'na Nagri nanekema huama hana'a netrena, hanavea zanaminuge'ne, 1,260'a zgegnafi znasunku kukena huke, kasnampa kea huama hugah'a.

⁴Ama ana netrena, tare olivi zafane, tare lamu tavikna huke, maka ama mopamofo Ramofo avugama oneti'a netrene. ⁵Hanki iza'o ana netre'ma znahenakuma hanamokizmia, znagipinti tevemo'a hagana hagana huno atiramino ana vahera tefanane hugahie. Hagi ina vahe'mo'za znahenaku'ma hanamokizmia, anahukna kante ahegahie. ⁶Ama ana netremokea monama eriginakeno koma noranigeno hanavea erina'ankino, kasnampa kema huamama hana'a knafina, kora azerinakeno norina, tina amne erikoranke nehuke, znagrima znavesisiaza huke amne mopamofona knazana amigaha'e. ⁷Znagrama ana nanekema huvgamaretakeno'a, riga omane kerifintima etiramino esia afi zgamo hara huznagatereno znahe frigahie. ⁸Hagi ana znahe frisia znavufamo'a, rankuma'mofo kampi me'nenigeta, e'i ana kumaku fronka ke huta Sodomune Isipie huta hugahune. E'ina kumapinke Ra zanimofona rugeka zafare ahe'naza kumapi, znavufgamo'a megahie. ⁹Ama ana fri'na'a znavufgamofona 3'a knagi mago zgeferupi mene'nige'za, maka vahepinti'ene, naga nofipinti'ene, zmagerupinti'ene, maka kazigati vahe'mo'za znagegahaze. Hianagi kerifima eriza ome aseznante zankura i'o huzmantegahie. ¹⁰Hagi mopafima mni'namo'za ana kasnampa netrema frina'a zankura musena nehu'za, ana zankura nezana retro hu'za nene'za, musezana omi ami hugahaze. Na'ankure ana tare kasnampa netremoke mopafima mani'naza vahera zmatazama zminaza zanku, ana musena hugahaze. ¹¹Hianagi 3'a knagi mago zgeferu evanigeno'a, Anumzamo'a zanasimura znamina, znagra otinake'no, kesaza vahe'mo'za tusi kore hugahaze. ¹²Hagi ana netre'mokea nentahikeno, monafinti ranke huno, amare emareri'o huno higene, ha'ma reznante'naza vahe'mo'za negazageno, hampompi monafi marerina'e. ¹³Anama neha'a kna fatgore tusi'a imi erigeno 10ni'a rankuma menefinti, mago rankumamo'a fragu vaziramigeno, 7 tausen'i'a veara imimo'a zmahe fri vgaregeno, mago'amo'za kore hu'za monafi Anumzamofu ra agi erisaga hu'naze.

¹⁴Hanki nampa 2 knazamo'a agatereno evigena negogeno, nampa 3 knazamo'a ame huno fore hu'za nehianki kva hiho.

Nampa 7ni ufe re'nea naneke

¹⁵Anante nampa 7ni ankeromo ufe regeno, ranke hu'za monafintira kezati'za anage hu'naze, Ama mopafi rankumamo'a, tagri Ramofo kuma

nesenkeno, Agri Kraisi kuma fore hinkino, Agra kini manino kegva huvava hugahie. ¹⁶Hanki 24'a ugagota kva vahe'mo'za kini tratema Anumzamofu avuga mni'nazareti, atre'za zmvugosaregati emase'za, Anumzamofu mono hunente'za, ¹⁷anage hu'za, hanave nentake Ra Anumzamoka, tagra rankagi kamune, korapa mni'namoka, menina mani'nane, na'ankure Kagra tusi'a hihamu hanave e'nerinka, menina erigafa hunka kini maninka kegva nehane. ¹⁸Hagi miko kokankoka vahe'mokizmia zmarimpa nehenkeno, Kagri karimpa hezamo'a ne-enkeno, fri vahema refkoma hanana knamo'a ne-enkeno, kazokzo eriza vahe'ene kasnampa vaheka'ane mono naga'ene zamagi me'nenia vahero, zamagi omnene'nia vahe'mo'za Kagri kagiguma korema nehaza vahera mizana nezaminka, ama mopafima vahe zmahenefriza vahera, zmahe frigahane.

¹⁹Hagi monafima me'nea Anumzamofu ra mono nomofu kafamo'a anagi hagro higeno, Agrama huvempa ke huno huhagerafi'nea vogesimo'a, Agri mono nompintira efore higeno, kopasinamo'a trege huno vuno eno higeno, ranke huno monage nehigeno, imi e'nerigeno, tusi ko'mopa ko ru'ne.

Israeli vahe'ene a'mofu naneke

12 ¹Mago ruzahukna huno tusi'a avame'za monafina efore higena kogeno, mago a'mo'a zgenu kukena hunegeno, ikamo'a agafi menegeno, asenifina 12fu'a hanafimo kini fetorikna huno asenire me'ne. ²Ana a'mo'a amu'ene huno mofavre kasenteza nehuno, ranke huno mofavre'za negegeno krafa hu'ne. ³Anantera ru avame'za monafina efore higena kogeno, mago agaza hunte koranke osifavemofona, 7ni'a agenopa me'negeno, 10ni'a pazive hanatinegeno, aseniramintera 7ni'a kini fetori me'ne. ⁴Hanki risonamo'a tagufa kevu hanafi monafi me'nefinti, mago kevu hanafira mopafi ruharfi huzmatrene. Ana osifavemo, a'mo'ma mofavrema kasentenaku'ma nehia avuga otine. Anama hu'neana ana mofavre kasentenkeno aheno asga hunakrinaku otine. ⁵Anante ana a'mo ne'mofavre ksente'ne. Henka'a ana mofavremo nena huno maka vahera aeni azompareti kegva huzmantenia ne'kino, ana mofavre avreno Anumzamofonte vuno, Agri'a kini trate avreno ome antene. ⁶Anantera ana a'mo kore freno Anumzamo retro hunte'nea mopare ka'ma kopi umanine. Anantega ana ara kegva krinte'za nezana nemisageno, 1,260ti'a kna manigahie.

⁷Hanki tusi'a ha' monafina fore hu'ne. Maikoli ene ankeru naga'amo'za, osifavene ana osifavemofu ankeru naga'a hara huzmante'naze. ⁸Ana osifavemofu ankeru nagamo'za hanavezmia omnege'za, hara agateregara osazageno monafima manisaza kumara omnene. ⁹Ana koranke osifavea asgahutregeno erami'neankino, ana ne'kura korapa mani'nea osifave

nehu'za, hankrore nehu'za, Sata'ema nehaza ne'ma ama mika mopafi vahema rezmatgama nehia nera, asgafetregeno ankeru naga'ane mopafi erami'naze. ¹⁰Anante nentahugeno mago ra ageru monafinti runo anage hu'ne, menina vahe'ma ahoke aheno agu'vazizane, hanavene, tagri Anumzamofu kumamo'ene Agrama huhampri'ranteno tavaregahie hu'nea nemo'a, hago tusi'a hihamu eri'ne. Na'ankure tagri nerafukizmima hanine zgene, tagri Anumzamofu avure agra havige kegaga hunezmantea nera asgahu atregeno urami'ne. ¹¹Zamagra ana ne'mo'ma ha'ma huzmantea hara, Sipisipi anentamofu koranteti'ene agenke'ama huama hazareti agatenere'za, zamagra z mavufagura nontahi'za, zamagri'ma zmahe frizanku enena korera osu'naze. ¹²Na'ankure ama ana agafare, monafinka mni'namota muse hiho. Hianagi mopane hagerimoka kva hi'o, na'ankure hankromo'a tanaagrite ko uramine, keno antahinoma hiana osi'agna me'negeno, tusi rimpa nehegeno uramine.

¹³Ana agaza hunte osifavemo'ma keno antahinoma hiana mopafima mate'mavutregeno'a, ne' mofavrema kasente'nea ara eme aheno atahoza ami'naku avaririne. ¹⁴Hianagi tusi'a tumpamofu agekonarere ana ara amigeno, ana a'mo'a hareno vahe omani kama mopafi, ana osifavea atreno, 3'a kafugi 6gisi'a ikampi agri kuma'ma retroma hunteneraga umani'nenigeno kegva huntengahie. ¹⁵Hanki ana osifavemo'a, ana ara ti mreno vaniegu agipinti tina ruvaritregeno, tusi'a ti hageaza huno ana ara avaririne. ¹⁶Hianagi ana agaza hunte osifavemofu agipintima evu'nea rantina, mopamo ana ara aza huno, ana tina agira aka huno nakri vgare'ne. ¹⁷⁻¹⁸Ana higeno ana tusi'a osifavemo'a ana a'mofona rimpa ahenenteno, maka mofavrenaga'amo'za Anumzamofu kasege amage nente'za, Jisasi avu'avazama nevaririza naga ha' huzmante'naku vu'ne. Ana agaza hunte osifavemo hagerinkenare otino mni'ne.

Hagerimpinti atirami'nea afi zgamofu naneke

13 ¹Anantera mago afi zga hagerimpinti hanatino mrerige'na kogeno, 7ni'a agenopa megeno, 10ni'a pazive ana agenopafintira mrerigeno, ana 10'a pazivetera kini fetori menegeno, Anumzamofu huhaviza hunte agiramina zmasenire me'ne. ²Hagi ana afi zgama ke'noana lepatigna higeno, agamo'a bea agagna higeno, agi'mo'a laioni agikna hu'ne. Hanki agaza hunte tusi osifavemo agra'a hihamu hanavene, kini tra'ane maka kegvahu hanavea ami'ne. ³Nagra koana mago agenopa ko aheneanagi, anama ahe'nea zamo'a teganigeno so'e huntene. Higeno maka mopafi vahe'mo'za antri nehu'za, muse hunte'za, ana afi zgamofu amage ante'naze. ⁴Ana vahe'mo'za agaza hunte osifavemofu monora hunte'naze. Na'ankure ana agaza hunte osifavemo'a, afi zgamofona kegvahu hanavea ami'negu, ana vahe'mo'za monora tusi zgamofona hunente'za anage hu'naze, iza ama tusi zgagna hu'nesimo hara hunttega hu'ne? hu'za hu'naze.

⁵Hanki Anumzamoa atregeno, ana afi zgamoa avufga ra nehuno, Anumzamofona azanava kea nehuno, 42'a ikamofu agu'afi hanavea amigeno ruzahu ruzahu kaguvazana hu'ne. ⁶Hanki ana afi zgamoa agira aka huno, Anumzamofona azanava kea hunenteno, Agi'amofona huhaviza hunenteno, Agri nagama monafinka mono noma'agna hu'za mni'naza nagara, huhaviza huzmante'ne. ⁷Hagi Anumzamofu nagama ha'marezmate hanavenena amigeno, hahu zmagatenereno, maka naga nofima, vahe'ma, zmageruma maka kumama, kegvama kri hanave ami'ne. ⁸Maka ama mopafi mni'naza vahe'ma, ahe'naza Sipisipi Anentamofu asimu eri avontafepi zmagima, monane mopanema tro'ma osu'neni kre ontesia vahe'mo'za, ana afi zgarera monora huntegahaze. ⁹Izago kagesa me'nenigenka nentahisamoka, antahise huo. ¹⁰Izano Anumzamoa huno avreno kina huntegahie hunesimo'a, kina ome hino. Izano kazinknonteti ahefrigahie hunesimofona kazinknonteti ahefrigahie. Hanki ama ana zma'vu'zma'vazana akohe'za mni'neza kazigazi hu'za knazama eri'za vnagu kea hu'ne!

Mopafinti atirami'nea afi zgamofu naneke

¹¹Anantera ru afi zgamoa mopafinti hanatino egena kogeno, sipisipi anentamofu tare pazivekna pazive asenirera me'negeno, kema hiana tusi'a agaza hunte osifavemofu agerukna ageru ru'ne. ¹²Nampa 2 afi zgamoa, nampa 1ni afi zgamofu kegvahu hanave'a, agri avure eri ama nehuno maka ama mopafi mni'naza vahera, nampa 1ni afi zgama koma ahazageno namuma'amo tegani'nemofu monora huntaho hu'ne. ¹³Anante nampa 2 afi zgamoa ruzahu ruzahu avameza eri fore nehuno, maka vahe'mokizmi zma'vufi kaguvaza higeno monafinti'neni tevea reno erami'ne. ¹⁴Ana nehuno mopafima mni'naza vahera rezmataga hu'ne, na'ankure nampa 1ni afi zgamofu avufina, ruzahu ruzahu avame'za nehuno, nampa 1ni afi zgama koma kazinknonu ahazageno friteno asimuma erinea afi zgamofu amema'a tro hiho huno zmasami'ne. ¹⁵Asimu'ante hanave amizageno, ana amema'a tro hunte'naza amema'a asimu amigeno, ana amema'amo'a keaga higeno, ana amema'ama mono huontesaza vahera zmahe frigahie. ¹⁶Hagi anante nampa 2 afi zgamoa huzmanteno, mika amane vahero zamagi me'nea vahero, zgo'a me'nea vahero, zgo'a omne vahero, amne vahero, kazokazo eri'za vahe'mokizmia avame'za tamaga zmazante'ene, kokovite'neni krentegahaze. ¹⁷Ana hanigeno mago vahe'mo'e huno mizasege, zgorera atrege osugahianki, ana afi zgamofu agimofu nampama erinenia vahe'moke mizasege, zgore atrege hugahie. ¹⁸Vahe'mo'ma knare antahintahima erinenimo'a atregeno, ana afi zgamofu nampana refko huno keno, ana nampana mago ne'mofu nampakino, ana nampana 666 me'ne.

Sipisipi Anenta'ene 144 tauseni'a vahe'mofu naneke

14 ¹Anantera Sipisipi Anentamo'a Saioni agonare otinegeno, Agri agine, Nefa aginema kokovitema krente'neana 144 tauseni'a

vahe'mo'za magoka oti'nazagena ke'noe. ²Ana higena mago agerura antahuana monafintira agerura rama'a timofo agasasamoma hiaza nehigeno, monagemoma hiaza nehigena, mago ageruma antahuana kita (harp) ahazageno neriankna ageru nerigena antahi'noe. ³Ana nehu'za kini trate'ene, ⁴a kasefa hu'za mni'naza zgane, ²⁴a ugota kva vahe zamurera kasefa zgamera hu'naze. Ana zgamera mago vahe'mo'ze huno ontahinazankino, 144 tauseni'a nagama maka mopafinti mizama sezamantenea vahe'mo'za antahi'naze. ⁴Hanki ana vahe'mo'za a'nene savrira osu fatgo hu'za mani'naze. Na'ankure zamagrazmi agru hu'za mni'naze. Ama ana vahe'mo'za Sipisipi Anentamo'ma inaregama viana zmagra nevaririza vahere. Ana vahera Anumzamo'a ese hoza vasageakna huno maka vahepinti miza sezmente'neankino, Anumzamofone Sipisipi afu Anentamofo naga manigahaze. ⁵Hagi ana vahe'mofo zmagipina havigea omnetfa higeno, hazenkezmia omne vahe zmagra mni'naze.

Tagufa ankeru vahe' mo'za ke hu'naza naneke

⁶Hagi anantera mago ankeru kogenu monafi hareno enevuno, mevava knare musenkea mopafima mni'naza vahete ene, maka kumate'ene naga nofite'ene, zmagerute ene, vahete'ene huama hu'ne. ⁷Ana nehuno ranke huno amanage hune, Anumzamofonku kore hunentetma ra agi amiho, Agrama vahema refkoma haniankna hago e'ne. Monane mopane hagerine, maka tinkampuima troma hu'nemofu monora huntetho hu'ne.

⁸Anantera nampa 2 ankeromu kota ankeromofu amefi hareno neno anage hu'ne, Babiloni tusi'a kumamo'a trakahu'ne, trakahu'ne, ana amo'a maka mopafi kumatamina, agra havi avu'avaza hanavetino hu aveszamofu waini tina zamige'za ne'naze.

⁹Anantera nampa 3 ankeromu'a, tare ankerofomu znamefi neno anage huno ranke hu'ne, iza'o afi zgamofone, amema'arema mono hunenteno, azante'ene kokovitema avame'zama'a eri'nenimo'a, ¹⁰Anumzamofu tusi'a rimpafe knazamofu waini erihavia huno tagi avitenea kapufinti neneno, ana vahe'mo'a ruotge ankeru vahe'ene, Sipisipi anentamofo avure, havere te kasinkasi nehia tevefi atazana erigahie. ¹¹Ana afi zgare'ma mono hunente'za, amema'arema mono hunentesageno, iza'zo agri agimofu avame'zama'a erisi'amo'za, zmatazama erisaza tevemofu tokimo mreri vava nehina, hanine zgenena fru hu'za omnigahaze.

¹²Anumzamofu kasege amage'nenteza zamentintima Jisasinte nehaza vahe'mo'za amanahu hugahaze, akohe'za manine'za kazigazi hu'za knazana eneriza oti hanavetigahaze.

¹³Anante mago ageru monafinti arigena nentahugenu anage hu'ne, avona krento, Ramofompi mni'ne'za frinamo'za, menintetima agafa huno vaniana muse hugahaze! Ozo huno Avamumo'a hu'ne. Zamagrama

mraguzati'za e'naza zana manifru hugahaze. Na'ankure zamagrama knare znavu'zamavama hu'zama e'naza znavuzmavamo'a, zamagrane magoka zamage znavaririno ne-e.

Hoza hamareankna huno vahe znavaresia naneke

¹⁴Anante kogeno efeke hampopina Vahe'mofo Mofavregna Ne' mni'neni, kolire tro hu'naza kini fetori asenire antanineno, sikolie nehaza ananke fagagino asane'nea kazi azampina eri'ne. ¹⁵Hanki mago ankeromo mono nompinti atiramino, ranke huno hampopima mni'nemofonkura huno, kazinkno ka'a erinka kavera hamaro. Na'ankure ne'zama hamare kna e'ne, na'ankure mopafina nezamo'a afureanki ome hamaro huno hu'ne. ¹⁶Anante efeke hampopima mni'nemo'a ananke fagagino asane'nea kazi erino, maka mopafima nenahu'nea hoza hamare'ne.

¹⁷Anantera mago ankeromo, ra mono no monafi me'nefinti atiramino, agranena sikolie nehaza ananke fagagino asane kazi erinegena ke'noe.

¹⁸Anante ru ankerona, tevema kvahu hanavema erinemo, kresramnavu itareti eno, ranke huno asane kazima erinemofonkura anage hu'ne, sikolie nehaza ananke fagagi kazinka'a erinka waini zafa rga mopafintira tagio, na'ankure rga'amo'a afure'ne. ¹⁹Anante ankeromo'a ananke fagagi asane kazima'a erino mopafi uramino waini rga tga huno eri atru nehuno, ana wainia erinteno rerati keru havereti tro huntene'ni atre'ne. E'i anazamo'a Anumzamomo tusi'a rimpape knaza huvame huno me'ne. ²⁰Rankumamomo megia, waini rga rerati keru havereti tro hunteneza kerifi rehapa netizageno, koramo tusiza huno vu'ne. Hanki ana koramo'a 300 kilo mitanaza vu'ne. Hanki tusiza huno nevuno tiru nemreno, mmerino hosimomo agite ome atre avamente vu'ne.

Seveni knazamomo naneke

15 ¹Hanki anantera monafina tusi'a ruzahu avame'za fore nehige'na negogeno, 7ni'a ankeromo'za, tusi'a rimpape knazana 7ni'a eri'naze. E'ina knazana Anumzamomo vgare rimpape he'zane. Na'ankure Anumzamomo rimpape hezamo'a, e'i ana knazampi vgaregahie. ²Anantera kogeno mago hagerina kapokna hu'negeno, tevene eri havia hu'ne. Afi zgamofone, amema'ane, agi'amomo nampama azeri agaterenaza nagamo'za, kapokna hu'nea hagerimomo agofetu oti'ne'za, Anumzamomo zavene (harps) azeri'naze. ³Anumzamomo eri'za vahe Mosese zgame'ene Sipisipi Anentamomo zgame hu'za anage hu'naze, ***Tusiza hunka ruzahu eriza eri'nane, Ra Anumzamomo tusi hanavenentake hu'nane, Kagri kamo'a fatgo huno tamage hu'ne, maka kumapi vahe'mokizmi kini Nere!*** ⁴***Ramoka, iza kagrikura korera nosuno, kagi'a erisaga osugahie? Na'ankure Kagrake Ruotge hunane. Maka kumapi vahe'mo'za,***

eza Kagri kavuga monora eme hugantegahaze. Na'ankure fatgo kavukvazamo'a eama hu'ne. (Eks-Uti 15:1-18, Diu-Kas 32:1-44)

⁵Anantera ama anazama fore'ma hutegena, Anumzamofu agi agenkehu seli mono nomo'a monafina anaginegena kogeno, ⁶7ni'a knazama eri'naza, 7ni'a ankeromo'za, ra mono nona atre'za atiramiza, zaza kukena (linen) hunazageno agru huno efenentake higeno, kolire tro hu'naza nofi zmafunteti kreramino zmasoparega evuraminea nofi hu'naze. ⁷Anante 4'a kasefa hu'za nemaniza zgafinti mago zmimo, 7ni'a kolire zuompafi kasefa huno manivava Anumzamofu rimpafe knazamo mevite'nea erino, 7ni'a ankeru vahera ome zamigena ke'noe. ⁸Hanki ra mono nomofona, Anumzamofu msa'zamofone, Agri hihamu hanavemofu tokimo avitegeno, mago vahe'mo'a, ana ra mono nompina ufregara osunegeno, 7ni'a knazamofu erizana, 7ni'a ankeru vahe'mo'za eri vgare'naze.

**Anumzamofu 7ni'a rimpafe knazamofone
Amakedonima ha'ma hnaza zamofu naneke**

16 ¹Anantera mago ra ageru antahugeno Anumzamofu ra mono nompinti, 7ni'a ankeru vahekura anage hu'ne, vutma 7ni'a Anumzamofu rimpafe knazama me'nea zuompa mopafina omeri tagi atreho. ²Hanki nampa 1ni ankeromo'a vuno Anumzamofu rimpafe zuompa mopa agofetu ome tagitregeno, afi zgamofu avame'za eri'ne'za amema'arema monoma hunentaza vahete haviza huno agotega namuzgamo fore hu'ne.

³Anante nampa 2 ankeromo'a Anumzamofu rimpafe zompa'a hagerimpi tagitregeno, fri'nea vahe'mofu korankna higeno, maka zamasimu ante'za mni'naza zgamo'za hagerimpina fri vgare'naze.

⁴Anantera nampa 3 ankeromo'a Anumzamofu rimpafe he'zana zompafintira, ranra tiranpine osi ti tamimpinena eri tagi atregeno, maka timo'za koranke hu'naze. ⁵Nagra nentahugeno tintamima kvama hu'nea ankeromo'a huno, Kagra fatgo hu'nane, korapara mni'nanankinka, menina mni'nane. Kagrake Ruotge hu'nane. Na'ankure Kagra ana maka'zana refko nehane. ⁶Na'ankure zmagra Anumzamoka kagri nagaka'ane, kasnampa vaheka'amofu korama zmahe'za eri tagi atre'nagu, Kagra karimpa he'zamofu korantima zaminke'za, zamagra ana koranti nega nagaki'za ne'naze! ⁷Anante nentahugeno kresramnavu itamo'a huno, ozo Hanaveka'ane Ra Anumzamoka, refako huzanka'amo'a, tamage huno fatgo hu'ne.

⁸Anante nampa 4 ankeromo Anumzamofu rimpafe zompa zgemofonte eritagitregeno, zgemo'a tevemo'ma hiaza huno ana vahera zmauvufare rentege'za zmatagu hu'naze. ⁹Zgemofo amuhomo'a tevemo'ma hiaza huno ana vahera zmauvufare rentege'za, zmatagu nehu'za ana knazama atregeno erami'nea Anumzamofu agi'a huhaviza hunente'za, zmagu'a rukrehe hu'za ra agi omi'naze.

¹⁰Anantera nampa 5 ankeromo Anumzamofu rimpafe knaza me'nea zuompa afi zgamofu trate eritagitregeno, agrama kegva hu'nea kumamo'a hani higeno, ana kumapima mni'naza vahe'mo'za tusi'a zmatagu nehu'za zmagnefuna anitruga nehu'za, ¹¹monafi mni'nea Anumzamofona huhaviza hu'naze. Na'ankure zmatama kri'nea zanku'ene namuma zmare'nea zanku anara nehu'za, ana zmavu'zmavazankura zmagu'a rukrehe osu'naze.

¹²Anantera nampa 6 ankeromo'a Anumzamofu rimpafe knaza me'nea zuompa tusi'a Yufretisi tirampi tagi atregeno, ana tiramo'a ho'mu huno, zage hanati kazigati esnaza kini vahe'tamimofu ka retro hu'ne. ¹³Ana higena kogeno agaza hunte osifavene, afi zgamofu agipinti'ene, havige kasnampa ne'mofu agipintira, 3'a agru osu avamutamina hogakna hu'naza atiramini'naze. ¹⁴Na'ankure zmagra hankrotamimofu avamutamimo'za, avame'zana erifore nehu'za, maka ama mopafi kini vahete vu'za ome zmazeri atru nehu'za, tusi'a hihamu hanave'ane Anumzamo'ma vahe'ma refko hania knarema, ha'ma hanagu zmazeri retro hu'naze. ¹⁵Antahio, Nagra kumzafa vahe eaza hu'na egahue, iza'o kukena'ama huno omase otino mni'nenimo'a, muse hugahie. Ana nehuno avufga avapara ovanigeno, vahe'mo'za agaze avufga onkegahaze. ¹⁶Ana nehu'za havi avamumoza kini vahe'zmine, ha' vahe'zminena Hibru kefina Amakedonie nehaza kumate zmazeri atru hu'naze.

¹⁷Anantera nampa 7ni ankeromo Anumzamofu rimpafezama me'nea zuompa zahopi eritagi atregeno, ra mono no agu'afi me'nea kini trateti magomofu agerumo ranke huno, havgare hu'ne. ¹⁸Anante kopsina e'nerino, agasasa nerigeno, monage nehigeno, tusi'a imi eri'neana, vahema fore'ma huneregatira, e'inahu imina e'ori'neankna tusi'a iminkrefa eri'ne. ¹⁹Babiloni rankumamo'a ruhantagino 3'afi fore higeno, mopafi ranra kumatamimo'za traka humase'naze. Babiloni kumamofu kefo avu'avazana, Anumzamo'a antahino keno hu'neankino rimpafe waini kapu tina amigeno ne'ne. ²⁰Ana higeno maka ti amunompi me'naza mopamo'za fnane hazageno, agonamoza tamiza agupo mopa se'naze. ²¹Hagi tusi'a komopa ko monafinti aru'neana, mago mago aragana'amo'a 50ti'a kilonaza hu'nea komopa komo, vahete evuramino zmahe haviza hige'za, ana vahe'mo'za Anumzamofona huhaviza hunte'naze. Na'ankure Anumzamofu rimpafe knazamofu komopa kokino, ana komopamo'a tusi havizantfa hu'neakino, vahera zmahe haviza hu'ne.

Mago a'mo'ma afi zgamofu agumpi mni'nea zamofu naneke

17 ¹Anantera 7ni'a zuompama 7ni'a ankeru vahe'mo'za azerinazafinti magomo eno nagrikura anage hu'ne, amare ege'na tusi monko a'mo rama'a tintamimofu agofetu mni'nea a'mo'ma erisia knazana kaveri haneno hu'ne. ²Ana a'ene maka mopafi kini vahe'mo'za, rama'a

monko zmu'zmaza nehazageno, mopafima mni'naza vahe'mo'za, ana a'mofo havi avu'avazamofo waini ti neza neginagi hu'naze. ³Anantetira ana ankeromo'a avamupi navreno vahe omni ka'ma mopafi vigena, nagra kogeno mago a'mo, koranke afi zgamofu agumpi mni'negeno, Anumzamofoma azanava kemahu agiramina ana afi zgamofu avufgare mevgaregeno, 7ni'a agenopa megeno ana agenopafina, 10ni'a pazivea me'ne. ⁴Ana a'mo'a fitunke'ene koranke kukena nehuno, kolire'ene mrrerisa havere'ene, perie (pearls) nehaza zanteti tro hu'naza avasasezana erinehankreno, azampina maka kasri avu'ava'amo'ene, monko avu'ava'amo avite'nea kolire kapu eri'ne. ⁵Ana a'mofo kokovitera mago oku'a agi'a anage huno krente'neana, **Babilonia tusi'a agatere kumare, monko a'nemokizmine, ama mopafi kasri avu'ava zantamimofu nezmarera'e** huno krentene. ⁶Hanki negogeno ana a'mo'a Anumzamofu nagamokizmi korane, Jisasi agi agenkema huamama nehza nagamokizmi korana ne'nezo neginagi nehigena, negena nagra tusiza hu'na antri hu'noe. ⁷Hagi ana ankeromo'a anage huno nasami'ne, nahigenka antria nehane? Ana a'ene, agofetu mni'no nevia afi zgagi, ana afi zgamofu 7ni'a agenopagi, 10ni'a pazive'ama me'neazamofo oku'a agu'agesa'a kasamigahue. ⁸Ana afi zga kenanana, korapa mni'neana, menina omni'neankino, kofa'a knafi riga omne kerifinti hnatinu, eama huteno haviza hugahie. Ama mopama tro'ma osu'negeno, mopafima mni'naza vahe'ma zmagima asimu eri avontafepima kreonte'nea vahe'mo'za, korapa mni'neana, menina omani'neankino, henkama eamama hanige'za kesnu'za antri hugahaze. ⁹Asenifima knare antahintahizama me'nenia vahe'mo'a antahi ama hino, 7ni'a agenopa, e'i ana a'moma agofetu mni'nea 7ni'a agonamo'za 7ni'a kini vahetamine. ¹⁰Ana 7ni'a kini vahepinti 5fu'amo'za evuramizageno, magomo menina mnigeno, magomo'a ome'neankino, esuno'a osi'a knafi kinia emanigahie. ¹¹Hanki afi zgama korapama mni'neama, menina omnineana, agra e'i nampa 8ti kinigino, 7ni'a kini vahepinti mago zmimokino, agra haviza hugahie. ¹²Hagi 10ni'a pazivema agenopafima kenanana, 10ni'a kini vahekiza kuma kegvahu hanavea e'orinazanagi, zamagra afi zgane magoke auafi kinia manigahaze. ¹³Ama ana kini vahe'mo'za magoke antahintahifine, mago zmarimpa hu'za hanave zmine hihamuzmia afi zgamofu amigahaze. ¹⁴Ana kini vahe'mo'za Sipisipi Anentamofo ha' hunte'naku hugahazanagi, Sipisipi Anentamo'a zmaheno zmagateregahie. Na'ankure Agra ramokizmi, Ra mnineno, kini'mokizmi Kini manine. Agrama zamigi huno huhampri zmantege'za mni fatgo hu'namo'za, Agranena mnigahaze.

¹⁵Hagi ankeromo'a anage huno nasamine, monko a'mo agofetu mni'negenka kenana tintamina, e'i zmagra mika nofi naga ene, zmageru ene, tusi'a vahe ene, kumatami huvame huno me'ne. ¹⁶Hagi 10ni'a pazive'ene afi zganema kenanana, zamagra monko a'mofona zmavesra

hunente'za kukena'a azeriza erivararo hanageno mago'zana avufarera omanetfahina, avufga avapa mni'nena avufga'a nene'za, tevefi kre fnane hugahaze. ¹⁷Na'ankure Anumzamo Agri avesiza eri knare hnazegu, ana kini vahera antahintahi zamige'za magoke antahintahire'ene, magoke zmagu zmagasare zamagrama kegva hu'naza kumatamina afi zgamofa amizageno, Anumzamofa kemofona avufga'a fore hu'ne. ¹⁸Hanki ana monko a'ma ke'nanana, e'i tusi'a kumamofa hu avame huno manineno, maka ama mopafi kini vahe'mokizmi kegva hunezmante hu'ne.

Babiloni kuma'mo haviza hu'nea naneke

18 ¹Anazama fore'ma hutegeni, mago monafinti tusi'a hanave eri'nea ankeromo'a eneramigena kogeno, msa'amo'a mopafina remsa hu'ne. ²Hanki agra hanavege huno, tusi'a Babiloni kumamo'a evuramie, evuramie! Ana a'mo'a havi hankromo'za mani kuma tro nehigeno, maka agru osu avamu tamimo'za kina hanaza kuma fore nehuno, maka agru osu nma zgamofa mni'naza kuma fore nehuno, agru osu afi zgamofa mni'naza kuma fore hu'ne. ³Na'ankure maka kumatamimpi vahe'mo'za monko avu'avazama'a, waini tima neaza hu'za kapu'afinti nene'za, negi ne'nazage'za mopafi kini vahe'mo'za ana a'ene monko avu'avaza nehazage'za, ama mopafi vahe'mo'za, ana a'mofa monko avu'avazama'areti tusi'a feno (bisinisi) vahera tro hu'za mani'naze. ⁴Ana hutegeni mago ageru monafinti arigena antahugenon, anage hu'ne, vahe'nimoka ana ara atrenka atineraminka, kumira ana a'enena nehunka agranena knazama'a e'orio. ⁵Na'ankure ana a'mofa kumimo'a, avitenon monafi m'rerigenon, Anumzamo'a ana a'mofa havi avu'avazama'amofona aghesa antahine. ⁶Ruga'amokizmima huzmante'nea kante antenka ana ara nona hunentenka, avu'avazama hu'nea kante antenka, mago'ene erinteguhenka nona'a hunentenka, ana a'moma waini kapu tima eri havia hu'nea kapufi mago'ane eriante aguhenka erihavia humio. ⁷Ana a'mo, agra'a agi erisaga nehuno, rama'a monko avu'avaza nehuno, ruga'a havi avu'avazana hu'ne. Anama hu'nea havi avu'avazama'amofa avamente atazana aminkeno, rama'a zavi ateno. Na'ankure agra'agura anage nehie, kuini manina, kuini trate mni'noankina, kento a' knara osuna, zavira otegahue hu'ne. ⁸E'ina hu'negu magoke zgefi, knazana enerino, kria enerino, zavira netena, tusi'a agate'za agritera fore nehina, agrira (Babilonia) tevemo'a te fanane hugahie. Na'ankure tusi'a hanave'ane Ra Anumzamo, agrira refko hu'neankino haviza hugahie.

⁹Ama mopafi kini vahe'mo'za, ana a'enema havi avu'avaza nehu'za, ana havi avu'avazampi agrane knare huta mni'none nehaza vahe'mo'zama, ana a'ma terasagesia teve tokimoma m'rerisige'za negenu'za, krafa hu'za zavira atentegahaze. ¹⁰Ana a'ma azeri haviza haniazanku kore huza afete otine'za anage hugahaze, tasunku hune tasunku hune, Babiloni hanave rankumakura na'ankure magoke knafi haviza hie.

¹¹Mopafi vahe'mo'za zgonu mizaseza zgore netraza nagamo'za (bisinisi) ana a'mo'ma havizama hiazanku zavite'naze. Na'ankure vahe'mo'za fenozazmi magoane miza osegahaze. ¹²Ana fenozana e'i koline, silvane, mrreri havene, periema nehaza zane, knare zaza tavravene, fitunke tavravene, silkare tavravene, koranke tavravene, maka sitroni nehaza mananentake zafareti tro hu'naza zantamine, elefanti afumofu ave'areti troma (ivori) hu'naza zantamine, mizama'amo mrrerinea zafareti tro hu'naza zantamine, bronsie nehazazane, aenine, mabolie nehaza havene, ¹³zarafune (sinamon), mananentake zane, neza eri hagahu aka nezane, tevefi krazageno knare mna neviazane, zmvufare nefraza mananentake masavene, knare manavu zafarine (frenkinsens), wainine, olivi masavene, flaua'ene, witine, kaontamine, sipisipiramine, hosi afuzgane, karisine, zmasimu eriza mni'naza kazokzo eriza vahera, izaza miza segahaze. ¹⁴Hu'za nehu'za ana vahe'mo'za amanage hugahaze, Babiloni kuma'moka knare'zama erifore'ma nehana zanku'ma kvenesiazane, mrrerisa nomnizama nemaninazamo'a kagripintira fanane hiankiza, vahe'mo'za ana knare'zanka'a onkegahaze. ¹⁵Ana a'mofontema zgore atre'za ra zgoma tro'ma huza feno vahe'ma nesaza vahe'mo'za, afete'are otiza manigahaze. Na'ankure ana a'moma atama eri'neazanku kore nehu'za zavira nete'za, ¹⁶anage hu'za, tasunku hune, tasunku hune, knare ran kuma, ana a'mo'a knare zaza efeke kukena nehuno, fitunke'ene koranke'ene, avasesezama kolireti'ene, mrrerisa havereti'ene, periema (pearls) nehaza zane, eri hankre'neane, ¹⁷na'ankure tusi'a fenomo'a mago auafi amnezankna hie! Ana higeno maka ventemofu azerino (kepten) nevia vahe'mo'zane, ventefi maniza nevaza vahe'mo'zane, ventefi eriza vahe'mo'zane, hagerimpi zantetima zgoma eri'za nomnizama retroma hu'za nemaniza vahe'mo'za, afete oti'za mni'neza, ¹⁸ana a'mofoma tegasagea teve tokima nege'za, zavira nete'za anage hu'za, ina rankumamo amanahu rankumakna hugahie? hu'za hu'naze. ¹⁹Hagi ana nehu'za kugusopa kate'za zamanunte netreza ranke hu'za, zavi krafa, nehu'za anage hu'naze, tasunku hune tasunku hune rankumamofonkura, maka feno vahe'mo'za ventema antene'za ana a'mofompintima feno vahema nemniza zamo'a magoke auafina ana maka fenomo haviza hie. ²⁰Monamokane, Anumzamofu nagamotane, aposol nagamotane, kasnampa nagamotanena muse hiho, na'ankure ana a'mo'ma tamagrima tami'nea knazantera Anumzamo'a refko huno mizama'a nona huno nemie. ²¹Anantera tusi hanavenentake ankeromo, witi refuzafu nepeankna ra have erino hagerimpi matevu netreno anage hu'ne, havema atreankna huno Babiloni rankumara azeri haviza hugahiankita, mago'ene onkegahu'ne ²²Ana kumara fanane hinkeno, zavenama ahe vahe'ene konkene ufene, zavenagna musikima nehaza (harp) vahe'mo'za mago'ane nehesagenka ontahigahane. Keonke'zama tro'mahu vahe'mo'za mago'ane

trora osanageno, witi akaruma hare'naza agerura ontahigahane. ²³Hagi ramumofa msa'a mo mago'ane remsa huogantesigeno, a'ma eri'kuma hania ne'ene, vema erikuma hana'a zanagasasankea ontahigahane. Na'ankure kagri vahe'moza zgonu mizaseza zgore netraza nagamo'za (bisinisi) maka mopafi vahe'mofo avurera ra vahe mani'nazangi, maka mopafi vahera kagra avuatga zanka'reti rezmataga hu'nane. ²⁴Hagi ana a'mofompina kasnampa vahe'ene, Anumzamofa naga'ene maka ama mopafima Anumzamofa amage nentazageno zmahe'nea vahe'mokizmi koramo me'nege'za ke'naze.

Muse zgame hu'naza naneke

19 ¹Anazama fore'ma hutege'na, nagra antahugeno, tusi'a vahe'mokizmi zmagerukna hu'za monafinti zmageru ru'za anage hu'naze, Ra agi amisune! Masazane hihamune hanavene tahokeno tagu'vazizana, tagri Anumzamofa su'zane. ²Na'ankure Anumzamofa refkoma hiazamo'a, tamage huno fatgo hu'ne, na'ankure tusi'a monko a'ma Anumzamofa refkoma huntenea a'mo'a, ama mopafi vahera havi monko avu'avazama'areti zmazeri haviza nehuno, Anumzamofa kazokzo eriza vahera zmaheno korana eritagi atrenegu, Anumzamofa nona ana ara huntene. ³Anante ete mago'ane anage hu'naze, Anumzamofa Ra agi amisune! Ana a'mofo krerasagea teve tokimo'a mreri vava nehie hu'za hu'naze. ⁴Anante 24'a ugagota kva vahe'mo'zane, 4'a kasefa hu'za mni'naza zgamo'za zmavugosaregati mopafi mase'za, kini tratema mni'nea Anumzamofa monora hunente'za, anage hu'naze, Tamage Anumzamofa ra agi amisune! hu'za hu'naze.

⁵Hagi mago agerumo kini trateti huno anage hu'ne, maka Agri kazokzo eri'za vahe'motane, Anumzamofonku'ma kore'ma hunentaza vahe'motane, tamagi omne vahe'motane, tamagi me'nea vahe'mota, Anumzamofa ra agi erihentesga hiho huno hu'ne. ⁶Anantera nentahugeno tusi'a vahe'mofo agerukna huno zmagerura neru'za, ranra timofo agasasa ke'nea nehu'za, tusi'a monage hiankna hu'za, anage hu'naze, Anumzamofa ra agi amisune! Na'ankure hanavenentake Ra Anumzantimo'a kini manino ke'nea hu'ne hu'naze.

Sipisipi anentamo arave haniazamofa naneke

⁷Tagra musenkase huta ra agi amisune, na'ankure sipisipi anentamoma aravema hania kna egeno, ana ne'mofontema maresia a'mo'a retro huno mni'ne. ⁸Ana a'mofona kukenama hanigu agru huno zaza efeke kukena ami'ne. E'i ana zaza kukena Anumzamofa nagamokizmi fatgo zmavu'zmavazane.

⁹Anantera ankeromo'a anage huno nasamine, Sipisipi anentamo'ma aravema hania nezantema agima hu'nemo'a muse hino hunka krento,

mago'ane anage huno nasamine, Ama'i tamage Anumzamofu naneke
¹⁰Anante nagrahana agiafi narena rena mono hunte'za huanagi, ana ankeromo'a anage huno nasamine, e'inahura osuo, kagrane negafuzane nehazaza hu'na nagra Anumzamofu eri'za vahe mni'neta, Jisasi'ma hu'nea ke'mofu huama nehuta, Anumzamofu monora huntegahune. Na'ankure Jisasi'ma hu'nea kemo vahe'mofona azeri otigeno, kasnampa kea huama nehaze.

Kraisi'ma efeke hosimofu agumpi esia zamofu naneke

¹¹Hagi monamo'a anagigena efeke hosi afu'mofu agumpi mago ne' mni'negenana ke'noe. Ana ne' mofonkura, hugahue hunoma hiaza nehimo'e huza nehu'za tamage nere hu'za nehazamo'e. Fatgo avu'avate refko huno hara nehie hu'ne. ¹²Avurgamo'a teve anefakna nehigeno, asenirera rama'a kini vahe'mofu fetori me'geno, Agrira mago agi avufarera krentene, mago vahe'mo'a ana agia ontahigahianki, Agrake antahine. ¹³Ana ne'mo'a korampi re'nea zaza kukena hu'ne. Agi'ama henazana, Anumzamofu Naneke hu'naze. ¹⁴Hanki monafi mni'naza sondia (ami) vahe'mo'za agru huno knarezantfa hu'nea efeke kukena hu'ne'za, amage ante'za efeke hosi afutamimofu agumpi vu'naze. ¹⁵Ana ne'mofu agipintira tarekaziga asane kazi atiramineakino, ana kazinuti maka kumapi vahera nezmaheno, aeni azompareti kini manino kegva hunezmante'na, hanavenentake Anumzamofu rimpape knazamo'a, agareti waini regatiti nehia'kna huno zmahegahie. ¹⁶Hanki zaza kukena'are'ene amotera anage huno krentene, ***Mika kini vahe'mofu Kini manino, maka ra vahe'mokizmi Ra manine huno krentene.***

¹⁷Anantera mago ankeromo'a zgefi otinegena kogeno, ranke huno anage hu'ne, maka monafima hareno vano nehia nma zgagura huno, Anumzamofu tusi'a nezantera etaru hutma, ¹⁸kini vahe'mofu zmauvufgane, ugota sondia vahe'mofu zmauvufgane, hanavenentake vahe'mofu zmauvufgane, hosi afumokizmi zmauvufgane, hosimofu zmagofetuma nemaniza vahe'mofone, maka vahemofone, amne vahe'mofone, kazokazo vahe'ene zmagi omne vahe'ene, zmagi me vahe'mofu zmauvufga negahaze huno zamasm'i'ne. ¹⁹Anantera afi zgane, mopafi kini vahe'mo'zane, sondia vahe'zmimozanana eri atru hute'za, hosi afumofu agumpi Mni'nemofone, sondia vahe'anana ha' huzmantenaku eri atru hu'naze. ²⁰Ana nehazageno ana afi zgane, havige kasnampa vahe'ene zanazerino kina reznante'ne. Ana kasnampa vahe'mo'a, afi zgamofu avure ruzahu ruzahu avame'za eri fore nehuno, ana afi zgamofu nampama eri'naza vahe'ene, afi zgamofu amema'are mono hunentaza vahe'ene rezmataga hu'ne. E'ima rezmataga hu'nea kasnampa vahe'ene ana afi zgane mani'nakeno havere tevava nehia teve tirupi znahre atrenigeke manigaha'e. ²¹Hanki ruga'amokizmia, hosi agumpi manino nea ne'mofu agipinti atiraminea tare kaziga

asanenea kazimo, zmahe vgaregeno maka nmaramimo'za zmvavufga nevg are'naze.

Sata'a 1 tauseni'a kafufi kina haniazamofu naneke

20 ¹Hanki monafinti mago ankeroma riga huonte kerimofo kine, ra seni nofi azante erineno eramigena kogeno, ²agaza hunte osifavema, korapa osifavea, havi hankro, Sata ema nehazankino, eme azerino 1 tauseni'a zge kafu kina hunte'ne. ³Ana ankeromo eme azerino riga huonte kerifi maka ama mopafi vahera vuno eno huno rezmatga osaniegu, matevunetreno avazarera refiteno renkanirentenesigeno, 1 tauseni'a zgekafua evutesigeno, atupa'a knafi anagi tresigeno maka moparega vuno eno hugahie.

⁴Hanki anantera kini tratami me'negenana kogeno, ana tratema maninaza vahera keagama refko hanaza hanave Anumzamoa zmi'ne. Anantera kogeno, Jisasinte'ma zamentintima nehu'za Anumzamofu kerema amagama nente'za, afi zgamofu amema'arema mono hunonte'za, kokovite'ene zmazantema nampama e'ori'naza vahe'mokizmia zmanakema akafrinaza vahe'mo'za, zmasimu eri'za Jisasi'ene 1 tauseni'a kafu zgefina kini vahe manigahaze. ⁵Ruga'a fri vahe'mo'za oraoti maninaga'za, 1 tauseni'a kafuzge vgarene. Fripintima omatinazana, e'i ese kna otigahaze. ⁶Ese knama fripinti otinamo'za ruotge hunazanki muse hiho, henka frizamofu hanavemo'a zmahe ofrigahie. Hianagi zmagra Kraisi'ne, Anumzamofu prisi vahe 1 tauseni'a zgekafu Kraisi'ene manigahaze.

Sata'a riga omne kerifinti atiraminia naneke

⁷Hagi 1 tauseni'a zgekafu evutenigeno'a, Satana kina hunenifintira anagitrenigeno, ⁸atiramino nevuno, zge hanati kazigane, zge ufre kazigane rugaraga soparegama ama mopafi mni'naza vahera rezmatga huno, Goku vahe'ene Megok vahe'ene ha'ma hanagura vahera zmazeri atru hugahaze. Ana vahe'mofo nampamo'a hagerinkenafi kasepankna hu'za atru hugahaze. ⁹Anantera ana vahemoza agupofi emareriza, Anumzamofu nagamo'zama nemanizageno avesima nentea rankumate vu'za ome regagigahaze. Hianagi monafinti tevemo'a eramino ana vahera te fnane hugahie. ¹⁰Hagi rezmatga hu'nea hankromofone, afi zgane, havige kasnampa ne'ma matevu zmatreniana salfa havere nerea teve tirupi mate vuzmatrena, zamagra anampina manine'za hanine zgena zmata erivava hugahaze.

Vgamare knazupa refkoma haniazamofu naneke

¹¹Anantera tusi'a efeke kini tra kogeno, ana tratema Mni'nemofu avu kore huke monane mopanemokea frakeno, mago kumara omnetfa

hu'ne. ¹²Anantera fri'naza vahe zmagogeno, zmagi me'nea vahe'ene, zmagi omne'nea vahe'mo'za, keaga refkohu trate otinageno, avontafe tamina eri vakarentene, magora asimu eri avontafekei, fri'naza vahe'mo'za zamagrama hu'naza z mavuzmavama krente'nea avontafe tamimpinti refko hunezmantegena ke'noe. ¹³Hagi hagerimpima fri'naza vahera, hagerimo'a avreno eme amigeno, fri'zamo'ene, (Hedes) fri vahe kumamo'enena, fri'naza vahera z mavre'za eme aminkeno, Anumzamo'a mago mago'mo'ma hu'nea avu'avate anteno refko huzmantene. ¹⁴Anantera fri'zane, fri vahe kuma'enena matevuno teve tirupi znatregeke uramina'e. E'i ana teve tirura nampa 2 fri'zane. ¹⁵Hanki izano agima asimu eri avontafepima kre ontensesimofona, mate vuno teve tirupi atregahie.

Kahefa monane mopane fore haniazamofa naneke

21 ¹Anantera kasefa monane, kasefa mopane ke'noe, na'ankure ese monane, ese mopamo'a fnane higeno, mago'enena hagerina omne'ne. ²Anantera kogeno Ruotge hu'nea rankumara e'i kasefa Jerusalemo, Anumzamofontegati mona atreno eramino, a'mo'ma vema erinaku'ma retro'ma huno eaza huno e'ne. ³Anantera antahugenokini tratetira, ranke huno anage hu'ne, keho, Anumzamofa mono nomo'a vahe'ene nemaniankiza, Agra zamagrane nemanisigeno, Agri vea zmagra nemanisageno, Anumzamo Agra'a zamagri amu'nompina manigahie. ⁴Ana nehuno maka z mavunura eri homu huzmante vgaresigeno, mago'ene fri'zana omnenkeno, zmasunku huza zavima atezana omnena, zmatama krizana omnenigeno, ese'ma me'nea zantamina omnegahie. ⁵Ana higeno kini tratema mni'nemo'a anage hu'ne, Nagra maka'zana eri kasefa hu'na tro nehue. Nehuno anage mago'ane hu'ne, na'ankure ama kemo'a fatgo huno tamage hu'neanki, fore hugahianki avontafepi krento. ⁶Anantera anage huno nasamine, maka zamo'a havgare, Nagrani'a (Alfa) ese agafahu mni'na, (Omega) vgarera mni'noe, ese agafahu ene vgare'enena mni'noankina, iza'o tinku'ma avesinimofona, mizama'a omne asimu eri tima nehanatifintira Nagra ami'nugenokinegahie. ⁷Iza'o ha'ma agateresimo'a ama anazantamina erisanti haresigena Nagra agri Anumza mni'nena, agra Nagri mofavre manigahie. ⁸Hagi koro vahe'ene, zamentinti nosnaza vahe'ene, hi'manage z mavuzmavama nehaza vahe'ene, vahe zamahe nefriza vahe'ene, monko avu'avazamoma antahintahifima nentahiza, monkozama nehaza vahe'ene, avuatga ha' nehaza vahe'ene, havi anumzante mono hunentaza vahe'ene krunage nehaza vahe'mo'za, mizama erisazana, havere tevava nehia teve tirupi manigahaze. E'i nampa 2 fri'zane.

Kasefa Jerusale kumamofa naneke

⁹Anantera 7ni'a ankeropinti magomo Anumzamofa tusi'a rimpafe vgare knazana 7ni'a zuompafi avite'nea erineno anage huno nasamine,

ege'na Sipisipi anentama erisia ara kaveri haneno huno hu'ne.

¹⁰Ruotge Avamumo nagrite hanavetino egeno, ankeri vahe'mo navreno tusi'a agonafi ome nante'ne. Jerusalea ruotge hu'nea mona kumamo Anumzamofontegati atreno erami'ne. ¹¹Anumzamofu tusi'a msamo ana kumara remsa higeno. konariri'amo'a, zgo'amo mrrerisa havegna higeno, klasifi kenkro huno negea Jaspae havegna hu'ne.

¹²Ana kumamofona tusi'a zaza kegina megeno, 12fu'a kafa megeno, ana kafantamintera magoke magoke ankeri vahe'mo'za otitere hu'nazageno, 12fu'a Israeli naga'nofimofu zmagi'a ana kafantamintera krente'naze. ¹³Ana kumamofona 3'a kafa, zge hanati kaziga megeno, zge fre kaziga 3'a kafa megeno, ruga raga asoparega 3'a kafa metere hu'ne. ¹⁴Ana rankumamofu keginama hu'neana, 12fu'a havenu trara anteteno, ana haveramimofu agofetu regrino kegina hu'ne. Ana 12fu'a haveramintera, Sipisipi anentamofu 12fu'a aposol nagamokizmi zmagi metere hu'ne. ¹⁵Ana ankeromoma naganema keagama himo'a, kolire tro hunte'naza azota anteno ke'za (mesarim) erineno, ana rankuma ene, kafantamine ana keginane anteno kenaku eri'ne. ¹⁶Ana rankumama troma hu'neana, ana miko asopa'amo'a magozahu higeno, zaza'amo ene atupa'amo'a magozahu huno ra higeno, ana rankumara kolirema troma hu'nea azotareti anteno (mesarim) huno kegeno, zaza'amo'a 2, 200 kilo mita higeno, mrreri'amofo zaza'ane upa'ane, asopa'amo'a magozahu hu'ne. ¹⁷Ana nehuno rankumamofu keginama anteno (mesarim) huno kegeno'a, tapa'amo'a 144 kiubits (66 mitagna) higeno, anama erineno anteno ke'nea azota vahe'mo'zama anteza negaza (mesarim) azotareti, ana ankeromo'a anteno ke'ne. ¹⁸Ana keginama huneana, Jaspae nehia havereti tro nehuno, ana rankumara koliretike trora hu'negeno, kenkro hunoma negea klasigna hu'ne. ¹⁹Ana rankumamofu kegina tra'ama avasesema hunteneana, mrrerisa haveraminteti tro hu'ne. Nampa 1nia jaspae nehia havereti tra'a tro nehuno, nampa 2a safie nehia havereti tro nehuno, nampa 3a agetie nehie havereti tro nehuno, nampa 4a emelelie nehia havereti tro nehuno, ²⁰nampa 5fu'a sadoniksie nehia havereti tro nehuno, nampa 6si'a saldiusie nehaza havereti tro nehuno, nampa 7nia krisolaetie nehaza havereti tro nehuno, nampa 8tia berlelie nehaza havereti tro nehuno, nampa 9nia topasie nehaza havereti tro nehuno, nampa 10nia krisoprasie nehaza havereti tro nehuno, nampa 11nia jasintie nehaza havereti tro nehuno, nampa 12fu'a ametistie nehaza havereti tro hu'ne. ²¹Hanki 12fu'a kafana perie nehaza zanteti mago mago kafana hagentetere hu'naze. Ana rankumamofu kana koliretike tro hunteteno, msa huno kenkro hu klasigna hu'ne. ²²Ana rankumapina mago ra mono nona nagra onketfa hu'noe. Na'ankure Hanavenentake Ra Anumzamo'ene, Sipisipi anentamo'ene znagrake ana rankumofu mono nona mni'na'e. ²³Hanki ana rankumamofona zgemo ene ikamo'enena

remsa huontene. Na'ankure Anumzamofu msamo remsa nehigeno, Sipisipi anentamo'a ana kumamofu lamu tavikna huno remsa hu'ne. ²⁴Maka kumate vahe'mo'za ana msare vano nehanageno, mopafi kini vahe'mo'za, ra zamagima e'neriza fenoza zmia eri'za ana kumapi ufregahaze. ²⁵Ana kumapina hanina onkina msa zamoke mevava hina, kafantamina erigiza anagintesageno mevava hugahie. ²⁶Ana hanageno maka kumapi vahe'mo'za, ra zmagima nezamiza zane feno zazmia eriza ana kumapina ufregahaze. ²⁷Hagi pehena zane, havi anumzante mono hunente'za, havigema nehaza vahe'mo'za, ana kumapina uofretfa hugahaze. Hianagi Sipisipi anentamofu asimu eri avontafe'afima, zmagima me'nenimo'zage ana kumapina ufregahaze.

Asimu eri tine, asimu eri zafamofu naneke

22 ¹Anantera ankeromo'a mago ra tina avu sese huno klasigna hu'nea asimu eri tina naveri higena kogeno, Anumzamofone Sipisipi anentamofu kini trapinti hanatino ne-eno, ²ana rankumamofu amunompi nevigeno, ana timofu ruga raga ankenarega asimu eri zafa me'neni, mago'mago ikantera rga rentetere nehie. E'i 12fu'a zupa rga renente. Ana zafamofu asinamo'a, mika kumate vahera zmazeri knamaregahie. ³Ana kumapina magore huno zmazeri havizama hu'zana omnena, Anumzamofone, Sipisipi anentamofu kini tramoke'za me'nena, kazokzo eri'za vahe'amo'za monora huntegahaze. (Jen-Agf 3:14-19) ⁴Ana vahe'moza Agri avugosa negenageno, Agri agimo'a kokovi zmire megahie. ⁵Hanki ana kumapina hanima hu'zana omnetfa hanigeno, lamumofu msane, zgemofo masagura ontahitfa hugahaze. Na'ankure Ra Anumzamofu Agra'a tvi msa'a, ana kumamofu manino remsa huzmantenige'za, zamagra kva vahe mni'vava hugahaze.

Jisasi'ma esiazamofu naneke

⁶Hanki anante ana ankeromo anage huno nasmi'ne, ama nanekemo'a tamage hu'neankino maka vahe'mo'za zmentinti hugahaze. Kasnampa vahe'mokizmi avamuzmimofu, Ra Anumzamofu ankeroma'a huntegeni, Agri kazokazo eri'za vahera maka'zama ame huno efore'ma haniaza eme zmaveri hu'ne. ⁷Hanki antahiho, Nagra ko egahue, iza'o ama avontafepi me'nea kasnampa kema antahino amage antesimo'a, muse hugahie.

⁸Nagra Joni'na ana maka'zana nentahina avanagnaza kenomona, ana zama negena nentahi'nama hute'na, naverima hia ankeromofu agafi, narena rena mono hunte'naku hu'noe. ⁹Hianagi ana ankeromo anage huno nasamine, e'inahura osuo, Nagrane kagranena magozahu huta Anumzamofu eriza vahe manineno'e. Kasnampa negafu'zane, ama avontafepima me'nea nanekema nentahiza amage'ma nentaza vahe'enenana eri'za vaheke mni'none. Hanki Anumzamofonke monora huntu huno hu'ne.

¹⁰Hanki anantera anage huno nasami'ne, ama avontafepi me'nea kasnampa nanekea refiraoto, na'ankure knamo'a hago kofta nehie. ¹¹Hagi iza'o havi avu'avazama nehimofona atregeno havi avu'avazana huno vino, iza'o pehena avu'avazama nehanimofona, atregeno pehena avu'avaza huno vino, iza'o fatgo avu'avazama nehanimofona, atregeno fatgo avu'avaza huno vino, iza'o ruotgema hunenimo'a, atregeno mni ruotge huno vino.

¹²Higeno Jisasi'a anage hu'ne, Antahiho, Nagra ame hu'na mizana eri'nena egahuanakina, maka vahe'mo'zama nehanaza z mavuzmavate mizana eme zamigahue. ¹³Nagra'a esera manina (Alfa) vgare mni'noe. (Omega), Nagrani'a agafahu mni'na, vgarera mni'noe hu'ne.

¹⁴Kukenazmima sesema hanamo'za muse hiho, anama hanageno'a hu izo huzmantenke'za, asimu eri zafa rga nene'za Anumzamofu rankumamofu kafantetira ufregahaze. ¹⁵Hagi avuatga ha' nehza vahe'mo'zane monko'za nehaza vahe'mo'zane vahe zmahe nefriza vahe'mo'zane, havi anumzante mono hunentaza vahe'mo'zane, krunage huzanku z mavesesiza, krunage nehaza vahe'mo'zane, kragna vahe'mo'za ana kumapi ovu'za fegi'a manigahaze.

¹⁶Nagra'a Jisasina ama anazana ankeroniamo, huama huno mono kevumota tamasamihogu hunte'noe. Nagra'a Deviti naga nofimofu agafa mni'na, Nagrani'a nanterama remsama nehia ofuna mni'noe.

¹⁷Hagi Avamu'ene, Sipisipi anentate'ma vema erinakuma nehimo'a eno nehaku, ama nanekema nentahisimo'enena, eno hina, tinkuma avenesinimo'a eno hina, mizama'a omne asimu eri tinkuma avenesinimo'a, amane emerino.

¹⁸Ama avontafepi me'nea kasnampa naneke nentahiza vaheku nagra huama nehue, iza'o mago'a omnenenia kasnampa kema avrentesimofona, ama avontafepima knazanku'ma krente'nea ke'mo'a, agrite efore hugahie. ¹⁹Hagi mago vahe'mo'ma ama kema avontafepi me'nea eri atresimofona, Anumzamo'ma asimuma eri zafa rgaguma negahie huno hu'neana oneno, Ruotge hu'nea rankumaku'ma ama avontafepi krente'nea kumapina uofregahie.

²⁰Amama ana naneke huamama nehimo'a huno, Izo Nagra ko ame hu'na egahue. Tamage. Ramoka Jisasiga eno.

²¹Ranti Jisasi asunkuzamo'a makamotma tamagrane mesie. Tamage.